


Compromisu xi majo xi casahmi nina cojo xuta (El
Nuevo Testamento en el mazateco de Chiquihuitlán
de Juárez ... y en español)



New Testament in Mazatec, Chiquihuitlán (MX:maq:Mazatec,
Chiquihuitlán)

**Compromisu xi majo xi casahmi nina cojo xuta (El
Nuevo Testamento en el mazateco de Chiquihuitlán
de Juárez ... y en español)
New Testament in Mazatec, Chiquihuitlán (MX:maq:Mazatec,
Chiquihuitlán)**

copyright © 1991 Wycliffe Bible Translators, Inc.

Language: Mazatec, Chiquihuitlán

Translation by: Wycliffe Bible Translators, Inc.

Mazateco, Chiquihuitlán [maq], Mexico

Copyright Information

© 1991, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Chiquihuitlán

© 1991, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
3ee7eab4-2659-54e8-8e90-b0a016392daf

Contents

San Mateo	1
San Marcos	65
San Lucas	107
San Juan	183
Hacutjin Casahmi Apóstol	238
Romanos	303
1 Corintios	331
2 Corintios	356
Gálatas	373
Efesios	382
Filipenses	391
Colosenses	398
1 Tesalonicenses	405
2 Tesalonicenses	410
1 Timoteo	413
2 Timoteo	421
Tito	426
Filemón	430
Hebreos	432
Santiago	453
1 Pedru	460
2 Pedru	468
1 Juan	473
2 Juan	480
3 Juan	481
San Judas	483
Apocalipsis	485

Cjuandajyihi xi catsihindu San Mateo Tsëhë Jesucristu

Xutachanga rë Jesucristu

¹ Xujun vihi ne, setaha xujun ñihi rë xutachanga rë Jesucristu, me xi tjë rë David, hacuaha tjë rë Abraham.

² Abraham ne, me vëhë xi xutachanga xi má nahmi rë Isaac. Isaac ne, me vëhë xi xutachanga xi má nahmi rë Jacob. Jacob ne, me vëhë xi xutachanga xi má nahmi rë Judá cojo hntsë cha. ³ Judá ne, nahmi má me tsëhë Fares cojo Zara; naa rë me ne, Tamar hmí rë. Fares ne, me vëhë xi xutachanga xi má nahmi rë Esrom. Esrom ne, me vëhë xi xutachanga xi má nahmi rë Aram. ⁴ Aram ne, me vëhë xi xutachanga xi má nahmi rë Aminadab me xi xutachanga xi má nahmi rë Naasón, me vëhë xi xutachanga xi má nahmi rë Salmón. ⁵ Salmón ne, nahmi rë Booz me; hane Rahab ne, naa rë me. Booz ne, nahmi má me tsëhë Obed. Naa rë me vë; má Rut. Obed ne, me vëhë xi xutachanga xi má nahmi rë Isaí. ⁶ Isaí ne, me vëhë xi xutachanga xi má nahmi rë David. David jan ne, me vëhë xi cavitexa nangui rë Israel. Hane David ne, me vëhë xi xutachanga xi má nahmi rë Salomón. Naa rë Salomón ne, titjun chjuun rë Urías camá me.

⁷ Salomón ne, me vëhë xi xutachanga xi má nahmi rë Roboam. Roboam ne, me vëhë xi xutachanga xi má nahmi rë Abías. Abías ne, me vëhë xi xutachanga xi má nahmi rë Asa. ⁸ Asa ne, me vëhë xi xutachanga xi má nahmi rë Josafat. Josafat ne, me vëhë xi xutachanga xi má nahmi rë Joram. Hane Joram ne, me vëhë xi xutachanga xi má nahmi rë Uzías. ⁹ Uzías ne, me vëhë xi xutachanga xi má nahmi rë Jotam. Jotam ne, me vëhë xi xutachanga xi má nahmi rë Acaz. Acaz ne, me vëhë xi xutachanga xi má nahmi rë Ezequías. ¹⁰ Ezequías ne, me vëhë xi xutachanga xi má nahmi rë Manasés. Manasés ne, me vëhë xi xutachanga xi má nahmi rë Amón. Amón ne, me vëhë xi xutachanga xi má nahmi rë Josias. ¹¹ Josias ne, me vëhë xi xutachanga xi má nahmi rë Jeconías cojo hntsë cha. Nixtin hya ne, xutaxín ne, cafachaxin me xuta nangui rë Israel, quijicojo me xuta jan nangui Babilonia.

¹² Hane xi cama quiji me Babilonia, Jeconías vë ne, camá me vëhë xutachanga xi má nahmi rë Salatiel. Salatiel ne, me vëhë xi xutachanga xi má nahmi rë Zorobabel. ¹³ Zorobabel ne, me vëhë xi xutachanga xi má nahmi rë Abiud. Abiud ne, me vëhë xi xutachanga xi má nahmi rë Eliaquim. Eliaquim ne, me vëhë xi xutachanga xi má nahmi rë Azor. ¹⁴ Azor ne, me vëhë xi xutachanga xi má nahmi rë Sadoc. Sadoc ne, me vëhë xi xutachanga xi má nahmi rë Aquim. Aquim ne, me vëhë xi xutachanga xi má nahmi rë Eliud. ¹⁵ Eliud ne, me vëhë xi xutachanga xi má nahmi rë Eleazar. Eleazar ne, me vëhë xi xutachanga xi má nahmi rë Matán. Matán ne, me vëhë xi xutachanga xi má nahmi rë Jacob. ¹⁶ Jacob ne, má me nahmi rë José, xihin rë María naa rë Jesús me xi hacuaha yaha ñihi rë Mesías.

¹⁷ Cuatjin camá xi cavatju teñuju ndiya xi cavatju xi cjín xuta tisetin me nixtin rë Abraham hisca nixtin rë David. Hacuaha cama teñuju ndiya xi cjín xuta tisetin me nixtin rë David hisca hya xi xutaxín jan ne, cafachaxin me xuta nangui rë Israel, quijicojo me xuta nangui Babilonia. Hane hacuaha camá teñuju ndiya tsëhë nixtin hya hisca nixtin xi catsin Mesías.

Hya xi catsin Jesucristu

¹⁸ Cuitjin camá nixtin xi catsin Jesucristu: María, naa rë Jesús ne, tacun vasen cjuavixan rë na cojo José. Peru chaja sa xi cjuaha xicjin na cojo me ne, casacu rë na quihndi ngatsë rë Hasen rë Nina. ¹⁹ José, me xi cuixan cojo na jan ne, tyjahi me cojo cjuatacun rë me xcun Nina. Hane xi mijí scandi me cjuasava rë na, catsingatahacacun me xi taha hma ni ne tsismicacun me na. ²⁰ Cuatjin catsingatahacacun me xi sahmi me peru hora hya ne, cafehetsejen ngu ángel rë Nina ngajñi chini rë me, hane cuitjin cachja ángel:

—José, ngaye quihndi tjë rë David, ximacjintacuin xi chjehentse María cuma chjuun riji na ta, sacuaaha quihndi xi yaha na ne, ngatsë rë Hasen rë Nina, camá xi casacu rë na. ²¹ Tsin rë na ngu quihndi xihin. Quihndi vë ne, tehe ñihi rë Jesús. Cuatjin cjuaha ñihi ta, tséhë xi cuaxëtje rë xuta rë tséhë jyë rë me.

²² Yëjë xcusun vihi ne cuatjin cama, cojo sa xi cuetjucaa jain cjua xi cachja profeta nixtin hatsëë cuitjin:

²³ Ngayujun ni nutsujun ta ngu chjuun xungun ne, sacu rë na ngu quihndi xihin.

Quihndi jan ne, suañihi me Emanuel.

Emanuel ne, vëhë cjua xi vijne: Nina ne, jiya me ngajñi naja.

²⁴ Ngajan xi hya xi cavasca rë José ne, casahmi me tutjin cachja ángel cojo me. Cafahatsja me María ne xi camá chjuun rë me na. ²⁵ Peru hisca xi cavatju catsin quihndi ne, sehe caviyuju cojo xicjin me. Hane casuañihi rë me quihndi jan, Jesús.

2

Ngu jo cha xi vechu cjuatacun rë ne, cavëë cha niñú tséhë Jesucristu

¹ Nixtin xi catsin Jesús nangui Belén, distritu Judea, nixtin hya ne, Herodes vitexa me xuta nangui vë. Hacuaha nixtin hya ne, ngu jo cha xi vechutaha cjuatacun rë ne, cavetjun cha ladu vetjucaa tsuhi cafehe cha nandya Jerusalén. ² Hane cuitjin cachja cha:

—¿Jani sacu niji quihndi xi cuitexa nangui Israel? ta cahyin xi cavetjucaa niñú rë me ngajan ladu vetjucaa tsuhi. Hane nduvintjenguin me xi chjihinrcuin me.

³ Hya xi cama ne, jemu cama xti rë Herodes xi tu cahndë me cjua jan; cojo xuta nangui Jerusalén ne, cama xti rë me. ⁴ Hya xi cama ne, Herodes ne, cajindayavaha me yëjë ni nahmi xi matitjun cojo yëjë cha vicuya cjuachacun rë xuta nangui Israel. Sehe cavinenguise me ¿jani xi tsin xu me xi má Cristu? ⁵ Hane cuitjin cafayangui me:

—Ngajan nandya Belén, distritu Judea tsin ta cuatjin catsihindu profeta tséhë nandya jan xi ngajan tsin quihndi:

⁶ Ngaye, nandya Belén, ngaye nandya tséhë xuta tjë rë Judá,

hacuaha vengui chji ri xcun xuta matitjun nangui Judá.

Ta ngajñi rë xuta riji ne cuetjutsejen ngu me xi cuitexa rë xuta naha, xuta nangui Israel.

⁷ Hya xi camá ne, Herodes ne, cajindayahma me cha xi vechu cjuatacun rë jan. Cafahataha rë me cha. ¿Mé hora cjuaquixi tséhë mé nixtin camatsejen niñú jan? ⁸ Ngaxtun vëhë ne, sehe cavitexa me cha xi cjue cha Belén. Hacuaha cuitjin cachja me cojo cha:

—Tangun ngajan Belén. Chjinengunsundujun yëjë tsëhë quihndi. Hane xi sacu nuju cjuaquixi ne, ningatjun ná cju sehe cojo ngahan ne hacuaha cjuë cjuahárcun quihndi.

⁹ Xi cavihndë cha xi cuicun vi cju jan, cavetju cha quiji cha. Hane niñú xi cavetjucaa ngajan ladu vetjucaa tsuhi jan ne, hacuaha quiji titjun hisca xi cavechu cahndë hiscan xi jiña quihndi, hane ngajan cavasén. ¹⁰ Hane xi cavëë cha niñú xi ngajan cavasen ne, jercu tu ndama camaha ni rë cha. ¹¹ Hane xi cavisehen cha ndihya hiscan siu me ne, cavëë cha quihndi jan. Hacuaha cavëë cha naa rë me, xi hmí rë María. Sehe quiji cavixcuhnchi cha cafaharcun cha quihndi jan. Hane sehe cavuxaha cha hiscan hincha rë cha cuatjo, hane casua cha oro cojo tyjungunsa cojo tyjungunjne xi hmí rë mira. ¹² Hya xi cavatju vëhë ne, tsëhë xi cachja chini cojo rë cha xi cuyaaín cha taha ladu hiscan tacun Herodes ne, tahaxin cavuya cha nangui rë cha.

Quiji me hiscan nangui Egipto

¹³ Hya xi quiji cha xi vechu cjuatacun rë jan ne, cafehetsejen ngu ángel rë Nina ngajñi chini rë José, hane cachja cuitjin:

—Tisatjinhngue, tihincueje quihndi cojo naa rë. Tiyun hiscan nangui Egipto. Hane ngajan cuinechun hisca xi tsingátju cju xi cuyun. Cuatjin nihñu ta tsëhë xi Herodes ne, cuanguise me quihndi xi tsiquehen me.

¹⁴ Hane cavisatjenhnga me nixten quijicojo me quihndi jan cojo naa rë, cafe me Egipto. ¹⁵ Hane xi cafehe me ngajan Egipto ne, ngajan caviyujutaha me hisca nixtin xi cahme Herodes. Cuatjin cama sehe hatuxa camachihin cju xi catsingatju Nina cojo profeta rë me hatsëë nixtin. Cuitjin chja cju jan: “Cajindáya rë quihndi naha xi nduvaniji tsëhë nangui Egipto.”

¹⁶ Hya xi camachaya rë Herodes xi camá cavindacha cha xi vechu cjuatacun rë jan ne, jercu cama cjan rë me. Hane cavitexa me yo xi tsiquehen rë yëjë ni quihndi xihin xi cjëë cjuë jyan nu, yëjë ni quihndi nandya Belén cojo distritu rë. ¹⁷ Vëhë cju xi cachja Nina xi catsihindu profeta Jeremías:

¹⁸ Vinuhya rë cjuava ngajan nandya Ramá.
Jemu tjin cjuandusin.

Na Raquel ne, jihndava na ngatsë rë quihndi rë na.

Hane tsajin cjuetacun xi cuma rë na ta tsëhë xi ha cafë quihndi.

¹⁹ Hane xi cavatju cahme Herodes ne, cavuya cafehetsejen nga ángel rë Nina ngajñi chini rë José ngajan Egipto ne, ²⁰ cuitjin cachja:

—Tisatjinhngue tihincueje quihndi cojo naa rë. Tihinniji nandya Israel. Tihin ta tsëhë xi ha cahme cha xi meje tsiquehen rë quihndi. Cuatjin cachja.

²¹ Hya xi camá ne, cavisatjenhnga José ne, sehe cavetju me quijicojo me quihndi cojo naa rë, hane sehe cavisehen nga me nangui Israel. ²² Peru xi cahndë José xi Archelaus vitexa me distritu Judea ta me vëhë vitexa me ngojo rë nahmi rë me, Herodes, vëhë xi camacjincacun José mijí cjue me ngajan. Hane xi cachja chini cojo rë me ne, sehe cavisehen me distritu Galilea. ²³ Caviyujutaha me ngajan ngu nandya xi hmí rë Nasaret. Cuatjin cama sehe cuetjucaa cju xi catsihindu profeta tsëhë me xi xuta ne, cuichja me xi Jesús ne, xuta Nasaret me.

3

Cachja Juan Vitenda rë Xuta ngajan ngu xín tsëhë nandya

¹ Nixtin hya ne, cavetjucaa tsejen Juan Vitenda rë Xuta ngajan nguijña tsëhë distritu Judea. ² Cuitjin catsiquihndë me xuta:

—Nindegun cjuatacun nuju ta, camatiña nixtin xi Nina ne, cuitexa me ngasunhndë.

³ Cuatjin tsëhë cha Juan vihi, cha vihi xi camahindu tsëhë cha xcun xujun xi chja cjua rë profeta Isaías xi chja cuitjin:

Cuitjin jercu hñu tsiquihndë ngu xuta ngajan hiscan jemu xín tsëhë nandya: “Tuhun chjinu ndiya xi cuinduva Nina;

hacuaña ninguixun cjuatacun nuju tsëhë me.” Cuatjin cachja me.

⁴ Tsjian rë Juan jan ne, tsja rë chu camellu camá hacuaña cojo ngu cinturón chuxin tsihñu me cahntsua me. Hane xi jinë me ne, chu nchahva cojo tsjen rë chu tusen. ⁵ Hane jemu cjin xuta quijitjengui me Juan, xuta nandya Jerusalén, xuta distritu Judea cojo xuta xi siutahandee rë ndajyë Jordán.

⁶ Xuta jan, xi cavijacun me jyë rë me cojo Nina camá cavitenda Juan me ngajan ndajyë Jordán.

⁷ Peru xi cavutsejen Juan xi cjin xuta tifehe tixtenda me; cha tsëhë partidu fariseo cojo cha tsëhë partidu saduceo ne cachja me cojo cha cuitjin:

—¡Ngayujun ni ngayun quihndi rë chu tsehen matsejen ne!, ¿yo cavin-changui nuju xi nihñu ngahñu xi cjuetjuntjun tsëhë castigu xi hatuxa tsing-atju Nina? ⁸ Sá xi meje jain cjuetjuntjun matsejen ne, nihñu súv cjuandaja sacuatjin sahmi xuta xi catsindeya jain me cjuatacun rë me. ⁹ Xicanujuun cahntsua xahasen nuju cjua vihi: “Ngayaan ne, tsjin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca cojo ndyojo xi cuicun vi ne, cuma sahmi me xi cumá tjë rë Abraham. ¹⁰ Chutsujun ta ngayun matsejen ne, tangun ngayun cojo yatjë xi ha quitahachjine quicharcu tyjama rë xi cuetsihin xti rë. Yëjë ni yatjë xi suaain tu xi ndaja matsejen ne, xti rë, sehe cueti. ¹¹ Ngahan matsejen ne, cojo nandá ni tiviténda nuju, peru sehe cuinduva me xi hitsë sa jyë ngahñu tjín rë cjuatacun rë xi cuma ná ngahan, me xi hitsë sa jyë hnga cojo cjuatacun rë xi cuma ná ngahan. Hane me vëhë cueya me Hasen rë Nina cahntsua xahasen nuju, hacuaña tangun me sacuaña ngu ndihi xi tsityjahi rë cjuatacun nuju. ¹² Me vëhë matsejen ne, sacuaña xi ha yahatsja me quicha xi tsicaha rë xtë rë trigu cojo sa xi cuma tyjahi ndaja trigu xi casechun rë tsëhë me, hacuaña cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ndihi xi tsjin nixtin coho. —Cuatjin cachja Juan.

Caxtenda Jesús

¹³ Nixtin hya ne, hacuaña cavetju Jesús tsëhë distritu Galilea hane cafehe me ndajyë Jordán xi xtenda me. ¹⁴ Peru mijí sua Juan cahndë ta cachja me:

—Hitsë sa ndaja xi ngayun cuitendun ná. Hacuín xi ngahan cuitenda nuju.

¹⁵ Ngajan xi cafayangui Jesús cuitjin:

—Jéya, cuatjin ndatjin xi cuma quihndë ta mameje rë xi cumachihin yëjë xcusun xi cavitexa Nina.

Hane catsingatihin Juan ne, cavitenda me Jesús. ¹⁶ Xi cama caxtenda Jesús ne, xi tu tivetju me tsëhë nandá jan ne, ngajan cavëë me xi ngahnga ne, catuxaha. Hane Hasen rë Nina ne, canduvajnetsejen casesun rcu me. Hane sacuaajyihí xcusun rë ngu paloma jyihí. ¹⁷ Hacuaña canuhya rë ngu cjua ngajan ngahnga xi cachja cuitjin:

—Cha vihi xi quihndi naha xi hmú cáacun. Jemu ndama ná ngatsë rë cha.

4

Cafahachuva Satanás Jesús xi choho sahmi me

¹ Hya xi camá ne, Hasen rë Nina ne, quijini xi cojo Jesús ngajan ngu xín tsêhê nandya ta ngajan cjuahachuva xitsehen me.

² Hya xi cama ne, Jesús ne, yachan nixtin cojo yachan nixten cajinii me niñu. Hya xi cavatju vêhê ne, jercu camavojo rë me. ³ Sehe camatiñataha xu xitsehen xi cjuahachuva rë me. Cachja cojo rë me cuitjin:

—Sá xi ngaye jain xi Quihndi rë Nina ngaye ne, tinoje cojo ndyojo vihi ne, catama niñu. —Cuatjin xu cachja xitsehen cojo rë me.

⁴ Peru cuitjin cafayangui me tsêhê xitsehen jan:

—Xcun xujun rë Nina ne, cuitjin camahindu: “Hacuiin suvá ngatsë rë niñu xi siu xuta cjuahñu ta hacuaha mameje rë me tsêhê yêjê ni cjuá xi catsingatju Nina.”

⁵ Sehe xitsehen jan quijicojo xu rë me nandya Jerusalén, nandya ximinchacun, quijisun xu me rcu cjin yungun xi matitjun ⁶ sehe ngajan xi cachja xu xitsehen:

—Sá xi ngaye jain xi Quihndi rë Nina ngaye ne, ningatjin yojo riji tsêhê ndyá ne hisca nangui. Ndaja hye ta tsajin mé cuma ri ta xcun xujun rë Nina ne, cuitjin chja:

Nina ne cuitexa me ángel rë me xi sahmi ri cuidadu.

Cjuahántsa ri,

cojo sa xi ntsacui ne, sacuinhmuaain rë cojo hisca ngu ndyojo.

⁷ Ngajan xi cafayangui xu Jesús tsêhê xitsehen cuitjin:

—Hacuaha cuitjin chja xcun xujun rë Nina: “Míj rë xi chjuhunchuvun Nina nuju.” —Cuatjin xu cachja Jesús.

⁸ Hane ngu ndiya nga quijicojo xitsehen Jesús, quijicojo rë me ngu ndetjún hnga ne, sehe catsingacun xitsehen jan me jingujyë ni nandya tsêhê ngasunhndê cojo yêjê ni cjuanchina xi tjín rë. ⁹ Ngajan xi cachja xitsehen cojo rë me cuitjin:

—Suá ri yêjê nandya xi cuacún vë cojo cjuanchina rë. Hatuxa suá ri sa xi cuindove cuiticjexcuin nguehe xi chjehercuin ná.

¹⁰ Sehe cafayangui Jesús tsêhê xitsehen cuitjin:

—Tihinxin Satanás, ta tsêhê xi xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha ngu ni me vêhê xi meje rë xi nihñuchuhun hacutjin xi meje rë me.”

¹¹ Xi cuatjin xu cachja Jesús cojo xitsehen jan ne, cavetjuxin tsêhê me. Hane cafehe tjengui ángel me xi cjuahacuenda rë me.

Jesús ne, vetsihin sahmi me xa ngajan distritu Galilea

¹² Xi camachaya rë Jesús xi jiya Juan Vitenda rë Xuta ndavaya ne, quiji me distritu Galilea. ¹³ Hane cavetjuxin me tsêhê nandya Nasaret, quiji cavejña me nandya Capernaum. Nandya jan ne, tacun tjeheñ rë ndajyë. Hane nandya jan ne tsêhê xuta tjê rë Zabalón cojo Neftalí. ¹⁴ Cuatjin cama sehe camachihin cjuá xi camahindu xcun xujun xi chja cjuá rë profeta Isaías xi chja cuitjin:

¹⁵ Xuta xi viyuju me nangui rë Zabalón cojo Neftalí, nangui ngajan ngunda ndajyë Jordán, ngajan tjeheñ rë ndachacun, tsêhê distritu Galilea, nangui rë xutaxín.

¹⁶ Xuta jan xi jñu cjuatacun rë me, cavêê me ngu me xi sacuaha ngu ndihi seti xi sua rë me cjuahasen.

Xuta xi jemu tsavi siu me tsêhê cjuaveya, ndihi jan ne casua rë me hasen rë.

¹⁷ Nixtin hya ne, Jesús ne, cavetsihin catsuyihiya me cachja me cojo xuta cjuar rë Nina. Cuitjin cachja me:

—Nindeyun cjuatacun nuju ta tsëhë xi camatiña nixtin xi Nina ne cuitexa me ngasunhndé.

Jesús ne, jindaya me cha xi tjun cumá xuta ladu rë me

¹⁸ Cama ngu nixtin xi tsuyihiya me ngajan tjehe laguna tsëhë Galilea ne, cavëë me jo me xi htntse, ngu me xi hmí rë Simón cojo ngu me xi hmí rë Andrés. Titsingatjenya me changa ngajñi ndachacun, tsëhë xi hatuxa xá rë me xi faha me chu ti. ¹⁹ Hane Jesús ne, cachja me cojo me cuitjin:

—Nduvun cuanguen cojo ná. Hane cuicuyá nuju xi cuangun nuvun xuta xi cuisehen me ladu naha ngojo rë xi nuvun chu ti. —Cuatjin cachja me.

²⁰ Hane hora vëhë ni caviyuju me changa jan, hane cavetju me quiji me cojo Jesús.

²¹ Hitsë sa nguvan ne, cavëë Jesús jo cha xi hacuaha htntse: Jacobo cojo Juan, cha quihndi rë Zebedeo. Hinchá cha cahntsua barcu cojo nahmi rë cha, ngajan tífuyataha cha changa rë cha. Hacuaha cajindaya Jesús cha xi cjuecojo me cha. ²² Sehe caviyuju cha barcu jan, hane cavejña cha nahmi rë cha quiji cha cojo Jesús.

²³ Hane Jesús ne, catsuyihiya me yëjë ni ladu tsëhë distritu Galilea. Xi cavisehen me yungun ne, cavicuya me xuta, cachja me cojo xuta cjuandajjihi tsëhë gobiernu xi sahmi Nina. Hacuaha catsirqui me xuta hmu rë; camandaja xuta tsëhë yëjë ni chíhin cojo tsëhë yëjë ni cjuahmu rë me. ²⁴ Hane cavitsojo cjuar tsëhë cjuarcun xi casahmi Jesús. Cavitsojo cjuar jan hisca yëjë nangui xi hmí rë Siria. Hane xuta ne, cafehetjengui me Jesús yaha me xuta hmu rë tsëhë yëjë xcusun chíhin hane catsirqui me. Hacuaha catsirqui me xuta xi hinchá xitsehen cahntsua xahasen rë me cojo xuta xi má rë me chajan cojo xuta xi cahme yojo rë. ²⁵ Hane quijitjengui xutacjín jan Jesús ne, xuta tsëhë cahndé xi cuicun vi: tsëhë të nandya xi tsëhë Decápolis, cojo nandya Jerusalén, cojo yahnga sa xuta tsëhë distritu Judea, cojo xuta tsëhë nangui ngunda tsëhë ndajyë Jordán.

5

Xuta xi ndaja tsëhë cojo xuta xi hmu tsëhë

¹ Hya xi cavutsejen Jesús xi camatangun xutacjín jan ne, quijinihi me ngu ndetjun, hane xi cavëjña Jesús ne, casahmitiña xuta tsëhë Jesús. ² Sehe cavetsihin cavicuya me xuta jan cuitjin:

³ —Jemu ndaja tsëhë me xi machaya rë me xi tsichaja sa rë cjuatacun rë me xcun Nina matsejen ta satë rë me gobiernu xi sahmi Nina.

⁴ Jemu ndaja tsëhë me xi jihndava me tsëhë cjuachoho matsejen ta Nina sua rë me cjuetacun.

⁵ Jemu ndaja tsëhë xuta jeya, xuta xi hacuiin xta me matsejen ta, cjuahatsja me nangui xi sua Nina.

⁶ Jemu ndaja tsëhë me xi sacuaha sahmi yahnga xuta xi yojo rë xi fi tjengui rë comida, cuanitjin tjengui me xcusun xi cuma tyjahi cjuatacun rë me xcun Nina matsejen ta, cuechu nixtin xi cuiyujuchihin cjuatacun rë me.

⁷ Jemu ndaja tsëhë me xi tjín rë cjuayumatacun cojo xuta, ta hacuaha cjuahatsja me cjuayumatacun tsëhë Nina.

⁸ Jemu ndaja tsëhë me xi tjín ngu cjuatacun tyjahi cahntsua xahasen rë me matsejen ta, scuëë me Nina.

⁹ Jemu ndaja tsëhë me xi tsinguejyu rë xuta xi chohovëë xicjin me matsejen ta, me vëhë jan ne, cuichja Nina xi quihndi rë me.

¹⁰ Jemu ndaja tsëhë me hya xi tsujyihya tjengui xuta me cojo cjuahngat-acun ngatsë rë xi tjin rë me ngu cjuatacun cojo Nina matsejen, ta satë rë me gobiernu xi sahmi Nina.

¹¹ Jemu ndaja tsujun ngayun ne sá xi ngatsë naha choho cuichja xuta tsujun o sá xi tsujyihya tjengui nuju xuta cojo cjuahngatacun o sá xi cojo cjuandesu tsicanijiyë me ngayun. ¹² Nixtin hya ne, jemu catama sua rë xahasen nuju ngatsë rë cjuañihi vë ta jemu jyë ngu cjuandaja xi tacunya nuju ngajan ngahnga. Cuanitjin ni choho casahmi xutachanga naja cojo profeta rë Nina xi caviyuju hatsëë nixtin.

Xuta ne, meje rë xi sahmi me sacuaaha naxa

¹³ Ngayun, tjin hacutjin machji rëhë ngayun ngajñi rë xuta sacuaaha sahmi naxa xi sahmi xtya rë ngu xichine. Ta sá xi naxa cjuë xtya rë ne, tsajin sa ngu xcusun xi cuma sahmi xtya rë. Hane sá xi cjuë xtya rë ne, tsajin me machji rëhë ta, scandi ni xuta, ngajan ni sune me.

Má naja ndihi rë ngasunhndë

¹⁴ Cuanitjin ne, tjin hacutjin machji rëhë ngayun ngajñi rë xuta sacuaaha machji rëhë ngu ndihi xi sua hasen rë. Ta sá xi ndetjun tacun nandya matsejen ne, hatuxa tsejen; tsajin me xi cuatsa rë. ¹⁵ Cuanitjin ne, hacuaaha tsajin ngu xuta xi ha xcun xi ha cavetaha rë me ngu ndihi ne, sehe cjuaha me cueyahma me ngahma rë ngu caxa. Hatuxa cjuaha me cuejñatsejen me cahndë rë cojo sa xi xuta xi siu me hiscan xi seti ndihi jan ne, cuechu hasen rë. ¹⁶ Hacuanitjin chuva vëhë, meje rë xi nihñu cjuandaja xi scuëë xuta xcusun xi nihñu hane ngatsë rë xcusun jan ne, sahmi jyë me sahmi hnga me Nahmi nuju xi tacun me ngahnga.

Cjua xi cachja Jesús tsëhë ley rë xuta tjë rë Israel

¹⁷ Xi caningatuantacun matsejen xi nduvá tsinguétsun ngahñu rë ley xi catsihindu xutachanga naja Moisés o cjuá xi cajuja profeta. Cahndë rë xi tsinguétsun ne, sahmechihin cjua jan. ¹⁸ Hatuxa cuichjá cojo nuju cjuaquixi ta hya xi tacun cuaha ngahnga ne tacun cuaha ngasunhndë ne, cumaji chjahanxin rë cjua rë ley jan cojo yëjë ni letra rë ta, cuejña cuaha hiscan cumachihin cjua rë. ¹⁹ Vëhë xi tu yo ni xi sahmicuendaain tsëhë hisca ngu rquí cjua rë, hane sá cuinchangu me yahnga xuta xi cuanitjin sahmi me, chuva cuengui chji rë me hya xi sahmi Nina gobiernu. Peru tu yo ni me xi cjuahacuenda me hacuaaha tsingacun me xuta xi cjuahacuenda me ley jan, me vëhë cuma titjun me hya xi sahmi Nina gobiernu. ²⁰ Nguehe cuichjá cojo nuju ngayun ta meje rë xi hitsë sa tyjahi cjuatacun nuju xi cumá rë cjuatacun rë xuta xi vicuya me ley o sá xi xuta partidu fariseo, ta sá tsajin ne, satiin nuju gobiernu xi sahmi Nina.

Cjua xi cavicuya Jesús tsëhë xuta xi hngacacun

²¹ Ha hyun cjua xi cafaha xuta hatsëë nixtin xi chja xi canicuun xingun hacuaaha chja xi yo xi tsiquehen xicjin matsejen ne, cjue me xcun juez xi tsichuva me jyë rë me. ²² Peru cuichjá cojo nuju xi hisca yo xi macjan rë cojo xicjin ne, satë rë xi tsichuva me. Hane yo xi chjataha xicjin ne, cjue xcun juez xi matitjun. Cuanitjin yo me xi cuichja tsëhë xuta: “Ngarca ngayun”, cuechji me tsëhë jyë rë me ngajan xcun ndihi xi tsajin nixtin coho.

²³ Ngatsë rë vihi, sá xi hora xi vejñu chjë nuju ngasunscun ne, sá xi tu ñahñu ni vitsjen nuju xi choho canihñu cojo xingun ²⁴ ngajan catejñavasen chjë nuju,

titjun cuangun tjengun xingun, hane chjayun rë me cjuaninchataha hane xi camandaja yun cojo me, sehe cuyun cuejñu chjë nuju jan.

²⁵ Sã ndiya tivangun cojo xuta xi meje cuinchajyë nuju xcun xutaxa rë ne, meje rë xi cuisiajmuchuhun cojo me, cojo sa xi ngajñi nuju cuma chihin ta sã tsajin ne, cjucojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane cjue cueya nuju me ndavaya.

²⁶ Ta cuichjá cojo nuju cjuaquixi ta hatuxa tsajin nixtin xi cuetjun tsëhë ngajan jinguyëjë rë xi cjëë cuechjun yëjë ni tujún xi quitjun.

Cjua xi cavicuya Jesús tsëhë xuta xi sahmi cjuatsehen cojo rë ngu xi hacuiin tsëhë me

²⁷ Ha hyun cjua xi cafaha xuta hatsëë nixtin xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun.” ²⁸ Peru cuichjá cojo nuju xi hisca xi ngu xihin xi vutsejen me ngu chjuun xi macacun me cojo na, ngajñi cjuatacun rë me ne, ha casahmi me cjuatsehen cojo ran.

²⁹ Hindë sã xi cjuatacun nuju meje rë xi nihñu ngu jyë tsëhë xcusun xi chutsujun cojo tuxcuun ladu quixi, hitsë sa ndaja tsujun sã xi chjuhunxun tuxcuun jan chandunxun cojo sa xi hacuiin tsitsehen nuju, ta hitsë sa vengui chji rëhë xi ma chaja nuju ngu rquí yojo nuju hane hacuiin xi cuangun jingu hiscan xi má hasen rë nima castigu. ³⁰ Cuanitjin ne, sã xi cjuatacun nuju meje rë xi nihñu ngu jyë cojo ntsun quixi ne, hitsë sa venguichji rëhë xi chandunxun ntsun jan ta hitsë sa ndaja tsujun xi machaja ngu rquí yojo nuju tsëhë xi cuangun jingu hiscan xi má hasen rë nima castigu.

Jyë rë xuta xi tsismi xicjin me sehe cuixan cojo jingu sa

³¹ Hacuaaha cafaha xuta hatsëë nixtin cjua xi chja cuitjin: “Ngu cha xi tsismi chjuun rë ne catejña cha ngu xujun tsja chjuun jan xi ha quihndë mijí rë cha na.” ³² Peru nguehe cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin xi hacjahi, hacuaaha tjín rë me jyë ta sehe ngatsë rë xi catsismi me na ne sahmi chjuun jan cjuatsehen. Hacuaaha yo xi cuixan cojo chjuun jan ne, tangun jyë rë cojo ngu xi sahmi cjuatsehen cojo ngu chjuun xi hacuiin chjuun rë.

Hacutjin meje rë xi sua cjuaquixi naja

³³ Hacuaaha hyun cjua xi cafaha xuta hatsëë nixtin xi chja cuitjin: Hya xi cuinújun: “Vëë Nina”, hatuxa sahmi ngu jyë xi nihñuchuhun cjua xi canújun.

³⁴ Peru nguehe cuichjá cojo nuju ta hora xi cuisiajmu cojo xingun ne, hacuiin cuinújun xi vëë Nina, hacuiin cuinújun xi vëë sa jingu sa quihndi ngasunhdë. Cuinujuun xi vëë ngahnga ta ngahnga ne, tacun Nina xi vitexa me.

³⁵ Hacuaaha cuinujuun xi vëë ngasunhdë ta ngasunhdë ne, tangun sacuaaha ngu yatë hiscan xi tine ntsacu Nina. Cuinujuun xi vëë Jerusalén ta Jerusalén ne, nandya xi tsëhë Nina, Me xi Matitjun. ³⁶ Cuinujuun cuitjin: “Sã xi quixiin jain cjua naha ne, catinduva ngu cjuacjintacun xi cuatjun”, ta tsëhë xi ngayun ne, hisca hitsë cumaji cuitexun sã xi cuma jma tsjarcun o sã xi cuma tyjava. ³⁷ Hya xi cuisiajmu, sã xi “joho” nújun ne, cuanitjin ni cuitejña; o sã xi “jéya” nújun, hacuaaha cuanitjin ni ndatjin ta, sã xi vetjutë visiajmu cjua ján jan ne, cjua cjín jan ne, nduva tsëhë cjuatsehen.

Meje rë xi nihmutacun xuta xi chohovëë naja

³⁸ Hyun cjua xi cafaha xuta hatsëë xi chja cuitjin: Cha xi cuahaxin tuxcun xicjin ne, hacuaaha chjahaxin rë tsëhë cha. Cuanitjin cha xi cuahaxin nehñu xicjin ne, hacuaaha cuanitjin ni chjahaxin rë nehñu cha. ³⁹ Peru nguehe cuichjá cojo nuju ta, canicuyun cjuatsehen. Sã xi tjín yo xi vanguihmu

nuju, yo xi vajaya ngu ladu tsa nuju matsejen ne, nicuyun sa ngu ladu catajaya. ⁴⁰ Cuanitjin ne, sá xi tjin yo xi cjuecojo nuju xcun juez xi fahataha chingá nuju matsejen ne, hacuaha tuhun rē me cojo yějē ni tsjian hasu nuju. ⁴¹ Cuanitjin ne sá xi ngu xuta ne, sahmi nuju me ngu yějē xi chanuju chaha rē me ngu kilómetro, cahndē rē ngu ni, tanguncujun jo kilómetro. ⁴² Yějē ni xuta xi fehya nuju me mé xi machaja rē me matsejen ne, tuhun rē me. Hane sá xi scuxetaha nuju me, tuhun rē me.

⁴³ Hyun cjua xi cafaha xuta hatsēē nixtin xi chja cuitjin: “Nihmutacún xuta xi siutahndee nuju; choho hyun xuta xi má condra nuju.” ⁴⁴ Peru cuichjá cojo nuju ta, hacuaha nihmutacún xuta xi má condra nuju; ndaja nihñu cojo xuta xi choho vēē nuju me. Nújnyumuntuhun rē xuta xi tsujyihya tjengui nuju me cojo cjuahngatacun. ⁴⁵ Sá xi cuatjin nihñu ne, cumatsejen xi chjayunngun sacuaa sahmi Nahmi nuju xi tacun ngahnga ta, Nina ne, sahmi me xi ngu chihin ni vetjucaa tsuhi xi casahmi me hane vechu hasen rē hiscan siu xuta tsehen hacuaha hiscan siu xuta ndaja. Hacuaha sahmi me xi vaha tsi xcun jnu rē xuta xi tjin xi cun rē me, hane hacuaha xcun jnu rē xuta xi tsajin xi cun rē me xcun Nina. ⁴⁶ Tsajin yo xi sua chji nuju tsēhē xi hmutacún xuta xi hmucacun nuju me matsejen, tsēhē xi hacuaha hisca cha faha tujúnsa (xi jemu vaxē cha tujún) matsejen ne, hmucacun cha xuta xi hmucacun rē cha. ⁴⁷ Hacuanitjin ne, sá xi suvun cuinúnjun nina cojo xuta nuju ne, ¿há hitsē sa ndaja yun xi cuma rē yahnga xuta? ¡jéya! Hisca xuta xi macjaain rē me Nina ne, tjin rē me xcusun ndaja vē. ⁴⁸ Vēhē xi nameje rē xi tangun cojo ngasunhndē nuju cojo ngu xcusun xi tyjahi chichihin ni, cumatangun xcusun nuju cojo xcusun rē Nina xi tyjahi chichihin cjuatacun rē me.

6

Jesús ne, vicuya me tsēhē cjuandaja xi meje rē sahmi xuta

¹ Hya xi nihñu ngu cjuandaja ne, nihñu nguñajatacun, hacuiin nihñu tsēhē xi scuēē nuju xuta; ta sá tsajin ne, ndastu me chji sacu tsēhē Nahmi nuju xi tacun ngahnga. ² Cuanitjin ni sacuaaha cjua vē, hya xi tuhun ngu caridad matsejen ne, xi canijanu nuju tyjo xi tuhun cumachaya rē xuta cjuandaja jan. Hacuaaha cuatjin sahmi xuta xi jo xcun jo hntsua me hya xi sua me caridad ngajan yungun o ndiya ngatsē rē xi vaxēndaja xuta me. Tichjá cojo nuju ta ha vēhē ni chji sacu rē me. ³ Vēhē xi ngayun ne, hya xi tuhun caridad ne, catuun cumachaya rē ntsun ladu xcun mé xi tuhun cojo ntsun ladu quixi. ⁴ Cuatjin hya xi tuhun caridad ne, tuhunhmu matsejen ne, hane xi cuatjin nihñu ne, Nahmi nuju xi tacun ngahnga ne xi cavēē me cjuandaja xi canihñu ne, sua me chji nuju.

Jesús ne, vicuya me hacutjin nihña oración

⁵ Hacuaaha hya xi nihñu oración, xi canihñuu sacuaaha xuta xi jo xcun jo hntsua me ta me vēhē ne, jemu meje sahmi me oración cahntsua yungun cojo sa hiscan sahmi cru ndiya tē hiscan xi scuēē xuta me. Nguehe cuichjá cojo nuju ta ha vēhē ni chji sacu rē me. ⁶ Vēhē xi ngayun ne, hya xi nihñu oración ne, techjun tingotjo ndya nuju hane tangun cahncun, ngajan hma nihñu oración cojo Nahmi nuju xi tacun ngahnga ta ngu ni me vēhē xi tacun me cojo nuju. Hane Nahmi nuju jan xi vēē me yějē xcusun xi hinch hma ne, sua me chji nuju.

⁷ Hacuaaha hya xi nihñu oración, caveyunnanguun ngu cjua xi hisca suvun vijnircun sacuaaha xcusun xi sahmi xuta xi hvíin me cjua rē Nina, ta xi má

rë me vë ne, xi hitsë cjin cju cuichja me ne, hacuaha hitsë sa cuahacuenda Nina tsëhë me. ⁸ Miji rë xi nihñu xcusun vëhë, ta hisca chaja sa xi chjahyun rë Nahmi nuju xi tacun ngahnga ne, ha vëhë me mé xcusun xi mameje nuju.

⁹ Cuanitjin nújun hya xi nihñu oración:

Ngayun Nahmi niji xi nechun ngahnga ne, meje rë xi ngayijin ni xuta ngasunhndë chjihinrcuin nuju.

¹⁰ Nduvun nihñu niji gobiernu.

Catamachihin cjuatacun nuju nguehe ngasunhndë sacuaha ngahnga xi ha camachihin.

¹¹ Nchunchujun ni ne, tuhun niñu xi xini.

¹² Ninchatuhun niji tsëhë yëjë ni jyë niji ta hacuaha ngayin suvin ni tininchatihin rë xuta xi choho sahmi me cojo niji.

¹³ Caningatjuun xi chjaháchuva niji cojo cjuatacun niji ta, tuhun niji ngahñu xi cuma cuetjinxin tsëhë cjuatsehen.

Tsujun suvun gobiernu cojo ngahñu, hacuaha tsujun ni hasen rë ngahñu cju nuju. Tsujun yëjë vë, yëjë nu, yëjë nixtin.

¹⁴ 'Hya xi cajnetaha oración jan, cachja sa Jesús cuitjin: sá xi ninchatuhun xuta xi choho casahmi me cojo nuju ne, hacuaha Nahmi nuju xi tacun ngahnga ne, tsinchataha me jyë nuju. ¹⁵ peru sá xi ninchatuun xuta xi choho casahmi me cojo nuju ne, hacuaha Nahmi nuju jan ne, tsinchataain me jyë nuju.

Jesús vicuya me tsëhë hya xi nechun xun rë Nina

¹⁶ 'Ngayun ne, nixtin xi nechun xun rë Nina ne, nihñuu va xcusun nuju sacuaha sahmi xuta xi jo xcun jo hntsua me ta sahmi va me xcusun rë me, ta me vëhë ne, hisca catsindeya me xcusun rë me sehe cumatsejen xi tacun me xun rë Nina. Cuichjá quixi cojo nuju ta ha vëhë chji xi sacu rë me. ¹⁷ Vëhë xi ngayun ne, hya xi nechun xun rë Nina ne, tinchacun, nihñu tyjahi yojo nuju. ¹⁸ Cuatjin nihñu cojo sa xi tsajin yo vëhë rë xi nechun xun rë Nina, ta suva Nina, Nahmi nuju vëhë me. Hane me vëhë ne cuechji me yun.

Cjuanchina xi tacunya ngahnga

¹⁹ 'Cavetjuun cjuanchina nuju nguehe ngasunhndë, ta nguehe ne, sahmi dañu chu xavi cojo xutsë. Nguehe ne cuma scuxahaya cha chëjë, hane sehe tsichëjë cha. ²⁰ Hitsë sa ndaja ne, tetjún cjuanchina ngajan ngahnga ta ngajan ne tsajin dañu xi sahmi chu xavi cojo sa xutsë. Ngajan ne scuxaain cha sehe xi tsichëjë cha. ²¹ Cuatjin meje rë xi ngajan cuetjin tsujun ta, tsëhë xi hiscan tetjo cjuanchina nuju ne, hacuaha ngajan quitaha cjuatacun nuju cojo.

Ndihi rë yojo naja

²² 'Tuxcuun matsejen ne, vëhë xi sacuaha ndihi rë yojo naja. Vëhë xi hya xi tuxcuun ndacun ne, hatuxa seya cjuahasen cahntsua yojo naja. ²³ Peru sá xi tuxcuun hmu matsejen ne, hacuaha ma jñu cahntsua yojo naja. Sacuaha hasen xi jiya cahntsua yojo naja ne, sá xi hacuiin hasen xi cjuaquixi jain ta, suva jñú ne, ijercu tu jñú camahani cuma sa!

Tsajin yo xi ma fahacuenda xa tsëhë Nina cojo tsëhë cjuanchina

²⁴ 'Tsajin yo xi ma fahacuenda xa tsëhë jo patrón ta, tsëhë xi choho scuëë rë patrón xi tjun hane tsihmu cacun rë patrón xi majo jan. O sá tsajin ne, jemu cuetaha yojo rë cojo patrón xi tjun hane patrón xi majo jan ne, hisca sahmicuendaain rë. Vëhë xi xi ngu tanguñ ni ne, cumaji nihñu hacutjin xi meje rë Nina cojo hacutjin meje rë cjuanchina tsehen xi tsëhë ngasunhndë.

Sahmi cuidadu Nina xuta ladu rë me

25 'Vêhë xi cuichjá cojo nuju ta hacuiin cuityjanguntacun sá sacu o sá sacuiin mé xcusun xi xinu xi sua nuju ngahñu. Hacuaha hacuiin cuityjanguntacun sá sacu o sá sacuiin tsjian xi chujun. Hitsë sa vengui chji rê cjuahñu nuju xi cumá rê xi chinu, hacuaha hitsë sa vengui chji rê yojo nuju xi cumá rê tsjian xi chujun. 26 Chutsujun chu nisë xi vitjen chu ngahnga ta hacuiin tsitjê chu, hacuiin fanchi chu, hacuaha tsajin rê chu ndyahnga hiscan cuinchandaja chu xi sinë chu, peru Nahmi nuju xi tacun me ngahnga ne, tsicjen me chu. Ngayun ne, hitsë sa vengui chji nuju xi cumá rê chu nisë vë. 27 Hacuaha tsajin hisca xi ngu xuta xi cuma cuesuntaha me cjuahñu rê me hisca ngu hora ta hacuiin cavatsë chji me cjuahñu rê me. Tu mahya ne xi tjercu vityanguicacun me.

28 'Cuanitjin ne, ¿mé má chji rêhë xi cuityjanguntacun tsëhë tsjian xi chujun? Chutsujun naxu liri xi vetju nguijña ta tshyaain nachjun hacuaha fahyaain tsjian rê. 29 Peru ngahan cuichjá cojo nuju ta tsjian rê xutachanga naja Salomón ne, handasa jercu ndacun camahani, peru hitsë sa ndajyih tsejen ngu naxu vëhë xi cuma rê tsjian jan. 30 Sá xi cuatjin tsicaja Nina xca nguijña xi ngu nixtin ne siutaha nguijña, hane xi tu cuma nchujun nga ne, cueti ne, hitsë guan sa ngayun xi hatuxa tsicaja nuju me. Peru ngayun ne, cjëë cumangutacundujun cojo me. 31 Vêhë xi hacuiin cumacjintacún hane cuinengunsuun cuitjin: "¿Mé comida xini? o sá ¿jani sacu niji xi sihin? o sá ¿mé tsjian hijin?" 32 Hacuiin ta, tsëhë xi xcusun vëhë ne, xuta xi hvíin me cjua rê Nina ne, me vëhë xi vityanguicacun me xcusun vëhë. Peru ngayun ne, Nina Nahmi naja ne, ha vëë me xi machaja nuju xcusun vëhë. 33 Tityjanguntacun hacuaha nechunyun rê gobiernu xi sahmi Nina, hacuaha catama tangun cjuatacun nuju cojo cjuatacun rê me ne, hane yëjê ni xcusun vëhë ne, quitahacoo sa sacú nuju. 34 Cuanitjin ne, hacuiin cumacjintacún tsëhë mé xi cuma cuatju nchujuni, ta xi cumá rê nchujuni matsejen ne, hya yaha cjuacjintacun rê. Ngu nixtin ngu nixtin ne, chjuhun cuendun cjuacjintacun rê ta jima ngu nixtin cojo tsëhë.

7

Mijí rê xi nichuvan jingu sa xuta cojo cjuatacun rê me

1 'Hacuiin nichuvan jingu sa xuta cojo cjuatacun rê me, sehe hacuiin tsichuva Nina ngayun. 2 Canichuvuun ta sá tsajin ne, chuva xi quixi yun cojo xuta ne, hacuaha cuanitjin quixi Nina cojo nuju; hacuaha chuva xi nichuvunyun matsejen ne, vëhë ni tsichuva Nina yun. 3 ¿Hacutjin má xi matsejen nuju xtë xi jiya tuxcun xingun? ta ngayun ne hitsë sa jyë xi jiya túxcun. 4 ¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyëjê rê xi suvun matsejen ne, machayiin nuju xi hitsë sa jyë xta xi jiya túxcun vë ni? 5 Ngayun xuta xi jo xcun jo hntsua ne, naxun titjun xtë jyë xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

6 'Sá xi tjin nuju mé xi venguichji rêhë sacuaha tjin rê cjuandaja xi casua Nina yun, tetjuhunndujun hacuiin tu yo ni tuhun rê ta sá tsajin ne, xuta jan ne, tsitjungui me xi ngayun jemu ximinchacun xi cuma nuju. Hacuaha cuichjataha nuju me.

Chjahyun rê Nina mé xi machaja nuju

7 'Chjahyun rê Nina, hane sua nuju me. Tinchunsun, hane sacú nuju. Tinújun hacuaha chjahyun cahndé, hane Nina sua me cahndé xi cuisuhun cuinújun cjuacjintacun nuju. 8 Cuatjin nihñu ta, yëjê ni xuta xi fehya rê me ne,

cuahatsja me, hane yo xi vanguise ne, sacu rë me, hane yo xi chja hacuaha fehya cahndë me ne, sacu cahndë cuisehen me.

⁹¿Há tjin ngu nahmi xi, hya xi quihndi rë me cjuehya ngu niñu ne, cahndë rë xi vëhë ne, sua me ngu ndyojo, ¹⁰o sá xi cjuehya quihndi yojo rë chu ti ne, cahndë rë vëhë ne, sua me ngu yë? ¹¹Sá xi ngayun xi xuta jyë yun ma tuhun rë quihndi nuju xcusun xi ndaja. Hitsë guan sa Nina Nahmi naja xi tacun me ngahnga xi jyë hnga me cojo cjuandaja rë me ne, me vëhë vëë me mé cuatjo ndaja xi cuma sua me xuta xi cjuehya rë me.

¹²Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me: cuatjin nihñu ta cojo ngu xcusun ni xi tinihñu vëhë ne, ngayun tinihñuchuhun yëjë ni cjua rë ley cojo yëjë ni cjua xi catsihindu profeta.

Ejemplu tsëhë tingotjo xcu

¹³Cuisuhun hiscan sahmi Nina gobiernu sá xi cuisuhun tingotjo xcu ta, tsëhë xi sá xi cuisuhun táha tingotjo të o ndiya xi cjín me vatjun me ne; vëhë ni cjuecojo nuju cjuaveya hiscan xi jemu cjín xuta cjue me. ¹⁴Ta tingotjo xcu o ndiya hndë ne, vëhë xi cjue cojo nuju hisca xi sacu nuju cjuahñu. Jemu chuya xuta xi sacu rë me tingotjo xcu jan.

Tsejen mé xcusun xuta me ngatsë rë mé xi sahmi me

¹⁵Cuidadu tsëhë profeta ndacha ta xi tjengui nuju me, jeya tsejen xcusun rë me sacuaha xcusun rë chu tsánga, peru quixiin vëhë ta suva cjuandacha ta xahasen rë me ne, quitsë rë cjuatsehen sacuaha cahntsua xahasen rë chu lobo. ¹⁶Tsejen mé xcusun xuta me ngatsë rë xcusun xi sahmi me. Sacuaha ngu ya ne, tsejen mé xcusun rë ngatsë rë tu xi sua. Sacuiin rë xuta uva tsëhë ya nahyálatu, hacuaha sacuiin rë xuta tuhaxi xi hmi higo tsëhë nahyándeHYA. ¹⁷Quixi jain ta ngu yatjë xi ndaja ne, sua tú xi ndaja, hacuaha ngu ya xi machjiriin ne, hacuaha machjiriin tu rë. ¹⁸Vëhë xi ngu yatjë ndaja ne, cumaji sua tú xi machjiriin, hacuaha ngu ya xi machjiriin ne, cumaji sua tú xi ndaja. ¹⁹Hane yatjë xi machjiriin tú rë ne, xtjñi rë tsëhë xi ndaja sehe cueti. ²⁰Cuanitjin xuta ne, tutjin rë yatë vë ne, cuatjin rë me ta, tsejen xcusun rë xahasen rë me ngatsë rë xcusun xi sahmi me.

Cachja Jesús xi hacuiin yëjë ni xuta cuisehen me gobiernu xi sahmi Nina

²¹Tjin yo me xi cuichjacojo ná ta nai rë me ngahan, peru cuiisiin me gobiernu xi sahmi Nina nahmi naha; ta ngajan cuisehen suva xuta xi sahmichihin me cjuatacun xi vitexa Nahmi naha xi tacun me ngahnga. ²²Vëhë xi handasa xi jemu cjín me cuichja me nixtin hya jan cuitjin ta: “Nai naha, ngatsë rë xi hñu ngayun, vëhë xi caveyinnangui ñihi nuju ne canújin cjua rë Nina, hacuaha xi canújin ñihi nuju ne, canaxinxin xitsehen, hane cojo ngahñu rë ñihi nuju cama canihñi cjuarcun.” Cuatjin cuichja me nixtin hya. ²³Ngajan xi ngahan ne, cuitjin cjuayanguë tsëhë me nixtin hya: “Tángxunxun tsahan ta hveen yo ngayun, ngayun xi nihñu cjuatsehen.”

Ejemplu tsëhë jo ndihya

²⁴Yahnga xuta xi visiñuju me cjua naha hacuaha sahmi me sacuatjin chjá cojo rë me matsejen ne, tangun me cojo ngu cha quicun xi hya xi casahmi cha ngu ndihya matsejen ne, hiscan xcun nanguihñu casahmi cha. ²⁵Hane hya xi cavaha tsi, camajyë ndajyë hacuaha casesuntë nandá, hacuaha cavanga tjo hñu ne, jercu hñu catsivaha rë ndihya jan, peru caticjaainjni tsëhë xi xcun nanguihñu secun. ²⁶Peru yahnga nga xuta xi visiñuju me cjua naha

hacuaaha sahmi me sacuatjin chjá cojo rë me matsejen ne, tangun me cojo ngu cha ngarca xi hya xi casahmi cha ngu ndihya matsejen ne, hiscan xcun nangui tsumi casahmi cha. ²⁷ Hane hya xi cavaha tsi, camajyë ndajyë hacuaaha casesuntë nandá, hacuaaha cavanga tjo hñu ne, jercu hñu catsivaha rë ndihya jan, hane tu ngu ñahñu ne caticja ndihya jan, ngu cafë cavetsunya.

²⁸ Xi cajnetaha cachja Jesús ne, xutacjín ne jercu quijircun rë me tsëhë cjuua xi cavicuya Jesús ta, ²⁹ tsëhë xi cjuua xi vicuya me ne, jercu tjin rë ngahñu, hacuiin sacuatjin cjuua xi vicuya maestru xi vicuya ley.

8

Casahmi Jesús xi camandaja ngu cha xi yaha chuxin rë cha chíhin vitaha

¹ Hya ha cavijne me tsëhë ndetjun jan, jemu cjín xuta tjengui rë me. ² Hya xi camá me ne, cafehe ngu cha xi jinguyë ni chuxin rë yaha rë ngu chíhin xi vitaha, caticjaxcun cha cafaharcun cha Jesús hane cachja cha cuitjin cojo rë me:

—Tatá. Sá xi meje nuju ne, cuma chjuhunxun chíhin xi yaha ná vi.
—Cuatjin cachja cha.

³ Hane xi catsixinga Jesús tsja me ne cavetahatsja me cha ne, sehe cachja me cuitjin:

—Meje ná. Catamandaja ngaye. —Cuatjin cachja me.

Hane chíhin jan ne, ngutjen ni cafëya. ⁴ Sehe cavitexa me cha cuitjin:

—Hisca xi ngu ni canujiin cojo. Tihin ningacuin yojo riji xcun nahmi sehe catutsejen me xi camandaja ye. Sehe tihinchjehe cjuatjo riji xi tehe rë Nina ngatsë rë xi camandaja ngaye tsëhë chíhin jan, sacuaaha cavitexa Moisés xutachanga naja. Cuatjin niñi cojo sa xi cumatsejen xi camandaja jain ngaye.

Casahmi Jesucristu xi camandaja cha mosu xi cavatsë capitán

⁵ Xi cavatju vihi ne, sehe rë cavisehen me nandya Capernaum, hane ngajan cafehe tjengui rë me ngu capitán cafehya cha me favor ⁶ cuitjin cachja cha:

—Tatá. Tjin ná ngu cha mosu xi jiñahmu ndya naha. Cahme yojo rë cha hane jemu jiñahi cha.

⁷ Ngajan cafayangui Jesús:

—Cjuë ngahan, tsíruë rë cha.

⁸ Ngajan xi cafayangui capitán jan cuitjin:

—Hisca hacuiin sahmi nguyjé xi ngayun cuinduvun ndya naha ta tsëhë xi hitsë sa hñu cjuua yun xi cuma ná ngahan. Quihndë ne, ndastu tintúnun xi cumandaja mosu naha hane cuma ndaja cha. ⁹ Hacuaaha ngahan ne, tjin ná xuta xi matitjun tsahan, hane hacuaaha tjin ná ngu cientu sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi; hacuaaha xi chjá cojo ngu nga xi cuinduva ne, nduva, hane mosu naha ne, xi chjá cojo xi sahmi mé xi meje ná ne, sahmi. —Cuatjin cafayangui capitán.

¹⁰ Hane xi cahndë Jesús cjuua vëhë ne, jemu quijircun rë me tsëhë capitán jan, hane cachja me cojo xuta xi tjengui rë me cuitjin:

—Cuichjá cojo nuju ngu cjuua ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja mangucacun me cojo ná sacuaaha capitán vihi xi hacuiin xuta tjë naja me. ¹¹ Hacuaaha cuichjá cojo nuju ta cuinduva xutaxin tsëhë táha ladu vetjucaa tsuhi cojo táha ladu vetje tsuhi cuiyuju me sinësuhi me cojo Abraham cojo Isaac cojo Jacob ngajan hiscan sahmi Nina gobiernu, ¹² Peru xuta tjë rë Abraham xi quihndi

cjuaquixi ne, cuma tsingatju me hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.

¹³ Hya xi camá cachja Jesús cuatjin cojo xuta ne, sehe cachja Jesús cojo capitán jan cuitjin:

—Cuma cuangun ta tséhë xi xcusun xi vetjutacun xi má sahme, camachihin.

Hane hora xi cachja me cuatjin ne, camandaja cha.

Jesucristu casahmi me xi camandaja nahya rë Simón Pedru

¹⁴ Hya xi cama ne, cavisehen Jesús ndava Pedru ne, hane cavëë me xi jiñahmu nahya rë Pedru cojo chíhin suë. ¹⁵ Ngajan xi cavetahatsja Jesús tsja na, hane ngutjen cavetjuxin chíhin jan tséhë na. Hane hora vëhë ni ne, cavisatjenhnga na hisca cama cafachacuenda na me.

¹⁶ Hane hora xi tivetje tsuhi ne, xuta ne, quijicojo me cjin xuta xi hinchã rë xitsehen hane quiji me hiscan tacun Jesús. Hane Jesús ne, cavaxëxin me xitsehen jan cojo cjua ni, hacuaha catsirqui me yëjë xuta hmu rë. ¹⁷ Cuatjin casahmi me sehe cumachihin cjua xi cachja profeta Isaías xi cachja me cuitjin: “Cafaha suva me yëjë chíhin hinda xi tjin rë yojo naja, hane suva me cavaha me chíhin naja.”

Xuta xi meje cjue cojo Jesucristu

¹⁸ Xi cavëë Jesús xi jemu tsë xuta hiscan tacun me ne, casua me cjua cojo xicjin me xi cjuexin cojo rë me ngunda laguna. ¹⁹ Ngajan cafehe tjengui rë me ngu cha maestru rë ley sehe cachja cha cuitjin:

—Maestro. Tu yani ni xi cuangun ne, cjuë cojo nuju. —Cuatjin cachja cha.

²⁰ Sehe Jesús ne, cafayangui me cuitjin:

—Chu ninda ne, tjin nguijo hiscan viyuju chu, hane nisë xi vitjen chu ngahnga ne, tjin ndava chu, peru ngahan xi hatuxa Quihndi rë Xuta ngahan ne, hisca ndya naha tsajin. —Cuatjin cachja me.

²¹ Ngu nga xuta xi tjengui rë me cachja cojo rë me cuitjin:

—Tatá. Cuangun cojo nuju peru hya xi cuatju seyaniji nahmi naha.

²² Peru cafayangui Jesús cuitjin:

—Hanguen. Tehe vëhë catisahmi xuta xi cahme cjuatacun rë me, me vëhë catinchaniji me nima.

Jesucristu casahmi me xi cuasen tjo cojo tsindyu rë nandan

²³ Hya xi camá ne, cavisehen Jesús cahntsua ngu barcu hane ngajan quiji tjengui rë me xuta ladu rë me. ²⁴ Hora xi cjui barcu jan ne, canduva ngu tjoññu xi cavanga xcun laguna jan, hane hisca meje tsa rë barcu jan cojo tsindyu rë nandan xi satë rë jan. Peru hora vëhë Jesús ne, jiñafë me. ²⁵ Sehe xuta ladu rë me ne, catsingasca rë me, hane cuitjin cachja me:

—¡Tatá, tatá! ¡Naxuntjun naja! ¡Nguehe cjuëyan! —Cuatjin cachja me cojo Jesús.

²⁶ Hane cachja Jesús cuitjin:

—¿Mé má cuatjin jemu rcun ngayun, ngayun xi cjëë cumangutacún cojo ná?

Hya xi cachja me cuatjin ne, cavisatjenhnga me cavatëcja me ngahñu rë tjo jan cojo tsindyu rë nandan jan, hane jingujyë ni jan ne, cavejñajyuu. ²⁷ Hya xi camá ne, xuta jan ne, jercu quijircun rë me hane cachja me cuitjin:

—¿Yo xuta me vihi xi hisca tjo hisca tsindyu rë nandan vihndë tséhë me?

Cha Gadara xi hinchã xitsehen xahasen rë

²⁸ Hya xi camá ne, cafehe Jesús cojo cha ladu rë me ngunda vëhë, hisca ladu rë xuta nandya Gadara ne, ngajan jo me xi hinchá xitsehen xahasen rë quiji tiña me tsëhë Jesús. Catsijo me xi cuacun jan ne, siu cahndë me ngojo naxi hisca xi sacuaaha tsjun. Hacuaha jemu cjan rë me hisca tsajin yo xi tsuyihiya taha vë jan. ²⁹ Hya xi cavechu me hiscan tacun Jesús, cojo ngahñu rë xitsehen jan, cavetsihin cachja me cuitjin:

—Mé má cuatjin ninguishunñu cojo niji ngayun Jesús, Quihndi rë Nina. ¿Há tuhun niji cjuañihi handasa chaja sa nixtin rë?

³⁰ Nixtin hya ne, ngajan tiñataha ne, tacun ngu cahndë hiscan jemu cjin chu chinga hinchataha chu tijine chu. ³¹ Hane xitsehen jan ne, ña yuma chja cojo Jesús cachja cuitjin:

—Sá xi hatuxa naxunxun niji tsëhë xahasen rë cha xi cuicun vi, ningatjun niji hiscan siutaha chinga, hacuaha ningatuhun niji xi cuisihin cahntsua xahasen rë chu.

³² Hane cachja Jesús ta:

—Joho, tangun.

Hya xi camá ne, cavetjuxin xitsehen tsëhë cahntsua xahasen rë cha jan, hane cavisehen cahntsua xahasen rë chu chinga jan. Hya xi camá ne, yëjë ni chu chinga jan ne, cavanga chu quijijne chu taha rcu ndetjún, hane ngajan cavixuya chu ngajñi nandá tsëhë laguna, hane ngajan café chu, cahme chu.

³³ Hane ngatsë rë chircun jan ne, cha xi sahmi cuidadu rë chu chinga jan, cavanga cha quiji cha nandya. Hane xi cavisehen cha nandya, casua cha camachaya rë xuta tsëhë xcusun xi camá rë chu chinga jan cojo xcusun xi cavatju jo cha xi hinchá rë xitsehen jan. ³⁴ Hya xi camá ne, yëjë xuta tsëhë ladu tsëhë nandya Gadara ne, quijitjengui me Jesús hiscan tacun me, hane xi cavechutaha xuta me ne, cafehya me Jesús xi catje me tsëhë ladu rë me jan.

9

Casahmi Jesús xi camandaja ngu xuta xi cahme yojo rë

¹ Hya xi camá ne, cavisehen nga Jesús barcu, cafe me nangui rë me ta tacun ngunda laguna. ² Hya xi camá ne, ngutjen ni quijitjengui xuta me hane xuta jan ne, yahahnga me ngu cha xi cahme yojo rë cha, jiña cha xcun nijña rë cha. Hane xi cavëë Jesús xi cuatjin mangu cacun xuta xi cuacun jan cojo rë me ne, sehe cachja xu me cojo cha hmu rë jan cuitjin:

—Tuhun cjuasua xahasen nuju ta jyë nuju, tsan ne, ha camanchataha. —Cuatjin cachja me.

³ Ngajan xi ngu jo maestru xi vicuya cjuachacun ne, cavetsihin catsingataha cacun me cuitjin: “Nina tsixcuehyu cha.” ⁴ Hane tsëhë xi vëë Jesús cjuá xi tsingatahacacun maestru jan ne, cuitjin cavinenguise me cha:

—¿Mé má cuatjin chojyihí ningatuhuntacun? ⁵ Xi má nuju, ¿jarë cjuá xi hitsë sa tsaviin fi xi cuichjá: há xi “Jyë nuju ne, ha camanchataha” o há tsajin ne; há “Tisatjunhngun ne, tujyuhunyun?” ⁶ Peru nguehe suá cumachaya nuju ta ngahan xi Quihndi rë Xuta Jain ngahan ne, yahá xá xi tsinchátaha jyë rë xuta nguehe ngasunhdë.

Sehe ngajan cachja xu Jesús cojo cha hmu rë jan:

—Quihndë ne, ngayun tsan ne, tisatjunhngun chjuhun nijña nuju vë, sehe tjangun ndya nuju.

⁷ Hya xi camá ne, cavisatjenhnga cha quiji cha ndava cha. ⁸ Xi cavëë xuta xcusun xi camá ne, quijircun rë me, sehe casahmi hnga me Nina ta Nina ne, casua me cahndë Jesús xi cuatjin casahmi me.

Cavaxijin Jesucristu Mateo

⁹ Xi quiji sa xu Jesús ne, cavechu me hiscan cavëë me ngu xihin xi tacun cahndë hiscan xi faha tujúnsa. Mateo hmí rë me. Ngajan xi cachja Jesús cojo me cuitjin:

—Nduvun, cuanguen cona.

Hane Mateo jan ne, cavetju me quiji me cojo Jesús.

¹⁰ Ha nixtin vëhë ne, tijine Jesús niñu ndava Mateo. Hane jemu cjín sa cha xi faha tujúnsa cojo yahnga cha xi tsitjungui xuta nangui vë ne, hacuaha tijine cha niñu ngajan. ¹¹ Peru xi cavëë cha partidu fariseo xcusun jan, sehe cavinguise cha cojo cha ladu rë Jesús cuitjin:

—¿Mé má jinë hvi mastru nuju cojo cha xi faha tujúnsa cojo ngujo sa cha xi hacuaha cha tsehen cha? —Cuatjin cachja cha.

¹² Peru cavihndë Jesús cjua xi cachja cha, hane cafayangui me cuitjin:

—Xuta xi hacuiin hmu rë me ne, mamijí rë me xi cjuahacuenda rë me doctor ta suvá ni xuta xi hmu rë me ne, me vëhë meje rë xi cjuahacuenda rë me doctor. ¹³ ¿Há vijni rcun mé vijne cjua rë Nina vihi?: “Hitsë sa ndama ná xi mayuma nuju xingun xi cuma rë xi nicuhun chu sacuaha cjuatjo xi tuhun ná.” Hacuanitjin ná ngahan ta ngahan ne, hacuiin canduvá xi squindáyavaha rë xuta xi tsajin xi cun rë me xcun Nina, ta xa xi canduvá ne, xi squindáyavaha rë xuta tsehen, hane cuichjá cojo me xi tsindeya me cjuatacun rë me. —Cuitjin cachja Jesús.

Mé tsëhë xi casahmii Jesucristu cojo xuta rë me xun rë Nina.

¹⁴ Ngajan xi xuta ladu rë Juan ne, cafehe me cavinguise me Jesús cuitjin:

—Ngayijin ni, vinechin xun rë Nina hacuaha cha partidu fariseo hacuaha viyuju cha xun rë Nina. ¿Mé tsëhë xi xuta ladu nuju ne, sahmii me cuatjin ne?

¹⁵ Ngajan xi Jesús ne, cuitjin cachja me cojo cha:

—Cumaji xi xuta rë cha xi tivixan ne, sahmi me xun rë Nina jinguyëjë rë xi cha xi tivixan ne, tacun cha cojo rë me. Peru cuechú nixtin xi cha xi tivixan jan ne, chjaháxin rë cha tsëhë xuta rë cha, hane hya cuma sahmi me xun rë Nina. —Cuatjin cachja Jesús.

¹⁶ Hacuaha cachja sa me ta: —Tsajin yo xi cueyacoo ngu tsjian changa cojo ngu rquí tsjian xi cjëë cjueyu ta sá xi cuatjin sahmi me, xi cjueyu tsjian xatsë jan ne, cuicheya rë tsjian changá jan hane sahmi jyë sa rë hiscan xi ntsun.

¹⁷ Cuanitjin ne, tsajin yo xi vincha xan xatsë cahntsua chuxin changá ta, sá xi cuatjin sahmi me ne, tsitsingá rë chuxin jan. Hane cjuë cuixu xan jan, hacuaha cuetsun chuxin jan. Xi meje rë ne, xan xatsë ne, xincha cahntsua chuxin xatsë ta cuatjin ne, catsijo ni ne tsajin mé cuma rë.

Catsicuya Jesucristu cjuahñu rë quihndi rë Jairo; hacuaha camandaja ngu na xi casatëtsja tsjian rë Jesucristu

¹⁸ Hora xi tivisiajmi me cuatjin ne, canduva ngu me xi xutaxa rë yungun. Hane quiji caticjaxcun me xcun Jesús cachja me cuitjin:

—Ndicumaha ni cahme na lihndi naha. Peru sa xi cuanguen ne, cuisanu ntsun na ne, cuya nga na cjuahñu.

¹⁹ Hya xi camá ne, cavetju Jesús quiji me cojo nahmi rë na lihndi jan hacuaha quiji xuta ladu rë Jesús. ²⁰ Hane ngajñi cjuí me ne, ngu na xi tjin rë tejó nu xi yaha rë na chíhin xahmajni quiji tiña na táha ngaxtun Jesús ne, quiji cavetahatsja na ntsacu tsjian rë me ta, ²¹ catsingatahacacun na cuitjin: “Sá xi cuetahantsa ndastu tsjian rë me ne, cumandaja ngahan.” ²² Peru cavuya

Jesús taha ngaxtun me ne, sehe cavutsejen me na hane cachja me cojo na cuitjin:

—Tuhun cjuasua xahasen nuju, tsan, camandaja ngayun ta camacjain nuju.

Hane ngutjen ni ne, camandaja na.

²³ Hya xi camá ne, cafehe Jesús ndava xutaxa rë jan. Ngajan cavëë me xi ha siu cha chjinetjyo cojo xutacjín xi jihnda me ngatsë rë cjuandusin. ²⁴ Sehe cachja me cojo xuta cuitjin:

—Tjangunxun. Na lihndi vë ne, hacuiin cahme na ta jiñafë ni na. —Cuatjin cachja me.

Ngajan xi xuta jan ne, tu cavejnucëë me Jesús. ²⁵ Peru xi casahmi me xi cavetju xin xuta jan, sehe cavisehen Jesús hiscan jiña nima lihndi jan ne, cafaha me tsja na hane catsisatjenhnga me na. ²⁶ Hya xi camá ne, cavitsojo cjua rë xcusun jan jingujyë nangui vë.

Casahmi Jesús xi camatsejen rë jo cha rcá

²⁷ Xi cavetju Jesús quiji me tsëhë ngajan ne, canduva tjengui rë me jo cha rcá hane cajindaya cha cachja cha cuitjin:

—¡Ngayun Jesús, tjë rë David! Catamayuma nuju ngayin. —Cuitjin cachja cha.

²⁸ Xi cavisehen Jesús ndihya ne, sehe cavechutaha cha rcá me, hane cavinenguise Jesús cha cjua vi:

—Xi má nuju, ¿há cuma sahme xcusun xi chjayun?

Cafayangui cha cuitjin:

—Macjain niji, Tatá, cuma nihñu.

²⁹ Hya xi camá ne, cavetahatsja me tuxcun cha hane cachja me cojo cha cuitjin:

—Cuatjin catama cojo nuju xcusun sacuaaha xi macjain nuju.

³⁰ Hane ha hora vëhë ni ne, catuxaha tuxcun cha hane camatsejen rë cha. Ngajan xi Jesús ne, cavitexa me cha cuitjin:

—Tsajin yo cuinújun cojo tsëhë xcusun vihi.

³¹ Peru cavatju xi quiji cha jan ne, cavitsojo cjua tsëhë me jingujyë nandya jan.

Cavaxëxin Jesús ngu xitsehen xi casahmi lihmi rë ngu cha

³² Hora xi ha quiji jo cha jan ne, cafehe xuta xi canduva me cojo ngu cha xi hinchá rë xitsehen; hane xitsehen jan ne, casahmi lihmi rë cha. ³³ Hane hya xi cavetju xitsehen tsëhë cha lihmi jan, cavetsihin cachja cha. Hane xutacjín xi cavutsejen me ne, jemu quijircun rë me ne cachja me cuitjin:

—Nguehe nangui naja Israel ne, tsajin ngu nixtin xi tsejen cjuarcun sacuaaha tijimá quihndë.

³⁴ Peru cha partidu fariseo ne, cachja cha cuitjin:

—Xitsehen xi matitjun ne, vëhë casua rë cha xa xi vaxëxin cha xitsehen.

Jemu cjín xuta xi meje rë xi cuisñuju me cjua rë Nina

³⁵ Jesús ne, catsujyihya me jemu cjín nandya cojo ranchun ne, ngajan cavicuya me xuta cahntsua yungun rë me. Casua me camachaya rë me cjuandajyihí xi chja tsëhë gobiernu xi sahmi Nina. Hacuaha catsirqui me xuta tsëhë yëjë ni chíhin cojo yëjë ni xcusun xi cjuahmu. ³⁶ Peru xi cavëë Jesús xutacjín ne, camayuma rë me xuta jan ta tsëhë xi jemu va tjín rë xahasen rë me, jemu camachohocacun me sacuaaha chu tsánga xi tsajin yo xi cjuahacuenda rë chu. ³⁷ Vëhë xi cuitjin cachja me cojo cha ladu rë me:

—Xutacjín vi ne siu me sacuaaha siu niji ngajan nguiñña xi jemu ndaja camá peru tsajin cha mosu xi cuanga rë. ³⁸Vêhë xi meje rë xi chjahyun rë Nai naja xi tsingatju me xuta xi cuanga me.

10

Cavaxijin Jesús tejó xuta ladu rë me

¹Cavechú ngu nixtin xi casahmitangun Jesús xuta ladu rë me xi tejó jan ne, sehe casua rë me ngahñu hacuaaha casua rë me xá xi me xi cuacún vë, cuitexa me yëjë xitsehen hane cuaxëxin me xitsehen tsêhë xuta; hacuaaha sahmi me xi xuta xi hmu rë me ne cuma ndaja me tsêhë tu me ni chíhin xi yaha rë me.

²Cha xi tejó jan ne, cuitjin hmí rë cha: titjun ne, Simón, me xi hacuaaha yaha ñihi rë Pedro, cojo Andrés hntsë Simón, Jacobo quihndi rë Zebedeo cojo Juan hntsë Jacobo, ³Felipe cojo Bartolomé, Tomás cojo Mateo, cha xi faha tujúnsa, Jacobo quihndi rë Alfeo cojo Tadeo, ⁴Simón xi tsêhë partidu cananayu cojo Judas Iscariote, me xi sahmi entregadu rë Jesús.

Catsingatju Jesucristu tejó xuta ladu rë me xi cuichja cjuandajiyi rë Nina

⁵Tejó xuta jan ne, catsingatju Jesús me ne, cavitexa me cuitjin:

—Tanguun ngajan ndiya xi fi xuta xi hvíin me cjua rë Nina, hacuaaha cuisuun nandya rë distritu Samaria ta; ⁶tángun hiscan siu xuta nandya rë Israel, xuta jan ne tangun me cojo ngu chu tsánga rë Nina xi cachaja chu.

⁷Tuhun cumachaya rë xuta cjuandajiyi rë Nina xi jima tiña gobiernu xi sahmi me. ⁸Nihñu xi cuma ndaja xuta xi yaha chuxin rë me chíhin vitaha, hacuaaha naxunxun xitsehen. Ngahñu xi meje nuju xi cuatjin nihñu ne, tu cuatjo ni sacu nuju, vëhë xi hacuaaha tu cuatjo ni tuhun ngahñu jan.

⁹Xicachjuun oro o sá quicha tyava o tu mé ni tujún xi cuinchunndu-jun cahntsua tsá tujún nuju xi tsêhë gastu nuju. ¹⁰Xicachjuun changa, xicachjuun ngu xúta tsjian, hacuaaha xicachjuun ngu xúta chuxinxhtë o sá ngu bastón ta, xuta xi sahmi me xá ne, tsêhë xá jan sacu rë me gastu rë me.

¹¹Cuanitjin ne, tu mé ni nandya o sá tu mé ni ranchun xi cuisuhun ne, ngajan cuinchunsun ngu xuta xi ndaja xahasen rë me, ngajan ndava me ne, nechuncahndun hisca xi cuetjunixun tsêhë nangui jan. ¹²Hane hya xi cuisuhun ngu ndihya ne, tinújun ngu nina cuitjin: “Nina sua nuju me cjuandaja cjuajeya.” ¹³Hane sá xi nai rë ndihya jan ndaja vëë me yun ne, catisatë rë ndava me jan cjuajeya; peru sá xi hacuiin ndaja vëë me yun ne, satiin rë me cjuajeya jan. ¹⁴Hane hiscan xi tjin xuta xi cjuahatsjaain nuju me, xi chjuhun ndiya xi cuetjunixun tsêhë nandya vëhë ne, titsunu chojo rë ntsacu. ¹⁵Cuichjá cojo nuju ngu cjuaquixi ta hya xi cuechú nixtin xi tsichuva Nina xuta tsêhë jyë rë me ne, hitsë sa jyë castigu cuatju xuta tsêhë nandya xi cafahatsjaain nuju jan, xi cumá rë xuta tsêhë nandya Sodoma cojo xuta nandya Gomorra.

Cjuañihi xi cuatjun cuma

¹⁶Ngahan titsingátju nuju ngayun xuta jeya xi cuangun ngajñi rë xuta hnga cacun sacuaaha cjue ngu chu tsánga ngajñi rë chu cjan rë. Vêhë xi meje rë xi ndaja quicuntacun sacuaaha quicuncacun chu yë, peru hacuiin tsavi yun sacuaaha tsajin tsavi chu paloma. ¹⁷Peru nechun cuidadu ta, cjuaha nuju xuta cjuecojo nuju me xcun xutaxa rë ndihyavasen, hacuaaha cuaja nuju me ngajan yungun rë me, ¹⁸hisca cjuecojo nuju me xcun gobernador, hacuaaha cjuecojo nuju me xcun me xi vitexa me jingujyë ni nandya. Cuatjin cuangun

ngatsë rë xi ladu naha má ngayun. Ngatsë rë vëhë sacu nuju cahndë xi ninguixun cjuá xi cavicuyá nuju xcun xuta jan cojo xuta xi hvíin me cjuá rë Nina. ¹⁹ Hya xi cuatjin cjucojo nuju me ne, hacuiin cuityjanguntacun tsëhë hacutjin xi ninguixun ta, tsëhë xi hora vëhë ne, Nina sua me ngayun cjuá xi nicuyun. ²⁰ Ta tsëhë xi hacuiin cjuá nuju xi cuinújun ta tsëhë Hasen rë Nina cuinduva cjuá xi cuinújun.

²¹ 'Hacuaha xuta ladu naha ne, hntsë me, cuinchajyë rë me, xutacha rë me, cuinchajyë rë me, quihndi rë me cuinchajyë rë me cojo sa xi xutaxa rë ne, cjuaha rë me me ne, tsiquehen rë me. ²² Yëjë ni xuta ne, choho scuëë nuju me, tsëhë xi ladu naha ngayun. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. ²³ Hya xi tsujyihiyatjengui nuju me ngu nandya ne, tangun ngu nandya tiñataha ta, cuichjá quixë cojo nuju ta xi chaja sa cuatjun jinguyjë ni nandya tsëhë nangui rë Israel ne, cúa ngahan Quihndi rë Xuta.

²⁴ 'Ngu cha xi sehe tivutaya matsejen ne, hacuiin hitsë sa matitjun cha xi cumá rë maestru rë cha, cuanitjin ne, ngu cha hndixahan ne, chuva venguichji rë cha xi cumá rë nai rë cha. ²⁵ Catamanguacacun cha tsëhë xi cuechú nixtin xi tangun cuenguichji rë cha cojo maestru rë cha o tangun cuenguichji rë hndixahan cojo nai rë. Ha chuva vëhë ni cuatjun ta sá xi choho cuichja xuta nai rë ndihya ne, ngu xitsehen me, hitsë sa choho cuichja me tsëhë xuta rë nai rë ndihya jan.

Xicarcuun xuta

²⁶ 'Xicarcuun xuta condra nuju. Yëjë ni xcusun xi casetsanguí ne, cuechú nixtin xi chjaháxin rë xi titsanguí rë. Vëhë xi yëjë ni xcusun xi hma ne, handasa sahmanguí ne, peru cuechú nixtin xi cuetjucaa tsejen. ²⁷ Yëjë ni cjuá xi cuichjá cojo nuju hiscan jñu ne, cuinújunsun hiscan hasen. Yëjë ni cjuá xi cuichjáhma ne, cuechú nixtin xi cuinuhya rë jinguyjë ni nandya. ²⁸ Xicarcuun xuta xi cuma tsiquehen yojo nuju, peru ngaxtun vëhë ne, tsajin me dañu ma sahmi me cojo hasen nuju. Hitsë sa ndaja ne, rcun Nina, me xi tjin rë chuva rë xi tsiquehen me yojo nuju hane hacuaha tsingatjenya nuju me hiscan xi má hasen nuju castigu.

²⁹ 'Chutsujun ta jo chu nisë langa ne, ngu ni tujún chji rë chu, peru handasa cuatjin ne, hiscan ngu chu cumaji cueya chu sá xi suaain Nina cahndë. ³⁰ Hane ngayun ne, hisca jimangu tsjarcun ne xqui tjin rë Nina. ³¹ Vëhë xi xicarcuun ta, tsëhë xi jimangu ngayun ne, hitsë sa jercu vengui chji nuju xi cumá rë chu nisë vë, handasa jemu cjín chu.

³² 'Yëjë xuta xi tsinguixi me xcun yahnga xuta xi xuta ladu naha má me ne, hacuaha ngahan tsinguixë xcun Nahmi naha xi tacun ngahnga xi xuta ladu naha má me. ³³ Peru yëjë xuta xi tsinguixiin me xcun yahnga xuta xi hacuiin xuta ladu naha má me ne, hacuaha hacuanitjin ni tsinguixë ngahan xcun Nahmi naha xi tacun ngahnga.

Ngatsë rë cjuá rë Jesucristu xi sahmi condra xutacjin xicjin me

³⁴ 'Xi má nuju ngayun ne, ¿há cjuajeya canduvácojo xi cumá rë xuta ngasunhndë? Hacuiin cuatjin. Ngahan ne, si canduvá cojo. ³⁵ Canduvá tsinguetsuntaha xicjin xuta. Cha quihndi ne, sahmi condra cha nahmi rë cha, hane na quihndi ne, sahmi condra na naa rë na, hane jahnda ne, sahmi condra na nahya rë na. ³⁶ Cuatjin xuta condra rë me ne, cuma ni xuta rë me.

³⁷ 'Sá xi ngu me ne hitsë sa tsihmu cacun me nahmi rë o sá xi naa rë me xi cumá ná ngahan ne, vechiin chuva rë xi tsahan cuma me. Hacuaha sá xi ngu

me ne hitsë sa tsihmu cacun me quihndi rë me sá xihin sá chjuun xi cuma rë xi tsihmu cacun me ngahan ne, vechiin chuva rë xi tsahan cumá me. ³⁸ Ha cuanitjin ne, sá xi ngu me ne miji cjeuñahñu xahasen rë me xi cjucojo me ndiya naha handasa cueya me xcun cru ne, cumaji cuechu me chuva rë xi tsahan cumá me. ³⁹ Xuta xi nguehe ni ngasunhdë meje cjuenduju me cojo cjuahñu rë me ne, titsichajá me cjuahñu xatsë xi sua Nina me. Peru xuta xi titsichajá me cjuahñu rë me nguehe ngasunhdë ne ngatsë naha ne, hatuxa sacú rë me cjuahñu xatsë xi sua Nina me.

Cjuatjo xi sua Nina

⁴⁰ Xuta xi cjuahatsja me yun, tangun sacuaaha xi cjuahatsja ná me ngahan suva, hane xuta xi cjuahatsja ná me ne, tangun sacuaaha xi cjuahatsja me Nahmi naha, me xi catsingatju ná. ⁴¹ Xuta xi cjuahatsja me ngu me xi chja me cjuá rë Nina ne ngatsë xi chja me jan cjuá rë Nina ne, tangun chji sacú rë me cojo me jan. Hacuaha xuta xi cjuahatsja me ngu xihin xi tyjahi cjuatacun rë me xcun Nina ngatsë rë ndaja xihin jan ne, tangun chji sacú rë me cojo xihin jan. ⁴² Cuanitjin ne, xuta xi sua me ndastu ngu vasu nandá cjuahatsja tu yo ni xi xuta ladu naha ne handasa jemu yuma jyih me ne, sacú chji rë me ngatsë rë xi cuatjin sahmi me cojo xuta xi tjengui ná.

11

Cha xi catsingatju Juan Vitenda rë Xuta

¹ Hya xi camá ne, xi cajnetaha cjuá xi cavitexa Jesús cha xi tejó má jan, sehe cavetjuxin me quiji me nandya xi siutahndee, ngajan cavicuya me xuta cachja me cojo tsëhë cjuandajyih rë Nina.

² Nixtin hya ne, ha jiya Juan Vitenda rë Xuta ndavaya, hane ngajan camachaya rë me tsëhë xcusun xi sahmi Jesús. Vëhë xi catsingatju me ngujo cha ladu rë me xi quiji cha ³ cavinenguise cha Jesús cuitjin:

—¿Há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin cavinenguise xuta xi catsingatju Juan jan.

⁴ Hya xi camá ne, catsicuya Jesús cjuá cojo cha xi cuacun jan hane cuitjin cachja me:

—Tjangun ne, sehe tinújun cojo Juan yëjë cjuá xi canuhyun cojo yëjë xcusun xi cahyun. ⁵ Tinújun ta xuta rcá ne, camá camatsejen rë me; xuta rëngun ne, camá quijindaja me; xuta xi yaha rë chíhin vitaha xi setaha jojo naja ne, camandaja me; nima ne, cavuya nga cjuahñu; xuta yuma ne, casacu camachaya rë me cjuandajyih rë Nina. ⁶ Hacuaha jemu ndaja tsëhë tu yo ni xuta xi hacuini tsismicacun me xi mangu cacun me cojo ná. —Cuatjin cachja Jesús.

⁷ Hane hya xi cavetju quiji xuta ladu rë Juan jan ne, sehe cavetsihin cachja Jesús cojo xutacjin jan cuitjin tsëhë Juan:

—Hya xi cavetjun catsangun ngajan ngu xín tsëhë nandya catsangun tjengun Juan matsejen ne, ¿há caningatuhuntacún xi cuechuntuhun ngu xihin xi hacuini ngu ni cjuatacun rë me, sacuatjin rë ngu ndeje xi fi nguehe fi ngajan rcu sacuatjin cjuí tjo? ⁸ O há tsajin ne, ¿há caningatuhuntacún xi cuechuntuhun ngu xihin xi yaja ngu tsjan xi jemu tu ndajyih camahani? Hacuini cuatjin. Ha hyaan matsejen ta xuta xi jercu tu ndacun camahani tsjan vaja me ne, sacuini naja ngajan xin jan, ta sacú naja ndava ngu xuta nchina. ⁹ Peru ngayun matsejen ne, catsangun cachutsujun ngu profeta. Hacuaha cjuaquixi xi vëhë cachutsujun. Peru profeta Juan vë matsejen ne,

hitsë sa vengui chji rë me xi cumá rë yějë sa profeta xi yahnga. ¹⁰ Hacuaha me vëhë xi cachja Nina tsëhë me xcun xujun rë me cuitjin:

Ngahan ne, tsingátju titjun ngu cha xi scuxaha cjuatacun rë xuta tsëhë xi cjeuhe ngaye.

¹¹ Cuichjá cojo nuju matsejen ta ngajñi rë yějë xuta xi catsin me tsëhë naa rë me matsejen ne, tsajin ngu xi hitsë sa vengui chji rë xi cumá rë Juan. Peru hya xi cuetsihin Nina sahmi me gobiernu ngeueh ngasunhndë matsejen ne, xuta xi chuya cuengui chji rë me nixtin hya matsejen ne, hitsë sa cuengui chji rë me nixtin hya, xi cuma rë xi vengui chji rë Juan quihndë.

¹² Hisca nixtin xi caxtenda Juan hisca nixtin quihndë ne, má cjuasuë xi satë rë gobiernu xi sahmi Nina; xuta ne, meje cuisehen me ngajan, handasa cojo cjuachan. ¹³ Xi chaja sa nduva Juan ne, yějë ni xujun xi catsihindu profeta cojo xujun rë ley ne, suva casua camachaya rë xuta tsëhë gobiernu xi sahmi Nina. ¹⁴ Sá xi meje nuhyun cjuaquixi ne: Juan ne, hacui Elías, xi sehe nduva xu. ¹⁵ Yo ngayun xi tjin nuju cjuasua xi cuinuhyun cju vihi matsejen ne, ndaja tetuhunrcun.

¹⁶ Ngayun xuta tsëhë nixtin vihi matsejen ne, ¿mé xi tangun ngayun cojo? Tangun ngayun cojo langa xi siu ngajan ndetsin, xi jindaya xicjin ¹⁷ cojo cju vihi: “Canijani tsujun ne, mijí xtun; casin va ne, mijí chjihndun.” Cuatjin jindaya langa. ¹⁸ Cuatjin chjá cojo nuju matsejen ta, Juan xi vitenda nuju ne jini me niñu hacuaha hviiin me xan, hane nújun ta jiya xitsehen xahasen rë me. ¹⁹ Hane ngahan xi Quihndi rë Xuta Jain matsejen ne, jinë hacuaha hvë, hane nújun ta ngu cha cahntsuaniniñu ngahan, ngu cha cahntsuxan ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan. Tsejen xi ndaja ngu cjuatacun xi casacu rë ngatsë rë xi ndaja tivetjucaa tsujun xi tinihñuchuhun.

Chojyihi tsëhë xuta nandya xi vindeyaain cjuatacun rë me

²⁰ Hya xi cama ne, cavetsihin Jesús chjataha me xuta nandya jani hitsë sa jemu casahmi me cjuarcun camá, ta catsindeyaain me cjuatacun rë me. Cuitjin cachja me:

²¹ —Jemu chojyihi tsujun xuta nandya Corazín! ¡Hacuaha jemu chojyihi tsujun xuta nandya Betsaida! Jemu chojyihi tsujun ta, tsëhë xi sá xi xutaxín tsëhë Tiro cojo xutaxín tsëhë Sidón cavëë me cjuarcun xi cahyun ne, ha catsindeya me cjuatacun rë me, hacuaha ha cavajá me tsjian xi sacuaaha tsánaxá hacuaha caviyuju me ngajñi ndesu, sacuaaha xcusun naja hya xi choho má naja. ²² Vëhë xi hya xi tsichuva Nina yějë xuta tsëhë jyë rë me ne, xuta nandya Tiro cojo xuta nandya Sidón ne, hitsë sa chuya castigu cuatju me cumá xi cumá nuju ngayun xuta nandya Corazín cojo ngayun xuta nandya Betsaida. ²³ Hane ngayun xuta nandya Capernaum ne, ¿há cuangun hisca ngahnga hiscan tacun Nina? ¡Hacuiin! Hatuxa cuangun nduchin, cahndë hiscan fi hasen rë nima ta, tsëhë xi sá xi xuta tsehen tsëhë Sodoma cavëë me cjuarcun xi cahyun ne, ha catsindeya me cjuatacun rë me, hane tacun cuaha nandya jan hisca quihndë. ²⁴ Vëhë xi hya xi tsichuva Nina xuta ne, hitsë sa chuya castigu cuatju xuta Sodoma xi cumá nuju ngayun xuta nandya Capernaum.

Casahmi jyë casahmi hnga Jesucristu Nina

²⁵ Nixtin hya ne, cachja Jesús cojo Nina cuitjin:
—Ngayun nahmi naha ne, sahme jyë sahme hnga nuju, ngayun xi Nai rë ngahnga cojo nanguí, ngayun, tsëhë xi ngayun caveyúnhmu cjuatacun vëhë

xi cuma rē xuta xi jemu vechú cjuatacun rē, hane catuhun camachaya rē xuta xi jñu tsēhē me. ²⁶ Ngayun nahmi naha, cuatjin canihñu ta, tsēhē xi cuatjin xi cachuya nuju. —Cuatjin cachja Jesús cojo Nina.

²⁷ Cachja me cojo xuta:

—Yējē ngarca matsejen ne, Nina Nahmi naha casua ná me. Tsajin hisca ngu xi vēē yo xi Quihndi rē Nina matsejen ta suvá ni Nina Nahmi naha xi vēē me. Hacuaha tsajin yo xi vēē Nahmi naha matsejen ne ta, suva ni ngahan xi Quihndi rē me ngahan xi hvē, cojo tu yo ni xi ngahan meje suá cumachaya rē. ²⁸ Ngayun xi fenda rē xahasen nuju, ngayun xi hai tjin tacun tsēhē jyē nuju ne, nduvun tjengun ná, hane cjuaháxēn vēhē xi sahmi hai nuju. ²⁹ Ningatuhun xi chjuhun yugu naha sacuaa má cojo ndyaja hya xi cjuaha chu xa sahmi chu, hacuaa hchjayunngun tsahan. Ta ngahan ne, tjin ná cjuandaja cjuajeya, hane sacu hñu rē xahasen nuju. ³⁰ Ta yugu xi suá nuju vihi ne, hacuiin hai, tanguaain cojo tsēhē chu ndyaja, hane xa xi suá nuju ne, hacuaa hacuiin hai.

12

Cavotohosun xuta ladu rē Jesucristu trigu nixtin xi chjahájenda rē

¹ Nixtin hya ne, cuatjin camá ngu nixtin xi chjahájenda rē. Hora xi tivatju Jesús cojo xuta ladu rē me hiscan tjin tjē trigu ne, cama vojo rē xuta ladu rē me, cavetsihin cavotohosun xuta jan tsē tsē trigu jan ne, catsufētsja me cajine me. ² Hane cha tsēhē partidu fariseo xi cavēē cha xi cuatjin casahmi me, cachja cha cojo Jesús cuitjin:

—Chutsujun ní, xuta ladu nuju ne, tisahmi me xa quihndē nixtin xi chjahájenda rē, handasa chja ley naja xi cumaji xi cuatjin nihña.

³ Hane cafayangui Jesús cuitjin:

—Ngayun, ha cachutayun xcusun xi casahmi xutachanga naja David hatsēē nixtin hya xi jercu camá vojo rē me cojo xuta xi siu cojo me. ⁴ Cavisehen me ndava Nina, hane cafaha me pan xi viyuju xcun Nina xi tsajin cahndē xi tu yo ni sinē ta suvá ni nahmi xi cuma sinē me. Peru David ne, cajinē me hacuaa casua me cajinē xuta xi siu cojo me. ⁵ Cuanitjin ne, ha cachutayun xi chja cjuā rē ley naja xi nahmi xi sahmi xa ndava Nina ne, ngajan tjin xa xi satē rē me nixtin xi chjahájenda rē peru tsajin jyē xi cuma rē me handasa tisahmi me xa nixtin hya. ⁶ Cuichjá quixē cojo nuju ta nguehe tacun ngu xi hitsē sa meje rē xi chjahanrcun rē xi cumá rē yungun xi matitjun. ⁷ Cjēē cuijnercun cjuā xi chja: “Hitsē sa ndama ná xi cumayuma nuju xingun tsēhē xi cumá rē xi nicuhun chu sacuaa cjuatjo xi tuhun ná.” ⁸ Hacuaha cachja sa Jesús cuitjin: Ngahan xi Quihndi rē Xuta Jain ngahan ne, ngahan xi vitéxa mé xi cuma nixtin xi chjahájenda rē.

Casahmi Jesucristu xi camandaja cha xi quixihñu ngu tsja

⁹ Hya xi camá ne, xi quiji sa Jesús ne, cavisehen me yungun ngajan. ¹⁰ Hane tacun ngu cha cahntsua yungun jan xi quixihñu tsja quixi cha. Hane cha xi vicuya cjuachacun cojo cha fariseo ne, cavinenguise cha Jesús cuitjin:

—¿Mé xi tsingatihi ley xi nihña nixtin xi chjahájenda rē? ¿Há sua cahndē xi nirquen rē xuta hmu rē? —Cuatjin cavinenguise cha me xi sehe cuma cunichajyē cha me.

¹¹ Hane cuitjin cafayangui Jesús tsēhē cha:

—¿Há cuma xi ngu ngayun handasa hya xi nixtin xi chjahájenda rē ne, cuanguun naxun chu tsánga nuju sá xi cjuinenguia chu ngu ngojo xi jemu

nungun? ¹² Sá cuatjin vengui chji rë ngu chu tsánga ne, hitsë sa cjin vengui chji rë ngu xihin. Vëhë xi tsingatihí ley xi nixtin xi chjahájenda rë ne nihña cjuandaja.

¹³ Sehe cachja Jesús cojo cha hmu rë cuitjin:

—Nixingun ntsun. —Cuatjin cachja me.

Hane cuatjin casahmi cha. Hane tsja cha xi quixi ne, ha camandaja sacuatjin jyihí tsja cha xingu. ¹⁴ Hya xi camá ne, cha partidu fariseo jan ne, cavetju cha quiji cha, cachja cha ngajñi rë cha cojo xicjin cha xi meje rë xi sacuya ra xcusun hacutjin cuma tsiquehen cha Jesús.

Cjua xi catsihindu profeta tsëhë Jesús

¹⁵ Peru Jesús ne, machaya rë me cjuatacun jan, hane cavetju me quiji me tsëhë ngajan. Hacuaha cjin xuta quiji tjengui cojo rë me, hane catsindaja me yëjë ni xuta tsëhë chíhin xi má rë me, ¹⁶ sehe cachja me cojo me xi cuichjaain tē me yo me jan. ¹⁷ Cuatjin casahmi Jesús xi cuetjucaa cjua xi catsihindu profeta Isaías xi chja cuitjin:

¹⁸ Cha vihi ne, cha mosu naha, cha xi cavitéxa ngahan, cha xi tsihmúcacun, cha xi ndama ná tsëhë.

Suá cha Hasen naha, cuichja cha cojo xutaxín tsëhë hacutjin quixi Nina hya xi tsichuva me xuta.

¹⁹ Cha vihi ne, hacuini cjin cuisiajmi cha cojo xuta; hacuini jindaya tē cha xi chja cha.

Cuichjaain hñu cha cojo sa xi jemu catjaha cuenda rë cha xuta xi tsuyihiya me ndiya tē.

²⁰ Xcotaain cha cjuatacun rë hisca ngu xuta yuma xi tangun me cojo ngu ndeje xi caxtane, hacuaha sahmi chuvaain cha cjuatacun rë xuta yuma xi tangun me cojo ngu candil xi ha ndiya coho.

Yëjë xcusun vihi ne, sahmi cha hisca xi cumatsejen cjuaquixi rë gobiernu rë cha.

²¹ Hane xuta ngasunhdë ne, cuetahacacun me cha.

Cachja xuta xi Satanás casuaxa rë Jesús

²² Cavechú ngu nixtin xi cafehe tjengui xuta Jesús hane yaha me ngu cha xi jiya xitsehen xahasen rë cha. Rcá cha jan hacuaha lihmi cha. Hya xi camá ne, Jesús ne casahmi me xi camandaja cha jan hisca cama cachja cha hisca cavutsejen ndaja cha. ²³ Hane xutacjin ne, jemu quijircun rë me cachja me cuitjin:

—¿Há cumacacun xi cha vihi hacui quihndi tjë rë David xi tsingatju Nina?

²⁴ Peru cha partidu fariseo xi camachaya rë cha cjua jan ne, cachja cha cuitjin:

—Hacuini suvá cha vaxëxin cha xitsehen ta Beelzebú, xitsehen xi matitjun ne, vëhë casuaxá rë cha xi vaxëxin cha xitsehen.

²⁵ Peru Jesús ne, tsëhë xi ha vëë me mé xi tsingataha cacun xuta xi cuacún jan ne, cuitjin cachja me cojo cha:

—Hya xi xuta tsëhë ngu nandya ticjan me ngajñi rë me cojo xicjin me, cjuë ngahñu cjua rë, hane cjuincanii rë me. Hacuaha sá xi xuta tsëhë ngu ndihya ne, scaan me ngajñi rë me ne, ngajan chajá ngahñu cjua rë ndihya jan.

²⁶ Ha cuanitjin rë Satanás ta, sá xi Satanás ne vaxëxin xitsehen xi yahnga ne, cavatëcja ngahñu cjua rë, hane cumaji cuitexa xicjin. ²⁷ Vëhë xi sá xi Beelzebú casua ná xa xi vaxëxen xitsehen ne, hacuaha ha Beelzebú vëhë casua rë ngu ngu xuta ladu nuju xa xi hacuaha vaxëxin me xitsehen. Vëhë xi me vëhë ni cuma cuichja me xi cuaintjin cjua xi nújun xi Beelzebú casua ná xa. ²⁸ Peru

sá xi hacuini Beelzebú casua ná xa ta Nina casua me ne, ngajan matsejen xi gobiernu xi sahmi Nina ne, ha tivetsihin.

²⁹ 'Hisca ngu cha chëjë cumaji tu cuisehen ni cha ndava ngu xuta xi hñu cjuarë sá xi tacun me. Titjun tsihñu cha xuta xi ndava ta cuatjin xi cuma tsichëjë cha tsëhë me.

³⁰ 'Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta.

³¹ 'Hacuaha cuichjá cojo nuju cjuaquixi ta tu mé ni jyë xi sahmi xuta hacuaha tu mé ni cjuarë xi choho cuichja me tsëhë xuta ne, sacú rë me cjuaninchataha sa xi cuijacun me jyë jan. Peru tu yo ni xi choho cuichja tsëhë Hasen rë Nina ne, tsajin cjuaninchataha xi cuma rë. ³² Cuanitjin ne, tu mé ni cjuarë xi choho cuichja xuta tsëhë Quihndi rë Xuta Jain ne, cuma sacú rë me cjuaninchataha. Peru tu yo ni xi choho cuichja tsëhë Hasen rë Nina ne, tsajin cjuaninchataha nguehe nixtin vi, hacuaha tsajin cjuaninchataha nixtin xi nduva.

Ngatsë ni rë xcusun xi sahmi me ne, tsejen mé xcusun xuta me

³³ '¿Jarë xi meje nuju?, ¿há xi ndaja ya hacuaha ndaja tu rë? o há tsajin ne, ¿há xi ndajin ya hane ndajin tu rë? Jima ngu ya ne, cuma tsejen sá xi ndaja o sá xi ndajin ngatsë rë tu xi sua. ³⁴ Ngayun quihndi rë chu tsehen, maji nújun cjuarë xi ndaja. Maji ta tsëhë xi cjuarë xi quitsë rë xahasen nuju ne, vëhë cjuarë xi vetju nújun. ³⁵ Vëhë xi xuta ndaja ne, tsëhë cjuandaja xi tetjo rë me cahntsua xahasen rë me cojo cahntsua cjuatacun rë me ne, tsëhë ngajan vetju cjuandaja. Cuanitjin ne xuta tsehen ne, tsëhë cjuatsehen xi tetjo rë me ne, ngajan vetju cjuatsehen. ³⁶ Cuichjá cojo nuju ta tu mé ni cjuarë xi cuinújun, handasa tu visiajmu ni ne, tuhuncuenda rë Nina cjuarë jan nixtin xi tsichuva me yaan. ³⁷ Cuatjin ta cojo cjuarë xi canújun ne, cjuarë jan cuma testigu xi cuetjunxun tsëhë castigu, o sá tsajin ne, cjuarë xi canújun vëhë cuma testigu tsëhë castigu xi cueyun.

Cafehya xuta tsehen ngu seña xi sua Nina

³⁸ Ngajan xi ngujo cha xi vicuya cjuachacun cojo ngujo cha partidu fariseo catsicuya cha tsëhë me, cuitjin cachja cha:

—Maestro, ningacun niji ngu cjuarcun xi sua seña yo ngayun.

³⁹ Ngajan cafayangui Jesús cuitjin:

—Ngayun xuta tje rë Israel xi nechun nixtin vihi matsejen ne, tsehen cjuatacun nuju, hacuaha majotacun xcun Nina. Vëhë xi chjahyun ná ngu seña xi sua Nina. Peru seña vëhë ne, sacuiin nuju ta ngu ni seña xi sacú nuju matsejen ne, vëhë seña xi casua profeta Jonás hatsëë nixtin. ⁴⁰ Sacuatjin rë profeta Jonás ne, jyan nixtin cojo jyan nixten caseya me cahntsua chu ti jyë, hane ha cuanitjin ni ne cumá rë Quihndi rë Xuta Jain, ta jyan nixtin cojo jyan nixten seya me ngahma nangui. ⁴¹ Hya xi cuechú nixtin xi tsichuva Nina jyë nuju, ngayun xi nechun nixtin vihi ne, yëjë ni xuta nandya Nínive matsejen ne, cjuarë cuinchajyë nuju me; ta me vëhë ne catsindeya me cjuatacun rë me hya xi casua profeta Jonás camachaya rë me cjuarë rë Nina. Peru nguehe ne ha tejña ngahan sacuaha ngu seña xi hitsë sa vengui chji rë xi cuma rë profeta Jonás. ⁴² Hacuaha nixtin hya ne, na xi cavitexa ngajan nangui Sabá ne, cjuarë cuinchajyë nuju ta, tsëhë xi jemu cjuañihi cavatju na tsëhë xi jercu cjin hiscan canduva na xi cuihndë na cjuatacun ndacun rë Salomón, me xi cavitexa xuta naja nixtin hatsëë. Peru nguehe tejña ngahan xi hitsë sa vengui chji rë cjuatacun naha xi cumá rë cjuatacun rë Salomón.

Xitsehen xi vuya

⁴³ Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndë hiscan xi cuejñajenda. ⁴⁴ Hane xi sacuiin rë cahndë hiscan cuejñajenda ne, cuitjin tsingatahacacun: “Cúya rë cjuë ndya naha hiscan xi cavétjuxen.” Cuatjin tsingataha cacun xitsehen jan. Hane hya xi vuya fehe xitsehen jan cahntsua xahasen jan ne, vutsejen xitsehen jan cahntsua xahasen jan sacuaha ngu ndihya tiya, ngu xi caxtecha tyjahi tyjahi, hacuaha siundaja chichihin ngu tsé ngu xti. ⁴⁵ Xi vutsejen xitsehen xi cuatjin jyihí jan ne, sehe fi jaha sa rë yatu sa xitsehen xi hitsé sa tsehen xi cumá rë vëhë ne, sehe visehen nga viyuyucahndë jan. Peru xi má ngascan ne, hitsé sa chojyihí tsëhë xuta vëhë xi cumá rë titjun. Cuitjin cumá tsëhë xuta xi siu nixtin vihi. —Cuatjin cachja Jesús.

Naa rë Jesucristu cojo xicjin me

⁴⁶ Hya xi tichja me cojo xutacjin ne, naa rë me cojo xicjin me ne, cafehettjen-gui me Jesús, hane maji vechútahacjin me xi cuichja me cojo ta tsëhë xi jemu quitsé xuta. ⁴⁷ Ngajan xi cachja ngu xi cachja cuitjin:

—Nutsujun ni. Ná nuju cojo nixti xingun ne, hinchacun me ngajan candatsen, xi meje nduvatjengui nuju me cuichja me cojo nuju. —Cuatjin casacu camachaya rë me.

⁴⁸ Hya xi camá ne, cavuya me catsicuya me cjua cuitjin:

—¿Yo xi má nuju xi ná naha cojo xingueen?

⁴⁹ Hya xi cuatjin cachja me ne, catsingacun tsja me xuta ladu rë me sehe cachja me cuitjin:

—Ngayun xi nechun nguehe ne, ngayun xi sacuaha ná naha cojo sacuaha xingueen ngayun ta, ⁵⁰ tu yo ni me xi sahmi me sacuaha meje rë Nahmi naha xi tacun me nahnga ne, me vëhë tangun ni cojo xingueen, cojo ná naha.

13*Ejemplu tsëhë cha xi catsitjë trigu*

¹ Nixtin hya ne, cavetjuxin Jesús tsëhë ndihya ne, quiji me tjehen laguna ngajan cavejña me. ² Hane ngajan camatangun xutacjin. Vëhë xi cavisehen me ngu barcu ngajan cavéjña me. Hane xutacjin jan ne, caviyuju me nangui quixí tjehen nandan jan. ³ Sehe cavicuya Jesús me jemu cjin cjua sacuaha xcusun rë ejemplu. Cuitjin cachja me:

—Cuejña ne xi ngu cha xi tsitjë cha trigu matsejen ne, cavetju cha quiji cha xi tsitjë cha trigu. ⁴ Hane jinguyëjë rë xi titsitjë cha matsejen ne, ngujo matsejen ne, cavixu ndiya. Hane canduva chu nisë, catsicjë chu cajine chu.

⁵ Hane ngujo nga matsejen ne, cavixu hiscan xi jemu naxindya, hacuaha jemu chuya nihndë quisun. Ngajan jemu xati cavetju ta tsëhë xi hacuiin tjain nihndë quisun. ⁶ Hane xi cavetjuca tsuhi ne, cavaca rë cojo ndavá jan. Hane tsëhë xi tsajin tyjama rë xi nungun matsejen ne, caxintsen. ⁷ Ngujo nga ne, cavixu ngajñi nahyá. Hane xi camacha tangun matsejen ne, nahyá jan ne, vëhë casahmi hndë rë catsixi rë. ⁸ Hane xi yahnga matsejen ne, cavixu hiscan nihndë ndaja. Hane camayehe ne, ngujo ne casua tutjë rë ngu cientu sa cuatjin sacuatjin xi camatjë, ngujo nga ne, yachantë sa, hane ngujo nga ne, cantë sa sacuatjin xi camatjë. ⁹ Yo ngayun xi tjin nuju cjuasua xi cuinuhyun cjua naha ne, ndaja tetuhuncun. —Cuatjin cachja me.

Mé má ejemplu cachja Jesucristu cojo xuta

¹⁰ Hya xi camá ne, cafehetiña xuta ladu rë me cavinenguisse me Jesús tsëhë ejemplu xi chja me ta, ¿mé tsëhë xi ejemplu ni vicuya me cojo? ¹¹ Hane cafayangui me tsëhë xuta jan cuitjin:

—Nina ne casua me cahndë xi ngayun ne, cuijne rcu cjuatacun tsëhë gobiernu xi sahmi Nina, cjuatahahma xi titjun ne tsajin yo machaya rë. Peru yëjë sa me xi yahnga ne, casuaain me cahndë xi cuijnercu me. ¹² Me xi ha tjin rë cjuatacun jan ne, sua sa Nina me, ndaja cuijne rcu me. Hane me xi tsajin cjin rë cjuatacun jan ne, cjuahataha Nina hitsë xi tjin rë me. ¹³ Vëhë xi súvá ejemplu tichjá cojo rë me ta, handasa vutsejen me, peru sahmicuendaain me; visiñuju me ne, peru sahmi me sacuaaha xi vihndiin me hacuaaha vijnii rcu me. ¹⁴ Xi cuatjin sahmi me ne, sahlichihin me cjuá xi catsihindu profeta Isaías xi catsihindu cjuá vihi:

Handasa cuisñuju ngayun ne, peru ha tuxa cuijnii rcun;

Handasa chutsujun ne, peru cumatsijiin nuju.

¹⁵ Xuta xi cuacun vë ne, tichjá cjuatacun rë me, tyjavañuju me cojo tuxcun me ne, cavechja me, ta sá tu scuëë me cojo tuxcun me,

hane sá cuihndë me cojo tyjavañuju me,

hacuaha cuijne rcu me cojo cjuatacun rë me, sehe cuya me ladu naha xi cuaxëtjë me.

¹⁶ Peru ngayun ne, jemu ndaja tsujun ngayujun ni tsëhë xi hatuxa tichutsujun cojo tuxcun; hacuaaha visiñuju cojo tyjavañuju. ¹⁷ Nguehe cuichjá quixë cojo nuju ta jemu ndaja tsujun ta, tsëhë xi hacuaaha jemu cjin profeta hacuaaha jemu cjin xuta xi matitjun xi caviyuju titjun ne, jemu meje scuëë me xcusun xi ngayun tichutsujun, peru casacuiin cavëë me. Hacuaaha jemu meje cuisñuju me cjuá xi tivisiñuju ngayun, peru casacuiin cavisñuju me ta, tsëhë xi cjëë cuechu nixtin.

Cachja Jesús mé vijne ejemplu tsëhë cha xi catsitjë trigu

¹⁸ Cuatjin hindë ne, nuhyun mé meje cuichja ejemplu tsëhë cha xi catsitjë trigu. ¹⁹ Hya xi visiñuju ngu xuta cjuá tsëhë gobiernu xi sahmi Nina ne, peru vijniircu me cjuá jan, sehe vinduva Satanás ne, fahataha cjuá jan tsëhë xahasen rë me. Cjuá vi ne, hacui sacuaaha trigu xi cavixu ndiáa.

²⁰ Hane tsëhë trigu xi cavixu hiscan jemu naxindya ne, hacui sacuaaha hya xi vihndë xuta cjuá rë Nina, hane fahatsja me cojo cjuasua. ²¹ Peru trigu xi cuacun vë ne, jemu chúva tyjama rë vetju. Hacuanitjin ni vatju ngujo xuta má. Macjain rë me ngujo nixtin peru hya xi vehú ngu nixtin xi satë rë me cjuañihi o cjuandya xi sua xuta me ngatsë rë cjuá rë Nina ne, fëcacun me cojo cjuá jan. ²² Hane tsëhë trigu xi cavixu ngajñi nahyá ne, hacui sacuaaha hya xi vihndë xuta cjuá rë Nina, peru ha xcun xi cjuinduju me cojo nixtin rë me ne, tsingataha cacun me tsëhë cjuatacun xi satë naja nguehe ngasunhndë, hacuaaha meje rë me cjuanchina xi cjuicani rë, hane vëhë suaain cahndë xi cumajyë cjuá rë Nina cahntsua xahasen rë me, hacuaaha sahmi me ngu cjuandaja xi tsingacun xi xuta rë Nina má me. ²³ Hane hya xi vixu yahnga trigu hiscan nihndë ndaja ne, hacuaaha hacui sacuaaha hya xi vihndë xuta cjuá rë Nina hane vijne rcu me mé vitexa Nina, hane sahmi me cjuandaja. Tjin me xi jercu quisun cjuandaja sahmi, hane tjin nga me ne, chuya cjuandaja sahmi me, hane yahnga me, hitsë sa chuya cjuandaja sahmi me.

Ejemplu tsëhë xi jiyahma cojo tutjë rë trigu

²⁴ Sehe cachja nga me ngu ejemplu cojo me, hane cuitjin cachja me:

—Gubiernu xi sahmi Nina ne, cumá sacuaha camá hya xi catsitjê ngu xuta tutjê rê trigu ndaja xcun nangui rê. ²⁵ Peru nixten ne, hya xi jiñafê xuta ne, cafehe ngu xi condra rê me catsitjê cha ngu ndiji xi meje tanguncun cojo trigu. Ngajan ngajñi rê trigu jan catsitjê hma cha sehe quiji cha. ²⁶ Hya xi camá ne, hisca xi cavetju xca rê, cavetju tú rê, sehe camachaya rê me tsêhê ndiji jan. ²⁷ Hya xi camachaya rê me ne, cafehe mosu rê me xi tsêhê nangui jan, cavinenguise mosu me: “Nai, tutjê ndaja xi camá canitjun, ¿há cutjin cavetjun xi casecjan cojo ndiji ne?” ²⁸ Ngajan cafayangui me tsêhê mosu jan: “Ngu me xi condra naha casahmi me.” Hane cafayangui mosu jan cuitjin: “¿Há hanguin chjanijñi ndiji jan?” ²⁹ Peru cafayangui me cuitjin: “¡Jéya! Caveni chjanujñu ndiji jan ta sá tsajin ne, hacuaha chjanu trigu xi ndaja. ³⁰ Catamacha catsijo, sehe cuichja hya xi tjune rê xi tjun ni cjuanejñi cha ndiji, sahmi cha xtê rê xi cuaca cha. Sehe cjuaya cha trigu, cuinchandaja cha cahndê rê.” Cuatjin fi ejemplu xi cachja Jesús.

Ejemplu tsêhê tutjê lihndi

³¹ Jesús ne, cachja nga me ngu ejemplu cuitjin:

—Gubiernu xi sahmi Nina ne, hacuaha cumajyê tangun cojo ngu tutjê ya mostasa ta jemu lihndi camahani ne. Tutjê jan ne, cafaha ngu cha catsitjê cha xcun nangui rê cha; ³² Tutjê rê ya mostasa ne, handasa hitsê sa lihndi má xi cumá rê yêjê ni tutjê xi yahnga ne, hya xi camá cha ni, hitsê sa jyê camá xi cumá rê yêjê ni ya xi yahnga. Cuma ngu ya xi hiscan nisê xi vitjen chu ngahnga ne, cuma sahmi chu ndava chu rcu ya jan.

Ejemplu tsêhê san rê pan

³³ Cavuya cachja nga Jesús cuitjin:

—Gubiernu xi sahmi Nina ne, hacuaha tangun sahmi sacuaha san rê pan xi visecjan ngu chjuun ngajñi rê jyan chuva rê nahyu rê pan cojo sa xi sahmixa ngajñi rê yêjê ni nahyu cjin jan.

Me tsêhê xi Jesús ne, sahmixa me cojo ejemplu

³⁴ Cuatjin cachja Jesús cojo xutacjin, ta ejemplu ni cachja me cojo xuta ne, cachjaain me chichihin ta, suvá cojo ejemplu. ³⁵ Cuatjin cavicuya me sehe cuetjuaca cjuaxi catsihindu profeta ta: Cjua xi vetju ntsuva ne, suva ejemplu ni; Cuichjá cjuaxi hinchahma hisca ntsacu cavetsihin ngasunhndê.

Cachja Jesús mé vijne ejemplu tsêhê ndiji jan

³⁶ Hya xi cavatju cachja me, sehe catsicjê Jesús cjuaxi cojo xutacjin jan, cavisehen me cahntsua ndihya hane ngajan cafehe tjengui rê me cha ladu rê me, cavinenguise cha me ¿mé vijne ejemplu tsêhê ndiji nguijña jan?

³⁷ Sehe cafayangui Jesús cuitjin:

—Cha xi catsitjê trigu ne, hacui Quihndi rê Xuta Jain. ³⁸ Hane nguijña ne, hacui ngasunhndê. Tutjê ndaja ne, vêhê xuta xi vihndê me tsêhê Nina, hane ndiji jan ne, hacui xuta xi vihndê tsêhê xitsehen. ³⁹ Cha condra xi catsitjê cha ndiji jan ne, hacui xitsehen xi matitjun cha. Hacuaha nixtin xi cjuanga ne, hya xi cjuê ngasunhndê. Hane cha xi cjuanga ne, hacui ángel. ⁴⁰ Cuanitjin sacuaha ndiji xi casahmi cha xtê rê xi cueti, cuatjin cumá cojo xuta xi hndiin tsêhê Nina hya xi cjuê ngasunhndê. ⁴¹ Hya ne Quihndi rê Xuta Jain ne, tsingatju me ángel rê me xi cuahaxin me yêjê ni xuta xi candiya xicjin me ngajñi rê cjuatsehen cojo xuta xi sahmi me cjuatsehen, cuaxëxin me tsêhê gobiernu xi sahmi Nina. ⁴² Hya xi camá cavaxëxin me ne, scandiya

me xuta hiscan cuaca me ngu ndihi jyë, ngajan jemu squihnda me hacuaha jemu cuanerii nehñu me. ⁴³ Peru xuta xi tyjahi cjuatacun rë me xcun Nina ne, cumá me sacuaha tsuhi xi seti xi sua hasen rë camá ngajan gobiernu xi sahmi Nina nahmi rë me. Yo ngayun xi tjin nuju cjuasua xi cuinuhyun cjuahaha ne, ndaja tetuhunrcun. —Cuatjin cachja me.

Ejemplu tsëhë tujún xi caseyanijihma

⁴⁴ Xuta xi meje cuisehen gobiernu xi sahmi Nina ne, hacuaha tangun me sacuaha ngu cha xi casacu rë cha ngu cahndë hiscan xi caseyanijihma tujún cjin. Hane hya xi camá ne, cavetsa nga cha tujún jan, sehe quiji cha cojo cjuasua ne, caviteña cha yëjë xi tjin rë cha sehe cavechutaha cha chji rë xáhva jan.

Ejemplu tsëhë tuseti xi hnga chji rë

⁴⁵ Hacuaha xuta xi meje cuisehen me gobiernu xi sahmi Nina ne, tangun me sacuaha ngu cha viteña xi vanguise cha ngu tuseti xi hitsë sa ndaja seti. ⁴⁶ Hane xi sacu rë cha ngu xi jercu tu vengui chji rë ne, quiji cha caviteña cha yëjë xi tjin rë cha sehe cavechutaha cha chji rë tuseti jan.

Ejemplu tsëhë changa rë chu ti

⁴⁷ Hacuaha gobiernu xi sahmi Nina ne, cumá sacuaha ngu changa jyë xi catsingatjeya xuta ndachacun. Hane hya xi camá ne, ngajan cahntsua changa jan camá tangun yëjë xcusun chu ti. ⁴⁸ Vëhë xi hora xi catsë rë ne, cajuvé nga xuta changa jan ne cavejña me tjeheh rë ndachacun ngajan cavaxijin me chu. Chu xi chine ne, cavinchandaja me, peru cacandi me chu xi yahnga. ⁴⁹ Cuanitjin ne cumá hya xi cjuë ngasunhdë, ta cuinduva ángel ne, cuatëcja me xuta xi tsehen cjuatacun rë me tsëhë xuta xi tyjahi cjuatacun rë me, ⁵⁰ sehe scandi me xuta tsehen hiscan cuaca me ngu ndihi jyë. Hane ngajan ne, jemu squihnda me hacuaha jemu cuanerii nehñu me.

Cjuanchina xatsë cojo cjuanchina changa

⁵¹ Hya xi camá ne, Jesús ne, cavinenguise me xicjin me:

—¿Há cavijne rcu cjuá vi?

Ngajan cafayangui me:

—Juun, cavijnircuin.

⁵² Sehe ngajan cachja Jesús cuitjin:

—Hya xi ngu maestru xi vicuya me ley ne, sá xi scutaya me xi meje cuisehen me ladu tsëhë gobiernu xi sahmi Nina ne, sahmi me sacuaha nai rë ngu ndihya jyë. Xuta jan ne, vaxë me xcusun xatsë ne, hacuaha vaxë me xcusun changá tsëhë cahndë xi cavinchandaja me.

Jesús ne, cavuya me nangui rë me

⁵³ Hya xi camá cajnetaha cachja Jesús ejemplu vihi ne, sehe cavatju quijixin me. ⁵⁴ Hane xi quiji me ne, cafehe me nangui rë me, ngajan cavicuya me xuta cahntsua yungun rë. Hya xi camá ne, jercu cavëhërcun me Jesús, hane cachja me cuitjin:

—¿Jani cavutaya cha vihi ta jemu tjin rë cha cjuatacun? ¿Jani casacu rë cha cahndë xi sahmi cha cjuarcun? ⁵⁵ Cha vihi ne, quihndi rë cha chjineya jan. Naa ra ne, María hmí na. Hacuaha xicjin cha ne, hacui Jacobo, José, Simón cojo Judas. ⁵⁶ Hacuaha tichjá cha ne, xuta nandya naja. Ha hyun ta cuatjin peru, ¿jani casacu rë cha cjuá xi tichja cha?

⁵⁷ Cuatjin ne mijí cjuaha cuenda me cjuá rë Jesús tsëhë xi tangun nangui rë me. Sehe cachja Jesús cuitjin:

—Ngu profeta ne, macjain rë xuta me, peru hatuxa xuta nangui rë me macjaain rë me tsëhë me. Hacuaha xuta ndava me ne, macjaain rë me tsëhë me.

⁵⁸ Cuatjin camá ta tsëhë xi ngatsë rë xi macjaain rë xuta me ne, ndastu cjin cjuarcun casahmi me ngajan.

14

Xi má rë Herodes ne, Jesús ne, hacui Juan Vitenda Xuta

¹ Nixtin hya ne, camachaya rë me xi matitjun xi hmí rë Herodes cjuaxi tichja xuta tsëhë Jesús. ² Ngajan xi cachja me cojo xuta xi faha cuenda rë me ta:

—Cha vëhë ne, hacui nima Juan Vitenda Xuta. Handasa cahme nima, peru ha cavascaya rë, vëhë xi tjin rë cha ngahñu xi má sahmi cha cjuarcun.

³ Ta Herodes jan ne, ha catsingatju me cachjaha rë Juan ne, catsihñu me cha xi quiji cha ndavaya. Cuatjin casahmi Herodes ta tsëhë xi cuatjin cachuya rë na Herodía, chjuun rë hntsë Herodes. ⁴ Tsëhë na vë cachja Juan cojo Herodes cuitjin:

—Chja ley ta ndajintjin camahani xi chjahan chjuun rë xingueen.

⁵ Herodes ne, meje tsiqehen me Juan jan, peru camaji ta tsëhë xi xi má rë xuta ne, cha Juan ne, hacui profeta má cha. Hane Herodes ne, tsacjun me xuta. ⁶ Cuatjin camá xi hya xi cavechu nixtin rë suhi tsëhë Herodes, na quihndi rë na Herodía ne, catë na ngajñi xuta xi siu suhi jan. Hane jemu cachuya rë Herodes xi cuatjin catë na. ⁷ Sehe ngajan xi Herodes casua na me cjuaxi quixi rë me xi sua me na tu mé ni xi meje cjuehya na. ⁸ Ngajan xi na vë ne, hya xi ha cavinchangui na naa rë na ne, cachja na cuitjin:

—Meje ná xi cahntsua ngu tyuva ne, tuhun ná rcu Juan Vitenda Xuta.

⁹ Hya xi camá ne, jercu choho cama rë Herodes. Peru tsëhë xi hisca Nina caveyanangui me hane tsëhë xi xcun cjin xuta jan casua me cjuaxi ne, catsingatju me cjuaxi cuatjin cumá. ¹⁰ Hane cavitexa me sindadu cavatësun cha rcu Juan ngajan ndavaya. ¹¹ Hya xi camá ne, cafehe cha cojo rcu jan xcun ngu tyuva hane casua me na. Sehe quijitjengui na naa rë na, casua na naa rë na. ¹² Hya xi camá ne, xuta ladu rë Juan jan, cafehya me nima caveyaniji me. Sehe quiji me casua me camachaya rë Jesús.

Catsicjen Jesucristu hñú mil xihin

¹³ Hane xi camachaya rë Jesús ne, cavetju me ngajan cavisehen me ngu barcu quiji me ngu cahndë xín. Peru xi camachaya rë xuta ne, cavetju me tsëhë nandya ne, quiji ntsacu me tjeheh laguna quiji tjengui me Jesús. ¹⁴ Xi tu cavetju Jesús tsëhë barcu ngunda ne, cavutsejen me xutacjin jan, hane camayuma rë me xuta jan. Hane catsindaja me xuta hmu rë. ¹⁵ Hane hya xi jimá nguixun ne, cafehe xuta ladu rë me cachja cojo me cuitjin:

—Jemu xín camahani cahndë vi, hane ha quiji hora. Ninguijn tuhun cjuaxi cojo xutacjin vë ne, sehe catji me nandya xi siu tiñataha catatsë me comida xi sinë me.

¹⁶ Peru Jesús ne, cuitjin cachja me cojo cha xi tejó jan:

—Sahmii nguujyë xi cjuexin me ne, ngayun tuhun xi sinë me.

¹⁷ Sehe ngajan xi cachja cha ladu rë me cuitjin:

—Hñu pan ne cojo jo ti tjin naja. —Cuatjin cachja cha.

¹⁸ Sehe cachja Jesús cuitjin:

—Nduvuncujun.

¹⁹ Hya xi camá ne, casahmi Jesús xi catiyuju xutacjín jan xcun ndiji; sehe cafahatsja me hñu rquí pan jan cojo jo ti jan. Hane tivutsejenniji me ngahnga ne, casua me nacuechji rè Nina, sehe cavotoho langa me pan casua me pan jan cha ladu rè me xi cjue sua cha sinë xuta. ²⁰ Hane xuta ne, yëjë ni me cajinë me hacutjin cachuya rè xahasen rè me. Hane xi cachjaya rè xi cavangui cajinë xuta jan ne, catsë tejó chajne. ²¹ Me xi cajinë pan jan ne, hñú mil má me xi xihin. Ha xin yachjin cojo langa xi hacuín cojo camaxqui.

Quiji ntsacu Jesucristu xcun nandá

²² Hya xi camá ne, Jesús ne, casahmi rè me ngujoyë xuta ladu rè me xi cuisehen me barcu hane cjue titjun ni me ngunda vëhë, jinguyëjë rè xi tsinguijnetaha me cjua cojo xutacjín jan. ²³ Hane hya xi camá quiji xutacjín ne, sehe camijixin Jesús rcu ndetjún xi cuisiajmi me cojo Nina. Hane hora xi camá nguixun ne, tacun suvá me. ²⁴ Peru barcu jan ne, vasantjin laguna cjuí, hane jemu chja cjuí ngatsë rè tsindyu rè nandá xi tsivaha rè barcu ta, tsëhë xi tjo ne, taha hiscan cjuí ne, ngajan nduva.

²⁵ Hane hya xi tiña sahasen ne, quiji ntsacu Jesús xcun nandan ne quiji tjengui me me tsëhë me. ²⁶ Hya xi cavëë xuta ladu rè me xi nduva ntsacu me xcun nandan ne, jemu camá xti rè me cachja me ta nima xi meje cuincharcun rè me, hane cajindayatë me. ²⁷ Ngajan xi cachja Jesús cojo me ta:

—¡Xi carcuun! ¡Tuhun cjuetacun xahasen nuju ta ngahan vi!

²⁸ Hya xi camá ne, cafayangui Pedru tsëhë Jesús cuitjin:

—Nai, sá xi quixi xi ngayun ne, tuhun ná cahndë nduvá tjenguë nuju.

²⁹ Sehe cachja Jesús cuitjin:

—Nduvun.

Hane cavitujne Pedru tsëhë barcu jan, quiji ntsacu me quiji tjengui me Jesús. ³⁰ Peru xi camachaya rè me tjoxtin ne, catsacju me camá, sehe cavet-sihin cavisehen ngahma me ngajñi nandan. Hya xi camá ne cajindayatë me Jesús cachja me cuitjin:

—¡Nai, naxuntjun ná!

³¹ Hya xi camá ne, ngutjen cafahatsja Jesús me, cavaniji me me ne, cachja me cojo me cuitjin:

—Ngayun ne, cjëë cumangutacunndujun cojo ná, ¿mé má macjaain nuju?

³² Hya xi camá ne, cavisehen catsijo me cahntsua barcu jan, hane hora vëhë ne casejyu tjo jan. ³³ Ngajan xi xuta xi hinchá barcu jan ne, cavixcuh-nchi me cafaharcun me Jesús cachja me cuitjin:

—Ngayun ne, quixi jaín xi Quihndi rè Nina yun.

Casahmi Jesús xi camandaja xuta nandya Genesaret

³⁴ Xi quiji sa me cojo barcu ne, cafehe me tjehen laguna hiscan nandya xi hmí Genesaret. ³⁵ Hane xi camachaya rè xuta xi Jesús xi cafehe me, catsingatju me cjua rè yëjë ni nandya xi siutahndee, hane xuta ne quijicojo me xuta hmu rè me hiscan tacun Jesús. ³⁶ Sehe cafehya me cojo Jesús xi ndastu satëtaha xuta hmu rè jan ntsacu tsjian rè Jesús. Hane yëjë ni xuta hmu rè xi casatëtaha ntsacu tsjian rè Jesús ne, camandaja me.

15

Cha partidu fariseo ne, fahataha cha Jesús

¹ Ngu ndiyya ne, ngujo cha tsëhë partidu fariseo cojo ngujo cha maestru rè ley ne, canduva cha tsëhë nandya Jerusalén, quiji cha hiscan tacun Jesús, cachja cha cojo me cuitjin:

²—¿Hacutjin cumá xi cha ladu nuju ne, sahmi cha sacuaaha yaha xcusun rë xutachanga naja? Ta cuatjin vanii cha tsja cha hora xi jinë cha niñu.

³Ngajan xi Jesús cafayangui me tsëhë cha cuitjin:

—Hane ngayun ne, ¿hacutjin cumá xi vejñuxun cjuua xi cavitexa Nina ngatsë rë xi nihñu xu xcusun rë xutachanga naja? ⁴Cachja Nina ta: “Chjuhuncun na nuju, chjuhuncun nahmi nuju” hacuaaha chja ta: “Yo xi choho chja tsëhë xutacha rë ne, xuta ne tsiquehen rë.” ⁵Peru ngayun tuhun cahndë xi cuichja xuta cojo xutacha rë ta: “Ha quihndë cumaji cuisécoo nuju ta yëjë ni xcusun xi tjin ná ne, ha cavejñá tsja Nina.” ⁶¿Mé má cuatjin tuhun cahndë xi faharcuiin cha nahmi rë cha? Cuitjin ne, ngatsë rë xcusun nuju sacuaaha xi venguichjiin rë cjuua rë Nina xi cuma rë xuta. ⁷Ngayun ne, xuta jo xcun jo hntsua ngayun. Cachja quixi profeta Isaías xi cuitjin catsihindu me tsujun:

⁸Xuta xi cuacun vi ne, ndaja chja me tsahan peru xi cojo xahasen rë me ne, hisca tsinguitsjiin me ngahan.

⁹Tu mahya xi faharcun ná me ta, Xi vicuya xicjin me ne, hacuiin cjuua naha ta tu cjuua rë xuta.

¹⁰Hya xi camá cachja me cuatjin ne, cajindaya Jesús xutacjín cachja me cojo cuitjin:

—Ngayujun ngarca ni ne, nuhyun ndaja cjuua vi: ¹¹Xcusun xi tsitsehen rë xuta ne, hacuiin xcusun xi chine xi visehen hntsua me, ta xcusun xi tsitsehen rë xuta ne, xcusun xi vetjun tsëhë hntsua me.

¹²Sehe cafehe xuta ladu rë Jesús ne, cavinenguise me cuitjin:

—¿Há hyun xi canicjun rë cha partidu fariseo ne xi cuatjin canújun?

¹³Peru cafayangui Jesús cuitjin:

—Tu mé ni tutjë xi catsitjiin nahmi naha xi tacun ngahnga ne, tjune rë hisca cojo tyjama rë. ¹⁴¡Caveni! ¡Nihñuu cuendun me! Me vëhë tangun me cojo xuta rcá xi cjuecani xicjin me. Hane sá xi cuatjin ne, cuixuya catsijo me xanga.

¹⁵Sehe cachja Pedru cuitjin:

—Ningacun niji mé vijne ejemplu jan.

¹⁶Ngajan xi Jesús cachja cojo me ta:

—¿Há hiscan ngayun cajni rë cjuua xi cachjá ni? ¹⁷¿Há hyuun xi xcusun xi jinë xuta ne visehen cahntsua me? Fë ne, vetjutaha ndatsen. ¹⁸Peru xcusun xi vetju chja me ne, nduva tsëhë xahasen rë me, hane vëhë tsitsehen rë me, ¹⁹ta tsëhë xi tsëhë xahasen rë xuta ne, nduva cjuatacun tsehen sacuaaha jyë xi tsiquehen xicjin xuta, sacuaaha jyë xi sahmi chjuunnahñu rë me jingu sa chjuun, sacuaaha yachjin xi viteña yojo rë, sacuaaha cjuachëjë, sacuaaha testigu xi vindacha me, sacuaaha cjuachjataha. ²⁰Yëjë cjuatsehen xi cuacun vëhë ne, nduva tsëhë xahasen rë xuta, hane vëhë tsitsehen rë me; peru sá jinë me niñu cojo tsja me xi cjëë cuane me ne, tsitsiin rë me.

Jesús ne, visecoo me ngu chjuun xutaxín, na xi hacuiin na ladu tsëhë Israel

²¹Hane Jesús ne, cavetju me ngajan, quiji me ngu nanguixin táha distritu nandya Tiro cojo nandya Sidón. ²²Hya xi camá ne, cafehetjengui rë me ngu chjuun cananea xi tsëhë ngajan. Cajindaya na cachja na cojo Jesús cuitjin:

—¡Nai! Ngayun, quihndindaicjin rë David, ¡catamayuma nuju ngahan! ta na quihndi naha ne, jiya xitsehen xi jemu suandya rë na cahntsua xahasen rë na.

²³Peru Jesús ne, ndastu me cjuua catsicuya me. Hane xuta ladu rë me ne, cafehya me Jesús cuitjin:

—Ningatjuxun na, ta jemu si nduvatjengui na yaan fehyataha na yun.
—Cuatjin cachja me.

²⁴Ngajan xi cafayangui Jesús cuitjin:

—Nina ne, catsingatju me ngahan ngatsë rë xuta rë nangui Israel, ta me vëhë sacuaaha tsánga xi cachaja má me.

²⁵Hya xi camá ne, cafehetiña na tsëhë Jesús cavixcuhnchi na xcun Jesús xi cafaharcun na me. Cachja nga na cuitjin:

—Tatá, nihñu favor tiseacun ná.

²⁶Ngajan xi cachja Jesús ejemplu vi:

—Sechiye ne catijnetaha catjine nixti ta, hacuiin ndatjin xi chjahantahan niñu tsëhë nixti hane sehe tahan rë naña.

²⁷Hane cafayangui na cuitjin:

—Quixi jain xi nújun, peru naña xi siu ngahma maxë ne, sacu xi rë pan xi vixuhndu ngahma maxë rë nai rë chu hane jinë chu.

²⁸Sehe cafayangui Jesús cachja me cojo na cuitjin:

—Ngaye chjuun, jemu ndaja mangutacuín cojo ná. Catamandaja quihndi riji sacuaaha xi meje ri.

Hya xi camá ne, hora hya ne, camandaja quihndi rë na.

Casahmi Jesús xi camandaja xuta tjehe rë laguna Galilea

²⁹Hya xi camá ne, cavetju Jesús taha vëhë quiji me tahndee rë laguna Galilea sehe ngajan camiji me ngu ndetjún, ngajan cavejña me. ³⁰Hane jemu quijitjengui rë me xutacjin, yaha me xuta rengun, xuta rcá, xuta lihmi, xuta yoho cojo xuta xi má rë hacjahi chíhin ne caviyujutë me xuta jan xcun Jesús hane Jesús ne, casahmi me xi camandaja me. ³¹Xi cavëë xutacjin xi cuatjin camá ta, cama cachja xuta lihmi, camajingu xuta yoho, findaja xuta rengun hacuaaha tsejen rë xuta rcá ne, sehe jercu quijircun rë me, hane casahmi hnga me, casahmi jyë me Nina, Nina jan xi faharcun xuta nangui Israel.

Cjuarcun xi catsicjen Jesús ñuju mil xihin

³²Ngajan cajindaya Jesús xuta ladu rë me, cafehe me cachja Jesús cojo rë me cuitjin:

—Jemu yuma má ná xutacjin vi ta ha quihndë jyë nixtin hinchataha me cojo naja, hane ha quihndë tsajin camahani mé xi sinë me. Tsajin mangucacun xi tsingátju me cjue me xi cjëë sinë me niñu ta, sá tsajin ne, cjuaha rë me hinda ndiua.

³³Sehe ngajan xi xuta ladu rë me ne cafayangui me tsëhë me cuitjin:

—Peru nguehe nangui xín ne ¿jani cuma sacú niji pan xi sinë xutacjin vi?

³⁴Ngajan xi cavinenguise Jesús cojo xuta cuitjin:

—¿Há cjín pan tjín nuju?

Ngajan xi cachja me ta:

—Yatu má pan hacuaaha siu ngujo ti langa.

³⁵Ngajan xi Jesús ne cavitexa me xutacjin xi cuiyujutë me nangui. ³⁶Hya xi camá casahmi xuta ne, sehe cafaha Jesús yatu pan cojo ti jan ne sehe casua me nacuechji rë Nina. Hane cavotoho langa me pan cojo ti jan, casua me xuta ladu rë me xi cavatëcja me ne cafaha xutacjin. ³⁷Cuatjin camá cajine xuta jan, hane jemu ndaja cama rë xahasen rë me. Hane xi cafaya xuta xi cavangui cajiné xuta jan ne catsë yatu nisinya. ³⁸Xuta xi cajiné ne, sacuaaha ñuju mil má me xi xihin me, hacjahi má xuta chjuun cojo quihndi. ³⁹Hya xi cajnetaha vëhë ne, catsingatju Jesús xuta cafe me, hane suvá ni me, cavisehen me ngu barcu quiji me taha nandya Magadán.

16

Cha partidu fariseo cojo cha partidu saduceo ne fehya cha xi tsingacun Jesús ngu seña

¹ Xi cafehe me ngajan ne, hacuaha cafehe cha tsêhê partidu fariseo cojo cha partidu saduceo hane ta tsêhê xi meje cjuahachuva cha me, cafehya cha me ngu cjuarcun xi nduva ngahnga, cojo sa xi scuêê cha xi Nina catsingatju rê Jesús. ² Peru Jesús ne, cafayangui me cojo ejemplu vi cuitjin:

—Nguehe ne, hya xi chutsujun xi má haní ngahnga ne, nújun jain, ta: “Tyjahi nchujun ni, ndajyihí nixtin.” ³ Cuanitjin hya xi sahasen ne, sá xi má haní ngahnga hane híncha yuffí jma ne, nújun ta: “Va cumá nixtin.” Jo má tacun. ¿Hacutjin cuma xi jemu hyun mé vijne xcusun xi cún ngahnga, peru vijniircun mé vijne xcusun xi tijima nguehe nixtin vihi ní? ⁴ Xuta tsêhê nixtin vihi ne, xuta xi tsehen cjuatacun rê me, xi tjenguin me Nina cojo ngu ni cjuatacun, xuta vê xi fehya me ngu seña. Peru sacuiin rê me seña ta seña xi sacú rê me ne, sacuaha seña xi ha catsingacun profeta Jonás hatsêê nixtin.

Sehe xi cajnetaha cachja Jesús cjuá vêhê ne, caviyuju me xuta jan ne, quiji me.

Ejemplu tsêhê san rê pan

⁵ Hya xi cafehe xuta ladu rê me ngunda laguna ne, hacuaha cachaya rê me cjuaha me pan. ⁶ Sehe Jesús cachja cojo me:

—Nechun cuidadu tsêhê san rê pan tsêhê cha partidu fariseo cojo xi tsêhê cha partidu saduceo.

⁷ Sehe cha ladu rê me ne, cavisiajmi cha cojo xicjin cha cuitjin:

—Tsêhê xi cachaya naja pan ne, vêhê xi cuatjin chja me.

⁸ Peru xi camachaya rê Jesús xi veyanangui cha xi tsajin rê cha pan ne, cachja me cojo cha cuitjin:

—Ngayun ne, cjêê cumangutacun nduju cojo ná. ¿Mé má cuatjin nújun xi chjá ta tsêhê xi tsajin nuju pan? ⁹ ¿Há nuhyuun? ¿Há vitsjiin nuju? Hya xi cajinê hñu mil xuta hñu pan ne, ¿há cjín chajne cachjayun tsêhê pan xi cavangui jan? ¹⁰ Hacuaha hya xi cajinê ñuju mil xuta yatu pan ne, hya ne ¿há cjín chajne cachjayun? ¹¹ ¿Hacutjin cuma xi nuhyuun xi hacuiin tsêhê pan xi cachjá cjuá jan? Xi chjá ne, nechun cuidadu tsêhê san rê pan tsêhê cha partidu fariseo cojo xi tsêhê cha partidu saduceo.

¹² Hya xi camá ne, camachaya rê me xi cachjaain me xi meje cuidadu cojo san xi sahmixa pan ta cachjá me tsêhê xi meje cuidadu cojo cjuachacun xi sahmixa cha partidu fariseo cojo cha partidu saduceo.

Catsinguixi Pedru yo Jesucristu

¹³ Ngu ndiya xi ha cavisehen Jesús distritu tsêhê nandya Cesarea tsêhê Filipino ne, cavinenguise me xuta ladu rê me cuitjin:

—Mé chja xuta tsahan, ¿yo ngahan, Quihndi rê Nina Jain? —Cuatjin cavinenguise me cha.

¹⁴ Sehe ngajan xi cachja cha cojo Jesús cuitjin:

—Yahnga me ne, chja me ta nima Juan Vitenda rê Xuta ngayun, hane yahnga nga me ne, chja me ta Elías, hane yahnga nga me ne, chja me ta nima Jeremías, hane me xi yahnga nga ne, chja me ta ngayun ne, ngu profeta xi hacjahi.

¹⁵ —Hane ngayun ne, ¿mé nújun ni, yo ngahan? —Cuatjin cavinenguise Jesús.

¹⁶ Ngajan xi cafayangui Símon Pedru cuitjin:

—Ngayun ne, Mesías xi catsingatju nuju Nina; ngayun, Quihndi rē Nina, Nina quicun jain.

¹⁷ Sehe cachja Jesús cuitjin:

—Ndatjin tsujun, Símon, quihndi rē Jonás. Tsajin ngu xuta xi casua camachaya nuju cjua jan, ta Nahmi naha xi tacun me ngahnga ne, me vèhē xi casua me xi camachaya nuju tsèhē. ¹⁸ Hane ngahan ne, suá cumachaya nuju xi ngayun ne, ngayun xi hmí nuju Pedru. Hane ñihi nuju ne, vijne ndyojo. Hane xcun ndyojo vihi sahme yungun naha; yungun jan ne, hisca cjuaveya ne tsajin ngahñu xi tsicjēya rē. ¹⁹ Suá nuju quicha tsèhē gobiernu xi sahmi Nina, ngajan xi xcusun xi nihñucjun nguehe ngasunhndē ne, hacuaha cumahñucjan ngajan ngahnga, hacuaha xcusun xi chundecjun nguehe ngasunhndē ne, hacuaha tundecjan ngajan ngahnga.

²⁰ Sehe Jesús ne, cavitexa me xuta jan xi tsajin camahani yo xi cuichja me cojo tsèhē xi Mesías má me.

Cachja Jesús xi tsiquehen xuta me

²¹ Hya xi camá ne, sehe cavetsihin vicuya Jesús xuta ladu rē me tsèhē xi sahmi nguyjē xi cjue me nandya Jerusalén, hane ngajan ne, jemu cjín cjuañihi cuátju me cuma xi sahmi xuta changá cojo nahmi xi matitjun tsèhē nahmi cojo cha xi vicuya cjuachacun ne. Tsitjungui cha me, tsiquehen cha me; peru xi cumá jyan nixtin ne, tsicuya Nina me cjuahñu. ²² Ngajan xi Pedru ne, quijixin me cojo Jesús. Sehe cavetsihin cachjataha me Jesús cuitjin:

—Tatá, ¡catamamiji rē Nina! ¡Hatuxa cumaji cuatjun cuatjin!

²³ Hane xi cavuya Jesús cavutsejen me Pedru, ngajan cachja cojo me cuitjin:

—Tihinxin ngaye Satanás, ngaye ne, sacuaha ngu ndyojo xi meje xten-guiya ná ngajni cjuatsehen tsèhē xi ningatiintacuin ngaye sacuaha tsingata-hacacun Nina ta ningatehetacuin sacuaha ngu xuta ngasunhndē ni.

²⁴ Sehe cachja Jesús cojo cha ladu rē me cuitjin:

—Sá xi tjin yo xi meje rē xi cuma cuisehen me ladu naha ne, ha quihndē miji rē xi sahmi me hacutjin xi meje rē suvá me ta nchunchujun ni meje rē xi catejñahñu xahasen rē me xi cjuenduju me cojo ndiya naha, handasa hisca cueya me xcun cru. ²⁵ Yo xi mijii cuisehen ladu naha tsèhē xi tsacjun me xi cueya me ne, cahndē xi vetjo me cjuahñu rē me ne, tsichaja me cjuahñu xatsē xi sacu rē me. Peru yo xi ngatsē rē xi cavisehen ladu naha cueya ne, sacu rē cjuahñu jan. ²⁶ ¿Mé machji rēhē rē yo xi sacú rē yjē cjuanchina rē ngasunhndē peru sehe cueya ne cumá castigu? Tsajin mé xi cuma tsindeya xicjin me cojo cjuahñu xatsē. ²⁷ Ta ngahan, quihndi rē Xuta Jain, cuinduvá cojo hasen ndajyihi tsèhē Nahmi naha hacuaha cojo ángel naha cuinduvá; hane hya ne, cuechji me jimangu me, ¿há ndaja há ndajin casahmi me? ²⁸ Cuichjá quixē cojo nuju ta tjin yahnga ngayun xi sechun nguehe xi cueyuun jinguyjē rē xi cjēē chun xi cuitexa Quihndi rē Xuta Jain gobiernu xi sahmi Nina.

17

Cavindeya xcusun rē Jesucristu

¹ Hya xi camá cavatju jyun nixtin ne, quijixin Jesús quijicojo me Pedru cojo Jacobo cojo Juan, hntsē Jacobo, quijiniji me ngu naxi hnga. ² Ngajan camá xi cavēē me xi cavindeya xcusun rē Jesús: Xcun me ne, camaseti sacuaha seti tsuhi, hacuaha tsjian rē me ne, jemu tu tyava camahani camá sacuaha hasen

rë ndihi. ³ Hacuaaha ngajan cavëë me xi cafehetsejen nima profeta Moisés cojo profeta Elías, me xi caviyuju hatsëë nixtin ne, tivisiajmi me cojo Jesús.

⁴ Sehe cachja Pedru cojo Jesús cuitjin:

—Nai, tu ma rë xi nguehe nechin ne, sá xi meje nuju ne, sahme jyan puestu; ngu cuma tsujun ne, ngu cuma tsëhë Moisés, hane cojo ngu cuma tsëhë Elías. —Cuatjin cachja me.

⁵ Hane hora xi tichja Pedru ne, canduva ngu yufí xi seti tsejen casahmi tjanguen rë tsëhë me, hane canuhya rë ngujo cjua xi cavetju ngajñi yufí jan xi cachja cuitjin:

—Cha vihi xi Quihndi naha cha xi jemu hmu cacún. Jemu ndama ná ngatsë rë cha. Tinuhyun cjua xi chja cha.

⁶ Hya xi cahndë xuta rë me cjua jan ne, caticaxcun me. Hane jemu catsacjun camahani me camá. ⁷ Ngajan xi cafehe Jesús cavetahatsja me me, hane cuitjin cachja me:

—Tisatjunhngun. Xicarcuun. —Cuatjin cachja me.

⁸ Hane xi cavutsejenniji me ngajan ne, ndastu yo siu ta suva ni Jesús tacun me.

⁹ Xi tu tivijne me tsëhë rcu naxi jan cojo xuta ladu rë me xi quijicojo me jan ne, ngajan xi cachja me cojo me ta tsajin yo xi cuichja me cojo xcusun xi cavëë me. Xi cuatju cueya Quihndi rë Xuta Jain, sehe cuya nga me cjuahñu ne, hya cuichja me.

¹⁰ Ngajan xi cavinenguise me cojo Jesús cuitjin:

—¿Mé má cuatjin chja maestru tsëhë ley xi titjun Elías cuinduva me, sehe cuinduva Mesías?

¹¹ Ngajan cafayangui Jesús cuitjin:

—Quixi xi Elías cuinduva me titjun ta me vëhë cuiyujuchihin me yëjë ni xcusun. ¹² Peru cuichjá cojo nuju ta ha canduva me, peru xuta ne, hvín me xi hacui me, hane choho casahmi xuta cojo me hacutjin meje rë xahasen rë me. Hane hacuanitjin sahmi me xi cuátju cjuañi Quihndi rë Xuta Jain.

¹³ Ngajan xi camachaya rë xuta rë me ta tichja me tsëhë Juan Vitenda xuta hya xi chja me Elías.

Jesucristu ne, casahmi me xi camandaja cha xi faha rë chajan

¹⁴ Hane xi quiji me ne cavechutaha me xutacjín ne, ngajan cafehetjengui rë me ngu xihin, cavixcuhnchitaha cha Jesús cachja cha cuitjin:

¹⁵ —Nai. ¡Catamayuma nuju cha lihndi naha ta, jemu faha rë cha chajan hane jemu choho sahmi cojo cha. Jiya hora ne, finenguia cha ngajñi ndacahi, hane jiya hora nga ne, viticjaya cha ngajñi nandan. ¹⁶ Cëjëcojo cha xcun xuta ladu nuju xi tsirqui me cha peru camaji casahmi me.

¹⁷ Sehe ngajan xi Jesús ne, cuitjin cafayangui me:

—Ngayujun ni ne, xuta xi macjaain rë ngayun hacuaaha xuta xi cavetjuxin tsëhë ndiya ndajyihí ngayun. ¿Há jyë sa xi cuitejña cojo nuju? ¿Há jyë sa nixtin xi scaa ná cojo nuju? Nduvuncujun cha nguehe. —Cuatjin cachja me.

¹⁸ Hya xi camá ne, cachjataha Jesús xitsehen xi hinchá xahasen rë cha, hane cavetjuxin xitsehen jan, hane hora hya ne, camandaja cha.

¹⁹ Hya xi camá ne, xi cafehe xuta ladu rë Jesús cavinenguise me me cuitjin:

—¿Mé má ngayin ne xi camaji canaxinxin xitsehen jan tsëhë xahasen rë cha vë?

²⁰ Ngajan xi cachja Jesús cojo me ta:

—Camaji ta hacuiin ndaja macjain nuju. Ta cuichjá quixë cojo nuju ta sá xi mangutacún cojo ná ndastu hitsë ne, hacuaaha cuma cuinújun cojo naxi

vihi: “Catjixin, catjin catiseacun ngajan tavêhë.” Hane cuihndë tsujun. Hisca sá xi mangutacún cojo ná ndastu hitsë ne, tsajin me xi cumaji nihñu. ²¹ Peru sacuaaha xitsehen xi cuacun vë ne, meje rë xi tijun chjahyan rë Nina hacuaaha cuinechan xun rë me, cojo sa xi cuma naxexeen.

Cachja nga Jesús xi tsiquehen xuta me

²² Nixtin xi caviyuju Jesús cojo xuta ladu rë me ngajan distritu Galilea ne, cachja Jesús cojo me ngu nixtin cuitjin:

—Ngahan xi Quihndi rë Xuta Jain ngahan ne, hatuxa tjín xi cuma ngahan entregadu tsja xuta ²³ xi tsiquehen ná me. Peru xi cjuë xi jyan nixtin ne, cuya nga cjuahñu.

Hane xi cahndë me cjuá jan ne, jemu cafaha me cjuachoho.

Jesucristu ne, cavechjitje me tujúnsa tsêhë yungun

²⁴ Hya xi cafehe me nandya Capernaum, cafehe xuta xi faha me tujúnsa rë yungun, camatiña me tsêhë Pedru cachja me cojo me cuitjin:

—Maestru nuju ne, ¿há vechjitje me tujúnsa rë yungun?

²⁵ Ngajan cafayangui Pedru cuitjin:

—Juun, vechjitje me.

Hya xi camá ne, xi cavisehen Pedru ndihya ne, peru chajasa xi cuichja me ne, ngajan xi cachja Jesús cojo me cuitjin:

—Simón, ¿mé nújun? Sacuaaha me xi matitjun tsêhë nandya ngasunhndë ne, ¿yo vitexa me xi satë rë xi cuechjitje tujúnsa? ¿Há quihndi rë me? ¿Há xutaxín?

²⁶ Ngajan xi cachja Pedru cuitjin:

—Xutaxín cuechji me.

Cachja nga Jesús cuitjin:

—Sá xi cuatjin ne, quihndi rë me xi matitjun jan ne, ha cavatjuhnga tsêhë.

²⁷ Quixi vë, peru cojo sa hacuúin ngatsë rë vëhë cumacjan rë me o maxti rë me cojo naja ne, tangun laguna ne, chandunyun tsitin ngajñi nandan ne, hane hya xi faha tsitin ngu ti ne, chu xi tjun faha rë ne, chjuhun chu nuxuhun hntsua chu hane ngajan cahntsua hntsua chu jan ne, sacú tujún xi stetaha cuechjun tujúnsa xi satë ná cojo xi satë nuju.

18

Yo xi matitjun

¹ Hya ne, xuta ladu rë Jesús cafehe tjengui me me, cavinenguise me cuitjin:

—¿Yo xi hitsë sa cumatitjun hya xi sahmi Nina gobiernu?

² Hya xi camá ne, cajindaya Jesús ngu lihndi, cavejña me cavasencja. ³ Sehe cachja me cuitjin:

—Hisca ngu ngayun cumaji cuisuhun gobiernu xi sahmi Nina ne, sá xi hacuúin nindeyun cjuatacun nuju hisca cuma yun sacuaaha ngu quihndi.

⁴ Vêhë xi yo xi tsinguijne suvá me yojo rë me xi cuihndë me sacuaaha vihndë ngu quihndi ne, me vëhë xi hitsë sa cumatitjun me hya xi sahmi Nina gobiernu. ⁵ Hane tu yo ni xi cjuahatsja rë ngu quihndi xi cuacun vë ngatsë rë xi ladu naha má ne; vëhë cuma sacuaaha xi cafahatsja me ngahan.

Xuta xi nduvacojo me xcusun xi tsitsehen rë xicjin

⁶ Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tsêhë xuta vëhë xi xtyangui ngu ndyojo natsi nguísín me sehe ningatjeya rë me ngajñi ndachacun. ⁷ Jemu choho vatju xuta ngasunhndë ngatsë rë xcusun xi tsitsehen rë me xi sahmi me cjuatsehen.

Hatuxa cuinduva xcusun xi meje sahmi xi tsismicacun xuta ndiya rē Nina, peru jemu chojyihī tsēhē xuta xi nduvacojo me xcusun vēhē.

⁸ Hane sá xi cjuatacun nuju meje rē xi nihñu ngu jyé cojo ntsun o sá xi cojo ntsacu ne, vengui sa chji rē xi chandunxun, ta hitsē sa ndaja tsujun xi cuma yoho yun xi cuma rē xi cuechun jingu cojo catsijo ntsun o catsijo ntsacu xcun ndihi xi tsajin nixtin tsajin nixten xi coho. ⁹ Hacuaha sá xi cjuatacun nuju meje rē xi nihñu ngu jyé cojo xcusun xi chutsujun cojo tuxcun ne, chjuhuncun tuxcun jan chandunxun, ta tsēhē xi hitsē sa ndaja tsujun xi sacu nuju cjuahñu xatsē handasa cojo ngu ni tuxcun xi cuma xi cojo catsijo tuxcun cuechun xcun ndihi xi sahmi castigu rē nima. ¹⁰ Cojo yējē ni ne, nihñu cuidadu xi nitjunguun ngu quihndi sacuaaha quihndi vihi, ta tsēhē xi ángel xi sahmi cuenda me ne, yējē nixtin yējē hora ne, siu tangun me cojo Nahmi naha hane sahmi nguyjē xi cjuéhya me cahndē xi cuichja me cojo.

Ejemplu tsēhē chu tsánga xi cachajá

¹¹ Quihndi rē Xuta Jain ne, canduvá me xi cuaxētje me xuta xi cachajá. ¹² ¿Mé xi nújun? Cuejñaa ne xi ngu xihin tjin rē me ngu cientu chu tsánga. Hane sá xi chajá ngu chu rē me, ¿há hyuun xi cuiyujutaha me chu xi ñujuchan tyjuhun ñuju jan nguijña ne, sehe cje me cuanguise me ngu chu xi cachajá jan? ¹³ Hane hya xi sacú rē me chu ne, hitsē sa jyé cjuasua tjin rē xahasen rē me ngatsē rē xi casacu rē me chu xi cachaja xi cuma rē cjuasua tsēhē ñujuchan tyjuhun ñuju chu xi tetjo. ¹⁴ Cuanitjin xi cuma rē Nahmi nuju xi tacun ngahnga, ta mijí rē me xi chajá hisca ngu quihndi rē me cuatjin.

Hacutjin meje rē xi cuinújantahan xingueen

¹⁵ Hane sá xi ngu xingun choho sahmi cojo nuju ne, tangun suvun tinújantuhun rē, hane sá xi tsindeya cjuatacun rē ne, ndatjin, ta hacuiin cuetsuntaha cjuandaja xi tjin nuju cojo me. ¹⁶ Peru sá xi vihndiin me tsujun ne, tangun chjuhun ngujo xuta tanguncujun xi tinújantuhun rē tsēhē xi hya xi cuma me testigu nuju tsēhē, sehe cumatsejen cjuaquixi. ¹⁷ Sá xi hisca cojo me vē vihndiin me tsēhē me ne, tangun tinújun tsēhē xcun xuta yungun, hane sá xi hacuaha vihndiin me cjuatacun rē xuta yungun jan, cumá me xi cuma nuju sacuaaha ngu xutaxín o sacuaaha ngu xuta ndacha xi faha rē tujúnsa.

¹⁸ Cuichjá quixē cojo nuju ta xcusun xi nihñucun nguehe ngasunhndē ne, hacuaha mahñucjan ngajan ngahnga, hacuaha xcusun xi nihñu ndaya nguehe, hacuaha mandaya ngajan ngahnga. ¹⁹ Hacuaha cuichjá cojo nuju ta sá nguehe ngasunhndē ne matangun cjuatacun rē jo ngayun tsēhē ngu xcusun xi chjahyun rē Nina ne, cuetjucaa jain tsujun ta sahmi chíhin Nahmi naha xi tacun me ngahnga. ²⁰ Ta tu mé ni cahndē xi cuiyujutangun ngu jo jyan xuta xi ngajan veyanangui ñihi naha, hacuaha ngajan ngajñi rē me tejña ngahan.

²¹ Sehe cafehe Pedru cachja cojo me cuitjin:

—Nai, ¿há cjin ndiya sahmi nguyjē xi tsinchátaha xingueen sá xi choho sahmi me cojo ná? ¿Há ndatjin xi yatu ndiya?

²² Ngajan cafayangui Jesús cuitjin:

—Hacuiin yatu ndiya ni, ta cuichjá cojo nuju ta mameje rē xi jyanchan tē cuatjin xi yatu ndiya ninchatuhun rē me.

Ejemplu tsēhē cha xi mijí tsinchataha xicjin cha

²³ Ngajan tsejen xi hya xi Nina sahmi me gobiernu ne, cumá sacuaaha ngu me xi matitjun xi meje cuaxēchihin me cuenta xi tjin rē me cojo xuta rē me.

²⁴ Hane hora xi tijima ne, cajindaya rē ngu cha xi cafehe cha hane cha jan

ne, të mil tujún quitjen cha. ²⁵ Hane ngatsë rë xi tsajin camahani cha rë tujún xi sahmingojo cha, cachja me xi matitjun jan xi xteña cha xi cuma cha ngu mosu, xteña suva cha, hacuaha cojo chjuun rë cha cojo quihndi rë cha cojo yějë ni xi tjin rë cha, hane sehe cuatjin cuma cuechji cha tsëhë xi quitjen cha. ²⁶ Hya xi camá ne, cavixcuhnchi cha xcun me cafaharcun cha me cafehya cha me cuitjin: “Nai, catijnehnchan cjuacjan nuju, tuhun ná hitsë cahndë hane cuechjë tsujun.” ²⁷ Ngajan xi me xi matitjun jan ne, camayuma rë me cha, catsijyëcacun me tsëhë cha tsëhë cjuacjintacun jan, catsinchataha me cha.

²⁸ Peru xi cavetju quiji cha jan, cavechutaha cha jan ngu cha xicjin cha xi quitjen tsëhë cha hitsë tujún, hane cafaha cha nguisin xicjin cha jan, cachja cha cuitjin: “Nihñi ngojo yějë xi quitjin tsahan.” ²⁹ Hane xi cavixcuhnchi xicjin cha xcun cha ne, cachja xicjin cha jan cuitjin: “Catijnehnchan cjuacjan nuju, tuhun ná hitsë cahndë ta cuechjë tsujun.” ³⁰ Peru mijí sua cha cahndë, hane quiji caveya cha xicjin cha ndavaya, ngajan seya xicjin hisca xi cuma sahmingojo tujún. ³¹ Hya xi cavëë yahnga mosu xcusun xi camá cavatjun jan, jemu camá xti rë me quiji casuacuenda me tsëhë cojo me xi matitjun tsëhë me. ³² Ngajan xi cajindayavaha me xi matitjun cha jan, cachja me cuitjin: “Ngaye, jemu choho xcusun riji. Catsinchátaha yějë ni xi quitjin tsahan, tsëhë xi jemu cachjahye. ³³ Hane ngaye, ¿hacutjin cumá xi tsajin ri cjuayuma cojo xinguin? ta ngahan ne, cama yuma ná ngaye.” ³⁴ Cuatjin camá xi jemu camacjan rë me xi matitjun cojo cha jan, catsingatju me cha cjuañihi ngajan ndavaya jñu hisca nixtin xi cjuë cuechji cha xi quitjen cha.

³⁵ Hane cuatjin sahmi Nahmi naha xi tacun ngahnga cojo nuju, sá xi ninchatuun xingun cojo yějë xahasen nuju.

19

Cjuachacun tsëhë xuta xi tsismi xicjin

¹ Hya xi cajnetaha cachja Jesús cjuá vi, sehe cavetju me distritu Galilea ne, cavisehen me distritu Judea ngajan tahndee ndajyë Jordán ladu vetjucaa tsuhi. ² Hacuaha quiji tjengui rë me xutacjin hane casahmi me xi camandaja xuta hmu rë.

³ Hya xi camá ne, ngajan cafehe cha tsëhë partidu fariseo ne, quiji cha hiscan tacun Jesús hane tsëhë xi meje cjuahachuva cha me cojo cjuá rë me ne, cachja cha cuitjin:

—¿Há tsingatihí ley xi ngu xihin ne, tsismi chjuun rë ngatsë rë tu mé ni xcusun xi chuyiin rë me tsëhë?

⁴ Ngajan xi cafayangui me cuitjin:

—Ngayun ne, ¿há cachutayuun ta tsëhë xi hisca ntsacu cavetsihin casahmi Nina ngasunhdë ne, casahmi me xi chjuun xi xihin xuta? ⁵ Cachja Nina ta ngatsë rë xi cuatjin casahmi me xuta ne: “Vëhë xi ngu xihin ne, cuejña cha nahmi rë cha, hacuaha cuejña cha naa rë cha, hane cumatangun cha cojo chjuun rë cha sacuaha ngu ni xahasen.” ⁶ Ha quihndë hacuiin jo ta sacuaha xi ngu ni xahasen. Hane tsëhë xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsëhë xicjin me. —Cuatjin cachja Jesús.

⁷ Ngajan cavinenguise cha cuitjin:

—Sá xi cuatjin ne, ¿mé má casua Moisés cahndë xi ngu xihin cuma cuejña cha ngu xujun tsja chjuun rë cha xi ha quihndë mijí rë cha na? Hane xi cuatjin ne, cuma tsismi cha na.

⁸ Sehe ngajan xi Jesús ne, cachja me cojo cha ta:

—Ngatsé rē cjuataja rē xahasen nuju ne, vèhè xi Moisés ne casua me cahndé xi nismu chjuun nuju, peru hacuini cuatjin cavitexa Nina ntsacu cavetsihin. ⁹ Cuichjá cojo nuju ta yo xi tsismi chjuun rē handasa ndastu mé cjuatsehen casahmi chjuun jan cojo ngu xihin hacjahi, hane cuixan cojo ngu nga chjuun ne, tjin jyé rē me ta tséhè xi ngatsé rē cjua rē me sahmi chjuun jan cjuatsehen.

¹⁰ Ngajan xi cachja xuta ladu rē Jesús cuitjin:

—Sá xi cuatjin sacua ha xi nújun, ndajintjin tsajan xi cuixan.

¹¹ Cachja nga Jesús cuitjin:

—Hacuini yèjè ni xuta ma vijnercu me cjua vi, suva xuta xi Nina casua cahndé xi vijnercu me ne, me vèhè vihndé me. ¹² Tjin xuta xi cumaji cuixan me, sacua ha xihin xi hisca chaja sa catsin me ne, maji matangun me cojo ngu chjuun. Hacua ha tjin yahnga me xi catsixindé xuta me, hacua ha tjin yahnga me xi faain me ngu chjuun ngatsé rē xi sahmixa rē gobiernu xi sahmi Nina. Catjahatsja cjua vi tu yo ni xi cuma cjuahatsja rē.

Catsinchacun Jesucristu nixti

¹³ Hacua ha quijicojo xuta nixti rē me hiscan tacun Jesús xi cuisanetsja me nixti jan hacua ha cjuehya me cjuandaja rē Nina ngatsé rē me. Peru hya xi cavèè xuta ladu rē Jesús xi cuatjin tijima ne, cavatècja me cjuatacun rē xuta jan.

¹⁴ Peru Jesús ne, cachja me cojo xuta ladu rē me cuitjin:

—Tuhun rē nixti cahndé catinduva tjengui ná. Xicanichuun rē cahndé ta, tséhè xi gobiernu xi sahmi Nina ne, má tséhè nixti xi cuacun vè.

¹⁵ Hane ngajan cavisanetsja me nixti jan sehe cavetju me tséhè cahndé jan.

Jemu chja cuisehen xuta nchina ladu rē Nina

¹⁶ Hya xi camá ne, cafehe ngu cha nixti xi cavinenguisse cha Jesús cuitjin:

—Ngayun Maestro, ¿mé cjuandaja meje rē xi sahme cojo sa xi sacú ná cjuahñu xatsé xcun Nina? —Cuatjin cachja cha.

Ngajan xi cachja Jesús cuitjin:

¹⁷ —¿Mé má noje tsahan xi ndaja ngahan? Ngu ni Nina xi ndaja me. Peru sá xi meje sacú ri cjuahñu xatsé jan, nohye cjua rē ley xi cavitexa Nina.

¹⁸ Ngajan cafayangui cha cuitjin:

—¿Jaré cjua jan?

Hane cachja Jesús ta:

—Xicanicuun xuta, xicanihñuu cjuatsehen cojo rē ngu chjuun o cojo rē ngu xihin xi hacuini tsujun, xicanihñuu cjuachèjè, xicanujuun cjuandesu tséhè xuta, ¹⁹ chjuhuncun nahmi nuju hacua ha chjuhuncun na nuju. Hacua ha nihñu hmutacun xingun sacua ha hmutacun suva yojo nuju.

²⁰ Ngajan cachja cha nixti jan ta:

—Yèjè ni cjua vèhè ne, ha cáhndé tséhè hisca cjualihndi naha. ¿Mé sa meje rē xi sahme? —Cuatjin cachja cha.

²¹ Ngajan cafayangui Jesús cuitjin:

—Tjin sa ngu cjua sehe cuma chihin yèjè ni: yèjè ni xcusun xi tjin ri ne, titeñi, hane sehe tichecje tujún rē ngajñi rē xuta yuma. Hane xi cuatjin nihñi ne, jemu jyé cjuanchina sacú ri ngajan ngahnga. Hane xi cjuè cuichecje tujún vèhè ne, sehe ndove tisece ná.

²² Peru xi cahndé cha nixti cjua xi cachja Jesús ne, jemu va camá cacun cha hane quiji cha, tséhè xi jemu nchina camahani cha.

²³ Hya xi camá quiji cha ne, cachja Jesús cojo xuta ladu rē me cuitjin:

—Cuichjá quixë cojo nuju ta jemu chja xi ngu xuta xi tjin rë me cjuanchina cuisehen me hiscan sahmi Nina gobiernu. ²⁴ Hisca cuichjá nga xi hitsë sa chjaain cuatju ngu chu camellu ngojo rë ngu nindu xi cuma rë xi cuisehen ngu xuta nchina hiscan sahmi Nina gobiernu.

²⁵ Ngajan xi xuta ladu rë me ne jemu quijircun rë me cjuar rë me tsëhë xi cachja me tsëhë xuta nchina hane cavinenguse me Jesús cuitjin:

—Sá cuatjin ne, ¿yo xi cuma cuetjutje ni?

²⁶ Ngajan xi Jesús ne, cavutsejen me hiscan siu xuta jan ne, cachja me cojo me cuitjin:

—Xuta ne, maji sahmi me; peru yëjë ni xi maji sahmi xuta ne, Nina ne, hatuxa ma sahmi me.

²⁷ Sehe cachja Pedru cojo me cuitjin:

—Chutsujun ni. Ngayin ne, ha canismitacuin yëjë ni xcusun xi tjin niji, hane tivisecuin nuju. Hindë ne, ¿mé sacu niji?

²⁸ Sehe cachja Jesús cuitjin:

—Cuichjá cojo nuju cjuaquixi ta hya xi cuechu nixtin xi cumá xatsë yëjë ni ne, nixtin xi cuejña Quihndi rë Xuta Jain xcun silla xi sahmi me gobiernu ne, ngayun xi tejó ne, ngayun xi cavisuhun ladu naha hacuaha cuinechun xcun silla nichuvun cjuatacun rë yëjë tejó tjë naja, ngayaan xi tjë rë xutachanga naja Israel ngayaan. ²⁹ Hacuaha yëjë xuta xi tsismicacun me ndava me, tsismicacun me xicjin me, tsismicacun me xutacha rë me, tsismicacun me quihndi rë me, tsismicacun me nangui rë xitjë rë me, ngatsë naha; sacú rë me ngu cientu sa quisun tsëhë hane hacuaha sacú rë me cjuahña xatsë. ³⁰ Peru xuta xi matitjun quihndë ne, jemu cjin me xi cumachjiriin me hya, hane xuta xi hacuain matitjun quihndë ne, hya ne cumachji rëhë me xi cumatitjun me.

20

Ejemplu tsëhë chji rë mosu

¹ Sua Nina cahndë xi cuisehen xuta gobiernu xi sahmi me ne, sacuaha casahmi ngu me xi nai rë ngu ranchun. Xati nguítajñu quiji me cavanguise me mosu xi sahmi xá hiscan catsitjë me uva. ² Hya xi casacu rë me ngujo cha, casahmi me compromisu hane cavejña chji rë cha xi ngu tujún xi hmí rë denario xi ngu nixtin. Hane hora hya casua me cha xá quiji cha nguíjña xitjë.

³ Hya xi camá ne, sacuaha fane ñaja ne, cavuya nai jan ndetsin hane ngajan cavëë me cha xi hacjahi hane mahya rë cha. ⁴ Sehe cachja me cojo cha cuitjin: “Hacuaha tangun xitjë naha, sehe sua nuju hacutjin satë nuju.” Hane quiji cha jan. ⁵ Hane jo ndiya nga ne, sacuaha nchisen hane sacuaha fane jyan ne, quiji nai jan ndetsin, tangun casahmi me tangun cachja me. ⁶ Hane xi cavechu sacuaha fane hñu nguixun ne, quiji nga me ndetsin, ngajan casacu rë me yahnga cha xi mahya rë, sehe cachja me cojo cha cuitjin: “¿Mé má tu nechun ni nguehe cuahanixtin?” ⁷ Hane cafayangui cha cuitjin: “Tsëhë xi tsajin yo xi casua niji xa.” Sehe cachja me cuitjin: “Hacuaha tangun nihñu xa xitjë naha.” ⁸ Hane hya xi ha camá nguixun, nai rë xitjë ne, cachja me cojo cha xi fahacuenda rë xitjë jan cuitjin: “Chjindayun rë mosu ne, tuhun rë me chji rë yëjë ni me, titjun ne tuhun chji rë cha xi cafehe ngascan hane cuatjin ne hisca xi cuijnetaha ne, sehe tuhun rë cha xi tjun cafehe.” ⁹ Hane xi cafehe cha xi casacu rë xa sacuaha fane hñu nguixun ne, cafahatsja cha chji ra xi ngu denario. ¹⁰ Hane xi camachaya rë cha xi tjun casacu rë xá ne, xi má rë cha ne, hitsë sa hnga cumá chji rë cha, peru hacuaha cafahatsja

cha ngu denario ni. ¹¹ Hane xi cafahatsja cha chji rë cha ne, cachjataha cha nai jan cuitjin: ¹² “Cha vë ne, ngascan cafehe cha, ngu ni hora casahmi cha xa, hane tangun catuhun chji rë cha cojo niji. Ngayin ne, canihñi xa cuaha nixtin hacuaha cacaa niji ndavá.” ¹³ Peru nai rë xitjë jan ne, cafayangui me tsêhë cha jan cuitjin: “Tai, tsajin me cjuachan, ¿há quixi, há quixiin xi cavisajme xi chji nuju ne, ngu denario?” ¹⁴ Chjuhun tujún xi satë nuju hane cuangun; ta ngahan ne, cachuya ná ngahan xi ngu chichihin suá rë cha hacuaha suá nuju. ¹⁵ Ngahan xi tsahan ne, ngahan cuitexa. ¿O há tsajin ne, há machinitacun tsêhë xi casahme cuatjin?” ¹⁶ Hacuaha chuva vëhë ni, xuta xi matitjun quihndë ne, cumachjiriin hya, hane xuta xi hacuiin matitjun me quihndë ne, cumachji rëhë me xi cumatitjun me. Jemu cjin má me xi cachjindaya rë xi canduva me, peru tsêhë yëjë me jan ne, chuva má me xi catuxijin rë.

Camá jyan ndiya cachja Jesucristu xi cueya me

¹⁷ Hya xi camá ne, hora xi jiya ndiya Jesús xi cjuí me nandya Jerusalén, quijixin me cojo xuta ladu rë me xi tejó ni cachja me cojo me cuitjin:

¹⁸—Chutsujun ni, tivanguen Jerusalén, hane ngajan ne, ngahan xi Quihndi rë Xuta jain ne, cuma ngahan entregadu tsja nahmi xi matitjun cojo maestru tsêhë ley; hane cuichja me jyë naha ne, vechu chuva rë xi cueya ngahan. ¹⁹ Sehe sahmi entregar me ngahan xutaxín, cuejuncëé ná xuta, cuêhënatya ná me, cuaja ná me ne, sehe cuetaha ná me xcun cru. Peru xi má jyan nixtin ne, cúa nga cjuahñu.

Meje scaaya xuta ladu rë Jesús tsêhë yo me xi cumatitjun

²⁰ Hya xi camá ne, naa rë quihndi rë Zebedeo quijitjengui na Jesús cojo cha quihndi rë na. Cavixcuhnchi na xcun Jesús tsêhë xi fehya na ngu favor.

²¹ Sehe cavinenguise Jesús na cuitjin:

—¿Mé xi meje rë xahasen nuju?

Hane cuitjin cafayangui na:

—Tuhun cahndë xi cuiyujutaha cha quihndi naha ngu ngu ladu tjehe nuju, hya xi nihñu gobiernu nuju.

²² Ngajan cachja Jesús cojo cha cuitjin:

—Ngayun ne, hyuun mé xi chjayun. ¿Há scaa nuju cuatjun cjuañihi xi cuátju ngahan ni?

Sehe cafayangui catsijo cha:

—Juun, scaa niji.

²³ Ngajan xi cachja nga Jesús cojo cha cuitjin:

—Cjuañihi xi cuátju ngahan cuma ne, hatuxa hacuaha cojo ngayun cuatjun cuma. Peru xi cuinechuntuhun ngu ngu ladu tjehe naha ne, hacuiin ngahan cuichjá ta Nina cuichja me yo xuta xi sua rë me cahndë xi cuiyujutaha me.

²⁴ Xi cahndë yahnga xuta xi të jan cjua xi cachja Jesús ne, cavetsihin camacjan rë me cojo jo me xicjin me jan. ²⁵ Ngajan xi cajindaya Jesús yëjë ni me, cachja cojo me cuitjin:

—Ngayun ne ha hyun ta yëjë ni xuta xi matitjun nguehe ngasunhndë ne, jemu sahmi yehe me yojo rë me sacuaha xi me vëhë xi nai rë xuta, hacuaha jercu meje cuitexa me. ²⁶ Peru hacuiin cojo ngayun cuatjun nihñu ta xi meje rë ne, ngu ngayun xi meje nihñi yehe yojo nuju ne; ninguijnu yojo nuju tisecon xingun. ²⁷ Hane ngu ngayun xi meje cumatitjun ngayun, nihñu xi cuma yun sacuaha ngu mosu rë xingun. ²⁸ Ta cuanitjin ne, casahme ngahan

Quihndi rë Xuta Jain, ta canduvá ne, peru hacuiin canduvá xi xuta cuisecoo ná me ta ngahan cuisé_{coo} rë xuta, hacuaha tsingatehen xi tsiquehen ná xuta, cojo sa xi ngatsë rë vëhë cjin xuta cuaxëte Nina me. —Cuatjin cachja Jesús.

Casahmi Jesucristu xi camatsejen nga rë jo cha rcá ngajan Jericó

²⁹ Hya xi cavetju me nandya Jericó ne, jemu xutacjin quijitjengui rë me.
³⁰ Hane ngajan hiscan cavatju me siu jo cha rcá xi viyuju cha tjeheh ndiya, hane xi canuhya rë xi Jesús tivatju me, cajindaya cha cachja cha cuitjin:
 —¡Nai, ngayun tjë rë David! Catamayuma nuju ngayin. —Cuatjin cachja cha.

³¹ Hane xuta xi siu ne, cavisiajmicjan me cojo cha xi sejyu cha, peru cha vëhë ne, hitsë sa jercu cajindaya cha chja cha ta:

—¡Nai, ngayun tjë rë David! Catamayuma nuju ngayin.

³² Hya xi camá ne, ngajan casecunhñu Jesús, cajindaya me cha xi nduva cha. Sehe cavinenguise me cha cuitjin:

—¿Mé xi meje nuju xi sahme cojo nuju ni?

³³ Ngajan xi cachja cha rcá jan ta:

—Tatá, xi meje niji ne, xi cuma tsejen niji.

³⁴ Hane Jesús ne, camayuma rë me cha; cavisanetsja me tuxcun cha. Hane ngutjen ni, camatsejen nga rë cha, sehe quiji cha cojo Jesús.

21

Cafehe Jesús nandya Jerusalén

¹ Hane hya xi ha jima tiña Jesús xi cjuehe me Jerusalén, cavechu me nandya Betfajé, ngajan ndetjún xi hmí rë Ndetjún Olivu ne, sehe catsingatju me jo xuta ladu rë me xi cjue tixa rë me, ² hane cuitjin cachja me cojo me:

—Tángun nandya xi tsejen tacun vë. Hane ngutjen xi cjuhun tjeheh rë ne, sacú nuju ngu burru xi tjihñu chu cojo quihndi rë chu. Hane chundecjun chu, nduvuncujun chu. ³ Hane sá xi tjin yo xi cuichja cojo nuju tsëhë chu, sehe tinújun ta: “Maestru niji ne, meje rë me chu.” Hane sehe sua me cahndë.

⁴ Cuatjin camá cojo sa xi cuetjucaa jain cjua xi cachja profeta cuitjin:

⁵ Tinújun cojo xuta nangui Sion:

“Chutsujun ne, nduva me xi matitjun tsujun hiscan nechun. Hacuiin xta me ne, nduva me quisun me chu burru, quisun me quihndi rë chu xi vaniji chaha.”

⁶ Sehe xuta ladu rë me jan, cavetju quiji me hane casahmi me hacutjin cachja Jesús, ⁷ canduvacojo me chu burru cojo quihndi rë chu hiscan tacun Jesús. Hane caviyujusun me tsjian rë me ngaxtun chu, sehe camiji Jesús burru jan. ⁸ Hane xi quiji Jesús ne, quisun me burru jan, hane xutacjin ne, táha cacandi me tsjian rë me ndiya hiscan cjui Jesús. Hane yahnga me ne, quiji cavotohosun me xca xcuen hane hacuaha cacandi me ndiya hacutjin cjuí Jesús. ⁹ Hane yëjë ni me xi cjui tjun cojo yëjë me xi tjengui jan ne, cavetsihin jercu cajindaya me cachja me:

—¡Hosana! ¡Nacuechji rë Nina xi cafehe me xi cuitexa naja sacuaha cavitexa David hatsëë! ¡Jemu catsinchacun Nina me xi nduva vi tsëhë xi Nina catsingatju rë me! ¡Hisca ngahnga ne, cuechu cjua rë cjuandaja rë Nina!

¹⁰ Hya xi camá ne, xi cavisehen me nandya Jerusalén jercu jyë cjuandya camá hane cavinenguise xuta nandya cuitjin:

—¿Yo me vihi?

¹¹ Ngajan cafayanguí xutacjin jan cuitjin:

—Me vihi, hacui profeta Jesús, xuta Nasaret tséhë distritu Galilea.

Cavaxë Jesucristu xuta xi sahmi ndetsin ndatsen yungun

¹² Hya xi camá ne, quiji me yungun xi matitjun. Hane hya xi cavisehen me ndatsen yungun jan; cavaxë me xuta xi sahmi me ndetsin. Hacuaha catsindefa me maxë xi xinchasun tujún xi tsindeya cha cojo tujún rë xuta ngu nangui cojo puestu rë cha xi viteña nisëtyava. ¹³ Sehe cachja me cojo cha jan cuitjin:

—Chja cjua rë Nina ta: “Ndyá naha ne, tacunxa xi cjue xuta sahmi me oración rë me. Peru ngayun ne, tiniññuxun cojo sacuaaha ngu cahndë xi matangun xuta xi sahmi cjuamaña.”

¹⁴ Hya xi ha cavatju vëhë ne, ngajan yungun xi matitjun ne, cavechutaha me xuta rcá cojo xuta rengun; hane casahmi me xi camandaja me. ¹⁵ Ngajan xi cavëë nahmi xi matitjun cojo cha xi vicuya cjuachacun ne cjuarcun xi casahmi Jesús, hacuaaha cahndë me xi jindaya nixti ta: “¡Hosana! ¡Nacuechji rë Nina xi cafehe me xi cuitexa naja sacuaaha cavitexa David hatsëë!”; hane jemu cama xti rë me. ¹⁶ Cachja me cojo Jesús cuitjin:

—¿Há nuhyun cjua xi tichja me?

Ngajan xi cafayangui Jesús cuitjin:

—Juun, vihndë. Hane ngayun ne, ¿há cjëë chutahanyun cjua rë Nina xi chja tséhë? Chja cjua ta: Hisca cjua rë nixti hisca cjua rë quihndinda ne canihñu xi cuetju xi sahmi hnga nuju.

¹⁷ Hya xi camá cachja me ne, cavetju Jesús tséhë Jerusalén quiji me nandya Betania cavejña me nguixun.

Jesús ne, cachja xi quihndë cuaquiin tu rë ngu yaxujun xi cavangui me tú rë hya xi vojo rë me

¹⁸ Xi camanchujun jan ne, xi cavuya nga Jesús Jerusalén ne, cama vojo rë me. ¹⁹ Hya xi camá ne, tjehen ndiya ne, cavëë me ngu yaxujun xi chine tú rë, peru xi cavechu me ngajan ne, ndastu me tú yaja rë, ta suva xca ni yaja rë. Ngajan xi cachja Jesús tséhë:

—Quihndë tsajin nixtin xi cuaquí tú riji.

Hane ngutjen ne, caxintsen ya jan. ²⁰ Hya xi cavëë xuta ladu rë me xi cuatjin camá ne, cafaharcun me Jesús cachja me cuitjin:

—¿Hacutjin cumá xi jemu xati caxintsen yaxujun jan?

²¹ Ngajan cafayangui Jesús tséhë me cuitjin:

—Cuichjá quixë jain cojo nuju ta sá xi macjain nuju Nina hane hacuiin jo cjuatacun nuju ne, cumá nihñu sacuaaha casahme cojo yaxujun vi. Hacuaha hisca sá xi cuinújun cojo ndetjún vihi ta: “Tihinxin tséhë nguehe. Tihin tsihin ngajñi ndachacun.” Hane cuatjin cumá. ²² Yëjë ni xcusun ne, tu mé ni xi chjahyun cojo Nina hane sá xi macjain nuju xi sacú nuju ne, cuetjuca quixi.

Cavinenguise xuta cojo Jesús yo cavitexa rë me

²³ Hane xi vicuya Jesús ngajan ndatsen yungun xi matitjun ne, camatangun nahmi xi matitjun cojo xuta changá, hane cuitjin cavinenguise me Jesús:

—¿Yo cavitexa nuju xi nihñu xa ví? ¿Yo casuaxa nuju?

²⁴ Hane xi cafayangui Jesús ne, cuitjin cachja me:

—Hacuaha cuinenguësë nuju ngu cjua, hane sá xi chjayunngun tsahan ne, sehe cuichjá cojo nuju yo cavitexa ná xi sahme xcusun vihi. ²⁵ ¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin cachja me.

Sehe ngajan xi xuta xi cuacun jan ne, cavisiajmicjín me ngajñi rë me, cachja me cuitjin:

—Sá xi cuinújan xi Nina caviteza me cha Juan vë ne, cjuinenguise naja me: “Sá cuatjin ne, ¿mé má camacjaain nuju cha?” ²⁶ Hane sá xi cuinújan xi xuta caviteza rë cha ne, tsajin yo hvë mé sahmi xuta cojo naja ta, tsëhë xi yëjë ni xuta ne, ha macjain rë me xi cha vëhë ne, profeta cha.

²⁷ Hane xi cafayangui xuta jan tsëhë Jesús ne chja me ta:

—Hyiin.

Ngajan xi hacuaha Jesús ne, cachja me ta:

—Hacuaha cuichjaan cojo nuju yo caviteza ná xi sahme xá vihi.

Ejemplu tsëhë jo cha quihndi

²⁸ Peru ¿mé nújun tsëhë cuento vi? Ngu xihin ne, jo má cha quihndi rë me. Hya xi camá ne, cafehe cachja me cojo ngu cha cuitjin: “Tsan, tihin nihñi xá ngajan hiscan camatjë xca rë uva.” ²⁹ Peru cha quihndi jan ne, cafayangui cha cuitjin: “¡jéya! ¡Mijí cjué!” Peru hya xi camá ne, cavindeya cjuatacun rë cha hane quiji cha xcun xá jan. ³⁰ Sehe hacuanitjin cachja nahmi jan cojo quihndi xi má jo, hane cuitjin cafayangui cha jan cachja cha: “Tatá, ngahan ne, cjué.” Peru quijiin cha. ³¹ Hindë ne, ¿jarë cha xi casahmi chihin cha xcusun xi meje rë nahmi rë cha?

Ngajan cafayangui me ta:

—Cha xi tjun cachja.

Sehe cachja Jesús cojo me cuitjin:

—Cuichjá quixë cojo nuju ta xuta xi cojo cjuamaña faha tujúnsa cojo chjuun xi viteña na yojo ran hitsë sa tjun cuisehen me gobiernu xi sahmi Nina xi cuma nuju ngayun, ³² ta cafehe Juan cavicuya me ngayun hacutjin nihñu xcun Nina hane camacjaain nuju cjuarë me. Peru xuta xi faha tujúnsa cojo chjuun xi viteña yojo ré na, me vëhë camacjain rë me. Ngayun ne, handasa cahyun yëjë xcusun vëhë ne, canindeyuun cjuatacun nuju; camacjaain nuju.

Ejemplu tsëhë cha xi sahmixa xi jemu tsehen cha

³³ Nuhyun sa ngu ejemplu xi cuitjin fi: Ngu nai rë ngu ranchun matsejen ne, catsitjë me xcun nangui rë me xca rë uva. Hacuaha casahmi me hnhua xondyojo tahndee rë xitjë jan, hane ngajan ni ne, cafahnguiya me ngu ndyojotë hiscan cuaxë nandá rë uva jan. Hacuaha casahmi me ngu cahndë hiscan xi cavesun me ngu nahan ngahnga xi sesun xuta xi sahmi cuidadu xitjë rë me. Sehe casua me ngujo cha sahmixa xi cjuahacuenda cha. Sehe cjuaha tsë tsë me cojo cha. Hane hya xi camá ne, cavetju me quiji me ngu nangui xin. ³⁴ Xi cavechú nixtin rë tútjë jan matsejen ne, sehe catsingatju me mosu rë me xi quiji cachja cha cojo cha xi fahacuenda xitjë jan xi sua cha hitsë tutjë xi satë rë me. ³⁵ Peru cha xi sahmixa jan ne, cafaha cha mosu jan tu cavaja cha ngu mosu, catsiquehen cha ngu nga, hane cavetaha cha ndyojo xcun ngu nga. ³⁶ Sehe catsingatju nga me mosu hacjahi xi hitsë sa cjín má cha tsëhë mosu xi tjun catsingatju me, peru cha xi sahmixa jan ne, ha chuva vëhë ni casahmi cha cojo yëjë ni.

³⁷ Hya xi camá ne, hisca catsingatju me suva quihndi rë me ta catsingatahacacun me cuitjin: “Tuxa cjuaharcun rë cha, xi quihndi naha.” ³⁸ Peru xi cavëë cha xi hatuxa quihndi rë me xi nduva ne, cavisiajmicjín cha cojo xicjin cha cuitjin: “Cha vihi ne, quihndi xi cjuahatsja xitjë vi cha. Niquen cha, cojo sa xi tsajan cuma nangui vi.” Cuatjin cavisiajmicjín cha. ³⁹ Hya xi

camá ne, cafaha cha cha quihndi jan quijicojo cha ndatsen cahndé jan, sehe catsiquehen cha cha.

⁴⁰ Hindé ne, xi má nuju ne, ¿mé sahmi nai rē xitjē jan cojo cha xi cuacun fahacuenda jan?

⁴¹ Ngajan cafayangui me tséhē Jesús cuitjin:

—Cjue tsiquehen me cha xi tsehen cjuatacun rē jan, sehe sua me xitjē jan cjuahacuenda jingu sa cha sahmixa, cha xi sua cha xitjē xi saté rē me hya xi cuechú nixtin rē. —Cuatjin cafayangui me.

⁴² Sehe cachja Jesús cojo me cuitjin:

—¿Há cachutayuun xujun rē Nina xi chja cuitjin?:

Ndyojo xi catsitjungi chjinevexo ne, véhē ndyojo xi cavéjña tjun tjun yuju rē xihndēnaña.

Cuatjin casahmi Nina xi cuma. Hane xi chutsejen ngayaan ne, jemu chja-hanrcun xahasen naja.

⁴³ Véhē xi cuichjá cojo nuju ta, chjahataha nuju cahndé xi cuisuhun gobiernu xi sahmi Nina, hane sua Nina xuta nanguixin cahndé jan, xuta xi sua me xi saté rē me. ⁴⁴ Hane ndyojo jan ne, hya xi ngu xuta cjuinenguisun me xcun ndyojo véhē matsejen ne, cuatēlanga rē me. Hane hya xi ndyojo véhē cuinenguisun rē ngu xuta matsejen ne, ña cumá té me.

⁴⁵ Hane xi cahndé nahmi xi matitjun cojo cha partidu fariseo ejemplu xi cachja Jesús tséhē xuta vē ne, camachaya rē me xi condra rē me tichja Jesús.

⁴⁶ Véhē xi cavangui me chuva rē hacutjin cuma xi cjuaha me Jesús peru camaji ta tsacjun me xuta, ta xi má rē xuta ne, ngu profeta má Jesús.

22

Ejemplu tséhē ngu suhi cjuavixan

¹ Sehe quijinduju sa cachja Jesús ejemplu cojo rē me cuitjin:

² —Nina ne sahmi me cojo xuta xi cuisehen me gobiernu xi sahmi me sacuha casahmi ngu xihin xi matitjun tséhē ngu nangui hya xi casahmi me suhi xi cuixan quihndi rē me. ³ Hya xi casune hora rē, catsingatju me mosu hndixahan rē me quiji cha ndava xuta xi ha casua me camachaya rē xi nduva me cjuavixan, peru canduvaain me suhi. ⁴ Sehe catsingatju me hndixahan xi hacjahi ne, cuitjin cavitexa me: “Tinoje cojo xuta xi nduva cuitjin: Chutsujun ni tai, ha tjin chihin comida, ha cahme chu xi tetjo ná tséhē suhi vi, hane cachjan yojo. Tjin chihin yějē ni: nduvun ne, xinēēsuhí.”

⁵ Peru casahmi cuendaain me cjuaj jan, hane quijixin me cafahacuenda me cjuacjintacun rē me. Ngu me quiji me xcun xitjē rē me, ngu nga me hiscan sahmi me negocio. ⁶ Hane yahnga nga me ne, cafaha me mosu hndixahan jan, choho casahmi me cojo cha hisca catsiquehen me cha. ⁷ Hya xi camá ne, me xi matitjun jan ne, cama cjan rē me. Catsingatju me sindadu rē me. Catsiquehen sindadu cha tsiquehen jan hane cavaca me nandya rē cha.

⁸ Hya xi camá ne, cachja nga me cojo hndixahan rē me cuitjin: “Ha tjin ndaja xcusun rē cjuavixan. Peru xuta xi cuinduva ne, hacuini ndaja cjuatacun rē me ndajintjin xi nduva me. ⁹ Véhē xi tihin hisca cruci ndiyatē ne, hane tu hacutjin cjin má xuta xi sacu ri, noje cojo yějē ni me xi catinduva me catjinesuhi me.” ¹⁰ Ngajan xi quiji hndixahan jan hiscan ndiyatē rē nandya ne, hane yějē ni xuta xi cavechutaha cha, sá xuta tsehen, o sá xuta ndaja ne, casahmi cha xi camatangun me quiji me suhi. Hane ña catsēxtin xuta ndava suhi.

11 'Hya xi tijima suhi ne, xi cavisehen me xi matitjun jan xi scutsejen me xuta xi cafehe me, cavutsejen me ngu cha xi yuma jyihi cojo tsjian rë. 12 Ngajan xi cachja me cojo cha cuitjin: "Tai, çhacutjin cama xi cavisuhun nguehe handasa jemu yuma jyihi tsjian nuju?" Peru cavejñajyuu cha vë cachjaain cha. 13 Sehe cachja me xi matitjun jan cojo hndixahan rë me cuitjin: "Tetuhunhñu tsja cha cojo ntsacu cha sehe naxun cha ndatsen hiscan jñu. Ngajan hiscan hinchaxuta xi tijihnda me, hacuaha titsijanerii me nehñu me." 14 Cjín má me xi cachjinda rë xi nduva me, peru chuva má me xi tuxijijñi rë.

Cjuacjintacun tsëhë tujúnsa

15 Hya xi camá ne, cha partidu fariseo ne, cavisiajmichihin cha casacuse rë cha ngu cjuacjintacun xi tsavi fi xi cjuayangui Jesús tsëhë. 16 Hya xi camá ne, catsingatju cha ngujo cha ladu jan, cojo cha ladu rë Herodes ne, cachja cha cojo Jesús cuitjin:

—Maestro, ngayin ne, hyin ta ngayun ne xuta ndaja ngayun. Vicuyun ndiya rë Nina cojo cjuaquixi. Ha tuxa cjuaquixindaja xi nújun, ha ndasa cojo xuta nchina visiajmu o sá cojo xuta yuma. 17 Xi má nuju ne, mé xi ndaja cuinújan. Sacuaha ley rë Moisés ne, çhá tsingatihi xi cuechjen tujúnsa naja cojo César, me xi matitjun, o há tsingatiin?

18 Peru Jesús ne, tsëhë xi ha vacun rë me xi jemu choho xcusun rë cha ne, cachja me cojo cha cuitjin:

—¿Mé má cuatjin meje chjuhunchuvun ná? Xuta ndacha ngayun.

19 Ningacun ná ngu tujún jan scutsejen.

Hane canduvacojo cha ngu tujún tyava.

20 Sehe cavinenguise me cha cuitjin:

—¿Yo xcusun rë hacuaha yo ñihi rë xi quitaha xcun tujún vë? —Cuatjin cavinenguise Jesús.

21 Hane cha xi cuacun vë ne, cuitjin cafayangui cha:

—Tsëhë César.

Sehen ngajan xi Jesús ne, cuitjin cachja me cojo cha:

—Cuatjin ne, tuhun rë César xi tsëhë me, hane tuhun rë Nina xi tsëhë me.

22 Hya xi cahndë cha cjuaxi cachja Jesús ne, quijircun rë cha, sehe cavetju cha quiji cha tsëhë cahndë xi tacun me.

Cjuachjinenguise tsëhë xi cuya nima cjuahñu

23 Sehe nixtin hya ne, cafehe tjengui Jesús cha partidu saduceo, cha xi vicuya cjuachacun xi chja xi xuta xi cahme ne, cuyaain nga me cjuahñu. Sehe cavinenguise cha Jesús cuitjin:

24 —Maestro, Moisés ne cachja me ta: "Sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaha quihndi rë nima vëhë." 25 Quihndë ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane tsëhë xi tsajin quihndi rë cha, hntsë nima vë ne, cafaha cha chjuun jan. 26 Hane cuanitjin cavatju cha xi majo cojo cha xi majyan hisca chuva ngu chuva ngu cha hisca cojo cha xi má yatu. 27 Hane xi cajnetaha ne, sehe cahme chjuun jan. 28 Quihndë ne, hya xi cuya yëjë nima cjuahñu ne, çjarë cha xi cuacún vë xi chjuun rë cha na xi cjuaquixi ta, tsëhë xi yëjë ni xi yatu cha ne, camá chjuun rë cha na? —Cuatjin cachja cha.

29 Ngajan xi cachja Jesús cojo cha ta:

—Ngayun ne, cuaintjin xi nújun, tséhë xi vijni rcun cja xi chja xujun tséhë Nina, hacuaha hyuun xi Nina ne, jemu hñu cjuatacun rë me. ³⁰ Ta hya ne, cumaji cjuavixan hacuaha tsinguixaain xicjin me hya ta, sacuaha ángel xi siu ngahnga ne, cuatjin cuiyuju me. ³¹ Quihndë xi tinújun tséhë nima xi cuya cjuahñu ne, cuinenguësë nuju ne, ¿há cjëë chutayun cja xi cachja Nina cojo nuju xcun xujun rë me tséhë nima xutachanga nuju xi cuicun vi? ³² “Ngahan xi Nina rë Abraham ngahan, Nina rë Isaac hacuaha cojo Nina rë Jacob.” Cuatjin cachja Nina. Peru ndaja hyun ta Nina ne, hacuiin Nina rë nima ta Nina rë xuta xi quicun me.

³³ Hya xi cahndë xutacjín cja jan, jercu tu quijircun rë me cja xi catsicuya Jesús.

Cjuachjinenguisse tséhë jarë artículo tséhë ley xi hitsë sa matitjun

³⁴ Peru cha partidu fariseo xi camachaya rë cha xi catsinguejyu Jesús cja rë cha partidu saduceo ne, camatangun cha cojo xicjin cha, ³⁵ hane sehe cavitexa cha ngu maestru rë ley xi cavinenguisse cha me cja vi cojo sa xi cuma cjuahachuva cha me. Cuitjin cachja maestru jan:

³⁶ —Maestro, tséhë yëjë ni cja xi cavitexa Nina naja xcun xujun ley ne, ¿jarë artículo xi hitsë sa matitjun?

³⁷ Ngajan xi cafayangui Jesús cuitjin:

—“Meje rë xi nihmutacún Nina naja cojo nguñajatacún, cojo yëjë ni xahasen nuju, cojo yëjë ni ngahñu nuju, cojo yëjë ni cjuatacun nuju.” ³⁸ Cja vë xi hitsë sa venguichji rë ne, hitsë sa matitjun xi cumá rë yëjë ni cja rë ley. ³⁹ Hane xi má jo ni: “Meje rë xi nihmutacún xingun sacuatjin hmutacún suvun jojo nuju.” ⁴⁰ Tséhë jo artículo vi ne vetjun sa yëjë cja rë ley xi catsihindu Moisés cojo yëjë cja xi catsihindu profeta. —Cuatjin cachja Jesús cojo cha.

¿Yo tjë rë má me xi catsingatju Nina?

⁴¹ Hya xi ha camá tangun cha partidu fariseo ne, sehe cavinenguisse Jesús cha cuitjin:

⁴² —¿Mé nújun? Mesías o sa Cristu ne, ¿yo tjë rë má me?

Cafayangui me ta:

—Tjë rë David má me.

⁴³ Sehe cachja Jesús cuitjin:

—Sá xi quixi xi cuatjin ne, ¿hacutjin cavátju xi suva David ne, hya xi catsihindu me cja xi cachja Hasen tséhë Nina cojo rë me, “Nai” cachja me tséhë Mesias? ta cuitjin catsihindu me:

⁴⁴ Nina ne, cachja me cojo Nai naha cuitjin:

“Tinechin nguehe ladu quixi naha,

hisca hya xi yëjë ni xi sahmi ri condra ne, cuiyúju ngahan ngahma gobiernu riji.”

⁴⁵ Quihndë ne, sá xi suvá David chja me xi Nai rë me má me xi tsingatju Nina ne, ¿hacutjin má ne xi hacuaha tjë rë me má me vëhë?

⁴⁶ Ngajan camá xi ndastu mé cafayangui cha, hacuaha hisca hya ne, tsacjun cha cjuinenguisse sa cha me.

23

Cachjajyë Jesucristu cojo xutacjín tséhë cha xi vicuya cjuachacun

¹ Hya xi camá ne, cachja Jesús cojo xutacjín hacuaha cojo xuta ladu rë me cuitjin:

²—Cha xi vicuya cjuachacun cojo cha partidu fariseo ne, casatë rë cha xá rë ley xi casatë rë Moisés hatsëë. ³ Vêhë xi meje rë xi nuhyun cjuarë cha hacuaha nihñuchuhun yëjë ni xi vicuya cha; peru nihñuu sacuaha sahmi cha ta, ndaja chja cha jan peru hacjahi sahmi cha. ⁴ Cjuarë xi vicuya cha jemu chja sahmi chihin xuta ta tangun sacuaha ngu chaha xi hai vaníji tyja rë me, peru suva ni cha ne, visecuaain cha me hisca hitsë. ⁵ Yëjë ni xi sahmi cha ne, sahmi cha ngatsë rë xi scuëë xuta cha, sahmi nga xuta cha. Vatjutaha cha chuva rë xujun xi chja ley xi setaha xten xuta, cojo tsjahya xi tsingaqui cha ntsacu tsjian rë cha. ⁶ Hacuaha jemu chuya rë cha hya xi satë rë cha cahndë xi matitjun tsëhë ngu ndava suhi o tsëhë yungun. ⁷ Hacuaha hora xi fi tsujijhiya cha, jemu chuya rë cha xi cuatjin fi xuta chja me nina cojo cha ngajan ngajñi ndetsin, maestro chja xuta tsëhë cha.

⁸ Peru ngayun ne, xi cuichjaain xuta tsujun Maestro ta ngu ni me xi Maestru nuju, hane ngajñi nuju ngayun ne, xingun má yun. ⁹ Hacuaha xuta ngasunhdë ne, canujuun tsëhë me xi Nahmi ta ngu ni me xi tacun me ngahnga ne, hacui Nahmi nuju. ¹⁰ Cuanitjin ne, xi cuichjaain xuta tsujun Nai ta ngu ni me xi Nai nuju, me vëhë ne, Cristu. ¹¹ Hane ngu ngayun xi meje cumatitjun ngayun ne, sahmi me sacuaha ngu mosu rë xicjin. ¹² Tsëhë xi yëjë xuta xi sahmi yehe suvá me yojo rë me ne, cuechu nixtin xi Nina ne, tsinguijne me cjuatacun rë. Hane xuta xi tsinguijne suvá me cjuatacun rë me, hya ne, Nina ne, sahmi yehe rë me.

¹³ Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun!, ta vechjun tingotjo hisca visehen gobiernu xi sahmi Nina cojo sa xi cumaji cuisehen xuta. Tivisuun suvun, hacuaha tituun cahndë xi cuisehen xuta xi meje cuisehen me.

¹⁴ Jemu chojyihí tsujun, ngayun cha xi vicuya cjuachacun cojo ngayun cha partidu fariseo. Jemu cjin tujún naxun yachjin cahan xi hisca ndava na tsajin. Hane hya xi nújunyumun ne jemu nduju hora nihñu, peru hacuain nguñaja tacun nújun ta, vindachun ni. Vêhë xi hitsë sa jyë cuma castigu xi cumá nuju.

¹⁵ Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! ta cuangun jingujyë ni ngasunhdë xi sacu ngu ni me xi cuisehen ladu nuju. Peru hya xi cavicuyun rë me, hitsë sa jyë castigu satë rë me xi cuma nuju.

¹⁶ Jemu chojyihí tsujun, ¡xuta rcá yun xi meje ningacun ndiya! Nújun ta: “Sá xi tuhun cjuarë nuju hane cuinújun ta: Quixi, vëë yungun xi matitjun ne, sahmi ngujyë xi nihñu chihin cjuarë nuju, peru sá xi tuhun cjuarë nuju cojo oro xi jiya yungun xi matitjun ne, vëhë sahmi ngujyë xi tuhun xi canújun.”

¹⁷ ¡Ngarca ni ngayun! ¡Rcá yun! ¡Jarë xi meje rë xi chjaanrcun? ¿Há oro jan? o sá tsajin ne, ¿há yungun xi matitjun? ta, ngatsë rë yungun ne, vëhë xi camanchacun oro xi hinchahantsua. ¹⁸ Hacuaha nújun ta: “Sá xi tuhun cjuarë nuju hane cuinújun xi ngasunscun yungun cuma testigu ne, sahmi ngujyë xi nihñu chihin cjuarë nuju, peru sá xi nújun ta cuatjo xcun ngasunscun jan cuma testigu ne, sehe sahmi ngujyë xi tuhun xi canújun.” ¹⁹ ¡Rcá yun! ¡Jarë xi meje rë xi chjaanrcun? ¿Há cuatjo jan? o sá tsajin ne, ¿há ngasunscun ta, tsëhë xi xcun vëhë ngajan camachacun cuatjo? ²⁰ Vêhë xi yo xi cuisiajmi hane cuichja me xi vëë ngasunscun ne, hacuaha tichja me xi vëë yëjë xi hinchasun xcun; ²¹ hacuaha yo xi cuisiajmi hane cuichja me xi vëë yungun xi matitjun ne, hacuaha tichja me xi vëë Nina xi tacun me ngajan. ²² Hane yo xi cuisiajmi

hane cuichja me xi vëë ngahnga ne, hacuaha tichja me xi vëë cahndë hiscan sahmi Nina gobiernu hane hacuaha xi vëë Nina xi sahmi me.

²³ 'Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! Ngayun ne, handasa tuhun diezmu nuju hisca cojo nchurca cojo ruda cojo yëjë sa xcusun ndeya ne, peru nihñucunduun xi nihñuchihin artículo rë ley xi hitsë sa meje rë Nina xi nihñuchuhun sacuaha xi chja cuitjin: nihñu hacutjin xi cjuaquixi cojo xingun, sacuaha xi mayuma nuju xingun, hane sacuaha xi ngu ni má cjuaju; hitsë sa ndaja sa canihñu yëjë xcusun vihi, hane canihñucundun tsëhë xcusun xi canihñu. ²⁴ ¡Ngayun ne xuta rcá yun xi meje ningacun ndiya! Nihñu sacuaha sahmi ngu xuta xi tsicaha me vinu rë me, sehe cuetjuxin ngu chu xihî xi jiya ngajñi rë. Peru cuma tsinguijne jingu me ngu chu camellu.

²⁵ 'Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Jo xcun jo ntsuvun yun! Nihñu tyjahi táha ngaxtun ngu vasu cojo ngu tyuva, peru cahntsua ne, quitsë camahani rë cjuachëjë cojo cjuatacun xi nimuju yëjë ni xcusun. ²⁶ Fariseo rcá, titjun nihñu tyjahi cahntsua vasu cojo tyuva jan ta tsëhë xi cuatjin ne, hacuaha cuma tyjahi táha ngaxtun.

²⁷ 'Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Jemu ndacha yun! Ngayun ne, tangun cun cojo ngu tsjun xi cahvi rë xujñu, ta ndaja tsejen tsjun jan, peru cahntsua ne, quitsë rë cojo ninda rë nima cojo yëjë ni xi jehndu. ²⁸ Cuanitjin cun ngayun ta xi vtusejen xuta yun, tsejen sacuaha xuta ndaja tyjahi yun, peru cahntsua xahasen nuju ne, quitsë rë cojo cjuandacha cojo cjuatsehen.

²⁹ 'Jemu chojyihî tsujun, ngayun cha xi vicuya cjuachacun cojo ngayun cha partidu fariseo. Ngayun ne, nindujun tsjun ndacun tsëhë yëjë ni nima profeta, hacuaha nihñu ndacun tsjun tsëhë nima xi tsajin xi cun rë me xcun Nina. ³⁰ Hacuaha ngayun nújun ta: "Sá xi ngayin cavinechin nixtin hatsëë xi quicun xutachanga niji ne, cavisecuiin rë me xi tsiquehen me profeta xi cuacun vë ta cumacjain niji." ³¹ Quihndë ne, cahyun ta cojo cjuaju nuju vë, tuhun testigu condra nuju ta tsëhë xi ngayun ne hatuxa quihndi rë xutachanga nuju ngayun, hane me vëhë ne xi catsiquehen me profeta jan. ³² Quihndë ngayun ne, ¡tangun cuéchun chuva rë cjuatsehen xi casahmi xutachanga nuju!

³³ 'Sacuaha cun yë chacun cuatjin cun ngayun, ¡quihndi rë yë yun! ¿Hacutjin cumá cuetjuntjun tsëhë castigu xi má hasen rë nima? ³⁴ Vëhë xi tsingátju sa nuju profeta cojo xuta xi quicun cjuatacun rë me cojo maestru ne, hane ngujo me ne, ngayun ne nicuhun me hacuaha cuetuhun me xcun cru. Ngujo nga me cujan rë me ngayun ngajan ndatsen yungun hacuaha tuhun rë me cjuañihî xi cuatju me sehe cuanga me ngu nandya ngu nandya. ³⁵ Cojo chuva vëhë ne, chanujujyun cjuaveya rë yëjë ni xuta xi tyjahi cjuatacun rë me xi cahme nguehe ngasunhdë. Chanujujyun cjuaveya rë xutachanga naja Abel cojo hisca cjuaveya rë xutachanga naja Zacarías quihndi rë Berequías, me xi canicuhun tiña ngasunscun hiscan ndatsen rë ndava Nina. ³⁶ Cuichjá quixë cojo nuju ta tsëhë cjuaveya rë yëjë ni me vë chanujujyun ngayujun ni xi nechun quihndë.

Jemu choho camá rë Jesucristu ngatsë rë xuta Jerusalén

³⁷ '¡Ngayun xuta Jerusalén, ngayun xi cojo ndoyojo nicuhun profeta xi tsingátju Nina ngajñi nuju! ¡Jemu choho má ná tsujun! ¡Mé hitsë ndiya xi meje scávëvaha nuju sacuaha javëvaha ngu nisë quihndi rë chu xi cuincha chu

ngahma tyjunga rë chu! Peru ngayun ne, mijí nuju. ³⁸ Chutsujun ni, Nina ne, catsismicacun me ngayun. ³⁹ Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingatju me ngajñi naja!” —Cuatjin cachja Jesús.

24

Cachja Jesús xi cuetsun yungun

¹ Hora xi tivetju Jesús tséhë ndatsen yungun xi matitjun jan xi cjuí xin me ne, ngajan cafehe xuta ladu rë me caveyananguí me hane catsingacun tsja me xi yungun jan ne, jemu ndajyíhi. ² Hya xi camá ne, cuitjin cachja Jesús tséhë yungun jan:

—Sacuaaha yějë ni ndihya vihi xi chutsujun tséhë yungun ne, cuichjá cojo nuju ta cuechú nixtin xi hisca ngu ndyojo ndacun xi cuicun vi ne, tsajin xinchasuncoo xicjin ta cjuë yějë cuixujne. —Cuitjin cachja Jesús.

Hacutjin sacú cumachaya naja xi ha meje cuijnetaha nixtin vihi

³ Xi cafë cachja Jesús cuitjin ne, sehe cafehe me tiña rcu Ndetjún Olivu. Hane xi tacun súvá me, ngajan cafehe xuta ladu rë me, cavinenguise rë me cuitjin:

—¿Mé nújun? ¿Janihya cuetjucaa xcusun vëhë ni? ¿Hane hacutjin cuma sacú niji cjuaquixi xi ha tivechú nixtin xi nduvun ngayun tivechú hora xi cjuë nixtin rë ngasunhndë vi?

⁴ Ngajan xi cachja Jesús cojo rë me cuitjin:

—Nechun cuidadu, cojo sa xi hacuiin cuma ndacha ngayun ta, ⁵ tséhë xi jemu cjín xuta cuetjucaa me xi cuichja me xi hacui me xi catsingatju Nina me. “Ngahan Cristu”, cuichja me. Hane cuatjin jemu cjín xuta cumacjain rë me cjuandacha rë me xi cuacun vë. ⁶ Hacuaha hya xi cumachaya nuju cjuá xi jemu yehe si tijima ngu nación o sá xi tjin cjuacjintacun xi jemu yehe si nduva ne, xicarcun ta, hatuxa tjin xi titjun xcusun vëhë cuma. Peru hacuiin ha hya cuijnetaha nixtin vihi. ⁷ Hacuiin hya cuma ta, titjun ne, scaan xuta ngu nación cojo jingu sa nación. Hacuaha scaan xuta ngu nandya cojo ngu nga nandya. Hacuaha jemu cjín cahndë xi cuma cuechu jindya. Jemu cjín cahndë xi cjuani nanguí. ⁸ Peru xi cuatjin cumá yějë ni xcusun vihi ne, sehe ntsacu tivetsihin cjuañihi xi cuatju xuta.

⁹ Sehe cjuaha nuju xuta, cjuecojo nuju me xi cuatjun cjuañihi, xi tsiquehen me ngayun. Hacuaha jemu chohovëë xuta rë yějë nanguí yun ngatsë naha.

¹⁰ Hya xi cumá ne, cjín xuta tsismicacun me ladu naha, hane tsindeya me cjuatacun rë me. Sehe cojo cjuá ni cuiteña xicjin me. ¹¹ Hacuaha jemu cjín profeta xi vindacha me xuta cuetjucaa me. Hane cuatjin jemu cjín xuta cumacjain rë me cjuandacha rë me. ¹² Hacuaha cjuatsehen ne, jemu cumayehetaha. Vëhë xi hya ne, cumachuva cjuahmutacun xi tjin rë xuta. ¹³ Peru jarë ngayun xi scaa nuju cojo cjuacjintacun vëhë hisca xi cueyun ne, cuehun xcun Nina. ¹⁴ Hane xuta ne, cjuë me jinguyjé ni ngasunhndë cuichja me cjuandajyíhi vihi tséhë gobiernu xi sahmi Nina, xi cumachaya rë xuta ngasunhndë. Hane hisca xi cuma chihin yějë xcusun vëhë cuijnetaha nixtin vihi.

¹⁵ Profeta Daniel ne, catsihindu me xcun xujun rë Nina tséhë ngu xcusun tsehen xi tsinguetsun. Cuechún nixtin xi cuejña vëhë xu cahndë ximinchacun —xuta xi vutaya cjuá vi, catjahacuenda me cjuá—. Hya xi cuatjin tsejen ne, ¹⁶ hya ne, xuta xi siu yějë nandya tséhë distritu Judea ne, catanga me hane

catangahma me hiscan ndetjún. ¹⁷ Hacuaha jarë me xi hinchasun me rcu ndava me ne, mé tséhë me xi siu cahntsua ndihya ne, mijí rë xi cjuejaha me. ¹⁸ Hacuaha ha chuva vëhé ni ne, xuta xi siutaha me nguiña ne, mijí rë xi cuya cjuejaha me tsjanga rë me ndava me. ¹⁹ Jemu chojyíhi tséhë yëjé yachjin xi hinchahma quihndi rë cojo yëjé me xi tjin rë quihndi vaqui xi cojo me cuanga me nixtin hya! ²⁰ Chjahyun rë Nina xi cjuañihi vëhé ne, hacuiin cuinduva nixtin chan nchan o sá nixtin xi chjahájenda rë ta, ²¹ tséhë xi cjuañihi jyë xi cuma ne, ngu cjuandya jyë xi cjëë camahani camá hisca ntsacu cavetsihin ngasunhdë. Hacuaha cuyaain cuma nga. ²² Jemu jyë cjuañihi jan, sá tsajin xi ha camachuva nixtin rë cjuañihi vëhé ne, hisca ngu xuta ne, cuetjintjiin me. Peru ngatsë rë cjuahmutacun xi tjin rë Nina cojo xuta xi cavaxijin me xi cuma ladu rë me ne, casahmichuva me nixtin vëhé.

²³ Hya ne, sá xi cuichja yahnga me cojo nuju ta: “Cuajyíhi Cristu nguehe”, o sá “Cuajyíhi me ngajan.” Xi camacjaain nuju cjuaja jan ta, ²⁴ tséhë xi nixtin hya ne, jemu cjín xuta cuetjucaa me xi cuichja me cuindacha me ta Cristu me o sá profeta me. Hacuaha jemu sahmi me cjuarcun tséhë xi meje cuindacha me xuta, hisca cojo xuta xi cavaxijin Nina. ²⁵ Quihndë ne cojo chaja sa xi cuechu nixtin vëhé ne, ngahan ne, ha cachjá cojo nuju. ²⁶ Vëhé xi sá xi cuichja yahnga me cojo nuju ta: “Jemu xín tséhë nandya tacun me”, hacuiin cuangun cojo me. O sá xi cuichja me ta: “Ndihya cahnchun tacun me”, camacjain nuju tséhë me ta, ²⁷ sacuaha sahmi hasen ndihichuhún xi ha tu ñahñu sahmi hasen rë jinguyjé ni ngahnga, hiscan ladu vetjucaa tsuhi hiscan ladu vetje tsuhi ne, cuatjin ha tu ñahñu scutsejen ná yëjé ni xuta hya xi cuinduvá nga ngahan xi Quihndi rë Xuta jain. ²⁸ Cuatjin cuma nixtin hya sacuaha chja cjuaja ta hiscan jiña chu xi cahme ne, hacuaha ngajan matangun chu lote.

Hya xi cuya nduva Quihndi rë Xuta Jain

²⁹ Ngutjen xi camá cavatju cjuañihi jan ne, cuinduva nixtin xi cjuë ndavá rë tsuhi. Hacuaha sá ne, ha quihndë suaain ndavá rë. Hane niñú ne, cuixu tséhë ngahnga. Hisca ngahñu xi tjin ngahnga ne, cjuiniyaya. ³⁰ Hya xi camá ne, ngajan cuma tsejen seña tséhë Quihndi rë Xuta Jain. Hane yëjé xuta xi siu ngasunhdë ne, jindayava me. Sehe hya scuëë xuta ngahan, xi Quihndi rë Xuta Jain ngahan, xi cuinduvá ngajñi rë yufi cojo jemu jyë ngahñu, hisca seti hisca vatë jyíhi ngahan xi cuinduva. ³¹ Hya ne, tsingátju ángel naha, hane xi ndaja hñu cuinuhya rë xi fane ngu tyjo, sehe cjuejaha rë yëjé ni xuta naha xi cavaxejen, sahmitangun rë me tséhë jinguyjé ni ladu ngasunhdë.

³² Quihndë ne, ningatuhuntacún tséhë ejemplu xi sua yaxujún: Hya xi cuetsihin cumá xcuen tsja rë tséhë xi ha jemu camatiña cuetsihin cuetjusehen ne, ngayun ne, ha hyun ta ha jemu camatiña chan tsin. ³³ Hacuaha chuva vëhé ni ne, hya xi chun xi cuetsihin cumá yëjé xcusun xi cachjá cojo nuju vë ne, vëhé sua cumachaya nuju xi ha camatiña nixtin rë, hisca meje cumá. ³⁴ Cuichjá cjuaquixi cojo nuju ta xuta xi siu nixtin vihi ne siu cuaha me hya xi cuetjucaa xcusun xi cachjá cojo nuju jan. ³⁵ Ngahnga cojo nguehe ngasunhdë ne, hatuxa cjuë. Peru hisca ngu cjuaja naha ne, tsajin xi cuetjincaain.

³⁶ Sacuaha nixtin xi cuetjucaa cjuatacun vëhé ne, tsajin yo vëë rë. Hisca víin ángel xi siu ngahnga. Hisca hveen ngahan xi Quihndi rë Xuta Jain. Suva tutu ni Nina nahmi naja ne, me vëhé xi vëë me.

³⁷ Sacuaha casahmi xuta hya xi cavéjña xutachanga naja Noé ne, hacuanitjin ni sahmi xuta hya xi cuinduva Quihndi rë Xuta Jain. ³⁸ Tséhë xi

hya ne, xi chaja sa casesuntë nandan ngasunhndë ne, jine tjihvi xuta, vixan me, tsinguixan me quihndi rë me. Cuatjin casahmi cuaha me hisca nixtin xi cavisehen Noé cahntsua barcu. ³⁹ Hacuaha camachayiin rë me hisca xi casesuntë nandá quijicojo rë yějë ni me jan. Hacuaha cuanitjin ni sahmi xuta hya xi cuinduvá ngahan xi Quihndi rë Xuta Jain ngahan. ⁴⁰ Jo cha ne, cuiyujutaha cha nguijná. Ngu cha ne, chjaháxin rë cha, hane cha xingu jan ne, cuejña cha. ⁴¹ Hacuaha jo nga yachjin ne, cuiyujutaha na coho na. Ngu na ne, chjaháxin rë na, hane na xingu jan ne, cuejña na.

⁴² Vêhë xi nechun cuidadu. Hacuaha ningascun rë cjuatacun nuju ta ngayun ne, hyúun janihya cjuehe Nai nuju. ⁴³ Hacuaha meje rë xi cumachaya nuju cjuatacun vihi: sá xi nai rë ngu ndihya ha machaya rë me hora xi cuinduva cha chějë ndava me ne, suaain me cahndë xi scuxaha cha ndava me ne, sehe tsichějë cha. ⁴⁴ Hacuanitjin ni meje rë xi ngayujun ni ngayun ne, tuhun chjinu yojo nuju ta, tséhë xi hora xi ningatuuntacún xi cjuéhë ngahan xi Quihndi rë Xuta jain ngahan ne, hora vêhë cjuéhë.

Xuta xi vihndë cojo xi vihndiin tséhë Nina

⁴⁵ ¿Yo ngayun xi nihñu sacuaha sahmi ngu mosu hndixahan xi jemu quicun cacun xi sahmichihin yějë ni hacutjin xi meje rë nai rë? Ngu hndixahan xi cjuahaxa xi cjuahacuenda rë yějë sa hndixahan xi hora tjin sua xi sinë. ⁴⁶ Jemu ndaja tséhë ngu hndixahan jan xi tisahmi tutjin xi casuaxa rë nai rë. ⁴⁷ Cuichjá cojo nuju cjuaquixi ta, nai rë hndixahan vêhë ne, suaxa me hndixahan vêhë xi hacuaha cjuahacuenda yějë sa xcusun xi tjin rë me. ⁴⁸ Peru cuejña ne xi hndixahan vêhë ne, jemu choho xcusun rë me, tsingataha cacun cojo cjuatacun rë cuitjin: “Nai naha ne, tijima tafi sa xi cjuehe me.” Cuatjin tsingataha cacun. ⁴⁹ Sehe cuetsihin cuaja rë hndixahan xi yahnga jan, hacuaha cuatjutaha sinë cuihi hisca cuma chihi. ⁵⁰ Peru cuechú ngu nixtin xi tsajin tacunya hndixahan vêhë, ngu hora xi hisca hvíin ne, hya cjuehe nai rë. ⁵¹ Hane jemu jyë castigu sahmi me, sehe tsingatju me cuatju tangun cjuañihi cojo xuta xi jo xcun jo hntsua me. Ngajan ne, jemu squihnda me, hacuaha tsijanerii me nehñu me.

25

Ejemplu tséhë tē na nixti xi quiji na cjuavixan

¹ Hya xi cuechú nixtin xi sahmi Nina gobiernu ne, cumá sacuaha cavatju tē na nixti xi cafaha na ndihi tséhë aceite, sehe quiji na xi cuejñaya na cha xi cuixan hora xi nduva cha. ² Hya xi camá ne, hñu na jan ne, rcu taja na, hacuain ndaja tsingatahacacun na. Peru hñu nga na jan ne, ndaja quicun na. ³ Cavejña xi na rcu taja ne, hora xi cafaha na ndihi ne, cafaain na aceite xi cuya cuincha na tséhë. ⁴ Peru sacuaha na quicun jan ne, cafaha na ndihi ne, hacuaha xin cafaha na aceite. ⁵ Hane xi ma tafi xi nduva cha xi cuixan jan ne, cafaha rë na nijña ne, caviyujufë na. ⁶ Hya xi camá ne, sacuaha vasen nixten ne, canuhya rë xi jindaya xuta ta: “¡Nduva cha xi cuixan! Tangun tjengun cha xi cuanguncujun.” ⁷ Xi cuatjin canuhya rë ne, cavisatjenhnga na nixti jan ne, cavêhëchjine na ndihi jan. ⁸ Hya xi camá ne, cachja na xi taja rcu cojo na quicun cuitjin: “Tuhun niji hitsë aceite nuju ta meje cjuë xi tsijin ne, coho ndihi niji.” ⁹ Peru cafayangui na quicun cuitjin: “Cumaji thín nuju ta sá cuatjin ne, cuechutaain tséhë xi cuma meje nuju hacuaha tséhë xi cuma meje niji. Hitsë sa ndaja ne, tangun hiscan xi xteña ne, hiscan ngajan chuhun.” ¹⁰ Cuatjin camá xi hora xi quiji cavatsë na jan aceite ne, cafehe

cha xi cuixan. Hane na xi siuya ne, cojo na cavisehen na ndava suhi. Sehe casechjahñu tingotjo ndihya. ¹¹ Hya xi camá ne, cafehe na nixti xi quiji jan, hane cajindaya na tingotjo ndihya cuitjin: “Tatá, chuxuhun tingotjo tsjin.” ¹² Peru me vèhè jan ne, cafayangui me cuitjin: “Hveen jani nduvun ngayun.” ¹³ Vèhè xi nechun cuidadu, hacuaha ningascun rë cjuatacun nuju ta ngayun ne, hyúun mé hora, hyúun mé nixtin xi cumá.

Ejemplu tsèhè tujún xi casua nai rë hndixahan

¹⁴ Cuejña ne xi ngu xuta jan ne, quiji me ngu nangui cjin. Hane chaja sa xi cjue me ne, cajindaya me mosu hndixahan rë me casua me xi cuejñatsja cha xi tsèhè me. ¹⁵ Hora xi casua me ne, ngu cha, casua me cha hñu mil tujún, hane ngu nga cha ne jo mil, hane ngu nga cha ne ngu mil. Cuatjin casua me cha hatucutjin tsejen xi chutaha cha. Hya xi camá ne, cavetju me quiji me. ¹⁶ Ngajan camá xi cha xi cafahatsja cha hñu mil tujún ne, casahmi cha ngu negocio. Hane ngajan cavesun rë cha hñu cuatjin sa. ¹⁷ Hacuaha cha xi cafahatsja cha jo mil tujún ne, cuanitjin ne cavesun rë cha jo cuatjin sa. ¹⁸ Peru cha xi cafahatsja cha ngu mil tujún tsèhè nai rë cha ne, quiji cha cafahangui cha ngu ngojo nangui. Hane ngajan caveyanijihma cha tujún jan.

¹⁹ Hya xi jercu cavatju nixtin xi quiji nai jan, cavuya cafehe me, cajindaya me cha xi sua cuenda cha tsèhè tujún jan. ²⁰ Ngajan xi cha xi cafahatsja cha hñu mil tujún ne, yaha cha hñu mil sa. Hane cachja cha cojo me ta: “Tatá, hñu mil catuhun ná, hindè ne, cavesun ná hñu cuatjin sa.” ²¹ Ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsè rë xi jemu ndaja canihñi xa lihndi vèhè ne, hitsè sa quisun xa xi sua ri. Quihndè ne, tehe cjuasua xahasen riji cojo ná.” ²² Sehe cafehe cha xi cafahatsja cha jo mil tujún. Hane cachja cha cuitjin: “Tatá, jo mil catuhun ná, hindè nguehe tacun tsujun jo cuatjin sa xi cavesun ná.” ²³ Ngajan cachja nai jan cuitjin: “Ndatjin. Ngaye ne, ngu hndixahan ndaja ngaye. Ngatsè rë xi jemu ndaja canihñi xa lihndi vèhè ne, hitsè sa quisun xa xi sua ri. Quihndè ne, tehe cjuasua xahasen riji cojo ná.”

²⁴ Hacuaha cafehe cha xi cafahatsja cha ngu mil tujún. Hane cuitjin cachja cha: “Tatá, ha machaya ná xi ngayun ne, jemu hñu cju nuju. Nangun xitjè handasa hacuain ngayun xi canitjun. Ngayun ne, hacjahi sahmi xa ne, ngayun chjuhunntsun chji rë. ²⁵ Vèhè xi tsácjun ngahan. Hane cèjè caveyaneje hma tujún nuju. Cuajyih tujún nuju nguehe.” ²⁶ Ngajan xi nai rë cha ne, catsicuya me tsèhè cha cuitjin: “Ngaye ne, machjiriin ngaye. Ngaye ne, mosu hndixahan tsehen. Sá xi hye xi fanga handasa hacuain ngahan xi catsitjè, hye xi hacjahi sahmi xa ne, peru ngahan fahántsa chji rë, ²⁷ hitsè sa ndaja xi xcun bancun cahmi chani tujún xi casuá ri, cojo sa xi hya xi cjuèhè ne, cúa cjuahántsa tujún naha, peru cojo quihndi rë.” ²⁸ Sehe cachja me cojo me xi hinchacun jan cuitjin: “Chjuhuntuhun tujún xi yaha cha vè. Sehe tuhun rë cha xi tjin rë tè mil tujún ta, ²⁹ me xi ha tjin rë ne, sua sa Nina me, hisca vesun tsèhè. Hane me xi tsajin cjin jan ne, cjuahataha Nina hitsè xi tjin rë me. ³⁰ Hacuaha chandunxin hndixahan xi machjiriin hiscan jñu ngajan candates. Ngajan ne, jemu squihnda me hacuaha tsijanerii me nehñu me.”

Ejemplu tsèhè chu tsángu cojo chu tentsun

³¹ Hya xi cuya Quihndi rë Xuta Jain cuinduva me cojo hasen ndajyih tsèhè Nina hacuaha cojo ángel rë Nina cuinduva me, cuejña me cahndé hñu hiscan tsichuva me xuta. ³² Hane ngajan xcun me ne, cumatangun xuta rë jinguyèjè ni ngasunhdè ne, sehe scuxijin me xuta sacuaha sahmi ngu

cha xi faha cuenda rē chu hora xi vaxijin cha chu tsanga tsēhē ngajñi rē chu tentsun. ³³ Vinchaxin cha chu tsánga taha quixi rē cha, hane vinchaxin cha chu tentsun taha xcun. ³⁴ Hya xi cumá ne, me xi matitjun jan, cuichja me cojo xuta taha quixi ta: “Nduvun nechun, ngayun xi catsinchacun Nina Nahmi naha. Ngayun xi satē nuju cuisuhun gobiernu xi Nina cavēhēchjini me tsujun hisca ntsacu savetsihin ngasunhndē. ³⁵ Cuatjin satē nuju ta tsēhē xi hya xi vojo ná, canicjun ná. Hya xi xinda ná, catuhun ná nandá; xutaxín ngahan, peru catuhun cahndē cavitejñajenda ndya nuju. ³⁶ Tsajin ná tsjian, peru catuhun ná tsjian xi mameje; hmu ná hane cafuhun cachusuhunyun ná; tejñaya ndavaya hane cafuhun cachutsujun ná.” ³⁷ Sehe xuta tyjahi jan, tsicuya me cjuá cuitjin: “Tatá, ¿janihya camachaya niji xi vojo nuju, hane canicjun nuju? ¿O sá xi xinda nuju, hane catihin nuju nandá? ³⁸ ¿O janihya cachutsijin nuju nujuhunyun sacua ha xutaxín hane catihin cahndē nechunjendun ndya niji? ¿Janihya cahyin xi tsajin nuju tsjian hane catihin? ³⁹ Hacuaha ¿janihya cahyin xi hmu nuju o nechunyun ndavaya xi canduvin-tjenguin nuju?” ⁴⁰ Sehe cuichja me xi matitjun jan ta: “Cuichjá quixi cojo nuju ta hya xi canihñu cjuandaja vē xi cavisekun rē tuyoni xuta yuma ladu naha ne, cavisekun ná ngahan.”

⁴¹ Hya xi camá ne, cachja me xi matitjun jan cojo xuta xi siu ladu scun rē me cuitjin: “Tangunxun ngayun xi cuatjun castigu rē Nina ne, tangun cuechún xcun ndihi xi catsindaja Nina xi cuisehen xitsehen xi matitjun cojo ángel rē. Ndihi jan ne, tsajin nixtin tsajin nixten xi coho. ⁴² Cuatjin satē nuju ta tsēhē xi hya xi vojo ná, ha canicjuun ná; hya xi xinda ná, catuun ná nandá; xutaxín ngahan, peru catuun cahndē cavitejñajenda ndya nuju; ⁴³ Tsajin ná tsjian, peru catuun ná tsjian xi mameje; hmu ná hane cafuun cachusuunyun ná; tejñaya ndavaya hane cafuun chutsuun ná.” ⁴⁴ Sehe cuinenguise me cuitjin: “Tatá, ¿janihya camachaya niji xi vojo nuju, o sá xi xinda nuju? ¿O janihya canutsijin nuju nujuhunyun sacua ha xutaxín, o xi tsajin nuju tsjian? Hacuaha ¿janihya cahyin xi hmu nuju o nechunyun ndavaya? ¿Janihya cahyin vē xi cavisecuin nuju?” ⁴⁵ Sehe cuichja me xi matitjun jan ta: “Cuichjá quixē cojo nuju ta tsēhē xi mijí nihñu cjuandaja vē xi cuisekun rē tuyoni xuta yuma ladu naha ne, mijí cuisekun ná ngahan.” ⁴⁶ Sehe xuta jan ne, cuisehen me castigu xi nixtin nixten cumá, peru xuta xi tyjahi cjuatacun rē me ne, satē rē me cjuahñu xatsē xcun Nina.

26

Camachihin cjuá hacutjin xi chjahá rē Jesucristu

¹ Hya xi camá ne, xi cajnetaha cachja Jesús yějē cjuá cuatjin ne, sehe cachja me cojo xuta ladu rē me cuitjin:

² —Ha hyun xi chaja sa jo nixtin xi cuechú suhi tsēhē pascua ne hane ngahan xi Quihndi rē Xuta Jain ngahan ne, hatuxa hya cumá ngahan entregadu tsja xuta xi cuetaha ná xcun cru. —Cuatjin cachja me.

³ Nixtin hya ne, yějē nahmi xi matitjun cojo xuta changá rē xuta tjē rē Israel ne, casahmi me ngu junta ngajan ndihya jyē rē Caifás, me xi vítexa yějē nahmi xi matitjun. ⁴ Ngajan xi caviyuju me cjuatacun rē me hacutjin xi cuma cuindacha me Jesús cojo sa xi cuma cjuahahma me me xi tsiquehen me me. ⁵ Peru cachja me ta:

—Ndatjin xi cuinechanyan ne cuatju suhi, sehe chjahanhma cha, sá tu cumacjan rē xutacjin, hane cumá ngu suē jyē.

Cavitejnu ngu chjuun aceite rcu Jesucristu

⁶ Hya ne, Jesús ne, nandya Betania quitaha me. Tacun me ndava cha Simú, cha xi camandaja tséhë chíhin vitaha xi casatë chuxin rë cha. ⁷ Hane ngajan camá xi cafehetjengui rë me ngu chjuun xi yaha na ngu frascu xi ndoyo camá, hinchá ngu aceite ndaja xi jercu hnga chji rë. Hya xi camá ne, cavitejnu na aceite jan rcu Jesús hora xi tijinë me niñu. ⁸ Peru xi cavutsejen cha ladu rë me xi cuatjin casahmi na jan ne, camacjan rë cha cachja cha cuitjin:

—¿Mé má tu mahya ni catsichaja na aceite vë? ⁹ Sá xi xteña ne ndaja sacú tujún rë. Hane tujún vëhë ne cuma cuisecoo rë xuta yuma. —Cuatjin cachjataha cha na.

¹⁰ Peru xi camachaya rë Jesús xi cuatjin chja cha ne, catsicuya me cjua cuitjin:

—¿Mé má cuatjin tivichuncjun tséhë na ta jemu vengui chíj rë xcusun xi casahmi na cojo ná? ¹¹ Xuta yuma ne, yëjë nu yëjë nixtin ne, siu me cojo nuju. Peru ngahan ne, hacuiin yëjë nu yëjë nixtin tejña cojo nuju. ¹² Tséhë xi xi cavitejnu ná na aceite jan ne cojo tjun ni ne cuëhëchjine na yojo naha xi seyaniji ngahan. ¹³ Cuichjáquixë cojo nuju ta tuyani ni tséhë jingujyë ni ngasunhdë xi cuichja xuta cjua tséhë Nina ne, hacuaha cueyanangui me na vihi, cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

Judas casahmi cha compromisu xi cuitëña cha Jesús

¹⁴ Hya xi camá ne, ngu cha tséhë ngajñi rë me xi tejó xi má ladu rë Jesús, cha xi hmí rë Judas Iscariote ne, quiji cavisiajmi cha cojo nahmi xi matitjun ¹⁵ cavinenguise cha me cuitjin:

—¿Há cjin tujún tuhun ná sá xi sahme entregadu nuju Jesús?

Ngajan xi cavexqui me hane casua me cha cantë tujún tyava. ¹⁶ Hane ngajan cavejñaya cha ngu hora xi ndaja xi cuma sahmi cha entregadu Jesús cojo xuta xi cuacun jan.

Hacutjin cajinë Jesús tséhë suhi rë Pascua

¹⁷ Hya xi camá ne, nixtin xi tjun tjun tséhë suhi xi chinë pan xi tsajin san rë, cafehe xuta ladu rë Jesús xi tejo jan, cachja cha cojo me cuitjin:

—¿Jani meje nuju xi cuihinchjini xi xine nguixun tséhë suhi?

¹⁸ Sehe cafayangui Jesús cuitjin:

—Tangun nandya Jerusalén. Hane xi cuechú ndava ngu cha xi cuacun jan ne, tinújun cojo rë cha cuitjin: “Chja maestru naja cuitjin: Meje cuechú hora naha, hindë ne, ndya nuju ne sínë niñu tséhë pascua cojo xuta ladu naha.”

¹⁹ Sehe quiji xuta ladu rë me ne, casahmi cha sacuaaha xi cavitexa Jesús cha, hane cavëhendaja cha xi sinënguixun me tséhë pascua.

²⁰ Hya xi quiji hora jan ne, tijinë me niñu cojo xuta ladu rë me xi tejó jan, ²¹ hane ngajñi hora xi tijinë me ne, cachja Jesús cuitjin:

—Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

²² Ngajan xi jemu choho camá rë cha, cavetsihin cha cachja chuya ngu chuya ngu cha cojo rë me cuitjin:

—Nai, ¿há cumácacun xi ngahan sahme?

²³ Hya xi camá ne, cafayangui Jesús cuitjin:

—Ngu cha xi ngu ni tyuva tsinguisehenquinda niñu naha cojo ne, cha vëhë xi sahmi ná entregadu. ²⁴ Ngahan xi Quihndi rë Xuta Jain ngahan ne, hatuxa

tjin ná xi cueya sacuatjin ha camá camahindu xcun xujun tsahan, peru jemu chojyihí tséhé cha xi sahmi ná entregadu. Vengui sa chji rē xi catsiin cha.

²⁵ Sehe Judas, cha xi sahmi rē me entregadu cachja cha ta:

—Maestro, ¿há cumá cacun xi ngahan sahme?

Ngajan xi cafayangui Jesús tséhé cha cuitjin:

—Juun, quixi.

²⁶ Hora xi tjiné me comida ne, cafaha me ngu niñutsju hacuaha casua me nacuechji rē Nina ne, sehe cavotohocja me niñutsju jan, casua rē me xi tejó jan ne, sehe cachja me cuitjin:

—Chjuhun xinu. Vihi ne, yojo naha vi.

²⁷ Hya xi camá ne, cafaha me ngu vasu ne, sehe casua me nacuechji rē Nina, sehe cachja me cuitjin:

—Juhun vihi sehe siuhun ngajñi ngayujun ni, ²⁸ ta xan rē uva vihi ne, vihi jni naha xi cuetju ngatsé rē xuta sehe cuma chihin compromisu xi cuaxéte rē xuta tséhé jyé rē me. ²⁹ Hacuaha cuichjá cojo nuju ta quihndé cojo nixtin xi cjuiniji sa ne, ha quihndé cayaan cuéhé xan rē uva. Cuéhé, peru hisca hya xi cuéhé nga cojo nuju ngajan hiscan sahmi Nina gobiernu.

Casua Jesucristu camachaya rē Pedru xi cuichja me xi hvín me yo Jesu-cristu

³⁰ Xi cajnetaha cajiné me ne, casé me ngu tséhé Nina. Sehe cavetju me quiji me Naxi Olivu. ³¹ Hane sehe ngajan cachja Jesús cojo xuta ladu rē me cuitjin:

—Ngayujun ni ngayun ne, nismutacun ná hacuaha cuma ndaya cjuata-cun nuju quihndé nguixun vi ne, hane cuejñu ná suva ta cumá sacuaha camahindu xcun xujun rē Nina xi chja xi: “Nina ne, tsiquehen me cha xi sahmi cuidadu rē chu tsánga, hane chu tsánga vè ne cuitsojo chu.” ³² Cuatjin cumá, peru hya xi cúa nga cjuahñu naha ne cjué titjun tsujun hisca distritu Galilea.

³³ Pedru ne, cafayangui cha cuitjin:

—Ha ndasa ngayéjé cha xi cuicun vi cuejña suva cha ngayun, hatuxa tsajin nixtin xi cojo ngahan sahme cuatjin.

³⁴ Hya xi camá ne, cuitjin cachja Jesús cojo cha:

—Cuichjáquixé cojo ri ta tajñu ni xi chaja squihnda xahnda ne, ha jyan ndiya cuinoje xi hyiin yo ngahan. —Cuatjin cachja Jesús.

³⁵ Cachja Pedru cuitjin:

—Ha ndasa hisca cueya cojo nuju ne, peru cuichjaan xi hveen yo ngayun. Hacuaha cuanitjin ni cachja cha xi yahnga.

Casahmi Jesucristu oración rē me ngajan Getsemaní

³⁶ Sehe quiji Jesús cojo cha xi tejó jan ne, cafehe me ngu cahndé xi hmí rē Getsemaní. Ngajan cachja Jesús cuitjin:

—Nechun ni nguehe. Cjué nguvan hitsé ni cuisiajme cojo Nina. —Cuatjin cachja me.

³⁷ Hya xi camá ne, cavaxé me Pedru cojo jo cha quihndi rē Zebedeo xi quiji cojo me cha. Hane xi cjui me ne, cavetsihin jemu camá va rē me, hacuaha jemu macjincacun me. ³⁸ Sehe cachja me cojo cha cuitjin:

—Jercu choho camahani má rē xahasen naha, sacuaha xi vèhé ni tsiquehen ná. Nguehe nechuncun ngayun cojo ná.

³⁹ Sehe ngajan xi Jesús ne, quiji me hitsé nguvan. Hane ngajan cafañatsacjan me, cafehya rē me Nina cuitjin:

—Ngayun Nahmi naha, sá tjin sa ngu chuva rë ne, catisatiin ná cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan.

⁴⁰ Hya xi camá ne, cavuya cafehe me hiscan siu jyan xuta ladu rë me xi quijicojo me jan ne, casacutsja me xi siufë me. Ngajan xi cachja Jesús cojo Pedru cuitjin:

—Cahyun ni, ¿há camaji cavacun ngayun cojo ná hisca ngu hora ni?

⁴¹ Nechuncun ngayun, nihñu oración nuju, sátu chjaháchuva nuju cojo cju-atacun nuju. Xahasen nuju ne, ndaja meje rë xi nihñu, peru yojo nuju ne, chuvacacun.

⁴² Hya xi camá ne, camá jo ndiya xi quiji me nguvan cafehya me Nina cuitjin:

—Nahmi naha, sá xi cumaji cuatju chuva rë xi satiin ná cjuañihi ne, catama sacuatjin xi meje nuju ngayun.

⁴³ Hya xi camá ne, cavuya nga cafehe me hiscan siu jyan xuta jan casacut-sja me xi siufë me ta jemu hai nijña rë me. ⁴⁴ Hya xi camá ne, camá jyan ndiya xi quiji me nguvan ne hacuaha cojo vëhë nga ne, cafehya me Nina. ⁴⁵ Sehe cavuya nga me cafehe me hiscan siu xuta jan ne, cachja Jesús cuitjin:

—¿Há tsjuñufun cuhun? Chutsujun ne, ha cavechú hora xi ngahan Quihndi rë Xuta Jain ne, cjuaha ná xuta xi sahmi ná entregadu cojo xuta tsehen.

⁴⁶ Tisatjunhngun, cuanguen chutsejen ta ha nduva cha xi sahmi ná entregadu.

Cafaha xuta Jesucristu

⁴⁷ Jínguyëjë rë xi tichja cuaha Jesús ne, cafehe Judas, cha xi cojo jiyajñi ngajñi rë cha xi tejó xi catsujyihya cojo me. Hacuaha jemu cjin xuta tivisecoo rë cha, xuta xi cavitexa nahmi xi matitjun cojo xuta changá xi quijijaha me Jesús. Hane yaha me quicha, yaha me ya. ⁴⁸ Chaja sa xi cjuehe cha jan xi sahmi cha entregadu Jesús ne, cachja cha cojo xutacjin jan cuitjin:

—Cha xi cjuë cuitatsuha xi suá rë nina ne, cha vëhë xi hacui cha.

⁴⁹ Xi tu cavechu cha hiscan nduva Jesús ne, ngutjen quiji casahmitiña cha tsëhë me hacuaha casua cha me nina cachja cha cuitjin:

—Cuhndanu, maestro —chja cha.

Hane quiji cavitatsuha cha me. ⁵⁰ Ngajan xi cachja Jesús cojo cha cuitjin:

—Tai, Nihñichihin xa vëhë xi candove.

Hya xi camá ne, quiji xuta jan ne, cafaha me Jesús. ⁵¹ Ngajan xi ngu cha xi secun cha cojo Jesús ne, cavaxë cha quichanduju rë cha, hane cavaja rë cha ngu cha mosu rë nahmi xi matitjun, hane cavatësun cha ngu ladu tyjavañuju.

⁵² Ngajan xi cachja Jesús cojo cha cuitjin:

—Teyendeje quicha riji vë. Xuta xi tsicojo me quicha ne, hacuaha cojo quicha cueya me.

⁵³ ¿Há hyuun ta sá xi cjuehya rë Nahmi naha ne, jemu cjin mil ángel tsingatju me cuisecoo ná? ⁵⁴ Peru sá xi cuatjin sahme ne, ¿hacutjin cumachihin cjua rë xujun rë Nina? ta cuitjin meje rë xi cumá.

⁵⁵ Hya xi cajnetaha cachja Jesús cojo xuta ladu rë me ne, sehe cachja me cojo xutacjin cuitjin:

—¿Há nduvun chjuhun ná sacuaha ngu xuta xi chëjë me, xi cuatjin nduvun cojo ya cojo quicha vë ni? Xi cavitejñaya cojo nuju nchunchujun ni ndatsen yungun jan ne, cavetuhunntsuun ná cachjuun ná. ⁵⁶ Peru cuitjin tijima cojo sa xi cuetjucaa jain hacutjin camahindu xcun xujun rë Nina xi catsihindu profeta.

Quiji me cojo Jesús ndava nahmi xi matitjun

⁵⁷ Hya xi camá ne, xi cafaha xuta jan Jesús ne, quijicojo me me ndava Caifás, nahmi xi matitjun tséhë yëjë ni nahmi ta tséhë xi ngajan ha camá tangun yëjë ni cha xi vícuya cjuachacun cojo yëjë ni xuta changá. ⁵⁸ Pedru ne, hacuaha tjengui cha cjuí cha tu cjin tu cjin ni hacutjin cjuí xuta jan cojo Jesús hisca xi cavisehen cha ndatsen rë ndava nahmi xi matitjun jan. Hane ngajan cavéjña cha cojo cha nísë rë yungun cojo sa xi cumachaya rë cha mé cumá.

⁵⁹ Hane nahmi xi matitjun jan cojo yëjë sa xuta xi matitjun ne, cavangui me xuta ndacha xi tsinguixi jyë rë Jesús, cojo sa xi cuma tsiquehen me me. ⁶⁰ Peru tsajin mé jyë rë Jesús xi casacu rë me handasa jemu cjin má xuta ndacha xi cachja me. Hisca xi ha tisacuiyiin rë me hacutjin cuma, sehe cafehe jo cha ndacha xi cachja cha ⁶¹ cuitjin:

—Cha vi cuitjin cachja cha ta: “Ngahan ne, cuma tsinguétsun yungun xi matitjun vi xi casahmi xuta tséhë Nina, hane cahntsua xi jyan nixtin ne, sahme nga ngu.”

⁶² Ngajan xi nahmi xi matitjun tséhë nahmi xi yahnga jan ne casecunvasen me, cavinenguise me Jesús cuitjin:

—¿Há chjayinnguiin hisca ngu cjuá? ¿Mé noje tséhë jyë xi vincha xuta jan?

⁶³ Hane Jesús ne, tu jyuú ni casecun me. Sehe cachja nahmi xi matitjun jan cojo Jesús cuitjin:

—Cuitexa ri ngatsë rë xi macjain ri tséhë ngu ni Nina quicun xi hora xi cjuahataha ri ne cuinoje cjuaquixi. ¿Há ngaye xi Quihndi rë Nina? ¿Há ngaye xi Cristu?

⁶⁴ Ngajan cafayangui Jesús tséhë me ta:

—Sacuatjin nújun vë ne, cuatjin jain. Hacuaha cjeuhe nixtin xi chutsujun ná xi tejña ladu quixi tséhë ngahñu rë Nina. Hacuaha chutsujun ná xi cuinduvajne ngajñi rë yufi tséhë ngahnga.

⁶⁵ Hane ngajan xi nahmi xi matitjun tséhë nahmi xi yahnga jan ne xi jemu camacjan rë me ne, hisca tsjian rë me cavicheya me. Hacuaha cuitjin cachja me:

—Tsixcuehyu cha Nina. Tsajin sa cjuá testigu xi mameje. Ngayun ne, ha canuhyun hacutjin tsixcuehyu cha Nina. ⁶⁶ ¿Mé nújun quihndë?

Ngajan cafayangui me cuitjin:

—¡Meje rë xi cueya cha!

⁶⁷ Hya xi camá ne, ngu jo me cavetsihin me cavëhënatya me Jesús hacuaha cavajaya me xcun. Yahnga nga me ne, cojo cahntsua tsja me cavaja me xcun Jesús. ⁶⁸ Cachja me cuitjin:

—Tinoje, ngaye Cristu, ¿yo xi cavaja ri?

Cachja Pedru xi hvín me yo Jesucristu

⁶⁹ Jinguyëjë rë xi cuatjin tijima ne, Pedru ne, tacun me ndatsen ndihya. Hya xi camá ne canduva ngu na mosu hndixahan tséhë nahmi jan, cafehe cachja na cojo Pedru cuitjin:

—Ngaye ne, ladu rë Jesús tséhë distritu Galilea má ye.

⁷⁰ Peru xcun yëjë me xi siu me ne, cafaahma me cachja me cuitjin:

—Hisca hveen mé xi noje.

⁷¹ Hya xi camá ne, sehe cavetju me quiji me casecun me hiscan tu cuiseen ni tséhë ndatsen ndihya. Hane ngajan xi ngu nga na cachja na cojo xuta xi siu ta:

—Cha vihi ne, ladu rë Jesús nandya Nasarét má cha.

⁷² Hya xi camá ne, ngu ndiya nga ne cafaahma me cuitjin:

—Vëë Nina xi hveen xuta jan.

⁷³ Hya xi cavatju ngu hora ne, sehe camatiña xuta xi hinchacun cojo Pedru jan cachja me cuitjin:

—Ha cjuaquixindaja ta ngaye ne, cojo ngaye nechin cojo cha xi cuajyihî vë, ta tsëhë xi cjua riji tsingacun xi xuta distritu vë ngaye.

⁷⁴ Ngajan xi cavetsihin nga Pedru cafaahma me cjuaquixi hisca cachja me xi catinduva ngu cjuacjintacun xi cuatju me sá xi tichja me ngu ndesu. Cuitjin cachja me:

—Vëë Nina jain xi hveen yo me xi nújun vë.

Hane hora vëhë ne, cajihnda ngu xahnda. ⁷⁵ Hane Pedru ne, catsinguitsjen me cjua xi cachja Jesús cojo rë me xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Hane xi cavetju me candatsen ne, cajihnda susu me.

27

Casahmi entregadu me Jesucristu xcun Pilatu

¹ Hya xi camá nchujun ni ne, yëjë ni nahmi xi matitjun cojo yëjë xuta changá ne camatangun nga me xi sacuya rë me xcusun hacutjin cuma tsiquehen me Jesús. ² Sehe catsihñu me Jesús ne, quijicani me xcun gobernador xi hmí rë Pilatu.

Cahme Judas

³ Hya xi camá ne, Judas ne, cha xi casahmi rë me entregadu, camachaya rë cha xi cueya Jesús. Ngajan xi choho camá rë cha hane catsindeya cha cjuatacun rë cha. Quiji cha catsicuya cha catë tujún tyava jan cojo nahmi xi matitjun cojo xuta changá. ⁴ Cuitjin cachja cha:

—Jemu tjin jyë naha ta tsëhë xi casahme entregadu ngu me xi tsajin xi cun rë.

Peru cafayangui me cuitjin:

—¡Mé tsijin vë! Cjuacjintacun vë hatuxa tsiji sove.

⁵ Hya xi camá ne, ngajan yungun xi matitjun ne, cacandi cha tujún tyava jan sehe cavatju cha quiji cha hiscan ngu cahndë xi cavityjangui cha yojo rë cha hisca xi camá cahme cha.

⁶ Nahmi xi matitjun jan cafaha me tujún tyava jan peru cachja me cuitjin: —Cumaji cuinchan tujún vi cahntsua caxa tujún rë yungun ta tsëhë xi tujún vi ne, cavengui chji rë jni rë cha.

⁷ Hya xi camá ne, cachuya rë me xi cuatsë me ngu xáhva xi chja xuta Nangui rë Cha Chjinetiji. Xáhva jan ne cumachji rëhë xi xinchaniji xutaxín xi cueya me nangui vë. ⁸ Ngatsë rë xi cuatjin casacu xahva jan ne, hisca nixtin quihndë ne cahndë vëhë ne yaha ñihi xi Cahndë Tsëhë Jni. ⁹ Xi cuatjin camá ne, camachihin cjua xi catsihindu profeta Jeremías xi cuitjin chja: “Cafaha me catë tujún tyava, xi cavejña chji rë cha xi cafehya xuta nangui Israel, ¹⁰ sehe casua me tujún jan xi cjuaha me nangui rë cha chjinetiji. Cuatjin casahmi me sacuaha cavitexa Nina.”

Xcusun xi cavatju Jesús xcun Pilatu

¹¹ Hya xi camá ne, Jesús ne secun me xcun gobernador. Ngajan cavinen-guise me Jesús cuitjin:

—¿Há ngaye xu matitjun ngaye tsëhë xuta tjë rë Israel? —Cuatjin cavinen-guise me.

Hane Jesús ne, cuitjin cafayangui me:

—Cuatjin sacuatjin nújun vë. —Cuatjin cafayangui me.

¹² Peru hora xi nahmi xi matitjun cojo xuta changá jan cavincha jyë me Jesús ne, ndastu mé cafayangui Jesús. ¹³ Ngajan xi cachja Pilatu cojo me cuitjin:

—¿Há nuhyiin cjua xi chja me? Jercu cjín jyë riji cavincha me.

¹⁴ Peru Jesús ne ha quihndë cafayanguiin me hisca ngu cjua. Hane Pilatu ne, jemu quijircun camahani rë me.

Camá entregadu Jesús xi cjue cueya me

¹⁵ Tjin ngu xcusun xi nu nu ni, hya xi cumá nixtin rë suhi jan ne, tsismi gobernador ngu presu xi xuta vaxijin me. ¹⁶ Nixtin hya ne, jiya ngu presu xi jemu tjin cjua tsëhë, Barrabás hmí rë cha. ¹⁷ Ngajan xi camá xi hya xi camatangun xutacjín ne, ngajan cavinenguise Pilatu xuta cuitjin:

—¿Jarë cha xi meje nuju xi tsisme? ¿Há Barrabás ne? ¿Há Jesús xi Mesías xu?

¹⁸ Cuatjin cachja me cojo xuta ta tsëhë xi ha vëë me xi ngatsë ni rë cjuaxin sahmi nahmi xi matitjun jan cojo Jesús, vëhë xi casahmi me entregadu xi meje rë me xi cueya.

¹⁹ Hora xi tijimá vë, tacun Pilatu xcun silla hiscan vejña me hora xi vitexa me, ngajan xi chjuun rë me ne, catsingatju na cjua xi cuitjin chja: “Canguisuunjnũu cjuacjintacun tsëhë cha vë xi tyahi cjuatacun rë cha, ta nguchjin ne ngajñi nijña naha jemu cjín xcusun xi chocun camá ná chini ngatsë rë cha.” Cuatjin fi cjua xi catsingatju na.

²⁰ Hya xi camá ne, nahmi xi matitjun cojo xuta changá jan jemu cachja me cojo sa xi cama cuinchahaxi me xuta xi cjuehya xuta Pilatu jan xi tsismi me Barrabás ne, tsiquehen me Jesús. ²¹ Ngajan cachja nga gobernador cuitjin:

—Tsëhë jo cha vë ne, ¿jarë cha xi meje nuju xi tsisme?

Ngajan cafayangui xutacjín jan cuitjin:

—Nismu Barrabás.

²² Sehe cachja nga Pilatu cuitjin:

—Sá cuatjin ne, ¿mé xi sahme cojo Jesús xi Cristu xu?

Ngajan xi cafayangui yëjë xutacjín jan cuitjin:

—¡Tetuhun cha xcun cru!

²³ Ngajan xi cachja Pilatu cojo rë me ta:

—Peru ¿mé xi rcu jyë casahmi cha?

Peru xutacjín ne hitsë sa hñu cajindaya me cachja me cuitjin:

—¡Tetuhun cha xcun cru!

²⁴ Hya xi camachaya rë Pilatu xi sahmi cuendaain xuta xi chja me ta tu hitsë sa tijima ngu suë jyë ne, cafehya me nandá sehe cavane me tsja me xcun xutacjín jan. Sehe cachja me cuitjin:

—Quitteen jyë tsëhë cjuaveya rë cha vihi ta, tsajin jyë rë cha. Vëhë ne, ha chaha nuju vëhë.

²⁵ Hya xi camá ne, yëjë xutacjín jan ne, ngu tangun ni cafayangui me cuitjin:

—Tsëhë cjuaveya rë cha vëhë ne, chanijijyin cojo quihndi niji. —Cuatjin cachja me.

²⁶ Hya xi camá ne, catsismi me Barrabás, peru casahmi me xi Jesús ne casehen rë me sehe casua Pilatu me xi cjue cueya me xcun cru.

²⁷ Hya xi camá ne cha sindadu xi vitexa gobernador ne, quiji cojo cha Jesús taha cahntsua ndava gobernador jan. Hane sehe casahmitangun sa

cha yějē sindadu cjin. ²⁸ Hya xi camá ne, cavaxē cha tsjian rē Jesús, hane sehe catsicaja cha me ngu tsjian hani. ²⁹ Hacuaha catsihya cha ngu corona nahyá sehe cavesun cha rcu Jesús hane cavisengui cha ngu bastón tsja me. Hya xi camá ne, cavixcuhnchi cha xcun me, catsixcuehyu cha me, cuitjin cachja cha:

—¡Viva! Me xi matitjun tséhē xuta tjē rē Israel.

³⁰ Hacuaha cavéhēnatya cha me, hacuaha cafaha cha bastón jan xi yaha tsja me hane cavaja cha rcu me. ³¹ Hya xi camá xi cuatjin catsixcuehyu cha me ne, cafaxin cha tsjian hani jan, catsicaja nga cha me tsjian rē me. Hya xi camá ne, sehe quijicojo cha me xi cuetaha cha me xcun cru.

Casetaha Jesucristu xcun cru

³² Hya xi cavetjun cjuicojo sindadu Jesús ne, cavechutaha cha ngu me xi hmí rē Simón tséhē nandya Cirene. Sehe sindadu jan ne, casahmi cha nguyjē xi cuaniji me cru jan.

³³ Hane xi cafehe cha cojo Jesús hiscan xi hmí rē Gólgota, cjua xi meje cuichja Naxi Nínda Rcuun. ³⁴ Hya xi camá ne, casua cha me xan rē uva xi tecjan rē nandá rē tyjungunsa xi cuihi Jesús. Peru xi cavutaha me hitsē ne, cavhiin me.

³⁵ Ngajan xi sindadu jan ne, xi cavatju casetaha me xcun cru ne, sehe cafaha cha tsjian rē me hane cavaxē cha suerte tséhē ne, jarē cha xi satē rē cha jima ngu tsjian. ³⁶ Sehe ngajan ne cavejñataha cha cavutsejensun cha Jesús xcun cru. ³⁷ Hacuaha camahindu ngujo cjua xi casetaha xcun cru ngatihin rcu Jesús sacuaaha xcusun rē me xi setaha xujun jyē rē xuta, hane cuitjin chja cjua jan: “Jesús, me xi Matitjun Tséhē Xuta Israel.”

³⁸ Hacuaha cavityangui cha ngu chējē ngu ngu ladu tjeheh rē me, jima ngu cojo cru rē. ³⁹ Hya xi camá ne, xuta xi cavatju jan ne, catsixcuehyu me Jesús ne, catsitjiya rcu me, hacuaha cuitjin cachja me:

⁴⁰ —Ngaye xi ha canoje xi cuma ninguetsin yungun xi matitjun, hane cahntsua xi jyan nixtin ne; cama nga canindeje ngu. Quihndē ne, sá cuatjin cuma nihñi ne, naxetje sove yojo riji. Sá xi Quihndi Jain rē Nina ngaye, titujni tséhē cru vē.

⁴¹ Ha chuva véhē ni ne, nahmi xi matitjun ne cojo cha vicuya cjuachacun rē ley cojo xuta changá ne cachja me cuitjin:

⁴² —Cavaxētje xu cha xuta, peru quihndē ne, cumaji cuaxētje suva cha yojo rē cha. Sá xi hacui jain cha xi Matitjun Tséhē Xuta Israel ne, catitujne cha tséhē cru chutsejen, cojo sa xi cumacjain naja tséhē cha. ⁴³ Macjain xu rē cha tséhē Nina, quihndē ne cataxētje Nina cha sá xi Nina meje rē me cha; ta cachja cha ta: “Quihndi rē Nina, ngahan.”

⁴⁴ Hacuaha cha chējē xi cojo caxtyangui taha cru jan ne, cojo cha choho cachja cha tséhē Jesús.

Xcusun xi camá hya xi cahme Jesucristu

⁴⁵ Hane hora véhē ne, camajñu jinguyjē ni. Cavetsihin xi camanchisen ne, quiji cani rē hisca fane jyan. ⁴⁶ Hya xi camá ne, jercu hñu camahani cachja Jesús cuitjin:

—Elí, Elí, ¿lama sabactani? -cjua véhē meje cuichja ta: Ngayun Nina naha, mé má canismutacun ná.

⁴⁷ Hane ngujo xuta xi hinchacun jan ne, xi cajni rcu me hne jan hane cachja me cuitjin:

—Tijindaya me profeta Elías.

⁴⁸ Hya xi camá ne, ngutjen ni, cavanga ngu me, quiji catsicahnchi me ngu tsjian hinda cojo xan rë uva xi ha sán, sehe cavetaha me rcu ngu ya nduju, sehe cavetaha me hntsua Jesús xi cuihngui me. ⁴⁹ Ngajan xi yahnga xuta ne, cachja me cuitjin:

—Caveni tuhun. Cuinechanyan hitsë ne, ¿há cuinduva jain Elías cuaxëtje me cha?

⁵⁰ Hane Jesús ne, hora vëhë ne, jercu cajindaya nga me hane cahme me.

⁵¹ Hacuaha hora vëhë ni ne, tsjian nduju xi tyjanguì cahntsua yungun xi matitjun jan ne, hisca rcu hisca ntsacu canduva catiyavasen. Hacuaha cafani nangui. Hacuaha cavacjan ndyojo. ⁵² Hacuaha hora vëhë ni ne, catuxaha tsjun rë nima, hane jemu cjín xuta xi tyjahi cjuatacun rë me xcun Nina ne, cavuya cjuahñu rë me. ⁵³ Cavetjun xuta jan tsëhë tsjun. Hane hya xi ha cavuya cjuahñu rë Jesús ne, sehe cavisehen me nandya Jerusalén hane ngajan ne, cjín xuta ne, cavëë rë me.

⁵⁴ Hora xi cahme Jesús ne, cha capitán tsëhë cha sindadu cojo yahnga sindadu xi hinchacun me ngajan vutsejensun me Jesús ne, camachaya rë cha xi fani nangui cojo cjín xcusun sa xi cavatju camá. Hane jercu quijircun camaha ni rë cha. Hacuaha cachja cha cuitjin:

—Hacui jain me vihi xi Quihndi Jain rë Nina, me.

⁵⁵ Hacuaha ngajan ne, tsëhë cjín ne hinchacun cuaha cjín yachjin xi tivutsejen me. Yachjin jan ne quijitjengui me Jesús xi cuisecoo me Jesús, sahmi cuenda me. ⁵⁶ Ngajñi yachjin jan ne, hinchajñi na xi cuicun vi: na María na Mágdala, hacuaha na María naa rë Jacobo cojo José, hacuaha cojo naa rë cha quihndi rë Zebedeo.

Caseya nima Jesucristu cahntsua tsjun

⁵⁷ Hya xi cajne hora ne, ngu cha nchina xi hmí rë José, ngu xuta Arimatea cha xi hacuaha xuta ladu rë Jesús cha. ⁵⁸ Cha vëhë quiji cha xcun Pilatu, cafehya cha cahndë sá xi cuma cjuahaxin cha nima Jesús. Hane Pilatu ne, casua me cha cahndë. ⁵⁹ Ngajan xi cafahatsja cha nima jan ne, sehe catsitjngui rë cha tsjian tyjahi, sacuaha xcusun rë me. ⁶⁰ Sehe caveya cha nima cahntsua ngu tsjun xatsë rë suva cha xi ha casahmi cha xi camá catjuhngui rë taha naxi. Sehe catsindefajne cha ngu ndyojo jyë xi cuechja rë tingotjo rë tsjun jan. Hya xi camá casahmi cha ne, quiji cha cojo xuta ra. ⁶¹ Peru na María na Mágdala cojo na María xi hacjahi ne, caviyujutaha na xcun tsjun.

Cha sindadu siu cuidadu cha tsjun

⁶² Hya xi cumá nchujun ni ne, hya nixtin xi cjuahajenda rë me ne, hya camatangun nahmi xi matitjun cojo cha partidu fariseo sehe cachja cha cojo Pilatu. ⁶³ Cuitjin cachja cha tsëhë Jesús:

—Nai, ngayin ne vitsjen niji xi hya xi chaja sa cueya cha cachja cha ndacha vë cuitjin: “Cahntsua jyan nixtin ne, cuya cjuahñu naha.” ⁶⁴ Ngatsë rë vëhë ne, meje rë xi nihñu cuendun xi sehñu ndaja tsjun rë cha hisca xi ha cavatju jyan nixtin jan, cojo sa xi cumaji nduva cha ladu rë nima vë ne, cjuahaxin cha nima tsëhë tsjun jan, sehe cuichja cha xi cavuya cjuahñu rë nima. Cuatjin nihñu ta tsëhë xi sá xi cuatjin sahmi cha, hisca hitsë sa choho cuatjuun cumá.

⁶⁵ Ngajan xi cachja Pilatu cojo rë me cuitjin:

—Sacu nuju sindadu jan xi sahmi cuidadu rë tsjun, sehe tanguncujun ne, hacuaha ndaja techjunhñu tsjun vë hacutjin cuma xi nihñu.

⁶⁶ Sehe quiji me cojo sindadu jan, cavechjahñu me tsjun, cojo sa xi cumatsejen sa xi cuaxé cha nima, hacuaha caviyuju cha sindadu xi sahmi cuidadu rë.

28

Cavuya Jesucristu cjuahñu

¹ Xi cavatju nixtin xi chjahájenda rë jan ne, xi tu casahasen ni tsëhë nixtin ngu tsëhë totje ne, na María na Mágdala jan cojo na María xi hacjahi ne, cavetju na quiji vutsejen na xcun tsjun rë nima Jesús. ² Hya xi camá ne, jercu cafani nangui ta tsëhë xi canduvajne ngu ángel rë Nina tsëhë ngahnga. Hane ángel jan ne, quiji catsivahaxin ndyojo xi cavechja rë tingotjo rë tsjun jan, sehe cavejña xcun. ³ Ángel jan ne, sacuaha ndihi chuhun ne, cuatjin jyihi ángel. Hacuaha tsjian rë ne, jemu tu tyava camahani jyihi, sacuaha jyihi hnchan xi hmí rë nieve. ⁴ Xi camachaya rë me tsëhë ángel jan ne, jemu catsacjun sindadu xi siu cuidadu ngajan, hisca cafatsë hnchan cha hisca sacuaha cahme yojo ra cojo chircun. ⁵ Ngajan xi cachja ángel cojo yachjin xi siutaha jan cuitjin:

—Xicarcuun. Ha hvë xi Jesús vinchunsun me, me xi cavetaha xuta xcun cru. ⁶ Me vëhë ne, tsajin me nguehe ta cavuya me cjuahñu sacuaha cachja me. Nduvun chutsujun cahndé hiscan cafaña me. ⁷ Quihndé ne tangun sanii ne, tuhuncuendun rë xuta ladu rë me cuitjin: “Ha cavuya cjuahñu rë me; hane cjue titjun me tsujun Galilea. Hane ngajan sacu xingueen.” Hindë ne, vëhë cjua xi cuichjá cojo nuju.

⁸ Hya xi camá ne, cavetju quiji yachjin jan. Jercu quijircun rë na peru hacuaha jercu ndama rë na. Cuatjin quiji na xi suacuenda na xuta ladu rë Jesús tsëhë cjua xi cachja ángel. ⁹ Hane hora xi tifi na ndiya ne, Jesús ne cavechutaha me na jan, casua me na nina. Sehe chjuun jan ne, cafehetiña na tsëhë Jesús, caticjaxcun na cafaha na ntsacu Jesús hane cafaharcun na me. ¹⁰ Hya xi camá ne, Jesús ne, cachja me cojo na cuitjin:

—Xicarcuun. Tangun tuhuncuendun rë hermano naja, tinújun cojo me xi cjue me distritu Galilea. Hane ngajan sacu xingueen.

Cjua xi casua sindadu

¹¹ Jinguyëjë rë xi quiji yachjin jan ne, ngujo cha sindadu jan cavisehen cha nandya Jerusalén, casuacuenda cha nahmi xi matitjun tsëhë xcusun xi camá. ¹² Sehe nahmi jan ne, hya xi ha camátangun me cojo xuta changá hane cavisiajmi cjin me tsëhë mé xi sahmi me. Hane xi cama chihin cjua ne, jemu cjin camahani tujún casua me cha sindadu jan, ¹³ hacuaha cachja me cojo sindadu cuitjin:

—Vihí cjua xi cuinújun ni. Cuinújun ta xuta ladu rë me ne, nguixun ne, hora xi catsuñufun ne, cafehe me. Hane tahahma ne catsichëjë me nima. ¹⁴ Hane sá xi cumachaya rë gobernador tsëhë cjua jan ne, ngayin ne, cuanguin cuinújin cojo rë me cojo sa xi cuijncacun me tsajin mé sahmi me cojo nuju.

¹⁵ Cuatjin camá xi cafahatsja cha tujún jan, hane cachja cha sacuaha cavitexa nahmi jan. Cjua vëhë ne, cavitsojo ngajñi rë xuta nangui Israel. Hane cuatjin chja cjua hisca nixtin quihndé.

Jesús ne, casuaxa me xuta ladu rë me xi cjue cuichja me cjua rë Nina

¹⁶ Hya xi camá ne, xuta ladu rë Jesús xi má tengu me ne, quiji me distritu Galilea, hisca naxi xi cachja Jesús. ¹⁷ Hya xi camá ne, ngajan cavëë me Jesús

ne, cafarharcun me me. Peru ngujo ni me macjaain rē me. ¹⁸ Ngajan xi camatiña Jesús tsēhē me, cachja me cojo me cuitjin:

—Ha cafarhantsa ngahñu xi cumá sahme tu mé ni xcusun sá xi tsēhē ngahnga o sá xi tsēhē ngasunhdē. ¹⁹ Ngatsē rē ngahñu vēhē ne, tsingátju nuju ne, tangun jinguyējē rē nandya ngasunhdē, cuinújun cojo xuta jan cojo sa xi cuisehen me ladu naha. Catiseyanangui ñihi rē Nina Nahmi, cojo ñihi naha, Quihndi rē Nina, cojo ñihi rē Hasen rē Nina hora xi xtenda me. ²⁰ Hacuaha ticuyun rē me xi cuihdē me ne, sahmichihin me yējē xcusun xi cavitéxa nuju ngahan. Hane xi cuatjin ne, hacuaha cuitejñacuaha cojo nuju yējē ni hora hisca cuijnetaha nixtin rē ngasunhdē.

Cjuandajyihí xí catsihindu San Marcos Tséhë Jesucristu

Juan ne, vitenda rë xuta ngajan ngu xín tséhë nandya

¹ Cuitjin cavetsihin cjuá tséhë Jesucristu, me xí Quihndi rë Nina Jain.

² Isaías ne, ngu xutachanga xí cama cafaha cjuá rë Nina hacuaha cachja me cojo xuta hatsëë nixtin. Cuitjin catsihindu me, hacutjin cachja Nina cojo me:

Tsingátju titjun ngu cha xí cjuaha cjuá naha, cojo sa xí scuxaha cha cjuatacun rë xuta, tséhë xí cjuéhe ngaye.

³ Hane hiscan jemu xín tséhë nandya ne, ngajan cuejña cha. Hane cuitjin cuichja cha:

“Sacuatjin matyjahi ndiya hya xí nduva ngu xuta rcun ne, cuatjin nihñu tyjahi cjuatacun nuju tséhë xí cuinduva me xí matitjun tsajan.” Cuatjin cuichja cha.

⁴ Sacuatjin jain catsihindu Isaías ne, cuatjin jain camá ta cafehe cha xí catsingatju Nina, cha xí hmí rë Juan, ngajan hiscan jemu xín tséhë nandya. Casua cha camachaya rë xuta ta meje rë xí tsindeya me cjuatacun rë me hacuaha xtenda me, cojo sa xí tsinchataha Nina me tséhë jyë rë me. ⁵ Hane jercu cjin xuta quijitjengui me cha, xuta tséhë distritu Judea cojo nandya Jerusalén. Hane cavitenda cha me xí cavijacun jyë rë cojo Nina ngajan ndajyë Jordán.

⁶ Tsjian rë cha Juan jan ne, tsja rë chu camellu camá. Cojo ngu cinturón chuxin quitaha cahntsua cha. Xí camá niñu rë cha ne, chu nchahva. Cojo tsjen rë chu tusen cahvi cha. ⁷ Cuitjin cachja cha:

—Canduvá ngahan titjun. Peru sehe cuinduva ngu me xí hitsë sa vechu cjuatacun rë xí cumá ná ngahan, xí hisca chuxinxté rë me cumaji tsinguissehercu sahme tyjahi. ⁸ Ngahan ne, tu caviténda ni nuju. Peru me vëhë ne, cueya me Hasen rë Nina cahntsua xahasen nuju.

Jesús ne, caxtenda me

⁹ Sacuaha nixtin vëhë ne, cavetju Jesús tséhë nandya Nasaret, distritu Galilea. Quijijengui me cha Juan xí cuitenda cha me. Hane cavitenda cha me ngajan ndajyë Jordán. ¹⁰ Xí camá caxtenda me ne, xí tu tivetju me tséhë nandan jan ne, cavëë me xí ngahnga ne tituxaha, hacuaha Hasen rë Nina ne, nduvajne sacuaha tsejen ngu paloma, quiji cavisehen cahntsua xahasen rë me. ¹¹ Hacuaha canuhya rë ngu cjuá ngajan ngahnga xí chja cuitjin:

—Ngaye ne, quihndi naha ngaye. Jercu hmucacun ri. Jercu ndama ná ngatsë riji.

Jesús ne, cafahachuva xitsehen me

¹² Ngajan xí Jesús ne, ngutjen ni quiji me ngajan ngu xín ta tséhë xí Hasen rë Nina ne, cavaxëxin rë me. ¹³ Casetaha me ngajan xín yachan nixtin. Hacuatjin cojo Satanás quijitjengui rë me. Hane handasa jercu cavangui Satanás chuva rë xí choho sahmi Jesús ne, peru casahmii me. Hacuaha quiji ángel caviyujutaha xí cjuahacuenda rë me.

Jesús ne, vetsihin me cojo xa rë me

¹⁴ Hacuaha camá nga ngu xcusun xi xuta xi matitjun ne, caveya me cha Juan ndavaya. Cavatju vëhë ne, sehe cavuya cafe nga Jesús distritu Galilea, cachja me cojo xuta cjuarë Nina. ¹⁵ Cuitjin cachja me:

—Camatiña nixtin xi Nina ne, cuitexa me ngasunhndë. Vëhë xi meje rë xi nindeyun cjuatacun nuju hacuaha catamacjain nuju cjuarë xi tichjá cojo nuju.

Jesús ne, cajindaya me ñuju cha xi tsuva rë chu ti xi cuma cha ladu rë me

¹⁶ Nixtin xi catsuyjihiya me hya ne, cavatju me tjehe laguna tsëhë Galilea. Hora hya ne, cavëë me cha Simón cojo cha Andrés hntsä cha. Titsingatjenja cha nahya ngajñi laguna jan, tsëhë xi ha tuxa xa vëhë sahmi cha. ¹⁷ Hane ngajan xi cachja me cojo cha ta:

—Nduvun cuanguen cojo ná. Hane cuicuyá nuju xi nuvun xuta xi cuisehen me ladu naja ngojo rë xi chu ti nuvun. —Cuatjin cachja me.

¹⁸ Hane hora vëhë ni caviyuju cha nahya jan ne, quiji cha cojo me. ¹⁹ Haxcun xi ha cjuarë Jesús cojo cha xi cuacun jan hitsë ni nguvan ne, cavëë me cha Jacobo cojo cha Juan hntsä cha, quihndi rë Zebedeo. Hincha cha cahntsua barcu, tifuyataha cha nahya. ²⁰ Hane hacuaha cajindaya me cha. Sehe caviyuju cha nahmi rë cha xi hmí Zebedeo cojo mosu rë me ngajan cahntsua barcu. Sehe quiji cha cojo Jesús.

Ngu cha xi jiya rë ngu xitsehen

²¹ Hya xi camá ne, cafehe me cojo catsiñuju cha xi cuacun vëhë nandya Capernaum. Hane hya xi cavechu nixtin xi chjahájenda rë ne, quiji me yungun, cavicuya me xuta. ²² Hane xuta jan ne, quijircun rë me hacutjin vicuya Jesús ta, tsëhë xi tivicuya me sacuaha ngu xi matitjun jain, hacuain sacuatjin maestru xi vicuya ley rë xuta tsëhë nangui Israel. ²³ Hacuaha ha tu ñahñu canduva ngu cha xi jiya xitsehen cahntsua xahasen rë cha ngajan cahntsua yungun jan. ²⁴ Hane cuitjin cajindaya cha:

—Ngayun ne, ¿mé cuenda nuju tsijin? ¿Há nduvun nicjun nijí? Ngayun ne, Jesús tsëhë nandya Nasaret ngayun. Hacuaha hvë xi ngayun xi tsajin jyë nuju ngayun xi catsingatju nuju Nina.

²⁵ Hane Jesús ne, cachja cjan me cojo xitsehen xi jiya xahasen rë cha jan. Cuitjin cachja me:

—Jyuu nechin. Hacuaha tetjixin tsëhë cha vi.

²⁶ Xi tu cahmexcuen cha xi casahmi xitsehen ne, hisca cajindaya, hane cavetjuxin tsëhë cha. ²⁷ Yëjë ni xuta jan ne, jemu quijircun rë me, hisca cavisiajmi me cojo xicjin me cuitjin:

—¿Mé nga xcusun vihi ni? Ngu cjuarë xatsë xi vicuya me vihi, ta hisca xitsehen, hacuaha hndë tsëhë me.

²⁸ Hacuaha marcu macjain canuhya rë tsëhë me jinguyëjë ni ladu tsëhë distritu Galilea.

Jesús ne, sahmi me xi mandaja nahya rë Simón Pedru

²⁹ Hya xi camá ne, cavetju me yungun jan, quiji me ndava cha Simón. Quiji me cojo cha Jacobo cojo cha Juan, hacuaha cojo cha Andrés hntsä cha Simón.

³⁰ Hane nahya rë cha Simón ne, jiña na xi hmu rë na cojo chihinsuë. Hane ngutjen cachja cha cojo Jesús xi hmu rë na. ³¹ Ngajan xi quiji tiña Jesús hiscan jiña na, cafaha me tsja na, catsisatjen me na. Hane hora vëhë ni, casejyu suë xi má rë na. Hisca cafaha cuenda na xi sinë me cojo xicjin me.

Jesús ne, sahmi me xi mandaja xutacjín xi hmu rë

³² Hane xi cavetje tsuhi ne, jemu cjin xuta quijicojo me xuta hmu rē hiscan tacun Jesús, hacuaha cojo me xi hinchá xitsehen xahasen rē, ³³ camatangun me cojo xuta nandya ngajan tingotjo ndihya. ³⁴ Hane jemu cjin xuta hmu rē camandaja me xi casahmi Jesús, xuta xi má rē me tu mé ni chíhin xi má rē xuta. Hacuaha jemu cjin xitsehen cavaxēxin me tséhē xahasen rē xuta. Hane casuaain me cahndē xi cachja xitsehen ta tséhē xi ha vëé rē me. Hane ngutjen cuichja ta me vëhé xi catsingatju Nina me.

Jesús ne, sua machaya rē xuta cjua rē Nina ngajan yungun

³⁵ Xi camá nchujuni, jñu sa nguitajñu cavisatjenhnga me. Hane cavetju me ndihya quiji me ngu cahndē hiscan xin. Hane ngajan cavisiajmi me cojo Nina. ³⁶ Ngajan xi cha Simón cojo cha xi yahnga jan ne, cavanguise cha Jesús.

³⁷ Hane xi casacu rē cha me ne, sehe cachja cha cojo me ta:

—Jemu cjin xuta cafehetjengui nuju me. —Cuatjin chja cha.

³⁸ Ngajan xi cachja me cojo cha ta:

—Cuanguen sa nandya xi siu tahndee, cojo sa xi hacuaha cuichjá cojo xuta vëhé cjua rē Nina ta tséhē xi xa vëhé canduvá. —Cuatjin cachja me.

³⁹ Hane sehe quiji sa me yungun xi siu yëjë ni nandya tséhē Galilea. Cachja me cojo xuta cjua rē Nina, hacuaha cavaxēxin me xitsehen xi hinchá xahasen rē ngujo xuta xi siu nandya jan.

Jesús ne, sahmi xi mandaja ngu cha xi ma rē chíhin xi vitaha rē yojo naja

⁴⁰ Hya xi catsuyihiya me nandya xi cuacun vëhé, hya cachja ngu cha xi yaha rē ngu chíhin vitaha xi setaha chuxin naja. Hane cachjajyë cha cojo Jesús, hisca cavixcuhnchi cha xcun me, sehe cachja cha cuitjin:

—Sá xi nihñu favor ne, cuma naxunxun chíhin xi yaha ná.

⁴¹ Jesús ne, camayuma rē me cha. Hane cavetahatsja me cha. Sehe cachja me cojo cha cuitjin:

—Joho. Ha camandaja ngaye. —Cuatjin cachja me.

⁴² Hane ngutjen ni cavetjuxin chíhin jan ne, camandaja cha. ⁴³ Hane sehe casua me cha cuidadu. Hane ngutjen ni catsingatju me cha, quiji cha.

⁴⁴ Cuitjin cachja me:

—Ndaja cuidadu xi canujiin camahani xcusun vi cojo hisca ngu. Peru tihin ningacuin yojo riji cojo nahmi ngajan yungun. Hane tejñi ngu cjuatjo sacuatjin chja ley tséhē Moisés ta camandaja ngaye, cojo sa xi xuta ne, cumacjain rē me. —Cuatjin cachja me cojo cha.

⁴⁵ Peru xi cavetju cha quiji cha ne, cavetsihin casua cha camachaya rē xuta. Jercu cachjatë cha tséhē xcusun vëhé. Vëhé xi Jesús ne, ha quihndë caviisiin me nandya ta tséhē xi ha ngutjen jercu tsé xuta. Hane ngajan ni nguijña casetaha me. Peru xuta ne, yëjë ni ladu cavetju me, quijitjengui me Jesús.

2

Jesús ne, sahmi me xi mandaja ngu cha xi cahme yojo rē

¹ Hane cahntsua xi ngujo nixtin ne, cavuya quiji nga Jesús cojo cha ladu rē me ngajan nandya Capernaum. ² Hane xi casacu cjua xi tacun ndihya me ne, jercu camatangun xuta, hisca tingotjo ndihya quitsë me. Hane sehe cachja Jesús cjua rē Nina. ³ Ngajan xi canduva ñuju cha hiscan tacun Jesús, yahahnga cha ngu cha xi cahme yojo rē. ⁴ Hane xi maji ficojo cha cha hisca hiscan tacun Jesús, tséhē xi jemu quitsë xuta ne, cavuxaha cha rcu ndihya quixi rē hiscan tacun me. Sehe ngajan catsinguissehen cha cha hmu rē jan

cojo ni nachan xi quisun cha. ⁵ Hya xi cavëë Jesús hacutjin xi macjain rë cha me ne, sehe cachjá me cojo cha hmu rë jan ta:

—Jyë riji tsan ne, ha camanchataha. —Cuatjin cachja me.

⁶ Hora vëhë ne, hacuaha tivisiñuju ngujo cha maestru tsëhë ley, hacuaha taha tisingatahacacun cha cuitjin: ⁷ “¿Mé má cuitjin chja cha xi cuijiyihi vi?, ta Nina tsixcuehyu cha. Tsajin yo xi cuma tsinchataha jyë rë ngu xuta ta suva ni Nina má sahmi me.” ⁸ Jesús ne, ha hisca vëë me cojo cjuatacun rë me xi cuatjin tisingatahacacun cha xi cuacún vë, hane sehe cavinenguise me cuitjin:

—¿Mé má cuatjin ningatuhuntacun cjuatacun vëhë? ⁹ ¿Jarë xi hitsë sa tsavi xi cuichjá cojo cha hmu rë vi? ¿Há xi: “Jyë riji ne, ha camanchataha?” O há tsajin ne, ¿há xi: “Tisatjinhgue ne, chjaye nijña riji, hane tjihin?” ¹⁰ Hindë cojo sa xi cumachaya nuju xi Nina cavitexa me ngahan xi tsinchátaha jyë rë xuta nguehe ngasunhdë ne, nguehe chutsujun hacutjin cuichjá cojo cha hmu rë vi.

Sehe cachja me cojo cha hmu rë cuitjin:

¹¹ —Tisatjinhgue tsan. Chjaye nijña riji ne, tjihin ndya riji. —Cuatjin cachja me.

¹² Ngajan xi cha hmu rë jan ne, ngutjen ni cavisatjenhnga cha, cafaya cha nijña rë cha, sehe cafe cha xcun ni ngayëjë xuta. Vëhë xi ngayëjë ni xuta jan ne, jemu quijircun rë me. Hacuaha cachja me ta:

—Jemu cjuarcun jain Nina. Vëhë xi cuatjin camá casahmi me. Cjëë camahani chaan xcusun sacuaha vëhë. —Cuatjin cachja xuta.

Jesús ne, jindaya me Leví xi má me xuta ladu rë Jesús

¹³ Ngu nixtin nga ne, cavatju Jesús tjehen laguna. Hane jemu cjín xuta quijitjengui rë me. Hane cavicuya me xuta jan. ¹⁴ Hane hya xi cjui cjui me ne, cavechu me hisca tacun cha Leví, quihndi rë cha Alfeo. Tacun cha ndihya hiscan faha cha xi machjitje tsëhë xi xteña. Sehe cachja Jesús cojo cha cuitjin:

—Cuanguen cojo ná.

Hya xi camá ne, cavetju cha, quiji cha cojo me.

¹⁵ Cuitjin camá nga ngu nixtin jan, tijinë Jesús niñu ndava cha Leví. Hacuaha jemu cjín sa cha xi faha tujúnsa cojo jingu sa cha tsehen tijinë cha cojo Jesús cojo cha ladu rë me, ta hacuaha jemu cjín xuta xi cuacún vë xi tjengui rë me. ¹⁶ Peru cha maestru tsëhë ley cojo cha tsëhë partidu fariseo ne xi tu cavëë cha xi tijinë Jesús cojo cha xi cuacún jan ne, sehe cavinenguise cha cojo cha ladu rë me cuitjin:

—¿Mé má cuatjin tijinë Jesús cojo cha xi choho xcusun rë vë ni?

¹⁷ Xi tu cahndë Jesús cjuar rë cha ne, sehe ngajan xi cachja me cojo cha ngu ejemplu cuitjin:

—Xuta xi hacuain hmu rë me ne, mijí rë me doctor. Me xi hmu ni rë me ne, me vëhë xi mameje rë me. Hacuaha ha chuva vëhë ni canduvá ngahan. Canduvá cuanguë xuta xi choho cjuatacun rë, cuichjá cojo rë me cjuar rë Nina. Peru hacuain cojo me xi ha tyahi cjuatacun rë. —Cuatjin cachja me.

Vinenguise xuta tsëhë xun rë Nina

¹⁸ Camá xi cha ladu rë cha Juan cojo cha tsëhë partidu fariseo ne, nixtin hya ne siu cha xun tsëhë Nina. Hane cafehe ngujo cha xi cavinenguise rë Jesús cuitjin:

—¿Mé má cha ladu rë cha Juan cojo cha tsëhë partidu fariseo ne, tijini cha quihndë ta, siu cha xun rë Nina, hane cha ladu nuju ne, faharcuiin cha cuatjin ni?

¹⁹ Sehe catsicuya Jesús cjuca cojo ngujo ejemplu cuitjin:

—Jinguyëjë rë xi cha xi cuixan ne, tacun cha cojo xuta rë cha ne, cumaji cuiyuju me xun rë Nina. ²⁰ Peru cuinduva nixtin hya xi cha xi vixan ne, cojo cjuachan cjucojo condra rë cha cha. Hane hya cuiyuju xuta rë me xun rë Nina.

Ejemplu tsëhë tsjian cojo chuxin xi xincha xan

²¹ Hacuaha cachja me cojo cha cuitjin:

—Tsajin yo xi fuyataha tsjian changá cojo ngu rquí tsjian xatsë ta tsëhë xi cjëë cjueyu. Cuatjin ta, sá xi cuatjin sahmi me ne, xi cjueyu tsjian xatsë jan ne, cuicheya rë tsjian xi changá jan hane sahmi jyë sa rë hiscan xi ntsun. ²² Hacuaha tsajin yo xi vincha xan xatsë cahntsua chuxin changá ta, sá xi cuatjin sahmi me ne xan jan ne, tsitsinga rë chuxin jan. Hane xan jan ne, chajan. Hacuaha cuetsun chuxin jan. Vëhë xi xan xatsë ne meje rë chuxin xi xatsë. Maji secjan jo xcusun.

Cha ladu rë Jesús ne, fane cha trigu nixtin xi chjahájenda rë

²³ Cuitjin camá nga ngu nixtin xi chjahájenda rë. Hora xi tivatju Jesús cojo cha ladu rë me hiscan tjin tjë trigu ne, cavetsihin cavotohosun cha tsë tsë trigu jan. ²⁴ Sehe cha tsëhë partidu fariseo cavinenguisse cha me cuitjin:

—¿Mé má cuatjin quihndë nixtin xi chjahájenda rë ne, sahmi cha ladu nuju xa xi chja ley xi cumaji nihña?

²⁵ Sehe Jesús ne, cafayangui me tsëhë cha cuitjin:

—¿Há cjëë camahani chutayun xujun hiscan chja tsëhë xcusun xi casahmi David hya xi tjin rë me cjuandya xi jemu vojo rë me cojo cha xi siutaha cojo me? ²⁶ Hya xi Abiatar má me nahmi xi matitjun jan ne, hya cavisehen me ndava Nina. Hane David ne, cajiñë me pan xi viyuju xcun Nina. Hacuaha casua me cajiñë cha xi siu cojo me. Cuatjin casahmi me handasa xi chja ley ta suva ni nahmi tjin cahndë xi cuma sinë me pan xi cuacún vë. —Cuatjin cachja Jesús.

²⁷ Ngajan xi cachja me cojo cha ta:

—Xi má nuju ngayun ne, ¿há titjun cavejña Nina nixtin xi chjahájenda rë, sehe catsindaja me xuta xi cjuaharcun rë nixtin vëhë? ¿Hacuiin cuatjin camá! Nina ne, titjun catsindaja me xuta, hane xi camá ngascan ne, cavajña me nixtin xi cjuahajenda xuta. ²⁸ Cuatjin ne, ngahan xi tsëhë Nina canduvá ne, hacuaha satë ná ngahan sacuaha nai rë xi cuichjá mé xi ndatjin xi cuma nixtin xi chjahájenda rë. —Cuatjin cachja Jesús.

3

Jesús ne, sahmi me xi cama ndaja ngu cha xi quixihñu ngu ladu tsja cha nixtin sabadu

¹ Ngu nixtin nga xi quiji Jesús ngu yungun ne, ngajan tacun ngu xihin xi quixihñu ngu ladu tsja cha. ² Hane cha tsëhë partidu fariseo ne, cojo sa xi cuma cuinchajyë cha Jesús ne, siu cha cuidadu, ¿há tsindaja Jesús hiscan hmu rë xihin jan nixtin xi chjahájenda rë? ³ Hane ngajan xi cachja Jesús cojo cha xi quixihñu tsja jan cuitjin:

—Xcun ni yëjé xuta vi ne, tisechin.

⁴ Sehe cavinenguisse me xuta xi siu me cuitjin:

—¿Mé xi sacu cahndé nixtin xi chjahájenda rē? ¿Há xi ndaja ne, o há xi ndajin, há xi naxentjen xuta o há xi niquen me?

Peru cafayinnguini me hisca hitsē. ⁵ Vêhê xi Jesús ne, cama cjan rē me. Hacuaha cama vacacun me ta, tsêhê xi sahmi yumahasen xuta. Xi tu cavutsejen Jesús yêjê ni xuta ne, sehe cachja me cojo xihin hmu rē jan cuitjin: —Nixingun ntsun.

Xi tu catsixinga cha tsja cha ne, ha camandaja. ⁶ Ngajan xi cha tsêhê partidu fariseo ne, cavetju cha yungun. Quiji casahmitangun cha cjua cojo cha tsêhê partidu Herodes xi tsiquehen cha Jesús.

Xutacjín xi camandaja me

⁷ Ngajan xi Jesús cojo cha ladu rē me ne, quiji nga me laguna. Hacuaha jemu cjín xuta tsêhê distritu Galilea quiijtjengui me Jesús. ⁸ Hane xi camachaya rē xuta xcusun xi casahmi Jesús ne, canduva camaha sa xuta tsêhê cahndé xi cuicun vi: nandya Jerusalén cojo yêjê sa nandya tsêhê distritu Judea, cojo distritu Idumea, cojo ngunda vêhê tsêhê ndajyê Jordán cojo hisca tahndee rē nandya Tiro cojo nandya Sidón. ⁹ Sehe ngajan xi cachja me cojo cha ladu rē me ta meje rē xi cuejña cha ngu barcu tña hiscan tacun me, ta jemu cuehncun xuta me. ¹⁰ Hane tsêhê xi jemu cjín xuta camandaja me xi casahmi Jesús ne, vêhê xi yêjê ni me xi hmu rē catsëxti me ne, cojo sa xi ndastu satê tsja me Jesús. ¹¹ Hane xi cavêê xitsehen xi hincha xahasen rē xuta jan Jesús ne, quiji caticja xuta jan hisca tacun Jesús. Sehe ña jindayatê xuta jan, ta xitsehen casahmi xi cachja me cuitjin:

—Ngayun xi Quihndi rē Nina ngayun. —Cuatjin cajindaya me.

¹² Ngajan xi Jesús ne, cavitexa me xitsehen xi tsajin yo cuichja cojo yo me.

Jesús ne, vuxijin me tejó me xi cumá apóstol

¹³ Hya xi camá ne, camiji Jesús ngu naxi. Sehe catsingatju me cjua rē cha xi meje rē me. Hane quiijtjengui cha me. ¹⁴ Hane cavaxijin me tejó cha xi cuisecoo rē me, hane hacuaha tsingatju me cha cjue cuicuya cha xuta cjua rē Nina, ¹⁵ hacuaha cuaxëxin cha xitsehen xi hincha xahasen rē xuta. ¹⁶ Cha xi tejó tsêhê cha ladu rē me cuitjin hmí ra: cha Simón ne, hacui cha xi cachja Jesús xi hmí rē Pedru, ¹⁷ cha Jacobo cojo cha Juan hntsé cha ne, xi quihndi rē Zebedeo, cha xi casuañihi me Boanergerne, ngu ñihi xcuehyu xi meje cuichja Jemu Xti Naja, ¹⁸ cha Andrés, cha Felipe, cha Bartolomé, cha Mateo, cha Tomás, cha Jacobo, quihndi rē Alfeo, cha Tadeo, cha Simón xi tsêhê partidu cananayu, ¹⁹ hane cha Judas tsêhê nandya Queriotte, cha xi cuiteña rē Jesús cojo condra rē me.

Jyê xi cumajin cumanchataha

²⁰ Hya xi camá ne, cavuya quiji nga Jesús ndihya hiscan véjña me. Hacuanitjin nga camatangun xuta cjín. Hisca xi sinê Jesús niñu cojo cha ladu rē me maji. ²¹ Hya xi camachaya rē xuta rē me cjua vêhê ne, quiji me xi cuaxëxin rē me, tsêhê xi há sa má rē me, sca rē Jesús.

²² Hane cha maestru tsêhê ley ne, canduva cha tsêhê Jerusalén. Sehe cavisajmi cha cojo xicjin cha cuitjin:

—Jiya Satanás xahasen rē me. Hane ngatsé rē xitsehen xi matitjun vê ne, vêhê xi ma vaxëxin Jesús xitsehen. —Cuatjin cachja cha.

²³ Ngajan xi casahmi tangun Jesús cha xi cuacun vêhê ne, sehe cojo ngujo ejemplu cachja me cojo cha cuitjin:

—Jemu yuma hasen rē Satanás sá xi suva ni cuaxēxin xicjin. ²⁴ Ha hyan ta sá xi xutaxa rē tsēhē ngu nandya scaan me ngajñi rē me ne, cjuicani rē me. ²⁵ Hacuaha sá xi xuta xi ngu ndava me ne, scaan me ngajñi rē me ne, ngajan chaja. ²⁶ Ha cuanitjin rē Satanás ta sá xi scaan cojo xicjin ne, ha quihndē cumachjiriin xi matitjun ta, tsēhē xi ha quihndē cuhndiin xicjin tsēhē.

²⁷ Hacuaniitjin ne, hisca ngu cha chējē cumaji tu cuisehen ni cha ndava ngu xuta xi hñu ngahñu rē me xi tsichējē cha tsēhē me. Cumaji sa xi hacuiin titjun tsihñu cha me ta cuatjin xi cuma tsichējē cha tsēhē me.

²⁸ Cuichjá cojo nuju cjuaquixi ta tu mé ni jyē xi sahmi xuta hacuaha tu mé ni cjua xi choho cuichja me ne, sacu rē me cjuaninchataha, sá xi cuijacun me jyē rē me cojo Nina. ²⁹ Peru tu yo ni xi choho cuichja tsēhē Hasen rē Nina ne, tsajin ngu nixtin xi sacu rē cjuaninchataha ta jemu jyē jyē rē.

³⁰ Cuatjin cachja Jesús ta tsēhē xi cachja cha jan xi jiya xitsehen xahasen rē me.

Naa rē Jesús cojo xicjin me

³¹ Hane cafehe naa rē me cojo hntsē me ne, ngajan ni ndatsen hinchacun me ne, catsingatju me cjua xi meje cuisiajmi me cojo Jesús. ³² Vēhē ta jemu cjin xuta siundee me Jesús ne, sehe cachja xuta cojo rē me cuitjin:

—Nutsujun ni. Ná nuju cojo tsuhun cojo tichjun ne, jindaya nuju me ngajan candatsen.

³³ Sehe cafayangui Jesús cuitjin:

—¿Yo xi má nuju xi ná naha cojo xingueen?

³⁴ Cavutsejen me xuta xi siundee rē me, sehe cachja me cuitjin:

—Ngayun xi nechun nguehe, ngayun xi sacuaha ná naha cojo xingueen ³⁵ ta, tu yo ni xi sahmi sacuatjin chja Nina ne, vēhē xi sacuaha ná naha sacuaha xingueen.

4

Ejemplu tsēhē cha xi tsitjē

¹ Ngu ndiya nga ne, cavetsihin cavicuya Jesús xuta tjeheh laguna. Hane ngu cuatjin nga jercu tu catsē camahani xuta hiscan tacun me. Vēhē xi cavisehen me ngu barcu cavéjña me. Hane quijicojo rē me hitsē xcun nandá, ngajan cavéjña. Hane yējē ni xutacjin jan ne, caviyuju me nangui quixí tjeheh nandan. ² Sehe cavicuya Jesús me jemu cjin cjua. Cuitjin cachja me ngu ejemplu:

³—Cuejña ni xi ngu xihin ne, quiji catsitjē cha trigu. ⁴ Hane hora xi ticandi cha tjē rē ne, ngujo ne, cavixu ndiya. Hane canduva nisē ne, cajinē chu. ⁵ Ngujo nga ne, cavixu hiscan xi jemu ndyojotē, hacuaha jemu chuva nihndē quisun. Hane jemu xati cavetju ta tsēhē xi hacuiin tjain nihndē quisun. ⁶ Hane xi jemu suē camá ne, caxiya tsēhē xi jemu chuva tyjama rē. ⁷ Ngujo nga ne, cavixu ngajñi rē nahyá. Xi tu camayehe nahyá ne, casahmihndē rē xitjē, hane camayiin. ⁸ Hane ngujo nga ne, cavixu hiscan ndajyihi nangui. Vēhē ne, jemu ndaja camá, hisca yehe hnga camá ya rē. Ngujo ne jemu ndaja camá. Ngujo nga jan ne, hitsē sa ndaja camá. Hane xi yahnga jan ne, jercu vatjutaha ndaja camá. Cuatjin fi ejemplu tsēhē cha xi tsitjē trigu.

⁹ Jarē ngayun xi meje nuju cuma nuju ne, ningatuhuntacun nduju mé vjine cjua vē.

¹⁰ Hya xi cafe xutacjín jan ne, ngajan xi me xi siundee cuaha jan cojo cha xi tejó jan ne, cavinenguise me tséhë cuentu jan. ¹¹ Sehe cafayangui Jesús cuitjin:

—Ngayun ne casua nuju Nina cahndé xi vijne rcun cjuatahahma tséhë gobiernu xi sahmi me. Peru me xi hacuiin ladu naja ne, cojo suva ejemplu tichjá cojo rë me, ¹² cojo sa xi handasa cuihndé me ne, peru cuijnii rcu me ta, sá tu tsindeya me cjuatacun rë me ne, hacuaha cumanchataha me. —Cuatjin cachja Jesús.

Jesús ne, chja me mé vijne ejemplu tséhë cha xi tsitjé

¹³ Sehe ngajan xi cachja Jesús cojo cha ladu rë me ta:

—Sá xi ha canuhyun ejemplu vëhé ne, hacutjin cuinuhyun sa xi yahnga ni. Nguehe cuichjá cojo nuju mé vijne ejemplu xi cachjá cojo nuju vë. ¹⁴ Cha xi tsitjé trigu ne, sacuaha ngu cha xi chja cjua rë Nina cojo xuta. ¹⁵ Ngujo me xi vihndé cjua vëhé ne, sacuaha tjé rë trigu xi cavixu ndiya ta cjua ndajiyihi xi vihndé me ne, ngutjen ni nduva Satanás ne, fahataha cjua xi caseya cahntsua xahasen rë me. ¹⁶ Yahnga nga me xi vihndé cjua vëhé ne, sacuaha tjé xi cavixu hiscan jemu ndyojoté ta hya xi vihndé me cjua ndajiyihi ne, ngutjen ni jemu cojo cjuasua macjain rë me cjua. ¹⁷ Peru tséhë xi hacuiin nguñaja cacun me macjain rë me ne, vëhé xi seyaain cahntsua xahasen rë me hya xi má cjuandya, sacuaha cumá rë tjé xi jemu chufa tyjama rë ne ta, cain rë xi jyé nixtin. ¹⁸ Hane ngujo nga me xi vihndé cjua vëhé ne, sacuaha tjé xi cavixu ngajñi nahyá. Vihndé me cjua. ¹⁹ Peru tséhë xi jemu tjín rë me cjuandya hacuaha jercu meje rë me xi cuma nchina me, vëhé xi chufa cuenda sahmi me cjua ndajiyihi xi cavisñuju me. Fë ne, tsajin mé vetjucaa. ²⁰ Ngujo nga me xi vihndé cjua ndajiyihi vëhé ne sacuaha tjé xi camatjé hiscan ndajiyihi nangui ta xi tu vihndé me cjua vëhé ne, faha nguñajacacun me. Vëhé xi ngujo me ne, ndaja cuiyujuchihin cjuatacun rë me. Ngujo nga me ne, hitsé sa ndaja cuiyujuchihin cjuatacun rë me. Hane me xi yahnga jan ne, jercu tu ndaja camahani cuiyujuchihin cjuatacun rë.

Ejemplu tséhë lámpara

²¹ Hacuaha cachja me cojo rë me cuitjin:

—Hya xi setaha rë candil ne, ¿jani cuejña? ¿Há ngahma caxa ne? o ¿há ngahma nachan? Hacuiin cuatjin nihñu ta, cuejña cahndé rë. ²² Sacuaha ndaja tsejen ndihi jan ne, hatuxa cuechu nixtin xi cuijne rcu xuta cjua naha xi hacuiin ndaja vijne rcun me quihndé. ²³ Jaré ngayun xi meje nuju cumá nuju ne, ningatuhuntacunndujun mé vijne cjua vë. ²⁴ Hacuaha cachja sa me cojo xutacjín cuitjin:

—Ndaja tetuhunrcun xi tivisiñuju. Chufa xi tuhun ne, ha chufa vëhé sua nuju Nina. Hisca quisun sa sua nuju me. ²⁵ Me xi ha tjín rë ne, sua sa Nina me, hane me xi tsajin cjín rë ne, cjuahataha Nina xi tjín rë me.

Ejemplu tséhë tutjé xi majyë

²⁶ Sehe cachja Jesús cojo xutacjín jan ngu ejemplu cuitjin:

—Xuta xi cuisehen me ladu rë Nina ne, ha tuxa cumá cjín me sacuaha tjé tséhë trigu xi tsitjé ngu xihin xcun nangui rë me. ²⁷ Fañafé cha nguixun ne, visatjenhnga cha nguítajñu. Hane tjé ne, vetju, hacuaha mayehe xitjé. Peru xihin jan ne, hvín hacutjin camá xi camayehe xitjé jan. ²⁸ Nangui ne, ha tuxa má xitjé. Titjun ne, cuetju xca rë. Xi cuijin sa ne, cuetju tú chihndé rë. Hiscan xi cuijnetaha ne, jemu cjín tutjé rë cuetju. ²⁹ Hane hya xi camacha tutjé rë ne,

sehe tsingatju xihin jan mosu xi cjue cuatë ta tsëhë xi ha cavechu nixtin xi xti rë.

Ejemplu tsëhë tutjë rë mostasa

³⁰ Sehe cachja Jesús cuitjin:

—Nguehe cuichjá cojo nuju ngu nga ejemplu tsëhë gobiernu xi sahmi Nina. ³¹ Xuta xi cuisehen ladu rë Nina ne, cumacjín me sacuaaha majyë ngu ya mostasa. Tutjë rë ya vëhë ne, hitsë sa langa xi cumá rë yëjë ni tutjë xi tjin ngasunhdë. ³² Peru hya xi matjë ngu ne, sehe cuetju xca rë hacuaaha hitsë sa jyë má xi cuma rë yëjë ni xca xi chine. Hane tsja rë ne, hacuaaha yehe, hisca nisë ma sahmi chu ndava chu xcun tsja rë hiscan tjanguen.

Mé tsëhë xi Jesús ne, sahmixa me cojo ejemplu

³³ Jemu cjín ejemplu sacuaaha vëhë cachja Jesús hya xi tivicuya me xuta cjua rë Nina, hatucutjin hora xi cama cavetaharcu xuta. Hane cojo xuta ne, cachja me suva ejemplu. ³⁴ Peru hya xi suva siu cha ladu rë me ne, casua cuenda me cha mé vijne yëjë ejemplu jan.

Jesús ne, tsisejyu me tjo cojo tsindyu rë laguna

³⁵ Xi quiji hora tsëhë nixtin vëhë ne, Jesús ne, cachja me cojo cha ladu rë me cuitjin:

—Cuanguen ngunda vëhë. —Cuitjin cachja me.

³⁶ Ngajan xi caviyuju ni me xutacjín jan ne, sehe cha ladu rë me ne, quiji cha cojo me tu cuanitjin ni. Hacuaaha cojo sa barcu xi yahnga jan ne, quiji tangun cojo rë me. ³⁷ Hora xi cjui barcu ne, canduva ngu tjo xi jercu tu hñu camahani. Hane tsindyu rë laguna jan ne, vixuya cahntsua barcu, hisca meje tsë rë barcu cojo nandá. ³⁸ Hane Jesús ne, hisca cahnchun barcu jan jiñafë me, tijiña me xcun tsjian sanercu me. Hya xi camá ne, catsingasca cha me, sehe cachja cha cojo me cuitjin:

—Maestro. Xati nihñutacun catasca nuju. ¿Há tsajin mé cuenda nuju ta, meje xtyusehen barcu cojo naja?

³⁹ Hane cavasca rë me ne, cachja me cojo tjo cojo laguna cuitjin:

—Jyuu nechun.

Xi tu cachja me cuatjin ne, casejyu yëjë ni. ⁴⁰ Ngajan xi cachja me cojo rë cha cuitjin:

—¿Mé má cuatjin jemu rcun? ¿Hacujyihí ni xi hisca cjëë cumacjain ndaja nuju ngahan?

⁴¹ Hya xi camá ne, jercu catsacjun camahani cha ladu rë me jan. Hane sehe ngajñi rë cha jan ne, cavisiajmi cha cuitjin:

—¿Yo me xi cuijyihí vi? ta, hisca tjo hisca laguna hndë tsëhë me.

5

Cha tsëhë nandya Gadara xi jiya ra xitsehen

¹ Hya xi camá ne, cafehe Jesús cojo cha ladu rë me ngunda vëhë tsëhë laguna, hiscan ladu rë xuta nandya Gadara.

² Hane xi cavetju me barcu jan, canduva tiña ngu xihin xi hinchá xitsehen xahasen rë, canduva cha tsëhë ngajñi rë tsjun ngajan tahndë. ³ Hacuaaha ha ngajan tacun cahndë cha tahndë. Hacuaaha tjihñu cha xi sejyu cha hisca cojo cadena. ⁴ Jemu cjan rë cha, cjín ndiya camahñu tsja camahñu ntsacu cha cojo cadena, peru tu cavicheya ni cha. Vëhë xi tsajin yo xi cama casahmi cojo cha. ⁵ Catsujyihiya cha nixtin nixten ngajan tahndë cojo ngajñi nguijña cha. Hane cajindayafëcjin ni cha, hacuaaha cavanguihmucjin ni cha yojo rë cha

cojo ndyojo. ⁶ Hane hora xi cavëë cha Jesús ne, cjin sa nduva cha ne, vanga cha quiji cavixcuhnchi cha xcun Jesús xi cjuaharcun cha me. ⁷ Ña cajindayatë cha cachja cha cuitjin:

—¿Mé cuenda nuju tsahan, Jesús, Quihndi rë Nina xi matitjun? Catamaniji rë Nina xi tuhundyun ná.

⁸ Cuatjin cachja cha ta tsëhë xi ha tichja Jesús xi cuetjuxin xitsehen jan tsëhë xahasen rë cha. ⁹ Sehe cavinenguise me ñihi rë cha. Hane cafayangui cha tsëhë me cuitjin:

—Ñihi naha ne, Sindadu Cjín, tsëhë xi jemu cjín ngayin.

¹⁰ Sehe jercu cafehya cha cojo Jesús xi hacuini cjin camaha tsingatju me xitsehen jan tsëhë cahndë vëhë. ¹¹ Jinguyëjë rë xi cuatjin tijima ne, ngajan tiñataha ne, tacun ngu cahndë hiscan chu chinga hinchataha chu tijinë chu.

¹² Hane xitsehen jan ne, ña yuma chja cojo Jesús cachja cuitjin:

—Ningatjun niji hiscan siutaha chinga, xi cuisihin cahntsua xahasen rë chu.

¹³ Hane Jesús ne, johu cachja me. Hane hora xi cavetju xitsehen xahasen rë xihin jan ne, quiji cavisehen cahntsua xahasen rë chinga jan. Sehe yëjë ni chinga jan, xi meje jo mil jan ne, cavanga chu quiji cavetje chu ngu ndetjun tsëhë rcu naxi hane ngajan cavixuya chu ngajñi laguna. Ngajan camiji rë chu, hane cahme chu.

¹⁴ Hane cha xi titsicjén rë chinga jan ne, cavanga cha quiji cha. Casua cha camachaya rë xuta xi siutaha nguñña, cavechu hisca nandya cachja cha. Ngajan xi xuta xi cahndë cjua jan ne, quiji cavutsejen me mé xi camá jan.

¹⁵ Cafehe me hisca tacun Jesús, hane cavëë me cha xi jemu cjín xitsehen caxincha xahasen rë, tacun cha, yaja cha tsjian rë cha, hacuaha ha quihndë tsajin mé má rë cjuatacun rë cha. Hane xuta jan ne, jemu catsacjun me camá. ¹⁶ Hacuaha xuta xi cavëë hacutjin cavatju cha camá hacuaha hacutjin cavatju chinga camá ne, cachja me cojo xuta xi yahnga. ¹⁷ Sehe cavetsihin cachja me cojo Jesús xi catje me tsëhë ladu rë me xi cuicun vi.

¹⁸ Hya xi camá ne, hora xi tivisehen Jesús barcu ne, jercu cafehya cha xi caxincha xitsehen xahasen rë jan xi cjue cha cojo me. ¹⁹ Peru Jesús ne casuaain me cahndë xi cjue cha. Hane cuitjin cachja me cojo cha:

—Tjihin ndya riji. Tjihin tjengui xuta riji, hane tinoje cojo rë me xi Nina ne, camayuma rë me ngaye. Hacuaha tinoje tsëhë cjuandaja xi casahmi me cojo ri.

²⁰ Ha xcun xi cafë cahndë cha cjua xi cachja Jesús ne, sehe cavetju cha quiji cha ladu hiscan xi hmí rë Të Nandya. Hane cavetsihin cha casuacuenda cha cjuandaja xi casahmi Jesús cojo cha. Sehe xuta xi siu cahndë jan ne, jemu quijircun rë me.

Jesús ne, sahmi me xi mandaja na chjuun xi ma rë xahmajni ndiya ndava Jairo

²¹ Xi tu cavuya nga Jesús cojo barcu ladu vihi tsëhë laguna ne, jercu catsë nga xuta hiscan cafehe me tjeheh laguna. ²² Hacuaha cafehe ngu xutaxa rë yungun rë ngu nandya. Cha vëhë ne, Jairo hmí rë cha. Hya xi cavëë cha Jesús ne, quiji cavixcuhnchi cha xcun me. ²³ Sehe jercu cafehya cha favor cojo me. Cuatjin cachja cha:

—Quihndi naha ne, ha tu hora sa xi cueya na. Cuanguen ne, cuisanu ntsun na ne, cojo sa xi cumandaja na, hane cuejña sa na cjuahñu.

²⁴ Xi tu cahndë Jesús cjua rë cha ne, sehe quiji me cojo cha. Hacuaha jemu cjin camahani xuta quiji me hacutjin quiji Jesús. Quiji hnhchun hnhchun me cojo me.

²⁵ Hane ngajñi rë xuta jan ne, jiyajñi ngu chjuun xi ha nduva tejó nu xi hmu rë na tséhë chíhin xahmajni. ²⁶ Hane jemu jyë cjuañihi cavatju na camá ta ha ndasa jemu cjin doctor catsirqui me na, tu mahya catsicjê na tujún rë na ta tsajin mé cavetjucaa. Tu hitsë sa jyë camá chíhin rë na. ²⁷ Xi tu cahndë na cjua tséhë xcusun xi casahmi Jesús ne, quiji tiña na taha ngaxtun me, cavetahatsja na tsjian rë me. ²⁸ Cuatjin casahmi na ta catsingatahacacun na cuitjin: “Sá xi cuetaha ntsa ndastu tsjian rë me ne, cumandaja ngahan.” ²⁹ Hane ngutjen ni caxiya jni xi vixu rë na. Hane hacuaha camachaya rë na ta camandaja na tséhë chíhin xi má rë na. ³⁰ Jesús ne, camachaya rë me xi tjin xa xi casahmi ngahñu rë me. Cavuya me taha ngaxtun me ne, cavutsejen me xuta jan ne, sehe cavinenguise me cuitjin:

—¿Yo xi casatëtsja tsjian naha?

³¹ Sehe ngajan xi cha ladu rë me jan ne, cachja cha cojo me cuitjin:

—¿Hacutjin meje nuju xi cuinújin yo xi casahmi? ta ha chutsujun xutacjin xi ña tisetãtaha me ngayun ndya jan.

³² Sehe cavutsejen nga me xuta tahndee rë me ne, ¿yo xi cuatjin casahmi?

³³ Sehe chjuun xi casahmi jan ne ta ha vëë na hacutjin cavatju na camá ne, ña fatsë na xi catsacjun na camá. Sehe quiji cavixcuhnchi na xcun Jesús, hane cachja na yëjë ni hacutjin xi cjuaquixi. ³⁴ Sehe ngajan xi Jesús ne, cachja me cojo na cuitjin:

—Ha camandaja ngayun ta camacjain nuju. Tjangun cojo cjuasua ta chíhin vë ne, ha quihndë cuyaaïn suaxti nuju.

³⁵ Jinguyëjë rë xi Jesús tichja cuaha me ne, canduva ngujo me tséhë ndava xutaxa rë yungun jan. Hane cuitjin cachja me:

—Ha cahme quihndi nuju. Tahanndyaan sa rë maestru.

³⁶ Peru Jesús ne, handasa cahndë me cjua xi cachja me xi cafehe jan ne, sehe cachja me cojo xutaxa rë yungun jan ta:

—Xi camacjiintacun. Ningatuhuntacun ni xi cumandaja na. —Cuatjin cachja Jesús.

³⁷ Sehe casuaain me cahndë xi cjue yëjë xuta jan. Suva ni cha Pedru, cha Jacobo cojo cha Juan hntsë cha Jacobo, cha vëhë quiji cha cojo me. ³⁸ Xi cafehe me ndava xutaxa rë yungun jan ne, ngajan siu xutacjin xi jihnda me jindaya me ngatsë rë cjuandusin. ³⁹ Hane xi cavisehen Jesús ndihya ne, sehe cachja me cojo xuta jan cuitjin:

—¿Mé má cuatjin va má ngayun chjihndun? Na lihndi vë ne, hacuiin cahme na ta jiñafë na. —Cuatjin cachja me.

⁴⁰ Sehe ngajan xi xuta xi siu jan ne, tu vejnucjëë me tséhë cjua xi cachja Jesús. Sehe ngajan xi Jesús ne, catsitëë me xuta xi siu jan candatsen. Hane suva ni nahmi rë nima quihndi cojo naa rë cojo cha xi ticojo me cavisehen me cojo hiscan jiña. ⁴¹ Sehe cafaha me tsja nima quihndi jan ne, sehe cachja me cojo cuitjin:

—Talita cumi —cjua xi meje cuichja: Tichjá cojo ri, tsan, tisetjinhngue.

⁴² Xi cafë cachja Jesús cuatjin ne, cavuya cjuahñu rë na lihndi jan hacuaha ngutjen ni cavisatjenhnga na catsujyihya na. Na lihndi jan ne, tejó nu tjin rë na. Hane me xi siu jan ne, jercu quijircun camahani rë me. ⁴³ Hya xi camá ne, jemu cachja camahani Jesús cojo xuta rë na xi tsajin yo cuichja me cojo xcusun jan. Hacuaha cachja me cojo xuta rë na xi sua me xi sinë na.

6

Jesús ne, fi nga me Nazaret

¹ Hya xi cavetju Jesús tséhë Capernaum ne, cavuya cafe me cojo cha ladu rë me nandya Nasaret, hiscan xi camacha me. ² Hya xi cavechu nixtin xi chjahájenda rë ne, cavetsihin cavicuya me xuta ngajan yungun. Hane xutacjin xi tivisiñuju cjuarë Jesús jan ne, jemu quijircun rë me. Sehe cachja me ngañi rë me cuitjin:

—¿Jani cavutaya cha xi cuijyihí vi cjuarë xi tichja cha? Jemu tjin rë cha cjuatacun. Hacuaha jemu yehe cjuarcun sahmi cha. ³ Há hyan गयाan xi cha vihi xi chjineya jan ni, cha xi quihndi rë na María. Hntsë cha ne, hacui cha Jacobo, cha José, cha Judas cojo cha Simón. Hacuaha nandya naja tacun ndava tichja cha.

Hane jemu xti rë xuta jan, tséhë xi ha vëë me Jesús. ⁴ Vëhë xi Jesús ne, cachja me cojo xuta jan cuitjin:

—Xuta ne, ha tuxa faharcun me ngu xihin xi suacuenda cjuarë Nina. Suva ni xuta rë xihin jan cojo xuta xi tangun nangui rë cojo, me vëhë xi faharcuaain me xihin jan.

⁵ Ngajan ne, hacuiin cjin cjuarcun casahmi me, tséhë xi macjaain rë xuta me. Tu cavisanetsja ni me ngujo xuta hmu rë, hane camandaja xuta hmu rë jan. ⁶ Hane Jesús ne quijircun rë me ta, tséhë xi xuta jan ne, cuatjin camacaain rë me. Hane sehe quiji catsujyihya Jesús nandya tahndee rë jan, cavicuya me xuta.

Jesús ne, tsingatju me cha ladu rë me xi sua cha machaya rë xuta tséhë gobiernu rë Nina

⁷ Sehe casahmitangun me cha xi tejó jan hane cavetsihin catsingatju me jo jo cha jima ngu ladu. Hacuaha casua me cha ngahñu xi cuma cuaxëxin cha xitsehen. ⁸ Hacuaha cachja me cojo yëjë ni cha xi tsajin mé xi cjuaha cha xi cjue cha. Suva ni ngu ya xi cuisecoo rë cha. Hacuiin niñu ne, hacuiin morra, hacuiin xi tujún. ⁹ Chuxinxté ni catincha ntsacu cha. Hacuaha cuaaín cha chingá. ¹⁰ Ngajan xi cachja me cojo yëjë ni cha cuitjin:

—Hya xi cjuhun ngu ndihya ne, xi cuisuhun ne, ha ngajan ni tinechun nguixun nguixun ni hisca xi cuetjun tséhë nandya hiscan xi casatë nuju. ¹¹ Tuyani ni xi tsingatiin nuju me hacuaha hisca cuisiniñiji me tsujun ne, tetjun tséhë ngajan ne, titsunu chojo rë ntsacu. Vëhë cuma ngu seña tséhë jyë rë me.

¹² Xi cajnetaha cachja Jesús cuatjin ne, sehe cavetju cha quiji cha hiscan xi casatë rë cha. Cachja cha cojo xuta xi tsindeya me cjuatacun rë me.

¹³ Hacuaha jemu cjin xitsehen cavaxëxin cha. Hane xuta hmu rë ne, aceite tséhë tuxine xi hmí olivu catsufë cha xten me hane camandaja me jan.

Cjuaveya rë Juan Vitenda rë Xuta

¹⁴ Me xi matitjun xi hmí rë Herodes ne, cahndë me cjuarë tséhë Jesús, tséhë xi xuta ne, jercu cachja me tséhë Jesús. Hane ngujo me ne, cuitjin cachja me:

—Nima Juan, cha xi cavitenda rë xuta ne, ha ndasa cahme cha, peru cavascaya rë cha. Vëhë xi ma sahmi cha cjuarcun.

¹⁵ Hane ngujo nga me ne, cachja me ta Jesús ne, hacui rë Elías, ngu xutachanga xi casuacuenda cjuarë Nina hatsëë. Hane cachja sa yahnga me ta Jesús ne, hacui rë ngu profeta, sacuaaha me xi casuacuenda xutachanga xi caviyuju titjun. ¹⁶ Peru Herodes ne, hya xi cahndë me cjuarë vëhë ne, sehe cachja me ta:

—Nima Juan má me. Catsingátju catisun rë rcu cha, hane cavuya rë cjuahñu rë cha. —Cuatjin cachja Herodes.

¹⁷ Herodes ne, ha catsingatju me cachjaha rë cha Juan xi cjue cha ndavaya. Cuatjin casahmi me ngatsë rë na Herodía. Na vëhë cafaha Herodes, camá chjuun rë me ha ndasa xi ha chjuun rë cha Felipe hntsëjñu me má na. ¹⁸ Hane ngatsë rë vëhë, cuitjin cachja cha Juan cojo rë me:

—Chja ley ta ndajintjin camahani xi chjahan chjuun rë xingueen. Vëhë xi ngayun ne, ndajintjin xi cuatjin canihñu. —Cuatjin cachja cha Juan.

¹⁹ Ngajan xi na Herodía ne, caveyacacun na cavutsejen na cha Juan. Hane meje rë na xi cueya cha. Peru camaji ta tsëhë xi ²⁰ Herodes ne, cafarharcun me cha, tsëhë xi vëë me ta Juan ne, ngu xihin xi tyjahi cjuatacun rë cha, hane cavëjña cha tsëhë Nina. Hane vëhë xi casahmi me cha cuidadu. Hacuaaha hya xi Herodes cavisiñuju me cjuarë cha Juan ne, jercu cachuya rë me ha ndasa casecjan cjuatacun rë me. ²¹ Peru casacu rë na Herodía cahndë tsëhë xi meje rë na hya xi cavechu nixtin tsëhë suhi rë Herodes. Hya cachja Herodes cojo ngujo xutaxa rë ndihyavasen cojo me xi matitjun tsëhë sindadu, cojo sa ngujo xuta changá xi matitjun tsëhë distritu Galilea, xi cjue me ta casehenchjine ngu comida tsëhë suhi rë me. ²² Hane hora xi tijinë me ne, cavisehen na quihndi rë na Herodía, catë na. Hane jercu cachuya rë Herodes cojo me xi yahnga jan hacutjin catë na. Sehe ngajan xi Herodes, me xi matitjun jan ne, cachja me cojo na cuitjin:

—Tu mé ni xi meje ri ne, chjahye ná, hane suá ri. ²³ Vëë Nina jain ta suá ri hisca vasentjin nandya xi siu ntsa. —Cuatjin cachja me.

²⁴ Xi tu cavetju na quiji na hiscan tacun naa rë na ne, cavinenguise na cuitjin:

—¿Mé xi ndatjin cjuéhya rë me?

Sehe ngajan xi chja naa rë na ta:

—Chjaye rcu cha Juan, cha xi vitenda rë xuta. —Cuatjin cavinchangui naa rë na na.

²⁵ Xi tu cavuya cavisehen na hiscan tacun Herodes ne, ngajan xi cachja na cuitjin:

—Meje ná xi ngutjen ni ne, cahntsua ngu tyuva ne tuhun ná rcu cha Juan. —Cuatjin cachja na quihndi jan.

²⁶ Ngajan xi Herodes ne, jemu choho camá rë me peru tsëhë xi hisca Nina caveyanangui me xi casua me cjuarë me, hacuaaha tsëhë xi yëjë ni amigu rë me cahndë me cjuarë jan, vëhë sahmi xi má sava rë me tsindeya me cjuarë me cojo na. ²⁷ Ngajan xi Herodes ne, ngutjen catsingatju me ngu sindadu hiscan jiya cha Juan. Hacuaaha cavitexa me xi cuinduva cojo cha rcu cha Juan. Sehe ngajan xi cha sindadu jan ne, quiji cha ndavaya, cavatësun cha rcu cha Juan. ²⁸ Sehe caveya cha cahntsua tyuva, quijicojo cha. Xi cafehe cha cojo ne, casua cha na quihndi rë na Herodía. Hane sehe casua na naa rë na. ²⁹ Sehe hya xi cahndë cha ladu rë cha Juan tsëhë mé xi cavatju cha cama ne, sehe quiji cha cafaha cha nima caveyaniji cha.

Jesús ne, tsicjen me hñu mil xihin

³⁰ Hya xi cajnetaha catsujyihya cha apóstol xi catsingatju Jesús jan ne, cavuya camatangun nga cha cojo me. Sehe cachja cha hacutjin casahmi cha hacuaaha hacutjin cavicuya cha. ³¹ Sehe ngajan xi Jesús ne, cachja me cojo cha cuitjin:

—Nduvun suvun ni ne, cuanguen hiscan xín, chjahanjeyan hitsë.

Cuatjin meje cjue cjuahajeya me ta tsëhë xi jemu cjín xuta xi cjui nduva me hiscan tacun Jesús. Hisca maxatiin jinë me niñu. ³² Sehe quiji me cojo cha ladu rë me cojo barcu ngajan hiscan xín. ³³ Hane xuta jan ne, cavëë me xi cjui me cojo cha ladu rë me. Hacuaha vëë me xi hacui Jesús. Sehe xuta tsëhë nandya tahndee jan ne, cavanga me quiji me taha vëhë. Hisca tjun sa me cafehe me, sehe cafehe Jesús cojo cha ladu rë me. ³⁴ Xi tu cavetju Jesús tsëhë barcu jan ne, cavëë me xi jemu cjín xuta siu me. Hane camayuma rë me xuta jan ta tsëhë xi siu me sacuaaha chu tsánga xi tsajin yo xi cjuahacuenda rë chu. Sehe cavetsihin cavicuaya me xuta jan, jemu cjín cjuacavicuaya me. ³⁵ Hya xi ha quiji hora jan ne, ngajan xi cachja cha ladu rë me cojo me ta:

—Nguehe ne jemu xín camahani. Hacuaha jemu quiji hora. ³⁶ Ninguijnutuhun cjuacojo xutacjín vi cojo sa xi catji me nandya xi siu tiñataha, hane catatsë me xi sinë me. —Cuatjin cachja cha.

³⁷ Hane cuitjin cafayangui Jesús:

—Tuhun ngayun xi sinë me.

Sehe ngajan xi cachja cha ladu rë me cuitjin:

—¿Hacutjin sacú niji xi sinë me xi cuarcu cjín me? Xi cuatjin cjín pan chihin ne, meje miji chji rë jo cientu mosu. —Cuatjin cachja cha.

³⁸ Sehe cachja Jesús cuitjin:

—Tangun chutsujun ¿há cjín pan tjín ngajñi nuju ngayujun ni?

Xi tu cavëë cha há cjín pan tjín ra ne, sehe cachja cha cojo me cuitjin:

—Hñú pan, cojo jo ti má.

³⁹ Sehe ngajan xi cachja Jesús cojo cha ta catichja cha cojo xuta, catiyuju me xcun ndiji, ngujo ngujo me ngu ngu cahndë. ⁴⁰ Hane caviyuju me ngu cientu me ngu cahndë, o vasen cientu ngu cahndë hisca xi café yëjë me caviyujuchihin me. ⁴¹ Sehe Jesús ne, cafaha me xi hñu pan cojo jo ti jan, cavutsejenniji me ngahnga ne, casua me nacuechji rë Nina, sehe cavotoho langa me pan jan. Hane casua me cha ladu rë me xi sua cha sinë xuta. Hacuaha cojo catsijo ti jan cavatëcja Jesús xi sinë xuta. ⁴² Jercu caxuva pan cojo ti jan. Hane yëjë ni me cajinë me hacutjin xi cachuya rë xahasen rë me. ⁴³ Xi cavatju cajinë xuta jan ne, sehe cafaya cha pan cojo ti xi cafiin jan ne, hane catsinguitsë cha tejó chajne cojo. ⁴⁴ Me xi cajinë pan jan ne, hñu mil má me xi xihin. Hacuaha xin má yachjin cojo langa xi cajinë me.

Jesús ne, fi ntsacu me xcun ndachacun

⁴⁵ Ngajan xi Jesús ne, catsingatju me cha ladu rë me cojo barcu jan xi cjue títjun ni cha ngunda vëhë, hiscan nandya Betsaida, jinguyëjë rë xi tsinguijnetaha me cjuacojo xuta. ⁴⁶ Hya xi camá catsinguijnetaha me cjuajan, sehe camiji me ngu ndetjún xi cuisiajmi me cojo Nina. ⁴⁷ Hane hora xi camá nguixun ne, barcu jan ne, vasencja laguna cjui. Hane Jesús ne, tacun suva cuaha me nangui quixí. ⁴⁸ Hacuaha cavutsejen me ta jemu chja tivatju cha xi cjui cha cojo barcu, tsëhë xi tjo ne, taha hiscan cjui cha ne, ngajan nduva. Hane xi tiña sahasen ne, camatiña Jesús tsëhë cha, cjui me xcun nandan. Hane cuatjin cjui me sacuaaha xi meje cuatjutaha me cha. ⁴⁹ Xi tu cavëë cha xi cjui me xcun nandan ne, catsingatahacacun cha ta nima xi meje cuincharcun rë cha. Hane jercu cajindayatë cha, ⁵⁰ tsëhë xi catsacjun cha xi cavëë cha me. Hane ngutjen ni cachja Jesús cojo cha cuitjin:

—Xi carcuun.

⁵¹ Hane sehe cavisehen Jesús barcu hiscan siu cha. Hora vëhë ne, casejyu tjo. Ngajan xi jemu quijircun camahani rë cha ta, ⁵² ha ndasa cavëë cha

cjuarcun xi casahmi Jesús cojo pan jan ne, peru cajni rcu cha, tsëhë xi vechiin cjuatacun rë cha.

Jesús ne, sahmi me xi mandaja xuta xi hmu rë tsëhë nandya Genesaret

⁵³ Xi quiji sa me cojo barcu ne, cafehe me tjehen laguna, tiña nandya xi hmí Genesaret. Hane ngajan catsihñu me barcu. ⁵⁴ Hya xi cavetju Jesús tsëhë barcu ne, cavëë xuta ta hacui Jesús. ⁵⁵ Hane xuta jan ne, marcu macjain quiji me yëjë ni ladu tsëhë nandya jan, xi quiji jaha me xuta hmu rë, caviyuju me xcun Jesús. ⁵⁶ Hane tuyani ni xi quiji Jesús, há nandya langa ne, há nandya hñu, o há xi ranchun, caviyuju me xuta hmu rë hiscan ndetsin. Sehe cafehya me cojo Jesús xi ndastu satëtaha xuta hmu rë jan tsjian rë Jesús. Hane yëjë ni xuta hmu rë xi casatë tsjian rë Jesús ne, camandaja me.

7

Jesús ne, chjataha me cha fariseo

¹ Ngujo cha tsëhë partidu fariseo cojo ngujo cha maestru tsëhë ley ne canduva cha tsëhë nandya Jerusalén quiji cha ngajan hiscan tacun Jesús, ngajan camatangun cha. ² Xi cafehe cha ngajan ne, cavëë cha xi ngujo cha ladu rë Jesús ne tjin sa jyë rë tsja cha ne, tijinë cha niñu ta cavanii cha tsja cha. ³ Hane cachuyiin rë cha ta tsëhë xi ngayëjë ni xuta nangui niji ne, sahmi nguyjë xi cuane me tsja me sehe sinë me niñu. Yaha me xcusun rë xutachanga niji. ⁴ Hacuaha hisca sa xi fehe me xi fi me ndetsin ne, sá xi cjëë cuane me tsja me ne, sinii me niñu. Hacuaha jemu cjín sa xcusun rë xutachanga niji xi yaha me ta sacuaha xi ha tyjahi trasti ne, cuane nga me. Hacuaha cuanitjin sahmi me cojo nachan. ⁵ Ngajan xi cha tsëhë partidu fariseo cojo cha maestru tsëhë ley ne, cachja cha cojo Jesús cuitjin:

—¿Mé má cuatjin sahmiichin cha ladu nuju ley rë xutachanga naja? ta, tsëhë xi vanii cha tsja cha xi jinë cha niñu.

⁶ Ngajan xi cafayangui Jesús cuitjin:

—Ngayun ne, jo xcun jo ntsuvun yun. Jemu quixi cjua xi catsihindu Isaías tsujun xcun xujun rë me sacuatjin cachja Nina xi xuta ne, jemu ndacha me. Cuitjin fi cjua jan:

Xuta xi cuicun vi ne, ndaja chja me tsahan, peru xi cojo xahasen rë me ne, hisca tsinguitsjiin me ngahan.

⁷ Tu mahya xi faharcun ná me ta

xi vicuya xicjin me ne, hacuiin cjua naha cuicuya me ta, tu cjua rë xuta.

⁸ Cuanitjin ngayun ta nismutacun cjua rë Nina, hane hitsë sa tivetuhuncun xcusun rë xutachanga naja.

⁹ Cachja sa me cuitjin:

—Xi má nuju ne, jemu ndatjin casacuse nuju hacutjin vejñuxun cjua rë Nina cojo sa xi nihñuchuhun xcusun rë xutachanga naja. ¹⁰ Moisés ne, cuitjin catsihindu me hacutjin xi cachja Nina xi nihña ngayaan xuta rë me: “Chjuhuncun ná nuju, chjuhuncun nahmi nuju”, hacuaha: “Yo xi choho chja tsëhë xutacha rë ne, xuta ne tsiquehen rë.” ¹¹ Peru ngayun ne, cjuatacun rë xutachanga naja vicuyun ta, nújun ta ngu cha ne cuma cuichja cha cojo xutacha rë cha cuitjin: “Ha quihndë cumaji cuisecoo nuju ta yëjë ni xcusun xi tjin ná ne, ha cavejñá tsja Nina.” ¹² Hane xi cuatjin cuichja cha ne, ha quihndë sahmi nguyjë xu xi cuisecoo cha xutacha rë cha. ¹³ Xi cuatjin ne, ha camachjiriin nuju cjua rë Nina ta, nihñu sacuaha xcusun rë xutachanga

naja, hacuaha vicuyun rë jingu sa. Hacuaha cjin sa xcusun ndacha sacuaha vëhë nihñu. —Cuatjin cachja Jesús cojo maestru jan.

¹⁴Hacuaha cajindaya Jesús xuta xi cumatangun me. Hya xi camá ne cuitjin cachja me cojo:

—Ngayujun ngarcun ni ne, tinuhyun cjua xi cuichjá vi. ¹⁵Xcusun xi vixuya cahntsua xuta ne, hacuiin vëhë tsitsehen rë me ta, cjuatacun xi nduva rë me ne, vëhë tsitsehen rë me. ¹⁶Jarë ngayun xi meje nuju xi cumá nuju ne, tetuhunrcun.

¹⁷Xi cavatju cachja me vëhë ne, caviyuju xuta ngajan ne, sehe cavisehen me cojo cha ladu rë me cahntsua ndihya. Ngajan xi cha ladu rë me ne, cavinenguise cha me tsëhë cjua vëhë. ¹⁸Ngajan xi cachja me cuitjin:

—¿Há hisca ngayun cajni rrun cjua xi cachjá ni? Nguehe cuichjá cojo nuju mé vijne cjua vëhë. Cuma xinë yëjë xcusun comida ta tsajin ngu xcusun xi jinë xuta xi cuma tsitsehen rë me ¹⁹ta xi sinë me ne, hacuiin cahntsua xahasen rë me cjuu ta cahntsua me. Fi ne vetjutaha ndatsen.

²⁰Hacuaha cachja sa Jesús cuitjin:

—Cjuatacun xi nduva tsëhë xahasen rë xuta ne, vëhë tsitsehen rë me ta, ²¹tsëhë xi xi nduva tsëhë xahasen rë me ne, cjuatacun tsehen, sacuaha yachjin xi viteña yojo rë, sacuaha jyë tsëhë xi sahmi me chjuunnahñu rë me jingu sa chjuun, cojo cjuachëjë, cojo xi tsiquehen xicjin, ²²cojo xi jercu meje rë me cjuanchina, cojo xi sahmi me cjuatsehen, sahmi me cjuandacha, choho sahmi me, tjin rë me cjuaxin, sahmi me cjuachjataha, tjin rë me cjuaxihin, sahmi me cjuangarca. ²³Yëjë cjuatsehen xi cuacun vëhë ne, nduva tsëhë xahasen rë xuta, hane vëhë tsitsehen rë me.

Ngu chjuun xi xutaxin má na ne, camacjain ran Jesús

²⁴Xi cavetju me tsëhë distritu Galilea, cafe me ladu tsëhë nandya Tiro cojo nandya Sidón. Xi cafehe me ngajan ne, cavisehen me cahntsua ngu ndihya, tsëhë xi mijí rë me xi scuëë xuta xi cafehe me. Peru camaji cavejñahma me. ²⁵Xi cafehe Jesús ngajan ne, ngutjen camachaya rë naa rë ngu na xi jiya xitsehen cahntsua xahasen rë na. Hane quiji na cavixcuhnchi na xcun Jesús xi cjuaharcun na me. ²⁶Na vëhë jan ne, xutaxin na, na ladu tsëhë distritu Sirofenisia, hacuiin na xuta tjë rë Israel. Hane cafehya na cojo Jesús xi cuaxë me xitsehen xi jiya cahntsua xahasen rë na quihndí rë na. ²⁷Hane xi cafayangui Jesús tsëhë na jan ne, cuitjin cachja me ngu ejemplu cojo rë na.

—Sechiye ni, catjinetaha catjinë nixti ta hacuiin ndatjin xi chjahatahan niñu tsëhë nixti hane sehe tahan rë naña.

²⁸Ngajan xi naa rë na hmu rë jan ne, cuitjin cajnercu na xi tichja me tsëhë xuta tjë rë Israel cojo xutaxin. Hane cafayangui na cuitjin:

—Nai. Quixi xi nújun, peru naña xi siu ngahma maxë ne, sacu xi vixuhya hntsua nixti, sehe jinë chu.

²⁹Hane sehe cachja Jesús cojo rë na cuitjin:

—Ndatjin xi canoje. Quihndë ta cuatjin ne, cuma cjuihin ta xitsehen xi caseya cahntsua xahasen rë na quihndí riji ne, ha cavetjuxin.

³⁰Xi cavuya cafe na ndava na ne, quihndí rë na ne, ha jyuu jiña na hacuaha xitsehen xi caseya cahntsua xahasen rë na, ha cavetjuxin.

Jesús ne, sahmi me xi mandaja ngu cha xi loho hacuaha lihmi cha

³¹Sehe cavetju Jesús ladu tsëhë nandya Tiro, cavatju me nandya Sidón cojo ladu xi hmí Të Nandya, vëhë cafehe me laguna tsëhë Galilea. ³²Hane cafehecojo nga xuta ngu cha xi loho hacuaha lihmi cha. Hane cafehya xuta jan cojo Jesús xi cuetahatsja me cha, sehe cumandaja cha. ³³Ngajan xi Jesús

ne cavaxëxin me cha tsêhë ngajñi rë xuta ne, sehe caviyujutaha me rcu tsja me ngu ngu ladu ngojo tyjavañuju cha. Hane hacuaha cavêhënatya me rcu tsja me sehe cavetaha me neje cha. ³⁴ Hya xi camá ne, cavutsejenniji me ngahnga hane cafêcacun me. Sehe cachja me cuitjin:

—¡Efata! —cjuá xi meje cuichja: ¡Nuxuhunyun!

³⁵ Hane xi tu cachja me cuatjin ne, catuxaha tyjavañuju cha xi loho. Hacuaha hora vëhë ni ne, camá ndandaja cachja cha. ³⁶ Sehe ngajan xi cachja Jesús cojo xuta xi tsajin yo cuichja cojo me xcusun vëhë. Peru xuta jan ne, hitsë sa jercu cachjatë me tsêhë xcusun xi casahmi Jesús. ³⁷ Jercu qujircun camahani rë xuta. Cuitjin cachja me:

—Tu mé xcusun ni jercu ndaja sahmi Jesús. Xuta xi loho ne, vihndë sahmi me, hacuaha xuta xi lihmi ne, sahmi me xi ma chja.

8

Jesús ne, tsicjen me ñuju mil xihin

¹ Nixtin hya ne, hacuaha jercu cjín xuta siu me hisca tacun Jesús. Hane tsêhë xi tsajin camahani mé xi sinë me ngajan ne, vëhë xi Jesús ne, cajindaya me cha ladu rë me, sehe cachja me cojo cha cuitjin:

² —Jemu yuma má ná xutacjín vi ta ha quihndë jyan nixtin hinchataha me cojo naja, hane ha quihndë tsajin camahani mé xi sinë me. ³ Sá xi tsingátju me cjue me xi cjëë sinë me niñu ne, cjuaha rë me hinda ndiya. Ngujo xuta xi cuicun vi ne, jemu cjín canduva me. —Cuatjin cachja me.

⁴ Sehe ngajan xi cha ladu rë me ne, cafayangui cha tsêhë me cuitjin:

—¿Jani cuma sacú naja xi sinë xuta vi ta nguehe ne, jemu xín camahani tsêhë nandya?

⁵ Ngajan xi cavinenguise Jesús cojo cha cuitjin:

—¿Há cjín pan tjín nuju?

Ngajan xi chja cha ta:

—Yatu má.

⁶ Ngajan xi Jesús ne, cavitexa me xutacjín jan xi cuiyuju me nangui. Xi cafê xuta caviyuju me nangui ne, sehe cafaha Jesús pan jan sehe casua me nacuechji rë Nina. Hane cavotoho langa me pan jan, casua me cha ladu rë me xi cuiyuju cha sinë xutacjín jan. Hane cuatjin casahmi cha. ⁷ Hacuaha tjín ra ngujo ti. Hane Jesús ne casua me nacuechji rë Nina tsêhë ti jan, hane sehe cachja me cojo cha ladu rë me xi sua cojo ti jan sinë xuta. ⁸ Xi camá cajinë xuta jan ne, jemu ndaja camá rë xahasen rë me. Hane xi cafaya cha ladu rë Jesús xi cavangui cajinë xuta jan ne, catsë yatu nisinya. ⁹ Xuta jan ne, sacuaha chuva rë ñuju mil má me. ¹⁰ Hane hisca xi cajnetaha cjuandaja vëhë ne, sehe catsingatju Jesús xuta, cafe xuta ndava me. Hya xi camá ne, cavisehen me barcu cojo cha ladu rë me, hane cavuya me ngunda vihi taha ladu rë hiscan xi hmí rë Dalmanuta.

Cha fariseo ne, fehya cha seña

¹¹ Xi cafehe me ngajan ne, hacuaha cafehe cha tsêhë partidu fariseo. Hane cavetsihin cha cavisiajmi cha cojo Jesús ta meje cjuahachuva cha me. Cafehya cha cojo rë me xi tsingacun me ngu cjuarcun xi nduva ngahnga, cojo sa xi scuëë cha xi Nina catsingatju jain rë me. ¹² Ngajan xi Jesús ne, cojo cjuachohotacun ne, cachja me cojo cha cuitjin:

—¿Mé má cuatjin chjahyun xi sahme ngu cjuarcun xi nduva ngahnga? Cuichjá quixë cojo nuju ta hisca ngu xcusun vëhë ne, sahmeë xi xcun cojo xcun.

¹³ Ngajan xi caviyuju me cha xi cuacun jan ne, cavisehen me barcu cojo cha ladu rë me. Hane sehe cavuya quiji me ngunda vëhë tsëhë laguna.

Xcusun rë cha fariseo ne, visehetë cjuatacun rë xuta sacuaaha sahmi san rë pan

¹⁴ Peru cha ladu rë me ne, cachaya rë cha xi cjuaha cha pan, hane cahntsua barcu ne, ngu tutu sa pan jiya ndaja. ¹⁵ Sehe ngajan xi chja Jesús cojo cha cuitjin:

—Nechun cuidadu cojo san rë pan tsëhë cha tsëhë partidu fariseo cojo cha ladu rë Herodes.

¹⁶ Sehe ngajan xi cavisajmicijn cha ngajñi rë cha cuitjin:

—¿Há tsëhë xi tsajin naja pan ne, há tsëhë vëhë xi cuatjin chja me?

¹⁷ Xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—¿Mé má cuatjin nújun xi tsajin pan? ¿Há nuhyuun? ¿Há vijinii rcun? ¿Há jemu taja rcun? ¹⁸ Tjin nuju túxcun hacuaaha tjin tyjavañuju. ¿Mé má matsijin nuju? hacuaaha ¿mé má nuhyuun? ¿Há vitsjiin nuju? ¹⁹ Hya xi cavótoho langa hñú pan ngajñi rë xi hñú mil xuta, ¿há cjín chajne sa quitsë cachjayun tsëhë pan xi cavangui jan? —Cuatjin cavinenguisse me.

Ngajan xi cafayangui cha ladu rë me ta:

—Tejó.

²⁰ —Hane hya xi cavótoho langa yatu pan jan xi cajinë ñuju mil xuta, ¿ha cjín nisinya sa cavangui?

Ngajan xi cha ladu rë me ne, cuitjin cachja nga cha:

—Yatu.

²¹ Ngajan xi cavinenguisse Jesús cojo cha cuitjin:

—¿Há cjëë camahani cuijne rcun cjua xi cachjá tsëhë san rë pan?

Jesús ne, sahmi xi cumatsejen rë ngu cha rcá ngajan nandya Betsaida

²² Hya xi camá ne, cavechu barcu tjeheh laguna. Hane xi cavitujne me barcu ne, cafehe me nandya xi hmí Betsaida. Xi cafehe me ngajan ne, cafehe nga xuta cojo ngu cha xi rcá. Hane jercu cachja xuta jan cojo Jesús xi cuetahatsja me cha, hane sehe cumatsejen rë cha. ²³ Hya xi camá ne, cafaha me tsja cha hane quijicojo me cha ngajan tjeheh nandya. Xi cafehe me cojo cha ngajan ne, cavëhë natya me tuxcun cha hacuaaha cavetahatsja me tuxcun cha, sehe cavinenguisse me cha cuitjin:

—¿Há tsejen ri hitsë quihndë?

²⁴ Xi catsiquijin cha xcun cha cavutsejen cha ne, chja cha ta:

—Vutsejen xuta. Peru sacuaaha tsejen ya, cuatjin tsejen me xi cjui me.

²⁵ Ngajan xi Jesús ne, cavetahatsja nga me tuxcun cha. Sehe casahmi cha nguyë cavutsejen ndaja cha, hane camandaja cha, camatsejen ndaja rë cha. Hane sehe catsingatju me cha cafe cha ndava cha. ²⁶ Hacuaaha cachja me cojo cha cuitjin:

—Xi caviisiin ngajñi nandya xi cuinoje cojo xuta jan xcusun xi casahme cojo ri.

Pedru ne, tsinguixi me xi Jesús ne, me vëhë xi Mesías me

²⁷ Hya xi camá ne, cavetju nga Jesús tsëhë ngajan cojo cha ladu rë me ne, quiji me ngujo nandya xi siu tahndee rë nandya xi hmí Cesarea Felipe. Hane ndiya jiya me cojo cha ne, cavinenguisse me cha cuitjin:

—¿Mé chja xuta, yo ngahan? —Cuatjin cachja me.

²⁸ Ngajan xi cafayangui cha ladu rë me cuitjin:

—Ngujo me ne, chja me ta ngayun xi cha Juan ngayun, cha xi cavitenda rë xuta. Ngujo nga me ne, chja me ta Elías. Hane ngujo nga me ne, chja me ta ngu profeta xi suacuenda cjua rë Nina. —Cuatjin cafayangui cha.

²⁹ Ngajan xi cachja nga Jesús cojo cha ta:

—Hane ngayun ne, ¿mé nújun? ¿Yo ngahan?

Ngajan xi cha Pedru ne, cuitjin cafayangui cha:

—Ngayun xi tjin cjua xi tsingatju nuju Nina. Ngayun xi Cristu.

³⁰ Ngajan xi Jesús ne, cavitexa me cha ta tsajin yo xi cuichja cha cojo tséhë.

Chja Jesucristu xi cueya me

³¹ Hya xi camá ne, cavetsihin cavicuya me cha tséhë xi ha ndasa xi Cristu, Quihndi rë Xuta Jain má me ne, peru jemu cjin cjuañihi cuatju me cumá ta tsingatiin xuta changá me, hacuaha tsiquehen xuta changá jan me, peru xi cjuë jyan nixtin ne, cuya nga me cjuahñu. ³² Cjua vëhë ne cachja quixi camahani me cojo cha. Ngajan xi cha Pedru ne, quijixin cha cojo Jesús. Sehe cavetsihin cachja cha cojo me xi ¿mé má cuatjin chja me? ³³ Ngajan xi cavuya Jesús cavutsejen me hiscan siu cha ladu rë me. Sehe cachja me cojo cha Pedru cuitjin:

—Tihinxin ngaye Satanás, tséhë xi ningatiintacuin ngaye sacuaha tsingatahacacun Nina ta, ningatehetacuin sacuaha ngu xuta.

Hacutjin xi meje rë xi nihña xa cojo cjuahñu naja

³⁴ Ngajan xi Jesús ne, cajindaya me xutacjin jan cojo cha ladu rë me xi cuinduva me hiscan tacun Jesús, sehe cachja me cuitjin:

—Sá xi tjin yo xi meje cuisehen ladu naha ne, meje rë xi nichuvun cjuatacun nuju, hane hacuaha tejñuhñu xahasen nuju xi cuanguncujun ndiya naha handasa xi cueyun xcun cru. ³⁵ Yo ngayun xi mijí cuisuhun ladu naha tséhë xi rcun xi cueyun ne, cahndé xi ndaja ne, nichujun xahasen nuju. Peru yo ngayun xi ngatsé naha o sá xi ngatsé rë cjua rë Nina cueyun ne, hacuiin nichujun xahasen nuju ta Nina ne, cuaxëtje me. ³⁶ Mé ndaja cuma nuju xi sacu nuju yëjë xi tjin ngasunhndé, sá xi cueyun hane cuma nuju castigu, ³⁷ ta sá xi cuaxintiin Nina xahasen nuju hya xi cueyun ne, ha quihndé tsajin rqui rë. ³⁸ Yo ngayun xi ma sava nuju ngatsé naha o sá xi ngatsé rë cjua naha nguehe xcun xuta tsehen xi manguaaincacun cojo cjua rë Nina ne, hacuaha cojo ngahan xi canduvá tséhë Nina ne, cuma sava ná ngahan ngatsé nuju ngayun, hya xi cuinduvá cojo cjuandajyihí tséhë nahmi naha ne, hacuaha cojo ángel xi vejña tséhë Nina cuinduvá cojo.

9

¹ Hacuaha cachja sa Jesús cuitjin:

—Cuichjá quixë cojo nuju ta tecjan yahnga xuta nguehe xi hisca xi scuëë me xi cuitexa jain Nina ne, sehe cueya me.

Cavindeya xcusun rë Jesús

² Xi café jyun nixtin jan ne, quijixin Jesús ngu rcu naxi hnga cojo cha Pedru cojo cha Jacobo cojo cha Juan. Xi cafehe me cojo cha ngajan ne, cavëë cha xi cavindeya xcusun rë me. ³ Tsjian rë me ne, ña seti tsejen, tséhë xi jercu tu tyava camahani, hisca xi ngu xuta cumaji cuane me xi cuatjin tyava. ⁴ Hya xi camá ne, ha tu ñahñu camatsejen hasen rë Elías cojo hasen rë nima Moisés, tivisajmi cojo Jesús. ⁵ Ngajan xi cachja cha Pedru cojo Jesús ta:

—Maestro, tu ma rë xi nguehe nechin cojo nuju ne, nihñi jyan puestu: ngu tsujun ne, cojo ngu ngu tséhë Moisés cojo Elías.

⁶ Cuatjin cachja cha Pedru ta, sacuiyniin rë cha mé sa cuichja cha ta tsëhé xi jercu catsacjun camahani cha camá. ⁷ Hora vëhé ne, canduva ngu yufi casahmi tjahnguen rë. Hane ngajñi rë yufi jan ne, canuhya rë ngujo cjua xi cachja cuitjin:

—Cha vihi xi quihndi naha cha. Jercu hmucacun cha. Tinuhyun xi chja cha.

⁸ Xi tu cahndë cha ladu rë Jesús cjua vëhé ne, vutsejen nguehe vutsejen ngajan cha, hane suva sa Jesús tacun me xi cavëë cha.

⁹ Xi tu tivitujne me tsëhé rcu naxi jan cojo cha ladu rë me xi quijicojo me jan ne, ngajan xi chja xu me cojo cha ta tsajin yo xi cuichja cha cojo xcusun xi cavëë cha. Xi cuatju cueya Quihndi rë Xuta Jain ne, cuya nga me cjuahñu, sehe hya cuichja cha. ¹⁰ Vëhé xi cavaha cha cjua jan cahntsua xahasen rë cha. Ngajñi rë ni cha cojo xicjin cha cavisiajmicjin cha ¿mé vijne cjua xi cuya nga me cjuahñu?

¹¹ Ngajan xi cavinenguise cha cojo Jesús cuitjin:

—¿Mé má cuatjin chja maestro tsëhé ley xi titjun Elías cuinduva me, sehe cuinduva me xi cuaxëtje naja?

¹²⁻¹³ Ngajan xi cafayangui Jesús cuitjin:

—Quixi xi Elías cuinduva me titjun ta, me vëhé cuiyujuchihin me yëjë ni xcusun. Peru ha canduva me, handasa hacuiin cojo ñihi rë me ta cojo ñihi rë cha Juan. Hane choho casahmi xuta cojo me sacuatjin chja xujun rë Nina. Hacuaha chja xujun xi cuacun vëhé ta handasa xi Quihndi rë Xuta Jain ngahan ne, hacuanitjin ne jemu jyë cjuañihi cuátju hacuaha tsitjungui xuta ngahan.

Jesús ne, sahmi xi mandaja ngu cha nixti xi jiya ra xitsehen

¹⁴ Xi tu cavuya cafehe Jesús cojo cha xi quijicojo me hiscan siu yahnga cha ladu rë me xi tejó jan ne, cavëë me xi tjercu siu xuta jan cojo ngujo cha maestro tsëhé ley siu me visiajmi me cojo cha. ¹⁵ Xi tu cavëë xuta jan xi cafehe Jesús ne, jemu quijircun rë me, vanga sanii me quiji cachja me nina cojo Jesús. ¹⁶ Ngajan xi Jesús ne, cavinenguise me cojo cha ladu rë me cuitjin:

—¿Mé xi visiajmu cojo xuta xi cuacun vë?

¹⁷ Hane ngajan ngajñi rë xutacjin xi siu jan ne, cavetjújñi ngu me xi cachja me cuitjin:

—Maestro, canduvá cojo quihndi naha, tsëhé xi jiya xitsehen cahntsua xahasen rë cha. Hane tsëhé vëhé xi sahmi lihmi rë cha. ¹⁸ Hora xi faha xitsehen jan cha ne, ngutjen tsiticjahñu rë cha, hacuaha vaxë natyaxu hntsua cha, hisca tsijanerii nehñu cha jiña cha. Hane ngatsë rë vëhé ne, jemu jima ndaya cha. Hacuaha cachjá cojo cha ladu nuju xi cuaxëxin cha xitsehen tsëhé quihndi naha. Peru camaji cavaxëxin cha. —Cuatjin cachja me.

¹⁹ Ngajan xi Jesús ne, cachja me cojo xuta xi siu jan cuitjin:

—¿Mé camá nuju ngayun xi macjaain camahani nuju? ¿Há jyë sa nixtin meje rë xi cuitejña cojo nuju? Nduvun cojo cha nguehe. —Cuatjin cachja me.

²⁰ Hya xi camá ne, cafehe xuta cojo cha hiscan tacun Jesús. Xi tu cavëë xitsehen jan Jesús ne, marcu macjain catsiticja rë cha nixti jan. Hane xi caticja cha ne, cavuya cavindefa cha cafaña cha. Hacuaha cavetju natyaxu hntsua cha. ²¹ Ngajan xi Jesús ne, cavinenguise me cojo nahmi rë cha cuitjin:

—¿Há tsëë xi cuitjin má rë cha?

Ngajan xi chja nahmi rë cha ta:

—Hisca cjuaquihndi rë cha, cuatjin má rë cha. ²² Jiya hora xi faha xitsehen jan cha ne, tsingatjeya rë cha xcun ndacahi. Tjin nga ne, tsingatjenya rë cha ngajñi nandan, ta meje tsiquehen rë cha. Vëhë xi sá xi tsejen xi ha hyun mé nihñu cojo cha ne, catamayuma nuju ngahan cojo quihndi naha, hane tisecon niji.

²³ Ngajan xi cachja Jesús cojo nahmi rë cha ta:

—Há xa vë xi hvë. Sá xi macjain nuju ne, yëjë ni ne, cuma.

²⁴ Ngajan xi nahmi rë cha ne, ngutjen cachja me cuitjin:

—Tatá. Macjain ná. Peru tisecon ná cojo sa xi cumacjain sa ná.

²⁵ Xi vutsejen Jesús xi jercu tijima tangun xuta ne, cacjan me cojo xitsehen jan. Cuitjin cachja me:

—Ngaye xitsehen loho lihmi, tetjixin tsëhë cha vi. Hacuaha ha quihndë cuyiin cuisihin cahntsua xahasen rë cha.

²⁶ Ngajan xi xitsehen jan ne, hisca cajindaya xi catsicuya catsindefa rë cha. Sehe cavetju quiji. Hane cha vëhë ne, jiña cahme cha. ²⁷ Peru Jesús ne, cafaha me tsja cha catsiatjenhnga me cha, hane casecon cha.

²⁸ Hya xi camá ne, quiji Jesús cojo cha ladu rë me, hane cavisehen me cahntsua ndihya. Xi cavisehen me jan ne, sehe ngajan xi chja cha cojo rë me cuitjin:

—¿Mé má ngayin xi camaji canaxinxin xitsehen jan tsëhë cahntsua xahasen rë cha vë?

²⁹ Ngajan xi cachja Jesús cojo cha cuitjin:

—Cuatjin camá nuju ta tsëhë xi xitsehen xi cuacon vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxenxen.

Jesús ne, cachja me ta cueya me peru cuya me cjuahñu

³⁰ Hya xi camá ne, sehe cavetju me quiji me taha distritu Galilea. Hacuaha mijí rë me xi cumachaya rë xuta jani taha tsujyihya me ta, ³¹ tsëhë xi tivicuya me cha ladu rë me hacutjin cuatju me cumá. Cuitjin cavicuya me:

—Ha ndasa tsëhë Nina canduva Quihndi rë Xuta Jain ne, peru cjuaha xuta me ne, tsiquehen me me. Peru xi cjuë xi jyan nixtin ne, cuya nga me cjuahñu.

³² Peru cha ladu rë me ne, vijinii rcu cha tsëhë xi cueya Jesús, hacuaha cuya me cjuahñu. Hacuaha tsacjun cha cuinenguise cha me cjuaja jan.

¿Yo xi hitsë sa matitjun?

³³ Hya xi camá ne, cafehe me nandya Capernaum. Hya xi cafehe me jan ne, cavisehen me cahntsua ndihya hisca cuiyuju me. Sehe ngajan xi cavinenguise me cojo cha ladu rë me mé xi cavisiajmi cha cojo xicjin cha ngajan ndiya. ³⁴ Hane tu jyu ni caviyuju cha ta xi cavisiajmi cha ndiya jan ne, cuitjin cachja cha:

—¿Jarë ngayaan xi hitsë sa venguichji naja?

³⁵ Hya xi camá ne, quiji Jesús cavéjña me. Sehe ngajan xi cajindaya me yëjë tejó cha ladu rë me jan ne, sehe ngajan xi cachja me cojo cha cuitjin:

—Sá xi tjin ngu yun xi meje nuju xi cumatitjun ngayun ne, meje rë xi hacuim jemu jyë nihñu yojo nuju hacuaha cuisecon xingun.

³⁶ Hya xi camá ne, cafaha me ngu lihndi, cavejña me cavasencja, hane sehe cavataha me. Hane ngajan xi cachja me cojo cha cuitjin:

³⁷ —Jarë ngayun xi ndaja nihñu cojo ngu lihndi sacuaha vihi xi ngatsë naha ne, sacuaha xi ngahan ndaja nihñu cojo ná. Hacuaha jarë ngayun xi ndaja nihñu cojo ná ne, hacuim ngahan ni ta, hacuaha cojo Nahmi naha xi catsingatu ná me, cojo me vëhë ndaja nihñu cojo rë me.

Me xi hacuiin condra naja ne, ladu naja má me

³⁸Ngajan xi cachja cha Juan cojo Jesús cuitjin:

—Maestro, cahyín ngu cha xi tujima tivaxéxin xitsehen tséhë xahasen rë xuta, hane xi sahmi cha ne, cojo ñihi nuju veyanangui cha. Peru tséhë xi hacuiin cha ladu naja cha ne, canújin cojo cha ta ha quihndë sahmi cha cuitjin.

³⁹Ngajan xi Jesús ne, cachja me cuitjin:

—Xi cavichecjin tséhë cha ta xuta xi cuma sahmi me cjuandaja vëhë, sacuaaha xi ngahan jain cavitéxa rë me ne, cumaji xi ngutjen choho cuichja me tsahan. ⁴⁰Xuta xi hacuiin choho vëë naja me ne, chuya rë me tsajan.

⁴¹Cuichjá quixë cojo nuju ta yo me xi sua ngu vasu nandá siuhun, tséhë xi vëë me xi xuta ladu naha ngayun, hacuaaha vëë me xi ngahan xi catsingatju ná Nina ne, me vëhë ne, sacu rë me ngu cjuandaja xi sua Nina.

Cjuatsavi xi ticojo rë xi cuixuya ngayaan xcun ngu jyë

⁴²'Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tséhë xuta vëhë xi xtyangui ngu ndyojo natsi nguisin me sehe ningatjeya rë me ngajñi ndachacun. ⁴³Hane sá xi cjuatacun nuju meje rë xi nihñu ngu jyë cojo ntsun ne, vengui sa chji rë xi chandunxun ntsun ta, jemu sa ndaja tsujun xi cuma yoho yun xcun Nina, xi cumá rë xi cuechun xcun xitsehen cojo ntsun ngajñi rë ndihi jyë xi tsajin nixtin hvo. ⁴⁴Ngajan cuinechun, hiscan xi cjuiin nuju cjuañihi ta ndihi ne, tsajin nixtin xi hvo. ⁴⁵Sá xi cjuatacun nuju meje rë xi nihñu ngu jyë jani xi cuangun ne, vengui sa chji rë xi chandunxun ntsacun ta, jemu sa ndaja cuechun xcun Nina xi yoho yun xi cuma rë xi cuechun xcun xitsehen cojo ntsacun. ⁴⁶Ngajan xcun xitsehen vëhë ne, cjuiin nuju cjuañihi ta ndihi ne, tsajin nixtin hvo. ⁴⁷Hacuaha sá xi cjuatacun nuju meje rë xi chutsujun xcusun xi ndajintjin xi chutsujun ne, chuhunxun tuxcun jan chandunxun, ta tséhë xi hitsë sa ndaja tsujun xi sacu nuju cahndë ngajan hiscan sahmi Nina gobiernu handasa cojo ngu ni tuxcun xi cuma rë xi cojo catsijo tuxcun cuechun xcun ndihi xi sahmi castigu rë nima. ⁴⁸Ngajan xcun xitsehen ne, ngajan cjuiin nuju cjuañihi ta ndihi ne, tsajin nixtin hvo.

⁴⁹'Hya xi tsichuva Nina ngayëjë ni xuta há ndaja há ndajin casahmi me ne, me xi tsajin mé casahmi ne, Nina ne, jemu chuya rë me. Hya xi Nina cjuahatsja me ngu cjuatjo xi tahan rë me ne, sá xi cojo naxa sehen ndaja ne, jemu chuya rë me.

⁵⁰'Naxa ne, jemu ndaja. Peru sá xi cjuë xtya rë ne, machjiriin. Cjuandaja rë Nina ne, hacuaaha jemu ndaja. Vëhë xi chjuhun cjuandaja rë Nina, teyun cahntsua xahasen nuju, hacuaaha ndaja tinechun cojo xingun.

10

Jesús ne, fi nga me nandya Nasaret

¹Hya xi camá ne, cavetju Jesús tséhë nandya Capernaum quiji me distritu Judea cojo ngunda ndajyë Jordán. Hacuaha jercu cjín nga xuta quijitjengui rë me. Hane sacuaaha xcusun xi ha sahmi Jesús ne, cavetsihin cavicuya nga me xuta jan. ²Hya xi camá ne, ngujo cha tséhë partidu fariseo ne, quiji cha hiscan tacun Jesús. Vinenguisse cha me tséhë xi ngu xihin, ¿há ndatjin xi tsismi tchuun rë? Cuatjin cachja cha ta tséhë xi meje cjuahachuva cha me cojo cju rë me. ³Ngajan xi cafayangui me tséhë cha cuitjin:

—Moisés ne, xutachanga naja ne, ¿mé cavitexa naja me?

⁴Ngajan xi cafayangui cha tséhë me cuitjin:

—Moisés ne, casua me cahndé xi ngu xihin ne, cuma cuejña cha ngu xujun tsja chjuun rē cha xi ha quihndé mijí rē cha na. Hane xi cuatjin ne, cuma tsismi cha na.

⁵ Sehe ngajan xi Jesús ne, cachja me cojo cha cuitjin:

—Ngatsé rē cjuataja rē xahasen nuju ne, vèhē xi Moisés ne, casua me cahndé xi cuatjin nihñu. ⁶ Peru hya xi casahmi Nina ngasunhndé ne: “Casahmi me xi chjuun xi xihin xuta.” ⁷ “Vèhē xi ngu xihin ne, cuejña cha nahmi rē cha, hacuaha cuejña cha naa rē cha, ⁸ hane cumatangun cha cojo chjuun rē cha sacuaha ngu ni xahasen.” ⁹ Ha quihndé hacuiin jo ta sacuaha xi ngu ni xahasen. Hane tséhē xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tséhē xicjin me. —Cuatjin cachja Jesús.

¹⁰ Ngajan xi hya xi Jesús tacun ndihya me cojo cha ladu rē me ne, cavinen-guise nga cha me ngu ndiya tséhē cjuavisiajmi vèhē. ¹¹ Ngajan xi cachja me cojo cha cuitjin:

—Yo xi tsismi chjuun rē hane cuixan cojo ngu sa chjuun ne, jemu jyé jyé rē xi cuatjin sahmi. ¹² Hacuaha sá xi ngu chjuun tsismi na xihin rē na hane cuixan na cojo ngu sa xihin ne, hacuaha jemu jyé jyé rē na.

Jesús ne, tsinchacun me langa

¹³ Jingu yèjè rē xi tivisiajmi Jesús cojo cha ladu rē me ne, cavetsihin tjemu canduva xuta cojo quihndi rē me, xi cuisanetsja Jesús nixti jan cojo sa xi sacú rē cjuandaja rē me. Peru cha ladu rē Jesús jan ne, cacjan cha cojo xuta jan ta, xi má rē cha ladu rē me ne, mahyiin rē Jesús. ¹⁴ Hya xi cavèë Jesús xi cuatjin sahmi cha ladu rē me ne, camacjan rē me cojo cha. Ngajan xi cachja me cuitjin:

—Tuhun cahndé catinduva tjengui suva ná nixti. Xi canichuun cahndé xi cuma rē ta, xuta xi sahmi me yojo rē me sacuaha ngu quihndi ne, xuta vèhē xi sahmi me sacuatjin vitexa Nina. ¹⁵ Cuichjá cojo nuju cjuaquixi ta yo xi meje cuisehen gobiernu rē Nina ne, cuma cuisehen peru sacuaha ngu quihndi. Sá sahmi cuatjin ne, cumaji cuisehen.

¹⁶ Ngajan xi Jesús ne, cavataha me nixti jan. Hane hora xi cavisanetsja me ne, cachja me cjuandaja rē me cojo.

Ngu cha nchina ne, chja cha cojo Jesús

¹⁷ Hya xi camá ne, cavetju me quiji me jingu sa cahndé. Hane ndiya cjui me ne, vanga ngu cha cafehe cha cavixcuhnchi cha xcun me xi faharcun cha me. Sehe chja cha cojo me cuitjin:

—Ngayan maestro. Jemu ndaja ngayun. Nújun, ¿mé xi sahme xi cuma sacú ná cjuahñu xatsé? —Cuatjin cachja cha.

¹⁸ Ngajan xi Jesús ne, cafayangui me tséhē cha cuitjin:

—¿Mé má cuatjin noje xi ndaja ngahan? Tsajin xuta xi ndaja suva ni Nina xi ndaja me. ¹⁹ Ha hye cjuaxi cavitexa Nina: “Xi caniquiin xuta. Xi canihñii chjuun nahñu riji jingu sa chjuun. Hacuiin mé chjehehmi tséhē xuta. Xi canujiin cjuandesu tséhē xuta. Xi cavindachiin rē xuta. Chjehercuin nahmi riji hacuaha chjehercuin ná riji.” Vèhē cjuaxi cavitexa Nina.

²⁰ Ngajan xi cachaja cha cojo Jesús ta:

—Maestro, yèjè cjuaxi vèhē ne, hisca cjuanixti naha ne, ha cahndé.

²¹ Xi cahndé Jesús cjuaxi rē cha ne, jemu cachuya rē me tséhē cha. Ngajan xi chja me cojo cha ta:

—Machaja sa ri ngu xcusun. Tjihin ne, titeñi yějē xi tjin ri hane tujún xi sacu ri ne, tehe rē xuta yuma. Hane sehe ndovetjengui ná. Sá xi nihñi cuatjin ne, xi cjuēhe xcun Nina ne, ngajan sacú ri cjuanchina xi ndajyihí.

²² Xi cahndē cha cjua vėhē ne, jemu choho camá rē cha. Va va má cacun cha, cavetju cha cafe cha ta, tsėhē xi jemu nchina cha.

Jesús ne, chja me tsėhē cjuanchina

²³ Ngajan xi Jesús ne, vutsejen me yějē ni ladu hiscan siu cha ladu rē me ne, sehe cachja me cojo cha cuitjin:

—Jemu chja tsėhē ngu xuta nchina xi cuisehen me ladu rē Nina.

²⁴ Ngajan xi cha ladu rē me ne, jemu quijircun rē cha xi cuatjin cachja me. Ngajan xi cachja nga Jesús cojo cha cuitjin:

—Compañeru, jercu chja tsėhē xuta xi cuisehen me ladu rē Nina.

²⁵ Sacuatjin rē naxin xi cumaji cuatju chu ngojo rē nindu ne, cuatjin rē xuta xi jemu meje rē me cjuanchina ta, cumaji cuisehen me ladu rē Nina.

²⁶ Xi cahndē cha ladu rē me cjua vėhē ne, jemu quijircun camahani rē cha. Ngajan xi cachja cha ngajñi rē cha cojo xicjin cha:

—¿Peru yo ní xi cuma cuetjutje ní?

²⁷ Xi cavuya me vutsejen me hiscan siu cha ne, ngajan xi cachja me cuitjin: —Yějē ni xi maji sahmi xuta ne, Nina ne, hatuxa ma sahmi me.

²⁸ Ngajan xi cavetsihin cachja cha Pedru cojo Jesús cuitjin:

—Chutsujun ni. Ngayin ne, canismitacuín yějē ni xcusun, hane cavisihin ladu nuju.

²⁹ Ngajan xi cachja Jesús ta:

—Cuichjá quixē cojo nuju ta, tu yo ni xi tsismicacun ndava, tsismicacun hntsé, tsismicacun tichja, tsismicacun naa rē o sá nahmi rē o sá quihndi rē, hacuaha tsismicacun nangui rē xitjē rē ngatsē naha cojo ngatsē rē cjua rē Nina ne, jinguyějē rē xi ngasunhdē vihi tacun me ne, ³⁰ sacú rē me ngu cientu sa quisun tsėhē ngu ngu xcusun xi catsismicacun me. Cjín ndava me sacú rē me. Cjín hntsé me sacú rē me. Cjín tichja me sacú rē me. Cjín naa rē me sacú rē me. Cjín quihndi rē me sacú rē me. Hacuaha cjín nangui rē xitjē rē me sacú rē me. Handasa cojo cjuañihi, peru sacú rē me. Hane hya xi cueya me ne, cuechú me cjuañu xatsē xcun Nina. ³¹ Tsėhē xuta xi matitjun quihndē ne, jemu cjín me xi cumachjiriin hya xi cuinduva Nina ngasunhdē. Hane xuta xi hacuín matitjun quihndē ne, hya ne, cumachji rē me xi cuma titjun me. —Cuatjin cachja me.

Jesús ne, camá jyan ndiya xi chja me xi cueya me

³² Hya xi camá ne, hora xi jiya ndiya Jesús cjui me cojo cha ladu rē me nandya Jerusalén ne, titjun Jesús cjui me. Hane cha ladu rē me ne, jercu fircun ra, tsėhē xi tsacjuiin Jesús xi cjui me. Hane xuta xi tjengui cjui cojo me jan ne, hacuaha jemu tsacjun me má. Ngajan xi Jesús ne, cajindaya nga me cha ladu rē me xi tejó ni jan, sehe cavetsihin cachja me cojo cha xcusun xi ha tacun xati xi cuatju me cuma. ³³ Cuitjin cachja me:

—Tinuhyun ní, tivanguen nandya Jerusalén. Hane ngajan ne, tjin yo me xi cuiteña ná ngajan cojo nahmi xi matitjun cojo cha maestru tsėhē ley. Cuatjin sahmi me ha ndasa xi ngahan xi Quihndi rē Xuta Jain. Hane xuta xi cuacun vė cuichja me xi cueya ngahan, hacuaha sa nga me ngahan cojo xuta rē jingu sa nandya. ³⁴ Sehe tsixcuehyu me ngahan. Cuėhėnatya me ngahan, cuaja me ngahan, hisca tsiquehen me ngahan. Peru xi cjuė jyan nixtin ne, cúa nga cjuañu.

Santiago cojo Juan ne, fehya me Jesús ngu cjuandaja

³⁵ Xi cajnetaha cachja Jesús cuatjin ne, sehe quiji cha Jacobo cojo cha Juan, quihndi rë Zebedeo, quiji tjengui tiña cha Jesús. Ngajan xi chja cha cojo rë me cuitjin:

—Maestro. Nihñu favor ne, cjua xi chjahyin nuju ne, ningatuhun nihi.

³⁶ Ngajan xi cachja me cojo cha cuitjin:

—¿Mé xi meje nuju xi sahme ni?

³⁷ Ngajan xi chja cha cojo rë me cuitjin:

—Tuhun cahndë xi ngu ngu ngayin ne, cuinechintihin ngu ngu ladu tjehen nuju, hya xi nihñu gobiernu nuju.

³⁸ Ngajan xi cachja Jesús cojo cha cuitjin:

—Ngayun ne, hyuun mé xi chahyun. ¿Há scaa nuju cuatju cjuañihi xi cuátju ngahan ni?

³⁹ Ngajan xi cachja cha ta:

—Scaa nihi.

Ngajan xi cachja nga Jesús cojo cha cuitjin:

—Cjuañihi xi cuatju ngahan cumá ne, hacuaha cojo ngayun cuatjun cumá.

⁴⁰ Peru xi cuinechuntuhun ngu ngu ladu tjehen naha ne, hacuiin ngahan cuichjá ta xcusun vëhë ne, sacu rë xuta xi cuichja Nina xi sacu rë me cahndë.

⁴¹ Xi cahndë cha xi të jan cjua xi cachja Jesús ne, cavetsihin camacjan rë cha cojo cha Jacobo cojo cha Juan. ⁴² Hya xi camá ne, cajindaya Jesús cha xi të jan ne, cachja me cojo cha cuitjin:

—Ngayun ne, ha hyun ta xuta matitjun nguehe ngasunhndë jemu sahmi yehe me yojo rë me, ta jercu meje cuiteja me. ⁴³ Peru hacuiin cojo ngayun cuatjin nihñu ngajñi nuju ta xi meje rë ne, jarë ngayun xi meje nuju xi cumatitjun ngayun ne, nihñu xa rë xingun sacuaha mosu. ⁴⁴ Hane jarë ngayun xi meje nuju xi xingun ne, cjuaharcun me yun ne, nihñu xa rë xingun sacuaha mosu xi caxteña. ⁴⁵ Hisca ngahan ne, Quihndi rë Xuta Jain má ngahan, peru hacuiin canduvá xi xuta cuisecoo ná me ta ngahan cuisecoo rë xuta. Hisca tsingatehen xi tsiquehen ná xuta, cojo sa xi cjin xuta cuaxëtje Nina me. —Cuatjin cachja Jesús.

Jesús ne, sahmi me xi cuma scutsejen cha rcá xi hmí rë Bartimeo

⁴⁶ Hya xi camá ne, cjuí cjuí me cojo cha ladu rë me ne, cavechu me nandya Jericó. Xi cavatju me tsëhë nandya vëhë cojo xutacjin xi ticojo me ne, cavechutaha me cha quihndi rë Timeu, cha xi hmí rë Bartimeo, ngu cha rcá, hane tifehya cha caridad tjehen ndiya. ⁴⁷ Xi cahndë cha rcá jan xi Jesús tsëhë nandya Nasaret hacui me xi nduva me, jercu cachja cha:

—Jesús, quihndindaicjin rë David, catamayuma nuju ngahan.

⁴⁸ Hane cavisiajmieján xuta jan cojo cha ta, catisejyu cha. Peru hitsë sa hñu chja cha cuitjin:

—Quihndindaicjin rë David, catamayuma nuju ngahan.

⁴⁹ Ngajan xi casecunhñu Jesús. Sehe ngajan xi chja me cojo cha ladu rë me cuitjin:

—Chjindayun rë cha.

Hya xi camá ne, cha ladu rë me jan ne, cajindaya cha cha rcá jan, sehe cachja cha cojo cha cuitjin:

—Tehe cjuetacun xahasen riji quen. Tisatjinhngue ta, jindaya me gaye.

⁵⁰ Cuatjin camá xi cafaha cha tsjanga rë cha ctsingatjenzin cha. Sehe marcu macjain casecun cha. Sehe quijitjengui cha Jesús. ⁵¹ Hane xi cavechutaha cha me ne, ngajan xi cachja me cojo cha cuitjin:

—¿Mé xi meje ri xi sahmi cojo ri?

Ngajan xi cachja cha rcá jan ta:

—Maestro, xi meje ná ne, xi cuma tsejen ná.

⁵² Ngajan xi cachja Jesús cojo cha cuitjin:

—Ndatjin. Cuma cjuihin ta, camandaja ye, tséhë xi camacjain ri ngahan.

Hane ha hora vehë ni ne, camatsejen rê cha. Hane quiji cha cojo rê me hacutjin cjuí me.

11

Tivisehen Jesús nandya Jerusalén

¹ Hane xi camatiña me Jerusalén xi ha cjuaha me nandya Betfajé cojo Betania, quiji me ndetjun xi hmí rê Ndetjun Olivu, ngu ndetjún xi tiña tacun cojo nandya xi cuacun vehë ne, catsingatju me jo cha ladu rê me quiji cha tixa. ² Cuatjin cachja me cojo cha:

—Tangun nandya xi tsejen vë. Hane xi tu cjuhun tjeheh nandya ne, sacú nuju ngu burru xatsë xi hisca ngu cjëë cuijin rê chu, quitahahñu chu ngajan. Hane chundecjun chu, sehe nduvuncujun chu. ³ Sá xi yo xi cuichja cojo nuju ta: “¿Mé má cuatjin chundecjun chu ne?”, cuitjin tinújun: “Me xi matitjun tsijin meje rê me chu. Peru sehe tsicuya nga me chu.” —Cuatjin cachja Jesús cojo cha.

⁴ Hya xi camá ne, quiji cha tixa xi cachja Jesús cojo cha. Xi tu cafehe cha ngajan ne, casacu rê cha ngu chu burru xatsë quitahahñu chu ngajan ndiya tiña tingotjo ndihya. Hane cavundecja cha chu.

⁵ Hane ngujo cha xi hinchacun jan ne, cachja cha cojo cha ladu rê Jesús cuitjin:

—¿Mé má cuatjin cachundecjun chu burru vë?

⁶ Ngajan xi cachja cha ladu rê Jesús hacutjin cachja me cojo cha. Sehe cha xi cuacun jan ne, casua cha cahndé quijicojo cha cha ladu rê Jesús chu burru jan. ⁷ Hane sehe quijicojo cha chu hiscan tacun Jesús. Hacuaha casua cha tsjian rê cha casesun ngaxtun chu sehe camiji me chu. ⁸ Hya xi camá ne, jemu cjín xuta xi cacandi me tsjian xcun rê me ndiya hacutjin cjuí Jesús. Hane ngujo nga me ne quiji cavotohosun me xca xcuen ngajan nguijná, hane hacuaha cacandi me ndiya hacutjin cjuí Jesús cojo sa xi tifaharcun me me.

⁹ Hane yëjë me xi cjuí titjun cojo yëjë me xi tjengui jan ne, cavetsihin jercu cajindaya me cachja me:

—Nacuechji rê Nina ta cafehe me xi catsingatju Nina. ¹⁰ Catsinchacun me me xi cuitexa naja sacuaha cavitexa David xutachanga naja. Jemu catsinchacun Nina me xi nduva tséhë xi Nina catsingatju rê me. —Cuatjin cajindaya xuta.

¹¹ Xi tu cavisehen me nandya Jerusalén ne, quiji me yungun xi matitjun. Xi tu cavutsejen nguehe cavutsejen ngajan me ne, mé ta quiji hora ne, cavetju nga me cojo cha ladu rê me xi tejó jan ne, cavuya cafehe nga me nandya Betania.

¹² Xi camá nchujun jan ne, cavuya cavetju nga Jesús tséhë nandya Betania. Hane ha jemu vojo rê me hora xi cavetju me. ¹³ Hya xi camá ne, tséhë cjin ni cavëë me ngu yaxujun xi chine tú rê xi jemu ndaja tsejen yaha xca rê. Hane quiji me hiscan secun, sá sacu sinë me. Peru xi cafehe me ngajan ne, tsajin camahani mé xi casacu rê me, tséhë xi hacuín nixtin rê tuhaxi jan. ¹⁴ Ngajan xi cachja me cojo ya jan cuitjin:

—Quihndé tsajin nixtin xi cuaqui tú riji xi sinë xuta.

Hane cha ladu rë me ne, cahndë cha cjua rë me.

Cavaxë Jesús xuta xi sahmi ndatsin ngajan yungun xi matitjun

¹⁵ Hya xi camá ne, cafehe me nandya Jerusalén. Xi cafehe me ngajan ne, quiji me ndatsen yungun xi matitjun jan. Hane cavetsihin cavaxë me xuta xi sahmi ndatsin ngajan. Catsindefa me maxë rë xuta xi tsindeya tujún. Hacuaha cacandí me siya rë xuta xi viteña nisë tyava. ¹⁶ Hane casuaain me cahndë xi tjin mé xi cjuaha xuta xi cuatjuvasen me ndatsen yungun jan.

¹⁷ Sehe cavetsihin cavicuya me xuta jan cuitjin:

—Ngayujun ni ne, ha hyun xi cuitjin cachja Nina xcun xujun rë me: “Ndyaha naha ne, ngu ndihya xi vinduva xuta tséhë yëjë ni nandya cuisiajmi me cojo ná.” Peru ngayun ne, tinihñu ndava Nina vi sacuaha ndava chëjë. —Cuatjin cachja Jesús.

¹⁸ Hya xi camá ne, xi cahndë nahmi xi matitjun cojo maestru tséhë ley cjua jan ne, cavetsihin cavangui me chuya rë xi cuma tsisquehen me Jesús. Cuatjin meje rë me tséhë cjuaxin xi tjin rë me, tséhë xi yëjë xuta ne, jemu quijircun rë hacutjin cavicuya Jesús. ¹⁹ Xi quiji hora ne, cavetju nga Jesús tséhë nandya jan cojo cha ladu rë me.

Caxi ya xujun xi cama cjan rë Jesús cojo

²⁰ Hane xi camá nchujun jan ne, cavuya cafe nga me nandya Jerusalén. Hane xi cavatju nga me hiscan secun ya xujun jan ne, cavëë me xi ya xujun jan ne, cafë caxi hisca rcu hisca ntsacu. ²¹ Ngajan xi cha Pedru ne, catsinguitsjen cha cjua xi cachja Jesús cojo ya jan nguiña ne, sehe ngajan xi cachja cha cojo Jesús cuitjin:

—Maestro. Chutsujun ta ya xujun xi canújuncjun cojo jan ne, cafë caxi.

²² Ngajan xi cafayangui Jesús tséhë cha cuitjin:

—Catamacjain nuju tséhë Nina. ²³ Cuichjá cojo nuju ngu cjuaquixi ta tu yo ni xi cuichja cojo naxi vëhë cuitjin: “Tihinxin tséhë nguehe, tihin tisihin ngajñi ndachacun”, sá xi hacuain majo cacun, sá xi macjain jain rë hacutjin xi cachja ne, cuatjin jain cuma. ²⁴ Vëhë xi chjá cojo nuju ta yëjë ni xi chjahyun cojo Nina ne, ningatuhuntacun sacuaha xi ha casacu nuju ta xi cuatjin ne, sacu jain nuju. ²⁵ Hora xi chjahyun rë Nina ne, sá xi tjin yo xi choho cachja tsujun, o sá xi choho casahmi tsujun ne, ninchatuhun rë, cojo sa xi Nahmi naja xi tacun ngahung ne, hacuaha tsinchataha nuju me tséhë jyë nuju ta, ²⁶ sá xi ninchatuun rë me ne, Nahmi naja xi tacun ngahnga ne, hacuaha tsinchataain nuju me. —Cuatjin cachja me.

Finenguisen xuta ¿yo casuaxa rë Jesús?

²⁷ Cjui cjui me ne, cafehe me nandya Jerusalén. Hane xi cafehe me jan ne, quiji me yungun xi matitjun. Hora xi tsujyihya me ndatsen yungun jan ne, nahmi xi matitjun cojo maestru tséhë ley cojo sa xuta changá xi yahnga jan ne, cafehe tjengui me Jesús. ²⁸ Hane cuitjin cavinenguise me:

—¿Yo cavitexa ri xi cuatjin nihñi xcusun vë? ¿Yo casuaxa ri?

²⁹ Ngajan xi Jesús ne, cachja me cojo xuta jan cuitjin:

—Cjuinenguësë nuju ngu cjua. Hane sá xi nicuyun tsahan ne, sehe cuichjá cojo nuju yo cavitexa ná xi sahme xcusun vëhë. ³⁰ Ngayun mé nújun, ¿Yo xi cavitexa rë cha Juan xi cavitenda cha xuta? ¿Há Nina cavitexa me cha ne, há xuta cavitexa me cha? Tinújun cojo ná.

³¹ Ngajan xi vetsihin visiajmi xuta jan ngajñi rë me cojo xicjin me cuitjin:

—Sá xi cuinújan xi Nina cavitexa me ne, cuichja me vihi cojo naja cuitjin: “Sá xi cuatjin ne, ¿mé má camacjaain nuju xi cachja cha ni?” ³² Peru ¿há cuma cuinújan xi xuta cavitexa me cha?

Cuatjin casacuinyiin rë xuta xi cuacun vë mé cjuaxi tsicuya me tsëhë Jesús ta, tsëhë xi tsacjun me xutacjín, tsëhë xi yëjë ni xuta jan ne, macjain rë me xi cha Juan ne, Nina cavitexa jain me cha xi suacuenda cha cjuaxi rë Nina. ³³ Vëhë xi hya xi cafayangui me tsëhë Jesús ne, cachja me cuitjin:

—Hyiin.

Ngajan xi hacuaha Jesús ne, cachja me ta:

—Sá xi cuatjin ne, ta mijí nicuyun cjuaxi tsahan ne, hacuaha cuichjaain cojo nuju yo cavitexa ná xi sahme xcusun vihi.

12

Ejemplu tsëhë cha mosu xi choho cjuatacun rë

¹ Sehe cavetsihin cavicuya Jesús xuta jan ngujo cjuaxi, peru cojo suva ejemplu cachja me. Cuitjin cavetsihin me cjuaxi:

—Cuejña xi ngu xihin ne, catsitjë me nahñu rë uva ngu rquí nangui. Hacuaha casahmi me hñchua xondyojo rë tahndee rë xitjë jan. Ha ngajan ne ne, cafanguiya me ngu ndyojotë hiscan cuaxë nandá rë tuhaxi jan. Hacuaha casahmi me ngu cahndë hiscan xi cavesun me ngu nachan ngahnga xi sesun xuta xi sahmi cuidadu xitjë rë me.

² Hya xi camá ne, casuatsja me cojo jingu sa xuta xi sahmi cha cuidadu rë, hane cjuaha me tsë tsë cojo rë cha. Sehe cavetju me quiji me ngu nanguicjin. ³ Xi cavechú nixtin tsëhë tutjë jan ne, catsingatju me xi tsëhë jan ngu mosu hiscan xi quitaha xitjë rë me, xi cjuahatsja cha tsëhë xi satë rë me. ⁴ Hya xi camá ne, xi cavechu cha mosu jan ne, cavaja xuta xi tacun tsja xitjë jan cha mosu jan. Hane catsicuya cha cha cafe cha. ⁵ Ngajan xi me xi tsëhë jan ne, cavuya catsingatju nga me ngu mosu quiji. Hane xi cavechu mosu vëhë ngajan ne, me xi siutaha jan ne, cavanguihmu me rcu cha, hacuaha choho cachja me cojo cha. ⁶ Cafë ne, me xi tsëhë jan ne, cavuya catsingatju nga me ngu mosu. Peru mosu jan ne, catsiquehen me xi cuacun jan cha. Cafë vëhë ne, catsingatju camaha sa cha mosu. Hane ngujo mosu jan ne, tu cavaja ni cha. Hane ngujo nga ne, catsiquehen camahani cha.

⁷ Quihndë me xi tsëhë cahndë jan ne, ngu ni quihndi tjín rë me ne, vëhë sa tacun. Handasa jemu hmucacun me cha ne, peru catsingatju me cha, tsëhë xi cuitjin catsingatahacacun me: “Quihndi naha vi ne, cjuaharcun me cha.” ⁸ Peru xi cafeha cha quihndi rë me ngajan ne, ngajan xi chja xuta xi sahmi cuidadu xitjë jan cojo xicjin me ta: “Cha vihi quihndi xi cjuahatsja cha cahndë vihi. Quihndë ne, niqen cha, cojo sa xi cumá tsajan nangui.” ⁹ Hya xi camá ne, cafahe me cha catsiquehen me cha, sehe catsingatjexin me cha tsëhë cahndë jan. Cuatjin casahmi me xi cuacun vë.

¹⁰ Hindë ne, me xi tsëhë nangui jan ne, ¿mé sahmi me cojo xuta xi siutaha cuidadu rë xitjë jan? Hatuxa cjuaxi me ne, tsiquehen me me, hane sua me cahndë jan cojo jingu sa xuta.

¹¹ Quihndë, ngayun ne, ha chutayuun cjuaxi tsëhë xujun rë Nina xi chja cuitjin:

Ndyojo xi chja cha chjinevexo xi machjiriin ne, ndyojo vëhë xi cachja Nina xi cuejña tjún tjún yuju rë xihndëñaña.

¹² Cuatjin casahmi Nina xi cumá hacuaha jemu chuya rë xahasen naja xi cuatjin camá.

¹² Hya xi camá ne, xuta changá xi cafehe tjengui rë Jesús jan ne, meje cjuaha me me, tsëhë xi camachaya rë me xi condra rë me xi cachja Jesús. Ha ndasa meje cjuaha xuta changá jan Jesús ne, peru xi tsacjun me tsëhë xutacjín jan ne, ha quihndë tsajin mé casahmi me, hane cafe me.

Cjuacjintacun tsëhë tujúnsa

¹³ Hya xi camá ne, xuta changá xi cuacun jan ne, catsingatju me ngujo cha tsëhë partidu fariseo cojo ngujo cha ladu rë Herodes xi cjuahangahma cha Jesús, cojo sa xi xuta changá jan ne, cuma cuinchajyë me me. Xi tu cafehe cha ne, ngajan xi cachja cha cojo rë me ta:

¹⁴ —Maestro. Ngayin ne, hyin ta ngayun ne, quixi cjuja tsujun. Ha tuxa cjuaquixi xi nújun ha ndasa xi cojo xuta nchina visiajmu o sá cojo xuta yuma. Tu yo ni ne tangun ni visiajmu cojo ta tsëhë xi ngayun ne, vicuyun ndiya rë Nina cojo cjuaquixi camahani. Quihndë ne, sacuaaha ley rë Moisés ne, ¿há sua cahndë xi cuechjen tujúnsa naja cojo César, me xi matitjun, o há suaain cahndë? —Cuatjin cavinenguise cha.

¹⁵ Peru Jesús ne, tsëhë xi ha vacun rë me xi jemu ndacha cha ne, cuitjin xu cachja me cojo cha:

—¿Mé má cuatjin meje chuhunchuvun ná? Nduvuncujun ngu tujún scutséjen.

¹⁶ Hya xi camá ne, cha xi cuacun jan ne, canduvacojo cha ngu tujún tyava. Ngajan xi cachja me cojo cha cuitjin:

—¿Yo xcusun rë hacuaaha yo ñihi rë xi quitahá xcun tujún vë? —Cuatjin cavinenguise Jesús.

Ngajan xi chja cha cojo rë me cuitjin:

—Tsëhë César. —Chja xu cha.

¹⁷ Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rë César xi tsëhë me; hane tuhun rë Nina xi tsëhë me. —Cuatjin cachja Jesús.

Hya xi camá ne, jemu quijircun rë cha xi cuatjin ndaja cachja Jesús.

Cjua chjinenguise hacutjin cumá xi cuya cjuahñu

¹⁸ Hacuaaha canduva tjengui rë me ngujo cha tsëhë partidu saduceo, cha xi vicuya ngu cjuachacun xi chja xi hya xi cueyan ne, ha quihndë cuyaaín cjuahñu naja. Hane cuitjin cachja cha ngujo cjuja cojo Jesús:

¹⁹ —Maestro. Moisés ne, catsihindu me xcun xujun rë Nina xi sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaaha quihndi rë nima vëhë. ²⁰ Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rë cha vëhë ne, casacuiín rë na hisca ngu quihndi cojo cha. ²¹ Hya xi camá ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaaha cahme cha hane casacuiín rë na quihndi. Hacuanitjin ni cafaha cha xi majyan jan na, ²² hisca xi café yëjë xi yatu cha cafaha cha na. Peru yëjë cha xi cuacun vëhë ne, café cha cahme cha chuva ngu chuva ngu cha. Hane na vëhë ne, casacuiín rë na hisca ngu quihndi cojo cha xi cuacun vëhë. Hiscan xi cajnetaha ne, hacuaaha cahme na. ²³ Quihndë ne, ¿mé nújun? Hya xi cuya yëjë nima cjuahñu ne, ¿jarë jain cha xi chjuun rë cha na xi cjuaquixi? ta yëjë xi yatu cha ne, cavixan cha cojo rë na. —Cuatjin cavinenguise cha.

²⁴ Ngajan xi cachja Jesús cojo cha cuitjin:

—Ngayun ne, cuaintjin xi nújun, tséhë xi vijni rcun cjua xi chja xujun rë Nina, hacuaha hyuun xi Nina ne, jemu hñu cjuatacun rë me. ²⁵ Hya xi cuya cjuahñu rë nima ne, ha quihndé hacuiin cuixan me hacuaha hacuiin tsinguixan me, ta tangun cumá sacuaha xi siu ángel ngahnga ne, cuatjin cuiyuju me. ²⁶ Hacuaha quihndé xi tinúnj tséhë nima xi cuya cjuahñu rë ne, ngayun ne, sacuaha xi cjéë chutayun xujun xi catsihindu Moisés hacutjin cahndé me cjua rë Nina xi cavetju tséhë cahntsua ngu ya lihndi xi seti. Cuitjin cachja Nina cojo me hya: “Ngahan xi Nina rë Abraham ngahan. Nina rë Isaac, hacuaha cojo Nina rë Jacobo má ngahan.” Cuatjin cachja Nina tséhë xuta xi ha cahme me. ²⁷ Peru Nina ne, hacuiin nina rë nima ta nina rë xuta xi quicun me. Hane sá xi quicun nima jan, ngajan tsejen xi cjuachacun xi nújun ne, quixiin.

Artículo tséhë ley xi hitsë sa venguichji rë

²⁸ Hacuaha cafehe ngu cha maestru tséhë ley hiscan tacun Jesús. Hane xi cahndé cha cjuavisiajmi rë me ne, xi ndaja cama catsicuya Jesús, ngajan xi cavinenguise cha me cuitjin:

—Maestro, tséhë yëjë ní cjua xi cavitexa Nina naja xcun xujun ley ne, ¿jaré artículo xi hitsë sa matitjun?

²⁹ Ngajan xi cafayangui Jesús cuitjin:

—Xi matitjun ne, cuitjin chja: “Ngayujun ni ngayun xuta ladu rë nangui Israel, Nina naja ne, ngu tu tu ni me. ³⁰ Meje rë xi nihña hmutacun Nina, me xi matitjun tsajan, cojo ngayëjë ni cjuatacun naja, cojo ngayëjë ni xahasen naja, hacuaha cojo ngayëjë ni ngahñu naja.” ³¹ Hane xi má jo ne hacui vihi: “Meje rë xi nihña hmutacun xingueen sacuatjin hmutacun suvaan yojo naja.” Tséhë yëjë ni artículo xi cavitexa Nina ne, jo ni cjuatacun vëhé xi matitjun. —Cuatjin cachja Jesús.

³² Ngajan xi cachja cha maestru tséhë ley cojo rë me cuitjin:

—Ndatjin canújun, maestro. Canújun cjuaquixi ta Nina naja ne, ngu tu tu ni me. ³³ Hacuaha ndatjin canújun xi meje rë xi nihña hmutacun Nina cojo ngayëjë ni cjuatacun naja, cojo ngayëjë ni ngahñu naja, hacuaha meje rë xi nihña hmutacun xingueen sacuaha nihña hmutacun yojo naja suvaan. Cjua vëhé ne, tjercu venguichji rë. Hisca vengui sa chji rë xi cuma rë yëjë ni cjuandaja cojo yëjë cjuatjo xi cjue xcun Nina.

³⁴ Xi tu cahndé Jesús ta ndatjin cafayangui cha maestru jan ne, ngajan xi cachja me cojo cha cuitjin:

—Ha jemu hitsë sa chaja xi cuisuhun ladu rë Nina.

Ha quihndé tsajan yo xi macacun sa cjuinenguise rë me ngu cjua.

¿Yo tjë rë má me xi hmi rë Mesías?

³⁵ Ngajan xi Jesús ne, hora xi tivicuya me xuta ngajan yungun xi matitjun ne, cachja me cojo xuta cuitjin:

—Maestru tséhë ley ne, chja cha ta Cristu, me xi tsingatju Nina xi cumatitjun tsajan ne, tjë rë David má me. ³⁶ Peru suva David ne, catsihindu me cjua xi cachja Hasen rë Nina cojo rë me cuitjin:

Nina ne, cachja me cojo Nai naha cuitjin:

“Tinechín ladu quixi naha

hiscan hya xi yëjë xi sahmi condra ne, cuiyuju ngahan ngahma gobiernu riji.”

³⁷ Ndatjin, sá xi cuatjin cachja David tséhë me ne, ¿há cuma xi hisca tjë rë David má me ni, hacuaha matitjun nga me tséhë David ni? —Cuatjin cachja Jesús.

Hane xutacjín ne, jemu cojo cjuasua cavisíñuju me cjua rē Jesús.

³⁸ Hacuaha cuatjín cachja nga me ngu ndiya xi tivicuya me xuta:

—Tjín nuju cuidado. Hacuín cojo ngayun nihñu sacuatjín sahmi cha maestru tséhē ley. Cha xi cuacun véhē ne, jemu meje tsujyihya chacun cha hacuaha meje rē cha xi cuichja xuta nina cojo cha ngajñi ndetsin. ³⁹ Hacuaha hora xi fi cha yungun ne, cjue cha cuiyuju cha ngu cahndē ndatjín hiscan viyuju xuta xi matitjun. Ha cuanitjín ni hiscan xi cjue sinē cha ngu ndava suhi ne, fi cha viyuju cha cahndē ndatjín hiscan viyuju xuta xi matitjun. ⁴⁰ Hacuaha yachjín cahan ne, jemu cjín tujún vaxē cha na. Hisca ndava na tsajin. Hane hisca xi chjayuma cha ne, jemu nduju hora chja cha, peru hacuín nguñaja cacun cha chja cha. Véhē xi cha xi cuacun vē ne, hitsē sa jyē castigu cuatjun cha, xi cuma rē jingu sa xuta.

Tujún chjē rē na cahan

⁴¹ Sehe quiji cavéjña me tiña hiscan xi tacun caxa xi xincha tujún chjē rē Nina, vutsejen me hacutjín vincha xuta tujún. Hane jemu cjín xuta nchina quiji cavincha me chjē rē, jercu cjín tujún cavincha me. ⁴² Hya xi camá ne, cojo ngu na cahan xi jemu yuma camahani quiji cavincha na jo tujún siné xi jemu chuva chji rē cahntsua caxa jan. ⁴³ Ngajan xi Jesús ne, casahmitangun me cha ladu rē me, sehe cachja me cojo cha cuitjin:

—Cuichjá cojo nuju cjuaquixi ta xuma chjuun cahan vihi ne, hitsē sa vengui chji rē tujún xi cavincha na, xi cumá rē tujún xi jemu cjín cavincha cha nchina jan ta, ⁴⁴ tséhē xi cha xi cuacun véhē ne, xi vangui rē cha ne, véhē xi cavincha cha. Hane ha ndaja na véhē ne, cojo cjuayuma xi tacun na ne, tujún xi cavincha na jan ne, ha véhē yějē ni xi tjín rē na. —Cuatjín cachja Jesús.

13

Jesús ne, chja me ta yungun xi matitjun ne, cuetsunya

¹ Hya xi camá ne, hora xi tivetju Jesús tséhē ndatsen yungun xi matitjun jan cojo cha ladu rē me ne, ngajan xi chja nga cha ladu rē me jan cojo rē me cuitjin:

—Maestro, chutsujun ndoyojo xi texo yungun vihi ta tjercu tu ndacun camahani. Hacuaha ndihya tséhē ne, jercu tu cun camahani.

² Ngajan xi chja Jesús cojo cha cuitjin:

—Sacuaha ndihya ndacun xi chutsujun ne, cuechu nixtin xi hisca xi ngu ndoyojo vi ne, tsajin hinchasuncoo xicjin ta, cjuē yějē cuixujne.

Hacutjin cumá hya xi cjuē ngasunhndē

³ Cafē cachja me cuitjin ne, sehe cavetju me quiji me cojo cha ladu rē me, cafehe me tiña rcu Naxi Olivu, quixi rē tingotjo yungun xi matitjun jan. Hane xi quijixin me cojo cha Pedru cojo cha Jacobo cojo cha Juan cojo cha Andrés, sehe cavinenguise cha me cuitjin:

⁴ —¿Janihya cuetjucaa xcusun véhē xi canújun?

⁵ Ngajan xi cachja Jesús cojo cha cuitjin:

—Nechun cuidado cojo sa xi hacuín cuma ndacha ngayun ta, ⁶ tséhē xi jemu cjín xuta cjuehe me xi cuichja me cueyanangui me ñihi naha cuichja me xi hacui me xi Cristu me. Hane cuatjín jemu cjín xuta cumacjain rē me cjuandacha rē me xi cuacun vē.

⁷ Hacuaha hya xi cumachaya nuju cjua xi jemu yehe si tijima ne o sá xi tjín cjuacjintacun ta jemu yehe si nduva ne, hacuín cumacjintacun ta ha

tuxa cuatjin cuma. Peru hacuiin ha hya cjuë nixtin rë ngasunhndë vihi. ⁸Xuta nandya scaan cojo xuta xi hacjahi. Ngu nación cojo ngu nga ne, scaan. Hacuaha cjín cahndë xi cjuani nangui. Hacuaha cjín cahndë ne, cuma jindya. Cuatjin cumá xi cuetsihin cjuañihi xi cuatju xuta.

⁹Nechun cuidadu ta, cuechu nixtin xi xuta nandya ne, cjue cani nuju me xcun xutaxa rë yungun ne, hacuaha cuaja nuju me. Hacuaha tjin nuju xi cuangun xcun xutaxa rë ndihyavasen cojo xcun gobernador ngatsë rë xi macjain nuju ngahan. Hane ngajan ninguixun yëjë cjuac hacutjin cavicuyá nuju. ¹⁰Peru chaja sa xi cjuë ngasunhndë ne, meje rë xi cuichja xuta ladu naha cjuarë Nina jingujyë ni nandya tsëhë ngasunhndë. ¹¹Hora xi cjui chani nuju xcun xutaxa rë ne, hacuiin cumacjintacun tsëhë cjuarë xi cuinújun jan ta, Hasen rë Nina ne, scuxaha cjuatacun nuju hora vëhë hacutjin cuinújun. Hacuaha vëhë ni cuinújun ta tsëhë xi hacuiin cjuatacun nuju xi cuinújun ta cjuatacun rë Nina xi sua nuju Hasen rë Nina. ¹²Xuta nandya ne, cuinchajyë me hntsë me, cuinchajyë me xutacha rë me, hacuaha cuinchajyë me quihndi rë me, cojo sa xi xutaxa rë ne, cjuaha me xuta xi cuacun vë ne, tsiquehen me. ¹³Hane yëjë xuta ne, choho scuëë nuju me ngatsë naha. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. —Cuatjin cachja Jesús.

Cjuacjintacun jyë xi cuma

¹⁴Yo xi scutaya cjuarë xi sehe nduva vi ne, meje rë xi ndaja catetaharcun. Tjin xcusun xi tsinguetsun rë cahntsua yungun xi matitjun. Hane hya xi cjuehe ngu xcusun xi cuacun vë hiscan xi ndajintjin xi cjuehe ne, yëjë ni xuta xi siu ladu tsëhë distritu Judea nixtin hya ne, ngutjen ni catangahma me hiscan ndetjun. ¹⁵Hacuaha jarë me xi hinchasun rcu ndava xi cuitujne me, hacuiin cujne me xi cuisehen me cahntsua ndihya cjuaha me mé tsëhë me xi cjuaha me. ¹⁶Hacuaha yo xi hinchataha me nguifña ne, mijí rë xi cuya cjue me ndava me xi cjuejaha ndastu tsjanga rë. ¹⁷Jemu chojyihí tsëhë yëjë ni yachjin xi hinchahma quihndi rë cojo yëjë me xi tjin rë quihndi vaqui ne nixtin hya. ¹⁸Chjahyun rë Nina xi cjuañihi vëhë ne, hacuiin cuinduva nixtin chan hnchan ta, ¹⁹cjuañihi xi cuma ne, ngu cjuañihi jyë xi cjëë camahani cumá hisca ntsacu cavetsihin ngasunhndë hacuaha cyaain cuatjin cuma. ²⁰Sá xi jemu cjín nixtin cjuacani rë cjuañihi vëhë ne, hisca ngu xuta ne, cuetjintjin me. Peru ngatsë rë cjuahmutacun xi tjin rë Nina cojo xuta xi cavaxijin me xi cumá me ladu rë me ne, sahmichuva me nixtin vëhë.

²¹Nixtin vëhë ne, sá xi yo xi cuichja cojo nuju xi ngajan o sá xi ngehe tacun me xi má Cristu, xi camacjain nuju ta quixiin xi chja me. ²²Ngujo xuta vindacha ne, cuichja me ta: “Ngahan xi Cristu xi cumatitjun ngahan tsujun.” Ngujo ngu me ne, cuichja me ta: “Ngahan xi chjá cjuarë Nina.” Peru vindacha ni me, quixiin cjuarë cuichja me. Hacuaha sahmi me xcusun sacuaha cjuarcun, tsëhë xi hisca cojo xuta xi cavaxijin Nina meje cuindacha me. ²³Nechun cuidadu ta cojo chaja sa xi cuechu nixtin vëhë ne, ngahan ne, ha casua camachaya nuju xi cuatju vë.

Xi cuya nga Jesús ne, cumatsejen hasen rë ngahña rë me

²⁴Xi cuatjun nixtin tsëhë cjuañihi jan ne, cuinduva nixtin xi cjuë ndavá rë tshui. Sá ne, hacuaha ha quihndë suaain ndavá rë. ²⁵Hane niñu ne, cuixu tsëhë ngahnga. Hisca ngahña xi yaha ngahnga ne, cjuiniyaya. ²⁶Xcun cjuacjintacun vëhë ne, scuëë xuta xi ngahan, Quihndi rë Xuta Jain, cuinduvá ngajñi rë yufí cojo jemu jyë ngahña hisca seti tsejen ngahan xi nduvá. ²⁷Hya

ne, tsingátju ángel naha yějē ni ladu tséhē ngasunhdē, cjujejaha rē yějē xuta naha xi cavaxejen, sahmi tangun rē hiscan tejña.

²⁸ Quihndē ne, cuetaharcun ngujo cjuata tséhē yaxujun xi chine tú rē. Hya xi cuetsihin cumá xcuen tsja rē yaxujun jan tséhē xi cuetsihin cuetjusehen ne, ngayun ne ha hyun ta ha jemu camatiña chan tsi. ²⁹ Hacuaha xi cjujehe cjuañihi xi cachjá cojo nuju ne, véhē sua cumachaya nuju ta ha tiña tacun xi cjuē ngasunhdē, hisca meje cumá. ³⁰ Cuichja cjuaquixi cojo nuju ta xuta xi siu quihndē ne, siu cuaha me hya xi cuetjucaa xcusun xi cachjá cojo nuju. ³¹ Cuechu nixtin xi cjuē nangui, cjuē ngahnga. Peru cjuata naha ne, tsajin nixtin xi cjuē.

³² Sacuaha nixtin xi cuetjucaa cjuatacun véhē ne, tsajin yo vée rē janihya cuetjucaa. Hisca hvíin ángel xi siu ngahnga. Hisca hveen ngahan xi Quihndi rē Nina. Suva ni Nina ngu tutu nahmi naja ne, me véhē xi vée me janihya cumá.

³³ Véhē xi nechun cuidadu, hacuaha ningascun rē hitsē cjuatacun nuju ta, ngayun ne, hyuun janihya xi cjujehe Nai nuju. Véhē xi chjá cojo nuju ta ningascun rē hitsē cjuatacun nuju ta ngayun ne, hyuun janihya cúa, ¿há jñu ne?, ¿há ñahñu cjuéhē? ³⁴ Ngahan ne, sacuaha ngu xuta xi cuetju cjuē ngu nangui cjin. Chaja sa xi cuetjun me tséhē ndava me, cuichja me cojo mosu rē me mé xa sahmi jimangu mosu. Hacuaha cuitexa ngu mosu xi cuahacuenda tingotjo ndava me. Cuatjin sahme. ³⁵ Véhē xi chjá cojo nuju ta ningascun rē hitsē cjuatacun nuju ta ngayun ne, hyuun janihya cúa, ¿há jñu ne, há nixten ne, há tiña sahasen, o sa sahasen camahani cúa? Sa xi ñahñu cjuéhē hane tsajin tjin chjine ngayun. ³⁶ Cuidadu sá xi ngu ñahñu nduvá hane ngayun ne, tsajin tjin chine ngayun. ³⁷ Xi chjá cojo nuju ne, ha cuanitivin ni chjá cojo yějē ni xuta: Meje rē xi catitsingasca me hitsē cjuatacun rē me. —Cuatjin cachja Jesús.

14

Me xi matitjun ne visiajmicjin me hacutjin cuma xi cjué Jesús ndavaya

¹ Hya xi camá ne, casahmi chaja sa jo nixtin xi cuechu suhi tséhē pascua ne, sacuaa xcusun nihi ne, hya chini pan xi tsajin san rē. Ngajan xi nahmi xi matitjun jan cojo cha maestru tséhē ley ne, jemu tivangui me chuva rē xi cuindacha me Jesús, cojo sa xi cuma cjuaha me me tsiquehen me me. ² Peru cachja me cojo xicjin me cuitjin:

—Ndatjin xi cuinechanyan ne, cuatju suhi sehe chjahanhma cha, ta sá xi tsajin ne, tu cumacjan rē xutacjin hane cumá ngu sué jyē.

Cavitejnu ngu chjuun aceite xi jemu ndaja jne rcu Jesús

³ Hya ne, Jesús ne, nandya Betania quitaha me. Tacun me ndava cha Simón, cha xi camandaja tséhē chíhin cjan rē xi cafaha rē chuxin yojo rē. Hora xi tacun me tjiné me niñu ne, cafehe ngu na xi yaha na ngu frascu ndyojo, hinchha aceite tséhē nardo xi jercu hnga chjí rē. Hane xi cavotohosun na rcu frascu hiscan hinchha aceite jan ne, sehe quiji cavitejnu na aceite jan rcun Jesús. ⁴ Ngujo me xi siu jan ne, camacjan rē me xi cuatjin casahmi na. Hane sehe cachja me ngajñi rē me cojo xicjin me cuitjin:

—¿Mé má cuatjin tu catsinguetsun na aceite vē? ⁵ Sá xi xteña vē, sacú tujún sacuaa tujún xi sacú rē ngu mosu xi casahmi xa ngu nu, hane tujún véhē ne, cuma cuisecoo rē xuta yuma. —Cuatjin cachjataha me na.

⁶ Ngajan xi cachja Jesús cuitjin:

—Xi canujuun tséhë na. ¿Mé má cuatjin tivichuncjun tséhë na? ta, jemu venguichji rë xcusun xi casahmi na cojo ná. ⁷ Xuta yuma ne, yëjë nu yëjë nixtin siu me ngajñi nuju. Peru ha ndaja ngahan ne, hacuiin jyë nixtin tejña cojo nuju. ⁸ Na vihi ne, casahmi na hacutjin xi chutaha na. Hane cojo chaja sa xi cueya ngahan ne, cavitejnu ná na aceite xi cuëhëchjine ni na yojo naha xi seyaniji ngahan. ⁹ Cuichjá quixë cojo nuju ta tuyani tséhë jingujyë ngasunhdë xi cuichja xuta cjua tséhë Nina ne, hacuaaha cueyanangui me na vihi cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

Judas ne, viteña me Jesús

¹⁰ Hya xi camá ne, cha Judas tséhë nandya Queriote, cha ladu rë Jesús tséhë cha xi tejó jan ne, quiji cha xcun nahmi xi matitjun ne, cavëhë chihin cha cjua cojo rë me xi sahmi me entregadu cha Jesús cojo rë nahmi jan. ¹¹ Hya xi cahndë nahmi xi matitjun jan cjua rë Judas ne, jercu ndama camahani rë me. Hacuaaha ngutjen ni cachja me ta, sua me cha tujún. Hane ngajan xi cha Judas jan ne, cavetsihin cavangui cha chuva rë hacutjin xi cuma sahmi entregadu cha Jesús.

Tisehen chjinë xi sinë me tséhë pascua

¹² Hya xi camá ne, nixtin tjun tjun tséhë suhi xi chini pan xi tsajin san rë, nixtin xi hacuaaha niqulihin chu tsánga tséhë suhi tséhë pascua ne, hya ne, cha ladu rë Jesús ne, cavinenguise cha cojo rë me cuitjin:

—¿Jani hiscan xi meje nuju xi cuanguin cuihinchjini xi xinëë nguixun tséhë suhi vi?

¹³ Ngajan xi catsingatju me jo cha ladu rë me quiji cha tixa. Hane cuitjin cachja me cojo cha:

—Tangun nandya Jerusalén. Hane ngajan cuechuntuhun ngu cha xi nduva ne, quisun rcu cha ngu nisa nandá. Tangun cojo cha hacutjin cjuí cha.

¹⁴ Hane ndihya xi cuisehen cha ne, tinújun cojo me xi nai rë ndihya jan cjua vihi: “Cuitjin chja maestru ta, ¿jarë cuarto hiscan xi sinë nguixun me cojo niji tséhë pascua?” Cuatjin tinújun cojo me. ¹⁵ Hane me vëhë ne, cjue tsingacun nuju me ngu cuarto jyë ngajan ndihya ngahnga hiscan xi ha tjin chjine. Hane ngajan tuhunndujun xi xinëë.

¹⁶ Hane ngajan xi cavetju cha xi cuacun jan quiji cha. Xi cafehe cha nandya Jerusalén ne, cuatjin camá tu tjin cachja Jesús cojo cha. Hane cavëhë ndaja cha xi sinë nguixun me cojo rë cha.

Pascua xi vijnetaha cajinë Jesús

¹⁷ Xi quiji hora jan ne, cafehe Jesús cojo yëjë tejó cha ladu rë me. Hane quiji me caviyuju me. ¹⁸ Sehe cavetsihin cajinë me. Hora xi tijinë me jan ne, ngajan xi cachja Jesús cuitjin:

—Nguehe cuichjá cojo nuju cjuaquixi ta ngu ngayun xi nechan tichine cojo nuju nguehe ne, nihñu ná entregadu. —Cuatjin cachja me.

¹⁹ Ngajan xi jemu choho camá rë cha, cavetsihin cha cachja cha chuva ngu chuva ngu cha, cuitjin cachja cha:

—Hacuiin ngahan.

²⁰ Ngajan xi cachja Jesús cuitjin:

—Ngajñi nuju xi tejó ngayun, ngajan jiyajñi ngu xi sahmi cuitjin. Ngu me xi ngu ni tyuva tsinguissehen quinda niñu naha cojo ne, me vëhë xi sahmi ná me entregadu. ²¹ Ngahan xi Quihndi rë Xuta Jain ne, hatuxa tjin xi cueyá ta,

xujun rē Nina ne, cuatjin chja. Peru xuma cha xi cuiteña ná. Vengui sa chji rē sá xi catsiin camahani cha.

Jesús ne, vindeya me xcusun rē pascua, cumá cena tsēhē Nai naja

²² Hora xi ha camatiña xi cuijnetaha sinē me niñu ne, cafaha Jesús ngu niñutsju, hane casua me nacuechji rē Nina, sehe cavotohocja me niñutsju jan. Hane sehe casua me ngu rquí ngu rquí niñu jan cha ladu rē me, hane cuitjin cachja me cojo cha:

—Juhun vihi ta, vihi ne, yojo naha. —Cuatjin cachja me.

²³ Hacuaha cafaha nga me ngu vasu xi hinchaxan rē uva, hane casua nga me nacuechji rē Nina. Hane sehe casua me tsē tsē cahvi cha jima ngu cha ladu rē me. ²⁴ Hacuaha cachja me cojo cha cjua vihi:

—Vihi jni naha xi cuetju ná ngatsē rē xuta. Xcusun vihi ne, ngu compromisu xatsē xi sehe tivēhēchihin Nina cojo xuta cojo sa xi jni naha ne, vēhē cuaxētje rē xuta. ²⁵ Cuichjá quixē cojo nuju ta ha quihndē cueen xan rē uva nguehe ngasunhndē. Cuēhē, peru hisca hya xi nduva Nina cuitexa me ngasunhndē, hya cuēhē, peru hacuiin tangun cumá. —Cuatjin cachja Jesús cojo cha ladu rē me.

Jesús ne, chja me ta Pedru cuichja me xi viin me yo xi Jesús

²⁶ Xi cajnetaha cajinē me ne, casē me ngu tsēhē Nina. Sehe cavetju me quiji me Naxi Olivu. ²⁷ Hane sehe ngajan xi chja me cojo cha ladu rē me cuitjin:

—Ngayujun ni ngayun cumanguaintacuun cojo ná ta cuma sacuaha camahindu xcun xujun rē Nina xi chja cuitjin: “Nina ne, tsiquehen me cha xi sahmi cuidadu rē chu tsánga. Hane chu tsánga ne, cuitsojo chu.” ²⁸ Cuatjin cumá, peru hya xi cúya nga cjuahñu naha ne, cjué titjun tsujun hiscan distritu Galilea.

²⁹ Ngajan xi cachja cha Pedru cojo Jesús cuitjin:

—Ha ndasa ngayējē cha xi cuicun vi cuejña suva cha ngayun ne, peru ngahan ne, cuejña nuju suvun.

³⁰ Ngajan xi cachja Jesús cojo cha cuitjin:

—Cuichjá quixē cojo ri ta tajñu ni xi chaja sa squindaya xahnda ne, ha jyan ndiya cuinojē xi hyiin yo ngahan. —Cuatjin cachja me.

³¹ Peru cha Pedru ne, cavuya cachja nga cha cjua vihi:

—Ha ndasa hisca cueya cojo nuju ne, peru cuichjaain xi hveen yo ngayun. —Cuatjin cachja cha.

Hacuaha cuanitjin ni cachja cha xi yahnga.

Jemu chja vatju Jesús ngajan Getsemaní

³² Hya xi camá ne, cavetju me quiji me ngu cahndē xi hmí rē Getsemaní. Ngajan xi cachja me cojo cha ladu rē me cuitjin:

—Nechun ni nguehe ne, cjué cuisiajme cojo Nina. —Cuatjin cachja me.

³³ Hya xi camá ne, cavaxē me cha Pedru cojo cha Jacobo cojo cha Juan, quiji me cojo cha. Ha xcun xi ha cjuí cjuí me jan ne, cavetsihin jemu casercun rē me, hacuaha macjincacun me. ³⁴ Ngajan xi cachja me cojo cha cuitjin:

—Jercu choho má camahani rē xahasen naha. Xi má ná ne, cueya tsēhē. Nechun ni nguehe cuacun ngayun cojo ná. —Cuatjin cachja me.

Oración xi tjun

³⁵ Sehe ngajan xi Jesús ne, quiji me hitsē ni nguvan. Hane ngajan cafañatsacjan me, cafehya rē me Nina sá xi tjin tu mé ni xi cumá cojo sa xi cuatjiin me cjuacjintacun xi cuatju me jan. ³⁶ Hane cuitjin cafehya rē me Nina:

—Papá. Xi cumá nuju ngayun ne, yějē ni xcusun ne, hacuiin chja cuma. Véhē xi tiféhya nuju xi naxuntjun ná tséhē cjuacjintacun xi cuátju cumá. Cuatjin meje ná, peru cja xi cuinújun ne, cuatjin catama. —Cuatjin cafehya rē me Nina.

³⁷ Hya xi camá ne, cavuya cafehe nga me hiscan siu cha ladu rē me xi quijicojo me jan. Hane xi vutsejen me ne, siufē cha. Ngajan xi chja me cojo cha Pedru cuitjin:

—Simón, ¿mé má tsjuñife? ¿Há camaji cavacun ngayun cojo ná hisca ngu hora? ³⁸ Nechun quicun, hacuaha chjahyun rē Nina cjuandaja rē me, cojo sa xi hacuiin chjaha chuva nuju cojo cjuatacun nuju. Xahasen nuju ne, ndaja meje rē xi nihñu, peru jojo nuju ne, chuva caa rē. —Cuatjin cachja me cojo cha.

Oración xi majo

³⁹ Hya xi camá ne, quiji nga me ngu ndiya hitsē ni nguvan. Hane ha cjuva véhē nga ni cavuya cafehya rē me Nina. ⁴⁰ Hya xi cavuya nga me ne, siufē nga cha ladu rē me xi jyan jan, tséhē xi ha quihndē ticaain rē cha xi jemu nijña rē cha. Xi catsingasca Jesús cha ne, sacuinyiin rē cha mé cuichja cha cojo me.

Oración xi má jyan

⁴¹ Xi cavuya me xi quiji me má jyan ndiya ne, cachja me cojo cha ladu rē me jan cuitjin:

—Ha tsjuñufun cuaha. Juun, peru ha camá. Ha cavechu hora xi ngahan, Quihndi rē Xuta Jain, cjuaha ná xuta tsehen ta, ha caxteña ngahan. ⁴² Tisatjunhngun, cuanguen chutsejen ta, ha nduva cha xi sahmi ná entregadu. —Cuatjin cachja me.

Cjuicojo cha Jesús ndavaya

⁴³ Ha tu tichja cuaha Jesús cojo cha ladu rē me ne, cafehe cha Judas, cha xi cojo jiyajñi ngajñi rē cha xi tejó jan. Hacuaha jercu cjin xuta tivisecoo rē cha hora xi nduva cha. Yaha me quicha. Yaha me ya. Nahmi xi matitjun cojo cha maestru tséhē ley cojo xuta changá jan ne, me véhē cavitexa me xutacjin jan xi quiji jaha me Jesús. ⁴⁴ Chaja sa xi cjujehe cha Judas cojo xutacjin jan hiscan tacun Jesús ne, ha cachja cha cojo xuta jan cjuva vihi:

—Cha xi cjuē cuitátsuha xi suá rē nina ne, cha véhē xi hacui cha. Chjuhun cha, hacuaha nihñu cha, sehe tangun cojo cha. —Cuatjin cachja cha.

⁴⁵ Xi tu cavechu cha hiscan nduva Jesús cojo cha ladu rē me xi yahnga jan ne, ngutjen quiji casahmi tiña cha tséhē me, hacuaha casua cha me nina cuitjin:

—Cuhndanu, Maestro. —Cuatjin cachja cha.

Cafē cachja cha cuitjin ne, sehe cavitatsuha cha Jesús. ⁴⁶ Hya xi camá ne, quiji xuta jan ne, cafaha me Jesús.

⁴⁷ Ngajan xi ngu cha xi secun jan ne, cavaxē cha quicha nduju rē cha, hane cavaja rē cha ngu cha mosu rē nahmi xi matitjun ne, cavatēsun cha ngu ladu tyjavañuju. ⁴⁸ Ngajan xi cachja Jesús cuitjin:

—¿Mé má sacuaha vangun chjuhun xuta chējē ne, cuatjin nduvun chjuhun ná? ta, quichuhun quicha quichuhun ya. ⁴⁹ Ngahan ne, nchunchujun ni caviteñaya yungun xi matitjun, cavicuyá rē xuta, hane ¿mé má cachjuun ná ngajan? Juun, peru cuatjin tijima cojo sa xi cuetjucaa jain hacutjin camahindu xcun xujun rē Nina.

⁵⁰ Hya xi camá ne, cha ladu rë Jesús ne, cavejña suva cha me, hane café yëjë cha cavanga cha.

Cha nixti xi cavanga hya xi cachjahá rë Jesús

⁵¹ Ngu sa cha jan yaja cha ngu tsjian tu të ni. Hane xi tu meje cjuaha xuta cha jan ne, tsjian ni rë cha cama cafaha me. ⁵² Peru cha vëhë ne, cama cavanga cha tu quixti ni.

Ficojo cha Jesús xcun nahmi xi matitjun

⁵³ Hya xi camá ne, quijicojo xuta jan Jesús xcun nahmi xi matitjun. Hane xi cafehe cha cojo Jesús jan ne, sehe camatangun yëjë ni nahmi xi matitjun cojo xuta changá cojo cha maestru tsëhë ley. ⁵⁴ Ngajan xi cha Pedru ne, quijitjengui cha Jesús tu cjin tu cjin ni. Cafehe cha hiscan ndatsen ndava nahmi xi matitjun jan. Hane ngajan cavéjña cha cojo cha nísë tjehe ndava ndihi, tsihasu rë cha yojo rë cha cojo cha nísë jan.

⁵⁵ Hane nahmi xi matitjun jan cojo yëjë sa xuta xi matitjun ne, cavangui me xuta xi tsinguixi jyë rë Jesús, cojo sa xi cuma tsiquehen me me. Peru tsajin mé jyë rë Jesús casacu rë me. ⁵⁶ Ha ndasa jemu cjin xuta xi cavinchajyë me Jesús ne, peru suva cjuandesu yëjë ni cjua xi cachja me ta, hacjahi chja ngu ne, hacjahi chja ngu. Hacuiin tangun má cjua rë me. ⁵⁷ Ngujo me ne, chja me ta cahndë me xi cuitjin cachja Jesús; ⁵⁸ “Ngahan ne, tsinguétsun yungun xi matitjun xi casahmi xuta vë, hane cahntsua xi jyan nixtin ne, sahme nga ngu. Peru hacuiin cojo tsja xuta xi cuma hya.” Cuahaxutjin cahndë me xi cachja Jesús. ⁵⁹ Hisca me xi cuacun jan ne, hacuaha hacuiin tangun camá cjua rë me.

⁶⁰ Ngajan xi nahmi xi matitjun tsëhë nahmi xi yahnga jan ne, casecunvasen me, hane sehe cavinenguise me Jesús cuitjin:

—¿Há chjayinnguini hisca xi ngu cjua tsëhë jyë riji xi vincha xuta xi cuicun vi? —Cuatjin cachja me.

⁶¹ Hane Jesús ne, tu jyu ni casecun me. Hisca ngu cjua cafayanguiin me. Hya xi camá ne, cavinenguise nga nahmi xi matitjun jan ngu ndiya cojo Jesús cuitjin:

—¿Há ngaye xi Quihndi rë Nina naja? ¿Há ngaye xi catsingatju me xi cumá titjun tsijin?

⁶² Ngajan xi cafayangui Jesús cuitjin:

—Juun, ngahan. Hacuaha cjuehe nixtin xi chutsujun ná xi tejña ladu quixi tsëhë Nina. Hacuaha chutsujun ná xi cuinduva ngajni rë yufi, xi cúa nga tsëhë Nina.

⁶³ Hane ngajan xi nahmi xi matitjun jan ne, jemu camacjan rë me ne, hisca tsjian rë me cavicheya me. Hane cuitjin cachja me:

—¿Mé sa cjua xi mameje? ⁶⁴ Ngayun ne, ha canuhyun hacutjin xi tsixcuehyu cha Nina. ¿Mé xi nújun quihndë?

Ngajan xi yëjë xuta jan ne, cachja me ta meje rë xi cueya Jesús.

⁶⁵ Hane cavetsihin ngujo me cavëhë natya me Jesús. Hane hacuaha cavatsa me xcun Jesús, sehe cavetsihin cavaja me. Sehe ngajan xi cachja me cuitjin: —Tinoje yo xi cavaja ri.

Hya xi camá ne, cavetsihin xi cha nísë jan ne, jemu cavaja cha me.

Pedru ne, fahma me Nai naja

⁶⁶ Jinguyëjë rë xi cuatjin tijima ne, cha Pedru ne, tacun cha ndatsen ndihya. Hya xi camá ne, hora vëhë canduva ngu na xi sahmi xa ndava nahmi xi

matitjun jan. ⁶⁷ Hane cavëë na xi tacun cha Pedru tsihasu rë cha yojo rë cha hiscan tacun ndava ndihi. Hane casecun na cafaahuenda na cha. Sehe ngajan xi cachja na cojo cha cuitjin:

—Ngayun ne, ladu rë Jesús tsëhë nandya Nasaret ngayun.

⁶⁸ Ngajan xi cachja cha Pedru cuitjin:

—Hisca hveen mé xi noje.

Hya xi camá ne, sehe cavetju cha quiji cha casecun cha hiscan tu cuiseen ni tsëhë ndatsen ndihya. ⁶⁹ Hane ngajan xi na xi sahmi xa tsëhë nahmi jan ne, cafaahuenda nga na cha hiscan quisekun cha. Hacuaha cavetsihin nga na cachja na cojo xuta xi hinchacun jan cuitjin:

—Cha vëhë ne, ladu rë Jesús má cha.

⁷⁰ Xi tu cahndë cha Pedru xi cuatjin cachja na jan ne, ngutjen cafaayangui cha xi quixiin xi chja na. Xi caffè ngu hora lihndi ne, hacuaha cachja xuta xi hinchacun jan cojo cha cuitjin:

—Quixi jain xi ladu rë Jesús má ngaye ta distritu Galilea ne, ngajan nangui riji.

⁷¹ Sehe ngajan xi hisca Nina caveyanangui cha Pedru ne, cachja cha xi hvín cha me, cuitjin cachja cha:

—Vëë Nina jain xi hveen yo me xi nújun vë.

⁷² Hane hora vëhë ne, cajihnda xahnda. Hya xi camá ne, catsinguitsjen cha Pedru cjuu xi cachja Jesús cojo cha xi cachja me cuitjin: “Chaja sa xi squihndajo xahnda ne, ngaye ne, ha jyan ndiya cuinoje xi hyiin yo ngahan.” Hora xi catsinguitsjen cha cjuu vëhë ne, cajihnda cha.

15

Ficojo cha Jesús xcun Pilatu

¹ Hya xi casahasen xi camá nchujun jan ne, camatangun nga nahmi xi matitjun cojo xuta changá cojo cha maestru tsëhë ley cojo yahnga sa xutaxa rë xi hinchajñi me. Sehe catsihñu me Jesús ne, sehe quijicani me xcun gobernador xi hmí rë Pilatu. ² Xi cafehe me cojo Jesús xcun Pilatu ne, sehe cavinenguise Pilatu cojo Jesús cuitjin:

—¿Há ngaye xi matitjun ngaye tsëhë xuta nangui Israel?

Ngajan xi cafaayangui Jesús cuitjin:

—Cuatjin sacuaha canújun vë.

³ Hane ngajan xi nahmi xi matitjun jan ne, jemu cjín xcusun jyë xi cavincha me tsëhë Jesús. ⁴ Ngajan xi Pilatu ne, cavuya cavinenguise nga me Jesús cuitjin:

—¿Há chjayinguiin camahani? Jercu cjín jyë riji cavincha me.

⁵ Peru Jesús ne, ha quihndë cafaayinguiin camahani me. Hane Pilatu ne, jemu quijircun camahani rë me.

Hacuiin Jesús ta Barrabás mandaya

⁶ Suhi vëhë ne, Pilatu ne, ha tuxa xcusun rë me xi nu nu ni vëhëndaya me ngu presu xi meje rë xuta xi cumandaya. ⁷ Ndavaya ne, jiya ngu presu xi hmí rë Barrabás cojo ngujo sa presu xi catsiquehen rë xuta tsëhë ngu si. ⁸ Hya xi camá ne, canduva xutacjin ne, cafehya me cojo Pilatu xi sahmi me vëhë sacuatjin xi ha xcusun rë me. ⁹ Ngajan xi cachja Pilatu cojo rë xuta jan cuitjin:

—¿Há meje nuju xi cuaxë cha xi matitjun tsujun?

¹⁰ Cuatjin cachja Pilatu ta tsëhë xi ha vëë me xi ngatsë rë cjuaxin sahmi nahmi xi matitjun jan cojo Jesús, vëhë xi quijicani me Jesús ngajan. ¹¹ Peru

nahmi xi matitjun jan ne, quiji cavinchangui me xutacjín jan xi meje rë me xi cuichja xuta jan xi catëhëndaya Pilatu Barrabás. ¹²Ngajan xi cavinenguisse nga Pilatu cojo xutacjín jan cuitjin:

—¿Mé sahme cojo cha xi nújun xi matitjun tsujun ni?

¹³Ngajan xi xuta jan ne, cuitjin jercu cachja me:

—Tetuhun cha xcun cru.

¹⁴Ngajan xi cachja Pilatu cojo rë me cuitjin:

—Peru ¿mé xi choho casahmi cha?

Peru xuta jan ne, hitsë sa rcu cachja me cuitjin:

—Tetuhun cha xcun cru.

¹⁵Hya xi camá ne, ta meje rë Pilatu xi cumangucacun xuta ne, cavëhëndaya me Barrabás. Hane xi cavatju catsingatju me Jesús casehen rë ne, sehe cavuya casua nga me cojo cha sindadu xi cjue cuetaha cha me xcun cru.

Jesús ne, quisun ngu corona tsëhë nahya rcu me

¹⁶Hya xi camá ne, quijicojo cha Jesús taha cahntsua hinchua hiscan ndatsen ndava Pilatu. Hane sehe casahmi tangun sa cha yëjë sindadu cjín.

¹⁷Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani. Hacuaha catsihya cha ngu corona nahya xi cavesun cha rcu me.

¹⁸Sehe cavetsihin cavincha cha viva rë me xi tsixcuehyu cha me, sacuaaha xi macjain rë me xi me vëhë matitjun me tsëhë xuta tsëhë nangui Israel.

¹⁹Hya xi camá ne, sehe cavaja cha ngu rquí ya rcu me. Cavëhë natya cha me. Hacuaha cavixcuhnchi cha xcun me, sacuaaha xi faharcun cha me.

²⁰Hya xi cajnetaha catsixcuehyu cha me cuatjin ne, sehe cavaxë cha tsjian hani xi catsicaja cha me, hane sehe cavuya catsicaja nga cha me tsjian rë me xi tsëhë jain me. Hya xi camá ne, sehe quijicojo cha me xi cuetaha cha me xcun cru.

Cavetaha cha Jesús xcun cru

²¹Ndiya cjui cha cojo me ne, cavechutaha cha ngu xuta changá xi hmí rë Simón tsëhë nandya Cirene, nahmi rë cha Alejandro cojo cha Rufu. Nduva me xi quiji me nguñña. Hane xi cavechutaha cha me, casahmi cha me nguuyë xi cuesuntyja me cru rë Jesús. Hya xi camá ne, cavesuntyja me, sehe quiji me cojo.

²²Sehe cavechu yëjë xuta jan hiscan xi hmí rë Gólgota, cjua xi meje cuichja Naxi Nínda Rcuun. ²³Sehe xuta jan ne, tisua me xan rë uva xi tecjan rë nandá rë tyjungunsa xi cuihi Jesús, peru cahviin me. ²⁴Hya xi camá ne, cavetaha cha me xcun cru. Hane tsjian rë me ne, cavincha rë cha ngu suerte ne, sehe cumatsejen mé xcusun tsjian rë me xi satë rë xingu xingu cha.

²⁵Hya ne, chuva rë fane ñaja tsëhë nguitajñu. ²⁶Hane camahindu ngu letreru cojo jyë rë me xi chja cuitjin: “Me xi Matitjun tsëhë Xuta nangui Israel.” Sehe quiji casetaharcu cru. ²⁷Hacuaha cavityanguí cha ngu chëjë ngu ngu ladu rë tjeheh rë me, jimangu cojo cru rë. ²⁸Cuatjin cavetjucaa cjua xi camahindu xcun xujun rë Nina xi chja cuitjin: “Cuichja xuta ta me vihi ne, ngu xuta tseheh me.”

²⁹Hya xi camá ne, xuta xi cavatju jan ne, xi catsixcuehyu me Jesús ne, catsiniya me rcu me, hacuaaha cuitjin cachja me:

—Canoje xi cuma ninguetsin yungun xi matitjun, hane cahntsua xi jyan nixtin ne, cama nga canindeje sove. ³⁰Quihndë ne, sá cuatjin cuma nihñi ne, naxetje sove yojo riji, titujni tsëhë cru vë. —Cuatjin cachja xuta.

³¹Ha chuva vëhë ni, cavisiajmi nahmi xi matitjun cojo cha maestru tsëhë ley ne, ngajñi rë me cojo xicjin me xi tsixcuehyu me Jesús. Cuitjin chja me:

—Cavaxëtje cha xuta, peru quihndë ne, maji vaxëtje cha yojo rë cha. ³² Sá xi hacui jain cha xi catsingatju Nina xi cumatitjun tsajan ne, catitujne cha tséhë cru chutsejen, cojo sa xi cumacjain naja tséhë cha. —Cuatjin cachja me tséhë Jesús.

Hacuaha cha chëjë xi cojo xtyangui taha cru jan ne, cojo cha choho cachja cha tséhë me.

³³ Xi camanchisen tséhë nixtin vëhë ne, jingujyë ni ladu vëhë ne, camajñu. Jyan hora quijicani rë. ³⁴ Xi café jyan hora vëhë ne, jercu cajindaya Jesús, cachja me hne rë me cuitjin:

—Eloí. Eloí, ¿lama sabactani? —cjua xi meje cuichja cuitjin: Ngayun, Nina naha, ¿mé má canismutacun ná?

³⁵ Hane ngujo xuta xi hinchacun jan ne, xi cavijniinrcu me hne rë Jesús ne, xi má rë xuta jan ne, nima Elías, ngu profeta tséhë nixtin hatsëë, jindaya Jesús me.

³⁶ Hane sehe cavanga ngu me quiji catsicahnchi me ngu tsjian hinda cojo xan rë uva xi ha san. Sehe cavetaha me rcu ngu ya nduju, sehe cavetaha me hntsua Jesús xi cuihingui me. Hacuaha chja me cojo xicjin me cuitjin:

—Cuinechanyan hitsë ne, ¿há cuinduva jain Elías tsitujne me Jesús tséhë cru?

³⁷ Peru Jesús ne, hora vëhë jercu cajindaya me, hane cahme me.

³⁸ Hacuaha hora vëhë ni ne, tsjian nduju xi tyangui cahntsua yungun xi matitjun ne, hisca rcu hiscan ntsacu canduva catiyavasen. ³⁹ Hya xi camá ne, ngu cha capitán tséhë sindadu xi secun tiña cru hisca tyangui Jesús jan ne, xi cavëë cha hacutjin xi cahme Jesús ne, ngajan xi chja cha cuitjin:

—Cjuaquixindaja xi me vihi xi Quihndi rë Nina me.

⁴⁰ Hacuaha hinchacun sa ngujo yachjin, vutsejen na tséhë cjin ni. Ngajñi rë na xi cuacun vëhë ne, quisecon na Salomé cojo na María tséhë nandya Mágdala cojo na María naa rë cha Jacobo lihndi cojo cha José. ⁴¹ Na yachjin xi cuacun vë ne, cojo na cavisecoo na catsindaja na xi cajinë Jesús cojo cha ladu rë me, hya xi catsujihya me ngajan ladu tséhë distritu Galilea. Hacuaha jercu cjin sa yachjin hinchacun na jan xi hacuaha cojo na quiji na ngajan nandya Jerusalén cojo Jesús.

Jesús ne, caseya me tsjun rë me

⁴² Nixtin xi cahme Jesús ne, hacuaha hya vispra tséhë nixtin xi chjahájenda rë. Hane xi quiji hora jan ne, ⁴³ ngu xutaxa rë xi tjemu chjahanrcun rë, xi hmí rë José tséhë nandya Arimatea, me xi hacuaha tacunya nixtin xi cjeuhe Nina cuma titjun me tséhë yëjë Israel, cavejñahñu me cjuatacun rë me sehe quiji me ndava Pilatu. Hane cafehya me cahndë cojo Pilatu xi cjuahaxin me nima Jesús. ⁴⁴ Hya xi camá ne, Pilatu ne, quijircun rë me xi cuatjin cachja José xi ha cahme nima ta, tséhë xi cjëë jyë hora xi casetaha Jesús xcun cru. Hane vëhë xi catsingatju me quiji chjaha rë cha capitán. Hane sehe cavinenguisse me cha sá xi quixi xi ha cahme jain Jesús. ⁴⁵ Xi tu camachaya rë me cjua tséhë cha capitán jan xi ha cahme jain Jesús ne, sehe ngajan xi cachja me cojo José ta cuma cjue tsitujne me nima. ⁴⁶ Ngajan xi José ne, vëhë ta cavatsë me ngu tsjiantë xatsë ne, sehe quiji catsitujne me nima Jesús tséhë cru, sehe cavaxtë rë me tsjian jan. Hane sehe cavaha me nima quijicojo me hiscan tacun rë me ngu tsjun xi cafahanguitaha me cahntsua ngu naxi. Hane ngajan caveya me nima. Sehe catsindefajne me ngu ndyojo jyë xi cavechja rë tingotjo tsjun jan. ⁴⁷ Hane na María tséhë nandya Mágdala cojo na María naa rë cha José ne, cavëë na hiscan caseya nima.

16

Vuya nga Jesús cjuahñu

¹ Xi camá nguixun tséhë nixtin xi chjahájenda rë jan ne, na Salomé cojo na María tséhë nandya Mágdala cojo na María naa rë cha Jacobo ne, cavatsë na rqui xi ndaja jne xi cuitejnu na nima. ² Xi casahasen domingu ne, hora xi tivetjucaa tsuhi ne, cavatju na yachjin jan quiji na hiscan tacun tsjun rë nima. ³ Hane ngajñi cju na jan ne, ngajan xi chja na cojo xicjin na cuitjin:

—¿Yo cuisecoo naja xi nindefajne ndyojo xi quitaha tingotjo rë tsjun jan?

⁴ Peru xi tu cafehe na jan ne, ndyojo jyë xi quitaha tingotjo rë tsjun jan ne, ha quihndë tsajin quitaha cahndë rë ta ha xin jiña. ⁵ Xi cavisehen na cahntsua tsjun jan ne, cavëë na ngu cha xi tacun cha taha ladu quixi, yaja cha ngu tsjian tyava nduju. Hya xi camá ne, jemu catsacjun camahani na. ⁶ Ngajan xi cachja cha cojo rë na cuitjin:

—Xicarcuun. Ngahan ne, ha hvë xi Jesús tséhë nandya Nasaret vinchun-sun me, me xi cavetaha xuta xcun cru. Peru me vëhë ne, tsajin me ngeuhe ta cavuya cjuahñu rë me. Chutsujun cahndë hiscan xi cafaña xuta me. ⁷ Quihndë ne, tjangun sanii ne, tinújun cojo cha ladu rë me, cha Pedru ne cojo cha xi yahnga ta, Jesús ne, hisca tjun cuechutaha me yun ngajan distritu Galilea sacuahatjin xi ha cachja me cojo nuju.

⁸ Xi tu cavetju na tséhë tsjun jan ne, ña fatsë na xi jemu catsacjun na camá. Hane vanga sanii na cafe na. Hane hisca xi ngu cachjaain na cojo, tséhë xi jemu catsacjun na camá.

Jesús ne, ñahñu ni camatsejen me na María Magdalena

⁹ Jesús ne, xati camaha sa tséhë nixtin domingu ne, hya cavuya cjuahñu rë me. Hya xi camá ne, tjun sa na María tséhë nandya Mágdala cavëë na me, na xi cavaxë me yatu xitsehen xahasen rë hatsëë. ¹⁰ Hane na vëhë quiji quicun na xuta ladu rë me xi jemu jihnda tséhë cjuachoho. ¹¹ Hane xi cahndë me cjuata Jesús tacun nga me cjuahñu hane na vëhë ne, cavëë na me, camacjaain rë xuta jan.

Hya xi cavuya Jesús cjuahñu ne, jo cha ladu rë me cavëë cha me

¹² Hya xi cavatju vëhë ne, jo cha ladu rë Jesús ne cju na nguñña. Hane cojo Jesús cju me cojo cha, peru ha ngu xcusun jyihi me. ¹³ Hane cha xi cuacun jan ne, xi tu cavëë cha xi hacui me ne, cavuya cha ne, quiji cachja cha cojo cha xi yahnga xi cavëë cha me. Peru hacuaha camacjaain rë cha xi yahnga jan.

Jesús ne, casuaxa me cha apóstol

¹⁴ Ngu ndiya nga ne, cafehe nga me hiscan siu cha ladu rë me xi tengu jan, tijinë cha niñu. Hane cachjataha me yëjë ni cha ngatsë rë xi jemu taja rcu cha, tséhë xi camacjaain rë cha tséhë xuta xi cavëë rë me xi tacun nga me cjuahñu. ¹⁵ Cavatju cacjan me cojo cha ne, sehe ngajan cavetsihin cachja me cojo cha cuitjin:

—Tangún jingujyë ni ngasunhndë ne, tinújun cojo yëjë ni xuta cjuata rë Nina.

¹⁶ Yo xi cumacjain rë cjuata vëhë hacuaha xtenda ne, cuechu xcun Nina. Yo xi cumacjaain rë ne, cuechu me castigu xi sahmi Nina xi cueyun. ¹⁷ Hane xuta xi cumacjain rë me ne, sahmi me xcusun vihi xi cueyanangui me ñihi naha ne: cuma cuaxë me xitsehen xi hincha xahasen rë xuta; cuma cuichja me ngu ngu xcusun hne; ¹⁸ yë ne, sá xi cjuahatsja me chu, o sá xi cuihi me ngu

venenu ne, tsajin mé cumá rë me; hane tu cuetahatsja ni me xuta hmu rë ne, cumandaja xuta hmu rë jan.

Jesús ne, cjuiniji me ngahnga

¹⁹ Xi cajnetaha cachja Jesús, me xi Nai naja, cojo cha ladu rë me cjuva vëhë ne, quiji me ngahnga, cavéjña me ladu quixi tsëhë Nina. ²⁰ Hane cha ladu rë me ne, cavetju cha quiji cha, cachja cha cjuva rë Nina yëjë ni ladu. Hacuaha Nai naja ne, cavisecoo me cha. Hane ngatsë rë xcusun xi cavëë xuta xi casahmi cha jan ne, vëhë xi tsejen xi quixi cjuva xi cachja cha.

Cjuandajyihí Xi Catsihindu San Lucas Tsëhé Jesucristu

¹ Jemu cjin xuta xi ha catsihindu me cjuá xi chja tsëhé yëjë xcusun xi sehe casahmi Nina ngajñi naja ngayaan xuta ngasunhdë. ² Meje tsihindu me cjuá vëhé sacuatjin camahani casua camachaya naja me xi cavëëndaja cojo tuxcun hisca ntsacu cavetsihin sehe cafa-haxa me xi tsinguitsojo me cjuá jan. ³ Hisca hatsëë ne, ngahan ne, hacuaha ha jemu ndaja cavinenguësë yëjë ni hacutjin camá. Vëhé xi xi má ná ne, hacuaha ndatjin xi tsihindu chichihin nuju cjuá tsëhé yëjë hacutjin camá, ngayun tatá Teófilo, ⁴ cojo sa xi sacúndaja nuju cjuaquixi tsëhé cjuá xi ha camachaya nuju jan.

Cafehe cjuá xi tsin Juan Vitenda rë Xuta

⁵ Nixtin hya xi Herodes cavitexa me yëjë ni xuta tjë rë Israel ne, cavëjña xu ngu nahmi xi hmí rë Zacarías, me xi má ladu rë Abías. Hane chjuun rë Zacarías ne, Elisabet hmí rë me, hacuaha tjë rë Aarón xu má me. ⁶ Hane Zacarías cojo Elisabet ne, tyjahi cjuatacun rë me xcun Nina ta, tsëhé xi tsajin xu jyë rë me xi tisahmichihin me yëjë ni sacuatjin cavitexa Nina. ⁷ Hane tsajin rë me quihndi ta, tsëhé xi Elisabet ne, hatuxa maji xu sacú rë me quihndi, hacuaha catsijo ni me ne, ha jemu changá xu me.

⁸ Hya xi camá ne, cavechú nixtin xi casatë rë Zacarías cojo yëjë sa nahmi xi má ladu rë Abías xi sahmi xu me xá xcun Nina xi má me nahmi. ⁹ Hane sacuaha xcusun rë nahmi ne, catsintsavë xu me ngu suerte cojo sa xi cuma tsejen ne, jarë xu me xi satë rë xi cuisehen ndava Nina, cuaca tyjungunsa. Hya xi camá ne, casatë xu rë Zacarías. ¹⁰ Hane yëjë xutacjin jan ne, caviyuju xu me candatsen sahmi me oración rë me, hora xi tivaca xu Zacarías tyjungunsa cahntsua ndava Nina. ¹¹ Hane hora xi tivaca me tyjungunsa jan ne, camatsejen xu ngu ángel secun taha ladu quixi tsëhé ngasuncun hiscan xi tí tyjungunsa. ¹² Hane xi cavëë Zacarías ángel jan ne, jemu quijircun rë me hacuaha jemu catsacjun xu me camá. ¹³ Ngajan xi ángel jan ne, cuitjin xu cachja cojo rë me:

—Xicarcuin ngaye Zacarías ta, cjuá xi cachjahye ne, cahndë Nina. Vëhé xi na Elisabet chjuun rijí ne, sacú rë na ngu quihndi, hane quihndi vëhé ne, Juan the ñihi rë. ¹⁴ Hane jemu cjue ri cjuasua hacuaha jemu ndaja cuma ri, hacuaha jemu cjin xuta xi jercu tjin rë me cjuasua xi catsin quihndi vëhé ta, ¹⁵ tsëhé xi jemu jyë hnga cuma cojo cjuatacun rë ngajan xcun Nina. Hacuaha cuiin camahani xan hacuaha cuiin camahani nandá machihi. Hacuaha hisca hya xi caseya quihndi vë cahntsua naa rë ne, Hasen rë Nina quitsë rë xahasen rë. ¹⁶ Hacuaha quihndi vëhé sahmi xi jemu cjin xuta tjë rë Israel cuya nga me ndiya rë Nina rë me. ¹⁷ Quihndi vë ne, vëhé cuinduva titjun, sehe cuinduva Nina. Hane sacuatjin jyë hnga profeta Elías cojo cjuatacun rë me hatsëë nixtin ne, hacuanitjin ni jyë hnga cuma quihndi vëhé cojo cjuatacun rë, cojo sa xi quihndi vëhé ne, sahmi xi cuya cuma ndaja cacun nga yëjë ni nahmi rë nixti cojo nixti rë me, hacuaha sahmi xi yëjë xuta xi vihndiin me tsëhé Nina ne, cuma tangun cjuatacun rë me cojo cjuatacun rë xuta xi tyjahi cjuatacun rë me. Hane cuatjin chuya vëhé ne, cuëhëchjine quihndi vëhé xuta xi cuihndë me tsëhé Nina. —Cuahaxutjin cachja ángel.

¹⁸ Sehe ngajan xi Zacarías ne, cuitjin xu cavinenguise me ángel:

—¿Hacutjin sacú ná cjuaquixi xi cuatjin jain cuma ni? ta ngahan ne, ha jemu changá ngahan, hacuanitjin ni chjuun naha ta jemu changá na. —Cuahaxutjin cachja me.

¹⁹ Sehe ngajan xi ángel jan ne, cuihixutjin cafayangui nga:

—Ngahan xi Gabriel ngahan; ngahan xi tejña ngajan xcun Nina. Hacuaha ngahan xi catsingatju ná Nina xi cuisiajme cojo ri hacuaha suá cumachaya ri cjuandajyihí vèhè. ²⁰ Chutsijin ni, quihndè ta camacjaaan ri tsèhè cjuá xi cachjá cojo ri ne, cumaji cuinoje, tsèhè xi cuma lihmi ngaye hisca hya xi cuetjucaa cjuá xi cachjá cojo ri. Cjuá vèhè ne, hatuxa cuetjucaa hya xi cuechú nixtin rè. —Cuahaxutjin cafayangui ángel.

²¹ Jinguyèjè rè ne, xutacjín jan ne, jercu siuya xu me Zacarías, hisca fircun rè me tsèhè xi cuatjin jercu vindeya rè Zacarías xi cavisehen xu me ndava Nina. ²² Hane hya xi cavetju me ne, maji xu chja me cojo xuta. Hane xuta jan ne, cavacun rè me ta Zacarías ne, tjin mé xi cavèè me. Hacuaha tu tisahmitsja ni me ta, tsèhè xi lihmi cuaha xu me. ²³ Hya xi cavatju nixtin xi satè rè me xi sahmi me xá xi má me nahmi ne, cavuya cafe xu me ndava me.

²⁴ Hya xi camá ne, xi cavatju sa nixtin ne, casacu xu rè chjuun rè me quihndi, hane cahntsua hñú sá xi jiya quihndi rè Elisabet jan ne, cuatjin caseyahma xu me ndava me. Hane cuitjin xu cachja súv me: ²⁵ “Cuitjin casahmi Nina cojo ná ngu cjuandaja, quihndè xi camayuma rè me ngahan hane cafaxin me cjuasava xi má ná ngajñi rè xuta tsèhè xi sacuiin ná quihndi.” Cuahaxutjin cachja me.

Cafehe cjuá xi tsin Jesucristu

²⁶ Xi ma jyun sá xi jiya xu quihndi rè Elisabet ne, catsingatju Nina ángel xi hmí rè Gabriel ngu nandya xi hmí rè Nasaret, tsèhè distritu Galilea, ²⁷ ndava ngu chjuun xungun xi hmí xu rè María. Hane María jan ne, tacunvasen cjuavixan rè me cojo ngu xihin xi hmí rè José, ngu me xi tjè rè David, ngu xutachanga xi camatitjun xu tsèhè xuta tjè rè Israel. ²⁸ Hane xi cavisehen ángel ndava María jan ne, sehe cachja xu cuitjin:

—Cuhndari, tsan. Nina ne, catsinchacun me ngaye, hacuaha tacun me cojo ri. Ngajñi rè yèjè ni yachjin ne, ngaye xi jercu catsinchacun ri Nina. —Cuatjin xu cachja ángel.

²⁹ Xi cahndè xu María cjuá xi cachja ángel jan ne, catsacjun me camá, sehe catsingataha cacun xu me mé xcusun nina xi casua ángel me. ³⁰ Sehe ngajan xi ángel ne, cuitjin xu cachja cojo rè me:

—Xicarcuiin María ta Nina ne, jemu tjin rè me cjuandaja cojo ri.

³¹ Quihndè ne, sacú ri ngu quihndi, hane hacuaha cuechú nixtin xi tsin ri quihndi vèhè. Quihndi vèhè ne, tehe ñihi rè Jesús. ³² Hacuaha jemu jyè hnga cuma cojo cjuatacun rè, hacuaha Quihndi rè Nina xi Matitjun cjuahañihi. Hacuaha Nina sahmi me xi cuitexa quihndi vèhè sacuatjin cavitexa xutachanga rè, me xi hmí rè David. ³³ Hane vèhè cuitexa rè xuta tjè rè Israel, hane gobiernu rè ne, tsajin nu tsajin nixtin cuijnetaha. —Cuatjin xu cachja ángel.

³⁴ Sehe ngajan xi María ne, cavinenguise xu me ángel cuitjin:

—¿Hacutjin cuma xcusun vi? ta ngahan ne, cjèè sacú xihin naha. —Cuatjin xu cachja me.

³⁵ Hane xi cafayangui ángel ne, cuitjin xu cachja:

—Hasen rè Nina xi Matitjun ne, cuinduva cuaxtè ri sacuaha ngu tjahnguen. Vèhè xi quihndi xi tsin ri ne, hatuxa tyjahi cojo cjuatacun rè, hacuaha

Quihndi rë Nina Jain. ³⁶ Hacuaha na Elisabet xinguin ne, handasa ha jemu changá na ne, hacuaha casacu rë na ngu quihndi. Ha quihndë jyun sá yaha na quihndi, na xi chja cjua xi hatuxa maji sacu rë quihndi. ³⁷ Cuatjin camá ta, xi cuma rë Nina ne, tsajin camahani mé xi cumaji cuma. —Cuatjin xu cachja ángel.

³⁸ Ngajan xi María ne, cuitjin xu cafayangui me:

—Ngahan ne, sacuaha ngu hndixahan rë Nina ngahan. Catisahmi Nina cojo ná sacuatjin cjua xi canújun. —Cuatjin xu cachja me.

Ngaxtun vëhë ne, sehe cafe ángel.

Cavusehenya María Elisabet

³⁹ Nixtin hya ne, cavetju xu María, ngu quixi ni quiji me ngu nandya ngajan nangui ndetjún tsëhë distritu Judea. ⁴⁰ Hane xi cafehe me ngajan ne, cavisehen xu me ndava Zacarías, sehe cachja me nina cojo Elisabet. ⁴¹ Hane xi cahndë xu Elisabet xi cachja María nina ne, cafiniya xu quihndi xi jiya cahntsua Elisabet. Ngajan xi Elisabet ne, catsë rë xahasen rë me cojo Hasen rë Nina. ⁴² Hane sehe jercu hñu xu cachja me cjua vihi cojo María:

—Ngajñi rë yëjë ni yachjin ne, ngaye xi jercu catsinchacun ri Nina, hacuaha catsinchacun me quihndi xi tsin ri. ⁴³ ¡Mé má ngahan xi tu ngaye xi naa rë nai naha ngaye, ndove tichusihinye ná! ⁴⁴ Xi tu cahndë xi canoje nina cojo ná ne, hora vëhë cafiniya quihndi xi jiya cahntsua xi ndama rë. ⁴⁵ Jemu ndaja tsiji xi macjain ri xi yëjë ni cjua xi cachja Nina cojo ri ne, cuetjucaa jain. —Cuatjin xu cachja Elisabet.

⁴⁶ Sehe ngajan xi María ne, cuitjin xu cachja me:

Ngahan ne, jercu sahme jyë sahme hnga Nina;

⁴⁷ hacuaha jercu ndama ná tsëhë Nina, me xi vaxëtje ná.

⁴⁸ Casahmicuenda Nina ngahan, ngahan xi sacuaha ngu hndixahan rë me ngahan ta,

quihndë cojo nixtin xi cjui sa ne, cuichja yëjë xuta xi siu cojo xuta xi sehe tsin sa xi jemu ndaja tsahan;

⁴⁹ tsëhë xi Nina xi jemu jyë hnga me cojo ngahñu rë me ne, jemu vengui chji rë xcusun xi casahmi me cojo ná.

¡Jemu tyjahi me cojo cjuatacun rë me!

⁵⁰ Nina ne, hatuxa jemu tjín rë me cjuayumatacun cojo yëjë xuta xi faharcun rë me

ha tucutjin cjín xuta tissetsin me jima ngundiya jima ngundiya.

⁵¹ Nina ne, sahmi me hacutjin xi meje sahmi me cojo ngahñu jyë xi tjín rë me: tsinguitojo me yëjë xuta xi jemu tjín rë cjuaxta cahntsua xahasen rë;

⁵² tsinguijne me xuta xi matitjun tsëhë xcun xá rë, hacuaha sahmi yehe sahmi hnga me xuta yuma.

⁵³ Xuta xi machaja rë me ne, jemu yehe cjuandaja sua Nina me, peru xuta nchina ne, suvá tsja tiya me tsicuya Nina me cjue me.

⁵⁴ Nina ne, cuisecoo naja me ngayejen ni xuta tjë rë Israel, ngayaan xi tsëhë me ngayaan,

hacuaha tsinguitsjen me xi cumayuma rë me ngayaan.

⁵⁵ Xi cuatjin ne, cuetjucaa jain sacuatjin xi ha cachja me cojo xutachanga naja Abraham, cojo yëjë sa tjë rë me.

Cuatjin xu cachja María.

⁵⁶ Hya xi camá ne, María jan ne, cavéjña xu me jyan sá ndava Elisabet, sehe cavuya cafe me nangui rë me hiscan tjín ndava me.

Hacutjin camá hya xi catsin Juan Vitenda rë Xuta

⁵⁷ Quihndë ne, cavechú nixtin xi tsin rë Elisabet quihndi, hane catsin rë me ngu quihndi xihin. ⁵⁸ Xi camachaya rë yějë xuta xi siu tahndee ndava me cojo yějë xicjin Elisabet xi jercu camayuma rë Nina Elisabet ne, jercu ndaja camá rë me xingu xingu me cojo Elisabet. ⁵⁹ Hya xi camá xu ne, xi cavetjucaa quihndi jan jyin nixtin ne, cafehe nga me xi siu tahndee ndava me jan cojo xicjin Elisabet xi cuma suhi tséhë xi xtí chuxin rë quihndi. Hane meje suañihi me quihndi jan Zacarías, tséhë xi cuatjin hmí rë nahmi rë. ⁶⁰ Ngajan xi cachja xu naa rë quihndi jan cuitjin:

—Hajín ta quihndi vi ne, Juan cjuahañihi. —Cuatjin xu cachja me.

⁶¹ Hane xuta jan ne, cuitjin xu cachja me:

—Peru ngayun ne, tsajin hisca ngu xingun xi cuatjin hmí rë. —Cuatjin xu cachja xuta jan.

⁶² Ngajan xi xuta xi cuacun jan ne, tu casahmi tsjá xu ni me cojo nahmi rë quihndi xi cavinenguise me hacutjin meje rë nahmi rë quihndi xi cjuahañihi quihndi jan. ⁶³ Ngajan xi Zacarías ne, cafehya xu me ngu pizarra, sehe ngajan catsihindu me cju vihi: “Juan cjuahañihi.” Cuatjin xu catsihindu me. Hya xi camá ne, yějë ni me ne, jemu quijircun xu rë me. ⁶⁴ Hane hora vëhë ni ne, camá xu cachja Zacarías, hane jemu ndaja cavaxëndaja me Nina. ⁶⁵ Ngajan xi xuta xi siu tahndee ndava me jan ne, jemu catsacjun xu me camá, hane jingujyë ni ladu nangui ndetjún tséhë distritu Judea hiscan xi siu xuta ne, jercu cavisiajmi xu me tséhë cjuacjintacun vëhë. ⁶⁶ Hane yějë xuta xi camachaya rë cjuacjintacun vëhë ne, jercu cjin catsingataha cacun me, hisca cachja xu me cuitjin:

—¡Cuechú nixtin xi quihndi vi ne, cuma ngu xihin xi jyë hnga cojo cjuatacun rë!

Cuatjin xu cachja xuta xi cuacun jan ta, tséhë xi quihndi vëhë ne, Nina yahangui jain me.

Cjua rë Nina xi cachja Zacarías

⁶⁷ Zacarías, nahmi rë quihndi jan ne, ña catsë rë me cojo Hasen rë Nina, hane cachja xu me cuitjin cjua xi cafahatsja me tséhë Nina:

⁶⁸ ¡Tjemu ndaja Nina naja गयाan xuta tjë rë Israel!

tséhë xi cuinduva me cjuaha naja me xi cuma yaan xuta rë me.

⁶⁹ Nina sahmi me xi ngajñi rë tjë rë David, ngu xuta rë Nina ne, cuetjujñi ngu xihin xi cuaxëtje naja,

⁷⁰ sacuatjin xi ha cachja profeta xi cavejña me tséhë Nina, hya xi cachja me cojo xutachanga naja cjua rë Nina hatsëë nixtin.

⁷¹ Hacuaha cachja Nina xi cuaxëtje naja me tséhë condra naja,

hacuaha cuaxëtje naja me tséhë yějë xuta xi choho vëë naja,

⁷² hacuaha cumayuma rë me tséhë xutachanga naja

hacuaha tsinguitsjen me compromisu ximinchacun xi casahmi me cojo xutachanga naja.

⁷³ Nina ne, cachja me: “Ngahan suva hvë”, hya xi casahmi me compromisu jan cojo xutachanga naja Abraham.

⁷⁴ Hya xi casahmi me compromisu vëhë ne, cachja me xi cuëhëndaya naja me tséhë condra naja,

cojo sa xi गयाan ne, hacuain cojo chircun chjahanrcun me ta

⁷⁵ chjahanrcun me cojo ngu cjuatacun tyahi, xi tsajin jyë naja xcun me hacutjin nixtin xi nechan xcun cjuahñu naja.

⁷⁶ Ngaye tsan ne, hacuaha cuma ngaye ngu profeta tséhë Nina xi Matitjun ta,

tsëhë xi ngaye cuihintitjin, choxehe ndiya tsëhë Nina,

⁷⁷ hacuaha tehe cumachaya rë xuta rë Nina xi cuaxëtje Nina me, cuma cuinújan ne, tsinchataha me tsëhë jyë rë

⁷⁸ ngatsë rë ta tsëhë xi Nina ne, jemu tjín rë me cjuayumatacun cojo naja.

Hacuaha ngatsë rë cjuayumatacun vëhë ne, Nina tsingatju me tsëhë ngahnga ngu xi sacuaha tsuhi,

⁷⁹ cojo sa xi sua hasen rë ngajñi naja xi nechán cojo ngu cjuacjintacun jyë xi hisca sacuinyiin naja hacutjin naxentjeen yojo naja,

ngayaan xi tjemu tsavi nechantahan tsëhë cjuaveya,

hacuaha cojo sa xi cjuccojo naja

ndiya tsëhë cjuajeya.

Cuatjin cachja xu Zacarías.

⁸⁰ Hya xi camá ne, quihndi jan ne, camajyë, hacuaha cavejñahñu xu cjuatacun rë. Hane xi camá ngu xihin jyë ne, quiji cavéjña xu ngajan ngu xín camahani tsëhë nandya, hisca hya xi cavechú nixtin xi cavetsihin cachja cja rë Nina cojo xuta tjë rë Israel.

2

Hacutjin camá hya xi catsin Jesucristu

¹ Cuitjin xu camá nga ngunixtin hya xi Herodes vitexa me xuta tjë rë Israel. Me xi matitjun camahani xi hmí rë César Augusto ne, cavitexa xu me xi yëjë ni xuta xi siu ngahma gobiernu rë me ne, cjue me cuiyujutahaxujun me xi cuechjite me. ² Hacuaha hya xi cuatjin tjuntjun caviyujutaha xujun xuta ne, hya vitexa xuta Cirene ngajan distritu Siria. ³ Ngajan xi yëjë ni xuta ne, quiji xu me caviyujutaha xujun me, jima ngu me hiscan nangui rë xutachanga rë me.

⁴ Cuatjin camá xi José ne, cavetju xu me tsëhë nandya Nasaret, distritu Galilea, quiji me distritu Judea, nangui rë xutachanga rë me David, hiscan xi hmí rë Belén, tsëhë xi José ne, tjë rë David xu má me. ⁵ Quiji casetahaxujun tangun me cojo María, me xi tacunvasen cjuavixan rë me cojo. Hane María ne, jiya xu quihndi rë me hya xi quiji me. ⁶ Hya xi camá ne, jinguyëjë rë xi siutahá xu me ngajan ne, cavechú nixtin xi tsin xu quihndi rë me, ⁷ hane catsin rë me ngu quihndi xihin, xi quihndi tjun rë me. Hane xi cavatju catsin quihndi jan ne, sehe cafaha me cavaxtë me ngu tsjian, sehe cafaña xu me quihndi jan cahntsua hiscan jineyá chu ta, tsëhë xi casacuiin xu cahndë cahntsua ndihya xi cuiyuju me, tsëhë xi jemu quitsë camahani xuta.

Cachja ángel cojo cha xi sahmi cuidadu rë chu

⁸ Ha taha ladu vëhë ni ne, siutahá ngujo cha nguixun ngajan nguijña, xi sahmi cuidadu xu cha chu tsánga rë cha. ⁹ Hya xi camá ne, ha tu ñahñu camatsejen xu ngu ángel tsëhë Nina hiscan xi siutahá cha, hane hora vëhë ni ne, hasen ndajyihí rë Nina ne, jercu casahmi hasen xu rë jinguyë ni hiscan xi siutahá cha, hane jemu catsacjun camahani cha camá. ¹⁰ Ngajan xi cachja xu ángel cojo cha cuitjin:

—Xicarcuun ta, nguehe nduva tisuá cumachaya nuju ngu cjuandajyihí xi hisca yëjë xuta tjë rë Israel jercu ndaja cuma rë me ¹¹ ta nguehe Belén, nangui rë xutachanga nuju David ne, quihndë catsin ngu quihndi xi cuaxëtje nuju, quihndi xi Nina catsingatju rë xi cumatitjun tsujun. ¹² Hane cuitjin sacú nuju cjuacquixi tsëhë cja xi cachjá cojo nuju vë: xi cjuhun jan ne, cuechun hiscan

xi chun ngu quihndi tixtê rê tsjian, jiña cahntsua hiscan jineyá chu. —Cuatjin xu cachja ángel.

¹³ Hane ha tu ñahñu camatsejen sa jercu cjin camahani ángel xi nduva xu ngahnga, cafehe hiscan xi secun ángel xi cafehe titjún, tivaxëndaja rê Nina cojo cja vihi:

¹⁴ ¡Jemu jyê hnga Nina cojo Hasen rê me ngajan ngahnga!

¡Hane nguehe nangui ne, cuisehen cjuajeya rê Nina cahntsua xahasen rê xuta xi chuya rê Nina tsêhê!

Cuatjin xu cachja ángel cjin jan.

¹⁵ Hya xi camá ne, hya xi cavuya quiji nga ángel jan ngahnga ne, cha xi sahmi cuidadu chu tsánga rê jan ne, cuitjin cachja cha cojo xicjin cha:

—¡Cjuanguen ni! Cjuanguen hisca nandya, cuanguen chutsejen xcusun xi camá vi, sacuatjin casua Nina camachaya naja. —Cuatjin xu cachja cha cojo xicjin cha.

¹⁶ Hya xi camá ne, ngusun xu ni cafe cha, hane xi cafehe cha nandya ne, casacuse rê cha hiscan tacun María cojo José, cojo quihndi jan, jiña cahntsua hiscan jineyá chu. ¹⁷ Hya xi cavêê xu cha quihndi jan ne, sehe cavetsihin casuacuenda cha yêjê cja xi cachja ángel cojo rê cha tsêhê quihndi vêhê.

¹⁸ Hane xi cahndê xuta cja xi cachja cha xi cuacun jan cojo rê me ne, jemu quijircun xu rê me. ¹⁹ Peru María ne, cavetjo cavetjo ni me yêjê ni cja vêhê cahntsua xahasen rê me, hacuaha jercu cjin xu catsingataha cacun me.

²⁰ Hane xi cavuya quiji nga cha xi sahmi cuidadu chu rê jan ngajan nguiña ne, taha tisahmi jyê tisahmi hnga xu cha Nina hacuaha taha tivaxëndaja cha me tsêhê yêjê cja xi cahndê cha cojo xcusun xi cavêê cha, sacuatjin cachja ángel cojo rê cha.

Quiji caningacun rê Jesucristu cojo Nina ngajan Jerusalén

²¹ Xi cavechú xu jyin nixtin quihndi ne, hacuaha hatuxa hya cavechú nixtin xi xtí chuxin rê, hane cuatjin camá cojo quihndi. Hacuaha Jesús cafahañihi xu quihndi, ñihi xi ha cachja ángel hisca chaja sa xi seyahma quihndi cahntsua naa rê.

²²⁻²⁴ Hya xi camá ne, xi cavechú xu nixtin xi cjue naa rê quihndi yungun xi matitjun cojo quihndi xi cuma tyjahi me xcun Nina tutjin chja ley rê Moisés ne, quiji José cojo María Jerusalén, quiji cani me ngu cjuatjo ta, tsêhê xi chja ley rê Nina ta meje rê xi cjue jo chu tucjin, o sá xi jo chu paloma chihndê. Hacuaha quijicojo xu me quihndi jan Jerusalén xi tsingacun me quihndi jan cojo Nina. Quitahá xujun xcun ley rê Nina xi yêjê ni quihndi tjun xi xihin ne, hatuxa tsêhê Nina cuma.

²⁵ Cavéjña xu ngu xihin xi hmí rê Simeón ngajan Jerusalén. Xihin vêhê ne, tyjahi xu me cojo cjuatacun rê me ngajan xcun Nina, hacuaha jemu faharcun me Nina. Hacuaha jemu meje xu rê me xi cjuehe xuta xi yaha cjuetacun jan xi cuma rê xuta tjê rê Israel. Hacuaha Hasen rê Nina ne, jiya cahntsua xahasen rê Simeón. ²⁶ Hane Hasen rê Nina jan ne, casua xu camachaya rê me xi jinguyêjê rê xi cjêê scuêê me xuta xi tsingatju Nina jan ne, hatuxa cueyaain xu me. ²⁷ Hane quiji me yungun xi matitjun, tsêhê xi cuatjin cachja Hasen rê Nina cojo rê me. Hacuaha xutacha rê quihndi xi hmí rê Jesús jan ne, quijicojo xu me quihndi jan yungun vêhê, xi sahmichihin me sacuaa xcusun xi vitexa ley rê Moisés hacutjin cuatju quihndi cuma. ²⁸ Hya xi camá ne, cafaha xu Simeón quihndi jan cavataha me, sehe hacuaha cavaxëndaja me Nina cojo cja vihi:

²⁹ Ngayun Nina naha, ngayun ne, ha cuma tuhun cahndé xi ngahan hndixahan nuju ne, cueya cojo cjuandaja cojo cjuajeya

sacuatjin xi ha canújun.

³⁰ Cuma cueya ta, tséhé xi quihndé ne, cahvé suva xuta xi caningatjun xi cuaxétje niji,

³¹ me xi caningatjun xcun cojo xcun yéjé ni xuta,

³² me xi cuinduva sacuaaha ngu ndihi xi sua me cjuahasen xi cuma rê xutaxín, hacuaaha cuinduva me xi sahmi yehe sahmi hnga niji me, ngayin xuta nuju, xuta tjé rê Israel.

Cuatjin xu cachja Simeón.

³³ Hane xutacha rê quihndi jan ne, jemu quijircun xu rê me tséhé xi cuatjin cachja Simeón tséhé quihndi jan. ³⁴ Hane Simeón ne, catsinchacun me me xi cuacun jan, sehe cachja xu me cojo María naa rê quihndi jan cuitjin:

—Quihndi vihi ne, hacuaaha sahmi xi jemu cjín xuta tjé rê Israel chajá me, hacuaaha sahmi xi jemu cjín xuta tjé rê Israel cuetjutje me. Hacuaaha quihndi vihi ne, sua cumachaya rê xuta mé xi meje rê Nina, hacuaaha jemu choho cuichja xuta tséhé quihndi. ³⁵ Cuatjin cuma cojo sa xi ngajan sesunhngatsejen yéjé hacutjin xi tsingataha cacun jemu cjín xuta cojo cjuatacun rê me. Hacuaaha ngayun ne, jercu cuma rê xahasen nuju, sacuaaha xi quicha casehen rê xahasen nuju. —Cuatjin xu cachja Simeón.

³⁶ Hacuaaha tacun xu ngu chjuun xi hmí rê Ana ngajan yungun, quihndi rê Fanuel, tjé rê xutachanga xi hmí rê Aser. Chjuun jan ne, profeta xu má me. Hacuaaha jercu changá xu me. Xi cavixan me ne, cavéjña me cojo xihin rê me yatu nu. ³⁷ Ngaxtun vèhé ne, cavéjña cahan me. Hane xi casacu xicjin xu me cojo xutacha rê Jesús ne, ñujuchan ñuju nu xu tjin rê me. Hacuaaha jemu quiji camaha xu ni me yungun xi matitjun. Jemu cjín ndiya ne, cajinií xu me niñu xi faharcun me Nina. Hacuaaha jercu sahmi xu me oración rê me. Nixtin nixten faharcun me Nina. ³⁸ Hacuaaha ha hora xi siu xu ni xutacha rê Jesús ngajan yungun jan ne, cafehe Ana. Hane xi cavéë me quihndi Jesús jan ne, casua xu me nacuechji rê Nina. Ngaxtun vèhé ne, sehe cavetsihin cachja xu me tséhé Jesús cojo yéjé xuta xi jemu meje rê xi cuechú nixtin xi cuaxétje Nina nandya Jerusalén.

Cavuya me cojo Jesucristu nandya Nasaret

³⁹ Xutacha rê Jesús ne, hya xi ha café casahmichihin xu me yéjé xcusun xi vitexa ley rê Nina ne, cavuya cafe me nangui rê me, hiscan xi hmí Nasaret, distritu Galilea. ⁴⁰ Quihndi jan ne, camajyé hacuaaha casacuhñu rê, hacuaaha jercu cavechútáha cjuatacun rê, hacuaaha jercu cavisehen xu cjuandaja rê Nina cahntsua xahasen rê.

Casetaha suvá Jesucristu ngajan yungun xi matitjun

⁴¹ Chuva nu chuva nu ne, xutacha rê Jesús ne, fi xu me suhi tséhé Pascua ngajan Jerusalén. ⁴² Hane hya xi Jesús cavechú me tejó nu ne, sacuaaha xcusun rê xuta cojo suhi vèhé ne, quiji xu Jesús cojo xutacha rê me ngajan Jerusalén. ⁴³ Xi cavatju suhi jan ne, xutacha rê Jesús ne, cavetju xu me tséhé Jerusalén xi cuya cjue me nangui rê me. Peru Jesús ne, hisca camachayiín rê xutacha rê me ne, casetaha suvá xu me Jerusalén. ⁴⁴ Xi má rê xutacha rê me ne, jiyajñi me ngajñi rê xutacjín tife me. Hane xi café ngu nixtin tife xutacha rê me ndiya ne, cavetsihin cavanguise xu me Jesús jan ngajñi rê xuta rê me cojo ngajñi rê yéjé xuta xi vinga rê me. ⁴⁵ Hane xi casacuiin rê me Jesús jan

ngajñi rē xutacjín jan ne, cavuya quiji xu me hisca Jerusalén, xi tivanguise me me.

⁴⁶ Hya xi camá ne, xi majyan nixtin jan ne, sehe casacu xu rē me Jesús ngajan yungun xi matitjun, tacun me ngajñi rē maestru xi vicuya cjuachacun, tivisiñuju me cjuá rē maestru hacuaha tivinenguise xu rē me jingu sa cjuachacun. ⁴⁷ Hane yějē ni xuta xi tivisiñuju cjuá rē Jesús jan ne, jercu fircun xu rē me, tséhē xi cuarcu quicun cacun me hacuaha tséhē xi jercu ndaja titsicuya me cjuá tséhē maestru jan. ⁴⁸ Hane hya xi cavéē xu xutacha rē Jesús xi ngajan tacun me ne, tu quiji tséhē me, sehe cachja naa rē me cuitjin:

—¿Mé má cuatjin canihñi cojo niji, tsan? Chutsijin ta cuajyihinyin ngahan cojo nahmi riji ne, cojo cjin cjuacjintacun niji ne, catujyihinyin cavinchinsin ri. —Cuatjin xu cachja me.

⁴⁹ Ngajan xi Jesús ne, cuitjin xu cachja me cojo xutacha rē me:

—¿Mé má cuatjin tu nguehe tu ngajan cavinchunsun ná ni? ¿Há hyúun ta hatuxa meje rē xi cuitejña ndava nahmi naha? —Cuatjin xu cachja Jesús.

⁵⁰ Peru xutacha rē Jesús ne, cajni xu rcu me cjuá xi cachja Jesús cojo rē me.

⁵¹ Hya xi camá ne, cavuya cafe xu Jesús cojo xutacha rē me nangui rē me ngajan Nasaret. Hacuaha cahndē me tséhē xutacha rē me hacutjin xi quiji sa nixtin rē me. Hane naa rē Jesús ne, cavetjo cavetjo xu ni me yějē ni cjuá véhē cahntsua xahasen rē me. ⁵² Sacuaha Jesús ne, jima jyē xu me cojo yojo rē me, hacuaha jima jyē jima hnga me cojo cjuatacun rē me. Hacuaha tichuya sa xu rē Nina tséhē me, hacuaha tichuya sa rē xuta tséhē me.

3

Cachja Juan Vitenda rē Xuta cjuandajyihí rē Nina

¹ Cuitjin xu camá hya xi café tyjuhun nu jiya me xi matitjun camaha ni xi hmí rē Tiberio César xcun xá rē me xi vitexa me jingu ni ladu. Poncio Pilatu ne, me véhē vitexa xu me distritu Judea, hane Herodes ne, me véhē xu vitexa me distritu Galilea, hane hntsjēñu me xi hmí rē Felipe ne, me véhē xu vitexa me distritu Iturea cojo distritu Traconite, hacuaha Lisanas ne, me véhē xu vitexa me distritu Abilinia. ² Hane sacuaha nahmi xi matitjun xu ne, Anás cojo Caifás má me. Hane sacuaha nixtin véhē ne, Juan quihndi rē Zacarías ne, hya xi quitahá me ngajan ngu xín tséhē nandya ne, cafahatsja me cjuá xi catsingatju xu Nina. ³ Hane quiji catsujyihiya me yějē ni ladu tiña tséhē ndajyē Jordán, tichja me xi meje rē xi tsindeya xu xuta cjuatacun rē me hacuaha xtenda me, cojo sa xi tsinchataha Nina xuta tséhē jyē rē me. ⁴ Xi cuatjin xu casahmi Juan ne, casahmichihin me sacuatjin camahindu hatsēē nixtin xcun xujun xi chja cjuá rē profeta Isaías xi chja cuitjin:

Cuitjin jercu hñu cuichja ngu xuta ngajan hiscan jemu xín tséhē nandya:

“Tuhunchjину ndiya tséhē Nai naja;

ninguixun ndiya tséhē me.

⁵ Yějē ni hiscan nangui cahntsua ne, tsěya rē,

yějē ni ndetjún cojo yějē ni naxi ne, cuijnenangui,

yějē ni ndiya lahñi ne, cuma quixi,

yějē ni ndiya xi hacuñin chihin ne, cuma chihin.

⁶ Hane yějē ni xuta ne, scuēē me hacutjin vaxětje Nina xuta rē me.”

Cuatjin xu catsihindu Isaías cjuá xi jercu hñu cuichja xuta jan.

⁷ Ngajan xi hya xi quiji xutacjín xi xtenda me ne, cuitjin xu cachja Juan cojo xuta:

—¡Ngayujun ni ngayun quihndi rë chu tsehen matsejen ne!, ¿yo cavin-changui nuju xi nihñu ngahñu xi cuetjuntjun tséhë castigu xi hatuxa tsing-atju Nina? ⁸ Sá xi meje jain cuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me. Xicanujuun cahntsua xahasen nuju cjuá vihi: “Ngayaan ne, tsajin mé cuma naja ta, tséhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca ndoyojo xi cuicun vi ne, cuma sahmi me tjë rë Abraham. ⁹ Chutsujun ta ngayun matsejen ne, tangun ngayun cojo yatjë xi ha quitaháchjine quicharcu tyjama rë xi cuetsihin xtí. Yëjë ni yatjë xi suaain tu xi ndaja matsejen ne, xtí rë, sehe cjue cueti. —Cuatjin xu cachja Juan.

¹⁰ Ngajan xi xutacjín jan ne, cuitjin xu cavinenguisse rë me Juan:

—¿Hacutjin ndatjin nihñi xi cuma nihñi cjuandaja xi nújun vë ni? —Cuatjin xu cavinenguisse me.

¹¹ Hane xi cafayangui Juan ne, cuitjin xu cachja me:

—Jarë ngayun xi tjín nuju jo tsjian nuju ne, tuhun rë ngu yo xi tsajin rë. Jarë ngayun xi tjín xi chinu ne, ha chuva vëhë ni tuhun hitsë catjinë me xi tsajin xi sinë. —Cuatjin xu cachja me.

¹² Hacuaha canduva sa xu ngujo cha xi faha tujúnsa xi meje rë cha xi xtenda cha, hane cuitjin xu cavinenguisse cha:

—Tatá, ¿mé xi ndatjin nihñi ngayin? —Cuatjin xu cavinenguisse cha.

¹³ Sehe ngajan xi Juan ne, cuitjin xu cachja me cojo cha:

—Hacuín cjín sa tujún chjahyun rë xuta. Chjahyun rë me hacutjin xi casatëxa ni nuju. —Cuatjin xu cachja me.

¹⁴ Hacuaha cavinenguisse nga ngujo sindadu me cuitjin:

—Hane ngayin ne, ¿mé xi ndatjin nihñi? —Cuatjin xu cavinenguisse cha.

Sehe cachja xu me cojo cha cuitjin:

—Xicanaxuun rë xuta tujún cojo cjuachan, o sá xi cojo ngu cjuandacha. Catamangutacún ni cojo tujún xi ha ma chji nuju. —Cuatjin xu cachja me.

¹⁵ Xuta ne, jercu siuya camahani me mé xi cuma, hacuaha vinenguisse xu me cahntsua xahasen rë me cuitjin: “Hyaan sa xi Juan rë vi Xihin xi Tsingatju Nina xi cuaxëtje naja me.” Cuatjin xu cavinenguisse me. ¹⁶ Sehe ngajan xi Juan ne, cuitjin xu cachja me cojo yëjë xuta jan:

—Ngahan matsejen ne, cojo nandá ni tivitënda nuju, peru sehe cuinduva me xi cueyá me Hasen rë Nina cahntsua xahasen nuju, hacuaha cuaha me sacuaha ngu ndihi xi tsityjahi rë cjuatacun nuju. Me vëhë ne, hitsë sa jyë hnga me cojo cjuatacun rë xi cumá ná ngahan, hisca cumaji tsinguissehercu sahme tyjahi chuxinxté rë me. ¹⁷ Me xi tsingatju Nina jan matsejen ne, sacuaha xi ha yahatsja me quicha xi tsinguitjen rë xtë rë trigu cojo sa xi cuma tyjahi ndaja trigu xi casechun rë tséhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ngu ndihi xi tsajin nixtin hvo. —Cuatjin xu cachja Juan.

¹⁸ Hacuaha hacuín suvá xu ni cjuá vëhë cachja Juan cojo xuta hya xi cachja me cjuandajiyihi rë Nina ta cachja sa xu me jemu cjín cjuá. ¹⁹ Herodes, me xi cavitëxa ngajan distritu Galilea ne, hacuaha cachjataha xu Juan me ngatsë rë xi cafaha Herodes na Herodía, chjuun rë hntsëjñu me, xi cumá chjuun rë me na. Hacuaha cachjataha sa xu Juan me tséhë jingu sa xcusun tsehen xi casahmi me. ²⁰ Peru xcun yëjë cjuatsehen vëhë ne, cavetahacoo sa Herodes xcusun vihi: caveya xu me Juan ndavaya.

²¹ Hane hya xi chaja sa xu cjue Juan ndavaya ne, ngu nixtin xi caxtenda yějē ni xuta ne, hacuaha cojo xu Jesús caxtenda me. Hane xi cavatju caxtenda me ne, hora xi tisahmi xu me oración rē me ne, ngahnga ne, catuxaha, ²² hane Hasen rē Nina ne, canduvajnetsejen casesun rcu me. Sacuajyihi ngu paloma jyihi. Hacuaha hora vėhė ni ne, canuhya xu rē ngu cjua ngajan ngahnga xi cachja xu cuitjin: “Ngaye xi quihndi naha ngaye xi jemu hmú cǎcun ri. Jemu ndama ná ngatsė riji.” Cuatjin xu cachja.

Xutachanga rē Jesucristu

²³ Quihndė ne, Jesús ne, tjin xu rē me sacuaha cantė nu hya xi cavetsihin me cojo xá rē me. Hacuaha xi má xu rē xuta ne, quihndi rē José má me. Hane José ne, quihndi rē Elí. ²⁴ Elí ne, quihndi rē Matat. Matat ne, quihndi rē Levi. Levi ne, quihndi rē Melqui. Melqui ne, quihndi rē Jana. Jana ne, quihndi rē José. ²⁵ José ne, quihndi rē Matatías. Matatías ne, quihndi rē Amós. Amós ne, quihndi rē Nahum. Nahum ne, quihndi rē Esli. Esli ne, quihndi rē Nagai. ²⁶ Nagai ne, quihndi rē Maat. Maat ne, quihndi rē Matatías. Matatías ne, quihndi rē Semei. Semei ne, quihndi rē José. José ne, quihndi rē Judá. ²⁷ Judá ne, quihndi rē Joana. Joana ne, quihndi rē Resa. Resa ne, quihndi rē Zorobabel. Zorobabel ne, quihndi rē Salatiel. Salatiel ne, quihndi rē Neri. ²⁸ Neri ne, quihndi rē Melqui. Melqui ne, quihndi rē Adi. Adi ne, quihndi rē Cosam. Cosam ne, quihndi rē Elmodam. Elmodam ne, quihndi rē Er. ²⁹ Er ne, quihndi rē Jesús. Jesús ne, quihndi rē Eliezer. Eliezer ne, quihndi rē Jorim. Jorim ne, quihndi rē Matat. ³⁰ Matat ne, quihndi rē Levi. Levi ne, quihndi rē Simeón. Simeón ne, quihndi rē Judá. Judá ne, quihndi rē José. José ne, quihndi rē Jonán. Jonán ne, quihndi rē Eliaquim. ³¹ Eliaquim ne, quihndi rē Melea. Melea ne, quihndi rē Mainán. Mainán ne, quihndi rē Matata. Matata ne, quihndi rē Natán. ³² Natán ne, quihndi rē David. David ne, quihndi rē Isai. Isai ne, quihndi rē Obed. Obed ne, quihndi rē Booz. Booz ne, quihndi rē Salmón. Salmón ne, quihndi rē Naasón. ³³ Naasón ne, quihndi rē Aminadab. Aminadab ne, quihndi rē Aram. Aram ne, quihndi rē Esrom. Esrom ne, quihndi rē Fares. Fares ne, quihndi rē Judá. ³⁴ Judá ne, quihndi rē Jacob. Jacob ne, quihndi rē Isaac. Isaac ne, quihndi rē Abraham. Abraham ne, quihndi rē Taré. Taré ne, quihndi rē Nacor. ³⁵ Nacor ne, quihndi rē Serug. Serug ne, quihndi rē Ragau. Ragau ne, quihndi rē Peleg. Peleg ne, quihndi rē Heber. Heber ne, quihndi rē Sala. ³⁶ Sala ne, quihndi rē Cainán. Cainán ne, quihndi rē Arfaxad. Arfaxad ne, quihndi rē Sem. Sem ne, quihndi rē Noé. Noé ne, quihndi rē Lamec. ³⁷ Lamec ne, quihndi rē Matusalén. Matusalén ne, quihndi rē Enoc. Enoc ne, quihndi rē Jared. Jared ne, quihndi rē Mahalaleel. Mahalaleel ne, quihndi rē Cainán. ³⁸ Cainán ne, quihndi rē Enós. Enós ne, quihndi rē Set. Set ne, quihndi rē Adán. Adán ne, me vėhė xi Nina casahmi rē me.

4

Cafahachuva xitsehen Jesucristu

¹ Hya xi camá ne, hya xi catsė rē Jesús cojo Hasen rē Nina hya xi caxtenda me ne, cavuya xu me tsėhė ndajyė Jordán xi cjue me ndava me, peru Hasen rē Nina ne, quiji ngeuhe quiji ngajan xu cojo rē me ngajan ngu xín tsėhė nandya ² cahntsua yachan nixtin. Hacuaha yasen ni tifahachuva xitsehen xi matitjun me. Hacuaha Jesús ne, tsajin camaha xu ni mé xi cajinė me cahntsua nixtin xi cuacun vėhė. Hane xi cavatju nixtin xi cuacun vė ne, jercu

camavojo xu rë me. ³ Sehe ngajan xi xitsehen jan ne, cuitjin xu cachja cojo Jesús:

—Sá xi Quihndi jain rë Nina ngaye ne, tinoje cojo ndyojo vihi ne, catama niñu. —Cuatjin xu cachja xitsehen.

⁴ Hane Jesús ne, cuitjin xu cafayangui me tséhë xitsehen jan:

—Xcun xujun rë Nina ne, cuitjin camahindu: “Hacuiin suvá ngatsë rë niñu xi siu xuta cjuahñu.” —Cuatjin xu cafayangui Jesús.

⁵ Hane xi quijicojo xitsehen me ngu ndetjún hnga ne, sehe nghuhñusasa xu catsingacun ni xitsehen jan me jingujyë ni nandya tséhë ngasunhdë. ⁶ Sehe cachja xu xitsehen cuitjin cojo rë me:

—Suá ri yëjë nandya xi cuacun vë cojo yëjë cjuanchina rë xi ngaye nihñi gobiernu. Cuma suá ri ta, tséhë xi hatuxa ngahan cafahántsä, hane ha tu yo ni xi meje suá rë ne, suá rë. ⁷ Quihndë ne, sä xi cuindove cuiticjxcuin nguehe xi chjehercuin ná ne, cumá tsiji yëjë ni nandya vë. —Cuatjin xu cachja xitsehen.

⁸ Sehe ngajan xi cafayangui xu Jesús cuitjin:

—Xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha suvá ni me vëhë meje rë xi nihñu hacutjin xi meje rë me.” —Cuatjin xu cachja Jesús cjua vëhë.

⁹ Hya xi camá ne, xitsehen jan ne, quijicojo xu rë Jesús ngajan Jerusalén, hane quijicani rë me hisca rcu cjin yungun xi matitjun. Sehe cachja xu cojo rë me cuitjin:

—Sá xi Quihndi jain rë Nina ngaye ne, ningatjin yojo riji ndyá hisca nangui. ¹⁰ Ha hye ta tsajin mé cuma ri ta xcun xujun rë Nina ne, cuitjin chja: Nina cuitexa me ángel rë me xi sahmi ri cuidadu.

¹¹ Cuahatsjá ri,

cojo sa xi hisca ntsacui ne, sacuinhmaain rë cojo ngu ndyojo. Cuatjin xu cachja xitsehen cjua vëhë.

¹² Hane Jesús ne, cuitjin xu cafayangui me tséhë xitsehen:

—Xujun rë Nina ne, cuitjin chja: “Miji rë xi chjuhunchuvun Nina naja.”

¹³ Hya xi camá ne, xi cajnetaha cafachuva xitsehen jan Jesús ne, cavetjuxin xu tséhë me hisca janihya cuya nga.

Cavetsihin cavicuya Jesucristu xuta Galilea

¹⁴ Ngajan xi Jesús ne, cojo ngahñu rë Hasen rë Nina ne, quijinduju sa xu me xi cjue me ndava me ngajan distritu Galilea. Hane xi cafehe xu me jan ne, jercu cachja xuta tséhë me ngajan Galilea cojo jingujyë ni nandya xi siu tahndee rë. ¹⁵ Hane quiji me yungun rë jimangu nandya tséhë Galilea, cavicuya me xuta. Hane yëjë ni xuta jan ne, casahmi jyë casahmi hnga xu me Jesús.

Tacun Jesucristu nandya Nasaret

¹⁶ Cavechú ngu nixtin xi quiji xu Jesús ngajan nandya Nasaret hiscan xi camacha me. Hane sacuaha xcusun xi tjin rë me ne, nixtin xi chjahájenda rë ne, quiji xu me yungun. Sehe quiji casecunvasen me xi cuichjasun xu me xujun rë Nina. ¹⁷ Hya xi camá ne, casengui tsja me xujun xi hinchä cjua rë Nina xi catsihindu profeta Isaías. Hane xi titsixinga xu me xujun jan ne, táha tivanguise me cahndë xi quitahá cjua xi meje rë me. Hane xi casacu rë me cahndë vëhë ne, sehe cavetsihin cachjasun xu me cjua vihi xcun xuta:

¹⁸ Hasen rë Nina ne, jiya cahntsua xahasen naha,

vëhë xi casuaxa ná Nina xi suá cumachaya rë xuta yuma cjuandajiyihi rë me:

catsingatju ná me xi suá cumachaya rè xuta xi hinchá ndavaya ta hatuxa
cuma ndaya me,

suá cumachaya rè xuta xi rcá me ta hatuxa cuya cuma tsejen nga rè me;
cuëhëndaya xuta xi jemu choho sahmi jingu sa xuta cojo rè me.

¹⁹ Hacuaha suá cumachaya rè xuta xi cavechú nu xi jercu sahmi Nina
cjuandaja cojo xuta rè me.

Cuatjin chja cjua rè xujun xi cachjasun Jesús.

²⁰ Hane xi cavuya catsijeyu nga Jesús xujun jan ne, sehe cavuya casua nga
me me xi sahmi xá cahntsua yungun jan. Sehe cavéjña Jesús xi cuicuya rè
me xuta. Hane yëjë ni xuta xi siu cahntsua yungun jan ne, jercu cavëhërcun
me Jesús. ²¹ Sehe ngajan xi Jesús ne, cavetsihin cachja me cuitjin cojo xuta:

—Quihndë, jinguyëjë rè xi cavinuhyun cjua xi camahindu xcun xujun rè
Nina xi cavutaya jan ne, ngajan cavetjucaa cjua vëhë. —Cuatjin xu cachja
Jesús.

²² Yëjë ni xuta ne, jemu ndaja xu cachja me tsëhë Jesús, hacuaha hisca
quijircun rè me tsëhë xi jemu ndaja camahani cjua xi cachja Jesús. Sehe
cachja xuta jan cuitjin:

—¡Peru cha vihi xi quihndi rè cha José jan! —Cuatjin xu cachja me.

²³ Hane Jesús ne, cuitjin xu cachja me cojo xuta jan:

—Ngahan matsejen ne, ha hvë ta ngayun ne, cuinújun cojo ná cjua vihi:
“Doctor, nircun suvun rè yojo nuju.” Hacuaha cuinújun nga cuitjin: “Xcusun
xi camachaya niji xi canihñu ngajan Capernaum matsejen ne, hacuaha
nihñu xcusun vëhë nguehe xi nangui nuju.” ²⁴ Cuichjá cojo nuju cjuaquixi
ta hisca xi ngu profeta matsejen ne, hatuxa macjaain rè xuta nangui rè me
tsëhë me. ²⁵ Hacuaha ha cjuaquixi ta jemu cjín chjuun cahan xi caviyuju
na nguehe Israel hya xi cavéjña profeta Elías hatsëë nixtin. Hacuaha nixtin
vëhë matsejen ne, cavaain camahani tsi sacuaaha jyan nu vasen, hane jercu
jyë camahani jindya cavéjña jinguyë ni ladu. ²⁶ Peru catsingatjin Nina
profeta Elías xi cjue cuisecoo me hisca ngu na cahan xi cuacun vë matsejen
ta ngu ni na cahan xi hisca hacuain na tjë rè Israel na catsingatju Nina
profeta xi cuisecoo me na ngajan nandya Sarepta, ladu tsëhë nandya Sidón.

²⁷ Hacuaha nguehe Israel matsejen ne, jemu cjín xuta xi yaha rè ngu chíhin
vitaha xi setaha yojo naja caviyuju me hya xi cavéjña profeta Eliseo hatsëë
nixtin. Peru hisca xi ngu me xi cuacun vë camandajin me matsejen ta ngu ni
Naamán xi hisca hacuain xuta tjë rè Israel ta xuta Siria me matsejen ne, me
vëhë ni xi camandaja me. —Cuatjin xu cachja Jesús.

²⁸ Hane yëjë ni xuta xi siu xu cahntsua yungun jan ne, hya xi cahndë
me cjua xi cachja Jesús jan ne, jemu camacjan rè me. ²⁹ Hya xi camá ne,
xi caxinchacun xuta jan ne, cavaxëxin xu me Jesús, quijicojo me me hisca
ngajan ngu xín tsëhë nandya, ngu rcu ndetjún hnga hiscan xi cavéjña nandya
rë me, xi meje tsingatjen me Jesús. ³⁰ Peru Jesús ne, cavatju xu me ngajñi rè
xuta jan quijixin me.

Cha xi jiya xitsehen xahasen rè

³¹ Hya xi camá ne, quiji xu Jesús Capernaum, ngu nandya tsëhë distritu
Galilea. Hane nixtin xi chjahájenda rè ne, quiji xu me yungun cavicuya me
xuta. ³² Hane yëjë xuta xi siu jan ne, jercu quijircun xu rè me tsëhë cjua xi
vicuya Jesús ta, tsëhë xi cjua xi vicuya me ne, sacuaaha cjua xi chja ngu xi
matitjun jain.

³³ Hacuaha cahntsua yungun jan ne, tacun xu ngu cha xi jiya xitsehen cahntsua xahasen rë cha. Hane xitsehen jan casahmi xi jercu cajindaya cha cachja cha cuitjin:

³⁴ —¡Ja! ¿Mé má cuatjin ninguisuhunjnũ cojo niji ngayun Jesús, xuta Nasaret? ¿Há canduvun xi nicjun niji? Ngahan ne, ha hvë yo ngayun. Ngayun xi hatuxa vinechun tséhë Nina ngayun. —Cuatjin xu casahmi xitsehen xi cachja cha.

³⁵ Hya xi camá ne, cuitjin xu cachja Jesús xi cavatëcja me cjua rë xitsehen xi jiya cahntsua xahasen rë cha:

—¡Jyuu nechin, hacuaha tetjixin tséhë cha vë! —Cuatjin xu cachja Jesús.

Hya xi camá ne, catsiticia xu xitsehen jan cha ngajñi rë xuta, sehe cavetju quiji tséhë xahasen rë cha, peru tsajin camahani mé cavanguihmu rë cha.

³⁶ Hya xi camá ne, yëjë xuta jan ne, jercu quijircun rë me, hisca cachja xu me ngajñi rë me cojo xicjin me cuitjin:

—¿Mé nga xcusun cjua vihi xi cojo yëjë ni ngahnũ vitexa rë hisca xitsehen, hacuaha vetjuxin ni? —Cuatjin xu cachja xuta ngajñi rë me cojo xicjin me.

³⁷ Hya xi camá ne, jinguyë ni ladu tahndee rë cahndë jan ne, cavitsojo xu cjua xi cachja xuta tséhë Jesús.

Camandaja nahya rë Simón Pedru xi casahmi Jesucristu

³⁸ Xi cavetju Jesús tséhë yungun ne, quiji xu me ndava ngu me xi hmí rë Simón. Hane nahya rë Simón ne, jemu hmu xu rë me xi yaha rë me chíhinsuë. Hane yëjë xuta rë me ne, cafehya me cojo Jesús xi cuiasecoo Jesús nahya rë Simón. ³⁹ Hane xi quiji cavutsejenya xu Jesús xcun nahya rë Simón ne, cavatëcja me chíhinsuë xi má rë xuta changá vëhë, hane cavetjuxin xu chíhin jan tséhë me. Hane hora vëhë ni ne, cavisatjenhnga nahya rë Simón cavetsihin caphacuenda me cjuandaja xi sahmi me cojo yëjë ni me xi cafehe jan.

Jemu cjin xutahmu rë camandaja me xi casahmi Jesús

⁴⁰ Hane hora xi tivetje tsuhi xu ne, yëjë ni xuta xi tjin rë me xutahmu rë tséhë tu mé ni xcusun chíhin ne, quijicojo me xutahmu rë jan nixtin hya hiscan tacun Jesús. Hane xi cavisanetsja xu Jesús jima ngu xutahmu rë jan ne, camandaja me. ⁴¹ Hacuaha jemu cjin xu xuta xi siu jan cavetjuxin xitsehen xi híncha rë me. Hane xi cavetju xitsehen jan quiji ne, jercu cachja camahani cuitjin:

—¡Ngayun xi Quihndi jain rë Nina ngayun! —Cuatjin xu cachja xitsehen jan.

Peru cavatëcja xu Jesús cjua xi tichja xitsehen jan, casuaain me cahndë xi cuichja xitsehen ta, tséhë xi ha vëë xu xitsehen xi me vëhë xi catsingatju Nina me.

Catsuyihiya Jesucristu cojo cjuandajyihí rë Nina

⁴² Hane xi casahasen jan ne, cavetju xu Jesús quiji me ngajan ngu xín tséhë nandya. Hane xutacjin jan ne, cuatjin quiji cavanguise xu me Jesús, hane xi cavechú me hiscan tacun Jesús ne, meje tsinguijnehai me Jesús cojo sa xi hacuiin cuetjuxin me tséhë xuta jan. ⁴³ Peru Jesús ne, cuitjin xu cachja me cojo xuta jan:

—Hacuaha sahmi ná nguyë xi cjuë jingu sa cahndë, suá cumachaya rë xuta cjuandajyihí tséhë gobiernu xi sahmi Nina ta ngatsë rë vëhë xi catsingatju ná Nina. —Cuatjin xu cachja Jesús.

⁴⁴ Hane cuatjin xu catsujyihya casua me camachaya rë xuta cjuandajyihy vëhë yëjë ni yungun tsëhë ladu vëhë.

5

Cjuarcun xi casahmi Jesucristu tsëhë chu ti

¹ Cuitjin xu camá nga ngu nixtin jan. Jercu cjín camahani xuta quijitjengui me Jesús xi cuihndë me cjuar rë Nina. Na cavehncun xu me Jesús xi secun me tjehen laguna Genesaret, xi hacuaha hmí rë laguna Galilea. ² Hya xi camá ne, cavëë Jesús jo barcu ngajan tjehen rë laguna jan, hane cha xi tsëhë barcu jan ne, ha cavitujne xu cha tsëhë barcu, hane hincha vane cha nahya rë cha. ³ Hane Jesús ne, quiji cavisehen xu me ngu barcu xi cavëë me jan. Barcu jan ne, tsëhë Simón. Sehe cachja me cojo Simón xi cjuccojo me hitsë barcu ngajñi nandá. Hya xi camá ne, quiji cavéña me sehe cavicuya xu me xutacjín jan tsëhë ngajan ni cahntsua barcu. ⁴ Hane xi cajnetaha cavicuya me xuta jan ne, sehe ngajan xi cachja xu me cojo Simón cuitjin:

—Tángunvuhun sa cojo barcu vi hiscan nungun nandá, sehe ngajan ningatjunyun nahya xi chjuhun ti. —Cuatjin xu cachja me.

⁵ Sehe ngajan xi cafayangui xu Simón tsëhë Jesús cuitjin:

—Tatá, cuaha nixten tinihñi xá vëhë ne, ndastu mé sacu niji. Peru sá xi cuatjin nújun ne, cuihchá cojo compañeru naha ne, ningatjinyin nahya. —Cuatjin cafayangui xu Simón.

⁶ Hane xi casahmi me cuatjin ne, jercu tu cjín camaha xu ni ti cafaha me, ña meje xtiya nahya rë me. ⁷ Hya xi camá ne, casahmitsja xu me cojo xicjin me xi hincha barcu xingu jan xi cjue cuisecoo xicjin me. Sehe quiji me xi cuacun jan. Hya xi camá ne, catsinguitsë me catsijo barcu cojo ti xi cafaha me jan. Hane xi jercu catsë barcu ne, ña meje xtyusehen. ⁸ Hane xi cavëë Simón Pedru xcusun xi camá jan ne, sehe quiji caticjaxcun me xcun Jesús, sehe cachja xu me cuitjin:

—Tatá. Tángunxun hitsë tsahan ta, ngahan ne, ngu xuta tsehen ngahan. —Cuatjin xu cachja Simón Pedru.

⁹ Cuatjin cachja me ta, tsëhë xi jercu quijircun camahani rë me cojo compañeru rë me ngatsë rë ti xi jemu cjín camahani chu cafaha me. ¹⁰ Hacuanitjin xu ni quijircun rë yahnga compañeru rë Simón, me xi hmí rë Jacobo cojo Juan, me xi quihndi rë Zebedeo. Sehe ngajan xi Jesús ne, cuitjin xu cachja me cojo Simón:

—Xicarcuun ta quihndë cojo nixtin xi cjuiniji sa vi ne, ngayun cuangun nuvun xuta xi cuisëhen me ladu naha ngojo rë xi nuvun chu ti. —Cuatjin xu cachja me.

¹¹ Hya xi camá ne, Simón cojo compañeru rë me ne, cavaxëxin xu me barcu jan tsëhë xcun nandá, caviyuju me nangui quixí. Sehe caviyuju me yëjë ni tsëhë me ne, sehe quiji me cojo Jesús.

Casahmi Jesucristu xi camandaja cha xi yaha rë chíhin xi setaha yojo naja

¹² Cuitjin camá nga xu hya xi casetaha Jesús ngu nandya jan. Cafehe xu ngu cha xi jingujyë ni yojo rë yaha rë ngu xcusun chíhin vitaha. Hane xi cavëë xu cha Jesús ne, quiji cha caticjaxcun cha xcun Jesús cafehya cha cjuandaja xi sahmi me cojo rë cha, cuitjin xu cachja cha:

—Tatá. Sá xi meje nuju ne, cuma chjuhunxun chíhin xi yaha ná. —Cuatjin xu cachja cha.

13 Hane xi catsixinga xu Jesús tsja me cavetahatsja me cha ne, cachja me cuitjin:

—Meje ná. Catamandaja ngayun. —Cuatjin xu cachja me.

Hane chíhin jan ne, ngutjen xu ni cavetjuxin. 14 Sehe cavitexa me cha cuitjin:

—Tsajin camahani yo xi cuinújun cojo xcusun vihi. Nihñu sacuatjin cavitexa Moisés xutachanga naja hatsëë nixtin. Tángun ningacun yojo nuju cojo nahmi, sehe tángun chjuhun ngu cjuatjo xi tuhun rë Nina tséhë xi camandaja ngayun. Cuatjin nihñu cojo sa xi cumatsejen xi camandaja jain ngayun. —Cuatjin xu cachja me.

15 Peru handasa cuatjin xu cachja Jesús cojo cha ne, hitsë sa jercu cavitsojo cjua tséhë xcusun xi casahmi me. Hya xi camá ne, jercu tu cjín camahani xuta quijitjengui xu me Jesús xi cuihndë me cjua rë Jesús hacuaha cumandaja me tséhë chíhin xi ma rë me. 16 Peru Jesús ne, yasen xu ni cavaxëxin me yojo rë me fi me ngajan ngu xín camahani, sahmi me oración rë me cojo Nina.

Casahmi Jesucristu xi camandaja cha xi cahme yojo rë

17 Cuitjin camá nga xu ngu nixtin hya xi tivicyua Jesús xuta. Hacuaha siu xu ngujo cha fariseo cojo ngujo cha xi vicuya cjuachacun xi canduva cha yëjë ni nandya tséhë distritu Galilea cojo distritu Judea, cojo nandya Jerusalén. Hacuaha jercu yaha Jesús ngahñu rë Nina xi sahmi me xi cumandaja xuta hmu rë. 18 Hya xi camá xu ne, hora vëhë cafehe ngu cha xi cahme yojo rë, quichahahnga rë cha cojo nijña rë cha. Hane cha xi yahahnga rë cha ne, casahmi cha cjuandya xi cuisehen cha cahntsua ndihya xi cuejña cha cha hmu rë jan hiscan tacun Jesús. 19 Peru xi casacuiin xu rë cha chuya rë hacutjin cuisehen cha ngatsë rë xuta xi jercu quitsë camahani me jan ne, camiji xu cha rcu ndihya, hane cafahaxin cha tjjavanitja, sehe catsitujne cha cha hmu rë jan taha rcu ndihya cojo ni nijña rë cha, xi camá cavejña cha cha ngajñi rë xuta hiscan tacun Jesús. 20 Hane xi cavëë Jesús xi cuatjin mangucacun cha xi cuacun jan cojo rë me ne, sehe cachja xu me cuitjin cojo cha hmu rë jan:

—Jyë nuju tsan ne, ha camanchataha. —Cuatjin xu cachja me.

21 Hya xi camá xu ne, cha xi vicuya cjuachacun cojo cha fariseo xi cuacun jan ne, cavetsihin catsingataha cacun cha cachja xu cha cuitjin cojo xicjin cha:

—¿Yo cha xi cuijyihí vi xi tsixcuehyu cha Nina? ¡Hatuxa tsajin yo xi cuma tsinchataha jyë rë xuta ta suvá ni Nina xi cuma tsinchataha me! —Cuatjin xu cachja cha cojo xicjin cha.

22 Peru tséhë xi Jesús ne, ha vëë me mé xi tisingataha cacun cha xi cuacun jan ne, cachja xu me cojo cha cuitjin:

—¿Mé xi tiningatuhuntacún cojo cjuatacun nuju? 23 ¿Jarë cjua xi hitsë sa tsaviin xi cuihjá? ¿Há xi: “Jyë nuju ne, ha camanchataha?”, o ¿há xi: “Tisatjunhgun ne, tujyuhunyun?” 24 Peru nguehe suá cumachaya nuju xi ngahan xi Quihndi rë Xuta Jain ngahan ne, yahá xá xi tsinchátaha jyë rë xuta nguehe ngasunhndë.

Sehe ngajan xi cachja xu Jesús cojo cha hmu rë jan:

—Quihndë ne, ngayun tsan ne, tsatjunhgun, chjuhun nijña nuju vë ne, sehe tjangan ndya nuju. —Cuatjin xu cachja Jesús.

25 Hya xi camá ne, ngutjen ni cavisatjenhnga xu cha ngajñi rë yëjë ni xuta, sehe cafaha cha nijña rë cha, cafe cha, taha sahmi jyë sahmi hnga cha Nina. 26 Hane yëjë ni xuta jan ne, jercu quijircun xu rë me, hacuaha cojo me

casahmi jyé casahmi hnga xu me Nina, hisca catsacjun me camá. Hacuaha cachja xu me cuitjin:

—Quihndé cahyan xcusun xi tsajin nixtin xi hyan. —Cuatjin xu cachja me.

Cavaxijin Jesucristu Leví xi hacuaha hmí rë me Mateo

²⁷ Hya xi camá xu ne, xi cavetju Jesús jan ne, cavechú me ngu cahndé hiscan xi tacun ngu me xi faha tujúnsa, me xi hmí rë Leví. Sehe cachja xu me cojo me cuitjin:

—Nduvun, cuanguen cona. —Cuatjin xu cachja me.

²⁸ Hya xi camá ne, Leví jan ne, caviyuju yějé mé xcusun xi sahmixa me cojo jan ne, sehe cavetju xu me quiji me cojo Jesús.

²⁹ Hane xi cavatju vëhë ne, sehe casahmi xu me ngu suhi ngajan ndava me ngatsë rë Jesús. Hacuaha jercu cjín camaha xu ni cha xi faha tujúnsa cojo jingu sa xuta tijinë me niñu cojo Jesús cojo Leví. ³⁰ Hane cha fariseo cojo cha xi vicuya cjuachacun cavetsihin cachjataha xu cha xuta ladu rë Jesús cuitjin:

—¿Mé má cuatjin chinu hyun tangun cojo cha xi faha tujúnsa cojo ngujo sa cha xi hacuaha cha tsehen cha? —Cuatjin xu cachjataha cha.

³¹ Hane xi cafayangui Jesús tsëhë cha ne, cuitjin xu cachja me:

—Xuta xi hacuain hmu rë me ne, mijí rë xi cjuahacuenda rë me doctor ta suvá ni xuta xi hmu rë me ne, me vëhë xi meje rë xi cjuahacuenda rë me doctor. ³² Hacuanitjin ná ngahan ta ngahan ne, hacuain canduvá nguehe xi squindáyavaha rë xuta xi tsajin jyé rë me ta xi canduvá ne, xi squindáyavaha rë xuta tsehen. Cuichjá cojo rë me xi tsindeya me cjuatacun rë me. —Cuatjin xu cachja me.

Mé tsëhë xi casahmii Jesucristu cojo xuta rë me xun rë me

³³ Ngajan xi cha fariseo cojo cha xi vicuya cjuachacun ne, cachja xu cha cuitjin cojo Jesús:

—Yějé xuta ladu rë Juan ne, yasen ni sahmi me xun rë me hacuaha sahmi me oración rë me cojo Nina. Hacuanitjin ni yějé xuta ladu rë cha fariseo. Peru xuta ladu nuju ne, jinë jihvi me. —Cuatjin xu cachja cha.

³⁴ Ngajan xi Jesús ne, cuitjin xu cachja me cojo cha:

—Cumaji xi xuta rë cha xi tivixan ne, sahmi me xun rë me jinguyějé rë xi cha xi tivixan ne, tacun cha cojo rë me. ³⁵ Peru cuechú nixtin xi cha xi tivixan chjaháxin rë cha tsëhë xuta rë cha ne, hya sahmi me xun rë me. —Cuatjin xu cachja Jesús.

³⁶ Hacuaha cachja nga xu me ngu ejemplu vihi cojo cha xi cuacun jan:

—Tsajin yo xi cuicheya ngu rquí tsjian xatsë sehe cueyaco cojo ngu tsjian changá ta sá xi cuatjin sahmi me ne, tsjian xatsë jan ne, tsinguetsun me. Hacuaha cumatanguaain ngu rquí tsjian xatsë cojo tsjian changá jan.

³⁷ Hacuaha tsajin yo xi cuincha xan xatsë cahntsua chuxin changá ta sá xi cuatjin sahmi ne, xan xatsë jan ne, tsitsinga rë chuxin jan. Hane cjuë cuixu xan, hacuaha chuxin jan ne, cuetsun. ³⁸ Xi meje rë ne, xan xatsë ne, xincha cahntsua chuxin xatsë. ³⁹ Hacuaha ngu xuta xi ha cahvi me xan changá ne, ha quihndé mijí cuihi me xan xatsë, tsëhë xi chja me ta xan changá ne, vëhë xi ndaja hyun. —Cuatjin xu cachja Jesús.

6

Cavotoho xuta ladu rë Jesucristu trigu nixtin xi chjahájenda rë

¹ Hacuaha cuitjin camá nga xu ngu nixtin xi chjahájenda rë. Hya xi tivatju xu Jesús cojo xuta ladu rë me hiscan tjin tjë trigu ne, cavotohosun xuta ladu

rë me tsë tsë trigu jan, sehe catsufëtsja me, sehe cajiñë me. ² Sehe ngajan xi ngujo cha fariseo xi cojo cjuí jan ne, cachjataha xu cha me cuitjin:

—¿Mé má cuatjin tisahmi xuta ladu nuju xá, handasa chja ley naja xi tsajin cahndë xi nihña xá nixtin xi chjahájenda rë? —Cuatjin xu cachja cha.

³ Ngajan xi Jesús ne, cuitjin xu cafayangui me tsëhë cha:

—Ngayun ne, ha cachutayun xcusun xi casahmi xutachanga naja David hatsëë nixtin. Hya xi jercu camavojo rë me cojo xuta xi siu cojo me ne, ⁴ cavisehen me ndava Nina, hane cafaha me pan xi viyuju xcun Nina xi tsajin cahndë xi tu yo ni sinë ta suvá ni nahmi xi cuma sinë me. Peru me vëhë ne, cajiñë me hacuaha casua me cajiñë xuta xi siu cojo rë me.

⁵ Hacuaha cachja sa Jesús cuitjin:

—Ngahan xi Quihndi rë Xuta Jain ngahan ne, ngahan xi vitéxa mé xi cuma nixtin xi chjahájenda rë. —Cuatjin xu cachja Jesús.

Casahmi Jesucristu xi camandaja cha xi quixihñu ngu tsja

⁶ Cuitjin camá nga xu ngu nixtin xi chjahájenda rë. Quiji Jesús yungun ne, cavicuya me. Hane tacun xu ngu cha cahntsua yungun jan xi quixihñu tsja quixi cha. ⁷ Hane cha xi vicuya cjuachacun cojo cha fariseo xu ne, siu tifahachuva xu ni cha Jesús, ¿há sahmi me xi cumandaja xuta nixtin xi chjahájenda rë?, cojo sa xi cuma cuinchajyë cha me tsëhë xi sahmi me xá nixtin xi chjahájenda rë. ⁸ Peru Jesús ne, ha vëë me mé xi tsingataha cacun cha xi cuacun jan. Sehe cachja xu me cojo cha xi quixihñu tsja jan cuitjin:

—Tisatjunhngun, hane tisechun nguehe cavasenca. —Cuatjin xu cachja Jesús.

Hane sehe cavisatjenhnga xu cha cavisecun cha. ⁹ Sehe ngajan xi cachja xu Jesús cojo cha xi cuacun jan cuitjin:

—Sahme nuju ngu cjuachjinenguise vihi: Nixtin xi chjahájenda rë ne, ¿mé xi sua cahndë ley xi nihña?, ¿há xi cjuandaja ne?, o ¿há xi cjuatsehen? ¿Há xi naxentjeen cjuahñu rë xingueen ne?, o ¿há xi nicjeen? —Cuatjin xu cachja Jesús.

¹⁰ Xi cavutsejen Jesús xuta jingujyë ni tahndee rë me ne, sehe cachja xu me cojo cha xi hmu tsja jan cuitjin:

—Nixingun ntsun. —Cuatjin xu cachja me.

Hane cuatjin casahmi cha. Hane tsja cha ne, ha camandaja xu sacuatjin xi jyihi titjún. ¹¹ Hya xi camá ne, cha xi cuacun jan ne, jemu camacjan camaha xu ni rë cha, hisca cachja cha ngajñi rë cha cojo xicjin cha mé xi ndatjin sahmi xu cha cojo Jesús.

Cavaxijin Jesucristu tejó me xi cuma apóstol

¹² Hacuaha cuitjin camá nga xu ngu nixtin nixtin xi cuacun vë. Cavetju Jesús quiji xu me ngu ndetjún xi sahmi me oración, hane ngajan cavéjña me cuaha nixten sahmi me oración rë me cojo Nina. ¹³ Hane xi casahasen ne, cajindayavaha xu me xuta ladu rë me, hane ngajñi rë xuta xi cuacun vë ne, cavaxijinñi xu me tejó xihin. Hane me xi tejó vëhë ne, me vëhë xu xi cachja Jesús tsëhë me apóstol. ¹⁴ Me xi cuicun vi xi tejó me xi cavaxijin Jesús: Simón, me xi hacuaha casuañihi me me Pedru, cojo Andrés hntsë Simón, Jacobo cojo Juan, Felipe cojo Bartolomé, ¹⁵ Mateo cojo Tomás, Jacobo quihndi rë Alfeo cojo Simón, me xi tsëhë partido zelota, ¹⁶ Judas xuta rë Jacobo cojo Judas Iscariote, me xi sahmi entregadu rë Jesús.

Cafahacuenda Jesucristu jemu cjin xuta

¹⁷ Hane xi cavuya canduvajne xu Jesús tsèhë naxi jan cojo xuta ladu rè me jan ne, xi cafehe xu me ngu ngasun ne, ngajan caxinchacunhñu xu me cojo xuta jan. Hacuaha jercu cjín sa xuta ladu rè me xi siuya jan, siuya tangun cojo jemu cjín camaha xu ni xuta tsèhë nandya Jerusalén cojo tsèhë yějë sa naciòn Israel, hisca cojo xu xuta xi nduva tsèhë nandya Tiro cojo Sidón, xi siu ladu tsèhë tjehe ndachacun. ¹⁸ Yahnga xu xuta xi cuacun vë ne, canduva me xi meje cuisñuju me cjua rè Jesús, hacuaha yahnga nga me ne, canduva me xi meje rè me xi cumandaja me tsèhë chíhin xi yaha rè me. Hacuaha me xi jemu tivatju cjuañihi xi hincha xitsehe cahntsua xahasen rè me ne, hacuaha camandaja xu me. ¹⁹ Yějë ni xutacjín jan ne, cavanguise me chuva rè xi satëtsja me Jesús ta, tsèhë xi Jesús ne, jemu tjin rè me ngahñu rè Nina, hane ngahñu vèhë tisahmi xi mandaja xu yějë xuta hmu rè.

Xuta xi ndaja tsèhë cojo xuta xi chojyih tsèhë

²⁰ Ngajan xi ngaxtun vèhë xu ne, cavutsejen Jesús xuta ladu rè me, sehe cachja xu me cojo cuitjin:

—Jemu ndaja tsujun ngayun xi yumu matsejen ta, tsèhë xi ngayun matsejen ne, satë nuju gobiernu xi sahmi Nina.

²¹ Jemu ndaja tsujun ngayun xi vojo nuju quihndë matsejen ta, tsèhë xi cuechú nixtin xi jemu chuya rè xahasen nuju.

Jemu ndaja tsujun ngayun xi tichjihndun quihndë matsejen ta, tsèhë xi cuechú nixtin xi cuéjnu.

²² Hacuaha jemu ndaja tsujun ngayun hya xi choho scuëë nuju xuta, o hya xi cuaxëxin nuju me tsèhë ngajñi rè me, o hya xi choho cuichja me cojo nuju, o hya xi tsitjungui nuju me, ngatsë rè xi tjin tangun cjuatacun nuju cojo ná ngahan xi Quihndi rè Xuta Jain ngahan. ²³ Hisca chihjhgung xi ndama nuju xi cuatjin tivatjun tijima nixtin hya matsejen ta, tsèhë xi jemu jyë ngu cjuandaja xi tacunya nuju ngajan ngahnga. Jemu ndaja tsujun matsejen ta, tsèhë xi cuanitjin ni choho casahmi xutachanga naja cojo profeta hatsëë nixtin, hane jemu cachuya rè Nina tsèhë profeta xi cuacun vë.

²⁴ Peru jemu chojyih tsujun ngayun xi nchina ngayun matsejen ta, tsèhë xi ha casacu nuju cjuetacun xi cuma nuju.

²⁵ Jemu chojyih tsujun ngayun xi ha jemu chuya rè xahasen nuju quihndë matsejen ta, tsèhë xi cuechú nixtin xi cuma vojo nuju.

Jemu chojyih tsujun ngayun xi tivéjnu quihndë matsejen ta, tsèhë xi cuechú nixtin xi jercu chjihndun xi cuma va rè xahasen nuju.

²⁶ Hacuaha jemu chojyih tsujun ngayun hya xi ndaja cuichja yějë xuta tsujun matsejen ta, tsèhë xi cuanitjin ni ndaja casahmi xutachanga naja cojo profeta ndacha hatsëë nixtin, hane profeta ndacha xi cuacun vë ne, cachuyiin rè Nina tsèhë me.

Meje rè xi nihmu tacun condra naja

²⁷ Peru ngayun xi tinuhyun xi chjá matsejen ne, cuichjá cojo nuju cuitjin: Nihmutacún xuta xi má condra nuju, ndaja nihñu cojo xuta xi choho vëë nuju me, ²⁸ chjahyun rè Nina cjuandaja xi cuma rè xuta xi fehya rè me Nina cjuahngatacun xi cuatjun cuma. Ngajñi rè oraciòn nuju matsejen ne, chjahyun rè Nina cjuandaja xi cuma rè xuta xi vangui nuju me si. ²⁹ Yo xi vajaya ngu ladu tsa nuju matsejen ne, nicuyun sa ngu ladu catajaya. Yo xi fahatahá chingá nuju matsejen ne, xicanichuun rè hisca chingá ngahma nuju. ³⁰ Yějë ni xuta xi fehya nuju me mé xi fehya nuju me matsejen ne, tuhun rè me. Yo xi fahatahá mé xi fahatahá tsuhun matsejen ne, xicanujuun xi

tsicuya nga me. ³¹ Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me.

³² Tsajin yo sua nacuechji nuju tsëhë xi hmutacún xuta xi hmucacun nuju me matsejen ta, tsëhë xi hacuaha hisca xuta tsehen matsejen ne, hmucacun me xuta xi hmucacun rë me. ³³ Hacuaha tsajin yo sua nacuechji nuju tsëhë xi ndaja nihñu cojo xuta xi ndaja sahmi me cojo nuju matsejen ta, tsëhë xi hacuaha hisca xuta tsehen matsejen ne, hacuanitjin ni sahmi me. ³⁴ Hacuaha tsajin yo sua nacuechji nuju tsëhë xi tuhun vuxetaha xuta xi vetuhun tacún xi ngascan matsejen ne, sua me nuxetuhun matsejen ta, tsëhë xi hacuaha hisca xuta tsehen matsejen ne, sua me vuxetaha xicjin me, cojo sa xi cuya cjuahatsja nga me chuva vëhë ni. ³⁵ Cúya cuichjá nga cojo nuju, nihmutacún xuta xi má condra nuju. Ndaja nihñu, hacuaha tuhun tuxetaha rë, peru xicavetuun tacún xi cuya chjuhunnstun nga. Sá xi cuatjin nihñu matsejen ne, jemu jyë cjuandaja xi sua nuju Nina ngascan, hane cjuandaja xi nihñu ngayun matsejen ne, tangun cojo cjuandaja xi sahmi Nina matsejen ta, tsëhë xi me vëhë matsejen ne, hatuxa jemu ndaja me cojo xuta tsehen xi hisca nacuechji rë Nina suaain me. ³⁶ Meje rë xi tjin nuju cjuayumatacun sacuatjin tjin rë Nina Nahmi naja cjuayumatacun.

Mijí rë xi nichuvan jingu sa xuta cojo cjuatacun rë me

³⁷ Hacuian nichuvun jingu sa xuta cojo cjuatacun rë me, sehe hacuiin tsichuva Nina ngayun. Hacuian ninguixun jyë rë jingu sa xuta, sehe hacuiin tsinguixi Nina jyë nuju. Ninchatuhun rë jingu sa xuta matsejen ne, sehe hacuaha tsinchataha nuju Nina. ³⁸ Tuhun rë jingu sa xuta matsejen ne, sehe hacuaha sua nuju Nina. Sua nuju me chuva xi cjuaquixi, hisca tsuquihine me, hisca tsiniyaya me chuva rë, hacuaha hisca xotje rë chuva xi sua nuju me. Cuatjin nihñu matsejen ta, tsëhë xi chuva xi nichuvun matsejen ne, hacuaha chuva vëhë tsichuva Nina xi sua nuju me. —Cuatjin xu cachja Jesús cojo xuta ladu rë me.

³⁹ Hya xi camá ne, cachja sa xu me ngu ejemplu cuitjin:

—Ngu cha rcá matsejen ne, cumaji cjuecani cha ngu nga cha rcá matsejen ta, sá xi cuatjin matsejen ne, catsijo ni cha cuixuya cha xanga. ⁴⁰ Ngu cha xi sehe tivutaya matsejen ne, hacuiin hitsë sa venguí chjí rë cha xi cuma rë maestru rë cha matsejen ta hya xi ha ndaja cavutaya cha yëjë ni matsejen ne, sehe ngajan xi cuechútáha cjuatacun rë cha sacuaaha cjuatacun rë maestru rë cha.

⁴¹ ¿Hacutjin má xi matsejen nuju xtë xi jiya tuxcun xingun, hane machayiin nuju tsëhë yasin xi jiya túxcun suvun ni? ⁴² ¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyëjë rë xi suvun matsejen ne, matsijin nuju yasin xi jiya túxcun vë ni? Ngayun xuta ndacha, naxun titjun yasin xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

Tsejen mé xcusun xuta me ngatsë ni rë cjuaxi chja me

⁴³ Ha hyan matsejen ta tsajin hisca xi ngu yatjë xi ya ndaja xi sua tú xi ndajin, hacuaha tsajin hisca xi ngu ya xi ya machjiriin xi sua tú xi ndaja matsejen ta, ⁴⁴ jima ngu ya ne, cuma tsejen sá xi ndaja o sá xi ndajin ngatsë rë tú xi sua. Hatuxa sacuiin naja tú xi hmí higo rcu ngu yanahyálatu, hacuaha sacuiin naja uva rcu ngu yanahyátindu. ⁴⁵ Cuanitjin ni rë xuta matsejen ta sacuaaha xuta ndaja matsejen ne, tsëhë cjuandaja xi tetjo rë me cahntsua xahasen rë me cojo cahntsua cjuatacun rë me matsejen ne, tsëhë ngajan vetju cjuandaja. Peru xuta tsehen matsejen ne, tsëhë cjuatsehen xi tetjo rë

me matsejen ne, tsëhë ngajan vetju cjuatsehen. Cuatjin matsejen ta, tsëhë xi yëjë ni xuta ne, cjua xi quitsë rë xahasen rë me cojo cjuatacun rë me matsejen ne, vëhë cjua xi vetju hntsua me.

Ejemplu tsëhë jo ndihya

⁴⁶ 'Yasen ni nújun xi nai nuju ngahan, peru ¿mé má nihñuu sacuatjin xi chjá cojo nuju ni? ⁴⁷ Yahnga ngayun xi nduvuntjengun ná hacuaha visiñuju cjua naha hacuaha nihñu sacuatjin chjá cojo nuju matsejen ne, nguehe cuichjá cojo nuju yo xi tangun ngayun cojo: ⁴⁸ tangun ngayun cojo ngu cha xi hya xi casahmi cha ngu ndihya matsejen ne, ndaja nungun cafahngui cha, sehe ngajan cavejña cha xihndënaña rë hisca xcun ndyjojhoñu. Hane hya xi camajyë ndajyë hacuaha casesuntë nandá matsejen ne, jercu hñu catsivaha rë ndihya jan, peru hisca catsiniyaain rë, tsëhë xi jemu ndatjin casecun. ⁴⁹ Peru yahnga nga ngayun xi visiñuju cjua naha peru nihñuu sacuatjin xi chjá matsejen ne, tangun ngayun cojo ngu cha xi casahmi ngu ndihya súvá xcun nangui ni, xi tsajin xihndënaña rë. Hane hya xi camá ne, xi camajyë ndajyë matsejen ne, catsivaha rë ndihya jan, hane ngutjen ni caticja. Hane cavetsun camahani ndihya vëhë. Cuatjin xu cajnetaha cavicyua Jesús.

7

Casahmi Jesucristu xi camandaja hndixahan rë capitán xi vitexa me ngu cientu sindadu

¹ Xi cajnetaha xu cachja Jesús yëjë ni cjua xi meje cuichja me cojo xuta ne, sehe cavuya quiji nga me nandya Capernaum. ² Hane nandya jan ne, ngajan xu tacun ngu capitán xi tjin rë me ngu hndixahan xi cavatsë me xi jiñahmú, ha ña meje cueya camaha xu ni. Capitán jan ne, jemu hmucacun xu me hndixahan jan. ³ Hane xi camachaya xu rë capitán jan xi tacun Jesús ne, catsingatju xu me ngujo xuta changá rë xuta tjë rë Israel xi quiji cachja me cojo Jesús xi cjue sahmi me xi cumandaja hndixahan rë capitán jan. ⁴ Hane xi cafehe xuta changá jan hiscan tacun Jesús ne, nguñaja camahani cacun me cafehya me xi cjue xu Jesús. Cachja me cuitjin:

—Nihñu favor ne, tiseacun rë capitán hitsë ta, tsëhë xi jemu ndaja me.

⁵ Handasa hisca hacuiin tjë rë xutachanga naja me ne, peru jemu hmucacun me ngayaan xuta tjë rë Israel, hacuaha casahmi me yungun niji cojo ngahñu rë suva me. —Cuatjin xu cachja xuta changá jan.

⁶ Hya xi camá ne, quiji xu Jesús cojo rë me. Hane xi ha jima tiñataha me ne, sehe catsingatju xu capitán ngujo xuta ndaja rë me xi quijitjengui me Jesús. Hane xi cavechútaha xu me Jesús ngajan ndiya ne, cuitjin cachja me sacuatjin cachja capitán cojo rë me xi cuichja me cojo Jesús:

—Tatá. Xicatuhunndyuun yojo nuju. Ngahan ne, vechiin chuva rë xi ngayun cuinduvun ndya naha ta, tsëhë xi ngayun xi jemu jyë hnga ngayun cojo cjuatacun nuju. ⁷ Vëhë xi hacuaha tsingátaha cáacun xi jemu chúva ngahan cojo cjuatacun naha xi cjuë cuichjá cojo nuju. Quihndé ne, ndastu nihñu favor ne, tinújun xi cumandaja hndixahan naha. ⁸ Ngahan ne, hvë xi cuma nihñu xcusun vëhë ta, ngahan ne, hacuaha tjin xuta xi matitjun tsahan, hane hacuaha tjin ná sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi. Hacuaha hya xi chjá cojo ngu nga xi cuinduva ne, nduva. Hane hndixahan naha ne, xi chjá cojo xi sahmi mé xi meje ná ne, sahmi. —Cuatjin xu cachja xuta ndaja rë capitán jan cjua rë capitán cojo Jesús.

⁹ Hane xi cahndë xu Jesús cjua vëhë ne, jemu quijircun rë me tsëhë capitán jan. Hane xi cavuya me cavutsejen me xutacjín xi tjengui rë me jan ne, cachja xu me cuitjin:

—Cuichjá cojo nuju ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja mangucacun me cojo ná. —Cuatjin xu cachja Jesús.

¹⁰ Hane xi cavuya xu me xi quiji tixa jan ne, cavëë me xi ha camandaja cha hndixahan jan.

Casahmi Jesucristu xi cavuya ngu nima cjuahñu

¹¹ Xi cavatju vëhë ne, quiji nga xu Jesús ngu nandya xi hmí rë Naín. Cavisecoo xuta ladu rë me me quiji me, cojo jingu sa xutacjín xi cojo me quiji me. ¹² Hane xi tijima tiña xu me tsëhë tingotjo hnhua tsëhë nandya jan ne, cjuí seyaniji xu ngu nima, ngu nima xi quihndi ngu tsëhë naa rë. Hacuaha naa rë nima jan ne, cahan xu me. Jercu cjín camahani xuta nandya visecoo me chjuun jan cjuí me. ¹³ Hane xi cavëë xu Nai naja chjuun jan ne, camayuma rë me me. Sehe cachja me cojo chjuun jan cuitjin:

—Ha quihndë xicachjihnduun. —Cuatjin xu cachja me.

¹⁴ Hane xi quiji tiña xu Jesús hiscan xi cjuí me cojo nima jan ne, sehe quiji cavetahatsja xu me nachan xi quisun nima jan. Hane xuta xi yahahnga rë nima jan ne, caxinchacunhñu me. Sehe ngajan xi Jesús ne, cachja xu me cuitjin:

—Quihndë ne, ngayun tsan ne, tísatjunhngun. —Cuatjin xu cachja me.

¹⁵ Hane nima jan ne, cavisatjenhnga xu cha cavéñña cha. Sehe cavetsihin cachja cha. Sehe cachja Jesús cojo naa rë cha jan xi cjuahatsja nga me quihndi rë me. ¹⁶ Hya xi camá xu ne, yëjë ni xuta jan ne, jemu catsacjun me camá. Hacuaha casahmi jyë casahmi hnga me Nina, cuitjin xu cachja me:

—Cavetjuiñi ngajñi naja ngu profeta xi jercu vengui chji rë me, hacuaha casahmi Nina cjuandaja rë me cojo naja ngayaan xuta rë me. —Cuatjin xu casahmi jyë casahmi hnga me Nina.

¹⁷ Hya xi camá ne, cavitsojo xu cjua vëhë tsëhë Jesús jingujyë ni ladu vëhë cojo jingujyë ni nación Israel.

Cavinenguise Juan Jesucristu, ¿há me vëhë xi catsingatju Nina me?

¹⁸ Cuitjin xu camá nixtin xi cuacun vë. Xuta ladu rë Juan ne, casua me camachaya rë me yëjë xcusun xi casahmi Jesús. Sehe ngajan xi Juan ne, cajindaya xu me jo xuta ladu rë me jan ne, ¹⁹ sehe catsingatju me me xi cjue cjuinenguise xu me Nai naja sá xi me vëhë xi chja xujun rë Nina xi tsingatju Nina me, o sá xi meje rë xi cuiyujuya rë xi cuinduva nga ngu. ²⁰ Hane xi cafehe xuta xi catsingatju Juan jan hiscan quitahá Jesús ne, cachja xu me cuitjin:

—Juan Vitenda rë Xuta ne, catsingatju niji me xi nduvin vinenguisin nuju ¿há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin xu cavinenguise xuta xi catsingatju Juan jan.

²¹ Hane ha hora vëhë ni ne, Jesús ne, casahmi me xi jemu cjín xu xuta camandaja me tsëhë tu mé ni xcusun chíhin xi má rë me. Hacuaha jemu cjín sa xuta xi cavaxëxin Jesús xitsehen xi híncha cahntsua xahasen rë. Hacuaha jemu cjín sa xu xuta rcá xi casahmi Jesús xi camá camatsejen rë me. ²² Hya xi camá ne, xi catsicuya me cjua cojo xuta ladu rë Juan ne, cuitjin xu cachja me:

—Tjangun ne, sehe tinújun cojo Juan yějē xcusun xi cahyun cojo yějē cjua xi canuhyun. Tinújun ta xuta rcá ne, camá camatsejen rē me; xuta rengun ne, camá quijindaja me; xuta xi yaha rē chíhin vitaha xi setaha yojo naja ne, camandaja me; xuta xi loho me ne, camá cahndē me; nima ne, cavuya nga cjuahñu; xuta yuma ne, casacu camachaya rē me cjuandajyihí rē Nina. ²³ Hacuaha jemu ndaja tsēhē tu yo ni xuta xi hacuiin tsismicacun me xi mangu cacun me cojo ná. —Cuatjin xu cachja Jesús.

²⁴ Hane hya xi cavuya cafe xu xuta ladu rē Juan jan ne, sehe cachja Jesús cojo xutacjin jan cuitjin tsēhē Juan:

—Hya xi cavetjun catsangun ngajan ngu xín tsēhē nandya catsanguntjen-gun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rē me?, sacuatjin rē ngu ndeje xi fi nguehe fi ngajan rcu sacuatjin cjui tjo. ²⁵ O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihí camahani? Hacuian cuatjin. Ha hyan matsejen ta xuta xi jercu tu ndacun camahani tsjian vaja me hacuaha hatuxa jemu cjuasua síu me matsejen ne, sacuiin naja me ngajan ngu xín camaha ni tsēhē nandya matsejen ta hiscan xi sacu naja me ne, ndava ngu xuta nchina. ²⁶ Peru ngayun matsejen ne, catsangun cachutsujun ngu profeta. Hacuaha cjuaquixi xi vēhē cachutsujun. Peru profeta Juan vē matsejen ne, hitsē sa vengui chji rē me xi cuma rē yějē sa profeta xi yahnga. ²⁷ Hacuaha me vēhē xi cachja Nina tsēhē me xcun xujun rē me cuitjin:

Ngahan ne, tsingátju titjun ngu cha

xi scuxaha cjuatacun rē xuta tsēhē xi cjuehé ngaye.

Cuatjin cachja Nina cojo Quihndi rē me. ²⁸ Cuichjá cojo nuju matsejen ta ngajñi rē yějē xuta xi catsin me tsēhē naa rē me matsejen ne, tsajin ngu xi hitsē sa vengui chji rē xi cuma rē Juan. Peru hya xi cuetsihin Nina sahmi me gobiernu nguehe ngasunhdē matsejen ne, xuta xi chuva cuengui chji rē me quihndē matsejen ne, hitsē sa cuengui chji rē me nixtin hya, xi cuma rē xi ha vengui chji rē Juan quihndē.

²⁹ Hane hya xi yějē ni xuta hisca cojo cha xi faha tujúnsa cahndē me cjua xi cachja Juan matsejen ne, catsingatihin me xi cuitenda Juan me. Hane chuva vēhē matsejen ne, catsingacun me xi macjain rē me xi Nina matsejen ne, yějē xcusun xi sahmi me matsejen ne, hatuxa cjuaquixindaja jain. ³⁰ Peru jemu cjin cha fariseo cojo cha vicuya cjuachacun matsejen ne, catsingatiin cha xi cuitenda Juan cha. Hane chuva vēhē matsejen ne, catsitjungui cha xcusun xi meje sahmi Nina xi cuma tsēhē cha.

³¹ 'Ngayun xuta tjē rē Israel tsēhē nixtin vihi matsejen ne, ¿mé xi tangun ngayun cojo? ³² Tangun ngayun cojo langa xi siu ngajan ndetsin, xi jindaya xicjin cojo cjua vihi: “Canijani tsujun ne, mijí xtun; casin va ne, mijí chjihndun.” Cuatjin jindaya langa. ³³ Cuatjin chjá cojo nuju matsejen ta, Juan xi vitenda nuju ngayun matsejen ne, jini me niñu hacuaha hviin me xan, hane ngayun nújun ta jiya xitsehan xahasen rē me. ³⁴ Hane ngahan xi Quihndi rē Xuta Jain matsejen ne, jínē hacuaha hvē, hane nújun xi ngahan matsejen ne, ngu cha cahntsuaniñu ngahan, ngu cha cahntsuaxan ngahan, hacuaha ngu cha amigu rē cha xi faha tujúnsa cojo jingu sa xuta tsehen ngahan. ³⁵ Peru xuta xi fitjengui me cjuatacun rē Nina matsejen ne, xuta xi cuacun vēhē xi tsingacun naja me xi cjuatacun vēhē matsejen ne, ndaja jain. —Cuatjin xu catsinguijnetaha Jesús cjua rē me cojo xuta.

Catsinchataha Jesucristu ngu chjuun tsehen

³⁶ Ngu nixtin nga jan ne, cuitjin xu camá. Ngu cha fariseo ne, cachja xu cha cojo Jesús xi cjue siné me cojo cha niñu ndava cha. Hane xi cavisehen me ndava cha fariseo jan ne, sehe quiji cafaha xu me cahndě rě me xcun maxě xi siné me niñu. ³⁷ Ngajan xi ngu chjuun tsehen tsěhě nandya vėhě ne, camachaya xu rě na xi Jesús ne, tacun me ndava ngu cha fariseo tijině me niñu cojo cha ne, yaha xu na ngu frascu xi ndoyojo camá, hincha ngu xcusun aceite ndaja xi jercu hnga chji rě. ³⁸ Quiji xu na secun na táha ntsacu me, jihnda na. Hane cojo ndatuxcun na ne, cavetsihin catsicahnchi xu na ntsacu me. Hane cojo tsjarcu na ne, cavujnu na, sehe cavitatsuha na. Hya xi camá xu ne, sehe cavitejnu na aceite. ³⁹ Peru xi cavěě xu cha fariseo xi quijiojo rě me jan xi cuatjin casahmi na ne, catsingataha cacun cha cuitjin: “Cha xi cuijiyih vihi ne, sá xi profeta jain cha ne, ha vėhě cha mé xcusun chjuun na xi cuatjin satětsja rě cha ta, tsěhě xi na vėhě ne, ngu chjuun tsehen na.” Cuatjin catsingataha cacun xu cha. ⁴⁰ Sehe ngajan xi Jesús ne, catsicuya xu me cjua tsěhě cjuatacun xi catsingataha cacun cha fariseo jan, cuitjin xu cachja me:

—Simón, tjin ná ngujo cjua xi cuichjá cojo nuju. —Cuatjin xu cachja me.

Ngajan xi cha Simón jan ne, cuitjin xu cafayangui cha tsěhě me:

—Maestro, tinújun. —Cuatjin xu cachja cha.

⁴¹ Hya xi camá xu ne, cachja Jesús cuitjin cojo cha ngu ejemplu:

—Cuejña ne xi jo cha jan ne, quitjen cha tujún tsěhě ngu cha nchina. Ngu cha ne, quitjen cha tujún tsěhě hñu cientu nixtin xi sahmi ngu mosu xá. Hane ngu nga cha ne, quitjen cha tujún tsěhě yachan tě nixtin. ⁴² Hane xi tsajin rě cha xi cuacun vė tujún xi sahmingojo cha ne, cha nchina jan ne, catsinchataha cha catsijo cha. ¿Jarě cha xi cuicun vi xi hitsě sa tsihmu cacun cha cha nchina jan, xi má nuju? —Cuatjin xu cachja me.

⁴³ Sehe ngajan xi cafayangui xu cha Simón cuitjin:

—Xi má ná ne, cha xi hitsě sa cjín quitjen. —Cuatjin xu cachja cha Simón.

Sehe ngajan xi cachja xu Jesús cojo cha cuitjin:

—Jemu ndaja canichuvun cjua xi canújun. —Cuatjin xu cachja Jesús.

⁴⁴ Hane xi cavuya xu me cavutsejen me chjuun jan ne, sehe cachja nga me cojo cha Simón cuitjin:

—Chutsujun hacutjin casahmi chjuun vihi cojo ná. Ngayun ne, hora xi cavisehen ndya nuju ne, catuun nandá xi cjuengui ntsacú. Peru chjuun vihi ne, cojo ndatuxcun na catsicahnchi na ntsacú, hane cojo tsjarcu na ne, cavujnu na. ⁴⁵ Hacuaaha ngayun ne, cavitatsuun ná. Peru na vihi ne, hisca hora xi cavisehen ne, cjěě cuejñaxin na xi vitatsuha na ntsacú. ⁴⁶ Ngayun ne, cavitejnuu aceite rcú. Peru chjuun vihi ne, cavitejnu na aceite ntsacú, aceite xi jemu ndaja jne camahani. ⁴⁷ Vėhě xi cuichjá cojo nuju ta tsejen xi ha camanchataha na tsěhě jyě cjín xi tjin rě na ta, tsěhě xi jemu tjin rě na cjuahmutacun. Peru yo xi manchataha tsěhě hitsě jyě xi tjin rě ne, hacuaaha chůva cjuahmutacun tjin rě. —Cuatjin xu cachja Jesús.

⁴⁸ Ngajan xi cachja xu Jesús cojo chjuun jan cuitjin:

—Jyě nuju ne, ha camanchataha. —Cuatjin xu cachja me.

⁴⁹ Hane xuta xi tijině xu cojo rě me jan ne, cavetsihin cavinenguisse me ngajñi rě me cojo xicjin me cuitjin:

—¿Yo rě cha xi cuijiyih vi xi hisca jyě rě xuta tsinchataha cha? —Cuatjin xu cachja me.

⁵⁰ Peru Jesús ne, cachja nga xu me cojo rě chjuun jan cuitjin:

—Ngayun ne, ha cavetjuntjun ta, tsěhě xi camangutacún cojo ná. Cuma cuangun cojo cjuasua. —Cuatjin xu cachja me.

8

Yachjin xi cafahacuenda rë Jesucristu

¹ Cuitjin camá nga xu ngu nixtin. Jesús ne, titsujyihya xu me jemu cjin nandya cojo ranchun tisua me tijimachaya rë xuta cjuandajyihí xi chja tséhé gobiernu xi sahmi Nina. Hacuaaha cojo tejó xuta ladu rë me jan cavisecoo xu rë me. ² Hacuaaha cojo sa ngujo yachjin xi cavetju xitsehen xi hincha xahasen rë me hacuaaha camandaja me tséhé chíhin xi má rë me ne, cojo xu me quiji me. María, na xi hacuaaha hmi rë na Mágdala, ngu chjuun xi cavetju yatu xitsehen xahasen rë. ³ cojo Juana, chjuun rë Chuza, ngu cha xi sahmixa ndava Herodes, me xi cavitexa ngajan distritu Galilea, cojo Susana cojo jemu cjin sa yachjin xi hacjahi. Yëjë ni yachjin xi cuacun vë ne, cojo xcusun xi tjin rë suvá me ne, cafahacuenda xu me Jesús cojo yëjë ni xuta xi ticojo me.

Ejemplu tséhé cha xi catsitjë trigu

⁴ Cuitjin camá xu ngu ndiya nga. Hya xi jemu cjin xuta camatangun me xi canduva nguehe canduva ngajan me jingu sa nandya xi nduva tjengui xu me Jesús ne, cachja Jesús cojo xuta jan ngu ejemplu vihi:

⁵—Cueñaa ne xi ngu cha xi tsitjë trigu matsejen ne, cavetju cha quiji cha xi tsitjë cha trigu. Hane jinguyëjë rë xi titsitjë cha matsejen ne, ngujo matsejen ne, cavixu ndiya, hane canune rë. Hane xi canduva chu nisë matsejen ne, cacsicjë chu cajinë chu. ⁶ Hane ngujo nga matsejen ne, cavixu hiscan xi jemu naxindya. Hane xi cavetsihin tijima yehe ne, caxintsen matsejen ta, tséhé xi tsajin mé xcuen rë. ⁷ Hane ngujo nga matsejen ne, cavixu ngajñi nahyá. Hane xi camachatangun matsejen ne, nahyá jan matsejen ne, vëhé casahmi hndë rë catsixi rë. ⁸ Hane xi yahnga nga matsejen ne, cavixu hiscan nihndë ndaja. Hane xi camayehe matsejen ne, casua tutjë rë, ngu cientu sa cuatjin sacuatjin xi camatjë.

Xi café cachja me cjua vëhé ne, sehe jercu hñu xu cachja me cuitjin:

—Yo ngayun xi tjin nuju cjuasua xi cuinuhyun cjua naha ne, ndaja tinuhyun. —Cuatjin xu cachja me.

Mé má ejemplu cachja Jesucristu cojo xuta

⁹ Ngajan xi xuta ladu rë me jan ne, cavinenguise xu me mé meje cuichja ejemplu xi cachja Jesús jan. ¹⁰ Hane Jesús ne, cachja xu me cuitjin:

—Nina ne, casua me cahndë xi ngayun ne, cuijne rcun cjuatacun tséhé gobiernu xi sahmi Nina, cjuatacun xi titjún ne, tsajin yo machaya rë. Peru yëjë sa me xi yahnga ne, tichjá cojo rë me cojo suvá ejemplu, cojo sa xi handasa cuihndë me cjua naha ne, peru cuijni rcu me.

Cachja Jesús mé vijne ejemplu tséhé cha xi catsitjë trigu

¹¹ 'Quihndë ne, nguehe cuichjá cojo nuju mé meje cuichja ejemplu vëhé. Trigu xi tsitjë ngu cha jan ne, vëhé xi sacuaaha cjua rë Nina. ¹² Hane hya xi vixu ngujo trigu ndiya ne, hacui sacuaaha hya xi visiñuju xuta cjua rë Nina. Sehe vinduva Satanás ne, fahatahá cjua rë Nina tséhé xahasen rë me, cojo sa xi cuetjintjin me ngatsë rë xi cumacjain rë me. ¹³ Hane hya xi vixu ngujo trigu hiscan xi jemu naxindya ne, hacui sacuaaha hya xi vihndë xuta cjua rë Nina, hane fahatsja me cojo cjuasua. Peru trigu xi cuacun vë ne, jemu chúva tyjama rë vetju. Hacuanitjin ni vatju ngujo xuta má. Macjain rë me ngujo nixtin ni, peru hya xi vechú ngunixtin xi chjaháchuva rë me ne, fi ngaxtun me. ¹⁴ Hane hya xi vixu ngujo trigu ngajñi nahyá ne, hacui sacuaaha hya xi vihndë xuta cjua rë Nina, peru ha xcun xi ha cjuinduju me cojo nixtin rë me ne, tsingataha cacun me tséhé cjuacjintacun tséhé cahntsua

ndava me, tsingataha cacun me tséhë cjuanchina, hacuaha tsingataha cacun me tséhë cjuasua xi tjin ngasunhdë, hane vëhë suaain cahndë xi cumajyë cjuarë Nina cahntsua xahasen rë me, hacuaha sahmi me ngu cjuandaja xi tsingacun xi xuta rë Nina me. ¹⁵ Hane hya xi vixu yahnga trigu hiscan nihndë ndaja ne, hacuaha hacui sacuaha hya xi vihndë xuta cjuarë Nina cojo ngu xahasen ndaja, ngu xahasen tyjahi, hacuaha tsismicacuaain me. Hane cuatjin cojo jeya ne, caa rë me sahmi me cjuandaja.

Ejemplu tséhë ngu ndihi

¹⁶ Hacuaha tsajin hisca xi ngu xuta xi ha xcun xi ha cavetaha rë me ngu ndihi ne, sehe faha me veyahma me ngahma rë ngu tyucu o sá xi faha me vejña me ngahma nachan ta, hatuxa faha me vejña me cahndë rë, cojo sa xi yëjë xuta xi visehen me hiscan setí ndihi jan ne, scuëë me hasen rë. ¹⁷ Hacuanitjin ni chuya vëhë, yëjë cjuarë Nina xi tivicyá nuju suvun ni ngayun xuta ladu naha ne, handasa hinchahma yëjë cjuarë vëhë quihndë ne, peru cuechú nixtin xi cuetjucaa tsejen, hacuaha cuicuyun rë yëjë xuta.

¹⁸ Vëhë xi meje rë xi nihñu ngahñu xi ndaja cuisñuju cjuarë Nina ta, tséhë xi tu yo ni xi tjin rë cjuarë vëhë ne, Nina ne, sua sa rë me. Hane tu yo ni xi tsajin rë cjuarë vëhë ne, hitsë cjuarë vëhë xi má rë xi tjin rë ne, chjahátahá rë. —Cuatjin xu cavicya Jesús xuta ladu rë me.

Naa rë Jesucristu cojo xicjin me

¹⁹ Ngajan xi naa rë Jesús cojo xicjin me ne, cafehetjengui xu me Jesús. Hane maji vechútahacjin rë me ta, tséhë xi jercu quitsë camaha xu ni xuta. ²⁰ Hane tjin xu yo casua camachaya rë Jesús cuitjin:

—Naa nuju cojo nixti xingun ne, hinchacun me ngajan candatsen, xi nduvatjengui nuju me. —Cuatjin xu casacu camachaya rë me.

²¹ Peru Jesús ne, cuitjin xu cafayangui me:

—Xuta xi vihndë me cjuarë Nina hacuaha sahmi me sacuatjin chja cjuarë vëhë ne, hacuaha tangun ni hmú cáacun me sacuatjin hmú cáacun naa naha cojo xinguen. —Cuatjin xu cafayangui me.

Cavatëcja Jesucristu ngahñu rë tjo cojo cjuasca rë nandá

²² Cuitjin camá nga xu ngu nixtin jan. Cavisehen Jesús cahntsua ngu barcu cojo xuta ladu rë me, sehe cachja xu me cojo xuta jan cuitjin:

—Cuanguen ngunda vëhë. —Cuatjin xu cachja me.

Sehe quiji me. ²³ Hane ngajñi cjuarë barcu cojo rë me ne, Jesús ne, cafañafë xu me. Hya xi camá ne, canduva ngu tjo hñu xi jercu tu cjuachan camahani vanga xcun laguna jan. Hane barcu jan ne, jercu tivisehen xu nandá cahntsua, hane me xi cuacun jan ne, jemu tsavi camahani xi cuma rë me. ²⁴ Hane xi quiji tiña xu me hiscan jiñafë Jesús ne, sehe catsingasca me me, cuitjin xu cachja me:

—¡Tatá, tatá! ¡Nguehe tifë ngayaan! —Cuatjin xu cachja xuta ladu rë Jesús jan.

Hane xi cavasca xu rë Jesús ne, cavatëcja me ngahñu rë tjo jan cojo cjuasca rë nandá jan. Sehe casejyu tjo casejyu nandá, jemu ndaja cavéñajyuu jingujyë ní. ²⁵ Sehe ngajan xi Jesús ne, cuitjin xu cachja me cojo xuta ladu rë me jan:

—¿Há manguaaintacún cojo ná ni? —Cuatjin xu cachja me.

Hane xi catsacjun xuta jan camá ne, jemu quijircun rë me. Sehe cachja xu me ngajñi rë me cojo xicjin me cuitjin:

—¡Mé xcusun xuta me vi xi hisca tjo hisca nandá vítexa me, hacuaha vihndé tséhé me ni! —Cuatjin xu cachja xuta ladu rē me jan.

Cha Gadarena xi hinchaxitsehen xahasen rē

²⁶ Hya xi camá xu ne, cafehe me nandya Gadara, ngu nandya xi tacun ngunda vèhè tséhé laguna Galilea. ²⁷ Hane xi cafehe xu Jesús nangui quixi cojo xuta ladu rē me ne, cavechútáha me ngu cha tséhé nandya vèhè xi hinchaxitsehen xahasen rē cha. Cha vèhè ne, ha jemu tséé xu xi vajin cha tsjian, hacuaha hacuini cahntsua ndihya véjña cha ta ngajan tahndé véjña cha. ²⁸ Xi cavèé xu cha Jesús ne, jercu cajindaya cha quiji caticjxcun cha xcun me, hacuaha jercu hñu cachja cha cuitjin:

—¿Mé má cuatjin ninguishunjin cojo ná ngayun Jesús, Quihndi rē Nina xi hatuxa jyé hnga cojo Hasen rē? Nihñu favor ne, xicatuun ná cjuañihi. —Cuatjin xu cachja cha.

²⁹ Cuatjin cachja cha ta, tséhé xi Jesús ne, ha cavitexa me xitsehen xi cuetjuxin tséhé cha. Ha jemu tséé xu nduva nixtin xi visehen xitsehen xahasen rē cha. Hane xuta ne, tsihñu tsja tsihñu ntsacu me cha cojo cadena cojo sa xi ha quihndé cuetjin cha cjue cha. Peru xi vicheya cha cadena ne, xitsehen ne, ficojo cjuachan rē cha ngajan ngu xín camahani tséhé nandya. Jemu cjin ndiya xu xi cavatju cha camá cuatjin. ³⁰ Ngajan xi Jesús ne, cuitjin xu cavinenguise me cha:

—¿Hacutjin hmí nuju? —Cuatjin xu cachja me.

Hane cha vèhè ne, cuitjin cafayangui cha:

—Sindadu Cjin. —Cuatjin xu cachja cha.

Cuatjin cachja cha ta, tséhé xi jemu cjin xitsehen cavisehen xahasen rē cha. ³¹ Hane ngajan xi xitsehen xi cuacun jan ne, jemu cafehya xu favor cojo Jesús xi hacuini cuiteha me xi cjue ngajan nduchin. ³² Hane tiña ngajan ne, jemu cjin xu chinga hinchataha chu tijiné chu ngajan ngu ndetjún. Hane xitsehen jan ne, cafehya cojo Jesús xi sua me cahndé xi cuisehen xitsehen jan xahasen rē chinga. Hane casua xu me cahndé. ³³ Hane xi cavetju xu xitsehen jan tséhé xahasen rē cha vèhè ne, quiji cavisehen xahasen rē chinga. Hya xi camá xu ne, chinga jan ne, cavanga chu quijijne chu tséhé rcu ndetjún, hane ngajan cavixuya xu chu ngajñi nandá tséhé laguna, hane ngajan camiji rē chu nandá ne, ngajan caffè xu chu.

³⁴ Ngajan xi xi cavèé xu cha xi sahmi cuidadu rē chu chinga jan xcusun xi camá ne, cavanga cha quiji casua cha camachaya rē nandya cojo ranchun xcusun vèhè. ³⁵ Hya xi camá ne, xuta jan ne, cavetju xu me quiji cavutsejen me xcusun xi camá jan. Hane xi cavechútáha me Jesús ne, hacuaha cavèé me cha xi cavetju xitsehen xahasen rē jan, yaja xu cha ngu tsjian, hacuaha ha cavéjña chihin cjuatacun rē cha, tacun cha tiña ntsacu Jesús. Hane xuta jan ne, jemu catsacjun me camá. ³⁶ Hane xuta xi cavèé xu xcusun xi camá jan ne, casuacuenda me cojo xuta xi yahnga jan hacutjin camá xi camandaja cha xi caxincha xitsehen xahasen rē jan. ³⁷ Hya xi camá ne, yějé xuta tséhé ladu tséhé nandya Gadara ne, cafehya xu me cojo Jesús xi cuetjuxin Jesús tséhé xuta xi cuacun jan ta, tséhé xi jemu catsacjun camaha ni yějé me camá. Hane ngajan xi Jesús cojo xuta ladu rē me ne, cavisehen xu me barcu sehe cavuya nga me ngunda vihi. ³⁸ Hane chaja sa xi cjue Jesús ne, cha xi cavetju xitsehen xahasen rē jan ne, cafehya cha cojo rē me xi cjue cha cojo rē me. Peru Jesús ne, catsinguijnetaha xu me cjuacjo rē cha, cachja me cuitjin:

39 —Tuyun tjangun ndya nuju ne, hacuaha tinújun cojo xuta tsêhê cjuan-daja xi cuacun casahmi Nina cojo nuju. —Cuatjin xu cachja Jesús.

Ngajan xi xi cavuya cafehe xu cha nandya ne, sehe cavetsihin catsuyihiya casuacuenda cha xuta jinguyê ni ngajni nandya yêjê ni cjuandaja xi cuacun casahmi Jesús cojo cha.

Catsicuya Jesucristu cjuahñu rê quihndi rê Jairo hacuaha camandaja na xi casatêtsja tsjian rê Jesucristu

40 Hya xi cavuya Jesús ngunda vihi ne, yêjê ni xutacjin jan ne, jemu ndaja cafahatsja xu me Jesús ta, tsêhê xi hatuxa siuya me me. 41 Hane hora vêhê ne, canduva xu ngu me xi hmî rê Jairo, me xi má xutaxa rê yungun. Hane quiji caticjaxcun xu me xcun Jesús. Hane cafehya me favor cojo Jesús xi cjue Jesús ndava me ta, 42 tsêhê xi me vêhê ne, tjin xu rê me ngu na lihndi xi quihndi ngu tsêhê me. Hane na lihndi vê ne, sacuaha tejó na nu. Hane meje cueya xu na.

Ngajan xi Jesús ne, quiji xu me. Hane ngajni cjuî me ne, jemu tivehnhun xu xuta me. 43 Hane ngu na jan ne, tjin rê tejó nu xi yaha rê na chíhin xahmajni. Hane cafê tujún rê na cavechji na xcun doctor. Peru tsajin xu yo camá cafahaxin chíhin xi má rê na. 44 Hane xi quiji tiña na táha ngaxtun Jesús ne, quiji na casatêtsja na ntsacu tsjian rê me. Hya xi camá xu ne, ha tu ñahñu cavasen xi vanga rê na jni. 45 Ngajan xi Jesús ne, cachja xu me cuitjin:

—¿Yo xi casatêtsja ná? —Cuatjin xu cachja me.

Hane xi cachja yêjê xuta xi hacuiin me casatêtsja me ne, sehe cachja xu Pedru cuitjin:

—Tatá, xutacjin ne, tivehnhun nuju me, hacuaha hisca titsivaha nuju me. —Cuatjin xu cachja Pedru.

46 Peru Jesús ne, cachja nga xu me cuitjin:

—Peru tjin yo xi casatêtsja ná ta ngahan ne, camachaya ná xi cavetju ná hitsê ngahñu. —Cuatjin xu cachja Jesús.

47 Hane xi vutsejen na xi cumaji seyahma na ngajni rê xuta ne, ña fatsê xu na quiji caticjaxcun na xcun Jesús. Sehe catsinguixi na xcun yêjê ni xuta mé má cuatjin quiji na casatêtsja na Jesús, cojo tsêhê xi ngutjen ni camandaja na.

48 Sehe ngajan xi Jesús ne, cuitjin cachja xu me cojo rê na:

—Ngayun tsan ne, camandaja ngayun ta, tsêhê xi camangutacún cojo ná. Cuma cuangun cojo cjuasua. —Cuatjin xu cachja Jesús.

49 Tu tichja cuaha xu Jesús cojo na xi camandaja jan ne, cafehe nga ngu me xi canduva me tsêhê ndava xutaxa rê yungun jan, hane cuitjin xu cachja me cojo xutaxa rê jan:

—Quihndi nuju ne, ha cahme na. Ha quihndê xicatuhunndyuun rê maestru. —Cuatjin xu cachja me.

50 Hane hya xi cahndê Jesús cjua vêhê ne, sehe cachja xu me cojo xutaxa rê jan cuitjin:

—Xicarcuun. Catamangutacún ni cojo ná ne, quihndi nuju ne, cumandaja na. —Cuatjin xu cachja me.

51 Hya xi camá xu ne, xi cafehe Jesús ndava xutaxa rê yungun jan ne, casuaain me cahndê xi cojo jingu sa xuta cuisehen me. Suvá ni Jesús cojo Pedru cojo Juan cojo Jacobo cojo naa cojo nahmi rê nima lihndi jan cuisehen me cahntsua ndihya. 52 Hane yêjê ni xuta ne, hisca chja hisca jihnda xu me tsêhê nima jan. Ngajan xi Jesús ne, cuitjin xu cachja me cojo xuta jan:

—Ha quihndê xicachjihnduun. Na lihndi vê ne, hacuiin cahme na ta jiñafê na. —Cuatjin xu cachja me.

⁵³ Peru xuta jan ne, tu cavejnuccëe xu me Jesús ta, tsëhë xi vëëndaja me xi cahme jain nima. ⁵⁴ Hane xi cavisehen Jesús hiscan jiña nima lihndi jan ne, sehe quiji me cafaha me tsja, sehe ndaja hñu cachja xu me cuitjin:

—¡Tisatjinhngue, tsan! —Cuatjin xu cachja me.

⁵⁵ Hya xi camá xu ne, cavuya hasen rë nima, sehe ngutjen ni cavisat-jenhnga na. Hane sehe cavitexa xu Jesús xi sua xuta rë na lihndi jan niñu sinë na. ⁵⁶ Hya xi camá xu ne, xutacha rë na lihndi jan ne, jemu quijircun rë me. Ngajan xi Jesús ne, cachja xu me cojo xutacha rë na lihndi jan xi tsajin camahani yo cuichja me cojo xcusun xi camá.

9

Catsingatju Jesucristu tejó xuta ladu rë me xi cuichja cjuandajyihî rë Nina

¹ Cavechú ngu nixtin xi casahmitangun xu Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacun vëhë cuitexa xu me yëjë xitsehen hacuaha sahmi me xi xuta hmu rë ne, cuma ndaja xu me. ² Hya xi camá xu ne, sehe catsingatju Jesús me xi sua me cumachaya rë xuta tsëhë gobiernu xi sahmi Nina hacuaha sahmi xuta xi cuacun vë xi xuta hmu rë ne, cuma ndaja xu me. ³ Hane cuitjin xu cachja Jesús cojo rë me:

—Xi cuetjun cuangun ne, tsajin camahani mé xi chuhun, hacuiin bastón ne, hacuiin changa, hacuiin niñu, hacuiin tujún, hacuaha hacuiin jo tsjian ngahma chuhun jima ngu ngayun. ⁴ Hacuaha xi cjuhun ngu ndihya ne, ha ngajan ni tinechun nguixun nguixun ni, hisca xi cuetjunxun tsëhé nandya vëhë. ⁵ Hya xi xuta tsëhë ngu nandya cjuahatsjaain nuju me ne, xi cuetjun tsëhé nandya vëhë ne, titsunu chojo rë ntsacun cojo sa xi cuma tsejen xi xuta jan cún rë me. —Cuatjin xu cachja Jesús.

⁶ Sehe ngajan xi cavetju xu xuta ladu rë Jesús jan, quiji catsujyihya me yëjë ni nandya tsëhë distritu Galilea, casua me camachaya rë xuta tsëhë cjuandajyihî xi chja tsëhë gobiernu xi sahmi Nina hacuaha casahmi me xi xuta hmu rë ne, camandaja xu me jingujyë ni ladu vëhë.

Hvín xuta yo xi Jesucristu

⁷ Hane Herodes, me xi cavitexa ngajan distritu Galilea ne, camachaya xu rë me yëjë xá xi tisahmi Jesús cojo xuta ladu rë me. Hane ngu cachajá xu cjuatacun rë me ta, tsëhë xi ngujo xuta ne, chja me ta Jesús ne, hacui nima Juan Vitenda rë Xuta, hacuaha handasa cahme xu nima Juan vë ne, peru cavuya cjuahñu. ⁸ Ngujo nga me ne, chja me ta profeta Elías xi cavuya, hane yahnga nga me ne, chja xu me ta ngu nima profeta xi hacjahi, xi cavéjña hatsëë nixtin ne, handasa cahme ne, peru cavuya cjuahñu. ⁹ Peru Herodes ne, catsingataha cacun xu me cuitjin: “Nima Juan ne, ha cavitéxa xi catisun rcu. Peru quihndë ¿yo rë cha xi cuajyihî vë xi jemu cjín cju nuhya rë tsëhë cha?” Cuatjin xu catsingataha cacun me. Jemu casahmi xu me ngujoyë xi scuëë me Jesús.

Catsicjen Jesucristu hñú mil xihin

¹⁰ Hane xi cavuya xu apóstol tsëhë hiscan xi quiji me jan ne, sehe ca-suacuenta xu me Jesús xcusun xi casahmi me. Ngajan xi Jesús ne, quijicojo xu me suvá ni apóstol jan ngu cahndë xín, tiña tsëhë ngu nandya xi hmí Betsaida. ¹¹ Peru xi camachaya rë xutacjín jan ne, quijitjengui xu me Jesús. Hane Jesús ne, jemu ndaja cafahtsja me xuta jan, hane sehe cachja me cojo

xuta jan tsëhë gobiernu xi sahmi Nina. Hane xuta xi meje rë xi cuma ndaja me ne, casahmi xu Jesús xi camandaja me.

¹² Hane xi quiji hora jan ne, xuta ladu rë Jesús xi tejó jan ne, quijivaha me xcun Jesús sehe cachja xu me cojo cuitjin:

—Tinújun cojo xutacjín vë ne, catji me nandya xi siu tiñataha o sá xi ranchun xi siu tiñataha, cojo sa xi cuanguise me cahndë xi cuiyuju me hacuaha cuanguise me xi sinë me ta, tsëhë xi jemu xín tsëhë nandya hiscan xi nechantahan vi. —Cuatjin xu cachja apóstol.

¹³ Ngajan xi Jesús ne, cuitjin xu cachja me cojo apóstol jan:

—Ngayun tuhun xi sinë me. —Cuatjin xu cachja me.

Ngajan xi apóstol ne, cafayangui xu me cuitjin:

—Hñú tutu pan cojo jo ti tjin naja. ¿Há cuanguin chíhin niñu xi sinë yëjë xuta xi cuicun vi ni? —Cuatjin xu cachja me.

¹⁴ Cuatjin cachja me ta, tsëhë xi ngajñi rë yëjë xuta xi siutahá jan ne, sacuaha hñú mil má xuta xi xihin. Sehe ngajan xi cachja xu Jesús cojo xuta ladu rë me jan cuitjin:

—Tinújun cojo rë xuta vë ne, catiyuju me sacuaha yachantë me ngu ngu cahndë. —Cuatjin xu cachja me.

¹⁵ Ngajan xi xuta ladu rë Jesús jan ne, cuatjin casahmi me, hane caviyuju xu yëjë xuta. ¹⁶ Hya xi camá ne, cafaha xu Jesús hñú pan cojo jo ti jan ne, hane xi cavutsejenniji me ngahnga ne, casua me nacuechji rë Nina, sehe cavotoho langa me pan hacuaha cavatëlanga me ti jan, sehe casua xu me cojo xuta ladu rë me xi cjue sua rë me xutacjín jan. ¹⁷ Hane xuta ne, yëjë ni me cajinë me hacutjin xi cachuya rë xahasen rë me. Hane xi cachjaya rë xi cavangui cajinë xuta jan ne, catsë xu tejó chajne.

Catsinguixi Pedru yo Jesucristu

¹⁸ Cuitjin camá nga ngundiya. Hya xi tisahmi xu Jesús oración rë me ne, xuta ladu rë me ne, hacuaha cojo me siu me cojo rë me. Sehe ngajan xi cavinenguise xu Jesús me cuitjin:

—¿Mé chja xutacjín jan ne, yo ngahan? —Cuatjin xu cachja me.

¹⁹ Sehe ngajan xi cachja xu me cojo Jesús cuitjin:

—Yahnga me ne, chja me ta Juan Vitenda rë Xuta ngayun. Hane yahnga nga me ne, chja me ta profeta Elías ngayun. Hane me xi yahnga nga ne, chja me ta ngayun ne, ngu profeta xi hacjahi, xi cavéjña hatsëë nixtin, xi handasa cahme ne, peru cavuya cjuahñu. —Cuatjin xu cachja xuta ladu rë Jesús.

²⁰ Sehe Jesús ne, cuitjin xu cavinenguise nga me:

—Hane ngayun ne, ¿mé núnjun ni, yo ngahan? —Cuatjin xu cavinenguise Jesús.

Ngajan xi Pedru ne, cuitjin xu cafayangui me:

—Ngayun xi catsingatju nuju Nina xi cumatitjun ngayun tsijin. —Cuatjin xu cafayangui Pedru.

Cachja Jesucristu xi tsiquehen xuta me

²¹ Peru Jesús ne, cavitexa xu me xuta jan xi tsajin camahani yo xi cuichja cojo me cjuatacun jan. ²² Cuitjin xu cachja me:

—Ngahan xi Quihndi rë Xuta Jain ngahan ne, hachu meje rë xi jemu cjín cjuañihi cuátju cuma; xuta changá cojo nahmi xi matitjun tsëhë nahmi cojo cha xi vicuya cjuachacun ne, tsitjungui me ngahan, tsiquehen me ngahan. Peru xi ma jyan nixtin ne, tsicuya Nina ngahan cjuahñu. —Cuatjin xu cachja Jesús cojo xuta ladu rë me.

²³ Hane sehe cavuya cachja nga me cojo yějē ni xuta jan cuitjin:

—Sá xi tjin yo xi meje rē xi cuma xuta ladu naha matsejen ne, ha quihndē miji rē xi sahmi hacutjin xi meje rē suvá matsejen ta nchunchujun ni matsejen ne, cateñahñu xahasen rē xi cjucojo ndiya naha, handasa hisca cueya xcun cru. ²⁴ Cuatjin matsejen ta, tsēhē xi yo xi meje cjuendujo cojo ngasunhndē rē cojo cjuatacun rē suvá matsejen ne, cuechintaain cjuahñu xatsē. Peru yo xi cuatju cjuañihi o hisca cueya ngatsē naha matsejen ne, vēhē xi cuechútáha cjuahñu xatsē. ²⁵ ¿Mé machjirēhē rē yo xi sacú rē yějē cjuanchina rē ngasunhndē sá xi cueya hacuaha cuma castigu? ²⁶ Machjirin matsejen ta, tsēhē xi yo xi ma sava rē ngatsē naha cojo ngatsē rē cju naha matsejen ne, ngahan xi Quihndi rē Xuta Jain ngahan matsejen ne, hacuaha cuma sava ná tsēhē hya xi cuinduva cojo hasen ndajyihí naha hacuaha tsēhē Nahmi naha hacuaha tsēhē ángel xi vejña tsēhē me. ²⁷ Nguehe cuichjá cojo nuju cjuaquixi matsejen ta tjin yahnga ngayun xi sechun nguehe xi cueyuun jinguyējē rē xi cjēh chun gobiernu xi sahmi Nina. —Cuatjin xu cachja Jesús.

Ñahñu camatsejen nima Moisés cojo xutachanga xi hmí rē Elías visiajmi cojo Jesucristu

²⁸ Cuitjin camá nga xu ngundiya hya xi cavatju sacuaha jyin nixtin xi cavicuya Jesús cju a vēhē. Quijicojo me Pedru cojo Juan cojo Jacobo quijini xi me ngu ndetjún xi sahmi me oración rē me. ²⁹ Hora xi tisaami xu Jesús oración rē me ne, xcun me ne, cavindeya xcusun rē. Hane tsjian rē me ne, jercu tu tyava camahani camá, ña setí jyihí. ³⁰ Hacuaha camatsejen xu jo xihin hinchacun visiajmi cojo rē me. Xihin jan ne, hacui xu nima profeta Moisés cojo profeta Elías. ³¹ Me xi cuacun vēhē ne, camatsejen me cojo ngu hasen ndajyihí, visiajmi xu me tsēhē cjuaveya xi hatuxa tjin rē xi cuechútáha Jesús ngajan Jerusalén. ³² Peru Pedru cojo jo sa me xi yahnga jan ne, ha siufē me, tsēhē xi jercu nijñá rē me. Peru xi cavascandaja xu rē me ne, cavēē me hacutjin jercu setí camahani tsejen hiscan secun Jesús, hacuaha cavēē xu me jo me jan hinchacuntangun me cojo Jesús. ³³ Hya xi camá ne, hora xi tivetjuxin me xi cuacun vē tsēhē Jesús ne, sehe cachja xu Pedru cojo Jesús cuitjin:

—Tatá. Tu ma rē xi nguehe nechin ne, nihñi jyan puestu; ngu cuma tsujun ne, ngu cuma tsēhē Moisés, hane cojo ngu cuma tsēhē Elías. —Cuatjin xu cachja Pedru, peru hisca hvín me mé xi chja me.

³⁴ Hane hora xi tichja xu Pedru cuatjin ne, canduva ngu yufí casahmi tjahnguen rē tsēhē me. Hane jemu catsacjun me camá xi caxinchavasen me tsēhē yufí jan. ³⁵ Hya xi camá ne, canuhya xu rē ngujo cju a xi cavetju ngajñi yufí jan xi cachja cuitjin:

—Cha vihi xi Quihndi naha cha, cha xi ngahan cavejñá cáacun xi tsingátju. Tinuhyun cju a xi chja cha. —Cuatjin xu cachja cju a jan.

³⁶ Hane xi cavatju cachja cju a jan ne, Jesús ne, camasuvá sa me secun me. Hya xi camá xu ne, jyan xuta ladu rē Jesús jan ne, tu caviyujuyuu ni me. Hane nixtin hya ne, cachjaain camaha xu ni me cojo hisca ngu tsēhē xcusun xi cavēē me.

Casahmi Jesucristu xi camandaja cha lihndi xi jiya xitsehen xahasen rē

³⁷ Cuitjin camá nga xu camá nchujun hya xi canduvajne Jesús tsēhē ndetjún cojo jyan xuta ladu rē me jan. Tjercu cjín camahani xuta canduvatjengui xu rē me ndiya. ³⁸ Hane ngajñi rē xutacjín jan ne, cavetjujñi ngu xihin xi jercu cajindaya xu cachja cojo Jesús cuitjin:

—Maestro, nihñu favor ne, nduvun chutsujun cha lihndi naha ta ngu tutu má cha vi xi tacun ná cha. ³⁹ Hane cuitjin sahmi ngu xitsehen cojo rë cha: faha rë cha, hane tu ñahñu jindaya, sehe vitsuneya rë cha, ña vetju natyaxu hntsua cha, hane hisca hya xi ndiya cjuë cha ne, sehe vetjuxin tsëhé cha. ⁴⁰ Xuta ladu nuju, caféhya rë me favor xi cuaxëxin me, peru camaji cavaxëxin me. —Cuatjin xu cachja xihin jan cojo Jesús.

⁴¹ Sehe ngajan xi Jesús ne, cuitjin xu cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tsëhé ndiya ndajiyi ngayun. ¿Jani hisca hya xi tjin ná xi cuitëjña cojo nuju? ¿Jani hisca hya xi tjin ná xi scaa ná cojo nuju? Nduvuncujun quihndi nuju nguehe. —Cuatjin xu cafayangui me.

⁴² Hane hora xi tijima tiña xu cha lihndi jan tsëhé Jesús ne, xitsehen ne, catsiticia rë cha, hacuaha vitsuneya rë cha. Hya xi camá ne, cavatëcja Jesús tsëhé xitsehen, hane casahmi me xi camandaja xu cha lihndi jan. Sehe casua me cha cojo nahmi rë cha. ⁴³ Hane yëjë ni xuta jan ne, jemu quijircun camaha xu ni rë me xi cuatjin jyë hnga Nina cojo Hasen rë me.

Cachja nga Jesucristu xi tsiquehen xuta me

Hane jinguyëjë rë xi cuatjin tifircun rë xutacjin jan tsëhé yëjë ni xcusun xi sahmi Jesús ne, cachja xu me cojo xuta ladu rë me cuitjin:

⁴⁴ —Ndaja tetuhunrcun cjua xi tichjá cojo nuju vi: Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta. —Cuatjin xu cachja me.

⁴⁵ Peru xuta ladu rë Jesús jan ne, cavijnii rcu me mé vijne cjua jan ta, tsëhé xi casetsa xu rë cjuatacun rë me, cojo sa xi cuijnii rcu me. Hacuaha tsacjun xu me xi cjuinenguise me Jesús mé vijne cjua vëhé.

Yo xi matitjun

⁴⁶ Ngu nixtin jan ne, cavetsihin sacuaha xi meje scaanya xu xuta ladu rë Jesús ngajñi rë me yo xi hitsë sa matitjun. ⁴⁷ Peru Jesús ne, xi ha vëë me hacutjin tsingataha cacun xuta ladu rë me jan ne, sehe cafaha me ngu lihndi cavisecun me ndaya rë me, ⁴⁸ sehe cachja xu me cojo xuta ladu rë me jan cuitjin:

—Tu yo ni xi cjuahatsja rë lihndi vihi tsëhé xi ladu naha má ne, hacuaha hora vëhé cjuahatsja ná ngahan. Hacuaha xi cuatjin cjuahatsja ná ngahan ne, hacuaha cjuahatsja rë Nina xi catsingatju ná. Hane tu yo ni xi má nuju xi ma tjengui tsëhé ngajñi nuju ngayujun ni ne, vëhé xi matitjun xi má rë Nina. —Cuatjin xu cachja Jesús.

Xuta xi hacuiin condra nuju má me ne, hatuxa favor nuju fi me

⁴⁹ Ngajan xi Juan ne, cachja xu me cojo Jesús cuitjin:

—Tatá, cahyin ngu me xi tivaxëxin xitsehen sacuaha xi suvun catuhun rë me xá. Hane canújin cojo rë me xi ha quihndë sahmi me cuatjin ta, tsëhé xi me vëhé ne, tsujyihintjenguin me ngayun sacuatjin niji ngayin. —Cuatjin xu cachja me.

⁵⁰ Hane Jesús ne, cuitjin xu cafayangui me:

—Xicanujuun cojo rë me cuatjin ta, tsëhé xi xuta xi hacuiin condra naja má me ne, hatuxa favor naja fi me. —Cuatjin xu cachja Jesús.

Catsingatiin xuta distritu Samaria Jesucristu

⁵¹ Hya xi camá ne, xi tijima tiña xu nixtin xi cjueniji Jesús ngajan ngahnga ne, cavejñahñu me cjuatacun rë me xi cjue me ngajan Jerusalén. ⁵² Vëhé xi

catsingatju titjun xu me jo xuta ladu rë me. Xi quiji me ne, cafehe me ngu nandya tsëhë xuta Samaria, xi cuanguise me cahndë xi cuejña Jesús cojo xuta ladu rë me. ⁵³Peru xuta jan ne, cafahtsjaain xu me Jesús ta, tsëhë xi Jesús ne, hatuxa tjin cacun me xi cjue me hisca Jerusalén. ⁵⁴Peru hya xi camachaya xu rë Jacobo cojo Juan, xuta ladu rë Jesús, cjua vëhë ne, cachja xu me cojo Jesús cuitjin:

—Tatá. ¿Há nihña sacuatjin casahmi profeta Elías hatsëë nixtin? ¿Há cuitexan xi cuinduva ndihi tsëhë ngahnga, tsicjë rë xuta xi cuicun vi? —Cuatjin xu cachja me.

⁵⁵Ngajan xi Jesús ne, cavuya vutsejen me xuta ladu rë me jan ne, sehe cavatëcja xu me cjuatacun xi tsingataha cacun me xi cuacun jan, cuitjin cachja me:

—Ngayun ne, hyúun mé xcusun Hasen xi tsëhë nuju. ⁵⁶Ngahan xi Quihndi rë Xuta Jain ngahan ne, hacuiin canduvá xi tsicjë xuta ta xi canduvá ne, xi cuáxëtjë me. —Cuatjin xu cachja Jesús.

Sehe quiji xu me ngu nga nandya.

Xuta xi camameje cjue cojo Jesucristu

⁵⁷Hane ndiya cjuí Jesús cojo xuta ladu rë me ne, cachja xu ngu me jan cojo rë me cuitjin:

—Tatá. Tu yani ni xi cuangun ne, cjuë cojo nuju. —Cuatjin xu cachja me.

⁵⁸Sehe ngajan xi Jesús ne, cuitjin xu cachja me cojo xuta jan:

—Chu ninda ne, tjin nguio hiscan viyuju chu, hane nisë xi vitjen chu ngahnga ne, tjin ndava chu, peru ngahan xi Quihndi rë Xuta Jain ngahan ne, hisca ndya naha tsajin. —Cuatjin xu cachja me.

⁵⁹Cachja sa xu me cuitjin cojo ngu nga xuta jan:

—Nduvun, cuanguen cojo ná. —Cuatjin xu cachja me.

Peru xuta jan ne, cuitjin xu cachja me:

—Tatá. Tuhun ná cahndë, titjun cjuë xi seyaniji nahmi naha. —Cuatjin xu cachja ngu nga xuta jan.

⁶⁰Ngajan xi Jesús ne, cuitjin xu cachja me:

—Xuta xi sacuaha xi cahme cjuatacun rë me xi sahmicuendain me Nina ne, me vëhë catinchaniji me nima rë me. Peru ngayun ne, tángun tuhun cumachaya rë xuta tsëhë gobiernu xi sahmi Nina. —Cuatjin xu cachja me.

⁶¹Ngu nga xuta ne, cachja xu me cojo Jesús cuitjin:

—Tatá. Ngahan ne, hacuaha cjuë cojo nuju. Peru tuhun ná cahndë, cjuë tsingujnetaha cjua cojo xuta naha. —Cuatjin xu cachja xuta jan.

⁶²Peru Jesús ne, cuitjin xu cachja me cojo xuta jan:

—Ngu xuta xi ha cavejña cacun me xi cjuetjengui me ndiya rë Nina sehe cumangu cumajo cacun me ¿há cjue, há cjuin me ne?, tangun me cojo ngu cha xi ha cafaha cha ndetsihin latu xi cuetsihin cuacjan cha nangui peru tivutsejen sa cha taha ngaxtun cha. Sacuatjin machjiriin cha vihi xi cuacjan cha nangui ne, hacuanitjin ni machjiriin me vëhë xi cuisecoo me Nina hiscan xi sahmi Nina gobiernu. —Cuatjin xu cachja Jesús.

10

Catsingatju Jesucristu jyanchan tejó xuta ladu rë me xi cuichja cjuandajyihí rë Nina

¹Xi cavatju xu vëhë ne, sehe casuaxa Nai naja jyanchan tejó sa xuta ladu rë me, sehe catsingatju titjun me chuva jo chuva jo xuta jan yëjë ni nandya cojo

yějē ni cahndě xi catsingataha cacun Jesús xi sehe cjue me. ² Hane cuitjin xu cachja me cojo:

—Jemu tjin camahani xuta xi meje cuisñuju me cjua rē Nina, peru me xi sua cumachaya rē xuta ne, jemu chuva má me. Věhě xi meje rē xi chjahyun rē Nina favor xi tsingatu me me xi cjue sua cumachaya rē xuta cjua rē Nina. ³ Tángun ni. Ngahan titsingátju nuju ngayun xuta jeya ngajñi rē xuta hnga cacun, sacuaaha cjue ngu chu hnditsánga ngajñi rē chu cjan rē. ⁴ Xicachjuun tujún, xicachjuun changa, hacuaaha xicachjuun chuxinxtě. Xicavisiajmuu cojo xuta hora xi sacu xingun cojo rē me ndiya. ⁵ Hane tu jarē ni ndihya xi cuisuhun ne, titjun tinújun ngu nina cuitjin: “Nina sua nuju me cjuandaja cjuajeya.” Cuatjin tinújun. ⁶ Hane sá xi ndihya věhě tjin quihndi tsěhě cjuajeya ne, hacuaaha sacú rē me cjuajeya. Peru sá xi hacuiin quihndi tsěhě cjuajeya xi siu jan ne, sacuiin rē me. ⁷ Hane xi cuisuhun ngu ndihya ne, ha ngajan ni tinechun, xinu siuhun cojo rē me mé xi sua me. Cuatjin nihñu ta, tsěhě xi ngu xuta xi sahmi me xá ne, vechú chuva rē xi sacú chji rē me. Věhě xi mijí rē xi cuangun nguehe cuangun ngajan cuinechun. ⁸ Hane tu jarē ni nandya xi cuisuhun hiscan xi cjuahatsja nuju xuta ne, xinu xcusun xi sua me xinu, ⁹ hacuaaha nihñu xi xutahmu rē tsěhě nandya jan ne, cumandaja me, hacuaaha cuitjin tinújun cojo yějē xuta: “Ha camatiña nixtin xi cuma nuju xi sahmi Nina gobiernu.” Cuatjin tinújun. ¹⁰ Hane tu jarē ni nandya xi cuisuhun hiscan xi cjuahatsjaain nuju xuta ne, xi chjuhun ndiya xi cuetjunxun tsěhě nandya věhě ne, cuitjin tinújun cojo xuta: ¹¹ “Hisca chojo rē ngajñi nandya nuju xi cavaqui rē ntsacuin ne, cuitsuni cojo sa xi cuma tsejen xi ngayun cún nuju. Peru meje rē xi cuijne rcun xi ha camatiña nixtin xi sahmi Nina gobiernu.” Cuatjin tinújun. ¹² Cuichjá cojo nuju ta hya xi cuechú nixtin xi tsichuva Nina xuta tsěhě jyě rē me ne, hitsě sa jyě castigu cuatju xuta tsěhě nandya xi fahatsjaain nuju, xi cuma rē xuta tsěhě nandya Sodoma xi jercu tu casahmi camahani me cjuatsehen.

Cjuachoho xi cuma rē ciudad xi camacjaain rē cjua rē Jesús

¹³ Jemu chojyihi tsěhě xuta nandya Corazín! ¡Hacuaha jemu chojyihi tsěhě xuta nandya Betsaida! Jemu chojyihi tsěhě me ta, tsěhě xi mijí tsindeya me cjuatacun rē me, handasa cavěě me cjuarcun xi casahme ngajñi rē me. Xuta nandya Tiro cojo xuta nandya Sidón ne, hisca hacuiin xuta ladu rē Nina má me sacuatjin rē xuta Corazín cojo Betsaida. Peru sá xi xuta Tiro cojo Sidón cavěě me cjuarcun xi cuacun vē ne, ha catsindeya me cjuatacun rē me, hacuaaha ha cavajá me tsjan xi sacuaaha tsánaxá hacuaaha caviyuju me ngajñi ndesu, sacuaaha xcusun naja, cojo sa xi cuma tsejen xi jemu choho má jain rē me tsěhě jyě rē me. ¹⁴ Věhě xi hya xi tsichuva Nina yějē xuta tsěhě jyě rē me ne, xuta nandya Tiro cojo xuta nandya Sidón ne, hitsě sa chúva castigu cuatju me cuma xi cuma rē xuta Corazín cojo xuta Betsaida. ¹⁵ Hane xuta nandya Capernaum ne, ¿há cjue me hisca ngahnga hiscan tacun Nina? ¡Hacuiin! Hatuxa cjue me nduchin, cahndě hiscan ma hasen rē nima castigu.

¹⁶ Xuta xi cuihndě me tsujun ne, hacuaaha tivihndě me tsahan. Hane xuta xi tsitjungui nuju me ne, hacuaaha titsitjungui me ngahan. Hane xuta xi tsitjungui ná me ne, hacuaaha titsitjungui me Nina xi catsingatju ná. Cuatjin xu cachja Jesús cojo xuta ladu rē me, sehe cavetju xuta ladu rē me jan quiji me.

Cavuya xuta ladu rē Jesucristu xi jyanchan tejó

¹⁷ Hya xi camá ne, xi cavuya xu xuta ladu rë Jesús xi jyanchan tejó jan ne, jercu sua rë xahasen rë me. Hane cuitjin xu cachja me cojo Jesús:

—¡Tatá! ¡xi veyinnanguin ñihi nuju hora xi tinihñí xá xi cavitexun niji ne, hisca xitsehen vihndé tsijin! —Cuatjin xu cachja xuta xi cuacun jan.

¹⁸ Sehe ngajan xi Jesús ne, cuitjin xu cachja me cojo xuta jan:

—Jinguyejë rë xi tivutsején ngahnga hiscan tacun Nina ne, cjanengui Satanás sacuaaha camá ni ngu ndihichuhún. Hane cuatjin cahvë xi tichjahátáha rë gobiernu xi sahmi Satanás. ¹⁹ Chutsujun ni, ngahan casuá nuju chuva rë xi tsajin mé cuatjun cuma, handasa nunú chu yë o sá nunú chu naya o sá xi suvá camahani Satanás choho meje sahmi cojo nuju. ²⁰ Hacuiin ndaja cuma nuju tséhë xi vihndé xitsehen tsujun ta xi meje rë ne, ndaja catama nuju tséhë xi ha quitaháxujun ñihi nuju ngajan ngahnga. —Cuatjin xu cachja Jesús cojo xuta ladu rë me jan.

Casahmi jyë casahmi hnga Jesucristu Nina

²¹ Hane ha hora vëhë ni ne, Hasen rë Nina casahmi xi jemu sua camahani camá rë xahasen rë Jesús, sehe cachja xu me cuitjin cojo Nina:

—Ngayun nahmi naha ne, sahmejyë sahme hnga nuju cojo Hasen nuju, ngayun xi Nai rë ngahnga cojo nangui ngayun, tséhë xi ngayun caveyúnhmu cjuatacun vëhë xi cuma rë xuta xi jemu vechú cjuatacun rë, hane catuhun camachaya rë xuta xi hvíin camahani. Ngayun nahmi naha, cuatjin canihñu ta, tséhë xi cuatjin xi cachya nuju. —Cuatjin xu cachja Jesús cojo Nina.

²² Hane xi cojo yëjë ni xuta ne, cuitjin xu cachja me:

—Yëjë ngarca ni matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin hisca xi ngu xi vëë yo xi Nahmi naha matsejen ta suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. —Cuatjin xu cachja me cojo yëjë xuta.

²³ Cavuya vutsejen nga me hiscan siu xuta ladu rë me ne, sehe cachja xu me cojo suvá ni me xi cuacun vëhë cuitjin:

—Jemu ndaja tsujun ngayujun ni xi tichutsujun xcusun xi tijima nixtin vihi. ²⁴ Nguehe cuichjá cojo nuju ta jemu ndaja tsujun ta, tséhë xi hacuaha jemu cjín profeta hacuaha jemu cjín xuta xi matitjun xi caviyuju titjún ne, jemu meje scuëë me xcusun xi ngayun tichutsujun, peru casacuiin cavëë me. Hacuaha jemu meje cuisñuju me cjua xi tivisiñuju ngayun, peru casacuiin cavisñuju me ta, tséhë xi cjëë cuma xcusun vëhë nixtin hya. —Cuatjin xu cachja Jesús cojo xuta ladu rë me.

Ejemplu tséhë cha Samaria xi casahmi cjuandaja

²⁵ Ngundiya nga hya xi tacun xu Jesús cojo xuta ne, casecun ngu cha xi vicuya cjuachacun cavinenguisse xu cha cuitjin xi cjuahachuva cha me:

—Maestro. ¿Mé ndatjin xi sahme cojo sa xi cuéchutáha cjuahñu xatsé xcun Nina? —Cuatjin xu cavinenguisse cha me.

²⁶ Ngajan xi Jesús ne, cuitjin xu cachja me cojo cha:

—¿Hacutjin camahindu xcun ley rë Moisés? ¿Mé xi chutayun jan? —Cuatjin xu cachja me.

²⁷ Hane xi cafayangui cha ne, cuitjin xu cachja cha:

—“Meje rë xi nihmutacún Nina naja cojo nguñajatacún, cojo yëjë xahasen nuju, cojo yëjë ngahñu nuju, cojo yëjë cjuatacun nuju, hacuaha cuatjin nihmutacún xingun sacuatjin hmutacún suvun yojo nuju.” —Cuatjin xu cachjasun cha cjua rë ley.

²⁸ Hane cuitjin xu cachja Jesús cojo cha:

—Cjuaquixi cjuaxi canújun. Cuatjin nihñu, sehe cuechuntuhun cjuahñu xatsé. —Cuatjin xu cachja Jesús.

²⁹ Ngajan xi cha xi vicuya cjuachacun jan ne, xi meje tsingacun cha xi jemu quixi cha cojo cjuatacun rë cha ne, cuitjin xu cavinenguise cha cojo Jesús:

—¿Yo xi xingueen ni? —Cuatjin xu cachja cha.

³⁰ Hane ngajan xi Jesús ne, cojo ngu ejemplu cafayangui xu me tséhë cha cuitjin:

—Cuejña ne xi ngu xuta jan ne, cavetju me tséhë nandya Jerusalén ne, cjui me nandya Jericó. Hane ndiya cjui me ne, cavechútaha ngujo cha chëjé me. Hane cafahtahá cha yëjé tséhë me xi yaha me, sehe cavaja cha me. Ña catsiquehenñaja cha me, hane sehe cavanga cha. ³¹ Hya xi camá ne, hora vëhé canduva ngu nahmi cavatju me ndiya vëhé, hane xi cavëë me xuma xuta xi casacuhmu rë jan ne, tjeheh ndiya ladu xingu cavatju me quiji me.

³² Ha chuva vëhé ni ne, cafehe ngu sangrista cahndé vëhé. Hane xi cavëë cha xi jiña me xi casacuhmu rë jan ne, cavetahaxin cha hitsé ndiya rë cha sehe cavatju cha quiji cha. ³³ Peru ngu cha tséhë distritu Samaria xi quiji cha ndiya vëhé ne, cafehe cha hiscan jiña xutahmu rë jan. Hane xi cavëë cha me ne, jemu camayuma rë cha me. ³⁴ Hane xi quijivaha cha xcun me ne, catsirquí cha me, cavitejnu cha aceite cojo xan hiscan casacuhmu rë me sehe catsitjinguia cha me tsjian. Hya xi camá ne, sehe catsiquijin cha me naxin rë cha, sehe quijicojo cha me ngu ndihya hiscan xi hatuxa ndihya viyuju xuta, hane ngajan casahmi cha me cuidadu. ³⁵ Hane xi camá nchujun jan ne, cavaxé cha jo denario, tujún xi faha ngu mosu xi sahmixa jo nixtin, sehe casua cha me xi nai rë ndihya jan, sehe cachja cha cojo rë me cuitjin: “Nihñu cjuandaja ne, chjuhuncuendun xuma xutahmu rë vi. Hane xi quisun sa nicujun tséhë xcun tujún xi suá nuju vi ne, xi cúa ne, sehe cuechjé tsujun.” Cuatjin cachja cha Samaria.

³⁶ Ngajan xi Jesús ne, xi cuatjin cajnetaha ejemplu xi cachja me ne, sehe cachja xu me cojo cha xi vicuya cjuachacun jan cuitjin:

—¿Jaré tséhë catsijyan xuta xi cuacun vë xi má nuju xi cjuaquixi xi camá xicjin me xi cavanguihmu chëjé jan? —Cuatjin xu cachja Jesús.

³⁷ Ngajan xi cha xi vicuya cjuachacun jan ne, cuitjin xu cafayangui cha tséhë Jesús:

—Cha xi ngatsé rë cjuayuma ne, casahmi cjuandaja cojo me xi casacuhmu rë jan. —Cuatjin xu cachja cha.

Hane Jesús ne, cuitjin cachja nga xu me cojo cha:

—Quihndé xi cuangun ne, hacuaha cuatjin nihñu. —Cuatjin xu cachja Jesús.

Quiji Jesucristu ndava na Marta

³⁸ Hane xi cjui sa xu Jesús cojo xuta ladu rë me ne, xi cavisehen me ngu nandya jan ne, ngu na xi hmí rë Marta ne, cafahtsja na Jesús ndava na. ³⁹ Na Marta jan ne, tjin ngu tichja na xi hmí rë María. Hane na María jan ne, quiji xu na cavéjña na táha ntsacu Jesús, tivisiñuju na cjuaxi tivicuya me. ⁴⁰ Peru na Marta ne, jemu cjín xcunya xá xi tisahmi na. Hane xi cavatju na hiscan tacun Jesús ne, cuitjin xu cachja na:

—Tatá. ¿Há marcuaaín nuju xi na tichja ne, cavejñasuva ná na cojo xá xi tacunvasen tisahme? Tinújun cojo rë na, catisecoo na ngahan. —Cuatjin xu cachja na.

⁴¹Ngajan xi Jesús ne, cuitjin xu cafayangui me tsèhè na:

—Marta, jercu marcun nuju tsèhè jemu cjín xcusun. ⁴²Peru ngu xcusun ni xi sahmi ngujoyè. Na María ne, cavaxijin na xcusun xi ndaja vè, hane hacuiin chjahátahá ré tsèhè na. —Cuatjin xu cachja me.

11

Cavicuya Jesucristu hacutjin meje rè xi nihña oración

¹Cuitjin camá xu ngundiya hya xi tisahmi Jesús oración rè me ngu cahndé jan. Hane xi cajnetaha casahmi me oración rè me ne, ngu xuta ladu rè me jan ne, cuitjin xu cachja me cojo Jesús:

—Tatá. Ticuyun niji hacutjin nihñi oración niji, sacuatjin cavicuya Juan xuta ladu rè me. —Cuatjin xu cachja me.

²Ngajan xi Jesús ne, cuitjin xu cafayangui me:

—Hya xi nihñu oración ne, cuitjin tinújun:

Ngayun Nahmi niji, meje niji xi ngayijin ni xuta ngasunhndé chjihinrcuin nuju.

Meje niji xi cuinduvun nihñu niji gobiernu.

³Nchunchujun ni tuhun niñu xi xiní.

⁴Ninchatuhun niji tsèhè jyé xi jemu quitjin ta ngayin suvin ne, hacuaha tininchatihin rè yèjé ni xuta xi quitjen me jyé tsijin.

Xicatuun cahndé xi chjaháchuva niji cojo cjuatacun niji.

Cuatjin tinújun. —Cuatjin xu cachja Jesús cojo xuta ladu rè me.

⁵Hya xi camá ne, cachja nga xu Jesús ngu ejemplu cojo xuta ladu rè me. Cuitjin xu cachja me:

—Cuejña ne xi ngayun tjin nuju ngu xuta xi vinga nuju, hane vasen nixten cuangun ndava me, cuinújun cojo rè me cuitjin: “Amigu, nihñu favor tuhun jyan niñu scuxétaha ta, ⁶tsèhè xi ngu amigu naha cafehe ndya naha xi cjui me ngu nangui, hane tsajin ná mé xi suá siné me.” Cuatjin cuinújun cojo rè me. ⁷¿Há cjuayangui me tsujun cuitjin tsèhè hisca cahntsua ndihya?: “Xicatuunndyuun ná ta tingotjo ndihya ne, ha tichjá, hacuaha quihndi naha ne, nguehe siufé cojo ná. Cumaji cuisátjehnga suá nuju.” ¿Há cuatjin cjuayangui me tsujun? Hacuiin cuatjin. ⁸Cuichjá cojo nuju ta handasa amigu nuju me, peru hacuiin ngatsé rè vèhè xi cuisatjehnga me sua nuju me ta ngatsé rè xi ngajan cjui ngajan nduva cuinújun ne, cuisatjehnga me sua nuju me ha tucutjin xi chjahyun. ⁹Hacuaha cuichjá cojo nuju cuitjin: Chjahyun rè Nina, hane sua nuju me. Tinchusun, hane sacú nuju. Tinújun, hane Nina ne, sua me cahndé cuisuhun. ¹⁰Cuatjin nihñu ta, yèjé ni xuta xi fehya me ne, fahatsja me, hane yo xi vanguise ne, sacú rè, hane yo xi chja ne, sacú cahndé visehen.

¹¹Tsajin ngu nahmi xi, hya xi quihndi rè me cjuehya ngu niñu ne, cahndé rè xi sua me ngu niñu ne, sua me ngu ndoyojo, o sá xi hya xi quihndi cjuehya ngu chu ti ne, cahndé rè xi sua me ngu chu ti ne, sua me ngu chu yé, ¹²o sá xi hya xi quihndi cjuehya ngu chjoo ne, sua me ngu chu naya. ¹³Ngayun xi tsehen cjuatacun nuju ne, ma tuhun rè quihndi nuju xcusun xi ndaja. Hitsé guan Nahmi naja xi tacun me ngahnga ta hitsé sa jercu meje sua me Hasen rè me cojo xuta xi cjuehya rè me. —Cuatjin xu cachja Jesús.

Cachja xuta xi Satanás casuaxa rè Jesucristu

¹⁴ Cavechú xu ngu nixtin xi cavaxëxin Jesús ngu xitsehen xi casahmi lihmi rë ngu cha jan. Hane hya xi cavetju xitsehen jan ne, cha lihmi jan ne, cavetsihin cachja cha. Hane xutacjin jan ne, jemu quijircun rë me. ¹⁵ Hya xi camá ne, ngujo xuta jan ne, cuitjin xu cachja me:

—Beelzebú, xitsehen xi matitjun ne, vëhë casua rë cha xá xi vaxëxin cha xitsehen. —Cuatjin xu cachja xuta jan.

¹⁶ Hane ngujo nga xuta ne, xi meje cjuahachuva me Jesús ne, cafehya me me xi sahmi me ngu cjuarcun xi cuinduva ngajan ngahnga. ¹⁷ Peru Jesús ne, tsëhë xi ha vëë me mé xi tsingataha cacun xuta xi cuacun jan ne, cuitjin xu cachja me:

—Hya xi xuta tsëhë ngu nandya ticjan me ngajñi rë me cojo xicjin me ne, nandya vëhë ne, ha tivëjña xahva, hisca ndihya ne, tivixusun xcun xicjin.

¹⁸ Hacuanitjin ni sá xi Satanás scaan cojo xitsehen xi yahnga xi hacuaha Satanás má nai rë ne, tsichajá ngahñu rë xi vëhë matitjun. Cuatjin chjá ta, tsëhë xi nújun xi Beelzebú casua ná xá xi vaxëxen xitsehen. ¹⁹ Peru sá xi Beelzebú casua ná xá xi vaxëxen xitsehen ne, hacuaha ha Beelzebú vëhë casua rë ngu ngu xuta ladu nuju xá xi hacuaha vaxëxin me xitsehen. Vëhë xi ha me vëhë ni cuichja me xi cuaintjin xi nújun xi Beelzebú casua ná xá. ²⁰ Peru sá xi Nina casua ná me xá xi vaxëxen xitsehen ne, ngajan matsejen xi gobiernu xi sahmi Nina ne, ha tivetsihin.

²¹ Satanás ne, tangun cojo ngu cha xi jemu hñu ngahñu rë. Hya xi ha ndaja tjin chjine cha cojo quicha rë cha xi sahmi cuidado cha ndava cha ne, yëjë xcusun xi tjin rë cha ne, hacuaha ha ndaja cuidado tjin. ²² Peru ngahan ne, tangun ngahan cojo ngu me xi hitsë sa jemu hñu camahani ngahñu rë. Hya xi me xi hitsë sa hñu ngahñu rë scaan me cojo cha xi hñu ngahñu rë jan hacuaha tsinguijne me cha ne, cjuahatahá me quicha xi vetaha cacun cha xi cuaxëtje rë cha, hane sehe cuatëcja me yëjë xcusun xi tjin rë cha jan ngajñi rë me cojo xicjin me.

²³ Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta. —Cuatjin xu cachja Jesús.

Xitsehen xi vuya

²⁴ Hya xi camá ne, Jesús ne, quijinduju sa xu cachja me cuitjin:

—Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndë hiscan xi cuejñajenda. Hane xi sacuiin rë cahndë hiscan cuejñajenda ne, cuitjin tsingataha cacun: “Cúya rë cjuë ndya naha hiscan xi cavëtjuxen.” Cuatjin tsingataha cacun xitsehen jan. ²⁵ Hane xi vuya fehe xitsehen jan cahntsua xahasen rë xuta jan ne, vutsejen xitsehen jan cahntsua xahasen jan sacuaha ngu ndihya xi caxtecha tyjahi tyjahi, hacuaha siundaja chichihin ngu tsë ngu xtí. ²⁶ Xi vutsejen xitsehen jan xi cuatjin jihi jan ne, sehe fi jaha sa rë yatu sa xitsehen xi hitsë sa tsehen xi cuma rë vëhë ne, sehe visehen nga viyujcahndë jan. Peru xi ma ngascaan ne, hitsë sa chojihi tsëhë xuta vëhë xi cuma rë titjún. —Cuatjin xu cachja Jesús.

Xuta xi ndaja jain tsëhë me

²⁷ Peru jinguyëjë rë xi tichja xu Jesús cjuava vëhë ne, ngu na xi jiyajñi ngajñi rë xutacjin jan ne, cajindaya na cachja xu na cuitjin:

—Jemu ndaja tsëhë chjuun xi catsin rë ngayun, hacuaha jemu ndaja tsëhë ndanisin xi cavacuntuhun. —Cuatjin xu cachja na.

²⁸ Peru Jesús ne, cuitjin xu cafayangui me tsêhê na:

—Quixi, peru hitsê sa ndaja tsêhê xuta xi visiñuju me cjua rê Nina hacuaha vihdê me tsêhê. —Cuatjin xu cafayangui Jesús.

Cafehya xuta tsehen ngu seña xi sahmi Nina

²⁹ Vêhê ta jima tangun camaha sa xutacjín jan ne, cavetsihin cachja xu Jesús cuitjin:

—Ngayujun ni ngayun xuta tjê rê Israel tsêhê nixtin vihi matsejen ne, hatuxa tsehen cjuatacun nuju. Tichjahyun ngu seña xi sahmi Nina, peru sacuiin nuju matsejen ta ngu ni seña xi sacú nuju matsejen ne, sacuaha seña xi catsingacun profeta Jonás hatsêê nixtin. ³⁰ Sacuatjin rê profeta Jonás xi me vêhê camá me ngu seña xi cuma rê xuta nandya Nínive hatsêê nixtin matsejen ne, ha cuanitjin ni ná ngahan xi Quihndi rê Xuta Jain ngahan matsejen ta ngahan cuma ngahan seña xi cuma nuju ngayujun ni xi nechun nixtin vihi. ³¹ Hya xi cuechú nixtin xi tsichuva Nina xuta tsêhê jyê rê me matsejen ne, na xi cavitexa ngajan nangui Sabá hatsêê nixtin matsejen ne, cjue cuinchajyê nuju na ngayujun ni ngayun xuta tjê rê Israel xi nechun nixtin vihi. Cuatjin sahmi na matsejen ta, tsêhê xi jercu tu cjin camahani xi canduava na xi cuihdê na cjuatacun ndacun xi jercu tu ma camahani rê Salomón, me xi cavitexa rê xutachanga naja hatsêê nixtin. Peru ha tejña ngahan nguehe sacuaha ngu seña xi hitsê sa vengui chji rê xi cuma rê Salomón. ³² Hacuaha hya xi cuechú nixtin xi tsichuva Nina xuta tsêhê jyê rê me matsejen ne, yêjê xuta nandya Nínive matsejen ne, cjue cuinchajyê nuju me ngayujun ni ngayun xuta tjê rê Israel xi nechun nixtin vihi. Cuatjin sahmi me matsejen ta, tsêhê xi me xi cuacun vêhê matsejen ne, catsindeya me cjuatacun rê me hya xi casua profeta Jonás camachaya rê me cjua rê Nina. Peru ha tejña ngahan nguehe sacuaha ngu seña xi hitsê sa vengui chji rê xi cuma rê profeta Jonás. —Cuatjin xu cachja Jesús.

Ndihi rê yojo naja

³³ Hane xi quijinduju sa cachja me ne, cuitjin xu cachja me:

—Tsajin hisca xi ngu xuta xi ha xcun xi ha cavatju cavetaha rê me ngu ndihi matsejen ne, faha me veyahma me o sá xi faha me veyahma me ngahma ngu caxa matsejen ta faha me vejña me cahndê rê, cojo sa xi yêjê xuta xi visehen me hiscan setí ndihi jan matsejen ne, scuêê me hasen rê.

³⁴ Tuxcuun matsejen ne, vêhê xi sacuaha ndihi rê yojo naja. Vêhê xi hya xi tuxcuun ndacun matsejen ne, hatuxa ma hasen cahntsua yojo naja. Peru sá xi tuxcuun chocun matsejen ne, hacuaha ma jñu cahntsua yojo naja.

³⁵ Ndandaja ningatuhuntacún matsejen ne, sacuaha hasen xi jiya cahntsua yojo nuju matsejen ne, ¿há hasen xi cjuaquixi jain?, o há tsajin ne, ¿há jñu?

³⁶ Quihndê matsejen ne, sá xi jingujyê ni yojo nuju jiya hasen, hisca xi hitsê jñu tsajin rê matsejen ne, jingujyê ni yojo nuju matsejen ne, jiya hasen sacuaha hya xi sahmi hasen tsajan hasen rê ngu ndihi. —Cuatjin xu cachja Jesús.

Cacjan Jesucristu cojo cha fariseo cojo cha xi vicuya cjuachacun

³⁷ Hane xi cajnetaha xu cachja Jesús ne, ngu cha fariseo ne, cachja cha cojo Jesús xi cjue sinê me cojo cha niñu. Xi cavisehen Jesús ndihya ne, quiji xu me cafaha me cahndê rê me xcun maxê. ³⁸ Peru xi cavêê xu cha fariseo xcusun rê Jesús ne, jemu quijircun rê cha tsêhê xi hacuiin titjun cavane xu me tsja me sehe sinê me niñu sacuaha vitexa xcusun rê xutachanga rê me. ³⁹ Ngajan xi Nai naja ne, cachja xu me cojo cha cuitjin:

—Ngayujun ni ngayun xuta fariseo ne, xcusun nuju xi nihñu tyjahi táha ngaxtun ni ngu vasu o sá xi ngu tyuva, peru cahntsua xahasen nuju ne, quitsë camahani rë cjuatsehen cojo cjuatacun xi nimuju yějê ni xcusun. ⁴⁰ Sca nuju ngayun. Catijne rcun ta ha me xi casahmi ni táha ngaxtun ne, hacuaha ha me vëhë ni casahmi me táha cahntsua. ⁴¹ Peru xi hincha cahntsua ne, vëhë tuhun sacuaha caridad. Sá xi cuatjin nihñu ne, yějê ni xcusun ne, tyjahi xi cuma nuju.

⁴² 'Peru jemu chojyihî tsujun ngayun xuta fariseo, tsëhë xi ngayun ne, handasa nihñu cuidadu xi tuhun diezmu nuju hisca cojo nchurca cojo ruda cojo yějê sa xcusun ndeya ne, peru nihñucuenduun xi nihñu hacutjin xi cjuaquixi cojo xingun, hacuaha nihñucuenduun xi nihmutacún Nina. Ngayun ne, meje rë xi ha canihñucuendun Nina, peru hacuaha hacuiin nichayun diezmu nuju vë.

⁴³ 'Hacuaha jemu chojyihî tsujun ngayun xuta fariseo, tsëhë xi ngayun ne, jemu ndama nuju xi cuatjin satë nuju cahndë xi matitjun tsëhë cahntsua yungun. Hacuaha jemu ndama nuju xi cuatjin fi chja xuta nina cojo nuju ngajan ngajñi ndetsin.

⁴⁴ 'Hacuaha jemu chojyihî tsujun ta, handasa matsijin ne, peru jemu chocun xahasen nuju. Vëhë xi tangun ngayun cojo tsjun xi hisca matsijin, hane xuta ne, hisca machayiin rë me cjuî nduva me sune me xcun. —Cuatjin xu cachja Jesús.

⁴⁵ Ngajan xi ngu cha xi vicuya cjuachacun ne, cachja xu cha cuitjin cojo Jesús:

—Maestro, hya xi nújun cjua vëhë ne, hacuaha cojo ngayin choho nújun tsijin. —Cuatjin xu cachja cha.

⁴⁶ Hane Jesús ne, cuitjin xu cachja me:

—Hacuaha cojo ngayun cha xi vicuya cjuachacun, jemu chojyihî tsujun, tsëhë xi vicuyun rë xuta jemu cjin xcusun xi jemu chja camahani cuma sahmichihin me, hane suvun ne, visecuún rë me hisca hitsë.

⁴⁷ 'Jemu chojyihî tsujun ngayun ta, tsëhë xi ngayun ne, nindujun tsjun ndacun tsëhë yějê ni nima profeta xi xutachanga nuju catsiquehen me hatsëë nixtin. ⁴⁸ Ngayun suvun ningacun xi chuya nuju xcusun xi casahmi xutachanga nuju ta, tsëhë xi ngu ladu ne, me vëhë catsiquehen me profeta xi cuacun vë, hane ngu ladu nga ne, ngayun nindujun tsjun rë.

⁴⁹ 'Vëhë xi Nina, me xi jemu vechútaha cjuatacun rë me ne, cachja me cuitjin: "Tsingátju profeta cojo apóstol ngajñi rë xuta xi siu nixtin vihi, hane yahnga me xi cuacun vë ne, tsiquehen xuta me, hane yahnga me ne, sua xuta cjuañihî xi cuatju me xi cuacun vë." Cuatjin cachja Nina. ⁵⁰ Hane cojo chuva vëhë ne, xuta xi siu nixtin vihi ne, me vëhë cháha rë me tsëhë cjuaveya rë yějê profeta xi cahme hisca ntsacu cavetsihin ngasunhdë, ⁵¹ vetsihin cojo hisca cjuaveya rë xutachanga naja Abel vijnetaha cojo hisca cjuaveya rë xutachanga naja Zacarías, me xi catsiquehen rë xuta tiña ngasuncun hiscan ndatsen rë ndava Nina. Cuichjá nga cojo nuju ta yějê cjuaveya xi cuacun vë ne, cháha rë xuta xi siu nixtin vihi.

⁵² 'Jemu chojyihî tsujun, ngayun cha vicuya cjuachacun ta, tsëhë xi cavejñuxun cjuatacun rë Nina. Canitjungun cjuatacun rë me, hacuaha hisca catuun cahndë xi sacú rë xuta xi meje rë me cjuatacun rë Nina jan. —Cuatjin xu cachja Jesús.

⁵³ Hane hya xi tivetju xu Jesús tsëhë cahndë hiscan cajinë me niñu jan ne, cha xi vicuya cjuachacun cojo cha fariseo jan ne, jemu cjan rë cha, jemu

cjín cjuca cafahataha xu cha me, ⁵⁴ hacuaha jemu cavangui xu cha chuva rë hacutjin xi sacú rë cha ngu cjuca rë me xi cuaintjin cuichja me.

12

Cjuandacha xi sahmi cha fariseo

¹ Jinguyëjë rë xi tichja sa xu Jesús cojo cha xi cuacun jan ne, jercu jima tangun camahani xuta, ña vehnchun xicjin me. Sehe ngajan xi Jesús ne, cavetsihin cachja xu me tjutjun cojo xuta ladu rë me cuitjin:

—Xicaninguisuhunjñuu cojo cha fariseo xi cuacun vë ta, tsëhë xi cjuandacha xi sahmi cha ne, tangun cojo san rë pan xi hatuxa vitsojo ngajñi rë yëjë ni nahyu. ² Yëjë ni xcusun xi casetsangui ne, cuechú nixtin xi chjaháxin rë xi titsangui rë. Vëhë xi yëjë ni xcusun xi hma ne, handasa sehmangui ne, peru cuechú nixtin xi cuetjucaa tsejen. ³ Yëjë ni cjuca xi má hiscan jñu ne, cuechú nixtin xi cuinuhya rë hiscan hasen. Vëhë xi yëjë ni cjuca xi má táha hma ne, cuechú nixtin xi cuinuhya rë táha tsejen.

Yo xi meje rë xi rcún

⁴ Nguehe cuichjá cojo nuju, ngayujun ni. Xicarcuun xuta xi tsiquehen nuju me, hane ngaxtun vëhë ne, ha quihndë tsajin mé sa xi cuma sahmi me cojo nuju. ⁵ Peru nguehe cuichjá cojo nuju yo xi meje rë xi rcún. Meje rë xi Nina xi rcún me. Me xi ngaxtun xi ha catsiquehen nuju ne, tjin rë me cahndë xi tsingatjenya nuju me hiscan xi má hasen rë nima castigu. Cuichjá nga cojo nuju ta hatuxa me vëhë xi meje rë xi rcún me.

⁶ Chutsujun ta hñú chu nisë langa ne, jemu xtengui chji rë chu. Peru Nina ne, tsichayaain me hisca xi ngu chu. ⁷ Hacuaha ngayun ne, hisca tsjarcun xqui tjin rë Nina. Vëhë xi xicarcuun ta, tsëhë xi jima ngu ngayun ne, hitsë sa jercu vengui chji nuju xi cuma rë xi jemu cjín chu nisë vë.

Xuta xi tsinguixi me xi xuta ladu rë Jesucristu má me

⁸ Nguehe cuichjá cojo nuju ta yëjë xuta xi tsinguixi me xcun xuta xi yahnga xi xuta ladu naha má me ne, hacuaha ngahan xi Quihndi rë Xuta jain ngahan ne, tsinguixë xcun yëjë ni ángel rë Nina xi xuta ladu naha má xuta xi cuacun vë. ⁹ Peru yëjë xuta xi tsinguixi me xcun xuta xi yahnga xi hacuiin xuta ladu naha má me ne, hacuaha hacuanitjin ni tsinguixë ngahan xcun ángel rë Nina.

¹⁰ Hacuaha yëjë xuta xi choho chja me tsahan, ngahan xi Quihndi rë Xuta Jain ngahan ne, tsinchataha Nina me, sá xi cjuehya me cjuaninchataha. Peru yëjë xuta xi choho chja me tsëhë Hasen rë Nina ne, tsajin cjuaninchataha xi cuma rë me.

¹¹ Hya xi xuta nandya cjuaha nuju me cjuecojo nuju me xcun xutaxa rë yungun o sá xi xcun xutaxa rë ndihyavasen ne, hacuiin cumacjintacún tsëhë chuva rë hacutjin xi chjayunngun o tsëhë xi cuinújun ta, ¹² tsëhë xi ha hora vëhë ni ne, Hasen rë Nina cuichja cojo nuju mé cjuca xi meje rë xi cuinújun. —Cuatjin xu cachja Jesús.

Mijí rë xi jercu nimeje cjuanchina

¹³ Hya xi camá ne, ngu xuta tsëhë ngajñi rë xutacjín jan ne, cachja xu me cojo Jesús cuitjin:

—Maestro, tinújun cojo cha vëhë xingueen, catisua cha ngahan xcusun xi satë ná xi cavejña nahmi niji hya xi cahme me. —Cuatjin xu cachja me.

¹⁴ Sehe ngajan xi Jesús ne, cuitjin xu cachja me:

—Peru ngahan ne, hacuiin xá naha xi ngahan cuátëcja xcusun xi satë nuju xingu xingu ngayun. —Cuatjin xu cachja Jesús cojo xuta jan.

¹⁵ Sehe cachja nga xu me cojo xutacjin jan cuitjin:

—Nechun cuidadu, hacuiin jercu nimuju cjuanchina matsejen ta, tsëhë xi hacuiin ngatsë rë cjuanchina xi tjin naja matsejen ne, vëhë xi ndacun cjuahñu naja. —Cuatjin xu cachja me.

¹⁶ Ngaxtun vëhë ne, sehe cachja xu Jesús ngu ejemplu cojo xuta cuitjin:

—Cuejña ne xi ngu cha nchina jan matsejen ne, jercu ndaja camá xitjë xcun nangui rë cha. ¹⁷ Hya xi camá ne, cuitjin catsingataha cacun cha: “¿Mé xi ndatjin sahme quihndë? Ha quihndë tsajin ná cahndë hiscan xinchandaja tutjë naha. ¹⁸ Ndatjin rë xi cuitjin sahme. Tsinguétsun ndihya hiscan hinchandaja tutjë naha, hane tsindaja xi hitsë sa yehe. Hane ngajan cuínchandaja yëjë tutjë naha cojo ngu tsë ngu xtí sa xi tjin ná. ¹⁹ Hane sehe cuichjá cojo xahasen naha cuitjin: Jercu cjin camahani xcusun hinchandaja ná quihndë, hacuaha jemu cjin nu cjuecani rë. Cuitejñajenda quihndë. Sinë cuëhë tsahan. Suá cjuasua xahasen naha.” Cuatjin catsingataha cacun cha nchina jan. ²⁰ Ngajan xi Nina matsejen ne, cuitjin cachja me cojo cha: “Sca ri ngaye. Nguixun quihndë ne, cueye. Hane yëjë xcusun xi cavetje ne, tsajin mé sacú ri tsëhë.” Cuatjin cachja Nina. ²¹ Cuatjin rë xuta xi jercu vetjo cjuanchina xi cuma rë suvá me, peru xcun Nina matsejen ne, tsajin mé xi tjin rë me. —Cuatjin xu cachja Jesús ejemplu vëhë.

Sahmi cuidadu Nina xuta ladu rë me

²² Ngajan xi Jesús ne, cuitjin cachja xu me cojo xuta ladu rë me:

—Vëhë xi cuichjá cojo nuju ta: Hacuiin cumacjintacún tsëhë xcusun xi xinu xi sua nuju ngahñu. Hacuaha hacuiin cumacjintacún tsëhë tsjian xi chujun. ²³ Hacuiin cumacjintacún ta, tsëhë xi hitsë sa vengui chji rë cjuahñu nuju xi cuma rë xi chinu. Hacuaha hitsë sa vengui chji rë jojo nuju xi cuma rë tsjian xi chujun. ²⁴ Chutsujun chu chenda ta hacuiin tsitjë chu, hacuiin fanga chu, hacuaha tsajin rë chu ndyahnga hiscan cuinchandaja chu xi sinë chu. Peru Nina tsicjen me chu. Ngayun ne, hitsë sa jercu vengui chji nuju xi cuma rë chu nisë. ²⁵ Hacuaha tsajin hisca xi ngu xuta xi cuma cuesuntaha me cjuahñu rë me hisca ngu hora ngatsë rë xi ma cjin cacun me. ²⁶ Sá xi hitsë lihndi xcusun vëhë maji nihñu ne, ¿mé má jercu macjintacún tsëhë xcusun xi yahnga jan ni?

²⁷ Chutsujun naxu liri ta tsihyaain nachjun hacuaha fahyaain tsjian. Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsë sa ndajyihí ngu naxu vëhë. ²⁸ Sá xi cuatjin tsicaja Nina xca nguñña xi ngu nixtin ne siutahá nguñña, hane xitu ngu nixtin ne cueti ne, hitsë sa ngayun ta hatuxa tsicaja nuju me, ngayun xi cjëë cumangutacúnndujun cojo me. ²⁹ Hacuiin jercu nijendun rë xahasen nuju xi vinchunsun xi xinu xi siuhun ta, ³⁰ tsëhë xi xcusun vëhë ne, yëjë xutaxín tsëhë jingujyë ni ngasunhndë ne, me vëhë xi vangui me xcusun vëhë. Peru ngayun ne, Nina Nahmi naja ne, ha vëë me xi hatuxa sahmi nguñyë xi sacú nuju xcusun vëhë. ³¹ Catamarcun nuju tsëhë gobiernu xi sahmi Nina, hane xcusun vëhë ne, quitahácoo sa sacú nuju.

Cjuanchina xi tacun ngahnga

³² Xicamacjintacún ngayun xuta ladu naha xi jemu chúva má ngayun ta, tsëhë xi Nina Nahmi naja ne, ha cavejña cacun me xi cojo cjuandaja rë me ne, sua nuju me xá xi nihñu gobiernu hiscan xi sahmi me gobiernu. ³³ Titeñu

xcusun xi tjin nuju, hane tujún xi sacú nuju ne, tuhun rè xuta xi tsajin rè me, sacuaaha tuhun ngu caridad. Nihñu nguuyë xi sacú nuju cjuanchina xi jercu cjuecani rè. Cuma cuinújan ne, ngu cjuanchina xi tsajin nixtin cjuë xi cuetjún ngajan ngahnga hiscan xi cha chëjë ne, maji ma tiña cha, hisca chu quixún ne, tsinguetsiin chu. ³⁴ Cuatjin meje rè xi nihñu ta, tsëhë xi hiscan tetjo cjuanchina nuju ne, hacuaaha ngajan quitahá cjuatacun nuju.

Meje rè xi tjinchjine ngayaan tsëhë xi cjuhe Nai naja

³⁵ Tuhunchjinu yojo nuju, hacuaaha catisetí ni ndihi nuju, tsëhë xi cjuhe Nai nuju. ³⁶ Nihñu sacuatjin sahmi hndixahan xi viyujuya me nai rè me, hya xi nai rè me quiji ngu ndava suhi. Siuchjine ni me cojo sa xi hora xi cjuhe nai rè me ne, xi tu cuichja ne, ngutjen cjuë scuxaha me tingotjo xi cuisehen nai rè me. ³⁷ Jemu ndaja tsëhë yëjë hndixahan xi, hora xi cjuhe nai rè ne, sacútsja rè xi siu quicun. Nguehe cuichjá cojo nuju cjuaquixi ta, xi scuëë nai rè hndixahan jan xi cuatjin quicun hndixahan ne, cuëhëchjine me yojo rè me, sehe cjuecojo me hndixahan xcun maxë, sehe cuiyuju me xi sinë me. ³⁸ Jemu ndaja tsëhë hndixahan xi sacútsja rè nai rè xi siu quicun, handasa nixten cjuhe me o sá hisca tiña sahasen cjuhe me. ³⁹ Hacuaaha meje rè xi cumachaya nuju cjuatacun vihi: sá xi nai rè ngu ndihya ha machaya rè me hora xi cuinduva cha chëjë ndava me ne, suaain me cahndé xi scuxaha cha ndava me, sehe tsichëjë cha. ⁴⁰ Hacuanitjin ni meje rè xi ngayujun ni ngayun ne, tuhunchjinu yojo nuju ta, tsëhë xi hora xi ningatuuntacún xi cjuëhë ngahan xi Quihndí rè Xuta Jain ngahan ne, hora vëhë rè cjuëhë. —Cuatjin xu cachja Jesús.

Xuta xi vihndë cojo xi vihndiin tsëhë Nina

⁴¹ Hya xi camá ne, Pedru ne, cuitjin xu cachja me cojo Nai naja: —Tatá. Ejemplu xi canújun vë ne, ¿há suvin ni ngayin xuta ladu nuju meje rè xi cuetihinrcuin?, o há tsajin ne, ¿há cojo yëjë sa xuta xi yahnga cuetaharcu me? —Cuatjin xu cachja Pedru.

⁴² Ngajan xi Nai naja ne, cuitjin xu cafayangui me:

—Ngayujun ni ne, meje rè xi nihñu sacuaaha sahmi ngu hndixahan xi jemu quicun cacun xi sahmichihin yëjë ni hacutjin xi meje rè nai rè, ngu hndixahan xi cjuahaxa xi cjuahacuenda rè yëjë sa hndixahan xi hora tjin sua xi sinë. ⁴³ Jemu ndaja tsëhë ngu hndixahan xi, hora xi cjuhe nai rè ne, sacútsja me hndixahan jan xi tisahmi tutjin xi casuaxa rè nai rè. ⁴⁴ Cuichjá cojo nuju cjuaquixi ta, nai rè hndixahan vëhë ne, suaxa me hndixahan vëhë xi hacuaaha cjuahacuenda yëjë sa xcusun xi tjin rè me. ⁴⁵ Peru cuejña ne xi hndixahan vëhë ne, tsingataha cacun cojo cjuatacun rè cuitjin: “Nai naha ne, tijima tafi sa xi cjuhe me.” Cuatjin tsingataha cacun. Sehe cuetsihin cuaja rè hndixahan xi yahnga jan, hacuaaha cuetsihin cuatjutaha sinë cuihi hisca cuma chihí. ⁴⁶ Peru cuechú ngu nixtin xi tsajin tacunya hndixahan vëhë, ngu hora xi hisca hvíin ne, hya cjuhe nai rè, hane jemu jyë castigu sahmi me. Sehe tsingatju me cuatjutangun cjuañihí cojo hndixahan xi yahnga xi casahmichiin tutjin xi casatëxa rè.

⁴⁷ Hndixahan xi ha ndaja vëë hacutjin xi meje rè nai rè hane cavihinchjinii, hacuaaha casahmii tutjin meje rè nai rè ne, jemu sehen camahani rè. ⁴⁸ Peru hndixahan xi hvíin hacutjin xi meje rè nai rè hane casahmi xcusun xi vehú chuva rè xi cuma castigu ne, chúva sehen rè. Hane yëjë ni hndixahan xi jemu cjin xcusun xá casua nai rè xi sahmi ne, hacuaaha cuatjin jercu cjin cjuachjaha rè hya xi sahmi entregadu cuenta rè.

Sahmi Jesucristu xi sahmi condra xuta xicjin me

⁴⁹ Ngahan ne, canduvá ne xi cuétaha rë sacuaaha ngu ndihi ngasunhndé, ngu ndihi xi tsingacun mé cún cjuatacun rë xuta. Hacuaha jemu meje ná xi ha hisca ha casetaha rë. ⁵⁰ Ngahan ne, tjin ná xi cuátju ngu cjuañihi sacuatjin rë ngu xuta xi tjin rë me xi satë rë me nandá hya xi xtenda me. Hacuaha jercu choho má ná hisca xi cuma chihin cjuacjintacun vëhë. ⁵¹ Xi má nuju ngayun ne, ¿há cjuajeya canduvácojo xi cuma rë xuta ngasunhndé? Hacuiin cuatjin. Ngahan ne, canduvá ne xi sahme xi sahmi condra xuta xicjin me. Cuatjin sahmi condra xicjin me ta, tsëhë xi ngujo me ne, cumangu cacun me cojo ná, hane ngujo nga me ne, cumanguaain cacun me cojo ná. ⁵² Xi cuetsihin nixtin vihi ne, hisca cojo xi cjuiniji sa ne, cuejña ne xi ngu ndihya ne, siu hñú xuta cojo xicjin me. Hane jyan me ne, sahmi condra me me xi jo jan. Hane me xi jo jan ne, sahmi condra me me xi jyan jan. ⁵³ Nahmi ne, sahmi condra me cha quihndi rë me, hane cha quihndi rë me jan ne, sahmi condra cha nahmi rë cha. Naa ne, sahmi condra me na quihndi rë me, hane na quihndi rë me ne, sahmi condra na naa rë na. Nahya ne, sahmi condra me jahnda rë me, hane jahnda rë me ne, sahmi condra na nahya rë na. —Cuatjin xu cachja Jesús cojo xuta ladu rë me.

Camamiji cuijne rcu xuta xcusun xi casahmi Jesucristu

⁵⁴ Hya xi camá ne, cachja nga xu Jesús cojo xutacjin jan cuitjin: —Nguehe nangui naja matsejen ne, hya xi chutsujun xi tivisecún ngu yuffi ngajan táha ladu vetje tsuhi matsejen ne, ngutjen nújun ta cuaha ngu tsi hñu, hane cuatjin jain má. ⁵⁵ Hane hya xi vanga ngu tjo xi cjui táha ladu ngathin matsejen ne, ngayun matsejen ne, nújun ta cuma suë, hane cuatjin jain má. ⁵⁶ Jemu hyun mé vijne xcusun xi cún nangui cojo xcusun xi cún ngahnga. ¿Mé má nújun xi hyúun mé vijne xcusun xi tijima nixtin vihi ni? ¡Jemu ndacha ngayun!

Meje xati rë xi cuichancjan si xi tacun ngajñi naja cojo Nina

⁵⁷ Hane ngayun matsejen ne, ¿mé má nichuvuun suvun cojo cjuatacun nuju xcusun xi cjuaquixi ni? ⁵⁸ Ndiya tivangun cojo xuta xi meje cuinchajyë nuju ngajan xcun xutaxa rë matsejen ne, nihñu ngahñu xi cuisuhun cjuandaja cojo me, cojo sa xi xticja si xi tacun ngajñi nuju cojo rë me matsejen ta, sá tsajin ne, cjucojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane mayu jan matsejen ne, cjue cueyá nuju me ndavaya. ⁵⁹ Hane cuichjá cojo nuju cjuaquixi matsejen ta hatuxa cuetjuun tsëhë ngajan jinguyëjë rë xi cjëë cuechjun yëjë ni tujún xi quitjun. —Cuatjin xu cachja Jesús.

13

Sahmi ngujoyë xi nindeyan cjuatacun naja

¹ Ha hora vëhë ni ne, cafehe xu ngujo xuta hiscan tacun Jesús. Hane cachja xu me cojo Jesús tsëhë ngujo xuta tsëhë distritu Galilea xi cavitexa Pilatu xi cueya hya xi tisisquehen xuta xi cuacun vë chu rë me xi sua me cjuatjo cojo Nina.

² Ngajan xi Jesús ne, cuitjin xu cachja me cojo xuta xi cachja cojo rë me jan: —Hane tsëhë xi cuatjin cahme ngujo xuta Galilea xi cuacun vë ne, ¿há vëhë xi má nuju xi hitsë sa tsehen me xi cuma rë yëjë sa me xi yahnga? ³ Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaaha cuatjin cueyun. ⁴ O há tsajin ne, xuta xi tjuhunjunyan xi cahme

hya xi caticjane rē torre tsēhē Siloé jan ne, ¿há má nuju xi hitsē sa tsehen me xi cuma rē yējē sa xuta xi caviyuju ngajan Jerusalén? ⁵ Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. —Cuatjin xu cachja Jesús.

Ejemplu tsēhē ya xi cavaquiin tú rē

⁶ Sehe ngajan xi Jesús ne, cachja sa xu me ngu ejemplu cojo xuta jan, cojo sa xi sua me cumachaya rē xuta xi jemu chúva camá nixtin xi cuma tsindeya xuta cjuatacun rē me. Cuitjin cachja me:

—Cuejñaa ne xi ngu ya túhaxi jan ne, secun xcun nangui rē ngu cha jan. Hane xi canduva cha xi tsēhē jan, vanguise cha tú rē ne, casacuiin rē cha.

⁷ Sehe ngajan xi cachja cha cojo cha mosu rē cha cuitjin: “Ha tjin rē jyan nu xi vinduva vanguésē tú rē ya vi ne, sacuiin ná. Tiche. ¿Mé má tu cuenda cuisecun tsinguetsun rē nangui?” Cuatjin cachja cha xi tsēhē jan. ⁸ Ngajan xi cha mosu jan ne, cuitjin cafayangui cha: “Tatá. Tuhun rē cahndē catiseacun ndastu ngu nu sa, hane cuacján nangui rē, hacuaha cuíncha rē abono. ⁹ Xi cuatjin ne, ¿há suaain tú rē nduva nga ngu nu? Hane sá xi hacuaha ni suaain tú rē ne, sehe cuichan.” Cuatjin cafayangui mosu jan. Cuatjin xu fi ejemplu xi cachja Jesús.

Casahmi Jesucristu xi camandaja ngu chjuun nixtin xi chjahájenda rē

¹⁰ Ngu nixtin xi chjahájenda rē, hya xi tivicuya xu Jesús cahntsua ngu yungun jan ne, ¹¹ ngajan tacun ngu chjuun xi ha cjuí tyjuhunjyan nu xi camaticua na hane ha quihndē maji xu ma quixi ninda ngaxtun na. ¹² Xi cavēē Jesús na ne, cajindaya xu me na, sehe cachja me cojo na cuitjin:

—Ngayun tsan ne, ha camandaya ngayun tsēhē xi cuatjin jyihí ngayun vē. —Cuatjin xu cachja Jesús.

¹³ Hane ha hora vēhē ni cavisanetsja xu me na, hane ngutjen ni camaquixi ninda ngaxtun na. Hya xi camá ne, cahamí jyē cahamí hnga xu na Nína.

¹⁴ Peru presidente rē yungun jan ne, jemu camacjan xu rē me tsēhē xi cahamí Jesús xi camandaja ngu chjuun nixtin xi chjahájenda rē. Vēhē xi cachja xu me cojo xutacjín jan cuitjin:

—Tjin naja jyun nixtin xi nihña xá. Vēhē xi meje rē xi ngajñi rē jyun nixtin vēhē matsejen ne, hya nduvun xi cumandaja ngayun, hacuiin xi tu nixtin xi chjahájenda rē matsejen ne, hya cuinduvun. —Cuatjin xu cachja presidente rē yungun jan.

¹⁵ Peru Nai naja ne, cuitjin xu cachja me:

—Jercu choho ningatuhuntacún! Jima ngu ngayun matsejen ne, hatuxa vuhunndayun ndyaja vuhunndayun burru nuju tsēhē cahndē rē chu xi cuangun nicuhun chu nandá, handasa nixtin xi chjahájenda rē. ¹⁶ Hane na vihi xi xuta ladu rē Nína na hacuaha tjinñu rē Satanás na cahntsua tyjuhunjyan nu matsejen ne, ¿há ndaintjin xi sehenndaya na nixtin xi chjahájenda rē ni? —Cuatjin xu cachja Nai naja.

¹⁷ Hane xi café xu cachja Jesús cjuá vēhē ne, yējē ni xuta xi má condra rē me ne, jemu camasava xu rē me. Peru yējē sa xuta xi yahnga ne, jercu ndaja camá xu rē me tsēhē yējē ni xcusun ndaja xi cahamí Jesús.

Ejemplu tsēhē tutjē lihndi

¹⁸ Hacuaha cachja sa xu Jesús ejemplu vihi:

—Gubiernu xi sahmi Nína ne, ¿mé xi tangun cojo? ¹⁹ Tangun cojo ngu tutjē xi jemu lihndi camahani. Hya xi ngu xuta tsitjē me tutjē vēhē xcun nangui rē

me ne, cuetju, cuma ngu ya, hisca nisë xi vitjen chu ngahnga ne, sahmi chu ndava chu rcu. —Cuatjin xu cachja Jesús.

Ejemplu tsëhë san rë pan

²⁰ Cavuya cachja nga xu Jesús cuitjin:

—Gubiernu xi sahmi Nina ne, ¿mé xi tangun cojo? ²¹ Tangun cojo san rë pan xi visecjan ngu chjuun ngajñi rë nahyu rë pan cojo sa xi sahmixa ngajñi rë yëjë ni nahyucjin jan. —Cuatjin xu cachja Jesús.

Ejemplu tsëhë tingotjo xcu

²² Ndiya cjuí xu Jesús ngajan Jerusalén ne, cavatju xu me nandya cojo ranchun xi siu ndiya cjuí me jan, hane cachja me cojo xuta cjua rë Nina. ²³ Hya xi camá ne, cavinenguise xu ngu me xi cavinenguise rë Jesús cuitjin: —Tatá. ¿Há jemu chúva xuta xi tivetjutje me? —Cuatjin xu cavinenguise xuta jan.

Sehe ngajan xi Jesús ne, cachja xu me cojo xuta xi siu jan cuitjin:

²⁴ —Nihñu ngahñu xi cuma cuisuhun hiscan sahmi Nina gobiernu táha tingotjo xi xcu ta, tsëhë xi nguehe cuichjá cojo nuju ta cuechú nixtin xi jemu cjin xuta xi cuma meje cuisehen me jan, peru cumaji. ²⁵ Ta hya xi ngahan xi nai rë cahndë vëhë ngahan, cuinduva cuéchja tingotjo ne, ngayun ne, cuinechun candatsen, sehe cjunntsun tingotjo jan hacuaha cuitjin cuinújun: “Tatá. Chuxuhun tingotjo tsijin.” Cuatjin cuinújun. Hane xi cjuayanguë tsujun ne, cuitjin cuichjá: “Hveen jani canduvun ngayun.” Cuatjin cuichjá cojo nuju. ²⁶ Hane ngayun ne, cuitjin cuinújun nga: “Cachini cahyin tangun cojo nuju, hacuaha nangui niji canuyuhunyun cavicyun cjua rë Nina.” Cuatjin cuinújun. ²⁷ Hane cuitjin cuichjá nga cojo nuju: “Hveen jani nandya nuju. Tángunxun tsahan, ngayujun ni ngayun xuta sahmi cjuatsehen.” Cuatjin cuichjá. ²⁸ Ngajan ni ne, jemu chjihndun hacuaha nijanurii nehñu, hya xi chutsujun Abraham cojo Isaac cojo Jacob, cojo yëjë profeta xi siu me ngajan hiscan xi sahmi Nina gobiernu, peru ngayun ne, caviyujú nuju candatsen. ²⁹ Hane cuinduva xuta tsëhë táha ladu vetjucaa tsuhi cojo táha ladu vetje tsuhi cojo yëjë sa ladu, cuinduva me sinë tangun me hiscan xi sahmi Nina gobiernu. ³⁰ Nguehe cuichjá cojo nuju ta yahnga xuta xi tjengui me quihndë ne, me vëhë cuma titjun me, hane yahnga me xi titjun quihndë ne, me vëhë cuma tjengui me hya xi cuejña Nina gobiernu rë me jan. —Cuatjin xu cachja Jesús.

Jemu choho camá rë Jesucristu ngatsë rë xuta Jerusalén

³¹ Ha hora vëhë ni ne, cafehe xu ngujo cha fariseo, hane cuitjin xu cachja cha cojo Jesús:

—Ndatjin xi tetjunxun tsëhë nguehe ta, tsëhë xi Herodes ne, meje tsiquehen nuju me. —Cuatjin xu cachja cha xi cuacun jan.

³² Hane ngajan xi Jesús ne, cuitjin cafayangui xu me:

—Tángun ne tinújun cojo rë chu ninda vë cuitjin: “Chutsujun ni, quihndë cojo nchujun ni ne, cuáxëxen xitsehen hacuaha sahme xi cuma ndaja xuta hmu rë, hane nguini ne, tsingujnetaha xá xi tisahme.” Cuatjin tinújun. ³³ Peru hacuaha sahmi ná nguyë xi cjuë sa quihndë nchujun ni cojo nguini hisca xi cjuëhë hiscan xi tifë ta, tsëhë xi profeta ngahan, hane ngu profeta ne, cumaji xi cueya jingusa nandya xi hacuini nandya Jerusalén.

³⁴ ¡Ngayun xuta Jerusalén, ngayun xi cojo ndyojo nicuhun profeta xi tsingatju Nina ngajñi nuju! ¡Jemu choho má ná! ¡Mé hitsë ndiya xi meje

scávëvaha nuju sacuaaha javëvaha ngu nisë quihndi rë chu xi cuincha chu ngahma tyjunga rë chu, peru ngayun ne, mijí nuju!³⁵ Chutsujun ni, Nina ne, catsismicacun me ngayun. Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingatju me ngajñi naja!” —Cuatjin xu cachja Jesús.

14

Casahmi Jesucristu xi camandaja cha xi yaha rë chhinsquee

¹ Cuitjin camá xu ngu nixtin xi chjahájenda rë hya xi quiji cajinë Jesús niñu ndava ngu cha xi matitjun ngajñi rë cha fariseo. Xi cafehe Jesús jan ne, cha xi siu jan ne, siu tifahachuva xu ni cha Jesús. ² Hacuaha hiscan tacun Jesús ne, ngajan xu tacun ngu cha xi yaha rë chhinsquee. ³ Ngajan xi Jesús ne, cavinenguise xu rë me cha xi vicuya cjuachacun cojo cha fariseo cuitjin:

—¿Há tjin cahndë nixtin xi chjahájenda rë xi nihña xi cumandaja xuta, o há tsajin cahndë? —Cuatjin xu cavinenguise Jesús.

⁴ Hane cha xi cuacun jan ne, tu caviyujuyuu xu ni cha. Hya xi camá ne, cafaha xu Jesús cha hmu rë jan, hane casahmi me xi camandaja cha, sehe catsingatju me cha cafe cha. ⁵ Sehe cavinenguise xu me cha xi siu jan cuitjin:

—¿Há tjin ngu ngayun xi nixtin xi chjahájenda rë ne, cuanguun marcu macjain naxun quihndi nuju o sá ndyaja nuju sá xi cjuinenguíya ngu ndava nandá xi jemu nungun? —Cuatjin xu cavinenguise me.

⁶ Hane cha xi cuacun jan ne, camaji cafayangui xu cha hisca xi ngu cjua xi meje rë Jesús.

Meje rë xi ninguijne yojo naja

⁷ Hya xi camá ne, tsëhë xi vutsejen xu Jesús xi xuta xi cachjindaya rë tsëhë suhi jan ne, tivaxijin me cahndë xi matitjun ngajan xcun maxë ne, vëhë xi cachja xu me cojo xuta jan cuitjin:

⁸ —Hya xi chjindaya nuju cuangun xinu ngu comida ne, xicachjuun cahndë xi matitjun ngajan xcun maxë ta sá tu hacuaha cachjindaya rë ngu me xi hitsë sa meje rë xi chjahárcun rë xi cuma nuju ngayun. ⁹ Hane cuinduva me xi cajindaya nuju catsijotjun ni ne, cuichja me cojo nuju cuitjin: “Tuhun rë me vihi cahndë nuju vë.” Cuatjin cuichja me cojo nuju. Ngajan xi ngayun ne, cojo jyë cjuasava ne, cuangun chjuhun cahndë xi ma tjengui. ¹⁰ Xi meje rë ne, hya xi cuatjin chjindaya nuju ne, tángun chjuhun cahndë xi ma tjengui, cojo sa xi hya xi cuinduva me xi cajindaya nuju ne, cuichja me cojo nuju cuitjin: “Ngayun ne, nduvun chjuhun ngu cahndë xi hitsë sa matitjun.” Cuatjin cuichja me. Ngajan xi ngayun ne, jercu sahmi jyë sahmi hnga nuju me ngajñi rë yëjë xuta xi siu jan. ¹¹ Cuatjin cuma ta, tsëhë xi yëjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi yehe rë me.

¹² Hacuaha cachja nga xu Jesús cuitjin cojo me xi cajindaya rë me:

—Hya xi nihñu ngu suhi ne, xicachjindayuun rë amigu nuju, xicachjin-dayuun rë xingun, hacuaha xicachjindayuun rë xuta nchina xi siu tahndee ndya nuju, sá tu hacuaha squindaya nuju me xi cuangun ndava suhi rë me, hane cojo vëhë ni ne, ha camangojo cjuandaja nuju. ¹³ Cahndë rë vëhë ne, hya xi nihñu ngu suhi ne, chjindayun rë xuta yuma, chjindayun rë xuta xi yoho me, chjindayun rë xuta rengun, hacuaha chjindayun rë xuta rcá. ¹⁴ Sá xi cuatjin nihñu ne, jemu ndaja tsujun ta, tsëhë xi xuta xi cuacun vë ne, tsajin

rë me mé cojo sahmíngojo me cjuandaja nuju. Peru Nina sahmíngojo me tsujun hya xi tsicuya me cjuahñu xuta xi tsajin jyë rë. —Cuatjin xu cachja Jesús.

Ejemplu tsëhë ngu suhi jyë

¹⁵ Hane xi cahndë xu ngu cha xi cojo tijinë jan cjua xi cachja Jesús ne, cuitjin xu cachja cha cojo rë me:

—Jemu ndaja tsëhë xuta xi sinë me niñu hiscan xi sahmi Nina gobiernu! —Cuatjin xu cachja cha.

¹⁶ Ngajan xi Jesús ne, casuacuenda xu me cha ngu ejemplu vihi:

—Cuejña ne xi ngu cha jan ne, casahmi cha ngu suhi jyë, hacuaha jemu cjin xuta cajindaya rë cha me. ¹⁷ Xi casune hora xi sinë cha cojo xuta ne, sehe catsingatju cha hndixahan rë cha ndava xuta xi ha cachja cha cojo xi cuichja hndixahan jan cojo rë xuta cjua vihi: “¿Há cuangun xu ta, ha tjin chjine yëjë ni?” Cuatjin cachja hndixahan jan. ¹⁸ Hya xi camá ne, cavetsihin jima ngu me cachja me mé tsëhë xi cumaji cjue me. Hane me xi tjtun ne, cuitjin cachja me cojo hndixahan jan: “Ngu rquí nangui cavátsë ne, sahmi ná ngu yëjë xi cjuë scutséjen. Vëhë xi cumaji cjuë ndava suhi.” Cuatjin cachja me.

¹⁹ Hane ngu nga me ne, cuitjin cachja me: “Cavátsë hñu ninchin ndyaja, hane cjuë cjuaháchuva chu. Vëhë xi cumaji cjuë ndava suhi.” Cuatjin cachja me.

²⁰ Hane ngu nga me ne, cuitjin cachja me: “Cumaji cjuë ta, tsëhë xi ngahan ne, ha cavíxan.” Cuatjin cachja me. ²¹ Hya xi camá ne, hndixahan jan ne, quiji cachja cojo nai rë cjua xi cachja xuta xi cuacun jan. Hane xi camacjan rë nai rë ndihya jan ne, cuitjin cachja cha cojo hndixahan rë cha: “Tetji ne, tihin sanii ngajan ndiyatë cojo ndiyahndë tsëhë ngajñi nandya ne, chjindaye rë xuta yuma cojo xuta yoho cojo xuta rcá cojo xuta rengun ne, ndovecueje me.” Cuatjin cachja cha. ²² Hane xi cavuya hndixahan jan ne, cuitjin cachja: “Tatá. Camá tutjin xi cavitexun ná, peru tjin sa cahndë.” Cuatjin cachja hndixahan jan. ²³ Ngajan xi cachja nga nai rë hndixahan jan cojo rë cuitjin: “Tihin nga hisca ndiya nguijña, hane nihñi rë xuta ngu yëjë ndovecueje me, cojo sa xi catitsë rë ndya naha. ²⁴ Nguehe cuichjá cojo ri ta hisca xi ngu me xi cajindáya rë tjun tjun ne, satiin rë me sinë me tsëhë suhi xi tisahme.” Cuatjin cachja nai rë hndixahan jan. —Vëhë cajnetaha xu ejemplu xi casuacuenda Jesús.

Meje rë xi nihña cuenta há scaa naja cuiseen ladu rë Jesucristu

²⁵ Ngajan xi hya xi quiji sa xu Jesús ndiya rë me xi cjui me Jerusalén ne, jemu cjin camahani xuta cjui me cojo rë me. Hane xi cavuya me cavutsejen me xutacjin jan ne, cuitjin xu cachja me:

²⁶ —Sá xi tjin ngu ngayun xi meje cuinduvuntjengun ná matsejen ne, meje rë xi hitsë sa nihmutacún ná ngahan xi cuma rë xi nihmutacún nahmi nuju, naa nuju, chjuun nuju, quihndi nuju, xingun, hisca cojo yojo nuju suvun. Sá tsajin ne, cumaji cuma ngayun ngu xuta ladu naha. ²⁷ Jarë ngayun xi nduvuntjengun ná matsejen ne, sá xi cuejñuhñuun xahasen nuju xi cuanguncujun ndiya naha handasa hisca cueyun xcun cru matsejen ne, cumaji cuma ngayun ngu xuta ladu naha. ²⁸ Ha hyan matsejen ta hya xi ngu xuta meje sahmi me ngu ndihya jyë ne, titjun sahmi me cuenta rë me, há chutaha tujún rë me hisca xi tsinguijnetaha me sahmi me ndihya. ²⁹ Cuatjin sahmi me cuenta rë me matsejen ta sá tsajin ne, sá xi ngutjen sahmi me xihndënaña rë hane cumaji tsinguijnetaha me sahmi me ndihya matsejen ne, yëjë ni xuta xi scuëë me matsejen ne, jemu cuejñucëë me me.

³⁰ Cuitjin cuichja me: “Cha xi cavetsihin casahmi ngu ndihya jyë vi ne, camaji catsinguijnetaha cha casahmi cha.” Cuatjin cuichja xuta. ³¹ Hacuaha ha hyan matsejen ta hya xi ngu me xi matitjun cjue sahmi me ngu si jyë cojo jingu sa me xi matitjun xi condra rë me matsejen ne, titjun tsingataha cacun ndaja me, çhá scaa rë me cojo të mil xuta rë me xi sahmi me si cojo condra rë me xi ticojo can mil xuta rë? ³² Sá xi vutsejen me ta scaain rë me matsejen ne, jinguyëjë rë xi cjin sa nduva condra rë me matsejen ne, tsingatju me ngujo xuta xi tsinguijnehnchan cjua. ³³ Vëhë xi ngayujun ni matsejen ne, meje rë xi cuatjin titjun ndaja ningatuhuntacún çhá scaa nuju, há scaain nuju? matsejen ta, tséhë xi yëjë ni ngayun xi nismutacuun yëjë ni xcusun xi tjin nuju matsejen ne, cumaji cuma ngayun xuta ladu naha. Cuatjin xu cachja Jesús.

Yo xi hacuain ndaja tjengui rë Jesús ne, tangun cojo naxa xi fë xtya rë

³⁴ Hacuaha cachja sa xu Jesús cojo xutacjín jan cuitjin:

—Ngayejen ni matsejen ne, ha hyan matsejen ta naxa matsejen ne, ndaja. Peru sá xi cjuë xtya rë matsejen ne, çhacutjin cuma xincha nga tutju rë ni? ³⁵ Ha quihndë tsajin mé cumachjirëhë. Cumaji nicojonxan sacuaha nihndë, hacuaha cumaji nicojonxan sacuaha abono. Chjahá rë cuixu candatsen. Yo ngayun xi tjin nuju cjuasua xi cuinuhyun cjua naha matsejen ne, ndaja tinuhyun. —Cuatjin xu cachja Jesús.

15

Ejemplu tséhë chu tsánga xi cachajá

¹ Ngundiya jan ne, jemu cjín xu cha faha tujúnsa cojo xuta tsehen xi yahnga jan quiji casahmi tiña me tséhë Jesús, xi meje cuisñuju me cjua xi cuichja Jesús. ² Hane cha fariseo cojo cha xi vicuya cjuachacun ne, cachjahma xu cha cojo xicjin cha cuitjin:

—Cha xi cuijyihí vi ne, tsingatihin cha visiajmi cha cojo xuta tsehen hacuaha jinëtangun cha cojo me. —Cuatjin xu cachjahma cha.

³ Sehe ngajan xi Jesús ne, cachja xu me ngu ejemplu cojo cha xi cuacun vë cuitjin:

⁴ —Cuejña ne xi ngu ngayun tjin nuju ngu cientu chu tsánga. Hane sá xi chajá ngu chu tsujun ne, hatuxa cuiyujuntuhun chu xi ñujuchan tyjuhunñuju jan nguñña ne, sehe cuangun cuinchunsun ngu chu xi cachajá jan hisca xi sacú nuju chu. ⁵ Hane xi sacú nuju chu ne, chjuhun chu cuesuntuhun chu xi jercu ndama nuju. ⁶ Hane xi cjuhun ndya nuju ne, nihñutangun yëjë xuta xi vinga nuju cojo me xi siu tahndee ndya nuju, hane cuitjin cuinújun cojo rë me: “Cuinechan cojo ná cjuasua ta casacu ná chu tsánga naha xi cachajá.” Cuatjin cuinújun. ⁷ Nguehe cuichjá cojo nuju ta hacuaha hitsë sa jyë cjuasua cuejña ngajan ngahnga ngatsë rë ngu xuta tsehen xi tsindeya me cjuatacun rë me xi cuma rë ngatsë rë ñujuchan tyjuhunñuju xuta ndaja xi tsajin mé má tsindeya me cjuatacun rë me. Cuatjin xu cachja Jesús.

Ejemplu tséhë tujún quicha xi cachajá

⁸ Hya xi camá ne, cuitjin cachja nga xu Jesús ngu ejemplu:

—Cuejña ne xi ngu chjuun jan ne, tjin rë me të tujún quicha xi jercu hnga chji rë. Hane sá xi tsichajá me ngu ne, hatuxa cuetaha rë me ndihí, sehe cuitecha me ndihya sehe cuanguise chichihin me hisca xi sacú rë me. ⁹ Hane xi sacú rë me ne, sahmitangun me yëjë xuta xi vinga rë me cojo me xi siu tahndee ndava me ne, hane cuitjin cuichja me cojo rë me: “Cuinechan

cojo ná cjuasua ta casacu ná tujún naha xi catsichajá.” Cuatjin cuichja me. ¹⁰ Nguehe cuichjá cojo nuju ta hacuaha jemu jyë cjuasua cuiyuju ángel tsêhë Nina ngatsë rê ngu xuta tsehen xi tsindeya me cjuatacun rê me. Cuatjin xu cachja Jesús.

Ejemplu tsêhë cha xi catsismi cacun ndava nahmi rê

¹¹ Hya xi camá ne, cuitjin cachja nga xu Jesús ngu ejemplu:

—Cuejña ne xi ngu me jan ne, tjin rê me jo quihndi. ¹² Hane cavechú ngunixtin xi cha quihndi ngascan tsêhë me vihi ne, cachja cha cojo rê me cuitjin: “Papá, tsêhë yëjë ni xcusun xi satë ná hya xi cueyun ne, meje ná xi tuhun ná quihndë.” Cuatjin cachja cha. Sehe ngajan xi nahmi rê cha jan ne, cavatëcja me hacutjin xi satë rê xingu xingu quihndi rê me. ¹³ Hane hacuuiin tsëë ni jan ne, cha quihndi ngascan jan ne, xi casahmi tangun cha yëjë xcusun xi casatë rê cha jan ne, sehe cavetju cha quiji cha ngu nangui cjin. Hane xi cafehe cha jan ne, sehe cavetsihin cha tujyë catsicojo cha tujún rê cha, casahmi cha yëjë ni hacutjin xi ndama rê xahasen rê cha. ¹⁴ Hane xi café catsicojo cha tujún jan ne, hya canduva ngu jindya jyë jingujyë ni ladu vëhë. Hya cavetsihin camachaja rê cha. ¹⁵ Hya xi camá ne, cavetsihin casahmi cha xá sacuaaha mosu rê ngu me tsêhë nandya jan. Hane me vëhë catsingatju me cha xi cjue sahmi cuidadu cha chu chinga rê me ngajan ranchun. ¹⁶ Hane tsêhë xi jemu vojo camahani rê cha ne, hisca meje sinë cha xi tjinë chu chinga jan, peru tsajin yo casua rê cha. ¹⁷ Hane hya xi catsingataha cacun ndaja cha në, cuitjin catsingataha cacun cha: “Yëjë mosu rê nahmi naha ne, tsajin mé machaja rê xi sinë, hane ngahan ne, tivéya jindya nguehe xi vojo ná. ¹⁸ Jemu sa rê ndaja ne, cúya cjuë nga ndava nahmi naha, hane cuitjin cuichjá cojo rê me: Cahndeen tsêhë Nina hacuaha cahndeen tsujun. ¹⁹ Ha quihndë vechiin chuva rê xi cuitejña cojo nuju sacuaaha quihndi nuju. Nihñucueundun sacuaaha xi mosu nuju ngahan quihndë xi cavúya.” Cuatjin catsingataha cacun cha. ²⁰ Hya xi camá ne, sehe cavuya cafe cha nangui rê cha xi cjue cha ndava nahmi rê cha.

‘Peru cjin sa cjui cha tsêhë ndava nahmi rê cha ne, cavëë nahmi rê cha xi nduva cha, hane jemu camayuma rê me cha. Sehe vanga me quijitjengui me cha, catsuvacja me cha hisca cavitatsuha me cha. ²¹ Sehe ngajan xi cavetsihin cachja cha cojo nahmi rê cha cuitjin: “Papá, cahndeen tsêhë Nina hacuaha cahndeen tsujun. Ha quihndë vechiin chuva rê xi cuitejña cojo nuju sacuaaha quihndi nuju.” Cuatjin cavetsihin cachja cha. ²² Peru nahmi rê cha ne, cachja me cuitjin cojo ngujo hndixahan rê me: “Tángunsanii, tángun chjuhun ngu tsjian xi tsjian ndaja jan ne, sehe nduvun nicujún cha quihndi naha vi. Hacuaha nduvuncujun ngu xtungun sehe teyun rcutsja cha, hacuaha nduvuncujun chuxinxhtë xi cuinchun ntsacu cha. ²³ Xi camá vëhë ne, sehe tángun chjuhun ngu ndyaja xi ndaja hñu cacun chu cueya chu xinëë chu. Nihña ngu suhi, tahan cjuasua xahasen naja ta, ²⁴ tsêhë xi cha quihndi naha vi ne, sacuaaha xi cahme cha hane sehe cavuya cha cjuahñu, sacuaaha xi cachajá cha hane sehe casacu nga cha.” Cuatjin cachja nahmi rê cha. Hya xi camá ne, sehe cavetsihin casahmi me suhi.

²⁵ ‘Peru cha quihndi tjun rê me vihi ne, tsajin cha ta nguijña quiji cha. Hane xi camatiña cha tsêhë ndava cha xi cavuya cha xi quiji cha nguijña ne, cahndë cha xi fane tyjó ndava cha hacuaha titë xuta. ²⁶ Hya xi camá ne, sehe cajindaya cha ngu cha hndixahan rê nahmi rê cha, sehe cavinenguise cha mé jima jan. ²⁷ Hane cha hndixahan jan ne, cuitjin cafayangui cha: “Cha tshun cavuya cha. Hane hacuaha cavitexa nahmi nuju xi cahme ngu

ndyaja xi ndaja hñu cacun xi cuma suhi, tsëhë xi cavuya cafahatsja nga me xingun cojo ngu cjuahñu ndajyihî.” Cuatjin cafayangui hndixahan jan. ²⁸ Peru cha quihndi tjun jan ne, jemu camacjan rë cha, hisca ndihya miji cuisehen cha. Hane xi cavetju nahmi rë cha ne, jercu cjin cachja me cojo cha xi cuisehen cha ndihya. ²⁹ Ngajan xi cha vëhë ne, cuitjin cafayangui cha tsëhë nahmi rë cha: “Chutsujun ni, ngahan ne, ha jemu tsëë nduva nixtin xi tivisécoo nuju, hacuaha tsajin ngu cjua xi cahndeen tsujun xi canújun. Peru ngahan ne, hisca ngu tentsun catuun chu xi cueya chu xi sahme ngu suhi cojo amigu naha. ³⁰ Peru quihndë xi cafehe cha quihndi nuju vë xi tu ngajan quiji catsicjë cha cjuanchina nuju cojo yachjin tsehen jan ne, canicuhun ngu ndyaja hñu cacun xi xinu cojo cha.” Cuatjin cafayangui cha. ³¹ Hya xi camá ne, cuitjin cachja nga nahmi rë cha: “Ngaye tsan xi nchunchujun ni nechin cojo ná ne, yëjë ni xi tsahan ne, hacuaha tsiji. ³² Ndatjin xi nihña ngu suhi cuitjin, cuinechan cjuasua ta, cha tsajan vi ne, sacuaha xi cahme cha peru cavuya cha cjuahñu, sacuaha xi cachajá cha peru casacu nga cha.” Cuatjin cachja nahmi rë cha. Vëhë xu ejemplu xi cachja Jesús cojo cha fariseo cojo cha xi vicuya cjuachacun.

16

Ejemplu tsëhë cha xi matitjun tsëhë xa xi cuaintin casahmi

¹ Hacuaha cachja nga xu Jesús cojo xuta ladu rë me ngu ejemplu cuitjin:

—Cuejña ne xi cavéjña ngu xuta nchina xi hacuaha tjin rë me ngu cha xi matitjun tsëhë yëjë ni xa rë me. Hane cha xi matitjun tsëhë xa jan ne, cavinchajyë ngu xi cavinchajyë rë cha cojo me xi tsëhë xa tsëhë xi jemu catsicojo cha tujún rë me xi matsijin mé casahmi cha cojo. ² Hane xi cajindaya me xi tsëhë xa jan cha ne, sehe cachja me cojo cha cuitjin: “Ngaye ne, cafahántsa ngu jyë riji. Quihndë ne, nihñi ná entregadu cuenta tsëhë xa xi tacun ntse ta, ngaye ne, ha quihndë cumaji cuihinnduju cojo xa xi nechintehe.” Cuatjin cachja me. ³ Sehe ngajan xi cha xi matitjun tsëhë xa jan ne, cuitjin catsingataha cacun cha: “¿Mé xi ndatjin sahme quihndë xi tivaxëxin ná nai naha tsëhë xa xi tejñataha? Ngahan ne, maji sahme xa xi hai. Hacuaha sava ná cjuë cjuéhya caridad. ⁴ Haan, ha hvë mé xi sahme cojo sa xi cjuahatsja ná xuta ndava me hya xi cuétjuxen tsëhë xa xi tejñataha.” Cuatjin catsingataha cacun cha. ⁵ Hya xi camá ne, cajindaya cha chuva ngu chuva ngu xuta xi quitjen tsëhë nai rë cha. Hane cuitjin cachja cha cojo ngu me: “Ngayun ne, ¿hacutjin quitjun tsëhë nai naha?” Cuatjin cachja cha. ⁶ Sehe ngajan xi me xi quitjen jan ne, cuitjin cafayangui me: “Ngu cientu tonel tsëhë aceíte.” Cuatjin cafayangui me. Hane cha xi matitjun tsëhë xa jan ne, cuitjin cachja cha cojo rë me: “Juhun xujun tsëhë cuenta nuju vi ne, tinechun sanii, nihñu sa ngu, hane tetuhun yachantë ni.” Cuatjin cachja cha. ⁷ Hya xi camá ne, cachja nga cha cojo ngu nga me cuitjin: “Ngayun ne, ¿há cjin quitjun tsëhë nai naha?” Cuatjin cachja cha. Hane cuitjin cafayangui me xi quitjen jan: “Ngu cientu xutsu trigu.” Cuatjin cafayangui me. Hane cha xi matitjun tsëhë xa jan ne, cuitjin cachja cha: “Juhun xujun tsëhë cuenta nuju vi ne, nihñu sa ngu, hane tetuhun ñujuchan ni.” Cuatjin cachja cha. ⁸ Ngajan xi xuta nchina xi nai rë xa jan ne, cavaxëndaja me cha tsehen xi matitjun tsëhë xa ngatsë rë xi jemu quicun cacun cha xi cuatjin casahmi cha. Hitsë sa quicun cacun xuta tsehen cojo ngasunhndë rë me, xi cuma rë xuta xi fitjengui me ndiya rë Nina.

⁹ Nguehe cuichjá cojo nuju ngayun xuta ladu naha ta hacuaha meje rë xi chjuhun tujún nuju, handasa hatuxa tsehen ta tsêhë xi tsêhë ngasunhndë, hane nicujunxun, cojo sa xi cuinga rë xuta ngayun. Cuatjin nihñu cojo sa xi hya xi cuechú nixtin xi cueyun hacuaha ha quihndë cumachjiriin nuju tujún ne, cjuahatsja nuju Nina ngajan hiscan xi cünechan cojo rë me yëjë nu yëjë nixtin.

¹⁰ Yo xi tjin rë cjuaquixi xi ndaja sahmi ngu xa xi chúva ne, hacuaha hatuxa tjin rë cjuaquixi xi ndaja sahmi ngu xa xi jyë. Hacuaha yo xi vindacha hya xi sahmi ngu xa xi chúva ne, hacuaha hatuxa vindacha hya xi sahmi ngu xa xi jyë. ¹¹ Vêhë xi ngayun ne, sá xi vindachun hya xi nicujunxun tujún tsehen xi tsêhë ngasunhndë ne, hatuxa cuejñaai Nina ntsun cjuanchina xi cjuaquixi, xi tsêhë me. ¹² Hacuaha sa xi vindachun hya xi nicujunxun cjuanchina tsêhë jingu sa ne, Nina ne, hatuxa suaain nuju me cjuanchina xi cuma tsujun suvun.

¹³ Tsajin ngu hndixahan xi ma fahacuenda xa tsêhë jo nai rë xa ta, tsêhë xi choho scuëë rë ngu nai rë hane tsihmu cacun nai rë xi majo jan. O sá tsajin ne, jemu cuetaha yojo rë cojo ngu nai rë, hane nai rë xi majo jan ne, hisca sahmicuendaain rë. Vêhë xi xi ngu ñahñu ni ne, maji nihñu hacutjin xi meje rë Nina cojo hacutjin meje rë cjuanchina tsehen xi tsêhë ngasunhndë. Cuatjin xu cachja Jesús cojo xuta ladu rë me.

¹⁴ Cha fariseo, xi hacuaha jemu chuya rë cha tsêhë tujún ne, cahndë xu cha yëjë cjuaxi cachja Jesús cojo xuta ladu rë me jan. Hane cavejnucëë cha Jesús.

¹⁵ Ngajan xi Jesús ne, cachja xu me cojo cha cuitjin:

—Ngayun xi nújun cojo xuta xi jemu ndaja xuta ngayun, peru Nina ne, vëë me cjuatacun xi jiya cahntsua xahasen nuju. Hane cjuatacun xi sahmi yehe sahmi hnga xuta ne, Nina ne, chuyiin camahani rë me tsêhë.

Cumaji chjaháxin rë hisca ngu cjuaxi tsêhë ley rë Nina

¹⁶ Hya xi chaja sa tsujyihya Juan Vitenda Xuta ne, yëjë xuta ne, casacu camachaya rë me cjuaxi rë Nina ngatsë rë ley xi cavejña Nina tsja Moisés, cojo ngatsë rë profeta xi hacuaha cachja me cjuaxi rë Nina. Hisca nixtin rë Juan ne, hisca quihndë ne, tisuá ngahan tijimachaya rë xuta cjuandajyihy xi chja xi Nina ne, sahmi me gobiernu. Hane yëjë ni xuta ne, meje cuisehen me hiscan sahmi Nina gobiernu, handasa cojo cjuachan.

¹⁷ Ngahnga cojo nangui ne, hitsë sa chjaain cjuë xi cuma rë xi chjaháxin rë ngu cjuaxi tsêhë ley rë Nina.

Jyë rë xuta xi tsismi chjuun rë sehe cuixan cojo jingu sa chjuun

¹⁸ Ngu xuta xi tsismi me chjuun rë me sehe cuixan me cojo jingu sa chjuun ne, tangun me cojo ngu xi sahmi cjuatsehen cojo ngu chjuun xi hacuiin chjuun rë. Hacuaha yo xi cuixan cojo ngu chjuun xi xihin rë na ne, catsismi cha na ne, tangun cojo ngu xi sahmi cjuatsehen cojo ngu chjuun xi hacuiin chjuun rë.

Ejemplu tsêhë cha nchina cojo cha yuma xi hmí rë Lázaro

¹⁹ Cuejña ne xi cavéjña ngu cha xi jemu nchina, xi jercu ndaja camahani tsjian vajá. Nchunchujun ni ne, jemu ndajyihy suhi sahmi cha. ²⁰ Hacuaha cavéjña ngu xuma cha yuma xi hmí rë Lázaro, xi jingujyë ni yojo rë cha camatsë. Hane jiña cha ngajan tingotjo ndava cha nchina jan. ²¹ Hane hacuaha cojo cha yuma jan jemu meje sinë cha hitsë xi vangui jinë cha nchina jan. Hatuxa jemu choho vatju cha má, hisca vinduva naña chimajnu chu tsë xi yaja rë cha. ²² Hya xi camá ne, xi cahme xuma cha yuma jan ne, quijicojo ángel hasen rë cha ngajan cahndë ndajyihy, cavéjña tangun cojo

hasen rē nima Abraham. Hane cha nchina jan ne, hacuaha cahme cha, hane caseyaniji cha.

²³ 'Hane hya xi jiya hasen rē cha nchina jan cahndē hiscan xi fi hasen rē nima ne, jercu tivatju cjuañihi. Hane xi cavuya cavutsejenniji hasen rē cha ne, cavēē rē hasen rē nima Abraham tsēhē cjin ni, hacuaha cavēē rē hasen rē nima Lázaro, tacun tangun cojo hasen rē nima Abraham. ²⁴ Hya xi camá ne, cajindaya hasen rē cha nchina jan tsēhē hasen rē nima Abraham, cuitjin cachja: "Tatá Abraham, catamayuma nuju ngahan ne, tinújun cojo cha Lázaro vē ne, catitsicahnchi cha rcutsja cha cojo nandá, sehe ningatjun cha catinduva catitsinguijnehnchan cha hitsē neje ta, tsēhē xi jercu má camahani ná cojo ndihi vi." Cuatjin cachja hasen rē cha nchina jan. ²⁵ Peru hasen rē nima Abraham ne, cuitjin cafayangui: "Ninguitsjin tsan ta xcun cjuahñu riji ne, jemu ndaja cavatji camá, hane xuma cha Lázaro vi ne, jemu choho cavatju cha camá. Peru quihndē ne, tisacu rē cha cjuetacun nguehe, hane ngaye ne, tivatji cjuañihi. ²⁶ Hacuaha tjin sa ngu cjuá xi cuichjá cojo ri: Nina ne, caveña me ngu xanga jyē xi jiyavasen tsēhē hiscan xi nechintihin ngayin cojo tsēhē hiscan xi nechintehe ngaye, cojo sa xi yo ngayin xi meje cuatjin xi cuinduvín ndyá ne, cumaji, hacuaha yo ngayun xi meje cuatjun cuinduvun nguehe ne, hacuaha cumaji." Cuatjin cafayangui hasen rē nima Abraham. ²⁷ Sehe ngajan xi hasen rē cha nchina jan ne, cuitjin cachja: "Tatá, nihñu favor ne, ningatjun cha Lázaro ngajan ndava nahmi naha, ²⁸ cojo sa xi sua cha cumachaya rē catsihñú xingueen xi siu jan, cojo sa xi hacuini cojo cha cuechú cha cahndē vihi hiscan xi tacun cjuañihi xi tivatjin tijima." Cuatjin cachja hasen rē cha nchina. ²⁹ Hane hasen rē nima Abraham ne, cuitjin cachja: "Peru cha xi cuacun vē ne, cuma cuisñuju cha cjuá xi ha catsihindu Moisés cojo cjuá xi ha catsihindu profeta hatsēē nixtin. Vēhē catetaharcu cha." Cuatjin cachja hasen rē nima Abraham. ³⁰ Ngajan xi hasen rē cha nchina jan ne, cuitjin cafayangui: "Tatá Abraham, cumaji xi cojo cjuá vēhē ni. Peru sá xi yo cuetju tsēhē ngajñi rē nima xi cjue cuichja cojo cha ne, ngayin xi tsindeya cha cjuatacun rē cha." Cuatjin cafayangui hasen rē cha nchina jan. ³¹ Peru hasen rē nima Abraham ne, cuitjin cachja: "Sá xi mijí cuihndē cha tsēhē cjuá xi catsihindu Moisés cojo cjuá xi catsihindu profeta ne, hacuanitjin ni cumacjaain rē cha, handasa ngu nima cuya cjuahñu, cjue cuichja cojo rē cha." Cuatjin cachja hasen rē nima Abraham. Cuatjin xu fi cjuá xi cachja Jesús cojo cha fariseo cojo xuta ladu rē me.

17

Miji rē xi nihña xi tsismicacun ngu xuta ndiya rē Nina

¹ Ngu nixtin jan ne, hacuaha cachja xu Jesús cojo xuta ladu rē me cuitjin: —Hatuxa cuinduva xcusun xi meje sahmi xi nismetacuun ndiya rē Nina, peru jemu chojihi tsēhē xuta xi nduvacojo xcusun vēhē. ² Hitsē sa ndaja tsēhē xuta vēhē xi xtyangui ngu ndyojo natsi nguisin me sehe ningatjenja rē me ngajñi ndachacun, xi cuma rē xi sahmi me xi ngu xuta ladu naha tsismicacun me ndiya rē Nina.

³ 'Nechun cuidadu tsēhē xcusun xi nihñu. Sá xi ngu xingun choho sahmi cojo nuju ne, tinújuntuhun rē. Hane sá xi tsindeya cjuatacun rē ne, ninchatuhun rē. ⁴ Hane sá xi hisca yatu ndiya choho sahmi cojo nuju ngu nixtin, hane hacuaha jima ngu ndiya vēhē cjue cuichja cojo nuju xi tsindeya cjuatacun rē ne, ninchatuhun rē. —Cuatjin xu cachja Jesús.

Cuma cuinuhyan tsêhê Nai naja sá xi mangutacuun ndastu hitsê cojo rê me

⁵Ngajan xi apóstol ne, cuitjin xu cachja me cojo Nai naja:

—Nihñu xi hitsê sa ndaja cumangu tacuín cojo nuju. —Cuatjin xu cachja me.

⁶Sehe ngajan xi Nai naja ne, cuitjin xu cafayangui me:

—Sá xi mangutacún cojo ná ndastu hitsê ne, hacuaha cuma cuinújun cojo ya vihi catjixin tsêhê cahndé hiscan secun, hane catji catiseacun ngajan ngajñi ndachacun, hane hacuaha cuihndé tsujun.

Hacutjin meje rê xi sahmi hndixahan cojo nai rê

⁷Cuejña ne xi ngu ngayun ne, tjin nuju ngu hndixahan xi vacjan nangui tsujun o sá xi sahmi cuidadu rê chu nuju. Hane xi cjuehe hndixahan vêhê xi quiji nguijña ne, ¿há cuinújun cojo cuitjin: “Ndove sanii ne, xini niñu”? ⁸Jéya, hacuín ta cuitjin cuinújun cojo: “Tehe chjini xi sínê, hacuaha tehe chjini yojo riji xi cuindove chani xi sínê xi cuêhê, hane xi cuijnetaha sínê ne, sehe xini sihi ngaye.” Cuatjin cuinújun. ⁹Hacuaha tuun nacuechji rê hndixahan vêhê tsêhê xi casahmi yêjê ni hacutjin xi cavitexun rê. ¹⁰Hacuanitjin nuju ngayun ta hya xi ha café canihñu yêjê ni hacutjin cavitexa nuju Nina ne, cuitjin meje rê xi ningatuhuntacún: “Ngahan ne, ngu hndixahan tujyê ni ngahan ta xi casahme ne, hacutjin xi casatêxa ná ne, vêhê ni xi casahme. Cuatjin meje rê xi ningatuhuntacún.” Vêhê xu cjua xi cachja Jesús cojo xuta ladu rê me.

Casahmi Jesucristu xi camandaja tê cha hmu rê

¹¹Hane hya xi tivatju xu Jesús vasencja tsêhê distritu Samaria cojo distritu Galilea xi cjui me ngajan Jerusalén ne, cuitjin camá. ¹²Hora xi ha cuisehen me ngu nandya jan ne, nduvatjengui xu tê cha me, cha xi yaha rê ngu xcusun chíhin vitaha xi setaha yojo naja. Hane caxinchacunhñu xu cha hitsê jan, ¹³hane tsêhê cjin ni cajindaya xu cha cachja cha cuitjin:

—¡Tatá Jesús! ¡Catamayuma nuju ngayin! ¡Nihñu xi cumandaja ngayin! —Cuatjin xu cajindaya cha cachja cha.

¹⁴Hane xi cavêê Jesús cha ne, cuitjin xu cachja me:

—Tángun hiscan xi siu nahmi, ningacun rê me yojo nuju xi tsajin mé cún ngayun. —Cuatjin xu cachja me.

Hane ndiya cjui cha ne, camandaja xu cha. ¹⁵Hya xi camá ne, xi cavêê xu ngu cha xi camandaja cha ne, cavuya quijitjengui xu cha Jesús, jindaya cha chja cha xi tisahmi jyê tisahmi hnga xu cha Nina. ¹⁶Hane xi cafehe xu cha hiscan secun Jesús ne, quiji catijaxcun cha xcun me, xi tisua cha nacuechji rê me. Cha xi cuajyihí jan ne, cha Samaria cha. ¹⁷Sehe ngajan xi Jesús ne, cuitjin xu cavinenguise me xuta ladu rê me:

—¿Hacuín yêjê tê cha xi cuicun vi xi camandaja cha ni? ¿Cha xi ñaja sa ne, jarê cha ne? ¹⁸¿Há súvá ni cha xi cuijyihí vi xi ngu xutaxín cha xi cavuya cha xi sahmi jyê sahmi hnga cha Nina ni?

¹⁹Sehe cachja xu me cojo cha xi camandaja jan cuitjin: —Tisatjunhngun, hane tjangun. Ngatsê rê xi camangutacún cojo ná ne, vêhê xi camandaja ngayun. —Cuatjin xu cachja Jesús.

Hacutjin cuma hya xi cuinduva Nina sahmi me gobiernu

²⁰Cuitjin xu camá nga ngundiya. Cha fariseo ne, cavinenguise cha Jesús janihya cuinduva Nina sahmi me gobiernu. Sehe ngajan xi Jesús ne, cuitjin xu cafayangui me tsêhê cha:

—Nina ne, hya xi cuinduva me sahmi me gobiernu ne, hacuiin titjun sua me cumachaya naja sehe cuinduva me. ²¹ Tsajin yo cuichja: “Cuajyihi Nina nguehe”, o sá: “Cuajyihi Nina ngajan”; ta Nina ne, ha tisahmi me gobiernu ngajñi nuju. —Cuatjin xu cachja me cojo cha fariseo.

²² Hya xi camá ne, cuitjin xu cachja me cojo xuta ladu rë me:

—Cuechú nixtin xi jemu cuma meje chutsujun ná ndastu ngu hora, ngahan xi Quihndi rë Xuta jain ngahan, peru cumaji. ²³ Yahnga me cuichja me cojo nuju: “Cuajyihi me nguehe”, o sá: “Cuajyihi me ngajan”; peru hacuiin cuangun cojo me, hacuiin cuanguntjengun me ta ²⁴ sacuaha sahmi hasen ndihichuhún xi ha tu ñahñu sahmi hasen rë jinguyë ni ngahnga, hisca nguehe hisca ngajan ne, cuatjin ha tu ñahñu scutsejen ná xuta tsëhé yëjë ni ladu hya xi cuechú nixtin xi cuinduva nga ngahan xi Quihndi rë Xuta Jain ngahan. ²⁵ Peru chaja sa xi cuechú nixtin vëhé ne, hatuxa meje rë xi jemu cjin cjuañihi cuátju cuma, hacuaha xuta xi siu nixtin vihi ne, tsitjungui ná me. ²⁶ Sacuatjin casahmi xuta nixtin hya xi cavéjña xutachanga naja Noé ne, hacuanitjin ni sahmi xuta hya xi ngahan cuinduva. ²⁷ Nixtin rë Noé vë ne, jinë jihvi xuta, vixan me, tsinguixan me quihndi rë me. Cuatjin sahmi cuaha me hisca nixtin xi cavisehen Noé cahntsua barcu, hacuaha casesuntë nandá, hane ngajan café yëjë xuta cahme me. ²⁸ Hacuanitjin ni xcusun vëhé casahmi xuta nixtin hya xi cavéjña ngu xutachanga xi hmí rë Lot: jinë hvi me, vatsë me, viteña me, vincha me tjë, hacuaha sahmi me ndihya. ²⁹ Peru nixtin xi cavetju Lot tsëhé nandya Sodoma ne, cavixu ndihi tsëhé ngahnga, hacuaha cavixu ndyojo xi yaha rë ndihi, sacuaha xi cavaha ngu tsihñu, hane ngajan café yëjë xuta cahme me. ³⁰ Hacuaha cuanitjin ni sahmi xuta hya xi cuinduva ngahan xi Quihndi rë Xuta Jain ngahan.

³¹ Nixtin hya ne, xuta xi hinchasan me rcu ndava me ne, mé tsëhé me xi siu cahntsua ndihya ne, miji rë xi cuitujne me cjue jaha me. Hacuaha ha chuva vëhé ni ne, xuta xi siutahá me nguijña ne, miji rë xi cuya cjue me ndava me. ³² Ninguitsjun sacuaha xcusun xi cavatju nima chjuun ré Lot. ³³ Yo xi meje cjuendujo cojo ngasunhdë rë cojo ngahñu ré suvá ne, cuechintaain cjuahñu xatsë; peru yo xi cuatju cjuañihi o hisca cueya ngatsë naha ne, vëhé xi cuechútáha cjuahñu xatsë.

³⁴ Nguehe cuichjá cojo nuju ta nguixun nixtin hya ne, jo xuta cuiyujufë tangun me ngu nachan. Ngu me ne, chjaháxin rë me, hane me xingu jan ne, cuejña me. ³⁵ Hacuaha jo nga yachjin ne, cuiyujutahá na coho na. Ngu na ne, chjaháxin rë na, hane na xingu jan ne, cuejña na. ³⁶ Hacuaha jo nga cha ne, cuiyujutahá cha nguijña. Ngu cha ne, chjaháxin rë cha, hane cha xingu jan ne, cuejña cha. —Cuatjin xu cachja Jesús.

³⁷ Hane xuta ladu rë me ne, cuitjin xu cavinenguise rë me:

—¿Hane jani cuma xcusun vëhé ni, tatá? —Cuatjin xu cavinenguise me.

Sehe ngajan xi Jesús ne, cachja xu me ngu ejemplu cuitjin:

—Hiscan jiña chu xi cahme ne, hacuaha ngajan matangun chu lote. —Cuatjin xu cachja Jesús.

18

Ejemplu tsëhé chjuun cahan cojo juez tsehen

¹ Hacuaha cachja sa xu Jesús ngu ejemplu cojo xuta ladu rë me xi sua me cumachaya rë xi meje rë xi yasen ni ne, sahmi me oración rë me, miji rë xi sahmi chúva cacun me. ² Cuitjin xu cachja me:

—Cuejña ne xi ngu nandya jan ne, tjin ngu juez xi tsacjuuin rē Nina hacuaha faharcuaain rē xuta. ³ Hacuaha nandya jan ne, tacun ngu chjuun cahan. Hane nchunchujun ni quiji na xcun juez jan ne, cachja na cuitjin: “Meje ná xi nihñucundun jyě xi vincha xuta tsahan.” Cuatjin cachja na. ⁴ Peru juez jan ne, jemu jyě nixtin xi mijí sahmicuenda me tsēhē na. Peru xi camá ngascan ne, cuitjin catsingataha cacun me: “Handasa tsacjuun Nina hacuaha faharcuun xuta ne, ⁵ peru ngatsē rē xi jemu tisuaxti na cahan vi ngahan ne, vėhē xi cjuahácuenda cjuacjintacun rē na, sá tsajin ne, jemu tsijenda na ngahan xi ngajan cjui ngajan nduva na.” Cuatjin xu catsingataha cacun me.

⁶ Sehe ngajan xi Nai naja ne, cachja sa xu me cuitjin:

—Chutsujun hacutjin chja juez tsehen vė. ⁷ Nina ne, ¿hacuiin hatuxa cjuahacuenda me cjuacjintacun rē xuta xi cavaxijin me, xi nguixun nguítajñu fehya rē me xi cjuahacuenda me tsēhē? ¿Há jemu cuindeya cjuahacuenda me? ⁸ Nguehe cuichjá cojo nuju ta Nina ne, ngutjen ni cjuahacuenda me. Peru hya xi cuinduva nga ngahan xi Quihndi rē Xuta Jain ngahan ne, ¿há tjin xuta xi mangucacun cojo ná nguehe ngasunhndē? —Cuatjin xu cachja Nai naja.

Ejemplu tsēhē oración rē cha fariseo cojo oración rē cha faha tujúnsa

⁹ Hacuaha siu sa xu ngujo xuta xi tsingataha cacun suvá me xi tsajin jyě rē me xcun Nina hacuaha sahmi xta me cojo xuta xi yahnga. Hane xuta xi cuacun vė ne, cuitjin xu cachja Jesús ngu ejemplu cojo rē me:

¹⁰ —Cuejña ne xi jo cha jan ne, quiji cha yungun xi matitjun xi sahmi cha oración rē cha. Ngu cha ne, cha fariseo cha, hane cha xingu ne, cha faha tujúnsa cha. ¹¹ Cha fariseo jan ne, cavisecun cha casahmi cha oración rē cha cahntsua xahasen ni rē cha, cachja cha cuitjin: “Ngayun Nina, suá nacuechji nuju ta ngahan ne, hacuiin tangun ngahan cojo jingu sa cha xi ndacha cha, tsehen cha, tsindesu cha cojo jingu sa chjuun, hacuaha hisca tanguaain ngahan cojo cha faha tujúnsa vi. ¹² Sahme xun naha jo ndiya xi ngu totje, hacuaha vátēcja tē cahndē tsēhē yějē ni xi sacu ná, hane suá nuju ngu cahndē.” Cuatjin casahmi cha fariseo oración rē cha. ¹³ Peru cha faha tujúnsa ne, hitsē ni cjin secun cha, hacuaha hisca cavuyaain cavutsejen cha ngahnga ta tu cavisanetsja ni cha rcu cha, cachja cha cuitjin: “Ngayun Nina, catamayuma nuju ngahan xi jemu tjin jyě naha.” Cuatjin cachja cha. ¹⁴ Cuichjá cojo nuju ta cha faha tujúnsa jan ne, xi tu cavuya cafe cha ndava cha ne, ha café jyě rē cha xcun Nina, peru cha fariseo jan ne, hacuiin cuatjin café jyě rē cha. Cuatjin camá ta, tsēhē xi yějē xuta xi sahmi yehe suvá me yojo rē me ne, cuechú nixtin xi Nina ne, tsinguijne me cjuatacun rē. Hane xuta xi tsinguijne suvá me yojo rē me ne, Nina ne, sahmi jyě rē me. —Cuatjin xu cachja Jesús.

Catsinchacun Jesucristu nixti

¹⁵ Hacuaha cjuicojo xu xuta nixti rē me hiscan tacun Jesús xi cuisanetsja me nixti jan. Peru hya xi cavėė xu xuta ladu rē Jesús xi cuatjin cjui xuta cojo nixti rē me ne, cavatēcja xu me cjuatacun rē xuta jan. ¹⁶ Peru Jesús ne, cajindaya xu me nixti jan xi cjuetjengui rē me, sehe ngajan xi cachja xu me cojo xuta ladu rē me cuitjin:

—Tuhun rē nixti cahndē catinduva tjengui ná. Xicanichuun rē cahndē ta, tsēhē xi nixti xi cuacun ne, hatuxa visehen ngajan hiscan xi sahmi Nina gobiernu. ¹⁷ Cuichjá cojo nuju cjuaquixi ta suvá ni xuta xi tsingatihin me

xi sahmi Nina me gobiernu sacuatjin tsingatihin nixti ne, me vëhë ni xi cuisehen me hiscan xi sahmi Nina gobiernu. —Cuatjin xu cachja Jesús.

Jemu chja cuisehen xuta nchina ladu rë Nina

¹⁸ Ngu xuta xi matitjun ne, cavinenguisse xu me Jesús cuitjin:

—Ngayun Maestro, jemu ndaja ngayun. ¿Mé xi meje rë xi sahme cojo sa xi sacú ná cjuahñu xatsë? —Cuatjin xu cachja me.

¹⁹ Sehe ngajan xi Jesús ne, cuitjin xu cafayangui me:

—¿Mé má cuatjin nújun xi ndaja ngahan? Tsajin yo xi ndaja. Ngu ni Nina xi ndaja me. ²⁰ Ngayun ne, ha hyun hacutjin chja ley rë Nina xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuün tsujun, xicanicuun xuta, xicanihñuu cjuachëjë, xicanujuun cjuandesu tsëhë xuta, chjuhuncun nahmi nuju hacuaha chjuhuncun na nuju.” —Cuatjin xu cachja Jesús cja rë ley rë Nina.

²¹ Hane ngajan xi xuta xi matitjun jan ne, cuitjin xu cachja me cojo Jesús:

—Yëjë cja vëhë ne, ha cáhndë tsëhë hisca cjualihndi naha. —Cuatjin xu cachja me.

²² Hane xi cahndë xu Jesús cja rë me ne, sehe cachja xu me cuitjin:

—Tjin sa ngu cja xi machaja nuju: yëjë ni xcusun xi tjin nuju ne, titeñu, hane sehe tichuncjun tujún rë ngajñi rë xuta yuma. Hane xi cuatjin nihñu ne, jemu jyë cjuanchina sacú nuju ngajan ngahnga. Hane xi cjuë cuichuncjun tujún vëhë ne, sehe nduvun tisecon ná. —Cuatjin xu cachja Jesús.

²³ Peru xi cahndë xu xuta xi matitjun jan cja xi cachja Jesús ne, jemu va camá cacun me, tsëhë xi jercu nchina camahani me. ²⁴ Hane xi vutsejen xu Jesús xi jemu va camá cacun xuta xi matitjun jan ne, sehe cachja xu me cuitjin:

—Jemu chja xi ngu xuta xi tjin rë me cjuanchina cuisehen me hiscan sahmi Nina gobiernu. ²⁵ Ha hitsë sa chjaain cuatju ngu chu camellu ngojo rë ngu nindu xi cuma rë xi cuisehen ngu xuta nchina hiscan sahmi Nina gobiernu. —Cuatjin xu cachja Jesús.

²⁶ Ngajan xi xuta xi cahndë me cja jan ne, cuitjin xu cachja me:

—Sá cuatjin ne, ¿yo xi cuma cuetjutje ni? —Cuatjin xu cachja me.

²⁷ Hane Jesús ne, cuitjin xu cafayangui me:

—Yëjë ni xi maji sahmi xuta ne, Nina ne, hatuxa ma sahmi me. —Cuatjin xu cafayangui Jesús.

²⁸ Ngajan xi Pedru ne, cuitjin xu cachja me cojo Jesús:

—Chutsujun ni. Ngayin ne, ha canismitacuín yëjë ni xcusun xi tjin ni, hane tivisecuin nuju. —Cuatjin xu cachja Pedru.

²⁹ Hane Jesús ne, cuitjin xu cachja me:

—Cuichjá cojo nuju cjuaquixi ta yëjë xuta xi tsismicacun me ndava me, tsismicacun me chjuun rë me, tsismicacun me xicjin me, tsismicacun me xutacha rë me, tsismicacun me quihndi rë me, xi cjuetjengui me ndiya rë Nina ne, ³⁰ hatuxa cjin sa cahndë sacú rë me xi cuma sacuaha ndava me, hacuaha hatuxa cjin sa xuta sacú rë me xi cuma sacuaha xuta rë me, quihndë xi siu me ngasunhndë vihi, hane hya xi cueya me ne, sacú rë me ngu cjuahñu xatsë. —Cuatjin xu cachja Jesús.

Camá jyan ndiya cachja Jesucristu xi cueya me

³¹ Hya xi camá xu ne, quijicojoxin Jesús tejó xuta ladu rë me, sehe cachja xu me cojo cuitjin:

—Quihndë ne, tivanguen Jerusalén. Hane xi cjuenhan jan ne, cuetjucaa yëjë sacuatjin catsihindu profeta tsahan, ngahan xi Quihndi rë Xuta Jain ngahan. ³² Ngahan ne, cuma ngahan entregadu tsja xutaxín, cuejnuccëé ná xuta, choho cuichja me tsahan, cuëhënatya ná me. ³³ Hane xi cjuë cuaja ná me ne, sehe tsiquehen ná me. Peru xi ma jyan nixtin ne, cúa nga cjuahñu. —Cuatjin xu cachja Jesús.

³⁴ Peru xuta ladu rë me jan ne, hisca ngu xu cjuá vëhë cajni rcu me ta tjihma cjuatacun vëhë xi cuma rë me. Vëhë xi hvíin xu me mé vijne cjuá xi cachja Jesús jan.

Casahmi Jesucristu xi camatsejen nga rë ngu cha rcá ngajan Jericó

³⁵ Hya xi camá ne, xi camatiña xu Jesús tsëhë nandya Jericó cojo xuta ladu rë me ne, ngajan tacun xu ngu cha rcá tjeheh ndiya, fehya cha caridad. ³⁶ Hane xi cahndë cha xi jercu cjin xuta fane ntsacu me ne, sehe cavinenguise xu cha mé jima jan. ³⁷ Hane tjin xu yo cachja cojo cha xi Jesús tsëhë nandya Nasaret tivatju me cojo xuta ladu rë me. ³⁸ Hane cha rcá jan ne, cuitjin xu cajindaya cha cachja cha:

—iNgayun Jesús, tjë rë David! Catamayuma nuju ngahan. —Cuatjin xu cachja cha.

³⁹ Hane xuta xi cjuí titjun jan ne, cavisiajmi cjan xu me cojo cha xi sejyu cha. Peru cha vëhë ne, hitsé sa jercu cajindaya xu cha cachja cha, cuitjin cachja cha:

—iNgayun tjë rë David! Catamayuma nuju ngahan. —Cuatjin xu cachja cha.

⁴⁰ Ngajan xi Jesús ne, xi casecunhñu xu me ne, sehe cavitexa me xi cuinduva cojo xuta cha rcá jan hiscan xi secun me. Hane xi camatiña cha tsëhë Jesús ne, sehe cavinenguise xu me cha cuitjin:

⁴¹ —¿Mé xi meje nuju xi sahme cojo nuju ni? —Cuatjin xu cavinenguise me.

Sehe ngajan xi cha rcá jan ne, cuitjin xu cachja cha:

—Tatá. Meje ná xi cuma tsejen nga ná. —Cuatjin xu cachja cha.

⁴² Hane Jesús ne, cuitjin xu cachja me cojo cha:

—Catamatsejen nga nuju. Ngayun ne, camandaja túxcun ta, tsëhë xi camangutacún cojo ná. —Cuatjin xu cachja Jesús.

⁴³ Hane ha hora vëhë ni ne, camatsejen nga xu rë cha. Sehe quiji xu cha cojo Jesús táha sahmi jyë sahmi hnga cha Nina. Hane xi cavëë yëjë xuta xcusun xi camá jan ne, jemu cavaxëndaja xu me Nina.

19

Jesucristu cojo cha Zaqueo

¹ Hya xi camá ne, cavisehen xu Jesús nandya Jericó xi cuatju me vasencia nandya. ² Hane ngajan tacun xu ngu cha xi hmí rë Zaqueo, ngu cha xi matitjun tsëhë cha faha tujúnsa, hacuaha jemu nchina cha. ³ Hane cha vëhë ne, jemu meje scuëë xu cha yo xi Jesús, peru camaji ta, tsëhë xi jercu cjin camahani xuta quítsé me, hacuaha cha vëhë ne, jemu patú xu cha. ⁴ Hane xi cavangatitjun cha ne, quiji camiji xu cha ngu ya jyë, cojo sa xi cuma scuëë cha Jesús ta, tsëhë xi hatuxa ngajan cuatju me. ⁵ Hane xi cafehe xu Jesús jan ne, sehe cavuya cavutsejenniji me rcu ya hiscan quisun cha ne, sehe cachja xu me cojo cha cuitjin:

—Zaqueo, nduvunjnu sanii ta, tsëhë xi sahmi ná ngujoyë xi ndya nuju cuitejña quihndë. —Cuatjin xu cachja me.

⁶ Ngajan xi cha Zaqueo ne, marcu macjain xu cavitujne cha, caphatsja cha Jesús cojo yëjë ni cjuasua, quijicojo cha me ndava cha. ⁷ Hane xi cavëë yëjë xuta xi cuatjin casahmi Jesús ne, sehe cachjahma xu me cojo xicjin me cuitjin:

—Quiji cavéjña me cojo ngu cha tsehen. —Cuatjin xu cachjahma me.

⁸ Hya xi camá ne, xi ha tacun Jesús ndava cha Zaqueo ne, cavisatjenhnga xu cha, sehe cachja xu cha cojo Nai naja cuitjin:

—Chutsujun ni, tatá. Vasentjin tsëhë yëjë ni xcusun xi tjin ná ne, suá rë xuta yuma. Hane sá xi tjin yo xi cavaxë rë tujún cojo cjuandacha ne, ñuju cuatjin sacuatjin xi caphá ne, tsicúya tsëhë me. —Cuatjin xu cachja cha.

⁹ Ngajan xi Jesús ne, cuitjin xu cachja me:

—Quihndë ta cuatjin ne, ngayujun ni tsëhë ndihya vihi ne, cavetjuntjun ta, me xi cuijiyihí vi ne, hacuaha cojo me má me xuta ladu rë Nina. ¹⁰ Hane ngahan xi Quihndi rë Xuta Jain ngahan ne, canduvá xi cuanguësë hacuaha cuaxëtjë xuta ladu rë Nina xi cachajá me tsëhë ndiya rë Nina. —Cuatjin xu cachja Jesús.

Ejemplu tsëhë tujún xi casua nai rë hndixahan

¹¹ Xi tu cajnetaha cavisíñuju xuta cjua vëhë ne, Jesús ne, cachja sa xu me ngu ejemplu cojo xuta jan ta, tsëhë xi tiña siutahá me cojo nandya Jerusalén, hane má xu rë xuta ta ha hisca tacun xati xi cuinduva Nina sahmi me gobiernu.

¹² Hane cuitjin xu cachja me:

—Cuejña ne xi ngu xuta chacun jan ne, quiji me ngu nangui cjin, xi cjuahaxa me xi cumatitjun me tsëhë estadu rë me, sehe cuya nga me. ¹³ Hane chaja sa xi cjué me ne, cajindaya me të hndixahan rë me, sehe casua rë me jima ngu hndixahan jan tujún. Sehe cachja me cojo cuitjin: “Nihñu xa cojo tujún vihi jinguyëjë rë xi cjué sehe cúa.” Cuatjin cachja me. ¹⁴ Peru xuta tsëhë estadu rë me ne, jemu choho vëë rë me. Vëhë xi hya xi ha quiji xuta chacun ja ne, catsingatju xuta estadu rë me jan ngujo cha xi cuichja cha cuitjin cojo xuta xi suaxa rë xuta chacun jan: “Mamijí niji xi me xi cuajiyihí vë cumatitjun me tsijin.” Cuatjin cuichja cha. ¹⁵ Hya xi camá ne, xi cavuya xuta chacun jan xi café caphatsja me xa ne, cavitexa me xi chjindaya rë cha hndixahan rë me xi casua rë me tujún jan, cojo sa xi sua cha cumachaya rë me há cjin cavesun rë cha jima ngu cha xi casahmi cha xa cojo tujún xi casua me cha. ¹⁶ Hane cha hndixahan xi canduva titjun ne, cuitjin cachja cha: “Tatá. Sacuatjin tujún xi catuhun ná ne, cavesun ná të cuatjin sa.” Cuatjin cachja cha. ¹⁷ Sehe ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsë rë xi jemu ndaja canihñi xa xi chúva vë ne, suá ri të nandya xi cumatitjun ngaye tsëhë.” Cuatjin cachja me. ¹⁸ Hane xi canduva cha xi majo ne, cuitjin cachja cha: “Tatá. Sacuatjin tujún xi catuhun ná ne, cavesun ná hñu cuatjin sa.” Cuatjin cachja cha. ¹⁹ Hane nai rë hndixahan jan ne, cuitjin cachja me: “Ngaye ne, cumatitjun ngaye tsëhë hñu nandya.” Cuatjin cachja me. ²⁰ Hya xi camá ne, xi canduva nga ngu cha ne, cuitjin cachja cha: “Tatá. Cuajiyihí tujún xi catuhun ná nguehe. Tujún vi ne, cavinchándaja cahntsua ngu pañutu ta, ²¹ tsëhë xi tsácjun nuju. Ta ngayun ne, jemu hñu cjua nuju. Tangun ngayun cojo ngu xuta xi fanga me handasa hacuini me vëhë catsitjë me ta, tsëhë

xi ngayun ne, hacjahi sahmi xa ne, ngayun chjuhunntsun chji rë.” Cuatjin cachja cha hndixahan vëhë. ²² Ngajan xi xuta chacun jan ne, cuitjin cachja me cojo hndixahan vëhë: “Ngaye, hndixahan tsehen ne, cojo cjua riji sove ni tsichúva ri. Ngaye xi noje xi hye xi jemu hñu cjua naha, hacuaha tangun ngahan cojo ngu xuta xi fanga me handasa hacuiin me catsitjé me, tsëhë xi ngahan ne, hacjahi sahmi xa ne, ngahan fahántsá chji rë. ²³ Sá xi hye xi cuatjin ne, ¿mé má hacuiin xcun bancun cahmi chani tujún xi casuá ri, cojo sa xi hya xi cjuëhë ne, cúa cjuahántsá tujún naha, peru cojo quihndi rë ni?” Cuatjin cachja xuta chacun jan cojo hndixahan rë me. ²⁴ Sehe cachja sa me cojo ngujo hndixahan rë me xi hinchacun jan cuitjin: “Chjuhuntuhun tujún xi yaha cha vë ne, sehe tuhun rë cha xi cavesun rë të cuatjin sa sacuatjin tujún xi casuá rë.” Cuatjin cachja xuta chacun jan. ²⁵ Hane hndixahan jan ne, cuitjin cafayangui: “Tatá. ¡Peru cha vëhë ne, ha tjin rë cha të cuatjin sa!” Cuatjin cachja cha. ²⁶ Ngajan xi xuta chacun jan ne, cuitjin cachja me: “Nguehe cuichjá cojo nuju ta yëjë xuta xi cavesun rë me xcun xi ha tjin rë me ne, suá sa rë me. Hane xuta xi tsajin mé cavesun rë me ne, hisca xi tjin rë me ne, cjuahátahá. ²⁷ Hane sacuaha condra naha xi miji rë xi ngahan cumatitjun ngahan tsëhë ne, tángun chjuhun, nduvuncujun nguehe, sehe nicuhun nguehe xcún.” Cuatjin cachja xu xuta chacun xcun ejemplu xi cachja Jesús.

Cafehe Jesucristu nandya Jerusalén

²⁸ Hya xi camá xu ne, xi cavatju cachja Jesús cjua vëhë ne, sehe cavetju me quiji sa xu me xi cjuëhe me Jerusalén. ²⁹ Hane hya xi camatiña me tsëhë nandya Betfajé cojo nandya Betania, nandya xi siu tiña tsëhë ndetjún xi hmí rë Ndetjún Olivu ne, sehe catsingatju xu me jo xuta ladu rë me xi cjue tixa rë me, ³⁰ hane cuitjin xu cachja me:

—Tángun nandya xi tsejen tacun vë. Hane xi cjuhun jan ne, ngajan cuechuntuhun ngu chu burru xatsé, xi hisca ngu cjëë cuijin rë chu, tjihñu chu. Hane chundecjun chu, nduvuncujun chu. ³¹ Hane sá xi yo cjuinenguise nuju mé má cuatjin chundecjun chu ne, sehe tinújun cuitjin: “Nai niji meje rë me chu.” Cuatjin tinújun. —Cuatjin xu cachja Jesús.

³² Hane me xi casatëxa rë jan ne, quiji xu me, hane cavetjucaa jain sacuatjin cachja Jesús cojo rë me. ³³ Hane jinguyëjë rë xi tivundecja me burru jan ne, nai rë chu ne, cuitjin xu cachja me:

—¿Mé má cuatjin chundecjun burru vë? —Cuatjin xu cachja me.

³⁴ Hane xuta ladu rë Jesús jan ne, cuitjin xu cafayangui me:

—Nai niji meje rë me chu. —Cuatjin xu cachja me.

³⁵ Sehe quijicojo xu me chu hiscan tacun Jesús. Hane caviyujusun me tsjian rë me ngaxtun chu, sehe catsiquijin xu me Jesús burru jan. ³⁶ Hane xi cjui Jesús quisun me burru jan ne, táha ticandi xu xuta tsjian rë me hiscan cjui Jesús. ³⁷ Ngajan xi xi jima tiña xu Jesús cojo yëjë xutacjín jan nandya Jerusalén, hiscan xi cafaha rë xi ha cuitsingaxten ndiya tsëhë Ndetjún Olivu ne, yëjë ni xutacjín xi xuta ladu rë Jesús jan ne, jercu ndama xu rë me, hisca cavetsihin cajindaya me cachja me xi cavaxëndaja me Nina tsëhë yëjë ni cjuarcun xi cavëë me. ³⁸ Cuitjin xu cachja me:

—Jemu catsinchacun Nina me xi nduva vi xi cuma titjun tsajan, tsëhë xi Nina catsingatju rë me. Ngahnga ne, hatuxa jemu tjin cjuandaja cjuajeya, hacuaha Nina ne, hatuxa jyë hnga me cojo Hasen rë me. —Cuatjin xu cavaxëndaja xuta Nina.

³⁹ Hane ngujo cha fariseo xi hinchajñi ngajñi rë xutacjín jan ne, cachja xu cha cojo Jesús cuitjin:

—Maestro, tichuncjun cja xi tichja xuta ladu nuju vë. —Cuatjin xu cachja cha.

⁴⁰ Hane xi cafayangui Jesús ne, cuitjin xu cachja me:

—Nguehe cuichjá cojo nuju ta sá xi xuta xi cuicun vi sejyu me ne, ndyojo vi cuetsihin squindaya cuichja nga. —Cuatjin xu cafayangui me.

⁴¹ Hane xi camatiña sa xu Jesús tsëhë Jerusalén ne, xi cavëë me nandya jan ne, cajihnda xu me ngatsë rë. ⁴² Sehe cachja xu me sacuaaha xi tichja me cojo xuta Jerusalén, cuitjin xu cachja me:

—¡Sá mé ni xi hacuaaha cojo ngayun hyun cjuatacun xi yaha cjuandaja cjuajeya! Peru quihndë matsejen ne, cjuatacun vëhë matsejen ne, jiyahma xi cuma nuju. Vëhë xi hyúun. ⁴³ Peru cuechú nixtin xi yëjë ni condra nuju matsejen ne, sahmi me ngujyë xi cuma cuisehen me nandya nuju, xinchandee nuju me yëjë ni ladu xi cuinchahñu nuju me. ⁴⁴ Tsixujne me yëjë ni ndihya tsëhë nandya nuju, tsicanguiin me hisca ngu ndyojo xi tinecoo, hacuaaha tsiquehen nuju me ngayujun ni xi nechun nandya nuju. Cuatjin cuatjun cuma matsejen ta, tsëhë xi ngayun matsejen ne, cajnií rcun hya xi cafehe Nina xi cuaxëtje nuju me. Cuatjin xu cachja Jesús.

Cavaxë Jesucristu xuta tsehen tsëhë ndatsen yungun

⁴⁵ Hane xi cafehe me nandya Jerusalén ne, sehe quiji xu me yungun xi matitjun. Hane xi cavisehen me ndatsen yungun jan ne, cavetsihin cavaxë me xuta xi sahmi ndetsin jan. ⁴⁶ Cuitjin xu cachja me:

—Cuitjin camahindu xcun xujun rë Nina sacuatjin xi cachja me: “Ndyá naha ne, vejña xa xi cjue xuta sahmi me oración rë me.” Cuatjin chja Nina. Peru ngayun ne, tinihñuxun cojo sacuaaha ngu cahndë hiscan xi matangun xuta chëjë. —Cuatjin xu cachja Jesús.

⁴⁷ Hya xi camá ne, nchunchujun xu ni quiji Jesús cavicuya me xuta ngajan ndatsen yungun xi matitjun. Hane yëjë ni nahmi xi matitjun cojo yëjë cha xi vicuya cjuachacun cojo yëjë sa xuta xi matitjun ne, jemu cavangui xu me chava rë xi tsiquehen me Jesús. ⁴⁸ Peru casacuinyiin xu rë me mé sahmi me ta, tsëhë xi yëjë ni xuta ne, tivisiñuju xu me cja rë Jesús nguñaja cacun me.

20

Cavinenguise xuta cojo Jesucristu yo cavitexa rë me

¹ Cuitjin camá xu ngu nixtin hya xi tivicuya Jesús xuta hacuaaha tisua me jimachaya rë cjuandajyihí rë Nina ngajan ndatsen yungun xi matitjun. Hacuaaha camatangun xu nahmi xi matitjun cojo cha xi vicuya cjuachacun cojo xuta changá, ² hane cuitjin xu cavinenguise me Jesús:

—Tinújun cojo niñi ne, ¿yo cavitexa nuju xi cuatjin nihñu? ¿Yo casuaxa nuju? —Cuatjin xu cavinenguise me.

³ Hane xi cafayangui Jesús ne, cuitjin xu cachja me:

—Hacuaha cjuinenguësë nuju ngu cja, hane chjayunngun tsahan: ⁴ ¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin xu cachja me.

⁵ Sehe ngajan xi xuta xi cuacun jan ne, cavisiajmicjín me ngajñi rë me, cachja xu me cuitjin:

—Sá xi cuinújan xi Nina cavitexa me cha Juan vë ne, cjuinenguise naja me: “¿Mé má camacjain naja cha?” ⁶ Hane sá xi cuinújan xi xuta cavitexa rë cha

ne, yějē ni xuta ne, tsiquehen naja me cojo ndoyojo ta, tsēhē xi yějē ni xuta ne, ha macjain rē me xi cha vėhē ne, profeta cha. —Cuatjin xu cavisiajmicjín me.

⁷ Ngajan xi xuta xi cuacun jan ne, cachja me xi hvín me. ⁸ Sehe ngajan xi Jesús ne, cuitjin xu cachja me:

—Sá cuatjin ne, ngahan ne, hacuaha cuichjaan cojo nuju yo cavitexa ná xi cuitjin sahme. —Cuatjin xu cachja Jesús.

Ejemplu tsēhē cha sahmixa xi jemu tsehen cha

⁹ Hya xi camá ne, cavetsihin cachja xu Jesús cojo yějē ni xuta jan ejemplu vihi:

—Cuejña ne xi ngu me jan matsejen ne, catsitjē me xcun nangui rē me xca rē uva. Sehe casua me ngujo cha sahmixa xi cjuahacuenda cha sehe cjuaha tsē tsē me cojo cha. Hya xi camá ne, sehe cavetju me quiji me ngu nangui jemu tsēē camahani. ¹⁰ Hane xi cavechú nixtin rē tutjē jan matsejen ne, sehe catsingatju me ngu mosu hndixahan rē me xi quiji cachja cha cojo cha xi fahacuenda xitjē jan xi sua cha hitsē tutjē xi satē rē me xi casacu rē cha xcun nangui rē me jan. Peru cha xi fahacuenda xitjē jan matsejen ne, tu cavaja cha cha hndixahan jan, sehe catsingatju cha cafe, ndastu mé casua rē cha. ¹¹ Hya xi camá ne, cavuya catsingatju nga me ngu hndixahan rē me. Hndixahan vėhē matsejen ne, jemu cavaja rē cha, jemu choho cachja cha cojo, sehe catsingatju cha cafe, ndastu mé casua rē cha. ¹² Hya xi camá ne, cavuya catsingatju nga me ngu hndixahan xi majyan. Hndixahan vėhē matsejen ne, jemu cavanguihmu rē cha, sehe cavaxēxin cha tsēhē ngajan.

¹³ Ngajan xi nai rē xitjē jan matsejen ne, cuitjin catsingataha cacun me: “¿Mé xi ndatjin sahme quihndé? Ndatjin rē xi tsingátju quihndi naha xi jemu hmú cáacun. Cjuaharcun rē cha, xi quihndi naha.” Cuatjin catsingataha cacun me. ¹⁴ Peru xi cavėē cha xi fahacuenda xitjē jan cha vėhē matsejen ne, sehe cavisiajmicjín cha cojo xicjin cha cuitjin: “Cha vihi ne, quihndi rē me xi cuahatsja cha xitjē vi. Niquen cha, cojo sa xi tsajan cuma nangui vi.” Cuatjin cavisiajmicjín cha. ¹⁵ Hane xi cavaxēxin cha cha tsēhē nangui jan matsejen ne, sehe catsiquehen cha.

“Xi má nuju matsejen ne, ¿mé sahmi nai rē xitjē jan cojo cha xi cuacun fahacuenda jan? ¹⁶ Cjue tsiquehen me cha, sehe sua me xitjē jan cjuahacuenda jingu sa cha sahmixa. —Cuatjin xu cachja Jesús.

Hane xi cahndē yějē xuta cjuah vėhē ne, cachja xu me cuitjin:

—¡Catamamiji cacun Nina xi cuatjin cuma! —Cuatjin xu cachja me.

¹⁷ Ngajan xi xi cavuya vutsejen Jesús xuta jan ne, cuitjin xu cachja me:

—¿Mé vijne xi cuitjin camahindu xcun xujun rē Nina?:

Ndyojo xi catsitjungui chjinevexo ne,

vėhē ndoyojo xi cavėjña tjun tjun yuju rē xihndėnaña.

Cuatjin camahindu. ¹⁸ Hya xi ngu xuta cjuinenguisun me xcun ndoyojo vėhē matsejen ne, cuatėlanga rē me. Hane hya xi ndoyojo vėhē cjuinenguisun rē ngu xuta matsejen ne, ña cuma tē me. —Cuatjin xu cachja Jesús.

¹⁹ Vėhē xi cha xi vicuya cjuachacun cojo nahmi xi matitjun ne, jemu cavangui xu me chuva rē hacutjin cuma xi cjuaha me Jesús hora vėhē ni, tsēhē xi vėē me xi ejemplu xi cachja Jesús ne, condra rē me chja. Peru tsēhē xi tsacjun xu me xuta ne, vėhē xi cafaain xu me Jesús ngutjen.

Cjuacjintacun tsēhē tujúnsa

²⁰ Tu siu xu ni me cuidadu tsēhē cjuah rē Jesús, hisca catsingatju xu me ngujo cha xi tsejen sacuaha xuta ndaja, xi cuangui cha chuva rē xi cuaxē rē cha

Jesús ngu cjuua xi cuaaaintjin, cojo sa xi cuma chjahá rë me cjuechani rë me xcun xutaxa rë ndihyavasen. ²¹ Hane cha xi cuacun jan ne, cuitjin xu cachja cha cojo Jesús.

—Maestro, ngayin ne, hyin ta ngayun ne, vicuyun rë xuta cojo cjuaquixi. Hacuaha tangun ni nújun cojo yějë xuta ta, tséhë xi ngayun ne, hatuxa vicuyun ndiya rë Nina cojo cjuaquixi. ²² Quihndë ne, sacuaaha ley rë Moisés ne, ¿há sua cahndë xi cuechjen tujúnsa naja cojo César, me xi matitjun, o há suaain cahndë? —Cuatjin xu cachja cha.

²³ Peru Jesús ne, tséhë xi ha vacun rë me xi jemu ndacha cha ne, cuitjin xu cachja me cojo cha:

²⁴ —Ningacun ná ngu tujún. Quihndë ne, ¿yo xcusun rë hacuaha yo ñihi rë xi quitahá xcun tujún vë? —Cuatjin xu cavinenguise Jesús.

Hane cha xi cuacun vë ne, cuitjin xu cafayangui cha:

—Tséhë César. —Chja xu cha.

²⁵ Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rë César xi tséhë me, hane tuhun rë Nina xi tséhë me. —Cuatjin xu cachja me.

²⁶ Hane camaji cavaxë xu rë cha Jesús ngu cjuua xi cuaaaintjin xi cuihndë xuta. Hane xi quijircun xu rë cha tséhë cjuua xi cafayangui Jesús ne, tu caviyujuyuu xu ni cha.

Cjuachjinenguise tséhë xi cuya nima cjuahñu

²⁷ Hya xi camá ne, cafehe xu ngujo cha saduceo hiscan tacun Jesús. Cha xi cuicun vi ne, vicuya cha cjuachacun xi chja xi xuta xi cahme ne, cuyaaain nga me cjuahñu. Ngajan xi cha xi cuacun cafehe jan ne, cachja xu cha cojo Jesús cuitjin:

²⁸ —Maestro, Moisés ne, catsihindu me xcun xujun rë Nina xi sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaaha quihndi rë nima vëhë. ²⁹ Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rë cha vëhë ne, casacuiin rë na hisca ngu quihndi cojo cha. ³⁰ Hya xi camá ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaha cahme cha hane casacuiin rë na quihndi. ³¹ Hacuanitjin ni cafaha cha xi majyan jan na hisca xi cafë yějë xi yatu cha cafaha cha na. Peru yějë cha xi cuacun vë ne, cafë cha cahme cha chuva ngu chuva ngu cha. Hane na vëhë ne, casacuiin rë na hisca ngu quihndi cojo cha xi cuacun vë. ³² Hiscan xi cajnetaha ne, na vëhë ne, hacuaha cahme na. ³³ Quihndë ne, hya xi cuya yějë nima cjuahñu ne, ¿jarë cha xi cuacun vë xi chjuun rë cha na xi cjuaquixi ta, tséhë xi yějë ni xi yatu cha ne, camá chjuun rë cha na? —Cuatjin xu cachja cha saduceo cojo Jesús.

³⁴ Sehe ngajan xi Jesús ne, cuitjin xu cachja me cojo cha:

—Xuta xi siu me ngasunhndë quihndë ne, tsinguixan me hacuaha vixan me. ³⁵ Peru xuta xi vechú chuva rë xi cuya me cjuahñu xi ha cuatju cueya me hacuaha sacú rë me cjuahñu xatsë ne, cuixaain me hacuaha tsinguixaain me hya ta, ³⁶ tséhë xi ha quihndë cueyaain nga me, tséhë xi tangun cuma me cojo ángel. Hacuaha cuma me quihndi rë Nina, tséhë xi cuya me cjuahñu. ³⁷ Hacuaha hya xi chutayan cjuua xi cachja Moisés ngajan hiscan xi catí yanahyá xcuen ne, hya sacu machaya naja tséhë xi nima ne, cuya cjuahñu ta, tséhë xi cachja Moisés xi Nina naja ne, Nina rë Abraham, Nina rë Isaac,

cojo Nina rē Jacob má me. ³⁸ Peru Nina ne, hacuiin nina rē nima ta nina rē xuta xi quicun me ta, tsēhē xi xi cuma rē Nina ne, yējē ni xuta ne, quicun me, handasa cahme yahnga me. —Cuatjin xu cachja Jesús.

³⁹ Ngajan xi ngujo cha vicuya cjuachacun ne, cuitjin xu cachja cha:

—Maestro, ndatjin cjua xi canújun.

⁴⁰ Cuatjin xu cachja cha ta, tsēhē xi tsacjun xu cha cjuinenguise sa cha me.

¿Yo tjē rē má me xi catsingatju Nina?

⁴¹ Sehe ngajan xi Jesús ne, cachja nga xu me cuitjin:

—¿Hacutjin má xi cuatjin chja xuta xi me xi tsingatju Nina ne, tjē rē David má me? ⁴² Ta suvá David ne, cachja me cuitjin xcun xujun tsēhē Salmo:

Nina ne, cachja me cojo Nai naha cuitjin:

“Tinechin nguehe ladu quixi naha,

⁴³ hisca hya xi yējē ni xi sahmi ri condra ne, cuiyujú ngahan ngahma gobiernu rijl.”

Cuatjin cachja David cjua xi cachja Nina. ⁴⁴ Quihndē ne, sá xi suvá David chja me xi Nai rē me má me xi tsingatju Nina ne, ¿hacutjin má ne xi hacuaha tjē rē me ni? —Cuatjin xu cachja Jesús.

Cachjajyē Jesucristu cojo xuta ladu rē me tsēhē cha vicuya cjuachacun

⁴⁵ Jinguyējē rē xi tivisiñuju yējē xuta jan ne, Jesús ne, cachja xu me cuitjin cojo xuta ladu rē me:

⁴⁶ —Xicaninguisuhunjñuu cojo cha xi vicuya cjuachacun, xi jemu ndama rē cha xi cuatjin vajá cha tsjian nduju, hora xi fi tsuyihiya cha, jemu chuya rē cha xi cuatjin fi chja xuta nina cojo cha ngajan ngajñi ndetsin, hacuaha jemu chuya rē cha xi cuatjin satē rē cha cahndē xi matitjun tsēhē cahntsua yungun, o hiscan ngu ndava suhi. ⁴⁷ Cha xi cuacun vē ne, hacuaha jemu cjín tujún vaxē cha yachjin cahan. Hisca xi chjayuma cha ne, hacuaha jemu nduju hora, peru hacuiin nguñaja cacun cha chja cha. Vēhē xi cha xi cuacun vē ne, hitsē sa jyē castigu cuatju cha xi cuma rē jingusa xuta. —Cuatjin xu cachja Jesús.

21

Tujún xi cavincha chjuun cahan cahntsua alcancía

¹ Ngu nixtin jan ne, jinguyējē rē xi tivutsejen xu Jesús xi tvincha xuta nchina tujún cahntsua alcancía tsēhē cjuandaja rē me cojo Nina ne; ² hacuaha cavēē xu me xi canduva ngu chjuun cahan xi jemu yuma, hane hacuaha cavincha na jo tujún langa cahntsua alcancía jan. ³ Sehe ngajan xi cachja xu Jesús cojo xuta ladu rē me cuitjin:

—Cuichjá cojo nuju cjuaquixi ta na cahan vē xi jemu yuma na ne, hitsē sa vengui chji rē tujún xi cavincha na xi cuma rē tujún xi jemu cjín cavincha yējē xuta nchina xi cuacun vē ta, ⁴ tsēhē xi me xi cuacun vē ne, tsēhē cjuanchina xi tjin rē me ne, ngajan cavaxē me tujún xi cavincha me. Peru na vēhē ne, handasa jemu tjin rē na cjuachaja ne, hitsē lihndi tujún xi tjin rē na ne, cavincha na yējē cahntsua alcancía. —Cuatjin xu cachja Jesús.

Cachja Jesucristu xi cuetsun yungun

⁵ Ngu ndiya, hya xi ngujo xuta jan cachja xu me xi yungun xi matitjun ne, jemu ndacun ndyojo camá cojo, hacuaha jercu camaxcuen cojo tu mé ni xcusun cjuatjo xi casua xuta ne, cachja xu Jesús cuitjin:

6—Sacuaha xcusun xi chutsujun vi ne, cuechú nixtin xi hisca ngu ndyojo ndacun xi cuicun vi ne, tsajin hinchasuncoo xicjin ta cjuë yějë cuixujne. —Cuatjin xu cachja Jesús.

Hacutjin sacú cumachaya naja xi ha meje cuijnetaha nixtin vihi

7 Ngajan xi xuta jan ne, cavinenguise xu me cojo Jesús cuitjin:

—Maestro, hane ¿janihya cuetjucaa xcusun vèhë ni? ¿Hacutjin cuma sacú niji cjuaquixi xi xcusun vèhë ne, ha tivechú nixtin xi cuetjucaa ni? —Cuatjin xu cavinenguise me.

8 Ngajan xi Jesús ne, cuitjin xu cachja me:

—Nechun cuidadu, cojo sa xi hacuiin cuma ndacha ngayun ta, tsèhë xi jemu cjín xuta cuetjucaa me xi cuichja me xi hacui me xi catsingatju Nina me, hacuaha cuichja me xi ha camatiña nixtin. Peru xicatsanguntjenguun me. ⁹ Hacuaha hya xi cuma chaya nuju cjuaxi jemu yehe si tijima ngu nación ne, o sá xi tjin cjuatacun xi jemu yehe si nduva ne, xicarcoon ta, hatuxa tjin xi titjun xcusun vèhë cuma. Peru hacuiin ngutjen hya cuijnetaha nixtin vihi.

¹⁰ Hacuaha quiijinduju sa xu cachja me cuitjin:

—Scaan xuta tsèhë ngu nación cojo jingu sa nación, hacuaha scaan xuta tsèhë ngu nandya cojo ngu nga nandya. ¹¹ Hacuaha jemu cjín cahndë xi cjuani nangui, jemu cjín cahndë xi cuatju chíhin vitaha, jemu cjín cahndë xi cuma jindya, hacuaha jemu yehe chircun cuma tsejen ngajan ngahnga xi sua cumachaya nuju mé xi cuma.

¹² Peru chaja sa xi cuma yějë xcusun vèhë ne, xuta ne, tsujyihiyatjengui nuju me cojo cjuahngatacun. Cjuaha nuju me cjucojo nuju me xcun xutaxa rë yungun, hisca cuincha nuju me ndavaya. Cjucojo nuju me xcun xutaxa rë ndihyavasen, hisca xcun gobernador, ngatsë rë xi ladu naha má ngayun. ¹³ Xi cuatjin cuatjun cuma ne, vèhë sua nuju cahndë xi ninguixun yějë cjuaxi hacutjin cavicuyá nuju. ¹⁴ Tejñungutacún xi hacuiin titjun jemu cjín ningatuhuntacún hacutjin chjayunngun tsèhë xutaxa rë ta, ¹⁵ tsèhë xi ngahan suá nuju cjuatacun xi cuinújun ngu cjuaxi condra nuju ne, cumaji tsitjungui me hacuaha cumaji cuichja me xi quixiin. ¹⁶ Hacuaha hisca xutacha nuju, o sá xi xingun, o sá xi xuta nuju, o sá xi amigu nuju ne, cuinchajyë nuju me. Hacuaha tjin yahnga ngayun ne, hisca tsiquehen nuju me. ¹⁷ Yějë ni xuta ne, choho scuëë nuju me, tsèhë xi ladu naha ngayun. ¹⁸ Peru xicamacjiintacún ta tsajin camahani mé xi nichujun. ¹⁹ Caticaa nuju ta, tsèhë xi cuatjin xi cuetjuntjun.

²⁰ Peru hya xi chun xi jemu cjín xuta nduvacjin cuetsihin xinchandee me nandya Jerusalén xi sahmi me ngu si jyë cojo nuju ne, vèhë sua machaya nuju xi camatiña nixtin xi nandya Jerusalén ne, cjuë tsinguetsun xuta nduvacjin vë. ²¹ Nixtin hya ne, ngayujun ni xi nechun yějë nandya tsèhë distritu Judea ne, tiyun tángun hiscan ndetjún. Hacuaha ngayujun ni xi nechun nguehe nandya Jerusalén ne, tetjunxun. Hacuaha ngayujun ni xi nechun ranchun rë Jerusalén ne, xicatsanguun nandya xi naxuntjun yojo nuju. ²² Cuatjin meje rë xi nihña ta, tsèhë xi nixtin hya ne, sahmi Nina castigu nandya vihi, cojo sa xi xi cuatjin ne, cuetjucaa yějë hacutjin camahindu xcun xujun rë Nina. ²³ Jemu chojyih tsèhë yějë yachjin xi hinchahma quihndi rë me cojo yějë me xi tjin rë quihndi vaquí nixtin hya ta, tsèhë xi cuatju ngu cjuandya jyë nación vihi, hacuaha cuatju xuta nguehe ngu castigu. ²⁴ Hacuaha jemu cjín xuta nguehe cueya me cojo quicha, hacuaha jemu cjín xuta nguehe tsihña xuta tsèhë jingu sa nación me sehe tsingatju me me yějë ni nación. Hane xi

cuatju vëhë ne, suvá xutaxín cjue nduva me sunesun me xcun nangui tsëhë nandya Jerusalén, hisca xi cjuë nixtin xi xuta xi cuacun vë cuitexa me nandya Jerusalén vi.

Xcusun xi cuma hya xi cuinduva nga Jesucristu

²⁵ Nixtin hya ne, hacuaha cuma tsejen cjuarcun xi cuma xcun tsuhi cojo sá cojo niñú. Hane nguehe ngasunhndë ne, jercu cjín tsingataha cacun xuta tsëhë yëjë ni nación, ña cuya sca me tsëhë xi jercu cjuane ndachacun, hacuaha jercu tsiquijin rë tsindyu rë. ²⁶ Yëjë xuta ne, ña cuma ndaya cacun me xi tsacjun me, xi tsingataha cacun me tsëhë chircun xi cuma nguehe ngasunhndë ta, tsëhë xi hisca ngahñu xi yaja ngahnga ne, cjuiniyaya. ²⁷ Sehe hya scuëë xuta ngahan, xi Quihndi rë Xuta Jain ngahan, xi cuinduva ngajñi rë yufí cojo jemu jyë ngahñu, hisca setí hisca vatë jyihi ngahan xi cuinduva. ²⁸ Hya xi xcusun xi cuacun vë cuetsihin cuma ne, tisechun chutsujun ngahnga ta camatiña nixtin xi cuetjuntjun.

²⁹ Xi quijinduju sa cjuavisiajmi rë Jesús ne, cachja xu me ngu ejemplu vihi: —Quihndë ne, ningatuhuntacún tsëhë yaxujún o sá yahnga sa ya xi vixu xca rë. ³⁰ Xi tu chun xi cuetjusehen ya xi cuacun vë ne, ha hyun ta ha camatiña chan tsi. ³¹ Hacuaha chuva vëhë ni ne, hya xi chun xi cuetsihin cuma yëjë xcusun xi cachjá cojo nuju vë ne, vëhë sua cumachaya nuju xi ha camatiña nixtin xi nduva Nina sahmi me gobiernu.

³² Cuichjá cojo nuju cjuaquixi ta ngayujun ni xi nechun nixtin vihi ne, hacuini ngayujun cavyun chaja sa xi cuatju yëjë xcusun xi cachjá cojo nuju jan. ³³ Ngahnga cojo nguehe ngasunhndë ne, hatuxa cjuë. Peru hisca ngu cju naha ne, tsajin xi cuetjincaain.

³⁴ Nechun cuidadu tsëhë xcusun xi nihñu. Xicatuun cahndë xi cjuatacun nuju ne, tsë rë cojo cjuatacun tsëhë cjuachihi, cojo cjuacjintacun tsëhë xcusun xi mameje nuju xcun ngasunhndë nuju, sá tu tsajin tjin chjine ngayun hya xi cuechú nixtin vëhë, ³⁵ sacuatjin tsajin tjin chjine ngu chu hya xi finenguisun rë chu chen. Vëhë xi nechun cuidadu ta, tsëhë xi hatuxa cuechú nixtin vëhë, hya xi sahmi Nina gobiernu yëjë ni xuta jingujyë ni ngasunhndë. ³⁶ Nechun cuidadu. Yasen ni chjahyun rë Nina xi cuechú chuva rë xi cuetjuntjun tsëhë yëjë ni cjuacjintacun xi ha tu hora sa xi cuinduva. Hacuaha chjahyun rë Nina xi cuma cuetjunndujun hora xi cuisechun xcún xi cjuháchuva nuju cojo cjuatacun nuju, ngahan xi Quihndi rë Xuta Jain ngahan. —Cuatjin xu cachja Jesús.

³⁷ Nguinixtin ne, ndatsen yungun xi matitjun xu véjña Jesús vicuya me xuta. Hane nguixun ne, vetju xu me fi véjña me ndetjún xi hmí rë Ndetjún Olivu. ³⁸ Hane yëjë ni xuta ne, tajñu tajñu xu ni fi me yungun jan xi cuisñuju me cju xi vicuya Jesús.

22

Camachihin cju hacutjin xi chjahá rë Jesucristu

¹ Hya xi camá xu ne, camatiña suhi tsëhë pan xi hacuini cojo san rë pan má, suhi xi hmí rë Pascua. ² Hane nahmi xi matitjun cojo cha vicuya cjuachacun ne, jemu tivangui xu me chuva rë hacutjin xi tsiquehen me Jesús. Peru táhahma xu tisahmi me xcusun vëhë ta, tsëhë xi tsacjun xu me xuta.

³ Hya xi camá xu ne, Satanás ne, cavisehen xu cahntsua xahasen rë Judas, cha xi hacuaha hmí rë Iscariote, ngu cha ngajñi rë me xi tejó xi má ladu rë

Jesús. ⁴ Ngajan xi Judas jan ne, quiji cavisiajmicijín xu cha cojo ngujo nahmi xi matitjun cojo ngujo cha mayu yungun hacutjin cuma xi cjuaha xuta xi cuacun vë Jesús. ⁵ Hane nahmi xi matitjun cojo mayu jan ne, jemu ndaja camá xu rë me, hisca caviyuju cacun me xi sua me cha tujún. ⁶ Hane Judas ne, cojo cjuatacun vëhë ne, camangu cacun cha, sehe ngajan xi cavangui xu cha ngu hora xi tsajin cjin xuta, xi sahmi cha entregadu Jesús cojo xuta xi cuacun jan.

Hacutjin cajinë Jesucristu tsëhë suhi rë Pascua

⁷ Cavechú xu nixtin tsëhë suhi rë pan xi hacuiin cojo san rë pan má, nixtin hya xi meje rë xi cueya chu tsánga. ⁸ Sehe ngajan xi Jesús ne, catsingatju xu me Pedru cojo Juan ngu tixa, hane cuitjin xu cachja me:

—Tángun tuhunchjinu xi xinëënguixuun tsëhë suhi. —Cuatjin xu cachja me.

⁹ Sehe ngajan xi me xi cuacun jan ne, cavinenguise xu me Jesús cuitjin: —¿Hane jani meje nuju xu cuihinchjini ni? —Cuatjin xu cavinenguise me.

¹⁰ Hane Jesús ne, cuitjin xu cachja me:

—Chutsujun ni, xi cjuhun tjeheh nandya jan ne, ngajan cuechuntuhun ngu cha xi yaniji ngu nisa nandá, hane tánguntjengun cha hisca xi cjuhun ndihya hiscan cjuí cha, ¹¹ sehe tinújun cojo nai rë ndihya jan cuitjin: “Cuitjin cjua xi catsingatju maestru tsujun: ¿Jarë cuarto xi tuhun, sehe ngajan sínë niñu tsëhë suhi cojo xuta ladu naha?” Cuatjin tinújun cojo rë me. ¹² Hane me vëhë ne, tsingacun nuju me ngu cuarto jyë xi tacun ngahnga hiscan xi ha tjin chjine ndihya. Hane ngajan tuhunchjinu xi xinëë. —Cuatjin xu cachja Jesús.

¹³ Hane xi quiji me xi jo jan ne, cavetjucaa jain yëjë cjua xi cachja Jesús cojo rë me. Hane ngajan cavëhëndaja xu me xi sínë nguixun Jesús cojo rë me tsëhë suhi.

¹⁴ Hane xi cavechú hora ne, cafaha xu Jesús cahndë rë me xcun maxë cojo xingu xingu apóstol. ¹⁵ Hane sehe cachja xu me cojo apóstol jan cuitjin:

—Jemu meje sínë cojo nuju comida tsëhë suhi vihi chaja sa xi cjuehe cjuaveya naha ta, ¹⁶ tsëhë xi nguehe cuichjá cojo nuju ta ha quihndë tsajin nixtin xi cúa sínë nga comida tsëhë suhi vihi. Sínë nga, peru hisca hya xi cuinduva Nina sahmi me gobiernu ta, tsëhë xi cjuatacun xi vicuya naja suhi vihi ne, hya cuetjucaa jain. —Cuatjin xu cachja Jesús.

¹⁷ Hane xi cafahatsja xu me ngu vasu ne, sehe casua me nacuechji rë Nina, sehe cachja xu me cuitjin:

—Juhun vihi ne, sehe siuhun tsë tsë cojo xingun ta, ¹⁸ hacuaha cuichjá nga cojo nuju ta quihndë cojo nixtin xi cjuiniji sa ne, ha quihndë cayaan cuëhë xan rë uva. Cuëhë, peru hisca hya xi cuinduva Nina sahmi me gobiernu. —Cuatjin xu cachja Jesús.

¹⁹ Hane xi cafaha me ngu niñutsju hacuaha casua me nacuechji rë Nina ne, sehe cavotohocja xu me niñutsju jan. Hane xi casua rë me apóstol jan ne, sehe cachja xu me cuitjin:

—Vihi ne, yojo naha vi, xi tisuá xi cueya ngatsë nuju. Cuitjin nihñu xcusun vihi yasen ni, cojo sa xi ninguitsjun ná. —Cuatjin xu cachja Jesús.

²⁰ Hane xi cajnetaha cajinë nguixun me ne, hacuanitjin xu ni casahmi me cojo vasu. Hora xi casua rë me apóstol ne, cuitjin xu cachja me:

—Xan vihi ne, vihi jni naha xi cuetju ngatsë nuju. Cuatjin xi cuma chihin compromisu xatsë xi tisahmi Nina cojo xuta.

²¹ Peru chutsujun ni, cha xi sahmi ná entregadu ne, nguehe tacun cha ngajñi naja. ²² Hane ngahan xi Quihndi rë Xuta Jain ngahan ne, hatuxa tjin

ná xi cueya sacuatjin cavichaya Nina tsahan. Peru jemu chojyihí tsêhê cha xi sahmi ná entregadu. —Cuatjin xu cachja Jesús.

²³ Ngajan xi yêjê xu apóstol jan ne, cavetsihin cavinenguise xicjin me jarê me xi sahmi xcusun vêhê.

Yo xi hitsê sa matitjun

²⁴ Hya xi camá xu ne, cavetsihin sacuaaha xi meje scaanya me ngajñi rê me yo xi chja xuta xi hitsê sa matitjun. ²⁵ Ngajan xi Jesús ne, cuitjin xu cachja me:

—Yêjê ni xuta xi matitjun nguehe ngasunhndê ne, jercu sahmi yehe me yojo rê me sacuaaha xi me vêhê má me nai rê xuta. Hacuaha jercu meje rê me xi yêjê xuta ne, cuichja me xi jemu ndaja me xi matitjun vê. ²⁶ Peru ngayun ne, mijí rê xi cuatjin nihñu ta xi meje rê ne, ngu xi matitjun tsêhê ngajñi nuju ne, catitsinguijne yojo rê sacuaaha ngu xi chûva nu rê. Hane ngu xi vitexa tsêhê ngajñi nuju ne, hacuaaha catitsinguijne yojo rê sacuaaha ngu hndixahan. ²⁷ ¿Yo xi hitsê sa matitjun ni? ¿Há ngu xi tijinê ne, o há tsajin ne, há ngu hndixahan xi cjuí cani comida? Xi tijinê ne, hatuxa vêhê xi hitsê sa matitjun. Peru ngahan ne, tejña ngajñi nuju sacuaaha ngu hndixahan nuju.

²⁸ Ngayun ne, ngayun xi cacaa nuju cojo yêjê cjuañihí xi cavatjuun camá. ²⁹ Vêhê xi sacuaaha casuaxa ná Nahmi naha xi ngahan sahme gobiernu ne, cuatjin suáxa nuju xi nihñu gobiernu, ³⁰ cojo sa xi ngayun ne, hacuaaha xinu siuhun cojo ná ngajan hiscan sahme gobiernu. Hacuaha suáxa nuju xi nichuvun cjuatacun rê yêjê tejó tjê naja, ngayaan xi tjê rê xutachanga naja Israel ngayaan. —Cuatjin xu cachja Jesús.

Casua Jesucristu camachaya rê Pedru xi cuichja me xi hvín me yo Jesucristu

³¹ Hacuaha cachja sa xu Jesús cuitjin cojo Pedru xi hacuaaha hmí rê me Simón:

—Chutsujun ni Simón. Satanás ne, casacu rê cahndê xi tsichuva cjuatacun nuju ngayujun ni. ³² Peru ngayun Simón ne, caféhya rê Nina ngatsê nuju, cojo sa xi hacuiin cumandaya tacún sacuatjin xi mangutacún cojo ná. Hane hya xi ngayun cuyun nga ndiya naha ne, tuhun ngahñu xingun. —Cuatjin xu cachja Jesús.

³³ Ngajan xi Pedru ne, cachja xu me cojo Jesús cuitjin:

—Tatá. Ngahan ne, tsingatehen cjuê ndavaya cojo nuju hisca tsingatehen cueya cojo nuju. —Cuatjin xu cachja Pedru.

³⁴ Ngajan xi Jesús ne, cuitjin xu cafayangui me tsêhê Pedru:

—Nguehe cuichjá cojo nuju, Pedru. Chaja sa xi squihnda ngu xahnda ne, ha jyan ndiya canújun xi hyúun yo ngahan. —Cuatjin xu cachja Jesús.

Camatiña hora xi chjahá rê Jesucristu

³⁵ Hacuaha cachja me cojo xuta ladu rê me cuitjin:

—Hya xi catsingátju nuju xi cachjá cojo nuju xi chuun tujún, chuun changa hacuaaha chuun chuxinxte ne, ¿há quixi xi tsajin mé camachaja nuju? —Cuatjin xu cachja Jesús.

Hane xuta ladu rê me jan ne, cuitjin xu cachja me:

—Juun, tsajin mé. —Cuatjin xu cachja me.

³⁶ Hane Jesús ne, cachja nga xu me cuitjin:

—Peru quihndê ne, jarê ngayun xi tjin nuju tujún, tjin nuju changa ne, chuhun, tángun cojo. Hane yo xi tsajin rê ngu quichandujú ne, catiteña

tsjanga rē ne, sehe catatsē ngu quichandujú. ³⁷ Cuatjin meje rē ta, tsēhē xi nguehe cuichjá cojo nuju ta hacutjin xi camahindu tsahan xcun xujun rē Nina ne, hatuxa tjin rē xi cuetjucaa, cjuá xi chja cuitjin: “Cuichja xuta tsēhē me xi ngu xuta tsehen me.” Cuatjin camahindu. Hatuxa cuetjucaa sacuatjin camahindu. —Cuatjin xu cachja Jesús.

³⁸ Sehe ngajan xi xuta ladu rē Jesús jan ne, cuitjin xu cachja me:

—Chutsujun ni, tatá. Nguehe ne, ha siu jo quichandujú. —Cuatjin xu cachja me.

Sehe ngajan xi Jesús ne, cuitjin xu cafayangui me:

—Cojo vēhē ne, ha cuma. —Cuatjin xu cachja me.

Casahmi Jesucristu oración rē me ngajan Ndetjún Olivu

³⁹ Hya xi camá ne, xi cavetju xu me tsēhē nandya Jerusalén ne, sacuatjin xi ha xcusun rē me ne, quiji xu me Ndetjún Olivu. Hacuaaha cojo yējē xuta ladu rē me quiji xu me cojo rē me. ⁴⁰ Hane xi cafehe me jan ne, cachja xu me cojo xuta jan cuitjin:

—Chjahyun rē Nina xi hacuiin chjaháchuva nuju cojo cjuatacun nuju. —Cuatjin xu cachja me.

⁴¹ Hane xi quijixin me hitsē tsēhē xuta ladu rē me jan ne, sehe ngajan cavixuhnchi xu me xi sahmi me oración rē me, ⁴² cuitjin xu cachja me:

—Ngayun Nahmi naha, sá mé ni xi meje nuju ne, chjuhunxun cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan. —Cuatjin xu cachja me.

⁴³ Hya xi camá ne, cavēē xu me ngu ángel xi canduva tsēhē ngahnga, casua rē me ngahñu. ⁴⁴ Hane xi jemu jima ndaya cacun xu me ne, hitsē sa jercu cafehya rē me Nina. Hacuaaha ndasueya xi cavetju rē me ne, sacuaaha jni xu cún xi cavixu nangui.

⁴⁵ Hane xi cavisatjenhnga xu Jesús xi cajnetaha casahmi me oración rē me ne, xi cavuya quiji me hiscan siu xuta ladu rē me jan ne, casacutsja xu me xi siufē, ngatsē rē cjuachoho rē. ⁴⁶ Sehe ngajan xi Jesús ne, cuitjin xu cachja me cojo xuta jan:

—¿Mé má cuatjin tsjuñufun ni? Tisatjunhngun ne, nihñu oración nuju, sátu chjaháchuva nuju cojo cjuatacun nuju. —Cuatjin xu cachja Jesús.

Cafaha xuta Jesucristu

⁴⁷ Jinguyējē rē xi tichja cuaha xu Jesús ne, ha tu ñahñu jercu cjín xuta cafehe me. Hane cha xi hmi rē Judas, ngu cha ngajñi rē me xi tejó xi má ladu rē Jesús jan ne, titjun xu cha xcun xuta cjín jan cjui cha. Hane xi cafehe cha jan ne, sehe quijitiña xu cha xi cuitatsuha cha Jesús xi sua cha me nina. ⁴⁸ Ngajan xi Jesús ne, cuitjin xu cachja me cojo cha:

—Judas, ¿há cuatjin cuitatsuhun ná xi nihñu ná entregadu, ngahan xi Quihndi rē Xuta Jain ngahan? —Cuatjin xu cachja me.

⁴⁹ Hane xi cajne rcu xuta xi siu cojo Jesús xcusun xi cuma jan ne, sehe cachja xu me cuitjin:

—Tatá. ¿Há cuijin rē me quicha? —Cuatjin xu cachja me.

⁵⁰ Hya xi camá xu ne, ngutjen cavaja ngu me jan cha hndixahan rē nahmi xi matitjun tsēhē yējē ni nahmi, hane cavatēsun xu me tyjavañuju quixi cha.

⁵¹ Hane ngajan xi Jesús ne, cuitjin xu cachja me:

—Camá ni. —Cuatjin xu cachja me.

Hane xi cavetahatsja xu me hiscan cati rē cha ne, camandaja xu cha casahmi Jesús. ⁵² Hane nahmi xi matitjun cojo cha mayu yungun xi matitjun

cojo xutachanga, xi cafehe me xi cjuaha me Jesús ne, cachja xu Jesús cojo rë me cuitjin:

—¿Há nduvun chjuhun ná sacuaaha ngu xuta xi chëjë me, xi cuatjin nduvun cojo ya cojo quicha vë ni? ⁵³ Xi cavitejñaya cojo nuju nchunchujun ni ndatsen yungun jan ne, cavetuhunntsuun ná. Peru quihndë cavechú hora xi casua Nina cahndë xi nihñu cojo ná tu mé ni xi meje nuju, cavechú hora xi Satanás cuitexa. —Cuatjin xu cachja Jesús.

Cachja Pedru xi hvín me yo Jesucristu

⁵⁴ Hya xi camá xu ne, xi cafaha xuta jan Jesús ne, quijicojo me me ndava nahmi xi matitjun tséhë yëjë ni nahmi. Pedru ne, hacuaaha tjengui xu me cjui me tu cjin tu cjin ni hacutjin cjui xuta jan cojo Jesús. ⁵⁵ Hane xi cafehe xu me jan ne, casahmi me ngu ndava ndihí ngajan ndatsen ndihya, sehe ngajan quiji me caviyuju tangun me. Hacuaha cojo xu Pedru quiji me cavëña tangun me cojo xuta jan. ⁵⁶ Hane xi cavëë xu na hndixahan rë nahmi jan Pedru, tacun me xcun ndihí jan ne, xi cavutsejenndaja na me ne, sehe cachja xu na cuitjin:

—Me xi cuijyihí vi ne, cojo me tacun me cojo me xi cuajyihí vë hya. —Cuatjin xu cachja na.

⁵⁷ Hane Pedru ne, cavitijaya me cachja xu me cuitjin:

—Hveen yo vë. —Cuatjin xu cachja me.

⁵⁸ Xi cavatju nga ngu hora lihndi ne, xi cavëë nga ngu cha Pedru ne, cachja xu cha cuitjin:

—Ngayun ne, hacuaaha ladu rë me xi cuacun vë má ngayun. —Cuatjin xu cachja cha.

Ngajan xi Pedru ne, cuitjin xu cachja me:

—¡Éya, hacuiin! —Cuatjin xu cachja me.

⁵⁹ Xi cavatju sacuaaha ngu hora nga xu ne, cachja nga ngu cha xi tacun jan cuitjin:

—Ha cjuaquixindaja ta cha xi cuijyihí vi ne, cojo cha tacun cha cojo cha xi cuajyihí vë, tséhë xi hacuaaha cha Galilea cha. —Cuatjin xu cachja cha.

⁶⁰ Ngajan xi Pedru ne, cuitjin xu cafayangui me:

—Hveen mé xi nújun vë. —Cuatjin xu cachja me.

Hane ha tu tichja cuaha xu Pedru ne, ha tu ñahñu cajindaya ngu xahnda jan. ⁶¹ Ngajan xi Nai naja ne, cavuya vutsejen xu me Pedru. Hane Pedru ne, catsinguitsjen xu me cjuaxi cachja Nai naja cojo rë me, xi cachja me cuitjin: “Chaja sa xi squihnda ngu xahnda ne, hacuaaha camá jyan ndiya nújun xi hyúun yo ngahan.” Cjua vëhë xi catsinguitsjen xu Pedru. ⁶² Hane xi cavetju xu me candatsen ne, cajihnda susu me.

Catsixcuehyu xuta Jesucristu

⁶³ Hane cha xi siutahá sahmi cuidadu rë Jesús jan ne, titsixcuehyu xu cha me hacuaaha tivaja cha me. ⁶⁴ Hane xi cavetsa xu cha tuxcun me ne, sehe cavaja sa cha me, sehe cachja xu cha cuitjin:

—¡Tinoje! ¿Yo xi tivaja ri? —Cuatjin xu cachja cha.

⁶⁵ Hacuaaha jemu cjin sa xu cjuaxi cachja cha xi choho chja cha tséhë me.

Casahmicuenda xuta xi matitjun jyë rë Jesucristu

⁶⁶ Hane xi camá nchujun jan ne, camatangun xu xuta changá tséhë nandya jan cojo nahmi xi matitjun cojo cha xi vicuya cjuachacun. Sehe quiji chani xu rë Jesús xcun xuta xi cuacun jan xi chjahácuenda rë jyë rë me. ⁶⁷ Hane xi cafehe Jesús jan ne, sehe cavinenguise xu xuta jan cuitjin:

—Sá xi ngaye xi catsingatju Nina ngaye ne, tinoje cojo niji. —Cuatjin xu cavinenguise xuta jan.

Sehe ngajan xi Jesús ne, cuitjin xu cafayangui me:

—Sá xi cuichjá cojo nuju ne, hatuxa cumacjaain nuju xi cuichjá.
 68 Hacuaha sá xi cjuinenguësë nuju ngu cjua ne, hatuxa chjayunnguun tsahan. 69 Peru cuetsihin cojo quihndë ni ne, ngahan xi Quihndi rë Xuta Jain ngahan ne, cuitejña ladu quixi tsëhé Nina, me xi jemu hñu ngahñu rë. —Cuatjin xu cafayangui Jesús.

70 Ngajan xi yëjë ni xuta jan ne, cavinenguise xu me Jesús cuitjin:

—¿Há ngaye xi Quihndi rë Nina ngaye ni? —Cuatjin xu cavinenguise me.

Hane Jesús jan ne, cuitjin xu cafayangui me:

—Sacuatjin nújun vë ne, cuatjin jain. —Cuatjin xu cafayangui Jesús.

71 Ngajan xi xuta xi cuacun jan ne, cuitjin xu cachja me cojo xicjin me:

—¿Mé sa nihña xuta xi tsinguixi me jyë rë cha? Ha canuhyaan suvaan xi hntsua cha cavetju xi cachja cha. —Cuatjin xu cachja xuta.

23

Cavisehen Jesucristu xcun Pilatu

1 Hya xi camá ne, cavisatjenhnga yëjë xu xuta xi matitjun jan ne, sehe quijicojo me Jesús xcun Pilatu. 2 Hane cavetsihin xu cavinchajyë me cuitjin:

—Casacuntsin cha xi cuijyihí vi tiviseccjan cha cjuatacun rë xuta. Hacuaha mijí rë cha xi cuechjin tujúnsa niji cojo César, me xi matitjun. Hacuaha chja sa cha ta hacuí cha xi catsingatju Nina cha, hacuaha matitjun xu cha. —Cuatjin xu cachja me xi cavinchajyë me Jesús.

3 Sehe ngajan xi Pilatu ne, cavinenguise xu me Jesús cuitjin:

—¿Há ngaye xu matitjun ngaye tsëhé xuta tjë rë Israel? —Cuatjin xu cavinenguise Pilatu.

Hane Jesús ne, cuitjin xu cafayangui me:

—Cuatjin sacuatjin nújun vë. —Cuatjin xu cafayangui me.

4 Ngajan xi Pilatu ne, cuitjin xu cachja me cojo nahmi xi matitjun cojo yëjë xutacjin jan:

—Sacuíin ná hisca ngu jyë rë cha xi cuijyihí vi. —Cuatjin xu cachja Pilatu.

5 Peru quijinduju sa xu cachja xuta xi matitjun jan cuitjin:

—Jemu tiviseccjan cha cjuatacun rë xuta ngatsë rë cjua xi tivicuya cha jingujyë ni distritu Judea vi. Cavetsihin cha hisca ngajan distritu Galilea, hisca nguehe cafehe cha. —Cuatjin xu cachja me.

Cavisehen Jesucristu xcun Herodes

6 Hane xi cahndë Pilatu cjua vëhé ne, sehe cavinenguise xu me xuta jan cuitjin:

—¿Há cha Galilea cha xi cuijyihí vi ni? —Cuatjin xu cavinenguise me.

7 Hane xi casacu xu rë Pilatu cjuaquixi xi hiscan xi vitexa Herodes canduva Jesús ne, sehe catsingatju xu Pilatu me xcun Herodes, tsëhé xi Herodes ne, hacuaha quitahá xu me ngajan Jerusalén nixtin hya. 8 Hane hya xi cavëë Herodes Jesús ne, jemu ndaja camá xu rë me, tsëhé xi ha titjun sa ne, jemu meje scuëë me Jesús, tsëhé xi ha machaya rë me cjua tsëhé Jesús, hacuaha meje scuëë xu me xi sahmi Jesús ngu cjuarcun. 9 Hane jercu cjin cjuachjinenguise casahmi xu me Jesús, peru Jesús ne, tsajin camahani mé xi cafayangui xu me. 10 Hane nahmi xi matitjun cojo cha xi vicuya cjuachacun ne, jemu tivincha xu me jyë rë Jesús. 11 Ngajan xi Herodes cojo sindadu rë me

ne, jemu casahmixta xu me cojo Jesús, hacuaha catsixcuehyu me me. Hane xi catsicaja xu me Jesús ngu tsjian xi jemu ndajyihi camahani ne, sehe cavuya catsingatju nga xu me Jesús xcun Pilatu. ¹² Hane nixtin hya ne, Herodes cojo Pilatu ne, jemu cavinga xu rë me xicjin me, handasa titjún xu ne, maji vëe xicjin me.

Camá entregadu Jesucristu xi cjue cueya me

¹³ Hya xi camá ne, xi casahmitangun xu Pilatu nahmi xi matitjun cojo xutaxa rë cojo xuta nandya ne, ¹⁴ sehe cachja xu me cojo cuitjin:

—Ngayujun ni matsejen ne, canduvuncujun cha xi cuijyihi vi nguehe matsejen, tsëhë xi xi má nuju matsejen ne, tiviseccjan cha cjuatacun rë xuta. Peru quihndë matsejen ne, chutsujun ta, xcún ni matsejen ne, cafahátaha rë cha, peru casacuiin ná hisca xi ngu jyë rë cha sacuatjin jyë xi cavinchun.

¹⁵ Hacuanitjin ni Herodes matsejen ta, casacuiin rë me jyë rë cha, vëhë xi catsicuya nga me cha. Chutsujun ta tsajin camahani mé casahmi cha xi vechú chuva rë xi niqnen cha. ¹⁶ Vëhë xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

¹⁷ Hatuxa xcusun xu rë Pilatu xi tsismi me ngu presu xi xuta vaxijin me nu nu ni nixtin rë suhi. ¹⁸ Peru yëjë ni xuta xi matitjun jan ne, ngu tangun ni camá xu me cajindaya me cachja me cuitjin:

—¡Nicuhun cha vi ne, Barrabás nismu cha! —Cuatjin xu cajindaya me.

¹⁹ Cha Barrabás ne, quiji cha ndavaya ngatsë rë xi casahmi xu cha ngu si cojo xutaxa rë, hacuaha catsiquehen xu cha. ²⁰ Peru ngu ndiya nga cachja xu Pilatu cojo xuta xi matitjun jan, tsëhë xi Pilatu ne, meje tsismi me Jesús. ²¹ Peru xuta xi matitjun jan ne, cavuya cajindaya nga me cachja xu me cuitjin:

—¡Tetuhun cha, tetuhun cha xcun cru! —Cuatjin xu cajindaya me.

²² Hane xi ma jyan ndiya ne, cavinenguise xu Pilatu xuta xi matitjun jan cuitjin:

—Peru ¿mé xi jemu choho casahmi cha ni? Tsajin camahani mé jyë rë cha casacu ná xi vechú chuva rë xi niqnen cha. Vëhë xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

²³ Peru yëjë ni xuta xi matitjun jan ne, quijinduju sa xu cajindaya me cafehya me xi setaha Jesús xcun cru. Vëhë xi cajne cacun xu Pilatu, ²⁴ hacuaha cavejña cacun xu me xi sahmi me hacutjin xi fehya xuta jan. ²⁵ Hya xi camá ne, catsismi xu me cha xi cafehya xuta xi matitjun jan, ngu cha xi quiji ndavaya tsëhë xi casahmi xu si cojo xutaxa rë hacuaha catsiquehen xu cha. Peru Jesús ne, casua xu Pilatu me xi cjue cueya me, sacuatjin meje rë xuta xi matitjun jan.

Casetaha Jesucristu xcun cru

²⁶ Hane xi cjuicojo sindadu Jesús ne, ngajan ndiya jan cavechútáha xu cha ngu me xi hmí rë Simón tsëhë nandya Cirene, xi nduva xu me quiji me nguijña. Hane cafaha xu sindadu jan me, catsicaniji xu cha me cru xi cjue me cojo hacutjin cjuí Jesús.

²⁷ Hane jercu cjín camaha xu ni xuta quiji me cojo Jesús hacuaha jercu cjín xu yachjin xi hisca chja hisca jihnda na xi jemu choho má rë na ngatsë rë Jesús quiji xu na cojo me. ²⁸ Hane xi cavuya Jesús cavutsejen me na ne, sehe cachja xu me cuitjin:

—Ngayun na quihndi nandya Jerusalén, xicachjihnduun ngatsë naha. Chjihndun ngatsë nuju suvun cojo ngatsë rë quihndi nuju ta, ²⁹ cuechú nixtin

xi cuichja xuta cuitjin: “Jemu ndaja tsëhë yachjin xi hatuxa maji sacu rë na quihndi; jemu ndaja tsëhë yachjin xi hisca ngu quihndi casacuiin rë na; hacuaha jemu ndaja tsëhë yachjin xi casacuiin quihndi catsicha na.” Cuatjin cuichja xuta. ³⁰ Nixtin hya ne, hacuaha cuichja xuta cojo ndetjün cuitjin: “Tjinengunsun ni.” Hane naxi ne, cuitjin cuichja me cojo: “Tatsun ni.” Cuatjin cuichja me ta, ³¹ sä xi cuitjin choho tisahmi xuta vi cojo ná quihndë, ngahan xi tangun ngahan sacuaha ngu ya xcuen ne, hatuxa hitsë sa choho sahmi me cojo nuju nchujun ni nguini, ngayun xi tangun ngayun sacuaha ngu ya quixí. —Cuatjin xu cachja Jesús.

³² Hacuaha cojo sa xu jo cha tsehen quijicojo sindadu jan cha, xi tsiquehen tangun cha cha cojo Jesús. ³³ Hane xi cafehe cha cojo Jesús hiscan xi hmí rë Nínda Rcuun ne, ngajan cavetaha xu cha Jesús xcun cru hacuaha caviyujutaha sa cha catsijo cha tsehen jan xcun cru rë cha. Ngu cru xi quitahá ngu cha ne, casecun xu táha xcun tsëhë Jesús, hane ngu nga ne, táha quixi. ³⁴ Ngajan xi Jesús ne, cachja xu me cuitjin:

—Ngayun Nahmi naha. Ninchatuhun rë xuta vi ta, hvíin me mé xi tisahmi me. —Cuatjin xu cachja Jesús.

Hane xi cuatëcja sindadu tsjian rë Jesús jan ne, cavaxë xu cha ngu suerte. ³⁵ Hane xutacín jan ne, caxinchacun xu me cavutsejen me xcusun xi tijima jan. Hacuaha xutaxa rë jan ne, cavejnucëë me Jesús, cuitjin xu cachja me:

—Cavaxëtje cha jingu sa xuta. Quihndë ne, cataxëtje suvá cha yojo rë cha, sä xi hacui jain cha xi cavaxijin Nina hacuaha catsingatju me. —Cuatjin xu cachja xutaxa rë.

³⁶ Hacuaha sindadu jan ne, catsixcuehyu xu cha Jesús. Quijitiña cha hiscan tyjangui me xcun cru, hane meje sua xu cha xan yufa cuihi me, ³⁷ sehe cachja xu cha cuitjin cojo rë me:

—Sá xi ngaye jain matitjun ngaye tsëhë xuta tjë rë Israel ne, naxetje sove yojo riji. —Cuatjin xu cachja cha.

³⁸ Hacuaha camahindu xu ngujo cjua rcu cru rë Jesús xi chja cuitjin: “Matitjun cha vihi tsëhë xuta tjë rë Israel.” Cuatjin xu camahindu. Jyan hne camahindu cjua xi cuacun vë: hne griego cojo latín cojo hebreo.

³⁹ Hane ngu cha tsehen xi cojo casetaha xcun cru jan ne, cuitjin xu choho cachja cha tsëhë Jesús:

—¿Hacuiin ngaye xi catsingatju ri Nina ni? ¡Naxetje sove yojo riji ne, hacuaha naxetje ni! —Cuatjin xu cachja cha.

⁴⁰ Hane xi cavatëcja xu cha xingu jan cjua rë cha xi choho chja tsëhë Jesús ne, cuitjin xu cachja cha:

—¿Há rcuiin Nina, quihndë xi tivatjun castigu sacuatjin tivatju me vëhë tijima? ⁴¹ Ngayaan ne, cojo cjuaquixi xi tivatjun tijima ta, ngatsë rë xcusun xi canihña ne, vëhë xi vechú chuva rë xi cuitjin tivatjun castigu. Peru me vihi ne, tsajin mé xi jemu choho casahmi me. —Cuatjin xu cachja cha.

⁴² Sehe cachja xu cha cojo Jesús cuitjin:

—Jesús, ninguitsjun ná hya xi cuinduvun nihñu gobiernu. —Cuatjin xu cachja cha.

⁴³ Hane Jesús ne, cuitjin xu cafayangui me:

—Cuichjá cojo nuju cjuaquixi ta ha cojo quihndë ni ne, cuinechun cojo ná ngajan cahndë ndajyihí hiscan xi hmí rë Paraíso. —Cuatjin xu cafayangui Jesús.

Xcusun xi camá hya xi cahme Jesucristu

⁴⁴ Hane hora vëhë ne, camajñu xu jinguyjë ni. Cavetsihin xi camanchisen ne, quiji cani rë hisca fane jyan, ⁴⁵ tsëhë xi tsuhi ne, ha quihndë casuaain xu ndavá rë. Hacuaha ngajan cahntsua yungun xi matitjun, tsjian xi vitechja rë tingotjo rë Ndava Nina ne, catiyavasen xu. ⁴⁶ Hya xi camá ne, jercu hñu camaha xu ni cachja Jesús cuitjin:

—Ngayun Nahmi naha. Ntsun cuejñá hasen naha. —Cuatjin xu cachja me. Hane xi cavatju cachja me cuatjin ne, cahme xu me.

⁴⁷ Hane ngu capitán xi secun tiña xu jan ne, xi cavëë cha xcusun xi camá jan ne, casahmi jyë casahmi hnga cha Nina, cachja xu cha cuitjin:

—Quixi jain xi cha xi cuijyihí vi ne, tsajin jyë rë cha. —Cuatjin xu cachja cha.

⁴⁸ Hane yëjë ni xutacjín xi camatangun me xi scutsejen xu me xcusun jan ne, xi cavatju cavëë me yëjë xcusun xi camá jan ne, cavuya me cafe xu me, ña yaha xu me rcu me ngatsë rë cjuachoho rë me. ⁴⁹ Peru yëjë ni xuta xi cavinga xu rë Jesús cojo yëjë yachjin xi cavetju me tsëhë distritu Galilea cojo Jesús ne, tsëhë cjin ni hinchacun cuaha xu me tivutsejen me xcusun xi tivatju Jesús.

Caseya nima Jesucristu cahntsua tsjun

⁵⁰ Hane tacun ngu xu me xi hmí rë José, ngu xuta nandya Arimatea, ngu nandya rë xuta tjë rë Israel. Me vëhë ngu xihin ndaja me hacuaha tsajin xu mé jyë rë me tjin. ⁵¹ Hacuaha cachuyiin xu rë me sacuatjin caviyuju xutaxa rë xi yahnga jan cjuatacun rë me cojo xcusun xi casahmi me. Hacuaha José jan ne, jemu meje xu rë me xi cuinduva Nina sahmi me gobiernu. ⁵² Ngajan xi me vëhë ne, quiji xu me xcun Pilatu, hane cafehya xu me nima Jesús.

⁵³ Hane xi casacu cahndë ne, quiji catsitujne me, sehe cavaxtë xu me ngu tsjian. Hya xi camá ne, quiji caveya xu me cahntsua ngu tsjun xi catjuhngui rë taha naxi, hacuaha hisca ngu xu nima cjëë seyaniji. ⁵⁴ Nixtin hya ne, vispra xu. Ha hisca meje cuechú xu hora xi cuisehen nixtin xi chjahájenda rë.

⁵⁵ Hane yachjin xi cojo xu me cavetjutangun me cojo Jesús ngajan Galilea ne, tjengui xu me quiji me cojo nima. Hane cavëë me tsjun hacuaha cavëë xu me hacutjin caseya nima. ⁵⁶ Hane xi cavuya me ne, cavëhëchjine xu me rqui cojo aceite xi ndaja jne tsëhë nima.

Hane xi camá nchujun jan, xi cavechú xu nixtin xi chjahájenda rë ne, caviyujuyuu xu me, sacuatjin vitexa ley rë Moisés.

24

Cavuya Jesucristu cjuahñu

¹ Peru tu casahasen ni tsëhë nixtin ngu tsëhë totje ne, yachjin jan ne, cavuya quiji nga xu me xcun tsjun jan hacuaha cavaha xu me rqui xi ha cavëhëchjine me jan. ² Hane xi cafehe me jan ne, cavëë xu me xi ndoyojo xi cavechja rë tingotjo rë tsjun jan ne, ha canivahaxin rë. ³ Hane xi cavisehen me cahntsua tsjun jan ne, cavëë xu me xi tsajin nima Nai naja Jesús. ⁴ Hane jinguyjë rë xi sacuiñiin rë me mé sahmi me ne, ha tu ñahñu camatsejen xu jo ángel jan, xi jercu tu setí camaha xu ni tsjian rë. ⁵ Hane xi jemu catsacjun me camá ne, catsiquindi xu me xcun me. Sehe ngajan xi ángel jan ne, cuitjin xu cachja cojo rë me:

—¿Mé má ngajñi rë nima vinchunsun me xi quicun? ⁶ Me vëhë ne, tsajin me nguehe ta cavuya me cjuahñu. Ninguitsjun hacutjin cachja me cojo nuju hya xi tacun cuaha me ngajan Galilea, ⁷ hya xi cachja me xi me xi Quihndi rë

Xuta Jain ne, hatuxa tjin xi cuma me entregadu tsja xuta tsehen, sehe cueya me xcun cru, hane xi cuma jyan nixtin ne, cuya nga me cjuahñu. —Cuatjín xu cachja ángel jan.

⁸ Sehe ngajan xi yachjín jan ne, catsinguitsjen xu me cjuarë Jesús. ⁹ Hane xi cavuya me xi quiji me xcun tsjun jan ne, quiji casua xu me camachaya rë xuta ladu rë Jesús xi tengu jan cojo yëjë sa me xi yahnga tsëhë yëjë ni hacutjín cavatju me camá. ¹⁰ Quihndë ne, yachjín xi casua camachaya rë apóstol jan ne, hacui xu na María na Mágdala cojo na Juana cojo na María naa rë Jacobo cojo sa yachjín xi yahnga. ¹¹ Peru apóstol jan ne, xi má xu rë me ne, súv cjuangarca xi chja yachjín jan, vëhë xi camacjaain xu rë me.

¹² Peru Pedru ne, vangasanii xu me quiji me hiscan tacun tsjun jan. Hane xi cafehe me jan ne, catsiquindi xu me yojo rë me, sehe cavutsejenya xu me cahntsua tsjun jan ne, hane cavëë xu me súv tsjian jan siu. Sehe cavuya cafe xu me. Jercu quijircun xu rë me tsëhë xcusun xi camá jan.

Ndiya Emaús

¹³ Hya xi camá ne, ha nixtin hya xu ni ne, jo cha ladu rë Jesús jan ne, cavetju xu cha quiji cha ngu nandya xi hmí rë Emaús, xi tacun sacuaaha chuva rë tengu kilómetro tsëhë Jerusalén. ¹⁴ Hane ndiya cjuí cha jan ne, cavisiajmi xu cha ngajñi rë cha tsëhë yëjë xcusun xi camá. ¹⁵ Hane jinguyëjë rë xi tivisiajmi cha jan ne, cavechútáha xu Jesús cha, hane quijitangun xu me cojo cha. ¹⁶ Peru handasa vutsejen cha me ne, casuaain xu Nina cahndë xi scuëë cha xi hacui me. ¹⁷ Sehe ngajan xi Jesús ne, cavinenguisse xu me cha cuitjín:

—¿Mé cjuarë xi tivisiajmu xi táha tivangun? —Cuatjín xu cavinenguisse me.

Hane cha xi cuacun jan ne, caxinchacunhñu xu cha, hacuaaha jemu va tjin cacun cha. ¹⁸ Hane ngu cha xi cuacun jan xi hmí rë Cleofas ne, cachja xu cha cojo Jesús cuitjín:

—¿Há ngu tu tu ngayun xi nechuntuhun nguehe Jerusalén xi cuatjín hyúun mé xi sehe cavatju camá ni? —Cuatjín xu cachja cha cojo Jesús.

¹⁹ Sehe ngajan xi Jesús ne, cuitjín xu cachja me cojo cha:

—¿Mé xcusun jan? —Cuatjín xu cachja me.

Hane cha xi cuacun jan ne, cuitjín xu cachja cha:

—Xcusun xi cavatju ngu me xi hmí rë Jesús camá, ngu me xi canduva tsëhë nandya Nasaret. Me vëhë ne, xi camá rë Nina cojo xi camá rë yëjë ni xuta ne, ngu profeta me, xi jemu tjin rë me ngahñu xi casahmi me yëjë ni xcusun xi casahmi me, hacuaaha xi cavicuya me yëjë ni cjuarë xi cavicuya me. ²⁰ Hacuaha nahmi xi matitjun cojo xutaxa rë yungun naja ne, casahmi me entregadu me vëhë cojo xutaxa rë Roma xi cueya me. Hane cuaha jain tjin cavetaha me xcun cru. ²¹ Ngayin ne, ha cavetihin tacuín xi me vëhë xi cuaxëtje naja me ngayejen ni गयाan xuta tjë rë Israel. Cojo yëjë sa ne, quihndë ne, ha camá jyan nixtin cavatju xcusun xi cuacun vë. ²² Hacuaha ngujo yachjín tsëhë ladu niji ne, catsisca na cjuatacun niji, tsëhë xi xati sa nguítajñu ne, quiji xu na xcun tsjun, ²³ hane xi casacuiin rë na nima ne, cafehe cachja na cojo niji xi cavëë na sacuaaha ángel ngajan, hane cachja cojo rë na xi me vëhë ne, tacun me cjuahñu. ²⁴ Hya xi camá ne, ngujo cha xi siu cojo niji ne, quiji cha xcun tsjun jan, cavëë cha xi quixi jain cjuarë xi cachja na, peru me vëhë ne, cahviin cha me. —Cuatjín xu cachja cha cojo Jesús.

²⁵ Sehe ngajan xi Jesús ne, cuitjín xu cachja me cojo cha:

—Ngayun yuma hasen, ngayun xi jemu tafi sehe macjain nuju yëjë cjuarë xi cachja profeta. ²⁶ ¿Hacuuiin hatuxa casahmi nguýjë xi me xi catsingatju

Nina ne, cuatjin cavatju me cjuañihi, sehe camajyë camahnga me cojo hasen ndajyihi rë me? —Cuatjin xu cachja Jesús.

²⁷ Hane sehe ngajan xi Jesús ne, casuacuenda xu me cha mé vijne yëjë ni cju a xi camahindu tsëhë me xcun yëjë ni xujun rë Nina, cavetsihin me cojo cju a xi catsihindu Moisés, hane cajnetaha me cojo hisca cju a xi catsihindu yëjë sa profeta.

²⁸ Hya xi camá ne, xi camatiña xu cha cojo Jesús nandya hiscan cju i cha jan ne, Jesús ne, casahmi xu me sacuaaha xi cjuenduju sa me. ²⁹ Peru cha xi cuacun jan ne, jercu cjin xu cachja cha cojo rë me cuitjin:

—Tinechun cojo niji ta quihndë ne, ha quiji hora hacuaaha hisca meje cju e nixtin. —Cuatjin xu cachja cha.

Ngajan xi Jesús ne, quiji xu me cojo cha, hane cavisehen me ndava cha xi cuejna me cojo cha. ³⁰ Hane xi ha cafaha me cahndë rë me xcun maxë xi sinë me niñu cojo cha ne, sehe cafaha xu me ngu niñu, hane casua me nacuechji rë Nina, sehe cavatëlanga me, casua xu me cha. ³¹ Hane hora vëhë xu casua Nina cahndë xi camá cavëë cha xi hacui Jesús. Hya xi camá ne, ha tu ñahñu cafëya xu me. ³² Hane sehe cachja xu cha ngajñi rë cha cojo xicjin cha cuitjin:

—Jercu ndaja camahani camá rë xahasen naja, hora xi tichja me cojo naja ngajan ndiya jan mé vijne cju a xi hinchu xcun xujun rë Nina! —Cuatjin xu cachja cha cojo xicjin cha.

³³ Hane hora vëhë ni ne, cavisatjenhnga xu cha tsëhë maxë jan, sehe cavuya quiji cha Jerusalén. Hane xi cafehe cha jan ne, casacutsja xu cha me xi tengu jan, tjintangun me cojo me xi yahnga sa. ³⁴ Hane sehe cachja xu me cojo cha cuitjin:

—Quixi jain xi cavuya Nai naja cjuahñu, hacuaaha cha Simón ne, cavëë cha me. —Cuatjin xu cachja me.

³⁵ Ngajan xi cha xi cuacun jan ne, casuacuenda xu cha hacutjin cavatju cha camá ngajan ndiya, hacuaaha hacutjin camá cavëë cha xi hacui Jesús hya xi cavatëlanga me niñu.

Cafehe Jesucristu hiscan tjin tangun xuta ladu rë me

³⁶ Hane tu tichja cuaha xu cha xi cuacun jan cojo me vëhë cju a jan ne, ha tu ñahñu cavëë xu yëjë me Jesús, secun me ngajñi rë me. Hane Jesús ne, cachja xu me nina cojo rë me cuitjin:

—Nina sua nuju me cjuandaja cjuajeya. —Cuatjin xu cachja me.

³⁷ Hane yëjë xuta ladu rë Jesús jan ne, jemu catsacjun camaha xu ni me camá tsëhë xi xi má rë me ne, tivutsejen me ngu hasen. ³⁸ Ngajan xi Jesús ne, cachja xu me cuitjin:

—¿Mé má cuatjin jemu fircun nuju? Hacuaaha ¿mé má cuatjin mangu majo tacún? ³⁹ Chutsujun ntsa cojo ntsacú ta ngahan vi. Nduvun tetuhun ntsun ná, hacuaaha chutsujun ná ta ngu hasen ne, tsajin yojo rë hacuaaha tsajin nínda rë sacuatjin chutsujun ná ngahan cojo yojo cojo nínda naha. —Cuatjin xu cachja Jesús.

⁴⁰ Hane xi cavatju cachja me cju a vëhë ne, sehe catsingacun xu me tsja me cojo ntsacu me. ⁴¹ Hane xuta ladu rë Jesús jan ne, hisca maji xu macjain rë me ngatsë rë xi jercu tu ndaja má camahani rë me hacuaaha hisca fircun rë me. Ngajan xi Jesús ne, cavinenguise xu me xuta jan cuitjin:

—¿Há tjin nuju hitsë xi xinëë nguehe? —Cuatjin xu cavinenguise me.

⁴² Hane ngu me jan ne, casua xu me ngu rquí ti camatsju. ⁴³ Hane xi cafaha me ne, cajnë xu me xcun yëjë ni xuta. ⁴⁴ Sehe cachja xu me cuitjin:

—Yějē xcusun xi cavátju camá ne, tséhē véhē cjua xi cachjá cojo nuju hya xi tejña cuaha ngajñi nuju. Cachjá cojo nuju ta hatuxa meje rē xi cuetjucaa yějē hacutjin camahindu tsahan xcun xujun xi catsihindu Moisés cojo xcun xujun xi catsihindu profeta, cojo xcun xujun tséhē Salmo. —Cuatjin xu cachja Jesús.

⁴⁵ Sehe ngajan xi Jesús ne, cavuxaha xu me cjuatacun rē xuta jan, cojo sa xi cuijnrcu me cjua xi camahindu xcun xujun rē Nina. ⁴⁶ Hacuaha cachja xu me cuitjin:

—Cuitjin camahindu xi me xi catsingatju Nina ne, hatuxa cuatju me cjuañihi, hane xi cjuē jyan nixtin xi cueya me ne, cuya nga me cjuahñu, ⁴⁷ hacuaha sacú cumachaya rē yějē ni xuta tséhē ngasunhndē xi sá xi mangucacun me cojo me véhē hacuaha tsindeya me cjuatacun rē me ne, tsinchataha Nina me tséhē jyē rē me. Jerusalén vi ne, nguehe cuetsihin cuitsojo cjua véhē. ⁴⁸ Ngayun cuinújun cojo xuta cjua vihi ta ngayun xi cahyun hacutjin camá. ⁴⁹ Chutsujun ni, ngahan tsingátju nuju Hasen xi ha cachja Nahmi naha xi sua nuju me. Peru ha tinechun ni nguehe nandya vihi hisca xi chjuhunntsun Hasen véhē, xi cuinduva hisca ngahnga. —Cuatjin xu cachja Jesús.

Quiji Jesucristu ngahnga

⁵⁰ Hya xi camá ne, cavaxéxin xu Jesús xuta ladu rē me tséhē nandya Jerusalén, quijicojo me me hisca nandya Betania. Hane xi cafehe me jan ne, catsiquijin xu Jesús tsja me hane catsinchacun me xuta jan. ⁵¹ Hane ngajñi rē xi titsinchacun me xuta jan ne, cavetjuxin xu me quiji me ngahnga. ⁵² Hane xuta ladu rē Jesús jan ne, xi cavatju cafaharcun me Jesús ne, sehe cavuya nga xu me Jerusalén cojo jemu jyē cjuasua. ⁵³ Hacuaha nchunchujun ni quiji xu me yungun xi matitjun, vaxëndaja me Nina.

Cjuandajyihî xi catsihindu San Juan Tsêhê Jesucristu

¹ Ntsacu cavetsihin ngasunhndê ne, ha tacun ngu me xi hmî rê Cjua. Me vêhê ne, tacun me cojo Nina, hacuaha Nina me. ² Me vêhê ne, hisca ntsacu cavetsihin ne, ha cuatjin tacun me cojo Nina. ³ Yêjê ni xi tjin ne, cojo me vêhê catsindaja Nina. Tsajin mé xi camandaja xi cuajin me vêhê camandaja. ⁴ Me vêhê xi hatuxa tjin rê me cjuahñu, hane cjuahñu vêhê ne, vêhê sua cjuahasen xi cuma rê xuta. ⁵ Hane cjuahasen vêhê ne, vitsojo ngajñi rê cjuatsehen sacuatjin sahmi hasen ngu ndihi ngajñi jñû, peru cjuatsehen ne, cacaain rê catsicjê rê cjuahasen jan.

⁶ Cavêjña ngu me xi hmî rê Juan, xi Nina catsingatju rê. ⁷ Me vêhê ne, cavetjujñi me xi cuichja me cojo xuta hane tsinguixi me tsêhê cjuahasen jan, cojo sa xi ngatsê rê cjua xi cuichja me ne, cumacjain rê yêjê ni xuta. ⁸ Hacuini me vêhê xi cjuahasen jan me ta me vêhê ne, cavetjujñi me cojo sa xi cuichja me tsêhê cjuahasen jan. ⁹ Cjuahasen xi cjuaquixi jan ne, xi visehen ngajñi rê cjuatacun rê yêjê xuta ne, sehe canduva nguehe ngasunhndê.

¹⁰ Me xi hmî rê Cjua jan ne, cavêjña me ngasunhndê. Hacuaha handasa cojo me xi catsindaja Nina ngasunhndê ne, peru xuta ne, hvîn me yo. ¹¹ Canduva me ngasunhndê rê suvá me, peru xuta nangui rê suvá me ne, cafahatsjaain rê me. ¹² Peru ngu jo xuta nangui rê me xi cafahatsja rê me hacuaha camangu cacun cojo rê me ne, me xi Cjua jan ne, casua me chuya rê xi cuma xuta xi cuacun jan quihndi rê Nina. ¹³ Xuta xi cuacun jan ne, hacuini camá me quihndi rê Nina chuya rê xi meje rê ngu xihin ngu quihndi ta suvá Nina casahmi me xi camá xuta xi cuacun jan quihndi rê me.

¹⁴ Me xi Cjua jan ne, camá me ngu xuta, hacuaha cavêjñacahndê me ngajñi niji. Hatuxa quitsê rê xahasen rê me cjuandaja, quitsê rê xahasen rê me cjuaquixi. Ngayin ne, cahyin hacutjin xi jemu jyê hnga me cojo hasen rê me. Jyê hnga me sacuatjin casahmi rê me Nahmi rê me. ¹⁵ Juan Vitenda rê Xuta ne, cachja me cojo xuta tsêhê me xi Cjua jan, cuitjin cachja me:

—Me vihi xi cachjá tsêhê, xi me xi sehe cuinduva ne, handasa ngahan canduvá titjun ne, peru me vêhê xi hitsê sa venguichji rê me xi cuma ná ngahan, tsêhê xi ha tacun me hya xi catsin ngahan.

¹⁶ Tsêhê xi hatuxa jemu quitsê rê xahasen rê me cjuandaja ne, vêhê xi ngayejen ni ne, hacuaha jemu cachjahanntsán cjuandaja. ¹⁷ Ley rê Nina ne, nima Moisés casua naja me, peru cjuandaja cojo cjuaquixi ne, Jesucristu casua naja me. ¹⁸ Tsajin camahani yo xi cavêê rê Nina. Suvá ni Quihndi ngu rê Nina xi hacuaha nina me hacuaha tacun tangun me cojo Nina Nahmi naja ne, me vêhê casua me camachaya naja yo xi Nina.

Cjua xi cachja Juan Vitenda rê Xuta

¹⁹ Cuitjin cachja Juan hya xi catsingatju xutaxa rê tsêhê nandya Jerusalén ngu jo nahmi cojo sacristán xi cjue cjuinenguise rê me Juan cuitjin:

—Ngayun ne, ¿yo ngayun? —Cuatjin cjuinenguise me. ²⁰ Hane hora xi cuatjin cavinenguise me ne, Juan ne, catsinguixi me, hacuini cavetsangui me, cuitjin catsinguixi me:

—Hacuini ngahan Xihin xi Tsingatju Nina. —Cuatjin cachja me.

²¹ Ngajan xi cavinenguise nga nahmi xi cuacun jan cuitjin:

—¿Mé ni ni? ¿Há xutachanga naja Elías ngayun? —Cuatjin cavinenguisse me.

Ngajan xi Juan ne, cuitjin cafayangui me:

—Hacuiin ngahan. —Cuatjin cafayangui me.

Ngahan xi cavinenguisse nga nahmi xi cuacun jan cuitjin:

—¿Há ngayun profeta xi jemu nechanyan rě? —Cuatjin cavinenguisse me.

Hane Juan ne, cuitjin cafayangui nga me:

—Jéya. —Cuatjin cafayangui nga me.

²² Ngajan xi nahmi xi cuacun jan ne, cavinenguisse nga me cuitjin:

—¿Yo ngayun ni? Tinújun cojo niji ne, cojo sa xi cuma nicuyin ngu cjuatsehē me xi catsingatju niji. ¿Mé nújun tsujun suvun? —Cuatjin cachja me.

²³ Ngajan xi Juan ne, cuitjin cafayangui me:

—Ngahan ne, xuta xi jercu hñu chjá ngeuhe hiscan jemu xín tsēhē nandya, xi catitsinguixi xuta ndiya tsēhē Nai naja, sacuatjin cachja profeta Isaías hatsēe nixtin. —Cuatjin cafayangui me.

²⁴ Quihndě ne, xuta xi cuacun catsingatju cha partidu fariseo xi cuichja me cojo Juan ne, ²⁵ cuitjin cavinenguisse me:

—¿Mé má cuatjin vitendun xuta sa xi hacuiin ngayun xi Tsingatju Nina ngayun, hacuiin ngayun xi profeta Elías ngayun, hacuiin ngayun xi profeta xi jemu nechanyan rě ngayun ni? —Cuatjin cavinenguisse me.

²⁶ Ngajan xi Juan ne, cuitjin cafayangui me:

—Ngahan ne, cojo nandá tivitēnda nuju, peru ngajñi nuju secun ngu me xi hyúun yo. ²⁷ Ngahan ne, canduvá titjun, sehe canduva me vēhē, peru hisca tsajin mé cumachjirēhē ngahan xi cuma rě me. —Cuatjin cafayangui Juan.

²⁸ Xcusun vēhē ne, camá ngajan ngu cahndě hiscan xi hmí Betania, ngunda vēhē tsēhē ndajyē Jordán, hiscan tivitenda Juan xuta.

Jesucristu sacuaaha chu tsánga xi sua Nina

²⁹ Xi camá nchujun jan ne, cavēe Juan xi nduva Jesús hiscan secun me. Hane cuitjin cachja Juan cojo xuta:

—¡Chutsujun ni! Cuajyihí me xi sacuaaha chu tsánga xi sua Nina xi tsicjě jyě rě xuta. ³⁰ Me vēhē xi cachjá cojo nuju xi me xi sehe cuinduva. Handasa ngahan canduvá titjun ne, peru me vēhē xi hitsě sa venguichji rě me xi cuma ná ngahan, tsēhē xi ha tacun me hya xi catsin ngahan. ³¹ Ngahan suva ne, hveen yo me. Peru cojo sa xi ngayaan xuta tjě rě Israel cumachaya naja yo me ne, vēhē xi cuitjin tivitēnda xuta. —Cuatjin cachja Juan.

³² Hacuaaha cachja Juan cuitjin tsēhē Jesús:

—Ngahan ne, cahvė Hasen rě Nina xi canduvajne tsēhē ngahnga sacuaaha ngu paloma, quiji casesun rcu me. ³³ Ngahan suva ne, hveen yo me, peru me xi cavitexa ná xi cuitēnda xuta cojo nandá ne, cuitjin cachja me cojo ná: “Me xi che xi cuinduvajne Hasen naha cjue sesun rcu ne, me vēhē xi cuitenda me xuta cojo Hasen naha.” Cuatjin cachja Nina cojo ná. ³⁴ Ngahan ne cahvė hacuaaha cachjá cojo xuta xi me vēhē xi Quihndi rě Nina me. —Cuatjin cachja Juan.

Me xi tjun tjun camá xuta ladu rě Jesucristu

³⁵ Xi camá nchujun nga jan ne, secun Juan cojo jo xuta ladu rě me. ³⁶ Hane xi cavēe Juan Jesús xi tivatju me jan ne, cachja me cuitjin:

—¡Chutsujun ni! Cuajyihí me xi sacuaaha chu tsánga xi sua Nina. —Cuatjin cachja me.

³⁷ Xi cahndë jo xuta ladu rë Juan cjua jan ne, quijitjengui me Jesús. ³⁸ Xi cavuya Jesús cavutsejen me xi cjuittjengui xuta jan me ne, sehe cavinenguisse Jesús me cuitjin:

—¿Mé meje nuju ngayun? —Cuatjin cavinenguisse me.

Ngajan xi xuta jan ne, cuitjin cafayangui me:

—Maestro, ¿jani nechun? —Cuatjin cavinenguisse me.

³⁹ Ngajan xi Jesús ne, cuitjin cachja me cojo jo xuta jan:

—Nduvun chutsujun. —Cuatjin cachja me.

Hane xi quiji vutsejen xuta jan ne, sehe cavëë me hiscan véjña Jesús. Sacuaha chuva rë fane ñuju hora vëhë. Hane caviyuju me ngajan cojo Jesús nixtin hya.

⁴⁰ Ngu xuta ladu rë Juan xi cahndë sacuatjin cachja me hacuaha quijitjengui rë Jesús ne, hacui Andrés, me xi hntsë Simón Pedru. ⁴¹ Me vëhë titjun quiji jaha me hntsë me Simón, hane xi casacu rë me ne, cuitjin cachja me cojo:

—¡Cahyin Mesías! —Cuatjin cachja me. (Mesías ne, hacui cjua xi meje cuichja: Me xi Tsingatju Nina.)

⁴² Hya xi camá ne, Andrés ne, quijicojo me Simón xicjin me ngajan hiscan tacun Jesús. Hane xi cafehe me jan ne, cavutsejenya Jesús xcun Simón ne, sehe cachja me cuitjin cojo rë me:

—Ngayun ne, Simón hmí nuju, peru chjuhunñuhu Cefas. —Cuatjin cachja Jesús. (Ñihi xi Cefas ne, tangun vijne cojo ñihi xi Pedru ta catsijo ni ne, ndyojo, meje cuichja.)

Cavaxijin Jesucristu Felipe cojo Natanael

⁴³ Hane xi camá nchujun jan ne, cavejña cacun Jesús xi cjue me ngu nandya tsëhë distritu Galilea. Chaja sa xi cjue me ne, cavechútáha me Felipe, hane cachja me cojo cuitjin:

—Nduvun, cuanguen cojo ná. —Cuatjin cachja me.

⁴⁴ Felipe ne, Betsaida nangui rë me, hiscan nangui rë Andrés cojo Pedru.

⁴⁵ Hya xi camá ne, Felipe ne, quiji jaha me Natanael, hane xi casacu rë me ne, cachja me cuitjin:

—Cahyin ngu xuta Nasaret xi hmí rë Jesús, quihndi rë José. Me vëhë xi catsihindu Moisés cojo jingu sa profeta tsëhë, ngajan xcun xujun rë Nina. —Cuatjin cachja Felipe cojo Natanael.

⁴⁶ Ngajan xi Natanael ne, cavinenguisse me cojo Felipe cuitjin:

—¡Ja! ¿Há cuma cuetjujñi ngajan Nasaret ngu xuta xi jemu venguichji rë ni? —Cuatjin cavinenguisse Natanael.

Ngajan xi cafayangui Felipe cuitjin:

—Ndove chutsijin ni. —Cuatjin cafayangui me.

⁴⁷ Hane xi cavëë Jesús xi camatiña Natanael ne, sehe cachja me cuitjin tsëhë:

—Chutsujun ni, cuajyihí ngu me xi xuta tjë rë Israel xi cjuaquixi jain, ngu me xi tsajin cjuandacha cahntsua xahasen rë. —Cuatjin cachja Jesús tsëhë Natanael.

⁴⁸ Ngajan xi Natanael ne, cuitjin cavinenguisse me Jesús:

—¿Hacutjin má xi cuatjin hyun yo ngahan ni? —Cuatjin cavinenguisse Natanael.

Ngajan xi Jesús ne, cuitjin cafayangui me:

—Chaja sa xi cuichja Felipe cojo nuju ne, ngahan ne, ha cahvë nuju hya xi sechun ngahma yaxujun jan. —Cuatjin cafayangui Jesús.

⁴⁹ Hane Natanael ne, cuitjin cachja me:

—Maestro, Ngayun xi Quihndi rë Nina ngayun, ngayun xi matitjun ngayun tsajan ngayaan xuta tjë rë Israel. —Cuatjin cachja Natanael.

⁵⁰Ngajan xi Jesús ne, cachja me cuitjin:

—Ngayun ne, camangu tacún cojo ná, tsëhë xi cachjá xi cahvë nuju hya xi nechun ngahma ya higo jan. Peru sehe chutsujun sa xcusun xi cuetjucaa xi hitsë sa venguichji rë.

⁵¹Hacuaha cachja sa Jesús cjua vihi:

—Cuichjá cojo nuju cjuaquixi ta ngayujun ni ne, cuechú nixtin xi chutsujun xi ngahnga ne, sacuaha xi tixaha, hacuaha ángel rë Nina ne, sacuaha xi cjuijne cjuiniji hiscan tejña ngahan xi Quihndi rë Xuta Jain ngahan. —Cuatjin cachja Jesús.

2

Cjuavixan xi camá ngajan Caná

¹Hane xi cavatju jyan nixtin ne, camá ngu cjuavixan ngajan Caná, distritu Galilea. Naa rë Jesús ne, ngajan quitahá me ndava suhi. ²Hacuaha Jesús cojo xuta ladu rë me ne, hacuaha camá me invitar xi cjue me ndava suhi, hane quiji me. ³Hya xi camá ne, café xan xi tsëhë suhi jan. Sehe ngajan xi naa rë Jesús ne, cuitjin cachja me cojo Jesús:

—Ha quihndë tsajin rë me xan nguehe. —Cuatjin cachja me.

⁴Ngajan xi Jesús ne, cuitjin cafayangui me:

—Hacuiin cuenda naha xi ngahan nújun cojo ná. Cjëë cuechú hora xi sahme mé xi sahme. —Cuatjin cafayangui Jesús.

⁵Ngajan xi naa rë Jesús ne, cuitjin cachja me cojo cha xi vincha xan jan:

—Tu mé ni xi cuichja cha cojo nuju ne, cuatjin nihñu. —Cuatjin cachja naa rë Jesús.

⁶Quihndë ne, siu ngajan jyun tiji xi ndoyojo camá, xi xinha nandá xi vitejnu xuta tjë rë Israel hitsë tu mé ni xcusun xi sahmixa me cojo, sacuatjin xi ha xcusun rë yungun rë me. Jima ngu tiji jan ne, xinha sacuaha yachantë o sa jyanchantë litru nandá. ⁷Ngajan xi cachja Jesús cojo cha xi vincha xan cuitjin:

—Ninguitsun rë tiji xi cuacun vë cojo nandá. —Cuatjin cachja me.

Ngajan xi cha xi cuacun jan ne, catsinguitsë camahani rë cha tiji jan cojo nandá.

⁸Hya xi camá ne, sehe cachja nga Jesús cuitjin cojo cha:

—Quihndë ne, chjuhun hitsë xi cavinchun tiji vë ne, tángun chanu rë xutacha. —Cuatjin cachja me.

Hane cuatjin casahmi cha xi cuacun jan. ⁹Hya xi camá ne, cavutaha xutacha jan nandá xi camá xan jan. Me vëhë ne, hisca hvíin me jani canduva xan jan, peru cha xi vincha xan xi cafaha quijicojo jan ne, vëë cha. Ngajan xi xutacha jan ne, cajindaya me cha xutavixan jan ne, ¹⁰sehe cachja me cojo cha cuitjin:

—Xcusun naja ne, titjun xan xi ndajyihí taan hvi xuta, hane ha xcun xi ha cjín cahvi me ne, sehe taan rë me xan xi ha va jyihí. Peru ngaye ne, hisca ndicmaha ni titehe xan xi ndajyihí. —Cuatjin cachja xutacha jan.

¹¹Cjuarcun xi tjun tjun casahmi Jesús vë ne, casahmi me ngajan Caná, distritu Galilea. Cuatjin catsingacun me xi jemu jyë hnga me cojo hasen rë me. Hane xuta ladu rë me ne, camangu cacun me cojo rë me.

¹² Xi cavatju vèhë ne, cavetju me quijijne me nandya Capernaum. Quiji me cojo naa rè me cojo xicjin me cojo xuta ladu rè me. Hane ngajan caviyujutaha me ngujo nixtin.

Cavaxë Jesucristu xuta xi sahmi ndetsin ndatsen yungun

¹³ Cavechú nixtin xi camatiña suhi xi hmí rè Pascua, ngu suhi xi sahmi xuta tjè rè Israel. Ngajan xi Jesús ne, quijiniiji me ngajan nandya Jerusalén.

¹⁴ Hane xi cafehe me jan ne, quiji me yungun xi matitjun. Ngajan cavèë me xuta xi tiviteña chu ndyaja cojo chu tsánga cojo chu nisétyava, hacuaha cavèë me xuta xi siu titsindeya tujún tsèhë xuta cojo tujún rè yungun. ¹⁵ Hane xi cavèë Jesús xi cuatjin tisahmi xuta jan ne, cafaha me ngu nahñu xi jiña ne, casahmi me ngu cuarta, sehe catsicanga me yèjë ni chu xteña, sa ndyaja sa tsánga. Hacuaha cacandí me tujún rè xuta xi tsindeya tujún, hacuaha catsindefa me maxë xi xinchasun tujún jan. ¹⁶ Hane xuta xi tiviteña chu nisétyava jan ne, cuitjin cachja Jesús cojo rè me:

—Tángunxun cojo chu xi cuicun vi. Xicanihñuu ndava Nahmi naha sacuaha ngu ndetsin. —Cuatjin cachja Jesús.

¹⁷ Ngajan xi xuta ladu rè Jesús jan ne, catsinguitsjen me xi camahindu xcun xujun rè Nina cuitjin: “Ngayun Nina naha, xi jemu hmú cáacun camahani ndya nuju ne, ña sca má rè xahasen naha.” Cuatjin camáhindu.

¹⁸ Ngajan xi xutaxa rè yungun jan ne, cuitjin cachja me:

—Quihndë ne, ñarë ngu cjuarcun xi nihñu cojo sa xi cumachaya niji xi tjin jain nuju chava rè xi cuatjin nihñu! —Cuatjin cachja me.

¹⁹ Ngajan xi Jesús ne, cuitjin cafayangui me:

—Ninguetsun yungun vihi ne, cahntsua xi jyan nixtin ne, ngahan sahme ndaja nga. —Cuatjin cafayangui Jesús.

²⁰ Hane xutaxa rè yungun xi matitjun ne, cuitjin cachja nga me:

—Yachan jyun nu quiji cani rè xi camandaja yungun naja vi. Hane sehe ngayun nujún ne, ¡cahntsua xi jyan nixtin ne, cuyun nindujun nga ni! —Cuatjin cachja xutaxa rè yungun jan.

²¹ Peru Jesús ne, hya xi cachja me tsèhë yungun jan ne, tsèhë yojo rè suvá me xi cachja me. ²² Vèhë xi hya xi cavuya Jesús cjuahñu ne, xuta ladu rè me ne, catsinguitsjen me xi cuatjin cachja Jesús, hane camacjain rè me cjua xi chja xujun rè Nina hacuaha camacjain rè me cjua xi cachja Jesús jan.

Vèë Jesucristu xahasen rè yèjë ni xuta

²³ Jinguyèjë rè xi cuatjin quitahá Jesús ngajan Jerusalén nixtin rè suhi tsèhë Pascua ne, jemu cjín xuta camangu cacun me cojo rè me, xi cavèë me cjuarcun xi Jesús tisahmi me. ²⁴ Peru suvá Jesús ne, camanguaain cacun me cojo xuta xi cuacun jan ta, tsèhë xi ha vèë me xahasen rè yèjë me xi cuacun vè.

²⁵ Hacuaha cuatjin camanguaain cacun me cojo xuta jan ta, tsèhë xi hacuiin sahmi nguyèjë xi tjin yo xi cuichja cojo rè me tsèhë xuta ta, tsèhë xi ha vèë me mé cjua xi hinha cahntsua xahasen rè xuta.

3

Cjuavisajmi rè Jesucristu cojo Nicodemo

¹ Cavéjña ngu xuta fariseo xi hmí rè Nicodemo. Me vèhë ne, ngu xuta matitjun me tsèhë ngajñi rè xuta tjè rè Israel. ² Ngundiya jan ne, nguixun quiji cavisajmi me cojo Jesús, hane cuitjin cachja me:

—Maestro, ngayin ne, hyin ta ngayun ne, ngu maestru xi Nina catsingatju rë. Cuatjin hyin ta, tsêhë xi tsajin yo xi cuma sahmi cjuarcun xi nihñu ngayun sa xi hacuiin Nina visecoo rë. —Cuatjin cachja Nicodemo cojo Jesús.

³Ngajan xi Jesús ne, cuitjin cafayangui me:

—Cuichjá cojo nuju cjuaquixi ta sa xi ngu xuta tsiin me ngu ndiya nga ne, cumaji cuisehen me hiscan sahmi Nina gobiernu. —Cuatjin cafayangui Jesús.

⁴Hane Nicodemo ne, cavinenguise me Jesús cuitjin:

—¿Peru hacutjin cuma xi ngu xihin xi ha changá ne, cuya tsin nga ni? ¿Há cuma cuisehen nga cahntsua naa rë sehe tsin nga ngu ndiya? —Cuatjin cavinenguise Nicodemo.

⁵Ngajan xi Jesús ne, cuitjin cafayangui me:

—Cuichjá cojo nuju cjuaquixi ta hatuxa sahmi ngujoyë xi cuisehen xuta ngu cjuahñu xatsë ngatsë rë nandá cojo ngatsë rë Hasen rë Nina ta, ha chuva rë vëhë ni xi cuma cuisehen me hiscan sahmi Nina gobiernu. ⁶Hya xi ngu xuta tsin me ngatsë rë xutacha rë me ne, sacú rë me cjuahñu xi tsêhë ngasunhdë. Peru hya xi tsin me ngatsë rë Hasen rë Nina ne, sacú rë me cjuahñu xatsë xi tsêhë Nina. ⁷Hacuiin cjuercun nuju xi cuatjin cachjá cojo nuju xi mameje rë xi tsin nga ngayun ngu ndiya. ⁸Tjo ne, hatuxa vanga hiscan meje rë, peru suva machaya naja xi vanga ta nuhya rë xi fane vanga, ta matsijin hiscan nduva o hiscan vechú. Hane xuta xi tsin me ngatsë rë Hasen rë Nina ne, tjin rë me sacuaaha tjo jan, ta tsin me ngu ndiya nga, peru matsijin hacutjin. —Cuatjin cafayangui Jesús.

⁹Ngajan xi Nicodemo ne, cuitjin cavinenguise me cojo Jesús:

—Peru ¿hacutjin cuma sacuatjin nújun vë ni?

¹⁰Hane Jesús ne, cuitjin cafayangui me:

—¿Hacutjin nga ne xi ngayun ne, maestru má ngayun tsêhë xuta tjë rë Israel, hane sehe hyúun mé vijne cjuá xi cachjá cojo nuju vë ni? ¹¹Cuichjá cojo nuju cjuaquixi ta ngayin ne, nújin cjuá xi hyin hacuaaha nújin tsêhë xcusun xi cachtusijín, peru cjuá xi nújin cojo nuju ne, mijí chjuhunntsun. ¹²Sa xi camacjain nuju hya xi cachjá cojo nuju cjuá tsêhë xcusun tsêhë ngasunhdë ne, ¿hacutjin cumacjain nuju sa xi cuichjá cojo nuju cjuá tsêhë xcusun tsêhë ngahnga ni?

¹³Tsajin hisca ngu xuta xi quiji cavutsejen me hacutjin jyihi ngahnga sehe cavuya me xi sua cuenda nuju me. Suvá ni me xi ha tsêhë ngajan canduva me ne, me vëhë xi cuma sua cuenda nuju me, suvá ni me xi Quihndi rë Xuta Jain. ¹⁴Chuva rë xi casahmi Moisés hatsëë nixtin xi cavunihnga me ngu quicha xcusun rë chu yë taha rë ngu ya ngajan ngu xín camahani jan ne, ha chuva vëhë ni ne, me xi Quihndi rë Xuta Jain ne, meje rë xi tjunihnga rë me taha rë ngu ya. ¹⁵Cuatjin meje rë, cojo sa xi yëjë ni xuta xi cumangu cacun me cojo rë me vëhë ne, sacú rë me cjuahñu xatsë. —Cuatjin cafayangui Jesús tsêhë Nicodemo.

Cjuahmutacun rë Nina cojo xuta

¹⁶—Tsêhë xi jemu catsihnu cacun Nina xuta ne, hisca casua me Quihndi ngu rë me, cojo sa xi yëjë ni xuta xi cumangu cacun me cojo me vëhë ne, hacuiin cjue hasen rë me xcun cjuañihi ta sacú rë me cjuahñu xatsë xcun Nina. ¹⁷Nina ne, catsingatju me Quihndi rë me gueue ngasunhdë, peru hacuiin xi cjuahachuva rë xuta ngasunhdë ta xi cuaxëtje rë xuta.

¹⁸ Xuta xi mangucacun cojo Quihndi rë Nina ne, hacuiin chjaháchuva rë me. Peru me xi hacuiin mangucacun cojo Quihndi rë Nina ne, ha cachjaháchuva rë me ta, tsëhë xi hacuiin mangucacun me cojo me xi Quihndi ngu rë Nina. ¹⁹ Hane cuitjin fahachuva Nina xuta ngasunhndë: Nina ne, ha catsingatju me Quihndi rë me ngasunhndë sacua ha ngu ndihi xi sua hasen rë. Peru xuta ne, hitsë sa cachuya rë me tsëhë jñu xi cuma rë hasen ta, tsëhë xi xcusun xi casahmi me ne, suvá cjuatsehen. ²⁰ Yëjë ni xuta xi sahmi xcusun tsehen ne, hatuxa chuyiin rë me tsëhë hasen, hisca sahmitiñaai me hiscan xi hasen, sa tu sesunhnga xcusun xi sahmi me. ²¹ Peru xuta xi ndiya rë cjuaquixi xcusun xi sahmi me ne, sahmitiña me hiscan xi hasen, cojo sa xi sesunhnga xi xcusun xi sahmi me ne, vëhë xcusun xi meje rë Nina.

Chja Juan Vitenda rë Xuta tsëhë Jesús

²² Hya xi camá ne, quiji Jesús cojo xuta ladu rë me ngajan nguijña tsëhë distritu Judea. Hane ngajan caviyujutahá cojo me xuta xi cuacun vë. Hane cavitenda me xuta. ²³ Hacuaha ha nixtin hya ni ne, Juan Vitenda rë Xuta ne, tivitenda me xuta ngajan hiscan xi hmí rë Enón, tiña tsëhë Salim. Ngajan quitahá me ta, tsëhë xi ngajan ne, jemu yehe nandá tjin. Hane hacuaha quiji xuta caxtenda me. ²⁴ Nixtin hya ne, cjëë cjue Juan jan ndavaya.

²⁵ Quihndë ne, ngujo xuta ladu rë Juan ne, cavetsihin ticjanjo cjua rë me cojo ngu xutaxa rë yungun tsëhë xcusun changá rë me xi ma tyjahi me xcun Nina. ²⁶ Hya xi camá ne, quiji cachja me cojo Juan cuitjin:

—Maestro, ¿Há vitsjen nuju me xi casetaha cojo nuju ngunda vëhë tsëhë ndajyë Jordán, me xi canújun cojo niji tsëhë jan? ¡Chutsujun ta hacuaha cojo me vëhë tivitenda me, hane yëjë ni xuta cjuítjengui rë me! —Cuatjin cachja xuta xi cuacun jan.

²⁷ Ngajan xi Juan ne, cuitjin cafayangui me:

—Tsajin mé xi sacú cjuahatsja ngu xuta sa xi Nina suaain rë me. ²⁸ Ngayun suvun ne, ha canuhyun xi cachjá xi hacuiin ngahan Xihin xi Tsingatju Nina ta ngahan ne, cha xi catsingatju titjun Nina, sehe catsingatju Nina me vëhë. ²⁹ Chutsujun ta na xutavixan ne, tsëhë cha xutavixan na. Peru ngu cha amigu ndaja rë cha xutavixan xi secun tivisiñuju cjua rë cha xutavixan jan ne, jercu ndama rë cha tsëhë cjua rë cha vëhë. Vëhë xi ngahan xi sacua ha cha amigu rë cha xutavixan vë ne, jercu tu ndaja camahani má ná. ³⁰ Me vëhë ne, meje rë xi quihndë nga nchujun cuma jyë cuma hnga sa me cojo xa rë me, peru ngahan ne, hacuiin cuatjin ta xi meje rë ne, cuijnetaha xa naha. —Cuatjin cafayangui Juan.

Me xi nduva tsëhë ngahnga

³¹ Me xi nduva tsëhë ngahnga ne, me vëhë xi hitsë sa jemu vengui chji rë me xi cuma rë yëjë xuta. Ngayaan xi tsëhë ngasunhndë ngayaan ne, ha xuta ngasunhndë ni ngayaan, hacuaha suvá cjuatacun rë ngasunhndë xi visiajme. Me xi nduva tsëhë ngahnga ne, me vëhë xi hitsë sa jemu vengui chji rë me xi cuma rë yëjë xuta. ³² Me vëhë ne, sua me machaya naja tsëhë xcusun xi cavëë me cojo tsëhë cjua xi cahndë me, peru xuta ne, fahatsjaain me cjua xi chja me vëhë. ³³ Peru ngujo xuta ne, fahatsja me cjua rë me vëhë, hane cuatjin maquixi xi Nina ne, quixi jain me cojo cjua rë me. ³⁴ Me xi Nina catsingatju rë ne, cjua rë Nina chja me ta, tsëhë xi Nina ne, hacuiin chva hitsë sua me Hasen rë me. ³⁵ Nina Nahmi naja ne, jemu hmu cacun me Quihndi Ngu rë me, hacuaha yëjë ni xcusun ne, cavejña me tsja Quihndi rë me jan. ³⁶ Xuta xi mangucacun me cojo Quihndi rë Nina jan ne, tjin rë me

cjuahñu xatsë. Peru xuta xi vihndiin me tsëhë Quihndi rë me jan ne, sacuiin rë me cjuahñu xatsë ta castigu rë Nina cuatju me cuma.

4

Cjuavisiajmi rë Jesús cojo na samaritana

¹ Quihndë ne, cha fariseo ne, camachaya rë cha xi Jesús ne, hitsë sa cjin jima xuta ladu rë me xi cuma rë xuta ladu rë Juan, hacuaha hitsë sa cjin xuta tivitenda me xi cuma rë xuta xi tivitenda Juan. ² Peru suvá Jesús ne, cavitendaain me ta xuta ladu rë me ne, me vëhë xi cavitenda me xuta. ³ Hane xi camachaya rë Jesús xi cuatjin camachaya rë cha fariseo xi cuacun vë ne, cavetjuxin me tsëhë distritu Judea. Hane cavuya quiji nga me ngu nandya tsëhë distritu Galilea.

⁴ Hane ndiya xi cjui me jan ne, tjïn xi cuatju me ngujo nandya tsëhë distritu Samaria.

⁵ Hya xi camá ne, cafehe me ngu nandya tsëhë distritu Samaria xi hmí rë Sicar, ngu nandya xi tacun tiña tsëhë nangui xi casua Jacob quihndi rë me José jemu hatsëë camahani. ⁶ Hane cahndë vëhë ne, tacun ngu ndava nandá xi casahmi Jacob. Hane tsëhë xi jemu cafenda rë Jesús tsëhë ndiya xi nduva me ne, quiji me cavëjña me hiscan ndava nandá jan. Sacuaha chuva rë nchisen xi cafehe me jan.

⁷ Hora vëhë ne, canduva ngu na samaritana, canduva jaha na nandá. Hane cuitjin cachja Jesús cojo rë na:

—Tuhun hitsë nandá cuëhë. —Cuatjin cachja me.

⁸ Hora vëhë ne, tsajin xuta ladu rë Jesús ta nandya quiji me xi cuatsë me xi sinë me cojo Jesús. ⁹ Ngajan xi na samaritana jan ne, cuitjin cachja na cojo Jesús:

—Ngayun xi xuta tjë rë Israel ngayun ne, ¿hacutjin má xi tichjahyun ná nandá, ngahan xi na samaritana ngahan ni? —(Cuatjin cachja na ta, tsëhë xi xuta tjë rë Israel ne, hatuxa tsinguisihinjñii me cojo xuta samaritana.)

¹⁰ Ngajan xi Jesús ne, cuitjin cafayangui me tsëhë na:

—Sa xi ngayun hyun cjuatjo xi Nina sua me hacuaha hyun yo ngahan xi tifehya nuju nandá ne, ngahan cachjahyun ná nandá, hane ngahan casuá nuju nandá xi sua cjuahñu. —Cuatjin cafayangui Jesús.

¹¹ Hane na vëhë ne, cuitjin cachja na:

—Tatá, peru ndava nandá vi ne, jemu nungun, hane tsajin quichuhun mé xi naxun cojo nandá. ¿Jani naxun nandá xi sua cjuahñu vë ni? ¹² Xutachanga naja Jacob casua niji me ndava nandá vi. Hacuaha cojo me cojo quihndi rë me cojo chu rë me cahvi me nandá tsëhë ndava nandá vihi. ¡Ja! Peru ¿há hitsë sa matitjun ngayun xi cuma rë me vëhë ni? —Cuatjin cachja na.

¹³ Hane xi cafayangui Jesús ne, cuitjin cachja me cojo rë na:

—Yëjë ni xuta xi hvi me nandá vihi ne, cuma xinda nga rë me. ¹⁴ Peru xuta xi cuihi me nandá xi suá ngahan ne, hatuxa ha quihndë tsajin nu tsajin nixtin xi cuya cumaxinda nga rë me ta nandá xi suá ngahan ne, cuma sacuaha ngu nandá xi ña vangatë xi sua rë me cjuahñu xatsë. —Cuatjin cachja me.

¹⁵ Ngajan xi na vëhë ne, cuitjin cachja na cojo Jesús:

—Tatá, tuhun ná hitsë nandá xi nújun vë, cojo sa xi cumaxindaain ná hacuaha ha quihndë cuinduvaan jaha nandá. —Cuatjin cachja na.

¹⁶ Hane Jesús ne, cuitjin cachja me cojo rë na:

—Táangun chjuhun xihin nuju, sehe nduvuncujun me nguehe. —Cuatjin cachja me.

17 Ngajan xi na vëhë ne, cuitjin cafayangui na:

—Tsajin xihin naha. —Cuatjin cafayangui na.

Hane cuitjin cachja Jesús cojo rë na:

—Ndaja nújun xi tsajin xihin nuju ta ¹⁸ hñú cha xi cavinechuncujun, hane cha xi nechuncujun quihndë ne, hacuïn xihin nuju cha. Canújun cjuaquixi.

—Cuatjin cachja Jesús cojo rë na.

19 Ngajan xi na vëhë ne, cuitjin cafayangui na:

—Tatá. Xi má ná ne, ngayun ne, ngu profeta ngayun. ²⁰ Xutachanga niji ne, nguehe ndetjún vihi canduva cafaharcun me Nina. Hane ngayujun ni xuta nangui rë Israel ne, nújun ta Jerusalén ne, ngajan tacun cahndë xi meje rë xi cjue chjahárcun rë Nina. —Cuatjin cafayangui na.

21 Ngajan xi cachja Jesús cojo rë na cju vihi:

—Ngayun chjuun, catamacjain nuju cju xi cuichjá vi: cuechú nixtin xi hacuïn ndetjún vihi hacuïn Jerusalén chjuhuncun Nina Nahmi naja.

²² Ngayun xuta samaritano ne, chjuhuncun Nina, peru hyúun me xi ndandaja. Ngayin ne, ha hyinndijin Nina ta, tsëhë xi me xi cuaxëtje rë xuta ne, cuetjújñi me ngajñi niji ngayin xuta nangui Israel. ²³ Cuechú nixtin o ha hisca cavechú nixtin xi xuta xi cjuaquixi xi faharcun me Nina Nahmi naja ne, Hasen rë Nina cuisecoo rë me xi cjuaharcun me Nina cojo cjuaquixi. Ha cjuaquixi ta xuta xi cuatjin sahmi me ne, me vëhë xi meje rë Nina Nahmi naja xi cjuaharcun rë me. ²⁴ Nina ne, Hasen me. Hane xuta xi faharcun rë me ne, hatuxa meje rë xi Hasen rë Nina cuisecoo rë me xi cjuaharcun me Nina cojo cjuaquixi. —Cuatjin cachja Jesús.

25 Hane chjuun jan ne, cuitjin cachja na cojo Jesús:

—Ngahan ne, ha hvë xi cuinduva Me xi Tsingatju Nina, me xi hmí rë Cristu. Hane hya xi cuinduva me vëhë ne, suacuenda naja me yëjë ni cjuatacun. —Cuatjin cachja na.

26 Ngajan xi Jesús ne, cuitjin cachja me cojo rë na:

—Ngahan xi tichjá cojo nuju vi ne, ha ngahan xi nújun vë. —Cuatjin cachja me.

²⁷ Hane hora vëhë cavuya xuta ladu rë Jesús xi quiji jaha me comida. Hane jemu quijircun rë me xi cavëë me xi visiajmi Jesús cojo rë ngu chjuun. Peru hisca ngu me xi cuacun vë cavinenguisiin me cuitjin: “¿Mé xi meje nuju?” o “¿mé xi visiajmu cojo rë na?” Cuatjin camá. ²⁸ Chjuun jan ne, cavejña na nisa rë na, sehe cavuya quiji na nandya, hane cuitjin cachja na cojo xuta:

²⁹ —Nduvun cuanguen chutsejen ngu me xi cachja cojo ná yëjë xcusun xi casahme. ¿Hacuïn hacui me vëhë xi Tsingatju Nina? —Cuatjin cachja na.

³⁰ Hya xi camá ne, cavetju xuta quiji me cojo rë na hiscan quitahá Jesús.

³¹ Jinguyëjë rë ne, xuta ladu rë Jesús jan ne, cuitjin cachja me:

—Maestro, xinu niñu. —Cuatjin cachja me.

³² Peru Jesús ne, cuitjin cafayangui me:

—Ngahan ne, ha tjïn xi sínë xi ngayun ne, hyúun mé jan. —Cuatjin cafayangui me.

³³ Ngajan xi xuta ladu rë Jesús jan ne, cuitjin cavinenguise xicjin me xingu xingu me:

—¿Há cuma cacun sa xi tjïn yo xi cafehe cani xi cajnë me? —Cuatjin cavinenguise xicjin me.

³⁴ Hane Jesús ne, cuitjin cachja me cojo xuta ladu rë me jan:

—Jemu chuya rë xahasen naja xi chinë niñu. Peru ngahan ne, hitsë sa chuya rë xahasen naha xi sahme sacuatjin meje rë me xi catsingatju ná,

hacuaha hitsë sa chuya rè xahasen naha xi tsingújnetaha xa xi casua ná me. ³⁵ Chja ngu cjua ta: “Chaja sa ñuju sá, sehe tjunihnga rè xitjê.” Peru ngahan cuichjá cojo nuju ta chutsujun xuta ta, tséhë xi tangun me cojo xitjê xi ha camacha, ha cuma tjunihnga rè. ³⁶ Me xi tivunihnga xitjê ne, ha tifaha me chji rè me, cuma cuinújan ne, tisahmi tangun me xuta xi sacú rè xuta xi cuacun vé cjuahñu xatsé. Cuatjin tijima cojo sa xi tangun cuiyujusua me xi vincha tjê cojo me xi vunihnga xitjê. ³⁷ Quixi cjua xi chja xi: “Hacjahi cha xi vincha tjê ne, hacjahi cha xi vunihnga xitjê.” ³⁸ Ngahan catsingátju nuju chunihngun xitjê hiscan xi hacuiin ngayun canihñu xa. Jingusa me casahmi me xa, hane ngayun cavisuhunjñu ngajñi rè xa rè me. —Cuatjin cachja Jesús cojo xuta ladu rè me.

³⁹ Jemu cjín xuta samaritano tséhë nandya jan camangu cacun me cojo Jesús, ngatsé rè cjua xi cachja chjuun jan cuitjin: “Cachja me cojo ná yějê xcusun xi casahme.” ⁴⁰ Ngajan xi hya xi cafehe xuta samaritano ngajan hiscan quitahá Jesús ne, cachja xuta jan cojo rè me xi cjue cuejña me cojo rè me. Hane Jesús ne, quiji cavéjña me jo nixtin cojo xuta xi cuacun jan. ⁴¹ Hane jemu cjín sa xuta xi camangu cacun me ngatsé rè cjua rè súvá Jesús. ⁴² Hane chjuun jan ne, cuitjin cachja xuta jan cojo rè na:

—Ha quihndé hacuiin ngatsé rè cjua riji xi mangutacuin ta, tséhë xi suvin canuhyiin cjua rè me, hane ngayin ne, hyin ta cjuaquixindaja xi me vihi xi cuaxëtje me xuta. —Cuatjin cachja xuta jan.

Camandaja quihndi rè ngu xutaxa rè casahmi Jesús

⁴³ Xi cavatju jo nixtin jan ne, cavetju Jesús cojo xuta ladu rè me, quiji me ngu nandya tséhë distritu Galilea. ⁴⁴ Ta súvá Jesús cachja me xi quixi xi xuta ne, faharcuaain me profeta xi tséhë nangui rè me. ⁴⁵ Véhë xi hya xi tivatju Jesús ngujo nandya tséhë distritu Galilea ne, ndaja cafachatsja xuta me ta, tséhë xi hacuaha cojo xuta jan quiji me suhi ngajan Jerusalén, hane ngajan cavéë me yějê xcusun xi casahmi Jesús nixtin rè suhi jan.

⁴⁶ Hya xi camá ne, cavuya cafehe me Caná, ngu nandya tséhë distritu Galilea, hiscan xi casahmi me xi nandá ne, cavuya camá xan rè uva. Hane ngajan nandya Capernaum ne, cavéjña ngu xutaxa rè xi hmu rè cha quihndi rè me. ⁴⁷ Hane xi camachaya rè me xi cafehe Jesús ngajan Caná ne, cavetju me quijitjengui me Jesús. Hane xi cafehe me jan ne, cafehya me favor cojo Jesús xi cjue Jesús cojo rè me nangui rè me xi sahmi Jesús xi cumandaja quihndi rè me ta ha tu hora sa xi cueya. ⁴⁸ Ngajan xi Jesús ne, cachja me cuitjin cojo xutaxa rè jan:

—¡Ngayujun ni ngayun ne, sa xi chuun cjuarcun ne, cumanguaain camahani tacún cojo ná! —Cuatjin cachja Jesús.

⁴⁹ Ngajan xi xutaxa rè jan ne, cuitjin cafayangui me:

—Tatá, cuanguen sanii, chaja sa xi cueya quihndi naha. —Cuatjin cafayangui me.

⁵⁰ Hane Jesús ne, cuitjin cachja me:

—Cuma cuangun ta, quihndi nuju ne, jimandaja cha. —Cuatjin cachja Jesús.

Hya xi camá ne, xutaxa rè jan ne, camacjain rè me cjua xi cachja Jesús, hane cavetju me quiji me. ⁵¹ Hane ndiya cjuí me ne, cavechútáha me ngujo cha mosu hndixahan rè me, hane cachja cha cojo rè me xi cha quihndi rè me ne, tijimandaja cha. ⁵² Ngajan xi xutaxa rè jan ne, cavinenguise me cojo cha

hndixahan rë me jan mé hora cavetsihin camandaja cha hmu rë jan. Hane cha hndixahan rë me jan ne, cuitjin cachja cha:

—Ngujña fane ngu cavetjuxin chíhinsuë xi sahmi cojo cha. —Cuatjin cachja cha.

⁵³ Hane nahmi rë quihndi jan ne, ha vëë me ta hora vëhë xi cachja Jesús cojo rë me xi quihndi rë me ne, tijimandaja cha. Cuatjin camá xi xutaxa rë jan cojo yëjë xuta rë me ne, camangu cacun me cojo Jesús.

⁵⁴ Cuatjin camá xi, hya xi cavetju Jesús tséhë ladu rë distritu Judea hane cafehe me Caná, distritu Galilea ne, casahmi me cjuarcun xi majo xi casahmi me ngajan.

5

Ndava nandá xi hmi rë Betesda

¹ Xi cavatju nixtin xi cuacun vë ne, quiji Jesús ngajan Jerusalén xi cjue me suhi xi cuma ngajan yungun xi matitjun.

² Quihndë ne, ngajan Jerusalén ne, tiña tingotjo Chu Tsánga ne, ngajan tacun ngu ndava nandá xi tjin rë hñú cahndë ngahma ndihya. Hane ndava nandá vëhë ne, xi hne hebreo ne, Betesda hmi rë. ³ Cahndë jan ne, jemu cjin xuta suhmu me. Siu xuta rcá, siu xuta rengun, siu xuta xi quixihñu yojo rë xi tacunya rë me xi cuiniya nandan ⁴ ta jiya hora jiya hora ne, finiya nandan ta ngu ángel ne, vijne tsiniya nandan jan. Sehe cha xi tjun cuisehen ne, marqui rë tséhë chíhin xi má rë. ⁵ Hane ngajñi rë xuta hmu rë xi cuacun jan ne, jiña ngu cha xi ha tjin rë can tyjuhunyan nu xi hmu rë cha. ⁶ Hane xi cavëë Jesús xi cuatjin jiña cha hacuaha ha vëë me xi ha jemu tsëë hmu rë cha ne, cavinenguise me cha cuitjin:

—¿Há meje nuju xi cuma ndaja ngayun? —Cuatjin cavinenguise Jesús.

⁷ Hane cha hmu rë jan ne, cuitjin cafayangui cha:

—Tatá, tsajin yo xi tsinguissehen ná ndava nandá hora xi finiya nandá. Jinguyëjë rë xi tifé tiña ne, hacjahi me xi ha cavisehen. —Cuatjin cafayangui cha.

⁸ Ngajan xi Jesús ne, cuitjin cachja me cojo cha:

—Tisatjunhngun, chjuhun nijña nuju, sehe tujyuhunyun. —Cuatjin cachja Jesús.

⁹ Cha vëhë ne, ha tu ñahñu camandaja cha, cafaha cha nijña rë cha, cavetsihin catsujyihya cha.

Nixtin vëhë ne, nixtin xi chjahájenda rë. ¹⁰ Ngajan xi xutaxa rë yungun ne, cachja me cojo cha xi camandaja jan cuitjin:

—Quihndë ne, nixtin xi chjahájenda rë. Ndajintjin xi cuatjin quichehe nijña riji. —Cuatjin cachja me.

¹¹ Hane cha xi camandaja jan ne, cuitjin cafayangui cha:

—Me xi casahmi xi camandaja ngahan ne, me vëhë cachja me cojo ná xi cjuahá nijña naha sehe tsujyëhëya. —Cuatjin cachja cha.

¹² Ngajan xi xutaxa rë jan ne, cavinenguise nga me cuitjin:

—¿Hane yo xi cachja cojo ri xi chjehe nijña riji ne, sehe tujyihye? —Cuatjin cavinenguise me.

¹³ Peru cha xi camandaja jan ne, hvín cha yo ta, tséhë xi Jesús ne, cavetjuxin me tséhë cahndë vëhë, tséhë xi jemu xutacjin quitsë me.

¹⁴ Hane xi cavatju vëhë ne, cavechútáha Jesús cha ngajan yungun xi matitjun, hane cachja me cojo cha cuitjin:

—Chutsujun ni, camandaja ngayun. Quihndë ne, xicavinechunyuun sa ndiya rë cjuatsehen, sa tu choho sa cuatjun cuma. —Cuatjin cachja Jesús cojo cha.

¹⁵ Sehe cavetju cha quiji cachja cha cojo xutaxa rë ta me xi casahmi xi camandaja cha ne, Jesús. ¹⁶ Vëhë xi xutaxa rë jan ne, tsuyihiyatjengui me Jesús cojo cjuahngatacun ta, tsëhë xi casahmi Jesús xcusun vëhë nixtin xi chjahájenda rë. ¹⁷ Ngajan xi Jesús ne, cuitjin cachja me cojo xutaxa rë jan:

—Nahmi naha ne, hisca quihndë tisahmi me xa, hacuaha ngahan ne, tisahme xa. —Cuatjin cachja Jesús.

¹⁸ Ngatsë rë cjua vëhë ne, xutaxa rë jan ne, hitsë sa cavangui me chuva rë xi tsiquehen me Jesús. Cuatjin casahmi xutaxa rë ta, tsëhë xi hacuiin suvá ni cafaharcuaain Jesús nixtin xi chjahájenda rë ta hacuaha cachja me xi Nahmi rë me ne, Nina. Hane xi cuatjin cachja Jesús ne, tsingacun me xi tangun me cojo Nina.

Xa xi tjin rë Quihndi rë Nina

¹⁹ Ngajan xi Jesús ne, cuitjin cachja me cojo xutaxa rë xi cuacun jan:

—Cuichjá cojo nuju cjuaquixi ta ngahan xi Quihndi rë Nina ngahan ne, tsajin mé xi cuma sahme xi cojo cjuatacun naha suva ta xi vutsején xi sahmi Nahmi naha ne, vëhë xi sahme. Xcusun xi sahmi me vëhë ne, hacuaha xcusun vëhë sahme ngahan Quihndi rë me. ²⁰ Nahmi naha ne, hmu cacun ná me, ngahan Quihndi rë me, hacuaha tsingacun ná me yëjë xcusun xi sahmi me. Hane xcusun xi sehe tsingacun ná me ne, hisca yehe sa xi cuma rë xcusun xi casahme xi camandaja cha hmu rë jan. Cuatjin cuma cojo sa xi ngayun ne, cjuercun nuju. ²¹ Sacuatjin faha Nahmi naha nima sehe sua nga rë me cjuahñu ne, hacuanitjin ni ngahan Quihndi rë me ta suá rë cjuahñu yo xi meje suá rë. ²² Nahmi naha ne, tsajin yo tsichuva me cojo cjuatacun rë ta ntsa ngahan cavejña me yëjë xa vëhë, ²³ cojo sa xi yëjë ni xuta ne, cjuaharcun me ngahan sacuatjin faharcun me Nahmi naha. Yo xi cjuaharcuaain ná ngahan ne, faharcuaain rë Nahmi naha, me xi catsingatju ná.

²⁴ Cuichjá cojo nuju cjuaquixi ta xuta xi vihndë me cjua xi chjá hacuaha mangucacun me cojo rë Nina, me xi catsingatju ná ne, tjin rë me cjuahñu xatsë. Hacuaha cumachuvaain me cojo cjuatacun rë me ta sacuaha xi ha cahme me hacuaha ha casacu rë me cjuahñu xatsë. ²⁵ Cuichjá cojo nuju cjuaquixi ta cuechú nixtin o ha hisca cavechú nixtin xi xuta xi hndiin tsëhë Nina sacuaha nima ne, cuihndë me xta naha, ngahan xi Quihndi rë Nina ngahan. Hane me xi cuihndë tsahan ne, sacú rë me cjuahñu xatsë. ²⁶ Cjuahñu xi tjin rë Nina ne, tsajin yo casua rë me, ta nduva tsëhë cjuandaja rë suva me. Hane hacuanitjin ná ngahan, ta casua ná cahndë xi hacuaha tjin ná cjuahñu tsëhë cjuandaja rë suvá. ²⁷ Hacuaha casua ná me xa xi tsichúva xuta cojo jyë rë me ta, tsëhë xi ngahan ne, Quihndi rë Xuta Jain ngahan. ²⁸ Hacuuiin cjuercun nuju tsëhë cjua naha. Cuechú nixtin xi yëjë ni nima xi hinchahantsua tsjun rë ne, cuihndë xta naha, ²⁹ sehe cuetju tsëhë tsjun rë. Hane nima xi ndaja xcusun casahmi xcun cjuahñu rë ne, sacú rë cjuahñu xatsë. Hane nima xi choho xcusun casahmi ne, cuatju castigu. ³⁰ Ngahan ne, hatuxa tsajin mé xi sahme xi cojo cjuatacun naha suva ta, sacuatjin cjua xi vihndë xi chja Nahmi naha ne, cuatjin tsichúva xuta cojo cjuatacun rë me. Hane hatuxa quixi ngahan cojo cjuatacun naha ta, tsëhë xi sahme hacutjin xi meje ná suva ta sacuatjin xi meje rë Nahmi naha, me xi catsingatju ná ne, cuatjin xi sahme. —Cuatjin cachja Jesús.

Hacutjin cumachaya naja yo xi Jesucristu

³¹ Cjuinduju sa tichja Jesús cojo xutaxa rë yungun cuitjin:

—Sa xi ngahan cuichjá favor naha suva ne, cuinújun ta quixiin cja xi chjá. ³² Peru tjin sa ngu xi tichja favor naha, hane hvë ta cja xi chja me vëhë tsahan ne, cjaquixi. ³³ Ngayun ne, caningatjun xuta quiji cavinenguisse rë me Juan ngu cja, hane Juan ne, catsicuya me cja xi cjaquixi. ³⁴ Peru ngahan ne, me xi tichja me favor naha hacuiin xuta me, peru cja xi tichjá vi ne, tichjá cojo sa xi ngayun ne, cuetjuntjun. ³⁵ Juan vë ne, sacuaaha ngu ndihi xi setí xi sua hasen rë camá me. Hane ngayun ne, cachuya nuju tsëhë xi cavinechun sua ngujo nixtin ngajñi rë cjuahasen rë Juan. ³⁶ Peru ngahan ne, tjin xcusun xi hitsë sa ndaja tsingacun yo ngahan xi cuma rë cja xi cachja Juan tsahan. Xa xi casua Nahmi naha ngahan xi sahmechehen ne, cuma cuinújan ne, xa xi ha tisahme ne, suvá xa vëhë tsingacun xi Nahmi naha catsingatju ná me. ³⁷ Hacuaha Nahmi naha, me xi catsingatju ná ne, chja me favor naha. Ngayun ne, hisca xta rë me cjëë cuinuhyun, hacuaha cjëë chun hacutjin jyihi me. ³⁸ Hisca cja rë me ne, tsajin tetjo ngajñi rë cjuatacun nuju ta, tsëhë xi ngahan xi catsingatju ná me vëhë ne, manguaain tacún cojo ná. ³⁹ Ngayun ne, jemu chutayun xujun rë Nina ta, tsëhë xi ningatuhun tacún ta xi cuatjin chutayun ne, sacú nuju cjuahñu xatsë. Hane xujun vëhë ne, vëhë xi chja favor naha. ⁴⁰ Hane ngayun ne, mijí cuisuhun ladu naha xi sacú nuju cjuahñu xatsë.

⁴¹ Ngahan ne, hacuiin sahmi ngujoyë xi xuta sahmi jyë sahmi hnga ná me. ⁴² Hacuaha ngahan ne, ha hvë xcusun nuju ta tsajin cjuahmutacun rë Nina jiya cahntsua xahasen nuju. ⁴³ Ngahan ne, canduvá ta, tsëhë xi Nahmi naha casuaxa ná me, peru ngayun ne, mijí chjuhunnstun ná. Hane sa xi jingu sa xuta cuinduva me cojo cjuatacun rë suvá me ne, ha hvë ta me vëhë ne, hatuxa chjuhunnstun me. ⁴⁴ Tsajin nixtin xi cumangu tacún cojo ná ngahan jinguyëjë rë xi tivinchun chuva rë xi ngajñi nuju cojo xingun ni ne, sahmi yehe sahmi hnga nuju me hane vinchunsuun xi Nina xi ngu tu tu ni ne, me vëhë sahmi yehe sahmi hnga nuju me. ⁴⁵ Xicaningatun tacún xi ngahan cuíncha jyë nuju xcun Nahmi naha ta xutachanga naja Moisés, me xi jemu vetuhun tacun ne, me vëhë xi cuíncha jyë nuju me. ⁴⁶ Sa xi camacjain nuju cja xi catsihindu Moisés ne, hacuaha camacjain nuju cja naha ta Moisés vë catsihindu me tsahan. ⁴⁷ Peru sa xi macjaain nuju cja xi catsihindu Moisés ne, ¿hacutjin cumacjain nuju cja xi chjá ngahan ni?

6

Catsicjen Jesucristu hñú mil xihin

¹ Xi cavatju yëjë xcusun vëhë ne, cavetju Jesús quiji me ngunda vëhë tsëhë laguna Galilea, xi hacuaha hmí rë laguna Tiberias. ² Hane jemu xutacjin camahani xi quijitjengui me Jesús ta, tsëhë xi cavëë me cjuarcun xi casahmi Jesús cojo xuta hmu rë. ³ Hane Jesús ne, quijiniji me ngu ndetjún, hane ngajan cavéñña me cojo xuta ladu rë me. ⁴ Hane Pascua, suhi xi sahmi xuta tjë rë Israel ne, hacuaha ha camatiña. ⁵ Hane xi vutsejen Jesús xi jemu xuta cjin nduvatjengui rë me ne, sehe cachja me cojo Felipe cuitjin:

—¿Jani cuanguen chaan niñu xi sinë xuta xi cuacun vë? —Cuatjin cachja Jesús.

⁶ Cuatjin cachja me xi cjuahachuva me Felipe ta, tsëhë xi Jesús ne, ha vëë me mé xi sahmi me. ⁷ Ngajan xi Felipe ne, cuitjin cafayangui me:

—Sa xi chaan niñu cojo tujún xi chji rë xuta jo cientu nixtin ne, hisca chutaain xi sacú tsë tsë sinë jima ngu xuta vë. —Cuatjin cafayangui Felipe.

⁸ Ngajan xi ngu xuta ladu rë Jesús, Andrés hntsë Simón Pedru ne, cuitjin cachja me cojo Jesús:

⁹ —Nguehe secun ngu cha lihndi xi yaha hñú niñu cojo jo chu ti. Peru ¿mé chutaha vë xi sinë xuta xi cuarcumu cjin me? —Cuatjin cachja Andrés.

¹⁰ Ngajan xi Jesús ne, cuitjin cachja me:

—Tinújun cojo xuta vë ne, catiyuju me. —Cuatjin cachja me.

Quihndë ne, ngajan cahndë vëhë ne, jemu jyë cahndë tjin ndiji. Hya xi camá ne, ngajan caviyuju sacuaha hñú mil xihin. ¹¹ Ngajan xi Jesús ne, cafaha me niñu jan, hane, xi café casua me nacuechji rë Nina ne, sehe cavatëcja me niñu jan ngajñi rë xuta xi siu jan. Hacuanitjin ni casahmi me cojo chu ti jan. Casua me ha tucutjin xi meje sinë xuta jan. ¹² Hane hya xi ha catsë rë xuta xi cajinë me ne, sehe cachja Jesús cojo xuta ladu rë me jan cuitjin:

—Quihndë ne, chjayun yëjë xi cavángui vë ne, cojo sa xi hacuini chajá hisca hitsë. —Cuatjin cachja Jesús.

¹³ Hane xi cafaya xuta ladu rë Jesús yëjë ni xi cavángui tsëhë hñú niñu xi cajinë yëjë xutacjin jan ne, catsinguitsë me tejó chajne. ¹⁴ Hane xi cavëë xuta cjuarcun xi casahmi Jesús jan ne, cuitjin cachja me:

—Cjuaquixi xi me vihi profeta xi cuinduva ngasunhndë. —Cuatjin cachja xuta jan.

¹⁵ Peru Jesús ne, ha vëë me xi ha tu hora sa xi cjuaha xuta me cojo ngujyë camahani xi suaxa rë me xi cuma titjun me. Vëhë xi Jesús ne, cavetjuxin nga me, quiji suvá ni me hisca rcu ndetjún.

Quiji ntsacu Jesucristu xcun nandá

¹⁶ Quihndë ne, xi quiji hora jan ne, quijijne xuta ladu rë Jesús tjehen laguna. ¹⁷ Hane xi cavisehen me ngu barcu ne, cavuya canduva nga me ngunda vihi tsëhë laguna xi cjue me nandya Capernaum. Hya xi camá ne, camajñu, peru Jesús ne, cjëë cjuetjengui me xuta ladu rë me jan. ¹⁸ Hane hora vëhë ne, xi jercu tu hñu camahani tivanga tjo ne, sacuaha xi sexu nandá tsëhë laguna jan. ¹⁹ Ha xcun xi ha quiji me xi cuacun jan cojo barcu sacuaha hñú o sa jyun kilómetro xcun nandá jan ne, cavëë me xi nduva ntsacu Jesús xcun nandá, tisahmitiña me tsëhë barcu. Hane xuta ladu rë me jan ne, catsacjun me camá. ²⁰ Peru Jesús ne, cachja me cuitjin cojo xuta ladu rë me jan:

—Ngahan vi. Xicarcuun. —Cuatjin cachja me.

²¹ Ngajan xi xuta ladu rë Jesús jan ne, cojo yëjë ni cjuasua ne, cafahatsja me Jesús cahntsua barcu. Hane ha tu ñahñu cafehe barcu cojo rë me nangui quixí, cahndë hiscan cjuí me.

Cavanguise xuta Jesús

²² Hane xi camá nchujun jan ne, xutacjin xi caviyuju ngunda vëhë tsëhë laguna jan ne, catsinguitsjen me xi ngujña ne, ngu tu tu barcu tacun jan. Hacuaha vëë me xi Jesús ne, quijiin me cojo xuta ladu rë me barcu vëhë ta suvá ni xuta ladu rë Jesús quiji me. ²³ Peru ngujo barcu xi canduva tsëhë nandya Tiberias ne, cafehe tiña hiscan xi cajinë xutacjin jan niñu hora xi café casua Nai naja nacuechji rë Nina. ²⁴ Hane xi cavëë xutacjin jan xi hacuini Jesús hacuini xuta ladu rë me siu cuaha me jan ne, sehe cavisehen me barcu xi sehe cafehe jan, quiji me nandya Capernaum xi cuanguise me Jesús.

Jesucristu ne, sacua ha niñu xi sua cjuahñu me

²⁵ Hane xi casacu rë xuta xi cuacun jan Jesús ngunda vihi tsëhë laguna jan ne, cavinenguise me cuitjin:

—Maestro, ¿janihya canduvun nguehe ni? —Cuatjin cavinenguise xuta xi cuacun jan.

²⁶ Ngajan xi Jesús ne, cuitjin cafayangui me:

—Cuichjá cojo nuju cjuaquixi ta ngayujun ni ngayun ne, nduvuntjengun ná, peru hacuiin ngatsë rë xi cahyun cjuarcun xi casahme ta ngatsë rë xi cachinu niñu jan hisca xi catsë nuju. ²⁷ Nihñu ngatsë rë xichine, peru hacuiin xichine xi vetsun ta xichine xi hacuiin vetsun hacua ha hisca sua cjuahñu xatsë. Vëhë xichine xi suá nuju ngahan xi Quihndi rë Xuta Jain ngahan, ngahan xi sahme cjuarcun cojo sa xi cumatsejen xi cjuaquixi jain xi Nina Nahmi naha catsingatju ná me. —Cuatjin cafayangui Jesús.

²⁸ Ngajan xi xuta xi cuacun jan ne, cuitjin cavinenguise me cojo Jesús:

—¿Hacutjin ndatjin nihñi, cojo sa xi nihñi hacutjin xi chuya rë Nina? —Cuatjin cavinenguise xuta jan.

²⁹ Hane Jesús ne, cuitjin cafayangui me:

—Cuitjin meje rë Nina xi nihñu: catamangu tacún cojo ná, ngahan xi catsingatju ná me. —Cuatjin cafayangui Jesús.

³⁰ Ngajan xi xuta jan ne, cuitjin cavinenguise me Jesús:

—¿Mé cjuarcun nihñu xi sacú chutsijin, cojo sa xi cumangu tacún cojo nuju? ¿Mé xi nihñu? ³¹ Yëjë ni xutachanga naja ne, cajinë me niñu xi camá cojo scuan maná ngajan ngu xín camahani tsëhë nandya, sacuatjin camahindu xcun xujun rë Nina xi chja cuitjin: “Nina ne, tsëhë ngahnga catsingatju me niñu xi cajinë xuta.” Cuatjin camahindu. —Vëhë cju a xi cavinenguise xuta xi cuacun jan Jesús.

³² Ngajan xi Jesús ne, cuitjin cachja me cojo xuta jan:

—Cuichjá cojo nuju cjuaquixi ta hacuiin Moisés xi casua me niñu xi nduva tsëhë ngahnga ta Nahmi naha xi sua nuju me niñu jain xi nduva tsëhë ngahnga. ³³ Niñu xi sua Nina ne, vëhë niñu xi nduvajne tsëhë ngahnga hacua ha sua rë xuta cjuahñu. —Cuatjin cachja Jesús.

³⁴ Hane xuta xi cuacun jan ne, cuitjin cafehya me cojo Jesús:

—Tatá, tuhun niji niñu vëhë nchunchujun ni. —Cuatjin cafehya xuta jan.

³⁵ Ngajan xi Jesús ne, cuitjin cachja me:

—Ngahan xi sacua ha niñu jan xi sua cjuahñu ngahan. Xuta xi cuisehen me ladu naha xi mangucacun me cojo ná ne, ña tsë rë xahasen rë me cjuandaja, sacua ha xi ha quihndë cumavajin rë me cumaxindaain rë me ngundiya nga. ³⁶ Ngahan ne, ha cachjá cojo nuju ta ha tichutsujun xcusun xi sahme peru manguaain tacún cojo ná. ³⁷ Yëjë ni xuta xi Nahmi naha casua ná me ne, cuinduvatjengui ná me. Hane me xi cuinduvatjengui ná ne, hatuxa tsitjunguen me ta, ³⁸ tsëhë xi ngahan ne, xi canduvajne tsëhë ngahnga ne, hacuiin xi sahme sacuatjin xi meje ná ta sacuatjin xi meje rë me xi catsingatju ná. ³⁹ Hane me xi catsingatju ná vë ne, meje rë me xi hisca ngu xuta tsëhë yëjë ni me xi casua ná me ne, tsichajan me ta tsicúya me cjuahñu nixtin xi chjaháchuva rë sa nima sa xuta cojo cjuatacun rë. ⁴⁰ Hacua ha Nahmi naha ne, meje rë me xi yëjë ni xuta xi vijnercu me yo ngahan xi Quihndi rë Nina ngahan hacua ha cumangu cacun me cojo ná ne, sacú rë me cjuahñu xatsë. Hane ngahan tsicúya me cjuahñu nixtin xi tsichuva Nina sa nima sa xuta. —Cuatjin cachja Jesús.

⁴¹ Vêhê xi xutaxa rê yungun xi cuacun jan ne, cavetsihin cavisiajmihma me tsêhê Jesús ta, tsêhê xi cachja Jesús ta: “Ngahan sacuaaha niñu xi nduvajne tsêhê ngahnga ngahan.” ⁴² Cuitjin cavisiajmihma me:

—¿Hacuiin cha Jesús vihi, xi quihndi rê José? ¿Hacuiin ha hyan nahmi rê cha haguaha ha hyan naa rê cha? ¿Hacutjin má xi quihndê ne, chja cha xi tsêhê ngahnga canduvajne cha ni? —Cuatjin cavisiajmihma me.

⁴³ Ngajan xi Jesús ne, cuitjin cachja me cojo xutaxa rê jan:

—Camá ni cuinújunhmú cojo xingun xingu xingu ngayun. ⁴⁴ Xuta xi cuma cuisehen me ladu naha ne, súvá ni xuta xi cuisecoo Nahmi naha, me xi catsingatju ná. Me vêhê xi cuma cuisehen me, hane ngahan tsicúya me cjuahñu nixtin xi tsichuva Nina sa nima sa xuta. ⁴⁵ Cuitjin camahindu xcun xujun rê Nina xi catsihindu profeta: “Súvá Nina scuxaha me cjuatacun rê yêjê ni xuta.” Cuatjin camahindu. Hane xuta xi vetaharcu cjuá rê Nina hacuaaha Nina vuxaha me cjuatacun rê ne, visehen me ladu naha.

⁴⁶ Hacuiin xi ha tjin yo xi cavutsejen rê Nahmi naha ta suva ni ngahan xi tsêhê Nina canduva ne, ngahan xi cahvê Nahmi naha. ⁴⁷ Cuichjá cojo nuju cjuaquixi ta yo xi mangucacun cojo ná ne, tjin rê cjuahñu xatsê. ⁴⁸ Ngahan xi sacuaaha niñu xi sua cjuahñu ngahan. ⁴⁹ Yêjê ni xutachanga nuju ne, cajinê me niñu xi camá cojo scuan maná ngajan ngu xín camahani tsêhê nandya, peru cavechú nixtin xi cahme me. ⁵⁰ Peru niñu xi nduvajne tsêhê ngahnga xi chjá ngahan tsêhê ne, sa xi yo sinê niñu vêhê ne, cueyaain. ⁵¹ Ngahan xi quicun ngahan ne, ngahan xi sacuaaha niñu xi canduvajne tsêhê ngahnga jan ngahan. Sa xi ngu xuta sinê me niñu vêhê ne, handasa cueya me ne, peru hasen rê me ne, cjue xcun Nina. Niñu xi suá ngahan vê ne, hacui yojo naha xi suá cojo sa xi xuta ngasunhdê ne, sacú rê me cjuahñu xatsê. —Cuatjin cachja Jesús cojo xutaxa rê.

⁵² Hya xi camá ne, xutaxa rê jan ne, cavetsihin cavisiajmicjan me tsêhê Jesús ngajñi rê me cojo xicjin me, cuitjin cachja me:

—¿Hacutjin cuma sua cha xi cuajyihî vê yojo rê cha xi xinêê ni? —Cuatjin cachja xutaxa rê jan.

⁵³ Hane Jesús ne, cuitjin cachja me cojo xuta xi cuacun jan:

—Cuichjá cojo nuju cjuaquixi ta sa xi ngayun xinuu yojo naha ngahan xi Quihndi rê Xuta Jain ngahan hacuaaha siuun jni naha ne, tsajin nuju cjuahñu xi cjuaquixi. ⁵⁴ Xuta xi jinê me yojo naha hacuaaha hvi me jni naha ne, tjin rê me cjuahñu xatsê, hacuaaha ngahan tsicúya me cjuahñu nixtin xi tsichuva Nina sa nima sa xuta. ⁵⁵ Cuatjin cuma ta, tsêhê xi yojo naha ne, vêhê comida xi cjuaquixi, hane jni naha ne, vêhê nandá xi cjuaquixi. ⁵⁶ Me xi jinê yojo naha hacuaaha hvi me jni naha ne, visehen me yojo naja, hacuaaha ngahan ne, visehen yojo rê. ⁵⁷ Nahmi naha, me xi hatuxa tjin rê cjuahñu ne, catsingatju ná me, hane ngatsê rê me vêhê xi tejña cjuahñu ngahan. Ha chuva vêhê ni ne, xuta xi jinê ná ne, cuejña me cjuahñu ngatsê naha. ⁵⁸ Cuatjin sahmi niñu xi canduvajne tsêhê ngahnga. Hacuiin tangun cojo niñu xi cajinê xutachanga nuju ta cavechú nixtin xi cahme me. Ha ndaja xuta xi sinê me niñu xi chjá ngahan ne, handasa cueya me ne, peru hasen rê me ne, cjue xcun Nina. ⁵⁹ —Cuatjin cachja Jesús hya xi cavicuya me xuta ngu yungun ngajan nandya Capernaum.

Cjua xi sua machaya naja tsêhê cjuahñu xatsê

⁶⁰ Hya xi camá ne, jemu cjín xuta ladu rê Jesús xi cuitjin cachja me hya xi cahndê me cjuá jan:

—Jemu choho visiajmi me! ¡Scaain naja cojo cjuua vèhè! —Cuatjin cachja me.

⁶¹ Peru Jesús ne, ha vèe me cojo cjuatacun rë me xi cuatjin visiajmihma xuta ladu rë me xi cuacun jan. Vèhè xi cachja me cuitjin:

—Sa xi meje cuetjunxun tsèhè ndiya naha ngatsè rë cjuua xi cachjá cojo nuju vè ne, ⁶² ¿mé ningatuhun tacún sa xi chutsujun xi cúa cjuèneje nga ngahnga hiscan xi cavitejña titjun, ngahan xi Quihndi rë Xuta Jain ngahan?

⁶³ Hasen rë Nina ne, vèhè xi sua cjuahñu. Peru ngu xuta ngasunhdè ne, hatuxa cumaji sahmi me cuatjin. Yèjè ni cjuua xi ngahan cachjá cojo nuju ne, vèhè sua machaya nuju tsèhè Hasen rë Nina cojo tsèhè cjuahñu xi sua. ⁶⁴ Peru tjin yahnga ngayun xi manguaain tacún cojo ná. —Cuatjin cachja Jesús ta, tsèhè xi hisca ntsacu cavetsihin ne, ha vèe me yo xuta xi cumanguaain cacun cojo rë me hacuaha ha vèe me yo xi sahmi rë me entregadu.

⁶⁵ Hacuaha cachja sa me cuitjin:

—Vèhè xi cuatjin cachjá cojo nuju xi xuta xi cuma cuisehen me ladu naha ne, suvá ni xuta xi cuichja Nahmi naha xi cuisehen. —Cuatjin cachja Jesús.

⁶⁶ Ngatsè rë vèhè xi jemu cjin xuta ladu rë Jesús ne, quiji ngaxtun me, hacuaha ha quihndè catsujyiin me cojo Jesús. ⁶⁷ Ngajan xi Jesús ne, cavinenguise me xuta ladu rë me xi tejó jan cuitjin:

—¿Hacuiin cojo ngayun meje cuangunxun? —Cuatjin cavinenguise me.

⁶⁸ Hane Simón Pedru ne, cuitjin cafayangui me:

—Ngayun nai naha, ¿yo cuanguintjenguin?, ta ngayun ne, tjin nuju cjuua xi sua machaya niji tsèhè cjuahñu xatsè. ⁶⁹ Hacuaha ngayin ne, mangutacuín cojo nuju hacuaha hyin xi tsèhè jain Nina ngayun. —Cuatjin cafayangui Simón Pedru.

⁷⁰ Ngajan xi Jesús ne, cuitjin cachja me:

—Handasa ngahan suva cavaxejen nuju ngayujun ni xi tejó ngayun, peru ngajñi nuju ne, jiyajñi ngu xi ha jiya xitsehen xahasen rë. —Cuatjin cachja Jesús.

⁷¹ Jesús ne, tichja me tsèhè ngu cha tsèhè ngajñi rë xi tejó xuta ladu rë me, ngu cha xi hmí rë Judas, quihndi rë Simón Iscariote. Cuatjin cachja me ta, tsèhè xi cha vèhè sahmi cha me entregadu cojo condra rë me.

7

Jesucristu cojo xicjin me

¹ Xi cavatju vèhè ne, catsujyihya Jesús ngujo nandya tsèhè distritu Galilea. Miji tsujyihya me nandya xi siu ladu tsèhè distritu Judea ta, tsèhè xi xutaxa rë yungun ne, tivanguise me Jesús xi tsiquehen me. ² Quihndè ne, ha camatiña suhi tsèhè Ndiha Tsjian, suhi xi sahmi xuta tjè rë Israel. ³ Ngajan xi me xi xicjin Jesús jan ne, cuitjin cachja me cojo Jesús:

—Tihin ngajan distritu Judea, cojo sa xi hacuaha cojo xuta ladu riji xi siu jan ne, scuèè me xcusun xi nihñi ta ⁴ tsèhè xi ngu cha xi meje rë xi cumachaya rë xuta xcusun xi sahmi cha ne, hacuiin táha hma sahmi cha. Ngaye ta cuatjin jemu nihñi cjuandaja ne, ningacuín rë yèjè xuta cjuandaja vèhè. —Cuatjin cachja xicjin Jesús cojo rë me ta, ⁵ tsèhè xi me xi cuacun vè ne, camanguaain cacun me cojo Jesús.

⁶ Ngajan xi Jesús ne, cuitjin cafayangui me:

—Cjèè cuechú nixtin xi sahme mé xi sahme. Peru ngayun ne, tu mé ni nixtin ne, ndatjin xi cuma nuju. ⁷ Ngayun ne, cumaji choho scuèè nuju xuta, peru ngahan ne, choho vèè ná me ta, tsèhè xi ngahan ne, chjá cjuaquixi xi

xcusun xi sahmi me ne, hatuxa tsehen. ⁸ Tángun ni ngayun ta ngahan ne, cjueen suhi vëhë. Cjueen ta cjëë cuetjucaa nixtin xi sahme mé xi sahme. —Cuatjin cafayangui Jesús.

⁹ Xi cavatju cachja me cojo xicjin me cjua vëhë ne, cavéjña ni me nangui rë me.

Quiji Jesucristu suhi tsëhë Ndihya Tsjian

¹⁰ Hane xi cavatju quiji xicjin Jesús suhi jan ne, hacuaha cojo Jesús quiji me. Peru hacuun táha tsejen ta sacuaha xi táha hma quiji me. ¹¹ Hya xi camá ne, xutaxa rë yungun jan ne, cavanguise me Jesús hiscan jima suhi jan. Cuitjin cavinenguise me:

—¿Jani tacun cha vëhë? —Cuatjin cavinenguise me.

¹² Hane xutacjin jan ne, jercu visiajmihma me ngajni rë me tsëhë Jesús. Ngujo me ne, cuitjin cachja me:

—Ngu xuta ndaja me. —Cuatjin cachja me.

Peru ngujo nga xuta ne, cuitjin cachja me:

—¡jéya, vindacha cha xutacjin! —Cuatjin cachja me.

¹³ Peru tsajin hisca ngu xuta xi cachjatë me tsëhë Jesús ta, tsëhë xi tsacjun me xutaxa rë yungun.

¹⁴ Quihndë ne, hya xi camavasen tijima suhi jan ne, quiji Jesús yungun xi matitjun, sehe cavetsihin cavicuya me xuta cjua rë Nina. ¹⁵ Hane xutaxa rë yungun jan ne, quijircun rë me xi cuatjin jemu ndaja chja Jesús. Cuitjin cachja me ngajni rë me cojo xicjin me:

—¿Hacutjin má xi cuarcu vëhë cjuatacun rë cha vë xi hisca hacuun cavutaya cha? —Cuatjin cachja me.

¹⁶ Ngajan xi Jesús ne, cuitjin cachja me cojo xutaxa rë xi cuacun jan:

—Cjua xi vicuyá rë xuta ne, hacuun cjua naha suva ta cjua rë me xi catsingatju ná. ¹⁷ Sa xi ngu xuta meje sahmi me sacuatjin xi meje rë me xi catsingatju ná ne, ngajan sacú cumachaya rë me tsëhë cjua xi vicuyá, ¿há xi tsëhë Nina ne? o ¿há xi nduva tsëhë cjuatacun naha suva? ¹⁸ Xuta xi chja me cjua xi nduva tsëhë cjuatacun rë suvá me ne, meje sahmi jyë sahmi hnga suvá me yojo rë me. Peru xuta xi meje sahmi jyë sahmi hnga me xi catsingatju rë me ne, me vëhë ne, quixi me cojo cjua rë me hacuaha tsajin cjuatsehen cahntsa xahasen rë me.

¹⁹ 'Moisés ne, casua nuju me ley rë Nina, peru hisca ngu ngayun nihñuchuun sacuatjin chja ley vëhë. ¡Tsëhë vëhë rë xi meje nicuhun ná! —Cuatjin cachja Jesús.

²⁰ Ngajan xi xutacjin jan ne, cuitjin cafayangui me:

—¿Yo xitsehen xi cachja cojo nuju? ta nguehe ne, tsajin yo xi meje tsiquehen nuju. —Cuatjin cafayangui xutacjin jan.

²¹ Hane xi cafayangui Jesús ne, cuitjin cachja me:

—Ngayujun ni ngayun ne, quijircun nuju ngatsë rë ngu xcusun xi casahme nixtin xi chjahájenda rë. ²² Peru suvá Moisés hacuaha cavejña me xcusun xi xti chuxin rë quihndi xihin. (Xi cjuaquixi ne, hacuun Moisés ta xutachanga nuju xi cavejña me xcusun vëhë.) Hane vëhë xi ngayun ne, vichun chuxin rë quihndi xihin handasa nixtin xi chjahájenda rë. ²³ Sa xi vichun chuxin rë quihndi xihin nixtin xi chjahájenda rë cojo sa xi nihñuchuhun sacuatjin cjua xi chja ley rë Moisés ne, ¿me má cuatjin ma cjan nuju cojo ná xi casahme xi camandaja camahani ngu xuta nixtin xi chjahájenda rë ni? ²⁴ Ha quihndë hacuun tujyë nichuvun ná ta nichuvun ná cojo ngu cjuatacun xi cjuaquixi. —Cuatjin cachja Jesús.

¿Jani hiscan canduva Jesucristu?

²⁵ Ngajan xi ngujo xuta nandya Jerusalén ne, cuitjin cachja me ngajñi rë me:

—¿Hacuiin me vihi xi vinchise rë xi cueya ni? ²⁶ Peru chutsujun ta cuajiyihi me secun me tichja tichja me cojo xuta, hane ndastu ngu cjuua chja xutaxa rë cojo rë me. ¡Hyaan sa xi vëëndaja xutaxa rë xi me vihi xi catsingatju jain Nina me! ²⁷ Me vihi ne, ha hyan jani canduva me, peru hya xi cuinduva me xi Nina tsingatju rë ne, tsajin yo vëë jani cuetju me cuinduva me. —Cuatjin cachja xuta xi cuacun jan.

²⁸ Ngajan xi Jesús ne, xi quijinduju sa cavicuya me xuta ngajan yungun xi matitjun ne, jercu hñu cachja me cuitjin:

—¿Há quixi xi hyun ná hacuaha hyun jani canduva? Peru ngahan ne, hacuiin cjuatacun naha suva xi canduva. Me xi catsingatju ná ne, hatuxa quixi me cojo cjuua rë me, peru ngayun ne, hyúun me. ²⁹ Ngahan ne, hvë me ta, tsëhë xi hiscan tacun me ne, ngajan canduvá. Hacuaha me vëhë catsingatju ná me. —Cuatjin cachja Jesús.

³⁰ Tsëhë xi cuatjin cachja Jesús cjuua vëhë ne, vëhë xi meje cjuaha xuta xi cuacun jan me. Peru tsajin yo xi cavetahatsja rë me ta, tsëhë xi cjëë cuetjucaa nixtin xi cuatjin cuma. ³¹ Hane jemu cjín xuta ngajñi rë xutacjín jan ne, camangu cacun me cojo Jesús. Cuitjin cachja me:

—Hya xi cuinduva me xi Nina tsingatju rë ne, ¿há hitsë sa cjín cjuarcun sahmi me xi cuma rë cjuarcun xi casahmi me vihi? —Cuatjin cachja xuta xi cuacun jan.

Catsingatju xutaxa rë yungun cha xi cjuaha rë Jesucristu

³² Hane ngujo cha fariseo ne, cahndë cha xi visiajmihma xutacjín jan ngajñi rë me cojo xicjin me cjuua vëhë. Ngajan xi yëjë ni nahmi xi matitjun cojo cha fariseo jan ne, catsingatju me mayu cojo nisë rë cha xi chjahá rë Jesús. ³³ Hane Jesús ne, cuitjin cachja me:

—Ngujo nixtin sa xi cuitejña cojo nuju, sehe cúa cjuë nga hiscan tacun me xi catsingatju ná. ³⁴ Ngayun ne, cuinchunsun ná, peru sacuiin nuju ngahan ta, tsëhë xi hiscan xi cuitejña ne, cumaji cuangun. —Cuatjin cachja Jesús.

³⁵ Ngajan xi xutaxa rë jan ne, cavinenguisse xicjin me cuitjin:

—¿Jani cjue cha xi cuijyihí vi xi sacuiin naja cha? ¿Há cjue cha ngu nangui cjin, cjue tjengui cha xuta naja xi cavitsojo ngajñi rë xutaxín hane ngajan cuicuya cha xutaxín jan ni? ³⁶ ¿Mé vijne cjuua xi chja cha xi cuinchaseen cha ne, sacuiin naja cha, tsëhë xi hiscan cuejña cha ne, cumaji cuanguen? —Cuatjin cavinenguisse xicjin xutaxa rë jan.

Nandá xi sua cjuahñu

³⁷ Quihndë ne, nixtin xi cajnetaha suhi jan ne, vëhë nixtin jyë tsëhë suhi jan. Hane casecun Jesús cachjahñu me cojo xuta cuitjin:

—Sa xi tjin yo xi xinda rë ne, catinduva tjengui ná catihí. ³⁸ Xuta xi mangucacun me cojo ná ne, cuatju me sacuatjin chja xujun rë Nina xi chja cuitjin: “Cuetju tsëhë xahasen rë me sacuaha nandá xi ña vangatë xi sua rë me cjuahñu xatsë.” —Cuatjin cachjahñu Jesús.

³⁹ Xi cuatjin cachja Jesús ne, cachja me tsëhë Hasen rë Nina xi sehe sacú rë xuta xi mangucacun me cojo Jesús. Cuatjin cachja Jesús ta, tsëhë xi Nina ne, cjëë sua me Hasen rë me, tsëhë xi Jesús ne, cjëë cuma jyë cuma hnga me cojo Hasen rë me.

Hacuiin ngu ni cjuatacun catsingataha cacun xutacjín

⁴⁰ Hane xi cahndë xutacjín jan cjua vëhë ne, ngujo me ne, cuitjin cachja me: —Me vëhë ne, cjuaquixi xi me vëhë profeta xi jemu nechanyan rë. —Cuatjin cachja ngujo me.

⁴¹ Hane ngujo nga me ne, cuitjin cachja me:

—Me vëhë xi Tsingatju Nina. —Cuatjin cachja me.

Peru ngujo nga me ne, cachja me cuitjin:

—¡Peru Me xi Tsingatju Nina ne, hacuiin ngajñi rë xuta Galilea cuetjujñi me! ⁴² ¡Ha hyan xi xujun rë Nina ne, chja ta Me xi Tsingatju Nina ne, cuinduva me tsëhë tjë rë xutachanga naja David, ngajan Belén hiscan nangui rë David! —Cuatjin cachja me xi cuacun jan.

⁴³ Cuatjin camá xi ngatsë rë Jesús ne, hacuiin ngu ni cjuatacun catsingataha cacun xutacjín jan. ⁴⁴ Vëhë xi ngujo xuta jan ne, meje cjuaha me Jesús cjuecojo me ndavaya. Peru tsajin yo xi cavetahatsja rë me.

Camanguaain cacun xutaxa rë cojo Jesucristu

⁴⁵ Hya xi camá ne, mayu cojo nisë rë cha ne, cavuya quiji nga cha xcun nahmi xi matitjun cojo xcun cha fariseo xi cuacun jan, hane xutaxa rë xi cuacun jan ne, cuitjin cachja me cojo mayu jan:

—¿Mé má canduvuun cojo cha? —Cuatjin cachja me.

⁴⁶ Ngajan xi cha mayu cojo nisë rë cha jan ne, cuitjin cafayangui cha:

—¡Cjëë camahani cuinuhyan xi chja ngu xuta sacuatjin chja me vëhë! —Cuatjin cafayangui cha.

⁴⁷ Hane cha fariseo jan ne, cuitjin cachja cha cojo cha xi cuacun jan:

—¡Tu ma rë sa xi cojo ngayun camandacha ngayun! ⁴⁸ ¡Ngayun ne, hyun ta hisca ngu xutaxa rë, hisca xi ngu xuta fariseo ne, cjëë cumangu cacun me cojo cha xi cuajiyi vë! ⁴⁹ Peru xutacjín xi cuacun hisca hvín hacutjin chja ley rë Moisés ne, ¡miji rë Nina me! —Cuatjin cachja cha fariseo jan.

⁵⁰ Ngajan xi ngu cha fariseo xi hmí rë Nicodemo, cha xi quiji tjengui rë Jesús hatsëë ne, cuitjin cachja cha cojo cha xi cuacun vëhë:

⁵¹ —Chja ley naja ta cumaji nihña castigu ngu xuta xi cjëë cuinuhyan mé cuichja me hacuaha sacú naja cjuaquixi mé casahmi me. —Cuatjin cachja cha Nicodemo.

⁵² Ngajan xi cha fariseo xi cuacun jan ne, cuitjin cafayangui cha:

—¿Hacuaha cojo ngayun má ngayun xuta rë distritu rë Galilea ni? Chutayun xujun rë Nina ne, sehe ngajan sacú cumachaya nuju ta ngajan Galilea ne, cuetjinjñii hisca ngu profeta. —Cuatjin cafayangui cha fariseo xi cuacun jan.

Chjuun xi cachjahá rë xcun cjuatsehen xi tisahmi

⁵³ Hya xi camá ne, jima ngu xuta jan cafe me ndava me.

8

¹ Peru Jesús ne, cavetju me quiji me ndetjún Olivu. ² Hane xi casahasen camá nchujun jan ne, cavuya quiji nga Jesús ndatsen yungun xi matitjun. Hane yëjë xuta jan ne, casahmitña me tsëhë Jesús. Hane xi quiji cavéjña Jesús ne, sehe cavetsihin cavicuya me xuta jan. ³ Ngajan xi ngujo cha vicuya cjuachacun cojo ngujo cha fariseo ne, cafehecojo cha ngu chjuun xi cachjahá rë na xcun cjuatsehen xi tisahmi na cojo ngu xihin xi hacuiin xihin rë na. Hane cha xi cuacun jan ne, quiji cavisecon cha na ngajñi rë xuta hiscan tacun Jesús, ⁴ sehe cachja cha cojo Jesús cuitjin:

—Maestro, chjuun vihi ne, cachjahá rë na xcun cjuatsehen xi tisahmi na cojo ngu xihin xi hacuiin xihin rë na. ⁵ Quihndë ne, xcun ley xi cavejña naja

Moisés ne, cavitexa me xi tu yo ni xuta xi sahmi xcusun vëhë ne, cueya me cojo ndyojo. Ngayun ne, ¿mé xi cuinújun? ⁶—Cuatjin cavinenguisse cha xi cuacun vëhë, xi tifahachuva cha Jesús, cojo sa xi sacú rë cha chuva rë xi cuinchajyë cha me.

Ngajan xi Jesús ne, catsiquindi me yojo rë me, sehe cavetsihin catsihindu me nangui cojo rcutsja me. ⁷Hane tsëhë xi cjuinduju sa tivinenguisse cha xi cuacun jan Jesús ne, catsinguixi me yojo rë me, sehe cachja me cojo cha cuitjin:

—Tu jarë ni ngayun xi tsajin jyë nuju ne, ngayun tjun tjun tetuhun rë na ndyojo. —Cuatjin cachja Jesús.

⁸Hane sehe catsiquindi nga me yojo rë me, hane catsihindu sa me nangui.

⁹Hane xi cahndë cha xi cuacun jan xi cuatjin cachja Jesús ne, ta vëë me xi hacuiin tyjahi cjuatacun rë me, chuva ngu chuva ngu cha cavetju cha cafe cha. Cavetsihin cavetju tjun tjun cha xi hitsë sa changá. Hane camá suvá sa Jesús, cojo chjuun xi secun ngajñi rë xutacjin jan. ¹⁰Hane xi catsinguixi me yojo rë me ne, cavinenguisse me chjuun jan cuitjin:

—Ngayun chjuun, ¿jarë me ne? ¿Há tsajin yo xi casahmi nuju castigu? —Cuatjin cavinenguisse Jesús.

¹¹Ngajan xi chjuun jan ne, cuitjin cafayangui na:

—Tsajin yo, tatá. —Cuatjin cafayangui na.

Ngajan xi Jesús ne, cuitjin cachja me:

—Ngahan ne, hacuaha sahmeë nuju castigu. Cuma cuangun, peru ha quihndë xicanihñuu sa cjuatsehen. —Cuatjin cachja Jesús.

Jesucristu ne, sacuaha hasen xi cuma rë xuta

¹²Hya xi camá ne, cachja nga Jesús cojo xutacjin jan cuitjin:

—Ngahan ne, sacuaha hasen xi cuma rë xuta ngasunhndë ngahan. Xuta xi cuisehen me ladu naha ne, hatuxa cuiyijin me ngajñi jñú ta ngajñi hasen xi sua cjuahñu xatsë cuiyuju me. —Cuatjin cachja Jesús.

¹³Ngajan xi cha fariseo xi cuacun jan ne, cuitjin cachja cha cojo Jesús:

—Ngayun ne, tinújun favor nuju suvun. Vëhë xi cjuá xi nújun ne, tsajin rë cjuaquixi. —Cuatjin cachja cha.

¹⁴Hane xi cafayangui Jesús ne, cuitjin cachja me:

—Handasa chjá favor naha suva ne, cjuá xi chjá ne, cjuaquixi ta, tsëhë xi ngahan ne, hvë jani canduva hacuaha hvë jani cýa cjué nga. Peru ngayun ne, hyúun jani canduva hacuaha hyúun jani cýa cjué nga. ¹⁵Ngayun ne, xi nichuvun xuta cojo cjuatacun rë me ne, chuva xi tsingatahacacun xuta ngasunhndë ne, cuatjin ningatuhuntacún. Ngahan ne, titsichuvaan hisca ngu xuta cojo cjuatacun rë me. ¹⁶Peru sa xi tsichúva ngu xuta ne, hatuxa cjuaquixi cjuá xi cuichjá ta, tsëhë xi hacuiin suva sahme ta ngahan cojo me xi catsingatju ná nihñi tangun. ¹⁷Xcun ley xi vitexa nuju ne, hacuaha camahindu xi hya xi jo xuta sua me cjuaquixi rë me xcun xutaxa rë hane ngu tangun ni cjuá chja me ne, cjuaquixi cjuá xi chja me. ¹⁸Ngahan xi chjá favor naha suva, hane Nahmi naha xi catsingatju ná me ne, hacuaha cojo me chja me favor naha. —Cuatjin cafayangui Jesús.

¹⁹Ngajan xi cha fariseo jan ne, cuitjin cavinenguisse cha Jesús:

—¿Jani tacun nahmi nuju ni? —Cuatjin cavinenguisse cha.

Hane Jesús ne, cuitjin cafayangui me:

—Hacuiin ngahan hyun ná ne, hacuiin Nahmi naha hyun me. Sa xi ngahan hyun ná ne, hacuaha hyun Nahmi naha. —Cuatjin cafayangui Jesús.

²⁰ Cjua vëhë ne, cachja Jesús hya xi tivicuya me xuta ngajan yungun xi matitjun, ngu ndihya hiscan xi siu alcancia. Peru hisca ngu xuta cafaain rë me, tsëhë xi cjëë cuetjucaa nixtin xi cuatjin cuma.

“Cumaji cuangun hiscan xi cjuë”, chja Jesucristu

²¹ Hya xi camá ne, quijinduju sa cachja Jesús cojo xuta cuitjin:

—Ngahan ne, cuétju cjuë, hane ngayun ne, cuinchunsun ná. Peru ngatsë rë cjuatsehen xi cún ngayun ne, cuechuun xcun Nina hya xi cueyun. Hiscan xi cjuë ne, ngayun ne, cumaji cuangun. —Cuatjin cachja Jesús.

²² Ngajan xi xutaxa rë xi cuacun jan ne, cuitjin cachja me ngajñi rë me cojo xicjin me:

—Tu ma rë sa xi cjue tsiquehen suvá me yojo rë me xi cuatjin chja me xi hiscan cjue me ne, cumaji cuanguen. —Cuatjin cachja xutaxa rë xi cuacun jan.

²³ Ngajan xi Jesús ne, cuitjin cachja me cojo me xi cuacun vë:

—Ngayun ne, tsëhë nguehe nangui ngayun. Ngahan ne, tsëhë ngahnga ngahan. Ngayun ne, tsëhë ngasunhndë vihi ngayun. Ngahan ne, hacuün tsëhë ngasunhndë vihi ngahan. ²⁴ Vëhë xi cuatjin cachjá cojo nuju xi ngatsë rë cjuatsehen xi cún ngayun ne, cuechuun xcun Nina hya xi cueyun. Sa xi macjaain nuju xi Ngahan Vi, hmí ná ne, ngatsë rë cjuatsehen xi cún ngayun ne, cuechuun xcun Nina hya xi cueyun. —Cuatjin cachja Jesús.

²⁵ Ngajan xi xuta xi cuacun jan ne, cavinenguise me Jesús cuitjin:

—¿Yo ngayun ní? —Cuatjin cavinenguise me.

Hane Jesús ne, cuitjin cachja me:

—¡Sacuatjin cachjá cojo nuju hisca ntsacu cavetsihin! ²⁶ Jemu tjin ná cjua xi cuichjá tsujun, hacuaha jemu tjin xi cjuaháchuva tsujun. Peru me xi catsingatju ná ne, quixi jain me cojo cjua rë me, hane ngahan ne, cjua xi cáhndë xi cachja me ne, cjua vëhë xi chjá nguehe ngasunhndë. —Cuatjin cachja Jesús.

²⁷ Peru xutaxa rë xi cuacun jan ne, cajni rcu me xi Jesús ne, tsëhë Nina Nahmi naja xi tichja me. ²⁸ Vëhë xi Jesús ne, cuitjin cachja me:

—Hya xi ngayun chjunihngun ná ngahan xi Quihndi rë Xuta Jain ngahan ne, hya cuijne rcun xi Ngahan Vi hmí ná. Hane ngahan ne, hatuxa tsajin mé xi sahme xi cojo cjuatacun naha suva ta sacuaha cjua xi cachja Nahmi naha cojo ná ne, cjua vëhë xi chjá. ²⁹ Hacuaha me xi catsingatju ná ne, tacun me cojo ná, cavejñaaí ná me xi suva ta, tsëhë xi ngahan ne, hatuxa sahme tutjin xi chuya rë me. —Cuatjin cachja Jesús.

³⁰ Hane xi cachja Jesús cjua vëhë ne, jemu cjín xuta camangu cacun me cojo rë me.

Cuëhëndaya naja cjuaquixi

³¹ Ngajan xi Jesús ne, cachja me cuitjin cojo xutaxa rë yungun xi camacjain rë tsëhë cjua rë me:

—Sa xi ngayun cuangun nduju xi quitahá rcun cjua naha ne, quixi xi ha camá ngayun xuta ladu naha. ³² Hacuaha cuijne rcun xi hmí rë cjuaquixi, hane cjuaquixi jan ne, cuëhëndaya nuju. —Cuatjin cachja Jesús.

³³ Ngajan xi xutaxa rë xi cuacun jan ne, cuitjin cafayangui me:

—Peru ngayaan ne, tjë rë xutachanga naja Abraham má ngayaan, hane cjëë camahani cuma ngayaan mosu hndixahan rë xuta. ¿Mé má nújun xi cumandaya ngayin? —Cuatjin cafayangui me.

³⁴ Hane Jesús ne, cuitjin cafayangui me:

—Cuichjá cojo nuju cjuaquixi ta yějē ni xuta xi hincha me ndiya rē cjuatsehen ne, hatuxa tjinñu me cojo cjuatsehen sacuatjin tjinñu ngu mosu hndixahan cojo nai rē. ³⁵ Ngu mosu hndixahan ne, hacuiin hatuxa cuiyujucahndē ngajñi xuta xi ndava, peru ngu quihndi xi cjuaquixi ne, hatuxa tséhē xuta xi ndava. ³⁶ Véhē xi sa xi Quihndi rē Nina cuéhēndaya nuju ne, cumandaya jain ngayun cojo cjuaquixi. ³⁷ Ngahan ne, hacuaha hvē xi tjē rē Abraham má ngayun. Peru ngayun ne, tivinchun chuva rē xi nicuhun ná, tséhē xi tuun cahndē xi cuisehen cju naha cahntsua xahasen nuju. ³⁸ Ngahan ne, xcusun xi cahvē hiscan tacun Nahmi naha ne, tséhē véhē xi tichjá. Peru ngayun ne, sacuatjin canuhyun xi cachja nahmi nuju ne, cuatjin tiniñu. —Cuatjin cafayangui Jesús.

³⁹ Ngajan xi xutaxa rē xi cuacun jan ne, cuitjin cachja me:

—Nahmi niji ne, hacui xutachanga naja Abraham. —Cuatjin cachja me.

Ngajan xi Jesús ne, cuitjin cachja me:

—Sa xi quixi xi quihndi rē Abraham má ngayun ne, sacuatjin casahmi Abraham ne, hacuaha cuatjin nihñu. ⁴⁰ Ngahan ne, cachjá cojo nuju cjuaquixi xi cáhndē xi cachja Nina, peru quihndē ne, tivinchun chuva rē xi nicuhun ná. Xutachanga naja Abraham ne, casahmii me cuatjin. ⁴¹ Ngayun ne, sacuatjin casahmi nahmi nuju ne, hacuanitjin ni tiniñu. —Cuatjin cachja Jesús.

Ngajan xi xutaxa rē xi cuacun jan ne, cachja me cuitjin:

—Ngayin ne, hacuiin quihndi xca ngayin. Nina ne, ngu ni me véhē xi Nahmi niji. —Cuatjin cachja xutaxa rē xi cuacun jan.

⁴² Hane Jesús ne, cuitjin cachja me:

—Sa xi quixi xi Nahmi nuju Nina ne, hacuaha canihñu hmu tacún ná ta, tséhē xi ngahan ne, Nina catsingatju ná me, hane quihndē ne, nguehe tejña. Ngahan ne, hacuiin cjuatacun naha suva xi canduvá ta me véhē catsingatju ná me. ⁴³ ¿Mé má vijñi rcun cju a xi chjá? Cuatjin vijñi rcun ta, tséhē xi caain nuju visiñuju cju naha. ⁴⁴ Ngayun ne, quihndi rē nahmi nuju Satanás ngayun, hane xcusun xi meje rē nahmi nuju ne, xcusun véhē xi meje nihñu. Xitsehen xi matitjun vē ne, hisca ntsacu cavetsihin ne, hatuxa tsiquehen vē xuta. Hatuxa tsajin jiya vē ngajñi rē cjuaquixi ta, tséhē xi tsajin cjuaquixi ngajñi rē cjuatacun rē. Hya xi chja xitsehen vē cjuandacha ne, chja sacuatjin xcusun rē suvá ta, tséhē xi hatuxa ndacha, hacuaha nahmi rē yějē ni cjuandacha. ⁴⁵ Peru ngahan ne, tséhē xi chjá cjuaquixi ne, véhē xi macjaain nuju ngahan. ⁴⁶ ¿Jarē ngayun xi cuma ninguixun xi ngahan ne, tjin jyē naha? Sa xi chjá xi cjuaquixi ne, ¿mé má macjaain nuju ngahan? ⁴⁷ Me xi tséhē jain Nina ne, vetaharcu me cju rē Nina. Ngayun ne, tséhē xi hacuiin tséhē Nina ngayun ne, véhē xi mijí cuetuhunrcun cju rē me. —Cuatjin cachja Jesús.

Ngahan Vi hmí rē Jesucristu hisca chaja sa xi tsin Abraham

⁴⁸ Hane xutaxa rē xi cuacun jan ne, cuitjin cachja me cojo Jesús:

—¡Hatuxa cjuaquixi xi nújin hya xi nújin xi ngayun ne, ngu xuta samaritano ngayun hacuaha jiya xitsehen xahasen nuju! —Cuatjin cachja xutaxa rē jan.

⁴⁹ Ngajan xi Jesús ne, cuitjin cafayangui me:

—Tsajin xitsehen xahasen naha. Ngahan ne, fahárcun Nahmi naha, hane ngayun ne, choho nújun tsahan. ⁵⁰ Hacuaha mijí sahme jyē sahme hnga suva yojo naha. Tjin ngu me xi meje sahmi jyē sahmi hnga ná, hane me véhē ne, tsichuva naja me cojo cjuatacun naja. ⁵¹ Cuichjá cojo nuju cjuaquixi ta xuta

xi cuihndë me tsëhë cjua naha ne, hatuxa tsajin nu tsajin nixtin xi cueya me. —Cuatjin cafayangui Jesús.

⁵² Hane xutaxa rë xi cuacun jan ne, cuitjin cachja me cojo Jesús:

—Quihndë matsejenndaja xi jïya jain xitsehen xahasen nuju. Xutachanga naja Abraham ne, cahme me, hacuaha yëjë profeta ne, cahme me, hane sehe ngayun nûjun xi xuta xi cuihndë me tsëhë cjua nuju ne, hatuxa tsajin nu tsajin nixtin xi cueya me. ⁵³ ¡Ja!, peru ¿há hitsë sa matitjun ngayun xi cuma rë xutachanga naja Abraham, me xi cahme ni? ¡Hacuaha cahme yëjë profeta! ¡Ngayun tinihñu yojo nuju sacuaha xi jemu matitjun ngayun! —Cuatjin cachja xutaxa rë jan.

⁵⁴ Hane Jesús ne, cuitjin cafayangui me:

—Sa xi sahme jyë sahme hnga suva yojo naha ne, cjua xi cuichjá tsahan ne, cuenguin camahani chji rë. Peru Nahmi naha, me xi nûjun xi Nina nuju ne, me vëhë xi sahmi jyë sahmi hnga ná me. ⁵⁵ Ngayun ne, hyúun me, peru ngahan ne, hvë me. Sa xi ngahan cuichjá xi hveen me ne, tangun ndacha ngahan cojo nuju ngayun. Peru ngahan ne, hvë me, hacuaha víhndë tsëhë cjua rë me. ⁵⁶ Xutachanga naja Abraham ne, jemu ndaja camá rë me xi satë rë me xi scuëë me nixtin xi cuinduva ngahan. Hane cavëë jain me, hacuaha jemu sua camá rë me. —Cuatjin cafayangui Jesús.

⁵⁷ Ngajan xi xutaxa rë xi cuacun jan ne, cuitjin catsixcuehyu me Jesús:

—Hisca cjëë yachantë nu tjin nuju. ¿Há cahyun xutachanga naja Abraham ni? —Cuatjin cachja me.

⁵⁸ Hane Jesús ne, cuitjin cachja me:

—Cuichjá cojo nuju cjuaquixi ta hisca chaja sa xi tsin xutachanga naja Abraham ne, ngahan ne, Ngahan Vi hmí ná. —Cuatjin cachja Jesús.

⁵⁹ Vëhë xi xutaxa rë yungun xi cuacun jan ne, cafaha me ndyojo xi cuetaha me Jesús xi meje tsiquehen me. Peru Jesús ne, cavetjuhmá me tsëhë yungun xi matitjun jan.

9

Camandaja ngu cha rcá casahmi Jesús

¹ Hya xi camá ne, xi cavatju Jesús ngu cahndë jan ne, cavëë me ngu cha rcá xi ha cuatjin rcá cha hisca hya xi catsin cha. ² Hane xuta ladu rë me jan ne, cuitjin cavinenguise me:

—Maestro, ¿yo casahmi cjuatsehen xi cuatjin rcá cha xi catsin cha? ¿Há suvá cha vihi ne?, o há tsajin ne, ¿há xutacha rë cha? —Cuatjin cavinenguise me.

³ Ngajan xi Jesús ne, cuitjin cafayangui me:

—Hacuiin cha vihi ne, hacuiin xutacha rë cha casahmi me cjuatsehen ta cuatjin camá cojo sa xi ngatsë rë cjuandaja xi sahmi Nina cojo cha vihi ne, cumatsejen xa xi sahmi Nina. ⁴ Meje rë xi nihña xa rë me xi catsingatju ná jinguyëjë rë xi hasen sa ta cuechú hora xi cumajñu, hane tsajin yo xi cuma sahmi xa. ⁵ Jinguyëjë rë xi tejña ngehe ngasunhndë ne, sacuaha hasen xi cuma rë xuta ngasunhndë ngahan. —Cuatjin cafayangui Jesús.

⁶ Xi cavatju cachja Jesús cjua vëhë ne, sehe cacandi me natya rë me nangui, hane casahmi me hitsë ndasi, sehe catsufë me tuxcun cha rcá jan. ⁷ Sehe cachja me cojo cha cuitjin:

—Tángun tinchacjun ngajan nda Siloé. —Cuatjin cachja Jesús. (Siloé ne, meje cuichja Caningatjun rë.)

Hya xi camá ne, quiji cha cavinchacjan cha. Xi tu cavuya cafe cha ndava cha ne, ha tsejen rë cha. ⁸Ngajan xi xuta xi siu tahndee ndava cha cojo me xi cavëë rë cha xi casahmi cha caridad ne, cavinenguise xicjin me cuitjin:

—¿Hacuiin cha vëhë xi véjña sahmi caridad jan ni? —Cuatjin cavinenguise me xi cuacun jan.

⁹Ngujo me jan ne, cuitjin cachja me:

—Juun, hacui cha vë. —Cuatjin cachja me.

Hane ngujo nga me ne, cuitjin cachja me:

—Cuatjin tsejen, peru hacuiin cha. —Cuatjin cachja me.

Hane suvá cha ne, cuitjin cachja cha:

—Ngahan vi. —Cuatjin cachja cha.

¹⁰Ngajan xi xuta xi cuacun jan ne, cavinenguise me cha cuitjin:

—¿Hacutjin camá xi camandaja túxcun ngayun? —Cuatjin cachja me.

¹¹Ngajan xi cha vëhë ne, cuitjin cafayangui cha:

—Me xi hmí rë Jesús ne, casahmi me hitsë ndasi, sehe catsufë me túxcun, sehe cachja me cojo ná xi cjuë cuinchacjan nda Siloé. Hane xi cëjë cavinchacjan jan ne, camatsejen ná. —Cuatjin cafayangui cha.

¹²Cavinenguise nga me cha cuitjin:

—¿Jani tacun me ni? —Cuatjin cavinenguise me.

Hane cha vëhë ne, cuitjin cachja cha:

—Hveen. —Cuatjin cachja cha.

Fahatáha cha fariseo cha xi camandaja tuxcun

¹³Ngajan xi xuta xi cuacun jan ne, quijicojo me cha xi sehe camatsejen rë jan hiscan xi siu cha fariseo. ¹⁴Quihndë ne, nixtin xi casahmi Jesús ndasi hane casahmi me xi camandaja tuxcun cha rcá jan ne, nixtin xi chjahájenda rë. ¹⁵Ngajan xi cha fariseo xi cuacun jan ne, hacuaha cavinenguise cha cha xi camandaja tuxcun jan hacutjin camá xi camatsejen rë cha. Hane cuitjin cafayangui cha:

—Ndasi catsufë me túxcun, sehe cëjë cavinchacjan, hane cama camatsejen ná. —Cuatjin cafayangui cha.

¹⁶Hane ngujo cha fariseo xi cuacun jan ne, cuitjin cachja cha:

—Me vëhë ne, tsejen xi hacuiin Nina catsingatju rë me, tsëhë xi fahar-cuaain me nixtin xi chjahájenda rë. —Cuatjin cachja cha.

Peru ngujo nga cha ne, cuitjin cachja cha:

—Cumaji sahmi me cjuarcun xi cuacun vëhë sa xi ngu cha tsehen me. —Cuatjin cachja cha.

Hacuiin ngu tangun ni camá cjua rë cha. ¹⁷Hane ngajan xi cavuya cachja nga cha cojo cha xi camandaja tuxcun jan cuitjin:

—Quihndë ta casahmi me xi camandaja tuxcun ne, ¿mé noje tsëhë me? —Cuatjin cachja cha.

Hane cha xi camandaja tuxcun jan ne, cuitjin cafayangui cha:

—Ngu profeta me. —Cuatjin cafayangui cha.

¹⁸Peru xutaxa rë yungun jan ne, macjaain rë me xi titjun ne, rcá cha hane quihndë ne, tsejen rë cha. Hisca xi cajindaya me xutacha rë cha xi camandaja tuxcun jan ne, ¹⁹sehe cafahatáha rë me cuitjin:

—¿Há cha vihi xi quihndi nuju, cha xi nújun xi ha cuatjin rcá hisca hya xi catsin? ¿Hacutjin camá xi quihndë ne, tsejen rë cha? —Cuatjin cafahatáha me.

²⁰Ngajan xi xutacha rë cha ne, cuitjin cafayangui me:

—Hyin xi cha vihi xi quihndi niji cha, hacuaha ha cuatjin rcá cha hisca hya xi catsin cha. ²¹Peru hyiín hacutjin camá xi quihndë ne, tsejen rë cha.

Hacuaha hyíin yo xi casahmi xi camandaja tuxcun cha. Chjinengunsun rë cha ta ha jiya nu rë cha. Suvá cha sua nuju cha cjuaquixi rë cha. —Cuatjin cafayangui me.

²² Cuatjin cachja xutacha rë cha ta, tsëhë xi tsacjun me xutaxa rë jan ta, xutaxa rë xi cuacun jan ne, ha casahmi tangun me cjuá xi yo xi cuichja xi Nina catsingatju me Jesús ne, tsichohotje rë me yungun. ²³ Vëhë xi xutacha rë cha ne, cachja me: “Ha jiya nu rë cha ne, chjinengunsun rë cha.”

²⁴ Vëhë xi cajindaya nga xutaxa rë majo ndiya cha xi camandaja tuxcun jan, hane sehe cachja me cojo cha cuitjin:

—“Vëë Nina”, noje xi cuatjin camá. Ngayin ne, hyin xi me xi casahmi xi camandaja tuxcun ne, ngu cha tsehen me. —Cuatjin cachja xutaxa rë jan.

²⁵ Ngajan xi cha vëhë ne, cuitjin cafayangui cha:

—Ngahan ne, hveen sa xi ngu cha tsehen me. Ngu xcusun ni xi hvë ne, titjun ne, rcá ngahan, peru quihndë ne, tsejen ná. —Cuatjin cafayangui cha.

²⁶ Hane xutaxa rë jan ne, cavinenguise me cha cuitjin:

—¿Mé casahmi me cojo ri? ¿Hacutjin casahmi me xi camandaja tuxcun? —Cuatjin cavinenguise me.

²⁷ Hane cha vëhë ne, cuitjin cafayangui cha:

—Ha cachjá cojo nuju ne, miji cuetuhuncun. ¿Mé má meje cuisíñuju nga ngundiya? ¿Há cojo ngayun meje cuisuhun ladu rë me? —Cuatjin cafayangui cha.

²⁸ Hane xutaxa rë jan ne, cacjan me cojo cha, cuitjin cachja me:

—¡Ngaye xi ladu rë cha vëhë má ngaye! ¡Ngayin ne, ladu rë Moisés má ngayin! ²⁹ Ngayin ne, hyin xi Moisés ne, cachja me cjuá xi casua Nina me, peru cha vëhë ne, hisca hyíin jani cavetju cha canduva cha. —Cuatjin cachja me.

³⁰ Ngajan xi cha vëhë ne, cuitjin cafayangui cha:

—¡Jemu sihya xi ngayun ne, hyúun jani cavetju me canduva me, handasa casahmi me xi camandaja túxcun ngahan! ³¹ Ha hyan ta Nina ne, fahacuen-daain me cjuá xi chja xuta tsehen. Peru sa xi ngu xuta faharcun me Nina hacuaha sahmi me hacutjin xi meje rë Nina ne, me vëhë ne, fahacuenda Nina cjuá xi chja me. ³² Cjëë camahani cuinuhyá rë xi ngu xuta sahmi me xi mandaja tuxcun ngu xuta xi rcá me hisca hya xi catsin me. ³³ Sa xi hacuuiin Nina catsingatju rë me vëhë ne, tsajin camahani mé xi cuma sahmi me. —Cuatjin cafayangui cha.

³⁴ Ngajan xi xutaxa rë jan ne, cuitjin cachja me:

—¡Ngaye ne, ngajñi rë cjuatsehen camahani catsin ngaye! ¡Machjiriin camahani ngaye xi cuicoye niji! —Cuatjin cachja me.

Sehe cavaxë me cha candatsen.

Xuta xi jñu tsëhë me

³⁵ Hya xi camá ne, camachaya rë Jesús xi cavaxë xutaxa rë yungun cha xi camandaja tuxcun jan candatsen. Hane xi casacu xicjin Jesús cojo cha ne, cachja me cojo cha cuitjin:

—¿Há mangutacún ngayun cojo me xi Quihndi rë Xuta Jain? —Cuatjin cachja me.

³⁶ Hane cha vëhë ne, cuitjin cafayangui cha:

—Tatá, tinújun cojo ná yo me vë ne, cojo sa xi cumangu cáacun cojo rë me. —Cuatjin cafayangui cha.

³⁷ Ngajan xi Jesús ne, cuitjin cachja me cojo cha:

—Ngayun ne, ha cahyun me ta, ngahan xi tichjá cojo nuju vi ne, ha ngahan xi Quihndi rë Xuta Jain ngahan. —Cuatjin cachja me.

³⁸ Hane cha vëhë ne, cuitjin cachja cha:

—Mangucácun, Tatá. —Cuatjin cachja cha, sehe cafarharcun cha me.

³⁹ Ngajan xi Jesús ne, cuitjin cachja me:

—Canduvá ngahan ngasunhndë vi ne, xi tsichúva xuta cojo cjuatacun rë me, sehe ngajan xi xuta xi cjëë ndaja cuijne rcu me cjua rë Nina ne, cuijnercundaja me, hane xuta xi cuenda chja me xi jemu ndaja vijne rcu me cjua rë Nina ne, cumajñu tsëhë me. —Cuatjin cachja Jesús.

⁴⁰ Hane ngujo cha fariseo xi hinchacun tiña hiscan secun Jesús ne, cahndë cha cjua vëhë, hane cuitjin cachja cha:

—¿Peru hacuiin cojo ngayin jñu tsijin? —Cuatjin cachja cha.

⁴¹ Ngajan xi Jesús ne, cuitjin cachja me:

—Sa xi jñu tsujun ne, tsajin jyé nuju. Peru quihndë xi nújun xi hacuiin jñu tsujun ne, ngajan matsejen xi tjín jyé nuju. —Cuatjin cachja Jesús.

10

Ejemplu tsëhë paxtu rë chu tsánga

¹ Ngajan xi Jesús ne, cachja sa me cuitjin:

—Cuichjá cojo nuju cjuaquixi ta xuta xi visiin me táha tingotjo hnhua rë chu tsánga ta tu táha xín mijisun me hnhua ne, me vëhë ne, chëjë me hacuaha fahatahá cjuachan me. ² Peru me xi visehen táha tingotjo hnhua ne, me vëhë xi paxtu rë chu tsánga. ³ Cha xi quitahá cuidadu rë tingotjo hnhua ne, vuxaha cha tingotjo tsëhë me vëhë. Chu tsánga ne, vihndë chu xta rë me, hane jindaya me chu xi tsëhë me, jimangu chu cojo ñihi rë chu, sehe vaxë me chu. ⁴ Hane hya xi ha cavaxë me yëjë chu xi tsëhë me ne, sehe cjui titjun me, hane chu tsánga ne, fitjengui chu me, tsëhë xi vëë chu xta rë me. ⁵ Peru jingu sa xuta ne, hatuxa cjuuin tjenguiin chu me ta tu cuanga chu tsëhë me, tsëhë xi hvíin chu xta rë jingu sa xuta jan.

⁶ Cuatjin cachja Jesús ejemplu vëhë cojo xuta xi cuacun vë, peru cajni rcu me mé vijne cjua xi cachja Jesús.

Sacuaha paxtu rë chu xi ndaja sahmi cuidadu rë chu má Jesucristu

⁷ Jesús ne, cachja sa me cojo xutaxa rë xi cuacun jan cuitjin:

—Cuichjá cojo nuju cjuaquixi ta ngahan ne, sacuaha tingotjo xi vatju chu tsánga ngahan. ⁸ Yëjë ni cha xi cavetjuiñi ngajñi rë xuta xi meje cumatitjun cha hya xi chaja sa cjuëhë ngahan ne, sacuaha cha chëjë cha, cha fahatahá cjuachan cha. Peru xuta ladu rë Nina ne, casahmicuendaain me cha, sacuatjin rë chu tsánga xi fitjenguiin chu jingu sa xuta. ⁹ Ngahan ne, sacuaha tingotjo ngahan. Sa xi ngu xuta cuisehen me táha tingotjo jan ne, cuetjutje me. Hacuaha tsajin mé cumacín cacun me cuetju cuisehen me jan, hane tsajin mé cuma chaja rë me. ¹⁰ Cha chëjë ne, xi vinduva cha ne, suvá ni xi tsichëjë cha, tsiquehen cha, hacuaha tsinguetsun cha. Peru ngahan ne, canduvá cojo sa xi sacú rë xuta cjuahñu xatsë, hacuaha jercu sacú camahani rë me cjuahñu vëhë.

¹¹ Ngahan ne, sacuaha paxtu rë chu xi jemu ndaja fahácuenda chu tsánga. Paxtu ndaja jan ne, hisca sua me yojo rë me xi cueya me ngatsë rë chu tsánga.

¹² Ngu mosu xi hacuiin paxtu rë chu má cha, hacuiin tsëhë cha chu tsánga ne, xi scuëë cha xi nduva tiña chu lobo ne, viyujutahá ni cha chu tsánga jan, hane vanga cha. Hane chu lobo jan ne, faha chu ngujo chu tsánga, sehe

tsicangacojo chu chu xi yahnga jan tu nguehe tu ngajan. ¹³ Cuatjin sahmi cha ta, tséhë xi mosu ni má cha, hane marcuaain rë cha tséhë chu tsánga. ¹⁴⁻¹⁵ Ngahan ne, sacuaaha paxtu ndaja jan ngahan. Sacuatjin vëë ná Nahmi naha hane ngahan ne, hvë Nahmi naha ne, ha chuva vëhë ni ne, ngahan ne, hvë chu tsahan hane chu tsahan ne, vëë chu ngahan. Hacuaha suá yojo naha xi cueya ngatsë rë chu. ¹⁶ Tjin sa ná chu tsánga xi hacuain tséhë hnhua vihi chu. Chu xi cuacun vë ne, hacuaha meje rë xi sahme chu cuidadu. Xi cuihndë chu xta naha ne, cuinduvatjengui chu ngahan, hane cuma tangun chu cojo chu xi ha tisahme cuidadu, hacuaha ngu ni ngahan xi paxtu rë chu.

¹⁷ Ngahan ne, hmu cacun ná Nahmi naha, tséhë xi suá yojo naha xi cueya, hane sehe sahme xi cúa nga cjuahñu. ¹⁸ Tsajin yo xi cjuahatahá cjuahñu naha ta ngahan ne, cojo cjuatacun naha suva suá yojo naha xi cueya. Tjin ná chuva rë xi suá yojo naha, hacuaha tjin ná chuva rë xi sahme xi cúa nga cjuahñu. Cuatjin cavitexa ná Nahmi naha xi sahme. —Cuatjin cachja Jesús.

¹⁹ Hya xi camá ne, ngu ndiya nga hacuain ngu tangun ni camá nga cjuá rë xutaxa rë jan ngatsë rë cjuá vëhë. ²⁰ Hane jemu cjin me xi cuacun jan ne, cuitjin cachja me:

—¡Jiya xitsehen xahasen rë cha, vëhë xi sca rë cha! ¡Venguiin chji rë xi cuatjin visiñuju cjuá rë cha! —Cuatjin cachja me.

²¹ Peru yahnga nga me ne, cuitjin cachja me:

—Cjuá vëhë ne, hacuain cjuá rë ngu xuta xi jiya xitsehen xahasen rë me. ¿Ngu xitsehen ne, cumaji sahmi xi cumandaja tuxcun ngu xuta xi rcá me? —Cuatjin cachja yahnga me jan.

Tsitjungui xutaxa rë yungun Jesucristu

²² Quihndë ne, hya xi cavechú nixtin rë chan hñchan ne, camá suhi rë yungun xi matitjun ngajan Jerusalén. ²³ Hane Jesús ne, tsuyihiya me ndatsen yungun xi matitjun, ngajan Ngahma Ndihya tséhë Salomón. ²⁴ Hane xutaxa rë yungun jan ne, quiji caxinchacundee me Jesús, sehe cachja me cojo me cuitjin:

—¿Jani hisca hya tuhun niji cjuaquixi? Sa xi ngayun jain xi tsingatju Nina ngayun ne, tinújunquixun cojo niji. —Cuatjin cachja xutaxa rë jan.

²⁵ Ngajan xi Jesús ne, cuitjin cafayangui me:

—Ha cachjá cojo nuju, peru macjaain nuju. Xcusun xi tisahme sacuatjin tivitexa ná Nahmi naha ne, xcusun vëhë ni tsingacun yo ngahan. Peru ngayun ne, macjaain nuju, ²⁶ tséhë xi hacuain xuta ladu naha má ngayun.

²⁷ Xuta xi ladu naha má me ne, tangun me sacuaaha chu tsánga. Me xi cuacun vë ne, vëë me xta naha, hacuaha ngahan ne, hvë me, hane fitjengui ná me.

²⁸ Ngahan ne, suá rë me cjuahñu xatsë, hane hatuxa tsajin nu tsajin nixtin xi cje hasen rë me xcun cjuañihi, hacuaha tsajin yo cuaxëxin rë me xi siu ntsa me. ²⁹ Xuta xi cuacun casua ná Nahmi naha ne, hitsë sa venguichji rë me xi cuma rë yëjë sa xcusun. Hacuaha tsajin yo cuma cuaxëxin rë me xi siu tsja Nahmi naja me. ³⁰ Ngahan cojo Nahmi naja ne, ngu ni xahasen niji, ngu ni cjuatacun niji, ngu ni hasen niji. —Cuatjin cafayangui Jesús.

³¹ Ngajan xi xutaxa rë xi cuacun jan ne, cafaha nga me ndyojo xi cuetaha me Jesús xi tsiquehen me me. ³² Hane Jesús ne, cuitjin cachja me:

—Ngahan ne, jemu cjin xcusun ndaja casahme ngajñi nuju sacuatjin cavitexa ná Nahmi naja. Hane ¿jarë xcusun vëhë tséhë xi cuetuhun ná ndyojo ni? —Cuatjin cachja Jesús.

³³ Ngajan xi xutaxa rë jan ne, cuitjin cafayangui me:

—Hacuiin tséhë ngu xcusun ndaja xi canihñi xi cuetihin ri ndyojo ta ngatsë rë xi nixcuehyi Nina, ngatsë rë xi handasa ngu xuta ni ngaye ne, peru noje xi tangun ngaye cojo Nina. —Cuatjin cafayangui me.

³⁴ Ngajan xi Jesús ne, cuitjin cachja me:

—Ley rë Moisés xi vitexa nuju ne, ha ndaja hyun xi camahindu cjua vihi xi cachja Nina: “Ngayujun ni ne, nina ngayun.” Cuatjin camahindu.

³⁵ Ngayejen ni ne, ha hyan ta cjua xi chja xcun xujun rë Nina ne, hatuxa cjuaquixi jain. Hane Nina ne, cachja me nina tséhë xuta xi cuacun cafahatsja cjua rë me. ³⁶ Quihndë ta Nina cavaxijin ná me hacuaha catsingatju ná me nguehe ngasunhndë ne, ¿hacutjin má xi nújun xi ngahan ne, choho chjá, tséhë xi chjá xi Quihndi rë Nina ngahan ni? ³⁷ Sa xi ngahan tisahmee xcusun xi cavitexa Nahmi naha xi sahme ne, xicamacjaain nuju ngahan. ³⁸ Peru sa xi tisahme ne, handasa cumacjaain nuju ngahan ne, ndastu tséhë xcusun xi sahme ne, catamacjain nuju, cojo sa xi cuijne rcun ngundiyaxa ni xi Nahmi naja ne, jiya me xahasen naha, hane ngahan ne, tejñaya xahasen rë me. —Cuatjin cachja Jesús.

³⁹ Ngajan xi casahmi nga xutaxa rë jan cjuandya xi cjuaha me Jesús, peru Jesús ne, cavetjutje me tséhë xuta jan quiji me.

⁴⁰ Hya xi camá ne, cavetju Jesús quiji nga me ngunda vëhë tséhë Ndajyë Jordán, ngajan hiscan xi casetaha Juan cavitenda me xuta ntsacu cavetsihin. Hane ngajan casetaha me. ⁴¹ Hane jemu cjín xuta quijitjengui me Jesús. Hane cuitjin cachja xingu xingu me cojo xicjin me:

—Juan ne, handasa casahmi me cjuarcun, peru yëjë ni cjua xi cachja me tséhë me vihi ne, cjuaquixi jain.

⁴² Hane jemu cjín xuta camangu cacun me cojo Jesús ngajan cahndë vëhë.

11

Cjuaveya rë Lázaro

¹ Tacun ngu cha hmu rë xi hmí rë Lázaro, ngu cha Betania, nangui rë na María cojo na Marta tíchja na. ² Na María vëhë ne, na vëhë xi cavitejnu na ntsacu Nai naja ngu xcusun aceite xi jemu ndaja jne camahani hacuaha jercu hnga chji rë, sehe catsixiya na cojo tsjarcu na. Na vëhë xi hmu rë cha Lázaro hntse na. ³ Ngajan xi catsijo na vëhë ne, catsingatju na cjua vihi tséhë Jesús:

—Tatá, chutsujun ni, cha xi jemu vinga nuju jan ne, jemu hmu rë cha. —Vëhë cjua xi catsingatju na.

⁴ Hane xi cahndë Jesús cjua vëhë ne, cuitjin cachja me:

—Chíhin vëhë ne, cuetjincaain cjuaveya rë cha Lázaro cojo ta xi cuetjucaa ne, cuma jyë cuma hnga Nina cojo Hasen rë me, cojo sa xi Quihndi rë Nina ne, hacuaha cuma jyë cuma hnga me cojo Hasen rë me ngatsë rë chíhin vëhë. —Cuatjin cachja Jesús.

⁵ Quihndë ne, Jesús ne, jemu vinga rë me na Marta cojo tíchja na cojo cha Lázaro. ⁶ Peru xi camachaya rë Jesús xi hmu rë cha ne, casetaha me jo nixtin sa hiscan xi ha quitahá me jan. ⁷ Xi cavatju vëhë ne, sehe cachja me cojo xuta ladu rë me jan cuitjin:

—Cuyan cuanguen nga ngu cahndë tséhë distritu Judea. —Cuatjin cachja me.

⁸ Ngajan xi xuta ladu rë me jan ne, cuitjin cachja me:

—Maestro, xutaxa rë yungun jan ne, ¡sehe tiña nixtin xi casahmi me cjuandya xi tsiquehen nuju me cojo ndyojo! ¡xi meje rë ne, cuanguun ngajan! —Cuatjin cachja me.

⁹ Hane Jesús ne, cuitjin cafayangui me:

—¿Hacuiin tejó hora tjin rë xi ngu nixtin ni? Quihndë xi cjëë cuechú hora xi cuichja Nina xi cueya ngahan ne, tsajin mé cuma ná, sacuatjin xtenguin naja xi nguixtin tsëhë xi tsejen naja hasen rë tsuhi. ¹⁰ Peru xi cuechú hora xi cuichja Nina xi cueya ngahan ne, cueya, sacuatjin xtengui naja xi nixten tsëhë xi tsajin hasen xi cuma naja.

¹¹ Cuatjin cafayangui Jesús cjuá vëhë, hane sehe cachja sa me cuitjin:

—Cha amigu naja, cha Lázaro ne, cafañafë cha. Peru cjuë ngahan tsingásca rë cha. —Cuatjin cachja Jesús.

¹² Ngajan xi xuta ladu rë me jan ne, cuitjin cachja me:

—Tatá, sa xi cafañafë jain cha ne, vëhë tsejen xi cumandaja cha. —Cuatjin cachja xuta ladu rë me jan.

¹³ Quihndë ne, cjuá xi cachja Jesús vë ne, tsëhë cjuaveya rë cha Lázaro. Peru xi má rë xuta ladu rë me jan ne, tichja me tsëhë nijná ni rë cha. ¹⁴ Ngajan xi Jesús ne, cachja quixi me cuitjin:

—Cha Lázaro ne, cahme cha. ¹⁵ Hane ngahan ne, jemu ndama ná xi hacuiin ngajan tejña hora vëhë ta, xi chutsujun hacutjin cuma ne, cumangu tacún cojo ná. Peru cuanguen tjenguen nima. —Cuatjin cachja Jesús.

¹⁶ Ngajan xi Tomás, me xi chja me tsëhë cha Lihma ne, cuitjin cachja me cojo xuta ladu rë Jesús xi yahnga jan:

—Hacuaha cuanguen ngayaan, cojo sa xi cueyan tangun cojo rë me. —Cuatjin cachja Tomás.

Sehe cavetju yëjë me quiji me cojo Jesús.

Sua Jesús cjuahñu hacuaha tsicuya me nima cjuahñu

¹⁷ Hya xi camá ne, xi cafehe me ngajan Betania ne, camachaya rë Jesús xi ha tjin rë ñuju nixtin xi jiyaniji nima Lázaro. ¹⁸ Betania jan ne, sacuaha chuya rë jyan kilómetro tacun tsëhë Jerusalén. ¹⁹ Hane jemu cjin xuta quiji tjengui me na Marta cojo na María xi sua me na cjuetacun tsëhë cjuaveya rë hntse na. ²⁰ Hane xi camachaya rë na Marta xi nduva Jesús ne, cavetju na quiji cafahatsja na me. Peru na María ne, cavéjña ni na ndava na. ²¹ Hya xi camá ne, xi casacu xicjin na Marta cojo Jesús ne, cuitjin cachja na cojo rë me:

—Tatá, sa ngayun nechun nguehe ne, cahmii nima xingueen. ²² Peru hvë ta hisca quihndë ne, tu mé ni xi chjahyun rë Nina ne, sua nuju me. —Cuatjin cachja na.

²³ Ngajan xi Jesús ne, cuitjin cachja me cojo rë na:

—Nima xingun ne, cuya cjuahñu. —Cuatjin cachja Jesús.

²⁴ Hane na Marta ne, cuitjin cachja na:

—Hvë ta cuya nima xingueen cjuahñu hya xi hacuaha yëjë nima cuya cjuahñu, nixtin xi tsichuva Nina sa nima sa xuta. —Cuatjin cachja na.

²⁵ Ngajan xi Jesús ne, cuitjin cachja me cojo rë na:

—Ngahan xi suá cjuahñu hacuaha tsicúya nima cjuahñu. Xuta xi mangucacun me cojo ná ne, ha ndasa cueya me ne, peru cuya me cjuahñu. ²⁶ Hane yëjë xuta xi tjin rë me cjuahñu xatsë hacuaha mangucacun me cojo ná ne, hatuxa tsajin nu tsajin nixtin xi cjue hasen rë me xcun cjuañihi. ¿Há macjain nuju cjuá vëhë? —Cuatjin cachja Jesús.

²⁷ Ngajan xi na vëhë ne, cuitjin cafayangui na:

—Juun, macjain ná, Tatá. Macjain ná xi ngayun xi catsingatju nuju Nina, ngayun xi Quihndi rë Nina ngayun. Hacuaha ngayun xi jemu cavinechinyin nuju xi cuinduvun ngasunhdë. —Cuatjin cafayangui na Marta.

Jihnda Jesucristu xcun tsjun rë nima Lázaro

²⁸ Xi café cachja na Marta cuatjin ne, sehe cavuya na quiji jaha na na María tíchja na. Hane xi cafehe na jan ne, sehe cajindayahma na na María, cuitjin cachja na:

—Cafehe maestru, hane jindaya me ngaye. —Cuatjin cachja na.

²⁹ Xi tu cahndë na María cjua vëhë ne, marcu macjain cavisatjen na quiji tjengui na Jesús. ³⁰ Quihndë ne, cjëë sa cuisehen Jesús nandya ta secun cuaha me cahndë hiscan cavechútaha na Marta me. ³¹ Hane xuta xi siu cojo na María ndava na xi tisua me na cjuetacun ne, xi cavëë me xi marcu macjain cavisatjen na quiji na ne, quiji tjengui me na. Xi má rë me ne, xcun tsjun cjui na, cojo sa xi ngajan squihnda na.

³² Hane xi cafehe na María hiscan secun Jesús ne, xi cavëë na me ne, quiji caticjaxcun na xcun me, sehe cachja na cuitjin:

—Tatá, sa xi ngayun nechun nguehe ne, cahmii nima xingueen. —Cuatjin cachja na.

³³ Hane xi cavëë Jesús xi cuatjin jihnda na hacuaha jihnda yëjë xuta xi ticojo na jan ne, camandya cacun me, jemu choho camahani camá rë xahasen rë me. ³⁴ Hane cuitjin cavinenguise me:

—¿Jani tacun tsjun xi caveyun nima? —Cuatjin cavinenguise me.

Hane xuta jan ne, cuitjin cafayangui me:

—Tatá, nduvun chutsujun. —Cuatjin cafayangui me.

³⁵ Hane cahihnda Jesús. ³⁶ Ngajan xi xuta jan ne, cuitjin cachja me ngajñi rë me:

—Chutsujun ni hacutjin catsihmu cacun me nima. —Cuatjin cachja me.

³⁷ Peru gujo me ne, cuitjin cachja me:

—Me vihi xi casahmi me xi camandaja tuxcun cha rcá jan ne, ¿há camaji casahmi me xi cahmii nima vëhë? —Cuatjin cachja gujo xuta jan.

Cavuya nima Lázaro cjuahñu

³⁸ Ngajan xi Jesús ne, ngu ndiya nga jemu camandya cacun me. Sehe quiji me xcun tsjun. Tsjun jan ne, ngu nguijo, hane tingotjo rë ne, titsa ngu ndyojo.

³⁹ Ngajan xi Jesús ne, cuitjin cachja me:

—Chjuhunxun ndyojo vë. —Cuatjin cachja me.

Ngajan xi na Marta, tíchja nima ne, cuitjin cachja na:

—Tatá, ha choho jne vë ta, ha tjin rë ñuju nixtin. —Cuatjin cachja na.

⁴⁰ Hane Jesús ne, cuitjin cachja me cojo rë na:

—Ha cachjá cojo nuju ta sa xi cumacjain nuju cjua naha ne, ngayun ne, chutsujun hacutjin jyë hnga Nina cojo Hasen rë me. —Cuatjin cachja Jesús.

⁴¹ Hya xi camá ne, cachjaháxin rë ndyojo jan. Hane hora vëhë cavutsejen-niji Jesús ngahnga, sehe cachja me cuitjin:

—Ngayun Nahmi naha, suá nacuechji nuju ta canihñucuendun cjua xi cachjá cojo nuju. ⁴² Hacuaha ha hvë ta ngayun ne, hatuxa nihñucuendun cjua naha. Vëhë xi hacuain ngujoyë xi cuichjá cojo nuju cjua vihi, peru ngatsë rë xuta xi hinchacundee vi ne, vëhë xi cuitjin tíchjá, cojo sa xi cumacjain rë me xi ngayun caningatjun ná. —Cuatjin cachja Jesús.

⁴³ Hane xi cajnetaha cachja me cuatjin ne, sehe ña cajindaya me cachja me cuitjin:

—¡Lázaro, tetjun! —Cuatjin cachja me.

⁴⁴ Hya xi camá ne, cavetju Lázaro tsèhë tsjun jan, tjinguiya tsjian ntsacu me, tjinguiya tsjian tsja me, hacuaha tjihñu xcun me cojo ngu pañutu. Hane Jesús ne, cuitjin cachja me cojo xuta jan:

—Chundecjun tsjian vë sehe cumandaya me. —Cuatjin cachja Jesús.

Meje cjuaha xutaxa rë yungun Jesucristu

⁴⁵ Quihndë ne, jemu cjin xuta quiji cavusehenya rë na María hacuaha cavëë me hacutjin casahmi Jesús. Hane xuta xi cuacun jan ne, camangu cacun me cojo Jesús. ⁴⁶ Peru ngujo xuta ne, quiji cachja me cojo cha fariseo hacutjin casahmi Jesús. ⁴⁷ Ngajan xi yëjë nahmi xi matitjun cojo cha fariseo xi cuacun jan ne, casahmi me ngu junta. Hane xcun junta jan ne, cuitjin cachja me:

—¿Mé ndatjin nihña? ta cha xi cuajiyi vë ne, jemu tisahmi cha cjuarcun.

⁴⁸ Sa xi tsajin mé xi nihña ne, yëjë xuta ne, cumangu cacun me cojo cha. Hane vëhë xi xutaxa rë Roma ne, cuma cjan rë me, hane cjuahatahá me yungun xi matitjun naja hacuaha cjuahatahá me gobiernu xi tinihña. —Cuatjin cachja me xi cuacun jan.

⁴⁹ Peru ngu me xi cuacun jan xi hmí rë Caifás, me xi hacuaha má nahmi xi matitjun tsèhë yëjë nahmi nu vëhë ne, cachja me cuitjin:

—Ngayun ne, hyún camahani. ⁵⁰ Vijnii rcun xi ndaja tsujun xi ngu xihin ni cueya ngatsë rë yëjë ni xuta, hane hacuini yëjë xuta cueya me. —Cuatjin cachja Caifás.

⁵¹ Peru me vëhë ne, hacuini cachja me cojo cjuatacun rë suvá me ta, ngatsë rë xi má me nahmi xi matitjun nu vëhë ne, cachja me cjuaxi casua Nina me xi Jesús cueya me ngatsë rë xuta. ⁵² Peru hacuini ngatsë rë suvá ni xuta tjë rë Israel ta hacuaha cueya me cojo sa xi sahmi tangun me yëjë quihndi rë Nina xi tinguitsojo, sehe cuma yëjë me sacuaha ngu ni xcusun xuta.

⁵³ Ngajan xi hisca nixtin xi cachja Caifás cuatjin ne, nahmi xi matitjun cojo cha fariseo xi cuacun jan ne, caviyuju me cjuatacun rë me xi tsiquehen me Jesús. ⁵⁴ Vëhë xi Jesús ne, catsujiyiyaintë me nandya xi siu ladu rë distritu Judea ta cavetjuxin me tsèhë ngajan, quiji me ngu nandya xi hmí rë Efraín, tiña hiscan xi faha rë xi ha jemu xín camahani tsèhë nandya. Hane ngajan casetaha me cojo xuta ladu rë me.

⁵⁵ Quihndë ne, ha camatiña suhi tsèhë Pascua. Hane jemu cjin xuta quiji me Jerusalén chaja sa nixtin rë suhi jan xi cuma tyjahi me sacuatjin xi ha xcusun rë xutachanga. ⁵⁶ Jemu siu me cuidadu há cjehe Jesús suhi jan. Hane jinguyëjë rë xi hinchacun me yungun xi matitjun jan ne, vinenguise xicjin me xingu xingu me cuitjin:

—¿Mé xi má nuju? ¿Há cuinduvaain me suhi? —Cuatjin cavinenguise xicjin me. ⁵⁷ Quihndë ne, nahmi xi matitjun cojo cha fariseo xi cuacun jan ne, ha cavitexa me xi yo xi vëë hiscan tacun Jesús ne, sua cumachaya rë me, cojo sa xi chjahá rë Jesús.

12

Xtejnu aceite ntsacu Jesucristu

¹ Jyun nixtin chaja sa xi cuechú suhi tsèhë Pascua ne, cavuya quiji Jesús ngajan Betania, hiscan xi tacun cha Lázaro, cha xi catsicuya Jesús cjuahñu hya xi cahme cha. ² Hane ngajan casehenndaja ngu comida xi sinë me. Na Marta tvincha na comida, peru cha Lázaro ne, cojo cha tijinë cha cojo Jesús cojo me xi yahnga sa. ³ Hane na María ne, cafaha na ngu frascu xi hincha

jo cuarto aceite nardo xi jemu ndaja jne hacuaha jemu hnga chji rë, quiji cavitejnu na ntsacu Jesús, sehe catsixiya na cojo tsjarcu na. Hane cahntsua ndihya jan ne, ña catsë rë cojo xta rë aceite jan. ⁴ Ngajan xi Judas Iscariote, ngu cha ladu rë Jesús, cha xi sahmi rë me entregadu ne, cuitjin cachja cha:

⁵ —¿Mé má cuatjin casahmi na? Aceite vë ne, cuma xteña hane sacú chji rë jyan cientu nixtin xa xi sahmi ngu xuta, hane tujún vëhë ne, tahan rë xuta yuma. —Cuatjin cachja cha.

⁶ Peru Judas ne, hacuiin tsëhë xi marcun rë cha tsëhë xuta yuma xi cuatjin cachja cha ta tsëhë xi chëjë cha, hacuaha cha vëhë tjin tsja cha tsá xi hincha yëjë tujún, hane jiya hora ne, tsichëjë cha tsë tsë. ⁷ Ngajan xi Jesús ne, cuitjin cachja me:

—Xicanújiin cojo rë na. Catetjo na xi tjin rë na hisca hya xi seyaniji ngahan.

⁸ Xuta yuma ne, yëjë nu yëjë nixtin ne, siu me cojo nuju, peru ngahan ne, hacuiin yëjë nu yëjë nixtin tejña cojo nuju. —Cuatjin cachja Jesús.

Meje tsiquehen xutaxa rë yungun cha Lázaro

⁹ Hya xi camá ne, jemu xutacjin tsëhë nandya xi siu distritu Judea ne, camachaya rë me xi Jesús ne, Betania quitahá me. Ngajan xi quiji xuta ngajan, hacuiin tsëhë xi meje scuëë ni me Jesús ta hacuaha tsëhë xi meje scuëë me cha Lázaro, cha xi catsicuya Jesús cjuahñu. ¹⁰ Hane nahmi xi matitjun jan ne, caviyuju cacun me xi hacuaha cojo cha Lázaro tsiquehen me cha, ¹¹ tsëhë xi ngatsë rë cha vëhë ne, jemu cjín xuta titsitjungui me nahmi jan, hane tijimangu cacun me cojo Jesús.

Cafehe Jesucristu nandya Jerusalén

¹² Xi camá nchujun jan ne, xutacjin xi cafehe suhi jan ne, camachaya rë me xi Jesús ne, hacuaha nduva me Jerusalén. ¹³ Hane cafaha me xca jne, sehe cavetju me quijitjengui me Jesús hiscan nduva me. Hane hisca jindaya me cachja me cuitjin:

—jJemu ndaja Nina! jJemu catsinchacun Nina me xi nduva vi tsëhë xi Nina catsingatju rë me, me xi cumatitjun tsajan ngayaan xuta tjë rë Israel! —Cuatjin cajindaya me cachja me.

¹⁴ Hane xi casacu rë Jesús ngu burru chihndë ne, sehe camiji me chu, sacuatjin camahindu tsëhë me xcun xujun rë Nina hiscan xi chja cuitjin:

¹⁵ jXicarcuun ngayun xuta Jerusalén; chutsujun ni, me xi matitjun tsujun ne, nduva me quisun me ngu burru chihndë!

¹⁶ Hya xi cuatjin camá ne, xuta ladu rë Jesús ne, cajni rcu me. Peru hya xi Jesús cama jyë cama hnga me cojo Hasen rë me ne, hya xi cavuya cjuahñu rë me hya catsinguitsjen xuta xi cuacun jan xi cuatjin camahindu tsëhë Jesús hane cuatjin jain cavatju me camá.

¹⁷ Xuta xi siu cojo Jesús hya xi cajindaya me cha Lázaro xi cuetju cha tsëhë tsjun hacuaha catsicuya me cha cjuahñu ne, casua me camachaya rë jingu sa xuta hacutjin camá. ¹⁸ Vëhë xi xutacjin jan ne, cavetju me quijitjengui me Jesús, tsëhë xi camachaya rë me xi casahmi Jesús cjuarcun vëhë. ¹⁹ Vëhë xi cha fariseo ne, cachja cha ngajñi rë cha cojo xicjin cha cuitjin:

—Cahyun ni ne, tsajin mé xi cuma nihña. Chutsujun ta yëjë ni xuta ne, tjengui rë cha. —Cuatjin cachja cha.

Meje scutsejen gujo xutaxín Jesucristu

²⁰ Quihndë ne, ngajñi rë xuta xi quiji me suhi xi cjuaharcun me Nina ne, hinchajñi ngujo xutaxín. ²¹ Hane me xi cuacun vëhë ne, quijitjengui me Felipe, xuta Betsaida, ngu nandya tsëhë distritu Galilea, hanë cuitjin cachja me:

—Tatá, ngayin ne, meje cuisiajmí cojo Jesús. —Cuatjin cachja me.

²² Ngajan xi Felipe ne, quiji cachja me cojo Andrés, sehe catsijo ni me quiji casua me camachaya rë Jesús. ²³ Ngajan xi Jesús ne, cuitjin cachja me cojo rë me:

—Cavechú hora xi ngahan xi Quihndi rë Xuta Jain ngahan ne, cuma jyë cuma hnga ngahan cojo hasen naha. ²⁴ Cuichjá cojo nuju cjuaquixi ta ngu tú rë trigu xi cjuinengui nangui ne, sa xi cueyaain ne, ha ngu tu tu ni má yëjë nu yëjë nixtin. Peru sa xi cueya ne, jemu cjin tjë sua. ²⁵ Xuta xi vangui me suvá ni xi ndaja cjuahñu rë me nguehe ngasunhndë ne, titsichajá me cjuandaja xi sua Nina me cjuahñu xatsë. Peru xuta xi marcuaain rë me tsëhë suvá ni xi ndaja cjuahñu rë me nguehe ngasunhndë ne, hatuxa sacú rë me cjuandaja xi sua Nina me cjuahñu xatsë. ²⁶ Xuta xi meje cuisehen me ladu naha ne, catinduva tjengui ná me. Hane hiscan xi cuitejña ngahan ne, hacuaha ngajan cuejña me xi má ladu naha. Xuta xi má me ladu naha ne, sahmi jyë sahmi hnga Nina Nahmi naja me. —Cuatjin cachja Jesús.

Chja Jesucristu tsëhë cjuaveya rë me

²⁷ Cachja sa Jesús cuitjin:

—Quihndë ne, jemu macjin cáacun. Peru ¿mé cuichjá ni? ¿Há cuichjá cuitjin: “Ngayun Nahmi naha, naxuntjun ná tsëhë xcusun xi cuátju cuma quihndë?” Peru cuichjaan cuatjin ta, tsëhë xi hatuxa canduvá xi cuatjin cuátju cuma. ²⁸ Ngayun Nahmi naha, tuhun cumachaya rë xuta hacutjin jyë hnga ngayun cojo Hasen nuju. —Cuatjin cachja Jesús.

Ngajan xi canuhya rë ngu xta xi canduva ngajan ngahnga xi cachja cuitjin:

—Ha casuá camachaya rë me, hacuaha cúa suá nga cumachaya rë me. —Cuatjin cachja xta jan.

²⁹ Hane ngujo xuta xi hinchacun jan xi cahndë me xta jan ne, cachja me ta chuhun xi catsingá. Hane ngujo nga me ne, cachja me xi ngu ángel cachja cojo Jesús. ³⁰ Ngajan xi Jesús ne, cuitjin cachja me cojo xuta jan:

—Hacuiin xi cuihndë ngahan xi cachja xta vëhë ta xi cuinuhyun ngayun.

³¹ Cavechú nixtin xi cuma chuva xuta cojo cjuatacun rë me. Cavechú nixtin xi cjuahatahá Nina gobiernu xi tisahmi Satanás. ³² Hane ngahan ne, hya xi tjunihnga ná tsëhë nangui ne, sahme xi xuta ne, cuisehen me ladu naha. —Cuatjin cachja Jesús.

³³ Xi cuatjin cachja Jesús ne, casua me camachaya rë xuta mé chuva rë cueya me. ³⁴ Ngajan xi xuta jan ne, cuitjin cafayangui me tsëhë Jesús:

—Ngayin ne, hyin xi chja ley ta me xi Nina tsingatju rë ne, tsajin nixtin xi cueya me. ¿Hacutjin má xi nújun ngayun xi me xi Quihndi rë Xuta Jain ne, tjunihnga rë me? ¿Yo me xi Quihndi rë Xuta Jain vë ni? —Cuatjin cafayangui xuta jan.

³⁵ Ngajan xi Jesús ne, cuitjin cachja me cojo xuta jan:

—Ha tu chúva sa nixtin xi ngahan xi sacuaha hasen ngahan ne, tejña ngajñi nuju. Tángun xcun sa cojo ndiya xi ha tivangun jinguyëjë rë xi tacun sa hasen ngajñi nuju, sa tu cuechútáha nuju jñú. Xuta xi cjuí me ngajñi jñú ne, hvíin me janí cjuí me. ³⁶ Vëhë xi jinguyëjë rë xi tejña ngajñi nuju ne, catamangu

tacún cojo ná, cojo sa xi tsë rë xahasen nuju cojo cjuahasen naha. —Cuatjin cachja Jesús.

Jemu cjin xuta xi camanguaain cacun me cojo Jesucristu

Hane xi cavatju cachja Jesús cjuva vëhë ne, cavetju me quijihma me tsëhë xuta jan.

³⁷ Handasa cavëë xuta xi jemu cjin cjuarcun casahmi Jesús ne, peru camanguaain cacun me cojo rë me. ³⁸ Cuatjin camá xi cavetjucaa cjuva rë profeta Isaías xi camahindu xcun xujun rë Nina hiscan xi chja cuitjin:

Ngayun Nina nihi, tsajin yo camacjain rë cjuva xi canújin;
Tsajin yo cajne rcu hacutjin xi hñu ngahñu rë Nina.

Cuatjin cachja profeta Isaías. ³⁹ Vëhë xi xuta jan ne, camaji camangu cacun me cojo Jesús ta, tsëhë xi hacuaha cachja nga profeta Isaías cuitjin:

⁴⁰ Sacuaha ngu xuta xi tsihñu me xcun ngu nga xuta cojo sa xi cumatsijin rë me ne,

cuatjin casahmi jñu Nina tsëhë cjuatacun rë xuta, cojo sa xi cuijnii rcu me hacuaha cuyaaïn me ladu rë Nina xi sahmi Nina xi cumandaja me.

⁴¹ Cuatjin cachja Isaías cjuva vëhë ta, tsëhë xi cavëë me hacutjin jyë hnga Jesús cojo hasen rë me hane cuatjin cachja me tsëhë Jesús.

⁴² Handasa cuatjin casahmi Nina ne, jemu cjin xutaxa rë camangu cacun me cojo Jesús. Peru tsëhë xi tsacjun me cha fariseo ne, catsinguixiin me ngajñi rë xuta, sa tu cumachohotje rë me yungun. ⁴³ Xutaxa rë xi cuacun vë ne, hitsë sa meje rë me xi sahmi yehe sahmi hnga xuta me, xi cuma rë xi sahmi yehe sahmi hnga Nina me.

Cjuva rë Jesucristu tsichuva rë xuta cojo cjuatacun rë me

⁴⁴ Ngu ndiya nga jan ne, jemu hñu cachja Jesús cuitjin:

—Xuta xi mangucacun me cojo ná ne, hacuiin suva ni mangucacun me cojo ná ta hacuaha mangucacun me cojo Nina Nahmi naja, me xi catsingatju ná. ⁴⁵ Hane xuta xi vijne rcu me yo ngahan ne, hacuaha vijne rcu me yo me xi catsingatju ná. ⁴⁶ Ngahan xi sacuaha hasen xi cuma rë xuta ngahan ne, canduva ngehe ngasunhdë, cojo sa xi yëjë xuta xi mangucacun me cojo ná ne, cjuë xi jñu tsëhë cjuatacun rë me. ⁴⁷ Hane sa xi ngu xuta vetaha rcu me cjuva xi chjá peru faharcuaain me ne, ngahan ne, tsichuvaan me cojo cjuatacun rë me ta, tsëhë xi ngahan ne, hacuiin canduvá xi tsichúva xuta cojo cjuatacun rë me ta canduvá xi cuáxëtje me. ⁴⁸ Xuta xi tsitjungui ná me hacuaha fahatsjaain me cjuva naha ne, ha tjin yo xi tsichuva rë me. Cjuva xi cachjá ne, cjuva vëhë xi tsichuva rë me nixtin xi tsichuva Nina sa nima sa xuta. ⁴⁹ Ngahan ne, cjuva xi cachjá ne, hacuiin cachjá cojo cjuatacun naha suva ta Nina Nahmi naja, me xi catsingatju ná ne, suvá me cavitexa ná me hacutjin meje rë xi cuichjá. ⁵⁰ Hane hvë ta cjuva xi vitexa me vëhë ne, sua naja cjuahñu xatsë. Vëhë xi cjuva xi chjá ne, suvá cjuva xi cavitexa Nina Nahmi naja.

13

Vane Jesucristu ntsacu xuta ladu rë me

¹ Quihndë ne, cavechú nixtin xi chaja sa ngu nixtin xi cuma suhi tsëhë Pascua. Hane Jesús ne, ha vëë me xi cavechú hora xi cuetju me tsëhë ngasunhdë vihi, cjue tjengui me Nina Nahmi naja. Hatuxa catsihmu cacun me xuta ladu rë me xi siu ngasunhdë vihi, hacuaha hacuanitjin ni catsihmu cacun me hisca xi cahme me.

² Jesús cojo xuta ladu rë me ne, tijinë nguixun me. Hane cha Judas, quihndi rë Simón Iscariote ne, ha casahmi Satanás xi cuejña cacun cha xi sahmi entregadu cha Jesús. ³ Peru Jesús ne, ha vëë me xi ha cavejña Nina yëjë xcusun tsja me. Hacuaha ha vëë me xi hiscan tacun Nina canduva me, hane hacuaha ngajan ni cuya cjue nga me. ⁴ Hya xi camá ne, cavejña Jesús xi tijinë me jan ne, cavisatjenhnga me, sehe cavaxë me chingá rë me cavejñaxin me, hane cafaha me ngu toalla cavityanguitaha me. ⁵ Sehe cafaha me nandá cojo nisu, hane cavetsihin cavane me ntsacu xuta ladu rë me hacuaha catsixiya me cojo toalla xi tyjanguitaha rë me jan.

⁶ Hane xi cafehe me xcun Simón Pedru ne, cachja Pedru cuitjin:

—Tatá, ¿há xi ngayun cuanu ntsacú? —Cuatjin cachja Pedru.

⁷ Ngajan xi Jesús ne, cuitjin cafayangui me:

—Xcusun xi tisahme ví ne, vijni rcun quihndë, peru ngascan ne, hya cuijne rcun. —Cuatjin cafayangui Jesús.

⁸ Hane Pedru ne, cuitjin cachja me:

—¡Hatuxa tsajin nu tsajin nixtin xi ngayun cuanu ntsacú! —Cuatjin cachja me.

Ngajan xi Jesús ne, cuitjin cafayangui me:

—Sa xi cuáne ntsacun ne, hacuiin xuta ladu naha ngayun. —Cuatjin cafayangui Jesús.

⁹ Ngajan xi Simón Pedru ne, cuitjin cachja me cojo Jesús:

—Tatá, sa cuatjin ne, ¡hacuiin suvá ni ntsacú ta hacuaha cojo ntsa cojo rcú tanu! —Cuatjin cachja me.

¹⁰ Ngajan xi Jesús ne, cuitjin cafayangui me tsëhë Pedru:

—Xuta xi ha cavinduya me ne, suvá ni ntsacu me meje rë xi cjuengui ta, tsëhë xi ha tyjahí me. Ngayujun ni ne, ha tyjahí ngayun. Peru ngu ngayun ne, hacuiin cuatjin. —Cuatjin cafayangui Jesús.

¹¹ Tsëhë xi ha vëë Jesús yo xi sahmi rë me entregadu, vëhë xi cachja me xi: “Hacuiin ngayujun xi tyjahí ngayun.”

¹² Hane xi cavatju cavane Jesús ntsacu xuta ladu rë me ne, sehe cavuya cavajá me chingá rë me, sehe quiji cafaha nga me cahndë rë me xcun maxë. Hane sehe cachja me cojo xuta ladu rë me cuitjin:

—¿Há vijne rcun xcusun xi casahme cojo nuju vë? ¹³ Ngayun ne, maestru niji hacuaha nai niji nújun tsahan. Hane ndatjin xi cuatjin nújun ta, tsëhë xi cuatjin jain. ¹⁴ Quihndë ne, quihndë ta ngahan xi nai nuju hacuaha maestru nuju ngahan cavane ntsacun ne, hacuaha meje rë xi cuatjin cuanu ntsacu xingun xingu xingu ngayun. ¹⁵ Ngahan ne, cavejñá nuju ngu ejemplu vë, cojo sa xi sacuaha xcusun xi casahme cojo nuju vë ne, hacuaha cuatjin nihñu. ¹⁶ Cuichjá cojo nuju cjuaquixi ta ngu mosu hndixahan ne, hacuiin hitsë sa venguichji rë xi cuma rë nai rë, hacuaha ngu xi ningatjun rë ne, hacuiin hitsë sa matitjun xi cuma rë me xi catsingatju rë. ¹⁷ Quihndë ta ha vijne rcun cjuavëhë ne, jemu ndaja tsujun sa xi nihñu cuatjin.

¹⁸ Peru ngahan ne, hacuiin tichjá tsujun ngayujun ni ta ngahan ne, ha hvë yo xi cavaxejen. Peru meje rë xi cuetjucaa cjuaxi camahindu xcun xujun rë Nina xi chja cuitjin: “Cha xi cajinë tangun cojo ná ne, camá cha condra naha.” Cuatjin camahindu. ¹⁹ Tichjá cojo nuju cjuavëhë quihndë chaja sa xi cuetjucaa, cojo sa xi hya xi cuetjucaa ne, ngayun ne, cumacajain nuju xi Ngahan Vi hmí ná. ²⁰ Cuichjá cojo nuju cjuaquixi ta xuta xi cjuahatsja me tu yo ni xi tsingatju ne, tangun sacuaha xi cjuahatsja ná me ngahan suva. Hane

xuta xi cjuahatsja ná me ne, tangun sacuaha xi cjuahatsja me Nahmi naha xi catsingatju ná me. —Cuatjin cachja Jesús cojo xuta ladu rë me.

Chja Jesucristu xi Judas sahmi rë me entregadu xcun xutaxa rë yungun

²¹ Xi cavatju cachja Jesús cuatjin ne, jemu camandya cacun me, hane cuitjin cachja me:

—Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

²² Hane xuta ladu rë Jesús xi cuacun jan ne, cavutsejenya me xcun xicjin me xingu xingu me. Hvín camahani me yo tsëhë xi cuatjin cachja Jesús.

²³ Hane ngu cha ladu rë Jesús xi jemu vinga rë me ne, tjeheh rë Jesús ne, ngajan tijinë cha niñu. ²⁴ Vëhë xi Simón Pedru ne, casahmi rcu me cojo cha vëhë, sehe cachja me cuitjin:

—Chjinengunsun rë me yo tsëhë xi chja me. —Cuatjin cachja Pedru.

²⁵ Hane xi catsicuya cha vëhë xcun cha tiña xcun Jesús ne, sehe cavinenguise cha me cuitjin:

—Tatá, ¿yo xi nújun vë? —Cuatjin cavinenguise cha.

²⁶ Ngajan xi Jesús ne, cuitjin cafayangui me:

—Cha xi suá rë ngu rquí niñu vi hora xi cjuë tsingúisehen quinda ne, cha vëhë xi hacui cha. —Cuatjin cafayangui me.

Hane hora xi camá catsingúisehen quinda me niñu jan ne, sehe casua me cha Judas, quihndi rë Simón Iscariote. ²⁷ Hane xi cavatju cafaha Judas ngu rquí niñu jan ne, hora vëhë cavisehen Satanás xahasen rë cha. Ngajan xi Jesús ne, cuitjin cachja me cojo cha:

—Xcusun xi nihñu ne, nihñu ni ngu ndiya xa. —Cuatjin cachja Jesús cojo cha.

²⁸ Peru hisca ngu me xi tijinë niñu jan hvín me mé má cuatjin cachja Jesús cojo cha. ²⁹ Yahnga me ne, catsingataha cacun me xi tsëhë xi Judas yaha cha tsá tujún ne, vëhë xi cachja Jesús cojo cha xi cjue cuatsë cha xi mameje tsëhë suhi o sa xi sua cha tsë tsë xuta yuma.

³⁰ Hane xi cavatju cafaha cha ngu rquí niñu jan ne, ngutjen ni cavetju cha quiji cha. Hora vëhë ne, ha camajñu.

Cjua xatsë xi cavitexa Jesucristu

³¹ Ngajan xi, xi cavetju Judas quiji cha ne, sehe cachja Jesús cuitjin:

—Ngahan xi Quihndi rë Xuta Jain Ngahan ne, quihndë cuetsihin cuma jyë cuma hnga ngahan cojo hasen naha, hacuaha ngahan tsingácun hacutjin jemu jyë hnga Nina cojo hasen rë me. ³² Hane sa xi ngahan tsingácun hacutjin jemu jyë hnga Nina cojo Hasen rë me ne, Nina ne, hacuaha tsingacun me hacutjin jemu jyë hnga ngahan cojo hasen naha. Hane ngutjen ni sahmi me cuatjin. ³³ Jemu chúva sa nixtin xi cuitejña cojo nuju, tsan. Ngayun ne, cuinchunsun ná, peru quihndë cuichjá cojo nuju sacuatjin cachjá cojo xutaxa rë yungun xi hiscan xi cjuë ne, cumaji cuangun. ³⁴ Nguehe cuitéxa nuju ngu cjuaxatsë cuitjin: “Meje rë xi nihñu hmu tacún xingun xingu xingu ngayun. Sacuatjin casahme hmu cáacun nuju ngahan, cuatjin meje rë xi nihñu hmu tacún xingun.” ³⁵ Hane xi cuatjin tjin cjuahmutacun ngajñi nuju cojo xingun ne, ngajan cumachaya rë yëjë xuta ta ngayun ne, xuta ladu naha má ngayun. —Cuatjin cachja Jesús.

Chja Jesucristu xi cuichja Pedru xi hvín me yo Jesucristu

³⁶ Ngajan xi Simón Pedru ne, cuitjin cavinenguise me:

—Tatá, ¿jani cuangun ni? —Cuatjin cavinenguise me.

Ngajan xi Jesús ne, cuitjin cafayangui me:

—Hiscan xi cjuë ne, quihndë ne, cumaji cuanguntjengun ná. Peru xi cuma ngascan ne, cuanguntjengun ná. —Cuatjin cafayangui Jesús.

³⁷ Hane Pedru ne, cuitjin cachja me cojo Jesús:

—Tatá, tsajin mé má cumaji cjuë tjënguë nuju quihndë. Hisca yojo naha suá ngatsë nuju. —Cuatjin cachja Pedru.

³⁸ Ngajan xi Jesús ne, cuitjin cafayangui me:

—¿Há xi tuhun yojo nuju ngatsë naha? Cuichjá cojo nuju cjuaquixi ta chaja sa xi squihnda xahnda ne, ngayun ne, ha jyan ndiya cuinújun xi hyúun yo ngahan. —Cuatjin cafayangui Jesús.

14

Sacuaha ndiya xi cjuí xcun Nina má Jesucristu

¹ Quijinduju sa cachja Jesús cojo xuta ladu rë me cuitjin:

—Xicamandyaain tacún. Catamangu tacún sa cojo Nina, hacuaha cata-mangu tacún sa cojo ná. ² Ngajan ngahnga hiscan tacun Nahmi naha ne, jemu cjín cahndë tjín xi cuiyuju yëjë xuta ladu rë me. Sa xi hacuiin cuatjin ne, ngahan ne, ha cachjá cojo nuju. Peru xicamacjiin tacún ta cjuë cuëhëndaja cahndë xi cuma nuju. ³ Hane hya xi ha cëjë cavëhëndaja cahndë xi cuma nuju ne, sehe cúa nga, hane cjuëcojo nuju, cojo sa xi hiscan xi cuitejña ne, hacuaha ngajan cuinechun. ⁴ Hacuaha hiscan xi cjuë ne, ngayun ne, ha hyun ndiya. —Cuatjin cachja Jesús.

⁵ Hane Tomás ne, cuitjin cachja me cojo Jesús:

—Tatá, hyíin jani cuangun. ¿Hacutjin má xi nújun xi ha hyin ndiya ni? —Cuatjin cachja me.

⁶ Hane Jesús ne, cuitjin cafayangui me tsëhë Tomás:

—Ngahan ne, sacuaha ndiya xi cjuí xcun Nina ngahan. Ngahan ne, hatuxa tjín ná cjuaquixi rë Nina, hatuxa tjín ná cjuahñu. Suvá ni xuta xi visehen me ladu naha ne, me vëhë ni xi cuma cuechú me xcun Nina Nahmi naja. ⁷ Ngatsë rë xi ha hyun ná ne, vëhë xi hatuxa chun Nahmi naha. Quihndë ne, hyun me, hacuaha ha cachutsujun me. —Cuatjin cafayangui Jesús.

⁸ Ngajan xi Felipe ne, cuitjin cachja me cojo Jesús:

—Tatá, ningacun niji Nina Nahmi naja, hane cojo vëhë cumangu tacuín. —Cuatjin cachja Felipe.

⁹ Ngajan xi Jesús ne, cuitjin cachja me:

—Ngahan ne, ha jemu jyë nixtin tejña cojo nuju, hane ¿há hyúun ná ni, Felipe? Xuta xi ha cavëë ná me ne, ha cavëë me Nina Nahmi naja. ¿Hacutjin má xi nújun xi tsingácun nuju Nina Nahmi naja ni? ¹⁰ ¿Há macjaain nuju xi ngahan ne, tejñaya xahasen rë Nina Nahmi naja, hane me vëhë ne, jiya me xahasen naha? Cjua xi chjá cojo nuju ne, hacuiin chjá cojo cjuatacun naha suva. Nina Nahmi naja xi jiya me xahasen naha ne, me vëhë sahmi me xa rë me. ¹¹ Catamacjain nuju xi ngahan ne, tejñaya xahasen rë Nina Nahmi naja hacuaha me vëhë ne, jiya me xahasen naha. O sa xi macjaain nuju cjua naha ne, catamacjain nuju ngahan ndastu ngatsë rë cjuarcun xi casahme.

¹² Cuichjá cojo nuju cjuaquixi ta xuta xi mangucacun me cojo ná ne, cjuarcun xi sahme ngahan ne, hacuaha cojo me sahmi me. Ha hisca yehe sa cjuarcun sahmi me ta, ngahan ne, cjuë tjënguë Nina Nahmi naja. ¹³ Hane tu mé ni xi chjahyun rë Nina ngatsë rë xi ladu naha ngayun ne, vëhë sahme, cojo sa xi cuma jyë cuma hnga Nina Nahmi naja cojo Hasen rë me ngatsë rë xcusun xi

sahme, ngahan xi Quihndi rē me ngahan. ¹⁴ Sa xi chjahyun ná ngu cjuandaja ngatsē rē xi ladu naha ngayun ne, ngahan ne, sahme. —Cuatjin cachja Jesús cojo xuta ladu rē me.

Chja Jesucristu xi cuinduva Hasen rē Nina

¹⁵ Quijinduju sa cachja Jesús cuitjin:

—Sa xi ngayun nihñu hmu tacún ná ne, hacuaha cuinuhyun sacuatjin vité_{xa} nuju, ¹⁶ hane ngahan cuichjá cojo Nina Nahmi naja, hane tsingatju me ngu nga xi cuisecoo nuju, xi cuejña cahndé cojo nuju yějē nu yějē nixtin.

¹⁷ Hane vèhē ne, vèhē Hasen xi hatuxa tjin rē cjuaquixi rē Nina. Xuta xi marcuaaïn rē me tséhē Nina ne, cumaji xi cuisehen Hasen vèhē xahasen rē me ta, tséhē xi tsijin rē me Hasen vèhē hacuaha hvín me Hasen vèhē. Peru ngayun ne, hyun Hasen vèhē ta, tséhē xi tacun cahndé cojo nuju hacuaha cuisehen xahasen nuju.

¹⁸ Ngahan ne, hacuiin cuiyuju nuju suvun ta cúa nga cuitejñacahndé cojo nuju. ¹⁹ Ha tu hitsē sa ne, ha quihndé scuiin ná xuta. Peru ngayun ne, chun ná. Hane tséhē xi ngahan ne, hatuxa tjin ná cjuahñu ne, vèhē xi ngayun ne, hatuxa sacú nuju cjuahñu xatsē. ²⁰ Nixtin hya ne, cuijne rcun xi ngahan ne, tejñaya xahasen rē Nahmi naha, hane ngayun ne, nechunyun xahasen naha, hane ngahan ne, tejñaya xahasen nuju.

²¹ Xuta xi tivihndé sacuatjin vité_{xa} ne, me vèhē xi hmu cacun ná me. Hane xuta xi cuatjin hmu cacun ná me ne, hacuaha sahmi hmu cacun Nahmi naha me. Ngahan ne, hacuaha sahme hmú cá_{cun} me, hacuaha suá cumachaya rē me yo ngahan. —Cuatjin cachja Jesús.

²² Judas, me xi hacuiin cha Judas Iscariote jan ne, cavinenguisse me cuitjin:

—Tatá, ¿hacutjin má xi tuhun cumachaya niji yo ngayun, hane hacuiin cojo yějē sa xuta ni? —Cuatjin cavinenguisse me.

²³ Ngajan xi Jesús ne, cuitjin cafayangui me:

—Xuta xi hmu cacun ná me ne, hacuaha cuihndé me tséhē cju_a naha. Hane sahmi hmu cacun Nahmi naha me, hacuaha cuinduvin cuinechinyincahndin xahasen rē me. ²⁴ Xuta xi hacuiin hmu cacun ná me ne, vihndiin me tséhē cju_a naha. Cju_a xi tinuhyun vi ne, hacuiin cju_a naha suva ta cju_a rē Nina Nahmi naja, me xi catsingatju ná.

²⁵ Jemu cjín cju_a tichjá cojo nuju jinguyějē rē xi tejña sa cojo nuju. ²⁶ Peru Hasen rē Nina xi tsingatju Nina Nahmi naja xi cuejña cahndé naha ne, vèhē cuisecoo nuju, tsinguixi cojo nuju yějē sa cju_a xi machaja, hacuaha tsinguitsjen nuju tséhē yějē cju_a xi ha cachjá cojo nuju.

²⁷ Cjuandaja cjuajeya cuejña nuju. Cjuandaja cjuajeya naha suá nuju. Peru hacuiin sacuatjin sua xuta ngasunhndé suá nuju. Xicamandyaain tacún, xicamacjiin tacún. ²⁸ Ha canuhyun xi cachjá cojo nuju ta cjué peru cúa nga cuinduva tjēnguē nuju. Sa xi ndaja jain hmu tacún ná ne, hacuaha ndama nuju xi cjué tjēnguē Nina Nahmi naja ta, Nina Nahmi naja ne, hitsē sa venguichji rē me xi cuma ná ngahan. ²⁹ Ha cachjá cojo nuju quihndé, chaja sa xi cuetjuaca cju_a vèhē, cojo sa xi hya xi cuetjuaca ne, ngayun ne, cumacjain nuju. ³⁰ Ha quihndé cuichjaan sa cojo nuju cjín cju_a ta, ha nduva Satanás, xi matitjun tséhē ngasunhndé. Peru ngahan ne, tsajin mé xi cuma sahmi cojo ná. ³¹ Ngahan ne, sahme sacuatjin cavitexa Nina Nahmi naja, cojo sa xi yějē xuta ne, cumachaya rē me xi hmú cá_{cun} Nina Nahmi naja.

’Nduvun ne, cuanguenxeen tséhē nguehe. —Cuatjin cachja Jesús.

15

Chja Jesucristu xi sacuaaha nahñu naa rë xca rë uva má me

¹ Hacuaha cachja sa Jesús cuitjin:

—Ngahan ne, sacuaaha nahñu naa cjuaquixi rë xca rë uva ngahan, hane Nahmi naha ne, sacuaaha me xi tsicha xcatjê vëhë me. ² Jima ngu nahñu tsja rë xi vaquiiñ tú rë ne, vatê me. Hane jima ngu nahñu tsja rë xi vaquí tú rë ne, vatêñi me tsja langa rë, cojo sa xi cjin sa tú rë cuaquí. ³ Hacuanitjin ni nuju ngayun xi sacuaaha nahñu tsja rë jan ngayun ta, cjuaxi cachjá cojo nuju ne, ha catsityjahi rë cjuatacun nuju. ⁴ Nihñutangun sa cjuatacun nuju cojo ná, hane ngahan ne, sahmetangun cjuatacun naha cojo nuju. Ha hyan ta nahñu tsja rë ne, cumaji sua tú rë sa xi tsajin quitahácoo cojo nahñu naa rë. Hacuanitjin ni nuju ngayun ta cumaji ninguitsujun cjuandaja rë Nina sa xi tsajin tjin tangun cjuatacun nuju cojo ná.

⁵ Ngahan ne, sacuaaha nahñu naa rë xca rë uva ngahan, hane ngayun ne, sacuaaha nahñu tsja rë. Xuta xi tjin tangun cjuatacun rë me cojo ná hacuaaha tjin tangun cjuatacun naha cojo rë me ne, me vëhë ne, jercu tsinguitojo me cjuandaja rë Nina. Vëhë xi sa xi tsajin tjin tangun cjuatacun nuju cojo ná ne, cumaji camahani ninguitsujun cjuandaja rë Nina. ⁶ Xuta xi tsajin tjin tangun cjuatacun rë me cojo ná ne, cuatju me cuma sacuatjin vatju nahñu tsja rë xca rë uva xi tijñi jan má: chandi rë, sehe xi; sehe chjaya rë cjue cueti. ⁷ Sa xi nihñu tangun sa cjuatacun nuju cojo ná hacuaaha cuiyujucahndë sa cjuaxi naha ngajñi rë cjuatacun nuju ne, chjahyun tu mé ni xi meje nuju, hane sacú nuju. ⁸ Nahmi naha ne, ma jyë ma hnga me cojo Hasen rë me hya xi ningacun xi xuta ladu naha jain má ngayun xi ninguitsujun cjuandaja rë me. ⁹ Sacuatjin hmu cacun ná Nahmi naja ne, hacuaaha cuanitjin hmú cáacun nuju. Xicanichayuun cjuahmutacun naha. ¹⁰ Sa xi vinuhyun tsëhë cjuaxi vitéxa nuju ne, ngayun ne, hatuxa nichayuun cjuahmutacun naha, sacuatjin ná ngahan xi cavíhndë tsëhë cjuaxi cavitéxa ná Nahmi naha hacuaaha tsichayaan cjuahmutacun rë me.

¹¹ Cuatjin chjá cojo nuju, cojo sa xi cjuasua xi tjin ná ne, cuejña cahntsua zahasen nuju, sehe jercu tu ndaja camahani cuma nuju. ¹² Vihi cjuaxi vitéxa nuju: nihñu hmu tacún xingun xingu xingu ngayun, sacuatjin sahme hmú cáacun nuju ngahan. ¹³ Tsajin yo xi hitsë sa jyë cjuahmutacun tjin rë xi cuma rë ngu xuta xi sua me yojo rë me ngatsë rë amigu rë me. ¹⁴ Hane ngayun ne, amigu naha má ngayun, sa xi nihñu sacuatjin xi vitéxa nuju. ¹⁵ Ha quihndë cuichjaan xi hndixahan naha ngayun ta, tsëhë xi ngu mosu hndixahan ne, hvíin mé xi sahmi nai rë. Ngayun ne, amigu naha chjá tsujun ta, tsëhë xi yjë cjuaxi cáhndë xi cachja Nahmi naha ne, casuá camachaya nuju. ¹⁶ Hacuñ ngayun canaxujun ná ta ngahan cavaxejen nuju. Hacuaaha casuáxa nuju xi cuangun ninguitsujun cjuandaja rë Nina. Hane cjuandaja vëhë ne, tsajin nu tsajin nixtin xi cjuë. Xi cuatjin nihñu ne, tu mé ni xi chjahyun rë Nina Nahmi naja ngatsë rë xi xuta ladu naha má ngayun ne, sua nuju me. ¹⁷ Vihi cjuaxi vitéxa nuju: nihñu hmu tacún xingun xingu xingu ngayun. —Cuatjin cachja Jesús.

Choho vëë xuta Jesucristu cojo xuta ladu rë me

¹⁸ Quijinduju sa cachja Jesús cuitjin:

—Sa xi choho vëë nuju xuta xi marcuaain rë tsëhë Nina ne, suá cumachaya nuju ta chaja sa xi choho scuëë nuju me ne, ngahan ne, ha choho vëë ná me. ¹⁹ Sa xi hacuaaha xuta xi marcuaain rë tsëhë Nina má ngayun ne, xuta xi

cuacun vë ne, sahmi hmu cacun nuju me ta, ngayun ne, ladu rë me ngayun. Peru tsëhë xi ngayun ne, hacuiin xuta xi marcuaain rë tsëhë Nina má ngayun ta ngahan cavaxejen nuju xi cuetjuxun tsëhë xuta xi cuacun vë, vëhë xi choho vëë nuju me. ²⁰ Ninguitsjun cja xi cachjá cojo nuju hya xi cachjá cojo nuju cuitjin: “Ngu mosu hndixahan ne, hacuiin hitsë sa venguichji rë xi cuma rë nai rë.” Sa xi catsuyihiya tjengui ná xuta cojo cjuahngatacun ne, hacuaha tsujyihiyatjengui nuju me cojo cjuahngatacun. Sa xi cahndë me tsëhë cja naha ne, hacuaha cuihndë me tsëhë cja nuju ngayun. ²¹ Yëjë xcusun vëhë sahmi xuta xi cuacun vë cojo nuju ngatsë naha ta, tsëhë xi hvíin me Nina, me xi catsingatju ná. ²² Tsajin mé jyë quitjen xuta xi cuacun vë sa xi canduvaan cachjá cojo rë me. Peru quihndë ne, sacuiinyiin rë me mé xi cuichja me xi cuaxëtje me yojo rë me. ²³ Xuta xi choho vëë ná ngahan ne, hacuaha cojo Nahmi naha choho vëë me. ²⁴ Tsajin mé jyë quitjen xuta xi cuacun vë sa xi casahmee ngajñi rë me cjuarcun xi tsajin sa ngu xuta xi ha casahmi me. Peru quihndë ne, ha cavëë me cjuarcun xi casahme, hane choho vëë ná me cojo Nahmi naha. ²⁵ Peru cuatjin camá cojo sa xi cuetjucaa cja xi camahindu xcun xujun rë Nina xi chja xuta xi cuacun vë xi jemu vihndë me tsëhë, cja xi chja cuitjin: “Choho cavëë ná me, handasa vechiin chva rë.” Cuatjin chja cja jan.

²⁶ ‘Cuinduva Hasen rë Nina, xi hatuxa tjin rë cjuaquixi rë Nina, hane cuisecoo nuju. Ngahan tsingátju nuju Hasen vëhë xi cuetju hiscan tacun Nina Nahmi naja, hane xi cjeuhe ne, cuichja tsahan. ²⁷ Hacuaha ngayun ne, cuinújun tsahan cojo xuta, tsëhë xi ngayun ne, ha nechun cojo ná hisca ntsacu cavetsihin.

16

¹ ‘Cuatjin tichjá cojo nuju, cojo sa xi hacuiin cuetjuxun tsëhë ndiya naha. ² Cuechú nixtin xi cumachohotje nuju yungun. Cuechú nixtin xi xuta xi tsiquehen nuju me ne, tsingataha cacun me xi jemu ndaja faharcun me Nina xi cuatjin sahmi me. ³ Cuatjin sahmi me ta, tsëhë xi hvíin me Nina Nahmi naja, hacuaha vijñi rcu me yo ngahan. ⁴ Cachjá cojo nuju cja vëhë, cojo sa xi hya xi cuechú hora xi cuetjucaa ne, ninguitsjun xi cuatjin cachjá cojo nuju. —Cuatjin cachja Jesús.

Hacutjin sahmi Hasen rë Nina

Quijinduju sa cachja Jesús cuitjin:

—Cachjaan cojo nuju cja vëhë ntsacu cavetsihin ta, tsëhë xi ngahan ne, tejña cuaha cojo nuju. ⁵ Peru quihndë ne, cjuéjtjenguë me xi catsingatju ná, hane hisca ngu ngayun ne, chjinengunsuun ná jani cjuë. ⁶ Hane tsëhë xi cuatjin cachjá cojo nuju cja vëhë ne, ña catsë rë xahasen nuju cjuachoho. ⁷ Peru ngahan ne, cuichjá cojo nuju cjuaquixi ta tsujun ndaja xi cjuë ta, sa xi cjuen ne, Hasen xi cuisecoo nuju jan ne, hatuxa cuinduvaain. Peru sa xi cjuë ne, tsingátju nuju Hasen rë Nina vë. ⁸ Hane hya xi Hasen vëhë cuinduva ne, vëhë tsinguixi xi hacuiin cuatjin xi tsingataha cacun xuta tsëhë cjuatsehen, hacuiin cuatjin xi tsingataha cacun me tsëhë cjuandaja, hacuiin cuatjin xi tsingataha cacun me tsëhë chva rë xi cjuahachuva Nina xuta cojo cjuatacun rë me. ⁹ Hacuiin cuatjin xi tsingataha cacun xuta tsëhë cjuatsehen ta, tsëhë xi manguaain cacun me cojo ná. ¹⁰ Hacuiin cuatjin xi tsingataha cacun xuta tsëhë cjuandaja ta, tsëhë xi ngahan ne, cjuéjtjenguë Nina Nahmi naja hane ngayun ne, ha quihndë chuun ná. ¹¹ Hacuiin cuatjin xi tsingataha cacun xuta tsëhë xi cjuahachuva Nina xuta cojo cjuatacun rë me ta, tsëhë

xi Satanás, xi matitjun tséhë ngasunhndë vihi ne, ha catsichuva Nina cojo cjuatacun rë.

¹² Jemu tjin sa ná cjuá xi cuichjá cojo nuju, peru ngayun ne, scaain nuju cuinuhyun quihndë. ¹³ Peru hya xi cuinduva Hasen xi hatuxa tjin rë cjuaquixi rë Nina ne, vëhë cuinchandiyandaja nuju ndiya rë cjuaquixi. Hacuini cojo cjuatacun rë suvá xi cuichja ta sacuatjin cjuá xi chja Nina cojo ne, cjuá vëhë cuichja. Hacuaha vëhë cuichja cojo nuju hacutjin cuma nixtin nduva. ¹⁴ Hasen vëhë ne, vëhë sahmi jyë sahmi hnga ná cojo cjuatacun naha ta, tséhë xi vëhë cjuaha xi tsahan sehe sua cumachaya nuju tsahan. ¹⁵ Yëjë ni xi tséhë Nina Nahmi naja ne, hacuaha tsahan. Vëhë xi cachjá xi Hasen jan ne, cjuaha xi tsahan sehe sua cumachaya nuju tsahan. —Cuatjin cachja Jesús.

Cuya cjuasua cjuachoho rë xuta ladu rë Jesús

¹⁶ Hacuaha cachja sa Jesús cuitjin:

—Ha tu hitsë sa ne, ha quihndë chuun ná, hane ha tu hitsë nga sa ne, chun ná. —Cuatjin cachja Jesús.

¹⁷ Ngajan xi ngujo xuta ladu rë Jesús jan ne, cuitjin cachja me cojo xicjin me:

—¿Mé vijne cjuá xi cuatjin chja me cojo naja? Chja me xi: “Ha tu hitsë sa ne, chuun ná, hane ha tu hitsë nga sa ne, chun ná”, hacuaha chja sa me xi: “Tséhë xi cjuë tjënguë Nina Nahmi naja”. ¹⁸ ¿Mé vijne cjuá xi “ha tu hitsë sa”? Vijnii rcuun mé xi chja me. —Cuatjin cachja me cojo xicjin me.

¹⁹ Jesús ne, ha vëë me xi meje cjuinenguise xuta xi cuacun jan me tséhë cjuá vëhë, vëhë xi Jesús ne, cachja me cojo rë xuta jan cuitjin:

—¿Há tichjinengunsun xingun tséhë xi cachjá xi ha tu hitsë sa ne, chuun ná hane ha tu hitsë nga sa ne, chun ná? ²⁰ Cuichjá cojo nuju cjuaquixi ta ngayun ne, chjihndun hacuaha chjihndunsun, peru xuta xi marcuaain rë me tséhë Nina ne, jercu ndaja cuma rë me. Ngayun ne, jemu choho cuma nuju, peru cjuachoho nuju ne, cuya sua. ²¹ Hya xi ngu chjuun tsin rë me quihndi ne, jemu tjin rë me cjuachoho ta, tséhë xi cavechú hora xi cuatju me cjuañihi. Peru hya xi cavatju catsin quihndi ne, ha quihndë vitsjiin rë me tséhë cjuañihi jan, ngatsë rë cjuasua rë me xi catsin ngu quihndi. ²² Cuatjin nuju ngayun ta quihndë ne, tjin nuju cjuachoho. Peru ngahan ne, cúa scuëë nga nuju, hane ngayun ne, jemu ndaja cuma rë xahasen nuju, hane cjuasua nuju jan ne, tsajin yo cuma cjuahatahá. ²³ Hane nixtin hya ne, chjinengunsun ná hisca ngu cjuá.

‘Cuichjá cojo nuju cjuaquixi ta tu mé ni xi chjahyun rë Nina Nahmi naja ne, sua nuju me tséhë xi ladu naha má ngayun. ²⁴ Hisca quihndë ne, cjëë chjahyun ná ngu cjuandaja tséhë xi ladu naha má ngayun. Chjahyun ne, sehe sacú nuju, cojo sa xi xahasen nuju ne, tsë rë cjuasua. —Cuatjin cachja Jesús.

Cacaá rë Jesucristu catsinguijne me cjuatsehen rë ngasunhndë

²⁵ Quijinduju sa cachja Jesús cuitjin:

—Ngahan ne, cojo ejemplu cachjá cojo nuju. Peru cuechú nixtin xi ha quihndë hacuini cojo ejemplu cuichjá cojo nuju ta cuichjáquixë cojo nuju tséhë Nina Nahmi naja. ²⁶ Nixtin hya ne, hatuxa chjahyun cjuandaja tséhë xi ladu naha má ngayun. Hane chjaan cojo nuju xi cuichjá ngatsë nuju cojo Nina Nahmi naja ta, ²⁷ suvá Nina Nahmi naja ne, jemu meje rë me ngayun, tséhë xi ngayun ne, hacuaha jemu meje nuju ngahan hacuaha macjain nuju xi ngahan ne, Nina catsingatju ná me. ²⁸ Ngahan ne, hiscan tacun Nina

cavétju canduvá nguehe ngasunhndë. Quihndë ne, cuétju tsëhë ngasunhndë, cúa cjuëtjenguë Nina Nahmi naja. —Cuatjin cachja Jesús.

²⁹ Ngajan xi xuta ladu rë Jesús ne, cuitjin cachja me:

—Chutsujun ni. Quihndë ne, hacuün cojo ejemplu tinújun ta tinújunquixun.

³⁰ Quihndë ne, hyin ta ngayun ne, hyun yëjë ni cjuatacun, hacuaha hacuün sahmi ngujyë xi cjuinenguise nuju xuta ngu cjuacojo sa xi cumachaya nuju rë xi tsingataha cacun xuta jan. Ngatsë rë vëhë xi macjain niji xi Nina catsingatju nuju me. —Cuatjin cachaja xuta ladu rë Jesús.

³¹ Ngajan xi Jesús ne, cuitjin cafayangui me:

—¿Há macjain jain nuju quihndë? ³² Chutsujun ni. Cuechú hora o ha hisca cavechú xi cuitsojo ngayun, jima ngu ngayun cojo ndya nuju, hane cuejñu ná suva. Peru ngahan ne, hacuün suva tejña ta Nina Nahmi naja tacun me cojo ná. ³³ Cuatjin chjá cojo nuju cojo sa xi sacú nuju cjuandaja cjuajeya ngatsë rë xi tjin tangun cjuatacun nuju cojo ná. Nguehe ngasunhndë ne, vatjun cjuañihi. Peru tuhun cjuasua xahasen nuju ta, ngahan ne, hacuaha cacaa ná catsinguijne cjuatsehen rë ngasunhndë. —Cuatjin cachja Jesús cojo xuta ladu rë me jan.

17

Fehya Jesucristu cjuandaja xi cuma rë xuta ladu rë me

¹ Xi cavatju cachja Jesús cuatjin ne, sehe cavutsejenniji me ngahnga, hane cachja me cuitjin:

—Ngayun Nahmi naha, ha cavechú hora. Nihñu jyë nihñu hnga ná cojo Hasen naha ngahan xi Quihndi nuju ngahan, cojo sa xi ngahan ne, hacuaha sahme jyë sahme hnga nuju cojo Hasen nuju. ² Ngayun catuhunxun ná xi matitjun ngahan tsëhë yëjë xuta, cojo sa xi yëjë me xi catuhun ná ne, suá rë me cjuahñu xatsë. ³ Hane cuitjin xi sacú rë me cjuahñu xatsë, xi vëë me ngayun, ngayun xi ngu ni ngayun xi Nina xi cjuaquixi ngayun, hacuaha xi vëë ná me, ngahan xi Jesucristu ngahan, ngahan xi ngayun caningatjun ná. ⁴ Ngahan ne, casahme jyë casahme hnga nuju nguehe ngasunhndë ta, catsinguijnetaha xa xi catuhun ná xi sahme. ⁵ Quihndë ne, nihñu jyë nihñu hnga ná cojo Hasen naha ndyá hiscan nechun, ngayun Nahmi naha. Tuhun ná Hasen ndajyihí xi ha tjin ná hya xi nechan tangun cojo nuju hisca hya xi chaja sa cuejña ngasunhndë.

⁶ Ngahan ne, casuá camachaya rë xuta xi catuhun ná nguehe ngasunhndë yo ngayun. Me xi cuacun vë ne, tsujun me, peru catuhun ná me. Hane cahndë me tsëhë cjuacojo nuju. ⁷ Ha vëë me quihndë xi yëjë ni xcusun xi catuhun ná ne, ngayun caningatjun. ⁸ Cuatjin vëë me ta, tsëhë xi yëjë ni cjuacojo xi catuhun ná ne, hacuaha casuá rë me. Hane me xi cuacun vë ne, cafahatsja me cjuacojo vëhë, hacuaha vëëndaja me xi hiscan nechun cavétju canduvá nguehe, hacuaha macjain rë me xi ngayun caningatjun ná.

⁹ Ngahan ne, tichjá cojo nuju ngatsë rë me xi cuacun vë. Tichjaan ngatsë rë xuta xi marcuaain rë tsujun ta tichjá ngatsë rë me xi catuhun ná, tsëhë xi tsujun me. ¹⁰ Yëjë ni xi tsahan ne, hacuaha tsujun, hane xi tsujun ne, hacuaha tsahan. Hane ngahan ne, cama jyë cama hnga ngahan cojo Hasen naha ngatsë rë xi tjin tangun cjuatacun rë me xi cuacun vë cojo ná. ¹¹ Ha quihndë cuitejña sa nguehe ngasunhndë. Me xi cuacun vë ne, siu me ngasunhndë, peru ngahan ne, cuinduvatjenguë nuju. Ngayun Nahmi naha, ngayun xi hatuxa tyjahí cjuatacun nuju ne, nihñu me cuidadu cojo ngahñu

nuju, ngahñu xi catuhun ná, cojo sa xi tjin tangun cjuatacun rë me cojo xicjin me, sacuatjin naja ngayaan. ¹² Hya xi tejña cojo rë me ne, casahme cuidadu me cojo ngahñu nuju xi catuhun ná. Casahme cuidadu me, hane hisca ngu me cachajin me. Suvá ni cha xi hatuxa chajá ne, cha vëhë xi cachajá cha, cojo sa xi cuetjucaa cjuaxi xi camahindu xcun xujun nuju. ¹³ Peru quihndë ne, cuinduvatjenguë nuju. Hane tichjá cjuaxi vihi nguehe ngasunhndë, cojo sa xi xuta ladu naha ne, tsë rë xahasen rë me cojo cjuasua xi quitsë rë xahasen naha suva. ¹⁴ Ngahan ne, casuá camachaya rë me cjuaxi nuju. Hane xuta ngasunhndë xi marcuaain rë tsujun ne, choho vëë rë me, tsëhë xi hacuiin tsëhë ngasunhndë má me, sacuatjin ná ngahan xi hacuiin tsëhë ngasunhndë má ngahan. ¹⁵ Cjuehyaan nuju xi naxunxun me tsëhë ngasunhndë ta tifëhya nuju xi nihñu me cuidadu tsëhë Satanás. ¹⁶ Xuta ladu naha jan ne, hacuiin tsëhë ngasunhndë má me, sacuatjin ná ngahan xi hacuiin tsëhë ngasunhndë má ngahan. ¹⁷ Nihñu tsujun jain me cojo cjuaxi xi hatuxa cjuaquixi. Cjuaxi nuju ne, vëhë xi hmí rë cjuaquixi. ¹⁸ Sacuatjin caningatjun ná ngahan ngajñi rë xuta xi marcuaain rë tsujun ne, hacuaha cuatjin catsingátju xuta ladu naha ngajñi rë xuta xi cuacun vë. ¹⁹ Hane ngatsë rë xuta ladu naha ne, suá nuju yojo naha, cojo sa xi me xi cuacun vë ne, hacuaha tsujun jain cuma me cojo cjuaquixi.

²⁰ Quihndë ne, hacuiin ngatsë rë suvá ni xuta ladu naha vi xi tichjá cojo nuju ta hacuaha cojo ngatsë rë me xi sehe cumangu cacun cojo ná xi cuihndë me cjuaxi xi chja xuta ladu naha tsahan. ²¹ Ngahan ne, xi meje ná ne, xi yëjë ni me xi cuacun vë ne, cuma tangun cjuatacun rë me cojo xicjin me. Sacuatjin nuju ngayun, Nahmi naha, xi nechunyun xahasen naha hane ngahan ne, tejñaya xahasen nuju ne, meje ná xi me xi cuacun vë ne, hacuaha hinchá me xahasen naja, cojo sa xi xuta ngasunhndë ne, cumacjain rë me xi ngayun caningatjun ná. ²² Ngahan ne, casahme yehe casahme hnga me cojo cjuatacun rë me sacuatjin canihñu jyë canihñu hnga ná ngahan cojo cjuatacun naha, cojo sa xi cuma tangun cjuatacun rë me cojo xicjin me, sacuatjin tjin tangun cjuatacun naja ngayaan cojo xingueen. ²³ Meje ná xi ngahan ne, cuitejñaya xahasen rë me, sacuatjin nechunyun xahasen naha. Meje ná xi cuma tangun camahani cjuatacun rë me cojo xicjin me, cojo sa xi xuta ngasunhndë ne, cuijne rcu me xi ngayun caningatjun ná, hacuaha xi nihñu hmu tacún me sacuatjin nihñu hmu tacún ná ngahan.

²⁴ Ngayun, Nahmi naha, xuta xi catuhun me xi cuma me ladu naha ne, meje ná xi hiscan xi cuitejña ne, hacuaha ngajan cuiyuyu me cojo ná, cojo sa xi scutsejen me hacutjin jyë hnga ngahan cojo hasen ndajyihí naha xi ngayun catuhun ná, tsëhë xi canihñu hmu tacún ná hisca chaja sa xi cuejña ngasunhndë. ²⁵ Ngayun Nahmi naha, ngayun xi quixi ngayun cojo cjuatacun nuju, xuta ngasunhndë ne, hvíin nuju me, peru ngahan ne, hvë nuju, hane xuta ladu naha vi ne, vëë me xi ngayun caningatjun ná. ²⁶ Ngahan casuá camachaya rë me yo ngayun, hane suá sa cumachaya rë me, cojo sa xi cjuahmutacun xi tjin nuju cojo ná ne, cuejña cahntsua xahasen rë me hacuaha ngahan ne, cuitejña cahntsua xahasen rë me. —Cuatjin cafehya Jesús cjuandaja cojo Nina.

¹ Hya xi camá ne, xi cavatju cachja Jesús cjuá vëhë ne, sehe cavetju me quiji me cojo xuta ladu rë me ngunda vëhë tsëhë caniña Cedrón. Hane ngajan cavisehen Jesús cojo xuta ladu rë me ngu ngajñi yatjë xi tjin jan. ² Quihndë ne, cha Judas, cha xi sahmi rë entregadu Jesús ne, hacuaha vëë cha cahndë vëhë ta, jemu quiji Jesús cahndë vëhë camatangun me cojo xuta ladu rë me. ³ Ngajan xi cha Judas ne, quijicojo cha ngujo sindadu cojo cha mayu cojo cha nisë rë cha, cha xi catsingatju nahmi xi matitjun cojo cha fariseo. Quiji cha xi cuacun jan ngajan cojo ndihi cojo quicha. ⁴ Hane Jesús ne, tsëhë xi ha vëë me yëjë xcusun xi cuatju me cuma ne, quijivaha me xcun cha xi cuacun jan, sehe cavinenguise me cha cuitjin:

—¿Yo xi meje nuju? —Cuatjin cavinenguise me.

⁵ Ngajan xi cha xi cuacun jan ne, cuitjin cafayangui cha:

—Xuta Nasaret xi hmí rë Jesús. —Cuatjin cafayangui cha.

Hane Jesús ne, cuitjin cachja me:

—Ngahan xi nújun vë. —Cuatjin cachja me.

Quihndë ne, Judas, cha xi sahmi rë me entregadu ne, cojo cha secun cha cojo cha xi cuacun vë. ⁶ Hane hya xi cachja Jesús xi: “Ngahan xi nújun vë” ne, quijingaxtun yëjë cha xi cuacun jan, hane caticja cha. ⁷ Ngajan xi Jesús ne, cavinenguise nga me cha cuitjin:

—¿Yo xi meje nuju? —Cuatjin cavinenguise me.

Hane cha xi cuacun jan ne, cuitjin cachja nga cha:

—Xuta Nasaret xi hmí rë Jesús. —Cuatjin cachja cha.

⁸ Hane Jesús ne, cuitjin cafayangui me:

—Ha cachjá cojo nuju ta ngahan xi nújun vë. Sa xi ngahan meje nuju ngahan ne, tuhun cahndë catje me xi cuacun vi. —Cuatjin cafayangui me.

⁹ Cuatjin cachja Jesús cjuá vëhë cojo sa xi cuetjucaa cjuá xi ha cachja me cuitjin: “Xuta xi catuhun ná me ne, hisca ngu me catsichajan me.” ¹⁰ Ngajan xi Simón Pedru ne, cavaxë me quichandujú xi yaha me, hane cavatësun me tyjavañuju quixi mosu hndixahan rë nahmi xi matitjun jan, cha xi hmí rë Malco. ¹¹ Ngajan xi Jesús ne, cuitjin cachja me cojo Pedru:

—Teyunndujun quicha nuju vë. Hatuxa tsingatehen xi cuátju cjuañihi sacuatjin xi meje rë Nina Nahmi naja. —Cuatjin cachja Jesús.

Nahmi xi matitjun ne, sahmi cuenda me jyë rë Jesús

¹² Hya xi camá ne, cha sindadu cojo capitán rë cha, cojo mayu cojo cha nisë rë cha, cha xi catsingatju xutaxa rë yungun jan ne, cafaha cha Jesús, catsihñu cha me, ¹³ sehe quiji cani cha me titjun xcun Anás. Anás vë ne, nahmichahya rë Caifás má me. Hane nu vëhë ne, nahmi xi matitjun tsëhë yëjë ni nahmi má Caifás. ¹⁴ Quihndë ne, Caifás vë ne, me vëhë xi cavinchangui me xutaxa rë xi ndaja tsëhë xutaxa rë xi ngu xihin ni cueya ngatsë rë yëjë ni xuta.

Chja Pedru xi hacuini ladu rë Jesucristu má me

¹⁵ Quihndë ne, Simón Pedru cojo ngu sa cha ladu rë Jesús jan ne, tjengui me quiji me cojo Jesús. Hane cha ladu rë Jesús xingu jan ne, tsëhë xi vëë nahmi xi matitjun jan cha ne, cojo cha cavisehen cha cojo Jesús cahntsua hnhua ndatsen ndava nahmi xi matitjun jan. ¹⁶ Peru Pedru ne, casecun ni me ngajan candatsen tingotjo hnhua jan. Ngajan xi cha ladu rë Jesús xi vëë nahmi jan ne, cavetju nga cha quiji cachja cha cojo na xi quitahá cuidadu rë tingotjo hnhua jan. Hane sehe catsingusehen cha Pedru cahntsua hnhua. ¹⁷ Hane na xi sahmi cuidadu tingotjo hnhua jan ne, cuitjin cavinenguise rë na Pedru:

—¿Hacuiin cojo ngayun má ngayun ladu rë me xi cuajyihi vë? —Cuatjin cavinenguise na.

Hane Pedru ne, cuitjin cafayangui me:

—Jéya, hacuiin. —Cuatjin cafayangui me.

¹⁸ Hane mosu rë nahmi jan cojo cha sindadu jan ne, cavejña cha ngu ndava ndihi, tsëhé xi jemu hnchan. Sehe hinchacun cha tijima hasu rë cha jan. Hacuaha cojo Pedru secun me jan, jima hasu rë me.

Fahatáha nahmi xi matitjun jan Jesucristu

¹⁹ Hane xi cafehe cha xi cuacun jan cojo Jesús jan ne, sehe cavetsihin cafahatáha nahmi xi matitjun jan me tsëhé xuta ladu rë me cojo tsëhé cjuachacun rë me. ²⁰ Hane Jesús ne, cuitjin cafayangui me:

—Ngahan ne, xcun cojo xcun cachjá cojo yëjë ni xuta, hacuaha cavicuyá rë me ngajan yungun langa o sa xi ngajan yungun xi matitjun, hiscan xi matangun ngayejen ni xuta tjë rë Israel. Tsajin mé xi cachjá xi táhahma.

²¹ Hane ¿mé má ngahan chjuhuntuhun ná ni? Chjuhuntuhun rë me xi cahndé cjuá naha. Chjinengunsun rë me mé xi cachjá cojo rë me. Me xi cuacun vë ne, vëë me cjuá xi cachjá. —Cuatjin cafayangui Jesús.

²² Hane xi cuatjin cachja Jesús cjuá vëhé ne, ngu cha mayu xi secun tiña jan ne, cavajaya cha ngu xcun Jesús, sehe cachja cha cuitjin cojo rë me:

—¿Há cuatjin chjayengui tsëhé nahmi xi matitjun? —Cuatjin cachja cha.

²³ Ngajan xi Jesús ne, cuitjin cafayangui me tsëhé cha:

—Sa xi choho cachjá ne, tinújun cojo yëjë xuta mé xi choho cachjá. Peru sa xi ndaja cachjá ne, ¿mé má cuatjin vujun ná ni? —Cuatjin cafayangui me.

²⁴ Ngajan xi Anás ne, hacuanitjin ni tjihñu cuaha Jesús ne, catsingatju me Jesús xcun nahmi xi matitjun tsëhé yëjë ni nahmi.

Chja nga Pedru xi hacuiin ladu rë Jesucristu má me

²⁵ Jinguyëjë rë xi tichjahátáha rë Jesús jan ne, Pedru ne, secun me xcun ndihi tijima hasu rë me. Hane cachjahátáha rë me cuitjin:

—¿Hacuiin cojo ngayun má ngayun ladu rë me vëhé? —Cuatjin cachjahátáha rë me.

Hane Pedru ne, cavetsangui me, cuitjin cachja me:

—Jéya, hacuiin. —Cuatjin cachja me.

²⁶ Ngajan xi ngu mosu rë nahmi xi matitjun jan, cha xi xicjin rë cha xi cavatésun Pedru tyjavañuju jan ne, cuitjin cachja cha cojo Pedru:

—¿Há calveen nuju cojo rë me ngajñi yatjë jan ni? —Cuatjin cachja cha.

²⁷ Cavetsangui nga Pedru ngu ndiya. Hane ha hora vëhé ni ne, cajiñda zahnda.

Fahatáha Pilatu Jesucristu

²⁸ Ngajan xi xuta matitjun tsëhé xuta tjë rë Israel jan ne, cavaxë me Jesús tsëhé ndava Caifás, hane quijicojo me ndihya jyë hiscan tacun Pilatu, xutaxa rë xi matitjun. Nguitajñu xati hora vëhé. Hane xuta xi quijicojo rë Jesús jan ne, cavisiin me cahntsua ndihya jyë jan, ngatsë rë xcusun ré me xi ma chocun yojo rë me xcun Nina hya xi visehen me ndava xutaxín. Hane sa xi cuatjin cuma chocun yojo rë me ne, cumaji sinë nguixun me comida suhi tsëhé Pascua. ²⁹ Vëhé xi cavetju Pilatu quijitjengui rë me candatsen. Hane cuitjin cavinenguise me:

—¿Mé jyë vinchun tsëhé cha xi cuijyihi vi? —Cuatjin cavinenguise Pilatu.

³⁰ Hane xuta xi cuacun jan ne, cuitjin cafayangui me:

—Sa xi hacuiin choho tisahmi cha ne, canduvinchanii nuju cha. —Cuatjin cafayangui me.

³¹ Hane Pilatu ne, cuitjin cachja me:

—Chjuhun cha ne, chjuhunchuvun suvun cha cojo jyě rě cha sacuatjin cha ley nuju. —Cuatjin cachja Pilatu.

Ngajan xi xutaxa rě yungun xi cuacun jan ne, cuitjin cachja me:

—Ley nuju ngayun ne, chja ta ngayin ne, cumaji niquihin xuta. —Cuatjin cachja xuta xi cuacun jan.

³² Cuatjin camá cojo sa xi cuetjucaa cjuá xi cachja Jesús hya xi cachja me mé chuva rě cueya me.

³³ Ngajan xi Pilatu ne, cavuya cavisehen nga me ndihya. Hane cajindaya me Jesús, sehe cavinenguise me cuitjin:

—¿Há ngaye xu matitjun ngaye tséhě xuta tjě rě Israel? —Cuatjin cavinenguise me.

³⁴ Hane Jesús ne, cuitjin cafayangui me:

—¿Há cojo cjuatacun nuju suvun chjinengunsun ná cjuá vėhě?, o há tsajin ne, ¿há tjin yo cachja cojo nuju tsahan? —Cuatjin cafayangui me.

³⁵ Ngajan xi Pilatu ne, cuitjin cafayangui me:

—¡Peru ngahan ne, hacuiin xuta Israel ngahan! Suvá xuta nangui riji cojo nahmi xi matitjun casahmi ri me entregadu cojo ná. ¿Mé canihni? —Cuatjin cafayangui Pilatu.

³⁶ Ngajan xi Jesús ne, cuitjin cafayangui me:

—Xa naha xi sahme gobiernu ne, hacuiin ngasunhdě vihi cafahántsa. Sa xi ngasunhdě vihi cafahántsa xa xi sahme gobiernu ne, xuta ladu naha ne, scaan me cojo sa xi cumaji cuma ngahan entregadu tsja xutaxa rě yungun. Peru xa naha xi sahme gobiernu ne, hacuiin nguehe cafahántsa. —Cuatjin cafayangui Jesús.

³⁷ Hane Pilatu ne, cuitjin cachja me cojo Jesús:

—¿Ngajan xi ngaye xi matitjun ngaye ni? —Cuatjin cachja me.

Hane Jesús ne, cuitjin cafayangui me:

—Cuatjin sacuatjin nújun vė. Ngahan ne, canduvá nguehe ngasunhdě hacuaha catsin ngahan cojo sa xi cuichjá cojo xuta cjuá xi cjuaquixi. Yějě xuta xi marcun rě me tséhě cjuaquixi ne, hatuxa vetaharcu me cjuá naha. —Cuatjin cafayangui Jesús.

³⁸ Hane Pilatu ne, cuitjin cachja me:

—¿Mé xi hmí rě cjuaquixi ni? —Cuatjin cachja Pilatu.

Chja xutaxa rě yungun xi meje rě xi cueya Jesucristu.

Hane xi cafě cachja Pilatu cjuá vėhě ne, sehe cavetju nga me quiji cachja me cojo xutaxa rě yungun, cuitjin cachja me:

—Sacuiin ná hisca ngu jyě rě cha xi cuajyihí vė. ³⁹ Peru ngayun ne, tjin nuju ngu xcusun xi tsisme ngu presu nixtin rě suhi rě Pascua. ¿Há meje nuju xi tsisme me xi matitjun tsujun? —Cuatjin cachja me.

⁴⁰ Hane xuta xi cuacun jan ne, cajindaya me cachja me cuitjin:

—¡Hacuiin cha vėhě ta Barrabás nismu cha! —Cuatjin cajindaya me cachja me.

Quihndě ne, Barrabás jan ne, ngu cha fahataha cjuachan cha.

19

¹ Ngajan xi Pilatu ne, catsingatju me Jesús casehen rě me. ² Hane cha sindadu xi cuacun jan ne, xi camá catsihya cha ngu corona nahyá ne, sehe

cavesun cha rcu Jesús, hacuaha catsicaja cha me ngu tsjian moradu. ³Hya xi camá ne, quijivaha cha jima ngu cha xcun me, sehe cavetsihin cavincha cha viva rë me xi tsixcuehyu cha me sacuaha xi me vëhë matitjun me tsëhë xuta tjë rë Israel. Hacuaha cavajaya cha xcun me.

⁴Hya xi camá ne, Pilatu ne, cavetju nga me candatsen, hane cuitjin cachja me cojo xuta xi cuacun jan:

—Chutsujun ni, cuaxë cha nguehe, cojo sa xi cumachaya nuju ta sacuiin ná hisca ngu jyë rë cha. —Cuatjin cachja Pilatu.

⁵Ngajan xi Jesús ne, cavetju me candatsen, quisun rcu me corona nahyá hacuaha yaja me tsjian moradu jan. Sehe cachja Pilatu cojo xuta cuitjin:

—Chutsujun ni, cuajyihí cha nguehe. —Cuatjin cachja me.

⁶Hane hya xi cavëë nahmi xi cuacun matitjun jan cojo cha mayu cojo nisë rë cha Jesús ne, cajindaya cha cachja cha cuitjin:

—¡Tetuhun cha xcun cru! ¡Tetuhun cha xcun cru! —Cuatjin cajindaya cha cachja cha.

Ngajan xi Pilatu ne, cuitjin cachja me:

—¡Chjuhun suvun cha, tetuhun cha xcun cru ta, ngahan ne, sacuiin ná hisca ngu jyë rë cha! —Cuatjin cachja Pilatu.

⁷Ngajan xi xutaxa rë xi cuacun jan ne, cuitjin cachja me:

—Ngayin ne, tjín ngu ley xi vitexa niji, hane sacuatjin chja ley vëhë ne, vechú chuva rë xi cueya cha ta, tsëhë xi cachja suvá cha xi Quihndi rë Nina cha. —Cuatjin cachja xutaxa rë jan.

⁸Hane xi cahndë Pilatu cja vëhë ne, hitsë sa catsacjun me camá. ⁹Sehe cavuya cavisehen nga me cahntsua ndihya, hane sehe cafahatáha me Jesús cuitjin:

—Ngayun ne, ¿jani canduvun? —Cuatjin cafahatáha me Jesús.

Peru Jesús ne, cafayanguiin me tsëhë Pilatu. ¹⁰Ngajan xi Pilatu ne, cuitjin cavinenguise me cojo Jesús:

—¿Há chayunnguun tsahan? ¿Há hyúun ta ngahan ne, cuma tsisme nuju hacuaha cuma cuitéxa xi setaha ngayun xcun cru? —Cuatjin cavinenguise Pilatu.

¹¹Hane Jesús ne, cuitjin cafayangui me:

—Ngayun ne, cuma nihñu cojo ná cuatjin, peru suvá ni ngatsë rë xi Nina casua nuju me cahndé. Vëhë xi me xi casahmi ná entregadu cojo nuju ne, hitsë sa jyë jyë rë me xi cuma nuju ngayun. —Cuatjin cafayangui Jesús.

¹²Xi cahndë Pilatu cja vëhë ne, cavangui me chuva rë xi tsismi me Jesús. Peru xutacjin jan ne, cajindaya me cachja me cuitjin:

—Sa xi nismu cha xi cuajyihí vë ne, hacuiin amigu rë César, me xi matitjun camahani, má ngayun. Ngu xuta xi chja suvá me xi matitjun me ne, hatuxa condra rë César má me. —Cuatjin cajindaya me cachja me.

¹³Hane xi cahndë Pilatu cja vëhë ne, sehe cavaxë nga me Jesús candatsen, sehe quiji me cavéjña me hiscan sahmi cuenda me jyë rë xuta, cahndë hiscan hmí rë Texondaja rë, hane xi hne hebreo ne, Gabata hmí rë. ¹⁴Hora vëhë ne, sacuaha nchisen tsëhë nixtin vispra rë suhí tsëhë Pascua. Ngajan xi Pilatu ne, cuitjin cachja me cojo xuta:

—¡Chutsujun ni, cuajyihí me xi matitjun tsujun nguehe! —Cuatjin cachja me.

¹⁵Hane xuta jan ne, cuitjin cajindaya me cachja me:

—¡Naxunxun cha, naxunxun cha tsëhë nguehe! ¡Tetuhun cha xcun cru! —Cuatjin cajindaya me cachja me.

Ngajan xi Pilatu ne, cuitjin cavinenguise me:

—¿Há cuétaha me xi matitjun tsujun xcun cru ni? —Cuatjin cavinenguise me.

Ngajan xi nahmi xi cuacun matitjun jan ne, cuitjin cafayangui me:

—¡Ngu ni César, me vèhë xi matitjun me tsijin! —Cuatjin cafayangui me.

¹⁶ Ngajan xi Pilatu ne, cajne cacun me. Hane casahmi me entregadu Jesús xi cjue setaha me xcun cru xi cueya me. Sehe cafahatsja xuta xi cuacun jan me.

Setaha Jesucristu xcun cru

¹⁷ Hya xi camá ne, quisuntyja suvá Jesús cru, cavetju me quiiji me cojo xuta cahndé hiscan xi hmí rë Nínda Rcuun, hane xi hne hebreo ne, Gólgota hmí rë.

¹⁸ Hane ngajan casetaha me xcun cru. Hacuaha cojo sa jo cha caviyujutaha cha xcun cru rë cha, ngu ngu cha ngu ngu ladu tjeheh rë me. Hane Jesús ne, cavasen caseya me. ¹⁹ Hacuaha catsihindu Pilatu ngujo cjua xi casetaha cru cru rë Jesús, cuitjin camahindu: “Jesús, Xuta Nasaret, Xi Matitjun Tsèhë Xuta Israel.” ²⁰ Cjua vèhë ne, jemu cjin xuta cavutaya me, tsèhë xi cahndé hiscan casetaha Jesús xcun cru ne, tiña tacun nandya. Camahindu cjua vèhë cojo hne hebreo cojo latín cojo griego. ²¹ Ngajan xi nahmi xi matitjun tsèhë xuta tjë rë Israel jan ne, cuitjin cachja me cojo Pilatu:

—Ndajintjin xi cuatjin canihindun “Xi Matitjun Tsèhë Xuta Israel” ta, xi ndatjin ne, “Cachja Cha: Ngahan Matitjun Ngahan Tsèhë Xuta Israel.” —Cuatjin cachja me.

²² Hane Pilatu ne, cuitjin cafayangui me:

—Ha catsihindu cjua xi meje tshindu. —Cuatjin cafayangui me.

²³ Ngajan xi sindadu jan ne, xi cavatju cavetaha cha Jesús xcun cru ne, sehe cafaha cha tsjian xcun rë me cojo yèjé sa xi tsé xi xtí xi sahmixa cojo me, cavatécja cha ngajñi catsiñuju cha. Hacuaha cafaha cha tsjian ngahma rë me. Quihndé ne, tsjian vèhë ne, hacuuiñ casehencoo ta tsjian tu të ni. ²⁴ Ngajan xi cha sindadu jan ne, cachja cha cojo xicjin cha cuitjin:

—Tsjian vèhë ne, hacuuiñ cuichan ta naxeen suerte tsèhë ne, jaré ngayaan xi saté naja. —Cuatjin cachja cha.

Cuatjin camá cojo sa xi cuetjucaa cjua xi camahindu xcun xujun rë Nina xi chja cuitjin:

Cavatécja cha tsjian naha ngajñi rë cha,
hacuaha cavaxé cha suerte ngatsé rë tsjian naha.
Cuatjin casahmi cha sindadu jan.

²⁵ Quihndé ne, tiña cru rë Jesús jan ne, secun naa rë me, cojo tíchja naa rë me, cojo na María chjuun rë Cleofas, cojo na María na Mágdala. ²⁶ Hane xi cavèë Jesús naa rë me cojo cha ladu rë me xi jemu vinga rë me jan xi secun tangun cha cojo naa rë me ne, sehe cachja me cuitjin cojo naa rë me:

—Ngayun chjuun, cuajyihí quihndi nuju ndyá.

²⁷ Hane cha ladu rë me jan ne, cuitjin cachja me cojo rë cha: —Cuajyihí naa nuju ndyá. —Cuatjin cachja Jesús.

Ha nixtin hya ni ne, quijicojo cha ladu rë Jesús jan naa rë me ndava cha, ngajan cavéñacahndé me.

Cjuaveya rë Jesucristu

²⁸ Hane xi camá ngascan ne, Jesús ne, ha vèë me xi camachihin yèjé xa xi cachja Nina xi sahmí me. Hane cojo sa xi cuetjucaa cjua xi camahindu xcun xujun rë Nina ne, cuitjin cachja me:

—Jemu xinda ná. —Cuatjin cachja me.

²⁹ Quihndë ne, tacun jan ngu hiscan jemu hinchá xan yufa. Ngajan xi sindadu jan ne, catsicahnchi cha ngu tsjian hinda cojo xan jan ne, sehe catsitjinguia cha rcu ngu ya nduju, sehe catsiquijin cha cavetaha cha hntsa Jesús. ³⁰ Hane xi camá cahvi Jesús xan jan ne, sehe cachja me cuitjin: —Camachihin quihndë. —Cuatjin cachja Jesús.

Hane xi catsiquindi me rcu me ne, hora vëhë cahme me.

Cavitengui cha sindadu quicha ngu ladu ntsacu ndanisin rë Jesucristu

³¹ Hya xi camá ne, xutaxa rë yungun ne, cafehya me favor cojo Pilatu xi cuitexa me ne, xtotoho ntsacu me xi caviyujutaha xcun cru rë jan, sehe chjaháxin rë nima. Cuatjin cafehya me ta, tsëhë xi nixtin hya ne, vispra tsëhë suhi, hane mijí rë me xi cuiyujutaha nima xcun cru rë hisca cuma nchujun, tsëhë xi, xi cuma nchujun jan ne, nixtin chjahájenda rë hacuaha jemu nixtin jyë. ³² Ngajan xi sindadu jan ne, quiji cavotoho cha ntsacu catsijo ni cha xi hacuaha cojo caviyujutaha xcun cru rë cojo Jesús. ³³ Peru xi cafehe cha xcun cru rë Jesús ne, xi cavëë cha xi ha cahme me ne, cavotaain cha ntsacu me. ³⁴ Peru ngu cha sindadu jan ne, quiji cavitengui cha quicha ngu ladu ntsacu ndanisin rë Jesús, hane ngutjen ni cavetju jni cojo nandá. ³⁵ Cha xi cavëë ne, chja cha tsëhë xcusun vëhë, cojo sa xi ngayujun ni ngayun ne, cumacjain nuju. Cjua xi chja cha ne, cjuaquixi, hacuaha cha vëhë ne, vëë cha ta cjuaquixi cjua xi chja cha. ³⁶ Cuatjin camá xcusun vëhë, cojo sa xi cuetjucaa cjua xi chja xujun rë Nina xi chja cuitjin: “Hisca ngu nında rë me xtotaain.” ³⁷ Hacuaha chja nga ngu cahndë xujun rë Nina cuitjin: “Scuëë xuta me xi caxtengui rë quicha.” Cuatjin chja xujun rë Nina.

Seyaniji Jesucristu

³⁸ Xi cavatju xcusun vëhë ne, José, ngu xuta Arimatea ne, cafehya me cahndë cojo Pilatu xi cjuahaxin me nima Jesús. José jan ne, hacuaha xuta ladu rë Jesús má me, handasa catsingacuiin me xi xcun cojo xcun, tsëhë xi tsacjun me xutaxa rë yungun. Hane Pilatu ne, casua me cahndë. Hya xi camá ne, quiji cafahaxin José nima. ³⁹ Nicodemo, me xi quiji cavisiajmi cojo Jesús ngu nguixun jan ne, hacuaha cojo me quiji me cojo José. Yaha me sacuaaha cantë kilu aceite xi jemu ndaja jne xi cuëhëchjine me yojo rë nima jan. ⁴⁰ Ngajan xi, xi cafaha me nima jan ne, sehe cavitejnu rë me aceite hacuaha catsitjinguí rë me tsjian, sacuatjin xcusun rë xuta tjë rë Israel hya xi vinchaniji me nima rë me. ⁴¹ Quihndë ne, tiña hiscan cavetaha xuta Jesús xcun cru xi catsiquehen me ne, tjín ngu ngajñi yatjë. Hane ngajñi yatjë jan ne, tacun ngu tsjun xatsë, xi hisca ngu nima cjëë seya. ⁴² Ngajan ni caveya me nima Jesús, tsëhë xi ngajan xi tiña, hacuaha ha vispra tsëhë suhi nixtin hya.

20

Tsjun tiya

¹ Quihndë ne, nixtin xi tjun tjun tsëhë totje jan ne, na María na Mágdala jan ne, nguitajñu jñu sa ne, cavetju na quiji na xcun tsjun rë nima Jesús. Hane xi cafehe na jan ne, cavëë na xi ndyojo xi quitahá tingotjo rë tsjun jan ne, cachjaháxin rë. ² Ngajan xi vangasanii na quiji na hiscan tacun Simón Pedru cojo cha ladu rë Jesús xingu jan, cha xi jemu vinga rë Jesús. Hane xi cafehe na jan ne, cuitjin cachja na:

—Cavaxë me nima Nai naja tsëhë tsjun rë, hane hyaan jani quiji chani rë.
—Cuatjin cachja na.

³ Ngajan xi Pedru cojo cha xingu jan ne, cavetjusanii me, quiji me xcun tsjun jan. ⁴ Vanga me catsijo me quiji me, peru cha xingu jan ne, hitsë sa hñu cavanga cha xi cuma rë Pedru, hane tjun cha vëhë cafehe cha xcun tsjun. ⁵ Hane xi cafehe cha jan ne, catsiquindi cha yojo rë cha, hane cavëë cha tsjian xi cavitjingu rë nima Jesús, siu jan. Peru cavisiin cha. ⁶ Hane xi cafehe Simón Pedru xi camá ngascan ne, cavisehen me cahntsua tsjun jan. Hane cavëë me tsjian jan siu, ⁷ hane pañutu xi camahñu rcu nima jan ne, hacuian tacun tangun cojo tsjian jan ta tjeju ne, xín tacun. ⁸ Ngajan xi cha ladu rë Jesús xi cafehe titjun xcun tsjun jan ne, hacuaha cavisehen cha. Hane cavëë cha hacuaha camacjain rë cha. ⁹ Nixtin hya ne, cjëë sa cuijne rcu cha xi chja xujun rë Nina xi nima Jesús ne, meje rë xi cuya me cjuahñu. ¹⁰ Hya xi camá ne, xuta ladu rë Jesús jan ne, cavuya cafe me.

Cavëë na María na Mágdala Jesucristu

¹¹ Hane na María ne, hacuaha cavuya quiji nga na xcun tsjun jan, hane ngajan casecun na tingotjo cajihnda na. Hane táha tijihnda na ne, catsiquindi na yojo rë na, cavutsejenya na cahntsua tsjun jan. ¹² Hane cavëë na jo ángel xi tyava tsjian rë, siu hiscan cafaña nima; ngu ne, táha hiscan cafaña rcu nima hane xingu ne, táha hiscan caviyuju ntsacu. ¹³ Ngajan xi ángel jan ne, cuitjin cavinenguise rë na:

—Ngaye chjuun, ¿mé má chjihnde? —Cuatjin cavinenguise ángel jan na.

Hane na vëhë ne, cuitjin cachja na:

—Cavaxë me maestru naha ne, hveen jani quiji chani rë. —Cuatjin cachja na.

¹⁴ Hane xi cavatju cachja na cjua vëhë ne, sehe cavuya na táha ngaxtun na, hane cavëë na Jesús secun me jan. Peru hvíin na xi hacui Jesús. ¹⁵ Ngajan xi Jesús ne, cuitjin cachja me:

—Ngaye chjuun, ¿mé má cuatjin chjihnde? ¿Yo xi vinchise? —Cuatjin cachja me.

Hane xi má rë na vëhë ne, cha xi sahmi cuidadu yatjë jan xi cachja. Vëhë xi cachja na cuitjin:

—Tatá, sa xi ngayun canaxun nima ne, tinújun jani catsangun chanu, sehe cjuë jaha. —Cuatjin cachja na.

¹⁶ Ngajan xi Jesús ne, cuitjin cachja me cojo rë na:

—¡María! —Cuatjin cachja me.

Hane xi cavuya na ne, sehe cachja na hne hebreo cuitjin:

—¡Rabuni! —Cuatjin cachja na cjua xi meje cuicha Maestro.

¹⁷ Ngajan xi Jesús ne, cuitjin cachja me cojo rë na:

—Ha quihndë xicachunhñuu sa ná ta cjëë cjuëneje cjuëjtjenguë Nina Nahmi naja. Peru tánguntjengun xuta ladu naha xi yahnga, hane cuitjin tinújun cojo rë me: “Cjuëneje, cjuëjtjenguë Nahmi naha, me xi hacuaha Nahmi nuju, me xi Nina naha hacuaha Nina nuju ngayujun ni.” Cuatjin tinújun. —Cuatjin cachja Jesús.

¹⁸ Ngajan xi na María na Mágdala jan ne, quiji cachja na cojo xuta ladu rë Jesús cuitjin:

—¡Cahvé maestru naja! —Cuatjin cachja na.

Hacuaha cachja na cjua xi cachja Jesús cojo rë na.

Cavëë xuta ladu rë Jesucristu me

¹⁹ Hane xi camajñu ndaja tsëhë nixtin tjun tjun tsëhë totje jan ne, tjin tangun xuta ladu rë Jesús jan. Hane tichjáhñu tingotjo ndihya siu me, tsëhë

xi tsacjun me xutaxa rë yungun jan. Hya xi camá ne, cafehetsejen Jesús casecun me ngajñi rë xuta ladu rë me, hane cuitjin cachja me:

—Cjuandaja cjuajeya catejña cojo nuju. —Cuatjin cachja me.

²⁰ Hane xi cavatju cachja me cjua vëhë ne, sehe catsingacun me tsja me hacuaha catsingacun me ngu ladu ntsacu ndanisin rë me. Ngajan xi xuta ladu rë me jan ne, jemu ndaja camá rë me hora xi cavëë me maestru naja.

²¹ Hane cachja nga Jesús cojo rë me xi cuacun jan cuitjin:

—Cjuandaja cjuajeya catejña cojo nuju. Sacuatjin catsingatju ná Nina Nahmi naja ne, hacuaha cuatjin tsingátju nuju ngayun. —Cuatjin cachja Jesús.

²² Hane xi cavatju cachja me cjua vëhë ne, sehe cachimatjo me xuta jan, sehe cachja me cuitjin:

—Chjuhunntsun Hasen rë Nina cahntsua xahasen nuju. ²³ Xuta xi ninchatuhun jyë rë me ne, ha camanchataha. Hane xuta xi ninchatuun jyë rë me, ha camanchataain. —Cuatjin cachja Jesús.

Cavëë Tomás Jesucristu

²⁴ Tomás, me xi chja me tsëhë Cha Lihma, ngu xuta ladu rë Jesús ngajñi rë me xi tejó jan ne, cuajin me tacun me hya xi cafehe Jesús hiscan xi tjin tangun xuta ladu rë me xi yahnga jan. ²⁵ Ngajan xi xuta ladu rë Jesús xi yahnga jan ne, cuitjin cachja me cojo Tomás:

—Cahyin Nai naja. —Cuatjin cachja me.

Peru Tomás ne, cuitjin cachja me:

—Sa xi scueen hiscan cavanguihmu rë xin tsja me hacuaha tsinguseen rcuntsa hiscan cavisehen xin jan hacuaha cuetahanntsaaan ngu ladu ntsacu ndanisin rë me ne, cumacjain camahani ná. —Cuatjin cachja Tomás.

²⁶ Xi cavatju jyin nixtin jan ne, tjin tangun nga xuta ladu rë Jesús cahntsua ndihya, hacuaha cojo Tomás tacun me cojo me xi cuacun vë. Hane cafehe nga Jesús casecun me ngajñi rë me xi cuacun vë, ha ndasa tichjá tingotjo ndihya. Hane sehe cachja Jesús cuitjin:

—Cjuandaja cjuajeya catejña cojo nuju.

²⁷ Sehe cachja me cojo Tomás cuitjin: —Jarë rcuntsun. Chutsujun ntsa ne. Hacuaha jarë ntsun. Ninguisuhun ngu ladu ntsacu ndanisin naha. Tejñuxun xi cuatjin macjain nuju. Catamacjain nuju. —Cuatjin cachja Jesús.

²⁸ Ngajan xi Tomás ne, cuitjin cafayangui me tsëhë Jesús:

—¡Ngayun Nai naha! ¡Ngayun Nina naha! —Cuatjin cafayangui me.

²⁹ Hane Jesús ne, cuitjin cachja me:

—¿Há macjain nuju ngatsë rë xi tichutsujun ná? Ndatjin, peru jemu ndaja tsëhë me xi macjain rë, ha ndasa vutsijin ná me. —Cuatjin cachja Jesús.

Cuitjin titsihindu Juan cojo sa xi cumacjain rë xuta

³⁰ Quihndë ne, jemu cjín sa cjuarcun casahmi Jesús xcun xuta ladu rë me xi camahindiin xcun xujun vihi. ³¹ Peru cjuarcun vihi ne, camahindu cojo sa xi ngayujun ni ngayun ne, cumacjain nuju xi Jesús ne, hacui me xi Catsingatju Nina, hacuaha hacui Quihndi rë Nina me. Hacuaha camahindu cojo sa xi, xi cuatjin cumacjain nuju ne, sacú nuju cjuahñu xatsë ngatsë rë xi ladu rë me má ngayun.

¹ Xi camá ngascan ne, cavetjucaatsejen nga Jesús ngajñi rè xuta ladu rè me ngajan tjeheh laguna Tiberias, xi hacuaha hmí rè laguna Galilea. Hane cuitjin camá. ² Siu tangun me xi cuicun vi: Simón Pedru, cojo Tomás, me xi chja me tsèhè Cha Lihma, cojo Natanael, xuta Caná, ngu nandya tsèhè distritu Galilea, cojo quihndi rè Zebedeo, cojo jo sa xuta ladu rè Jesús jan.

³ Hane Simón Pedru ne, cuitjin cachja me cojo xicjin me:

—Ngahan ne, cjué cúaxè chu ti. —Cuatjin cachja me.

Hane me xi yahnga jan ne, cuitjin cachja me:

—Hacuaha cuanguin ngayin cojo nuju. —Cuatjin cachja me.

Sehe cavetju me quiji me cojo xicjin me, cafaha me barcu, quiji me xcun nandá. Peru nguixun hya ne, casacuiin camahani rè me chu ti. ⁴ Hane hora xi tisahasen jan ne, cavèè me Jesús secun me tjeheh laguna jan, peru hvíin me xi hacui Jesús. ⁵ Ngajan xi Jesús ne, cuitjin cajindaya me cavinenguise rè me me xi cuacun jan:

—¿Há sacuiin nuju chu ti, tsan? —Cuatjin cavinenguise Jesús.

Hane me xi cuacun jan ne, cuitjin cajindaya me cafayangui me:

—¡Sacuiin niji chu! —Cuatjin cafayangui me.

⁶ Ngajan xi Jesús ne, cuitjin cajindaya me cachja nga me cojo rè me:

—¡Ningatjunyun nahya vè táha ladu quixi tsèhè barcu ne, sehe sacú nuju chu! —Cuatjin cachja me.

Hane xi catsingatjenya xuta ladu rè me jan nahya táha ladu quixi ne, caain rè me cavaxè me nahya jan, ngatsè rè ti xi jemu cjín chu hinchu chu. ⁷ Ngajan xi cha ladu rè Jesús xi jemu vinga rè Jesús jan ne, cuitjin cachja cha cojo Pedru:

—¡Nai naja vè! —Cuatjin cachja cha.

Ngajan xi Simón Pedru ne, xi cahndè me cjua xi hacui Nai naja ne, cavajásanii me tsjian rè me, tsèhè xi quixti me xi sahmi me xa jan. Hane sehe catsingatjenya me yojo rè me ngajñi nandá xi cjuetjengui me Jesús tjeheh laguna jan. ⁸ Peru xuta ladu rè Jesús xi yahnga jan ne, quijitjengui me Jesús cojo barcu jan, táha javè me nahya, ña quítsè rè cojo chu ti. Hacuiin cjin hinchu me tsèhè tjeheh nandá ta sacuaha ngu cientu metru ni cjin. ⁹ Hane xi cafehe me tjeheh nandá jan ne, sehe cavetju me barcu, hane ngajan cavèè me ngu ndava ndihí tacun, quisun ngu ti xcun ndixuhi, hacuaha cavèè me niñu. ¹⁰ Ngajan xi Jesús ne, cuitjin cachja me cojo me xi cuacun vè:

—Tuhun ngujo chu ti xi sehe canaxun vè. —Cuatjin cachja Jesús.

¹¹ Sehe quiji Simón Pedru cajavè me nahya jan cavaxè me nangui quixí, quítsè rè cojo súv ti yehe, sacuaha ngu cientu cojo yachan tejan má chu. Hane handasa cuatjin cjín chu ti hinchu chu nahya jan ne, catiyaain.

¹² Ngajan xi Jesús ne, cuitjin cachja me cojo xuta ladu rè me jan:

—Nduvun xinu tajñu. —Cuatjin cachja me.

Peru hisca ngu xuta ladu rè me cavetjiin cacun me cavinenguise me cuitjin: “Yo ngayun”, tsèhè xi ha vèè me xi hacui Nai naja. ¹³ Ngajan xi Jesús ne, cafaha me niñu jan, casua me xuta ladu rè me. Hacuaha cuanitjin ni casua me chu ti jan.

¹⁴ Vihi majyan ndiya xi cavetjucaatsejen Jesús ngajñi rè xuta ladu rè me, quihndè xi cavuya nga me cjuahñu.

Visiajmi Jesucristu cojo Simón Pedru

¹⁵ Hane xi cajnetaha cajinë tajñu me ne, sehe cavinenguise Jesús Simón Pedru cuitjin:

—Ngayun Simón, quihndi rë Jonás, ¿há hitsë sa hmu tacún ná ngayun xi cuma rë me xi cuicun vi? —Cuatjin cavinenguise me.

Hane Pedru ne, cuitjin cafayangui me tsëhë Jesús:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

¹⁶ Cavinenguise nga Jesús Pedru majo ndiya cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguise Jesús.

Hane Pedru ne, cuitjin cafayangui me:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

¹⁷ Cavinenguise nga Jesús xi majyan ndiya Simón Pedru cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguise Jesús.

Ngajan xi Pedru ne, choho camá rë me xi cuatjin cavinenguise Jesús me xi majyan ndiya sa xi hmu cacun me Jesús, hane cuitjin cachja me:

—Tatá, ngayun ne, yëjë ni ne, hyun. Ngayun ne, hyun ta hmú cáacun nuju. —Cuatjin cachja Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. ¹⁸ Hacuaha cuichjá cojo nuju cjuaquixi ta hya xi chúva sa nixtin nuju ne, cachujun suvun tsjian nuju sehe catsangun hiscan xi meje cuangun. Peru hya xi cuma changá ngayun ne, nicujun tyja nuju, hane hacjahi xuta tsihñu me cahntsua nuju, sehe cjuecojo nuju me hiscan xi miji cuangun. —Cuatjin cachja Jesús cojo Pedru.

¹⁹ Xi cuatjin cachja Jesús ne, casua me camachaya rë Pedru mé chuva rë cueya Pedru, hacuaha casua me camachaya rë me xi sahmi jyë sahmi hnga me Nina xi cuatjin cueya me. Xi cavatju cachja Jesús cjua vëhë ne, sehe cachja me cuitjin cojo Pedru:

—Nduvun cuanguen cojo ná. —Cuatjin cachja Jesús.

Xuta ladu rë Jesús xi jemu vinga rë me jan

²⁰ Xi cavuya cavutsejen Pedru táha ngaxtun me ne, cavëë me xi tjengui cha xi jemu vinga rë Jesús jan nduva cha, cha xi quijivaha tiña xcun Jesús hya xi tijinë me comida jan hacuaha cavinenguise cha me cjua vihi: “Tatá, ¿yo xi sahmi nuju entregadu ni?” ²¹ Hane xi cavëë Pedru cha vëhë ne, cavinenguise me cuitjin cojo Jesús:

—Tatá, hane me vëhë ne, ¿mé cuatju me cuma ni? —Cuatjin cavinenguise Pedru.

²² Ngajan xi Jesús ne, cuitjin cachja me cojo Pedru:

—Sa xi ngahan meje ná xi cuejña me hisca hya xi cúa nga ne, ¿mé cuenda nuju ngayun ni? Ngayun ne, nduvun cuanguen cojo ná. —Cuatjin cachja Jesús.

²³ Hane cavitsojo ngajñi rë xuta ladu rë Jesús cjua xi cha xi jemu vinga rë Jesús jan ne, cueyaain cha. Peru Jesús ne, hacuain cachja me cojo Pedru xi

cueyaain cha vëhë ta xi cachja me ne, cjua vihi: “Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni?” Vëhë cjua xi cachja me.

²⁴ Cha xi cuajyihí jemu vinga rë Jesús jan ne, cha vëhë xi cachja cha cjua vëhë hacuaha cha vëhë catsihindu cha. Hacuaha ngayin xi tinihindin ngujo cjua vihi ne, hyin ta cjuaquixi cjua xi cachja cha.

²⁵ Hacuaha jemu cjín sa xcusun xi casahmi Jesús. Peru sa xi cumahindu yëjë ni xcusun vëhë chuva ngu chuva ngu ne, xi má ná ne, chutaain cahndë setjo yëjë ni libru xi cumahindu, handasa jingujyë ni ngasunhdë.

Hacutjin Casahmi Apóstol

1 Ngayun Teófilo, xcun xujun naha xi catsihindu nuju tjun tjun ne, cachjá cojo nuju yějē ni hacutjin cavetsihin casahmi xu Jesús cojo hacutjin cavetsihin cavicuya me. Cavétsehen hisca ntsacu cuetsihin ne, ² catsingujnetaha hisca hya xi quiji me ngahnga. Hya xi chaja sa cjue me ngahnga ne, cachja xu me cojo apóstol xi ha cavaxijin me xi camá ladu rē me jan, hacutjin sahmi. Hacuaha cojo ngahñu rē Hasen rē Nina xi cachja xu me. ³ Hya xi ha cavatju nixtin xi cahme me ne, cavuya cafehetjengui nga me apóstol jan, casua me camachaya xu rē ta quixi jain xi tacun quicun nga me. Hane ngajñi rē xi yachan nixtin ne, cavēē apóstol jan Jesús, hacuaha cachja sa Jesús cojo me ngujo cjua tsēhē hacutjin cuma hya xi cuinduva Nina sahmi me gobiernu.

⁴ Hane xi tacun Jesús cojo apóstol jan ngajan Jerusalén ne, cavitexa xu me me cuitjin:

—Hacuiin cuetjunxun tsēhē nandya vi ta nechunyun rē cjuandaja xi sua nuju Nahmi naha, sacuatjin xi ha cachjá cojo nuju. ⁵ Cuatjin nihñu ta, xuta ne, handasa cojo nandá cavitenda Juan me, peru ngayun ne, xtenda ngayun cojo Hasen rē Nina cahntsua xi ngujo sa nixtin. —Cuatjin cavitexa me.

Quiji Jesús ngahnga

⁶ Hya xi camá ne, ngu nixtin xi siu tangun xu apóstol cojo Jesús ne, cavinenguise me Jesús cuitjin:

—Tatá, ¿há cavechú nixtin xi tuhun cahndē xi xutaxa rē nangui naja ne, cuya cuitexa nga me nguehe nangui naja cojo jingu sa nangui, sacuatjin xi cavitexa me hatsēē ni? —Cuatjin cavinenguise me.

⁷ Ngajan xi cafayangui xu Jesús cuitjin:

—Satiin nuju ngayun xi cumachaya nuju jarē nixtin xi Nina cavejña cacun me cojo cjuatacun rē suvá me xi cuma yějē ni xcusun vēhē. ⁸ Peru hya xi cuinduva Hasen rē Nina cuisehen cahntsua xahasen nuju ne, hya sacú sa nuju ngahñu, sehe cuinújun cjua naha cojo xuta nguehe nandya Jerusalén, cojo yějē ni nandya distritu Judea cojo Samaria, hisca cojo yějē sa nangui xi siu ngasunhdē. —Cuatjin xu cafayangui me.

⁹ Xi café cachja xu Jesús cjua vēhē ne, tivutsejen ni apóstol ne, cavetsihin quiji me ngahnga. Sehe cavisehen me ngajñi rē yufi, ha quihndē camatsijin sa me. ¹⁰ Ha tu tivutsejen cuaha xu apóstol ngahnga hacutjin cjui Jesús ne, xi tu camachaya rē me ne, hinchacun jo xihin xi tyava tsjian rē hiscan siu me.

¹¹ Hane cuitjin cavinenguise xu xihin jan me:

—Ngayun, cha Galilea. ¿Mé má cuatjin chutsujun ngahnga? Jesús, me xi quiji ngahnga vē ne, cuatjin tutjin xi cahyun xi quiji me ne, tjin ngu nixtin ne, ha cuanitjin ni cuya nga me. —Cuatjin cachja xu xihin jan.

Catuxijin rē me xi cuisehen ngojo rē nima Judas

¹² Hya xi camá xu ne, apóstol jan ne, cavetjuxin me tsēhē ndetjún xi hmí ndetjún Ya Olivu, hane cavuya quiji nga me Jerusalén, xi tacun sacuaha ngu mil metru tsēhē ndetjún vēhē. ¹³ Hya xi cafehe me ngajan ne, quiji me ndihya hiscan xi viyuju me, hane quijiniji me pisu ngahnga. Me xi cuicun xu vi xi viyuju me ngajan: Pedru, Jacobo, Juan, Andrés, Felipe, Tomás, Bartolomé, Mateo, Jacobo xi quihndi rē Alfeo, Simón xi tsēhē partido zelota, cojo Judas xi xuta rē Jacobo. ¹⁴ Yějē ni me xi cuacun jan, cojo yějē ni me xi xicjin Jesús, cojo

María naa rë me, cojo yachjin xi yahnga ne, nchunchujun ni camatangun me xi sahmi me oración rë me.

¹⁵ Ngu ndiya hya xi camatangun xu sacuaha chuva rë ngu cientu cojo can xuta xi cuacun ladu rë Jesús ne, casecunvasen Pedru ne, sehe cachja me cojo xuta jan cjua vihi:

¹⁶ —Ngayujun ngarcun ni ngayun xuta ladu rë Jesús. Cavetjucaa jain cjua xi catsihindu xutachanga naja David xcun xujun rë Nina hatsëë. Hatuxa cuatjin camameje rë xi cuma ta, tsëhë xi chaja sa xi cuma matsejen ne, Hasen rë Nina ne, ha casua camachaya rë xutachanga naja jan hacutjin sahmi nima Judas, nima xi cavisecoo rë xuta xi cafaha rë Jesús, catsihñu rë me.

¹⁷ Nima Judas jan matsejen ne, hacuaha camá ladu rë Jesús sacuaha ngayaan matsejen ta, tsëhë xi cavaxijin Jesús nima xi cuisecoo rë me xcun xa rë Nina xi sahmi me. —Cuahaxutjin cachja Pedru.

¹⁸ Nima Judas jan ne, cavatsë xu ngu rquí nangui cojo tujún xi cafaha tsëhë xcusun tsehen xi casahmi xi casahmi rë entregadu Jesús. Hane ha xcun nangui xi cavatsë xu nima jan ne, caticja xcun, hane catsingá xu cahntsua nima, hisca cavetju yëjë ni ntsehen rë. ¹⁹ Sacuatjin camá xu xi cahme nima ne, yëjë cjua vëhë ne, cavechútáha rë yëjë xuta ngajan Jerusalén. Vëhë xi xuta ngajan ne, casuañihi xu rë me cahndë jan Acéldama, ñihi xi meje cuichja xi hne rë me ne, Cahndë Tsëhë Jni.

²⁰ Hacuaha quijinduju sa cachja Pedru cuitjin:

—Hacuaha xcun xujun tsëhë Salmo matsejen ne, cuitjin camahindu:

Catejña cuatjin ndava cha,
hacuaha hisca ngu cuiyijin jan.

Hacuaha camahindu sa cuitjin:

Xa rë cha ne, catjaha jingu sa xuta.

Cuatjin camahindu matsejen.

²¹ Vëhë xi meje rë xi cuinchise rë ngu cha xi cuma tangun cojo niji matsejen, ngu cha xi ha cuatjin cavisecoo niji yëjë ni nixtin xi canuyihinyin cojo Nai naja Jesús, ²² hisca nixtin xi cavitenda Juan me cojo hisca nixtin xi quiji me ngahnga. Cha vëhë matsejen ne, cuma tangun cha cojo niji, xi tsinguixi cha hacutjin camá xi cavuya Jesús cjuahñu. —Cuatjin cachja Pedru.

²³ Hya xi cajnetaha cachja Pedru cuatjin ne, catuxijin xu rë jo xihin: José cojo Matías. José jan ne, hacuaha hacui me xi hmí rë Barsabás cojo Justo.

²⁴ Sehe cafehya rë me Nina cuitjin:

—Ngayun Nai niji, ngayun xi hyun cjuatacun rë ngayëjë ni xuta ne, tsëhë jo cha xi cuicun vihi ne, naxujun jarë cha xi chuya nuju ngayun ²⁵ xi cuisehen cha xa sacuaha apóstol cahndë rë nima Judas ta, tsëhë xi nima vëhë ne, cavejña tiya cahndë rë xi quiji hiscan xi casatë rë. —Cuatjin cafehya rë me Nina.

²⁶ Xi cajnetaha cachja apóstol cuatjin ne, sehe cavaxë xu me ngu suerte, hane Matías casatë rë me. Ngajan xi Matías ne, camatangun me cojo tengu apóstol jan.

2

Hya xi canduva Hasen rë Nina

¹ Hya xi camá ne, xi cavechú nixtin tsëhë suhi xi hmí Pentecostés ne, ngu cahndë ni camatangun xu yëjë ni xuta ladu rë Jesús. ² Xi siu tangun me jan ne, ha tu ñahñu cahndë xu me xi jercu cafane ngajan ngahnga, sacuaha nuhya rë xi fane vanga tjo xi jemu hñu camahani. Sehe yëjë ni xuta jan ne, cahndë

xu me xi canduva cafane hisca cahntsua ndihya hiscan siu me. ³ Hacuaha cavêê xu me ndihi xi langa sacuaaha neje xuta, hane cavitsojo quiji casatê xu rê jima ngu jima ngu me. ⁴ Hya xi camá ne, catsê xu rê Hasen rê Nina xahasen rê jima ngu me jan, hacuaha cavetsihin cachja xu me jima ngu me cjuandaja rê Nina ne, cachja xu me jingu sa hne xi maji rê me, tucutjin xi Hasen jan casahmi xi camá cachja me.

⁵ Ngajan Jerusalén ne, siu xuta tjê rê Israel xi faharcun jain me Nina, canduva me tsêhê yêjê ni nangui xi tjin ngasunhdê. ⁶ Hane hya xi canuhya rê xi cuatjin jercu fane ne, jercu xutacjín camatangun xu me xi quiji cavutsejen me mé xi camá. Hane xutacjín jan ne, jemu quijircun xu rê me, tsêhê xi hora xi tichja xuta ladu rê Jesús ne, xuta jan ne, hne ni rê suva me cahndê me jima ngu me xi cuacun jan. ⁷ Ngajan xi cachja xu me cojo xicjin me cuitjin:

—¿Mé nga vihi ni? ¡Yêjê ni me xi tichja vi ne, xuta distritu Galilea me!
⁸ ¿Hacutjin má xi jima ngu ngayaan ne, tinuhyan hne naja suvaan ta, ⁹ tsêhê xi jemu cjín nangui canduvan? Ngujo ngayaan ne, xuta Partia ngayaan. Ngujo nga ngayaan ne, xuta Media ngayaan. Cojo sa xuta Elam, xuta Mesopotamia, xuta Judea, xuta Capadocia, xuta Ponto, xuta Asia, ¹⁰ xuta Frigia, xuta Panfilia, xuta Egipto, xuta ladu Libia, tiñataha nandya xi hmí Cirene, xuta Roma, ¹¹ xuta Creta, xuta Arabia. Ngayaan xuta ngu nangui xi macjain naja Nina rê xuta tjê rê Israel ne, jemu cjín ngayaan xi nechanyanjñe nguehe ngajñi rê xuta tjê rê Israel. Hacuaha ngayejen ngarca ni tinuhyan xi tichja me hne naja. Tichja me tsêhê cjuandaja xi jercu casahmi Nina. —Cuatjin xu cachja xuta xi cuacun jan.

¹² Hane tsêhê xi cuatjin camacjínacun me xi jemu quijircun camahani rê me ne, cavinenguise xicjin xu me cuitjin:

—¿Mé rê meje cuichja xcusun vi? —Cuatjin cavinenguise me.

¹³ Peru yahnga me ne, catsixcuehyu me xuta ladu rê Jesús, hane cachja xu me ta chihí xuta jan.

Cjua xi cachja Pedru

¹⁴ Hya xi camá ne, caxinchacun yêjê tengu apóstol jan ne, sehe cachja xu Pedru cojo xutacjín jan cuitjin:

—Ngayujun ngarcun ni ngayun xuta tjê rê Israel xi nechun nguehe Jerusalén matsejen ne, tinuhyun ngujo cjua xi cuichjá cojo nuju vi, cojo sa xi cumachaya nuju. ¹⁵ Ngayujun ni matsejen ne, nújun ta me xi cuicun vi ne, chihí me. Peru quixiín xi nújun ta ndicumaha ni ne, sehe fane ñaja tsêhê nguitajñu. ¹⁶ Peru xcusun xi sehe cavatju camá nguehe matsejen ne, cavetjucaa cjua xi cachja xutachanga naja profeta Joel hatsêê nixtin, hya xi catsihindu me cjua xi casua Nina. Cuitjin catsihindu me:

¹⁷ Cjua xi cuicun vi xi chja Nina cojo naja:

Hya xi cuma tiña nixtin xi cjuê ngasunhdê ne, hya tsingátju Hasen naha xi cuisehen xahasen rê xuta jingujyê ni ngasunhdê;

hane quihndi nuju, sa chjuun sa xihin ne, suacuenda me cjua naha, hacuaha cha nixti nuju cojo xuta changá nuju ne, cuichja chini cojo rê me tsêhê cjuatacun naha.

¹⁸ Hacuaha nixtin hya ne, tsingátju Hasen naha xi cuisehen xahasen rê me xi sahmi cjuatacun naha, sa chjuun, sa xihin,

hane me vêhê ne, suácuenda me cjua naha.

¹⁹ Hya sahme xcusun cjuarcun vihi ngajan ngahnga, cojo nguehe nangui xi chutsujun:

cuáxëcaa jni, cojo ndihi, cojo nihndi cjin.

²⁰ Tsuhi ne, cuma jma;

sá ne, cuma hani sacuaha jni.

Cuatjin cuma hya xi chaja sa xi cuechú nixtin xi ngahan xi Nina ngahan ne, tsichúva yějē ni xuta cojo cjuatacun rē me;

ngu nixtin jyē ngu nixtin ndajyihi nixtin vëhē.

²¹ Hane nixtin hya ne, yějē ni xuta xi cjuehya ná me cjuandaja naha ngahan xi Nina ngahan ne, cuetjutje me.

Cuatjin catsihindu profeta Joel cja xi cachja Nina.

²² Cjuinduju sa tichja Pedru cja vihi:

—Quihndē matsejen ne, tinuhyun cja xi cuichjá cojo nuju, ngayujun ngarcun ni xuta tjē rē Israel. Jesús, me Nasaret matsejen ne, camachaya naja xi Nina catsingatju rē me matsejen ta, tsēhē xi jemu cjin xcusun cjuarcun casahmi me ngajñi naja sacuatjin xi ha ndaja hyun. Camá casahmi me cjuarcun jan matsejen ta, ngatsē rē xi Nina casua rē me cahndē xi cuatjin casahmi me. ²³ Nina matsejen ne, ha vëē me yějē ni xcusun. Vëhē xi cojo tjun sa ne, ha catsingataha cacun me ta Jesús vë ne, cuma me entregadu cojo xuta tsehen. Cuatjin cavejña Nina cjuatacun rē me hisca chaja sa xi cuetjucaa xcusun vëhē. Sacuaha xi ngayun canicuhun Jesús ta, ngatsē nuju xi cavetaha xuta tsehen me xcun cru. ²⁴ Peru cavëhëndaya Nina me tsēhē cjuaveya, catsicuya me me cjuahñu ta, tsēhē xi hatuxa camaji xi cavëjña me ngahma gobiernu rē cjuaveya. ²⁵ Xutachanga naja David matsejen ne, catsihindu me tsēhē Jesús cuitjin:

Cahvë Nina xi cjui titjun me tsahan yějē ni nixtin;

ticojo ná me, cojo sa xi tsajin mé cuma ná.

²⁶ Vëhē xi xahasen naha ne, jemu sua rē, hacuaha ntsuva ne, suvá cjuandaja chjá.

Hacuaha vëhē xi ngahan ne, vetahá cácnun Nina.

²⁷ Cuatjin sahme ta, tsēhē xi ngayun Nina ne, hacuiin nismutacun hasen naha xi cuejña ngajan Hades hiscan siu nima,

hacuaha hatuxa tuun cahndē xi cjuehndu yojo naha, ngahan xi hatuxa tjënguë nuju cojo yějē xahasen naha.

²⁸ Ngayun ne, catuhun camachaya ná ndiya xi cuéchu hiscan sacú ná cjuahñu ndajyihi.

Hacuaha ninguitsun rē xahasen naha cjuasua xi cuécutaha nuju hiscan nechun.

Cuatjin catsihindu David.

²⁹ Hacuaha cachja sa Pedru cuitjin:

—Ngayujun ngarcun ni matsejen ne, nguehe cuichjáquixë cojo nuju matsejen ta, xutachanga naja David ne, cahme me, hacuaha caseyaniji me hatsëē nixtin. Hane tsjun rē me ne, tacun cuaha hisca quihndē hiscan xi cavëjña.

³⁰ Peru xi chaja sa xi cueya David jan matsejen ne, ngu profeta me, hacuaha ha vëē me xi ha cachja Nina cojo rē me cuitjin: Ngahan suva hvë xi ngu xuta tjē riji ne, cuitexa rē xuta, sacuatjin tivitexe ngaye. Cuatjin cachja Nina cojo David. ³¹ Vëhē xi camachaya rē David xcusun xi sahmi Nina ngascan. Ha vëē me xi cuya nga cjuahñu me xi tsingatju Nina, hane vëhē xi cachja me ta hacuaha hacuiin cuejña me vëhē ngajan Hades ngajñi rē nima, hacuaha hacuiin cjuehndu yojo rē me. ³² Hane ngayijin ni matsejen ne, cahyin suvin xi Jesús, me xi catsingatju Nina vë ne, catsicuya Nina me cjuahñu. ³³ Hane

quihndë matsejen ne, ha catsiquijin Nina me xi cavechú me ngahnga hiscan véña suvá Nina. Hacuaha cafahtsja me Hasen rë Nina sacuatjin xi cachja Nina Nahmi rë me xi sua rë me. Vêhë xi Jesús matsejen ne, tisahmi me xcusun xi tijima nguehe ngajñi niji. ³⁴ Xi tsejen ne, cachjaaïn David tsêhë suvá me ta, tsêhë xi hacuiïn quiji me ngahnga sacuatjin quiji Jesús matsejen ta, catsihindu sa me cuitjin:

Nina ne, cachja me cojo Nai naha cuitjin:

“Tinechin nguehe, ladu quixi naha,

³⁵ hisca hya xi yêjê ni xi sahmi ri condra ne, cuiyujú ngahan ngahma gobiernu riji.”

Cuatjin catsihindu David hatsëë nixtin.

³⁶ Vêhë xi ngayujun ni xuta nangui Israel matsejen ne, ndaja catijne rcun cjua xi chjá cojo nuju vi: Jesús vë, me xi ngayun catuhun xi cahme xcun cru matsejen ne, Nina casahmi me xi me vêhë ne, camá me Nai naja hacuaha catsingatju Nina me xi cuaxëtje naja me. —Cuahaxutjin cachja Pedru cojo xutacjin jan.

³⁷ Xi cahndë xutacjin jan cjua vêhë ne, jemu choho camá rë me. Ngajan xi cavinenguise me Pedru cojo apóstol xi yahnga jan cuitjin:

—Xi má nuju ngayun ne, ¿mé xi ndatjin nihñi? —Cuatjin cavinenguise xuta jan.

³⁸ Ngajan xi cachja xu Pedru cojo rë me cuitjin:

—Nindeyun cjuatacun nuju. Hacuaha jima ngu ngayun ne, catixtenda ngayun, ngatsë rë xi camangu tacún cojo Jesucristu, sehe ngajan xi tsinchataha nuju Nina tsêhë jyë nuju. Xi cuatjin ne, hacuaha sahmi me cjuandaja xi sua nuju me Hasen rë me. ³⁹ Cjuandaja vêhë ne, ha cachja Nina xi sua nuju me ngayun cojo quihndi nuju, hisca cojo yêjê xuta tjê nuju. Nina naja ne, sua me cjuandaja vêhë xi cuma rë yêjê ni xuta xi cuaxijin me. —Cuahaxutjin cachja Pedru.

⁴⁰ Hacuaha jemu cjin sa cjua cachja me cuitjin, hacutjin meje rë xi sahmi xuta jan:

—Naxunxun yojo nuju tsêhë xuta tsehen xi siu quihndë. —Cuatjin cachja xu me.

⁴¹ Ngajan xi xuta xi cachuya rë me cjua xi cachja Pedru ne, caxtenda me. Hane cuatjin xi nixtin vêhë xu ne, sacuaaha jyan mil xuta xi cavisehen me ladu rë Jesús. ⁴² Casua me yojo rë me cojo cjua xi tivicyua apóstol jan, hacuaha nguñaja cacun xu me xi ma tangun me cojo yêjê sa xuta ladu rë Jesús. Nchunchujun ni ne, camatangun me cojo xicjin me xi sahmi me oración, cojo xi sinë tangun me niñu.

Cjuandaja xi caviyuju xuta ladu rë Jesucristu cojo xicjin me

⁴³ Jemu cjin xcusun xu cjuarcun casahmi apóstol ngatsë rë ngahñu xi casua Nina me, hane vêhë xi yêjê ni xuta xi hacuiïn ladu rë Jesús ne, jemu tsacjun me. ⁴⁴ Peru yêjê ni xuta ladu rë Jesús ne, camatangun xu cjuatacun rë me, hacuaha yêjê ni xcusun xi tsêhë jima ngu xu me ne, hacuaha camá tsêhë yêjê ni me xi yahnga jan. ⁴⁵ Caviteña xu me xcusun xi tjin rë me ne, sehe cavatêcja xu me tujún ngajñi rë yêjê ni me xi casahmi chaja rë. ⁴⁶ Nchunchujun xu ni ne, camatangun me nguñaja cacun me ngajan yungun xi matitjun xi cjuaharcun me Nina. Hacuaha xi cajinë xu me niñu ndava me cojo xicjin me ne, jemu cojo cjuasua, cojo cjuandaja cojo cjuajeya. ⁴⁷ Hacuaha jemu cavaxëndaja me Nina. Hane yêjê xuta xi yahnga jan ne, xi cavëë xu me xcusun rë xuta ladu rë Jesús jan ne, cachja xu me ta xuta ndaja me xi cuacun vë.

Hacuaha nchunchujun ni ne, tivaxëtje Nai naja ngujo ngujo sa xuta. Vêhë xi nchunchujun ni ne, jima cjin sa xuta yungun jan.

3

Casahmi Pedru cojo Juan xi camandaja ngu cha xi maji fi

¹ Ngu nixtin jan ne, Pedru cojo Juan ne, quijinihi tangun xu me yungun xi matitjun chuva rë fane jyan, hora xi fi chjayuma xuta. ² Hane ngu cha xi maji fi, tsëhë xi tsehen ntsacu cha hisca hya xi catsin cha ne, hacuaha hora vëhë cjuicojo xuta rë cha cha yungun. Nchunchujun ni quiji chani rë cha ngajan tingotjo hnhua xondyojo rë yungun xi hmí Tingotjo Ndajiyihi, xi sahmi cha caridad tsëhë xuta xi visehen ndatsen yungun jan. ³ Hane xi cavëë cha hmu rë jan xi camatiña Pedru cojo Juan hiscan tacun cha xi cuisehen me ndatsen yungun jan ne, cafehya xu cha me cjuandaja rë me. ⁴ Ngajan xi cavutsejndaja me cha. Hane Pedru ne, cuitjin cachja me cojo cha:

—Chutsijin nihi hitsë —Chja xu me.

⁵ Hane cavutsejen cha me ta, xi má rë cha ne, tjin mé xi sua me cha.

⁶ Ngajan xi cavuya cachja nga Pedru cojo rë cha cuitjin:

—Tsajin camahani ná tujún. Peru xi tjin ná, tsan ne, suá ri. Jesucristu, me Nasaret ne, casua ná me ngahñu, hane vëhë xi chjá cojo ri ta, tisechin, hane tuyiyiye. —Cuatjin cachja xu me cojo cha.

⁷ Sehe cafaha me tsja quixi cha hmu rë jan hane catsisatjenhnga xu me cha. Hane ngutjen ni casacuhñu rë ntsacu cha cojo ndyojo naxa rë cha. ⁸ Xi tu cafaha Pedru tsja cha ne, cacaahnga cha, hacuaha casecun cha. Sehe cavetsihin catsuyiyiha cha. Hacuaha cavisehen cha yungun xi matitjun cojo me xi cuacun jan, cjuí cha, hisca chijihnga cha, taha tivaxëndaja cha Nina. ⁹ Yëjë ni xuta xi siu ndatsen yungun jan ne, cavëë me xi cjuí cha, hacuaha cahndë me xi tivaxëndaja cha Nina. ¹⁰ Hane jemu quijircun rë xuta jan tsëhë xcusun xi cavatju cha camá ta, tsëhë xi ha vëë me xi ha hacui cha vëhë xi véña cha sahmi cha caridad ngajan tingotjo yungun xi hmí Tingotjo Ndajiyihi.

Cjua xi cachja Pedru cojo xuta ngajan yungun xi matitjun

¹¹ Cha xi camandaja xu jan ne, mijí cjuexin cha tsëhë Pedru cojo Juan. Hane tsëhë xi jemu quijircun rë xuta ne, cavanga me quiji me hiscan siu me xi cuacun jan, camatangun me ngajan ngu ngahma ndihya tsëhë yungun, cahndë xi hmí Tsëhë Salomón. ¹² Xi cavëë xu Pedru xi cuatjin camatangun xuta ne, cuitjin cachja me:

—Ngayujun ngarcun ni xuta tjë rë Israel matsejen ne, ¿mé má cuatjin fircun nuju tsëhë cha xi cuiyiyi vi? ¿Mé má cuatjin jercu chutsujun nihi sacuaha xi ngatsë rë cjuatacun nihi suvin o ngatsë rë xi jemu ndaja chjihincuin Nina ne, vëhë xi camá canihñi xi camandaja cha? ¡Jéya! Hacuini cuatjin.

¹³ Nina rë Abraham cojo Isaac cojo Jacob, Nina rë xutachanga naja matsejen ne, casahmi jyë casahmi hnga me Jesús, me xi casahmi xa rë Nina. Hane ngatsë rë me cama cjuarcun vi. Peru ngayun matsejen ne, catuhun Jesús cojo xutaxa rë. Hane ngajan xcun gobernador Pilatu matsejen ne, hora xi meje tsismi me Jesús ne, catuun cahndë. ¹⁴ Jesús jan ne, hatuxa tjengui me Nina cojo yëjë xahasen rë me, hatuxa cjuaquixi xi sahmi me. Peru ngayun matsejen ne, canitjungun me. Hane cahndë rë xi chjahyun rë Pilatu xi tsismi me Jesús matsejen ne, cachjahyun rë me xi tsismi me ngu cha tsiquehen.

¹⁵ Hane Jesús, me xi sua cjuahñu naja ne, ngayun catuhun me xi cahme me. Peru Nina matsejen ne, catsicuya me Jesús jan cjuahñu. Hane ngayin

ne, hisca cahyin me quihndé xi tacun nga me cjuahñu. ¹⁶ Cha xi cuijyihí tichutsujun vi ne, ha hyun yo cha. Casacu rē ntsacu cha ngahñu ta, tséhé xi ngayin matsejen ne, mangutacuín cojo Jesús. Hacuaha ngatsé rē xi cuatjin mangutacuín cojo Jesús ne, vèhé casahmi xi camandaja cha sacuahatjin xi cahyun ngayujun ni.

¹⁷ 'Quihndé ne, ha hvé ta ngayujun ni cojo yèjé xutaxa rē yungun naja matsejen ne, hya xi catuhun Jesús xi cahme me ne, hyúun yo xi canihñu cojo.

¹⁸ Peru Nina matsejen ne, cuatjin casahmi me xi cavetjucaa cjuá xi cachja yèjé ni profeta cojo xutachanga naja hatséé nixtin hya xi cachja profeta jan, tséhé cjuañihí xi cuatju ngu me xi tsingatju naja Nina nchujun ni nguini.

¹⁹ Vèhé xi meje rē xi nindeyun cjuatacun nuju, tisuhun ndiya rē Nina, cojo sa xi Nina matsejen ne, cjuahaxin me yèjé ni jyé nuju. ²⁰ Xi cuatjin nihñu ne, Nina ne, sua me cahndé xi cjuahajenda hitsé xahasen naja. Hacuaha xi cuatjin ne, tsingatju nga naja me Jesús ta, tséhé xi ha me vèhé xi cachja Nina hisca hatséé xi cjuaha me xa xi cuaxétje naja me. ²¹ Peru Jesús jan ne, meje rē xi cuejña sa me ngajan ngahnga hisca xi Nina ne, cuya sahmi ndaja nga me yèjé ni xcusun, sacuatjin xi ha cachja profeta rē me, hya xi cachja me cojo xutachanga naja cjuá rē Nina hatséé nixtin. ²² Xutachanga naja Moisés matsejen ne, cuitjin cachja me ngu cjuá xi catsingatju Nina tséhé me hatséé: "Nina ne, sahmi me xi cuetjujñi ngajñi nuju ngu xi cuma profeta sacuahanga ngahan. Tetuhunrcun yèjé cjuá xi cuichja me cojo nuju ta, ²³ sa xi yo xi cuetaharcuaain cjuá rē profeta jan ne, hatuxa cueya, ha quihndé cuejñaai ngajñi naja ngayaan xuta rē Nina." Cuahaxutjin cachja Pedru cjuá rē Moisés.

²⁴ Sehe cachja sa Pedru cojo xuta cuitjin:

—Hacuahanitjin yèjé profeta, xi cavetsihin cojo xutachanga naja Samuel cojo xi canduvaniji sa ne, jemu cachja me tséhé xcusun xi camá nixtin xi nechan vi. ²⁵ Cjuandaja xi cachja Nina xi sua me xutachanga naja nchujun ni nguini ne, vèhé cjuandaja xi tisua naja me quihndé. Hacuaha compromisu xi casahmi me cojo xutachanga naja matsejen ne, tisahmichihin me cojo naja quihndé. Nina ne, casahmi me compromisu jan nixtin xi cachja me cojo xutachanga naja Abraham cuitjin: "Ngatsé rē ngu xuta tjé riji ne, ngahan ne, tsinchacun yèjé ni xuta ngasunhndé." Cuatjin cachja Nina cojo Abraham. ²⁶ Sehe ngajan xi Nina matsejen ne, hya xi cavaxijin me Jesús xi cjuaha xa rē me ne, tjun tjun ngayaan xuta tjé rē Israel catsingatju naja Nina me. Cuatjin xi tsinchacun naja me xi cuetjunxeen jima ngu ngayaan tséhé ndiya tsehen xi tivanguen. —Cuahaxutjin cachja Pedru cojo xuta.

4

Casua Pedru cojo Juan cjuaquixi rē me

¹ Hya xi camá ne, Pedru cojo Juan ne, tichja cuaha sa me cojo xutacín jan, hora xi cafehe xu ngujo nahmi. Hacuaha cha mayu rē yungun xi matitjun cojo ngujo sa cha saduceo ne, cafehe xu cha cojo nahmi xi cuacun jan. ² Hane jemu xti má rē yèjé me ta, tséhé xi tivicuya apóstol jan xuta, tichja me xi ngatsé rē xi catsicuya Nina Jesús cjuahñu ne, vèhé xi machaya naja xi cuechú nixtin ne, tsicuya nga Nina yèjé ni nima cjuahñu. ³ Hya xi camá ne, cachjaha rē Pedru cojo Juan. Peru tséhé xi ha quiji xu hora ne, tu caxincha ni me ndavaya. ⁴ Peru jemu cjin xuta xi cahndé cjuá rē apóstol jan ne, camacjain xu rē me. Vèhé xi yèjé xuta xihin xi macjain rē ne, sacuahanga hñú mil xu camá me, cojo me xi hatséé camacjain rē cojo me xi sehe camacjain rē.

⁵ Xi camá nchujun jan ne, ngujo xutaxa rë yungun cojo ngujo xuta changá cojo ngujo cha xi vicuya cjuachacun ne, camatangun xu me ngajan Jerusalén. ⁶ Camatangun me cojo Anás, me xi matitjun tséhë yëjë ni nahmi, cojo Caifás, cojo Juan, cojo Alejandro, cojo yëjë sa me xi xuta rë me xi matitjun tséhë nahmi jan. ⁷ Hya xi camá xu ne, catsingatju me quiji chjahá rë Pedru cojo Juan, caviyuju me me cavasencja jan ne, sehe cavinenguise me me cuitjin:

—¿Hacutjin canihñu xi camá camandaja cha hmu rë jan? ¿Yo casua nuju chuva rë xi cuatjin canihñu? —Cuatjin cavinenguise me.

⁸ Ngajan xi Pedru ne, cojo ngahñu rë Hasen rë Nina xi quitsë rë xahasen rë me ne, cuitjin cafayangui xu me:

—Ngayun xi má ngayun xutaxa rë tsajan, ngayun xi má ngayun xuta changá naja matsejen ne, ⁹ quihndë xi meje cumachaya nuju hacutjin canihñi ngu cjuandaja xi camandaja ngu cha hmu rë. ¹⁰ Nguehe cuinújin cojo nuju cojo sa xi cumachaya rë yëjë ni xuta tjë rë Israel ta cha hmu rë vi ne, nguehe secun cha xcun ngayujun ni matsejen ta, tséhë xi camandaja cha ngatsë rë ngahñu rë Jesucristu, me xi tséhë nandya Nasaret. Ngayun ne, catuhun me xi cahmé me xcun cru, peru Nina matsejen ne, catsicuya rë me cjuahñu. ¹¹ Me vëhé xi canitjungun ta, tséhë xi xi má nuju matsejen ne, machjiriin camahani Jesucristu. Canitjungun me sacua ha tsitjungui chjinevexo ngu ndyojo xi chuyiin rë me tséhë. Peru quihndë matsejen ne, camatitjun me tsajan ngayejen ni, sacua ha ndyojo ngahñu rë ndihya. ¹² Tsajin sa yo xi cuaxëtje naja. Tsajin sa ngu xuta nguehe ngasunhndë xi catsingatju Nina xi cuma cuaxëtje naja. —Cuahaxutjin cachja Pedru.

¹³ Hya xi camá xu ne, cavëë xuta xi cuacun jan xi Pedru cojo Juan ne, tsacjuiin camahani me xi sua me cjuaquixi rë me, hacua ha cavacun rë xuta jan xi Pedru cojo Juan ne, xuta yuma me, xi hisca cavutayaa in me cjuachacun. Ngajan xi xuta jan ne, jemu quijircun rë me. Hacua ha vëë me xi Pedru cojo Juan ne, hacui me xi catsujyihya cojo Jesús. ¹⁴ Hane tséhë xi cha xi camandaja jan ne, ngajan secun tangun xu cha cojo Pedru cojo Juan ne, vëhé xi sacuiinyiin rë xuta xi cuacun jan hacutjin cuma xi cuichja me condra tséhë Pedru cojo Juan. ¹⁵ Hya xi camá ne, cavaxë me Pedru cojo Juan cojo cha xi camandaja jan candatsen. Sehe cavisiajmicjín sa me cojo xicjin me. ¹⁶ Cuitjin cachja me:

—¿Mé xi ndatjin nihña cojo cha xi cuacun vë? Yëjë ni xuta nandya ne, ha camachaya rë me tséhë cjuarcun jyë xi casahmi cha. Hane cumaji cuinújan xi quixiin. ¹⁷ Peru cojo sa xi hacuiin cuitsojo sa cjuacjintacun vihi ngajñi rë xuta nandya ne, cuinchanrcun rë cha. Cuinújan cojo rë cha ta ha quihndë cuichja in sa cha tséhë nima vëhé cojo xuta. —Cuahaxutjin cavisiajmicjín xuta xi cuacun jan cojo xicjin me.

¹⁸ Hya xi camá ne, cajindaya nga xuta xi cuacun jan Pedru cojo Juan, sehe cachja xu me cojo me xi ha quihndë cuyaa in cuichja me tséhë Jesús cojo xuta. ¹⁹ Peru Pedru cojo Juan ne, cuitjin cafayangui me:

—Xi má nuju svun ne, ¿jarë xi hitsë sa chuya rë Nina? ¿Há xi cuinuhyin tsujun ne?, o há tsajin ne, ¿há xi cuinuhyin tséhë me? ²⁰ Peru ngayin matsejen ne, hatuxa cumajin nisejyin xi cuinújin cjuandaja xi canuhyin cojo xcusun xi cahyin. —Cuatjin xu cafayangui me.

²¹ Hya xi camá ne, xuta xi cuacun jan ne, cavincharcun sa xu me Pedru cojo Juan, sehe cavëhëndaya xu me. Casacuinyiin rë me hacutjin sahmi me castigu me ta, tséhë xi yëjë ni xuta tichja me xi jemu jyë hnga Nina cojo Hasen

rë me, ngatsë rë cjuarcun xi cuatjin camá jan. ²² Cha xi camandaja ngatsë rë cjuarcun jan ne, ha vatju yachan nu xu tjin rë cha.

Cafehya sa xuta ladu rë Jesús ngahñu cojo Nina

²³ Hya xi camá ne, xi tu camandaya Pedru cojo Juan ne, quijitjengui sa xu me xuta xi yahnga xi hacuaha ladu rë Jesús, sehe casuacuenda me yějë cjuja xi cachja xuta xi cuacun jan cojo rë me. ²⁴ Hya xi cahndë me xi yahnga jan cjuja xi cachja Pedru cojo Juan ne, ngu tangun ni cachja me xi cafehya rë me Nina cuitjin:

—Ngayun Nai niji. Ngayun xi canihñu ngahnga, canihñu nangui, canihñu ndachacun, hacuaha canihñu yějë ni xcusun xi siu jan ne, ²⁵ cojo Hasen nuju ne, cachuxuhun cjuatacun rë xutachanga niji David, me xi casahmi xa nuju. Hane me vëhë ne, cuitjin cachja me cjuja xi catuhun rë me:

¿Má rcu hngacacun xuta?

¿Mé má cuatjin tsingatahacacun me ngu cjuatacun tsehen xi tsajin mé machjirëhë?

²⁶ Me xi matitjun tsëhë jingu sa nangui, cojo xutaxa rë jingu sa nandya ne, matangun me xi sahmi me condra Nina hacuaha sahmi me condra me xi tsingatju Nina xi cuaxëtje naja.

Cuatjin cachja xutachanga niji David.

²⁷ Hacuaha cavetjucaa jain cjuja vëhë ta, tsëhë xi ha nguehe nandya vihi ne, cuatjin camatangun Herodes cojo Poncio Pilatu cojo xutaxín cojo xuta tjë rë Israel. Camatangun me xi cuacun vëhë xi sahmi condra me Jesús, me xi hatuxa sahmi xa nuju cojo yějë xahasen rë, me xi ngayun caningatjun ngasunhndë. ²⁸ Cuatjin casahmi me yějë hacutjin xi ha cavejñu cjuatacun ngu hatsëe xi cuma ta, tsëhë xi cuatjin meje nuju ngayun. ²⁹ Quihndë ne, ngayun xi Nai niji ngayun ne, chjuhuncuendun cjuja xi cachja xuta xi cuacun vë hacutjin xi choho sahmi me cojo niji. Hane ngayin xi má ngayin mosu hndixahan nuju ne, tuhun niji hitsë ngahñu xi rcuiin camahani xi cuintújin cjuja nuju cojo xuta. ³⁰ Hacuaha cojo ngahñu nuju ne, nihñu xi cuma ndaja xuta hmu rë, hacuaha nihñu hitsë cjuarcun xi cueyinnanguin ñihi rë Jesús, me xi hatuxa sahmi xa nuju cojo yějë xahasen rë. —Cuatjin xu cafehya rë me Nina.

³¹ Hane xi cajnetaha casahmi xuta ladu rë Jesús jan oración ne, cafani nangui ngajan hiscan tjin tangun xu me. Hane cojo Hasen rë Nina ne, catsë rë xahasen rë yějë ni me, sehe cavetsihin cachja me nguñaja cacun me cjuja rë Nina cojo xuta.

Casahmi tangun me yějë xcusun xi tjin rë me

³² Quihndë ne, ngayëjë ni me xi cuatjin camangu cacun me cojo Jesús ne, ngu cjuatacun ni rë me, ngu xahasen xu ni rë me. Hacuaha hisca ngu me cachjaain me xi yějë ni xi tjin rë me ne, tsëhë súvá me ta xi tsëhë me ne, hacuaha tsëhë xu yějë xicjin me. ³³ Hane cojo ngahñu jyë xi casua Nina apóstol xi cuacun jan ne, cuatjin quijinduju me casua me camachaya rë xuta hacutjin catsicuya Nina Nai naja Jesús cjuahñu. Hane jercu casua Nina cjuandaja rë me cojo yějë xuta ladu rë me. ³⁴ Hacuaha ngajñi rë me xi cuacun jan ne, tsajin xu hisca ngu me xi tjin rë cjuachaja ta, tsëhë xi yějë me xi nai rë ngu rquí nangui o sa xi ngu ndihya ne, viteña me, sehe fi cani me chji rë jan ³⁵ tsja apóstol. Sehe ngajan xi apóstol xi cuacun jan ne, vatëcja xu me ngajñi rë yějë xuta, ha tucutjin cjuachaja xi tjin rë xuta jan. ³⁶ Hacuaha cuatjin casahmi ngu cha xi hmí rë José, ngu cha xi casuañihi apóstol ngu ñihi xi ma jo

xi hmí Bernabé, ñihi xi meje cuichja cuitjin: Ngu Cha Xi Sua Cjuetacun. Cha vèhè ne, tjè rè Leví má cha, peru catsin xu cha ngajan ngu nangui hiscan xi hmí rè Chipre. ³⁷ Hane cha vèhè ne, caviteña cha ngu rquí nangui xi tjin rè cha, sehe quiji caní cha chji rè, cafahatsja apóstol.

5

Cha Ananías cojo na Safira

¹ Peru ngu nga cha xi hmí rè Ananías cojo na Safira chjuun rè cha ne, hacuaha caviteña xu cha ngu rquí nangui. ² Peru cafahaxin suvá cha hitsè tujún jan, sehe quiji caní cha hitsè tujún xi cavangui jan tsja apóstol, sacuaha xi ha vèhè yèjè ni chji rè nangui jan. Hane na chjuun rè cha jan ne, hacuaha vèhè xu na xi cuatjin casahmi cha. ³ Ngajan xi cachjataha xu Pedru cha cuitjin: —¿Mé má cuatjin caningatihin xi catsè Satanás xahasen riji, ngaye Ananías? ¡Xitsehen vèhè casahmi xi cachjehexin sove hitsè tujún tsèhè chji rè nangui xi caviteñi! ¡Xitsehen vèhè casahmi xi meje cuindache rè Hasen rè Nina! ⁴ Xi chaja sa cuiteñi nangui jan ne, ha hye ta tsiji. Hacuaha ngu ndiya xi ha caviteñi ne, hacuaha hye ta tujún rè ne, tsiji. ¿Mé má cuatjin caningatehetacuín xi nihñi ngu cjuatacun tsehen vi ní? Hacuín ngayin ni xuta xi meje cuindache niji ta hisca cojo Nina meje cuindache rè me. —Cuatjin cachja Pedru.

⁵ Xi tu cahndè cha Ananías cjuá jan ne, caticja cha, hane cahme xu cha. Hane yèjè xuta xi camachaya rè cjuacjintacun jan ne, jemu catsacjun camaha xu ni me camá. ⁶ Ngajan xi ngujo cha ne, cavaxtè cha nima ngu tsjian ne, sehe cafaha cha quiji caveyaniji cha.

⁷ Hya xi camá ne, xi cavatju sacuaha chuva rè jyan hora xi cahme nima jan ne, cafehe xu chjuun rè nima ngajan hiscan siu apóstol jan. Peru cjèè cumachaya rè na hacutjin xi cavatju nima xihin rè na camá. ⁸ Ngajan xi cavinenguisse xu Pedru na cuitjin:

—Tinoje cojo ná. ¿Há caviteñu nangui sacuatjin chji vihi?

—Juun. Chji vèhè caviteñi. —Cuahaxutjin cachja ná.

⁹ Sehe ngajan xi cavinenguisse nga xu Pedru na cuitjin:

—¿Mé má cuatjin sacuaha catsingataha cacun nima xihin riji ne, cuatjin caningatehetacuín xi meje cuindachun Hasen rè Nina? Chutsijin ta cuacun cha xi quiji caveyaniji rè nima xihin riji nduva cha jan. Quihndè ne, hacuaha cojo ngaye cuatjin cuatji cuma. —Cuatjin cachja Pedru.

¹⁰ Ha hora vèhè ni ne, caticja xu na hiscan secun Pedru, hane cahme na. Xi tu cavisehen nga cha xi cuacun jan ne, ha cahme xu na xi tu cavèè cha. Sehe ngajan xi cafaha cha nima jan, quiji caveyaniji cha tjeheh rè hiscan caseyaniji nima xihin rè. ¹¹ Hya xi camá ne, yèjè xuta rè yungun cojo yèjè sa xuta xi camachaya xu rè cjuacjintacun jan ne, jemu catsacjun camahani me camá.

Casahmi apóstol cjuarcun

¹² Hacuaha apóstol xi cuacun jan ne, jemu cjín cjuarcun xi casahmi xu me ngajñi rè xuta nandya. Hane ngajan ndatsen yungun xi matitjun, hiscan ngahma Ndihya Tsèhè Salomón ne, ngajan xu ma tangun yèjè xuta ladu rè Jesús. ¹³ Peru xuta xi hacuín ladu rè Jesús me ne, hisca vetjiin cacun me xi cuma tiña me ngajan, handasa yèjè xuta jemu ndaja chja me tsèhè xuta ladu rè Jesús jan. ¹⁴ Peru hacuaha jemu cjín sa xuta sa chjuun sa xihin me ne, jimangu cacun xu me cojo Jesús, hacuaha jima tangun me cojo xuta ladu rè Jesús. ¹⁵ Hacuaha jemu cjín xuta ne, vaxè me xuta hmu rè, viyuju me me xcun

nijnã ngajan ndiyatë, cojo sa xi hora xi cuatju xu Pedru ne, ndastu tjahnguen rë me satë rë xuta hmu rë xi cuacun jan, hane cumandaja me. ¹⁶ Hacuaha jemu cjin camaha xu ni xuta nandya tahndee rë Jerusalén ne, ficojo me xuta hmu rë hacuaha cojo me xi hinchaxitsehen xahasen rë, ngajan Jerusalén. Hane camandaja ngayëjë xu ni me.

Cavatju apóstol cjuañihi

¹⁷ Hya xi camá ne, nahmi xi matitjun tsëhë yëjë ni nahmi, cojo yëjë sa xuta saduceo xi tjin tangun cojo rë me ne, jercu camaxín camaha xu ni rë me. ¹⁸ Vëhë xi cachjaha rë apóstol, caxincha me ndavaya. ¹⁹ Peru hya xi camanguixun ne, ngu ángel tsëhë Nina quiji cavuxaha xu tingotjo ndavaya, sehe cavaxë rë apóstol xi cuacun jan. Hya xi cavetju me ne, cachja ángel jan cojo rë me cuitjin:

²⁰ —Tángun yungun xi matitjun ne, tuhuncuendun rë xuta yëjë ni cjuat sëhë ndiya xatsë xi tisua nuju Nina. —Cuatjin cachja ángel jan.

²¹ Ngajan xi apóstol jan ne, casahmi me sacuatjin cachja ángel. Vëhë xi, xi casahasen xi camá nchujun ne, quiji xu me yungun xi matitjun. Hane xi cafehe me ndatsen yungun jan ne, cavetsihin casuacuenda me xuta cjuat sëhë ndiya xatsë jan.

Hacuaha sacuaha hora vëhë ne, nahmi xi matitjun cojo xuta xi tjin tangun cojo rë me ne, casahmi tangun xu me yëjë xuta changá tsëhë xuta tjë rë Israel xi cuma ngu junta jyë. Sehe catsingatju me ngujo cha nisë xi cjue coaxë xu cha apóstol tsëhë ndavaya, cjuecojo cha me hiscan tijima junta. ²² Peru xi cafehe cha ngajan ndavaya jan ne, casacuiin xu rë cha me. Ngajan xi cavuya quiji casuacuenda cha xuta changá jan cuitjin:

²³ —Xi caphin tingotjo ndavaya jan ne, nda ndaja tichjáhñu, hacuaha cha xi sahmi cuidadu jan ne, hinchacun cha tingotjo jan. Peru xi catuxaha tingotjo ne, tsajin yo casacu niji xi hinchaxahntsua. —Cuatjin casuacuenda cha.

²⁴ Ngajan xi cha mayu yungun cojo yëjë nahmi xi matitjun ne, hya xi cahndë xu me cjuat vëhë ne, jemu cavinenguise xicjin me tsëhë xcusun xi camá jan. ²⁵ Hane ha hora vëhë ni ne, cafehe xu ngu cha xi cachja cojo rë me cuitjin:

—Nijyun tacún. Ngu xa xi nduva ngahan ne, cha xi cuacun cavinchun ndavaya jan ne, hinchatahá cha ndatsen yungun, tichja cha cojo xuta. —Cuatjin cachja cha xi cafehe jan.

²⁶ Sehe ngajan xi cha mayu yungun jan ne, quiji cha cojo cha nisë, quiijaha xu cha apóstol xi cuacun jan. Hane xi cafaha cha me ne, quiijocojo cha me hiscan tijima junta, peru hacuiin cojo cjuachan ta, tsëhë xi jemu tsacjun xu cha xuta nandya, sá tu cuetaha me cha ndyojo. ²⁷ Hya xi cafehecojo cha me jan ne, sehe caviyuju cha me xcun nahmi cojo xuta changá xi cuacun jan. Ngajan xi nahmi xi matitjun ne, cachja xu me cojo rë me cuitjin:

²⁸ —Ha canújin cojo nuju ta ha quihndë cuyuun cuinújun tsëhë nima vëhë cojo xuta. Peru quihndë ne, caninguitsujun sa cjuachacun nuju jingujyë nandya Jerusalén, hacuaha meje ningatjunsun jyë tsëhë cjuaveya rë nima vëhë ngaxtin ngayin.

²⁹ Ngajan xi Pedru cojo apóstol xi yahnga xu jan ne, cuitjin cafayangui me: —Meje rë xi cuinuhyan tsëhë Nina cahndë rë xi cuinuhyan tsëhë xuta.

³⁰ Ngayun matsejen ne, catuhun Jesús xi catyangui me xcun ngu cru, hane ngajan cahme me. Peru Nina ré xutachanga naja matsejen ne, catsicuya me Jesús cjuahñu. ³¹ Hane Jesús vë matsejen ne, casahmi jyë casahmi hnga

Nina me, hacuaha cavejña me Jesús ladu quixi tsèhë me, xi cumatitjun Jesús tsajan hacuaha cuaxëtje naja me. Cuatjin casahmi Nina, cojo sa xi ngayaan xuta tjë rë Israel matsejen ne, nindeyan cjuatacun naja hacuaha tsinchataha naja me tsèhë jyë naja. ³² Ngayin matsejen ne, cahyin xcusun vèhë, vèhë xi titihín jimachaya rë xuta. Hacuaha Hasen rë Nina matsejen ne, cuatjin tisua jimachaya rë xuta tsèhë xcusun xi camá jan. Hane Nina ne, casua me Hasen rë me cojo xuta xi vihndë tsèhë me. —Cuatjin cafayangui apóstol jan.

³³ Ngajan xi yëjë me xi cuacun tisahmi xu junta jan ne, hya xi cahndë me cjua xi cachja apóstol jan ne, jercu camacjan camahani rë me. Hisca meje tsiquehen xu me apóstol jan. ³⁴ Peru ngajñi rë xuta xi sahmi junta jan ne, jiyajñi ngu me xi vicuya cjuachacun xi hmí rë Gamaliel, ngu xuta fariseo. Hane yëjë ni xuta ne, jemu faharcun xu me me. Gamaliel jan ne, casecunvasen me, sehe cavitexa me xi cuetjuxin apóstol ngu hora lihndi candatsen. ³⁵ Sehe cachja xu me cojo xuta xi tisahmi junta jan cuitjin:

—Ngayujun ngarcun ni xuta tjë rë Israel matsejen ne, nechun cuidadu sa xi mé meje nihñu cojo cha xi cuacun vë. ³⁶ Ninguitsjun ta hatsëë nixtin matsejen ne, cavetjujñi nima cha Teudas ngajñi rë xuta. Jercu cachja nima xi jemu cha venguichji rë cha, hane sacuaha ñuju cientu xihin cavisehen ladu rë nima. Hya xi camá ne, catsiquehen xuta nima, hane yëjë ni xuta ladu rë nima jan ne, cavitsojo me, hane ngajan caffè cjuandya xi casahmi me. ³⁷ Hane xi camá ngascan ne, sacuaha nixtin xi camá censu matsejen ne, hacuaha cavetjujñi nima Judas, cha Galilea. Cavindacha nima xuta, hane jemu cavisehen me ladu rë nima. Peru nima vèhë matsejen ne, hacuanitjin ni cahme. Hane yëjë ni xuta ladu rë nima jan ne, caffè me cavitsojo me.

³⁸ Vèhë xi nguehe cuichjá cojo nuju ta mijí rë xi nihñu cjuahngatacun cojo cha xi cuacun vë. Mijí rë xi chasen cha ta, sa xi suvá cjuatacun ni rë xuta xi tijima matsejen ne, cjuëya suvá vë. ³⁹ Peru sa xi cjuatacun rë Nina xi tijima ne, cumaji cuichancan cjuatacun rë cha. Ndaja cuidadu, sá tu cuechú nixtin xi cumachaya naja ne, Nina tichicjaan cojo rë me. —Cuatjin cachja Gamaliel.

Hya xi cajnetaha cachja Gamaliel cuatjin ne, yëjë ni xuta xi tisahmi junta jan ne, cajne cacun me. ⁴⁰ Ngajan xi cajindaya nga me apóstol jan, sehe cavitexa me casehen rë. Hya xi camá ne, cachja xu me cojo rë apóstol xi ha quihndë cuyaaín cuichja me tsèhë Jesús cojo xuta, sehe cavèhëndaya xuta jan me. ⁴¹ Ngajan xi apóstol jan ne, cavetjuxin xu me tsèhë hiscan jima junta jan. Hane jemu ndama camahani rë me xi cavechú chuya rë xi choho cavatju me camá ngatsë rë Jesús. ⁴² Peru nchunchujun ni ne, ngajan ndatsen yungun cojo ndava xuta ne, casejyiin xu xi casua me camachaya rë xuta cjuandajyihí xi chja xi Jesús ne, hacui me xi catsingatju Nina.

6

Catuxijin rë yatu cha xi cuisecoo rë apóstol

¹ Hya xi camá ne, xi quiji sa nixtin ne, camacjín sa xuta ladu rë Jesús. Hane ngajñi rë me xi cuacun vèhë ne, me xi visiajmi hne griego ne, cavetsihin cavinchajyë xu me me xi visiajmi hne rë xuta tjë rë Israel. Jyë xi cavincha xu me ne, yachjin cahan tsèhë ngajñi rë me ne, ndajin xu má cuenda me nchunchujun ni hora xi ticja xcusun xi satë rë me xingu xingu me xi tjín rë cjuachaja. ² Ngajan xi apóstol xi tejó jan ne, cajindayavaha me yëjë sa xuta ladu rë Jesús, sehe cachja xu ngu apóstol jan cuitjin:

—Ndajintjin xi tu fë tu vetsihin vejñixin cjua rë Nina ngatsë rë xi chjihin-cuendin cjuacjintacun xi ma cuenda nchunchujun ni. ³ Vèhë xi ngayujun ni

ne, naxujun ngajñi nuju yatu xihin xi tsajin mé cún mé má hacuaha quitsë rë xahasen rë cojo Hasen rë Nina hacuaha vechútaha cjuatacun rë. Sehe tahan rë xa xi cjuahacuenda cjuacjintacun vëhë. ⁴ Xi cuatjin ne, ngayin ne, tihín yojo niji cojo xa xi nihñi oración hacuaha tihín cumachaya rë xuta cjua rë Nina. —Cuatjin cachja apóstol jan.

⁵ Hane jemu cachuya xu rë yëjë xuta xi cuacun jan cjua xi cachja apóstol jan. Sehe ngajan xi cavaxijin xu me yatu xihin xi cuicun vi: Esteban, ngu xihin xi jemu mangucacun cojo Jesús hacuaha quitsë rë xahasen rë cojo Hasen rë Nina; Felipe; Prócoro; Nicanor; Timón; Parmenas; cojo Nicolás, ngu xutaxín xi hacuiin xuta tjë rë Israel, peru camacjain rë me Nina rë xuta tjë rë Israel. Nicolás jan ne, canduva me ngu nandya xi hmí rë Antioquía. ⁶ Hya xi camá xu ne, quijicojo xuta jan xihin xi cavaxijin me jan xcun apóstol. Sehe apóstol jan ne, casahmi me oración, sehe cavisanetsja xu me xihin xi cuacun jan xi suaxa rë me.

⁷ Xi quiji sa nixtin ne, xuta Jerusalén ne, jemu jima chaya sa xu rë me cjua rë Nina, hacuaha jercu jima cjín sa xuta ladu rë Jesús ngajan Jerusalén. Hisca nahmi ne, jemu cjín me xi jimangu cacun xu me cojo cjuandajyihi xi chja tsëhë Jesús.

Caxinchajyë rë Esteban

⁸ Nixtin hya ne, Esteban, ngu xihin xi hacuaha cojo cavaxijin xuta jan ne, quitsë rë xahasen rë me cjuandaja rë Nina, hacuaha quitsë rë me ngahñu rë Nina. Vëhë xi jemu tisahmi xu me cjuarcun ngajñi rë xuta. ⁹ Peru ngujo cha tsëhë yungun xi hmí rë Yungun Rë Hndixahan Xi Ha Ndaya Tjin ne, cojo xu cha ma tangun cha cojo cha nandya Cirene, cha nandya Alejandria, cha estadu Cilicia, cojo cha estadu Asia, xi cuisiajmi cha. Cavechú ngu nixtin xi camatangun xu cha xi cuacun vë cojo Esteban ne, cavetsihin cafachataha cha me. ¹⁰ Peru ngatsë rë xi Hasen rë Nina jemu casua rë me cjuatacun xi cuisiajmi me cojo cha ne, cacaain xu rë cha casahmi condra cha cjua rë me. ¹¹ Hya xi camá ne, cavanguisehma xu cha ngujo cha xi cuichja cjuandesu cuitjin:

—Canuhyin xi choho cachja cha xi cuajyihi vë tsëhë Moisés hacuaha choho cachja cha tsëhë Nina. —Cuatjin cuichja cha.

¹² Hane xi cachja cha cjuandesu vëhë ne, casahmi cha xi yëjë xuta cojo xuta changá cojo cha xi vicuya cjuachacun ne, jemu camaxti xu rë me. Ngajan xi cachjahá rë Esteban, quiji chani rë me xcun yëjë xuta xi matitjun. Sehe casahmi me xi matitjun jan ngu junta. ¹³ Ngajan xi cha xi cuacun jan ne, cuitjin cachja xu cha cjuandesu hora xi cavinchajyë cha Esteban:

—Cha xi cuijyihi vi ne, sejiin cha xi choho chja cha tsëhë yungun rë Nina xi matitjun vi. Sejiin cha xi choho chja cha tsëhë ley rë yungun naja. ¹⁴ Hacuaha canuhyin xi cachja cha xi Jesús, cha Nasaret vë ne, tsinguetsun cha yungun naja vi hacuaha tsindeya cha xcusun xi cavejña xutachanga naja Moisés hatsëë hacutjin nihña. —Cuatjin cavinchajyë cha me.

¹⁵ Ngajan xi yëjë xuta xi siu xu xcun junta jan ne, cavutsejenndaja me Esteban. Hane cavëë me xi xcun Esteban ne, tangun jyihi xu cojo xcun ngu ángel.

¹ Hya xi camá ne, nahmi xi matitjun xu jan ne, cavinenguisse me Esteban cuitjin:

—¿Há quixi cjuá xi chja cha xi cuacun vé? —Cuatjin xu cachja me.

² Hane Esteban ne, cuitjin xu cavetsihin casua me cjuaquixi rë me:

—Ngayujun ni quihndi nandya, ngayujun ni xuta changá matsejen ne, tisiñuju cjuá xi cuichjá cojo nuju vi. Nina naja, xi jemu jyë hnga camahani me cojo hasen rë me matsejen ne, cajnetsejen me cachja me cojo xutachanga naja Abraham, hya xi tacun cuaha Abraham táha ladu tséhë nangui Mesopotamia, hya xi chaja sa cjue setaha cahndë me ngajan Harán.

³ Hane cachja Nina cojo rë me cuitjin: “Nismitacuín nangui riji. Nismitacuín xuta riji. Hane tihin ngajan ngu nangui cjin, tuyani ni hiscan xi ngahan tsingácun ri.” Cuatjin cachja Nina. ⁴ Ngajan xi Abraham matsejen ne, cavetju me tséhë nangui rë me, nangui xi hmí Mesopotamia, hiscan xi caviyuju xuta nangui rë me, xuta Caldea. Cavetju me quiji casetahacahndë me ngajan nandya Harán. Hane xi cavatju cahme nahmi rë me ne, Nina casahmi me xi cavetju nga Abraham tséhë Harán, canduva casetahacahndë me nguehe nangui hiscan xi nechan quihndë. ⁵ Peru xi ngutjen ni ne, casuaain Nina me hisca hitsë nangui vihi xi cuma tséhë me ta xi cachja me ne, hisca xi cuma ngascan ne, sehe sua me nangui vihi xi cuma tséhë Abraham, cojo yëjë sa xuta tjë rë me xi cuinduva ngascan. Hya xi cachja Nina cojo rë me cuatjin ne, cjëë sacú rë chjuun rë Abraham quihndi. ⁶ Hacuaha cachja sa Nina cojo Abraham cuitjin: “Cuechú nixtin xi xuta tjë riji ne, cjue cuiyujutaha me ngu nangui cjin. Hane xuta xi nangui rë jan ne, sahmi me mosu hndixahan rë me xuta xi cuacun tjë riji vé, hacuaha jemu choho sahmi me cojo rë me. Ñuju cientu nu xi cuatjin sahmi me xcusun vëhë. ⁷ Peru cuechú nixtin xi ngahan ne, sahme castigu xuta xi nangui rë jan. Hane xi cuatju xcusun vëhë ne, sehe cuetju xuta tjë riji ne, cuya cuinduva nga me nguehe cahndë vihi, hane nguehe cjuaharcun cjuahajeya ná me.” Cuatjin cachja Nina cojo Abraham.

⁸ Hane cojo sa xi cuma tsejen xi camangu cacun Abraham cojo compromisu xi casahmi Nina cojo rë me matsejen ne, cavejña Nina ngu xcusun xi xtí chuxin naja ngayaan xi xihin ngayaan. Ngajan xi hya xi cavechú jyin nixtin xi catsin Isaac, quihndi rë Abraham ne, cavatë me chuxin rë quihndi jan sacuatjin xi cachja Nina. Hane hacuanitjin ni casahmi Isaac cojo quihndi rë me Jacob. Hacuaha Jacob ne, cuatjin casahmi me cojo yëjë tejó quihndi rë me xi xutachanga naja.

⁹ Hane xi camá ngascan matsejen ne, cavechú ngu nixtin xi xutachanga naja xi quihndi rë Jacob jan ne, jemu casahmi xín cacun me cojo hntsë me xi hmí rë José. Vëhë xi caviteña me José. Hane quijicojo xuta xi cavatsë rë José jan me hisca nangui Egipto. Peru Nina ne, cavisecoo me José jan, ¹⁰ hacuaha cavaxëtje Nina me tséhë yëjë cjuacjintacun xi cavatju me camá. Jemu casua Nina me cjuatacun, hacuaha jemu casua me me cjuandaja. Vëhë xi me xi matitjun tséhë yëjë ni nación Egipto ne, jemu cachuya rë me tséhë José jan. Vëhë xi me xi matitjun jan ne, casua me José xa xi cuitexa me jinguyë ni nación jan hacuaha cjuahacuenda me yëjë cjuacjintacun xi tjin ndava me xi matitjun jan.

¹¹ Hya xi camá ne, jercu camajindya camahani jinguyë ni ladu tséhë Egipto cojo Canaán. Jercu jyë camahani ngu cjuañihi xi cavatju xuma xutachanga naja camá. Casaciin rë me mé xi sinë ne. ¹² Peru hya xi camachaya rë xutachanga naja Jacob xi jemu tjin xichinë ngajan Egipto matsejen ne, ngajan catsingatju me quihndi rë me ngu ndiya titjun xi cjue

cuatsë me xichinë. ¹³ Hane hya xi ma jo ndiya quiji quihndi rë Jacob ngajan Egipto ne, cachja quixi José cojo hntsë me cuitjin: “Ngahan xi tsuhun ná.” Cuatjin cachja me. Hacuaha nixtin hya ne, me xi matitjun tsëhë Egipto matsejen ne, camachaya rë me yo tjë rë má José. ¹⁴ Sehe ngajan xi José ne, catsingatju me hntsë me jan xi cjue jaha me Jacob, nahmi rë me, cojo yëjë sa xuta rë me. Xi yëjë xuta xi cuacun vëhë ne, jyanchan tyjuhun xuta má me. ¹⁵ Ngajan xi Jacob cojo xuta rë me matsejen ne, quiji caviyujutaha cahndë me ngajan Egipto. Hane xi camachangá me ne, ngajan cahme me. Hacuaha yëjë sa xutachanga naja xi cuacun jan ne, hacuaha ngajan cahme me. ¹⁶ Xi camá ngascan ne, quiji chani rë yojo rë nima Jacob ngajan nandya Siquem. Ngajan caseyaniji nima tsjun xi cavatsë Abraham hatsëë, hya xi caviteña xuta rë ngu cha xi hmí rë Hamor, ngajan Siquem.

¹⁷ Hya xi camá ne, xi camatiña nixtin xi cuetjucaa sacuaha cjua xi ha cachja Nina cojo Abraham matsejen ne, yëjë xutachanga naja xi siutaha cahndë ngajan nangui Egipto ne, ha jercu cjín camahani camá me. ¹⁸ Sehe cavisehen nga ngu me xi xatsë xi camatitjun me ngajan nangui Egipto jan. Hane me vëhë ne, hvín me hacutjin casahmi nima José hatsëë. ¹⁹ Hacuaha me vëhë ne, jemu cavindacha me xutachanga naja. Jemu choho casahmi me cojo rë me ta casahmi me ngu yëjë xi xutachanga jan ne, cuaxë me quihndinda rë me, cuiyuju me candatsen cojo sa xi cueya. Hane cuatjin xi ha quihndë hacuín cuma cjín sa me. ²⁰ Ngajñi rë cjuacjintacun vëhë matsejen ne, hya catsin Moisés, ngu quihndi xi jemu ndajyihí camahani. Hane quihndi jan ne, ndava nahmi rë camacha sacuaha chuva rë jyan sá. ²¹ Peru hya xi cavaxë me quihndi jan xi cueya ne, na quihndi rë me xi matitjun jan ne, cafaha na quihndi jan, hane catsicha na sacuaha quihndi rë suvá na. ²² Hane xi quiji sa nixtin ne, cavetsihin cavutaya Moisés yëjë ni cjuahasen xi tjín rë xuta Egipto, sehe ngajan xi camá me ngu xihin xi jercu vengui chji rë xi chja me cojo xi sahmí me.

²³ Hya xi cavechú Moisés yachan nu matsejen ne, catsingataha cacun me xi cjue scusehenya me xuta tjë rë Israel, xuta xi tangun xutachanga rë me cojo. ²⁴ Hya xi camá ne, cavëë Moisés xi ngu cha Egipto ne, tisahmi cha cjuahngatacun cojo ngu cha tjë rë Israel. Ngajan xi Moisés ne, cavisecoo me cha xi choho tivatju tijima jan. Catsiquehen me cha Egipto jan, hane cuatjin casahmingojo me. ²⁵ Xi má rë Moisés matsejen ne, cuijnercu yëjë xuta tjë rë Israel xi Nina tsingatju me Moisés xi cuaxëtje me xuta jan. Peru cajnií rcu me. ²⁶ Xi camá nchujun jan ne, cavechútaha me jo cha tjë rë Israel xi ticjan cha cojo xicjin cha. Hane meje cuatëcja me si xi tisahmi cha. Vëhë xi cachja me cojo cha cuitjin: “¿Mé má cuatjin nihñu cjuahngatacun cojo xingun? ta ngayun ne, tangun xutachanga nuju.” Cuatjin xu cachja Moisés. ²⁷ Peru cha xi tisahmi cjuahngatacun cojo cha xingu jan ne, catsivaha cha Moisés, sehe cachja cha cojo me cuitjin: “¿Yo casuaxa nuju xi nduvun vitexun niji hacuaha nduvun nichuvun jyë niji?” ²⁸ ¿Há meje nicuhun ná ngahan sacuatjin canicuhun cha Egipto ngujña?” Cuatjin cachja cha. ²⁹ Hane xi cuatjin cachja cha cojo Moisés ne, catsacjun me camá. Vëhë xi quiji cavanga me hiscan ngu nangui cjín xi hmí rë Madián, ngajan casetahacahndë me. Hane xi quiji nixtin matsejen ne, camá me nahmi rë jo quihndi xihin.

³⁰ Hane hya xi caffè nga yachan nu xi casetaha Moisés ngajan ne, cavechú ngu nixtin xi cavëë me sacuaha ngu ángel ngajñi rë ndihi tsëhë ngu ya lihndi xi seti ngajan ngu xín camahani tsëhë nandya, tiña Naxi Sinaí. ³¹ Hane jemu quijircun rë Moisés xi cavëë me xcusun jan. Hane xi quijitiña sa me xi

scutsejenndaja me matsejen ne, cahndé me cjua rē Nina xi cachja cuitjin: ³² “Ngahan xi Nina rē xutachanga riji ngahan, Nina rē Abraham cojo Isaac cojo Jacob.” Cuatjin cachja cjua rē Nina jan. Ngajan xi Moisés ne, cavetsihin ña cafatsē me xi catsacjun me camá; ha hisca quihndé cavetjiin cacun me xi scutsejen sa me. ³³ Sehe cachja nga Nina cojo rē me cuitjin: “Naxe chuxinxte riji ta cahndé hiscan sechin ne, catsinchácun. ³⁴ Hacuaha nguehe cuichjá cojo ri ta ngahan ne, ha cahvè hacutjin choho tisahmi xuta Egipto cojo xuta ladu naha, hacuaha ha cahndé hacutjin tifé cacun xuta ladu naha xi choho tivatju me tijima. Vèhē xi ngahan ne, canduvajne xi cuaxètjē me. Quihndé ne, ndove ta tsingátju ri ngajan Egipto.” Cuatjin cachja Nina cojo Moisés.

³⁵ Moisés vè ne, hacui me xi catsitjungui xuta hya xi cachja xuta cuitjin: “¿Yo casuaxa nuju xi nduvun vitexun niñi, hacuaha nduvun nichuvun jyé niñi?”, chja me. Hacuaha hacui me xi Nina catsingatju rē xi cuma titjun hacuaha cuèhëndaya rē xuta. Hane sacuaha ángel xi camatsejen ngajñi ndihi rē ya lihndi jan ne, cavisecoo rē Moisés xi cuatjin casahmi me. ³⁶ Hacuaha hacui me xi cavaxé rē xutachanga naja tsèhē nangui Egipto. Jemu casahmi me cjuarcun ngajan Egipto, cojo ngajan ndachacun Hani, cojo ngajan ngu xín camahani tsèhē nandya. Cahntsua yachan nu xi cuatjin casahmi me. ³⁷ Moisés vè ne, hacui me xi cachja cojo xutachanga naja cuitjin: “Nina ne, cuya tsingatju nga nuju me ngu profeta xi cuetjuñi ngajñi nuju. Tsingatju nuju Nina profeta vèhē sacuatjin catsingatju ná me ngahan.” Cuatjin cachja Moisés. ³⁸ Hacuaha ha hacui ni me xi casetaha cojo xutachanga naja, hya xi caviyujutaha me ngajan ngu xín camahani tsèhē nandya. Hacui me xi cachja ángel cojo rē ngajan Naxi Sinaí. Hacuaha hacui me xi cafahatsja cjua rē Nina xi sacú rē xutachanga naja hacuaha hisca cojo xi sacú naja ngayaan quihndé.

³⁹ Peru xutachanga naja xi cuacun jan ne, mijí cuihndé me tsèhē Moisés. Catsitjungui me Moisés, hisca cavuya catsinguitsjen nga me nangui Egipto cahntsua xahasen rē me. ⁴⁰ Ngajan xi cachja me cjua vihi cojo xutachanga naja Aarón, hntsē Moisés: “Nindujun sa nina xi scuxaha ndiya tsajan ta, cha Moisés vè, cha xi cavaxé naja tsèhē nación Egipto ne, hyaan mé camá rē cha xi vuyaaín cha.” Cuatjin cachja xuta jan. ⁴¹ Ngajan xi nixtin hya ne, catsindaja xuta jan ngu nina rē me xi xcusun rē ngu hndindyaja. Hya xi camá ne, catsiquehen me ngujo chu, sehe quiji caviyuju me chu xcun nina jan. Hacuaha casahmi me suhi tsèhē nina xi catsindaja suvá me jan. ⁴² Vèhē xi Nina naja ne, catsismi cacun me xutachanga jan, cojo sa xi cjuaharcun xuta jan niñú xi siutaha ngahnga, sacuatjin catsihindu profeta xcun xujun rē Nina cjua xi cachja Nina hya xi cachja me cuitjin:

Ngayujun ngarcun ni xuta tjé rē Israel matsejen ne,
hya xi canicuhun chu sacuaha cjuatjo xi tuhun ná ngahan cahntsua yachan
nu xi cavinechuntuhun ngajan ngu xín camahani tsèhē nandya mat-
sejen ne,

hacuiin ngahan xi cuatjin cachjuhuncun ná ta ngayun ne, ha canindujun
suvun nina xi chjuhuncun.

⁴³ Ndava nina nuju xi hmí Moloc

cojo niñú rē nina nuju xi hmí Refán, jo vèhē xi cachuhunhngun catsangun-
cujun xi má nina nuju.

Vèhē xi ngahan sahme xi cjuecojo cjuachan nuju xuta cjin sa tsèhē hiscan xi
hmí Babilonia.

Cuatjin catsihindu profeta cjua xi cachja Nina.

⁴⁴ 'Hya xi caviyujutaha xutachanga naja hatsëë ngajan ngu xín camahani tsëhé nandya matsejen ne, cavejña rë me ngu ndihya tsjian hiscan camá acuerdu cojo Nina. Hane vëhé xi vëë me xi cavejña Nina cojo rë me. Ndava Nina jan matsejen ne, camandaja tutjin xi cachja Nina cojo Moisés, camandaja sacuatjin xcusun xi catsingacun Nina Moisés. ⁴⁵ Hane hya xi cakahatsja xutachanga naja ndava Nina jan ne, hacuaha cuatjin quijicojo me ha tuyani ni xi quiji caviyujutaha nga me. Hane xi camá ngascan ne, cavechú nixtin xi cafehecojo Josué xutachanga naja nguehe nangui naja vi, nangui xi Nina cavisecoo rë xutachanga naja xi cavaxëxin me xuta xi nangui rë. Hacuaha nixtin hya xi camá cuatjin ne, hacuaha cafehecojo me ndava Nina jan. Cuatjin camá sa hisca hya xi cavechú nixtin rë xutachanga naja David. ⁴⁶ Hane David jan matsejen ne, jemu cachuya rë Nina tsëhé me. Ngajan xi cafehya David cahndë cojo Nina xi tsindaja me ngu ndihya hiscan cuejña Nina. ⁴⁷ Hane hisca xi camá ngascan ne, xutachanga naja Salomón catsindaja me ndava Nina. ⁴⁸ Peru Nina xi matitjun matsejen ne, hacuini vejñacahndë me ngu ndihya xi tsindaja xuta ta çhá vitsiini nuju hacutjin cachja ngu profeta xi cachja me cjuar rë Nina cuitjin?:

⁴⁹ Ngahnga ne, sacuaha ngu silla ndajiyi hiscan xi vitejña, hane nangui ne, sacuaha ngu yatë hiscan xi visane ntsacu, chja Nina. Tsajin yo cuma tsindaja ngu ndihya hiscan xi cuitejñacahndë, Tsajin ngu cahndë xi cuacun vë xi cuma cjuahájenda.

⁵⁰ Ngahan catsindaja yëjë ni xcusun xi tjin ngasunhndë.

Cuatjin cachja profeta jan cjuar rë Nina.

⁵¹ Ngayujun ni ne, jercu taja camahani rcun. Xahasen nuju cojo cjuatacun nuju ne, tangun cojo xutaxín xi hatuxa macjaain rë Nina. Hatuxa nihñu condra Hasen rë Nina. Tangun camahani ngayun cojo xutachanga naja.

⁵² Hacuaha xutachanga naja ne, jercu catsujyihya tjengui me yëjë profeta cojo cjuahngatacun. Hisca catsiquehen me profeta xi casua camachaya rë me xi sehe cuinduva ngu me xi hatuxa tyjahi jain cojo cjuatacun rë. Hane quihndë xi cafehe jain me ne, ngayun canihñu me entregadu, ngayun catuhun me xi catsiquehen xuta me. ⁵³ Ngayun xi casua ángel xutachanga nuju ley rë Nina ne, hisca nuhyuun tsëhé ley vëhé. —Cuatjin casua Esteban cjuaquixi rë me xcun yëjë xuta xi matitjun ngajan xcun junta.

Cojo ndyoyo catsiquehen xuta Esteban

⁵⁴ Ngajan xi yëjë xuta xi matitjun xi cuacun tisahmi junta jan ne, hya xi cahndë me cjuar xi cachja Esteban jan ne, hisca catsijanerii me nehñu me xi jercu tu camacjan camahani rë me. ⁵⁵ Peru Esteban ne, quitsë rë xahasen rë me cojo Hasen rë Nina. Hane xi cavutsejenniji me ngahnga ne, cavëë me hasen ndajiyi rë Nina xi jercu seti camahani. Hacuaha cavëë me Jesús, secun me cojo Nina. ⁵⁶ Ngajan xi cachja Esteban cuitjin:

—Chutsujun ni. Ngahan ne, xi tivutsejen ngahnga vë ne, tsejen xi tixaha sacuaha tingotjo rë, hacuaha tsejen xi me xi Quihndi rë Xuta Jain ne, secun me cojo Nina. —Cuatjin cachja Esteban.

⁵⁷ Peru me xi cuacun jan ne, cavetsihin cajindayatë me hacuaha cava-hahñu me tyjavañuju me, tsëhé xi mijí sa cuihndë me xi tichja Esteban. Sehe ngutjen ni ne, ngu tangun ni cavanga me quiji cavehnchun me Esteban xi cafaha me me. ⁵⁸ Sehe cavaxëxin me me ngajan tjehen nandya, sehe cavitexa me ngujo cha xi cavetsihin cavetaha cha ndyoyo Esteban. Cha xi cuacun casahmi jan ne, cavaxë cha tsjian xcun rë cha, caviyuju cha hiscan xi secun ngu cha xi hmí rë Saulo, xi casahmi cha cuidadu. ⁵⁹ Jinguyëjë rë xi tísatë rë

Esteban ndyojo xi tivetaha cha xi cuacun jan ne, cafehya me cjuandaja cojo Jesús cuitjin:

—Jesús, ngayun Nai naha, chjuhunnstun hasen naha. —Cuatjin cachja me.

⁶⁰ Hya xi camá ne, cavixcuhnchi me, hane sehe jercu cajindaya me, cachja me cjua vihi:

—iNgayun Nai naha, ninchatuhun rë xuta xi cuicun vi tsëhë cjuatsehen xi tisahmi me cojo ná! —Cuatjin cajindaya me cachja me.

Xi café cachja me cjua vëhë ne, cahme me.

8

Catsuyihiya tjengui Saulo xuta ladu rë Jesús cojo cjuahngatacun

¹ Hane Saulo ne, hacuaha cachuya rë me xi cuatjin catsiquehen cha xi cuacun jan Esteban.

Ha nixtin hya ni ne, cavetsihin catsuyihiya tjengui xuta xi matitjun jan yëjë xuta ladu rë Jesús cojo cjuahngatacun ngajan Jerusalén. Hya xi camá ne, yëjë xuta ladu rë Jesús jan ne, café cavitsojo me táha ladu tsëhë distritu Judea cojo distritu Samaria. Suvá sa apóstol xi tsajin cavitsojo xu me. ² Hane ngujo cha xi faharcun jain rë Nina ne, cavinchaniji cha nima Esteban, hacuaha jemu cajihnda xu cha tsëhë nima. ³ Peru Saulo ne, cavetsihin catsuyihiya tjengui me xuta ladu rë Jesús cojo cjuahngatacun. Quiji cavisehen xu me ndava xuta xi cuacun jan, cajuvéjne me cavaxë me sa chjuun sa xihin, quijicani me ndavaya. Vëhë xi cuatjin cavitsojo xuta jan.

Sacu machaya rë xuta Samaria cjuandajiyi xi chja tsëhë Jesucristu

⁴ Quihndë ne, xuta xi cavitsojo tsëhë Jerusalén jan ne, catsuyihiya casua xu me camachaya rë xuta cjuandajiyi xi chja tsëhë Jesucristu. ⁵ Hane Felipe ne, quiji xu me ngu nandya táha distritu Samaria, hane ngajan casua me camachaya rë xuta ta ha cafehe me xi catsingatju Nina xi cuaxëtje naja.

⁶ Hane xi cavisifuju xuta cjua xi cachja Felipe cojo xi cavutsejen me cjuarcun xi casahmi me ne, jemu ndaja cavetaharcu me cjua xi cachja Felipe jan.

⁷ Jemu cjin xuta xi hinchaxitsehen xahasen rë me ne, camandaja xu me. Hisca cajindaya xitsehen jan hora xi cavetjuxin. Hacuaha jemu cjin xuta xi cahme yojo rë me cojo cjin sa xuta xi rengun me ne, camandaja xu me. ⁸ Vëhë xi xuta nandya vëhë ne, jercu ndaja camá xu rë me.

⁹ Peru ngu cha xi hmí rë Simón ne, ha quitahá cha ngajan, tisahmi xu cha cjuasurqui. Hane yëjë xuta distritu Samaria ne, jemu quijircun rë me xi casahmi cha. Hacuaha cachja xu suvá cha xi jemu jyë hnga cha cojo cjuatacun rë cha. ¹⁰ Yëjë xuta Samaria jan, sa quihndi sa changá me ne, jemu ndaja cavetaharcu xu me tsëhë cha Simón jan. Hisca cachja xu me tsëhë cha cuitjin:

—Cha vihi ne, hacui cha xi tjin rë ngahñu rë Nina, ngahñu xi hmí rë ngahñu jyë. —Cuatjin cachja xuta jan.

¹¹ Vëhë xi jemu ndaja cavetaharcu xu xuta tsëhë cha ta, tsëhë xi ha jemu jyë nixtin xi casahmi cha xi quijircun rë xuta tsëhë cjuasurqui xi casahmi cha.

¹² Peru hya xi camacjain rë xuta tsëhë Felipe, hya xi casua me camachaya rë xuta tsëhë cjuandajiyi xi chja xi cuinduva Nina sahmi me gobiernu hacuaha cojo cjuandajiyi xi chja tsëhë Jesucristu ne, caxtenda xu me, sa chjuun sa xihin me. ¹³ Hacuaha hisca cha Simón jan ne, camacjain xu rë cha tsëhë Felipe. Hane xi cavatju caxtenda cha ne, sehe catsihñu cha yojo rë

cha cojo Felipe. Hane xi cavutsejen cha yějē cjuarcun yehe xi jima ne, jemu quijircun rē cha.

¹⁴ Hya xi camachaya rē apóstol xi siu ngajan Jerusalén xi xuta Samaria ne, camacjain xu rē me cjua rē Nina ne, catsingatju me Pedru cojo Juan quijitjengui rē xuta jan. ¹⁵ Hya xi cafehe jo apóstol jan ngajan ne, casahmi xu me oración tséhē xuta jan cojo sa xi sacú rē me Hasen rē Nina. ¹⁶ Cuatjin casahmi me ta, tséhē xi hisca xi ngu xuta jan ne, cjěē cuinduva xu Hasen rē Nina cuisehen xahasen rē me. Suvá ni ñihi rē Nai naja Jesús caseyanangui hora xi caxtenda me. ¹⁷ Ngajan xi Pedru cojo Juan ne, cavisanetsja me xuta Samaria jan, sehe cavisehen xu Hasen rē Nina cahntsua xahasen rē me.

¹⁸ Xi cavěē cha Simón xi casacu rē xuta jan Hasen rē Nina ngatsē rē xi cavisanetsja apóstol jan me ne, meje sua xu cha me tujún, ¹⁹ hacuaha cuitjin cachja xu cha cojo rē me:

—Tuhun ná cjuatacun vėhē, cojo sa xi tu yo ni xi cuisanentsa ne, sacú rē Hasen rē Nina. —Cuatjin cachja cha.

²⁰ Ngajan xi Pedru ne, cuitjin cafayangui xu me:

—¡Tujún riji ne, catjē tangun cojo ri! ta, tséhē xi caningatehetacuin xi cjuandaja rē Nina ne, cuma chaha rē cojo tujún. ²¹ Ngaye ne, satiin camahani ri xa vėhē ta, tséhē xi hacuiin tyjahi xahasen riji xcun Nina.

²² Nindeye cjuatacun riji. Tejñixin cjuatsehen riji vė. Hacuaha chjahye rē Nina cjuandaja rē me, há tsinchataain me ngaye tséhē cjuatacun xi jiya ngajñi rē cjuatacun riji. ²³ Ngahan ne, vacun ná xi ngaye ne, cuma ngaye ngu xuta xi ngundiyaxa ni tsiññu me yojo rē me cojo cjuatsehen. —Cuatjin cafayangui Pedru.

²⁴ Ngajan xi cha Simón ne, cuitjin cafehya xu cha:

—Nihñu favor ne, chjahyun rē Nina ngatsē naha cojo sa xi hisca xi ngu cjua xi canújun vė ne, cuatjuun cuma. —Cuatjin cafehya cha.

²⁵ Hya xi camá ne, Pedru cojo Juan ne, xi cavatju cachja xu me cojo xuta Samaria jan cjua xi chja tséhē Nai naja ne, cavuya quiji nga me ngajan Jerusalén. Peru yějē ni nandya xi vatju me hacutjin cjui me jingunduju ni ndiya ngajan distritu Samaria ne, ha cuatjin cachja sa me cjuandajyihí jan cojo xuta.

Felipe cojo ngu xutaxa rē nación Etiópia

²⁶ Camá nga ngu nixtin xi ngu ángel tséhē Nina ne, cachja cojo Felipe ngajan Jerusalén cuitjin:

—Tihinjni ndiya Gaza. —Cuatjin cachja ángel.

Ndiya vėhē ne, vatju ngajan ngu xín camahani tséhē nandya. ²⁷ Ngajan xi cavetju xu Felipe, quiji me. Hane ndiya cjui me ne, cavechútaha xu me ngu xutaxa rē nación Etiópia, ngu xihin xindé xi fahacuenda yějē cjuanchina rē na xi matitjun tséhē yějē xuta Etiópia jan. Xihin jan ne, quiji me ngajan Jerusalén xi cjuaharcun me Nina. ²⁸ Hane xi cavuya tife me nangui rē me ne, jiya me carreta rē me cjue me, táha tivutaya me xujun rē Nina xi catsihindu profeta Isaías. ²⁹ Ngajan xi cachja xu Hasen rē Nina cojo Felipe cuitjin:

—Tihinvehe hiscan cjuí carreta xi cuajyihí vė, nihñitanguin cojo. —Cuatjin cachja Hasen rē Nina.

³⁰ Ngajan xi cuatjin casahmi Felipe. Xi tu camatiña me hiscan cjuí carreta jan ne, cahndé xu me xi cjua rē xujun xi catsihindu profeta Isaías ne, vėhē tivutaya me xi jiya carreta jan. Sehe cavinenguise Felipe me cuitjin:

—¿Há vijnercun cjua xi tichutayun vė? —Cuatjin cavinenguise Felipe.

³¹ Ngajan xi cuitjin cafayangui xu me:

—Ngahan ne, vijniircú ta, tsêhë xi tsajin yo cuicuya ná. —Cuatjin cafayangui me.

Sehe ngajan xi cachja xu me cojo Felipe xi cuisehen cuejñatangun xu me cojo rë me. ³² Tivutaya me xujun rë Nina hiscan xi chja cuitjin:

Sacuaha ficojo xuta ngu chu tsánga xi tsiquehen me chu ne, cuatjin cjucojo xuta me;

hacuaha sacuaha jindayaain ngu hnditsánga hora xi secun chu xcun me xi cuejnu rë chu ne,

cuatjin tsajin camahani mé xi cuichja me hora xi secun me xcun me xi cjuahataha rë me.

³³ Sahnichuva xuta me, hacuaha tsichoho xuta cjuandaja xi cuma rë me;

Tsajin cuichja xuta tsêhë quihndi rë me ta, casacuiin rë me

tsêhë xi cjuahñu xi casacu rë me ngeuhe ngasunhndë ne, quijicanii rë me.

Vêhë cjuar rë Nina xi tivutaya xihin jan.

³⁴ Hya xi camá ne, sehe cafnenguise me cojo Felipe cuitjin:

—Xi má nuju ne, ¿yo tsêhë xi cuatjin chja profeta vë? ¿Há tsêhë súv me ne?, o há tsajin ne, ¿há tsêhë jingu sa xuta? —Cuatjin cafnenguise me.

³⁵ Ngajan xi Felipe ne, cavetsihin me cojo cjuar rë Nina xi tivutaya xihin jan, hane casua xu me camachaya rë xihin jan yêjê ni cjuandajiyi xi chja tsêhë Jesús.

³⁶ Xi cjuar me ndiya ne, cavechú xu me hiscan jiya ngu nandá. Ngajan xi chja xihin jan cojo Felipe cuitjin:

—Chutsujun ni. Ngeuhe jiya ngu nandá. ¿Há cumaji xtenda ngahan? —Cuatjin cachja xihin jan.

³⁷ Ngajan xi cachja xu Felipe cojo rë me cuitjin:

—Sa xi nguñaja xahasen nuju xi macjain nuju ne, cuma. —Cuatjin cachja Felipe.

Hane xihin xi cuajiyi jan ne, cuitjin cafayangui me:

—Macjain ná xi Jesucristu ne, hacui jain me xi Quihndi rë Nina me. —Cuatjin cafayangui me.

³⁸ Hya xi camá ne, cachja xu xihin jan cojo cha xi ficojo carreta xi secunhñu cha cojo, hane sehe cavitujne me cojo Felipe, sehe quiji catsijo me xcun nandá, hane caxtenda xu xihin jan.

³⁹ Xi cavetju me tsêhë nandá ne, Hasen rë Nina ne, ngutjen quijicojo xu rë Felipe. Hane xihin jan ne, ha quihndë cavuyaain cavëë rë Felipe ta, cavuya cafaha me ndiya rë me cafe me cojo cjuasua.

⁴⁰ Hya xi camá ne, cavechú Felipe nandya Azoto. Hane xi cavetju me ngajan ne, jima ngu nandya xi cavatju me ne, ha cuatjin casua me camachaya rë xuta cjuandajiyi xi chja tsêhë Jesucristu hisca xi cafehe me nandya Cesarea.

9

Hacutjin camá xi cavisehen Saulo ladu rë Jesús

¹ Jinguyêjê rë xi cuatjin tijima ne, Saulo ne, hacuaha ni cjuinduju sa me vincharcun me xuta ladu rë Nai naja ta tsiquehen me. Quiji me xcun nahmi xi matitjun ne, ² cafehya me ngu carta cojo sa xi cumacjain rë tsêhë me

xutaxa rë yungun ngajan nandya Damasco. Hane cojo xujun jan sa xi sacú rë me xuta Damasco xi tngui ndiya rë Jesús, sa chjuun sa xihin ne, tsihñu me

cjucojo me ngajan Jerusalén. ³ Hya xi camá ne, cavetju me quiji me. Hane xi tijima tiña me Damasco ne, ha tu ñahñu canduva ngu ndihi tsêhë ngahnga

casahmi hasen rë hiscan cjuí me. ⁴ Hane xi caticja me ne, cahndë me ngu cjuá xi cachja cojo rë me cuitjin:

—Saulo, Saulo, ¿mé má cuatjin nujihiye tjengui ná cojo cjuahngatacun?
—Cuatjin cachja.

⁵ Ngajan xi Saulo ne, cuitjin cafayangui me:

—¿Yo ngayun, Tatá? —Cuatjin cafayangui me.

Ngajan xi cjuá jan ne, cuitjin cafayangui tsëhé me:

—Ngahan xi Jesús ngahan, xi tinujihiye tjengui ná cojo cjuahngatacun.

⁶ Tisatjinhngue ne, tisihin nandya Damasco, hane ngajan sacú ri cjuá mé xi meje rë xi nihñi. —Cuatjin cachja cjuá jan.

⁷ Ngajan xi xuta xi cjuicojo Saulo jan ne, caxinchacun lihmi ni me ngajan. Cahndë me cjuá jan, peru tsajin yo xi cavëë me. ⁸ Hya xi camá ne, cavisat-jenhnga Saulo, hane xi cavuxaha me tuxcun me ne, matsijin camahani rë me. Sehe ngajan xi cavaha xuta jan tsja me ne, quijicojo me me hisca nandya Damasco. ⁹ Jyan nixtin cavéjña me jan xi matsijin rë me, hacuaha tsajin mé cajiné me, tsajin mé cahvi me.

¹⁰ Hane ngajan Damasco ne, ngajan tacun ngu xuta ladu rë Jesús xi hmí rë Ananías. Ha tu ñahñu cavëë me Nai naja ne, cachja cojo rë me cuitjin:

—¿Há nechín, Ananías? —Cuatjin cachja Nai naja.

Ngajan xi Ananías ne, cuitjin cafayangui me:

—Juun, tejña, Nai naha. —Cuatjin cafayangui me.

¹¹ Ngajan xi Nai naja ne, cuitjin cachja me cojo Ananías:

—Tihin ndiya xi hmí rë Taha Quixi. Hane ndava cha Judas ne, ngajan chjinenguise ngu cha Tarso xi hmí rë Saulo. Cha vëhé ne, tisahmi cha oración rë cha, ¹² hane sacuaha xi ngajñi nijñá rë cha ne, cavëë cha ngu xihin xi hmí rë Ananías xi cavisehen hiscan tacun cha, hane cavisanetsja rë cha xi cuma tsejen nga rë cha. —Cuatjin cachja Nai naja.

¹³ Ngajan xi Ananías ne, cuitjin cafayangui me:

—Ngayun Nai naha, jemu cjin xuta chja me hacutjin xi jemu choho casahmi cha xi cuajyihí vë cojo xuta ladu nuju ngajan Jerusalén. ¹⁴ Quihndë ne, hacuaha hisca nahmi xi matitjun catsingatju rë cha nguehe xi cjuaha cha xuta xi fehya nuju me cjuandaja nuju. —Cuatjin cafayangui me.

¹⁵ Peru Nai naja ne, cuitjin cachja nga me cojo rë me:

—Tihin ta, cha xi cuajyihí vë ne, ngahan cavaxejen cha xi cjue sua cha cumachaya rë xutaxín, cojo xuta xi vitexa, cojo xuta tjë rë Israel, cuichja cha yo ngahan. ¹⁶ Ngahan tsingácun rë cha há cjin cjuacjintacun xi meje rë xi cuatju cha cuma ngatsë naha. —Cuatjin cachja Nai naja.

¹⁷ Hya xi camá ne, cavetju Ananías quiji me ndava Judas. Hane xi cavisehen me ndava Judas ne, cavisanetsja me Saulo, cuitjin cachja me:

—Ngayun Saulo, Nai naja Jesús, me xi cahyun ndiya nduvun jan ne, catsingatju ná me, cojo sa xi ngayun ne, cuma tsejen nga nuju hacuaha tsë nuju cojo Hasen rë Nina. —Cuatjin cachja me.

¹⁸ Hane ha hora vëhé ni ne, cavixu tsëhé tuxcun Saulo ngu xcusun sacuaha tujún rë ti, hane camatsejen nga rë me. Hya xi camá ne, caxtenda me. ¹⁹ Hane xi cajiné me niñu ne, casacuhñu rë me.

Sua Saulo machaya rë xuta tsëhé Jesús

Hya xi camá ne, cavéjña Saulo ngujo nixtin ngajan Damasco cojo xuta ladu rë Jesús. ²⁰ Quiji me yëjë ni yungun, casua me camachaya rë xuta xi Jesús ne,

hacui me xi Quihndi rë Nina, xi Mesías. ²¹ Hane yëjë xuta xi cavisifiñuju cjuajan ne, jemu quijircun rë me, cuitjin cachja me cojo xicjin me:

—¡Peru me vihi xi jemu casahmi cjuahngatacun cojo xuta xi veyanangui ñihi vëhë ngajan Jerusalén! ¡Hacuaha ha xa vëhë canduva me nguehe, xi cjuaha me xuta xi cuacun vë, cjuecojo me xcun nahmi xi matitjun! —Cuatjin cachja xuta jan.

²² Peru Saulo ne, hitsë sa casacuhñu rë me xi tichja me cojo xuta, hisca quijircun rë xuta tjë rë Israel casahmi me ta, tsëhë xi tsejen xi cjuaquixi xi chja me xi Jesús ne, me vëhë jain xi catsingatju Nina.

Vetjutje Saulo tsëhë xuta tjë rë Israel

²³ Hane xi ha jemu cavatju nixtin jan ne, casahmichihin xuta tjë rë Israel cjuaxi tsiquehen me Saulo. ²⁴ Peru cjuaxi vëhë ne, casacu camachaya rë Saulo. Xuta xi cuacun jan ne, nixtin nixten jemu casahmi me cuidadu tingotju hnhcua rë nandya jan cojo sa xi cuma tsiquehen me Saulo. ²⁵ Peru xuta ladu rë Saulo ne, nguixun quiji catsitujne me Saulo taha ngaxtun hnhcua cojo nahñu jiya me cahntsua ngu nisinya. Cuatjin camá, sehe cavetjutje me.

Hacutjin cavatju Saulo ngajan Jerusalén

²⁶ Hya xi camá ne, xi cafehe Saulo ngajan Jerusalén ne, meje cjue sahitangun me cojo xuta ladu rë Jesús. Peru yëjë ni xuta xi cuacun jan ne, jemu tsacjun me Saulo. Macjaain rë me xi hacuaha xuta ladu rë Jesús camá me. ²⁷ Ngajan xi Bernabé ne, quijicojo me Saulo xcun apóstol, hane ngajan casacuenda me hacutjin xi ngajan ndiya ne, cavëë Saulo Nai naja, hacuaha cachja Nai naja cojo rë me. Hacuaha casacuenda Bernabé apóstol jan hacutjin tsacjuin Saulo xi cachja me tsëhë Jesús. ²⁸ Cuatjin camá xi cjui nduva me catsujiyihiya tangun me ngajan Jerusalén cojo xuta ladu rë Jesús. Hatuxa tsacjuin me chja me tsëhë Jesús. ²⁹ Hacuaha jercu cavisiajmi me cojo xuta xi visiajmi hne griego. Peru xuta xi cuacun jan ne, casahmi me nguujë xi tsiquehen me Saulo. ³⁰ Peru hya xi camachaya rë xuta ladu rë Jesús cjuaxi vëhë ne, quijicojo me Saulo nandya Cesarea, hane ngajan catsingatju me me quiji me nandya Tarso.

³¹ Cuatjin camá xi yëjë xuta ladu rë Jesús ngajan estadu Judea, cojo Galilea cojo Samaria ne, cafë rë me cjuacjintacun hacuaha camajyë sa cjuandaja rë Nina ngajñi rë me. Hane xi cuatjin quijinduju me cafaharcun me Nai naja hacuaha xi cuatjin cavisecoo rë me Hasen rë Nina ne, camacjin sa xuta ladu rë Jesús.

Camandaja Eneas

³² Pedru ne, catsujiyihiya me jingu ni ladu. Hya xi camá ne, quiji cavusehenya me xuta ladu rë Nina xi siu ngajan Lida. ³³ Hane ngajan cavechútaha me ngu xihin xi hmí rë Eneas, xi ha tjin rë jyin nu xi jiña xi cahme yojo rë. ³⁴ Ngajan xi Pedru ne, cuitjin cachja me cojo xihin jan:

—Ngayun Eneas, Jesucristu tisahmi me xi cumandaja ngayun. Tisatjunhngun, chjayun niñña nuju vë. —Cuatjin cachja Pedru.

Hane ngutjen ni cavisatjenhnga xihin jan. ³⁵ Hane yëjë ni xuta xi siu ngajan Lida cojo xuta xi siu ngajan Sarón cavëë me Eneas hane hacuaha cavisehen me ladu rë Nai naja.

Cavuya Dorcas cjuahñu

³⁶ Ngajan nandya Jope ne, cavëjña ngu chjuun ladu rë Jesús xi hmí rë Tabita. Hane xi hne griego ne, Dorcas hmí rë me. Chjuun vëhë ne, jemu

sahmi me cjuandaja, hacuaha jemu visecoo me xuta xi tjin rë cjuachaja. ³⁷ Hya xi camá ne, nixtin xi quitahá Pedru ngajan nandya Lida ne, chjuun vëhë ne, camahmu rë me, hane cahme me. Hane xuta jan ne, catsinduya me nima. Hane xi café catsinduya me ne, sehe quiji catsijaña me cahntsua ndihya ngahnga. ³⁸ Vëhë ta nandya Lida ne, tiña tacun tsëhë nandya Jope. Hane hya xi camachaya rë xuta ladu rë Jesús ngajan Jope xi Pedru ne, quitahá me ngajan Lida ne, catsingatju me jo xihin quijijaha rë Pedru, cuitjin cachja me:

—Nihñu cjuandaja ne, cuanguen cojo niji ngajan Jope marcu macjain.

³⁹ Ngajan xi Pedru ne, cavetju me quiji me cojo xihin jan. Xi tu cafehe me ngajan ndava nima ne, quijicojo me me ndihya ngahnga hiscan jiña nima. Hane jemu cjín yachjin cahan ne, quiji caxinchacun me xcun Pedru, hisca chja hisca jihnda me titsingacun me tsjian xi casahmi nima Dorcas hya xi tacun nima cjuahñu. ⁴⁰ Ngajan xi Pedru ne, cachja me cojo yëjë xuta xi cuetju xuta candatsen. Hane xi café xuta cavetju me candatsen ne, sehe cavixcuhnchi Pedru, casahmi me oración rë me. Hane xi cavuya cavutsejen me nima ne, sehe cachja me cuitjin:

—Tabita, tísatjunhngun. —Cuatjin cachja me. Hane chjuun jan ne, cavuxaha tuxcun. Hane xi cavëë rë Pedru ne, cavisatjenhnga cavéjña. ⁴¹ Hane xi casua Pedru ngu tsja me chjuun jan ne, catsisatjenhnga me. Xi tu cajindaya me xuta ladu rë Jesús cojo chjuun cahan jan ne, sehe catsingacun me chjuun jan xi tacun quicun nga. ⁴² Hane cjua vëhë ne, casacu camachaya rë xuta jingujyë ni Jope. Hane jemu cjín me xi camangu cacun me cojo Nai naja. ⁴³ Ngajan xi Pedru ne, jemu cjín nixtin casetaha me ngajan Jope, cavéjña me ndava cha Simón, ngu cha vechjanchuxin.

10

Jindaya Cornelio Pedru

¹ Ngajan nandya Cesarea ne, cavéjña ngu xihin xi hmí rë Cornelio. Capitán má me tsëhë sindadu tsëhë nangui Italia. ² Me vëhë ne, jemu ndaja faharcun me Nina cojo yëjë xuta xi siu ndava me, hacuaha jemu sua me cjuandaja cojo xuta tjë rë Israel, hacuaha yëjë ni hora fehya rë me Nina cjuandaja rë me. ³ Ngu nixtin jan sacuaha chuva rë fane jyan tsëhë ngu nixtin ne, cavëëndaja me xi cafehe ngu ángel rë Nina cachja cojo rë me cuitjin:

—Cornelio. —Cuatjin cachja.

⁴ Hane xi cavutsejenndaja sa me ángel jan ne, jemu catsacjun me camá, sehe cachja me cuitjin:

—¿Mé jan, Tatá? —Cuatjin cachja me.

Ngajan xi ángel jan ne, cuitjin cafayangui:

—Ngatsë rë oración riji cojo ngatsë rë cjuandaja xi jemu tehe ne, Nina ne, hacuaha tsinguitsjen me ngaye. ⁵ Quihndë ne, ningatji ngujo xihin ngajan Jope, chjindaye rë cha Simón, cha xi hacuaha hmí rë Pedru. ⁶ Cha Simón vëhë ne, ngajan tacun cha ndava ngu cha vechjanchuxin, xi hacuaha hmí rë Simón, cha xi tacun ndava tiña ndachacun. —Cuatjin cafayangui ángel jan.

⁷ Hane xi cavatju café ángel xi cachja cojo rë me jan ne, sehe cajindaya me jo mosu hndixahan rë me cojo ngu sindadu xi sahmixa ndava me hacuaha faharcun rë Nina. ⁸ Hane xi café casuacuenda me yëjë ni cjuacjintacun rë me ne, sehe catsingatju me cjue ngajan Jope.

⁹ Hane xi camá nchujun xi ha jima tiña cha xi cuacun jan nandya Jope ne, sacuahá chuya rë nchisen ne, sehe camiji Pedru ngajan xcun ndihya xi sahmi me oración. ¹⁰ Hya xi camá ne, camavojo rë me, meje sinë me hitsë tu mé ni xi sinë me. Hane jinguyëjë rë xi tisehenchjine xi sinë me ne, sacuahá xi canduva cachja ngu chini cojo rë me. ¹¹ Tivutsejen me xi ngahnga ne, catuxaha, hane nduvajne sacuahá ngu tsjian jyë, quichahahñu rë catsiñuju yuju rë xi nduvajne nangui. ¹² Cahntsua tsjian jan ne, ngajan hinchá yëjë xcusun chu xi tsujihiya nangui cojo chu xi vitjen ngahnga xi tsavi xi sinë xuta nangui Israel. ¹³ Hya xi camá ne, Pedru ne, cahndë me ngu cjua xi cachja cojo rë me cuitjin:

—Pedru, tísatjinhngue. Niquihin ngu chu ne, sehe xini chu. —Cuatjin cachja cjua jan.

¹⁴ Hane Pedru ne, cuitjin cachja me:

—Cumaji, Tatá, ta ngahan ne, cjëë camahani sinë ngu xcusun xi tsavi vë. —Cuatjin cachja me.

¹⁵ Peru xi ma jo ndiya ne, cuitjin cachja nga cjua jan cojo rë me:

—Xi ha Nina cachja me xi hacuini tsavi ne, xi canujiin ngaye xi tsavi. —Cuatjin cachja cjua jan.

¹⁶ Jyan ndiya camá xcusun vëhë. Hya xi camá ne, ngutjen ni cavuya quiji nga tsjian jan ngahnga. ¹⁷ Hane jinguyëjë rë xi tisingataha cacun Pedru mé vijne xcusun xi cavëë me jan ne, tivinenguise cha xi catsingatju Cornelio jan jani xi ndava Simón. Hane xi cafehe cha jan ne, caxinchacun ni cha tingotjo, ¹⁸ sehe cafinguisse cha há ngajan tacun Simón xi hacuahá hmí rë Pedru. ¹⁹ Hane jinguyëjë rë xi tisingataha cacun Pedru tsëhë xcusun xi cavëë me jan ne, cuitjin cachja Hasen rë Nina cojo rë me:

—Chutsijin ni. Hinchacun jo jyan cha xi tivanguise ri. ²⁰ Tihinjni ne, tihin cojo cha. Xicamacjiin tacuin ta cha xi cuacun vë ne, ngahan catsingátju cha. —Cuatjin cachja Hasen rë Nina. ²¹ Hane xi quijijne Pedru hiscan hinchacun cha xi cuacun jan ne, cuitjin cachja me:

—Ngahan xi vinchunsun ná. ¿Mé xa canduvun? —Cuatjin cachja Pedru.

²² Ngajan xi cha xi cuacun jan ne, cuitjin cachja cha:

—Ngu capitán xi hmí Cornelio catsingatju niji me xi canduvin nguehe. Me vëhë ne, ngu xihin ndaja me, hacuahá jemu faharcun me Nina. Yëjë ni xuta tjë rë Israel ne, ndaja chja me tsëhë Cornelio. Ngu ángel rë Nina cachja cojo rë me xi squindaya me ngayun xi cuangun ndava me cojo sa xi cuiñuju me cjua xi cuinújun cojo rë me. —Cuatjin cachja cha xi cuacun jan.

²³ Hya xi camá ne, cachja me cojo cha xi cuisehen cha cahntsua ndihya, hacuahá casua me cahndë xi cuiyuju cha ngajan. Hane xi camá nchujun jan ne, cavetju me quiji me cojo cha, hacuahá cojo sa ngujo xuta ladu rë Jesús xi siu ngajan Jope quiji me cojo rë me.

²⁴ Hane xi camá nchujun nga jan ne, cafehe me nandya Cesarea. Cornelio ne, ha casahmitangun me xuta rë me cojo amigu ndaja rë me, siuya me Pedru. ²⁵ Hane xi ha cuisehen Pedru jan ne, cavechútaha Cornelio me. Cornelio ne, quiji cafañatsacjan me xcun Pedru xi cafaharcun me. ²⁶ Peru Pedru ne, catsatjenhnga me Cornelio, hacuahá cachja me cojo cuitjin:

—Tísatjunhngun ta ngahan ne, hacuahá ngu xuta ni ngahan. —Cuatjin cachja me.

²⁷ Hane taha visiajmi me cojo Cornelio ne, cavisehen me ndihya, ngajan cavëë me xi jemu cjin xuta tjín tangun me jan. ²⁸ Sehe ngajan xi cachja Pedru cojo rë xuta jan cuitjin:

—Ngayun ne, ha ndaja hyun xi ngu xuta tjê rê Israel ne, sacuiin cahndê xi tsihñu me yojo rê me cojo xutaxín, hacuaha sacuiin cahndê xi cuisehen me ndava. Peru ngahan ne, casua Nina camachaya ná xi mijí rê xi cuichjá xi tsavi cojo ngu xcusun xuta. ²⁹ Vêhê xi xi tu quiji chjahá ná ne, ngutjen canduvá ni, hisca ngu cjua cachjaan. Quihndê ne, meje ná cumachaya ná me nihñu ná xi cachjindayun ná. —Cuatjin cachja Pedru.

³⁰ Ngajan xi Cornelio ne, cuitjin cachja me:

—Cuyatje fane jyan, sacuaaha hora vihi ne, tisahme oración naha nguehe ndya naha. Hane ha tu ñahñu cahvê ngu xihin, secun xcun, yaja ngu tsjian xi jemu tu seti camahani, ³¹ hane cuitjin cachja cojo ná: “Cornelio, Nina ne, cahndê me oración riji, hacuaha ngatsê rê cjuandaja xi jemu tehe ne, Nina ne, hacuaha tsinguitsjen me ngaye. ³² Quihndê ne, ningatji cjua ngajan Jope, hane chjindaye rê cha Simón, cha xi hacuaha hmí rê Pedru. Cha vêhê ne, tacun cha ndava cha Simón, ngu cha vechjanchuxin, xi tacun cha tiña ndachacun.” Cuatjin cachja xihin jan cojo ná. ³³ Vêhê xi marcu macjain catsingátju cjua nuju, hane jemu ndatjin canihñu xi canduvun. Vêhê xi quihndê ne, ha tjin tangun ngayin ngayijin ni nguehe xcun Nina xi cuisñiji yêjê cjua xi casua nuju Nina xi cuinújun cojo ni. —Cuatjin cachja Cornelio.

Cjuandajiyi xi cachja Pedru ndava Cornelio

³⁴ Ngajan xi Pedru ne, cuitjin cachja me:

—Ngahan vutsején ne, Nina ne, hatuxa quixi jain me cojo cjuatacun rê me xi tsichuva me yêjê ni xuta cojo cjuatacun rê ta ³⁵ yêjê ni nación ne, tu jarê ni xuta xi faharcun me Nina hacuaha sahmi me cjuandaja ne, jemu chuya rê Nina tsêhê me. ³⁶ Nina ne, catsingátju me cjuandajiyi rê me tsijin, ngayin xuta tjê rê Israel; casua me camachaya ni xi ngatsê rê Jesucristu ne, sacú ni xi cjuandaja cjuajeya. Me vêhê xi Nai rê yêjê ni xuta. ³⁷ Ngayun ne, ha machaya nuju tsêhê xcusun xi camá jinguyê ni nación Judea. Cavetsihin hisca distritu Galilea, hya xi cavatju cachja nima Juan xi meje rê xi xtenda xuta. ³⁸ Hacuaha ha hyun xi Jesús, xuta Nasaret ne, Nina ne, catsinguitsê rê me cojo Hasen rê me hacuaha cojo ngahñu rê me. Jesús vê ne, catsujiyiha casahmi me cjuandaja hacuaha casahmi me xi camandaja yêjê xuta xi jemu tisuaxti Satanás. Cuatjin casahmi me ta, tsêhê xi Nina ne, hacuaha tacun cojo rê me. ³⁹ Ngayin tihín machaya rê xuta tsêhê yêjê xcun xi cahyin xi casahmi me ngajan Jerusalén, cojo jinguyê ni nación Judea. Xi cavetaha xuta tjê rê Israel jan me xcun ngu cru ne, catsiquehen xuta jan me. ⁴⁰ Me vêhê ne, Nina catsicuya rê me cjuahñu xi ma jyan nixtin, hacuaha casua Nina cahndê xi cavuya camatsejen nga me. ⁴¹ Peru hacuiin ngajñi rê yêjê xuta camatsejen me ta suvá ni ngajñi rê me xi Nina cavaxijin rê cojo tjun sa, cuma cuinújan ne, ngajñi ni ngayin, xi cachini cahyin tangun cojo rê me hya xi cavatju cavuya me cjuahñu. ⁴² Hacuaha me vêhê cavitexa ni xi tihín cumachaya rê xuta xi me vêhê xi casuaxa Nina me xi tsichuva me xuta cojo cjuatacun rê, sa siu quicun me o sa cahme me. ⁴³ Yêjê ni profeta ne, cachja me ta yêjê ni xuta xi cumangu cacun cojo Jesús ne, sacú rê me cjuaninchataha tsêhê jyê rê me, xi cuatjin mangucun me. —Cuatjin cachja Pedru.

Casacu rê xutaxín Hasen rê Nina

⁴⁴ Hora xi tichja cuaha Pedru cjua vêhê ne, canduva Hasen rê Nina cavisehen xahasen rê yêjê xuta xi tivisiñuju cjua xi tichja Pedru jan. ⁴⁵ Hane xuta ladu rê Jesús xi tjê rê Israel xi cojo me canduva me cojo Pedru ne, jemu quijircun rê me xi cojo xutaxín casua Nina Hasen rê me xi cuma rê me.

⁴⁶ Cuatjin quijircun rë me ta, tsëhë xi cahndë me xi xutaxín jan ne, tichja me ngujo hne xi hisca hvíin xutaxín vë xi tisahmi jyë tisahmi hnga me Nina.

⁴⁷ Ngajan xi Pedru ne, cuitjin cachja me:

—Cumaji nichoon ngayaan nandá xi xtenda xuta, ta me xi cuicun vi ne, hacuaha casacu rë Hasen rë Nina sacuatjin casacu naja ngayaan. —Cuatjin cachja Pedru.

⁴⁸ Sehe cavitexa me xi caxtenda xuta xi cuacun vë xi cavisehen me ladu rë Jesucristu. Ngajan xi xuta jan ne, cafehya sa rë me Pedru xi cuejña sa me ngujo nixtin cojo rë me.

11

Sua Pedru machaya rë xuta rë yungun Jerusalén hacutjin camá ndava Cornelio

¹ Quihndë ne, apóstol cojo xuta ladu rë Jesús xi siu jinguyë ni Judea ne, camachaya rë me cjua xi cojo xutaxín cafachatsja me cjua rë Nina. ² Hane hya xi cavuya quiji Pedru ngajan Jerusalén ne, xuta ladu rë Jesús xi tjë rë Israel ne, cacjan me cojo, ³ cuitjin cachja me:

—¿Mé má cuatjin catsangun ndava xuta xi hacuiin tjë rë Israel hacuaha hisca cachinu niñu cojo rë me? —Cuatjin cachja me.

⁴ Ngajan xi Pedru ne, cavetsihin casuacuenda chichihin me cuitjin:

⁵ —Ngahan ne, tisahme oración naha hya xi tejñataha Jope. Hane sacuaha xi cachja ni chini cojo ná xi cahvë ngu xcusun sacuaha ngu tsjian jyë, quichahahñu rë catsiñuju yuju rë xi nduvajne nangui, camatiña tsahan.

⁶ Hane xi cavutsejénnadaja cahntsua ne, cahvë chu xi tsujyihya nangui, chu xi cjaain rë cojo chu xi cjan rë, cojo chu xi vitjen ngahnga híncha chu cahntsua.

⁷ Hacuaha cahndë ngu cjua xi cachja cojo ná cuitjin: “Pedru, tisatjinhgue. Niquihin ngu chu ne, sehe xini chu.” Cuatjin cachja cjua jan.

⁸ Ngajan xi ngahan ne, cuitjin cachjá: “Cumaji, Tatá, ta ngahan ne, cjëë camahani cuíncha ntsuva ngu xcusun xi tsavi vë.” ⁹ Ngajan xi cjua xi nduva ngahnga jan ne, cachja nga cojo ná ma jo ndiya cuitjin: “Xi ha Nina cachja me xi hacuiin tsavi ne, xi canujiin ngaye xi tsavi.” Cuatjin cachja cjua jan cojo ná.

¹⁰ Jyan ndiya camá xcusun vëhë. Hya xi camá ne, sehe cavuya cachjüvë nga rë tsjian jan, quiji yëjë hisca ngahnga. ¹¹ Hya xi camá ne, ha tu ñahñu cafehe jyan xihin ndihya hiscan xi tejña. Hisca nandya Cesarea casatëxa rë xihin jan xi canduvatjengui ná.

¹² Hane Hasen rë Nina cachja cojo ná xi cumacjiin cáacun xi cjué cojo xihin xi cuacun jan. Hya xi camá ne, cëjë cojo rë, hacuaha cavisecoo ná jyun xuta ladu naja xi cuicun vi xi catsanguin. Hane xi caphin jan ne, cavisihin ndava Cornelio. ¹³ Hane me vëhë ne, casuacuenda niji me hacutjin xi cavëë me ngu ángel cahntsua ndava me, cuitjin cachja cojo rë me: “Ningatji cjua ngajan Jope, chjindaye rë cha Simón, cha xi hacuaha hmí rë Pedru.

¹⁴ Hane cha vëhë cuichja cha cojo ri ngujo cjua hacutjin cuma xi cuetjitje ngaye cojo yëjë ni xuta xi siu ndya riji.” Cuatjin cachja ángel jan.

¹⁵ Hane xi cavetsehen cachjá cjua rë Nina cojo rë me ne, cavisehen Hasen rë Nina cahntsua xahasen rë me sacuatjin cavisehen cahntsua xahasen naja ntsacu cavetsihin, ngayaan xuta tjë rë Israel. ¹⁶ Ngajan xi ngahan ne, catsinguítsjen cjua rë Nai naja xi cachja me cuitjin: “Juan ne, cojo nandá cavitenda me, peru ngayun ne, cojo Hasen rë Nina xtenda ngayun.” Cuatjin cachja me.

¹⁷ Vëhë xi hya xi suvá Nina casua rë me cjuandaja xicjin xi casua

naja me ngayaan hya xi camangu tacuun cojo Nai naja Jesucristu ne, hatuxa camaji cavátécja xcusun xi Nina casahmi me. —Cuatjin casuacuenda Pedru.

¹⁸ Xi cahndé me xi cuacun jan xi cuatjin cachja Pedru ne, cajnehnchan cjuatacun rē me, sehe cavetsihin casahmi jyē casahmi hnga me Nina, cuitjin cachja me:

—Xi matsejen ne, cojo xutaxín casua Nina cahndé xi tsindeya me cjuatacun rē me cuisehen me ndiya rē Nina cojo sa xi sacú rē me cjuahñu xatsē.

Xuta rē yungun Antioquía

¹⁹ Quihndé ne, xuta ladu rē Jesús xi cavitsojo me ngatsé rē cjuañihi xi camá hya xi cahme Esteban ne, cavechú me hiscan nangui xi hmí rē Fenicia. Ngujo nga me cavechú me nandya Chipre, ngu cahndé xi vetjucaa tséhē ndachacun. Hane me xi yahnga ne, cavechú me nandya Antioquía xi cavanga me. Hane casuaain me camachaya rē xutaxín cjuandajyihí xi chja tséhē Jesucristu ta suvá ni xuta tjē rē Israel casua me camachaya rē.

²⁰ Peru tjin yahnga xuta ladu rē Jesús xi canduva me tséhē Chipre cojo Cirene. Xi cafehe me nandya Antioquía ne, cachja me cojo xuta xi chja hne Griego, casua me camachaya rē xuta cjuandajyihí xi chja tséhē Nai naja Jesús. ²¹ Hane Nina ne, jemu casua rē me ngahñu. Hacuaha jemu cjin xuta camacjain rē me, hane cavisehen me ladu rē Nai naja.

²² Hane xuta ladu rē Jesús xi siu ngajan Jerusalén ne, hya xi camachaya rē me xcusun véhē ne, catsingatju me Bernabé xi cjuetjengui me xuta ngajan Antioquía. ²³ Hane xi cafehe me jan ne, xi cavéē me hacutjin tisahmi Nina cjuandaja cojo xuta xi cuacun vē ne, jemu ndaja camá rē me. Sehe ngajan xi cachja me cojo yējē xuta jan xi catjinduju me cojo yējē xahasen rē me ndiya rē Nai naja. ²⁴ Cuatjin casahmi me ta, tséhē xi me véhē ne, ngu xihin ndaja me, ña quítsé rē me Hasen rē Nina, hacuaha jercu mangucacun me cojo Nina. Nixtin hya ne, jemu camacjin sa xuta ladu rē Nai naja.

²⁵ Hya xi camá ne, cavetju Bernabé quiji me ngajan Tarso, cavanguise me Saulo. ²⁶ Hane xi casacu rē me Saulo ne, cavuya quijicojo me me ngajan Antioquía. Cavyuju catsijo me ngajan ngu nu jingu, casahmitangun me cojo xuta rē yungun jan. Jemu cjin xuta cavicuya rē me cjuá rē Nina. Hacuaha ngajan Antioquía xi tjuntjun cachja xuta tséhē yējē xuta ladu rē Jesús xi xuta rē Cristu xi meje cuichja cjuá vē cristiano.

²⁷ Nixtin hya ne, cafehe ngujo profeta ngajan Antioquía xi canduva me tséhē Jerusalén. ²⁸ Ngajan xi cavetjujñi ngu me ngajñi rē profeta xi cuacun vē, ngu me xi hmí rē Agabo, hane cachja me cjuá xi Hasen rē Nina casua rē me xi ha tu hitsé sa ne, cuinduva ngu jindya jyē jinguyjē ni ngasunhndé. Jindya vē ne, cavetjucaa jain hya xi Claudio matitjun camahani me. ²⁹ Ngajan xi xuta ladu rē Jesús ngajan Antioquía ne, cavyuju me cjuatacun rē me jima ngu me xi cuisecoo me ha tucutjin xi chutaha me hane tsingatju me tséhē xuta ladu rē Jesús xi siu ngajan Judea. ³⁰ Hya xi camá ne, cuatjin casahmi me. Catsingatju me cjuandaja véhē, cavaha Bernabé cojo Saulo xi sua me tsja xuta changá xi siu ngajan Judea.

12

Cjuañihi xi cavatju xuta rē yungun

¹ Hane ngajñi rē nixtin xi cuacun vē ne, Herodes, me xi matitjun ne, cavitexa me cachjahá rē ngujo xuta rē yungun xi sahmi me cojo cjuahngatacun.

² Hacuaha cavitexa me xi cueya Jacobo, hntsé Juan, cojo quicha. ³ Xi vutsejen

me xi cachuya rë xuta tjë rë Israel xcusun vëhë ne, hacuaha cavitexa me cachjahá rë Pedru, nixtin rë suhi rë pan xi tsajin san rë. ⁴ Sehe caveya me ndavaya, hacuaha cavitexa me tyjuhunngu sindadu xi cjue sahmi rë me cuidadu nixtin nixten chuya ñuju chuya ñuju sindadu jima ngu ndiya. Xi catsingataha cacun me ne, xi cuatju suhi tsëhë Pascua ne, sehe cuaxë me xcun yëjë ni xuta. ⁵ Cuatjin camá xi Pedru ne, casetjo me ndavaya. Peru xuta rë yungun ne, cafehya me cojo nguñaja xahasen rë me cjuandaja rë Nina xi cuma rë Pedru.

Cavaxëtje Nina Pedru tsëhë ndavaya

⁶ Ngu nguixun chaja sa xi cuitexa Herodes xi cuetju Pedru xi cumacuenda jyë rë me ne, Pedru ne, jiñafë me, tjinñu me cojo jo cadena ngajñi rë jo sindadu. Hacuaha siu sa jo sindadu tingotjo ndavaya xi sahmi cuidadu. ⁷ Hya xi camá ne, cafehe ngu ángel tsëhë Nina, hane jercu camahasen cahntsua ndavaya. Hane xi quiji cavëhëtsja ángel jan ndanisin rë Pedru ne, catsisatjenhnga rë me, sehe cachja cojo rë me cuitjin:

—Tisatjinhnga sanii. —Cuatjin cachja.

Hane hora vëhë ne, cavixuhndu cadena xi tjinñu tsja me. ⁸ Sehe ngajan xi ángel ne, cachja nga cojo rë me cuitjin:

—Cheje tsjian riji, hacuaha tinche chuxinxhtë riji. —Cuatjin cachja.

Hane Pedru ne, cuatjin casahmi me. Cachja nga ángel cuitjin:

—Cheje tsjana riji, hane ndove hacutjin cjuë. —Cuatjin cachja ángel jan.

⁹ Hane xi cavetju me ne, quiji me hacutjin quiji ángel. Peru hvín me xi xcusun xi tisahmi ángel jan ne, cjuaquixi ta xi má rë me ne, chini tichja cojo rë me. ¹⁰ Hane xi cavatjutaha me ngu cavatjutaha me jo sindadu ne, sehe cafehe me tingotjo quicha xi cuëtjuun xi cuanguen ngajñi nandya. Tingotjo vëhë ne, catuxaha suvá. Xi cavetju me ne, sehe quiji me. Hane xi cafehe me hiscan xi faha rë ngu nga ndiya ne, ha tu ñañu quijixin ángel tsëhë me.

¹¹ Sehe ngajan xi cajnercu Pedru xi cjuaquixi xcusun xi camá, hane cachja me cuitjin ngajñi rë suvá me:

—Quihndë ne, hvë jain xi Nina ne, catsingatju me ángel rë me, hane cavaxëtje ná me tsëhë Herodes, hacuaha cavaxëtje ná me tsëhë yëjë xcusun xi meje sahmi xuta tjë rë Israel cojo ná. —Cuatjin cachja me ngajñi rë suvá me.

¹² Hane xi tu catsingataha cacun me cuatjin ne, sehe quiji me ndava María naa rë Juan, me xi hacuaha hmí rë Marcos. Ngajan ne, jercu tjin tangun xuta xi tisahmi me oración. ¹³ Hane xi cafehe me jan ne, catsijane me tingotjo. Hane sehe canduvavaha ngu na hndixahan xi hmí rë Rode xi cjuinenguise na yo xi titsijane. ¹⁴ Hane xi camachaya rë na xi xta rë Pedru xi tichja ne, tsëhë xi jercu ndaja camá rë na ne, hisca cavuxaaín na tingotjo ta marcu macjain cavuya na quiji cachja na cojo me xi yahnga jan xi Pedru ne, secun me tingotjo taha candatsen. ¹⁵ Peru me xi cuacun jan ne, cuitjin cachja me cojo rë na:

—Sca ri ngaye. —Cuatjin cachja me.

Peru na vëhë ne, cachja sa na xi hatuxa cjuaquixi xi hacui me. Hane me xi cuacun vë ne, cachja me cuitjin:

—¿Hacuiin ángel xi sahmi rë me cuidadu? —Cuatjin cachja me.

¹⁶ Hane Pedru ne, quijinduju sa me titsijane me tingotjo jan. Hane xi cavuxaha me tingotjo jan ne, cavëë me xi hacui jain Pedru, hane jemu quijircun rë me. ¹⁷ Ngajan xi Pedru ne, casahmitsja me cojo rë me xi

cuiyujuyuu me, sehe cavetsihin casua cuenda me hacutjin camá xi Nai naja ne, cavaxê rê me ndavaya. Sehe ngajan xi cachja me cuitjin:

—Tuhun cumachaya rê Jacobo cojo sa xuta ladu rê Jesús xi yahnga tsêhê xucusun xi camá vi. —Cuatjin cachja me.

Hya xi camá ne, sehe cavetju me quiji me jingu sa cahndê.

¹⁸ Hane xi casahsen jan ne, ngu cjuandya jyê casahmi sindadu jan, tsêhê xi hvíin cha mé hacutjin camá rê Pedru. ¹⁹ Hane Herodes ne, cavitexa me quiji cavinchise rê Pedru, peru casacuiin me. Hane vêhê xi cafahataha rê me sindadu xi casahmi cuidadu jan, sehe cavitexa me cachjaha rê sehe cueya cha. Hya xi camá ne, cavetju Herodes cavuya quiji me ngajan Cesarea, cavejña me.

Cjuaveya rê Herodes

²⁰ Quihndê ne, Herodes me xi matitjun ne, jemu cjan rê me cojo xuta nandya Tiro cojo nandya Sidón. Ngajan xi xuta xi cuacun vê ne, camatangun me, sehe quijitjengui me Herodes. Xi tjun tjun ne, camá casahmi me xi cavinga rê Blasto me. Blasto ne, me vêhê xi fahacuenda me ndava Herodes. Hya xi camá ne, xuta xi cuacun jan ne, cafehya rê me Herodes xi cuijnetaha si ngajñi rê me cojo me vêhê. Cuatjin cafehya me xi cuacun vê ta, tsêhê xi nangui rê Herodes ne, ngajan vinduva xichinë tsêhê nandya Tiro cojo Sidón.

²¹ Cavechú nixtin xi cavejña Herodes xi cuichja me cojo xuta xi cuacun jan ne, sehe cavaja me tsjian tsêhê xi matitjun me, sehe quiji me cavêjña me cahndê rê me xi cuichja me cojo xuta. ²² Hane xi cajnetaha cachja Herodes ne, ngajan xi xuta ne, cuitjin cajindaya me cachja me:

—¡cjuá vêhê ne, cjuá rê ngu nina, hacuiin cjuá rê ngu xuta! —Cuatjin cajindaya me cachja me. ²³ Ha hora vêhê ni ne, ngu ángel tsêhê Nina ne, casahmi xi cafaha rê Herodes ngu chíhin, tsêhê xi hacuiin casahmi jyê casahmi hnga me Nina. Hya xi camá ne, cjinê rê me chundu, hane cahme me.

²⁴ Peru cjuá rê Nina ne, quijinduju sa cavitsojo.

²⁵ Ngajan xi Bernabé cojo Saulo ne, casahmichihin me cjuandaja rê xuta yuma sehe cavuya me tsêhê Jerusalén. Hacuaha canduvacojo me Juan, xi hacuaha hmí rê me Marcos.

13

Casuaxa Nina Bernabé cojo Saulo

¹ Quihndê ne, ngajñi rê xuta rê yungun xi tacun ngajan Antioquia ne, hinchajñi me xi má profeta hacuaha hinchajñi me xi vicuya cjuachacun. Cuitjin hmí rê xuta xi cuacun vê: Bernabé, Simeón, me xi cachja xuta tsêhê Nchava Jma, Lucio, ngu xuta Cirene, Manaén, me xi camacha tangun cojo Herodes, me xi matitjun, hacuaha cojo Saulo. ² Hane jinguyêjê rê xi tisahmi me xi cuacun vê xa rê Nina hacuaha tisahmi me xun rê me ne, Hasen rê Nina ne, cuitjin cachja cojo rê me:

—Tuhunxun rê Bernabé cojo Saulo, cojo sa xi sahmi me xa xi ha casuáxa rê me.

³ Ngajan xi casahmi me xi cuacun jan xun rê me, hacuaha casahmi me oración rê me ne, sehe cavisanetsja me Bernabé cojo Saulo hane chuva vêhê cafaha me xa rê Nina. Hya xi camá ne, sehe catsinguijnetaha me cjuá cojo xicjin me.

Quiji apóstol ngajan Chipre

⁴ Ngajan xi Bernabé cojo Saulo ne, quiji me sacuatjin cachja Hasen rë Nina cojo rë me. Cavetju me quiji me nandya Seleucia. Hane xi cafehe me ngajan ne, cavisehen me ngu barcu, sehe quiji me Chipre, ngu rquí nangui xi vetjucaa xcun ndachacun. ⁵ Hane xi cafehe me Salamina, ngu nandya tséhë Chipre ne, casua me camachaya rë xuta cjua rë Nina ngajan yungun rë xuta tjë rë Israel. Hacuaha cavisecoo Juan Marcos me xi quiji me jan.

⁶ Hane xi quiji me jinguyë ni ladu vëhë ne, cavechú me hisca nandya Pafos. Hane ngajan cavechútaha me ngu cha surqui xi hmí rë Barjesús. Cha vëhë ne, ngu profeta ndacha cha, hacuaha tjë rë Israel cha. ⁷ Hane tangun tsuyihiya cha cojo me xi matitjun xi hmí rë Sergio Paulo, ngu me xi jemu vechú cjuatacun rë. Me vëhë ne, cajindaya me Bernabé cojo Saulo tséhë xi mechu cuihndë me cjua rë Nina. ⁸ Peru cha surqui jan ne, xi hacuaha hmí rë Elimas xi hne griego ne, casahmi condra cha me xi cuacun vë, tséhë xi mijí rë cha xi me xi matitjun jan ne, cumangucacun me cojo Jesucristu. ⁹ Peru Saulo, me xi hacuaha hmí rë Pablo ne, catsë rë me cojo Hasen rë Nina. Cavutsejennadaja me cha surqui jan ne, sehe cachja me cojo cha cuitjin:

¹⁰ —¡Ngaye xindesu, ngaye cha ndacha, ngaye quihndi rë xitsehen, ngaye condra rë yëjë ni cjuandaja ne! ¿Hatuxa cuihinnduju sa ninguetsin ndiya ndajyihí rë Nina? ¹¹ Quihndë chutsijin ta Nina ne, sahmi ri me castigu. Cuma rcá ngaye, cumatsijin ri ndavá rë tsuhi ngujo nixtin. —Cuatjin cachja me.

Hane ngutjen ni camá rë cha sacuaha xi canduva ngu yuffi xi cavetsa rë tuxcun cha, hane cama rcá cha. Hane cjuí nguehe cjuí ngajan cha vanguisetsja cha yo xi cuaha tsja cha. ¹² Ngajan xi me xi matitjun jan ne, xi cavëe me xcusun xi camá ne, camacjain rë me cjuachacun xi chja tséhë Nina ta, tséhë xi jemu quijircun rë me tséhë cjuachacun vëhë.

Quiji apóstol ngajan Antioquía, distritu Pisidia

¹³ Hya xi camá ne, xi cavetju Pablo cojo me xi siutaha cojo me ngajan Pafos ne, sehe cavisehen me ngu barcu, quiji me nandya Perge, ngajan distritu Panfilia. Hane ngajan cavetjuxin Juan Marcos tséhë me, hane cavuya nga me Jerusalén. ¹⁴ Hane Pablo cojo Bernabé ne, cavetju me tséhë Perge, hane cafehe me Antioquía, ngajan distritu Pisidia. Hane xi cavechú nixtin xi chjahájenda rë ne, quiji me cavisehen me yungun ne, quiji me caviyuju me. ¹⁵ Hane xi cavatju cachutaya rë ngujo cjua xi catsihindu Moisés cojo ngujo cjua xi catsihindu profeta ne, xutaxa rë yungun jan ne, catsingatju me cjua tséhë Pablo cojo Bernabé, hane cuitjin cachja me:

—Ngayun ne, sa xi tjin mé cjuandajyihí xi meje cuinújun cojo xuta ne, cuma cuinújun. —Cuatjin cachja me.

¹⁶ Hane xi casecun Pablo ne, casahmitsja me cojo xuta sehe cachja me cuitjin:

—Ngayujun ngarcun ni xuta tjë rë Israel cojo sa ngayujun ni xi hacuaha chjuhuncun Nina ne, tisiñuju cjua xi cuichjá cojo nuju. ¹⁷ Nina naja ngayaan tjë rë Israel ne, cavaxijin me xutachanga naja, hane tséhë me vëhë casahmi cjín sa Nina xuta. Sehe tséhë me casahmi me ngu nación xi hñu vetju cjua rë hya xi caviyujutaha me ngajan nación Egipto. Hane cojo ngahñu xi tjin rë Nina ne, cavaxë me xuta xi cuacun vë tséhë ngajan. ¹⁸ Hane Nina ne, caaca rë me cojo xuta xi cuacun vë, hya xi catsuyihiya me ngajan ngu xín tséhë nandya sacuaha yachan nu. ¹⁹ Hane xi cavatju catsingquetsun Nina yatu nación ngajan nangui Canaán ne, sehe casua me xutachanga naja jan xi cuma tséhë me ²⁰ sacuaha ñuju cientu vasen nu. Hane xi cavatju vëhë

ne, sehe cavaxijin me xuta xi camá me juez, hisca nixtin xi cavéjña profeta Samuel. ²¹ Hya xi cavatju vèhë ne, cafehya xutachanga naja jan ngu me xi cumatitjun tsèhë me. Cuatjin camá xi Nina ne, casuaxa me xutachanga naja Saúl, quihndi rè Cis, ngu xihin tjë rè Benjamín, xi cumatitjun me cahntsua yachan nu. ²² Hane xi cafahaxin Nina me vèhë xi matitjun me ne, cavejña me xutachanga naja David xi cuma titjun me. Cuitjin cachja Nina tsèhë David: “Ngahan vutsején ne, cha David, quihndi rè cha Isaí ne, cha vèhë ngu cha xi jemu chuya ná tsèhë, ngu cha xi sahmi yèjë hacutjin xi meje ná.” Cuatjin cachja Nina. ²³ Ngu xuta tjë rè xutachanga naja David, me vèhë ne, xi hacui Jesús, me xi catsingatju Nina xi cuaxëtje naja गयाan xuta tjë rè Israel, sacuatjin xi ha cachja me. ²⁴ Hane xi chaja sa xi cjuete Jesús ne, nima Juan ne, cachja me cojo yèjë xuta tjë rè Israel xi meje rè xi tsindeya me cjuatacun rè me, hacuaha xtenda me. ²⁵ Quihndë ne, hya xi ha camatiña nixtin xi cueya nima Juan ne, cuitjin cachja me: “Hacuiin ngahan xi tsingatju Nina, xi nechunyun rè ta ngaxtun ne, nduva ngu me xi hitsë sa vechu cjuatacun rè xi hisca cumajin tsinguishehercu sahme tyjahi chuxinxte rè.” Cuatjin cachja nima Juan.

²⁶ Ngayejen ngarca ni गयाan xuta tjë rè xutachanga naja Abraham cojo sa ngayujun ni xi hacuaha chjuhuncun Nina ne, गयाan catsingatju naja Nina cjuandajyih vihi xi chja hacutjin cuetjuntjeen. ²⁷ Yèjë xuta xi siu ngajan Jerusalén cojo xutaxa rè jan ne, hvíin me xi Jesús ne, hacui me xi catsingatju Nina, hacuaha cajni rcu me cjuar yèjë ni profeta xi chutaya rè yèjë ni nixtin xi nixtin chjahájenda rè. Vèhë xi hya xi catsicanijjyë xuta xi cuacun vë Jesús ne, casahmi me xi cavetjucaa cjua xi cachja profeta vë. ²⁸ Hane handasa casacuiin rè me jyë xi vechú chuya rè xi cueya Jesús ne, peru cafehya rè me Pilatu xi cuitexa me xi cueya Jesús. ²⁹ Hane xi cajnetaha casahmi me yèjë xcusun sacuatjin camahindu tsèhë Jesús ne, sehe catsitujne me tsèhë cru, sehe caseyaniji cahntsua ngu tsjun. ³⁰ Peru Nina catsicuya rè me cjuahña. ³¹ Hya xi camá ne, jemu cjin nixtin xi camatsejen me ngajñi rè xuta xi cavetju tangun me cojo ngajan Galilea hane hacuaha quiji tangun me cojo ngajan Jerusalén. Quihndë ne, xuta xi cuacun vë ne, tisua me jimachaya rè xuta tsèhë Jesús.

³² Hane ngayin ne, hacuaha titihín jimachaya nuju ta cjuandajyih xi ha cachja Nina cojo xutachanga naja ne, ³³ cjua vèhë Nina casahmi me xi cavetjucaa ngajñi naja गयाan tjë rè xutachanga naja hya xi catsicuya me Jesús cjuahña. Hacuaha cuitjin camahindu xcun Salmo xi ma jo: “Ngaye xi quihndi naha ngaye; quihndë ngahan suá ri cjuahña.” Cuatjin cachja Nina xcun Salmo vèhë. ³⁴ Hacuaha Nina ne, ha cachja me xi tsicuya me Jesús cjuahña, hacuaha yojo rè Jesús ne, hacuiin cjuehndu, cuitjin cachja me xcun xujun rè me: “Hatuxa suá ri ximinchacun naha, sacuatjin xi ha cachja xi suá rè David.” Cuatjin cachja Nina. ³⁵ Hacuaha catsihindu sa David xcun ngu nga Salmo cuitjin: “Tuun cahndë xi cjuehndu yojo rè me, xi hatuxa tjengui nuju cojo yèjë xahasen rè me.” Cuatjin camahindu. ³⁶ Peru David ne, xcun xi ha cavatju casahmi me sacuatjin meje rè Nina ne, cahme me, caseyaniji tangun me cojo nima xutachanga rè me, hacuaha cafehndu yojo rè me. ³⁷ Peru Jesús, me xi Nina catsicuya rè cjuahña ne, cafehndiin yojo rè me. ³⁸ Vèhë xi ngayujun ngarcun ni ne, meje rè xi cuijnercun xi ngatsë rè me vèhë ne, tisacu jimachaya nuju xi tjin cjuaninchataha tsèhë jyë nuju, ³⁹ hacuaha ngatsë ni rè me vèhë ne, yèjë ni xuta xi mangucacun cojo rè me ne, tsicjë Nina yèjë jyë rè me ta xcun ley rè Moisés ne, sacuiin rè cjuaninchataha. ⁴⁰ Vèhë xi meje rè xi

cuinechun cuidadu, sá tu cuatjun cuma sacuatjin xi catsihindu profeta xcun xujun rë Nina hatsëë nixtin, cuitjin catsihindu me:

⁴¹ Chutsujun ni, ngayun xi macjaain nuju ne, catjircun nuju, sehe tjangun ta jinguyëjë rë xi nechun ne, sahme ngu chircun xi hisca cumacjaain nuju sa xi yo cuichja cojo nuju.

Cuatjin catsihindu profeta. Hacuaha cojo cjua vëhë ne, catsinguijnetaha Pablo cachja me.

⁴² Hane hora xi tivetju Pablo cojo Bernabé tsëhë yungun jan ne, cachja xuta cojo me xi cuetjucaa totje nga ne, meje rë me xi cuya cuichja nga Pablo tsëhë cjuacjintacun vëhë. ⁴³ Hane hya xi cavetju xuta tsëhë yungun ne, jemu cjín xuta tjë rë Israel hacuaha jemu cjín xutaxín xi hacuaha faharcun me Nina ne, quiji me cojo Pablo cojo Bernabé. Hane Pablo cojo Bernabé ne, cachja me cojo xuta xi cuacun jan xi catjinduju sa me cojo ndiya rë cjuandaja rë Nina.

⁴⁴ Hane xi cavetjucaa nga totje nixtin xi chjahájenda rë ne, ha ña meje yëjë ni xuta nandya camatangun me xi cuisñuju me cjua rë Nina. ⁴⁵ Peru hya xi cavëë yahnga xuta tjë rë Israel xutacjín jan ne, catsë rë xahasen rë me cojo cjuachini, hacuaha cachja me condra tsëhë cjua xi cachja Pablo, hisca choho cachja me tsëhë me. ⁴⁶ Ngajan xi Pablo cojo Bernabé ne, cachja me cojo xuta tjë rë Israel jan cuitjin:

—Hatuxa ngayun titjun camameje rë xi canújin cojo nuju cjua rë Nina. Peru quihndë ta nitjungun hacuaha xi má nuju ne, machjiriin ngayun xi cojo ngayun satë nuju cjuahñu xatsë ne, cuanguin tihín cumachaya rë xutaxín cjuandajyihí vëhë. ⁴⁷ Cuatjin nihñi ta, tsëhë xi cuitjin cavitexa niji Nina: Ngahan tsingátju ri sacuaaha ngu ndihi xi tehe cjuahasen xi cuma rë xutaxín, cojo sa xi ngatsë rë cjuandajyihí xi cuinoje ne, cuetjutje xuta jinguyë ni, hisca hiscan vijnetaha ngasunhndë.

Cuatjin cavitexa niji Nina. —Cuatjin catsacjuiin Pablo cojo Bernabé, cachja me.

⁴⁸ Hane xi cahndë xutaxín jan cjua vëhë ne, jemu ndaja camá rë me, hacuaha casahmi jyë casahmi hnga me cjua rë Nina. Hane yëjë ni xuta xi cavaxijin Nina xi sacú rë cjuahñu xatsë ne, camacjain rë me cjuandajyihí vëhë.

⁴⁹ Hya xi camá ne, jercu cavitsojo cjuandajyihí xi chja tsëhë Nai naja jinguyë ni ladu vëhë. ⁵⁰ Peru xuta tjë rë Israel jan ne, cavisiajmi me cojo ngujo yachjin nchina tsëhë yungun jan, cojo ngujo xuta xi matitjun tsëhë nandya jan, sehe cavetsihin casua me ngu cjuañihí xi cuma rë Pablo cojo Bernabé, sehe cavaxëxin me tsëhë nangui rë me. ⁵¹ Peru Pablo cojo Bernabé ne, cavitsune me choje rë ntsacu me, xi sua me machaya rë xuta xi cuacun jan xi vutsejen me me sacuaaha xutaxín xi hvín cjua rë Nina. Sehe cavetju me quiji me nandya Iconio. ⁵² Hane xuta ladu rë Jesús ne, quitsë rë me cjuasua hacuaha quitsë rë me tsëhë Hasen rë Nina.

14

Quiji apóstol ngajan Iconio

¹ Hya xi camá ne, Pablo cojo Bernabé ne, quiji tangun me yungun rë xuta tjë rë Israel ngajan nandya Iconio. Hane xi cachja me cojo xuta ne, jercu cjín camahani xuta tjë rë Israel cojo xutaxín camacjain rë me cjua jan. ² Peru xuta tjë rë Israel xi ha mijí cumacjain rë ne, cachja me cojo xutaxín, catsinguetsun me cjuatacun rë me xi cuacun vë condra tsëhë apóstol xi cuacun jan. ³ Peru

jemu jyë nixtin caviyujutaha me hacuaha hacuiin catsacjun me xi cachja me tsêhë Nai naja. Hane Nai naja ne, casua me cahndë xi casahmi apóstol cjuarcun, cojo sa xi cumatsejen xi quixi cjua xi chja me tsêhë cjuandaja rê Nai naja. ⁴Peru xuta nandya jan ne, hacuiin tangun camá cjuatacun rê me ta ngujo me ne, cachuya rê me tsêhë xuta tjê rê Israel, peru yahnga nga me ne, cachuya rê me tsêhë apóstol jan. ⁵Hya xi camá ne, xutaxín cojo xuta tjê rê Israel cojo xutaxa rê jan ne, caviyujucacun me xi choho sahmi me cojo apóstol xi cuacun jan hacuaha tsiquehen me cojo ndyojo. ⁶Peru apóstol jan ne, camachaya rê me cjua jan, hane cavanga me quiji me ngajan nandya Listra cojo nandya Derbe, ngajan distritu Licaonia, cojo ngujo sa cahndë tahndee jan. ⁷Hane yêjê cahndë hacutjin catsuyihiya me ne, cachja me cojo xuta cjuandajiyi xi chja tsêhë Jesucristu.

Meje tsiquehen xuta Pablo ngajan Listra

⁸Cavéjña ngu cha ngajan nandya Listra, ngu cha xi tsajin rê ngahñu ntsacu, tsêhë xi tsehen hisca hya xi catsin cha. Maji camahani fi cha. ⁹Tacun cha tivisiñuju cha cjua xi tichja Pablo. Ngajan xi xi cavutsejenndaja Pablo cha ne, cavacun rê me xi mangucacun cha xi hatuxa cumandaja cha, ¹⁰sehe ngajan xi cachja me cojo cha cuitjin:

—Tisechunquixun. —Cuatjin cachja me.

Hya xi camá ne, hisca cacaahnga cha xi casecun cha, sehe cavetsihin quiji ntsacu cha.

¹¹Ngajan xi xutacjín jan ne, xi cavëë me xcusun xi casahmi Pablo ne, cavetsihin cajindaya me cachja me hne rê me, xi hmí rê hne Licaonia, cuitjin cachja me:

—¡Me xi cuicun vi ne, nina me vi, xi canduva me tsêhë ngahnga, canduvat-jengui naja me, tu xi tsejen me sacuaaha xuta! —Cuatjin cachja me.

¹²Bernabé ne, xi má rê xuta jan ne, nina Zeus me, hane Pablo ne, nina Hermes me, tsêhë xi me vëhë xi hitsë sa jercu cachja me. ¹³Ngajan xi nahmi tsêhë nina Zeus jan, me xi tacun yungun rê tjeheh nandya ni ne, canduvacojo me chu ndyaja hacuaha canduvacojo me naxu ngajan hiscan tingotjo tsêhë nandya. Hane nahmi cojo xutacjín jan ne, meje tsiquehen me ndyaja jan hacuaha sua me naxu jan xi cjuaharcun me Pablo cojo Bernabé. ¹⁴Hya xi apóstol Bernabé cojo Pablo camachaya rê me hacutjin tisahmi xuta jan ne, cajavë me tsjian rê me cavicheya me, ta cuatjin xcusun rê xuta tjê rê Israel hya xi cjan rê me. Sehe cavanga me quiji me ngajñi rê xutacjín jan, cajindaya me cachja me cuitjin:

¹⁵—Ngayujun ni ne, ¿mé má cuitjin tinihñu? Ngayin ne, hacuaha xuta ni ngayin sacuatjin nuju ngayun. Canújin cojo nuju ngu cjuandajiyi xi quichihin, cojo sa xi cuejñuxun xcusun xi machjirin vi, hacuaha cojo sa xi cuisuhun ndiya rê ngu Nina xi quicun, me xi casahmi ngahnga cojo nangui cojo ndachacun, cojo yêjê ni xi tjín jan. ¹⁶Nina ne, casua me cahndë xi, nixtin xi cavatju ne, xuta tsêhë yêjê ni nación ne, casahmi me hacutjin xi ha xcusun rê súvá me. ¹⁷Peru tsêhë xi casahmi me cjuandaja ne, casua me camachaya nuju xi me vëhë xi Nina me; catsingatju me tsi tsêhë ngahnga xi cuma nuju, hacuaha casua nuju me nixtin rê tutjê nuju, casua me xi chinu, hacuaha catsinguitsë me xahasen nuju cjuasua. —Cuatjin cajindaya me cachja me.

¹⁸Handasa cachja me cuatjin ne, peru ha tu hitsë sa ne, camaji cavatëcja me xi tsiquehen xutacjín jan chu xi sua me cjuatjo cojo apóstol jan sacuaaha nina rê me.

¹⁹Hya xi camá ne, canduva ngujo xuta tjê rê Israel tsêhë nandya Antioquia cojo nandya Iconio. Hane catsinguetsun me cjuatacun rê xutacjín jan, sehe

cavetaha me ndyojo Pablo hane cajavějne me cavaxë me ngajan xín tsëhé nandya, tsëhé xi xi má rë me ne, ha cahme Pablo. ²⁰ Peru xi tu catsëxtin xuta ladu rë Jesús jan hiscan jiña Pablo ne, cavisatjenhnga me quiji me cavisehen nga me nandya. Hane xi camá nchujun jan ne, cavetju me quiji me cojo Bernabé ngajan nandya Derbe.

Cavuya Pablo cojo Bernabé ngajan Antioquia, distritu Siria

²¹ Hane xi cafehe me jan ne, casua me camachaya rë xuta cjuandajyihi xi chja tsëhé Jesucristu. Hane jemu cjin xuta xi cavisehen me ladu rë Jesús. Hya xi camá ne, cavuya nga me Litra cojo Iconio cojo Antioquia, distritu Pisidia. ²² Caviyujuhñu me cjuataacun rë xuta ladu rë Jesús, hacuaaha cachja me cojo rë me xi catjinduju me xi mangucacun me cojo Jesús. Hacuaaha cachja sa me cojo rë me cuitjin:

—Meje rë xi jemu cjin cjuañihi cuatjuun cuma sehe cuiseen hiscan sahmi Nina gobiernu. —Cuatjin cachja me.

²³ Hacuaaha casuaxa rë me ngujo xuta changá jima ngu yungun jan, xi cjuahacuenda me xuta rë yungun. Hane xi cavatju casahmi me oración hacuaaha casahmi me xun rë me ne, sehe caviyuju me xuta rë yějë yungun jan tsja Nai naja, me xi camangucacun xuta jan cojo. ²⁴ Hya xi camá ne, cavuya cavatju nga me distritu Pisidia, sehe cafehe me nandya Perge, distritu Panfilia. ²⁵ Hane xi café cachja me cojo xuta jan cjuandajyihi ne, sehe cavetju me quiji me nandya Atalia. Hane xi cavetju me ngajan ne, sehe cavisehen me barcu cavuya quiji me Antioquia, ²⁶ nandya hiscan xi caviyuju xuta me ngahma cjuandaja rë Nina xi sahmi me xa xi sehe cajnetaha casahmi me jan. ²⁷ Hane xi cafehe Pablo cojo Bernabé jan ne, sehe casahmitangun me yějë xuta rë yungun, casuacuenda me yějë hacutjin xi casahmi Nina, nixtin xi quiji casahmi me xa rë Nina. Hacuaaha casuacuenda me xi Nina ne, cavuxaha me ndiya xi cumangucacun xutaxín cojo Jesús. ²⁸ Hane hacuiin hitsë nixtin caviyujutaha me jan cojo xuta ladu rë Jesús.

15

Junta xi camá ngajan Jerusalén

¹ Hya xi camá ne, ngujo me xi xuta tjë rë Israel ne, cavetju tsëhé Judea hane cafehe me Antioquia, cachja me cojo yahnga xuta ladu rë Jesús cuitjin:

—Sa xi xtiin rë chuxin nuju sacuaaha xcusun xi cavejña Moisés ne, cumaji cuetjuntjun. —Cuatjin cachja me.

² Ngajan xi Pablo cojo Bernabé ne, hacuiin hitsë casecjan cjuarë me cojo xuta xi cachja cuatjin jan. Vëhé xi xuta rë yungun jan ne, casuaxa me Pablo cojo Bernabé cojo ngujo sa me xi cjue me xcun apóstol cojo xcun xuta changá rë Jerusalén, xi ha vëe me cjuarë Nina xi cuinenguise me tsëhé cjuacjintacun xi casuandya rë me ngajan.

³ Ngajan xi xuta xi cuacun cavitexa xuta rë yungun jan ne, cavatju me distritu Fenicia cojo distritu Samaria. Hane cuatjin tisuacuenda me hacutjin xi xutaxín ne, hacuaaha cavisehen me ndiya rë Jesús. Hane yějë xuta ladu rë Jesús xi cavisifñuju cjuarë jan ne, jemu ndaja camá rë me.

⁴ Hane xi cafehe me Jerusalén ne, jemu ndaja cafahatsja xuta rë yungun jan me. Hacuaaha jemu ndaja cafahatsja apóstol cojo xuta changá jan me. Hya xi camá ne, sehe casuacuenda me yějë hacutjin xi casahmi Nina, nixtin xi quiji casahmi me xa rë Nina. ⁵ Peru ngujo xuta fariseo xi hacuaaha camá me ladu rë Jesús ne, cavetjuñi me cachja me cuitjin:

—Xutaxín xi visehen ladu rè Jesús ne, meje rè xi xti chuxin rè me hacuaha cuinújan cojo rè me xi sahmi me yějě sacuatjin chja ley rè Moisés. —Cuatjin cachja me.

⁶ Hya xi camá ne, camatangun apóstol cojo xuta changá xi cjuahacuenda me cjuacjintacun vèhě. ⁷ Hane ha xcun xi ha jemu cavisajmicjín me ngajñi rè me ne, sehe ngajan xi cavetjujñi Pedru, cachja me cuitjin:

—Ngayujun ngarcun ni matsejen ne, ngayun ne, ha hyun ta hisca nixtin titjun ne, ngahan cavaxijin ná Nina ngajñi nuju cojo sa xi ngatsě naha ne, cumachaya rè xutaxín cjuandajyihí xi chja tsěhě Jesucristu hane cumacjain rè me. ⁸ Hane Nina, me xi vějě yějě cjuatacun rè xuta matsejen ne, catsingacun me xi cachuya rè me tsěhě xutaxín, hya xi casua me Hasen rè me xi cuma rè xuta xi cuacun vě, sacuatjin casua naja me ngayaan. ⁹ Tangun ni casahmi Nina cojo rè me sacuatjin casahmi Nina cojo naja ngayaan, xi catsityjahi me cjuatacun rè xuta xi cuacun vě ta, tsěhě xi camangucacun me cojo Nina. ¹⁰ Quihndě ta cuatjin ne, ¿mé má cuatjin meje chjuhunchuvun rè Nina cojo chuya rè ley rè Moisés, xi cuatjin tivitexun rè xuta ladu rè Jesús xi cuacun jan xi sahmichihin me ngu xcusun xi hisca xutachanga naja cacaain rè me casahmichihin me hacuaha hisca ngayaan matsejen ne, cacaain naja canihñachehen? ¹¹ Peru hacuini cuatjin ta ngayaan ne, macjain naja xi cuetjuntjeen ngatsě rè cjuandaja rè Nai naja Jesús sacuatjin rè me xi cuacun vèhě. —Cuatjin cachja Pedru.

¹² Ngajan xi xutacjín jan ne, ngu caviyujuyuu me cavisñuju me cja xi cachja Bernabé cojo Pablo hora xi casuacuenda me hacutjin casahmi Nina cjuarcun ngajñi rè xa xi casahmi me ngajan nangui rè xutaxín. ¹³ Hane hora xi cajnetaha cachja Bernabé cojo Pablo cja vèhě ne, sehe cachja Jacobo cuitjin:

—Ngayujun ngarcun ni matsejen ne, tinuhyun cja xi cuichjá cojo nuju. ¹⁴ Sehe cajnetaha casuacuenda Simón hacutjin camá xi tjuntjun catsingacun Nina xi hacuaha meje rè me xutaxín, hya xi cavaxijin me ngujo xutaxín jan xi cuma xuta ladu rè me. ¹⁵ Cja rè Nina xi catsihindu profeta hatsě nixtin matsejen ne, tjin tangun cjuatacun rè cojo cja xi cafě cachja Simón. Cuitjin camahindu:

¹⁶ Xi cuatju xcusun vèhě ne, cúa nga,
hane sahme xatsě ndava David xi cavetsun;
cúa sahmendaja nga xi cavixujne,
tsindaja nga ngundiya,

¹⁷ cojo sa xi xuta xi yahnga ne, sahmi me ngahñu xi cuisehen me ladu naha, cuma cuinújan ne, yějě xutaxín xi ngahan cavaxejen xi cuma tsahan me.

¹⁸ Cuatjin chja Nina, me xi ha casua cja vèhě hatsě nixtin.
Cuatjin camahindu.

¹⁹ Vèhě xi xi má ná ngahan matsejen ne, mijí rè xi tahan xti rè xutaxín xi visehen ladu rè Nina. ²⁰ Xi meje rè xi nihña ne, xi nihinduun rè me xi sinii me xichině xi caviyuju xcun nina ndyojo, sahmii me cjuatsehen xi sahmi xuta cojo ngu xi hacuini chjuun rè hacuini xihin rè me, sinii me jojo rè chu xi caxinchahndu rè xi cahme, hacuaha sinii me jni. ²¹ Cuatjin meje rè ta, tsěhě xi hisca jemu nu tsěě jan hisca quihndě ne, jima ngu nandya ngajñi xuta tjě rè Israel ne, tjin me xi sua machaya rè xuta cja tsěhě ley rè Moisés. Ley vèhě ne, chutaya rè yějě ni yungun jima ngu nixtin xi nixtin chjahájenda rè. —Cuatjin cachja Jacobo.

Xujun xi catsingatju apóstol tsěhě xutaxín

²² Ngajan xi apóstol cojo xuta changá cojo yějē sa xuta rē yungun ne, caviyujucacun me xi tuxijin rē ngujo xihin ngajñi rē me xi tsingatju me ngajan Antioquia, cjue tangun cojo Pablo cojo Bernabé. Me xi cuicun vi xi catuxijin rē: Judas, me xi hacuaha hmí rē Báršabas, cojo Silas, jo xihin xi jemu chjaharcun rē ngajñi rē xuta ladu rē Jesús. ²³ Sehe ngajan xi catsihindu me ngu xujun catsingatju me cojo me xi jo xi cuacun vè. Cuitjin chja xujun jan:

“Ngayin xuta ladu rē Jesús, apóstol cojo xuta changá ne, ningatjin ngu nina niji tsujun ngayujun ni ngayun xuta ladu rē Jesús xi hacuiin xuta tjē rē Israel ngayun, xi nechun nandya Antioquia cojo distritu Siria cojo distritu Cilicia.

²⁴ Ngayin ne, camachaya niji xi cavetju ngujo xihin ngajñi niji xi cafehe ndya casuaxi nuju cojo cjua rē hacuaha caviseccan cjuatacun nuju. Me xi cuacun vè ne, ngayin ne, cavitexiin rē me xi quiji me. ²⁵ Véhē xi ngu tangun ni camá cjua niji hane cavejñi tacuín xi tuxijin rē xihin xi ningatjin xi nduvatjengui nuju, cuinduvatangun cojo Bernabé cojo Pablo, me xi jemu vinga niji. ²⁶ Me xi cuacun vè ne, casua me yojo rē me xi caviyujutaha tsavi me xi sahmi me xa rē Nai naja Jesucristu. ²⁷ Cuatjin xi Judas cojo Silas ne, ningatjin nuju me. Hane me véhē ne, cuichja me cojo nuju cjua hntsua me, cjua xi ningatjin nuju vi. ²⁸ Ngayin ne, ngu tangun ni camá cjua niji cojo Hasen rē Nina xi cuitexin nuju xi nihñu suvá ni xcusun xi hitsē sa sahmi nguýē vi: ²⁹ xicachinuu xichinē xi caviyuju xcun nina ndyojo, xicachinuu jni, xicachinuu yojo rē chu xi caxinchahndu rē xi cahme, xicanihñuu cjuatsehen xi sahmi xuta cojo ngu xi hacuiin chjuun rē hacuiin xihin rē. Sa xi nihñuu yějē xcusun véhē ne, ndatjin nihñu. Véhē ni cjua xi nújin cojo nuju.” Cuatjin chja xujun jan.

³⁰ Hya xi camá ne, cavetju me xi cuacun jan quiji me Antioquia. Hane xi cafehe me jan ne, casahmitangun me yějē ni xuta rē yungun, sehe casua me xujun xi yaha me. ³¹ Hane xi cavutaya xuta ladu rē Jesús xujun jan ne, jemu ndaja camá rē me tséhē cjua jan. ³² Hane Judas cojo Silas jan ne, tséhē xi tjin rē me chuya xi cuichja me cjua xi cafahatsja me tséhē Nina ne, jercu cachja me cojo xuta jan, hacuaha jemu casua rē me cjuetacun. ³³ Hane xi ha caviyujutaha me ngujo nixtin jan ne, xuta rē yungun jan ne, catsingatju me cafe nga cojo yějē ni cjuandaja cjuajeya ngajan hiscan xi cavetju me. ³⁴ Hane Silas, xi má rē me ne, hitsē sa ndaja xi ngaja caviyujutaha me. ³⁵ Peru Pablo cojo Bernabé ne, caviyujutaha sa me ngajan Antioquia, cavicuaya me cjuachacun rē cjua rē Nina, hacuaha casua me camachaya rē xuta cjuandajyihí xi chja tséhē Nai naja. Hacuaha jemu cjin sa xuta xi cuatjin casahmi me.

Catsismi xicjin Pablo cojo Bernabé

³⁶ Hya xi camá ne, xi cavatju ngujo nixtin ne, Pablo ne, cuitjin cachja me cojo Bernabé:

—Cuyan cuanguen tjenguen nga xuta ladu rē Jesús yějē ni nandya hiscan xi ha cataan camachaya rē me cjuandajyihí xi chja tséhē Nai naja, cuanguen chutsejen ne, hacutjin tivatju me tijima.

³⁷ Hane Bernabé ne, meje cjuecojo me Juan, me xi hacuaha hmí rē Marcos. ³⁸ Peru Pablo ne, mijí cjuecojo me, tséhē xi Marcos ne, catsismicacun me xicjin me hane cavetjuxin me tséhē Pablo cojo Bernabé ngajan Panfilia, quijiinndujain me cojo xa. ³⁹ Hane cojo cjuatacun véhē ne, cavetjucaa ngu si ngajñi rē Pablo cojo Bernabé. Cuatjin camá xi cavetjuxin me tséhē xicjin me. Hya xi camá ne, Bernabé ne, quijicojo me Marcos jan ne, cavisehen me ngu barcu, hane quiji me Chipre. ⁴⁰ Peru Pablo ne, cavaxijin me Silas

xi cjuccojo me. Hane xuta ladu rë Jesús ne, caviyuju me me xi cuacun jan ngahma cjuandaja rë Nai naja. Hya xi camá ne, cavetju Pablo cojo Silas, ⁴¹quiji me yëjë ni nandya tsëhë distritu Siria cojo Cilicia, casua rë me ngahñu xuta rë yungun jan.

16

Cavetsihin catsujyihya Timoteo cojo Pablo

¹ Hane xi cavatju vëhë ne, cafehe me nandya Derbe cojo Listra. Ngajan ne, tacun ngu xuta ladu rë Jesús xi hmí rë Timoteo, quihndi rë ngu chjuun xuta tjë rë Israel xi hacuaha cavisehen me ndiya rë Jesucristu. Nahmi rë Timoteo jan ne, xutaxín me. ² Xuta ladu rë Jesús ngajan nandya Listra cojo Iconio ne, jemu ndaja chja me tsëhë Timoteo vë. ³ Pablo ne, meje rë me xi cjue Timoteo cojo rë me. Vëhë xi quijicojo me Timoteo hiscan xi ti chuxin rë xuta tjë rë Israel. Cuatjin casahmi me ngatsë rë xi nandya xi cuacun vëhë ne, siu xuta jan, hane yëjë xuta xi cuacun jan ne, vëë me xi nahmi rë Timoteo ne, ngu xutaxín me. ⁴ Ngajan xi cavetju Pablo cojo Silas cojo Timoteo, quiji me. Hane jima ngu nandya xi tivatju me ne, casua me camachaya rë xuta tsëhë cjua xi caviyuju apóstol cojo xuta changá ngajan Jerusalén, cojo sa xi xuta ne, cuihndë me tsëhë cjua vëhë. ⁵ Cuatjin camá xi xuta tsëhë yëjë yungun jan ne, casacuhñu rë me xi mangucacun me cojo Jesús. Hane nchunchujun ni ne, cuatjin jima cjin sa me.

Cachja nijñá cojo Pablo

⁶ Hya xi camá ne, cavatju me distritu Frigia cojo distritu Galacia ta, tsëhë xi Hasen rë Nina ne, casuaain cahndë xi cuichja me cojo xuta cjua rë Nina ngajan distritu Asia. ⁷ Hane xi cafehe me tiña distritu Misia ne, meje cjue me distritu Bitinia, peru Hasen rë Jesús ne, casuaain cahndë. ⁸ Cuatjin camá xi cavatjutaha me Misia, hane quiji me nandya Troas. ⁹ Hane ngu nguixun xi siutaha me ngajan ne, cachja ngu nijñá cojo rë Pablo. Cavëë me ngu xihin tsëhë distritu Macedonia xi secun tichja cojo rë me cuitjin: “Nduvun nguehe Macedonia ne, cuiseacun niji.” Cuatjin cachja nijñá jan. ¹⁰ Cuatjin camá xi xi tu cachja nijñá cojo Pablo cuatjin ne, ngutjen ni cavinchin chuva rë hacutjin cuma xi cuanguin Macedonia ta, tsëhë xi xi má niji ne, Nina cajindaya niji me xi cuanguin cuinújin cojo xuta jan cjuandajyihí xi chja tsëhë Jesús.

Cavisehen na Lidia ladu tsëhë Jesucristu

¹¹ Hya xi camá ne, xi cavetjin nandya Troas ne, cachjihin ngu barcu sehe catsanguin ngu quixi rë nandya Samotracia. Hane xi camá nchujun jan ne, catsanguin nandya Neápolis. ¹² Hane tsëhë ngajan ne, catsanguin nandya Filipos, ngu nandya xi hitsë sa matitjun tsëhë ngu cahndë tsëhë distritu Macedonia. Jemu cjin xuta Roma siu me jan. Hane cavinechintihin nandya vëhë ngujo nixtin. ¹³ Hane xi cavechú nixtin xi nixtin chjahájenda rë ne, cavetjin tingotjo hnhua tsëhë nandya jan hiscan jiya ndajyë. Xi má niji ne, ngajan tjin ngu cahndë xi má oración. Hane cavinechin ngajan, canújin cjua rë Nina cojo yachjin xi camatangun me jan. ¹⁴ Hane ngu chjuun xi cahndë cjua xi cachja Pablo ne, Lidia hmí rë na, ngu na tsëhë nandya Tiatira, viteña na tsjan moradu. Na vëhë ne, hacuaha faharcun na Nina, hane Nai naja ne, cavuxaha me cjuatacun rë na xi ndaja cavetaharcu na cjua xi cachja Pablo. ¹⁵ Hane hya xi caxtenda na cojo yëjë xuta rë na ne, cachja na cojo niji cuitjin:

—Quihndē ta ha hyun xi ngahan ne, camangucácun cojo Nai naja ne, nduvun ndya naha, hane ngajan cuinechun. —Cuatjin jemu cjin cachja na cojo nihi, vèhē xi catsangui.

Quiji Pablo cojo Silas ndavaya ngajan Filipos

¹⁶ Cavechú ngu nixtin hya xi tivanguin cahndē hiscan xi má oración ne, cavechútaha nihi ngu na hndixahan rē xuta, xi jiya xitsehen xahasen rē. Hane nai rē na hndixahan jan ne, jemu cjin tujún sacú rē me, tsèhē xi chja na cojo xuta mé xi cuatju me cuma. ¹⁷ Na vèhē ne, catsuyihya tjengui na ngayin cojo Pablo, jindaya na chja na cuitjin:

—Xuta xi cuicun vi ne, mosu rē Nina xi matitjun má me, hacuaha sua me machaya nuju cja hacutjin cuetjuntjun. —Cuatjin cajindaya na cachja na.

¹⁸ Jemu cjin nixtin xi cuatjin casahmi na. Hya xi camá ne, tsèhē xi jemu camaxti rē Pablo ne, cavuya me cavutsejen me na, sehe cachja me cojo xitsehen jan cuitjin:

—Tsèhē xi Jesucristu casuaxa ná me ne, ¡tetjixin tsèhē na! ¡vèhē xi chjá cojo ri! —Cuatjin cachja Pablo.

Hane hora vèhē ni ne, cavetjuxin xitsehen jan.

¹⁹ Hya xi camá ne, xi vutsejen nai rē na hndixahan jan xi ha quihndē tsajin cjuetacun xi sacú sa rē me tujún ne, cafaha me Pablo cojo Silas, cajavèjne me quijicani me ngajan hiscan ma tangun xutaxa rē ngajan hiscan má ndetsin.

²⁰ Hane xi cafehe me ngajan xcun xutaxa rē ne, cuitjin cavinchajyè me:

—Cha xi cuicun tjè rē Israel vi ne, jemu tivisejcan cha cjuatacun rē xuta nangui naja. ²¹ Meje rē cha xi nihña xcusun rē xutachanga rē cha, peru ngayaan xuta Roma ne, ndajintjin xi cuanguentjengueen xcusun xi cuacun vè.

²² Hane hacuaha cojo xutacjin jan, cavetsihin cavinchajyè me Pablo cojo Silas. Ngajan xi xutaxa rē ne, cavaxèhndu me tsjian rē me xi cuacun jan, sehe cavitexa me xi sehen rē. ²³ Hane ha xcun xi ha jercu cavaja rē me ne, sehe cavincha me ndavaya. Hacuaha cachja me cojo cha xi sahmi cuidadu ndavaya xi ndaja cuidadu cuma me xi cuacun jan. ²⁴ Hane hya xi cafa-hatsja mayu cja vèhē ne, quiji cavinchahñu cha me cahntsua ndavayajñu, hacuaha cavinchanguihñu cha ntsacu me ngojo xi casehenchjine tsèhē jo ya xi sahmi rē me castigu hacuaha hitsè sa cjuaquixi jiya me.

²⁵ Hane sacuaa chuva rē vasen nixten ne, Pablo cojo Silas ne, tisahmi me oración hacuaha tisè me tsèhē Nina. Hane presu xi yahnga jan ne, tu tivisiñuju ni me. ²⁶ Hane ha tu ñahñu jercu cafani nangui, hisca xihndènaña rē ndavaya jan vitsuneya rē. Hacuaha yèjè ni tingotjo ndavaya jan ne, ngutjen ni catuxaha, hane cadena xi tjinñu xingu xingu presu ne, cavixuhndu.

²⁷ Hya xi camá ne, cavasca rē cha xi sahmi cuidadu ndavaya jan. Hane xi cavèè cha xi tixaha yèjè tingotjo tsèhē ndavaya jan ne, cavaxè cha quicha rē cha hane ha tu hitsè sa ne, catsiquehen cha yojo rē cha ta, tsèhē xi xi má rē cha ne, yèjè presu ne, cavanga. ²⁸ Peru Pablo ne, jercu cajindaya me cachja me cuitjin:

—Xicanihñuu cuatjin ta ngayijin ni nechinyin nguehe. —Cuatjin cachja Pablo.

²⁹ Ngajan xi cha xi sahmi cuidadu jan ne, cafehya cha ngu ndihi, sehe vangasanii cha quiji cha cahntsua ndavaya, ña fatsè cha xi tsacjun cha, quiji cafañatsacjan cha xcun Pablo cojo Silas xi faharcun cha me. ³⁰ Hane xi cavaxè cha me tsèhē ndavayajñu jan ne, sehe cafinenguise cha cuitjin:

—Tatá, ¿mé xi meje rë xi sahme, cojo sa xi cuétjutjé? —Cuatjin cafinenguise cha.

³¹ Hane me xi cuacun jan ne, cuitjin cachja me:

—Catamangu tacún cojo Nai niji Jesús, sehe cuetjuntjun ngayun cojo yëjë xuta xi siu ndya nuju. —Cuatjin cachja me.

³² Sehe ngajan xi cha vëhë ne, cajindaya cha yëjë xuta xi siu ndava cha, hane Pablo cojo Silas ne, casua me camachaya rë cha cjua rë Nina cojo yëjë xuta xi cajindaya rë cha jan. ³³ Ha hora vëhë ni tsëhë nixten vëhë ne, cafaha cha me ne, cavane cha hiscan casacuhmu rë me. Hya xi camá ne, ngutjen ni caxtenda cha cojo yëjë xuta rë cha jan. ³⁴ Sehe quijini cha cojo Pablo cojo Silas ndava cha, hane casua cha niñu cajiñë me. Hacuaha jercu ndaja camá rë cha cojo yëjë xuta xi siu ndava cha, tsëhë xi camangucacun cha cojo Nina.

³⁵ Hya xi camá ne, xi casahasen jan ne, catsingatju xutaxa rë jan nisë, quiji cachja cojo cha xi sahmi cuidadu ndavaya jan cuitjin:

—Naxun xu cha xi caxincha ndavaya nguchjin jan. —Cuatjin cachja cha.

³⁶ Ngajan xi cha xi sahmi cuidadu ndavaya jan ne, quiji cachja cha cojo Pablo cjua vihi:

—Catsingatju xutaxa rë cjua xi cuaxë xu nuju. Vëhë xi cuma cuetjun ne, cuangun cojo cjuandaja cjuajeya. —Cuatjin cachja cha.

³⁷ Peru Pablo ne, cuitjin cachja me cojo cha xi cuacun jan:

—Xutaxa rë ne, cavitexa me casehen niji xcun yëjë ni xuta, handasa cjëë cjuahacuenda me jyë niji, ngayin xi xuta Roma ngayin. Sehe cavinchaniji me ndavaya. ¿Há taha hma meje cuaxë niji me quihndë? ¡Cumaji xi cuatjin! Catinduva suvá me cataxë niji me. —Cuatjin cachja Pablo.

³⁸ Hane cha nisë jan ne, catsicuya cha cjua cojo xutaxa rë cuatjin. Hane xi camachaya rë xutaxa rë xi xuta Roma má me xi cuacun jan ne, catsacun me camá. ³⁹ Ngajan xi xutaxa rë ne, quiji cachja me cojo Pablo cojo Silas xi tsijyëcacun me xi cuatjin camá. Sehe cavaxë me me, sehe cafehya rë me xi sahmi me cjuandaja ne, cuetjuxin me tsëhë nandya jan. ⁴⁰ Hane xi cavetju Pablo cojo Silas tsëhë ndavaya ne, cavuya quijitjengui me na Lidia. Hane xi cavëë me yëjë xuta ladu rë Jesús jan ne, sehe cachja me cojo xuta jan xi catjinduju me cojo ndiya rë Jesús, sehe cavetju Pablo cojo Silas quiji me.

17

Cafehe Pablo ngajan nandya Tesalónica

¹ Hya xi camá ne, Pablo cojo Silas jan ne, cavatju me nandya Anffipolis cojo nandya Apolonia, sehe cafehe me nandya Tesalónica, hiscan xi tacun ngu yungun rë xuta tjë rë Israel. ² Hane sacuatjin xi ha xcusun rë Pablo ne, ngajan quijitjengui me xuta tjë rë Israel jan nixtin xi chjahájenda rë. Hane jyan nixtin, tsëhë jyan totje ne, Pablo ne, cavicuya me xuta cjua rë Nina. ³ Casua me camachaya rë xuta xi chja cjua rë Nina xi Me xi Tsingatju Nina ne, hatuxa tjïn xi cueba me sehe cuya nga me cjuahñu. Hacuaha cachja Pablo cuitjin:

—Jesús, me xi tisuá jimachaya nuju tsëhë ne, me vëhë xi catsingatju Nina. —Cuatjin cachja me.

⁴ Ngajan xi ngujo xuta xi cuacun jan ne, camacjain rë me, hane cavisehen me ladu rë Pablo cojo Silas. Hane ngajñi rë me xi cuacun camacjain rë vë ne, hacuaha jemu cjïn xutaxin xi faharcun rë Nina hinchajñi me cojo hacuïn hitsë yachjin xi matitjun jan hinchajñi me. ⁵ Ngajan xi ngujo xuta tjë rë Israel xi camacjain rë jan ne, camachini me. Hane hora xi camá casahmitangun me ne, jemu cjïn xuta tsehen xi tujyë tsujyihya jan ne, cavetsihin casahmi

me ngu suë jyë ngajñi nandya xi cjue jaha me Pablo cojo Silas. Quiji me ndava Jasón xi vanguisse me me xi cuacun vë xi cuaxë me xcun xutacjín jan. ⁶ Hane xi casacuiin rë me Pablo cojo Silas ngajan ne, cajavëjne me Jasón cojo ngujo sa xuta ladu rë Jesús, quijicojo me xcun xutaxa rë, jindaya me cachja me, cavincha me jyë cuitjin:

—Cha xi cuacun jemu casuaxti jinguyjyë ni ngasunhndë ne, hacuaha cojo nguehe cafehe cha. ⁷ Hane cha Jasón vi ne, cafahatsja cha cha xi cuacun jan ngajan ndava cha. Hane yëjë cha xi cuacun vë ne, tisahmi cha condra ley rë emperador Romano xi hmí rë César, me xi matitjun camahani, ha chja cha xi tjin sa ngu me xi matitjun xi hmí rë Jesús. —Cuatjin cavinchajyë xutacjín jan me xi cuacun jan xcun xutaxa rë.

⁸ Ngajan xi xutacjín cojo xutaxa rë jan ne, xi cahndë me cjua jan ne, jemu camacjíncacun me. ⁹ Hane ha xcun xi cavechji Jasón cojo xuta xi yahnga jan tujún cojo xutaxa rë ne, sehe catsismi xutaxa rë jan me.

Cafehe Pablo cojo Silas ngajan nandya Berea

¹⁰ Ngajan xi xuta ladu rë Jesús ne, xi tu camá nguixun jan ne, catsingatju me Pablo cojo Silas ngajan nandya Berea. Hane xi cafehe me ngajan ne, quiji me yungun rë xuta tjë rë Israel. ¹¹ Hane xuta jan ne, hitsë sa tixaha cjuatacun rë me xi cuma rë xuta xi siu ngajan Tesalónica. Hane me xi cuacun jan ne, cafahatsja me cjua rë Nina cojo nguñaja xahasen rë me. Hacuaha nchunchujun ni ne, cavutaya me xujun rë Nina, cojo sa xi sacú rë me cjuaquixi tsëhë cjua xi cachja Pablo. ¹² Cuatjin camá xi jemu cjín xuta jan camacjain rë me. Ngajñi rë xuta jan ne, hacuaha hacuiin hitsë xutaxín nchina sa chjuun sa xihin me hinchajñi me jan. ¹³ Peru hya xi camachaya rë xuta tjë rë Israel ngajan Tesalónica xi cojo nandya Berea tisua Pablo jimachaya rë xuta cjua rë Nina ne, hacuaha quiji xuta xi cuacun jan casua me cjuacjintacun xutacjín xi siu jan. ¹⁴ Ngajan xi xuta ladu rë Jesús xi siu jan ne, catsingatju me Pablo hisca ndachacun. Peru Silas cojo Timoteo ne, caxinchataha ni me ngajan. ¹⁵ Hane xuta xi quijicani rë Pablo jan ne, quijicojo me me hisca nandya Atenas. Xi tu cafehe me ngajan ne, cachja Pablo cojo xuta xi quijicani rë me jan ne, catji catichja me cojo Silas cojo Timoteo ne, marcu macjain catjitjengui me Pablo. Hya xi camá ne, sehe cafe xuta xi cuacun jan.

Cafehe Pablo ngajan nandya Atenas

¹⁶ Jinguyjyë rë xi tacunya Pablo Silas cojo Timoteo ngajan Atenas ne, jemu camaxti rë xahasen rë me, tsëhë xi tivutsejen me nandya jan xi ña quitsë rë cojo nina ndyojo. ¹⁷ Vëhë xi Pablo ne, cachja me cojo xuta tjë rë Israel cojo xutaxín xi faharcun rë Nina ngajan yungun. Hane ngajan ndetsin ne, nchunchujun ni cachja sa me cojo xuta xi fehe jan. ¹⁸ Hacuaha cojo maestru xi tjengui cjuatacun xi hmí epicúreo cojo ngujo sa maestru xi tjengui cjuatacun xi hmí estóico cavisiajmi me cojo Pablo. Hane ngujo me ne, cachja me cuitjin:

—Cha machjiriin xi cuajiyihi vë ne, ¡tsajin camahani mé vengui chji rë cjua xi chja cha! —Cuatjin cachja maestru xi cuacun jan.

Ngujo nga me ne, cuitjin cachja me:

—Cha xi cuajiyihi vë ne, tisua cha jimachaya naja tsëhë nina rë jingu sa xuta.

Cuatjin cachja ngujo nga me ta, tsëhë xi Pablo ne, tisua me jimachaya rë xuta cjuandajiyihi xi chja tsëhë Jesús cojo tsëhë hacutjin cavuya me cjuahñu.

¹⁹ Ngajan xi xuta jan ne, quijicojo me Pablo ngajan Areópago, cahndé hiscan matangun me xi sahmi me junta, sehe cachja me cojo me cuitjin:

—Tinújun cojo niji mé cjuachacun xatsé xi quichuhun ta ²⁰ jemu ha ngu xcusun cjua xi canuhyin xi canújun. Vêhé xi meje cumachaya niji mé vijné cjua vêhé.

Cuatjin cachja xuta Atenas jan ta, ²¹ tséhé xi yéjé xuta xi cuacun vé cojo xuta ngu nangui xi siu cahndé jan ne, hatuxa chuya rê me xi cuisñuju me ngu cjua xatsé hacuaha jemu nduju cuichja me cojo xicjin me.

²² Hya xi camá ne, sehe casecunvasen Pablo cahndé vêhé, sehe cachja me cuitjin:

—Ngayujun ngarcun ni xuta Atenas matsejen ne, vutsején jinguyjé ni ne, ngayun ne, hacuaha jemu chjuhuncun nina nuju. ²³ Ta jinguyjé rê xi catsujyéhéya ngajñi nandya nuju hacuaha tivutsején yéjé cahndé hiscan chjuhuncun nina nuju ne, cavéchutaha ngu yungun lihndi hiscan xi camahindu ngujo cjua xi chja cuitjin: “Tséhé ngu nina xi hyaan me.” Cuatjin camahindu. Vêhé xi nina xi chjuhuncun xi hisca hyuun ne, me vêhé xi nduva tisuá jimachaya nuju tséhé me. ²⁴ Nina xi casahmi ngasunhndé cojo yéjé xi tjin xcun, me xi nai rê ngahnga cojo nangui ne, hacuiin véjñacahndé me yungun xi sahmi xuta. ²⁵ Hacuaha me vêhé ne, tsajin mé xi ma chaja rê me xi ngayaan xuta cuma tahan rê me ta, me vêhé xi sua naja me cjuahñu, sua me xta naja, hacuaha sua naja me yéjé ni xi mameje naja.

²⁶ Hane tjé rê xi ngu ni xuta ne, casahmi Nina yéjé xcusun xuta, xi cuiyuju me jinguyjé ni ngasunhndé. Hacuaha Nina cachja me janihya xi cumatitjun jimangu xcusun xuta hacuaha jani hiscan xi cuiyuju me.

²⁷ Cuatjin casahmi Nina cojo sa xi ngayaan xuta ne, cuinchaseen me, hane xi cuatjin cuinchaseen me ne, hyaan sa xi sacú naja me, handasa hacuiin cjin tacun Nina xi cuma naja xingu xingu ngayaan. ²⁸ Sacuatjin chja ngu cjua xi chja cuitjin: “Nina ne, sua naja me cjuahñu, sahmi me xi ma finiya ngayaan, hacuaha sua naja me xi nechan cojo cjuahñu naja.” Cuatjin chja cjua. Hacuaha yahnga xuta tséhé ngajñi nuju xi tsihindu me cjua xi jemu ndaja fi ne, cuitjin catsihindu me: “Ngayaan ne, tjé rê Nina ngayaan.” Cuatjin catsihindu me. ²⁹ Quihndé ta quihndi rê nina ngayaan ne, miji rê xi cuma tacuun xi Nina ne, tangun me cojo nina oro o sa xi nina quicha tyava, o sa xi nina ndyojo, xi xuta casahmi me cojo cjuatacun rê suvá me. ³⁰ Nina ne, catsingatjuhnga me nixtin xi xuta ne, hvín me. Peru quihndé ne, Nina ne, tivitexa me xi yéjé ni xuta tséhé jinguyjé ni ladu ne, tsindeya me cjuatacun rê me ta, ³¹ tséhé xi Nina ne, ha cavejña me ngu nixtin xi tsichuva me xuta tséhé ngasunhndé cojo cjuaquixi tu cutjin jyé rê ne, cuatjin sahmi me cojo. Hacuaha ha cavaxijin me ngu xuta xi sahmi xa vêhé. Hacuaha ha hyan xi cjuaquixi xi cuatjin cuma, tséhé xi Nina catsicuya me cjuahñu xuta vêhé. —Cuatjin cachja Pablo.

³² Hane hya xi cahndé xuta jan cjua xi ngu nima ne, cavuya cjuahñu ne, ngujo me ne, catsixcuehyu me cjua jan, peru ngujo nga me ne, cuitjin cachja me:

—Cuisñiji xi cuinújun nga ngundiya cjua vêhé. —Cuatjin cachja ngujo me jan.

³³ Ngajan xi Pablo ne, cavetju me tséhé ngajñi rê xuta jan. ³⁴ Hane ngujo xuta ne, cavisehen me ladu rê Pablo sehe camacjain rê me cjua jan. Hane ngajñi rê me xi cuacun vé ne, jiyajñi me xi hmí rê Dionisio, ngu xutaxa rê tséhé nandya, hacuaha cojo sa ngu chjuun xi hmí rê Dámaris jiyajñi me jan, cojo ngujo sa me.

18

Cafehe Pablo ngajan nandya Corinto

¹ Hya xi camá ne, hya xi cavatju xcusun vëhë ne, cavetju Pablo tsëhë nandya Atenas, hane quiji me nandya Corinto. ² Hane xi cafehe Pablo ngajan ne, cavechútaha me ngu xihin tjë rë Israel xi hmí rë Aquila. Aquila jan ne, tsëhë distritu Ponto má me, peru hacuaha sehe cafehe me Corinto cojo chjuun rë me xi hmí rë Priscila, xi quiji caviyujucahndë me ngajan nación Italia. Cavetjuxin me tsëhë Italia ta, tsëhë xi me xi matitjun jan, me xi hmí rë Claudio ne, cavitexa me xi yëjë ni xuta tjë rë Israel ne, hatuxa cuetjuxin me tsëhë nandya Roma. Hane Pablo ne, quijitjengui me Aquila. ³ Hane tsëhë xi ha ngu xcusun ni xa xi sahmi catsijo ni me ne, cavejñatangun me cojo me xi cuacun vë, hacuaha tangun casahmi me xa. Xa xi sahmi me ne, xi tsindaja me ndihya tsjian. ⁴ Ngajan xi Pablo ne, cachja me cjua rë Nina ngajan yungun rë xuta tjë rë Israel jima ngu nixtin xi chjahájenda rë ta, tsëhë xi meje rë me xi sa xuta tjë rë Israel o sa xi xutaxín ne, cumacjain rë me cjua vëhë.

⁵ Hane xi cafehe Silas cojo Timoteo xi cavetju me tsëhë distritu Macedonia ne, Pablo ne, cavetsihin xi nchunchujun ni tichja me cojo xuta cjua rë Nina, tichja me cojo xuta tjë rë Israel xi Jesús ne, me vëhë xi catsingatju Nina. ⁶ Peru hya xi casahmi xuta xi cuacun jan condra Pablo hacuaha choho cachja me tsëhë me ne, cavitsune Pablo chojo rë tsjian rë me sacuaha xi tivaxë me xuta xi mijí cuihndë cjua rë Nina, sehe cachja me cojo xuta jan cuitjin:

—Ngayun suvun cún nuju tsëhë xcusun xi cuátju cuma. Hacuiin ngahan cún ná. Quihndë cojo nixtin xi cjuí sa ne, cjuë cuichjá cojo xutaxín cjua rë Nina. —Cuatjin cachja me.

⁷ Hane xi cavetjuxín me tsëhë xuta xi cuacun vë ne, quiji me ndava ngu me xi hmí rë Ticio Justo, ngu xutaxín xi hacuaha faharcun me Nina. Ndava me vëhë ne, ngu ndava ni rë yungun rë xuta tjë rë Israel jan tacun. ⁸ Hane Crispo, me xi xutaxa rë yungun jan ne, camangucacun me cojo Nai naja Jesucristu, hacuaha cojo yëjë sa me xi siu ndava me camangucacun me. Hacuaha jemu cjín xuta Corinto ne, xi cahndë me cjua ndajyihi rë Nina jan ne, camacjain rë me sehe caxtenda me. ⁹ Hane ngu nguixun jan ne, ngajñi nijña rë Pablo ne, cachja Nai naja cojo rë me cuitjin:

—Xicarcuin. Tinoje sa. Xicanisejyiin cjua xi noje. ¹⁰ Cuatjin nihñi ta, tsëhë xi ngahan ne, tejña cojo ri, hane tsajín yo xi cuma choho sahmi cojo ri ta ngahan ne, jemu tjín ná xuta ladu naha nguehe nandya vihi. —Cuatjin cachja Nai naja.

¹¹ Hane cavéjña Pablo ngajan ngu nu vasen, xi vicuya rë me xuta cjua rë Nina.

¹² Peru hya xi Galión matitjun me tsëhë distritu Acaya ne, camatangun xuta tjë rë Israel jan ne, cafaha me Pablo, quijicani me xcun xutaxa rë, ¹³ cuitjin cachja me:

—Cha xi cuijyihi vi ne, tsujyihya cha tichja cha cojo xuta xi hacjahi xcusun meje rë xi nihña xi chjahanrcun Nina. Peru xcusun vëhë ne, condra tsëhë ley naja. —Cuatjin cachja xuta jan.

¹⁴ Hane ha tu hora sa xi cuichja Pablo ne, cachja Galión cojo xuta xi cuacun jan cuitjin:

—Ngayun xuta tjë rë Israel, sa xi ngu cjuatsehen o sa xi ngu jyë jyë xi casahmi cha ne, tjín ná chuva rë xi scaa ná cojo nuju. ¹⁵ Peru xi tsëhë ngu cjuachacun cojo tsëhë ñihi rë ngu xuta cojo tsëhë ley nuju suvun ne,

ndyá chutsujun suvun hacutjin cuma chihin ta, tsëhë xi ngahan ne, hatuxa sahmeцуendaan cjuacjintacun xi cuacun vë. —Cuatjin cachja Galión.

¹⁶ Ngajan xi Galión ne, catsicanga cojo me xuta tjë rë Israel jan tsëhë ndihyavasen. ¹⁷ Ngajan xi yëjë xuta jan ne, cafaha me Sóstenes, me xi matitjun tsëhë yungun rë xuta tjë rë Israel, cavaja rë me ngajan ndatsen ndihyavasen. Peru Galión ne, casahmicuendaain camahani me yëjë ni cjuacjintacun vëhë.

Cavuya nga Pablo nandya Antioquia

¹⁸ Peru hya xi ha jemu cavatju nixtin xi quitaha Pablo ngajan Corinto ne, catsinguijnetaha me cjua cojo xuta ladu rë Jesús, sehe cafaha me ngu barcu xi cjue me ngajan distritu Siria. Priscila cojo Aquila ne, hacuaha cojo me quiji me cojo Pablo. Hane xi cafehe me nandya Cencrea ne, ngajan casejnu rë rcu Pablo ta, tsëhë xi casahmichihin me ngu cjua cojo Nina. ¹⁹ Hane xi cavatju vëhë ne, sehe quiji me nandya Efeso. Hane Pablo ne, ngajan caviyujutaha me Priscila cojo Aquila. Hya xi camá ne, Pablo ne, quiji me yungun, cachja me cojo xuta tjë rë Israel jan cjua rë Nina. ²⁰ Hane xi cafehya xuta me xi setaha sa me ngujo nixtin ngajan ne, catsingatiin me. ²¹ Hya xi camá ne, catsinguijnetaha me cjua cojo xuta jan, cuitjin cachja me:

—Sa xi Nina meje rë me ne, cúa nga, nduvatjënguë nuju. —Cuatjin cachja me.

Ngajan xi cafaha me ngu barcu xi cavetju me tsëhë Efeso.

Quiji nga Pablo cavusehenhya me xuta rë yungun

²² Hane xi cafehe me Cesarea ne, ngajan cavetju me quiji me Jerusalén xi sua me ngu nina xuta rë yungun ngajan. Hya xi camá ne, sehe cavuya cafehe me nandya Antioquia.

²³ Hane xi ha casetaha me ngujo nixtin jan ne, sehe cavetju nga me quiji me yëjë ni nandya tsëhë distritu Galacia cojo distritu Frigia, casua rë me ngahñu yëjë ni xuta ladu rë Jesús.

Quiji Apolos nandya Efeso cojo nandya Corinto

²⁴ Ngajan nandya Efeso ne, cafehe ngu xuta tjë rë Israel xi hmí rë Apolos. Nangui rë me ne, Alejandría. Jemu ndaja tsichihin me cjua xi chja me, hacuaha jemu vëë me tsëhë cjua rë xujun rë Nina. ²⁵ Me vëhë ne, tjin yo xi casuacuenda rë me tsëhë ndiya rë Nai naja. Cojo nguñaja xahasen rë me ne, chichihin ni casua me camachaya rë xuta cjuandajiyihi xi chja tsëhë Jesús. Peru hvíin me mé vijne xi xtenda xuta sacuatjin tixtenda xuta ladu rë Jesús ta xi vëë me ne, súvá ni mé vijne xi xtenda xuta sacuatjin cavitenda Juan Vitenda rë Xuta. ²⁶ Apolos vë ne, hacuiin cojo chircun rë me cuetsihin cuichja me cojo xuta cjua rë Nina ngajan yungun rë xuta tjë rë Israel. Hane xi cahndë Priscila cojo Aquila sacuatjin cachja Apolos ne, cavaxëxin me ne, sehe casuacuenda ndaja sa me tsëhë ndiya rë Nina. ²⁷ Hya xi camá ne, catsingatahacacun Apolos xi cjue me ngajan distritu Acaya. Hane xuta ladu rë Jesús jan ne, cachuya rë me hacuaha catsihindu me ngu xujun tsëhë xuta ladu rë Jesús ngajan, cachja me cojo xuta jan xi ndaja cjuahatsja me Apolos. Hane xi cafehe me jan ne, jemu cavisecoo me xuta xi cojo cjuandaja rë Nina ne, ha camangucacun me cojo Jesús. ²⁸ Hane xcun ni yëjë xuta ne, jercu catsitjungi me cjua rë xuta tjë rë Israel. Jemu cjin cahndë tsëhë xujun rë Nina xi cachja me cojo xuta, xi tsingacun me xuta xi Jesús ne, me vëhë xi catsingatju Nina me.

19

Cafehe Pablo nandya Efeso

¹ Cuitjin camá jinguyêjë rë xi quitahá cuaha Apolos ngajan Corinto. Xi cavatju catsuyihiya Pablo taha ladu ngatihin ne, cafehe me nandya Efeso, hane ngajan cavechútaha me ngujo xuta ladu rë Jesús. ² Hane cuitjin cachja me cojo xuta jan:

—¿Há cavisehen Hasen rë Nina cahntsua xahasen nuju hya xi camangutacún cojo Jesús? —Cuatjin cachja me.

Hane xuta jan ne, cuitjin cafayangui me:

—Hisca camachayiin niji cjua xi tjin xi hmí rë Hasen rë Nina. —Cuatjin cafayangui me.

³ Ngajan xi Pablo ne, cuitjin cachja nga me:

—¿Hacutjin caxtenda ngayun ni? —Cuatjin cachja me.

Hane xuta jan ne, cuitjin cafayangui me:

—Caxtenda ngayin sacuatjin cavitenda nima Juan. —Cuatjin cafayangui me.

⁴ Ngajan xi Pablo ne, cuitjin cachja nga me:

—Juan vë ne, cavitenda me xuta hya xi xuta jan ne, catsindeya me cjuatacun rë me, hacuaha cachja me cojo xuta jan xi catamangucacun me cojo me xi sehe cjeuhe, me xi hacui Jesús. —Cuatjin cachja nga Pablo.

⁵ Xi cahndë xuta jan cjua vëhë ne, caxtenda me xi cumatangun cjuatacun rë me cojo Nai naja Jesús. ⁶ Hane xi cavisanetsja Pablo xuta jan ne, canduva Hasen rë Nina, cavisehen cahntsua xahasen rë xuta, hane cachja me hne xi hisca hvín me, hacuaha cachja me cjua xi casua Nina me. ⁷ Hane má sacuaha tejó xihin me xi yëjë me.

⁸ Hya xi camá ne, quiji Pablo yungun rë xuta tjë rë Israel, cachja me cojo xuta. Hane cahntsua jyan sá ne, cuatjin fi me yungun, hane hacuiin cojo chiracun rë me chja me cojo xuta tsëhë gobiernu xi sahmi Nina. ⁹ Peru ngujo xuta jan ne, casahmitaja rcu me, hane camacjaain rë me, hane choho cachja me tsëhë ndiya rë Jesús xcun yëjë ni xuta. Vëhë xi Pablo ne, cavetjuxin me tsëhë xuta jan, hacuaha quijicojo me xuta ladu rë Jesús. Cavetsihin me nchunchujun ni cachja me cojo xuta ngajan escuela rë ngu me xi hmí rë Tirano. ¹⁰ Cuatjin casahmi me cahntsua jo nu, vëhë xi yëjë xuta xi siu ngajan Asia ne, camachaya rë me tsëhë cjua rë Nai naja, sa xuta tjë rë Israel ne, o sa xutaxín.

Yatu quihndi rë Sceva

¹¹ Jemu jyë cjuarcun casahmi Nina ngajñi rë xa xi casahmi Pablo. ¹² Hisca tsjian xi sahmixa cojo Pablo ne, quijicojo xuta casua rë me xuta hmu rë, hane chíhin rë me ne, cavetjuxin, hisca xitsehen xi hincha xahasen rë yahnga me ne, hacuaha cavetjuxin.

¹³ Peru ngujo cha tjë rë Israel xi tsuyihiya vaxëxin cha xitsehen xi hincha xahasen rë xuta ne, hacuaha camameje cuyenangui cha ñihi rë Nai naja Jesús hora xi tivaxëxin cha xitsehen, hane cuitjin cachja cha:

—Tsëhë xi Jesús casuaxa ná me, me xi chja Pablo tsëhë ne, tivitéxa nuju xi cuetjuxun. —Cuatjin cachja cha.

¹⁴ Cha xi cuatjin sahmi vë ne, hacui yatu cha quihndi rë ngu nahmi xi hmí rë Sceva, ngu nahmi xi matitjun tsëhë xuta tjë rë Israel.

¹⁵ Hane ngu ndiya xi cuatjin cachja cha ne, cuitjin cafayangui xitsehen jan:

—Jesús ne, hvě me vėhė. Hacuaha hvě Pablo. Peru ngayun ne, ¿yo ngayun?
—Cuatjin cafayangui xitsehen jan.

¹⁶ Hya xi camá ne, me xi hıncha xitsehen xahasen rė jan ne, cacaataha me cha, hane cacaa rė me catsinguijne me yėjė yatu cha, tsėhė xi jemu hñu ngahñu rė me. Cuatjin camá xi jemu casacuhmu rė cha xi cuacun jan, hane cavanga cha tu quixti ni tsėhė ndihya hiscan siu cha jan. ¹⁷ Xcusun xi camá vė ne, camachaya rė yėjė xuta nandya Efeso, sa xuta tjė rė Israel ne, o sa xutaxın. Hane ngayėjė ni me ne, jemu catsacjun me camá, hane camá jyė camá hnga Nai naja Jesús.

¹⁸ Hane jemu cjin xuta xi ha cavisehen me ladu rė Jesús ne, fitjengui me Pablo vijacun me tsėhė cjuasurqui xi sahmi me. ¹⁹ Hya xi camá ne, jemu cjin xuta xi sahmi cjuasurqui ne, quijicojo me xujun rė me jan, cavaca me ngajan xcun yėjė ni xuta. Hane xi casahmi me cuenta chji rė yėjė xujun rė me jan ne, jemu jyė camahani tujún cavetju chji rė. ²⁰ Cuatjin camá xi cjua rė Nai naja ne, jercu cavitsojo sa hacuaha casacuhñu sa rė.

Suė jyė xi camá ngajan Efeso

²¹ Hane xi cavatju camá yėjė xcusun vėhė ne, cavejñacacun Pablo xi cjue me Jerusalén, cuatju me yėjė nandya tsėhė distritu Macedonia cojo yėjė nandya tsėhė distritu Acaya. Hacuaha cachja me cuitjin:

—Xi cuatju cjuė Jerusalén ne, hacuaha tjin ná xi cjuė hisca nandya Roma.
—Cuatjin cachja me.

²² Ngajan xi catsingatju me jo xuta xi visecoo rė me jan, Timoteo cojo Erasto, ngajan distritu Macedonia. Peru me vėhė ne, casetaha sa me ngajan distritu Asia.

²³ Ngu nixtin xi quitahá me jan ne, cavechú ngu cjuandya jyė tsėhė ndiya rė Jesús. ²⁴ Ngu xihin xi hmı rė Demetrio ne, sahmi me yungun langa cojo suvá quicha tyava, xcusun rė yungun rė nina Diana. Hane xuta xi sahmi xa rė Demetrio ne, jemu casacu rė me tujún tsėhė xa vėhė. ²⁵ Ngajan xi Demetrio ne, casahmi tangun me yėjė xuta xi sahmi xa rė me cojo jingu sa xuta xi sahmi me xa vėhė ni ne, sehe cachja me cuitjin:

—Ngayujun ni ne, ha hyun ta tsėhė xa vihi ne, sacu naja yėjė tujún xi tjin naja. ²⁶ Ngayun ne, chutsujun hacuaha machaya nuju cjua xi hacuiin suvá ni nguehe ta cojo jingujyė ni distritu Asia ne, tsujyihya cha Pablo vė, sahmi cha xi vijnecacun xuta cjin hacuaha tsismicacun me nina naja ta, tsėhė xi chja cha xi nina xi nindajan cojo ntsan ne, hacuiin nina jain me. ²⁷ Jemu tsavi ta hacuiin suvá ni xa naja chajá ta cojo yungun rė nina naja Diana ne, cuechú hora xi cuenguin chji rė, hacuaha hisca suvá nina naja ne, chajá me xi jyė hnga me cojo cjuatacun rė me ta me vėhė ne, yėjė ni xuta tsėhė jingujyė ni distritu Asia cojo xuta tsėhė jingujyė ni ngasunhndė ne, jemu faharcun rė me. —Cuatjin cachja me.

²⁸ Xi cahndė xuta cjua jan ne, jemu camacjan camahani rė me, sehe cajindaya me cachja me cuitjin:

—Jemu jyė hnga nina Diana naja. —Cuatjin cajindaya me cachja me.

²⁹ Jingujyė ni ngajñi nandya ne, jemu jyė suė cavejña. Ngajan xi xuta jan ne, vanga me cjuı cuma tangun me ngajan ndatsen ndihyavasen, taha tijuvėhya me Gayo cojo Aristarco, jo me tsėhė distritu Macedonia, me xi visecoo rė Pablo. ³⁰ Ngajan xi Pablo ne, meje cuisehenjñi me ngajñi rė xuta cjin jan, peru xuta ladu rė Jesús ne, casuaain me cahndė. ³¹ Hacuaha ngujo xutaxa rė xi vinga rė Pablo ne, catsingatju me cjua tsėhė Pablo xi cjuin me ngajan ndatsen ndihyavasen. ³² Ngujo xutacjin jan ne, jindaya me chja me

cuitjin, ngujo nga me ne, jindaya me chja me cuatjin ta, tsêhê xi yêjê ni xuta ne, jemu camasuê rê cjuatacun rê me. Jercu cjín me xi hisca hvíin me mé má cuatjin quiji camatangun me jan. ³³Peru ngujo xutacjín jan ne, casuacuenda me Alejandro mé tsêhê xi cuatjin tijima, hya xi catsivaha xuta tjê rê Israel me xi secun me xcun. Ngajan xi Alejandro ne, casahmi tsja me cojo xutacjín jan xi sejyu me cojo sa xi cuma cuichja Alejandro ngatsê rê xuta tjê rê Israel. ³⁴Peru xi cavêê xutacjín jan xi Alejandro ne, xuta tjê rê Israel má me ne, ngu tangun ni cajindaya me, vatju sa jo hora cachja me cuitjin:

—Jemu jyê hnga nina Diana naja! —Cuatjin cajindaya me cachja me.

³⁵Hya xi camá ne, xi camá catsinguejyu secretariu xutacjín jan ne, sehe cachja me cuitjin:

—Ngayujun ngarcun ni ngayun xuta nandya matsejen ne, ha hyun ta tsajin hisca ngu xuta xi hvíin me xi nguehe Efeso tacun yungun rê nina Diana hacuaha nguehe tacun suvá nina xi cjanengui nguehe xi canduva ngahnga.

³⁶Tsêhê xi tsajin yo xi cuma cuichja xi hacuín cuatjin ne, vêhê xi meje rê xi catisejyu ni ngayun, tsajin mé xi nihñu sa xi cjêê ningatuhuntacúnndujun.

³⁷Cha xi cuicun canduvuncujun nguehe ne, tsajin mé xi choho casahmi cha cojo yungun naja, hacuaha tsajin mé xi choho chja cha tsêhê nina naja.

³⁸Peru sa xi Demetrio cojo xuta xi sahmi xa rê me tjin yo xi sahmi si me cojo ne, tacun ndihyavasen, hacuaha tjin xutaxa rê. Ngajan catinchajyê xicjin me, jima ngu me. ³⁹Hane sa xi tjin sa mé xi meje nuju ne, nixtin xi satê rê junta xi sehe cuma ne, hya cuma chihin. ⁴⁰Sacuaha xcusun xi tijima vi ne, cuma tsingatahacacun me xi matitjun xi ngayaan ne, tinihña ngu si jyê condra tsêhê gobiernu. Ta sa xi cjuinenguise naja me mé má cuatjin canihña ne, sacuín naja chuva rê hacutjin cuinújan mé má cuitjin tinihña ngu suê jyê vi.

⁴¹Cuatjin cachja secretariu, sehe catsinguijnetaha me cjua cojo xutacjín ne, sehe cafe xingu xingu me.

20

Quiji Pablo distritu Macedonia cojo distritu Acaya

¹Hya xi camá ne, xi cavatju suê jyê jan ne, cajindaya Pablo xuta ladu rê Jesús, casua rê me cjuetacun. Sehe catsinguijnetaha me cjua, sehe cavetju quiji me distritu Macedonia. ²Hane jima ngu nandya xi cavatju me xi cafehe me Macedonia ne, hacuaha jercu cachja me cojo xuta ladu rê Jesús hacuaha casua rê me cjuetacun. Hane xi cavatju me yêjê nandya vêhê ne, cafehe me distritu Acaya. ³Hane ngajan casetaha me jyan sá. Hane hya xi ha cjuaha me barcu xi cjue me distritu Siria ne, casacu camachaya rê me xi xuta tjê rê Israel ne, caviyuju me xi tsiquehen rê me. Vêhê xi catsingatahacacun me xi hitsê sa ndatjin cuya cjue ntsacu me xi táha ladu tsêhê Macedonia. ⁴Hane cojo me xi cuicun vihi quiji me cojo rê me: Sópater, ngu xuta Berea xi quihndi rê Pirro; cojo Aristarco cojo Segundo, jo xuta Tesalónica; cojo Gayo, ngu xuta Derbe; cojo Timoteo; cojo Tíquico cojo Trófimo, jo xuta tsêhê distritu Asia. ⁵Me xi cuacun vê ne, camatitjun me quiji me, hane ngajan caviyujuya niji me nandya Troas. ⁶Peru ngayin ne, xi cavatju suhi tsêhê pan xi tsajin san rê ne, sehe cachjihin barcu xi cavetjin tsêhê Filipos, hane xi café hñú nixtin ne, sehe cavechintihin me ngajan Troas. Hane ngajan cavinechintihin yatu nixtin.

Quitahá Pablo ngajan nandya Troas

⁷ Ngajan xi nixtin ngu tsêhê totje ne, camatangun ngayin xi xinitanguin niñu ngayijin ni. Hane Pablo ne, cachja me cojo xuta. Hane tsêhê xi cuetju me cjue me xi cuma nchujun jan ne, quijinduju cachja me hisca cavechú vasen nixten. ⁸ Jemu cjín ndihi seti ngajan ndihya ngahnga hiscan camatangun ngayin. ⁹ Hane ngu cha xi hmí rê Eútico ne, tacun cha xcun ventana. Hane xi quijinduju sa cachja Pablo ne, jemu camanijñá rê cha. Hane tsêhê xi cacaain rê cha nijñá ne, cafañafé tjain camahani cha, hane cjanengui cha hisca xi má jyan pisu ndihya jan. Hane xi quiji catjunihnga rê cha ne, ha cahme cha. ¹⁰ Hane xi quijijne Pablo hiscan jiña nima ne, catsiquindi me yojo rê me sehe catsuvacja me nima. Hacuaha cachja me cuitjin:

—Xicamacjiin tacún ta, quicun cha vi. —Cuatjin cachja Pablo.

¹¹ Ngajan xi Pablo ne, cavuya quijiniji me, sehe cajiné me niñu. Sehe cavisiajmi camaha sa me hisca xi casahasen, sehe cavetju me quiji me. ¹² Hacuaha quicun cha xi cjanengui jan, cafecojo xuta cha. Hane jercu casacu rê me cjuetacun xi quicun cha.

Quiji Pablo nandya Mileto

¹³ Ngayin ne, camatitjun ngayin catsanguin cavisihin barcu, hane sehe catsanguin nandya Aso, cojo sa xi chjihinntsín Pablo cahntsua barcu ngajan ta, tsêhê xi ha cuatjin camachihin cjua ta, tsêhê xi me vêhê ne, meje cjue ntsacu me. ¹⁴ Hane xi casacu xinguin cojo rê me ngajan Aso ne, cavisehen me barcu, sehe catsanguin tangun Mitilene. ¹⁵ Hane xi cavetjin ngajan ne, xi camá nchujun ne, cavatjin quixi rê Quío. Hane xi camá nchujun nga ne, caphin Samos. Hane camá nchujun nga ne, caphin nandya Mileto, ¹⁶ tsêhê xi Pablo ne, cavejñacacun me xi cuátjincjin tsêhê nandya Efeso, cojo sa xi hacuúin cuma tafi me ngajan distritu Asia, tsêhê xi me vêhê ne, jemu meje xati rê me cojo sa xi xati cuechú me ngajan Jerusalén, hane ngajan tsingatju me suhi Pentecostés.

Catsingujnetaha Pablo cjua cojo xuta changá rê yungun Efeso

¹⁷ Hane jinguyêjê rê xi quitahá Pablo ngajan Mileto ne, catsingatju me quiji chjahá rê xuta changá rê yungun ngajan Efeso. ¹⁸ Hane xi cafehe xuta changá jan xcun Pablo ne, cuitjin cachja Pablo cojo rê me:

—Ngayun ne, ha hyunndujun hacutjin cavitejñataha cojo nuju yêjê ni nixtin hisca hya xi sehe tu cafêhê ngeuhe distritu Asia. ¹⁹ Ha hyun hacutjin casahme xa rê Nai naja: catsingujne yojo naha, hisca cajíhnda, hacuaha jemu cjín cjuañihi cavátju camá ta, tsêhê xi xuta tjê rê Israel ne, jemu choho meje sahmi me cojo ná. ²⁰ Ngayun ne, ha hyun hacutjin xi cachjá yêjê cojo nuju yêjê cjua xi ndaja xi cuma nuju. Hacuaha ha hyun hacutjin casuá camachaya nuju cjuachacun hya xi camatangun ngayun ngayujun ni, hacuaha cêjê ndya nuju jima ngu ngayun, cachjá cojo nuju. ²¹ Cachjá cojo xuta tjê rê Israel hacuaha cachjá cojo xutaxín xi meje rê xi tsindeya me cjuatacun rê me hacuaha cuisehen me ladu rê Nina hacuaha meje rê xi cumangucacun me cojo Nai naja Jesús. ²² Quihndê ne, ngahan ne, tifê Jerusalén sacuatjin cavitexa ná Hasen rê Nina. Hveen mé xi cuátju cuma jan. ²³ Peru Hasen rê Nina ne, yêjê ni nandya xi vátju ne, chja cojo ná xi hatuxa cjuê ndavaya hacuaha jemu cuátju cjuañihi. ²⁴ Xi má ná ne, tangun ni xi tejña cjuahñu o sa xi cueya. Xi meje ná ne, xi tsingujnetaha xa xi casua ná Nai naja Jesús, xa xi suá cumachaya rê xuta cjuandajyihí xi chja tsêhê cjuandaja rê Nina.

²⁵ Quihndê ne, ha hvê ta ha quihndê cuyuun chun ná, ngayujun ni xi casuá camachaya nuju tsêhê gobiernu xi sahmi Nina. ²⁶ Vêhê xi ngeuhe cuichjá

cojo nuju ta, sa xi tjin ngu ngayun xi cuechuun xcun Nina ne, hacuiin ngahan quitjen jyě ta, ²⁷ tsěhě xi ngahan ne, casuácuenda chichihin nuju yějě hacutjin xi cavejña Nina cjuatacun rě me. ²⁸ Nechun cuidadu, hacuaha nihñucuidadun yějě xuta ladu rě Jesús, xi súvá Hasen rě Nina casuaxa nuju xi cuma tjtjun ngayun tsěhě sacuaha obispos, cojo sa xi ngayun nihñu cuidadu xuta rě yungun rě Nina. Me xi cuacun vė ne, casacu rě Nina me cojo jni rě Quihndi rě súvá me hya xi cahme me. ²⁹ Hya xi ha cavatju cavétjuxen tsujun ne, ngahan hvě ta cuinduva xuta, xi meje tsinguetsun me cjuatacun rě yějě xuta ladu rě Jesús, sacuatjin tsiquehen chu lobo cjan rě chu tsánga. ³⁰ Hacuaha ngajñi nuju suvun ne, cuetjujñi xuta xi cuichja me cjuandacha, cojo sa xi cuaxėxin me xuta ladu rě Jesús xi cuma ladu rě me. ³¹ Nechun cuidadu. Hacuaha ninguitsjun ta, cahntsua jyan nu ne, nguixun nguaitjñu cavicuyá nuju jima ngu ngayun. Jiya hora ne, hisca cajihnda.

³² Quihndě ne, ngeueh cuiyujú nuju tsja Nai naja, cojo sa xi sahmi nuju me cuidadu cojo cjuandaja rě me. Me vėhě xi ma sahmi me xi cuma yehe sa cjuatacun nuju, hacuaha sua tangun nuju me cjuahñu xatsě cojo yějě sa xuta xi cavaxijin me. ³³ Ngahan ne, hacuiin catsihmucacun tujún o sa tsjian rě jingu sa xuta. ³⁴ Ngayun ne, hyun ta ngahan ne, casahmexa cojo ntsa vi xi casacu cjuachaja naha cojo me xi cavisecoo ná. ³⁵ Ngajñi rě yějě ni xcusun xi casahme ne, ngahan ne, catsingácun nuju xi, xi cuatjin hñu nihña xa ne, meje rě xi cuisecoon rě xuta xi jemu tjin rě cjuachaja. Hacuaha meje rě xi ninguitsjen cjua rě Nai naja Jesús, hya xi cachja me cuitjin: “Hitsě sa sua má naja xi tahan, xi cuma rě xi chjahanntsán.” Cuatjin cachja Nai naja.

³⁶ Hane xi café cachja Pablo cuatjin ne, sehe cavixuhnchin me, casahmi me oración cojo yějě xuta jan. ³⁷ Yějě ni me jemu cajihnda me, quiji me catsuvacja me Pablo, hisca cavitatsuha me. ³⁸ Cjua xi hitsě sa casua rě me cjuachoho ne, cjua xi cachja Pablo xi ha quihndě cuyaaín scuėě xuta jan me. Sehe quiji me cojo Pablo hiscan cavisehen Pablo barcu.

21

Quiji Pablo ngajan Jerusalén

¹ Hya xi camá ne, xi cavejñi xuta jan ne, sehe ngu quixi ni quiji barcu cojo nihi ne, caphin Cos. Hane xi camá nchujun jan ne, caphin Rodas. Hane xi cavetjin ngajan ne, caphin Pátara. ² Hane xi casacu nihi ngu barcu xi cjue distritu Fenicia ne, cavisihin sehe catsanguin. ³ Hane xi cachutsijin Chipre ne, cavatjin taha ladu quixi tsěhě jan, catsanguin nduju xi caphin quixi rě distritu Siria, sehe caphin nandya Tiro ta, tsěhě xi ngajan cuitujne chaha xi híncha cahntsua barcu. ⁴ Hane xi casacu xinguin cojo xuta ladu rě Jesús jan ne, cavinechintihin ngajan yatu nixtin. Hane ngujo profeta xi siu ngajan Tiro ne, tjin me cachja Hasen rě Nina cojo rě me, sehe cachja profeta jan cojo Pablo xi cjuuin me Jerusalén. ⁵ Xi cavechú nixtin xi cuetjin jan ne, sehe cavetjin catsanguin. Hane yějě xuta jan, cojo chjuun rě me cojo quihndi rě me ne, quiji caní nihi me hisca tjehen ndachacun, hiscan fě nandya. Sehe ngajan cavixuhnchin, sehe canihñi oración. ⁶ Hane xi caninguijnithin cjua cojo rě me ne, sehe cavisihin barcu, hane me vėhě ne, cavuya cafe me ndava me xingu xingu me.

⁷ Hane ngayin ne, catsanguin cojo barcu xi cavétjin tsěhě Tiro, hane caphin Tolemaida. Hane xi catsanguin catihin rě xuta ladu rě Jesús nina ne, ngajan cavinechin cojo rě me ngu nixtin. ⁸ Hane xi camá nchujun jan ne, cavetjin

catsanguin, hane caphin Cesarea. Sehe catsanguin ndava Felipe, me xi sua machaya rē xuta cjuandajyih xi chja tsēhē Jesús. Me vēhē ne, ngu me tsēhē me xi ma yatu xi cavaxiji me xi viseco rē apóstol. Hane ngajan cavinechin cojo rē me. ⁹ Me vēhē ne, tjin rē me ñuju na nixti quihndi rē me, xi má na profeta. ¹⁰ Hane jinguyējē rē xi nechintihin ngajan ngujo nixtin ne, cafehe ngu profeta xi canduva tsēhē Judea, ngu me xi hmí rē Agabo. ¹¹ Hane xi cafehetjengui niji me ne, quiji me cafaha me cinturón rē Pablo, sehe catsihñu me tsja me cojo ntsacu me cinturón jan, sehe cachja me cuitjin:

—Cuitjin chja Hasen rē Nina: “Xihin xi tsēhē cinturón vi ne, cuitjin tsihñu xuta tjē rē Israel me ngajan Jerusalén, hacuaha sahmi me entregadu xihin vēhē tsja xutaxín.” —Cuatjin cachja profeta jan cjua rē Nina.

¹² Xi canuhyin cjua vēhē ne, ngayin cojo xuta xi siu jan ne, canújin cojo Pablo xi cjuuin me Jerusalén. ¹³ Ngajan xi Pablo ne, cuitjin cafayangui me:

—¿Mé má cuatjin chjihndun? ¿Mé má cuatjin nihñuchuvun cjuatacun naha? Ngahan ne, ha tjin chjine ngahan, hacuiin suvá ni xi cjué ndavaya ta hacuaha hisca cueya ngajan Jerusalén ngatsē rē xi ladu rē Nai naja Jesús ngahan. —Cuatjin cafayangui Pablo tsijin.

¹⁴ Hane xi catsingatiin me cjua xi canújin ne, ha quihndē canujiin sa cjua vēhē ta cuitjin canújin:

—Catama sacuatjin Nai naja meje rē me. —Cuatjin canújin.

¹⁵ Xi cavatju nixtin xi cuacun vē ne, sehe cavihinchjini tsijin, sehe catsanguin Jerusalén. ¹⁶ Hacuaha cojo ngujo xuta ladu rē Jesús ngajan Cesarea quiji me cojo niji. Me xi cuacun vē quijicojo niji me hiscan xi cuinechin, ndava ngu xuta Chipre xi siutaha me Jerusalén, xi hmí rē Mnasón. Me vēhē ne, ha jemu hatsēē camahani xi xuta ladu rē Jesús má me.

Quiji Pablo xi cuisiajmi me cojo Jacobo

¹⁷ Xi caphin ngajan Jerusalén ne, xuta ladu rē Jesús jan ne, cafahatsja niji me cojo yējē ni cjuasua. ¹⁸ Hane xi camá nchujun jan ne, Pablo ne, quiji me cojo niji xi cuisiajmi me cojo Jacobo. Hacuaha ha tjin tangun yējē xuta changá rē yungun jan. ¹⁹ Hane xi cavatju cachja Pablo nina cojo rē me ne, sehe casuacuenda chichihin me yējē ni xcusun xi casahmi Nina ngajñi rē xa rē Nina xi casahmi Pablo ngajñi rē xutaxín. ²⁰ Hane xi cavatju cahndē xuta jan cjua xi cachja Pablo ne, casahmi jyē casahmi hnga me Nina, sehe cachja me cojo Pablo cuitjin:

—Ngayun ne, ha hyun xi ngajñi rē xuta tjē rē Israel ne, chuva mil xuta tjin me xi cavisehen me ndiya rē Jesús. Hacuaha yējē ni me ne, jemu ndaja faharcun me ley rē Moisés. ²¹ Hacuaha xuta xi cuacun vē ne, casacu camachaya rē me xi ngayun ne, nújun cojo yējē xuta tjē rē Israel xi siu ngajan nangui rē xutaxín xi meje rē xi tsismicacun me ley rē Moisés, hacuaha mijí rē xi cuatē me chuxin rē quihndinda xi xihin, ha quihndē mijí rē xi cjuetjengui sa me xcusun changá naja. ²² ¿Mé xi cuma ni? Hatuxa jyih ni ne, sacú cumachaya rē me xi cafuhun. ²³ Vēhē xi quihndē ne, nihñu tutjin xi cuinújin cojo nuju. Nguehe ngajñi niji ne, siu ñuju xihin xi casahmichihin me ngu cjua cojo Nina. ²⁴ Chjuhun cha vihi ne, tangun cojo cha yungun xi matitjun, cojo sa xi ngajan cuma tyjahí cha tangun cojo ngayun tsēhē xcusun xi tsavi xi cojo Nina sacuatjin xi ha xcusun naja. Hacuaha techjun tsēhē cha, cojo sa xi cuma sejnu rē rcu cha. Hane xi cuatjin nihñu ne, yējē ni xuta ne, cumachaya rē me xi yējē cjua xi camachaya rē me tsujun ne, quixiin ta ngayun ne, hacuaha ha tuxa nihñuchuhun sacuatjin chja ley rē Moisés. ²⁵ Hane sacuaha

xutaxín xi cojo cavisehen ladu rë Jesús ne, ha caningatjin ngu xujun tséhë me, hane xujun vëhë ne, chja xi meje rë xi sinii me xichinë xi caviyuju xcun ninandyojo, sinii me jni, sinii me yojo rë chu xi caxinchahndu rë xi cahme, sahmi me cjuatsehen xi sahmi xuta cojo ngu xi hacuiin chjuun rë hacuiin xihin rë. —Cuatjin cachja xuta changá jan cojo Pablo.

²⁶ Hane xi camá nchujun jan ne, sehe quijicojo Pablo cha xi cuacun jan, sehe catsityjahi tangun me yojo rë me cojo cha, sacuatjin xi ha xcusun rë xuta tjë rë Israel. Sehe ngajan xi Pablo cojo cha xi cuacun jan ne, cavisehen me yungun xi matitjun, xi cuichja me há cjín sa nixtin xi cuijnetaha xi cuma tyjahi camahani me, hane hacuaha cjue cjuatjo xcun Nina ngatsë rë jima ngu me.

Cafaha sindadu Pablo ngajan yungun xi matitjun

²⁷ Hya xi camá ne, xi ha meje cuechú xi cuma yatu nixtin jan ne, xuta tjë rë Israel xi canduva tséhë distritu Asia jan ne, cavëë me Pablo ngajan cahntsua yungun xi matitjun tséhë xi nhunchujun ni quiji me yungun tséhë nixtin jan. Catsisüë me cjuatacun rë xutacjín jan, sehe quiji cafaha me Pablo, ²⁸ hisca cajindaya me cachja me cuitjin:

—¡Ngayujun ni ngayun xuta tjë rë Israel, nduvun tisecuun niji! ¡Cha vihi xi tsujyihya chja cha condra naja ngayaan xuta rë Nina, cojo condra rë ley xi vitexa naja, cojo condra tséhë cahndë vihi! Cuatjin tsujyihya chja cha cojo yëjë xuta jinguyë ni. Hacuaha catsinguetsun cha cahndë rë Nina vi, tséhë xi canduvacojo cha xutaxín nguehe cahntsua yungun xi matitjun vi.

Cuatjin cajindaya me cachja me ta, ²⁹ tséhë xi titjun ne, ha cavëë me Pablo cojo ngu xutaxín xi hmi rë Tróximo ngajan ngajñi nandya, hane xi má rë me ne, quijicojo Pablo me cahntsua yungun.

³⁰ Hane yëjë xuta nandya ne, camasüë rë cjuatacun rë me. Hane vanga me quiji camatangun me yungun xi matitjun hiscan secun Pablo, sehe cafaha me cajavëjne me, cavaxë me tséhë yungun jan. Sehe ngutjen ni casechja yëjë tingotjo jan. ³¹ Hane jinguyëjë rë xi tisahmi xutacjín jan cjuandya xi tsiuehen me Pablo ne, quiji cjua rë capitán tséhë sindadu xi yëjë xuta Jerusalén ne, tjemu jyë suë tisahmi me. ³² Ngajan xi capitán jan ne, ngutjen ni quijijne me cojo sindadu rë me hiscan xi hinchataha xutacjín jan. Hane xi cavëë xutacjín jan sindadu cojo capitán rë cha ne, sehe casejyu me xi tivaja rë me Pablo. ³³ Hane xi quiji tiña capitán jan ne, sehe cafaha me Pablo. Sehe cavitexa me xi cumahña Pablo cojo jo cadena. Hya xi camá ne, sehe cavinenguise capitán jan cojo xuta jan yo xuta Pablo jan, hacuaha mé casahmi me. ³⁴ Hane ngujo xuta jan ne, hisca jindaya me chja me cuitjin, ngujo nga me ne, hisca jindaya me chja me cuatjin. Peru tséhë xi casacuiin rë capitán jan cjuaquixi ngatsë rë suë jyë xi tijima jan ne, cavitexa me xi cjuecojo sindadu Pablo ngajan hiscan hinchá sindadu. ³⁵ Hane xi cafehe sindadu cojo Pablo hiscan ndë rë ne, hisca cavahanga cha Pablo ngatsë rë cjuahngatacun xi sahmi xutacjín jan ta, ³⁶ tséhë xi tjengui me cjui me jindaya me chja me cuitjin:

—¡Nicuhun cha! —Cuatjin chja me.

Sua Pablo cjuaquixi rë me xcun xutacjín

³⁷ Hya xi ha tsinguissehen sindadu jan Pablo cahntsua ndihya ne, cachja Pablo cuitjin cojo capitán:

—¿Há tuun cahndë cuichjá cojo nuju ngujo cjua? —Cuatjin cachja Pablo. Ngajan xi capitán jan ne, cuitjin cachja me:

—¡Han, peru ma noje griego! ³⁸ Hane ngajan xi hacuiin ngaye cha Egipto xi sehe tiña nixtin cavunihnga ngu si jyë hacuaha quijicojo rê ñuju mil cha tsiquehen ngajan ngu xín tséhë nandya jan ni. —Cuatjin cachja capitán jan.

³⁹ Ngajan xi Pablo ne, cuitjin cachja me:

—Ngahan ne, ngu cha tjë rê xuta Israel ngahan. Nangui naha ne, ngu nandya xi hacuaha jemu vengui chji rê xi hmi rê Tarso, tséhë distritu Cilicia. Nihñu favor ne, tuhun cahndë cuichjá cojo xuta xi cuicun vi. —Cuatjin cachja Pablo.

⁴⁰ Hane xi casua capitán jan cahndë xi cuichja Pablo ne, hora xi secun Pablo hiscan ndë jan ne, casahmitsja me cojo xuta xi sejyu me hitsë. Hane hora xi café xuta caviyujuyuu me ne, ngajan xi Pablo ne, cachja me cojo xuta jan hne hebreo, cuitjin cachja me:

22

¹ —Ngayujun ngarcun ni xi hacuaha xingueen nuju ne, nihñu favor ne, tisiñuju hacutjin suá cjuaquixi naha quihndë xcun ngayujun ni. —Cuatjin cavetsihin cachja me.

² Hane xi cahndë xutacjín jan xi hne hebreo cachja Pablo cojo rê me ne, hitsë sa jercu caviyujuyuu me. Sehe cachja sa Pablo cuitjin:

³ —Ngahan ne, ngu cha tjë rê Israel ngahan. Hacuaha catsin ngahan ngajan nandya Tarso tséhë distritu Cilicia. Peru xi camacha ne, nguehe Jerusalén. Hane maestru Gamaliel cavicuya ná me sacuatjin camahani chja ley rê xutachanga naja. Hatuxa jemu ndaja fahárcun Nina, sacuatjin tinihñu ngayujun ni quihndë. ⁴ Ngahan ne, cojo cjuahngatacun ne, catsujyéhëya tjënguë xuta xi tjengui ndiya xatsë vihi. Hisca cavitéxa xi cueya me. Cafahá me cëjëcojo me ndavaya, sa chjuun sa xihin me. ⁵ Hisca nahmi xi matitjun cojo yëjë xuta changá rê yungun ne, cuma sua me cjuaquixi rê me tséhë cjuu vihi ta, tséhë xi hacuaha me xi cuacun vëhë casua ná me xujun xi suá rê xuta naja ngajan Damasco. Vëhë xi cëjë ngajan xi cjuahá xuta xi tjengui ndiya xatsë vihi, hane tsihñu me cuinduva cojo me nguehe Jerusalén, cojo sa xi cuma me castigu.

Cachja Pablo hacutjin camá xi cavisehen me ladu rê Jesús

⁶ 'Hya xi camá ne, hora xi ha tijima tiña ngayin xi tivanguin Damasco, sacuaa chuya rê nchisen ne, ha tu ñahñu canduva ngu ndihi jyë tséhë ngahnga casahmi hasen rê hiscan tifë. ⁷ Ña catícja, hane cahndë ngu cjuu xi cachja cojo ná cuitjin: “Saulo, Saulo, ¿mé má cuatjin nuyihiye tjengui ná cojo cjuahngatacun?” Cuatjin cachja cjuu jan. ⁸ Ngajan xi ngahan ne, cuitjin cafayanguë: “¿Yo ngayun, Tatá?” Cuatjin cafayanguë. Sehe cachja nga cjuu jan cojo ná cuitjin: “Ngahan xi Jesús tséhë nandya Nasaret ngahan, xi tinuyihiye tjengui ná cojo cjuahngatacun.” Cuatjin cachja nga cjuu jan cojo ná. ⁹ Yëjë xuta xi cavisecoo ná xi tivanguin ne, cavëë me ndihi jyë jan, peru cahndiin me cjuu xi cachja cojo ná jan. ¹⁰ Sehe ngajan xi ngahan ne, cachjá cuitjin: “¿Mé xi meje rê xi sahme, Tatá?” Cuatjin cachjá. Hane Nai naja ne, cuitjin cachja me cojo ná: “Tisatjinhngue ne, tisihin Damasco. Hane ngajan cumachaya ri yëjë xcusun xi meje rê Nina xi nihñi.” Cuatjin cachja Nai naja cojo ná. ¹¹ Peru tséhë hasen jyë xi cavisehen túxcun jan ne, camatsijin ná. Ngajan xi xuta xi tivisecoo ná xi tivanguin ne, cavaha me ntsa, sehe camá caféhë Damasco.

¹² 'Hya xi camá ne, ngu xihin xi hmi rê Ananías, xi jemu faharcun rê Nina hacuaha sahmi yëjë sacuatjin chja ley xi vitexa naja ne, ndaja chja

yějē xuta tjē rē Israel xi siu jan tsēhē. ¹³ Hane cafehettjengui ná me hiscan tejña, hane cachja me cojo ná cuitjin: “Ngayun Saulo, catamatsejen nga nuju ngundiya.” Cuatjin cachja me. Hane ha hora vėhē ni ne, camatsejen nga ná hane cahvė me. ¹⁴ Hya xi camá ne, sehe cachja me cojo ná cuitjin: “Nina rē xutachanga naja ne, cojo tjun sa ne, casuaxa nuju me xi cumachaya nuju mé xi meje rē me, hacuaha chun me xi hatuxa tyjahi cojo cjuatacun rē, hacuaha cuinuhyun cjua xi chja me cojo nuju. ¹⁵ Cuatjin camá ta, tsēhē xi Nina meje rē me xi ngayun tuhun cumachaya rē yějē xuta tsēhē me, cojo tsēhē xcusun xi cahyun cojo tsēhē cjua xi canuhyun. ¹⁶ Quihndē ne, ¿mé nechunyun rē ni? Tángun ni catixtenda ngayun, chjindayun rē Jesús cahntsua xahasen nuju, cojo sa xi cjuē jyē nuju.” Cuatjin cachja Ananías cojo ná.

Cachja Pablo hacutjin camá xi quiji cachja me cjua rē Nina cojo xutaxín

¹⁷ Hane xi cavatju vėhē ne, cavúya nga Jerusalén. Hane ngu ndiya hya xi tejñaya yungun xi matitjun tisahme oración naha ne, sacua ha xi camá ná xi cachja ngu chini cojo ná. ¹⁸ Cahvė Nina, hane cachja me cojo ná cuitjin: “Xati nihñi tacuin ne, tetjixin tsēhē Jerusalén ta, tsēhē xi xuta nguehe ne, cumacjaain rē me cjua xi noje tsahan.” Cuatjin cachja Nina. ¹⁹ Hane ngahan ne, cuitjin cachjá: “Ngayun Nina naha, xuta nguehe ne, vėē me xi ngahan ne, catsujyėhėya yungun jinguyjė ni, cafa há xuta xi tjengui me ndiya nuju, cavajá rē me, hacuaha cavinchá me ndavaya. ²⁰ Hane hora xi titsiquehen xuta Esteban, me xi cachja cjua nuju ne, hacuaha cojo ngahan sécun jan, tichuya ná, hacuaha hisca ngahan tisahme cuidadu tsjan rē cha xi titsiquehen rē Esteban jan.” Cuatjin cachjá. ²¹ Sehe ngajan xi Nina ne, cuitjin cachja me cojo ná: “Tihin ta, ngahan tsingátju ri hisca nangui cjin, cuihin cuinoje cojo xutaxín cjua naha.” Chja Nina cojo ná. —Cuatjin cachja Pablo.

Cavitexa capitán xi sehen rē Pablo

²² Hisca ngajan ni cacaa rē xutacjín cavisinuju me cjua xi cachja Pablo, sehe cavetsihin me cajindayataha me cachja me cuitjin:

—iNicuhun cha xi cuajyihí vė ta ha quihndē vechiin chuva rē xi cuejña sa cha cjuahñu! —Cuatjin cajindaya me cachja me.

²³ Jinguyjėjė rē xi cuatjin jercu tijindayataha xuta, titsiniya me tsjan rē me, hacuaha titsicjin me nihndē scuan ne, ²⁴ capitán jan ne, cavitexa me xi cjue chani rē Pablo cahntsua hiscan híncha sindadu. Hacuaha cavitexa me xi chjahátaha rē Pablo táha sehen rē me, cojo sa xi sacú cjuaquixi mé má cuatjin jindayataha xuta Pablo. ²⁵ Hane hya xi ha camahñu me xi sehen rē me ne, sehe cachja me cuitjin cojo sindadu xi secun jan:

—¿Há chja ley xi cuma sehen rē ngu xuta Roma jinguyjėjė rē xi cjėē cuma cuenda jyē rē me? —Cuatjin cachja me.

²⁶ Hane xi cahndē sindadu cjua vėhē ne, quiji cachja me cojo capitán cuitjin:

—¿Há hyun mé xi nihñu ni? Cha vėhē ne, cha Roma cha. —Cuatjin cachja sindadu jan.

²⁷ Ngajan xi capitán jan ne, quijittjengui me Pablo, sehe cachja me cuitjin:

—Tinoje cojo ná ne, ¿há xuta Roma jain ngaye? —Cuatjin cachja me.

Ngajan xi Pablo ne, cuitjin cafayangui me:

—Juun. —Cuatjin cafayangui me.

²⁸ Ngajan xi capitán jan ne, cuitjin cachja me:

—Ngahan ne, jemu jyë tujún cavechjë xi camá ngahan xuta Roma. —Cuatjin cachja me.

Ngajan xi Pablo ne, cuitjin cachja me:

—Peru ngahan ne, xuta Roma ngahan hisca xi catsin ngahan. —Cuatjin cachja me.

²⁹ Hya xi camá ne, sindadu xi cjuahataha rë Pablo jan ne, ngutjen quijixin cha tsëhë Pablo. Hacuaha capitán jan ne, jemu catsacjun me camá xi cuatjin catsihñu me Pablo tsëhë xi camachaya rë me xi Pablo ne, xuta Roma me.

Cavisehen Pablo xi cuma cuenda jyë rë me xcun me xi matitjun tsëhë xuta tjë rë Israel

³⁰ Hane xi camá nchujun jan ne, tsëhë xi meje cumachaya rë capitán jan cjuaquixi mé má cuatjin cavinchajyë xuta tjë rë Israel Pablo ne, cavitexa me quiji casehenndaya Pablo, hacuaha cavitexa me xi cumatangun yëjë nahmi xi matitjun cojo yëjë sa xuta xi matitjun. Hane xi cafehecojo sindadu Pablo jan ne, sehe quijicani capitán me xcun yëjë xuta xi matitjun jan.

23

¹ Ngajan xi Pablo ne, xi cavutsejenja me xcun yëjë xuta xi matitjun jan ne, sehe cachja me cuitjin:

—Ngayujun ni ne, nguehe cuichjá cojo nuju ta ngahan ne, hisca ntsacu cavetsihin hisca quihndë ne, hatuxa tyjahi cjuatacun naha xcun Nina. —Cuatjin cachja me.

² Hane Ananías, nahmi xi matitjun jan ne, cavitexa me xi xuta xi hinchacun hiscan secun Pablo xi cuajaya me hntsua Pablo. ³ Ngajan xi Pablo ne, cachja me cuitjin:

—¡Nina cuaja nuju me, ngayun xuta ndacha! ¡Nechun ndyá xi chjuhunchuven ná cojo ley rë Moisés, sehe vitexun xi cuajaya xuta ntsuva, handasa chja ley xi ndajintjin xi cuatjin nihñu! —Cuatjin cachja me.

⁴ Hane xuta xi hinchacun hiscan secun Pablo jan ne, cuitjin cachja me:

—Haján, ¿há cuatjin choho noje cojo nahmi xi matitjun xi Nina casuaxa rë? —Cuatjin cachja me.

⁵ Sehe ngajan xi Pablo ne, cuitjin cafayangui me:

—Haan, peru ngahan ne, hveen xi me vëhë xi nahmi xi matitjun me ta, ngahan ne, ha hvë xi xcun xujun rë Nina ne, cuitjin camahindu: “Mijí rë xi choho cuinújun cojo me xi matitjun tsujun.” —Cuatjin cachja Pablo cjuaxi camahindu xcun xujun rë Nina.

⁶ Hane ha vëë Pablo xi ngujo xuta xi matitjun jan ne, xuta saduceo me, hane ngujo nga me ne, xuta fariseo me. Vëhë xi cachjahñu me xcun junta cuitjin:

—Ngayujun ni ne, nguehe cuichjá cojo nuju ta ngahan ne, xuta fariseo ngahan, hacuaha quihndi rë xuta fariseo. Ngatsë rë xi vetahácacun xi nima ne, cuya cjuahñu ne, vëhë xi tichjahachuva ná. —Cuatjin cachjahñu Pablo.

⁷ Hane xi cachja Pablo cuatjin ne, cavetsihin cacjan xuta fariseo cojo xuta saduceo, hane hacuini tangun camá me cojo cjuatacun rë me. ⁸ Xuta fariseo ne, chja me ta nima ne, cuya cjuahñu, hacuaha chja sa me xi tjin ángel hacuaha tjin hasen naja. Peru xuta saduceo ne, chja me ta quixiin. ⁹ Hya xi camá ne, cavisatjenhnga ngu suë jyë. Ngajan xi cavetjuiñi ngujo cha xi vicuya cjuachacun xi hacuaha fariseo cha ne, cachja cha cuitjin:

—Sacuini niji hisca ngu jyë rë cha xi cuijyihí vi. ¿Há ngayaan hyan sa xi ngu ángel o sa xi ngu hasen cachja cojo rë cha? —Cuatjin cachja cha.

¹⁰ Hane hya xi suë xi tacun jan camajyë sa ne, jemu catsacjun capitán jan tsêhë xi tsiquehen xuta Pablo. Hane vëhë xi cavitexa me sindadu xi cjeuejne, cuaxëxín cha Pablo tsêhë ngajñi rë xuta jan, cjuecojo cha me cahntsua hiscan hincha sindadu.

¹¹ Hane xi camá nguixun nchujun jan ne, quijitjengui Nai naja Pablo, cuitjin cachja me cojo rë me:

—Tejñi hñu xahasen riji ta, tsêhë xi sacuatjin canoje ngatsë naha nguehe Jerusalén ne, hacuaha cuatjin tjin ri xi cuinoje ngajan Roma. —Cuatjin cachja Nai naja.

Casahmichihin xuta cjua xi tsiquehen me Pablo

¹² Hane xi camá nchujun nga jan ne, ngujo xuta tjë rë Israel jan ne, casahmitangun me cjua xi hacuiin sinë hacuiin cuihi me jinguyëjë rë xi cjëë tsiquehen me Pablo. ¹³ Quisun sa xi yachan xuta xi cuatjin caviyujucacun me. ¹⁴ Hya xi camá ne, quiji me xcun yëjë nahmi xi matitjun cojo xuta changá jan, hane cachja me cojo me cuitjin:

—Ngayin ne, canihñitanguín cjua xi xinii síin jinguyëjë rë xi cjëë niquihin cha Pablo. ¹⁵ Quihndë ne, ngayun cojo sa me xi yahnga xi matitjun ne, tuhun cumachaya rë capitán ne, cataxë me cha Pablo, catinduvacojo me cha xcun junta xi cuma, sacuaha xi meje sa nuju cjuaquixi tsêhë jyë rë cha. Hane ngayin ne, ha tjin chjine ngayin xi niquihin cha chaja sa xi cjeuhe cha xcun junta. —Cuatjin cachja xuta jan.

¹⁶ Peru cha quihndi rë na tichja Pablo ne, xi camachaya rë cha tsêhë cjuandacha jan ne, quiji cha hiscan hincha sindadu hane casuacuenda cha Pablo tsêhë cjua xi camachaya rë cha. ¹⁷ Sehe ngajan xi Pablo ne, cajindaya me ngu cha xi matitjun tsêhë sindadu, sehe cachja me cojo cha cuitjin:

—Tángun cojo cha vihi xingueen xcun capitán tsêhë xi tjin cjua xi cuichja cha cojo rë me. —Cuatjin cachja Pablo.

¹⁸ Ngajan xi sindadu jan ne, quijicojo cha cha xicjin Pablo jan xcun capitán, sehe cachja cha cuitjin:

—Cha Pablo xi jiya ndavaya jan ne, cajindaya cha ngahan, sehe cachja cha cojo ná xi cuinduva cojo cha vihi nguehe ta, tsêhë xi tjin xu cjua xi cuichja cha cojo nuju. —Cuatjin cachja cha sindadu jan.

¹⁹ Ngajan xi capitán jan ne, cafaha me tsja cha xicjin Pablo ne, sehe quijixin me cojo cha ngu ladu sehe ngajan cafninguise me cha cuitjin:

—¿Mé cjua xi cuinoje cojo ná? —Cuatjin cafninguise me.

²⁰ Hane cha xicjin Pablo jan ne, cuitjin cachja cha:

—Ngujo xuta tjë rë Israel ne, casahmitangun me cjua xi cuichja me cojo nuju xi cuanguncunun tsini naha xcun me xi matitjun tsêhë me, sacuaha xi tjin sa cjua xi meje cjuinenguise rë me. ²¹ Peru xicamacjaain nuju cjua rë me ta, vatju sa yachan xuta xi hinchaya rë me ngajan ndiya, xi casahmichihin me cjua xi sinii cuiin me jinguyëjë rë xi cjëë tsiquehen me tsini naha. Ndicumaha ni ne, siuya me xi cuinújun xi ndatjin. —Cuatjin cachja cha xicjin Pablo.

²² Ngajan xi capitán jan ne, cuitjin cachja me cojo rë cha:

—Tjihin ne, tsajin yo xi cuinoje cojo xi catehe camachaya ná cjua vihi. —Cuatjin cachja me.

Quiji chani rë Pablo xcun Félix, me xi matitjun

²³ Hya xi camá ne, capitán jan ne, cajindaya me jo sindadu rë me, sehe cachja me cojo cha cuitjin:

—Tuhunchjinu jo cientu sindadu cojo jyanchan tē cha xi miji naxin cojo jo cientu sa cha xi vaha lanza ne, cojo sa xi fane ñaja tsēhē nguixun ne, cuetju cha, cjue cha hisca nandya Cesarea. ²⁴ Hacuaha tuhunchjinu ngujo naxin xi cuijin Pablo, xi cuangun chanu me xcun Félix, me xi matitjun. —Cuatjin cachja capitán.

²⁵ Sehe catsihindu me ngu xujun xi chja cuitjin:

²⁶ “Ngahan, Claudio Lisias ne, tsingátju ngu nina naha tsujun, ngayun Félix, ngayun xi matitjun ngayun tsahan. ²⁷ Cha xi cuijyihí vi ne, cafaha xuta Israel cha. Hitsē sa ne, catsiquehen me cha. Hane xi camachaya ná xi cha Roma cha ne, cējē cojo sindadu naha, cavaxētjē cha. ²⁸ Hane tsēhē xi meje cumachaya ná mé má cuatjin vinchajyē xuta cha ne, cējēcojo cha xcun xutaxa rē yungun cojo xcun xuta changá rē xuta Israel. ²⁹ Hane ngahan ne, camachaya ná ta vinchajyē me cha, tsēhē xi faharcuaain cha ley rē suvá me. Peru jyē xi vincha me tsēhē cha ne, vechiin chuya rē xi cueya cha o sa cjue cha ndavaya. ³⁰ Hane xi camachaya ná xi casahmichihin xuta cjua xi tsiquehen me cha ne, ngutjen ni catsingátju cha xcun ngayun, hacuaha cavitéxa rē xuta xi vinchajyē rē cha cuinduva me ndyá cuichja me cojo nuju mé má cuatjin vinchajyē me cha.” Cuatjin chja xujun jan.

³¹ Hya xi camá ne, cafaha sindadu jan Pablo, quijicojo cha me nguixun hya nandya Antípatris, sacuatjin cjua xi cachja capitán cojo cha. ³² Hane xi camá nchujun jan ne, cavuya sindadu xi fi ntsacu jan ngajan Jerusalén, hane cha xi hinchasun naxin jan ne, quiji sa cha cojo Pablo. ³³ Hane xi cafehe cha cojo rē me Cesarea ne, casahmi entregadu cha xujun xi yaha cha, hacuaha casahmi entregadu cha Pablo tsja me xi matitjun. ³⁴ Hya xi camá ne, xi café cavutaya me xujun jan ne, sehe cavinenguise me jani distritu rē Pablo. Hane xi camachaya rē me xi Pablo ne, distritu Cilicia distritu rē me ne, ³⁵ cuitjin cachja me:

—Hya xi cjuehe xuta xi vincha me jyē riji ne, hya cuihndē cjua riji. —Cuatjin cachja me.

Sehe cavitexa me xi setjo Pablo ngajan ngu cahndē tsēhē ndihya jyē xi casahmi Herodes, hiscan xi má ndava me xi matitjun.

24

Cavinchajyē xuta tjē rē Israel Pablo

¹ Hane xi cavatju hñú nixtin jan ne, cafehe nahmi xi matitjun xi hmí rē Ananías ngajan Cesarea, cojo ngujo xuta changá cojo ngu me xi cuichjatje ngatsē rē xuta xi cuacun vē, ngu me xi hmí rē Tértulo. Me xi cuacun vē ne, quiji cavinchajyē me Pablo xcun me xi matitjun. ² Hane xi cachjindaya rē Pablo ne, cavetsihin cavinchajyē Tértulo me, cuitjin cachja me:

—Ngatsē nuju ngayun ne, jemu tjin cjuandaja cjuajeya ngajñi niji. Hacuaha tsēhē xi jemu ndaja chjuhuncuendun yēje ni nandya niji ne, vēhē xi cjui xcun nandya. ³ Jemu tihín camahani nacuechji nuju, ngayun Félix, tsēhē yēje cjuandaja xi tinihñu vē. ⁴ Cojo sa xi ha quihndē suaan sa nuju cjuandya ne, nihñu favor ne, nihñujun tacún cojo niji ne, tisiñuju hitsē ngujo cjua xi cuinújin. ⁵ Cha xi cuijyihí vi ne, jemu cjuaxti camahani cha. Jingujyē ni ngasunhndē ne, titsujyihya tivunihnga cha si ngajñi niji ngayijin ni xuta tjē rē Israel. Hacuaha cha vihi ngu cha xi matitjun ngajñi rē xuta ladu rē cha Nasaret. ⁶ Hisca cahntsua yungun xi matitjun meje sahmi cha ngu xcusun xi ndajin tjin xi nihña, vēhē xi cachjihin cha. Ngayín ne, meje chjihinchuvin

cha sacuatjin vitexa ley ni, ⁷ peru cafehe capitán Lisias ne, cafachahá me cha, hacuaha cavitexa ni me xi ngayin xi vinchin jyè rè cha ne, cuinduvín hisca nguehe xcun ngayun. ⁸ Hora xi chjuhuntuhan rè cha ne, ngayun suvun ni sacú nuju cjuaquixi tséhë yëjë ni jyè xi vinchin tséhë cha. —Cuatjin cavinchajyë Tértulo.

⁹ Yëjë xuta tjë rè Israel xi cojo siu jan ne, hacuaha cachja me xi cuatjin jain.

Casua Pablo cjuaquixi rè me xcun Félix

¹⁰ Hane hora xi casahmitsja me xi matitjun cojo Pablo xi cuichja me ne, Pablo ne, cuitjin cachja me:

—Ngayun ne, ha hvë xi jemu tsëë chjuhunchuvun xuta nación naha tséhë jyè rè me. Véhë xi ngahan ne, cojo yëjë ni cjuasua ne, suá cjuaquixi naha cojo nuju. ¹¹ Sa xi chjinengunsun suvun ne, cuma sacú nuju cjuaquixi ta ngahan ne, sehe tjin rè tejó nixtin xi cëjë Jerusalén xi cjuahárcun Nina. ¹² Peru casacuintsjaain ná me xi tivisiajmejen o sa tisuá suë rè cjuatacun rè xuta, sa cahntsua yungun xi matitjun, sa cahntsua tu jarë ni yungun langa, o sa jinguyyë ni ngajñi nandya. ¹³ Hacuaha hisca cumaji tsinguixi me xi cjuaquixi jain tséhë jyè xi vincha me tsahan quihndë. ¹⁴ Peru ngu nga ne, nguehe cuichjá cojo nuju cjuaquixi ta ngahan ne, hatuxa fahárcun jain Nina rè xutachanga naha, sacuatjin faharcun xuta xi hinchá ndyá xi chja me xi cuicun vihi xi ngu ndiya ndacha. Hacuaha macjain ná yëjë ni cjuatacun rè rè Moisés cojo yëjë cjuá xi catsihindu profeta. ¹⁵ Hacuaha vétahacácun Nina sacuatjin vetahacacun me xi cuicun vi xi nima ne, cuya cjuahñu, sa tyahi o sa xi hacuuiin tyahi cjuatacun rè. ¹⁶ Véhë xi ngahan ne, yëjë ni hora ne, sahme nguyyë xi tyahi cjuatacun naha xi cuma rè Nina cojo xi cuma rè xuta.

¹⁷ Hane xi ha jemu cavatju nixtin ne, cavúya canduvatjenguë xuta naha, yahá tujún xi cuisécoo rè me hacuaha suá cjuatjo xi cjue xcun Nina. ¹⁸ Hane xi cuatjin canduva ne, me xi cuicun vi ne, cavëë ná me ngajan yungun xi matitjun, tyahi ngahan sacuatjin xi ha xcusun ni. Hacuaha hacuuiin jemu cjín xuta siu me cojo ná hacuaha tsajin ngu suë jyè xi tijima. ¹⁹ Peru siu ngujo xuta tjë rè Israel xi canduva me tséhë distritu Asia. Me xi cuacun vë xi sa tjin mé jyè meje cuincha me tsahan ne, catinduva catincha me jyè naha nguehe xcun ngayun. ²⁰ O sa tsajin ne, suvá me xi cuicun vi catichja me me cjuatsehen naha casacu rè me, hya xi cavisécun xcun xutaxa rè yungun ni. ²¹ Ngu tu tu ni cjuá xi cajindáya cachjá hya xi sécun ngajñi rè me ne, cuitjin cachjá: “Ngatsë rè xi macjain ná xi nima ne, cuya cjuahñu ne, véhë xi tichjahachuva ná quihndë xcun ngayun.” Cuatjin cachjá. —Cjuá véhë xi cachja Pablo xcun Félix, me xi matitjun.

²² Hya xi camá ne, tséhë xi ha vëë ndaja Félix cjuá tséhë Ndiya Xatsë ne, xi cuejñavasen me cjuacjintacun véhë ne, cuitjin cachja me:

—Hya xi cjuehe Capitán Lisias ne, sehe sahmechehen cjuacjintacun nuju vi. —Cuatjin cachja me. ²³ Hane sehe cavitexa me sindadu rè me xi cuetjo cha Pablo, peru sahmi cha cjuandaja ne, hacuuiin cuitijaya rè cha xuta rè Pablo xi cjue cjuahacuenda rè me.

Cavisiajmi Pablo cojo Félix cojo Drusila

²⁴ Hane xi cavatju ngujo nixtin ne, cavuya cafehe Félix, xi quiji me ngu nangui. Cafehe me cojo Drusila, chjuun rè me, ngu chjuun xuta tjë rè Israel. Hya xi camá ne, catsingatju me quiji chjahá rè Pablo, sehe cavisifñuju me cjuá xi cachja Pablo tséhë hacutjin xi cumangutacuun cojo Jesucristu. ²⁵ Jinguyyëjë rè xi tichja Pablo tséhë ngu cjuatacun tyahi, tséhë ngu xahasen tyahi, cojo

tsêhê nixtin xi tsichuva Nina xuta tsêhê jyê rê me ne, Félix ne, catsacjun me camá, sehe cachja me cojo Pablo cuitjin:

—Quihndê ne, cuma cjuihin. Hane hya xi cumahya ná ne, sehe squindáya nga ri. —Cuatjin cachja me.

²⁶ Peru hacuaha tsingatahacacun me sa xi sua Pablo me tujún. Vêhê xi jemu cjin ndiya cajindaya me Pablo, cavisiajmi me cojo.

²⁷ Xi cavatju jo nu ne, cavetju Félix tsêhê xcun xa rê me, hane cavisehen nga ngu cahndê rê me, ngu me xi hmi rê Porcio Festo. Peru tsêhê xi Félix ne, meje sahmi me cjuandaja cojo xuta tjê rê Israel ne, caseya cuaha Pablo ndavaya.

25

Cafehya Pablo xi cuma me consina tsja César

¹ Hya xi camá ne, cafehe Festo xi cjuahaxa me ngajan Cesarea. Hane xi café jyan nixtin ne, cavetju me quiji me Jerusalén. ² Hane xi cafehe Festo ngajan Jerusalén ne, nahmi xi matitjun cojo me xi matitjun tsêhê ngajni rê xuta tjê rê Israel ne, casua me camachaya rê Festo tsêhê jyê xi vincha me tsêhê Pablo. ³ Hane cafehya me favor xi tsingatju Festo cjue chjahá rê Pablo xi cjue me ngajan Jerusalén. Cuatjin meje rê me xi cuma ta, tsêhê xi ha cavisiajmichihin me xi tsiquehen me Pablo ngajan ndiya. ⁴ Ngajan xi Festo ne, cachja me ta Pablo ne, tacunñihi me ngajan Cesarea, hacuaha suvá Festo ne, ha cjue xati me ngajan. ⁵ Hacuaha cachja sa me cuitjin:

—Catji xutaxa rê yungun nuju cojo ná, hane sa xi tjin mé jyê rê cha ne, ngajan catincha me jyê rê cha cojo ná. —Cuatjin cachja me.

⁶ Hya xi camá ne, cavejña sa Festo ngajan Jerusalén sacuaha jyin o sa tê nixtin, sehe cafe me Cesarea. Hane camá nchujun tsêhê nixtin xi cafehe me jan ne, quiji me cavéjña me xcun xa rê me, sehe cavitexa me cjue chjahá rê Pablo. ⁷ Hane xi cafehe Pablo ne, quiji caxinchacunndee xuta tjê rê Israel xi canduva tsêhê Jerusalén jan tjeheh rê me, hane jemu cjin xcusun jyê rê Pablo xi cavincha me, peru hisca camaji catsinguixi me xi cjuaquixi jain. ⁸ Hane Pablo ne, xi casua me cjuaquixi rê me ne, cuitjin cachja me:

—Tsajin camahani mé jyê xi casahme, hacuini condra rê ley niji ngayin xuta tjê rê Israel ne, hacuini condra rê yungun xi matitjun tsijin ne, hacuini condra rê César, me xi matitjun tsajan. —Cuatjin cachja Pablo.

⁹ Hane xi meje sahmi Festo cjuandaja cojo xuta tjê rê Israel ne, cuitjin cafinguisse me Pablo:

—¿Há meje cuihin Jerusalén, cojo sa xi ngajan tsichúva ri cojo jyê riji vi? —Cuatjin cafinguisse me.

¹⁰ Ngajan xi Pablo ne, cuitjin cafayangui me:

—Ha ndihyavasen rê César, me xi matitjun camahani, sécun, hane ha nguehe xi meje rê xi chjahachuva ná cojo jyê naha. Xuta tjê rê Israel ne, tsajin camahani mé xi choho sahme cojo rê me. Ngayun ne, ha ndaja hyun. ¹¹ Sa xi tsejen ta casahme ngu xcusun xi vechú chuva rê xi cueya ne, tsingatehen xi cueya. Peru sa xi tsajin cjuaquixi tsêhê hisca ngu jyê xi vincha me tsahan ne, tsajin yo xi cuma sahmi ná entregadu tsja xuta xi cuacun vê. Ngahan ne, féhya nuju xi nihñu ná consina tsja César, me xi matitjun camahani. —Cuatjin cafayangui me.

¹² Ngajan xi Festo ne, xi cavisiajmicjin me cojo yêjê me xi visecoo rê me ne, sehe cachja me cuitjin cojo Pablo:

—Cachjahye xi sahme ri consina tsja César ne, tsja César tsingátju ri.
—Cuatjin cachja Festo.

Cavisehen Pablo xcun Agripa

¹³ Hane xi cavatju ngujo nixtin jan ne, ngu me xi matitjun tsêhê jingu sa distritu, me xi hmí Agripa ne, cafehe me Cesarea cojo Berenice na xicjin me, xi sua me ngu nina Festo. ¹⁴ Hane tsêhê xi caviyuju me ngujo nixtin jan ne, cachja Festo cojo rê me tsêhê cjuacjintacun xi tacun tsja me tsêhê Pablo. Cuitjin cachja me:

—Nguehe ne, tacunñihi ngu cha xi cavejñavasen Félix cjuacjintacun rê. ¹⁵ Hya xi cêjê Jerusalén ne, nahmi xi matitjun cojo xuta changá tsêhê xuta tjê rê Israel ne, casua me camachaya ná tsêhê cha vêhê, hacuaha cafehya me xi cuichjá xi cuma cha castigu. ¹⁶ Peru ngahan ne, cachjá cojo rê me ta ngayin xuta Roma ne, tsajin nihi xcusun xi nihñi castigu ngu xuta xi hinchajyê rê me jinguyêjê rê xi cjeê cuisehen me xcun cojo xcun cojo me xi vinchajyê rê me, hacuaha sacú rê me cahndê xi sua me cjuaquixi rê me tsêhê jyê xi hinchajyê me. ¹⁷ Hane hya xi cafehe yêjê xuta xi cuacun vê nguehe ne, catsichajan hora ta xi tu camá nchujun jan ne, cêjê ndihyavasen ne, catsingatju quiji chjahá rê cha. ¹⁸ Hane xi caxinchacun xuta xi cuacun jan cachja me ne, hisca ngu jyê jyê sacuatjin tsingátaha cáacun ne, cavinchaan me tsêhê cha ta, ¹⁹ suvá ni cjuat tsêhê xcusun rê yungun rê me xi casahmichiin xu cha, cojo cjua tsêhê ngu nima xi hmí rê Jesús, xi chja cha ta tacun quicun. ²⁰ Peru ngahan ne, casacuinyiin ná hacutjin sacú ná cjuaquixi tsêhê cjuacjintacun vêhê ne, cavinnguêsê rê cha sa xi meje cjue cha Jerusalén hane ngajan chjahachuva rê cha tsêhê cjuacjintacun xi yaha rê cha. ²¹ Peru tsêhê xi cafehya cha xi seyañihi sa cha hisca xi suvá me xi matitjun camahani tsichuva me cjuacjintacun rê cha ne, cavitéxa xi quiji caseyañihi sa cha hisca hya xi cuma tsingátju cha tsja me. —Cuatjin cachja Festo.

²² Ngajan xi Agripa ne, cuitjin cachja me cojo Festo:

—Ngahan ne, hacuaha catsingátahacáacun xi cuisñijú cjua rê cha xi cuajyihí vê. —Cuatjin cachja me.

Hane Festo ne, cuitjin cafayangui me:

—Sa cuatjin ne, nchujun ni cuisñiju cjua rê cha. —Cuatjin cafayangui me.

²³ Hane xi camá nchujun jan ne, ngu cjuandya jyê tjin xi cafehe Agripa cojo Berenice. Hane quiji cavisehentangun me ndihyavasen cojo yêjê capitán cojo yêjê xuta xi matitjun tsêhê nandya jan. Sehe cavitexa Festo quiji chjahá rê Pablo. ²⁴ Hane xi cafehe Pablo ne, sehe cachja Festo cuitjin:

—Ngayun Agripa, cojo ngayujun ni xi tjin tangun ngayaan nguehe ne, nguehe tacun chá vihi xi yêjê xuta tjê rê Israel ne, cavinchajyê me cha cojo ná ngajan Jerusalén, hacuaha cavinchajyê me cha hisca nguehe. Jindaya me chja me ta ha quihndê mijí rê xi cuejña sa cha cjuahñu. ²⁵ Peru ngahan ne, casacuiniin ná hisca ngu xcusun xi casahmi cha xi vechú chva rê xi cueya cha. Hane xi cafehya suvá cha xi cuma cha consina tsja me xi matitjun camahani ne, cavejñá cáacun xi tsingátju cha. ²⁶ Peru tsajin ngu cjua xi cuma tsihindu rê nai naha, ¿há vihi ne, há vêhê casahmi cha? Vêhê xi cavitéxa xi cuisehen cha xcun ngayun, Agripa, cojo sa xi cjuê chjahantahan rê cha ne, sacú ná cjua xi tsihindu. ²⁷ Xi má ná ne, tsajin ná cjuatacun sa xi tsingátju ngu presu hacuaha cuichjaan mé jyê xi caxincha tsêhê. —Cuatjin cachja Festo.

26

Casua Pablo cjuaquixi rē me xcun Agripa

¹ Hya xi camá ne, cuitjin cachja Agripa cojo Pablo:

—Quihndē ne, tjin cahndē xi cuinojē ngatsē riji. —Cuatjin cachja me.

Ngajan xi Pablo ne, catsiquijin me tsja me, sehe casua me cjuaquixi rē me cuitjin:

² —Agripa, ngayun xi matitjun ngayun ne, jemu ndaja tsahan xi xcun ngayun suá cjuaquixi naha quihndē tsēhē yējē jyē xi vincha xuta tjē rē Israel tsahan. ³ Jemu ndaja tsahan ta, tsēhē xi ngayun ne, ha hyun yējē xcusun naja cojo cjuacjintacun naja ngayaan xuta tjē rē Israel. Vēhē xi nihñu cjuandaja ne, nihñu jyē tacún xi cuisñuju ngujo cju naha.

Xcusun changá rē Pablo

⁴ Quihndē ne, yējē xuta tjē rē Israel ne, vēē me hacutjin xcusun naha hisca cjua lihndi naha, hya xi cavitejña nangui naha cojo hya xi cavitejña Jerusalén.

⁵ Hacuaha, sa xi meje cuichja me cojo nuju ne, cuma cuichja me ta ha vēē me xi ngahan ne, hatuxa xuta fariseo ngahan, xuta xi chinchihin tjengui me ndiya rē Nina naja. ⁶ Quihndē ne, ngehe sécun tichjaháchuva ná cojo cjuatacun naha ngatsē rē xi vétahácacun cjua xi cachja Nina cojo xutachanga naja. ⁷ Ngayejen ni xi tjē rē tejó xutachanga naja ne, vetahantacun xi cuechuntahan cjua vēhē. Vēhē xi cojo yējē ni xahasen naja ne, chjahanrcun Nina nixtin nixten. Hane tsēhē xi vetahácacun cjua vēhē ne, vēhē xi vinchajyē ná xuta tjē rē Israel. ⁸ Ngayujun ni ne, ¿mé má macjaain nuju xi Nina ne, tsicuya me nima cjuahñu?

Pablo ne, catsuyihiya tjengui me cojo cjuahngatacun xuta ladu rē Nina

⁹ Titjun ne, ngahan ne, catsingátahácacun xi jemu cjín xcusun meje rē xi sahme condra tsēhē Jesús, xuta Nasaret. ¹⁰ Hane cuatjin casahme ngajan Jerusalén. Ngahan ne, jemu cjín xuta ladu rē Nina cavinchá me ndavaya ta, tsēhē xi nahmi xi matitjun casuaxa ná me xi cuatjin casahme. Hane hya xi cavítexa xutaxa rē xi cueya xuta ladu rē Nina xi cuacun jan ne, cojo ngahan cachjá xi ndatjin. ¹¹ Jemu cjín ndiya cējē yējē yungun naja, cavitéxa xi cuma xuta castigu, hacuaha jemu casahme ngahñu xi choho cuichja me tsēhē Jesús. Tjemu camacjan ná cojo rē me, hacuaha catsuyjēhēya tjēnguē me cojo cjuahngatacun hisca cojo jingu sa nandya rē xutaxín.

Cachja nga Pablo hacutjin camá xi cavisehen me ladu rē Jesús

¹² Ngayun Agripa, ngu nixtin jan ne, tifé Damasco xi sahme cjuahngatacun jan, yahá xa xi ha casua ná nahmi xi matitjun. ¹³ Hane ndiya jan ne, sacuaha chuva rē nchisen ne, cahvé ngu ndihi xi canduva ngahnga, xi hitsē sa hñu ndavá rē xi cuma rē ndavá rē tsuhi, xi cavaja rē hasen rē jingundee ni hiscan tifé cojo me xi tifé cojo. ¹⁴ Hane xi ha caticjin ngayijin ni ne, ngahan ne, cahndē ngu cjua xi cachja cojo ná hne hebreo, cuitjin cachja: “Saulo, Saulo, ¿mé má cuatjin nujihiye tjengui ná cojo cjuahngatacun? Sacuahatjin tjin rē chu ndyaja tjin ri, ta chu vē ne, tsun chu nahñu quicha nahya ne, vanguihmu suva chu yojo ru hya xi vēhē hñu chu yojo ru xi vihndiin chu. Hane cuanitjin ni tjin ri, ye.” Cuatjin cachja cjua jan. ¹⁵ Ngajan xi ngahan ne, cuitjin cavinenguēsē: “¿Yo ngayun, Tatá?” Cuatjin cavinenguēsē. Hane Nai naja ne, cuitjin cafayangui me: “Ngahan ne, Jesús ngahan, xi nujihiye tjengui ná cojo cjuahngatacun. ¹⁶ Tisatjinhngue, tisechin ta, tsēhē xi canduvá tjēnguē ri cojo sa xi suáxa ri xi cuisecuee ná hacuaha cuinoje cojo xuta xi

cuitjin cahye ná, hacuaha cuinoje cojo xuta hacutjin camá hya xi ha canduvá tjénguë nga ri ngujo ndiya. ¹⁷ Ngahan cuáxëtjé ri tséhë xuta tjé rë Israel. Hacuaha cuáxëtjé ri tséhë xutaxín. Tsingátju ri ngajñi rë xuta xi cuacun vë, ¹⁸ cojo sa xi choxehe cjuatacun rë me, sehe cuetjuxin me tséhë cjuatsehen, hane cuisehen me ndiya rë cjuandaja, cuetjuxin me tséhë ladu rë Satanás hane cuisehen me ladu rë Nina. Choxehe cjuatacun rë me, sehe sacú rë me cjuaninchataha tséhë jyë rë me, hacuaha cuisehen me ladu rë xuta xi ha camá tséhë Nina me ngatsë rë xi camanguacacun me cojo ná.” Cuatjin cafayangui Nai naja.

Cachja Pablo tséhë xa xi sahmi me

¹⁹ Ngayun Agripa, ngahan ne, hatuxa cahndë tséhë cjua xi cachja Jesús hya xi canduvatjengui ná me xi canduva me tséhë ngahnga. ²⁰ Tjun tjun ne, cachjá cojo xuta ngajan Damasco, sehe cachjá cojo xuta ngajan Jerusalén cojo jingujyë ni nación Israel, hisca cojo xutaxín. Cachjá cojo rë me xi tsindeya me cjuatacun rë me hacuaha cuisehen me ladu rë Nina. Hacuaha cachjá cojo rë me xi catisahmi me cjuandaja xi tsingacun xi catsindeya jain me cjuatacun rë me. ²¹ Ngatsë rë vëhë xi cafaha ná xuta tjé rë Israel ngajan yungun xi matitjun hisca casahmi me cjuandya xi tsiquehen ná me. ²² Peru Nina ne, visecoo ná me, vëhë xi tifëxcun hisca quihndë, tichjá cojo xuta sa quihndi sa changá me. Tichjá suvá cjua xi cachja profeta cojo cjua xi cachja Moisés tséhë yëjë xcusun xi sehe cuetjucaa. ²³ Cachja me xi cuacun vë xi Cristu ne, Me xi Tsingatju Nina ne, tjin rë me xi cueya me, hacuaha tjin rë me xi tjun tjun me cuya me cjuahñu, sehe sua me cumachaya rë xuta tjé rë Israel cojo xutaxín tséhë xi cuaxëtje Nina xuta xi cuacun vë. —Cuatjin cachja Pablo.

Pablo ne, meje rë me xi cjuinjecacun Agripa ne, cumacjain rë me xi cavuya cjuahñu rë Jesús

²⁴ Hane xi cuatjin cachja Pablo xi vaxëtje me yojo rë me ne, cavisehenjñi Festo cojo cjua rë me ne, cachjahñu me cuitjin:

—¡Sca ri, Pablo! ¡Tséhë xi jercu chutaye ne, vëhë sahmi sca rë cjuatacun riji! —Cuatjin cachja Festo.

²⁵ Ngajan xi Pablo ne, cuitjin cafayangui me:

—Hacuiin sca ná, ngayun Festo. Ngahan ne, tichjá cjua xi cjuaquixi.

²⁶ Agripa, me xi matitjun vë ne, hacuaha ndaja vëë me cjua vihi. Vëhë xi tsacjuun xi chjá cojo rë me. Xi má ná ne, tsajin ngu cjua xi cuicun vi xi hvín me ta, tséhë xi xcusun vihi ne, hacuiin ngu cahncun camá. ²⁷ Ngayun Agripa, ¿há macjain nuju cjua xi catsihindu profeta? Ha hvë ta macjain nuju. —Cuatjin cafayangui Pablo.

²⁸ Ngajan xi Agripa ne, cuitjin cachja me cojo Pablo:

—Cojo hitsë cjua xi canoje vë ne, meje ri xi cuisehen ladu rë Cristu. —Cuatjin cachja me.

²⁹ Hane Pablo ne, cuitjin cafayangui me:

—Nina meje rë me xi há hitsë o há cjín cjua xi cuichjá ne, hacuiin suvun ni ta cojo yëjë me xi tivisiñuju cjua xi tichjá quihndë ne, cuma me sacuaha ngahan, peru hacuiin cojo cadena vihi. —Cuatjin cafayangui me.

³⁰ Hya xi camá ne, cavisatjenhnga Agripa, me xi matitjun, cojo Festo, hacuaha cojo sa Berenice cojo yëjë me xi caviyujutangun me cojo, cavisatjenhnga me. ³¹ Sehe quijixin me, cachja me cojo xingu xingu me cuitjin:

—Cha xi cuajyihí vè ne, tsajin mé sahmi cha xi vechú chuva rè xi cueya cha o sa xi cjue cha ndavaya. —Cuatjin cachja me.

³² Sehe ngajan xi Agripa ne, cachja me cojo Festo cuitjin:

—Cha xi cuajyihí vè ne, sá tsajin xi cafehya cha xi cuma cha consina xcun me xi matitjun camahani ne, cuma nismi ré cha. —Cuatjin cachja me.

27

Cavetju Pablo xi cjue me Roma

¹ Hane hya xi cavechú nixtin xi cavejñacacun me xi matitjun jan xi cuanguin ngajan Italia ne, Pablo cojo yahnga sa presu jan ne, camá me entregadu tsja ngu capitán xi hmí rè Julio, capitán tséhé sindadu rè me xi matitjun camahani. ² Hane xi cavisihin ngu barcu xi cavetju tséhé nandya Andramitio xi cjue jingunduju ni ndaya tséhé distritu Asia ne, sehe quiji barcu cojo niji. Hacuaha quiji cha Aristarco cojo niji, ngu cha Tesalónica tséhé distritu Macedonia. ³ Hane xi camá nchujun jan ne, cafehe barcu cojo niji nandya Sidón. Hane Julio ne, casahmi me cjuandaja cojo Pablo, casua me cahndé xi cjue Pablo ndava amigu rè me xi cjuahacuenda amigu jan xcusun xi ma chaja rè Pablo. ⁴ Hane xi quiji barcu cojo niji tséhé ngajan ne, cavatjin jingunduju ni taha ngaxtun Chipre, ngu rquí nangui xi vetjucaa xcun ndachacun, tséhé xi tjo ne, casuaain cahndé xi ngu quixi ni cjue barcu cojo niji. ⁵ Hane xi cavatjin xcun ndachacun quixi rè distritu Cilicia cojo distritu Panfilia ne, cafihin nandya Mira, ngajan distritu Licia. ⁶ Hane ngajan casacu rè capitán ngu barcu tséhé Alejandría xi cjue Italia. Sehe catsingusehen niji me barcu vèhé.

⁷ Hane xi catsanguin tafi tafi ngujo nixtin sa ne, cojo jemu jyè cjuandya ne, cafihin quixi rè nandya Gnido. Hane tséhé xi casuaain tjo cahndé xi ngu quixi ni quiji barcu cojo niji ne, cavatjin taha ngaxtun Creta, quixi rè Salmón.

⁸ Handasa jemu chja cavatjin camá, peru quiji barcu cojo niji tafi tafi hisca xi cafihin ngu cahndé xi hmí rè Cahndé Ndajyihí, tiña nandya Lasea.

⁹ Jemu tivatju nixtin, hacuaha jemu tsavi xi cjue barcu xcun nandá, tséhé xi camatiña chan hnchan. Vèhé xi Pablo ne, cachja me cojo xuta jan cuitjin:

¹⁰—Ngayujun ni ne, nguehe cuichjá cojo nuju ta vutsején ne, xi tivanguen vi ne, jemu tsavi, jemu jyè nichajan tséhé chaha cojo tséhé barcu, hacuaha hisca tjin yahnga ngayaan xi chajá yaan. —Cuatjin cachja me.

¹¹ Peru capitán jan ne, hitsé sa casahmicuenda me cjua xi cachja cha xi cjuicojo barcu jan xi cuma rè cjua xi cachja Pablo. ¹² Hane tséhé xi cahndé xi tacun barcu jan ne, machjiriin xi ngajan cuejña barcu nixtin rè chan hnchan, vèhé xi hitsé sa cjin xuta xi cachja me xi cuetjuxin ni barcu cojo rè me tséhé ngajan tuxa ma sa xi cuma cuechú me hisca Fenice, ngu nandya ngajan Creta, xi ndatjin cahndé tacun, hane ngajan cuma cuiyuju me yéjé nixtin rè chan hnchan.

Tjo hñu xi cavanga ngajan xcun ndachacun

¹³ Hya xi camá ne, cavetsihin cavanga ngu tjo jeya jeya ni xi canduva táha ladu xi ndatjin. Sehe ngajan xi xi má rè me ne, cuma sahmi me sacuatjin xi ha catsingatahacacun me. Vèhé xi cavetju me quiji me, ndaya ndaya rè Creta.

¹⁴ Peru sehe tu hitsé cjuí barcu jan ne, canduva ngu tjo hñu ladu xi choho tjin, ¹⁵ catsivaha rè barcu. Hane tséhé xi maji fi barcu taha hiscan nduva tjo ne, catihin cahndé quiji barcu hacutjin xi cjuí tjo. ¹⁶ Hane xi cavatjin taha ngaxtun ngu rquí lihndi nangui quixí xi hmí rè Clauda hiscan xi yiin

cjuachan vanga tjo ne, cojo chja ne, peru camá cachjihin barcu lihndi xi tjengui jan, ¹⁷ sehe cachjuvinniji caveyín cahntsua barcu jyë. Sehe ngajan xi cha xi cjuicojo barcu jan ne, camá catsihñuhñu cha barcu jyë. Hane tséhë xi tsacjun me xi cjucojo tjo jan barcu ngu cahndë chojyihí hiscan xi jemu tsavi xi cjue barcu ne, catsitujne me tsjan xi faha rë tjo, casua me cahndë quiji barcu hacutjin cjui tjo. ¹⁸ Peru tséhë xi quijinduju sa cavanga tjo hñu jan ne, xi camá nchujun jan ne, cavetsihin cacandiya me chaha xi hincha barcu jan ngajñi ndachacun. ¹⁹ Hane xi camá nguini, cojo tsja ni me, cafaha me yëjë ni xcusun xi tséhë barcu jan, cavetsihin cacandiya me ngajñi ndachacun. ²⁰ Hane xi ha jemu cjín nixtin xi cahyiin tsuhi cahyiin niñu hacuaha tjo jan ne, cjuinduju sa tivanga jercu tu hñu camahani ne, ngajan cafë cjuetacun xi cuetjintjin.

²¹ Hane tséhë xi ha jemu cjín nixtin xi cjëë sinë xuta jan niñu ne, cavetjuñi Pablo ngajñi rë me, cachja me cuitjin:

—Ngayujun ni ne, nguehe cuichjá cojo nuju ta hitsë sa ndatjin sa xi cavetuhun rcun cjuaxi cachjá cojo nuju hane cavetjuun ni tséhë Creta. Tsajin mé cjuañihí xi cuitjin cuatjun cuma hacuaha tsajin mé xi cuitjin nichajan. ²² Quihndë ne, tuhun cjuetacun xahasen nuju ta hisca xi ngu ngayun ne, chajin ngayun. Xi chajá ne, barcu. ²³ Hvë xi cuatjin cuma ta, nguchjin ne, cafehe ngu ángel rë Nina xi Nai naha hacuaha xi fahárcun. ²⁴ Hane cachja cojo ná cuitjin: “Xi carcuin Pablo. Hatuxa tjin ri xi cuechi xcun César, me xi matitjun camahani. Hacuaha Nina ne, sahmi me cjuandaja cojo ri xi cuetjutje yëjë xuta xi cjui cojo ri.” Cuatjin cachja ángel cojo ná. ²⁵ Véhë xi tuhun cjuetacun xahasen nuju ngayujun ni ta, tséhë xi ngahan ne, mangucáacun cojo Nina, hane hatuxa cuatjin cuma sacuatjin cachja ángel cojo ná. ²⁶ Peru tjin rë xi scandi naja tjo jan xcun ngu rquí nangui quixí. —Cuatjin cachja Pablo.

²⁷ Xi cavatju teñuju nguixun xi cuatjin cjui nguehe cjui ngajan tjo cojo barcu xi nechinyin xcun ndachacun xi hmí rë Adriático ne, sacuaha chuva rë vasen nixten ne, catsingatahacacun cha xi cjuicojo barcu jan xi ha jima tiña barcu tséhë nangui quixí. ²⁸ Hane catsichuva cha hacutjin nungun nandá hiscan quísun barcu, hane casacuse rë cha xi can tyjuhun ngu metru nungun nandá jan. Hane xi quiji sa barcu hitsë ni nguvan ne, catsichuva nga cha nandá, hane can yatu metru nungun nandá jan. ²⁹ Hane tséhë xi tsacjun cha xi satëcoo barcu jan cojo ngu naxi ne, cacandiya cha ñuju quicha hai xi machjiréhë xi cuiyuhñu barcu ngajñi nandá xi tsuvahñu rë, hacuaha jercu cafehya rë cha Nina xi sahasen sanii. ³⁰ Hya xi camá ne, yahnga cha xi cjuicojo barcu jan ne, meje cuetjuxin cha tséhë barcu xi cuetjutje cha. Véhë xi catsitujne cha barcu lihndi jan xcun ndachacun, sacuaha xi meje scandiya sa cha quicha ngajñi nandá taha xcun barcu. ³¹ Sehe ngajan xi Pablo ne, cachja me cojo capitán cojo sindadu xi yahnga jan cuitjin:

—Sa xi cuiyijin cha xi cuacun vë cahntsua barcu jyë ne, ngayun ne, cumaji cuetjuntjun. —Cuatjin cachja me.

³² Ngajan xi sindadu jan ne, cavatë cha nahñu xi yaha rë barcu lihndi jan, sehe catsismi cha.

³³ Hya xi ha tiña sahasen ne, cachja Pablo cojo yëjë xuta jan xi sinë me niñu, cuitjin cachja me:

—Ha quihndë teñuju nixtin xi nechunyun rë mé xi cuatjuun cuma hacuaha hisca hitsë niñu cjëë xinu. ³⁴ Véhë xi tichjá cojo nuju ta, xinu niñu. Xi cuatjin

ne, scaa nuju cuetjuntjun ta hisca ngu ngayun ne, chajin hisca ngu tsjarcun. —Cuatjin cachja Pablo.

³⁵ Hane xi cafë cachja me cuatjin ne, cafaha me niñu ne, sehe casua me nacuechji rë Nina xcun yëjë ni xuta jan. Hane xi cavatëcja me niñu jan ne, sehe cavetsihin cajinë me. ³⁶ Hya xi camá ne, yëjë ni xuta jan ne, casacu rë me cjuetacun, hane hacuaha cojo me cajinë me niñu. ³⁷ Ngayijin ni xi nechinyin barcu jan ne, jo cientu cojo jyanchan tyjuhun ngu má ngayin. ³⁸ Hane hya xi ha ndaja camá rë xahasen rë me xi cajinë me niñu jan ne, cacandiya me trigu jan ngajni ndachacun xi cuma nguijna sa barcu.

Cavetsun barcu casahmi tjo

³⁹ Hane xi casahasen ne, cavëë me ngu cahndë hiscan xi hvíin me jani jan. Peru hacuaha cavëë me ngu cahncun xi jemu jyë tsumi jiña tjehen rë. Hane caviyujucacun me xi sahmi me cjuandya xi barcu ne, ngajan cuechú. ⁴⁰ Hya xi camá ne, cavatë me nahñu xi yaha rë quicha hai jan, sehe caxincha ni ngajan ngajni nandá. Hacuaha cavëhëndaya me ya xi veyaquixi rë barcu hacutjin cjue. Hane xi catsiquijin me tsjian xi faha rë tjo jan ne, sehe cavetsihin quiji barcu jan quixi rë tsumi jan. ⁴¹ Peru xi cafehe barcu ngu cahndë hiscan tacun ngu naxi ngahma nandá ne, ngajan casatë. Hane taha xcun barcu jan ne, ngajan casetahañu, ha quihndë camaji quiji. Peru taha ngaxtun barcu jan ne, jercu tivetsun tsëhë tsindyu rë nandá xi vaja rë.

⁴² Hane sindadu jan ne, catsingatahacacun cha xi tsiquehen cha presu, sá tu cuatë presu jan nandá ne, cuanga. ⁴³ Peru capitán jan ne, tsëhë xi meje cuaxëtje me Pablo ne, casuaain me cahndë xi sahmi sindadu jan hacutjin xi meje rë cha. Hya xi camá ne, cavitexa me yëjë ni xuta xi ma vatë nandá ne, tjun tjun me caticandiya me yojo rë me ngajni nandá, catji me quixi rë tsumi jan. ⁴⁴ Hane me xi yahnga xi maji vatë nandá jan ne, catjaha me ngu rquí yatë o sa ngu ya tsëhë barcu jan. Cuatjin camá xi ngayijin ni ne, caphin nangui quixi, hacuaha cavetjintjin.

28

Cafehe Pablo ngajan Malta

¹ Hane xi ha cavatju cavetjintjin ne, sehe casacu camachaya niji xi ngu rquí nangui xi vetjucaa xcun ndachacun jan ne, Malta hmí rë. ² Hane xuta xi nangui rë jan ne, hacuain hitsë cjuandaja casahmi me cojo niji. Cavejña me ngu ndava ndihi jyë ne, sehe cajindaya niji me ngayijin ni, tsëhë xi hacuaha cavetsihin cavaha tsi hane jemu hnchan. ³ Hane xi cafaha Pablo ngu tyjá chaquin quiji caviyujusun me xcun ndihi jan ne, tsëhë suë rë ndihi jan ne, vanga ngu yë cavetju chu ngajni rë chaquin xi caviyujusun me jan, hane cafaha chu tsja me, hane catsismii chu ngutjen. ⁴ Hane xi cavëë xuta xi nangui rë jan xi tyjanguitaha cuaha yë jan tsja Pablo ne, sehe cachja me cojo xicjin me cuitjin:

—Ngu cha tsiquehen jain rë cha vi, vëhë xi handasa cavetjutje cha tsëhë ndachacun ne, peru nina ne, suaain me cahndë xi cuejña sa cha cjuahñu. —Cuatjin cachja xuta jan.

⁵ Hane xi cavitsune Pablo tsja me ne, cjanenguia chu ngajni ndihi jan. Peru me vëhë ne, tsajin mé camá rë me xi cafaha chu me. ⁶ Xuta jan ne, xi má rë me ne, cuijin squee Pablo o sa xi tu ñahñu ne, cueya me. Peru xi ha jemu jyë hora vutsejen xuta jan xi tsajin mé má rë Pablo ne, catsindeya me cjua rë me, hane sehe cavetsihin cachja me xi Pablo ne, ngu nina me.

⁷ Hane tiña tséhë cahndë jan ne, siutahá nangui rë me xi matitjun tséhë nangui xi vetjucaa xcun ndachacun jan, me xi hmí rë Publio. Me vëhé cafahatsja niji me, hacuaha casahmi me cjuandaja xi casua niji me cahndë ndava me xi cavinechin jan jyan nixtin. ⁸ Hya xi camá ne, nahmi rë Publio jan ne, jiña me xi hmu rë me tséhë chíhin suë cojo chíhin jni. Hane Pablo ne, quiji vutsejen me me, hane cafehya rë me Nina ngatsë rë xuta hmu rë jan. Hane xi cavisanetsja Pablo me ne, camandaja me. ⁹ Xi cavatju vëhé ne, hacuaha canduva tjengui yëjë sa xuta hmu rë tséhë nangui vëhé Pablo ne, camandaja me. ¹⁰ Xuta jan ne, jemu casahmi me cjuandaja cojo niji, hane xi cavetjin catsanguin nga cojo barcu ne, casua me hacutjin xcusun xi machaja niji.

Cafehe Pablo ngajan Roma

¹¹ Xi cavatju jyan sá ne, cavetjin catsanguin cojo ngu barcu xi cavéjña jan yëjë nixtin tséhë chan nchan. Barcu jan ne, nandya Alejandria canduva, hacuaha Nina Lihma hmí rë. ¹² Hane xi catsanguin sa hitsë ne, caphin nandya Siracusa, hane ngajan cuinechin jyan nixtin. ¹³ Hane xi cavetjin ngajan ne, quiji nduju sa barcu cojo niji ne, caphin nandya Regio. Hane xi café ngu nixtin xi nechintihin jan ne, cavetsihin cavanga ngu tjo xi ndatjin cjui, sehe quiji nga barcu cojo niji, hane xi camá nchujun ne, caphin nandya Puteoli. ¹⁴ Hane xi caphin jan ne, cavechintihin ngujo xuta ladu rë Jesús, hane cachja me xi cuinechintihin ngu totje cojo rë me jan. Hane xi cuatjin chuva vëhé ne, cavetjin Cesarea hane caphin hisca Roma. ¹⁵ Hane xuta ladu rë Jesús xi siu ngajan Roma ne, xi camachaya rë me xi ha jima tiña ngayin ne, canduvatjengui niji me ndiya. Ngujo me ne, cafehe me hisca hiscan hmí rë Ndetsin Apio. Hane ngujo nga me ne, cafehe me hiscan hmí rë Jyan Cantina. Hane xi cavëé Pablo xuta jan ne, casua me nacuechji rë Nina, hacuaha casacu rë me cjuetacun. ¹⁶ Hane xi caphin Roma ne, xutaxa rë jan ne, casua me cahndë xi cjuiin Pablo ndavaya hane cjue me ndava ngu xuta cuejña me, peru cojo ngu sindadu xi sahmí cuidadu xi hacuain cuanga me.

Catsinguijnetaha Pablo cjua cojo xuta changá rë yungun

¹⁷ Hya xi camá ne, xi café jyan nixtin quitahá Pablo jan ne, casahmi tangun me xuta xi matitjun tséhë ngajñi rë xuta tjë rë Israel. Hane xi camatangun xuta jan ne, sehe cachja Pablo cojo rë me cuitjin:

—Ngayujun ni ngayun xuta tjë rë Israel matsejen ne, nguehe cuichjá cojo nuju ta handasa tsajin mé casahme condra yëjë xuta naja o condra rë xcusun rë xutachanga naja ne, peru cafaha ná me, casahmi ná me entregadu tsja xutaxa rë Roma ngajan Jerusalén. ¹⁸ Hane xi cafahataha ná xutaxa rë jan ne, meje tsismi ná me, tséhë xi tsajin jyë naha xi vechú chuva rë xi cueya. ¹⁹ Peru xi cachja xutaxa rë yungun naja xi ndajintjin xi cuma ndaya ngahan ne, casahmi ná ngujoyë xi caféhya xi cuma ngahan consina tsja César, me xi matitjun camahani. Cuatjin casahme, handasa tsajin mé jyë meje cuíncha tséhë xuta naja. ²⁰ Ngatsë rë cjuacjintacun vëhé ne, vëhé xi cachjá xi cuinduvun tjengun ná, cojo sa xi cuichjá cojo ngu ngujo cjua ta, tséhë xi ngatsë rë me xi vetahantacun ngayejen ni गयाan xuta tjë rë Israel ne, vëhé xi cuitjin tjinhñu ngahan vi. —Cuatjin cachja Pablo.

²¹ Ngajan xi xuta xi cuacun jan ne, cuitjin cafayangu me:

—Peru ngayin ne, hisca ngu xujun xi chja condra nuju xi nduva tséhë Jerusalén ne, cjëë chjihinntsín. Hacuaha tsajin hisca ngu xuta naja xi nduva me tséhë ngajan xi choho chja me tsujun cojo niji. ²² Quihndë ne, meje

cuisiñiji hacutjin fi cjuatacun nuju ta, tsêhê xi sacuaha cjuatacun vihi ne, hyin ta jingujyê ni ne, choho chja xuta tsêhê. —Cuatjin cafayangui xuta xi cuacun jan.

²³ Hya xi camá ne, cavejña xuta xi cuacun jan ngu nixtin xi cuya nga me. Hane xi cavuya me ne, hitsê sa jercu cjín me xi cafehe me hiscan tacun Pablo. Ngajan xi Pablo ne, cuaha nixtin cachja me cojo xuta jan tsêhê gobiernu xi sahmi Nina. Hacuaha casahmi Pablo ngahñu xi cumacjain rê yêjê xuta jan xi Jesús ne, me vêhê xi catsingatju Nina me, sacuatjin chja xujun rê Nina xi catsihindu Moisés cojo xi catsihindu profeta hatsêê nixtin. ²⁴ Ngujo me ne, camacjain rê me cjua xi cachja Pablo, peru ngujo nga me ne, camacjaain rê me. ²⁵ Hane tsêhê xi hacuiin tangun camá cjuatacun rê me ne, cavetju me cafe me. Peru chaja sa xi cjue me ne, Pablo ne, cachja me cuitjin:

—Jemu quixi cjua rê Hasen rê Nina xi cachja profeta Isaías cojo xutachanga naja, cjua xi cachja cuitjin:

²⁶ Tihin tjengui xuta naha hane tinoje cojo rê me xi hatuxa cuihndê me, peru cuijnii rcu me hisca hitsê. Hatuxa scuêê me, peru hvíin me mé jan.

²⁷ Cuatjin cuma ta, tsêhê xi cjuatacun rê me ne, tichjá, tyjavañuju me cojo tuxcun me ne, cavechja me, sá tu scuêê me cojo tuxcun me hane cuihndê me cojo tyjavañuju me hacuaha cuijne rcu me cojo cjuatacun rê me, sehe cuya me ladu naha xi cuaxêtjê me.

Cuatjin cachja cjua jan. ²⁸ Sa xi mijí cuisñuju ngayun sacuatjin camamiji cuisñuju xutachanga naja xi cuacun jan ne, ngeuhe suá cumachaya nuju ta Nina ne, cjua xi cuaxêtje me xuta ne, quihndê catsingatju me cjua vêhê tsêhê xutaxín. Me xi cuacun vè ne, cuisñuju me. —Cuatjin cachja Pablo.

²⁹ Hya xi camá ne, xuta tjê rê Israel xi cahndê me cjua rê Pablo ne, quiji cavetju me, tichja cjín me cojo xicjin. ³⁰ Ngajan xi Pablo ne, jo nu jingu cavêjña me ndihya xi cafehya me cojo renta jan. Hane ngajan cafahatsja me xuta xi quiji tjengui rê me, ³¹ casua me camachaya rê xuta tsêhê gobiernu xi sahmi Nina, hacuaha cavicuya rê me xuta cjua xi chja tsêhê Nai naja Jesucristu. Hisca ngu quijiin cavatêcja tsêhê me xi cuatjin casahmi me.

Xujun xi catsingatju San Pablo xi cafa hatsja xuta Roma

¹ Ngahan, Pablo ne, visécoo rē Jesucristu sacuaaha ngu mosu hndixahan rē me, hacuaaha Nina cavaxijin ná me xi cuma ngahan apóstol, casuaxa ná me xi suá cumachaya rē xuta cjuandajyihí rē me. ² Hane ha jemu hatsēē casahmi Nina xi profeta rē me ne, tsihindu me cjuandajyihí vē xcun xujun rē Nina. ³⁻⁴ Cjuandajyihí vē ne, hacui cjua xi sua machaya naja tsēhē Quihndi rē Nina, Nai naja Jesucristu. Hya xi catsin Jesucristu, sacuaaha ngu xuta tjē rē David, catsin me. Peru Hasen rē Nina ne, jemu ndaja casua camachaya naja xi hatuxa Quihndi rē Nina me ta catsingacun naja hya xi cavuya me cjuahñu hya xi cavatju cahme me. ⁵ Hane ngatsē rē Jesucristu ne, casacu niji cjuandaja rē Nina xi camá ngayin apóstol, cojo sa xi cuisecuin rē xuta yējē ni nangui, sehe cumangucacun me cojo Nina hacuaaha cuihndē me tsēhē Nina. Hane xi cuatjin ne, cuma jyē cuma hnga Jesucristu. ⁶ Hacuaaha cojo ngayujun ni xi xuta nanguixin ngayun ne, cavaxijin nuju Nina xi camá tsēhē Jesucristu ngayun.

⁷ Ngahan ne, titsihíndu nuju ngayujun ni xi nechun ngajan nandya Roma, ngayujun ni xi hmucacun nuju Nina, ngayujun ni xi cavaxijin nuju me xi camá ngayun xuta rē me. Nina Nahmi naja cojo Nai naja Jesucristu ne, catisia nuju me cjuandaja cjuajeya.

Pablo ne, meje cjue me nandya Roma

⁸ Quihndē ne, hora xi sahme oración naha cojo Jesucristu ne, suá nacuechji rē Nina naha ngatsē nuju ngayujun ni ta jingu ni ladu ne, jimachaya rē xuta hacutjin xi mangutacún cojo Jesucristu. ⁹ Ngahan ne, nguñaja xahasen naha sahme xa rē Nina xi suá cumachaya rē xuta cjuandajyihí xi chja tsēhē Quihndi rē Nina. Hane vēē Nina jain xi hatuxa veyanangē nuju, ¹⁰ yējē ni hora xi sahme oración naha. Féhya rē Nina xi sua me cahndē xi cuechú hora cuechú nixtin xi cuma cjuētjēngē nuju, sa xi cuatjin meje rē me. ¹¹ Hatuxa meje cjuētjēngē nuju, cojo sa xi suá nuju ngu cjuandaja rē Nina. Sehe ngayun ne, hitsē sa ndaja cumangutacun cojo Jesucristu. ¹² Cuma cuinújan ne, meje cjuētjēngē nuju, cojo sa xi tahan cjuasua xahasen naja xingu xingu ngayaan, ngatsē rē xi ndaja mangutacun xingu xingu ngayaan cojo Jesucristu.

¹³ Ngayujun ni ne, meje ná xi cumachaya nuju ta jemu cjin ndiya cavejñá cjuatacun naha xi cjuētjēngē nuju, peru hisca quihndē ne, camaji. Meje ná xi ngujo xuta nangui nuju ne, cuisehen me ndiya rē Jesucristu ngatsē rē xi ngahan suá cumachaya rē me cjua xi yahá, sacuatjin xi ha camá jingu sa nangui. ¹⁴ Xi má na ne, hatuxa sahmi ná ngu jyē xi cuichjá cjua jan cojo yējē ni xuta; sa xuta rcun, sa xuta yuma; o sa xuta vechu cjuatacun rē, sa xuta yuma hasen. ¹⁵ Vēhē xi hacuaaha jemu meje cjuētjēngē nuju ngajan Roma, suá cumachaya rē xuta nangui nuju cjuandajyihí xi chja tsēhē Jesucristu.

Cjuandajyihí xi sua Pablo cachaya rē xuta

¹⁶ Ngahan ne, ma savaain ná tsēhē cjuandajyihí xi chja tsēhē Jesucristu ta, tsēhē xi cjua vēhē ne, sua machaya rē xuta ta vaxētje Nina yējē ni xuta xi mangucacun cojo Jesucristu. Tjun tjun xuta Israel cuaxētje me, peru hacuaaha cuaxētje me xutaxín. ¹⁷ Cjuandajyihí vēhē ne, sua machaya naja ta Nina ne, tsicjē me jyē xi quitjen, peru suvá ni hya xi mangutacun cojo

Jesucristu. Hacuaha cuatjin chja ngu cjua xi camahindu xcun xujun rē Nina: “Xuta xi tsajin jyē rē me ngatsē rē xi mangucacun me cojo Nina ne, sacū rē me cjuahñu xatsē.” Cuatjin camahindu.

Jyē xi tjin rē xuta ngasunhndē

¹⁸ Nina xi tacun me ngahnga ne, sua me machaya naja hacutjin jemu cjan rē me ngatsē rē xi faharcuain xuta me, cojo ngatsē rē yējē ni cjuatsehen xi sahmi xuta. Hacuaha cojo cjuatsehen xi sahmi xuta jan ne, vetsa me cjua xi cjuaquixi. ¹⁹ Cjuatacun xi cuma cumachaya naja tsēhē Nina ne, hatuxa vēē xuta xi cuacun tsehen jan ta, tsēhē xi Nina ne, ha casua me camachaya rē xuta cjuatacun vēhē. ²⁰ Nina ne, matsijin me; peru hisca nixtin xi catsindaja me ngasunhndē cojo hisca nixtin quihndē ne, matsejen ta hacui jain me xi Nina me hacuaha tjin rē me ngahñu xi tsajin nuju tsajin nixtin cjuē. Cuatjin ma vijne rcu tu yo ni xuta hya xi vutsejen me yējē ni xcusun xi catsindaja Nina. Vēhē xi xuta xi cuacun tsehen jan ne, sacuiyiin rē me mé xi cuichja me hya xi sua me cjuaquixi rē me xcun Nina. ²¹ Handasa vēē xuta xi tacun jain Nina ne, peru casahmijyiin casahmihngaain me Nina, hacuaha hisca casuaain me nacuechji rē Nina. Vēhē xi camachjiriin cjuatacun rē me. Hacuaha cjuatacun yuma hasen rē me ne, camajñu tsēhē. ²² Chja suvá me xi jemu vechu cjuatacun rē me, peru ngajñi rē xi chja me cuatjin ne, hitsē sa ngarca cavuya me cojo cjuatacun rē me. ²³ Hacuaha catsitjungui me Nina xi hatuxa jyē hnga me cojo cjua rē me, Nina xi hatuxa hmii me. Sehe cavetsihin cafaharcun xuta xi cuacun jan tu mé ni nina ndyojo xi catsindaja suvá me. Cafaharcun me xcusun rē xuta xi hatuxa hme me, cojo xcusun rē chu nisē, cojo xcusun rē chu yē, cojo jingu sa xcusun rē chu xi yahnga.

²⁴ Vēhē xi Nina ne, catsismicacun me xuta xi cuacun tsehen jan, cojo sa xi sahmi xuta cjuatsehen xi fehya rē xahasen tsehen xi tjin rē me. Hane casahmi xuta jan cjuatsehen cojo yojo rē me ngajñi rē me cojo xicjin me. ²⁵ Catsitjungui me Nina xi cjuaquixi. Cafaharcun me nina ndyojo xi nina ndacha ni. Hacuaha cahndē rē xi cjuaharcun me Nina, cafaharcun me hacuaha casahmi cuidadu rē xcusun xi Nina casahmi me. Peru mameje jain xi chjaharcun rē Nina yējē ni nu yējē ni nixtin. Cuatjin jain.

²⁶ Vēhē xi Nina ne, catsismicacun me xuta xi cuacun tsehen jan, cojo sa xi cuma tsehen sa xahasen rē me. Hisca yachjin ne, catsitjungui ne xcusun xi ndatjin xi sacū xihin rē ne, hane casahmi na xcusun xi cuaintjin. ²⁷ Hacuaintjin ni casahmi cha xi xihin; catsitjungui cha xcusun xi ndatjin xi sacū chjuun rē cha, hane jercu cavetju suē cha xi cuatjin meje sahmi cha cjuatsehen ngajñi rē cha cojo xicjin cha. Xihin cojo xihin cha casahmi cha cjuasava jan, hacuaha casacu rē cha jima ngu cha castigu xi cavangui xcusun tsehen xi casahmi cha jan.

²⁸ Xi má rē xuta xi cuacun tsehen jan ne, machjiriin xi tsinguitsjen me nina. Vēhē xi Nina ne, catsismicacun me xuta jan, cojo sa xi hatuxa cumachjiriin cjuatacun rē me, hacuaha sahmi me xcusun xi ndajintjin xi nihña. ²⁹ Quitsē rē xahasen rē me cojo yējē ni cjuatsehen xi fehya xahasen rē me sacuaha xcusun vi: jemu choho tsingatahacacun me; ña quitsē rē xahasen rē me cojo cjuaxin; meje tsiquehen xicjin me; jemu meje scaanya me tu mé ni xcusun; jemu ndacha me; jemu tsehen me; jemu ndesu me; ³⁰ choho chja me tsēhē xicjin me; choho vēē me Nina; jemu hnga cacun me; jemu xta me; vaxēndaja suvá me yojo rē me; tsindajaya me cjuatsehen; vihndiin me tsēhē xutacha rē me; ³¹ machjiriin cjuatacun rē me; sahmiichiin me ngu cjua xi chja me; tsajin rē me cjuahmutacun; tsajin rē me cjuayumatacun. ³² Nina ne, cavitexa me xi

yějě ni xuta xi cuatjin sahmi xcusun tsehen vë ne, hatuxa vechú chuya rë xi cueya me. Hane xuta xi cuacun tsehen jan ne, handasa ha vëë me xi cuatjin cavitexa Nina, peru sahmicuendaain me ta finduju me cojo cjuatsehen jan, hisca ndama rë me tséhë xuta xi yahnga xi cuatjin sahmi.

2

Nina ne, tsichuva me xuta cojo cjuatacun rë me hacutjin xi cjuaquixi

¹ Tu yo ni ngayun xi nichuvun jingu sa xuta cojo cjuatacun rë me ne, sacuiyin nuju mé xi cuinújun hya xi tuhun cjuaquixi nuju xcun Nina ta, tséhë xi hora xi nichuvun xuta ne, cjuachojyihí xi sahmi ni me ne, ha xcusun vëhë ni nihñu. ² Ha hyan ta xuta xi cuatjin sahmi xcusun tsehen vëhë ne, hya xi tsichuva Nina me cojo cjuatacun rë me ne, tsichuva me hacutjin xi cjuaquixi. ³ Peru ngayun xi nichuvun xuta xi cuatjin sahmi xcusun tsehen vëhë ne, ¿há má nuju xi cuatjuhnga ngayun xi tsichuvaain nuju Nina xi cojo ngayun nihñu xcusun tsehen vëhë? ⁴ O há tsajin ne, ¿há cuendaain nuju tséhë cjuandaja xi sua nuju Nina? ¿Há cuendaain nuju xi Nina ne, jemu jyë cacun me cojo nuju? ¿Há hyuun xi cuatjin sahmi Nina cjuandaja cojo nuju, cojo sa xi nindeyun cjuatacun nuju? ⁵ Peru ngayun ne, jemu taja rcun, hatuxa mijí nindeyun cjuatacun nuju. Xi cuatjin nihñu ne, tinihñu xi jima cjan sa rë Nina cojo nuju, hisca xi cuechú nixtin xi Nina ne, jemu cuma cjan rë me hacuaha sua me cumachaya nuju hacutjin tsichuva nuju me cojo cjuaquixi. ⁶ Nina ne cuechji me xingu xingu xuta tu cutjin xcusun xi casahmi xuta jan. ⁷ Xuta xi scaa rë me sahmi me cjuandaja ngatsë rë xi meje rë me xi cuma yehe cuma hnga me, hacuaha meje rë me xi chuya rë Nina tséhë me. Meje rë me xi cuechiin nixtin xi cueya me ne, me vëhë xi sua Nina me cjuahñu xatsë. ⁸ Peru xuta xi meje rë me xi suvá ni me xi ndaja tséhë me, hacuaha vihndiin me tséhë cjuaquixi ta suvá cjuatsehen yějě ni xi sahmi me ne, me vëhë xi jemu cuma cjan camahani rë Nina cojo rë me. ⁹ Yějě ni xuta xi sahmi cjuatsehen ne, sacú rë me cjuañihí, hisca sacuiin rë me chuya rë hacutjin cuaxëtje me yojo rë me. Tjun tjun xuta Israel cuatju me cuma cuatjin, peru hacuaha cojo xutaxín cuatjin cuatju me cuma. ¹⁰ Peru yějě ni xuta xi sahmi cjuandaja ne, me vëhë xi jemu cuma yehe cuma hnga me, hacuaha jemu chuya rë Nina tséhë me, hacuaha jemu sacú rë me cjuajeya. Me vëhë xi má xuta tjë rë Israel ne, tjun tjun cuatju me cuma cuatjin, peru hacuaha cojo xutaxín cuatju me cuma.

¹¹ Ta Nina ne, hatuxa quixi jain me cojo cjuatacun rë me xi tsichuva me yějě ni xuta cojo cjuatacun rë. ¹² Yějě xuta xi tsajin rë me ley rë Moisés hacuaha sahmi me cjuatsehen ne, hacuiin ley vëhë vitexa mé castigu xi cuma me; peru hatuxa cjuetjintjin me. Hane yějě xuta xi tjin rë me ley jan hacuaha sahmi me cjuatsehen ne, tsichuva Nina me tu cutjin xi vitexa ley vëhë. ¹³ Xuta xi tu visifñuju ni sacuatjin chja ley ne, hacuiin me vëhë xi tsajin jyë quitjen me xcun Nina ta xuta xi sahmi sacuatjin chja ley jan ne, me vëhë xi cuichja Nina ta tsajin jyë quitjen me. ¹⁴ Xutaxín xi tsajin rë me ley rë Moisés jan ne, hya xi sahmi me sacuatjin chja ley vëhë cojo cjuatacun rë suvá ni me ne, ngajan ma tsejen xi sacuaha xi me vëhë má me ley rë suvá ni me. ¹⁵ Xcusun xi sahmi me tsingacun naja xi cjuaxi vitexa ley ne, ha híncha cahntsua cjuatacun rë me. Ha vëë suvá me cojo cjuatacun rë me mé xi ndaja, mé xi ndajin. Vëhë xi vinchajyë cjuatacun rë me me, o sa tsajin ne, chjatje cjuatacun rë me ngatsë rë me. ¹⁶ Ngajan xi hatuxa cuechji Nina xuta nixtin hya xi Nina tsingatju nga

me Jesucristu xi tsichuva me cjuua xi hinchahma rë xuta. Hacuaha cuatjin chjá hya xi suá machaya rë xuta cjuandajyihi xi chja tséhë Jesucristu.

Xuta tjë rë Israel xi faharcun me ley ne, vëhë sua machaya rë me xi xuta jyë me

¹⁷ Quihndë ne, ngayun xi nújun xi xuta tjë rë Israel ngayun ne, jemu vetuhuntacun ley rë Moisés. Jemu naxunndujun yojo nuju ngatsë rë xi Nina xi cjuaquixi ne, me vëhë xi nina nuju me. ¹⁸ Ha hyun hacutjin xi meje rë Nina xi nihñu; hacuaha ngatsë rë xi cachutayun ley ne, chuya nuju tséhë cjuandaja. ¹⁹ Xi má nuju ne, jemu ndaja ninguixun cjuatacun rë xutaxín xi hvíin me Nina; jemu ndaja chuxuhun cjuatacun rë xutaxín xi tsajin hinha me ndiya rë Nina. ²⁰ Xi má nuju ngayun ne, sacuaha maestru rë xutaxín xi hvíin camahani me má ngayun. Cuatjin ningatuhuntacun ta, tséhë xi tjin nuju ley rë Moisés jan xi yaha cjuatacun xi cjuaquixi. ²¹ Ngayun xi vicuyun rë jingu sa ne, ¿há vicuyun suvun rë yojo nuju ni? Ngayun xi chuyiin nuju tséhë nina ndyojo ne, ¿há nichujun cjuanchina rë yungun rë ni? ²² Ngayun xi nújun xi ndajintjin xi nindesun cojo rë ngu chjuun, o cojo ngu xihín xi hacuiin tsajan ne, ¿há cuatjin nihñu suvun ni? Ngayun xi chuyiin nuju tséhë nina ndyojo ne, ¿há nichujun cjuanchina rë yungun rë ni? ²³ Ngayun xi jemu naxunndujun yojo nuju xi tjin nuju ley rë Moisés ne, ¿há choho chja xuta tséhë Nina ngatsë rë xi nihñuchuun cjuua xi vitexa ley vë ni? ²⁴ Hacuaha cuatjin camahindu xcun xujun rë Nina: “Xutaxín ne, choho chja me tséhë Nina, ngatsë rë xcusun nuju ngayun xuta tjë rë Israel.” Cuatjin chja xujun.

²⁵ Sa xi nihñuchuhun jaín sacuatjin vitexa ley ne, cumachji rëhë nuju xi cati chuxin nuju ngatsë rë xi ngu xuta rë Nina ngayun; peru sa xi nihñuchuun sacuatjin vitexa ley ne, ngayun ne, tangun ngayun sacuaha xi cjëë xti chuxin nuju. ²⁶ Vëhë xi xutaxín xi vatiin me chuxin rë me ne, sa xi sahmi me cjuandaja sacuatjin vitexa ley ne, tangun chuya rë Nina tséhë me sacuaha xi ngu xuta xi cati chuxin rë me. ²⁷ Hane xutaxín xi sahmi me sacuatjin vitexa ley ne, handasa hatuxa vatiin me chuxin rë me, peru cuatjutaha nuju me, ngayun xi nihñuchuun sacuatjin chja ley handasa tjin nuju ley jan hacuaha cati chuxin nuju. ²⁸ ¿Yo xi má ngu xuta tjë rë Israel xi cjuaquixi? Hacuun ngu xuta xi suvá ni xi sahmi me sacuaha xcusun rë xuta jan, hacuiin ngu xuta xi suvá ni xi cati rë chuxin rë ta, ²⁹ ngu xuta xi yaha cjuatacun rë xuta tjë rë Israel, ngu xuta xi cjuë me cojo ngasunhdë rë me sacuaha xi cati chuxin rë me, me vëhë xi ngu xuta tjë rë Israel xi cjuaquixi. Hane tsajin rë ley ngahñu xi cuma sahmi cuatjin cahntsua xahasen naja ta suvá Hasen rë Nina xi cuma sahmi cuatjin. Xi cuatjin nihña ne, hacuiin xuta xi cuaxëndaja me tsajan ta Nina ne, me vëhë xi chuya rë me tsajan.

3

¹ Sa quixi cuatjin ne, cuma cuinenguisen ta, ¿mé vengui chjí rë xi xuta tjë rë Israel má ngayaan? ¿Mé vengui chjí rë xi cuatjin cati chuxin naja?

² Peru jemu vengui camahani chjí rë. Titjun ne, vengui chjí rë ta, tséhë xi Nina ne, casuatsja naja me cjuua rë me. ³ Peru sa xi ngujo xuta tjë rë Israel catsismicacun me Nina ne, ¿mé xi cuma? ¿Há vëhë ni sahmi xi tsismicacun Nina ngayaan xuta rë me? ⁴ ¡Jéya! Meje rë xi cuinúnjan xi Nina ne, hatuxa sahmicihín me yëjë ni cjuua xi chja me. Sahmi me handasa yëjë ni xuta ne, jemu ndacha me. Xcun xujun rë Nina ne, cuitjin camahindu:

Ngayun, Nina naha ne, tséhë yëjë ni cjuua xi nújun ne,

tsajin camahani mé jyé quitjin, hacuaha hatuxa scaa rë cjuua nuju cjue xcun tséhë cjuua rë xuta xi tsichuva nuju me cojo cjuatacun nuju. Cuatjin camahindu.

⁵ Sa xi ngatsë rë cjuatsehen xi nihña ne, vëhë tsingacun jain xi Nina ne, tsajin camahani jyé quitjen me ne, ¿mé cumá cuinújan? ¿Há cuinújan xi Nina ne, hacuaha jyé quitjen me ta sahmi naja me castigu? (Tichjá cojo nuju sacuaha cjuatacun rë ngu xutajyë.) ⁶ ¡Jéya! quixiin vë ta, sa xi jyé quitjen Nina ne, sehe cumaji tsichuva me xuta ngasunhdë cojo cjuatacun rë me.

⁷ Cuejña xi cuichja sa ngu xuta cuitjin: Sa xi hitsë sa cuaxëndaja Nina cojo cjuaquixi rë me hya xi sahmi jain me sacuatjin chja me hacuaha hitsë sa ndaja tsejen xi jyé hnga Nina cojo Hasen rë me ngatsë rë cjuandacha naha ne, ¿mé má sehe cuatjin tsichuva ná me sacuaha ngu xuta tsehen? ⁸ O sa tsajin ne, cuejña xi cuichja sa ngu xuta cuitjin: Cuanguen nihña cjuatsehen, cojo sa xi cuma cuetjucaa sa cjuandaja. Hisca tjin yahnga xuta xi choho chja me tsijin ta chja me xi cjuatacun vëhë vicuyin, peru quixiin vë. Xuta xi cuacun vë ne, hatuxa satë rë me castigu xi vitexa jyé rë me.

⁹ Sa cuatjin ne, ¿há hitsë sa vengui chjí naja ngayaan xuta tjë rë Israel xi cuma rë xutaxín? ¡Jéya! Ha sehe cachjá ta ngayejen ni, sa xuta tjë rë Israel o sa xutaxin ne, ha nechán ngayejen ni ngajñi rë cjuatsehen. ¹⁰ Cuatjin camahindu xcun xujun rë Nina hiscan xi chja cuitjin: Tsajin xuta xi tsajin jyé quitjen, hisca ngu me tsajin me;

¹¹ tsajin yo xi vijne rcu, tsajin yo xi vanguise ndiya rë Nina.

¹² Yëjë ni xuta ne, cavetjuxin me tséhë ndiya rë Nina, yëjë ni me ne, camachjiriin me.

Tsajin yo xi ndaja sahmi me. Ndastu ngu ni me tsajin me.

¹³ Cahntsua hntsua me ne, chojyihí sacuaha ngu tsjun xi catuxaha; neje me ne, suvá cjuandacha visiajmi,

chuxin hntsua me ne, xan rë chu yë hinchá ngahma rë;

¹⁴ hntsua me ne, suvá cjuahngatacun quitsë rë.

¹⁵ Cojo ntsacu me ne, ngu hñu sasa cjue tsiquehen xicjin me;

¹⁶ Ndiya xi hinchá me ne, suvá xi tsinguetsun ni me cjuatacun rë xuta, hacuaha sua me xuta cjuachoho.

¹⁷ Hvíin camahani me ndiya tséhë cjuajeya.

¹⁸ Tsajin ngu hora xi tsingatahacacun me xi tsacjun me Nina.

Cuatjin chja xujun rë Nina.

¹⁹ Ha hyan ta yëjë ni cjuua xi chja ley rë Nina ne, chja cojo xuta xi siu ngahma rë ley vëhë. Cuatjin xi tsajin yo cuma cuichja xi tsajin mé jyé quitjen. Hacuaha cuatjin xi yëjë ni xuta ngasunhdë vi ne, tsichuva Nina me cojo cjuatacun rë me. ²⁰ Nina ne, cuichjaain me tséhë ngu xuta xi tsajin jyé rë me ngatsë rë xi casahmichihin me sacuatjin chja ley ta, ley ne, sua machaya naja xi ngayejen ne ne, xuta tsehen ngayaan.

Nina ne, tsicjë me jyë naja sa xi mangutacun cojo rë me

²¹ Peru Nina ne, casua me camachaya naja hacutjin tsicjë me jyë naja. Hane hacuain ngatsë rë ley xi cuatjin sahmi me. Cjuatacun rë Nina vë ne, hisca hatsëë camahindu xcun xujun rë me. ²² Cjuatacun vëhë ne, cuitjin fi: Nina ne, tsicjë me jyë rë xuta xi mangucacun cojo Jesucristu. Cuatjin sahmi Nina cojo yëjë ni xuta xi cuatjin mangucacun me cojo Jesucristu ta Nina ne, tangun ni vutsejen me xutaxín cojo xuta tjë rë Israel. ²³ Yëjë ni xuta ne, sahmi me cjuatsehen, hacuaha chaja camaha sa xi cuechutaha me sacuatjin jyë hnga Nina cojo Hasen rë me. ²⁴ Peru cojo cjuandaja rë Nina

ne, tu cjuatjo ni tsicjê me jyê rê xuta, ngatsê rê xi Jesucristu ne, cavechjitje me jyê xi quitjen xuta. ²⁵ Nina ne, catsingatju me Jesucristu xi cueya me xi cuechjitje me jyê rê yêjê ni xuta xi cumangucacun cojo rê me. Cuatjin casahmi Nina, cojo sa xi sua me cumachaya naja xi me vêhê ne, jemu tyjahi me cojo cjuatacun rê me hya xi jemu catsijyêcacun me cojo xuta xi caviyuju titjun hacuaha catsingatjuhnga me jyê rê xuta xi cuacun vê. ²⁶ Hacuanitjin ni sua me machaya naja xi jemu tyjahi me cojo cjuatacun rê me quihndê xi titsicjê me jyê xi quitjen xuta xi mangucacun cojo Jesús.

²⁷ Xi cuatjin ne, çhá cuma naxenndajan yojo naja? ¡Jéya, cumaji! Nina ne, hacuiin tsicjê me jyê naja ngatsê rê xcusun xi nihña ta súvá ngatsê rê xi mangutacun cojo Jesucristu. Vêhê xi choho nuhya rê sa xi naxenndajan yojo naja. ²⁸ Vêhê xi tsejen xi meje rê xi ningatahantacun cuitjin: Nina tsicjê me jyê rê ngu xuta ngatsê rê xi mangucacun xuta jan cojo Jesucristu, hacuiin ngatsê rê ngu ley xi vihndê me.

²⁹ Nina ne, çhá cuma xi súvá ni xuta tjê rê Israel xi Nina rê me má me? ¿O há cojo xutaxín má me Nina tsêhê? Juun, cojo me. ³⁰ Ngu ni Nina xi tacun me. Hane me vêhê tsicjê me jyê rê xuta tjê rê Israel ngatsê rê xi mangucacun xuta jan cojo Jesucristu, hacuaha tsicjê me jyê rê xutaxín xi vatiin me chuxin rê me ngatsê rê xi mangucacun xutaxín cojo Jesucristu. ³¹ Quihndê xi tinújan xi jemu vengui chjí rê xi mangutacun cojo Jesucristu ne, çhá tininguetsun ngahño rê ley xi cavitexa Nina? ¡Jéya! Ha hyan ta ley rê Nina ne, hatuxa vengui chjí rê.

4

Hacutjin camá xi cafê jyê rê Abraham

¹ Sa cuatjin ne, çmé cuinújan tsêhê xutachanga naja Abraham? ¿Mé xi casacu rê me xi caviyuju me nguehe ngasunhndê? ² Sa xi cachja Nina ta tsajin jyê rê Abraham ngatsê rê cjuandaja xi casahmi Abraham ne, tjin rê Abraham chuva rê xi cuaxëndaja súvá me yojo rê me. Peru cumaji sahmi me cuatjin xcun Nina ta, ³ xujun rê Nina ne, chja cuitjin: “Abraham ne, camangucacun me cojo cjua xi cachja Nina cojo rê me, hane ngatsê rê vêhê xi catsicjê Nina jyê rê me.” Cuatjin chja xujun rê Nina. ⁴ Ngu xuta xi casahmi me ngu xa naja ne, chjí rê me ne, hacuiin catahan rê me sacuaha ngu cjuandaja xi nihña cojo rê me ta catahan rê me tsêhê xi quitjen tsêhê xa xi casahmi me tsajan. ⁵ Peru sacuaha ngu xuta xi hacuiin vihi hacuiin vêhê sahmi me xi meje rê me xi chuya rê Nina tsêhê me ta tu mangucacun ni me cojo Nina, Nina tsicjê jyê rê xuta tsehen jan. Ngatsê rê xi cuatjin mangucacun xuta jan ne, hatuxa tsicjê Nina jyê rê me. ⁶ Xutachanga naja David ne, hacuaha cachja me hatsêê nixtin tsêhê cjuasua xi tjin rê ngu xuta xi Nina tsicjê jyê rê me, hane tsimii sahmi rê há ndaja há ndajin casahmi xuta jan. ⁷ Cuitjin cachja David:

Jemu ndaja tsêhê ngu xuta xi catsinchataha Nina jyê rê me, hacuaha xi cafacuendaain Nina cjuatsehen xi casahmi me.

⁸ Jemu ndaja tsêhê ngu xuta xi hatuxa tsicjê Nai naja jyê rê me. Cuatjin cachja David.

⁹ Cjuandaja vêhê ne, çhá súvá cuma tsêhê xuta xi cati chuxin rê? ¡Jéya! ta, hacuaha cojo xuta xi vatiin me chuxin rê cuma ta, tsêhê xi ha cachjá ta Nina catsicjê me jyê rê Abraham ngatsê rê xi camangucacun Abraham cojo Nina. ¹⁰ ¿Janihya catsicjê Nina jyê rê Abraham? ¿Há cachja me cjua jan hya xi cavatju cati chuxin rê me ne?, o há tsajin ne, çhá hya xi cjêê xti chuxin rê

me? Hacuuiin hya xi ha cati chuxin rë me ta cachja me hya xi chaja sa xtí. ¹¹ Hisca xi camá ngascan ne, sehe cati chuxin rë Abraham sacuaaha ngu sellu xi casetaha rë me xi tsejen xi Nina ne, catsicjé me jyé rë Abraham ngatsé rë xi ha camangucacun me cojo Nina. Cuatjin xi Abraham ne, camatitjun me sacuaaha nahmi tséhé yéjé xuta xi cjué jyé rë me ngatsé rë xi cumangucacun me cojo Nina handasa hacuuiin xtí chuxin rë me. ¹² Hacuaha Abraham ne, camatitjun me sacuaaha nahmi tséhé yéjé ni xuta xi xtí chuxin rë me hane hacuaaha cumangucacun me cojo Nina, ta xuta jan ne, vetjunguí cjuatacun rë xutachanga naja Abraham hya xi chaja sa xtí chuxin rë me.

¹³ Nina ne, cachja me cojo Abraham ta yéjé ngasunhndé ne, cuma tséhé me cojo xuta xi nduva tjé rë me. Peru hacuuiin ngatsé rë xi casahmi Abraham sacuatjin vitexa ley xi cuatjin cachja Nina cojo rë me ta cachja me cuatjin ngatsé rë xi camangucacun me cojo Nina. Véhé xi Nina ne, catsicjé me jyé rë Abraham. ¹⁴ Cuatjin chjá ta, sa xi suvá xuta xi sahmi sacuatjin chja ley cuma saté rë me cjuandaja xi cachja Nina jan ne, venguuiin chjí rë xi mangutacun cojo Nina, hacuaaha machjiriin cjua xi cachja Nina jan. ¹⁵ Cachjá xi hacuuiin ngatsé rë ley xi cuatjin cachja Nina cojo Abraham ta, tséhé xi hiscan xi sahmixa ley rë Nina ne, ngajan xi cuma xuta castigu. Peru hiscan xi tsajin ley ne, hacuaaha tsajin yo xi vinchajyé rë xuta ta casahmichiin me cjua xi vitexa ley.

¹⁶ Véhé xi cavejña ngu cacun Nina xi sahmichihin me cjua rë me cojo xuta xi cumangucacun cojo rë me, cojo sa xi tsejen ta suvá ngatsé rë cjuandaja rë Nina xi cuatjin sahmichihin me cjua rë me cojo xuta. Ngajan xi tjin cjuaquixi xi sahmichihin jain Nina cjua rë me cojo yéjé xuta xi nduva tjé rë Abraham, hacuuiin tu suvá cojo xuta xi tjin rë me ley ta hacuaaha cojo xuta xi mangucacun me cojo Nina, sacuatjin casahmi Abraham. Cuatjin xi Abraham ne, camatitjun me tsajan sacuaaha nahmi naja ngayejen ni गयाan ngajan xcun Nina. ¹⁷ Nina ne, me véhé xi camangucacun Abraham cojo me, me véhé xi sua cjuahñu rë nima, me véhé xi handasa chaja sa tsindaja me ngu xcusun ne, chja me tséhé xcusun véhé sacuaaha xi ha catsindaja me. Camahindu xcun xujun rë Nina hiscan xi cachja me cojo Abraham cuitjin: “Cavejña ri ne, xi cuma titjun gaye sacuaaha nahmi tséhé jemu cjin xuta.” Cuatjin camahindu.

¹⁸ Peru Abraham ne, handasa matsijin hacutjin cuma sahmichihin Nina cjua xi cachja me cojo rë me ne, camangucacun me cojo cjua jan, cavetaha cacun me Nina. Cuatjin xi camatitjun me tséhé jemu cjin xuta, sacuatjin xi ha cachja Nina cojo rë me hya xi cachja me ta: “Cuitjin cjin cuma xuta xi tjé rijji.” Cuatjin cachja Nina. ¹⁹ Hane hacuuiin quiji ngaxtun Abraham xi mangucacun me cojo Nina handasa xi ha ngu cientu nu tjin rë me, hacuaaha ha vée me xi jemu changá camahani camá me cojo chjuun rë me xi sacú rë me quihndí. ²⁰ Peru hacuuiin quiji ngaxtun me xi mangucacun me cojo cjua xi cachja Nina cojo rë me ta hitsé sa ndaja camangucacun me. Hacuaaha casahmi jyé casahmi hnga me Nina ²¹ ta, xi tsingatahacacun me ne, hatuxa tjin rë Nina chuva rë xi sahmi chihin me yéjé ni cjua xi cachja me xi sahmi me. ²² Véhé xi Nina ne, catsicjé me jyé rë Abraham.

²³ Quihndé ne, hacuuiin suvá tséhé Abraham xi cuatjin camahindu xi catsicjé Nina jyé rë me ta ²⁴ hacuaaha cojo tsajan गयाan, xi sehe tsicjé Nina jyé naja, गयाan xi mangutacun cojo Nina, me xi catsicuya Nai naja Jesucristu cjuahñu. ²⁵ Cahme me ngatsé rë cjuatsehen xi nihña, hacuaaha cavuya me cjuahñu cojo sa xi cuma cjué jyé naja.

5

Cavetjuntjen tsêhê jyê naja

¹ Quihndê ne, tsêhê xi catsicjê Nina jyê naja ngatsê rê xi camangutacun cojo rê me ne, vêhê xi ngayaan ne, ha hindê tsajin sa cjuachan cojo Nina ngatsê rê xi cavaxêtje naja Nai naja Jesucristu. ² Hacuaha ngatsê rê xi camangutacun cojo rê me ne, vêhê xi casacu naja cjuandaja rê me. Hacuaha jemu sua rê xahasen naja cojo ngu cjuetacun xi cuechú nixtin xi cuechuntahan hitsê sacuatjin jyê hnga Nina cojo Hasen rê me. ³ Hane hacuiin svá ngatsê rê cjuetacun vêhê ni ta hacuaha ma sua rê xahasen naja ngatsê rê cjuañihi xi vatjun ta, tsêhê xi ha hyan ta cjuañihi ne, vêhê vicuya naja hacutjin scaa naja tu mé ni cjuacjintacun. ⁴ Hane xi scaa naja ne, vêhê sahmi xi chuya rê Nina tsajan, hane xi chuya rê Nina tsajan ne, vêhê sahmi xi cuetahan tacun Nina. ⁵ Hane xi cuatjin cuetahan tacun Nina ne, tsajin nixtin cuetju sava ngayaan ta, tsêhê xi Hasen rê Nina xi casua naja me ne, jemu caveya cjuahmutacun rê Nina cahntsua xahasen naja.

⁶ Hya xi tsajin mé camá canihña suvaan xi naxentjen yojo naja ne, hya cahme Jesucristu xi cuaxêtje me ngayaan xuta tsehen. Cahme me nixtin xi cachja Nina xi cueya me. ⁷ Tsajin cjuaquixi xi ngu xuta sua me yojo rê me xi cueya me ngatsê rê ngu me xi tsajin jyê rê. Hisca ngu xuta ndaja jain ne, hyan sa xi sacu yo xi cuetjucacun xi sua yojo rê xi cueya ngatsê rê me. ⁸ Peru Nina ne, casua me camachaya naja cjuahmutacun xi tjin rê me cojo naja hya xi Jesucristu casua me yojo rê me xi cahme me ngatsê naja, handasa xuta tsehen ngayaan. ⁹ Hane quihndê xi cafê jyê naja ngatsê rê cjuaveya rê Jesucristu ne, ngajan xi hacuaha tjin cjuaquixi xi ngatsê rê me ne, cuetjuntjen tsêhê castigu. ¹⁰ Hya xi condra rê Nina má ngayaan ne, hya camá xutandaja rê me ngayaan ngatsê rê cjuaveya rê Quihndi rê me. Hane quihndê xi camá xutandaja rê me ngayaan ne, tjin cjuaquixi xi ngayaan ne, cuetjuntjen ngatsê rê xi tacun quicun nga me quihndê. ¹¹ Hacuaha jemu sua ma rê xahasen naja ngatsê rê cjuahmutacun rê Nina, cojo ngatsê rê Nai naja Jesucristu, me xi quihndê casahmi xi camá xutandaja rê Nina ngayaan.

Hacutjin casahmi Adán cojo hacutjin casahmi Jesucristu

¹² Ntsacu cavetsihin ne, cavisehen xi hmí cjuatsehen cahntsua cjuatacun rê xuta nguehe ngasunhndê vihi ngatsê rê ngu xuta xi hmí rê Adán. Hane ngatsê rê cjuatsehen ne, cavisehen xi hmí cjuaveya nguehe ngasunhndê. Cuatjin xi yêjê ni xuta ngasunhndê ne, hatuxa hme me ta, tsêhê xi yêjê ni me ne, sahmi me cjuatsehen. ¹³ Chaja sa xi sua Nina Moisés ley rê me ne, ha hinchajñi cjuatsehen ngajñi rê cjuatacun rê xuta ngasunhndê. Peru sahmicuendaain me cjuatsehen xi má hiscan xi tsajin ngu ley. ¹⁴ Peru yêjê ni xuta xi caviyuju me ngasunhndê hisca nixtin rê Adán hisca nixtin rê Moisés ne, cahme me. Hisca xuta xi hacuiin tangun cjuatsehen xi casahmi me cojo cjuatsehen xi casahmi Adán ne, hacuaha cojo me cahme me. Hane Adán ne, tjin ngu xcusun hacutjin matangun me cojo Cristu, me xi sehe cuinduva me ta, ngatsê rê Adán ne, cavisehen ngu xcusun nguehe ngasunhndê, hacuaha ngatsê rê Jesucristu, me xi camangascan canduva ne, cavisehen ngu nga xcusun ngasunhndê.

¹⁵ Peru cjuandaja xi sua Nina ne, hacuiin tangun cojo cjuatsehen xi casahmi Adán. Ngatsê rê cjuatsehen xi casahmi ngu ni xuta vêhê ne, jemu cjin xuta cahme me. Peru cjuandaja rê Nina cojo cjuandaja xi tisua naja ngu ni xuta xi hmí Jesucristu ne, hitsê sa vengui chji rê hacuaha jemu ndaja cama rê tsêhê jemu cjin xuta. ¹⁶ Cuichjá nga ngu ndiya ta hacuiin tangun cavetju

tsêhê cjuandaja vêhê cojo tsêhê cjuatsehen xi casahmi ngu ni Adán. Hya xi Adán casahmi me cjuatsehen vêhê ne, sehe cachja Nina xi sacuaha castigu ne, cuechú nixtin xi cueya Adán. Peru quihndê ne handasa xi jemu cjín cjuatsehen sahmi xuta ne, Nina ne, hacuaha sahmi me cjuandaja xi tsicjê me jyê rê xuta. ¹⁷ Ngatsê rê cjuatsehen xi casahmi ngu ni xuta ne, hatuxa cuma rê xuta cjuaveya. Cuanitjin hitsê sa ndaja ta, ngatsê rê ngu ni Jesucristu ne, xuta xi jemu tisacu rê me cjuandaja rê Nina xi tsicjê Nina jyê rê me tu cjuatjo ni ne, hatuxa sacú rê me cjuahñu xatsê.

¹⁸ Vêhê xi sacuatjin xi cavetjucaa castigu xi cuma rê yêjê ni xuta ngatsê rê ngu cjuatsehen jan ne, hacuanitjin ni cuetjucaa xi cjuê jyê rê yêjê ni xuta, hacuaha sacú rê me cjuahñu xatsê, ngatsê rê ngu ni cjuandaja jan. ¹⁹ Hacuaha sacuatjin xi jemu cjín xuta camatsehen cjuatacun rê me ngatsê rê xi ngu ni xuta cahndiin me tsêhê Nina ne, hacuanitjin ni jemu cjín xuta cuma me xuta xi tsajin jyê rê ngatsê rê xi ngu ni me xi cahndê me tsêhê Nina.

²⁰ Cavejña Nina ley hane ngajan xi cama cjín sa cjuatsehen xi sahmi xuta. Peru hiscan xi camacjín sa cjuatsehen ne, ngajan xi cjín sa camatsejen cjuandaja rê Nina. ²¹ Sacuatjin xi hatuxa casahmi xuta cjuatsehen hane cahme me ne, hacuanitjin ni hatuxa sacú rê xuta cjuandaja rê Nina, hane cjuê jyê rê me, sehe sacú rê me cjuahñu xatsê, ngatsê rê Nai naja Jesucristu.

6

Sacuaha xi caveyan xi cuma rê cjuatsehen hane quicun ngayaan xi cuma rê Nina

¹ Xi cuatjin ne, ¿há quixi sa xi cuinújan xi ndatjin xi nihña sa cjuatsehen cojo sa xi vetjutsejen sa cjuandaja rê Nina? ² ¡Jéya, ndajintjin! Ngayaan ne, sacuaha xi caveyan xi cuma rê cjuatsehen. Hane xi ha cavetjuxen tsêhê cjuatsehen ne, ha quihndê cumaji camahani cuinechan sa ngajñi rê cjuatsehen. ³ ¿Há hyuun ta ngayejen ni ne, hya xi caxtenda ngayaan xi cumatangun ngayaan cojo Jesucristu ne, hacuun tu xi cuma tangun ni ngayaan cojo rê me ta hacuaha cojo xi cuma tangun ngayaan cojo cjuaveya rê me? ⁴ Ngajan xi sacuaha xi caxinchaniji tangun ngayaan cojo Jesucristu hya xi caxtenda ngayaan, cojo sa xi cuma tsejen xi camatangun ngayaan cojo cjuaveya rê me. Cuatjin caxinchaniji ngayaan cojo sa xi sacuatjin xi cavuya Jesucristu cjuahñu ngatsê rê Nahmi naja xi jemu jyê hnga me cojo Hasen rê me ne, hacuanitjin ni ngayaan ta sacú naja cjuahñu xatsê xi tivanguen cojo ngasunhndê naja.

⁵ Sa xi camatangun ngayaan cojo ngu cjuaveya sacuaha cjuaveya rê Jesucristu ne, hacuaha cama tangun ngayaan cojo ngu cjuahñu sacuaha cjuahñu xatsê rê me. ⁶ Hacuaha hyan ta ngayaan ne, sacuaha xi casetaha tangun ngayaan cojo Jesucristu xcun cru, cojo sa xi cjuê cuetsun yojo tsehen naja, hane cuatjin xi ha quihndê hacuun cuanguen nduju sa ndiya rê cjuatsehen. ⁷ Ta yo xi ha cahme ne, ha camandaya tsêhê cjuatsehen. ⁸ Sa xi cuatjin caveyan cojo Jesucristu ne, vetahantacun xi hacuaha cuatjin cuinechan cjuahñu cojo rê me. ⁹ Hacuaha hyan ta Jesucristu ne, quihndê xi ha cavuya me cjuahñu ne, ha quihndê cuyaain cueya nga me ngu ndiya. Cjuaveya ne, ha quihndê vitexaain rê me. ¹⁰ Xi cahme me ne, ngu ndiya ni cahme me xi cuma rê cjuatsehen; peru quihndê xi tacun nga me cjuahñu ne, tacun me xi cuma rê Nina. ¹¹ Cuatjin nuju ngayun ne, nihñucuendun ni xi caveyun camahani xi cuma rê cjuatsehen, nihñucuendun xi nechun cjuahñu xi cuma rê Nina xi tjin tangun cjuatacun nuju cojo Jesucristu.

¹² Vêhê xi ngayun ne, xicatuun sa cahndê xi cjuatsehen cuitexa nuju; xicanihñuu sa yêjê ni hacutjin meje rê yojo jyê nuju. ¹³ Xicatuun sa yojo nuju cojo cjuatsehen ta tuhun yojo nuju cojo Nina, sacuaaha nima xi cavuya cjuahñu ngayun. Yojo nuju ne, mijí rê xi sahmi xa rê cjuatsehen ta meje rê xi sahmi xa rê cjuandaja. ¹⁴ Sacuaaha cjuatsehen ne, ha quihndê vitexaain nuju ta, tsêhê xi hacuiin ley tivitexa nuju ta cjuandaja rê Nina ne, vêhê tivitexa nuju.

Yo meje rê xi tahan yojo naja cojo

¹⁵ Sa cuatjin ne, ¿mé xi ndatjin nihña? ¿Há nihña sa cjuatsehen tsêhê xi hacuiin ley tivitexa naja ta cjuandaja rê Nina tivitexa naja? ¡Yéya, hacuiin cuatjin! ¹⁶ Ngayun ne, ha ndaja hyun ta sa xi tuhun yojo nuju cojo cjuatsehen xi cuinuhyun tsêhê yêjê ni hacutjin vitexa nuju cjuatsehen ne, hatuxa tjihñu ngayun cojo cjuatsehen jan, hacuaaha sacú nuju cjuaveya. Peru sa xi tuhun yojo nuju cojo Nina xi cuinuhyun tsêhê me ne, hatuxa tjihñu ngayun cojo Nina, hacuaaha nujuhunyun ndiya rê cjuandaja. ¹⁷ Titjun ne, hatuxa tjihñu ngayun cojo cjuatsehen. Peru nacuechji rê Nina ta quihndê ne, ha canuhyun cojo ngu ñaja xahasen nuju tsêhê cjuachacun xi casahmi Nina xi camachaya nuju. ¹⁸ Hane xi ha camandaya ngayun tsêhê cjuatsehen ne, catuhun yojo nuju cojo ndiya rê cjuandaja. ¹⁹ Tichjá cojo nuju cojo cjuua xi chjaain cuijne rcun, ngatsê rê xi hvê xi jemu chja cuijne rcun cjuatacun xi tichjá cojo nuju. Titjun ne, catuhun yojo nuju cojo cjuatsehen, cojo sa xi suvá cjuatsehen yêjê ni xi nihñu. Peru quihndê ne, cuatjin meje rê xi tuhun yojo nuju cojo ndiya rê cjuandaja cojo sa xi cuma cjuê jyê nuju xcun Nina.

²⁰ Hya xi tjihñu ngayun cojo cjuatsehen ne, ndaya tjin ngayun xi cuma rê ndiya rê cjuandaja. ²¹ Peru ¿mé ndajyihí casacu nuju hya? Tsajin, ta quihndê ne, tu ma sava nuju xi ninguitsjun xcusun xi canihñu ta, tsêhê xi hya xi cuatjin nihña ne, suvá cjuaveya sacú naja. ²² Peru quihndê ne, camandaya ngayun tsêhê cjuatsehen hacuaaha catuhun yojo nuju cojo Nina. Vêhê xi tisacu nuju ngu cjuatacun tyjahi xi tsajin cun rê, tisacu nuju ngu xahasen tyjahi, hacuaaha hya xi cuijnetaha ne, sacú nuju ngu cjuahñu xatsê. ²³ Sacuaaha chjí xi sacú naja tsêhê cjuatsehen ne, hacui cjuaveya. Peru cjuandaja xi Nina sua naja me, tu cjuatjo ni sacú naja hya xi tjin tangun cjuatacun naja cojo Nai naja Jesucristu. Hane sacú naja cjuahñu xatsê.

7

Xcusun xi vicuya naja ley rê cjuavixan

¹ Ngayujun ni matsejen ne, ha hyun xi hmí rê ley. Vêhê xi ha hyun xi ley ne, vitexa naja jinguyêjê rê xi nechan cjuahñu. ² Sacuaaha ngu chjuun xi cavixan na cojo xihin rê na ne, chja ley rê Moisés ta sacuaaha xi tjihñu na cojo cha jinguyêjê rê xi tacun cha cjuahñu. Peru sa xi xihin rê na cueya cha ne, na vêhê ne, ha ndaya tjin na tsêhê cjuavixan xi camá na cojo xihin rê na jan. ³ Vêhê xi sa xi tacun cuaha xihin rê na, hane na vêhê ne, cjuaha na jingu sa xihin ne, jemu jyê jyê rê na. Peru sa xi cueya xihin rê na jan ne, ndaya tjin na tsêhê cjuavixan xi camá na, hacuaaha tsajin mé jyê rê na sa xi cuixan nga na ngu ndiya cojo jingu sa xihin.

⁴ Cuanitjin nuju ngayun, sacuaaha xi caveyun xi cuma rê ley ngatsê rê Jesucristu cojo sa xi cuma ndaya ngayun tsêhê ley, hane cuma tsêhê jingu sa me ngayun. Me vêhê ne, hacui Jesucristu, me xi cavuya cjuahñu. Cuatjin cavuya me cjuahñu cojo sa xi cuma nihña cjuandaja xi meje rê Nina. ⁵ Titjun hya xi cavinechan cojo yojo jyê naja ne, ley ne, catsingasca rê cjuatsehen

ngajñi rë cjuatacun naja cojo sa xi nihña cjuatsehen. Hane ngatsë rë cjuatsehen xi canihña ne, vëhë xi cuechuntahan cjuaveya. ⁶ Peru quihndë ne, sacuaaha xi caveyan xi cuma rë xcusun xi catsihñu naja, sehe ndaya tjin ngayaan tsëhë ley. Cuatjin xi ha quihndë hacuiin tjihñu ngayaan cojo ley changá vëhë ta, tjihñu ngayaan cojo cjuaxatsë tsëhë Hasen rë Nina.

Cjuatsehen xi hinja ngajñi yojo naja

⁷ Tsëhë xi quixi cuatjin ne, ¿há cuinújan xi jemu tsehen ley rë Moisés jan? ¡Jéya, hacuiin cuatjin! Peru hveen mé xi hmí rë cjuatsehen hisca xi camachaya ná cjuarë ley jan. Hya ne hveen xi ndajin tjin xi tsimeje xcusun xi tjin rë jingu sa xuta, hveen hisca xi camachaya ná cjuarë ley xi chja cuitjin: “Xicanimiji xcusun xi tjin rë jingu sa xuta.” ⁸ Ngajan xi ngatsë rë xi camachaya ná cjuarë ley jan ne, cjuatsehen ne, catsingasca rë cjuatacun naha, hane casahmi xi ngahan ne, jemu catsimeje xcusun xi tjin rë jingu sa xuta. Suva hya xi cjëë cumachaya ná cjuarë ley ne, hya xi tsajin mé casahmi cjuatsehen cojo ná. ⁹ Titjun xi hveen xi hmí ley ne, sacuaaha xi jemu ndajiyi tejña. Peru hya xi camachaya ná tsëhë cjuarë ley jan ne, cavascaya rë cjuatsehen ngajñi rë cjuatacun naha, ¹⁰ hane sacuaaha xi cavéya ngahan. Hane cjuarë ley vëhë ne, cahndë rë xi cavisecoo ná xi sacú ná ngu cjuahñu xatsë ne, sacuaaha xi catsiquehen ná. ¹¹ Cuatjin camá ta, tsëhë xi ngatsë rë xi camachaya ná cjuarë ley jan ne, cjuatsehen ne, cavindacha ná. Hane cojo cjuarë ley jan ne, casacu ná cjuaquixi xi xín cavitejña tsëhë Nina.

¹² Ngajan xi yëjë ní cjuarë vitexa ley jan ne, hatuxa cjuarë Nina, hatuxa cjuaquixi, hatuxa cjuandaja. ¹³ Xi cuatjin ne, ley xi ndaja jan ne, ¿há cuma xi vëhë catsiquehen ná? ¿Há cuma xi vëhë cavaxëxin ná tsëhë Nina? ¡Jéya, hacuiin cuatjin cama! Cjuatsehen ne, cojo sa xi cumatsejen xi tsehen jain ne, casahmi xa cojo ngu xcusun ndaja cojo sa xi tsiquehen ná. Cuma cuinújan ne, hya xi machaya naja cjuarë ley jan ne, ngajan ma tsejen xi jemu tsehen camahani cjuatsehen.

¹⁴ Ha hyan ta ley rë Moisés jan ne, tsëhë Nina vë. Peru ngahan xi tsëhë ngasunhndë ngahan ne, sacuaaha xi caxteña ngahan xi cuihndë tsëhë cjuatsehen. ¹⁵ Hisca vijniircú xcusun xi sahme. Sahmee xcusun xi meje sahme ta sahme xcusun xi chuyiin camahani ná. ¹⁶ Quihndë xi sahme xcusun xi mijí sahme ne, ha ngajan ma tsejen ta ha hvë ta ley ne, jemu ndaja. ¹⁷ Peru xi cuatjin ne, hacuiin ngahan xi sahme cuatjin ta cjuatsehen xi hinja ngajñi yojo naha ne, vëhë xi sahmi cuatjin. ¹⁸ Ha hvë ta sacuaaha ngajñi yojo jyë naha vi ne, tsajin camahani hinja rë cjuandaja. Jemu meje sahme cjuandaja, peru maji. ¹⁹ Sahmee cjuandaja xi meje sahme ta tu cjuatsehen xi mijí sahme ne, vëhë sahme. ²⁰ Peru quihndë xi sahme xcusun xi mijí sahme ne, ha ngajan ma tsejen ta hacuiin ngahan xi sahme cuatjin ta, cjuatsehen xi hinja ngajñi yojo naha ne, vëhë xi sahmi cuatjin.

²¹ Ngajan xi ngahan ne, hatuxa cuitjin vátju má: hya xi meje sahme ngu cjuandaja ne, hya vutsején ta tjin mé xi sahmi xi ma sahme cjuatsehen. ²² Ngahan cojo cjuatacun naha ne, jemu chuya ná ley rë Nina. ²³ Peru vutsején ta ngajñi yojo jyë naha ne, jiya sa ngu ley xi hacjahi. Hane ley xi hacjahi jan ne, sacuaaha xi ticjan cojo ley xi jiya ngajñi cjuatacun naha. Hacuaaha ley xi hacjahi jan ne, hacui ley rë cjuatsehen xi hinja ngajñi yojo naha. Hane vutsején ta ley jan ne, sacuaaha xi titsihñu ná. ²⁴ ¡Jemu choho camahani má ná ngahan! ¿Yo xi cuaxëtje ná tsëhë yojo jyë naha vi ni? ta, ngatsë rë yojo naha vi ne, sacú ná cjuaveya. ²⁵ Suá nacuehji rë Nina ngatsë

rë Nai naja Jesucristu ta me vëhë cuaxëtje ná me. Ngajan xi ngahan ne, ngu ladu ne, tjihñu cjuatacun naha cojo ley rê Nina, peru ngu ladu nga ne, tjihñu yojo naha cojo ley rê cjuatsehen.

8

Hacutjin meje rê xi tjenguen ndiya rê Nina

¹ Quihndë ne, tsajin camahani castigu xi cuma naja ngayaan xi tjin tangun cjuatacun naja cojo Jesucristu ta, ² tsëhë xi quihndë xi tjenguen ndiya rê Nina xi sua naja cjuahñu xatsë ngatsë rê xa xi casahmi Jesucristu ne, vëhë xi ha tjin ndaya ngayaan tsëhë ndiya rê cjuatsehen xi sua naja cjuaveya. ³ Xcusun xi camaji casahmi ley rê Moisés ngatsë rê xi caain rê xutajyë sahmi chihin me sacuatjin chja ley ne, Nina ne, camá casahmi me. Nina catsingatju me Quihndi rê me xi cuma me ngu xuta sacuatjin ngayaan xutajyë. Catsingatju Nina Quihndi rê me jan xi tsicjë me cjuatsehen. Vëhë xi quihndi jan xi hmí rê Jesucristu ne, cahme me sacuaaha castigu ngatsë rê yëjë ni cjuatsehen xi sahmi xuta jyë. ⁴ Cuatjin casahmi Nina cojo sa xi cuma nihña sacuatjin vitexa ley ta ngayaan ne, hacuiin tjenguen ndiya hacutjin xi meje rê yojo jyë naja ta tjenguen ndiya hacutjin xi meje rê Hasen rê Nina.

⁵ Xuta xi tjengui me ndiya hacutjin xi meje rê yojo jyë rê me ne, sahmi tangun me cjuatacun rê me cojo xcusun xi meje rê yojo jyë rê me. Peru xuta xi tjengui me ndiya rê Hasen rê Nina ne, sahmi tangun me cjuatacun rê me cojo Hasen rê Nina. ⁶ Xuta xi tsiniya cacun me hacutjin xi meje rê yojo jyë rê me ne, hatuxa sacú rê me ngu cjuaveya ta tsajin jiya Hasen rê Nina cahntsua xahasen rê me, cuechiin me xcun Nina. Peru xuta xi tsiniya cacun me hacutjin meje rê Hasen rê Nina ne, hatuxa sacú rê me ngu cjuahñu xatsë cojo ngu cjuajeya ta ha jiya Hasen jan xahasen rê me hacuaaha cuechú me xcun Nina. ⁷ Ngajan xi xuta xi tsiniya cacun me hacutjin xi meje rê yojo jyë rê me ne, hatuxa choho vëë me Nina ta, tsëhë xi mijí cuihndë me tsëhë cjua xi vitexa Nina. Hisca maji vihndë me tsëhë cjua xi vitexa Nina. ⁸ Xuta xi tjengui me ndiya hacutjin xi meje rê yojo jyë rê me ne, maji sahmi me sacuatjin chuya rê Nina.

⁹ Peru ngayun ne, hacuiin tjengun ndiya hacutjin xi meje rê yojo jyë nuju ta tjengun ndiya rê Hasen rê Nina, sa xi jiya Hasen rê Nina cahntsua cjuatacun nuju. Peru sa xi ngu xuta tsajin rê me Hasen rê Jesucristu ne, xuta vëhë ne, hacuiin tsëhë Jesucristu me. ¹⁰ Peru sa xi jiya Hasen xi sua Jesucristu ngajñi rê cjuatacun nuju ne, yojo nuju ne, sacuaaha xi cahme ngatsë rê cjuatsehen, peru hasen nuju ne, sacú rê ngu cjuahñu xatsë ngatsë rê xi Nina ne, tsicjë me jyë nuju. ¹¹ Ha hyan ta Nina ne, catsicuya me Jesús cjuahñu. Hane sa xi jiya Hasen rê Nina ngajñi rê cjuatacun nuju ne, vëhë sahmi xi sua sa Nina cjuahñu rê yojo jyë nuju xi hatuxa hme.

¹² Vëhë xi ngayaan ne, tjin xcusun xi hatuxa meje rê xi nihña, peru mijí rê xi nihña sacuatjin vitexa yojo jyë naja ta ¹³ ngu xuta xi tisahmi me sacuatjin vitexa yojo jyë rê me ne, hatuxa cueya me. Peru ngu xuta xi cojo ngahñu xi sua Hasen rê Nina me ne, titsitjungui me xcusun xi meje rê yojo rê me ne, hatuxa sacú rê me ngu cjuahñu xatsë.

¹⁴ Yëjë ni xuta xi vihndë me tsëhë Hasen rê Nina ne, me vëhë xi cjuaquixi xi quihndi rê Nina me. ¹⁵ Hasen xi casacu nuju ne, hacuiin ngu hasen xi tsihñu nuju cojo sa xi rcun nga cuma ngu ndiya ta, hasen vëhë ne, hacui ngu xi sahmi xi cjuaquixi xi cuma ngayun quihndi rê Nina. Hya xi nujan “¡Papá!” Nina Nahmi naja ne, ¹⁶ hya tichja Hasen rê Nina cojo hasen naja xi ngayaan ne, ha quihndi rê Nina ngayaan. ¹⁷ Hane tsëhë xi quihndi rê

Nina ngayaan ne, vèhë xi hatuxa cuechú nixtin xi satè naja cjuandaja rë me. Hacuaha cojo ngayaan satè naja tsèhë cjuandaja xi satè rë Jesucristu ta, tsèhë xi quihndë ne, tivatjun cjuañihi sacuatjin cavatju Jesucristu. Vèhë xi hya xi cuma ngascan ne, hacuaha cojo ngayaan cuma yehe cuma hnga ngayaan cojo cjuatacun naja sacuatjin cama jyë cama hnga Jesucristu cojo Hasen rë me.

¹⁸ Xi má ná ngahan ne, tsimii sahmi rë xi tivatjun ngayaan cjuañihi quihndë ta, tsèhë xi cjuandaja rë Nina xi sacú naja xi cuma ngascan ne, jercu tu ndaja camahani. ¹⁹ Yèjë ni xcusun xi casahmi Nina nguehe ngasunhndë ne, jemu siuya xi meje xati scuëë hacutjin cún hacutjin má cuma ngayaan quihndi rë Nina. ²⁰ Ta ngasunhndë ne, tu mahya xi siu yèjë ni xi siu. Peru hacuiin hatuxa xcusun xi cacún vë camameje rë xi cuatjin camá ta Nina ne, cuatjin meje rë me xi cuma. Peru tjin ngu cjuetacun. ²¹ Cuechú nixtin xi yèjë ni xi casahmi Nina nguehe ngasunhndë ne, hisca cojo vèhë cuma ndaya ne, ha quihndë hacuiin hatuxa cjuehndu sa ta cuma ndaya sacuatjin cuma ndaya yèjë ni quihndi rë Nina. Hacuaha sacú rë cjuandaja sacuatjin sacú rë quihndi rë Nina cjuandaja. ²² Ha hyan ta hisca quihndë nixtin vihi ne, yèjë ni xi casahmi Nina ngasunhndë vi ne, sacuaha xi tivitsine sacuaha xi vitsine ngu chjuun xi meje tsin rë na quihndi. ²³ Hane hacuiin suvá ni ngasunhndë xi cuatjin tivitsine ta hacuaha cojo ngayaan ne, tivitsine. Ha tjin naja Hasen rë Nina sacuaha hitsë tsèhë yèjë ni xi sacú naja xi cuma ngascan. Peru vitsine ta, tsèhë xi jemu meje naja xi Nina sahmi naja me quihndi rë me xi cjuaquixi hya xi cuaxëtje me yojo jyë naja. ²⁴ Ngayaan ne, cavetjuntjen cojo sa xi cuetahan tacun Nina. Peru sa xi ha tjin naja ngu xcusun ne, ha quihndë hacuiin cuetahan tacun xi sehe sacú naja xcusun xi ha tjin naja jan. ²⁵ Peru hya xi vetahan tacun xi sacú naja ngu xcusun xi cjëë sacú naja ne, jemu jyë tacun xi nechayan rë.

²⁶ Hacuaha ha chuva vèhë ni ne, Hasen rë Nina ne, visecoo naja, ngayaan xi caain naja nihña cjuandaja. Hisca hyaan jarë cjuandaja rë Nina xi ndatjin xi chjahyan. Peru suvá Hasen rë Nina ne, chjatje ngatsë naja cojo cjuatacun xi hisca cumaji cuinújan cojo cjua naja. Vèhë xi sacuaha xi tu fëtacun ni. ²⁷ Hane Nina, me xi vëë yèjë ni xi hinchu cjuatacun naja ne, hacuaha vëë me cjuatacun rë Hasen rë me jan ta, tsèhë xi Hasen rë me jan ne, hatuxa chjatje ngatsë rë xuta ladu rë Nina sacuatjin meje rë Nina xi cuma.

Nina sahmi me xi cuetjundajan ngayaan

²⁸ Ha hyan ta yèjë ni xcusun xi má nguehe ngasunhndë vi ne, sahmi Nina xi ndaja tsèhë xuta xi hmucacun me Nina, xuta xi cavaxijin Nina sacuatjin xi meje rë me. ²⁹ Hisca ntsacu cavetsihin ne, ha tjin chjin rë Nina cjuatacun rë yo xi meje rë me xi cuma xuta ladu rë me, hacuaha hisca hya cavejña ngu cacun me xi cuma xuta xi cuacun jan sacuaha Jesucristu Quihndi rë me. Cuatjin meje rë Nina cojo sa xi cuma titjun Jesucristu ngajni rë jemu cjin xuta xi cuma sacuaha xicjin me. ³⁰ Hacuaha xuta xi cuacun cavejña ngu cacun Nina jan ne, me vèhë xi cavaxijin Nina me; hacuaha xuta xi cuacun catsicjë Nina jyë rë jan ne, me vèhë xi casahmi yehe casahmi hnga Nina me cojo cjuatacun rë me.

³¹ Quihndë ne, nguehe cuichjá sa ngu cjua cojo nuju. Tsèhë xi Nina tacun me ngatsë naja ne, tsajin camahani yo xi cuma sahmi naja condra. ³² Nina ne, catsichuvaain naja me Quihndi rë suvá me ta casua me Quihndi rë me xi cahme ngatsë naja ngayejen ni. Hane vèhë xi hacuaha hatuxa sua naja me yèjë sa xcusun xi ndaja. ³³ Tsajin yo xi cuinchajyë naja,

ngayaan xi Nina cavaxijin naja me ta, Nina ne, me vëhë xi tsicjë me jyë naja. ³⁴ Vëhë xi tsajin camahani yo xi ma cjan rë xi ngayaan cún naja. Tsajin ta, Jesucristu ne, me vëhë xi ha cahme me hacuaha ha cavuya me cjuahñu, hane me vëhë xi jemu casahmi jyë casahmi hnga Nina me cojo Hasen rë me ngajan hiscan tacun me cojo rë Nina. Hacuaha me vëhë xi tichjatje me ngatsë naja. ³⁵ Ngajan xi tsajin camahani mé xcusun xi cuaxëxin naja tsëhë cjuahmutacun rë Jesucristu, handasa cuatjun cjuañihi, handasa sacuyiin hacutjin naxentjen yojo naja, handasa yo tsujyihya tjengui naja cojo cjuahngatacun, handasa cuma jindyá nangui naja, handasa cumachaja naja tsjian naja, handasa cuinechantahan tsavi xi mé xi cuma naja, handasa tsiquehen naja xuta. Hatuxa tsajin mé xcusun xi cuacun vë xi cuma cuaxëxin naja tsëhë cjuahmutacun rë Jesucristu. ³⁶ Hacuaha camahindu ngujo cjuaxcun xujun rë Nina xi chja cuitjin:

Yëjë ni hora ne, titsiquehen niji xuta ngu jo ngayin ngatsë rë xi ladu nuju ngayin;

xi má rë xuta ne, ngayin ne, sacuaha chu tsánga xi cjue cueya chu ngayin. Cuatjin camahindu. Sacuatjin camahindu tsëhë xuma xuta xi cuacun jan ne, hacuaha cuatjin tivatjun tijima. ³⁷ Peru caa naja yëjë ni cjuacjintacun vëhë, hisca vetjun ndaja sa ta, tsëhë xi Jesucristu ne, visecoo naja me, tsëhë xi hmucacun naja me. ³⁸ Hane ngahan ne, camangucácun ta tsajin mé xcusun xi cuma cuaxëxin naja tsëhë cjuahmutacun rë Nina: sa cjuaveya sa cjuahñu, sa ángel sa xuta xi ma titjun, sa cjuacjintacun xi tivatjun tijima, sa cjuacjintacun xi sehe nduva, sa xutacjin xi choho vëë naja sa chircun, ³⁹ sa ngajan ngahnga nduva, sa nguehe nangui nduva, o sa tu mé ni xcusun xi yahnga xi casahmi Nina ne, cumaji cuaxëxin naja tsëhë cjuahmutacun xi tjin rë Nina cojo naja ngatsë rë xi tjin tangun cjuatacun naja cojo Nai naja Jesucristu.

9

Nina cavaxijin me xuta Israel

¹ Quihndë ne, sacuaha ngahan xi tsëhë Jesucristu ngahan ne, nguehe cuichjá cjuaquixi, hacuiin vindácha nuju. Hane tsëhë xi jiya Hasen rë Nina ngajni rë cjuatacun naha ne, vëhë xi hvë cojo cjuatacun naha ta cjuaxi chjá ne, cjuaquixi hya xi chjá xi ² jercu tu choho camahani má ná, jemu jyë cjuava xi jiya cahntsua xahasen naha. ³ Hisca má cáacun ne, cjuéhya rë Nina xi cuaxëxin ná me tsëhë Jesucristu sa xi cojo cjuatacun vëhë ne, yëjë ni xuta xi tangun xutachanga naha cojo ne, cuma sacú rë me cjuandaja rë Nina. ⁴ Xuta xi cuacun vë ne, xuta Israel me. Me vëhë xi camá me quihndi rë Nina, camachaya rë me hacutjin jemu jyë hnga Nina cojo Hasen rë me, camachihin ngu jo compromisu rë Nina cojo rë me, casacu rë me ley rë Nina, camachaya rë me hacutjin meje rë xi chjaharcun rë Nina, casacu rë me cjuaxi rë Nina hacutjin sua Nina me cjuandaja. ⁵ Me vëhë xi canduva me tjë rë xutachanga niji, hacuaha tjë rë me vëhë ne, canduva Jesucristu sacuaha ngu xuta. Hane Jesucristu jan ne, me vëhë xi Nina me tsëhë jingujyë ni ngasunhndë, hacuaha chjaharcun rë me yëjë nu yëjë nixtin. Cuatjin jain.

⁶ Hacuiin chjá xi cavetjincaain cjuaxi cachja Nina cojo xuta Israel. Ha hyun ta xuta xi canduva tjë rë xutachanga xi hmí rë Israel ne, hacuiin yëjë me xi xuta ladu rë Israel xi cjuaquixi me. ⁷ Hacuaha xuta xi canduva tjë rë Abraham ne, hacuiin yëjë me xi ladu rë Abraham me xi cjuaquixi, ta cuitjin cachja Nina cojo Abraham: “Suvá tjë rë quihndi riji Isaac ne, vëhë ni xuta xi cuma tjë riji xi cjuaquixi.” Cuatjin cachja Nina. ⁸ Cuma cuinújan ne, hacuiin

yějē ni xuta xi canduva tjē rē Abraham xi jni xi yojo rē me xi cuma quihndi rē Nina ta, suvá xuta xi tsin me sacuatjin cachja Nina cojo Abraham ne, me vėhė xi cuichja Nina xi tjē rē Abraham xi cjuaquixi. ⁹ Cuitjin cachja Nina cojo Abraham hatsėē: “Nixtin xi cuejńńa xi cúya nga ne, hya tsin rē na Sara ngu quihndi xihin.” Cuatjin cachja Nina.

¹⁰ Hacuaha hacuiin vėhė ni má yějē cjuava vė ta sacuaaha catsijo quihndi rē Rebeca ne, ngu ni nahmi rē, me xi xutachanga nijji xi hmí Isaac. ¹¹⁻¹² Hane hisca hya xi cjėē tsin quihndi xi cuacun jan, hacuaaha cjėē sahmi xi ndaja xi ndajin ne, hya cachja Nina cojo Rebeca cuitjin: “Quihndi rijji xi ngascan ne, cuma titjun tsėhė quihndi tjun.” Cuatjin cachja Nina. Cuatjin camá cojo sa xi cuma tsejen xi Nina ne, tjin rē me chuva rē xi cuaxijin suvá me tu yo ni xi meje rē me, hacuaaha tsimii sahmi rē tu mé ni xcusun xi casahmi xuta jan. ¹³ Hacuaha camahindu xcun xujun rē Nina cuitjin: “Cha Jacob ne, catsihmucacun cha, peru cha Esaú ne, choho cahvė cha.” Cuatjin camahindu.

¹⁴ Xi cuatjin ne, ĺhá cuinújan xi Nina ne, cuaaintjin xi sahmi me? jéya, hacuiin! ta ¹⁵ Nina ne cuitjin cachja me cojo Moisés: “Ngahan ne, sahme cjuandaja cojo yo xi meje sahme cjuandaja cojo, hacuaaha cumayuma ná yo xi meje cuma yuma ná.” ¹⁶ Vėhė xi xuta xi sacu rē cjuandaja rē Nina ne, hacuiin xuta xi jemu meje rē, hacuiin xuta xi jemu sahmi vihi sahmi vėhė ta suvá Nina vaxijin me yo xi sua me cjuandaja rē me. ¹⁷ Xcun xujun rē Nina ne, chja Nina cojo me xi ma titjun tsėhė xuta Egipto cuitjin: “Ngahan ne, casahme xi camatitjun ngaye cojo sa xi cuatjin tsingáacun rē xuta ngahńu naha, hacuaaha cojo sa xi xuta tsėhė yějē ni ladu ne, cumachaya rē me yo ngahan.” Cuatjin cachja Nina. ¹⁸ Ngajan xi Nina ne, sahmi me cjuandaja cojo yo xi meje sahmi me cjuandaja cojo, hacuaaha sahmi me xi mijji cuijne rcu yo xi meje rē me xi cuijnii rcu.

¹⁹ Peru ngu ngayun ne, cuinújun cojo ná cuitjin: “Sa cuatjin ne, ĺmé má chaha rē xuta sahmi Nina? ta, tsėhė xi tsajin yo xi catsingatiin rē xcusun xi meje rē Nina xi cuma.” Cuatjin cuinújun. ²⁰ Peru ngayun xi ngu xutajyė ni ngayun ne, ĺyo ngayun xi cuatjin meje cuinújun cojo Nina? Sacuaaha ngu xcusun xi casahmi xuta ne, ĺhá cuichja cojo xuta xi casahmi jan cuitjin: “ĺMé má cuitjin jyihi canihńu ná?” Cuatjin cuichja. ²¹ Sacuaaha ngu cha chjinetiji ne, hatuxa tjin rē cha xa xi cjuaha cha ngu xtín ndasi ne, tsindaja cha jo tiji. Ngu tiji jan ne, jemu ndajiyihi ngu xa xi satė rē, hane tiji xingu jan ne, ngu xa xi chojyihí satė rē.

²² Nina ne, tsėhė xi meje sua me cumachaya rē xuta hacutjin xi jemu cuma cjan rē me hacuaaha jemu hńu ngahńu rē me ne, vėhė xi cojo yějē cjuajeya xi tjin rē me ne, caca rē me cojo xuta xi hatuxa cuma cjan rē me cojo, xuta xi cavaxijin me xi hatuxa tsicjė me. ²³ Cuatjin casahmi jyė cacun Nina, cojo sa xi sua me cumachaya rē xuta hacutjin xi jemu tjin rē me cjuandaja cojo xuta xi hatuxa sua me cjuandaja rē me, xuta xi caviyuju chjine Nina cojo tjun sa, cojo sa xi sacú rē xuta jan cjuandaja rē me. ²⁴ Hane xuta xi cuacun vėhė ne, hacuii ngayaan xi cavaxijin naja Nina. Hacuiin suvá ngajńi rē xuta Israel cavaxijin me ta hacuaaha cojo ngajńi rē xutaxín cavaxijin me. ²⁵ Sacuaaha cjuava rē Nina xi catsihindu profeta Oseas ne, cuitjin chja:

Xuta xi hacuiin xuta ladu naha me ne, cuechú nixtin xi sahme xuta ladu naha me;

hacuaha cojo na xi hacuiin tsihmucacun ne, cuechú nixtin xi jemu tsihmucacun na.

Cuatjin chja cjuava rē Nina.

²⁶ Hacuaha cachja nga Oseas cuitjin:

Ngu cahndé jan ne, cuitjin cachja Nina cojo xuta: “Ngayujun ni ne, hacuiin xuta ladu naha ngayun.” Cuatjin cachja Nina.

Hane handasa cuatjin cachja Nina, peru cuechú nixtin xi ngajan ne, cuma xuta xi cuacun jan quihndi rê Nina quicun.

Cuatjin cachja profeta Oseas.

²⁷ Hacuaha cachja profeta Isaías tséhê xuta tjê rê Israel cuitjin: “Handasa sacuatjin cjin tsumi tséhê ndachacun cuatjin cjin cuma xuta tjê rê Israel ne, peru jemu chuva me xi cuetjutje me ta, ²⁸ Nina ne, hatuxa sahmi me castigu nguehe ngasunhdê, hane xi cuechú nixtin vèhê ne, ngutjen ni sahmi me yêjê ni hacutjin xi cavejña me xi sahmi me.” Cuatjin cachja profeta Isaías.

²⁹ Hacuaha hatsêê ne, cachja nga Isaías cuitjin:

Nina, me xi hatuxa matitjun tséhê yêjê ni xi tjin, sa ngahnga sa ngasunhdê ne, sa xi casuaain naja me xuta xi cuma tjê naja ne,

tangun ni cafê ngayaan sacuatjin cafê camahani xuta nandya Sodoma cojo xuta nandya Gomorra.

Cuatjin cachja Isaías.

Catsitjungui xuta tjê rê Israel ndiya rê Nina

³⁰ Xi cuatjin ne, cuma cuinújan xi Nina ne, catsicjê me jyê rê xutaxín ngatsê rê xi cumangucacun xutaxín jan cojo Jesucristu, handasa hatsêê ne, hisca cuendaain rê xutaxín jan hacutjin sahmi Nina cojo jyê rê me. ³¹ Peru xuta tjê rê Israel ne, handasa jemu casahmi me ngahñu xi meje rê me xi tsicjê Nina jyê rê me ne, peru catsicjiin Nina jyê rê me. ³² ¿Mé má cuatjin catsicjiin Nina jyê rê me? Catsicjiin Nina jyê rê me ta, tséhê xi xuta tjê rê Israel xi cuacun jan ne, meje rê me xi tsicjê Nina jyê rê me ngatsê rê xcusun xi casahmi me xcun ngasunhdê rê me. Peru tséhê xi mijí cumangucacun me cojo Jesucristu ne, vèhê xi sacuaha xi caxtenguiya rê me “ndyojo xi xtenguiya rê xuta”. ³³ Cjua vèhê ne, sacuaha cjua xi cachja Nina xcun xujun rê me xi chja cuitjin:

“Ngahan vejñavasen ngu xihin ngajan ndetjún Sión,

hane xihin jan ne, sacuaha ngu ndyojo xi xtenguiya rê xuta;

peru xuta xi cumangucacun cojo xihin jan ne, tsajin nu tsajin nixtin xi cuetju sava me.”

10

¹ Ngayujun ni matsejen ne, cuichjá cojo nuju ta xahasen naha ne, jemu meje rê xi xuta tjê rê Israel ne, cuetjutje me tséhê jyê rê me. Hacuaha cuatjin féhya rê Nina. ² Cuma cuichjá cojo nuju ta xuta tjê rê Israel ne, hacuaha jercu tsiniya cacun me xi meje rê me Nina. Peru hacuiin ndaja vijnercu me hacutjin chuya rê Nina. ³ Hvíin me hacutjin tsicjê Nina jyê rê xuta. Peru jemu meje tsicjê súva me jyê rê me. Vèhê xi casuaain me yojo rê me cojo ndiya rê Nina, cojo sa xi Nina tsicjê me jyê rê me. ⁴ Jesucristu ne, me vèhê xi casahmichihin me yêjê ni cjua xi vitexa ley rê Moisés, cojo sa xi yêjê ni xuta xi cumangucacun me cojo Jesucristu ne, cjuê jyê rê me.

⁵ Moisés jan ne, hatsêê catsihindu me cjua vihi tséhê xuta xi meje rê me xi cjuê jyê rê me ngatsê rê xi sahmi me hacutjin vitexa ley rê Moisés. Cuitjin catsihindu me: “Xuta xi sahmi me sacuatjin vitexa ley ne, sacú rê me cjuañu xatsê ngatsê rê xi cuatjin sahmi me.” Cuatjin catsihindu Moisés. ⁶ Peru hacuaha cuitjin cachja nga Moisés tséhê xuta xi cjuê jyê rê me ngatsê rê xi mangucacun me cojo Nina: “Mijí rê xi ningatehetacuin cuitjin: ¿Yo xi cjueniji hisca ngahnga?” —sacuaha xi cuinduvajne cojo Jesucristu—; ⁷ o

¿Yo xi cjejne cahntsua nduchin? —sacua ha xi cuinduvaniji cojo Jesucristu xi jiya me ngajñi rë nima. ⁸ ¿Hacutjin chja Moisés xcun cja rë Nina ni? Cuitjin chja: “Cja rë Nina ne, ha jemu tiña tacun xi cuma nuju; ha híncha ntsuvun xi cuinújun, hacua ha híncha cahntsua xahasen nuju.” Cuatjin cachja Moisés. Cja rë Nina jan ne, hacui cja tséhë hacutjin meje rë xi cumangutacun cojo Jesucristu, vëhé cja xi titihín jimachaya rë xuta. ⁹ Sa xi ninguixun cojo ntsuvun xi Jesucristu ne, Nina me, Nai nuju me, hacua ha sa xi cojo xahasen nuju macjain nuju xi catsicuya Nina Jesucristu cjuahñu ne, cuétjuntjun tséhë jyé nuju. ¹⁰ Cuatjin cuma ta, tséhë xi macjain naja cojo xahasen naja, sehe tsicjé Nina jyé naja, hacua ha ninguixen cojo ntsuvan hacutjin macjain naja, sehe cuaxétje naja Nina.

¹¹ Cuatjin ta, cja rë Nina ne, cuitjin chja: “Yëjé xuta xi mangucacun cojo Nina ne, hatuxa cuetjin savaain me.” Cuatjin chja xujun rë Nina. ¹² Nina ne, tangun ni vutsejen me xuta tjé rë Israel cojo xutaxín ta me xi Nai naja ne, hacui ni me xi Nai rë yëjé ni xuta. Me vëhé xi jemu sua me cjuandaja rë me xi cuma rë yëjé xuta xi fehya rë me. ¹³ Hisca xujun rë Nina ne, cuitjin chja: “Yëjé xuta xi fehya me Nai naja cjuandaja ne, cuetjutje me.” Cuatjin chja xujun rë Nina. ¹⁴ Tjin rë yo xi cuichja cojo ná cuitjin: “Peru ¿hacutjin cuma cjuehya xuta cjuandaja rë ngu xi hisca cjëé cumangucacun me cojo ni? Hane ¿hacutjin cumangucacun me cojo ngu xi hisca cjëé cumachaya rë me yo ni? Hane ¿hacutjin cumachaya rë me yo jan, sa xi tsajin yo sua cumachaya rë me ni? ¹⁵ Hane ¿hacutjin cuma cjue sua me cumachaya rë xuta yo jan, sa xi cjëé tsingatju Nina me ni?” Cuatjin cuichja. Xujun rë Nina ne, cuitjin chja: “Jemu ndatjin camahani hya xi fehe ngu me xi nduvacojo ngu cjuandajyihí.”

¹⁶ Peru chjá ngahan ta hacuiin yëjé xuta cavihndé me tséhë cjuandajyihí jan. Hacua ha cuatjin chja profeta Isaías xcun xujun rë Nina: “Ngayun, Nai nijl, jemu chúva me xi camangucacun cojo cja nijl.” Cuatjin chja Isaías. ¹⁷ Ngajan xi cumangutacun hya xi ha camachaya naja ngu cja, hane cumachaya naja hya xi yo cuinduva sua cumachaya naja ngu cja xi chja hacutjin casahmi Cristu.

¹⁸ Peru ¿há cjëé cumachaya rë xuta? chjá han. ¡Jéya, hatuxa camachaya rë me! Chja nga xujun rë Nina cuitjin:

Jingujyë ni ngasunhndé ne, quiji cja rë me, hisca hiscan vijnetaha ngasunhndé cavechu cja rë me.

Cuatjin chja. ¹⁹ Cúya cuichjá nga ngu ndiya: Xuta tjé rë Israel ne, ¿há hvín me ni? ¡Jéya! hatuxa vëé me ta, tséhë xi catsihindu Moisés cja xi cachja Nina cuitjin:

Ngahan ne, sahme xi jemu nihñu cjuaxín ngatsé rë xi sahme cjuandaja cojo xutaxín;

tsicján nuju ngatsé rë xi sahme cjuandaja cojo xuta xi hvín me yo ngahan. Cuatjin catsihindu Moisés cja rë Nina. ²⁰ Hacua ha catsacjuiin Isaías hya xi catsihindu me cuitjin:

Xuta xi hacuiin cavanguise ná me ne, me vëhé casacu rë me ngahan;

hacua ha xuta xi cuendaain rë me tsahan ne, me vëhé xi casuá camachaya rë me yo ngahan.

Cuatjin cachja Isaías. ²¹ Peru catsihindu Isaías cja xi cachja Nina tséhë xuta Israel cuitjin: “Yëjé nixtin tsahan, xuta xi catsitjungui ná me.” Cuatjin catsihindu Isaías cja rë Nina.

11

Nina ne, cavaxijin me ngu jo xuta Israel

¹ Quihndë ne, tsêhë xi cuatjin catsitjungui xuta Israel ndiya rê Nina ne, cuinengësë nuju ngu cju: ¿há catsitjungui Nina xuta rê me ni? ¡jéya, hacuiin cuatjin! Ta ngahan ne, hacuaha ngu xuta Israel ngahan, tjë rê Abraham ngahan, hacuaha tjë rê Benjamín ngahan. ² Hisca ntsacu cavetsihin ne, ha vëë Nina yo xi meje rê me xi cuma xuta ladu rê me, hacuaha tsitjunguiin me xuta xi cuacun vë quihndë. ¿Há vitsijiin nuju hacutjin chja xcun xujun rê Nina hiscan xi catsihindu profeta Elías cju xi cachjajyë me cojo Nina tsêhë xuta Israel? Cuitjin cachja Elías: ³ “Ngayun, Nai naha, ha catsiquehen xuta profeta nuju hacuaha ha catsinguetsun me cahndë hiscan xi cjue cjuatjo xi cuma nuju. Ha tu suva sa teña, peru hacuaha hisca cojo ngahan tivanguise ná me xi tsiquehen ná me.” Cuatjin cachja Elías. ⁴ Peru ¿hacutjin catsicuya Nina cju cojo Elías? Cachja Nina: “Ngahan ne, ha cavaxëxen yatu mil xuta, hane xuta xi cuacun jan ne, cjëë cjue cuixcuhnci me xcun nina ndyojo xi hmí Baal.” Cuatjin cachja Nina cojo Elías. ⁵ Hacuanitjin ni quihndë ta handasa jemu camachuva me peru tjin sa me xi hincha ndiya rê Nina ta, tsêhë xi cavaxijin Nina xuta jan ngatsë rê cjuandaja rê Nina cojo rê me. ⁶ Peru camá ngatsë rê cjuandaja ni rê Nina cojo rê xuta xi cuacun vë, hacuiin ngatsë rê xcusun xi casahmi xuta jan. Ta sa xi cavaxijin Nina me ngatsë rê xcusun xi casahmi me ne, cjuandaja rê Nina ne, sacuaha xi venguiin chji rê.

⁷ Ngajan xi cuma cuinújan xi hacuiin yëjë xuta Israel xi casacu rê me xi vanguise me ta ngujo ni xuta Israel xi cavaxijin Nina ne, me vëhë ni casacu rê me. Hane me xi yahnga jan ne, Nina casahmi me xi mijí cuijnercu me. ⁸ Camá sacuatjin camahindu xcun xujun rê Nina hiscan xi chja cuitjin: “Nina ne, casua me xuta xi cuacun vë ngu cjuatacun sacuaha cjuatacun rê ngu cha chihi. Vetaain rcu me hacuaha vijni rcu me. Hisca quihndë ne, cuatjin cún me.” Cuatjin camahindu. ⁹ Hacuaha hatsëë cachja David cuitjin cojo Nina: Meje ná xi yëjë ni cjuandaja xi tuhun rê xuta ne, catuya sacuaha ngu chen, sacuaha ngu changa, sacuaha ngu xcusun xi xtenguiya rê me, sacuaha ngu castigu xi vangui suvá me.

¹⁰ Meje ná xi catama rcá me, cojo sa xi cumatsijin rê me; hacuaha catindi ngaxtun me, cojo sa xi tsajin nu tsajin nixtin xi cuma quixi ngaxtun me. Cuatjin cachja David.

Tivetjutje xutaxín

¹¹ Quihndë ne, cuinengësë nuju ngu cju vi: Hya xi cavetjuxin xuta tjë rê Israel tsêhë ndiya rê Nina ne, ¿há ngu ndiya xa ni cachaja camahani me? ¡jéya, hacuiin cuatjin! ta ngatsë rê cjuatsehen rê xuta tjë rê Israel xi cuacun jan ne, casua Nina cahndë xi cuetjutje xutaxín, cojo sa xi xuta tjë rê Israel ne, sahmi me cjuachini. ¹² Ngajan xi ngatsë rê cjuatsehen rê xuta tjë rê Israel jan ne, jemu casacu rê xuta ngasunhndë cjuandaja rê Nina. Ngatsë rê xi cachaja xuta tjë rê Israel ndiya rê Nina ne, jemu casacu rê xutaxín cjuandaja rê Nina. Peru sa xi cuatjin camá ne, hya xi sacú nga rê xuta tjë rê Israel ndiya rê Nina ne, jercu sacú sa rê xuta ngasunhndë cjuandaja rê Nina.

¹³ Quihndë ne, ngayun xi xutaxín ngayun ne, nguehe cuichjá sa cojo nuju ngu jo cju matsejen. Ngahan ne, casuaxa ná Nina xi cjuë suá cumachaya rê xutaxín cju rê Nina. Vëhë xi jemu sahme nguñajacacun xa naha, ¹⁴ cojo sa

xi cuma chini xuta xi tjë rë xutachanga naha cojo nuju. Hane xi cuatjin ne, cuisécoo rë xi cuetjutje ngu jo me. ¹⁵ Ngatsë rë xi catsitjungui Nina xuta tjë rë Israel ne, vëhë cavuxaha ndiya xi cuma xticia si xi tacun ngajñi rë Nina cojo xutaxín. Ngajan xi hya xi cjuahatsja nga Nina xuta tjë rë Israel jan ne, jercu ndajyihí camahani ngu cjuandaja xi cuetjucaa ta, sacuaaha xi ngu nima cuya cjuahñu.

¹⁶ Sa xi chjahan ngu rquí nahyu hane cuinújan ta nahyu vëhë ne, cuma tséhë Nina, hacuaaha cojo yëjë ni nahyu xi vaquí jan ne, hacuaaha tséhë Nina. Hacuaaha sa xi cuinújan xi tyjama rë ngu ya ne, cuma tséhë Nina, hacuaaha hisca cojo tsja rë ya jan ne, hacuaaha tséhë Nina.

¹⁷ Hacuaaha sa xi xtisun ngujo tsja rë ngu ya olivu ndaja hane cuinduva tsja rë ngu ya olivu nguijná setahacoo cojo ya olivu ndaja jan ne, sehe xi cuatjin cuma ne, tsja rë ya olivu nguijná jan ne, hacuaaha sacú rë cjuahñu rë tyjama rë ya olivu ndaja jan. Ngayun xi xutaxín ngayun ne, sacuaaha tsja rë ya olivu nguijná má ngayun, xi casacu nuju cjuandaja rë Nina cahndë rë xuta tjë rë Israel xi sacuaaha tsja rë ya olivu ndaja má me. ¹⁸ Peru mijí rë xi nihñu yehe yojo nuju hane choho cuinújun tséhë xuta Israel ta, sa xi meje nihñu cuatjin ne, ninguitsjun ta hacuiin tsja rë ya xi tsvangui rë tyjama rë ta tyjama ne, vëhë tsvangui rë tsja rë ya.

¹⁹ Cuma cuinújun cojo ná cuitjin: “Peru catsitjungui Nina ngu jo xuta tjë rë Israel cojo sa xi ngahan ne, cuma tséhë Nina ngahan.” ²⁰ Cuatjin cuma cuinújun hane cjuaquixi cjua vëhë. Ngatsë rë xi camanguaaíncacun me cojo Jesucristu ne, vëhë xi catsitjungui Nina me. Hane ngayun ne, ngatsë ni rë xi camangutacun cojo Jesucristu ne, vëhë xi casacu nuju cahndë vë. Peru mijí rë xi nihñu jyë yojo nuju ta xi meje rë ne, rcun cuma hitsë. ²¹ Cuatjin meje rë ta, tséhë xi Nina ne, sa xi catsinchataain me xuta tjë rë Israel xi hatuxa xuta ladu rë me ne, hacuaaha tsinchataain nuju me. ²² Cahyun ni ne, Nina ne, jemu ndaja me peru hacuaaha jemu cjan rë me. Ngu ladu ne, jemu cjan rë me cojo xuta xi cavetjuxin me tséhë ndiya rë Nina. Hane ngu ladu nga ne, jemu ndaja Nina cojo nuju, sa xi cuangunxcun cojo cjuandaja rë me. Peru sa tsajin ne, cojo ngayun tsitjungui nuju me. ²³ Hane xuta tjë rë Israel xi cuacun jan ne, sa xi cuiyujuxín me xi manguaaíncacun me cojo Nina ne, sacú nga rë me cahndë rë me ta Nina ne, hatuxa cuma sua nga me cahndë vëhë. ²⁴ Ngayun xi xutaxín ngayun, hacuiin xuta ladu rë Nina ngayun titjun ne, peru Nina casahmi me ngayun xuta ladu rë me. Hane xi cuatjin sahmi me ne, hitsë sa chjaain sahmi me xi xuta tjë rë Israel ne, cuma nga me xuta ladu rë Nina ta, tséhë xi xuta tjë rë Israel ne, hatuxa xuta ladu rë Nina me titjun.

Cuetjutje xuta tjë rë Israel

²⁵ Ngayujun ni ne, meje ná xi cumachaya nuju ngu cjuaxi sehe casua Nina, cjuatahahma xi cjëë cumachaya naja. Meje ná xi cumachaya nuju cojo sa xi hacuiin nihñu yehe yojo nuju. Cjua xi cuichjá cojo nuju ne, cuitjin fi: jemu cjín xuta tjë rë Israel ne, vijñii rcu me cjuar rë Nina. Cuatjin cuijnii rcu me hisca hya xi yëjë xutaxín xi cavaxijin Nina ne, cuisehen me ndiya rë Nina. ²⁶ Sehe yëjë xuta tjë rë Israel ne, cuetjutje me tséhë jyë rë me sacuatjin camahindu xcun xujun rë Nina:

Ngajñi rë xuta tjë rë Israel ne, cuetjújñi ngu me xi cuaxëtje rë xuta, hane cuaxëxín me xcusun rë xuta xi tjë rë Jacob xi faharcuaain rë Nina.

²⁷ Hatuxa sahmechehen compromisu naha cojo xuta, hya xi cjuaháxen cjuatsehen rë me. Cuatjin cachja Nina.

²⁸ Ngu ladu ne, tsêhê xi catsitjungui xuta tjê rê Israel cjuandajyihi xi chja tsêhê Jesucristu ne, vêhê xi choho vêê Nina me, cojo sa xi ngayun xi xutaxín ngayun ne, satê nuju cjuandajyihi vêhê. Peru ngu ladu nga ne, tsêhê xi ha cavaxijin Nina me ne, vêhê xi Nina ne, hmucacun me xuta Israel jan, ngatsê rê xutachanga rê me. ²⁹ Cuatjin ta tsêhê xi hya xi vaxijin Nina ngu xuta cojo hya xi sua rê me cjuandaja ne, hatuxa sehe tsindeyaain Nina cjuatacun rê me. ³⁰ Ngayun xi má yun xutaxín, titjun ne, canuhyun tsêhê Nina. Peru quihndê ne, camayuma rê Nina ngayun ngatsê rê xi xuta tjê rê Israel ne, hacuaha vihndiin me tsêhê Nina. ³¹ Hacuanitjin rê xuta tjê rê Israel jan ta quihndê ne, hacuaha vihndiin me tsêhê Nina, cojo sa xi sacú rê me cjuayumatacun rê Nina ngatsê rê xi ngayun ne, casacu nuju cjuayumatacun rê Nina. ³² Nina ne, catsismicacun me yêjê ni xuta, cojo sa xi cuihndiin xuta tsêhê me, hane cojo sa xi hacuaha cumayuma rê me ngayêjê ni xuta.

³³ Nina ne, jercu jyihî cjuanchina xi tjin rê me, jercu jyihî cjuatacun xi vechutaha me, jercu vêê me. Maji vijnercun hacutjin tsingatahacacun me. Maji vijnercun hacutjin sahmi Nina. ³⁴ Sacuatjin chja xujun rê Nina ne: “Tsajin yo vêê cjuatacun rê Nina. Tsajin yo camá catsinguixi rê Nina cojo cjuatacun rê me. ³⁵ Tsajin yo xi cojo tjun sa ne, casua rê Nina ngu cjuatjo, cojo sa xi Nina ne, hatuxa sahmi ngojo me cjuatjo rê xuta jan.” Cuatjin chja xujun rê Nina. ³⁶ Yêjê ni xcusun xi tjin ne, Nina catsingatahacacun me sehe catsindaja me ta, tsêhê xi meje rê me xcusun xi cuacun vê. Meje rê xi nihña jyê nihña hnga Nina yêjê ni nu yêjê ni nixtin. Cuatjin jan.

12

Hacutjin meje rê xi cuiyuju xuta ladu rê Jesucristu

¹ Ngayujun ni ne, ngatsê rê yêjê ni xi sehe cachjá cojo nuju ne, vêhê xi meje ná xi ngundiyaxa ni tuhun yojo nuju cojo Nina sacuaha ngu cjuatjo, peru ngu cjuatjo xi quicun, ngu cjuatjo xi hatuxa tsêhê Nina, ngu cjuatjo xi chuya rê me. Cuatjin nihña ta, tsêhê xi Nina ne, jemu tjin rê me cjuayumatacun, hacuaha hatuxa ndatjin xi cuatjin chjahanrcun Nina. ² Miji rê xi cuangun tjengun ndiya rê xuta ngasunhndê vi ta cahndê rê vêhê ne, yêjê ni hora ne, tuhun cahndê xi Nina ne, tsindeya me ngayun xi sua nuju me ngu cjuatacun xatsê. Xi cuatjin ne, sacú nuju cjuaquixi mé xi meje rê Nina xi nihña, mé xi ndaja, mé xi chuya rê Nina, mé xi cjuaquixi.

³ Nina ne, casuaxa ná me xi cuichjá cojo xuta. Hane vêhê xi chjá cojo nuju ngayujun ni ta, miji rê xi jemu nihña yehe yojo nuju ta meje rê xi ningatuhuntacun hacutjin xi cjuaquixi, tu cutjin cjuandaja xi casua nuju Nina xi camá camangutacun jima ngu ngayun cojo Jesucristu. ⁴ Ha hyun ta yojo rê ngu xuta ne, tjin tsja, tjin ntsacu, tjin nguisin, tjin jingu sa xcusun tsêhê, peru hacuiin tangun xa xi sahmi yêjê xcusun xi cuacun vê. ⁵ Hacuanitjin naja ngayaan, handasa cjin má ngayaan ne, peru sacuaha ngu ni yojo má ngayaan hya xi tjin tangun cjuatacun naja cojo Jesucristu. Ngu ngu ngayaan ne, sacuaha ntsan má ngayaan ne, ngu ngu ngayaan ne, sacuaha ntsacu má ngayaan, ngu ngu ngayaan ne, sacuaha nguisen má ngayaan, peru ngu ni yojo má ngayaan.

⁶ Vêhê xi xa xi casacu naja jima ngu ngayaan ne, hacuiin tangun ta tu tjin cjuandaja xi casua naja Nina ne, hacuanitjin ni xa xi satê naja. Sa xi casua nuju Nina xa xi cuinújun cjuatacun rê me cojo xuta ne, tinújun, peru sacuatjin cojo ngahña xi tjin nuju xi mangutacún cojo Jesucristu ne, cuatjin tinújun.

⁷ Sa xi casua nuju Nina xa xi cuisecun rê jingusa xingueen ne, tiseacun rê me.

O sa xi casua nuju Nina xa xi cuicuyun cjuã rë me ne, ticuyun. ⁸ Sa xi casua nuju Nina xa xi tuhun rë jingu sa xingueen ngu ndiya ndajyihi ne, cuatjin nihñu. Sa xi casua nuju Nina xa xi cuisecun rë jingu sa xingueen cojo tujún xi ma chaja rë me ne, tisekun rë me cojo ngu xahasen tyjahi, cojo ngu cjuatacun tyjahi. Sa xi casua nuju Nina xa xi chjuhunnstun ngu xa xi satë nuju ne, nihñu xa jan nguñajatacun. Sa xi casua nuju Nina xa xi chjuhuncuendun xuma xingueen xi mé má rë me o mé cjuacjintacun xi tivatju me tijima ne, sehe chjuhuncuendun me cojo cjuasua.

⁹ Mijí rë xi jo xcun jo ntsuvun xi nihmutacún xingu xingu xingueen. Catamachohotacun cojo ndiya rë cjuatsehen, hane tuhun yojo nuju cojo ndiya rë cjuandaja. ¹⁰ Nihmutacun xingun sacuatjin nihñu hmu tacún tsuhun jain. Hacuaha chjuhunrcun xingun sacuaaha xi me vëhë xi hitsë sa ma titjun me tsujun. ¹¹ Chjuhuncuendun nguñajatacun cuidadu nuju, hacuiin nihñu tsëhë. Meje rë xi sacuaaha xi quisechun ngayun xi tisecuun nihñu xa rë Nai naja.

¹² Tuhun cjuasua xahasen nuju ngatsë rë xi Nina vetuhun tacun me. Caticaa nuju yëjë ni cjuañihi xi vatjun má. Hacuaha yëjë ni hora ne, nihñu oraciún nuju cojo Nina.

¹³ Tisekun rë xuta ladu rë Nina hya xi tjín rë me cjuachaja. Hacuaha cojo cjuandaja chjuhunnstun xuta ngu nangui hya xi fehe me ndya nuju.

¹⁴ Chjahyun cjuandaja rë Nina xi cuma rë xuta xi tsujihiyatjengui nuju me cojo cjuahngatacun. Hacuiin chjahyun ngu cjuaxti xi cuma rë me ta ngu cjuandaja chjahyun.

¹⁵ Tuhun cjuasua xahasen nuju cojo xuta xi sua rë me, hane xuta xi jihnda me ne, hacuaaha chjihndun cojo rë me. Xi cuatjin nihñu ne, tsejen xi hmutacún jain me.

¹⁶ Nihñu tangun cjuatacun nuju cojo xingun xingu xingu ngayun. Hacuiin nihñu yehe yojo nuju ta xi meje rë ne, nihñu tangun cojo, handasa xuta xi yuma cjuatacun rë. Hacuaha hacuiin nihñu sacuaaha xi jercu vechutaha cjuatacun nuju.

¹⁷ Mijí rë xi nicuyun ngu cjuachan xi casahmi xuta cojo nuju ta xi meje rë ne, nihñu ngujoyë xi nihñu cjuandaja xcun yëjë ni xuta. ¹⁸ Sa xi cuma ne, nihñu ngujoyë hisca hiscan vechu cjuatacun nuju, cojo sa xi cuma cuinechun ngu cjuandaja ngu cjuajeya cojo yëjë ni xuta. ¹⁹ Cuichjá cojo nuju sacuaaha xi quihndi naha ngayun: xicanihñundujun suvun ngu cjuahngatacun xi sahmi xuta cojo nuju ta tuhun cahndë xi Nina ne, cuma cjan rë me cojo xuta xi casahmi jan. Ta Nina ne, cachja me xcun xujun rë me cuitjin: “Ngahan satë ná xi sahme ngojo cojo xuta tsehen; hatuxa ngahan sahme ngojo.” Cuatjin chja Nai naja. ²⁰ Nihñu sacuatjin chja xujun rë Nina xi chja cuitjin: “Xuta xi choho vëë ri me ne, sa xi vojo rë me ne, tehe xi sinë me; hacuaaha sa xi xinda rë me ne, tehe xi cuihi me; sa xi cuatjin nihñi cjuandaja vëhë ne, nihñi xi cuma sava rë me.” Cuatjin chja xcun xujun rë Nina. ²¹ Xicatuun cahndë xi cjuatsehen ne, tsinguetsun rë cjuatacun nuju. Cahndë rë vëhë ne, cojo cjuandaja xi nihñu ne, ninguetsun cjuatsehen.

13

Hacutjin cuinuhyan tsëhë xutaxa rë

¹ Meje rë xi ngayejen ni ne, cuinuhyan tsëhë xutaxa rë ta, tsëhë xi tsajin xutaxa rë xi vuyuju me sa xi suaain Nina cahndë cuiyuju me. Hane xutaxa rë xi siu ne, cuatjin siu me ta, tsëhë xi casuaxa Nina me. ² Vëhë xi xuta xi sahmi condra me xutaxa rë ne, sahmi me condra cjuã xi Nina cavitexa

me. Hacuaha xuta xi cuatjin sahmi condra ne, sacú rë me ngu castigu. ³ Xuta xi sahmi cjuandaja ne, hacuiin tsacjun me xutaxa rë ta xuta xi sahmi cjuatsehen ne, me vëhë xi tsacjun me. ¿Há meje nuju xi tsajin mé rcun xutaxa rë? Nihñu cjuandaja, sehe xutaxa rë ne, cuaxëndaja me ngayun. ⁴ Cuatjin sahmi xutaxa rë ta, tsëhë xi casuaxa Nina me xi cuisecoo nuju me. Peru sa xi nihñu cjuatsehen ne, meje rë xi rcun xutaxa rë ta, tsëhë xi hacuiin tu mahya xi yaha me xa xi sahmi me castigu ta, tsëhë xi casuaxa Nina me xi sahmi me castigu xuta xi hatuxa sahmi cjuatsehen. ⁵ Vëhë xi meje rë xi cuinuhyan tsëhë xutaxa rë, hacuiin suvá ni ngatsë rë castigu xi cuatjun cuma ta hacuaha cojo ngatsë rë xi cojo cjuatacun naja ne, ha hyan ta ndatjin xi cuatjin nuhyan tsëhë me.

⁶ Hacuaha vëhë xi vechjun tujúnsa nuju ta, tsëhë xi hatuxa Nina caviyuju rë me xi fahacuenda me cjuacjintacun vë. ⁷ Tuhun rë jima ngu xutaxa rë xi satë rë me. Me xi faha tujúnsa ne, techjun cojo rë me; me xi faha tujún tsëhë xi xteña ne, hacuaha techjun cojo rë me. Cuatjin tinuhyan tsëhë me xi satë rë xi cuinuhyan tsëhë, hacuanitjin chjuhunrcun me xi satë rë xi chjahanrcun.

Cjuahmutacun ne, vëhë sahmicihin sacuatjin vitexa ley rë Nina

⁸ Mijí rë xi yëjë ni nixtin quitjun tsëhë xuta, ta ngu ni xcusun xi hatuxa quitjen ne, xi nihña hmu tacun xingueen. Cuatjin ta, yo xi sahmi hmu cacun rë xuta ne, ha cojo vëhë ni ne, sahmicihin sacuatjin chja ley rë Moisés. ⁹ Ley vëhë ne, cuitjin chja: “Xicanindesuun cojo rë ngu chjuun o cojo rë ngu xihin xi hacuiin tsujun, xicanicuun xuta, xicanihñuu cjuachëjë, xicanimuju ngu xcusun xi hacuiin tsujun.” Cjua vëhë cojo yëjë sa cjua xi chja ley jan ne, cuitjin vijne: “Meje rë xi nihñu hmu tacún xuta sacuatjin nihñu hmu tacún suvun yojo nuju.” ¹⁰ Cuatjin chja ley ta, ngu xuta xi tjin rë me cjuahmutacun ne, hacuiin choho sahmi me cojo xuta. Vëhë xi hya xi nihña hmu tacun xuta ne, ha nihñachehen sacuatjin chja ley xi cavitexa Nina.

¹¹ Cuatjin meje rë xi nihñu ta, tsëhë xi ha hyun ta ha cavechú nixtin xi ningascun rë cjuatacun nuju ta, tsëhë xi nixtin xi cuetjutjen tsëhë jyë naja ne, hacuiin cjín sa tacun, sacuatjin hya xi sehe tu camangutacun cojo cjua xi chja tsëhë Jesucristu. ¹² Sacuaha xi nixten ne, ha tivatju, hane meje sahasen. Vëhë xi meje rë xi cuejñaxen xcusun xi má nixten, hane cuetseen nihña xcusun xi má nguinxitin. ¹³ Meje rë xi cuetseen nihña cjuandaja, sacuatjin meje rë xi nihña hya xi tujyehenyan nguinxitin. Mijí rë xi nihña cjuachihí, mijí rë xi va má ngayaan nechan sacuaha xi cheen hya xi tinihña ngu suhí, mijí rë xi nihña cjuachini, mijí rë xi nihña cjuatsehen cojo jingu sa yachjin, o sa xi hisca cojo jingu sa xihin, mijí rë xi chicjanyan tu mé ni xcusun, mijí rë xi nihña cjuaxintacun. ¹⁴ Peru nihñu tangun cjuatacun nuju cojo Nai naja Jesucristu, hane ha quihndë mijí rë xi ningatuhuntacun xi nihñu yëjë ni hacutjin fehya yojo jyë nuju.

14

Mijí rë xi cuinújantahan xingueen

¹ Sacuaha ngu xuta ladu rë Jesucristu xi cjëë ndaja cuijnercu me yëjë ni cjuachacun xi macjain naja ne, tuhun cahndë xi cuisehen me ladu nuju, peru hacuiin xi chicjun cojo me ngajñi rë cjuavisiajmi nuju cojo rë me. ² Cuichjá cojo nuju ngu cjua. Yahnga xuta xi ndaja vijne rcu me cjuachacun naja ne, jinë me tu mé ni xcusun comida. Peru yahnga me xi cjëë ndaja cuijne rcu me ne, ndeya ni jinë me. ³ Peru xuta xi jinë me yëjë ni xcusun ne, mijí rë xi sahmi xta me cojo xuta xi jinii yëjë ni xcusun. Hacuaha xuta xi jinii me yëjë

ni xcusun ne, mijí rë xi cuichjataha me xuta xi jinë yějë ni xcusun ta, tséhë xi ha cafahatsja Nina xuta jan. ⁴ Cuma cuinújin: ¿mé cuenda nuju ngayun xi nújuntuhun rë mosu rë jingu sa xuta ni? Nai rë mosu jan ne, me vëhé cuichja me há ndaja há ndajin xa casahmi mosu rë me. Hane xuta ladu rë Nai naja jan ne, hatuxa cuetju ndaja me ta, tséhë xi Nai naja ne, ma sahmi me xi cuetju ndaja xuta ladu rë me.

⁵ Cuichjá nga cojo nuju ngu cjua. Yahnga xuta ne, tjin ni nixtin xi jemu faharcun me. Hane yahnga me ne, tangun yějë ni nixtin xi cuma rë me. Meje rë xi jima ngu xuta ne, catamangucacun me cojo cjuatacun rë suvá me hacutjin meje sahmi me. ⁶ Me xi faharcun nixtin jan ne, hacuaha faharcun me Nai naja xi faharcun me nixtin hya. Hane me xi jinë yějë ni xcusun comida ne, faharcun me Nai naja xi cuatjin jinë me ta, tséhë xi sua me nacuechji rë Nina. Hane me xi jinü yějë xcusun comida ne, hacuaha faharcun me Nai naja xi cuatjin jinü me ta hacuaha sua me nacuechji rë Nina.

⁷ Hisca ngu ngayaan ne, hacuiin nechan cjuahñu ngatsë rë cjuatacun naja suvaan, hacuaha hacuiin cueyan ngatsë rë cjuatacun naja suvaan ta, ⁸ sa xi nechan cjuahñu ne, nechan ngatsë rë Nai naja, o sa xi cueyan ne, cueyan ngatsë rë Nai naja. Vëhé xi hatuxa tséhë Nai naja ngayaan ne, sa xi cuinechan cjuahñu o sa xi cueyan. ⁹ Jesucristu ne, cahme me sehe cavuya nga me cjuahñu cojo sa xi cuma me Nai rë nima cojo Nai rë xuta xi siu quicun me.

¹⁰ Vëhé xi tsajin mé tséhë xi cuatjin nújantahan rë xingueen, tsajin mé tséhë xi cuatjin nihña xta cojo xingueen ta, tséhë xi ngayejen ni ne, hatuxa tjin xi cuehun xcun Nina ne, xi tsichuva me ngayaan cojo cjuatacun naja.

¹¹ Cuitjin camahindu xcun xujun rë Nina cjua xi cachja me:

Tu tjin xi cjuaquixi xi tejña ngahan ne,

hacuanitjin ni tjin cjuaquixi cuechú nixtin xi yějë ni xuta ne, cuinduva cuixcuhnchi me xcun,

hacuaha yějë ni xuta ne, cuichja me ta ngahan xi Nina ngahan.

Cuatjin cachja Nina.

¹² Ngajan xi jima ngu jima ngu ngayaan ne, taancuendan rë Nina xcusun xi canihña.

Mijí rë xi tahan cahndë xi cjuinenguíya xingueen ngajñi rë cjuatsehen

¹³ Vëhé xi ha quihndë mijí rë xi nichuvan xingueen cojo cjuatacun rë. Xi meje rë ne, xi cuejñangutacun xi tsajin nixtin xi nihña ngu xcusun xi sahmi xi cjuinenguíya xingueen ngajñi rë cjuatsehen. ¹⁴ Ngahan ne, tjin tangun cjuatacun naha cojo Nai naja Jesús. Hane ha hvë, hacuaha camangucacun ta tsajin hisca ngu xcusun comida xi hatuxa tsavi xi xinëë. Peru sa xi ngu xuta tsingatahacacun me xi tsavi vihi o tsavi vëhé xi xinëë ne, xi cuma rë suvá me vëhé xi tsavi. ¹⁵ Sa xi cuetsun cjuatacun rë xingun ngatsë rë ngu xcusun xi scuëë me xi xinu ne, ha quihndë tsajin nechunyun ndiya rë cjuahmutacun. Mijí rë xi ninguetun cjuatacun rë xingun ngatsë rë ngu xcusun xi chinu ta, Jesucristu ne, cahme me ngatsë rë me vëhé. ¹⁶ Vëhé xi xicatuun cahndë xi choho cuichja xuta tséhë xcusun xi ndaja xi nihñu ta, ¹⁷ tséhë xi hya xi nechan ngahma gobiernu rë Nina ne, cuendaan rë tséhë tu mé ni xcusun xi chinë o sa xi hyun. Xi sahmi nguýë ne, xi tjin naja ngu xahasen tyjahi, ngu cjuajeya, ngu cjuasua xi sua naja Hasen rë Nina. ¹⁸ Xuta xi cuatjin sahmi me xa rë Jesucristu chuya vëhé ne, hatuxa chuya rë Nina tséhë rë, hacuaha ndaja cuichja xuta tséhë me.

¹⁹ Vêhê xi cuanguen tjenguen ndiya rê cjuajeya, hacuaha cuisecoon xingueen cojo sa xi cuma jyê sa cjuandaja rê Nina cahntsua xahasen naja xingu xingu ngayaan. ²⁰ Cjuandaja xi casahmi Nina cojo xingueen ne, miji rê xi nguetsun ngayaan ngatsê rê xcusun xi chinê. Xi cjuaquixi ne, yêjê ni xcusun comida ne, ndatjin xi xinê. Peru ndajintjin xi xinê ngu xcusun sa xi vêhê sahmi xi cuixuya ngu xingueen ngajñi rê cjuatsehen. ²¹ Xi ndatjin ne, hacuiin xinê yojo, hacuiin siuhun xan, hacuiin nihña tu mé ni xcusun xi sahmi xi cuixuya ngu xingueen ngajñi rê cjuatsehen. ²² Cjua xi ha macjain nuju ne, catamacjain sa nuju, peru tetjún cjua jan cahntsua cjuatacun nuju suvun cojo sa xi suvá ni Nina vêê me. Jemu ndaja tsêhê xuta xi cjuatacun rê me ne, vinchaainjyê rê me tsêhê cjua xi macjain rê me. ²³ Peru sacuaha ngu xuta xi mangu majo cacun me tsêhê ngu xcusun xi cajinê me ne, quitjen me jyê xi cuatjin cajinê me ta, tsêhê xi hacuiin ngatsê rê xi mangucacun me cojo Jesucristu ne, vêhê xi cajinê me ta mangu majo cacun me xi cajinê me. Hya xi hacuiin ngatsê rê xi mangutacun cojo Jesucristu xi nihña ngu xcusun xi nihña ne, hatuxa quitjen jyê.

15

Meje rê xi nihña xcusun xi chuya rê xingueen

¹ Sacuaha ngayaan xi ndaja vijne rcun cjuatacun xi macjain naja ne, meje rê xi niyentacun, meje rê xi cuisecoon rê xingueen xi cjêê ndaja cuijne rcu me yêjê ni cjuachacun vêhê. Miji rê xi nihña sa xcusun xi chuya naja suvaan ni. ² Jima ngu ngayaan ne, meje rê xi nihña xcusun xi chuya rê xingueen, cojo sa xi hacuaha cojo me ndaja tsêhê me, cojo sa xi cuma jyê sa cjuandaja rê Nina cahntsua xahasen rê me. ³ Hisca Jesucristu ne, hacuiin casahmi me tu cutjin xi cachuya rê suvá me, sacuatjin cjua xi camahindu xcun xujun rê Nina hiscan xi cachja ngu xuta cojo Nina cuitjin: “Cjua xi cachja xuta xi choho cachja tsujun ne, ngahan choho cachja me tsahan.” Cuatjin camahindu. ⁴ Yêjê ni cjua xi camahindu xcun xujun rê Nina hatsêê nixtin ne, cuatjin camahindu cojo sa xi sacú naja cjuatacun. Hacuaha camahindu cojo sa xi scaa naja hacuaha sacú naja cjuetacun, sehe hitsê sa ndaja cuetahan tacun Nina. ⁵ Nina xi sahmi xi caa naja, Nina xi sua naja cjuetacun ne, catisua nuju me ngu cjuatacun xi cumatangun cjuatacun nuju cojo xingun xi tjengun ndiya rê Jesucristu. ⁶ Catisua nuju Nina cjuatacun vêhê, cojo sa xi ngayujun ni ne, ngu tangun cuma cjuatacun nuju xi nihñu jyê nihñu hnga Nina Nahmi rê Nai naja Jesucristu.

⁷ Vêhê xi meje rê xi hatuxa chjuhunntsun xingun xingu xingu ngayun sacuatjin cafahatsja naja Jesucristu, cojo sa xi cuma jyê cuma hnga Nina cojo Hasen rê me. ⁸ Chjá cojo nuju ta Jesucristu ne, canduva me xi cuisecoo me ngayun xuta tjê rê Israel. Hane cuatjin sahmichihin Jesucristu cjua xi cachja Nina cojo xutachanga niji. Canduva me xi tsingacun niji me xi Nina ne, hatuxa quixi me cojo cjua xi chja me. ⁹ Hacuaha canduva me cojo sa xi xutaxín ne, sahmi jyê sahmi hnga me Nina ngatsê rê cjuandaja rê Nina. Camahindu xcun xujun rê Nina cuitjin:

Ngahan ne, sahme jyê sahme hnga nuju ngajñi rê xutaxín, hacuaha hisca sê tsujun.

Cuatjin camahindu.

¹⁰ Hacuaha chja nga ngu cahndê cuitjin:

Ngayun xi xutaxín ngayun ne, hacuaha tuhun cjuasua xahasen nuju cojo xuta rê Nina.

Cuatjin chja.

¹¹ Hacuaha chja nga cuitjin:

Ngayun xi xutaxín ngayun, nihñu jyë nihñu hnga Nina.
Ngayejen ni xuta ngasunhdë ne, meje rë xi nihña jyë nihña hnga Nina.
Cuatjin chja.

¹² Hacuaha catsihindu Isaías xcun xujun rë Nina cuitjin:

Cuetjucun ngu xuta, tjë rë Isai,
hane cuma titjun me tsëhë yëjë ni xutaxín.
Hane xutaxín jan ne, cuetahacacun me xuta jan.
Cuatjin catsihindu Isaías.

¹³ Nina, me xi sahmi xi ma vetahantacun Nina ne, catisua nuju me cjuasua cojo cjuajeya, ngayujun xi tjin ngu tacún cojo rë Jesucristu, cojo sa xi Hasen rë Nina ne, sua nuju ngahñu xi ndaja cuetuhun tacún Nina.

Sua Pablo machaya rë xuta hacutjin sahmi me xa

¹⁴ Ngayujun ni matsejen ne, ha hvë cojo cjuatacun naha ta ngayun ne, quitsë rë xahasen nuju cojo cjuandaja, ha jemu vechú cjuatacun nuju, hacuaha ma ninguixun cjuatacun rë xingun xingu xingu ngayun. ¹⁵ Ngahan ne, cavetjucácun catsihindu nuju ngu jo cjuá vëhë ta, tsëhë xi mijí ná xi chaya nuju cjuá jan. Cuatjin catsihindu nuju ngatsë rë cjuandaja xi casua ná Nina, ¹⁶ xi sahme xa rë Jesucristu ngajñi rë xutaxín. Tisahme xa sacuaha ngu nahmi, xi tisuá jimachaya rë xutaxín cjuandajyihí xi catsingatju Nina. Cuatjin sahme cojo sa xi cuma suá rë Nina ngu cjuatjo xi chuya rë me. Cjuatjo vëhë ne, hacui xutaxín, xi ha Hasen rë Nina cavaxëxin rë me xi cuma tyjahi cjuatacun rë me xcun Nina.

¹⁷ Vëhë xi ngahan, xi tjin tangun cjuatacun naha cojo Jesucristu ne, ma vaxëndaja hitsë yojo naha tsëhë xa rë Nina xi tisahme. ¹⁸ Vetjiincácun xi cuichjá cojo nuju tu mé ni cjuá ta, suvá ni cjuá tsëhë hacutjin cjuatacun xi casua ná Jesucristu xi cachjá cojo xi casahme, cojo sa xi xutaxín ne, cavihndë me tsëhë Nina. ¹⁹ Cuatjin camá ta, tsëhë xi cojo Hasen rë Nina ne, jemu camá cjuarcun. Cuatjin xi ngahan ne, ha chichihin casuá camachaya rë xuta cjuandajyihí xi chja tsëhë Jesucristu, cavëtsehen hisca Jerusalén ne, cavéchu hisca hiscan ladu xi hmí Iliria. ²⁰ Hatuxa casahme ngahñu xi casuá camachaya rë xuta cjuandajyihí jan hiscan xi cjëë camahani cumachaya rë xuta yo xi Jesucristu, cojo sa xi hacuiin hiscan xi tacunvasen xa xi jingu sa casahmi ne, ngajan cjuë sahmejyë. ²¹ Casahme sacuatjin camahindu xcun xujun rë Nina hiscan xi chja cuitjin:
Xuta xi cjëë cumachaya rë me tsëhë me ne, cumachaya rë me;
hacuaha xuta xi cjëë cuihdë me ne, cuijnercu me.
Cuatjin camahindu.

Vejnã Pablo xi cjuë me Roma

²² Ngatsë rë vëhë xi casacuiin camahani ná cahndë xi cjuë tjëngë nuju.
²³ Peru quihndë xi cajnetaha xa xi sahme ladu vihi, hacuaha jemu hatsëë xi meje cjuë tjëngë nuju ne, ²⁴ meje scusehenya nuju xi cuátju nangui nuju hya xi cjuë ngajan nación xi hmí España. Hane nixtin xi cuitejñataha hitsë cojo nuju ne, meje ná xi cuisecon ná hitsë xi cjuë hisca España. ²⁵ Peru ndicumaha ni ne, cjuë nandya Jerusalén, xi cuisécoo rë xuta ladu rë Nina jan ta, ²⁶ tsëhë xi xuta ladu rë Nina ngajan estadu Macedonia cojo xuta ladu rë Nina nguehe estadu Acaya ne, ndaja catsingatahacacun me xi tsingatju me ngu cjuandaja xi cuma ré xuta yuma xi siu ngajñi rë xuta ladu rë Nina ngajan Jerusalén. ²⁷ Ndatjin xi cuatjin catsingatahacacun xuta xi cuacun vë ta, tsëhë

xi sacuaha xi quitjen me tsëhë xuta nangui Israel. Tsëhë xi xutaxín ne, casatë rë me cjuandajyihi xi casua Nina camachaya rë xuta tjë rë Israel, vëhë xi hacuaha satë rë me xi cuisecoo me xuta nangui Israel tsë tsë tujún xi tjin rë me. ²⁸ Ngajan xi hya xi ha casahmechehen cjuacjintacun vëhë hacuaha ha casahme entregadu tujún jan ne, ²⁹ sehe cuëtju cjuë España. Hane xi cuátju nangui nuju ne, cjuë scusehenya nuju. Hacuaha hvë ta jemu sua naja Jesucristu cjuandaja rë me hya xi cjuë tjëngë nuju.

³⁰ Ngayujun ni matsejen ne, ngatsë rë xi tjin tangun cjuatacun nuju cojo Nai naja Jesucristu hacuaha ngatsë rë cjuahmutacun xi sua nuju Hasen rë Nina ne, vëhë xi féhya nuju xi nihñu tangun cjuatacun nuju cojo ná, hane chjahyun rë Nina cjuandaja rë me xi cuma ná. ³¹ Cuatjín nihñu ngatsë naha, cojo sa xi cuaxëtje ná Nina tsëhë xuta xi vihndiin me tsëhë Nina ngajan Judea. Hacuaha chjahyun rë Nina cjuandaja xi cuma ná cojo sa xi hya xi cjuëcane tujún ngajan Jerusalén ne, chuya rë xuta ladu rë Nina xi cuatjín sahme. ³² Cuatjín chjahyun rë Nina cojo sa xi, sa meje rë me ne, cuma cjuëtjëngë nuju cojo cjuasua hacuaha cuitejñajenda hitsë cojo nuju xi cuéchutaha nuju. ³³ Nina, me xi sua naja cjuandaja cjuajeya ne, catsicoo nuju me ngayujun ni. Cuatjín jain.

16

Tsingatju Pablo nina rë me

¹ Nguehe cuichjá cojo nuju ta na Febe xingueen ne, jemu xuta ndaja na. Casatë rë na xa xi visecoo na xuta ladu rë Jesucristu xi ma tangun me nguehe nandya Cencrea. ² Vëhë xi chjá cojo nuju ta, chjuhunnstun na sacuatjín xi meje rë xi nihña ngayaan xi ladu rë Nina ngayaan. Chjuhunnstun na ta, tsëhë xi na vëhë ne, hacuaha tjin tangun cjuatacun rë na cojo Nai naja. Hacuaha tiseacun rë na tu mé ni xcusun xi cuma meje rë na ta, tsëhë xi na vëhë ne, jemu cjin xingueen xi cavisecoo na. Hacuaha hisca ngahan ne, jemu cavisecoo na ngahan.

³ Tuhun nina naha na Priscila cojo cha Aquila xihin rë na. Xuta xi cuacun vë ne, jemu sahmi me xa rë Jesucristu sacuatjín sahme ngahan, ⁴ hacuaha hisca caviyujutaha tsavi me yojo rë me xi cavaxëtje ná me. Vëhë xi jemu suá nacuechji rë Nina. Hacuaha hacuain ngahan suva ni ta cojo yëjë xutaxín xi matangun me tsëhë xi camá me ladu rë Jesucristu ne, hacuaha sua me nacuechji rë Nina. ⁵ Hacuaha tuhun nina naha yëjë xuta ladu rë Jesucristu xi matangun me ndava na Priscila cojo cha Aquila. Hacuaha ngu cha xi jemu vinga ná ne, cha Epeneto ne, tuhun rë cha nina naha. Cha vëhë xi tjun tjun camangucacun cha cojo Jesucristu ngajan estadu Asia. ⁶ Hacuaha tuhun nina naha na María, na xi jemu cavisecoo nuju jan. ⁷ Hacuaha tuhun nina naha Andrónico cojo Junias xingueen, me xi cavitejñaya tangun cojo ndavaya jan. Me vëhë ne, jemu jyë hnga me cojo cjuatacun rë me ngajñi rë yëjë ni apóstol, hacuaha hitsë sa tjun me cavisehen me ladu rë Jesucristu xi cuma ná ngahan. ⁸ Tuhun nina naha cha Amplias, cha xi jemu vinga ná, tsëhë xi tjin tangun cjuatacun niji cojo Nai naja. ⁹ Tuhun nina naha cha Urbano, cha xi jemu sahmi xa rë Jesucristu sacuatjín tiniña ngayaan. Hacuaha tuhun nina naha cha Estaquis, cha xi jemu vinga ná jan. ¹⁰ Tuhun nina naha cha Apeles, cha xi suvá tsejen xi jemu ndaja tjin tangun cjuatacun rë cojo Jesucristu. Hacuaha tuhun nina naha yëjë ni xuta rë cha Aristóbulo.

¹¹ Tuhun nina naha cha Herodián xingueen. Tuhun nina naha yějě xuta rě Narciso, me xi hacuaha tjin tangun cjuatacun rě cojo Nai naja. ¹² Tuhun nina naha na Trifena cojo na Trifosa, na xi jemu sahmi xa rě Nai naja. Tuhun nina naha na Pérsida, na xi jemu vinga naja jan. Na vėhė ne, hacuaha jemu casahmi na xa rě Nai naja. ¹³ Tuhun nina naha cha Rufo, cha xi cavaxijin Nina xi tjin tangun cjuatacun rě cojo Nai naja. Hacuaha tuhun ngu nina naha cojo naa rě cha ta, me vėhė ne, sacuaha naa naha me. ¹⁴ Tuhun nina naha cha Asíncrito, cha Flegonte, cha Hermas, cha Patrobas, cha Hermes, hacuaha cojo sa yějě xingueen xi siu me cojo cha xi cuacun vė. ¹⁵ Tuhun nina naha cha Filólogo, na Julia, cha Nereo cojo na tichja cha, cha Olimpas, hacuaha cojo sa yějě xuta ladu rě Nina xi siu me cojo me xi cuacun vė.

¹⁶ Tuhun rě xingun nina, cojo cjuandaja cojo cjuahmutacun cuitatsuhun xingun, sacuatjın xcusun naja. Yějě xuta ladu rě Jesucristu ne, hacuaha tsingatju me nina nuju.

Ngu nga conseju xi sua Pablo

¹⁷ Ngayujun ni ne, cuichjá cojo nuju ta meje rě xi chuhuncuendun yo xuta xi sahmi xi chicjun cojo xingun, yo xuta xi sahmi xi cjuinenguiya ngu xingueen ngajñi rě cjuatsehen ta, tsėhė xi xcusun xi sahmi me ne, sahmi condra rě cjuachacun xi ha cachutayun. Naxunxun yojo nuju tsėhė xuta xi cuacun vė ta, ¹⁸ tsėhė xi vihndiin me tsėhė Nai naja Jesucristu ta xi meje ni rě xahasen rě suvá me ne, vėhė ni xi vihndė me tsėhė. Hane cojo cjuahaxi xi visiajmi me ne, vindacha me xuta xi hvín ndiya rě cjuatsehen. ¹⁹ Yějě ni xuta ne, ha machaya rě me cjua tsėhė hacutjın xi ngayujun ni ne, jemu ndaja nuhyun tsėhė Nai naja. Vėhė xi jemu ndama ná. Jemu meje ná xi cuechutaha sa cjuatacun nuju, peru xi nihñu cjuandaja. Hane cjuatsehen ne, meje ná xi sacuaha xi hyuun ndiya rě. ²⁰ Hane cuechú nixtin xi Nina, me xi sua naja cjuandaja cjuajeya ne, ngutjen cuatėcja me cjuatsehen xi sahmi Satanás ngajñi nuju. Cjuandaja rě Nai naja Jesús ne, catisehen cahntsi jan xahasen nuju.

Jingusa me tsingatju me nina rě me

²¹ Cha Timoteo, cha xi sahmi tangun cojo ná xa rě Jesucristu ne, tsingatju cha nina nuju. Cojo cha Lucio, cha Jasón, cojo cha Sosípater xingueen ne, hacuaha tsingatju cha nina nuju.

²² Ngahan, Tercio, xi titsihindu cjua rě Pablo xcun xujun vihi ne, hacuaha tsingátju nina nuju ngayujun ni xi tjin tangun cjuatacun nuju cojo Nai naja.

²³ Cha Gayo, cha xi casua ndava xi tejña ngahan ne, hacuaha sua cha ndava cha xi ma tangun yějě ni xuta ladu rě Jesucristu ne, tsingatju cha nina nuju. Cha Erasto, cha xi má tesorero tsėhė nandya vihi ne, tsingatju cha nina nuju. Cha Cuarto xingueen ne, hacuaha tsingatju cha nina nuju.

Pablo ne, vaxėndaja me Nina

²⁴ Cjuandaja rě Nai naja Jesucristu ne, catama tsujun ngayujun ni. Cuatjın jain. ²⁵ Tahan nacuechji rě Nina ta, Nina ne, ma sahmi me xi viyuju cahndė cjuatacun nuju cojo cjuandajyihi xi chja tsėhė Jesucristu, cjuandajyihi xi ngahan cojo jingu sa apóstol ne, tihín machaya rě xuta. Cjuandajyihi vėhė ne, hacui ngu cjua xi jiyahma hisca hya xi cjėė cumandaja ngasunhndė. ²⁶ Peru hisca quihndė casua Nina camachaya naja cjuandajyihi jan, quihndė xi casahmi me xi profeta ne, camá catsihindu cjua rě me. Hane Nina xi tsajın nu tsajın nixtin cjuė me ne, ngatsė rě xi cuatjın cavitexa me ne, vėhė xi

camachaya rë xuta tsëhë yëjë ni nación yëjë ni ladu cjuandajyihî vëhë, cojo sa xi yëjë ni xuta ne, cumangucacun me hacuaha cuihndë me tsëhë Nina.

²⁷ Ngu ni Nina xi vëë yëjë ni cjuatacun ne, nihña jyë nihña hnga me yëjë nu yëjë nixtin ngatsë rë Jesucristu. Cuatjin jain.

Carta xi tjuntjun catsihindu San Pablo xi cafhatsja xuta nandya Corinto

¹ Ngahan Pablo ne, casuaxa ná Jesucristu xi má ngahan apóstol tsêhê me, tsêhê xi cuatjin xi meje rê Nina. Hane ngahan cojo cha Sóstenes xingueen ne, ² ningatjin ngu xujun vi tsujun, ngayujun ni xuta Corinto xi hacuaha xuta ladu rê Nina ngayun, ngayun xi cavaxijin Nina ngayun, tsêhê xi tjin tyjahi cjuatacun nuju cojo Jesucristu. Hacuaha ningatjin xujun vihi tsêhê yêjê xuta xi faharcun me Nai naja Jesucristu jinguyê ni cahndê. Jesucristu jan ne, Nai rê xuta xi cuacun vêhê me, hacuaha Nai naja ngayaan me. ³ Nina Nahmi naja cojo Nai naja Jesucristu ne, catisua nuju me cjuandaja cjuajeya.

Ximinchacun xi casua Jesucristu

⁴ Yasen ni suá nacuechji rê Nina ngatsê nuju ngayujun ni cojo ngatsê rê cjuandaja rê Nina xi casua nuju me quihndê xi tjin tangun cjuatacun nuju cojo Jesucristu. ⁵ Suá nacuechji rê Nina ta, quihndê xi tjin tangun cjuatacun nuju cojo Jesucristu ne, casua nuju Nina yêjê ni. Casua nuju me chuva rê hacutjin ndaja cuinújun hacuaha ndaja cuijnercun cjuarê me. ⁶ Cjuandajiyi xi chja tsêhê Jesucristu ne, jemu ndaja cavisehen cahntsua xahasen nuju. ⁷ Vêhê xi ngayun ne, tsajin ngu cjuandaja rê Nina xi machaja nuju, jinguyêjê rê xi cuinechunyun rê nixtin xi cumatsejen nga Nai naja Jesucristu. ⁸ Cuisecoo nuju Nina xi cuejñu hñu cjuatacun nuju jinguyêjê rê xi nechun cjuahñu, cojo sa xi ngayun ne, tsajin mé jyê tjin nuju nixtin hya xi cuya nga Nai naja Jesucristu. ⁹ Nina ne, hatuxa sahmichihin me yêjê cjuarê xi chja me, hacuaha me vêhê xi cavaxijin nuju me xi nihñu tangun cjuatacun nuju cojo Quihndi rê me, Nai naja Jesucristu.

Hacuiin ngu tangun ni siu cjuatacun rê xuta rê yungun

¹⁰ Ngatsê rê xi casuaxa ná Nai naja Jesucristu ne, cuichjá cojo nuju ta meje ná xi ngu tangun ni cjuarê cuinújun ngayujun ni, hacuiin xi cuisecjun cjuarê nuju. Nihñu tangun cjuatacun nuju cojo xingun. ¹¹ Cuatjin chjá cojo nuju ta, tsêhê xi xuta rê Cloé ne, casua me camachaya ná xi tjin si ngajñi nuju cojo xingun. ¹² Cuma cuinújan ne, ngujo ngayun ne, nújun cuitjin: “Ladu rê Pablo ngayin”; hane ngujo nga ngayun ne: “Ladu rê Apolos ngayin”; hane ngujo nga ngayun ne: “Ladu rê Pedru ngayin”; hane ngujo nga ngayun ne: “Ladu rê Cristu ngayin.” Cuatjin nújun. ¹³ Peru ¿há tjin jo jyan Cristu? ¿Há Pablo casetaha me xcun cru ngatsê nuju? ¿Há tsajin ne, há caxtenda ngayun xi ladu rê Pablo cuma ngayun? ¡Hacuiin cuatjin! ¹⁴ Hisca suá nacuechji rê Nina ta hisca ngu ngayun ne, cavitendaan nuju, suvá ni cha Crispo cojo cha Gayo xi cavitênda cha. ¹⁵ Xi cuatjin camá ne, tsajin yo xi cuichja xi caxtenda ngayun xi cuma ngayun xuta ladu naha. ¹⁶ Haan, hacuaha cavitênda sa xuta rê Estêfanas. Peru hveen há tjin sa xi cavitênda. ¹⁷ Cuatjin casahme ta, tsêhê xi hacuiin catsingatju ná Jesucristu xi cuitênda xuta ta catsingatju ná me xi suá cumachaya rê xuta cjuandajiyi xi chja tsêhê me. Hacuaha hacuiin catsingatju ná me xi cuichjá sacuaha chja ngu xuta xi jemu ndaja nuhya rê, hane cuahacuenda xuta cjuarê naha cahndê rê xi cuahacuenda me ngahñu rê cjuaveya rê Jesucristu ngajan xcun cru.

Tjin rê Jesucristu ngahñu rê Nina hacuaha tjin rê me cjuatacun rê Nina

18 Cuatjin mijí rë xi chjahátahá rë ngahñu rë cjua rë cjuaveya rë Jesucristu xcun cru ta, tsêhë xi cjua vëhë ne, handasa ngu cjuaveya cjuangarca xi má rë xuta xi tivetjintjiin me, peru xi cuma naja ngayaan xi tivetjuntjeen ne, cjua vëhë ne, tjin rë ngahñu rë Nina. 19 Cuitjin camahindu xcun xujun rë Nina cjua xi cachja Nina:

Tsinguétsun cjuatacun rë xuta xi jemu vechú cjuatacun rë, hacuaha cjuatacun rë xuta xi jemu ndaja vijnercu me ne, tsinguejñu rë. Cuatjin camahindu.

20 ¿Jarë cha xi jemu vechú cjuatacun rë? ¿Jarë cha xi vicuya cjuachacun? Hacuaha ¿jarë cha xi jemu ndaja ma visiajmi nixtin vihi? ¡Nina ne, catsicuya me suvá cjuangarca cjuatacun xi jemu vëhë xuta ngasunhndë vi! 21 Nina ta vechutaha jain cjuatacun rë me ne, cavejña ngu cacun me xi xuta ngasunhndë ne, cumaji sacúse rë me cojo suva ni cjuatacun rë me yo xi Nina. Cahndë rë vëhë ne, Nina ne, camameje cuaxëtje me xuta xi mangu cacun cojo rë me ngatsë rë cjuandajyihí xi nújin, handasa xi má rë xuta ne, ngu cjuangarca cjuandajyihí vëhë.

22 Xuta tjë rë Israel ne, meje rë me xi sahmi Nina cjuarcun, hane xutaxín ne, vanguise me xi jemu cuechú cjuatacun rë me. 23 Peru ngayin ne, tihin machaya rë xuta cjua tsêhë me xi catsingatju Nina, me xi cahme xi casetaha xcun cru. Ngu ladu ne, cjua vëhë sahmi xi xuta tjë rë Israel ne, sahmi condra me Nina. Hane ngu ladu nga ne, cjua vëhë ne, ngu cjuangarca xi má rë xutaxín. 24 Peru xi cuma rë xuta xi Nina cavaxijin rë me, sa xuta tjë rë Israel o sa xutaxín ne, me xi Nina catsingatju rë jan ne, tjin rë me ngahñu rë Nina hacuaha tjin rë me cjuatacun rë Nina. 25 Hya xi machaya rë yahnga xuta yëjë xcusun xi choho cavatju Jesucristu camá ne, tsingataha cacun me xi Nina ne, jemu ngarca me hacuaha jemu ndaya cacun me. Peru hacuiin cuatjin ta, xcusun xi cuacun vë ne, tsingacun naja xi Nina ne, hitsë sa jercu vechú cjuatacun rë me xi cuma rë xuta xi jercu vechú cjuatacun rë, hacuaha hitsë sa jercu tjin rë me ngahñu xi cuma rë xuta xi jercu tjin rë ngahñu.

26 Ngayujun ni ngayun ne, ha hyun ta Nina cavaxijin nuju me handasa hacuiin cjin ngayun xi vechú cjuatacun nuju, hacuiin cjin ngayun xi jercu tjin nuju ngahñu, hacuaha hacuiin cjin ngayun xi nchina ngayun. 27 Peru Nina ne, cavaxijin me xuta ngasunhndë xi ngarca, cojo sa xi tsisava me xuta xi jercu vechú cjuatacun rë. Hane cavaxijin me xuta ngasunhndë xi ndaya cacun, cojo sa xi tsisava me xuta xi jercu hñu ngahñu rë. 28 Hacuaha Nina ne, cavaxijin me xuta ngasunhndë xi yuma, xuta xi maxta tsêhë, xuta xi venguiin chji rë, cojo sa xi tsinguetsun Nina cjuatacun rë xuta xi jemu vengui chji rë xi má rë xuta ngasunhndë. 29 Xi cuatjin ne, yëjë xuta ne, cumaji cuaxëndaja me yojo rë me xcun Nina. 30 Hane ha suvá Nina casahmi tangun me cjuatacun nuju cojo Jesucristu. Hacuaha Nina vuxaha me cjuatacun naja, xi mangutacun cojo Jesucristu. Hacuaha ngatsë rë Jesucristu ne, fë jyë naja xcun Nina, tsêhë Nina má ngayaan, hacuaha vetjuntjeen. 31 Cuatjin jain má cojo sa xi nihña sacuatjin quitaha xcun xujun rë Nina hiscan xi chja cuitjin: “Sa xi yo xi meje cuaxëndaja yojo rë ne, cataxëndaja yojo rë, peru xi tsêhë Nai naja.”

2

Chuva rë xi cachja Pablo cjua rë Nina

1 Peru ngayujun ni ne, hya xi cëjë nangui nuju ne, cachjaan cojo nuju cjua rë Nina sacuaha xi jemu ma chjá o sa sacuaha xi jemu vechú cjuatacun naha.

² Cuatjín casahme ta, tsêhê xi cavejñá cjuatacun naha xi ngu ni Jesucristu xi cahme me xcun cru tsingátaha cacún tsêhê me, jinguyêjê rê xi cuitejñataha cojo nuju. ³ Hacuaha hya xi cavitejñataha cojo nuju ne, jemu ndaya cacún, hisca fatsê ngahan xi tsácjun. ⁴ Hacuaha hya xi cachjá cojo nuju cjuarê Nina ne, hacuiin jemu cjuar yehe casahmexa cojo xi meje sahme xi cuijne tacún ta cajne tacún ngatsê rê ngahñu xi tjin rê Hasen rê Nina. ⁵ Cuatjín camá cojo sa xi cumangu tacún cojo Nina, peru hacuiin ngatsê rê cjuatacun rê xuta ta ngatsê rê ngahñu xi tjin rê Nina.

Cjuatacun rê Nina xi jercu vechú

⁶ Peru cojo xuta xi vechútaha cjuatacun rê me xi mangucacun me cojo Jesucristu ne, nújin cjuatacun xi jemu vengui chjí rê. Peru cjuatacun vêhê ne, hacuiin cjuatacun tsêhê xuta ngasunhndê vihi hacuaha hacuiin cjuatacun tsêhê xuta xi vitexa nguehe ngasunhndê vihi, me xi titsinguetsun Nina cjuatacun rê. ⁷ Cjuatacun vêhê ne, vêhê cjuatacun rê Nina xi jiyahma titjun. Peru Nina ne, hisca chaja sa xi cuejña ngasunhndê ne, ha tjin chjine rê me cjuatacun vêhê xi ndaja tsajan. ⁸ Hisca xi ngu xuta xi vitexa quihndê níxtin vihi ne, vijniircu me cjuatacun vêhê. Sa xi cajnercu me ne, hacuaha catsiquiin me Nai naja, me xi jemu jyê hnga camahani me cojo Hasen rê me. ⁹ Peru tivetjucaa sacuatjín camahindu xcun xujun rê Nina hiscan xi chja cuitjín:

Xcusun xi cjêê camahani scuêê xuta, hisca cjêê camahani cuihndê me cjuar tsêhê, hacuaha hisca cjêê camahani tsingatahacacun me tsêhê ne, vêhê xcusun xi cavêhêchjine Nina xi cuma rê xuta xi hmu cacun rê me. Cuatjín camahindu. ¹⁰ Xcusun vêhê ne, ngayin casua Hasen rê Nina camachaya nijí. Hasen rê Nina jan ne, vêê yêjê ngarca ní, hisca cjuatacun rê Nina xi hitsê sa hma jija.

¹¹ Ngajñi rê yêjê xuta ne, tsajín yo xi ma vêê cjuatacun rê ngu xuta ta suvá ní hasen rê me xi jija ngajñi yojo rê me ne, vêhê xi vêê. Ha chuva vêhê ní ne, tsajín yo xi vêê cjuatacun rê Nina ta suvá ní Hasen rê Nina ne, vêhê xi vêê. ¹² Ngayaan ne, hacuiin cachjahanntsán ngu hasen tsêhê ngasunhndê ta cachjahanntsán Hasen xi catsingatju Nina, cojo sa xi cumachaya naja yêjê ní cjuandaja xi Nina casua naja me.

¹³ Nújan tsêhê cjuandaja vêhê, peru hacuiin cojo cjuar yehe xi nduva tsêhê cjuatacun rê xuta ngasunhndê ta cojo cjuar xi nduva tsêhê Hasen rê Nina. Hane cuatjín xi tahan cjuatacun rê Nina machaya rê xuta xi tjin rê me Hasen rê Nina.

¹⁴ Xuta xi tsajín rê me Hasen rê Nina ne, mají fahatsja me cjuandaja xi sua Hasen rê Nina ta xi má rê me xi cuacun vê ne, suvá cjuangarca cjuandaja xi cuacun vê, hacuaha mají vijnercu me cjuandaja xi cuacun vê, tsêhê xi suvá Hasen rê Nina sahmi xi vijnercuun. ¹⁵ Xuta xi tjin rê me Hasen rê Nina ne, ma tsichuva me yêjê ngarca ní, peru me xi cuacun vêhê ne, tsajín yo xi ma tsichuva rê me. ¹⁶ Cuitjín camahindu xcun xujun rê Nina: “¿Yo xi vêê cjuatacun rê Nina? ¿Yo xi cuiçuya rê?” Cuatjín camahindu. Peru ngayaan ne, tjin naja cjuatacun rê Jesucristu.

3

Xuta sahmixa rê Nina

¹ Ngayujun ní ne, camají cachjá cojo nuju sacuaaha chjá cojo xuta xi ha tjin rê me Hasen rê Nina ta, tjin ná xi cachjá cojo nuju sacuaaha chjá cojo xuta ngasunhndê, sacuaaha xuta xi sehe cavisehen ladu rê Jesucristu. ² Sacuaaha xi

casuá nuju lechi xi siuhun. Hacuini niñu casuá xi xinu ta, tsêhê xi nixtin hya ne, tangun ngayun cojo quihndi chihndê xi cjêê cuma sinê niñu. Hacuanitjin ni cjêê cuma chjuhunnstun yêjê cjuarê Nina hisca quihndê,³ tsêhê xi xuta ngasunhndê sa má ngayun. Cuatjin chjá cojo nuju ta jinguyêjê rê xi tjin sa cjuachini hacuaha tjin sa si ngajni nuju ne, xuta ngasunhndê cuaha sa má ngayun, hacuaha tivanguntjengun sa ndiya rê xuta ngasunhndê.⁴ Hya xi ngu ngayun nújun: “Ngahan ne, ladu rê Pablo ngahan”, hane ngu nga ngayun ne, nújun: “Ngahan ne, ladu rê Apolos ngahan” ne, ngajan matsejen xi xuta ngasunhndê cuaha má ngayun.

⁵ Xi matsejen ne, ¿mé má Apolos ne, mé má Pablo ni? Ngayin ne, xuta sahmixa rê Nina ni ngayin, xi canújin cojo nuju cjuarê Nina xi camacjain nuju. Jima ngu ngayin ne, canihni xa xi casua niji Nai naja.⁶ Sacuaha xi ngahan catsitjê, hane Apolos cavitejnu me nandá, peru Nina casahmi me xi camayehe xitjê.⁷ Ngajan xi, xi matsejen ne, cha xi tsitjê cojo cha xi vitejnu nandá ne, hacuini jemu vengui chji rê cha ta me xi vengui jain chji rê ne, Nina, me xi sahmi xi ma yehe xitjê.⁸ Cha xi tsitjê cojo cha xi vitejnu nandá ne, tangun ni vengui chji rê cha. Jimangu cha ne, cjuahatsja cha chji rê cha, sacuatjin xa xi casahmi jimangu cha.⁹ Ngayin ne, tangun tihni xa rê Nina, hane ngayun ne, sacuaha nangu rê Nina xi tijimaxa cojo má ngayun.

Hacuaha ngayun ne, sacuaha ngu ndihya xi Nina tsindaja me má ngayun.¹⁰ Ngahan ne, tsêhê cjuandaja xi casua ná Nina ne, casahme sacuaha ngu chjine vexo ne, cavejni ngu xihndênaña, peru xcun xihndênaña xi casahme jan ne, jingu sa xuta canduva casahmi me ngu ndihya. Peru jima ngu xuta xi sahmi me ndihya xcun xihndênaña vêhê ne, meje rê xi tjin rê me cuidadu hacutjin xi sahmi me ta,¹¹ tsêhê xi tsajin sa cjin xihndênaña xi tjin ta ngu tu tu ni má. Hane xihndênaña xi ha tacun vê ne, hacui Jesucristu.¹² Quihndê ne, xi nihni xa rê Nina ne, cuejni xi yahnga xuta sahmixa me cojo oro, o sa quicha tyava, o sa ndyojo xi jercu vengui chji rê. Hane yahnga nga me ne, sacuaha sahmixa me cojo ya, o sa cojo ndiji, o sa cojo xca ni.¹³ Peru nixtin hya xi tsichuva naja Nina ne, hya cuma cumatsejen xcusun rê xa xi casahmi jima ngu xuta xi cuacun vê. Nixtin hya ne, cuejni Nina ngu ndihi xi tsichuva xa xi casahmi jima ngu me, cojo sa xi cumatsejen mé xcusun xa vêhê.¹⁴ Sa xi xa xi casahmi ngu xuta scaa rê cojo suê rê ndihi vêhê ne, sacú rê me ngu cjuandaja rê xi sua Nina.¹⁵ Peru sa xi xa xi casahmi ngu xuta jan cjuêya cojo suê rê ndihi vêhê ne, tsichajá me yêjê, peru me vêhê ne, cuetjutje me sacuaha ngu xi vetjutje tsêhê ngu ndihi.

¹⁶ Ngayujun ni ne, ha ndaja hyun xi sacuaha yungun rê Nina má ngayun, ta Hasen rê Nina ne, hacuaha tacuncahndê cahntsua xahasen nuju.¹⁷ Sa xi yo xi tsinguetsun yungun rê Nina, Nina ne, hacuaha jercu sahmi me castigu xuta jan, tsêhê xi yungun rê Nina ne, hatuxa tsêhê Nina. Hane ngayun ne, hacuaha yungun rê Nina má ngayun.

¹⁸ Xicavindachuun suvun rê yojo nuju. Sa xi tjin ngu ngayun xi ningatuhun tacún xi jemu vechú cjuatacun nuju sacuaha cjuatacun rê xuta ngasunhndê vihi ne, nihñucuecundun chjuhunxun cjuatacun vêhê sacuaha xi vechiun cjuatacun nuju. Hane xi cuatjin nihni ne, sehe cuechú tuhun cojo cjuaquixi ngu cjuatacun nuju.¹⁹ Cuatjin meje rê ta, tsêhê xi cjuatacun rê xuta ngasunhndê vihi ne, xi cuma rê Nina ne, suvá cjuangarca. Hisca camahindu xcun xujun rê Nina cuitjin: “Nina ne, sahmi me xi xuta xi jemu vechú cjuatacun rê me vetju sava me xcun cjuandacha xi sahmi me.”²⁰ Hacuaha camahindu nga cuitjin: “Nina ne, vêê me xi cjuatacun rê xuta xi jemu vechú

cjuatacun rë ne, tu mahya.” ²¹ Vêhë xi hisca ngu ngayaan ne, mijí rë xi naxenndajan cjuatacun rë xuta ngasunhdë ta, tsêhë xi yêjê ngarca ni ne, tsujun: ²² há xi Pablo, há xi Apolos, há xi Pedru, há ngasunhdë, há cjuahñu, há cjuaveya, há xi nixtin quihndë, há xi nixtin nduva ne, ta yêjê ngarca ni ne, tsujun vë. ²³ Hane ngayun ne, tsêhë Jesucristu ngayun, hane Jesucristu ne, tsêhë Nina me.

4

Xa rë apóstol

¹ Meje rë xi nihñucueundun xi ngayin ne, xuta sahmi xa rë Jesucristu má ngayin, hacuaha cachjihinntsín xa xi tihin cumachaya rë xuta tsêhë cjuatahahma xi sehe tisua Nina jimachaya naja. ² Hacuaha jemu sahmi nguujyë xi ngu xuta xi tjin tsjá me xa ne, tsejen tsêhë me xi cuma cumangu tacuun cojo rë me. ³ Xi cuma ná ngahan ne, tsajin mé sahmi rë sa xi chjuhunchuvun ná cojo cjuatacun naha, o sa xi cjuahachuva ná xuta ngasunhdë. Hisca ngahan suva ne, fahachuvaan cjuatacun naha. ⁴ Xi má ná ne, tsajin jyë naha. Peru hacuiin ngatsë rë vêhë xi hatuxa tsajin jyë naha. Nai naja ne, me vêhë xi tsichuva ná me. ⁵ Vêhë xi mijí rë xi yo chjuhunchuvun, xi chaja sa cuechú nixtin xi cuinduva Nai naja ta, tsêhë xi me vêhë cuaxêcaatsejen me yêjê ni cjuaxi tsajin yo vëë. Hacuaha cuaxêcaatsejen me yêjê cjuatacun rë xuta. Nixtin hya ne, cuaxëndaja Nina jima ngu xuta sacuatjín vechú chuva rë tsêhë jima ngu me.

⁶ Ngayujun ni ne, cachjá cojo nuju yêjê cjuaxi vêhë tsahan suva cojo tsêhë Apolos, cojo sa xi ndaja tsujun, cojo sa xi cuijnercun mé meje cuichja cjuaxi chja cuitjín: “Nihñuchuhun sacuatjín chja cjuaxi camahindu.” Cuatjín chja cjuaxi. Cuatjín meje rë cojo sa xi hacuiin nihñu yehe yojo nuju ngatsë rë ngu xi tjengun cjuaxi rë, hane me xi yahnga ne, nitjungun me. ⁷ ¿Yo casahmi xi hitsë sa vengui chjí nuju ngayun xi cuma rë me xi yahnga? Hacuaha ¿mé tjin nuju xi hacuiin Nina casua nuju me? Sa xi Nina casua nuju me ne, ¿mé má naxunndujun yojo nuju sacuaaha xi tsajin yo xi casua nuju ni?

⁸ ¿Sacuaaha xi ngayun ne, má nuju xi ha tjin nuju yêjê xi meje rë xahasen nuju, ha jemu nchina camá ngayun! Ha xuta xi matitjun camá ngayun xi má nuju. Hacuaha quihndë tsajin mé xi machaja nuju xi cumatihin nuju. Jemu ndatjin sa xi matitjun jain ngayun, cojo sa xi ngayin ne, hacuaha cojo ngayin cumatitjun tangun ngayin cojo nuju. ⁹ Xi má ná ngahan ne, casahmi Nina xi venguiin chjí niji ngayin xi má ngayin apóstol, sacuaaha xuta xi cjue cueya me ngatsë rë jyë rë me. Tivutsejen yêjê ni xuta cojo yêjê ni ángel hacutjín tivatjín tijima. ¹⁰ Ngatsë rë xi tjenguin rë Jesucristu ne, má rë xuta sacuaaha xi jemu ngarca ngayin. Peru ngayun ne, xi má nuju ne, jemu quicun tacún ngatsë rë xi tjengun rë Jesucristu. Ngayin ne, jemu ndaya tacuín, peru ngayun ne, jemu hñu ngahñu nuju. Ngayun ne, chjahárcun nuju, hane ngayin ne, chjaharcuaain niji. ¹¹ Hisca quihndë sa ne, jindya niji tsêhë xi xini xi sihin, hacuiin ndaja tsjian chijín, choho sahmi xuta cojo niji, hacuaha tu nuyjihinsin ni. ¹² Nihñi xa xi hai. Hora xi choho chja xuta cojo niji ne, ndaja nújin cojo rë me. Hora xi tsuyihiya tjengui niji me cojo cjuahngatacun ne, caa niji cojo xcusun xi sahmi me. Tsajin mé nihñi cojo rë me. ¹³ Hora xi choho chja xuta tsijin ne, nindijin cjuaxi cojo rë me. Camá ngayin sacuaaha xtë xi tjin ngasunhdë. Hitsë sa chuva vengui chjí niji xi cuma rë yêjê ni xcusun xi tjin. Hisca quihndë ne, cuanitjín vatjín má.

¹⁴ Xi titsihindu nuju cuitjin ne, hacuiin xi tsisava nuju ta xi suá nuju conseju sacuaaha quihndi naha suva xi jemu hmú cacún. ¹⁵ Handasa tjin nuju té mil xuta xi vicuya nuju cjuá xi chja tséhé Jesucristu ne, peru nahmi nuju ne, ngu ni ngahan, tséhé xi hya xi casuá camachaya nuju cjuandajyihí xi chja tséhé Jesucristu hacuaaha cavisuhun ladu rē me ne, hya camá ngahan sacuaaha nahmi nuju. ¹⁶ Véhé xi ngayujun ni ne, meje ná xi nihñu sacuatjin sahme ngahan.

¹⁷ Ngatsē rē véhé ne, titsingátju nuju cha Timoteo, cha véhé xi sacuaaha quihndi naha xi jemu hmú cacún hacuaaha jemu ndaja sahmi chíhin me xa tséhé Nai naja. Me véhé sahmi me xi cuitsjen nuju hacutjin tifé cojo ndiya rē Jesucristu, sacuatjin vicuyá rē xuta rē yějé ni yungun jingujyē ni.

¹⁸ Quihndé ne, yahnga ngayun ne, canihñu yehe yojo nuju xi cuatjin caningatuhun tacún xi cjuéen cjué scútsejen nuju. ¹⁹ Peru ngahan ne, cuinduva xati scútsejen nuju, sa Nai naja meje rē me. Hane hya cumachaya ná hacuiin sacuatjin xi visiajmi xuta xi cuacun casahmi yehe yojo rē jan ta sacuatjin ngahñu xi tjin rē me. ²⁰ Cuatjin sahme ta sacuaaha gobiernu xi sahmi Nina ne, hacuiin cojo suvá cjuá ni rē me xi sahmi me ta cojo ngahñu xi tjin rē me. ²¹ ¿Hacutjin meje nuju xi nduva scútsejen nuju, há xi cojo ngu castigu ne, o há tsajin ne, há cojo ngu cjuahmutacun, cojo cjuandaja cjuajeya?

5

Cjuatsehen xi casahmi ngu cha xuta rē yungun

¹ Tjin cjuá xi ngajñi nuju ngayujun ni ne, jiyajñi ngu cjuatsehen xi hisca xutaxín sa ne, sahmi me. Chja cjuá ta ngu ngayun ne, cachjuhun chjuun rē nahmi nuju, camá chjuun nuju. ² ¡Hane ngayujun ni ne, jercu naxunndujun yojo nuju! Cahndé rē véhé ne, meje rē xi choho cuma nuju. Cha xi cuatjin sahmi xcusun véhé ne, catetjuxin cha tsujun. ³ Handasa tsajin ngahan tejña cojo nuju ndyá ne, peru cjuatacun naha ne, sacuaaha xi ndyá tacun cojo nuju. Hane sacuaaha xi tejña cojo nuju ne, ngahan ne, ngatsē rē xi sahme xa rē Nai naja Jesús ne, chjá cojo nuju ta meje rē xi cuma castigu cha xi cuatjin sahmi xcusun véhé. ⁴ Hya xi cuma tangun ngayun, hacuaaha cjuatacun naha ne, sacuaaha xi tacun cojo nuju ne, cojo ngahñu xi sua naja Nai naja Jesús ne, ⁵ nihñu entregadu cha xi cuajyihí vė cojo Satanás, cojo sa xi cueya cha. Cuatjin nihñu, cojo sa xi cuetjutje hasen rē cha nixtin hya xi cuya nga Nai naja.

⁶ Ndajin tjin xi cuatjin nihñu yehe yojo nuju. Ha hyun cjuá xi chja cuitjin: “Hitsē lihndi ni san rē pan ne, caa rē tsisatjen rē yějé nahyu.” Cuatjin chja cjuá. ⁷ Meje rē xi chjuhunxun cjuatsehen véhé, xi sahmi sacuaaha san rē pan, cojo sa xi cuma tyjahi cjuatacun nuju, sacuaaha nahyu xi tsajin san rē. Hacuaaha hvé ta hatuxa tyjahi cjuatacun nuju ta, tséhé xi Jesucristu ne, me xi sacuaaha chu tsánga tséhé suhi rē Pascua naja ne, ha cahme me. ⁸ Véhé xi meje rē xi nihña suhi, peru hacuiin cojo san rē pan xi changá, cuma cuinújan ne, hacuiin cojo cjuatsehen ta, cojo nahyu xi tsajin san rē, cuma cuinújan ne, cojo cjuandaja cojo cjuaquixi.

⁹ Catsihindu nuju xcun xujun xi ha catsingátju nuju ta mijí rē xi nihñu tangun cojo xuta xi sahmi cjuatsehen cojo ngu chjuun o sa cojo ngu xihin. ¹⁰ Xi cachjá cojo nuju cuatjin ne, hacuiin meje cuichja xi meje rē xi cuetjunxun camahani tséhé xuta ngasunhdé xi hinchá ndiya rē cjuatsehen véhé, o sa tjenguitaha me xi hacuiin tséhé, o sa ndacha, o sa faharcun me nina ndyojo.

Sa xi cuatjin nihñu ne, meje rë xi cuetjun camahani tsëhë ngasunhdë. ¹¹ Xi vijne cjua xi catsihindu nuju vë ne, xi hacuiin nihñu tangun cojo ngu xuta xi chja me xi ladu rë Jesús má me hane sahmi me cjuatsehen cojo ngu chjuun o sa cojo ngu xihin, o sa tjenguitaha me xi hacuiin tsëhë me, o sa faharcun me nina ndyojo, o sa ndesu me, o sa cha chih me, o sa xi ndacha me. Ngu xuta rë yungun xi cuatjin xcusun rë ne, hisca mijí rë xi xinu niñu cojo rë me. ¹²⁻¹³ Satiin ná ngahan xi tsichúva xuta xi hacuiin xuta rë yungun má me. Nina ne, me vëhë xi tsichuva rë me. Peru ngayun ne, meje rë xi nichuvun xuta xi xuta rë yungun me. Vëhë xi hacuaha meje rë xi naxunxun cha tsehen vë tsëhë ngajñi nuju.

6

Vinchajyë yahnga xuta ladu rë Jesús xicjin me ngajñi rë me

¹ Hya xi tjin ngu ngayun xi tjin ngu jyë xi meje cuinchun tsëhë xingun ne, ¿mé má cuatjin vetju tacún xi xcun xuta xi hisca sahmicuendaain me Nina vangun chjahyun xi cumacuenda tsujun, cahndë xi cuangun xcun xuta xi ladu rë Nina me? ² ¿Há hyuun xi cuechú nixtin xi ngayaan xuta ladu rë Nina nichuvan xuta ngasunhdë cojo cjuatacun rë me? Hane sa xi ngayun cuatjin nichuvun xuta ngasunhdë ne, ¿há maji nichuvun ngu jyë lihndi quihndë ni? ³ ¿Há hyuun xi ngayaan nichuvan ángel cojo cjuatacun rë ni? ¿Hitsë guan cjuacjintacun rë ngasunhdë vihi! ⁴ Vëhë xi sa tjin ngu jyë xicjin vëhë xi meje cuinchun ne, ¿há cuangun cuejñu jyë vëhë xcun ngu xutaxín xi faharcuaain me xcusun rë yungun? ⁵ Nguehe cuichjá cojo nuju ngujo cjua cuitjin, cojo sa xi cuma sava nuju: ¿há tsajin ndastu ngu xuta xi vechú hitsë cjuatacun rë me xi cuma sahmi cuenda me tu mé ni si xi nihñu cojo xingun? ⁶ Peru ngu ngayun xuta ladu rë Jesús ne, vinchun jyë rë jingu sa xuta ladu rë Jesús, ¿hane hisca vanguncujun jyë vëhë xcun xuta xi sahmicuendaain me Nina!

⁷ Xi cuatjin vinchun jyë rë xingun xingu xingu ngayun ne, ngajan matsejen xi ngayun canichujún. Hitsë sa ndaja xi ningatuhun xi cumandacha ngayun. Hitsë sa ndaja xi ningatuhun xi cjue chëjë tsujun. ⁸ Cahndë rë xi cuatjin ningatuhun ne, tu ngayun vindachun hacuaha nichujun tsëhë xingun ngajñi nuju ngayun xuta rë yungun.

⁹ ¿Há hyuun ta xuta tsehen ne, cumaji cuisehen me hiscan sahmi Nina gobiernu? Ha quihndë xicatuun cahndë xi cuma ndacha sa ngayun ta, yëjë xcusun xuta xi cuicun vi ne, cumaji cuisehen me hiscan sahmi Nina gobiernu: xuta xi sahmi me cjuatsehen cojo chjuun o sa cojo xihin xi hacuiin tsëhë me, xuta xi faharcun me nina ndyojo, cha xi chuya rë ngu xihin, ¹⁰ xuta xi chëjë me, xuta xi tjenguitaha me xi hacuiin tsëhë me, xuta xi hatuxa xuta chih me, xuta xi ndesu me, xuta xi ndacha me, yëjë xcusun xuta xi cuacun vë ne, cumaji cuisehen me hiscan sahmi Nina gobiernu. ¹¹ Yahnga ngayun ne, cuatjin cún ngayun titjun. Peru fahaxin me jyë nuju, camá tyjahi cjuatacun nuju, cafë jyë nuju. Cuatjin camá cojo nuju ngatsë rë Nai naja Jesucristu cojo ngatsë rë Hasen rë Nina naja.

Meje rë xi cojo yojo naja nihña jyë nihña hnga Nina

¹² Yahnga ngayun ne, nújun cuitjin: “Cuma nihña yëjë ni xcusun.” Cuatjin nújun. Cuma, peru hacuiin yëjë xcusun xi ndaja tsajan. “Cuma nihña yëjë ni xcusun”, peru ngahan ne, suaan cahndë xi scaa rë suhi rë tu mé ni xcusun cojo ná. ¹³ Yahnga nga ngayun ne, nújun cuitjin: “Casahmi Nina xi hatuxa matangun xi chinë cojo cahntsuan, hacuaha cahntsuan ne, hatuxa

ma tangun cojo xi chiné.” Cuatjin nújun. Quixi jain, peru cuechú nixtin xi tsicjé Nina catsijo xcusun vèhè. Peru hacuiin casahmi Nina xi hatuxa matangun yojo naja cojo cjuatsehen ta casahmi me xi hatuxa matangun cojo Nai naja, hacuaha hatuxa matangun Nai naja cojo yojo naja. ¹⁴ Nina ne, catsicuya me Nai naja cjuahñu, hacuaha cojo ngahñu rë suvá me ne, hacuanitjin ni tsicuya naja me ngayaan cjuahñu.

¹⁵ ¿Há hyuun ta yojo nuju ne, tjin tangun cojo Jesucristu? Quihndé ne, yojo naja xi tjin tangun cojo Jesucristu ne, ¿há nihña tangun cojo ngu na viteña yojo rë ni? ¡Jéya! ¡Catamamiji rë Nina! ¹⁶ Hacuaha ¿há hyuun ta ngu xuta xi sahmi cjuatsehen cojo ngu na xi viteña yojo rë ne, sacuaha xi ngu yojo ni rë me cojo rë na? Cuatjin ma ta chja xujun rë Nina cuitjin: “Catsijo me ne, cuma ngu yojo ni rë me cojo xicjin me.” Cuatjin chja xujun rë Nina. ¹⁷ Peru ngu xuta xi sahmi tangun me cjuatacun rë me cojo Nai naja ne, cuma ngu cjuatacun ni rë cojo rë me.

¹⁸ Naxunxun yojo nuju tséhè cjuatsehen xi sahmi ngu xuta cojo ngu chjuun o sa cojo ngu xihin xi hacuiin tséhè me. Yèjé sa cjuatsehen xi sahmi ngu xuta ne, hacuiin cojo yojo rë me sahmi me. Peru xuta xi sahmi cjuatsehen cojo ngu chjuun o sa ngu xihin xi hacuiin tséhè ne, cojo yojo rë me sahmi me cjuatsehen vèhè. ¹⁹ ¿Há hyuun ta yojo nuju ne, sacuaha ngu yungun rë Hasen rë Nina xi caveya Nina cahntsua xahasen nuju? Ngayun ne, hacuiin tsujun suvun yojo nuju ta, ²⁰ tséhè xi ngayun ne, cojo chji cachaha nuju. Vèhè xi meje rë xi cojo yojo nuju nihñu jyè nihñu hnga Nina.

7

Cjuacjintacun tséhè cjuavixan

¹ Quihndé ne, nguehe tsicúya cjuatacun tséhè cjuatacun xi canihindun ná.

Ndatjin xi cuixaain xuta. ² Peru ngatsé rë cjuatsehen ne, catisacu chjuun rë jima ngu xihin, hacuaha jima ngu chjuun ne, catisacu xihin rë na. ³ Sa chjuun sa xihin me ne, catisahmi chihin me sacuatjin mameje rë cjuavixan xi casahmi me. ⁴ Sacuaha chjuun ne, hacuiin na vèhè vitexa na yojo rë na ta xihin rë na vitexa cha. Hacuanitjin ni xihin ta hacuiin cha vèhè vitexa cha yojo rë cha ta chjuun rë cha vitexa na. ⁵ Mijí rë xi nichuhun rë xingun yojo nuju sa chjuun sa xihin ngayun. Cuma nihñu cuatjin, peru sa xi catsijo ni ngayun canihñu tangun cjuatacun xicjin xicjin ngujo nixtin, tséhè xi meje nuju xi ngujo nixtin vèhè ne, nihñu oración nuju cojo Nina. Hane xi cuatju vèhè ne, sehe tuyun nihñuchuhun sacuatjin mameje rë cjuavixan xi canihñu, sá tu ngatsé rë xi scaain nuju ne, sahmi Satanás ngahñu xi nihñu cjuatsehen.

⁶ Cuatjin cachjá cojo nuju cojo sa xi hacuiin chja cuatjun, cachjaan sacuaha xi hatuxa vitéxa nuju. ⁷ Xi má ná ngahan ne, ndatjin sa xi yèjé ni xuta ne, scaa rë me sacuaha ngahan. Peru jima ngu xuta ne, casacu rë me jima ngu xcusun cjuandaja xi casua Nina me: ngu me ne, casacu rë me xcusun vihi, ngu nga me ne, casacu rë me xcusun vèhè.

⁸ Quihndé ne, ngu ngu ngayun xi cjéè sacú chjuun nuju, cjéè sacú xihin nuju, hacuaha cojo ngayun xi cahan ngayun ne, cuichjá cojo nuju ta ndatjin xi cuinechun suvun sacuaha ngahan. ⁹ Peru sa xi scaain nuju ne, tixun. Hitsé sa ndaja xi cuixun xi cuma rë xi nicjun suvun yojo nuju cjuandya rë xihin.

¹⁰ Hane ngu ngu ngayun xi cavixun ne, cuichjá cojo nuju ta ngu chjuun ne, mijí rë xi tsismi na xihin rë na. ¹¹ Hane sa xi tacun xín na ne, cateña suvá na, o sa tsajin ne, catisehen nga na cjuandaja cojo xihin rë na. Hacuaha ngu

xihin ne, mijí rë xi tsismi cha chjuun rë cha. Hacuuiin ngahan xi chjá cuatjin ta Nai naja chja me.

¹² Quihndë ne, hacuuiin Nai naja cuichja me ta ngahan cuichjá cojo nuju ngayujun ni xi cjëë cuichjá cojo nuju. Sa xi cachjuhun ngu chjuun xi manguaain cacun na cojo Nai naja, hane tsingatihin na cuejña sa na cojo nuju ne, xicanismuu na. ¹³ O sa xi cachjuhun ngu xihin xi manguaain cacun cha cojo Nai naja, hane tsingatihin cha cuejña sa cha cojo nuju ne, xi canismuu xihin nuju vë. ¹⁴ Cuatjin nihñu ta, xihin nuju xi manguaain cacun cojo Nai naja jan ne, ngatsë nuju ngayun ne, hacuaha cojo cha cumá cha ladu rë Nina. Hacuanitjin ni chjuun nuju xi manguaain cacun cojo Nai naja jan ne, ngatsë nuju ngayun xi ladu rë Jesús ne, hacuaha cojo na cumá na ladu rë Nina. Sa xi hacuuiin cuatjin ne, quihndi nuju ne, hacuuiin ladu rë Nina má. Peru xi cjuaquixi ne, quihndi nuju ne, ladu rë Nina má. ¹⁵ Peru sa chjuun sa xihin xi manguaain cacun cojo Nai naja ne, sa xi meje tsismi nuju ne, catitsismi nuju. Sa xi cuatjin cuatjun cuma ne, ngayun xi ladu rë Jesús ngayun ne, ha ndaya tjin ngayun tsëhé cjuavixan. Cuatjin meje rë xi nihñu ta, tsëhé xi Nina cajindaya nuju me xi cuangun ndiya rë cjuandaja cjuajeya. ¹⁶ Tsajin yo vëë rë há cuma naxuntjun chjuun nuju o sa xihin nuju.

Chja Pablo hacutjin meje rë xi cjue xuta cojo ngasunhndë rë me

¹⁷ Meje rë xi ngayujun ni ne, nihñu xa xi casua Nina xi nihñu jima ngu ngayun, hacuaha ha sacuanitjin ni cún ngayun hya xi cavaxijin nuju Nina ne, hacuanitjin ni tángun nduju cojo. Cuatjin chjá cojo xuta tsëhé yëjë ni yungun. ¹⁸ Sa xi ha cati rë chuxin nuju hya xi cavaxijin nuju Nina ne, xicavinchuun chuva rë xi nindeyun xcusun vëhé. O sa xi cjëë xtí rë chuxin nuju hya xi cavaxijin nuju Nina ne, xicanihñuu. ¹⁹ Xi xti rë chuxin naja o sa xtiin rë ne, tsajin mé vengui chjí rë ta xi vengui chjí rë ne, xi cuinuhyan cjuá xi vitexa Nina. ²⁰ Ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo. ²¹ Sa xi ngu mosu hndixahan ngayun nixtin hya ne, xicamacjiin tacún. Peru sa xi cuma cuetjuntjun tsëhé xi má ngayun mosu hndixahan ne, naxuntjun yojo nuju ta, ²² tsëhé xi ngu mosu hndixahan xi Nai naja vaxijin me ne, ndaya tjin xi cuma rë Nai naja. Hacuanitjin ni ngu xuta xi hacuuiin mosu hndixahan me peru Nai naja cavaxijin rë me ne, mosu hndixahan rë Jesucristu má me. ²³ Cojo chjí cavatsë nuju Nina. Vëhé xi mijí rë xi mosu hndixahan rë xuta cuma ngayun. ²⁴ Ngayujun ni ne, ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo, xi tjin tangun cjuatacun nuju cojo Nina.

Chja Pablo tsëhé xuta xi tsajin chjuun tsajin xihin rë me

²⁵ Quihndë ne, sacuaha tsëhé xuta xi cjëë cjuaha me chjuun cjëë cjuaha me xihin ne, tsajin ngu cjuá xi cavitexa ná Nai naja xi cuichjá cojo nuju. Peru cuichjá cojo nuju sacuatjin tsingátaha cacún, tsëhé xi ngatsë rë cjuandaja xi casua ná Nai naja ne, cuma cumangu tacún cojo ná. ²⁶ Xi má ná ne, ngatsë rë cjuandya xi tjin naja quihndë ne, ngu xihin ne, ndatjin xi cuejña ni cha chuva xi ha tacun cha. ²⁷ Sa xi ha tjin chjuun nuju ne, xicanismuu ná. Hane sa xi tsajin chjuun nuju ne, xicachjuun chjuun. ²⁸ Peru sa xi cuixun ne, tsajin mé jyë nuju tjin, hacuaha sa xi ngu na nixti cuixan na ne, tsajin mé jyë rë na tjin. Peru sa xi ngayun cuixun ne, hatuxa tjin nuju cjuacjintacun nchunchuun ni cahntsua ndya nuju, hane vëhé ngu cjuacjintacun xi mijí ná xi cuatjun cuma. ²⁹ Peru meje cuichjá cojo nuju ngayujun ni ta ha jemu camachúva nixtin. Vëhé xi hacuuiin jercu nicjun yojo nuju tsëhé cjuandya rë guehe ngasunhndë

ta xuta xi tjin chjuun rë me ne, catisahmi cuenda me sacuaaha xi tsajin chjuun rë me; ³⁰ xuta xi jihnda me ne, catisahmi cuenda me sacuaaha xi hacuiin jihnda me; xuta xi jemu tjin rë me cjuasua ne, catisahmi cuenda me sacuaaha xi hacuiin jemu tjin rë me cjuasua; xuta xi vatsë me ne, catisahmi cuenda me sacuaaha xi hacuiin tsëhë me xi cavatsë me; ³¹ hane xuta xi jemu sahmixa cojo yëjë ni xcusun xi tjin ngasunhdë ne, hacuiin cuatjutaha sahmixa me cojo. Cuatjin meje rë xi tsingataha cacun xuta ta, tsëhë xi ngasunhdë xi chutsejen vi ne, hatuxa cjuë.

³² Ngahan ne, meje ná xi ngayun ne, tsajin nuju mé cjuandya. Xuta xi tsajin chjuun rë me ne, marcun rë me tsëhë xa rë Nai naja ta, tsëhë xi meje sahmi me hacutjin xi chuya rë Nai naja. ³³ Peru xuta xi tjin chjuun rë me ne, marcun rë me tsëhë cjuandya rë ngasunhdë ta, tsëhë xi meje sahmi me hacutjin xi chuya rë chjuun rë me. ³⁴ Hane xi cuatjin sahmi me ne, ma jo cjuatacun rë me. Hane ngu chjuun xi tsajin xihin rë o sa xi ngu chjuun xungun ne, marcun rë na tsëhë xa rë Nai naja, cojo sa xi cuma tsëhë Nina na cojo yojo rë na cojo hasen rë na. Peru na xi cavixan ne, marcun rë na tsëhë xa rë ngasunhdë ta, tsëhë xi meje sahmi na hacutjin xi chuya rë xihin rë na.

³⁵ Cachjá cuatjin cojo nuju, peru hacuiin xi cuatëcja cjuatacun nuju ta xi ndaja tsujun. Meje ná xi cuanguncujun ngu ndiya rë cjuandaja. Hacuaha meje ná xi tuhun yojo nuju ngundiyaxa ni xi nihñu xa rë Nai naja.

³⁶ Peru sa xi ngu xuta tsingataha cacun me xi cuaaintjin xi sahmi me xi cjëë cuixan me cojo rë na xi tacunvasen cjuavixan rë me cojo, hane na vëhë ne, ha cavechú nixtin rë na xi cuma cuixan na, hacuaaha sa xi ha tuxa meje rë xi cuixan na ne, catisahmi me mé xi meje sahmi me. Catixan me cojo rë na ta, tsajin mé jyë rë me xi cuatjin sahmi me. ³⁷ Peru ngu sa xuta xi hacuiin sahmi nguyë xi cuixan me hacuaaha ma vëhëñu me yojo rë me ne, sa xi ha cavejña cacun me xi cuixaaïn me ne, ndaja sahmi me xi cuixaaïn me. ³⁸ Vëhë xi me xi vixan cojo rë na xi tacunvasen cjuavixan rë me cojo ne, ndaja sahmi me. Hane me xi vixaaïn ne, hitsë sa ndaja sahmi me.

³⁹ Ngu chjuun ne, tsajin ndaya tjin na tsëhë xihin rë na jinguyëjë rë xi tacun cha cjuahñu. Peru sa xi cueya xihin rë na ne, ha ndaya tjin na xi cuixan na cojo tu yo ni xi meje rë na, ndastu xi ladu rë Nai naja má cha. ⁴⁰ Peru xi má ná ne, hitsë sa ndaja cuma rë xahasen rë na sa xi cuejña cuanitjin ni na. Hane tsingátaha cacun xi ngahan ne, hacuaaha cojo ngahan jiya Hasen rë Nina cahntsua xahasen naha.

8

Xichinë xi viyuju xcun nina ndyojo

¹ Quihndë ne, nguehe cuichjá cojo nuju tsëhë xichinë xi viyuju xcun nina ndyojo. Ha hyan ta ngayejen ni ne, tjin cjuatacun xi hyan. Hya xi jemu cjin cjuatacun xi hyan ne, nihña yehe yojo naja suvaan, peru hya xi tjin naja cjuahmutacun ne, nihña yehe xingueen. ² Sa xi ngu xuta tsingataha cacun me xi ndaja vëë me ngu cjuatacun ne, cjëë sa cuijnercu me sacuatjin xi meje rë. ³ Peru sa xi ngu xuta hmu cacun me Nina ne, me vëhë ne, vëë Nina me.

⁴ Quihndë ne, sacuaaha cjuatacun tsëhë xichinë xi viyuju xcun nina ndyojo ne, ha hyan ta tsajin camahani mé vengui chjí rë nina ndyojo jinguyë ni ngasunhdë, hacuaaha ha hyan ta ngu tutu ni Nina xi tacun me. ⁵ Handasa xi jemu tjin xi hmí rë nina, sa ngahnga sa nangui ne, hacuaaha handasa jemu cjin nina xi cuacun vë hacuaaha jemu cjin nai vihi nai vëhë tjin ne, ⁶ peru xi cuma naja ngayaan ne, ngu tutu ni Nina xi tacun me, me xi Nahmi naja. Me vëhë xi casahmi me ngayëjë ni, hacuaaha ngayaan ne, nechan

nguehe ngasunhdë xi nihña tutjin xi meje rë me. Hacuaaha ngu tutu ni Nai naja Jesucristu xi tacun me, me xi hacuaaha cojo casahmi Nina jinguyëjë ni. Hacuaaha ngayaan ne, nechan nguehe ngasunhdë ngatsë rë xi cuatjin meje rë Jesucristu.

⁷ Peru hacuiin yëjë xuta vëë me cjuatacun vëhë. Yahnga xuta ne, ngatsë rë xi cuatjin xcusun rë me hatsëë ne, vutsejen me xichinë vëhë sacuaaha ngu cjuatjo xi tsëhë cuaha nina ndyojo. Hane hya xi jinë me ne, jemu choho má cacun me, tsëhë xi, xi má rë me ne, jemu tsavi. ⁸ Peru xcusun xi chinë ne, visecuaain naja xi chuya rë Nina tsajan. Sa xi xinë ngu xcusun ne, tsajin mé nichajan, hacuaaha sa xi xinëë ne, tsajin mé ndaja sacú naja. ⁹ Nechun cuidadu, ngayun xi vijne rcun xi tsajin mé sahmi rë xi xinë ngu xcusun xi caviyuju xcun nina ndyojo. Nechun cuidadu, sá tu cuechú nixtin xi ngu xuta ladu rë Jesús xi cjëë ndaja cuijnercu cjuachacun rë Nina ne, tsismi cacun me ndiya rë Nina ngatsë rë xcusun xi nihña. ¹⁰ Cuatjin nechun cuidadu ta, tsëhë xi ngayun xi vijnercun ne, sa xi yo scuëë nuju xi tichinu niñu yungun rë nina ndyojo ne, me vëhë ne, ngatsë rë xi cjëë ndaja cuijnercu cjuatacun rë me ne, cojo me cuetju cacun me sinë me xi chinu xi caviyuju xcun nina ndyojo. ¹¹ Xi cuatjin cuma ne, xuta ladu rë Jesús xi cjëë cuijnercu ndaja jan ne, chajá me ngatsë rë cjuatacun nuju xi cuatjin nihña, handasa Jesucristu cahme me ngatsë rë xuta vëhë. ¹² Vëhë xi, xi cuatjin ninguetson cjuatacun rë xuta xi cuacun cjëë cuijnercu ndaja me ne, hacuiin suvá ni me xi cuacun vëhë xi choho nihña cojo rë me ta hacuaaha cojo Jesucristu. ¹³ Vëhë xi sa xi xichinë sahmi xi tsismi cacun ngu xuta ladu rë Jesús ndiya rë Nina ne, tsajin nu tsajin nixtin xi cúa sínë sa vëhë, cojo sa xi sahmeë xi tsismi cacun ngu xuta ladu rë Jesús jan ndiya rë Nina.

9

Xcusun xi vechú chuva rë xi sahmi ngu apóstol

¹ Ngahan ne, ngu apóstol ngahan, hane vechú chuva rë xi sahme yëjë ni xcusun xi sahmi ngu apóstol, tsëhë xi ngahan ne, cahvë Nai naja Jesús. Ngayun ne, camá ngayun ladu rë Nai naja, ngatsë rë xi cëjë casahme xa rë me ngajñi nuju. ² Handasa mijí cumacjain rë yahnga xuta xi apóstol má ngahan ne, peru ngayun ne, macjain nuju ta, tsëhë xi tsejen xi apóstol ngahan ngatsë rë xi ngayun ne, cavisuhun ladu rë Nai naja ngatsë rë cjua xi cachjá cojo nuju.

³ Cuitjin tsicúya cjua vihi tsëhë xuta xi sahmi chuva ná me ndyá ngajñi nuju: ⁴ Tjin ná chuva rë xi tuhun xi xini xi sihin. ⁵ Tjin ná chuva rë xi chjihín chjuun xi cuma chjuun nihi, sacuatjin rë apóstol xi yahnga cojo xicjin Nai naja cojo Pedru. ⁶ ¿Há Bernabé cojo ngahan tutu ni xi meje rë xi nihña xa sehe sacú xi xini xi sihin? ⁷ Ngu xuta xi má me sindadu ne, ¿há tujún rë suvá me tsicojo me xi sahmi me xa vëhë? Ngu xuta xi sahmi me xitjë ne, ¿há jini me xitjë xi vunihnga me jan? Ngu xuta xi sahmi cuidadu chu tsánga ne, ¿há hviin me lechi rë chu? ⁸ Ngahan ne, hacuiin suvá cjuatacun rë xuta xi tichjá ta ley rë Moisés ne, hacuaaha cuatjin chja. ⁹ Xcun ley rë Moisés ne, cuitjin camahindu: “Ngu ndyaja xi visecoo nuju ne, hacuiin nichaan xi sinë chu ta, hacuaaha tjin ru chuva rë xi sinë chu tsëhë xa xi sahmi chu.” Cjua vëhë ne, hacuiin meje cuichja xi vityangui cacun Nina tsëhë chu ndyaja ta ¹⁰ xi vityangui cacun me ne, tsijin ngayin. Cjua vëhë ne, camahindu ngatsë nihi ngayin. Xuta xi vacjan me nangui cojo xuta xi vechjunne me tutjë ne, hya xi sahmi me xa vëhë ne, meje rë xi cuetaha cacun me xi sacú rë me hitsë tutjë vëhë. ¹¹ Ngayin canitjin cjua rë Nina cahntsua xahasen nuju xingu xingu ngayun. Vëhë xi hacuiin

choho tjin sa xi tuhun niji hitsë cjuachaja niji. ¹² Sa xi vechú chuva rë xi tuhun cjuachaja rë jingu sa apóstol ne, ¡hitsë sa guan ngayin!

Peru ngayin ne, cjëë camahani mé xi chjahyin nuju. Cahndë rë vëhë ne, cacaa niji cojo jemu cjin cjuacjintacun, cojo sa xi hacuiin nihñi xi tjin yo xi tsitjungui cjuandajyihí xi chja tsëhë Jesucristu. ¹³ Ngayun ne, ha hyun ta nahmi xi sahmi me xa cahntsua yungun xi matitjun ne, hacuaaha ngajan vaxë me cjuachaja rë me. Cuma cuinújan ne, nahmi xi sahmixa me cojo chu xi sua xuta cjuatjo ngajan ngasunscun ne, hacuaaha ngajan faha me xi jinë me. ¹⁴ Ha chuva vëhë ni ne, cavitexa Nai naja xi me xi sua machaya rë xuta tsëhë cjuandajyihí xi chja tsëhë Jesús ne, ha xcun xa vëhë ne, ngajan cuaxë me cjuachaja rë me.

¹⁵ Peru ngahan ne, cjëë camahani mé xi cjuéhya rë xuta rë yungun. Hane cjuá xi titsihindu nuju vi ne, hacuiin tsëhë xi féhya nuju cjuachaja naha. Xi má ná ne, hitsë sa ndaja tsahan xi cueya, xi cuma rë xi chjahátahá rë cjuasua naha xi sahme xa rë Nina tu cjuatjo. ¹⁶ Xi suá machaya rë xuta cjuandajyihí xi chja tsëhë Jesucristu ne, tsajin mé má vaxëndaja suva yojo naha ta, hatuxa tjin ná xi sahme cuatjin. Jemu chojyihí tsahan sa xi suaan cumachaya rë xuta cjuandajyihí vëhë. ¹⁷ Vëhë xi, sa xi ngatsë rë xi meje ná suva xi cuatjin suá machaya rë xuta cjuandajyihí vëhë ne, ha tjin chjí naha. O sa xi sahme handasa mijí ná ne, peru Nina casua ná me xa vëhë. ¹⁸ Peru ¿jarë xi chjí naha ni? Chjí naha ne, xi tu cjuatjo ni suá machaya rë xuta cjuandajyihí xi chja tsëhë Jesucristu. Vëhë xi chjí naha, vëhë xi sua rë xahasen naha cjuasua. Cuma cuinújan xi handasa xi tjin ná chuva rë ne, cjëë camahani cjuéhya rë xuta rë yungun xi sua me cjuachaja naha xi sahme xa rë Nai naja.

¹⁹ Ngahan ne, ha ndaya tjin ngahan. Hacuiin mosu hndixahan rë xuta má ngahan. Peru sahme sacuaaha xi mosu hndixahan rë yëjë ni xuta má ngahan, cojo sa xi cjin sa xuta cuisécoo rë me xi cuisehen me ladu rë Jesucristu. ²⁰ Hya xi tejñayajñe ngajñi rë xuta tjë rë Israel ne, sahme sacuaaha sahmi xuta xi cuacun vë, cojo sa xi cjin sa xuta tjë rë Israel cuisécoo rë me xi cuisehen me ladu rë Jesucristu. Hya xi tejñayajñe ngajñi rë xuta xi tjengui me ley rë Moisés ne, sahme sacuaaha sahmi xuta xi cuacun vë, handasa hacuiin ngahma gobiernu rë ley vëhë tejña. Cuatjin sahme, cojo sa xi cjin sa xuta xi tjengui ley vë cuisécoo rë me xi cuisehen me ladu rë Jesucristu. ²¹ Hya xi tejñayajñe ngajñi rë xuta xi faharcuaain ley rë Moisés ne, sahme sacuaaha sahmi xuta xi cuacun vë, handasa fahárcun ngahan ley rë Nina, tsëhë xi tejña ngahma gobiernu rë ley rë Jesucristu. Cuatjin sahme, cojo sa xi cjin sa xuta xi faharcuaain ley rë Moisés vë cuisécoo rë me xi cuisehen me ladu rë Jesucristu. ²² Hya xi tejñayajñe ngajñi rë xuta xi cjëë ndaja cuijnercu me cjuachacun rë Nina ne, sahme sacuaaha sahmi xuta xi cuacun vë, cojo sa xi cjin sa xuta xi cjëë ndaja cuijnercu me cjuachacun rë Nina cuisécoo rë me xi ndaja cuisehen me ladu rë Jesucristu. Cuma cuinújan ne, sahme sacuaaha sahmi yëjë ni xuta, cojo sa xi sacú ná chuva rë xi cuma cuáxëtjé ngujo me. ²³ Cuatjin sahme yëjë xcusun vëhë ngatsë rë cjuandajyihí xi chja tsëhë Jesucristu, cojo sa xi hacuaaha cojo ngahan satë ná.

²⁴ Ngayaan ne, ha hyan ta cha xi vincha carrera ne, yëjë ni cha sahmi cha ngahñu, peru ngu ni cha caa rë cha xi fehe titjun cha, hane cha vëhë xi fahatsja cha cjuatjo rë. Ha chuva vëhë ni meje rë xi ngayujun ni ne, nihñu ngahñu, cojo sa xi hacuaaha sua nuju Nina ngu premiu xi cuma ngascan. ²⁵ Quihndë ne, cha xi cuatjin vincha carrera ne, haya xi vëhëchjine cha yojo

rë cha ne, hatuxa jemu viyuju cha cuidadu tsêhë yêjê ni xcusun xi choho sahmi cojo cha. Cuatjin sahmi cha, cojo sa xi sacú rê cha ngu premiu xi ficanii rê. Peru ngayaan xi ladu rê Jesucristu ngayaan ne, cuatjin nihña, cojo sa xi Nina ne, sua naja me ngu premiu xi tsajin nixtin vetsun. ²⁶ Vêhê xi ngahan ne, hacuiin tujyê vânga, hacuiin tujyê sahme ta ²⁷ jemu tsijênda rê yojo naha, hacuaha sahme rê nguyê xi sahmi hacutjin xi meje ná. Cuatjin sahme, sá tu ha xcun xi ha casuá camachaya rê xuta cjuandajyihî xi chja tsêhê Jesucristu ne, ngahan suva tsichajá.

10

Mijî rê xi chjahanrcun nina ndyojo

¹ Ngayujun ni ne, meje ná xi hacuiin nichayun xcusun xi cavatju xutachanga naja xi caviyuju nixtin rê Moisés. Ngayêjê ni me xi cuacun vê ne, quiji me sacuatjin quiji yufí, hacuaha yêjê ni me cavatjucja me ndachacun Hani. ² Hane xi casahmi me cuatjin ne, cuatjin camá xi yêjê ni me cavisehen me ladu rê Moisés. ³ Hacuaha yêjê ni me cajinê me niñu xi casua Nina. ⁴ Hacuaha yêjê ni me cahvi me nandá xi casua Nina. Cahvi me nandá xi cavetju rê naxi xi casua Nina xi cjue cojo rê me. Hane naxi vêhê ne, hacui Jesucristu. ⁵ Peru jemu cjin xuta xi cuacun vê xi cachuyiin rê Nina tsêhê me. Vêhê xi ngajan ngu cahndê xin camahani cahme nguehe cahme ngajan me.

⁶ Cuatjin camá yêjê xcusun vêhê sacuaha ngu ejemplu xi cuma naja, cojo sa xi hacuiin cumameje naja cjuatsehen, sacuatjin camameje rê me xi cuacun vêhê. ⁷ Hacuaha mijî rê xi chjuhunrcun nina ndyojo sacuatjin casahmi ngujo me xi cuacun vêhê. Cuitjin camahindu xcun xujun rê Nina: “Caviyuju xuta cajinê cahvi me, sehe cavisatjenhnga me quiji casua me cjuasua xahasen rê me.” Cuatjin camahindu. ⁸ Mijî rê xi nihña cjuatsehen cojo ngu chjuun o sa cojo ngu xihin sacuatjin casahmi ngujo me xi cuacun vêhê. Hane ha nixtin vêhê ni ne, cahme can jyan mil me. ⁹ Hacuaha mijî rê xi chjahanchuvan Nai naja sacuatjin casahmi ngujo me xi cuacun vêhê, hane cahme me xi cafaha chu yê me. ¹⁰ Hacuaha mijî rê xi choho cuisiajmuhmu tsêhê Nina sacuatjin casahmi ngujo me xi cuacun vêhê, hane catsiquehen rê me ángel xi hatuxa tsiquehen naja.

¹¹ Yêjê xcusun vêhê ne, cavatju me xi cuacun vêhê camá sacuaha ejemplu xi cuma naja. Hacuaha camahindu cjuá vêhê cojo sa xi sua naja conseju, ngayaan xi nechan quihndê xi ha meje cuijnetaha ngasunhndê. ¹² Vêhê xi xuta xi má rê me xi jemu hñu siu cjuatacun rê me xi mangucacun me cojo Nina ne, catiyuju me cuidadu, sá tu chajá me tsêhê ndiya rê Nina. ¹³ Ngayun ne, hya xi chjaháchuva nuju ne, chjaháchuva nuju sacuaha chjaháchuva rê yêjê xuta. Peru Nina ne, hatuxa cuma cumangu tacuun cojo rê me ta, tsêhê xi me vêhê ne, suaain me cahndê xi chjaháchuva nuju cojo ngu chuya rê xi scaain nuju cojo. Hya xi chjaháchuva nuju ne, me vêhê sua me chuya rê hacutjin cuetjuntjun, cojo sa xi scaa nuju hisca xi cuetjuntjun.

¹⁴ Vêhê xi ngayujun ni ne, xicavisuhunjnñuu cojo xuta xi faharcun me nina ndyojo. ¹⁵ Cuitjin tichjá cojo nuju, tsêhê xi jemu xuta quicun cacun ngayun. Nichuvun suvun cjuá xi chjá cojo nuju. ¹⁶ Ngayaan ne, hya xi hyuun xi hincha copa rê Nai naja ne, jemu ndaja tsajan. Nihña tangun cjuatacun naja cojo Jesucristu xi ninguitsjen hacutjin cavanga jni rê me hya xi cahme me. Hane hya xi chinê pan xi chotooncjan ne, nihña tangun cjuatacun naja cojo Jesucristu xi ninguitsjen hacutjin cavatju me camá xcun cru. ¹⁷ Sacuatjin

rë pan xi ngu ni má handasa jemu cjín rquí xtotoho ne, hacuanitjin naja ngayaan ta tjin tangun cjuatacun naja cojo xingueen, handasa jemu cjín má ngayaan. Cuatjin ta, tsêhë ngu ni pan ne, chinë ngayeyen ni hacuaha ngu ni má ngayaan.

¹⁸ Ningatuhun tacún hitsë tsêhë xuta tjë rë Israel. Xuta xi vejña me chu xi cahme sacuaaha cjuatjo xcun Nina ne, sahmi tangun me cjuatacun rë me cojo Nina. ¹⁹ Xi chjá cuatjin ne, ¿há chjá xi nina ndyojo ne, jemu vengui chjí rë? ¿há chjá xi yojo xi cavejña xcun nina ndyojo ne, jemu vengui chjí rë? ²⁰ Hacuüin ta, yojo xi vejña me ne, xcun xitsehen vejña me, hacuüin xcun Nina. Quihndë ne, mijí ná xi ngayun ne, nihñu tangun cjuatacun nuju cojo xitsehen. ²¹ Ngayujun ni ne, cumaji siuhun xi xinha copa rë Nai naja hane hacuaha siuhun xi xinha copa rë xitsehen. Hacuaha cumaji xinu xi viyuju xcun Nina hane hacuaha xinu xi viyuju xcun xitsehen. ²² ¿há ndatjin xi nihña xi cuma chini Nai naja? ¿há hitsë sa hñu ngayaan xi cuma rë me? ¡Hacuüin!

Hacuüin yëjë xcusun xi ndaja tsajan xi nihña

²³ Yahnga ngayun ne, nújun cuitjin: “Cuma nihña yëjë ni xcusun.” Cuatjin nújun. Cuma, peru hacuüin yëjë xcusun xi ndaja tsajan. “Cuma nihña yëjë ni xcusun”, peru hacuüin yëjë xcusun xi cuisecoo naja xi cuanguen nduju cojo cjua rë Nina. ²⁴ Mijí rë xi jima ngu ngayaan nihña ngahñu xi ndaja tsajan suvaan ta xi meje rë ne, nihña ngahñu xi ndaja tsêhë xingueen.

²⁵ Xinu tu mé ni hiscan xi xteña yojo. Xicachjinengunsuun vihi vëhë tsêhë yojo jan ngatsë rë xi chuyiin rë cjuatacun nuju tsêhë yojo xi cavejña xcun nina ndyojo. ²⁶ Cuatjin nihñu ta, xcun xujun rë Nina ne, cuitjin camahindu: “Ngasunhndë cojo yëjë ni xi tjin ngasunhndë ne, tsêhë Nina.” Cuatjin camahindu.

²⁷ Sa xi ngu xuta xi manguaain cacun cojo Jesucristu cuichja me xi cuangun xinu niñu ndava me ne, tángun. Hacuaha xinu tu mé ni xcusun xi cuiyuju me xi xinu. Xicachjinengunsuun vihi vëhë tsêhë xi caviyuju me jan ngatsë rë xi chuyiin rë cjuatacun nuju tsêhë yojo xi caviyuju xcun nina ndyojo. ²⁸⁻²⁹ Peru sa xi yo sua cumachaya nuju xi yojo jan ne, cavejña xcun ngasuncun ne, xicachinuu yojo jan ngatsë rë me xi casua camachaya nuju hacuaha ngatsë rë xi chuyiin rë cjuatacun rë me tsêhë yojo xi viyuju xcun nina ndyojo. Hacuüin ngatsë rë xi chuyiin nuju suvun.

Peru tjin yahnga xuta xi cuma cjuinenguisse me cuitjin: “¿Mé má ch-jaháchuva rë xcusun xi ngahan cuma sahme ngatsë rë xi chuyiin rë cjuatacun rë jingu sa xuta tsêhë? ³⁰ Sa xi suá nacuechji rë Nina tsêhë xcusun xi jínë ne, ¿mé má choho chja me tsahan ngatsë rë xi cuatjin jínë ni?” Cuatjin cjuinenguisse me.

³¹ Vëhë xi, sa xi xinu o sa xi siuhun o sa xi tu mé ni xcusun xi nihñu ne, meje rë xi nihñu yëjë cojo sa xi nihñu jyë nihñu hnga Nina. ³² Mijí rë xi nicjun rë xuta, há xi xuta tjë rë Israel ne, o há xi xutaxín ne, o há xi xuta rë yungun rë Nina. ³³ Hya xi sahme tu mé ni xcusun ne, sahme ngahñu xi chuya rë yëjë xuta tsahan. Sahmee ngahñu xi ndaja tsahan suva ta sahme ngahñu xi ndaja tsêhë jemu cjín xuta, cojo sa xi cuetjutje me.

11

¹ Vëhë xi ngayujun ni ne, meje rë xi nihñu sacuatjin sahme ngahan, sacuaaha ngahan xi sahme sacuatjin casahmi Jesucristu.

¿há meje rë xi cuetsan rcuun hya xi chjahanrcun Nina?

² Ngayujun ni ne, ngahan ne, vaxëndaja nuju ta, tsëhë xi yëjë ni hora ne, vitsjen nuju ngahan, hacuaha tivangun nduju cojo yëjë xcusun xi casuá camachaya nuju. ³ Peru meje ná xi cumachaya nuju ta me xi matitjun tsëhë jima ngu xihin ne, hacui Jesucristu, hane xi matitjun tsëhë ngu chjuun ne, hacui xihin rë na, hane xi matitjun tsëhë Jesucristu ne, hacui Nina. ⁴ Sa xi ngu xihin titsa rcu cha hora xi sahmi cha oración rë cha o sa hora xi chja cha cjua rë Nina cojo xuta ne, jemu choho sahmi cha cojo Jesucristu, me xi matitjun tsëhë cha. ⁵ Hane sa xi ngu chjuun tsajin titsa rcu na hora xi sahmi na oración rë na o sa hora xi chja na cjua rë Nina cojo xuta ne, jemu choho sahmi na cojo xihin rë na, cha xi matitjun tsëhë na. Ha tangun ni sacuaha xi casejnu rë rcu na. ⁶ Sa xi ngu chjuun vetsaain na rcu na ne, hacuaha catisejnu rë. Peru sa xi sava tsejen xi xtisun rë tsjarcu na o sejnu rë ne, catetsa na rcu na. ⁷ Xuta xi xihin ne, mijí rë xi titsa rcu me ta, me vëhë ne, matitjun me sacuatjin matitjun Nina hacuaha tsingacun me hacutjin jyë hnga Nina cojo Hasen rë me. Peru yachjin ne, tsingacun na hacutjin yehe hnga xuta xi xihin cojo cjuatacun rë me. ⁸ Cuatjin ta hya xi casahmi Nina xuta ne, titjun casahmi me ngu xihin, sehe cafaha me ngu rquí ninda rë xihin jan casahmi me ngu chjuun. ⁹ Hacuaha xuta xi xihin ne, hacuiin catsindaja Nina me ngatsë rë yachjin ta yachjin ne, catsindaja Nina ngatsë rë xuta xi xihin. ¹⁰ Vëhë xi ngatsë rë xi tivutsejen ángel ne, yachjin ne, meje rë xi cuetsa na rcu na, cojo sa xi tsingacun na xi ngahma gobiernu rë xihin ran siu na. ¹¹ Ngayejen ni ngayaan xuta ladu rë Jesucristu ne, hacuiin suvá ni chjuun o sa xi suvá ni xihin xi vengui chjí rë me ta catsijo xcusun ni ngayaan vengui chjí naja. ¹² Quixi xi cafaha Nina ngu rquí ninda rë xihin xi casahmi me chjuun xi tjun tjun casahmi me. Peru quihndë ne, ngayaan xihin ne, hacuaha tsin ngayaan tsëhë yachjin. Peru Nina casahmi me ngayëjë ngarca.

¹³ Ngayujun ni ne, ha hyun ta ngu chjuun ne, ndajin tjin xi cuetsaain na rcu na hya xi sahmi na oración rë na cojo Nina. ¹⁴ Suvá tsejen xi jemu cjuasava xi cuma rë ngu xihin sa xi nduju tsjarcu cha. ¹⁵ Peru yachjin ne, ndaja tsejen na xi nduju tsjarcu na ta, tsëhë xi Nina casua me xi cuetsa rë rcu na. ¹⁶ Peru sa xi yo meje cuichja xi ndajin tjin xcusun vëhë ne, catamachaya rë ta ngayin cojo ngayujun ni xuta rë yungun ne, ha vëhë ni xcusun naja.

Cuaain tjin xi má hya xi má suhi rë Comida tsëhë Nai naja ngajan Corinto

¹⁷ Nguehe tsihindu nuju ngujo cjua. Vaxeenndajan nuju ta, tsëhë xi hya xi matangun ngayun xi chjuhuncun Nina ne, cahndë rë xi ndaja cuetjucaa tsujun ne, tu chohotjin vetju. ¹⁸ Xi tjutjun ne, fehe cjua tsahan xi hya xi cuatjin matangun ngayun ne, hacuiin ngu tangun ni má cjuatacun nuju. Hane ngahan ne, macjain ná hitsë. ¹⁹ Xi má nuju ne, ¡hatuxa meje rë xi cuatjin cuma, cojo sa xi cuma tsejen yo xi tsëhë jain Nina! ²⁰ Hya xi matangun ngayun ne, hacuiin comida rë Nai naja xi chinu ta, ²¹ hora xi chinu niñu ne, jima ngu ngayun vangun titjun chjuhun comida nuju suvun xinu. Hane ngujo ngayun ne, hisca vojo sa nuju. Hane ngujo nga ngayun ne, hisca camachuhun. ²² ¡Sacuaha xi tsajin ndya nuju xinu siuhun! O sa tsajin ne, sacuaha xi nihñuchuvun xuta ladu rë Nina hacuaha chandunsavun xuma me xi tsajin rë. ¿Mé cuichjá cojo nuju ni? ¿Há cuaxëndaja nuju? ¡Xi cuatjin nihñu ne, cumaji!

Comida tsëhë Nai naja

²³ Cjua xi casuá camachaya nuju ne, hacui cjua xi cafahántsa tsëhë Nai naja xi chja cuitjin: Nguixun xi camá entregadu Nai naja Jesús ne, tacun

me cojo tejó xuta ladu rë me xi sinë nguixun me tsëhë suhi Pascua. Hane hora vëhë ne, cafaha me ngu pan. ²⁴ Hane xi cafë casua me nacuehji rë Nina ne, cavotohocja me pan jan, sehe cachja me cuitjin: “Vihi ne, yojo naha xi cueya ngatsë nuju. Cuitjin nihñu xcusun vihi yasen ni, cojo sa xi ninguitsjun ná.” Cuatjin cachja Jesús. ²⁵ Hane xi cajnetaha cajinë nguixun me ne, hacuanitjin ni cafaha me copa, sehe cachja me cuitjin: “Xan vihi ne, vihi jni naha xi sahmichihin rë compromisu xatsë xi tisahmi Nina cojo xuta. Cuitjin nihñu xcusun vihi jima ngu ndiya xi siuhun cuitjin, cojo sa xi ninguitsjun ná.” Cuatjin cachja me. ²⁶ Vëhë xi jima ngu ndiya xi tichinu pan vëhë hacuaha tjihyún xi hinchu copa vëhë ne, tininguitsjun tsëhë cjuaveya rë Nai naja. Hane cuanitjin cjin ni cumá hisca hya xi cuinduva nga me.

Hacutjin meje rë xi xinëe xi hmí rë Comida tsëhë Nai naja

²⁷ Ngajan xi tu yo ni xi tujyë jinë pan vëhë o sa xi hvi xan vëhë xcun Comida tsëhë Nai naja ne, quitjen jyë xi tsixcuehyu yojo rë Nai naja, quitjen jyë xi tsixcuehyu jni rë me. ²⁸ Vëhë xi meje rë xi jima ngu ngayaan ne, nichuvan suvaan cjuatacun naja, sehe xinë pan jan hacuaha siuhun xan jan ta, ²⁹ tsëhë xi yo xi tsinguitsjin yojo rë Nai naja hora xi sinë cuihi xcusun vëhë ne, sacú rë ngu castigu xi cuatjin tujyë jinë hvi. ³⁰ Vëhë xi jemu cjín xuta tsëhë ngajñi nuju ne, ndaya tjín cacun me hacuaha hmu rë me; yahnga nga me ne, hisca cahme me. ³¹ Peru sa xi ngayaan ndaja nichuvan suvaan cjuatacun naja ne, Nai naja ne, hacuaha sahmii naja me castigu. ³² Peru sa xi Nai naja sahmii naja me castigu ne, cuatjin sahmii me cojo sa xi cueyaquixi naja me ndiya hane hacuain tangun cuma ngayaan castigu cojo xuta tsehen.

³³ Vëhë xi ngayujun ni ne, hya xi cumatangun ngayun xi xinu niñu ne, tinechunyun xingun xingu xingu ngayun. ³⁴ Sa xi tjín yahnga ngayun xi jemu yojo nuju ne, cojo tjun ni xinu ngajan ndya nuju, cojo sa xi hacuain sahmii nuju Nina castigu xi cuatjin vinechunyuun xingun. Quihndë ne, sacuaaha cjuacjintacun xi yahnga ne, hya xi cuinduvatjengë nuju ne, hya sahmechehen.

12

Cjuatjo xi sua Nina ngayaan

¹ Ngayujun ni ne, meje ná xi cuijnercun sacuaaha tsëhë cjuatjo xi cuacun sua naja Nina.

² Ngayun ne, ndaja hyun xi hya xi cjëë cuisuhun ladu rë Nina ne, tujyë caningatuhun cachjuhuncun nina ndoyojo xi hatuxa tsajin cjuahñu rë.

³ Vëhë xi meje ná xi cuijnercun xi ngu xuta xi tichja me ngu cjua xi casua Hasen rë Nina me ne, hatuxa cuichjaain me cjua vihi: “¡Jesús ne, catji me cojo xitsehen!” Hacuaha suvá ni xuta xi jiya Hasen rë Nina cahntsua cjuatacun rë me xi cuma cuichja me cjua vihi: “¡Jesús ne, Nai naha me!”

⁴ Quihndë ne, jemu cjín xcusun cjuatjo xi tjín, peru suvá ni Hasen rë Nina xi sua naja yëjë cjuatjo vëhë. ⁵ Hacuaha jemu cjín xcusun xa rë Nina xi tjín, peru suvá ni Nai naja xi suaxa naja me. ⁶ Hacuaha hacuain ngu chihin xcusun xa xi Nina sahmii me xcun cjuahñu naja, peru ngu ni Nina sahmii me vëhë ngajñi jima ngu jima ngu ngayaan. ⁷ Nina sahmii me xi ma tsejen xi jiya Hasen rë me cahntsua xahasen naja xingu xingu ngayaan, cojo sa xi ndaja tsajan ngajñi naja ngayejen ni. ⁸ Ngu xuta ne, jemu vechú cjuatacun rë me hya xi chja me ngu cjua xi sua Hasen rë Nina me. Hane ngu nga xuta ne, jemu ndaja vijnercu me hya xi chja me ngu cjua xi sua Hasen rë Nina me. ⁹ Hane ngu nga xuta ne, ha Hasen vëhë ni ne, sahmii xi ndaja mangucacun me cojo Nina.

Hane ngu nga xuta ne, ha Hasen vëhë ni sahmi xi ma sahmi me xi mandaja xuta hmu rë. ¹⁰ Hane ngu nga xuta ne, fahatsja me cjuatacun xi sahmi me cjuarcun, hane ngu nga xuta ne, fahatsja me cjuatacun xi cuichja me ngu cjua xi sua Nina me. Ngu nga me ne, fahatsja me cjuatacun xi cuijnercu me mé xcusun hasen catsingatju ngu cjuatacun xi cafahatsja ngu xuta, ¿há hasen ndaja?, o ¿há hasen tsehen? Ngu nga xuta ne, fahatsja me cjuatacun xi cuichja me ngujo xcusun hne xi hvíin me. Hane ngu nga me ne, fahatsja me cjuatacun xi sua me machaya naja mé vijne xi cuacun vëhë. ¹¹ Ngu tu tu ni Hasen rë Nina xi sahmi yëjé cjuandaja vëhë, hacuaha hacui ni Hasen rë Nina xi sua naja jima ngu ngayaan hacutjin xi chuya rë.

Sacuaha ngu ni yojo má ngayejen ni

¹² Ha hyan ta yojo rë ngu xuta ne, tjin tsja, tjin ntsacu, tjin nguisin, tjin jingusa cahndë tsëhë. Peru yëjé ni cahndë vëhë ne, má ngu ni yojo rë xuta. Hacuaha cuanitjin rë Jesucristu. ¹³ Hacuaha cuanitjin naja ngayaan ta ngayejen ni ne, hya xi caxtenda ngayaan, handasa xuta ladu rë Nina o sa xutaxín, handasa mosu hndixahan o sa xuta xi ndaya tjin má ngayaan ne, peru camá ngayaan sacuaha ngu ni yojo ngatsë rë ngu tu tu ni Hasen rë Nina. Hacuaha ngayejen ni ne, ngu tu tu ni Hasen rë Nina xi cavisehen cahntsua xahasen naja.

¹⁴ Cuatjin ta yojo rë ngu xuta ne, hacuiin ngu cahndë ni tjin rë ta jemu cjín cahndë tjin rë. ¹⁵ Ntsacun ne, cuma cuichja cuitjin: “Ngatsë rë xi hacuiin ntsun má ngahan ne, vëhë xi hacuiin tsëhë yojo nuju má ngahan.” Cuatjin cuichja. Peru handasa cuatjin cuichja ne, hacuiin vëhë sahmi xi hacuiin tsëhë yojo naja má. ¹⁶ Hacuaha tyjavañujú nga ne, cuma cuichja cuitjin: “Ngatsë rë xi hacuiin túxcun má ngahan ne, vëhë xi hacuiin tsëhë yojo nuju má ngahan.” Cuatjin cuichja. Peru handasa cuatjin cuichja ne, hacuiin vëhë sahmi xi hacuiin tsëhë yojo naja má. ¹⁷ Sa xi suvá tuxcun má yëjé yojo naja ne, ¿hacutjin cuinuhyan? O sa xi suvá tyjavañujú má yëjé yojo naja ne, ¿hacutjin cuijné naja? ¹⁸ Peru Nina ne, caviyujutahá me jima ngu cahndë tsëhë yojo naja tucutjin ni xi cachuya rë me. ¹⁹ Sa xi yëjé ni yojo naja má ngu ni ntsan o sa xi ngu ni tuxcun ne, vëhë ne, hisca hacuiin yojo naja hmí rë. ²⁰ Cuatjin xi jemu cjín cahndë xi cuacun vëhë xi má ngu ni yojo naja.

²¹ Quihndë ne, tuxcun ne, cumaji cuichja xi mamijí rë ntsan, o sa rcuun ne, cumaji cuichja xi mamijí rë ntsacun ta, ²² xi cjuaquixi ne, cahndë tsëhë yojo naja xi má naja xi hitsë sa tsavi ne, vëhë cahndë xi hitsë sa mameje. ²³ Hane cahndë tsëhë yojo naja xi hitsë sa chjaharcuaain rë ne, vëhë cahndë xi hitsë sa ndaja nicaja rë. Hane cahndë tsëhë yojo naja xi má naja xi mijí rë xi ningacun rë ne, vëhë cahndë xi hitsë sa ndaja cuidadu má. ²⁴ Peru hacuiin sahmi ngu yëjé nihña cuatjin cojo cahndë tsëhë yojo naja xi ma ningacun rë. Nina ne, hya xi catsindaja me yojo naja ne, casahmi me xi hitsë sa chjahárcun rë cahndë xi hitsë sa tsavi. ²⁵ Cuatjin casahmi Nina yojo naja, cojo sa xi ngu chihin ni sahmixa yëjé yojo naja, hacuaha yëjé ni cahndë tsëhë yojo naja ne, ngu tangun ni marcun rë tsëhë xicjin. ²⁶ Hane sa xi ngu cahndë tsëhë yojo naja choho vatju má ne, hacuaha cojo sa yëjé cahndë tsëhë yojo naja choho má rë. O sa xi ngu cahndë tsëhë yojo naja vaxëndaja xuta ne, hacuaha cojo yëjé sa cahndë tsëhë yojo naja ndamá rë.

²⁷ Quihndë ne, ngayejen ni xuta ladu rë Nina ne, sacuaha yojo rë Jesucristu má ngayaan, hane jima ngu ngayaan ne, má ngayaan sacuaha ngu cahndë tsëhë yojo rë me. ²⁸ Hane ngajñi naja ngayaan xuta ladu rë Nina ne, tjuntjun

ne, caviyuju me apóstol; xi ma jo ne, caviyuju me profeta; xi ma jyan ne, caviyuju me xuta xi vicuya cjuar rë me; hane xi cjui sa ne, caviyuju me xuta xi ma sahmi cjuarcun, cojo xuta xi ma sahmi xi mandaja xuta hmu rë, xuta xi visecoo me jingu sa xuta, xuta xi vitexa naja, xuta xi ma chja me ngu hne xi hvín me mé vijne. ²⁹ Tsêhê cjuatjo vihi ne, hacuiin yêjê vihi satê naja jimangu yaan ta, ¿há ngayejen ni má ngayaan apóstol ni? ¿Há ngayejen ni má ngayaan profeta ni? ¿Há ngayejen ni vicuyan cjuar rë Nina ni? ¿Há ngayejen ni ma nihña cjuarcun ni? ³⁰ ¿Há ngayejen ni ma nihña xi mandaja xuta hmu rë ni? ¿Há ngayejen ni ma nújan hne xi hisca núhyaan mé vijne ni? ¿Há ngayejen ni ma tahan machaya rë xuta mé vijne hne vêhê ni? ³¹ Vêhê xi meje rë xi ngayun ne, catamameje nuju cjuatjo rë Nina xi hitsê sa vengui chji rë.

Quihndê ne, tsingácun nuju ngu ndiya xi hitsê sa jercu ndaja.

13

Mé vijne xi tjin naja cjuahmutacun

¹ Ngahan ne, sa xi cuichjá yêjê hne rë xuta hacuaha cuichjá hne rë ángel, peru tsajin ná cjuahmutacun ne, tangun ngahan cojo ngu quicha xi choho fane o sa ngu quicha xi hmí platillu xi jercu fane camahani. ² Sa xi cuichjá ngu cjuar rë xi sua ná Nina, sa xi vijnercú yêjê cjuar rë Nina xi tjihma, sa xi hvê yêjê cjuatacun, hacuaha sa xi ma tsiniya ngu naxi ngatsê rë xi jercu ndaja mangucacún cojo Nina, peru tsajin ná cjuahmutacun ne, tsajin mé vengui chji naha. ³ Sa xi suá rë xuta yuma yêjê xi tjin ná, hacuaha hisca suá yojo naha xi cueti, peru tsajin ná cjuahmutacun ne, tsajin mé machjirêhê ná xi cuatjin sahme.

⁴ Hya xi tjin naja cjuahmutacun ne, hacuaha jyê tacun, ndaja ngayaan, hacuiin chini ngayaan, hacuiin xta ngayaan, hacuiin nihña yehe suvaan yojo naja, ⁵ hacuiin xcuahya ngayaan, hacuiin meje naja xi suvaan ni ndaja tsajan, hacuiin ma cjan naja, hacuiin veyantacun cjuatsehen xi sahmi xuta cojo naja. ⁶ Xi tjin naja cjuahmutacun ne, tsajin mé ndama naja tsêhê cjuatsehen ta xi ndama naja ne, tsêhê cjuaquixi. ⁷ Xi tjin naja cjuahmutacun ne, ngajñi rë tu mé ni cjuacjintacun ne, hatuxa jyê tacuun, hatuxa mangu tacuun, hatuxa vetahan tacun, hatuxa caa naja.

⁸ Cjuahmutacun ne, tsajin nixtin xi cjuê. Peru cuechú nixtin xi ha quihndê suaain sa Nina cjuar rë xi cuichja profeta, ha quihndê cuichjaain sa xuta hne xi vijni rcu me, hacuaha ha quihndê suaain sa Nina cjuatacun xi ndaja cuijnercu ngu xuta cjuar rë me. ⁹ Cuatjin cuma ta cjuar rë Nina ne, sehe hitsê xi vijnercuun, hacuaha sehe hitsê cjuar rë Nina xi chja profeta. ¹⁰ Peru hya xi cjuê me xi vê chichihin yêjê cjuar rë Nina ne, hya cjuê xi tsê tsê ni hyan.

¹¹ Hya xi lihndi ngahan ne, cavisiajme sacuaha visiajmi langa, catsingátaha cacún sacuaha tsingátaha cacun langa, hacuaha cjuatacun naha ne, sacuaha cjuatacun rë langa. Peru xi camachangá ngahan ne, cavejñáxen xcusun rë langa. ¹² Quihndê ne, sehe hitsê vijnercuun cjuar rë Nina sacuaha tsejen naja hya xi chutsejenyan ni ngu speju xi hacuiin ndaja tsejen. Peru cuechú nixtin xi chutsejen xcun cojo xcun. Quihndê ne, sehe hitsê xi vijnercú. Peru cuechú nixtin xi chichihin ni cuijnercú, sacuatjin vêê ndaja ná Nina. ¹³ Quihndê ne, tjin jyan xcusun xi nihña xi tsajin nixtin xi cjuê. Tjin ne, xi mangu tacuun cojo Nina. Xi má jo ne, xi vetahan tacun Nina. Xi má jyan ne, xi tjin naja cjuahmutacun. Peru xi hitsê sa matitjun ngajñi rë xi catsijyan vêhê ne, xi tjin naja cjuahmutacun.

14

Hne xi hyaan mé vijne

¹ Quihndë ne, nihñu ngahñu xi tjin nuju cjuahmutacun. Hacuaha cata-mameje nuju xi sua nuju Nina cjuatjo rë me. Peru hitsë sa chjahyun rë me cjuatacun xi cuinújun cojo xuta ngu cjua xi sua nuju me ta, ² xuta xi chja me ngu hne xi hvín me mé vijne ne, hacuiin chja me cojo xuta ta suvá ni Nina chja me cojo ta, tsëhë xi tsajin yo vijnercu. Hasen rë me sahmi xi chja me cjua xi tsajin yo vëë. ³ Peru me xi chja cjua xi casua Nina me ne, chja me cojo xuta, cojo sa xi cuisecoo me xuta hacuaha sua rë me cjuetacun. ⁴ Xuta xi chja me ngu hne xi hvín me mé vijne ne, visecoo suvá rë me yojo rë me. Peru xuta xi chja me ngu cjua xi casua Nina me ne, visecoo rë yëjë xuta rë yungun.

⁵ Ngayujun ni ne, meje ná xi cuma cuinújun hne xi vijniircun, peru hitsë sa meje ná xi chjuhunnstun cjuatacun xi cuinújun cojo xuta ngu cjua xi sua nuju Nina ta xuta xi chja me cojo xuta ngu cjua xi sua Nina me ne, hitsë sa matitjun me xi cuma rë me xi chja hne xi vijniircuun. Peru sa xi cuma cuichja me cojo naja mé vijne hne vëhë ne, ndatjin ta cuisecoo naja ngayejen ni xuta rë yungun xi cuatjin sahmi me. ⁶ Vëhë xi hya xi cjuëjtjengë nuju ne, venguiin chji rë xi cuichjá cojo nuju ngu hne xi vijniircun. Xi vengui chji rë ne, hacui xi suá cumachaya nuju ngu cjua xi casua ná Nina, o sa xi cuichjá cojo nuju ngu cjuatacun xi sua Nina, o sa xi cuicuyá nuju ngu cjua rë Nina o ngu cjuachacun.

⁷ Cuma cuinújan ne, sa xi ngu tyjo o sa ngu arpa hacuiin ndaja fane ne, hisca hyaan mé pieza fane. ⁸ Hacuaha sa xi ngu tyjo rë sindadu hacuiin ndaja sua xta rë ne, tsajin yo cuëhëchjine rë xi cjue xcun si. ⁹ Hacuanitjin nuju ngayun ta sa xi cojo ntsuvun nújun ngu cjua xi nuhyaain rë ne, tsajin yo xi cuijnercu cjua vëhë ta sacuaha xi ngajñi tjo ni nújun. ¹⁰ Nguehe ngasunhndë ne, hisca hyaan há cjin xcusun hne tjin, hane yëjë ni ne, tjin mé vijne. ¹¹ Peru sa xi vihndeenu ngu hne ne, sacuaha ngu xuta ngu nangui ngahan xi cuma rë xuta xi tichja cojo ná jan, hacuaha me vëhë ne, sacuaha xuta ngu nangui me xi cuma ná ngahan. ¹² Vëhë xi quihndë ta ngayujun ni jemu meje nuju cjuatjo rë Nina ne, nihñu ngahñu xi sacú nuju ngu cjuatjo xi visecoo rë yëjë sa xuta rë yungun.

¹³ Vëhë xi xuta xi chja me ngu hne xi hvín me mé vijne ne, catjehya rë me Nina cojo sa xi cuma suacuenda me mé vijne. ¹⁴ Sa xi sahme oración naha cojo ngu hne xi vijniircú ne, hasen naha ne, sahmixa, peru cjuatacun naha ne, sahmixaain. ¹⁵ ¿Hacutjin sahme ni? Sahme oración naha cojo hasen naha, hacuaha sahme oración naha cojo cjuatacun naha. Së cojo hasen naha, hacuaha së cojo cjuatacun naha. ¹⁶ Sa xi ngayun nihñuu cuatjin ne, hya xi tuhun nacuechji rë Nina cojo hasen nuju ne, cumaji cuichja xuta xi yahnga sa: “Cuatjin jain” ta, tsëhë xi cjua xi nújun ne, vijniircu me. ¹⁷ Handasa jemu ndaja tuhun nacuechji rë Nina, peru xuta xi yahnga ne, visecaain camahani rë me. ¹⁸ Súa nacuechji rë Nina ta hitsë sa chjá ngahan hne xi vijniircú xi cuma nuju ngayujun ni. ¹⁹ Peru hya xi ma tangun ngahan cojo xuta ngagan yungun ne, hitsë sa chuya ná xi cuichjá ndastu hñu cjua cojo cjuatacun naha cojo sa xi cuicuyá rë xuta, xi cuma rë xi cuichjá të mil cjua cojo ngu hne xi vijniircu me.

²⁰ Ngayujun ni ne, ha quihndë xicaningatuun tacún sa sacuatjin tsingataha cacun quihndi. Sacuatjin rë ngu quihndi xi hisca hvín mé xi hmí rë cjuatsehen ne, cuatjin meje rë xi hacuaha hyuun. Peru xi cojo cjuatacun

nuju ne, meje rë xi ningatuhun tacún sacuaaha tsingataha cacun ngu xuta changá. ²¹ Xcun xujun rë Nina ne, camahindu cjuua xi cachja me cuitjin: “Ngahan ne, tsingátju xuta ngu nangui xi chja jingu sa hne, hane hne rë me cuichja me cjuua naha cojo yějë xuta ladu naha. Peru handasa cuatjin sahme ne, cuetaharcuaain me cjuua naha, chja Nina.” Cuatjin camahindu. ²² Véhë xi cjuatjo xi casua naja Nina xi ma nújan hne xi hisca hyaan mé vijne ne, hacuiin ngatsë rë xuta xi ha mangu cacun cojo Nina xi casua me ta ngatsë rë xuta xi tsitjungui cjuua rë me. Hane cjuatjo xi ma nújan ngu cjuua xi sua naja Nina ne, hacuiin ngatsë rë xuta xi tsitjungui cjuua rë me xi casua me ta ngatsë rë xuta xi ha mangu cacun me cojo rë me. ²³ Véhë xi hya xi matangun ngayujun ni ngayun xuta rë yungun, sa xi ngayujun ni nújun ngu hne xi hisca hyuun mé vijne hane cjuehe ngujo cha xi hvíin cjuua rë Nina hacuaaha hisca manguaain cacun cha cojo me ne, zhácuiin tsingataha cacun cha xi sca nuju ni? ²⁴ Peru sa xi ngayujun ni ngayun nújun ngu cjuua xi sua nuju Nina hane cjuehe ngu cha xi manguaain cacun cojo Nina hacuaaha hisca hvíin cha cjuua rë me ne, xi vihndë cha yějë cjuua véhë ne, cuijnercu cha xi jemu tjin jyë rë cha, súvá ni cha tsichuva cha cjuatacun rë cha, ²⁵ hacuaaha cjuua xi hinchahma ngajñi rë cjuatacun rë cha ne, cuitsjen rë cha. Ngajan xi cjuua cuiticjxcun cha, cjuaharcun cha Nina. Hacuaaha tsinguixi cha xi tacun jain Nina guehe ngajñi nuju.

Meje rë xi ndandaja nihña yějë ni

²⁶ Ngayujun ni ne, cuitjin vijne cjuua xi titsihíndu nuju. Hya xi matangun ngayujun ni ne, ngu ngayun ne, sun tséhë Nina, ngu nga ngayun ne, vicuyun ngu cjuua rë Nina, ngu nga ngayun ne, nújun ngu cjuua xi casua nuju Nina, ngu nga ngayun ne, nújun ngu hne xi hisca hyuun mé vijne, hane ngu nga ngayun ne, nújun mé vijne cjuua rë hne jan. Xi meje rë ne, yějë ni xcusun xi nihñu vë ne, cuatjin nihñu cojo sa xi cuisecuun xingun ngajñi nuju. ²⁷ Sa xi tjin xuta xi cuichja me hne xi vijniircun ne, catichja jo o sa xi jyan ni me, hacuaaha chuva ngu me catichja me. Hane meje rë xi cuinújun ngu ngayun mé vijne cjuua xi cachja xuta xi cuacun jan. ²⁸ Peru sa xi tsajin ngu ngayun xi cuma nihñu cuatjin ngajan yungun ne, catiyujujuu ni xuta xi cuacun vë. Catichja súvá ni me cahntsua xahasen rë me, o sa súvá ni Nina catichja me cojo me. ²⁹ Hacuanitjin ni sa xi tjin xuta xi cjuahahtsja me ngu cjuua tséhë Nina ne, jo jyan ni me catichja me, hane yějë sa ngayun ne, nichuvun cjuua véhë. ³⁰ Sa xi ngu ngayun xi nechun ndyá chjuhunntsun ngu cjuua tséhë Nina ne, catisejyu me xi titjun tichja jan. ³¹ Xi cuatjin ne, ngayujun ni cuma cuinújun chuva ngu chuva ngu ngayun ngu cjuua xi chjuhunntsun tséhë Nina, cojo sa xi hacuaaha cojo yějë sa ngayun ne, cumachaya nuju hacuaaha sacú nuju cjuetacun. ³² Xuta xi chja me ngu cjuua xi fahatsja me tséhë Nina ne, cjuua véhë cuitexa me cjuatacun rë súvá me ta. ³³ tséhë xi Nina ne, chuyiin rë me xi tujyë nihña ta xi chuya rë me ne, ngu cjuandaja cjuajeya.

Sacuatjin xcusun xi nihña ngayejen ni xuta ladu rë Nina ne, ³⁴ yachjin ne, miji rë xi cojo na cuichja na hya xi tjin tangun ngayaan yungun ta, tséhë xi tsajin cahndë xi cuichja na. Xi meje rë ne, catiyuju na ngahma gobiernu rë xihin rë na, sacuatjin vitexa ley rë Nina. ³⁵ Sa xi tjin ngu cjuua xi meje cumachaya rë na ne, ndava na catinenguise na xihin rë súvá na ta, tséhë xi jemu cjuasava xi ngu chjuun cuichja na hya xi tjin tangun ngayaan ngajan yungun.

³⁶ ¿Há tjtujun ngayun canújun cjava rë Nina cojo xuta? ¿Há suvun ni catsingatju nuju Nina cjava vëhë ni? ³⁷ Sa xi tjin ngu xuta xi má rë me xi profeta me o sa quitsë rë xahasen rë me cojo Hasen rë Nina ne, catijnercu me ta cjava xi titsihindu nuju vi ne, Nai naja vitexa me. ³⁸ Peru sa xi miji sahmicuenda me cjava naha ne, hacuaha xicanihñu cuenduun cjava rë me.

³⁹ Vëhë xi ngayujun ni ne, catamameje nuju xi cuma ngayun profeta, hacuaha xicanichuun rë xuta cahndë xi cuichja me hne xi vijniircu me. ⁴⁰ Xi meje rë ne, yëjë ni xcusun xi nihñu ne, ndandaja nihñu hacuaha chichihin ni nihñu yëjë.

15

Cjuandajiyi xi chja tsëhë xi cavuya Jesucristu cjuahñu

¹ Ngayujun ni ne, meje tsinguitsjen nuju tsëhë cjuandajiyi xi casúa camachaya nuju, cjuandajiyi xi chja tsëhë Jesucristu. Cachjuhunnstun cjuandajiyi vëhë, hacuaha ndaja sa tijimangu tacún cojo. ² Hane ngatsë rë cjuandajiyi vëhë ne, tivetjuntjun tsëhë jyë nuju, sa xi nismutacuun cjuandajiyi vëhë. Cuatjin tivetjuntjun sa xi hacuün tu mahya camangu tacún cojo.

³ Ngahan ne, casúa camachaya nuju cjava xi matitjun xi cafahántsa. Cachjá ta Jesucristu ne, cahme me cojo sa xi tsicjë me jyë naja, sacuatjin camahindu xcun xujun rë Nina. ⁴ Hacuaha cachjá cojo nuju ta caseyaniji me hane xi ma jyan nixtin ne, cavuya nga me cjuahñu, sacuatjin camahindu xcun xujun rë Nina. ⁵ Hacuaha cachjá cojo nuju ta cavëë Pedru Jesucristu, sehe cavëë yëjë tejó apóstol jan me. ⁶ Sehe ngu tangun ni cavëë nga vatju sa hñú cientu xuta ladu rë me me. Hane handasa cahme yahnga me ne, peru jemu cjin me xi siu quicun sa hisca quihndë. ⁷ Sehe cavëë Jacobo me, sehe cavëë nga yëjë apóstol me.

⁸ Hane xi camá ngascan xi cavuya cjuahñu rë me ne, ngahan cahvë me. Ngahan xi sacuaha ngu quihndi xi cavatjutaha tsëhë nixtin rë, sehe catsin. ⁹ Cuatjin chjá ta, tsëhë xi ngahan ne, hitsë sa chüva vengui chji naha xi cuma rë apóstol xi yahnga. Ngahan ne, hisca vechiin chuva rë xi apóstol cuichja xuta tsahan ta, tsëhë xi jemu jyë cjuañihi casúa rë xuta ladu rë Nina titjun. ¹⁰ Peru ngatsë rë cjuandaja rë Nina ne, ngahan ne, apóstol má ngahan. Hane cjuandaja xi casahmi me cojo ná ne, hacuün tu mahya ta hitsë sa hñu casahme xa xi cuma rë yëjë sa apóstol. Peru hacuün suva casahme ta cjuandaja rë Nina cavisecoo ná. ¹¹ Quihndë ne, cuendaain rë ¿há ngahan? o ¿há me vëhë ne?, peru cjuandajiyi vëhë xi catihin camachaya nuju, hacuaha cjava vëhë xi camangu tacún cojo.

Cjuandajiyi xi chja tsëhë xi cuya nima cjuahñu

¹² Quihndë ne, quihndë ta tihin machaya rë xuta xi Jesucristu ne, cahme me sehe cavuya nga me cjuahñu ne, ¿hacutjin má xi nújun yahnga ngayun xi nima ne, vuyaaain nga cjuahñu ni? ¹³ Sa xi vuyaaain nima cjuahñu ne, ngajan xi Jesucristu ne, hacuaha cavuyaaain nga me cjuahñu. ¹⁴ Hane sa xi cavuyaaain Jesucristu cjuahñu ne, ngajan xi tu mahya xi cuatjin tihin machaya rë xuta, hacuaha ngayun ne, tu mahya xi cuatjin mangu tacún. ¹⁵ Sa xi cuatjin ne, ngajan xi hacuün cuatjin cjava xi nújin tsëhë Nina ta, tsëhë xi nújin xi Nina ne, catsicuya me Jesucristu cjuahñu. Peru quixiin xi catsicuya Nina Jesucristu cjuahñu sa xi hatuxa vuyaaain nima cjuahñu. ¹⁶ Sa xi hatuxa tsicuyaaain Nina nima cjuahñu ne, ngajan xi hacuaha catsicuyaaain me Jesucristu cjuahñu.

17 Hane sa xi catsicuyaaïn me Jesucristu cjuahñu ne, ngajan xi tsajin mé vengui chji rë xi cuatjin mangu tacún cojo rë me, hacuaha cjeë camahani cjuë jyë nuju. 18 Hacuaha nima xi camangu cacun cojo Jesucristu ne, hacuaha cachajá me. 19 Sa xi súvá ni quihndë xi nechan cjuahñu machjirëhë xi cuitjin vetahan tacun Jesucristu ne, hitsë sa jemu chojyih tsajan xi cuma rë yëjë sa xuta.

20 Peru xi cjuaquixi ne, Jesucristu ne, Nina catsicuya rë me cjuahñu. Tsëhë yëjë nima xi cahme ne, me vëhë tjtutjun me cavuya me cjuahñu.

21 Sacuatjin xi ngatsë rë ngu xihin cavisehen cjuaveya ngasunhdë ne, hacuanitjin ni ngatsë rë ngu xihin ne, cavisehen cjuatacun xi nima ne, cuya cjuahñu. 22 Ngatsë rë xi tjë rë Adán má xuta ne, vëhë xi yëjë ni me ne, hme me. Hacuanitjin ni ngatsë rë xi sahmitangun xuta cjuatacun rë me cojo Jesucristu ne, vëhë xi yëjë ni me xi cuacun vë sacú rë me cjuahñu xatsë. 23 Peru cuatjin sacú rë jima ngu me hacutjin xi satë rë me: tjtutjun ne, Jesucristu; ngaxtun vëhë ne, hya xi cuya nga Jesucristu ne, xuta xi ladu rë me ne, tsicuya me cjuahñu, sacú rë me cjuahñu xatsë. 24 Ngaxtun vëhë nga ne, tsicjë Jesucristu yëjë xutaxa rë xi jemu tsehen, hacuaha tsicjë me yëjë xitsehen. Hane xi matjenguicjin ne, sahmi me entregadu cojo Nina Nahmi naja gobiernu xi sahmi me. Hane hya cuijnetaha ngasunhdë. 25 Cuatjin cuma ta meje rë xi Jesucristu ne, sahmi me gobiernu hisca hya xi cuiyuju Nina ngahma gobiernu rë Jesucristu yëjë ni xi sahmi rë me condra. 26 Hane xi cuatju tsicjë Nina yëjë sa xi sahmi rë Jesucristu condra ne, sehe tsicjë me cjuaveya ta, tsëhë xi hatuxa yëjë ngarca ni caviyuju Nina ngahma gobiernu rë Jesucristu. 27 Chja xujun rë Nina xi caviyuju me yëjë ngarca ni ngahma gobiernu rë Jesucristu. Peru ha súvá tsejen xi hacuïn cojo Nina, me xi caviyuju yëjë ngarca ni jan, cavëjña me. 28 Peru hya xi ha yëjë ngarca ni cuiyuju ngahma gobiernu rë Jesucristu, me xi Quihndi rë Nina ne, hya cuejña súvá Jesucristu yojo rë me ngahma gobiernu rë Nina, me xi caviyuju yëjë ngarca ni ngahma gobiernu rë Jesucristu. Cuatjin cuma, cojo sa xi Nina ne, cuma titjun camahani me tsëhë yëjë ngarca ni.

29 Quihndë ne, sacuaha xuta xi cuatjin xtenda me ngatsë rë nima ne, ¿mé machjirëhë? Sa xi hatuxa vuyaaïn nima cjuahñu sacuatjin chja yahnga xuta ne, ¿mé má cuatjin xtenda xuta ngatsë rë nima? 30 Hane sacuaha ngayin ne, ¿mé má yëjë ni hora nechintihin tsavi? 31 Nina vëe me xi hacuaha ngahan ne, ngu nixtin ngu nixtin ne, tejnãtaha tsavi tsëhë cjuaveya. Ngayujun ni ne, jemu vaxëndaja nuju ngatsë rë xi tjin tangun cjuatacun naja cojo Nai naja Jesucristu. 32 Sa xi ngahan cavitejnãtaha tsavi nguehe Efeso sacuaha ngu xuta xi hacuïn ladu rë Nina má me ne, ¿mé ndaja tsahan ni? Sa xi hatuxa vuyaaïn nima cjuahñu ne, sacuatjin chja cju ne: “Jemu sa ndaja xi xinëë siuun ta, nchujun ni nguini ne, cueyan!” 33 Ha quihndë xicatuun cahndë xi cumandacha sa ngayun ta, tjin ngu cju xi chja cuitjin: “Xi nihña tangun cojo xuta tsehen ne, vëhë tsinguetsun rë xcusun ndaja xi nihña.” 34 Catuya nga catejña chihin cjuatacun nuju, hacuaha ha quihndë xicanihñuu sa cjuatsehen. Tjin yahnga ngayun ne, hisca hyuun Nina. Cuatjin chjá cojo nuju cojo sa xi cuma sava nuju.

Xcusun yojo xi sacú rë nima hya xi cuya cjuahñu

35 Peru tjin rë yahnga ngayun xi chjinengunsun cuitjin: “¿Hacutjin nga cuya nima cjuahñu? ¿Mé xcusun yojo rë me xi cuya?” Cuatjin chjinengunsun. 36 ¡Ngarca, xan! Hya xi nitjen ngu tutjë ne, titjun cueya sehe cuetju. 37 Xcusun xi nitjen ne, hacuïn xcusun xi sehe cuma jyë jan, ta ngu tutjë ni xi nitjen,

sacuaha ngu trigu o sa tu mé sa xcusun tutjé. ³⁸ Peru Nina sua me xcusun rē hacutjin jyihí xi cachuya rē me. Jima ngu tutjé ne, sua rē me xcusun rē xi tsēhē suvá. ³⁹ Yojo ne, hacuiin ngu xcusun ni tjin ta hacjahi xcusun yojo rē xuta, hacjahi xcusun yojo rē chu, hacjahi xcusun yojo rē chu nisē, hacuaha hacjahi xcusun yojo rē chu ti. ⁴⁰ Tjin hasen xi tjin ngajan ngahnga hacuaha tjin hasen rē yējē xi tjin nguehe nangui. Peru hacjahi tsejen xcusun xi tjin ngajan ngahnga hacuaha hacjahi tsejen yējē xi tjin nguehe nangui. ⁴¹ Hacjahi hasen ndajyihí rē tsuhi, hacjahi hasen ndajyihí rē sá, hacuaha hacjahi hasen ndajyihí rē niñú. Hisca ngajñi rē niñú ne, hacjahi hacjahi hasen rē jima ngu.

⁴² Hacuaha cuatjin cuma hya xi nima cuya cjuahñu. Hya xi seyaniji nima jan ne, hatuxa fē fehndu yojo rē. Peru hya xi nima cuya nga cjuahñu ne, tsajin nu tsajin nixtin xi cjuehndu yojo rē. ⁴³ Hya xi seyaniji ne, tsajin camahani mé ndajyihí, peru hya xi cuya nga cjuahñu ne, jercu ndajyihí camahani. Hya xi seyaniji ne, tsajin camahani ngahñu rē, peru hya xi cuya nga cjuahñu ne, jemu hñu camahani ngahñu rē. ⁴⁴ Hya xi seyaniji ne, seyaniji ngu yojo naja xi hatuxa tsēhē cjuahñu xi tjin nguehe ngasunhndē vihi, peru hya xi cuya nga cjuahñu ne, cuya ngu yojo naja xi hatuxa tsēhē cjuahñu xi tjin ngajan ngahnga. Quihndē ta tjin yojo naja xi tsēhē cjuahñu xi tjin nguehe ngasunhndē ne, ngajan xi hatuxa tjin yojo naja xi tsēhē cjuahñu xi tjin ngajan ngahnga.

⁴⁵ Hacuaha cuatjin camahindu xcun xujun rē Nina hiscan chja cuitjin: “Adán, xihin xi tjutjun camá ne, casua Nina me cjuahñu.” Peru Jesucristu, me xi canduva camá ngascan ne, me vēhē Hasen xi sua cjuahñu. ⁴⁶ Hacuiin titjun sacú naja cjuahñu xi tsēhē ngahnga ta tsēhē ngasunhndē titjun sacú naja, sehe sacú naja cjuahñu xatsé xi tsēhē ngahnga. ⁴⁷ Xihin xi tjutjun camá jan ne, cojo nihndē camá. Vēhē xi tsēhē ngasunhndē má. Peru Jesucristu, xihin xi majo jan ne, canduva me tsēhē ngahnga. ⁴⁸ Yējē xuta xi tsēhē ngasunhndē me ne, hatuxa tangun me cojo xihin xi nihndē camá jan. Hane yējē xuta xi tsēhē ngahnga me ne, hatuxa tangun me cojo xihin xi canduva tsēhē ngahnga. ⁴⁹ Sacuatjin xi camá ngayaan sacuaha xihin xi nihndē camá jan ne, hacuanitjin cuma ngayaan sacuaha xihin xi canduva tsēhē ngahnga jan.

⁵⁰ Ngayujun ni ne, nguehe cuichjá cojo nuju ta yojo naja xi yojo cojo jni camá ne, cumaji cuisehen hiscan sahmi Nina gobiernu. Hacuaha ngu xcusun xi hatuxa fehndu ne, cumaji cuisehen hiscan tsajin camahani mé xi fehndu. ⁵¹ Chutsujun ni. Nguehe cuichjá cojo nuju ngu cjuatacun xi jiyahma titjun: Hacuiin ngayejen ngayaan cueyan. Peru ngayejen ni sacú yojo xatsé naja ⁵² ngu marcu macjain ni, sacuaha xi ngu cuechjan ngu chuxahan ni tuxcun, hya xi cjuane sacuaha ngu tyjo xi meje cuijnetaha fane ta, cjuane sacuaha ngu tyjo, sehe cuya nima cjuahñu cojo yojo xatsé rē xi tsajin nu tsajin nixtin cjuehndu. Hane ngayaan ne, hacuaha sacú naja yojo xatsé naja. ⁵³ Cuatjin cuma ta, yojo naja vi xi hatuxa fehndu ne, meje rē xi cuya ngu yojo xi hatuxa fehndi. Yojo naja vi xi hatuxa hme ne, meje rē xi cuya ngu yojo xi hatuxa hmii. ⁵⁴ Hane hya xi cuatjin cuma ne, hya cuetjucaa cjuá xi camahindu xcun xujun rē Nina xi chja cuitjin: “Cjuaveya ne, cjué camahani. Cjuahñu xatsé xi fehndi ne, vēhē scaa rē cuetjundaja. ⁵⁵ ¡Cjuaveya ne, ha quihndē tsajin camahani rē ngahñu! ¡Cjuaveya ne, ha quihndē tsajin camahani mé cjuahngatacun xi cuma sahmi cojo naja!” ⁵⁶ Cjuaveya ne, sahmi cjuahngatacun cojo xuta ngatsé rē cjuatsehen, hacuaha cjuatsehen

ne, tjin rē ngahñu ngatsē rē ley rē Moisés. ⁵⁷ Peru nacuechji rē Nina, me xi sahmi xi vetjunndajan ngatsē rē yějē ni xi casahmi Nai naja Jesucristu.

⁵⁸ Vēhē xi ngayujun ni ne, ngayun xi jemu hmú cacún nuju ne, tejñuhñu xahasen nuju, xicavetjunxuun tsēhē ndiya rē Nina. Yějē ni nixtin ne, tángun nduju camaha sa nihñu xa xi casua nuju Nai naja. Ha hyun ta yějē xa xi nihñu ne, hacuiin tu mahya, xi cuatjin tjin tangun cjuatacun nuju cojo Nai naja.

16

Cuma tangun tujún xi cjue Jerusalén

¹ Quihndē ne, sacuaaha tujún xi jima tangun xi cjue cuisecoo rē xuta ladu rē Jesucristu, me xi jemu choho tivatju tijima ngajan Jerusalén ne, sacuatjin cachjá cojo xuta rē yungun ngajan distritu Galacia ne, cuatjin nihñu. ² Jima ngu domingu ne, meje rē xi ngayujun ni ne, tejñuxun tsē tsē tujún xi nihñu ganar tsēhē xa xi nihñu. Tetjún ne, cojo sa xi hya xi cjuēhē ndyá ne, mijí rē xi chjahya nga rē tujún. ³ Hane hya xi cjuēhē ndyá ne, yo xuta xi cuinúnjun xi cjue ne, tsihindu ngahan xujun xi cuaaha me, sehe tsingátju me cjuecani me cjuatjo nuju ngajan Jerusalén. ⁴ Hane sa xi tsejen ta ndatjin xi ngahan cjuē ne, cuma cjue me cojo ná.

Sua Pablo machaya rē xuta Corinto xi cjuetjengui me me

⁵ Cuechú nixtin xi cjuētjengē nuju, peru hya xi ha cavátju distritu Macedonia, tsēhē xi hatuxa tjin ná xi cuátju ngajan. ⁶ Cuma rē cuitejñataha cojo nuju ngujo nixtin, o sa xi yějē nixtin rē chan hnchan. Hane xi cuatjin ha cavitejñataha cojo nuju hitsē ne, cuma cuisecuun ná hitsē xi cjuē sa hiscan xi cjuē. ⁷ Cuatjin tsingátaha cacún ta, tsēhē xi mijí ná xi nduva scútsejen nuju xi tu ñaja cuátju ni ta xi vetahá cacun ne, xi cuitejñataha cojo nuju jyē nixtin, sa xi sua Nai naja cahndē.

⁸ Peru cuitejñataha nguehe Efeso hisca xi cuechú suhi tsēhē Pentecostés ta, ⁹ tsēhē xi jemu casacu ná cahndē xi sahme xa xi ndatjin cuetjucaa, handasa hacuaaha jemu tjin xuta xi sahmi ná me condra.

¹⁰ Quihndē ne, sa xi cjue scusehenya nuju Timoteo ne, nihñu xi hacuiin cumacjín cacun me xi cuejña me ngajñi nuju ta, tsēhē xi sahmi me xa rē Nai naja sacuatjin sahme ngahan. ¹¹ Vēhē xi hisca ngu yun ne, mijí rē xi nihñuchuvun me. Tisecuun rē me xi cjue sa me cojo cjuandaja cjuajeya, cojo sa xi cuma cuinduvatjengui ná me ta, tsēhē xi nguehe tejñaya rē me cojo sa ngujo xuta ladu rē Nai naja xi nduva cojo me.

¹² Quihndē ne, sacuaaha Apolos ne, jemu cachjá cojo rē me xi cjue me cojo ngujo sa xuta ladu rē Nai naja jan, cjuetjengui nuju me, peru mijí cjue me xi ngutjen. Peru cjue me nixtin hya xi sua rē me chuva rē.

Cjua xi vijnetaha

¹³ Nechun cuidadu. Ndaja sa catamangu tacún cojo cjuachacun xi macjain naja. Tiyujunhñu cjuatacun nuju hacuaaha tuhun ngahñu xahasen nuju.

¹⁴ Yějē ni xi nihñu ne, nihñu cojo cjuahmutacun.

¹⁵ Ngayujun ni ne, ha hyun ta yějē me xi siu ndava Estéfanos ne, me xi cuacun vē tjtun cavisehen me ladu rē Jesucristu ndyá Acaya, hacuaaha casua súvá me yojo rē me xi cuisecoo me xuta ladu rē Jesucristu. ¹⁶ Meje ná xi ngayujun ni ne, tinuhyun tsēhē xuta xi cuatjin sahmi, hacuaaha tinuhyun tsēhē xuta xi visecoo me xcun xa rē me xi cuacun vēhē.

¹⁷ Jemu ndama ná xi cafehe Estéfanos nguehe, cojo Fortunato cojo Acaico. Handasa tsajin ngayujun ni nguehe, ¹⁸ peru ndastu me xi jyan vi ne, casua ná me cjuetacun, sacuatjin casua nuju me ngayun cjuetacun. Xuta xi cuatjin sahmi ne, meje rē xi chjuhuncun me.

¹⁹ Xuta tsēhē yējē ni yungun nguehe distritu Asia ne, tsingatju me ngu nina rē me tsujun ngayujun ni. Aquila cojo Priscila, cojo yējē sa xuta ladu rē Jesucristu xi ma tangun me ndava me vēhē ne, hacuaha tsingatju me ngu nina rē me tsujun ngayujun ni xi hacuaha tjin tangun cjuatacun nuju cojo Jesucristu. ²⁰ Yējē ni xuta ladu rē Jesucristu nguehe ne, tsingatju me ngu nina rē me tsujun. Tuhun rē xingun nina, cojo cjuandaja cojo cjuahmutacun chutatsuhun xingun, sacuatjin xcusun naja.

²¹ Suva ngahan, Pablo, tsihindu nuju ngu cjua vihi, xi tisuá nuju ngu nina.

²² Sa xi ngajñi nuju tjin ngu me xi hmaai cacun me Nai naja ne, catisatiin rē me cjuandaja rē Nai naja. ¡Ngayun Nai naja, nduvun!

²³ Nai naja Jesucristu catisua nuju me cjuandaja rē me. ²⁴ Ngahan ne, hacuaha tsingátju cjuahmutacun naha xi cuma nuju ngayujun ni, ngatsē rē xi tjin tangun cjuatacun naja cojo Jesucristu.

Carta xi majo catsingatju San Pablo xi cafahatsja xuta nandya Corinto

¹ Ngahan Pablo ne, casuaxa ná Jesucristu xi má ngahan apóstol tséhê me, tséhê xi cuatjin xi meje rê Nina. Hane ngahan cojo cha Timoteo xingueen ne, ningatjin ngu xujun vi tsujun, ngayujun ni xuta Corinto xi xuta ladu rê Nina ngayun. Hacuaha ningatjin xujun vi xi scutaya yêjê sa xuta ladu rê Nina jinguyê ni estadu Acaya vê. ² Nina Nahmi naja cojo Nai naja Jesucristu ne, catusua nuju me cjuandaja cjuajeya.

Vaxëndaja Pablo Nina ngajñi rê cjuañihi

³ Nina Nahmi rê Nai naja Jesucristu ne, jemu tjin rê me cjuandaja. Me vêhê ne, hatuxa tjin rê me cjuayumatacun cojo niji hacuaha hatuxa sua niji me cjuetacun. ⁴ Sua niji me cjuetacun ngajñi rê yêjê ni cjuañihi xi vatjin má, cojo sa xi ngayin ne, hacuaha cuatjin cuma tihín rê xuta xi yahnga cjuetacun vêhê ngajñi rê yêjê cjuañihi xi vatju me má. ⁵ Chuva rê xi vatjin cjuañihi sacuatjin xi cavatju Jesucristu camá ne, hacuaha cuatjin sua niji me cjuetacun. ⁶ Hya xi cuatjin vatjin cjuañihi ne, hatuxa cuatjin má cojo sa xi ngayun ne, sacú nuju cjuetacun hacuaha cuetjuntjun tséhê jyê nuju. Hacuaha hya xi cuatjin sacú niji cjuetacun ne, cuatjin má cojo sa xi hacuaha cojo ngayun ne, sacú nuju cjuetacun. Hane sacú nuju cjuetacun vêhê ngatsê rê xi hacuaha caa nuju cojo cjuañihi sacuaha cjuañihi xi vatjin má. ⁷ Ngayin ne, jemu vetihin tacuin nuju fa, tséhê xi hyin ta sacuatjin xi tivatjun cjuañihi ne, hacuaha tisacu nuju cjuetacun.

⁸ Ngayujun ni ne, meje niji xi cumachaya nuju cjuacjintacun xi cavatjin camá ngajan estadu Asia. Jemu jyê camahani cjuañihi xi cavatjin camá, hisca ngahñu sa tsajin niji xi scaa niji cojo cjuañihi vêhê; quihndê tsajin niji cjuetacun xi cojo cjuahñu cuijnitihin. ⁹ Peru ngayin ne, hisca hatsêê camangu tacuin cojo cjuaveya niji. Cuatjin camá cojo sa xi hacuaha cuetihin tacuin cjuetacun niji suvin ta cuetihin tacuin Nina, me xi tsicuya cjuahñu rê nima. ¹⁰ Nina ne, cavaxêtje niji me tséhê cjuacjintacun jyê xi meje tsiquehen niji jan, hacuaha cuaxêtje sa niji me. Cavetihin tacuin Nina xi cuatjin cuaxêtje sa niji me, ¹¹ tséhê xi ngayun ne, hacuaha tivisecuun niji xi tichjahyun rê Nina ngatsê niji. Hane xi cjin xuta sahmi me cuatjin ne, hacuaha jemu cjin cuma ngayun xi tuhun nacuechji rê Nina tséhê cjuandaja xi sua niji me.

Chja Pablo mé má cjêê cjue me Corinto

¹² Ngayin ne, nihñi yehe yojo niji ngatsê rê xi ha hyin cojo cjuatacun niji ta tyjahi xahasen niji hacuaha nechin nguñaja tacuin xi tivanguin cojo ngasunhndê niji. Peru hacuaha cojo cjuatacun niji suvin xi cuatjin cun ngayin ta cojo cjuandaja rê Nina. Hacuaha hatuxa cuatjin cun ngayin hya xi nechin ngajñi nuju. ¹³⁻¹⁴ Sacuaha cjua xi nihindin nuju ne, suvá cjua xi ma chutayun hacuaha vijnercun. Ha vijnercun hitsê, peru meje niji xi ndaja sa cuijnercun cjuetacun vihi: Cuma nihñi yehe yojo nuju ngatsê niji sacuatjin xi cuma nihñi yehe yojo niji ngatsê nuju, hya xi cuya nga Nai naja Jesucristu.

¹⁵ Xi cuatjin catsingátaha cáacun ne, cavejñá xi cjuê scusehenya nuju titjun, cojo sa xi jo ndiya sacú nuju cjuandaja. ¹⁶ Meje cuátju nangui nuju hya xi canduvá nguehe estadu Macedonia. Hane xi cuijnetaha cjuacjintacun

naha nguehe Macedonia ne, hacuaha meje cúa scusehenya nga nuju ngu ndiya. Sehe ngajan xi ngayun ne, cuma cuiseacun ná cojo sa xi cuma cjuë ngajan distritu Judea. ¹⁷ Xi cuatjin cavejñá cjuatacun naha sehe casahmee ne, ¿há tsajin rë cjuaquixi cjuá naha, má nuju? ¿Há má nuju ngayun ne, hya xi vejñá xi sahme ngu xcusun xi sahme ne, tangun han cojo ngu xuta ngasunhdë xi xcun cojo xcun ne, chja me ta cuma, hane xi taha ngaxtun ne, chja me ta cumaji? ¡yéya, hacuiin cuatjin! ¹⁸ Nina, me xi hatuxa cjuaquixi ne, vëë me ta hacuiin jo ma tacuin xi nújin cojo nuju. ¹⁹ Sacuaha Jesucristu, Quihndi rë Nina, me xi catihin camachaya nuju cjuá rë, cojo cha Silvanu cojo cha Timoteo ne, hacuiin jo tjin cacun me ta, yëjë ni cjuá xi cachja me ne, hatuxa cjuaquixi. ²⁰ Hane Jesucristu vë ne, me vëhë xi sahmi chihin me yëjë ni cjuá xi há cachja Nina xi cuma. Vëhë xi hora xi chjahanrcun Nina xi nújanyuman cojo Jesucristu ne, nújan “Amén” (O sa tsajin ne, nújan “Cuatjin jain.”) ²¹ Nina ne, hacui me xi sahmi xi viyujucahndë cjuatacun naja xi macjain naja Jesucristu. Hacui ni me xi cavaxijin me ngayaan. ²² Sacuaha xi cavisane me sellu rë me ngayaan; caveya me Hasen rë me cahntsua xahasen naja cojo sa xi ngutjen tsejen ta quixi jain xi, hya xi cuma ngascan ne, sua jain naja me yëjë ni xi ha cachja me.

²³ Quihndë ne, quejen cavusehenya nuju sacuatjin xi ha cachjá cojo nuju ngatsë rë xi mijí tsisava nuju xi cuichjátaha nuju. Sa xi quixiin xi chjá ne, catitsingatju Nina cjuaveya xi cuma ná. ²⁴ Hacuiin xi meje cuitexin nuju jarë ngu cjuá xi hatuxa meje rë xi cumacjain nuju ta, tsëhë xi ngayun ne, ha siucahndë cjuatacun nuju cojo cjuachacun xi macjain naja. Ta ngayin ne, tivisecuiin nuju cojo sa xi cuma sua sa rë xahasen nuju.

2

¹ Hya xi camá ne, cavejñá cjuatacun naha xi hacuiin ngutjen cjuë scusehenya nuju sá tu choho cuma rë xahasen nuju ngatsë rë cjuá xi cuichjá cojo nuju. ² Cuatjin cavejñá cjuatacun naha ta, ngayun tinihñu xi ma sua rë xahasen naha. Vëhë xi sa xi sahme xi cuma va rë xahasen nuju ne, ndajin tjin ta, xi cuatjin sahme ne, sahme xi cuma va rë xahasen rë xuta xi tisahmi xi ma sua rë xahasen naha. ³ Vëhë xi cuatjin catsihindu nuju nixtin hya, cojo sa xi hya xi cuinduva ndyá ne, hacuiin cuma va rë xahasen naha ngatsë nuju ta, xi meje rë ne, tuhun rë xahasen naha cjuasua. Hacuaha mangu cáacun cojo nuju ngayujun ni. Mangu cáacun xi tu mé ni xi sahmi xi jemu sua ma rë xahasen naha ne, hacuaha vëhë ni ne, sahmi xi jemu sua ma rë xahasen nuju. ⁴ Hya xi catsihindu nuju cjuá vëhë ne, jemu choho ma ná, jercu cjín catsingátaha cáacun ngatsë nuju, hisca jercu cajíhnda; mijí ná xi cuma va tacún ta xi meje ná ne, xi cumachaya nuju ta cjuahmutacun xi tjin ná cojo nuju ne, jemu jyë camahani.

Ma manchataha me xi cavinchachoho

⁵ Quihndë ne, sacuaha ngu xuta xi cavinchachoho vë ne, hacuiin ngahan ni choho camá ná ta, ngayujun ni ne, hacuaha choho camá nuju hitsë. “Hitsë ni” chjá ta, mijí cuátjutaha xi tichjátaha nuju. ⁶ Quihndë xi cjín ngayun canújuntuhun rë xuta jan ne, cojo vëhë ni ne, ha cuma. ⁷ Cahndë rë xi cuinújuntuhun sa rë me ne, ninchatuhun rë me, tuhun rë me cjuetacun, sá tu scaain rë me cojo cjuachoho jyë vëhë. ⁸ Vëhë xi chjá cojo nuju ta tuhun nga catamachaya rë me tsëhë cjuahmutacun xi tjin nuju cojo me. ⁹ Vëhë jain xi cuatjin catsihindu nuju ta, tsëhë xi meje cjuaháchuva nuju ne, há tjin ngu tacún xi nihñu yëjë ni hacutjin chjá cojo nuju. ¹⁰ Quihndë ne, yo xi

ninchatuhun rē tsēhē ngu jyē xi sahmi ne, ngahan ne, hacuaha tsinchátaha rē ta, tu mé ni xi catsinchátaha ne, vëë Jesucristu ta ngatsē nuju ngayun ne, vëhē xi cuatjin catsinchátaha, ¹¹ cojo sa xi cumaji sahmi Satanás xi meje sahmi cojo naja. Ngayaan ne, ha ndaja hyan hacutjin meje sahmi xitsehen vë cojo naja.

Cjuacjintacun rē Pablo ngajan nandya Troas

¹² Hya xi camá ne, cējē ngajan Troas xi cuichjá cojo xuta cjuandajyihí xi chja tsēhē Nai naja Jesucristu. Hane xi cafēhē ngajan ne, vutsején ne, jemu casacu ná cahndē xi cuichjá cojo xuta cjuandajyihí jan. ¹³ Peru hacuini ndaja má cácu xi casacuini ná cha Titu xingueen sacuatjin xi catsingátaha cácu. Vëhē xi catsingujnetaha cjua cojo xuta jan sehe cavétju canduvá nguehe estadu Macedonia.

Tsinguitsojo Pablo cjua rē Nina

¹⁴ Peru nacuechji rē Nina ta hatuxa sahmi me xi caa niji vetjintjin ngatsē rē xi tjin tangun cjuatacun niji cojo Jesucristu. Chuva vëhē xi Nina ne, sahmi me xi cumachaya rē xuta cjuatacun rē me jingujyē ni. ¹⁵ Ta ngayin ne, sacuaaha xta rē tyjungunsa ngayin xi tisua Jesucristu xi cuma rē Nina. Xta ndajyihí vëhē ne, vitsojo vechutaha rē yējē ni xuta, sa xuta xi tivetjutje me tsēhē jyē rē me o sa xuta xi tivetjintjin me. ¹⁶ Xi vutsejen niji xuta xi cuacun tivetjintjin jan ne, sacu rē me cjuaquixi ta quixi jain xi cuechiin me xcun Nina. Peru xi vutsejen niji xuta xi cuacun tivetjutje jan ne, sacu rē me cjuaquixi xi quixi jain xi cuechu me xcun Nina. Ngayin ne, cumaji nihñi cojo cjuatacun niji suvin xa vë xi sacu rē xuta cjuaquixi jan. ¹⁷ Ngayin ne, hacuini tiviteñi cjua rē Nina sacuatjin jemu cjin xuta tsahmi me ta ngayin ne, nechin nguñaja tacuin xi nújin cojo xuta cjua vëhē. Nina casua niji me xa hacuaha vutsejen me xa xi nihñi. Hacuaha tiniñi xa vëhē ta tsēhē xi tjin tangun cjuatacun niji cojo Jesucristu.

3

Compromisu xatsē xi casahmi Nina

¹ ¿Há má nuju xi tinaxinndijin suvin nga yojo niji xi cuatjin nújin? O há tsajin ne, ¿há mameje rē xi tihín nuju o sa xi chjahyin nuju ngu carta xi chja ngatsē niji, sacuatjin sahmi yahnga xuta? ² ¡Jéya! mamijí rē ta, ngayin xi má ngayun sacuaaha carta niji, sacuaaha ngu carta xi camahindu cahntsua xahasen niji, ngu carta xi cuma scutsejen yējē ni xuta ne, hacuaha cuma scutaya me. ³ Hane suvá tsejen xi Jesucristu catsihindu me carta jan, hane ngayin ne, tu canihñi entregadu ni. Hacuini cojo tinta camahindu ta cojo Hasen rē Nina xi quicun me. Hacuaha hacuini xcun ndyojo tē camahindu ta cahntsua xahasen rē xuta.

⁴ Cuatjin nújin cojo nuju ta, tsēhē xi mangu tacuin cojo Nina ngatsē rē Jesucristu. ⁵ Hacuini cjuatacun niji suvin, hacuini ngahñu niji suvin xi ma nihñi mé xi nihñi ta Nina casua niji me cjuatacun, Nina casua niji me ngahñu. ⁶ Me vëhē casahmi me xi machjirēhē rē me ngayin xi tihín cumachaya rē xuta compromisu xatsē xi sehe tivetsihin tsahmi Nina cojo xuta, hane compromisu xatsē vëhē ne, hacuini ngu ley xi cuinuhyan tsēhē ta ngu ndiya ndajyihí xi tsingacun naja Hasen rē Nina xi cuanguencojon. Cuatjin casahmi Nina ta tsēhē xi xuta xi cumaji sahmicihin me yējē ni cjua xi vítexa ley ne, sacú rē me ngu castigu xi cuetsun cjuatacun rē me hacuaha tsajin nu tsajin nixtin xi cuechu me xcun Nina. Peru xuta xi tjengui me Hasen rē Nina ne, sacú rē me ngu cjuahñu ndajyihí, hacuaha cuechu me xcun Nina.

⁷ Ngayujun ni ne, ha hyun ta sacuaha ley rë Nina xi catsihindu Moisés ne, catiya xcun ndyojo të hya xi camahindu, hacuaha xuta xi maji sahmi me yëjë hacutjin vitexa ley jan ne, cumaji cuechu me xcun Nina. Hane sacuaha xa xi casahmi Moisés hya xi casua me camachaya rë xuta cjua rë ley jan ne, hacuaha ha hyun xi jercu vengui chji rë ta, tsëhë xi camatsejen ngu hasen ndajyihi xi hisca camaji cavutsejenndaja xuta Israel xcun Moisés ta jercu tu seti camahani jyihi xcun me. Peru hasen ndajyihi vëhë ne, tafi tafi ne, cafëya suvá. ⁸ Hacuaha ha hyun ta ngayin ne, titihín tijimachaya rë xuta cjua tsëhë hacutjin sua naja Nina Hasen rë me. Quihndë ne, sa xi cuatjin jemu cavengui chji rë xa xi casahmi Moisés jan ne, hitsë sa jercu vengui chji rë xa xi tinihñi ngayin. ⁹ Cuma cuinújan ne, sa xi jemu cavengui chji rë xa xi casahmi Moisés, hya xi casua me ley xi chja xi sacú naja ngu castigu sa xi hacuiin nihña chehen cjua rë ne, hitsë sa jemu vengui chji rë xa xi tinihñi ngayin, quihndë xi tinújan cojo xuta xi cuma sacú naja ngu xahasen tyahi, ngu cjuatacun tyahi. ¹⁰ Cuma cuinújan ne, sacuaha xa rë Nina xi casahmi Moisés xi jemu ndajyihi titjun ne, quihndë ne, sacuaha xi ha quihndë tsajin mé ndajyihi tsëhë ta, xa rë Nina xi tinihñi ne, jercu tu ndajyihi camahani. ¹¹ Sa xi jercu ndajyihi ngu xcusun xi hacuiin cuejña tsëë ne, hitsë sa ndajyihi ngu xi cuejña tsëë.

¹² Ngatsë rë xi cuatjin vetihin tacuin Nina ne, vëhë xi ngayin ne, rcuiin camahani xi nújin cojo xuta. ¹³ Hacuiin nihñi sacuatjin casahmi Moisés, hya xi cavetsa me xcun me cojo ngu tsjian cojo sa xi xuta tjë rë Israel ne, scuiin me hacutjin tifëya suvá hasen ndajyihi xi jyihi xcun Moisés jan. ¹⁴ Peru xuta jan ne, camajñu tsëhë cjuatacun rë me. Hisca quihndë nixtin vihi ne, hya xi visiñuju me cjua rë ley changa vëhë ne, maji vijnercu me cjua rë, sacuaha xi titsa rë cjuatacun rë me cojo tsjian jan. Hisca hya xi cumacjain rë me Jesucristu ne, hya sacuaha xi cuetjuxin tsjian jan, hya cuma cuijnercu me. ¹⁵ Peru hisca quihndë ne, hya xi visiñuju me cjua xi catsihindu Moisés ne, sacuaha xi tsjian jan vechja rë cjuatacun rë me, hane maji vijnercu me. ¹⁶ Peru hya xi ngu xuta cuisehen me ndiya rë Nai naja ne, sacuaha tsjian jan ne, cjuexin tsëhë me, hane cuma cuijnercu me. ¹⁷ Nai naja ne, hacui me xi Hasen rë Nina, hane hiscan xi tacun Hasen rë Nai naja ne, tsajin mé xi vechja rë cjuatacun naja. ¹⁸ Vëhë xi ngayejen ngarcen ni ne, tsajin titsa rë cjuatacun naja cojo tsjian vëhë, hacuaha xi vutsejen xuta ngayaan ne, ma vutsejen me cjuandaja rë Nai naja sacuaha tsejen mé xi tsejen xcun ngu speju. Hane ngayaan ne, jima tiña jima tiña sa cjuatacun naja cojo cjuatacun rë Nai naja ta, tsëhë xi jima ngu ndiya ne, tisacu sa naja cjuandaja rë me. Nai naja ne, suvá hasen me, hane hacui me xi cuatjin tisahmi.

4

¹ Nina casahmi me cjuandaja cojo niji, hane casua me xa vëhë xi nihñi. Vëhë xi hatuxa hacuiin machuva tacuin. ² Ngayin ne, cavejñi tacuin xi nihñi yëjë ni xi ticojo rë cjuasava xi tahahma má; hacuiin vindachin, hacuiin nindeyin cjua rë Nina ta, suvá cjuaquixi yëjë ni xi nújin cojo xuta. Cuatjin nihñi cojo sa xi scuëë yëjë ni xuta ta cuatjin jain xi nújin. Hacuaha vëë Nina xi cuatjin nújin. ³ Hane sa xi vijniircu xuta cjuandajyihi xi chja tsëhë Jesucristu xi titihín cumachaya rë me ne, peru suvá xuta xi tivetjintjin me ne, me vëhë xi cuatjin vijniircu me. ⁴ Xitsehen xi matitjun xi tacun nixtin vihi ne, cavetsa cjuatacun rë xuta xi cuacen macjaain rë Nina xi cjuaquixi, cojo sa xi cuiisiin rë me cjuahasen rë cjuandajyihi xi chja hacutjin xi jyë hnga Jesucristu cojo

cjuatacun rë me. Hya xi machaya naja tsëhë Jesucristu ne, hacuaha hyan hacutjin jemu ndaja camahani Nina. ⁵ Ngayin ne, hacuiin nújin cojo xuta xi nai nuju ngayin ta xi nújin ne, Jesucristu xi Nai naja me; hane ngayin ne, tivisecuiin nuju sacuaha ngu mosu hndixahan nuju ta, tsëhë xi cuatjin cavitexa niji Jesucristu. ⁶ Hane ntsacu cavetsihin ne, cachja Nina ta ngajñi rë jñu ne, cuma hasen. Hane hacui ni me xi caveya me cjuahasen ngajñi rë cjuatacun niji, cojo sa xi ngayin ne, tihín cumachaya rë xuta, cuijnercu me hacutjin jemu ndaja camahani Nina. Hane hya xi machaya naja tsëhë Jesucristu ne, hacuaha hyan hacutjin jemu ndaja camahani Nina.

Cjuahñu xatsë xi sua Nina

⁷ Cjuahasen xi casua niji Nina jan ne, quichihin ngajñi rë cjuatacun niji, sacuatjin xi jiya cjuanchina cahntsua ngu tiji xi nihndë ni camá. Cuatjin casahmi Nina cojo sa xi matsejen xi jemu hñu camahani ngahñu xi sua niji Nina. Hacuiin cojo ngahñu niji suvin xi caa niji nihñi yëjë ni xi tinihñi ta Nina ne, me vëhë xi casua niji me ngahñu; hacuaha jemu ndaja camahani ngahñu xi sua niji me. ⁸ Ha tu yani ni xi vanguin ne, jemu yehe cjuacjintacun vatjin má, peru sacuya niji chuva rë hacutjin xi naxintjin yojo niji; hisca hyiin mé xi ndatjin nihñi. Peru nihñichuviin cjuatacun niji; ⁹ jemu suaxti niji xuta hacuaha choho sahmi me cojo niji, peru Nina ne, tsismicacuaain niji me; vaja niji xuta, hisca viticjin, peru hacuiin tsiquehen niji me. ¹⁰ Xi nujiyhinyin cojo cjuarë Nina ne, hatuxa meje tsiquehen niji xuta, sacuatjin catsiquehen me Jesucristu. Cuatjin tijima ne, cojo sa xi xuta ne, xi scutsejen me hacutjin ticaa niji ne, cumachaya rë me ta quixi jain xi tisacu niji cjuahñu sacuaha cjuahñu rë Jesucristu. ¹¹ Ngayin xi quicun ngayin ne, tjin xuta xi jemu meje tsiquehen niji me ngatsë rë xi quichihin cjuandajyihí xi chja tsëhë Jesús. Cuatjin tijima ne, cojo sa xi cuma tsejen xi yojo jyë niji vi xi hatuxa cueya ne, hacuaha tisacu rë cjuahñu sacuaha cjuahñu rë Jesús. ¹² Ngajan xi ngayin ne, tisacu niji cjuaveya; peru ngayun ne, tisacu nuju cjuahñu xatsë.

¹³ Tjin hiscan xi chja xcun xujun rë Nina cuitjin: “Camacjain ná, vëhë xi cachjá”; hane ngayin ne, tangun macjain niji cojo me xi cuatjin catsihindu cjuarë. Vëhë xi hacuanitjin ni nújin ngayin: “Macjain niji, vëhë xi nújin.” ¹⁴ Hacuaha hyin ta Nina, me xi catsicuya cjuahñu rë Nai naja Jesús hya xi cahme me ne, hacuaha cuechu nixtin xi cuatjin tsicuya me cjuahñu niji, hane sahmi tangun me ngayin ngajan hiscan tacun Jesús. Hacuaha cuatjin sahmi me cojo nuju. ¹⁵ Yëjë ni xcusun xi tivatjin tijima ne, ngayun ndaja tsujun ta, xi cuma cjín sa ngayun xi sacun nuju cjuandaja rë Nina ne, ha cuatjin cjín sa cuma ngayun xi tuhun nacuechji rë me. Hane cuatjin cuma tsejen xi Nina ne, jemu ndaja camahani me.

¹⁶ Vëhë xi hatuxa nihñichuviin cjuatacun niji. Handasa tivetsun hitsë tivetsun hitsë yojo niji xi jima changa ngayin ne, peru cjuatacun niji ne, jima xatsë ngu nixtin ngu nixtin. ¹⁷ Hane cjuacjintacun xi tivatjin tijima nguehe ngasunhndë ne, sacuaha xi hacuiin yehe camahani ta, tsëhë xi hya xi ha cacaa niji ne, hya sacú niji cjuandaja, sacú rë xahasen niji ngu cjuasua xi jemu ndajyihí camahani, hacuaha tsajin nixtin xi cjuë. ¹⁸ Ngayin ne, hacuiin tivetihin rcuín yëjë ni xi tsejen ta xi vethin rcuín ne, xi cjëë cuma tsejen. Cuatjin nihñi ta, tsëhë xi yëjë ni xi tsejen ne, cuechu nixtin xi cjuë, peru xi cjëë cuma tsejen ne, tsajin nu tsajin nixtin cjuë.

5

¹ Hacuaha nihñichuviin cjuatacun niji ta, tsêhê xi ha hyin ta sa xi cueya yojo niji sacuatjin vetsun ngu ndihya yuma ne, sacú niji ngu xcusun yojo xatsê ngajan ngahnga xi tsajin nu tsajin nixtin cueya, sacuaaha ngu ndihya ndajiyihi xi suvá Nina casahmi me xi cuma niji. ² Vêhê xi ngayin ne, hisca fê tacuin ta, tsêhê xi jercu meje chjihinnsin sacuaaha yojo xatsê niji xi sua Nina jan, ³ cojo sa xi chijin yojo xatsê vêhê sacuatjin chajá rê ngu tsjian. Xi cuatjin ne, cuechiin ngu nixtin xi siu suvá hasen niji xi tsajin yojo niji. ⁴ Ngayin xi nechin cojo yojo jyê niji vi ne, hisca fê tacuin ngatsê rê xi jercu meje niji yojo xatsê xi sehe sacú niji. Hacuuiin meje niji xi cueyin ta xi meje niji ne, yojo xatsê niji. Cuatjin meje niji cojo sa xi yojo jyê xi hatuxa cueya ne, cjuêya; hane suvá cjuahñu xatsê vêhê cuejña. ⁵ Quihndê ne, me xi cuatjin cavejña cjuatacun rê xi cuitjin cun cuma ngayin ne, hacui Nina. Hacuaha me vêhê xi caveya me Hasen rê me cahntsua xahasen niji, cojo sa xi ngutjen tsejen ta quixi jain xi, hya xi cuma ngascan ne, sua jain niji me yojo xatsê vêhê.

⁶ Vêhê xi hatuxa tihñ ngahñu xahasen niji. Hyin ta jinguyêjê rê xi nechinc-ahndin cojo yojo jyê niji vi ne, sacuaaha xi nechintihin ngu nangui ta, tsêhê xi cjêê cuechin hiscan xi cuinechincahndin cojo Nai naja. ⁷ Ngayin ne, mangu tacuin cojo Nai naja xi tivanguin cojo ngasunhndê niji, handasa matsijin me. ⁸ Cuyin cuinújin cojo nuju ta ngayin ne, titihín ngahñu xahasen niji. Hacuaha xi má niji ne, hitsê sa ndatjin xi cuetjinxin tsêhê yojo jyê niji, hane cjuanguin cuinechincahndin cojo Nai naja. ⁹ Vêhê xi sa xi cuinechintihin sa ngeuhe ngasunhndê, o sa xi cuinechincahndin cojo Nai naja ne, jemu meje nihñi yêjê ni hacutjin chuya rê me ta, ¹⁰ tsêhê xi ngayejen ni ne, cuechu nixtin xi cuma tsejen xi cun xi má ngayaan hya xi cuechuun xcun Jesucristu, xi cjuahacuenda me xcusun xi canihña, cojo sa xi jima ngu ngayaan ne, sacú naja xi satê naja ha tucutjin xcusun xi canihña xi cavinechan ngasunhndê, há ndaja ne, há ndajin.

Cjuandajiyihi xi sahmi tangun cjuatacun naja cojo Nina

¹¹ Ngayin ne, ha hyin mé vijne xi rcuin Nina. Vêhê xi meje nihñi xi cuijne cacun xuta. Nina ne, ha vêê me xi cun xi má ngayin. Hacuaha cojo ngayun ne, vetihin tacuin xi cumachaya nuju xi cun xi má ngayin. ¹² Hacuuiin tivétsihin tinihñi yehe suvin nga yojo niji ta tu titihín cumachaya nuju hacutjin cuma naxunndujun niji, cojo sa xi cuma nicuyun cjuá tsêhê xuta xi chuya rê me tsêhê xcusun xi jyihî ngu cha, hane sahmicuendaain me cjuatacun rê cha. ¹³ Chja yahnga xuta ta sca niji, hane yahnga me ne, jemu xta ngayin; peru há sca niji o há xta ngayin ne, peru nihñi yêjê ni ngatsê rê xi tsêhê Nina ngayin, hacuaaha ngatsê rê xi meje cuisecuin nuju. ¹⁴ Cuatjin nihñi ta tsêhê xi cjuahmutacun xi tjin rê Jesucristu cojo niji ne, vêhê xi vítexa niji. Cuitjin ningatihin tacuin: ngu ni Jesucristu xi cahme me ngatsê rê jyê naja ngayejen ni, vêhê xi ngayejen ni ne, sacuaaha xi ha caveyan xi cuma rê jyê xi cuacun vê. ¹⁵ Jesucristu ne, cahme me ngatsê naja ngayejen ni ne, cojo sa xi ngayaan xi casacu naja cjuahñu xatsê ne, hacuuiin nihñacuendan suvá ni yojo naja ta hacuaaha nihñacuendan tsêhê me vêhê, me xi cahme hacuaaha cavuya me cjuahñu ngatsê naja.

¹⁶ Vêhê xi ha quihndê hacuuiin nutsijin xuta sacuatjin vutsejen ngu xuta xicjin me cojo cjuatacun rê ngasunhndê. Hatsêê ne, cuatjin canutsijin Jesucristu, peru quihndê ne, hacuuiin cuatjin nutsijin me. ¹⁷ Yêjê xuta xi tjin tangun cjuatacun rê me cojo cjuatacun rê Jesucristu ne, ngu xuta xatsê camá me. Xcusun changá xi tjin rê me ne, cafê, ha cama xatsê. ¹⁸ Nina ne, me

vêhê xi tisahmi me yêjê cjuatacun xatsê vêhê. Ngayin xi condra rê Nina camá ngayin hatsêê ne, casahmi me xi camatangun cjuatacun niji cojo cjuatacun rê me ngatsê rê cjuacjintacun xi cavatju Jesucristu. Hacuaha casua niji me xa xi tihîn cumachaya rê xuta hacutjin tisahmi tangun me cjuatacun rê xuta cojo cjuatacun rê me. ¹⁹ Cojo cjuacjintacun xi cavatju Jesucristu camá ne, cavetsihin casahmi Nina xi cuma tangun cjuatacun rê xuta cojo rê me, cavetsihin cafachacuendaain me tsêhê cjuatsehen xi casahmi xuta, hacuaha cavetsihin casua niji me cjuandajyihi xi tinújin cojo xuta xi Nina ne, meje rê me xi cuma tangun cjuatacun naja cojo rê me. ²⁰ Vêhê xi ngayin ne, cuatjin nújin cojo xuta cjuarê Jesucristu ta, Jesucristu casua niji me xa xi cuatjin nújin, sacuaha xi tichja súvá Nina cojo xuta ngajñi rê cjuarê xi nújin. Vêhê xi sacuatjin xi vitexa niji Jesucristu ne, chjahyin rê xuta xi catisahmi tangun me cjuatacun rê me cojo Nina. ²¹ Jesucristu ne, tsajin mé jyê rê me xi tjin, peru ngatsê naja ngayaan ne, Nina casahmi me xi Jesucristu ne, sacuaha xi jercu tjin camahani jyê rê me. Cuatjin casahmi Nina cojo sa xi ngayaan xi tjin tangun cjuatacun naja cojo Jesucristu ne, hacuaha jemu tyjahi camahani cuma cjuatacun naja sacuatjin tyjahi cjuatacun rê Nina.

6

¹ Hane xi tinihñi tangun xa cojo Nina ne, hacuaha nújin cojo nuju ta, mijí rê xi tu mahya xi casacu nuju cjuandaja rê Nina. ² Cachja Nina cuitjin xcun xujun rê me:

Ngu hora ndajyihi ne, cahndê cjuarê xi canoje cojo ná;

ngu nixtin xi vetjutje xuta ne, cavisécoo ri.

Quihndê ne, ha cavechu ngu hora ndajyihi vêhê, sacuatjin cachja Nina; ha cavechu ngu nixtin xi tivetjutje xuta.

³ Ngayin ne, nihñi camahani xcusun xi sahmi xi secjan cjuatacun rê xuta, sá tu choho cuichja xuta tsêhê xa xi tinihñi. ⁴ Yêjê xcusun xi tivatjin tijima xcun xa xi tinihñi ne, tsingacun rê xuta ta ngayin ne, tivisecuiin jain rê Nina cojo xa xi meje rê me xi nihñi. Jemu cjin cjuacjintacun xi cacaa niji: tjin hora ne, jemu cavatjin cjuañihi, tjin hora ne, cavatjin ngu cjuandya jyê, tjin hora ne, casacuinyiin niji hacutjin naxintjin yojo niji. ⁵ Tjin hora ne, cavaja niji xuta, tjin hora ne, cavincha niji me ndavaya, tjin hora ne, choho casahmi xutacjin cojo niji, tjin hora ne, jemu chja xa canihñi, tjin hora ne, camaji catsjuñifin, tjin hora ne, hisca casacuiin mé xi xiní. ⁶ Hacuaha tsejen xi tivisecuiin jain rê Nina ngatsê rê xi tyjahi xahasen niji, vechu cjuatacun niji, jemu jyê tacuin, jemu nihñi cjuandaja, jiya Hasen rê Nina cahntsua xahasen niji, nguñaja tacuin xi hmu tacuin xinguin, ⁷ hacuaha súvá cjuaquixi tjin rê cjuatacun niji, Nina ne, sua niji me ngahñu. Hatuxa cjuaquixi cjuarê xi nújin, há xi titihîn jimachaya rê xuta cjuarê Nina, o há xi tinaxintjin yojo niji tsêhê xuta xi choho chja tsijin. ⁸ Yahnga xuta ne, faharcun me ngayin, yahnga me ne, faharcuaain me ngayin. Yahnga xuta ne, ndaja chja me tsijin, yahnga me ne, choho chja me tsijin. Xi má rê ngujo xuta ne, jemu ndacha ngayin, handasa quixi ngayin cojo ngasunhndê niji xi tivanguin cuijin. ⁹ Yahnga xuta ne, hisca hvín me yo ngayin, peru yahnga me ne, vêê me ngayin. Ngayin ne, sacuaha xi ha tiveyin, peru cjêê cueyin ta nechincuihin cjuahñu. Sahmi xuta ngayin castigu, peru hacuiin tsiquehen niji me. ¹⁰ Sacuaha xi jemu choho má rê xahasen niji, peru xahasen niji ne, hatuxa jemu sua rê. Sacuaha xi jemu yumi ngayin, peru jemu nihñi nchina xuta cojo cjuarê Nina. Sacuaha xi tsajin camahani mé xi tjin niji, peru ha tsijin yêjê ni xi tjin ngasunhndê.

¹¹ Ngayun xuta Corinto ne, ha canújin cojo nuju yějē ni hacutjin ningatihin tacuin, hacuaha jemu hmu tacuin nuju. ¹² Ngayin ne, hacuiin camachuva cjuahmutacun xi tjin niji cojo nuju ta ngayun xi camachuva cjuahmutacun xi jiya cahntsua xahasen nuju. ¹³ Véhē xi chjá cojo nuju sacuaha xi quihndi naha ngayun, catamajyě sa cjuahmutacun xi tjin nuju sacuaha cjuahmutacun xi tjin niji cojo nuju.

Yungun rē Nina xi quicun me ngayaan

¹⁴ Peru mijí rē xi nihñu tangun cojo xuta xi macjaain rē me cjuā rē Jesucristu sacuatjin ma hñu jo chu ndyaja xi tangun cjue chu. Sacuaha cjuandaja ne, matanguaain camahani cojo cjuatsehen. Hacuaha cumaji cuma jñu hiscan xi jemu hasen. ¹⁵ Cumaji camahani cumatangun cjuatacun rē Jesucristu cojo cjuatacun rē Satanás. Hacuaha cumaji camahani cumatangun cjuatacun rē ngu xuta xi macjain rē me cjuā rē Jesucristu cojo cjuatacun rē ngu xuta xi macjaain rē me cjuā rē Jesucristu. ¹⁶ Sacuaha yungun rē Nina xi cjuaquixi ne, cumaji cuiyuju nina xi tsindaja xuta. Hane ngayaan ne, sacuaha yungun rē Nina xi quicun me ngayaan ta, tséhē xi suvá Nina cachja me cuitjin:

Ngahan ne, cuitejñacahndē cahntsua xahasen rē me, hacuaha tsujyéhéya ngajñi rē me; hane ngahan cuma nina rē me ngahan, hacuaha me xi cuacun véhē ne, cuma me xuta naha.

¹⁷ Hacuaha cachja sa Nina cuitjin:

Véhē xi tetjunixun tséhē xuta xi cuacun faharcun me nina xi mandaja, hacuaha nechunxun tséhē me; mijí rē xi nicujun sa xcusun xi chjá cojo nuju xi tsavi. Xi cuatjin nihñu ne, cuitejña ngatsē nuju

¹⁸ hacuaha ngahan ne, cuma ngahan nahmi nuju, hane ngayujun ni ne, hacuaha cuma ngayun quihndi naha, chja Nai naja, me xi ma sahmi yějē ni xcusun.

7

¹ Quihndē ngayujun ni tsan ne, tséhē xi cuatjin cachja Nina xi sahmi me cojo naja ne, meje rē xi cuiyujunxen yějē ni cjuatsehen xi meje rē yojo naja o sa xi ningatahan tacun. Hane xi rcun ngayaan Nina ne, meje rē xi nihña ngahñu xi cuma tyahi xahasen naja, cuma tyahi cjuatacun naja.

Cavindeya cjuatacun rē xuta Corinto

² Nuxuhun xahasen nuju xi cuma niji. Hisca ngu ngayun ne, hacuiin choho canihñi cojo nuju; hisca ngu ngayun ne, hacuiin caninguetsin cjuatacun nuju; hisca ngu ngayun ne, hacuiin cavindachin nuju. ³ Hacuini titsicaneje jyě nuju xi cuatjin chjá cojo nuju. Ha cachjá cojo nuju ta hatuxa jemu vinga niji ngayun, hisca tihñ yojo niji ngatsē nuju sa xi cuatjin meje rē. ⁴ Jemu camangu cácn cojo nuju, hacuaha hya xi visiajme cojo xuta ne, jemu vaxëndaja nuju.

Jemu casacu ná cjuetacun. Jemu sua ma rē xahasen naha ngajñi rē yějē cjuañihi xi cavatjin camá.

⁵ Hisca nixtin xi caffhin nguehe estadu Macedonia hisca quihndē ne, cjě cjuahajenda xahasen niji, ta yějē ni nixtin vihi ne, jercu cjin cjuañihi tivatjin tijima. Ticjan xuta cojo niji, hacuaha jemu macjin tacuin. ⁶ Peru Nina xi sua cjuetacun xuta yuma ne, hacuaha cuatjin casua niji me cjuetacun hya xi cafehe cha Tito. ⁷ Hacuini tséhē xi cafehe ni cha xi casacu niji cjuetacun ta, hacuaha ngatsē rē cjuā xi cachja cha hacutjin xi casacu rē cha cjuetacun

ngajñi nuju. Cachja cha cojo niji ta jemu meje nuju xi sacú xingueen. Hacuaha casuacuenda niji cha tsêhê cjuachoho xi tjin nuju. Hacuaha cachja cha ta jemu meje nihñu xcusun xi chuya ná. Vêhê xi hitsê sa camasua rê xahasen naha quihndê.

⁸ Hacuuiin choho ma ná xi cuatjin catsihindu nuju xujun vêhê, handasa choho camá nuju ngatsê rê cjuaxi cachjá cojo nuju. Choho camá ná hitsê ta, tsêhê xi cahvê ta cjuaxi naha jan ne, casua nuju cjuachoho ndastu ngu hora. ⁹ Peru quihndê ne, jemu ndama ná, hacuuiin ngatsê rê xi choho camá nuju ta ngatsê rê xi sacuaaha cjuachoho xi camá nuju ne, vêhê casahmi xi canindeyuncu cuatacun nuju. Hacuaha hya xi choho camá nuju ne, canihñu hacutjin chuya rê Nina, vêhê xi tsajin mé xi choho cavatjun camá ngatsê rê cjuaxi canihindin nuju. ¹⁰ Hya xi nihñachehen hacutjin chuya rê Nina hora xi choho ma naja ne, vêhê sahmi xi nindeyan cjuatacun naja cojo sa xi cuetjuntjen tsêhê jyê naja. Hane xi cuatjin sahmi ngu xuta ne, tsajin yo xi chuyiin rê. Peru hya xi tu choho má naja hora xi vatjun ngu cjuachoho sacuatjin sahmi xuta ngasunhdê ne, vêhê sahmi xi cueyan. ¹¹ Chutsujun hacutjin canihñu hya xi canihñu hacutjin chuya rê Nina ngajñi rê cjuachoho xi cavatjun camá: jemu nguñaja tacún; jemu ndaja catuhun cjuaquixi nuju; hisca camacjan nuju; hisca carcun camá; canújun ta jemu meje chun ná ngu ndiya nga; jemu meje nihñu xcusun xi chuya ná; ngutjen canihñu castigu xuta xi choho casahmi me. Cuatjin camatsejen xi tyjahi jain cjuatacun nuju hacuaha tyjahi jain xahasen nuju. ¹² Vêhê xi hya xi cuatjin catsihindu nuju xujun vêhê ne, hacuuiin ngatsê rê xuta xi cavangui jyê, hacuuiin ngatsê rê xuta xi choho cavatju me camá ta xi cuatjin catsihindu nuju ne, ngatsê rê xi meje ná xi cuma tsejen hacutjin xi meje nihñu xcusun xi chuya niji ta, tsêhê xi hyun ta cuatjin xi meje rê Nina. ¹³ Hane hacuaha ngatsê rê vêhê xi ngayin ne, casacu niji cjuetacun.

Peru hacuuiin súvâ cjuetacun vêhê ni xi casacu niji ta hacuaha jemu ndaja camá rê xahasen niji ngatsê rê cjuasua xi tjin rê cha Tito. Cuatjin tjin rê cha cjuasua ta, tsêhê xi ngayujun ni ne, catuhun rê cha cjuandaja cjuajeya. ¹⁴ Jemu cavaxêndaja nuju hya xi cachjá cojo cha Tito, hane hacuuiin cavêtju sava ngahan xi camá ngascan. Hatuxa cjuaquixi yêjê ni cjuaxi canújin cojo nuju. Hacuanitjin ni cjuaxi canújin tsujun cojo cha Tito ta hacuaha cavetjucuaa cjuaquixi. ¹⁵ Hacuaha jemu hmu cacun nuju cha, xi tsinguitsjen cha hacutjin canihñu yêjê hacutjin xi cachja cha cojo nuju, cojo hacutjin jemu ndaja cachjuhuncun cha hya xi cachjuhunntsun cha. ¹⁶ Jemu ndama ná ta tsêhê xi hvê ta ngayun ne, mangu tacún cojo ná.

8

Cjuatjo xi cjue Jerusalén

¹ Ngayujun ni ne, ngeue tihín cumachaya nuju hacutjin casua Nina cjuandaja rê me cojo xuta xi matangun me yêjê ni yungun xi siu taha ladu tsêhê estadu Macedonia vi. ² Xuta xi cuicun vi ne, handasa jercu cavatju me cjuañihi, peru jemu sua ma rê xahasen rê me. Handasa jemu yuma camahani me ne, peru jemu jyê cjuatjo xi cavisecoo me. ³ Cahvê xi casua me tututjin xi camá casua me, hisca quisun sa casua me. Hacuaha cjuatacun rê súvâ me ⁴ xi cafehya me xi tihín cahndê xi cojo me sahmi me cjuandaja xi cuisecoo me xuta ladu rê Jesucristu ngajan Jerusalén. ⁵ Hitsê sa ndaja casahmi me xi cuma rê sacuatjin caningatihin tacuin ngayin. Titjun ne, casua me yojo rê me cojo Nai naja ne, sehe casua me yojo rê me cojo niji

ngayin, sacuatjin meje rë Nina. ⁶ Vêhë xi canújin cojo cha Tito xi, sacuatjin xi ha cavetsihin casahmi tangun cha ngu cjuatjo vêhë ngajñi nuju hatsëë ne, quihndë ne, hacuanitjin ni catitsinguijnetaha cha hiscan xi cavejñavasen. ⁷ Ngayujun ni ne, jemu tjin ngu tacún cojo Jesucristu; jemu ndaja nújun cjua rë Nina; jemu vechu cjuatacun nuju; jemu nguñaja tacún xi meje cuisecun; jemu tjin nuju cjuahmutacun cojo niji. Sacuatjin tivangun xcun cojo yëjë ni cjuatacun vêhë ne, hacuaha meje niji xi cuanitjin ni cuangun xcun cojo ngu cjuandaja vi xi cuisecun rë xuta yuma.

⁸ Hacuini tivitéxa nuju xi cuitjin tichjá cojo nuju ta, tu titsingácun ni nuju hacutjin sahmi nguñaja cacun xuta Macedonia, cojo sa xi cuma tsejen há nechun nguñaja tacún jain cojo cjuahmutacun xi tjin nuju. ⁹ Ha ndaja hyun hacutjin casahmi Nai naja Jesucristu cjuandaja. Handasa jemu tjin rë me cjuanchina peru catsiyuma me yojo rë me ngatsë rë xi hmu cacun nuju me, cojo sa xi ngatsë rë xi camayuma me ne, ngayun xi cuisuhun ladu rë me ne, sacú nuju cjuanchina xi sua Nina.

¹⁰ Nguehe cuichjá cojo nuju hacutjin xi tsingátaha cáacun. Ngayun xi hatuxa meje cuisecun hacuaha hisca cuyan cavetsuhun cavisecun ne, ¹¹ quihndë ne, meje rë xi ninguijnutuhun cjuandaja vêhë. Tuhun hitsë xi tjin nuju sacuatjin canihñu titjún xi cojo cjuasua catuhun. ¹² Sa xi ngu ngayaan meje jain tahan ngu cjuatjo ngu cjuandaja ne, cuma tahan tucutjin xi tjin naja xi tahan ta, vêhë xi chuya rë Nina. Nina ne, fehyaain me hisca cojo xi tsajin naja.

¹³ Hacuini meje rë xi ngayun ne, hisca cuma chaja nuju ngatsë rë xi cuisecun rë jingu sa xuta. Xi meje rë ne, tangun ni cuatjun ngayejen ni. ¹⁴ Ngayun xi cjin tjin nuju quihndë ne, cuma cuisecun rë me xi tsajin rë, cojo sa xi hya xi ngayun tsajin nuju ne, me xi cuacun vë ne, cuma cuisecoo nuju me. Cuatjin xi tangun cuatjun ngayun cuma cojo rë me. ¹⁵ Cuitjin chja ngu cjua xcun xujun rë Nina: “Xuta xi cjin cafaya me ne, cavanguini rë me; hane xuta xi chuva cafaya me ne, camachajin rë me.”

Cha Tito cojo xicjin cha

¹⁶ Suá nacuechji rë Nina xi cavuxaha me cjuatacun rë cha Tito cojo sa xi cuma meje cuisecoo nuju cha sacuatjin xi meje ná ngahan. ¹⁷ Hya xi cachjá cojo rë cha xi cjuetjengui nuju cha ne, jemu cachuya rë cha cjua jan. Hane tsëhë xi jemu tjin rë cha cjuasua xi sahmi cha tu mé ni xi satëxa rë cha ne, vêhë xi cojo cjuatacun rë suvá ni cha ne, cjuetjengui nuju cha. ¹⁸ Hacuaha ningatjin sa ngu cha ladu naja cojo cha Tito. Xuta xi matangun me yëjë ni yungun ne, jemu vaxëndaja me cha xi cuajiyi vë, xi jemu ndaja xa sahmi cha xi tsinguitsojo cha cjuandajiyi xi chja tsëhë Jesucristu. ¹⁹ Hacuaha xuta xi cuacun jan ne, casua me cha xa xi cuisecoo niji cha xi cuanguin chani ngu cjuandaja vihi ngajan Jerusalén. Cuitjin tinihñi cjuandaja vihi cojo sa xi cuma tsejen ta Nai naja ne, jemu jyë hnga me cojo cjuatacun rë me hacuaha cojo sa xi cuma tsejen ta nguñaja tacuin xi visecun xinguin. ²⁰ Jemu nechin cuidadu, sá tu yo choho cuichja tsijin tsëhë cjuatjo rë xuta vi xi tacun ntsin. ²¹ Meje nihñi cjuandaja, hacuini suvá xcun Nina ni ta hacuaha cojo xcun xuta.

²² Hacuaha cojo cha xi cuacun jan ne, ningatjin sa ngu cha ladu naja. Jemu cjin xcusun casahmi cha xi camatsejen xi jemu nguñaja cacun cha. Quihndë ne, hitsë sa nguñaja cacun cha xi meje cjue cha ta, tsëhë xi jemu camangu cacun cha cojo nuju. ²³ Sacuaha cha Tito ne, jemu visecoo ná cha xi cuatjin visecuin nuju. Sacuaha cha ladu naja xi cuacun vë ne, xuta rë yungun

catsingatju me cha hacuaha sahmi jyë sahmi hnga cha Jesucristu. ²⁴ Vêhë xi meje ná ngahan xi tuhun cumachaya rê cha xi cuacun vë cjuahmutacun xi tjin nuju, cojo sa xi yêjê ni xuta rê yungun cumachaya rê me ta quixi jain cjuaxi xi nújin xi cuatjin naxinndijin nuju.

9

Cjuatjo xi cjue Jerusalén

¹ Quihndë ne, hacuiin hatuxa meje rê xi tsihindu nuju hacutjin tijima tsêhë cjuatjo xi cjue cuisecoo rê xuta ladu rê Jesucristu ngajan Jerusalén ta, ² tsêhë xi ha hvë ta jemu meje cuisecon rê xuta xi cuacun vë. Vêhë xi ha cachjá cojo xuta nguehe Macedonia xi ngayun xuta Acaya ne, hisca cuyanu cavetsuhun canihñu tangun tujún. Hane tsêhë xi jemu nguñaja tacún xi cuatjin canihñu ne, vêhë casahmi xi jemu cjin xuta Macedonia xi hacuaha caviyungu cacun me xi cuisecoo me. ³ Vêhë xi tsingátju nuju ngujo cha ladu naja xi ha cachjá cojo nuju jan, sá tu cuetjicaain yêjê ni cjuaxi cachjá tsujun tsêhë cjuacjintacun vêhë. Meje ná xi tjin chjine ngayun sacuatjin xi ha cachjá tsujun, ⁴ tuxa má sa xi cojo ngujo xuta Macedonia cuinduva me cojo ná ndyá, hane tsajin tjin chjine ngayun ne, jemu cuixu sava ngayin, hisca cojo ngayun cuixu sava ngayun ta, tsêhë xi cuatjin camangu tacuin cojo nuju. ⁵ Vêhë xi catsingátaha cáacun xi casahmi ná ngujoyê xi caféhya cha xi cuacun vë xi cjuetjengui cha ngayun cojo chaja sa, cuisecoo nuju cha xi ninguiñunñuju tujún xi canújun jan. Xi cuatjin tjin chjine cjuandaja nuju vë ne, ngajan cuma tsejen xi hacuiin ngujoyê canihñi nuju ta cojo cjuasua nuju xi canihñu.

⁶ Ha hyun ta yo xi chuva tjê cuincha ne, hacuaha chuva tutjê sacú rê; hane yo xi cjin tjê cuincha ne, hacuaha cjin tutjê sacú rê. Hacuanitjin ni ngayun cojo cjuatjo nuju. ⁷ Jima ngu ngayun ne, meje rê xi tuhun hacutjin xi cavejñu tacún xi tuhun, peru hacuiin taha choho ma tacún, hacuiin cojo ngujoyê. Cuatjin nihñu ta ngu xuta xi cojo cjuasua sua me ne, xuta vêhë xi jemu chuya rê Nina tsêhë me. ⁸ Nina ne, cuma sua nuju me yêjê ni cjuandaja rê me, cojo sa xi tsajin nixtin xi cuma chaja nuju; hisca cuangui sa nuju, cojo sa xi cjin xcusun cjuandaja cuma nihñu. ⁹ Xcun xujun rê Nina ne, cuitjin chja: Xuta ndaja jan ne, chuva cjin sua me xuta yuma.

Hane cjuandaja xi sahmi me vêhë ne, tsajin nu tsajin nixtin xi chaya rê Nina. ¹⁰ Nina, me xi sua tjê xi nitjen cojo niñu xi chinë ne, hacuaha sua nuju me yêjê ni tjê xi mameje nuju, hacuaha me vêhë sahmi me xi cuma cjin sa tutjê xi sacú nuju. Hacuaha sahmi me xi cuma yehe sa yêjê ni cjuandaja xi nihñu. ¹¹ Cuatjin sahmi Nina xi jemu ndaja cuatjun cuma, cojo sa xi yehe cjuandaja cuma nihñu. Hane xi nihñi entregadu cjuandaja nuju jan cojo xuta yuma ne, sua me nacuechji rê Nina. ¹² Xi cuitjin cuanguinchani ngu cjuandaja nuju vë ne, hacuiin súvá xi nicjen cjuachaja xi tjin rê xuta ladu rê Jesucristu ta, hacuaha nihña xi jemu cjin xuta ne, sua me nacuechji rê Nina. ¹³ Xi cuitjin nihñi ngu cjuandaja vë ne, ngajan cuma tsejen xi ngayun ne, tiniñu jain sacuatjin xi nújun xi macjain nuju cjuandajyihí xi chja tsêhë Jesucristu. Hacuaha cuma tsejen ta jemu ndaja tivisecon rê xuta Jerusalén, hacuaha jemu ndaja visecon rê yêjê ni xuta yuma xi ladu rê Jesucristu. Vêhë xi ngahan cojo yêjê ni me xi visecoo ná ne, jemu nihñi jyë Nina. ¹⁴ Hacuaha xuta ladu rê Jesucristu ngajan Jerusalén ne, sahmi me oración rê me cojo Nina ngatsë nuju, hacuaha jemu cuinga rê me ngayun xi cumachaya rê me tsêhë cjuandaja xi jemu casua nuju Nina. ¹⁵ Nacuechji rê Nina xi casua naja

me ngu cjuandaja ngu cjuatjo xi hisca hyaan hacutjin cuinújan xi venguichji rë.

10

Vaxëte Pablo xa xi casua Nina me

¹ Ngahan Pablo ne, nguehe cuichjá cojo nuju cojo cjuandaja cjuajeya rë Jesucristu. Chja yahnga xuta ta ngahan ne, hya xi tejñataha tangun cojo nuju ne, jemu jeya ngahan; peru hya xi cjin tejñataha tsujun ne, jemu hñu cjua naha cojo nuju. ² Ndatjin, peru nguehe cjuéhya nuju ngu cjuandaja: xicanihñuu xcusun xi sahmi xi sahme hñu cjua naha hya xi cjuétjengë nuju. Ha hvë ta cuma sahme hñu cjua naha cojo xuta xi chja cojo nuju xi ngayin ne, suvá cjuatacun rë xuta ngasunhndë xi quichihin. ³ Quixi jain xi xuta ngasunhndë ngayin, peru hacuiin sí rcuin sacuatjin sí rcu xuta ngasunhndë. ⁴ Hacuiin chicjin cojo quicha ta Nina ne, sua niji me ngahñu xi caa niji ninguetsinyin cjuatacun rë xuta xi tsitjungui me Nina; xi visiajmí ngayin cojo xuta xi cuacun jan ne, ngutjen tsejen ta machjiriin cjuatacun rë me. ⁵ Ninguetsinyin cjuaxin xi sahmi xi maji vijnercu me yo xi Nina, hacuaha ninguixin cjuatacun rë xuta cojo sa xi tsingataha cacun me sacuatjin meje rë Jesucristu. ⁶ Hane hya xi cuechu nixtin xi ngayun ne, jemu ndaja camahani cuinuhyun tséhë Nina ne, ha tjin ngu tacuin xi nihñi castigu yëjë ni me xi vihndiin tséhë Nina.

⁷ Ngayun ne, tiningatuhun tacún sacuaaha tsingataha cacun xuta ngasunhndë. Sa xi tjin yahnga xuta xi tsingataha cacun me xi ladu rë Jesucristu me ne, ndatjin; peru hacuaha catitsingataha cacun me xi, sacuatjin xi ladu rë Jesucristu me ne, ngayin ne, hacuaha cojo ngayin ladu rë Jesucristu ngayin. ⁸ Handasa cuátjutaha hitsë xi cuichjá cojo nuju sacuaaha tséhë xa xi casua niji Nai naja ne, peru hacuiin cuma sava ná. Nai naja casua niji me xa vëhë, cojo sa xi cuisecuin nuju xi cuangunndujun xi mangu tacún cojo cjua rë Nina, hacuiin xi ninguetsin cjuatacun nuju. ⁹ Hacuaha mijí ná xi ningatuhun tacún xi meje cuinchárcun nuju cojo yëjë cjua xi tsihindu nuju. ¹⁰ Cuinújun ngu ngayun ta jemu hñu cjua naha xi tsihindu nuju, peru hya xi tejñataha cojo nuju ne, jemu yuma hasen ngahan, hacuaha hisca chuyiin nuju chuva rë xi visiajme. ¹¹ Peru cuidadu xi cuatjin nújun ta, chuva rë xi nújin cojo nuju xcun xujun xi nihindin nuju quihndë xi xín nechintihin tsujun ne, ha chuva vëhë ni nihñi hya xi cuéchintihin nuju.

¹² Ngayin ne, vetjiin tacuin xi cuinújin xi tangun ngayin cojo ngujo me xi vaxëndaja suvá me yojo rë me. Xi cuatjin tsichuva me cjuatacun rë me ngajñi rë suvá me ne, jemu ngarca me. ¹³ Ngayin ne, cuinujiiin xi jemu ndaja canihñi ngu xa xi hisca canihñii. Ha tucutjin xa xi canihñi ne, ha vëhë ni xi cuinújin. Nina ne, me vëhë xi vitexa niji me jani hiscan cuechin xi nihñi xa, hacuaha me vëhë cavitexa niji me xi catsanguin hisca ngajan nangui nuju. ¹⁴ Vëhë xi hya xi ndaja nújin tsujun ne, hacuiin sacuaaha xi vatjintihin rë xa xi casua niji Nina ta, tjun tjun ngayin cafihin nangui nuju cojo cjuandajiyi xi chja tséhë Jesucristu. ¹⁵ Hacuaha hacuiin naxinndijin yojo niji tséhë ngu xa xi casahmi jingu sa xuta. Peru vetihin tacuin xi sacuatjin xi cuangun xcun xi hitsë sa ndaja cumacjain nuju Jesucristu ne, hacuaha hitsë sa jyë xa cuma nihñi ngajñi nuju. ¹⁶ Ngajan xi cuma cuanguin tihín cumachaya rë xuta cjuandajiyi tséhë Jesucristu hisca ngajan sa tséhë nangui nuju. Xi cuatjin ne, tsajin yo cuichja xi ngayin ne, naxinndijin yojo niji tséhë ngu xa xi jingu sa xuta casahmi me.

¹⁷ Yo xi meje cuaxëndaja rè tu yo ni ne, cataxëndaja me Nai naja, sacuatjin chja xujun rè Nina. ¹⁸ Cuatjin ta, xi naxenndajan suvaan yojo naja ne, machjiriin camahani. Xi machjirèhè ne, xi Nai naja cuaxëndaja naja me.

11

Chja Pablo tsèhè apóstol ndacha

¹ Nijyun tacún. Caticaa nuju ndastu ngujo cjuasca xi cuichjá cojo nuju. Handasa hacuiin sca ná peru cuichjá cjuasca ta, ² tsèhè xi jemu chini ngahan tsujun. Nina ne, casua ná me cjuatacun xi cuatjin chini ngahan ta, tsèhè xi ngayujun ni ne, sacuaaha ngu quihndi naha xi chjuun xi casuá xi cuixan cojo ngu ni xihin. Cuatjin nuju ngayun. Hane xihin jan ne, hacui Jesucristu. ³ Hatsèè ne, chu yè cavindacha chu na Eva cojo cjuatacun tsehen rè chu. Hane hacuaaha jemu macjín cáacun tsujun ta sá tu cuatjin ningatuhun cumandacha ngayun, hane ha quihndè hacuiin nguñaja tacún cuangunndujun cojo ndiya rè Jesucristu xi tivanguncujun. ⁴ Hya xi fehe ngu cha xi sua cumachaya nuju ngu cjua xi chja tsèhè Jesús xi hacuiin tangun cojo cjua xi cachjá cojo nuju ntsacu cavetsihin ne, ¿mé má cha vèhè xi jemu ndaja caa nuju cojo cjua rè cha? O sa xi chjuhunnstun ngu cjuatacun xi hacjahi, xi hacuiin tangun cojo cjuatacun xi cachjuhunnstun ntsacu cavetsihin ne, ¿mé má cjuatacun vèhè xi jemu ndaja caa nuju cojo? O sa xi fehe ngu cjuandajyihí xi hacjahi, xi hacuiin tangun cojo cjuandajyihí xi cachjuhunnstun ntsacu cavetsihin ne, ¿mé má cjua vèhè xi jemu caa nuju cojo?

⁵ Quihndè ne, nguehe cuetsehen cuichjá cojo nuju cjuasca. Caticaa nuju hitsè ta, tsèhè xi xi má ná ngahan ne, hacuiin tjèngè ngahan xi cuma rè cha xi cuacun nújun xi apóstol yehe cha. ⁶ Handasa cjèè scutaya hacutjin xi jemu ndaja cuma cuichjá cojo xuta, peru jemu cavutaya cjuatacun rè Nina. Hane ngajñi rè yèjè ni xcusun xi canihñi, ngajñi rè yèjè ni cjua xi canújin ne, cahyun suvun hacutjin vechu cjuatacun niji.

⁷ Catsingújne suva yojo naha cojo sa xi ngayun ne, cuma yehe cuma hnga ngayun cojo cjuatacun nuju. Hane xi casuá camachaya nuju cjuandajyihí xi chja tsèhè Nina ne, cafaan camahani chjí tsujun. ¿Mé jyé quítjen xi cuatjin casahme? ⁸ Ngahan ne, cakahá tujún tsèhè xuta xi matangun yungun xi yahnga. Me vèhè cavechji ná me cojo sa xi cuma cuisécoo nuju ngayun. ⁹ Hora xi camachaja ná hya xi cavitejñataha cojo nuju ne, hisca ngu ngayun ne, casuandyaan nuju xi cuisecun ná ta, ngujo cha xingueen xi canduva cha tsèhè Macedonia ne, cha vèhè casua ná cha mé xi casahmi chaja ná. Hatuxa cavitejña cuidadu xi tsajin camahani mé cjuandya xi suá nuju, hacuaaha ha cavitjñin ni sahme nchujunni nguini. ¹⁰ Jiya cjuaquixi rè Jesucristu cahntsua xahasen naha. Hatuxa cuichjá sa cojo xuta ngajan yèjè ladu tsèhè estadu Acaya hacutjin casuandyaan camahani nuju. ¹¹ ¿Mé má cuatjin cuichjá sa? ¿Há tsèhè xi mijí ná ngayun? Vèè Nina ta jercu meje ná ngayun.

¹² Peru sacuatjin xcusun xi ha sahme ne, ha cuatjin cjuènduju sa sahme, cojo sa xi tsinguétsun cjua rè cha xi cuacun vanguise chuva rè xi cuichja cha xi xa xi sahmi cha ne, tangun cojo xa xi nihñi. ¹³ Cha vèhè ne, hacuiin apóstol xi cjuaquixi cha. Tu vindacha ni cha xi chja cha xi apóstol tsèhè Jesucristu má cha. ¹⁴ Peru hacuiin fircun ná xi cuatjin ma vindacha cha ta, hisca Satanás ne, ma vindacha naja xi sahmi yojo rè sacuaaha ngu xi catsingatju Nina. ¹⁵ Vèhè xi cojo cha xi cuacun sahmi xa rè xitsehen vè ne, hacuiin chja ma sahmi cha

xi cuma cha sacuaaha cha xi sahmi cjuaquixi jain. Peru cha xi cuacun vë ne, ha cuatjin cjuë cha sacuatjin meje rë xcusun xi sahmi cha.

Cjuañihi xi vatju apóstol Pablo

¹⁶ Cuichjá nga cojo nuju ngu ndiya ta, xicaningatuun tacún xi sca ná. O sa tsajin ne, handasa sacuaaha xi sca ná má nuju ne, peru tuhun cahndë xi hacuaaha cojo ngahan ne, cuaxëndaja hitsë yojo naha sacuatjin sahmi cha xi vaxëndaja yojo rë vë. ¹⁷ Xi cuitjin vaxëndaja yojo naha ne, hacuiin tichjá sacuatjin chja Nai naja ta tichjá sacuaaha xi sca ná. ¹⁸ Jemu cjín xuta xi vaxëndaja me yojo rë me ngatsë rë xcusun xi cun xi má suvá me hacuaaha xi vatju suvá me má, vëhë xi hacuaaha cojo ngahan ne, cuatjin cuaxëndaja hitsë yojo naha. ¹⁹ Xi má nuju ngayun ne, jemu quicuntacun. Peru jemu ndaja caa nuju cojo cjua rë xuta sca rë. ²⁰ Jemu caa nuju tu yo ni xi vitexa nuju hacuaaha xi mosu rë ngayun, sacuaaha xi matitjun me tsujun; tu yo ni xi sahmi jyë sahmi hnga suvá yojo rë, tu yo ni xi sahmi chuva nuju. ²¹ Peru savaain camahani ná xi cuichjá cojo nuju xi ngayin ne, sacuaaha xi jemu yuma hasen ngayin xi cuatjin nihni cojo nuju.

Peru sacuatjin vetju cacun cha xi cuacun jan xi vaxëndaja cha yojo rë cha ne, hacuaaha ngahan ne, cuatjin vetju cáacun xi cuaxëndaja yojo naha. Peru sacuaaha xi sca ná xi cuitjin tichjá cojo nuju. ²² ¿Há ma chja cha hne hebreo? Ngahan ne, hacuaaha ma chjá. ¿Há xuta tjë rë Israel cha? Ngahan ne, hacuaaha xuta tjë rë Israel ngahan. ¿Há tjë rë Abraham cha? Ngahan ne, hacuaaha tjë rë Abraham ngahan. ²³ ¿Há sahmi cha xa rë Jesucristu? Sacuaaha xi jercu sca ná xi cuitjin chjá, peru ngahan ne, hitsë sa ndaja sahme xa rë Jesucristu. Hitsë sa jercu casahme xa xi cuma rë cha xi cuacun vë. Hitsë sa cjín ndiya cëjë ndavaya. Hitsë sa cjín ndiya casehen ná. Jemu cjín ndiya xi hitsë sa ne, caveya ngahan. ²⁴ Xutaxa rë xuta Judea ne, hñú ndiya casahmi ná me castigu xi cavaja ná me can tyjuhun ñuju can tyjuhun ñuju cuarta xi ngu ngundiya. ²⁵ Jyan ndiya ne, ya cavaja ná xuta; ngundiya ne, cavetaha ná me ndyojo; jyan ndiya nga ne, quijingahma barcu xi cjuicojo ná; ngundiya tsëhë jyan ndiya vëhë ne, cavitejñaya ngu nixtin cojo ngu nixten ngajñi ndachacun. ²⁶ Jercu fë camahani ngu nangui; hane xi cuatjin tsujyëhëya ne, hacuaaha jemu tsavi xi vátju ndajyë, jemu tsavi tsëhë cha chëjë, jemu tsavi cojo cjuahngatacun xi sahmi xuta nangui naha, hacuaaha tsavi cojo cjuahngatacun xi sahmi xutaxin; jemu cojo tsavi xi tejñataha ngu nandya; jemu cojo tsavi xi tejñataha ngu nguijña; jemu tsavi xi vátju ndachacun; jemu tsavi xi tsujyëhëya cojo cha ndacha xi chja cha xi cha ladu naja cha. ²⁷ Jemu chja camahani xa xi casahme hacuaaha jemu chja cavátju camá; jemu cjín ndiya xi hisca camaji cafañafë; tjín hora ne, jemu vojo ná, jemu xinda ná; jemu cjín ndiya xi cajinëë niñu; tjín hora xi jemu hnchan ná, hacuaaha camachaja tsjian naha.

²⁸ Hane tsëhë yëjë ni cjuacjintacun xi cuacun vëhë ne, nchu nchujunni ne, sesuntaha sa ngu: jemu vityanguë cáacun tsëhë xuta xi ma tangun me yëjë ni yungun, hacutjin tivatju me tijima. ²⁹ Sa xi choho vatju ngu xingueen má ne, ngahan ne, hacuaaha choho ma ná. Sa xi yo sahmi xi cjuinenguia ngu xingueen ngajñi rë cjuatsehen ne, hacuaaha ngahan ne, jemu cuma cjan camahani ná. ³⁰ Sa xi meje rë xi cuaxëndaja yojo naha ne, cuichjá cojo nuju hacutjin yuma hasen ngahan. ³¹ Nina Nahmi rë Nai naja Jesús ne, me vëhë xi hatuxa jyë hnga me yëjë nu yëjë nixtin ne, me vëhë xi vëë jain me ta hacuiin tivindácha xi cuitjin tichjá cojo nuju. ³² Ngundiya hya xi

cavitejñataha ngajan nandya Damasco hiscan vitéxa Aretas ne, ngu xutaxa rë xi catsingatju Aretas ne, caviyujutaha me sindadu tingotjo rë nandya jan xi cjuaha cha ngahan cjucojo ná cha. ³³ Peru ngujo xingueen ne, quijicojo ná me xcun ngu ventana tséhë taha xihndë tséhë hñchua rë nandya jan, caveya ná me cahntsua ngu changa jyë, sehe catsitujne ná me taha candatsen. Cuatjin camá xi cavétjutjë tséhë gobernador jan.

12

Chja nijña cojo Pablo

¹ Tjin ná xi cuaxëndaja sa yojo naha. Hacuaha handasa tsajin mé machjiréhë xi cuitjin sahme ne, peru nguehe cuichjá cojo nuju hacutjin casahmi Nai naja xi cuichja nijña cojo ná ngu jo ndiya. ²⁻³ Ngahan ne, hvë ngu xihin xi ma ladu rë Jesucristu, hane camateñuju nu jan ne, quijicojo rë cha hisca hiscan majyan ngahnga hisca hiscan tacun Nina. (Xihin xi quijicojo rë ne, hacui Pablo.) Hveen ne, ¿há xi cojo yojo rë cha quiji cha? ne, o ¿há xi hasen ni rë cha xi quiji? ta, suvá Nina ni vëë me hacutjin camá. Mé ta cha xi cuajyihí vë ne, ⁴ quijicojo rë cha ngajan ngahnga ngu cahndë ndajyihí xi hmí paraiso, hane ngajan cahndë cha cjua xi hisca sacuiin chuva rë hacutjin cuichja nga cha cojo xuta, hacuaha hisca sacuiin cahndë xi cuya cuichja nga cha cjua jan cojo xuta. ⁵ Cuaxëndaja xcusun xi casahmi Nina cojo rë cha vëhë, peru hacuiin cuaxëndaja yojo naha suva; sa xi cuichjá tsahan ne, cuichjá hacutjin xi yuma hasen ngahan. ⁶ Sa xi meje cuaxëndaja sa yojo naha ne, hacuiin sca ná ta, tséhë xi suvá cjuaquixi xi cuichjá. Peru ha quihndë sahme sa cuatjin ta, tséhë xi mijí ná xi ngatsë rë cjua vëhë ne, tsingataha cacun ngu xuta xi jemu ngu cha machjiréhë ngahan. Xi meje ná ne, xi catutsejen xuta jan xcusun xi sahme hacuaha catisiñuju me cjua xi chjá, sehe tsingataha cacun me ne, há machjiréhë ne, o há machjiriin ngahan.

⁷ Hacuaha cojo sa xi hacuiin cuátjutaha xi ndaja tsingátaha cáacun tsahan suva ngatsë rë cjuandaja xi casahmi Nina cojo ná xi cuatjin cachja nijña cojo ná ne, vëhë xi casua me cahndë xi Satanás ne, suandya ná sacuatjin suandya naja ngu nahyá xi maji naxenxen, cojo sa xi hacuiin cuátjutaha xi ndaja tsingátaha cáacun tsahan suva. ⁸ Jyan ndiya caféhya rë Nai naja xi cuetjuxin cjuandya jan; ⁹ peru cachja me cojo ná cuitjin: “Cjuandaja xi suá ri ne, vëhë yëjë ni xi mameje ri ta, tséhë xi hiscan xi yuma hasen xuta ne, ngajan xi ma visehen ngahñu naha.” Cuatjin cachja me. Vëhë xi hisca nguñaja cáacun xi vaxëndaja yojo naha ngatsë rë xi yuma hasen ngahan, cojo sa xi ngahñu rë Jesucristu ne, cuma cuisehen ngajñi rë cjuatacun naha. ¹⁰ Vëhë xi hisca ndama ná xi jeya ngahan, ndama ná hya xi choho chja xuta tsahan, ndama ná xi vátju ngu cjuandya jyë, ndama ná hya xi vátju cjuañihí, ndama ná hya xi sacuiyiin ná hacutjin cuaxëtjé yojo naha. Jemu ndama ná xi cuatjin vátju má cjuacjintacun vëhë ngatsë rë Jesucristu ta, tséhë xi hya xi jemu yuma hasen ngahan ne, hya jemu sacu ná ngahñu rë Nina.

Cjín tsingataha cacun Pablo tséhë xuta rë yungun Corinto

¹¹ Ngahan ne, sacuaaha xi sca ná, peru ngayun quitjun jyë xi cuitjin tichjá cojo nuju. Xi meje rë ne, ngayun ndaja cuinújun tsahan ta, tséhë xi handasa chja yahnga xuta ta tsajin mé venguichji ná, peru cumaji cuatjutaha ná cha xi nújun xi apóstol yehe vë. ¹² Xcusun xi casahme ngajñi nuju ne, casua machaya nuju ta ngu apóstol xi cjuaquixi ngahan. Jemu cacaa ná cojo nuju xi cuatjin cavisécoo nuju hya. Ngayun ne, jemu quijircun nuju hisca carcun

xi cahyun cjuarcun xi casahme. ¹³ Tangun casahme ngajñi nuju cojo xi casahme ngajñi rë yëjê xuta rë yungun xi yahnga, cuenda xi casuandyaan nuju xi cuisecun ná tsêhê gastu naha. Sa xi cuaaintjin xi casahme cojo nuju xi má nuju ne, nijyun tacún cojo ná.

Chja Pablo xi cjue me má jyan ndiya nandya Corinto

¹⁴ Quihndê ne, cuma jyan ndiya xi cjuëtjengê nuju ne, hacuaha suandyaan camahani nuju ta, hacuiin xcusun xi tjin nuju xi meje ná ta suvun xi meje ná ngayun. Mijí rë xi nixti cuetjo tujún xi cuisecoo rë xutacha rë ta xutacha rë cuetjo me tujún xi cuisecoo rë nixti rë me. ¹⁵ Ngahan ne, cojo yëjê ni cjuasua tsicójó tujún naha ngatsê nuju, hisca tsicjê ngahñu naha ngatsê nuju. Xi má ná ne, tucutjin xi hitsê sa vinga ná ngayun ne, ngayun ne, hitsê sa chuva vinga nuju ngahan.

¹⁶ Cuichja yahnga xuta tsahan ne: “Jéya. Hacuiin casuandya naja cha tsêhê gastu rë cha, peru tsêhê xi jemu quicun cacun cha ne, jemu cavindacha naja cha.” Cuatjin cuichja yahnga xuta tsahan. ¹⁷ ¿Há cavindácha nuju xi catsingátju nuju ngujo cha xi quijitjengui nuju cojo cjua naha? ¹⁸ Cachjá cojo cha Tito xi cjuetjengui nuju cha, hacuaha catsingátju sa ngu cha xingueen cojo cha Tito. ¿Há cavindacha nuju cha Tito vë? Jéya. Ha ndaja hyun ta cha vëhê ne, hya xi quitaha cha cojo nuju ne, tangun cjuatacun rë cha cojo cjuatacun naha, hacuaha tangun xcusun xi casahmi cha cojo xcusun xi ha casahme ngahan.

¹⁹ Ngu ngu ngayun ne, ningatuhun tacún xi cojo nuju ngayun titihín cjuaquixi niji. Peru hacuiin cuatjin ta, xcun Nina ne, cuitjin tinújin ngatsê rë xi tjin tangun cjuatacun niji cojo Jesucristu. Peru yëjê ni cjua xi tinújin ne, tinújin ngatsê nuju ngayujun ni, tsan, cojo sa xi cuma yehe sa cjuatacun rë Nina xi tjin nuju. ²⁰ Jemu macjín cáacun, sá nihñuu tutjin xi meje ná, hacuaha sá sahmee tutjin xi meje nuju, hya xi cjuêhê nangui nuju. Jemu macjín cáacun, sá tacun si ngajñi nuju, sá tjin cjuachini ngajñi nuju, sá cjan nuju cojo xingun, sá hnga tacún, sá tjin cjuandesu ngajñi nuju, sá tjin cjuachjataha ngajñi nuju, sá tjin cjuaxta ngajñi nuju, sá tujyé tinihñu. ²¹ Jemu macjín cáacun sá sahmi chuva Nina ngahan ngajñi nuju hya xi cjuêhê nga ngundiya nangui nuju; hacuaha jemu macjín cáacun, sa choho cuma rë xahasen naha ngatsê rë ngu ngu ngayun xi mijí nindeyun cjuatacun nuju hacuaha hacuiin caviyujunxun cjuatsehen xi nihñu, hacuaha cjuatsehen xi sahmi xuta cojo ngu xi hacuiin chjuun rë me, hacuiin xihin rë me.

13

Conseju xi sua Pablo

¹ Quihndê ne, cuma jyan ndiya xi cjuëtjengê nuju. Sacuatjin camahindu xcun xujun rë Nina xi jo o sa xi jyan xuta sua me cjuaquixi rë me tsêhê ngu cha xi caxincha jyê rë ne, sehe cuma chihin cjua jan, há cuma cha castigu o há xi cumaji cha castigu. ² Hya xi cavitejñataha cojo nuju xi ma jo ndiya ne, cachjátaha rë xuta xi casahmi cjuatsehen; hane quihndê xi xín tejñataha ne, cúa cuichjá nga cuatjin cojo nuju ngayujun ni xi cjêê cuichjá cojo nuju ta, hya xi cuinduva nga ngundiya ne, ha quihndê tsajin yo cuetjutje tsêhê castigu xi fehya jyê rë. ³ Cuatjin sahme ta, tsêhê xi ngayun ne, tivinchunsun chuva rë xi meje cumachaya nuju há cjuaquixi xi Jesucristu ne, sua ná me cjua xi chjá cojo nuju. Me vëhê ne, hya xi tsichuva nuju me ne, hacuiin jemu yuma hasen me ta jemu hñu ngahñu rë me, jemu hñu cjuatacun rë me

ngajñi nuju. ⁴ Cjuaquixi xi jemu yuma hasen me hya xi catsiquehen xuta me xcun cru; peru tjin rë me ngahñu rë Nina quihndë xi tacun nga me cjuahñu. Hacuaha ngayin ne, xi tjin tangun cjuatacun niji cojo rë me ne, jemu yuma hasen ngayin. Peru cuinechin cjuahñu cojo rë me cojo ngahñu rë Nina cojo sa xi cuma cuisecuin nuju.

⁵ Chjuhunchuvun suvun ni yojo nuju, ¿há nechunyun jain ndiya rë Jesucristu? Nichuvun suvun ni yojo nuju. Ngayun ne, hatuxa machaya nuju suvun xi Jesucristu ne, jiya me cahntsua xahasen nuju, jiya me ngajñi rë cjuatacun nuju. Sa xi tsajin ne, cuetjun ndesu ngayun. ⁶ Hacuaha vetahá cáacun ta ngayun ne, cumachaya nuju ta ngayin ne, hacuiin ndacha ngayin. ⁷ Tichjahyin rë Nina cojo sa xi ngayun ne, hacuiin nihñu cjuatsehen. Cuatjin chjahyin, peru hacuiin ngatsë rë xi meje niji xi cuichja xuta ta jemu ndaja xa canihñi ta, xi meje niji ne, xi nihñu cjuandaja, handasa cuichja xuta xi ngayin ne, sacuaaha xuta ndacha ngayin. ⁸ Ngayin ne, tsajin mé venguichji rë xi nihñi xcusun xi hacuiin cjuaquixi ta xi venguichji rë xi nihñi ne, xcusun xi cjuaquixi. ⁹ Jemu ndama niji hya xi jemu yuma hasen ngayin hane ngayun ne, jemu hñu cjuatacun nuju. Hacuaha chjahyin rë Nina xi xcun ngasunhndë nuju ne, cuiyujuchihin cjuatacun nuju, cuma tyjahi xahasen nuju. ¹⁰ Vëhë xi cuatjin tifsihindu nuju cjua vëhë xcun xujun vihi quihndë xi chaja sa cjuëtjengë nuju, cojo sa xi hya xi cjuëhë ngajan ne, hacuiin jemu hñu cjua naha cojo nuju ta Nai naja ne, casua ná me xa xi cuisécoo nuju, hacuiin xi tsinguétsun cjuatacun nuju.

Tsinguijnetaha Pablo cjua

¹¹ Quihndë ne, ngayujun ni ne, catama sua rë xahasen nuju; tiyujunchuhun cjuatacun nuju; tuhun cjuetacun xahasen nuju; nihñu tangun cjuatacun nuju cojo xingun; tinechun cojo cjuandaja cojo cjuajeya; hacuaaha xicamacjiin tacún ta Nina xi sua cjuahmutacun sua cjuajeya ne, cuisécoo nuju me. ¹² Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja. ¹³ Yëjë xuta ladu rë Jesucristu ne, tsingatju me ngu nina tsujun. ¹⁴ Jesucristu, Nai naja ne, catisua nuju me cjuandaja rë me; Nina ne, catisua nuju me cjuahmutacun rë me; hane Hasen rë Nina ne, catisécoo nuju ngayujun ni.

Carta xi catsingatju San Pablo xi cafahtsja xuta ladu rë Jesucristu ngajan distritu Galacia

¹ Ngahan Pablo ne, má ngahan apóstol, hacuiin ngatsë rë xi xuta catsingatju ná me o sa xi cavetahaxa ná me ta ngatsë rë xi cavetahaxa ná Jesucristu cojo Nina Nahmi naja, me xi catsicuya nga rë Jesucristu cjuahñu tséhë ngajñi rë nima. ² Ngahan cojo yëjë sa xuta ladu naja xi siu cojo ná nguehe ne, ningatjin nuju carta vihi, ngayujun ni xuta ladu rë Nina xi tséhë yëjë ni nandya ngajan distritu Galacia. ³ Nina Nahmi naja cojo Nai naja Jesucristu ne, catisua nuju me cjuandaja cjuajeya. ⁴ Jesucristu ne, casua me yojo rë me xi cueya me ngatsë rë yëjë ni jyë naja, cojo sa xi cuéhëndaya naja me tséhë nixtin tsehen vihi, sacuatjin meje rë Nina Nahmi naja. ⁵ Catamajyë catamahnga Nina cojo Hasen rë me yëjë ni nu yëjë ni nixtin. Cuatjin jain.

Ngu ni má cjuandajyihí xi chja tséhë Jesucristu

⁶ Jercu fircun ná xi ngayujun ni ne, jercu xati tiniñu cjin tséhë Nina, me xi cajindaya nuju cojo cjuandaja rë Cristu, hane tiniñu tiña tséhë ngu nga cjuachacun. ⁷ Xi cjuaquixi ne, tsajin sa ngu cjuachacun ndajyihí xi hacjahi xi cuaxëtje naja. Peru tjin yahnga me xi tisuandya nuju hacuaha meje tsindeya me cjuandajyihí xi chja tséhë Jesucristu. ⁸ Peru sa xi tjin ngu me xi sua cumachaya nuju ngu cjuandajyihí xi tanguaain cojo xi ha catihín camachaya nuju ne, ¡catji me cojo nai rë me! Cuatjin catama, handasa ngahan suva o sa xi ngu ángel tséhë ngahnga cuichja cjuajan. ⁹ Sacuatjin canújin cojo nuju titjun ne, hacuanitjin ni cúa cuichjá cojo nuju quihndë cjuavihi: Sa xi tjin ngu me xi tisua tijimachaya nuju ngu cjuandajyihí xi tanguaain cojo xi ha camacjain nuju ne, ¡catji me cojo nai rë me!

¹⁰ Ngahan ne, tsajin jercu meje ná xi chuya rë xuta tsahan ta xi meje ná ne, xi Nina chuya rë me tsahan. Sa xi meje sa ná xi xuta chuya rë me tsahan sacuatjin camameje ná hatsëë ne, hacuaha hacuiin mosu hndixahan rë Cristu ngahan.

Hacutjin camá xi camá Pablo apóstol

¹¹ Nguehe cuichjá cojo nuju ngayujun ni xi cjuandajyihí xi suá machaya rë xuta ne, hacuiin cjuatacun rë xuta. ¹² Hacuiin xuta casua ná me cjuandajyihí vë, hacuaha hacuiin xuta cavicuya ná me ta Jesucristu ne, me vëhë xi casua me camachaya ná.

¹³ Ngayujun ni ne, ha camachaya nuju hacutjin xi casahme hatsëë, hya xi jemu cavétaha yojo naha cjuachacun rë xuta tjë rë Israel. Camachaya nuju tséhë hacutjin jercu tisuá rë xuta ladu rë Nina cjuañihí nixtin hya hacuaha jercu tisahme ngahñu xi tsicjéya me. ¹⁴ Hane ngahan ne, tséhë yëjë xuta xi hacuaha tjë rë Israel xi tangun nu naha cojo ne, cavátjutaha rë xi casahmechehen yëjë ni xcusun rë xuta naha ta, tséhë xi jercu tu cavétaha camahani yojo naha cojo xcusun rë xutachanga naha. ¹⁵ Peru Nina ne, cavaxijin ná me chaja sa xi tsin ngahan, hane cojo cjuandaja rë me ne, casuaxa ná me. Hya xi Nina cavejña ngu cacun me ¹⁶ xi tsingacun me ngahan Quihndi rë me, cojo sa xi suá cumachaya rë xutaxín tséhë cjuandajyihí tséhë me ne, hya tsajin yo xuta xi cëjë cavinengësë rë, ¹⁷ hacuaha cejen ngajan

Jerusalén xi cjuéjtjengë me xi ha má apóstol chaja sa xi cuma ngahan apóstol. Cahndé rê vèhë ne, ngutjen cëjëxen ngajan distritu Arabia, sehe cavúya nga nandya Damasco.

¹⁸ Hya xi camá ne, xi cavatju jyan nu ne, cëjë ngajan Jerusalén, cëjëjtjengë Pedru, hane cavitejñataha cojo rê me tyjuhun nixtin. ¹⁹ Peru cahveen apóstol xi yahnga ta ngu ni Jacobo, xicjin Nai naja, xi cahvë. ²⁰ Cjua xi tichjá cojo nuju ne, vèë Nina ta hacuini vindácha.

²¹ Hya xi camá ne, cëjë distritu Siria cojo distritu Cilicia. ²² Hane xuta ladu rê Cristu ngajan distritu Judea ne, hisca cjëë sa scuëë me ngahan. ²³ Sehe tu vihndë me cjua vihi: “Cha xi jercu casua naja cjuañihi hatsëë ne, quihndë ne, tisua cha tijmachaya rê xuta tséhë cjuachacun xi jercu casahmi cha ngahñu xi tsicjéya cha.” Cuatjin vihndë me. ²⁴ Hane casahmi jyë casahmi hnga me Nina cojo Hasen rê me ngatsë naha.

2

Quiji tjengui Pablo apóstol xi yahnga

¹ Hya xi camá ne, xi cavatju teñuju nu ne, cavúya ngahan nga ngu ndiya ngajan Jerusalén. Hacuaha Bernabé ne, quijitangun me cojo ná. Hacuaha cëjëcojo cha Tito. ² Cëjë ta cuatjin cachja Nina. Hane xcun ngu junta xi camá cojo suvá xuta matitjun ne, cachjá cojo rê me hacutjin fi cjuandajyihí xi suá machaya rê xutaxín. Cuatjin casahme, tséhë xi miji ná xi xa xi tisahme o xi ha casahme ne, tu mahya ni. ³ Peru hisca cha Tito xi quitahátangun cha cojo ná ne, handasa xutaxín má cha ne, camaji cha nguýë xi xtí chuxin rê cha. ⁴ Ngujo cha ndacha xi chja cha xi ladu rê Jesucristu má cha ne, cavisehen tahahma cha ngajñi niji xi scutsejen cha hacutjin xcusun niji xi tjin ndaya ngayin ngatsë rê xi tjin tangun cjuatacun niji cojo Jesucristu. Meje rê cha xi cuetihin nga yojo niji cojo ley rê Moisés. ⁵ Peru ngayin ne, caningatiin rê cha hisca hitsë, cojo sa xi cjuandajyihí xi hatuxa cjuaquixi ne, chajin xi cuma nuju.

⁶ Peru me xi chjahárcun rê sacuaaha xuta xi matitjun jan ne, (cuatjin chjá ta xa xi quitahá me jan ne, hisca cuendaain ná ta, Nina ne, texta ni vutsejen naja me ngayejen ni), me xi cuacun matitjun jan ne, cavesintaain me hisca ngu cjua tséhë cjuandajyihí xi chjá cojo xuta, tséhë xi ha tjin chihin. ⁷ Hacuaha cajnercu me xi Nina casua ná me xa xi cuichjá cjuandajyihí cojo xutaxín, sacuahatjin rê Pedru xi casatë rê me xi cuichja me cojo xuta tjë rê Israel. ⁸ Nina ne, me xi catsingatju rê Pedru xi cuma me apóstol ngajñi rê xuta tjë rê Israel ne, hacuaaha hacui ni me xi catsingatju ná xi cuma ngahan apóstol ngajñi rê xutaxín.

⁹ Hane Jacobo cojo Pedru cojo Juan, me xi chjahárcun rê sacuaaha xuta xi matitjun ne, hya xi cuatjin cajnercu me xi Nina casua ná me cjuandaja jan ne, cafaha me ntsin, ngahan cojo Bernabé, hane cuatjin catsingacun me xi ngayin ne, tinihñitangun cojo rê me xa rê Nina. Hane camangu tacuín xi ngayin ne, nihñi xa ngajñi rê xutaxín, hane me xi cuacun jan ne, sahmi me xa ngajñi rê xuta tjë rê Israel. ¹⁰ Ngu tu tu ni xi cafehya niji me ne, xi cuisecuin ngajñi rê cjuachaja rê xuta yuma xi hinchajñi ngajñi me. Sacuatjin xcusun vèhë ne, hatuxa jercu vejñá xi sahme.

Cachjataha Pablo Pedru ngajan Antioquía

¹¹ Peru hya xi quiji Pedru ngajan nandya Antioquía ne, cachjátáha rê me xcun cojo xcun ta, tséhë xi suvá tsejen xi cuaain tjin xi tisahmi me. ¹² Chaja

sa xi cjuhe ngujo cha xi catsingatju Jacobo ne, tijnë tangun Pedru niñu cojo xutaxín xi ladu naja. Peru tu ngu cafehe cha xi cuacun jan ne, cavetsihin cavejñaxin me xi jinë tangun me cojo xutaxín xi cuacun jan ta, tsêhë xi tsacun me yahnga xuta tjë rë Israel xi ladu naja xi meje rë xi xti chuxin rë yëjë ni xuta xi visehen ladu rë Nina. ¹³ Hacuaha yëjë sa xuta tjë rë Israel xi siu ngajan ne, cavetsihin casahmi jo xcun jo hntsua me sacuatjin rë Pedru, hane hisca cojo Bernabé camatangun me cojo me xi cuacun jan cojo xcusun xi casahmi me. ¹⁴ Peru hya xi cahvë xi xcusun xi tisahmi me ne, matanguaain cojo cjuaquixi xi vicuya naja cjuandajyihi ne, xcun yëjë ni xuta jan ne, cuitjin cachjá cojo rë Pedru: “Ngayun xi ngu xuta tjë rë Israel má ngayun ne, sa xi nihñu sacuaha sahmi xutaxín, hacuiin sacuaha sahmi xuta tjë rë Israel ne, çhacutjin meje nihñu ngujoyë xi xutaxín jan ne, sahmi me sacuaha nihña ngayaan xuta tjë rë Israel?”

Xi mangu tacuun cojo Jesucristu ne, vetjuntje xuta, sa xuta tjë rë Israel o sa xutaxín

¹⁵ Ngayaan ne, hatuxa xuta tjë rë Israel má ngayaan, hacuiin xuta tsehen má ngayaan. ¹⁶ Handasa cuatjin ne, ha hyan xi ngu xuta ne, tsicjiin Nina jyë rë me ngatsë rë xi vihndë me tsêhë ley rë Moisés ta suvá ni ngatsë rë xi mangu cacun me cojo Jesucristu. Hane cojo ngayaan ne, hacuaha camangu tacun cojo Jesucristu, cojo sa xi tsicjé Nina jyë naja ngatsë rë xi mangu tacun cojo rë Cristu, hacuiin ngatsë rë xi canuhyaan tsêhë ley jan ta, tsêhë xi tsajin camahani yo xi cjuë jyë rë ngatsë rë xi vihndë tsêhë ley rë Moisés jan.

¹⁷ Hya xi canihña tangun cjuatacun naja cojo Cristu cojo sa xi cjuë jyë naja ne, sa xi hya camatsejen xi hacuaha ngayaan xuta tsehen ynan ne, çhá vëhë vijne xi Cristu ne, casahmi me xi caxincha ngayaan ndiya rë cjuatsehen? ¡jéya, hacuiin cuatjin vijne! ¹⁸ Sa xi cúa tsindaja nga xcusun xi ha catsinguétsun ne, ngajan matsejen xi xuta tsehen má ngahan. ¹⁹ Ngahan ne, xi cuma rë ley rë Moisés ne, sacuaha xi cavéya, sacuaha xi suvá ley jan catsiquehen ná. Cuatjin camá cojo sa xi cuma ngahan tsêhë Nina. Sacuaha xi casetaha tangun ngahan xcun cru cojo Cristu. ²⁰ Ngajan xi sacuaha xi ha quihndë hacuiin cjuahñu naha xi tjin ná ta sacuaha cjuahñu rë Cristu. Peru quihndë xi tjin ná cjuahñu cojo yojo naha ne, mangu cacún cojo Quihndi rë Nina, me xi catsihmu cacun ná hacuaha casua me yojo rë me xi cueya ngatsë naha. ²¹ Hacuiin tsitjungë cjuandaja rë Nina. Sa xi cuma cjuë jyë rë xuta ngatsë rë xi vihndë me tsêhë ley rë Moisés ne, ha tu mahya ni cahme Cristu.

3

çHá cojo ley o há cojo Jesucristu mangutacuun?

¹ Ngayujun ni xuta Galacia ne, ¡jercu yuma hasen yun! çHá tjin yo cafehya cacun tsujun xi cuatjin ningatuhuntacún? Jercu tu ndaja camachaya nuju hacutjin xi cahme Jesucristu xcun cru. ² Ngu tu tu ni cjua xi meje cuinengësë nuju ne: çHá cachjuhunnuntsun Hasen rë Nina ngatsë rë xi canihñu sacuatjin vitexa ley jan, o sa tsajin ne, há ngatsë rë xi camacjain nuju cjuandajyihi xi cavisifñuju? ³ çHá tuxa yuma hasen ngayun? Quihndë xi cavetsuhun cojo Hasen rë Nina ne, çhá meje nihñuchuhun cojo ngahñu nuju suvun ni? ⁴ çHá tu mahya ni xi cuatjin cjín xcusun cavatjun ni? ¡Hatuxa hacuiin tu mahya! ⁵ Hya xi Nina sua nuju me Hasen rë me hacuaha sahmi me cjuarcun ngajñi nuju ne, çmé má cuatjin casahmi me? Hacuiin ngatsë rë xi nihñu sacuatjin vitexa ley ta, ngatsë rë xi macjain nuju cjuandajyihi xi visifñuju.

Compromisu rë Nina cojo Abraham

⁶ Xcun xujun rë Nina ne, cuitjin camahindu: “Abraham ne, camangu cacun me cojo cjua xi cachja Nina cojo rë me, hane ngatsë rë vëhë xi catsicjë Nina jyë rë me.” Cuatjin camahindu. ⁷ Ngajan xi meje rë xi cuijnercun xi xuta xi mangu cacun me cojo Nina ne, me vëhë jain xi quihndi rë Abraham ne. ⁸ Xujun rë Nina jan ne, ha tjun sa vëë xi tsicjë Nina jyë rë xutaxín ngatsë rë xi cumangu cacun xutaxín jan cojo rë me. Vëhë xi xcun xujun rë Nina ne, camahindu cjua xi cuitjin cachja Nina cojo Abraham: “Ngatsë riji ngaye ne, cumanchacuntihin yëjë ni xuta ngasunhndë.” ⁹ Ngajan xi yëjë ni xuta xi mangu cacun me cojo Nina ne, cumanchacun tangun me cojo Abraham, me xi hacuaaha camangu cacun.

¹⁰ Yëjë ni xuta xi mangu cacun me cojo ley rë Moisés ne, hatuxa cuatju me castigu, tsëhë xi xcun xujun rë Nina ne, cuitjin camahindu: “Nina ne, sahmi rë me castigu yëjë ni xuta xi vihndiin me tsëhë yëjë ni cjua xi camahindu xcun xujun rë ley rë Moisés.” Cuatjin camahindu. ¹¹ Ngajan xi suvá tsejen xi xcun Nina ne, cjuin jyë rë hisca xi ngu xuta ngatsë rë xi cahndë me tsëhë ley jan, tsëhë xi xcun xujun rë Nina ne, cuitjin camahindu: “Xuta xi tsajin jyë rë me ngatsë rë xi mangu cacun me cojo Nina ne, sacú rë me cjuahñu xatsë.” Cuatjin camahindu. ¹² Peru ley rë Moisés jan ne, cuendaain camahani rë xi mangu tacun cojo Nina ta, xcun xujun rë Nina ne, cuitjin camahindu: “Xuta xi sahmi me sacuatjin vitexa ley ne, sacú rë me cjuahñu xatsë sa xi sahmi chihin me ley jan.” Cuatjin camahindu.

¹³ Cristu ne, cavëhëndaya naja me tsëhë castigu xi vitexa ley jan, hya xi cavatju me castigu jan ngatsë naja. Camahindu nga cuitjin xcun xujun rë Nina: “Yëjë nima xi xtyangui tsëhë ngu ya ne, hatuxa cuatju me castigu rë Nina cuma.” Cuatjin camahindu. ¹⁴ Cristu ne, cuatjin cavëhëndaya naja me, cojo sa xi cjuaninchacuntihin xi cachja Nina xi sua me Abraham ne, hacuaaha satë rë xutaxín ngatsë rë Jesucristu, hacuaaha cojo sa xi ngatsë rë xi mangu tacun cojo Jesucristu ne, sacú naja Hasen rë Nina xi cachja Nina xi sua me.

¿Há ley o cjua xi cachja Nina mangutacun?

¹⁵ Ngayujun ni ne, cuichjá cojo nuju ngu ejemplu xi ha ndaja hyan. Hya xi ha camachihin xujun tsëhë ngu compromisu ne, tsajin yo xi tsicjëya rë o sa cuesuntaha sa rë ngu cjua. ¹⁶ Nina ne, cachja me cojo Abraham xi sua me cjuandaja rë me xi cuma rë Abraham cojo tjë rë me. Chjaain xujun rë Nina xi “yëjë tjë rë”, sacuaaha xi jercu cjin xuta tichja tsëhë ta xi chja ne, “cojo tjë riji”, sacuaaha xi ngu ni xuta tichja tsëhë. Hane tjë vëhë ne, hacui Cristu. ¹⁷ Xi meje cuichjá ne, Nina ne, casahmi me ngu compromisu cojo Abraham titjun. Vëhë xi ley rë Moisés, xi cavejña Nina xi cavatju ñuju cientu cojo cantë nu ne, maji tsicjëya rë compromisu jan, maji tsinguetsun rë cjua xi cachja Nina jan. ¹⁸ Sa xi sacú naja cjuandaja xi sua Nina ngatsë rë xi vinuhyan tsëhë ley rë Moisés ne, ngajan xi hacuín ngatsë ni rë xi cuatjin cachja Nina xi sacú naja. Peru Nina ne, casua me cjuandaja jan Abraham ngatsë ni rë xi cuatjin cachja me titjun.

Mé ngatsë rë xi tjin ley rë Moisés

¹⁹ Sa xi cuatjin ne, ¿mé machjirëhë ley rë Moisés? Xi camá ngascan ni, Nina casua me ley jan, cojo sa xi cumatsejen xi xuta ne, hatuxa vihndiin me cjua xi vitexa Nina. Ley jan ne, cavitexa hisca xi cafehe tjë rë Abraham jan, me xi cachja Nina xi sacú rë cjuandaja. Hacuaaha ley jan ne, casahmi entregadu ángel tsja Moisés, me xi cavéjña vasentjin ngajñi rë Nina cojo xuta. ²⁰ Peru

hindë ne, tsëhë cjua rë Nina ne, mamijí sa ngu me xi véjña vasantjin, ta ngu tu tu ni me ne, tifahacuenda me.

²¹ ¿Há vëhë vijne xi ley rë Moisés ne, sahmi rë condra cjua xi cachja Nina jan ni? ¡Jéya, hacuiin cuatjin! ta, sa xi ley jan camá casua naja cjuahñu xatsë ne, ha café jyé naja ngatsë rë xi canuhyan tsëhë ley jan. ²² Peru xujun rë Nina ne, chja xi cjuatsehen vitexa rë yëjé ngarca ni, cojo sa xi xuta xi mangu cacun me cojo Jesucristu ne, cuma cjuahatsja me cjuandaja xi cachja Nina xi sua me.

²³ Peru chaja sa xi nduva nixtin xi camá camangu tacun cojo Jesucristu ne, ley jan ne, cavinchahñu naja sacua ha xi ndavaya cavinechayaan, hisca nixtin xi casacu camachaya naja xi fë jyé naja ngatsë rë xi mangu tacuun cojo Jesucristu. ²⁴ Cuatjin xi ley ne, cavitexa naja hisca xi canduva Cristu cojo sa xi cjuë jyé naja ngatsë rë xi mangu tacuun cojo Jesucristu. ²⁵ Peru quihndë xi ha cafehe nixtin xi mangu tacuun cojo Jesucristu ne, ha quihndë vitexaain sa naja ley rë Moisés jan. ²⁶ Cuatjin ta, tsëhë xi quihndë xi tjin tangun cjuatacun nuju cojo Jesucristu ne, ngayujun ni ne, quihndi rë Nina má ngayun ngatsë rë xi mangu tacún cojo rë me. ²⁷ Ngayujun ni xi caxtenda ngayun xi nihñutangun cjuatacun nuju cojo Cristu ne, hacua ha cavisehen nuju cjuatacun rë me jan sacua ha xi cachujun ngu tsjian xatsë. ²⁸ Ngajan xi cuendaain rë sa xi xuta tjë rë Israel o sa xi xutaxin ngayun, cuendaain rë sa xi xuta caxteña o sa xi xuta tjin ndaya ngayun, cuendaain rë sa xi chjuun o sa xi xihin ngayun ta, tsëhë xi ngayujun ni ne, xi tjin tangun cjuatacun nuju cojo Jesucristu ne, ngu tangun ni cún yun xi cuma rë Nina. ²⁹ Hane sa xi tsëhë Cristu má yun ne, ngajan xi hacua ha tjë rë Abraham má yun, hane satë nuju cjuandaja xi cachja Nina xi sua me.

4

¹ Cuma cuinújan ne, sacua ha cha xi cjuahatsja cjuanchina rë xutacha rë ne, nguyëjë rë xi chúva nu rë cha ne, tangun cha cojo ngu mosu xi cachahá rë, handasa cjuaquixindaja xi cha vëhë má cha nai rë yëjé ni cjuanchina jan. ² Tjin xuta xi sahmi rë cha cuidadu hacua ha fahacuenda me cjuacjintacun rë cha, hisca nixtin xi cachja nahmi rë cha xi cuatjin cuma cojo cha. ³ Cuanitjin ni naja ngayaan ta, hya xi cjualanga naja ne, hatuxa cavinuhyan tsëhë xitsehen xi vitexa rë ngasunhndë, sacua ha xi má ngayaan hndixahan xi cachahá rë. ⁴ Peru hya xi cavechútáha rë nixtin rë ne, Nina ne, catsingatju me Quihndi rë me, xi catsin sacua ha tsin ngayaan xuta ngasunhndë, hacua ha ley rë Moisés cavitexa rë jan. ⁵ Cuatjin catsingatju me, cojo sa xi Quihndi rë me jan ne, cuëhëndaya naja ngayejen ni xi cavitexa naja ley jan, hacua ha cojo sa xi cuma ngayaan quihndi rë Nina. ⁶ Cojo sa xi cumatsejen xi quihndi rë Nina má ngayun ne, Nina ne, caveya me Hasen rë Quihndi rë me cahntsua cjuatacun naja. Hane Hasen jan ne, cuitjin chja cojo Nina: “¡Papá, Nahmi naha!” ⁷ Vëhë xi ngayun ne, hindë hacuiin má ngayun mosu hndixahan xi caxteña ta quihndi rë Nina. Hane xi cuatjin quihndi rë me ngayun ne, Nina ne, sua nuju me yëjé ni xi satë rë quihndi rë me.

Macjincacun Pablo tsëhë xuta Galacia

⁸ Hatsëë nixtin ne, hya xi chaja sa cumachaya nuju yo xi Nina ne, jemu cavetuhun yoju nuju cojo jemu cjin xcusun nina xi hatuxa hacuiin nina. ⁹ Peru quihndë xi ha camachaya nuju yo xi Nina ne, o cuma cuinújan ne, quihndë xi Nina ne, vutsejen nuju me cojo cjuandaja ne, ¿hacutjin nga meje cuyun cuisuhun cojo cjuahasen xi chúva ngahñu rë hacua ha yuma cojo

cjuatacun rē ni? ¿Hacutjin nga meje cuetuhun yojo nuju cojo cjuahasen xi cuacun jan ni? ¹⁰ Jercu nihñu suhi. Tjin nixtin xi jercu chjuhunrcun, tjin suhi xi nihñu chuva sá o sa xi chuva nu. ¹¹ Macjín cacún, sá tu xa xi casahme ngajñi nuju ne, tu mahya ni camá.

¹² Ngayujun ni ne, cjuéhya nuju favor ne, catama ngayun sacuaaha ngahan ta, tséhē xi ngahan ne, ha camá ngahan sacuaaha ngayun. Tsajin mé xi choho canihñu cojo ná. ¹³ Hacuaha hyun xi titjun ne, casuá camachaya nuju tséhē cjuandajyihi xi chja tséhē Jesucristu ngatsē rē ngu chíhin xi yaha ná. ¹⁴ Peru handasa casuándya nuju cojo chíhin naha jan ne, ngayun ne, tsajin canitjungun ná hacuaaha tsajin canihñuchuvun ná. Cahndē rē véhē ne, cachjuhunntsun ná sacuaaha xi ngu ángel xi catsingatju Nina má ngahan, o sacuaaha xi suvá Jesucristu má ngahan. ¹⁵ ¿Mé camá cojo cjuandaja xi tjin nuju hatsēē ni? Ngahan ne, tsinguixē xi ngayun ne, hisca canaxun túxcun tuhun ná nixtin hya, sa xi camá canaxun. ¹⁶ ¿Há camá ngahan condra nuju ngatsē rē xi cachjá cojo nuju cjuaquixi?

¹⁷ Tjin xuta xi jercu meje cuisecoo nuju me, peru hacuiin cojo cjuandaja ta xi meje rē me ne, xi cuaxēxin nuju mé tsahan, cojo sa xi ngayun ne, ninguisuhunñurcun cojo rē me. ¹⁸ Jercu ndatjin xi meje cuisecoon rē xingueen, hya xi cojo cjuandaja. Peru meje rē xi yējē ni nixtin cuatjin nihña, hacuiin suvá ni hya xi tejñataha cojo nuju. ¹⁹ Ngayujun ni tsan, jercu jyē cjuahmu xi tivátju nga tijima ngatsē nuju, sacuaaha vatju ngu chjuun xi tsin quihndi rē me. Hacuaha cuatjin cjuēndujú cojo cjuahmu vihi hisca xi cumatsejen xi jiya tē Cristu ngajñi cjuatacun nuju hacuaaha cuitexa me cjuatacun nuju tséhē yējē ni xcusun xi nihñu. ²⁰ Jercu meje cuitejña cojo nuju ndicuma ni, cojo sa xi cuma tsindéya cjuavisiajmi naha cojo nuju ta, tséhē xi jercu vityangē cacún tsujun.

Ejemplu tséhē Agar cojo Sara

²¹ Ngayujun ni xi meje nuju xi ley rē Moisés cuitexa nuju ne, tinújun cojo ná, ¿há cjēē cuinuhyun cjuá rē ley jan? ²² Camahindu xi Abraham ne, jo xu camá quihndi rē me: ngu ne, tséhē na mosu hndixahan xi sahmi xa rē chjuun rē me, hane xingu jan ne, tséhē chjuun rē suvá me, na xi hacuiin hndixahan ta hatuxa xuta ndaya tjin. ²³ Quihndi rē na mosu hndixahan jan ne, catsin sacuaaha tsin yējē ni langa; peru quihndi rē na ndaya jan ne, camá tséhē cjuarcun rē Nina. ²⁴ Cjuá xi cuicun vi ne, sacuaaha ngu ejemplu: jo chjuun jan ne, sacuaaha jo compromisu má na. Ngu na ne, Agar hmí rē na, hane yējē ni quihndi rē na ne, hatuxa hndixahan cachahá rē. Hane chjuun jan ne, sacuaaha compromisu xi casahmi Nina cojo Moisés ngajan Naxi Sinaí. ²⁵ Na Agar, na xi sacuaaha Naxi Sinaí ngajan Arabia ne, sacuaaha ngu ejemplu tséhē nandya Jerusalén xi tacun quihndē. Hane yējē ni xuta tséhē Jerusalén véhē ne, sacuaaha hndixahan cachahá rē má me. ²⁶ Peru yējē ni xuta tséhē Jerusalén xi tacun ngahanga ne, hatuxa ndaya tjin me. Hane ngayaan ne, quihndi rē nandya Jerusalén véhē má ngayaan. ²⁷ Cuitjin chja xujun rē Nina: Catamasua ri ngaye chjuun xi maji sacú ri quihndi; chjindaye cjuasua, ngaye xi cjēē cuatji cjuahmu xi tsin ri quihndi.

Tséhē xi ngaye xi cavixin cojo ra, hitsē sa cjín cuma ye cojo quihndi riji xi cuma ran xi fi vejña na cojo cha.

²⁸ Ngayujun ni ne, hacuaaha quihndi rē Nina má ngayun, sacuatjin rē Isaac, ngatsē rē xi cuatjin cachja Nina. ²⁹ Nixtin hya ne, cha xi catsin sacuaaha tsin yējē ni langa ne, catsujyihya tjengui cha cojo cjuahngatacun cha xi catsin

ngatsë rë Hasen rë Nina. Quihndë ne, ha cuanitjin ni tijima. ³⁰ Peru ¿mé chja xujun rë Nina? Cuitjin chja: “Naxendihye na mosu hndixahan jan cojo quihndi rë na ta, tsëhë xi quihndi rë na hndixahan jan ne, hatuxa cumaji sacu tangun rë cjuanchina rë nahmi rë cojo quihndi rë na xi ndaya tjin.” Cuatjin chja xujun rë Nina. ³¹ Vëhë xi ngayejen ni ne, hacuiin quihndi rë na mosu hndixahan má ngayaan ta quihndi rë na xi ndaya tjin.

5

Meje rë xi cuanguendujun xi tjin ndaya ngayaan

¹ Cristu ne, cavëhëndaya naja me, cojo sa xi ndaya tjin ngayaan. Vëhë xi tiyujunhñu cjuatacun nuju, xicaninguisunjñuu rcun nga cojo ngu xcusun xi sahmi xi cuyun nga ngayun sacuaaha hndixahan.

² Nutsujun ni. Ngahan Pablo ne, cuichjá cojo nuju ta, sa xi xtí chuxin nuju sacuatjin xcusun rë xuta tjë rë Israel ne, Cristu ne, cumachjiriin nuju me.

³ Cúya cuichjá cojo nuju ta yëjë ni xihin xi cuatjin xtí chuxin rë ne, hatuxa tjin rë xi sahmi yëjë ni hacutjin chja ley rë Moisés. ⁴ Ngayun xi meje nuju xi cjuë jyë nuju ngatsë rë xi vinuhyun tsëhë ley rë Moisés ne, hindë tsajin tjin tangun cjuatacun nuju cojo Cristu, hacuaaha jemu cjin nechun tsëhë cjuandaja rë Nina. ⁵ Peru ngayin ne, jercu vetihin tacuín xi tsicjë Nina jyë niji. Hacuaaha jercu nechinyin xi cuatjin sahmi Nina ta, tsëhë xi Hasen rë Nina ne, visecoo niji xi mangu tacuín cojo Jesucristu. ⁶ Hya xi tjin tangun cjuatacun naja cojo Jesucristu ne, venguin chji rë sa cati rë o sa xi catiin rë chuxin naja. Xi venguí chji rë ne, xi mangu tacuín cojo Jesucristu, hane ngatsë rë vëhë ne, xi hacuaaha tjin naja cjuahmutacun.

⁷ Ngayun ne, ha jercu ndaja titsangun titjun. ¿Yo xi casuandya nuju xi mijí cuanguendujun xi cuinuhyun tsëhë cjuaquixi rë Nina? ⁸ Nina xi tsingatju me cjua nuju ne, hacuiin me vëhë xi cuatjin casuandya nuju. ⁹ Ha hyan cjua xi chja cuitjin: “Hitsë lihndi ni san rë pan ne, caa rë tsisatjen rë yëjë nahyu.” Cuatjin chja cjua. ¹⁰ Macjiin cacún tsujun ta, ngatsë rë xi tjin tangun cjuatacun naja cojo Nai naja ne, xi má ná ne, ningatuhun tacún sacuatjin tsingátaha cacún ngahan. Hane tu yo ni xi tisuandya nuju ne, cuatju castigu cuma.

¹¹ Sacuaaha ngahan ne, sa xi quixi xi tichjá sa cojo xuta xi sahmi ngu jyë xi xtí chuxin naja ne, ¿mé tsëhë xi yahnga me ne, tsujyihiyatjengui sa ná me cojo cjuahngatacun? Sa xi quixi xi cuatjin sahme sa ne, ngajan xi hya xi chjá cojo xuta tsëhë hacutjin cahme Jesucristu xcun cru ne, tsajin cjuandya xi cuma rë yahnga xuta xi cuacun jan. ¹² Jercu ndatjin sa xi xuta jan xi cuatjin tisuandya nuju me ne, catatëxin súv me yojo rë me ngu ndiya xa ni!

¹³ Sacuaaha ngayujun ni ne, catsingatju Nina cjua nuju, cojo sa xi cumandya ngayun. Peru hacuiin tu cuaain rë xi cavëhëndaya nuju Nina xi ningatuhun rë cjuatacun nuju yëjë ni xcusun tsehen xi vitexa nuju. Cahndë rë vëhë ne, tisecon xingun ngatsë rë cjuahmutacun ni tjin ngajñi nuju.

¹⁴ Cuatjin nihñu ta, yëjë ni cjua xi vitexa ley rë Moisés ne, cumachihin hya xi nihña ngu ni cjua vihi: “Meje rë xi nihmu tacún xingun sacuatjin nihmu tacún suvun yojo nuju.” ¹⁵ Peru sa xi choho nihñu cojo xingun sacuatjin sahmi chu xi cjan rë xi jinëxcuen xicjin chu ne, nechun cuidadu, sá tu nicjuyun cjuandaja xi tjin ngajñi nuju.

Hacutjin sahmi Hasen rë Nina, hacuaaha hacutjin sahmi cjuatacun tsehen naja

¹⁶ Nutsujun ni. Tuhun cahndé xi Hasen rë Nina ne, cuitexa rë cjuatacun nuju. Hane xi cuatjin ne, hatuxa nihñuu yëjë ni xi fehya cjuatacun tsehen nuju. ¹⁷ Cjuatacun tsehen naja ne, sahmi condra cojo Hasen rë Nina, hacuaha Hasen rë Nina ne, sahmi condra cojo cjuatacun tsehen naja. Catsijo ni vihi ne, sahmi condra cojo xicjin. Ngajan xi ngayujun ni ne, maji nihñu tu mé ni xcusun xi meje nihñu. ¹⁸ Sa xi Hasen rë Nina vitexa rë cjuatacun nuju ne, ngajan xi cuitexaain nuju ley rë Moisés.

¹⁹ Quihndé ne, ha ndaja ni hyan xcusun tsehen xi nihña hya xi vitexa naja cjuatacun tsehen naja. Nihña cjuatsehen xi sahmi ngu xuta cojo ngu xi hacuiin chjuun rë me, hacuiin xihin rë me, o sa xi ngajñi ni xihin me, o ngajñi ni chjuun me, o tu mé sa xcusun cjuatsehen jan. ²⁰ Chjahanrcun nina ndyojo, hacuaha nihña cjuasurqui. Choho hyaan xingueen, nihña si ngajñi naja cojo xingueen, hacuaha tjin naja cjuachini. Jercu ma cjan naja, jercu hnga tacun, jercu chicjan cojo xingueen, ngujo yaan ne, naxenxeen yojo naja tséhë xingueen. ²¹ Jercu tjin naja cjuaxin, jercu xuta chihí má ngayaan, jercu maxti nuju ngayaan hya xi nihñu ngu suhi, cojo jercu cjin sa xcusun vëhë xi nihña. Cojo tjun sa ne, cuichjá cojo nuju sacuatjin xi ha cachjá cojo nuju ta xuta xi sahmi me sacuahatjin rë xcusun vëhë ne, satiin rë me xi cuisehen me hiscan xi sahmi Nina gobiernu.

²² Peru hya xi Hasen rë Nina vincha cjuandaja ngajñi rë cjuatacun naja ne, jercu tjin naja cjuahmutacun, tjin naja cjuasua, tjin naja cjuajeya, yehe tacun, tjin naja cjuandaja, cuma cumangu cacun xuta cojo naja, ²³ jeya ngayaan, caa naja xi hacuiin ningatehen rë cjuatacun tsehen naja cojo xcusun xi fehya xi nihña. Sacuaha yëjë ni cjuandaja vëhë ne, tsajin camahani ley xi vitexa xi cumaji nihña. ²⁴ Hane yëjë ni xuta ladu rë Jesucristu ne, ha caviyujxin me cjuatacun tsehen rë me cojo yëjë ni xcusun tsehen xi fehya rë me xi sahmi me. ²⁵ Sa xi Hasen rë Nina casua naja cjuahñu xatsë ne, meje rë xi hacuaha ningatehen xi Hasen jan cuitexa rë cjuatacun naja.

²⁶ Miji rë xi xta ngayaan, miji rë xi si rcun, miji rë xi tjin naja cjuaxin cojo xingueen.

6

Meje rë xi cuisecoon xingueen

¹ Ngayujun ni ne, sa xi yo sacutsja rë ngu xuta xi tisahmi me cjuatsehen ne, ngayun xi ningatuhun xi vitexa Hasen rë Nina cjuatacun nuju ne, meje rë xi cuisecon rë me xi cuya ndaja me, peru tisecon rë me cojo yëjë ni cjuandaja cjuajeya. Hacuaha meje rë xi tjin nuju cuidadu, sá tu cojo ngayun cuinengyunun ngajñi rë cjuatsehen. ² Tisecon xingun cojo sa xi scaa nuju cojo cjuacjintacun xi quichuhun xingu xingu ngayun. Hane xi cuatjin nihñu ne, ngajan xi machihin ley xi cavicuya naja Cristu. ³ Sa xi yo sahmi jyë yojo rë handasa tsajin mé vechú ne, vindacha suvá yojo rë. ⁴ Xingu xingu ngayaan ne, meje rë xi nichuvan suvaan yojo naja cojo xcusun naja. Xi cuatjin nihña ne, cumasua naja cojo xcusun ndaja xi canihña suvaan, hisca sahmi ngu jyë xi nutsejen xcusun xi sahmi xingueen. ⁵ Xingu xingu ngayaan ne, tjin naja xi chaan cjuacjintacun naja suvaan.

⁶ Xuta xi vutaya cjuandajyihí xi chja tséhë Jesucristu ne, hacuaha meje rë xi cuisecoo me xuta xi tivicuya rë me jan cojo yëjë ni xcusun ndaja xi tjin rë me.

⁷ Xicavindachuun suvun rë yojo nuju ta Nina ne, cumaji cumandacha me. Xcusun xi nitjen ne, ha vëhë ni sacú naja. ⁸ Xuta xi fi tjengui me ndiya rë cjuatacun tsehen xi fehya yojo rë me ne, cuechú nixtin xi sacú chjí rë me

xi yojo rë me jan ne, cjuehndu. Peru xuta xi fi tjengui me ndiya rë Hasen rë Nina ne, cuechú nixtin xi sacú chjí rë me xi Hasen rë Nina ne, sua rë me cjuahñu xatsë. ⁹ Sacuaha ngayaan ne, mijí rë xi nihñachuvan ngajñi rë yëjë ní cjuandaja xi tinihña ta, tséhë xi hya xi cuechú jain nixtin rë ne, sacú chjí naja, sa xi scaa naja. ¹⁰ Vëhë xi nguyëjë rë xi tjin sa nixtin ne, ha tuxa meje rë xi nihña cjuandaja cojo yëjë ni me xi sacuaha xingueen tséhë xi hacuaha manguacacun me cojo Jesucristu. Hacuaha meje rë xi nihña cjuandaja cojo ngayëjë ni xuta.

Sua Pablo conseju, hacuaha sua me Nina rë me cojo xuta Galacia

¹¹ Ngayujun ni ne, ñnutsujun letra yehe vihi xi titsihindu nuju cojo hntsa suva! ¹² Xuta xi meje rë me xi ndaja cuichja xuta tséhë me ne, me vëhë xi meje sahmi nuju me nguýë xi xtí chuxin nuju. Cuatjin sahmi me, cojo sa xi tsajin cuatju me cjuañihi ngatsë rë xi chja me tséhë cru rë Cristu. ¹³ Hisca me xi ti chuxin rë ne, vihndiin me tséhë ley rë Moisés. Peru meje rë me xi xtí chuxin nuju, cojo sa xi cuaxëndaja me yojo rë me xi cuatjin camá cojo nuju. ¹⁴ Peru sacuaha ngahan ne, ngatsë ni rë cru rë Nai naja Jesucristu xi cuaxëndaja yojo naha. Cuatjin sahme, tséhë xi ngatsë rë cru rë Cristu jan ne, sacuaha xi cahme ngasunhndë xi cuma ná ngahan, hacuaha ngahan ne, sacuaha xi cavéya xi cuma rë ngasunhndë. ¹⁵ Tsajin mé vengui chjí rë xi cati o xi catiin rë chuxin naja ta xi vengui chji rë ne, xi cuma ngayaan xuta xatsë. ¹⁶ Ngayujun ni xi tsangunndujun cojo cjuatacun xi sehe cachjá cojo nuju jan ne, Nina catisua nuju me cjuajeya cojo cjuayumatacun. Hacuaha cojo yëjë sa me xi má xuta ladu rë Nina ne, cuatjin catisua Nina me.

¹⁷ Nchujun ni nguini ne, mijí ná xi yo sua sa ná cjuandya ta, tséhë xi yëjë yanda xi yaha yojo naha ne, vëhë tsingacun xi sahme xa rë Jesús sacuaha mosu hndixahan rë me.

¹⁸ Nai naja Jesucristu ne, catisua nuju me cjuandaja ngayujun ni. Cuatjin jain.

Carta xi catsingatju San Pablo tsëhë xuta nandya Efeso

Pablo tsihindu me xuta rë yungun

¹ Ngahan Pablo ne, apóstol tsëhë Jesucristu ngahan ta, tsëhë xi cuatjin camameje rë Nina. Tsingatju nuju carta vihi ngayun xuta nandya Efeso, ngayujun ni xuta ladu rë Nina xi jercu ndaja titsangunndujun cojo ndiya rë me. ² Nina Nahmi naja cojo Nai naja Jesucristu ne, catisua nuju me cjuandaja cjuajeya rë me xi cuma nuju.

Ximinchacun xi cachjahantsan tsëhë Cristu

³ Nina ne, me vëhë xi Nina rë hacuaha nahmi rë Jesucristu me xi matitjun tsajan, jemu jyë hnga camahani me cojo hasen rë me! Me vëhë ne, ngatsë rë xi tsëhë Cristu ngayaan ne, catsinchacun naja me cojo yëjë ni xcusun cjuandaja xi siu tsja me. ⁴ Nihña jyë hnga Nina cojo hasen rë me ta hisca hya xi chajasa casahasen ngasunhndë ne, hya cavaxijin naja Nina ngatsë rë xi tsëhë Cristu ngayaan, hane ngatsë rë xi casahmi tsëhë me ngayaan ne, camatjahi cjuatacun naja hacuaha tsajin xi cún naja. Hacuaha Nina cojo cjuahmutacun xi tjin rë me cojo naja ne, ⁵ vëhë xi ha tjin chjine rë me cjuatacun xi ngatsë rë mé xi casahmi Jesucristu ne, ngayaan ne, quihndi ndaja jain rë me má ngayaan. Cuatjin tjin cacun me xi cumá, cuatjin cavejñacacun me. ⁶ Cuatjin nihña jyë hnga me cojo hasen rë me tsëhë cjuandaja rë me. Jemu cavincha naja me cjuandaja ngatsë rë xi ngayaan ne, tsëhë Cristu yaan; hane Nina ne, hmucacun me Cristu. ⁷ Cojo jni rë Cristu xi cavanga hya xi cahme me, vëhë machji rë xi camandaya yaan tsëhë castigu xi satë naja, cavaxëtje rë cjuatsehen xi canihña, tucu cjuahmucacun rë me xi jercu jyë camahani. ⁸ Tjercu tu ndaja casahmi me cjuandaja cojo naja xi cavuxaha ndaja me cjuatacun naja xi vijnercun cjuar rë me ta, ⁹ casua camachaya naja tsëhë cjuatahahma xi tjin cacun me xi cumá, tsëhë cjuatacun xi cavejñangucacun suva me xi cumachihin. ¹⁰ Cjuatahahma vë ne, cumachihin hya xi cuetjucaa xi cuechu nixtin rë. Hya ne, Nina sahmitangun me ngu nguyëjë ni ngahma Cristu, me xi matitjun rë. Sahmitangun me yëjë xi siu ngahnga hacuaha yëjë xi siu nangui, hane sacuaaha ngu ni cjuatacun cuma.

¹¹ Hacuaha ngatsë rë xi tsëhë Cristu ngayaan ne, Nina cavaxijin niji xi satë niji hitsë tsëhë mé xi satë rë Cristu ta, Nina sahmicihin me yëjë ni mé xi sua má rë me sacuahatjin ha cavejñacacun me xi cumá. ¹² Cuatjin casahmi me cojo sa xi ngayin xuta tjë rë Israel xi tjun tjun cavinechinyin rë xi nduva Cristu ne, nihñi jyë hnga Nina cojo hasen rë me ngajñi rë yëjë ni mé xi nihñi. ¹³ Hacuaha ngayun ni, hya xi canuhyun rë cjuaquixi cjuandajiyihi xi chja hacutjin cuma cuetjuntjun tsëhë jyë nuju ne, camatangun cjuatacun nuju cojo Cristu. Hane sacuaaha xi setaha sellu ngu xujun rë nangui xi tsejen xi quixi xi tsëhë me, cuatjin caveya Nina Hasen rë me sacuaaha cavejña me cjuar xi sua nuju me, cojo sa xi tsejen xi tsëhë me yun. ¹⁴ Hane tsëhë xi hincha naja Hasen rë Nina ne, vëhë tsinguixi rë xi chjahanntsant yëjë xi cavejñacacun Nina xi cumá tsajan, tsinguixi rë xi sahmi ndaya me yaan tsëhë jyë naja, hane ngatsë rë vëhë ne, me vëhë cuma jyë hnga sa me cojo hasen rë me.

Pablo ne, fehya me Nina xi scuxaha me cjuatacun rë xuta xi ndaja macjain rë me Jesucristu

¹⁵ Hindë ta cuatjin catsinchacun Nina yaan ne, vëhë xi ngahan, hisca xi camachaya ná xi naxunndujun Jesucristu hane xi tjin nuju cjuahmutacun cojo yëjë ni xuta xi tsëhë Nina me, ¹⁶ suá cuaha nacuechji rë Nina ngatsë nuju. Hane yëjë ni hora xi tisahme oración naha, veyangë nuju, chjayuma ngatsë nuju. ¹⁷ Féhya rë Nina rë Nai naja Jesucristu, Nina Nahmi naja xi jemu hnga me cojo hasen rë me. Féhya rë me xi sua me yun cjuatacun rë Hasen rë me cojo sa xi cuijnercun mé xi tsëhë me hane xi hitsë sa ndaja chun yo me. ¹⁸ Féhya rë Nina xi scuxaha me cjuatacun nuju cojo sa xi cumachaya nuju tsëhë xcusun vëhë xi vetahan tacun ngatsë rë xi cavaxijin naja Nina. Xi machaya nuju xi jercu vatjutaha ndajijihi cjuatjo rë me xi cuatëcja me ngajñi xuta ladu rë me. ¹⁹ Hacuaha xi machaya nuju ta ngahñu rë me ne, tsajin chuva rë ne, hane tacunntsaan. Hacuaha ngahñu jan catsingacun me ta jemu hñu cju. ²⁰ Catsingacun me chuva rë ngahñu jan hya xi catsicuya me cjuahñu rë Cristu tsëhë cjuaveya hane hacuaha hya xi casahmi jyë hnga me Cristu xi cavejña me cahndë ladu quixi rë me ngajan ngahnga. ²¹ Jercu hñu camahani cju rë Jesucristu xi cumá rë yëjë ni hasen, yëjë ni ángel, yëjë ni rey hasen xi hacuaha vitexa ngajan sa xi nixtin quihndë o sa xi nixtin xi nduva ngascan. Hacuaha hitsë sa jyë hnga ñihi rë xa xi tacuntsja me. ²² Hacuaha yëjë xcusun xi siu, Nina ne, caviyuju me ngahma gobiernu rë Cristu. Hacuaha ha Cristu nga ni, casua me xi cumá titjun me tsëhë yëjë ni xuta rë yungun hane vitexa me xuta ladu rë Nina sacuatjin rë rcuun xi vitexa rë yojo naja. ²³ Hane sacuaaha vitsojo cjuatacun rë rcuun ngajñi yëjë yojo naja ne, cuatjin vitsojo Cristu ngajñi rë jinguyë ni xuta yungun, hane cojo Cristu ne, majingu jinguyëjë ni xcusun.

2

Ngatsë rë xi hmucacun naja Nina ne, cavaxëtje naja me

¹ Hacuaha ngayun ne, catsingasca Nina cjuatacun nuju ta, titjun ne, camá ngayun sacuaaha xi caveyun xi cumá rë Nina ngatsë rë xi canuhyuun tsëhë Nina hane canihñu cjuatsehen. ² Cavanguntengun cjuatsehen sacuaaha xcusun rë xuta tsehen rë ngasunhndë. Canuhyun tsëhë rey xi hacui hasen tsehen xi vitexa rë yahnga hasen tsehen ngajan ngahnga, rey jan xi vitexa rë xuta xi vihndiin me tsëhë Nina. ³ Hacuaha ngayëjë ni ngayaan ni, cuatjin xcusun naja hatsëë. Canihña yëjë cjuatsehen xi cafehya rë yojo jyë naja, xi masua rë xahasen naja. Tsëhë xi hatuxa xuta tsehen yaan, ngatsë rë vëhë ne, tacunya castigu xi cuma naja sacuaaha yëjë sa yahnga xuta. ⁴ Peru Nina ne, tjercu tu tjin rë me cjuayumatacun ngatsë rë xi jemu tu jyihi camahani cjuahmutacun xi tjin rë me cojo naja. ⁵ Hane handasa xi camá sacuaaha xi caveyan ngayaan xi cumá rë Nina ta canuhyaan tsëhë me, peru hindë ne, sacuaaha xi casacu naja cjuahñu xatsë tangun cojo Cristu. (Cjuanijyutacun rë Nina ne, vëhë casahmi xi cavaxëtje nuju me tsëhë cjuatsehen xi canihñu.) ⁶ Hacuaha sacuaaha catsicuya nga naja Nina cjuahñu tangun cojo Cristu hane casahmi jyë hnga me yaan xi cavejña me yaan cojo Cristu ngajan ngahnga ngatsë rë xi tsëhë Jesucristu yaan. ⁷ Cuatjin casahmi me cojo sa xi hisca nixtin xi sehe nduva ne, cumatsejen xi jercu vatjutaha cjuanijyëtacun xi tjin rë me cojo naja, cjuanijyëtacun vë xi matsejen ngajñi rë cjuahmutacun xi tsingacun me yaan ngatsë rë Jesucristu. ⁸ Cuatjin jan ne, cjuanijyëtacun rë Nina ne, vëhë casahmi xi cavaxëtje nuju me tsëhë jyë nuju hya xi camacjain

nuju ta, hacuiin suvun cavinchunsun chuva rë xi cavetjuntjun ta tsëhë xi Nina ne, tu cuatjo ni casua nuju me cahndë. ⁹Hacuiin tsëhë xi canihñu suvun xi jemu ndaja xi cavëchuntuhun xcusun vë ne, ngatsë rë vëhë ne, hisca ngu xuta cumaji sahmi jyë me yojo rë me. ¹⁰Ta sacuaajihi ngayaan ne, Nina casahmi naja me. Hane ngatsë rë xi tsëhë Jesucristu yaan, vëhë xi catsindaja me ngayaan cojo sa xi ndaja nihña, sacuatjin xi ha cojo tjun sa cavejñacacun me xi má xcusun naja.

Ngatsë rë jni rë Cristu ne, ma vetjutje xutaxín

¹¹Ngajan xi ninguitsjun ta, ngayun ne, xutaxín yun ta hacuiin tsëhë xuta tjë rë Israel catsin ngayun. Hacuaha xuta tjë rë Israel jan ta casahmi suva me sacuaaha vitexa ley rë Moisés, me vëhë chja me tsujun ta, xuta xi catiin rë chuxin rë; hane chja me suva me ta, xuta xi cati rë chuxin rë. ¹²Hacuaha hya ne, hisca tsajin quitahatacun xi sacuse nuju Cristu. Casatiin nuju cahndë cojo xuta tjë rë Israel hacuaha casatiin nuju compromisu xi vetaha cacun me. Jemu va cavinechun cojo ngasunhndë nuju ta hacuiin vinga nuju Nina xi cjuaquixi. ¹³Peru quihndë xi camá tsëhë Cristu yun, handasa xi hya jemu xín nechun xi cuma rë Nina, peru hindë casacu cahndë camatiña yun ngatsë rë jni rë Cristu xi cavanga hya xi cahme me. ¹⁴Ta Cristu ne, me vëhë casahmi me xi cavisehen naja ngayëjë ni cjuandaja cjuajeya. Hane xi cuatjin casahmi me ne, sa xuta tjë rë Israel yaan o sa xutaxín yaan, sacuaaha ngu ni xuta má ngayaan. Ta hya xi cahme me, cafaxin me cjuachan xi vetsuntaha naja. ¹⁵Catsicjë me ngahñu rë ley rë Moisés cojo yëjë ni cjuaxi vitexa jan. Hane cuatjin ne, tsëhë catsijo tjë rë xuta jan ne, tsajin sa cjuachan ta casahmitangun Cristu me xi sacuaaha ngu ni xuta má me xi tsëhë me suva me. Cuatjin cavisehen me cjuandaja tsëhë xcusun xi cavetsutaha rë me titjun. ¹⁶Hacuaha cuatjin casahmitangun me catsijo tjë jan xi cuma ngu ni hane tangun catsindajacacun me me jan cojo Nina ngatsë rë xi cahme me xanc cru. Hane cuatjin cavatëcja me cjuachan xi tjin ngajñi rë me jan.

¹⁷Cuatjin camá xi canduva Jesucristu cachja me cjuandajyihi tsëhë cjuajeya cojo nuju ngayun xutaxín xi xín nechun xi cuma rë Nina, hacuaha cojo xuta nangui Israel xi tiña siu me xi cuma rë Nina. ¹⁸Vëhë xi ngatsë rë mé xi casahmi Cristu hane cojo ngu ni Hasen rë Nina ne, xingu xingu ngayaan ne tjin naja cahndë cojo Nina Nahmi naja. ¹⁹Vëhë xi ngayun ne, hindë hacuiin xutaxín yun hacuiin xín tujyuhunyun ni xi cumá rë xuta rë Nina ta hindë ne, sacuaaha camá ngu nangui nuju ngayujun ni hacuaha cojo rë me ne xuta rë Nina má ngayun. ²⁰Cojo rë me ne, ngayun ne tangun ngayun sacuaaha xihndë rë ngu yungun xi sehe tjunihnga rë. Xihndënaña rë ne, vëhë casahmi apóstol cojo profeta hya xi cachja me cjuaxi rë Nina. Hane Jesucristu ne, me vëhë má me ndoyojo xi matitjun xi vejña yuju rë. ²¹ta sacuaaha ndoyojo jan vaniji hai rë ndihya xi ndaja hñu cuejña xihndë rë xi cuijin, hacuaha ngatsë rë Jesucristu sacuaaha ndaja setahacoo ngu xihndë ne, cuatjin vetahacoo Jesucristu xuta rë yungun hya xi scunihnga me xi cuma me sacuaaha ngu yungun quicun xi camanchacun tsëhë me. ²²Hacuaha cuantitjin ngayun ne, cavinchajñi me yun sehe cojo yun cumá ngayun sacuaaha yungun quicun jan rë Nina hiscan cuejña me.

3

Cjua tsëhë xa xi sahmi Pablo ngajñi rë xutaxín

¹Cuatjin camá xi ngahan Pablo ne, tejñaya ndavaya ngatsë rë xa rë Jesucristu, xa jan xi sahme ngajñi nuju xutaxín. ²Cuejña ni xi há machaya

nuju tsêhê cjuanijyêtacun xi Nina cavincha ná me xi satê ná sahme xa ngatsê nuju ta, ³ Nina casua me camachaya ná tsêhê cjuatacun hma jan sacuaaha xi ha catsihindu nuju hitsê tsêhê. ⁴ Hane xi chutahayun tsêhê ne, mangutacun xi ngahan ne vijnercu cjuatahahma jan xi sahmichihin Jesucristu. ⁵ Cjuatacun jan ne, hatsêê nixtin tsajin yo camachaya rê tsêhê. Peru hindê ne, cojo Hasen rê me catsingacun me tsêhê xi cumachaya rê apóstol cojo profeta xi cavaxijin me. ⁶ Cjuatacun hma jan ne, cuatjin fi: Camá xi cojo cjuandajyihi rê Nina ne, xutaxín ne, fahatsja tangun me cuatjo rê Nina cojo xuta tjê rê Israel, hacuaaha cojo me ngu xuta má me. Hacuaaha ngatsê rê xi tsêhê Jesucristu me ne, hacuaaha satê rê me compromisu xi vetahacacun xuta tjê rê Israel.

⁷ Sacuaaha cjuatahahma vêhê ne, casatê ná ngahan xi sahme xa xi cuichja tsêhê. Cuatjin casatê ná ngatsê rê cjuanijyêtacun xi casua Nina ngahan xi cojo ngahñu rê me cuma. ⁸ Ngahan ne, handasa tsajin chuva rê xi ngahan sahme xi cuma rê xi sahmi tu yo sa yahnga xuta tsêhê Nina, peru casua ná Nina cjuanijyêtacun xi satê ná xa xi cuichjá cojo xutaxín xi cumachaya rê me tsêhê cjuanchina ndajyihi rê Cristu xi tsajin cojo chuva rê. ⁹ Hacuaaha cavetahaxa ná Nina xi sucxáha cjuatacun rê xuta cojo sa xi cumachaya rê me cjuatacun hma jan. Nina, xi casahmi me yêjê ni ne, hisca ntsacu cavetsihin cavejñacacun hma me xi cuatjin cumá. ¹⁰ Cuatjin camá cojo sa xi nixtin quihndê ne, ngajñi xuta yungun rê Nina ne, tsingacun rê cjuahasen rê Nina, cojo sa xi yêjê ni hasen, yêjê ni ángel xi hacuaaha vitexa ngajan ngahnga, machaya rê xi jemu cjin xcusun rê cjuahasen jan ta, ¹¹ cjuatacun jan ne, hisca ntsacu cavetsihin cuatjin cavejñacacun me, hane casahmichihin me cojo Cristu Jesús, me xi matitjun tsajan. ¹² Hacuaaha ngatsê rê xi tsêhê Cristu yaan hane ngatsê rê xi mangutacun cojo me ne, rcuun nihña tiña tsêhê Nina cuinújan cojo me ta, tjin ngutacun xi sacu naja cahndê. ¹³ Vêhê xi cojo cjuatacun vêhê ne, cuichjá cojo nuju ta hacuín nihñuchuvuntacun ngatsê naha ngahan xi choho tivatju tijima tsêhê xa xi sahme ngatsê nuju, ta ngajñi rê xi cuatjin tivatju ngahan ne, hitsê sa tivaxëndaja nuju.

Cjuahmutacun xi tjin rê Nina

¹⁴ Cuatjin camá xi ngatsê rê vêhê ne, vixcuhnchêtaha xcun Nina nahmi rê Jesucristu me xi matitjun tsajan. ¹⁵ Yêjê ni tjê rê xuta o sa ángel, sa ngahnga o sa ngasunhndê viyuju me ne, faha ñihi me tsêhê Nina sacuaaha tsêhê Nahmi rê me. ¹⁶ Nina Nahmi naja ne, tjemu tjin rê me ngahñu xi casahmi hnga hasen me ngajan ngahnga. Chjáhya rê me xi tucu chuva rê yêjê cjuandaja rê me jan ne, sua nuju me xi cuiyujuhñu xahasen nuju cojo ngahñu rê Hasen rê me. ¹⁷ Hane ngatsê rê xi cuatjin macjain nuju Cristu ne, hacuaaha cuejña cahndê me cahntsua xahasen nuju. Hane cjuahmutacun xi hincha nuju ne, cuma sacuaaha ngu tyjama xi sua nuju ngahñu hane tsuvangui nuju, ¹⁸ cojo sa xi hacuaaha cuijnercunndujun ngayun cojo yêjê yahnga xuta xi macjain rê me, ta tsajin hisca cjuê ta jemu tu jyê hnga cjuahmutacun xi tjin rê Cristu cojo naja. ¹⁹ Hacuaaha cjuéhya xi sacuse nuju cjuahmutacun xi tjin rê Cristu cojo nuju, ngu cjuahmutacun xi jercu vatjutaha rê hisca tsajin chuva rê xi hatuxa hyan, cojo sa xi ma tsê rê cjuatacun nuju suva cojo yêjê ni xi tsêhê Nina.

²⁰ Quihndê ne, catama jyê catama hnga Nina. Me vêhê cojo ngahñu rê me xi sahmixa ngajñi naja ne, hitsê sa cjin cuma sahmi me tsêhê xi cuma chjahyan o sa xi matacun xi ma sahmi me. ²¹ Catama jyê catama hnga me ngajñi xuta yungun rê me hacuaaha ngajñi Jesucristu; catama jyê catama hnga me yêjê ni nu yêjê ni nixtin. Cuatjin jain.

4

Tjin tangun yaan ngatsë rë Hasen rë Nina

¹ Ngatsë rë vëhë ne, ngahan xi tejñaya ndavaya ngatsë rë xa xi sahme tsëhë Nina, ngahan fehya nuju xi tangun nduju cojo ngasunhdë nuju sacuaaha meje rë xi sahmi me xi cavaxijin Nina, sacuahatjin ngayun xi catuxijin nuju.

² Tjin nuju cjuajeya hacuaaha ninguijnu yojo nuju cojo xingun. Hacuaha jÿëtacun xingu xingu yun cojo xingun ngatsë rë cjuahmutacun xi tjin nuju.

³ Nihñu nguÿë xi yëjë nixtin tjin tangun yun, cojo ngahñu rë cjuajeya xi sua Hasen rë Nina xi sahmi tangun nuju ngayun ngayujun ni. ⁴ Ngayaan ne, ngu ni yojo má yaan, hacuaaha ngu ni má Hasen rë Nina. Hacuaha cuanitjin ne, ngu ni cjuaxi cuetaha tacun xi sacu naja cjuahñu xatsë, ngayaan xi cajindaya naja me. ⁵ Hacuaha ngu ni Jesucristu xi Nai naja, ngu ni cjuachacun xi macjain naja, hacuaaha ngu cjuatacun ni xi xtenda yaan. ⁶ Ngu ni Nina Nahmi naja ngayejen ni. Hane Nina ne, matitjun me tsëhë ngayëjë ngarca ni ne, tsinguitsojo me jinguyë ni ngajñi yojo naja, hacuaaha tacun me ngajñi naja.

⁷ Peru jimangu yaan ne, ha casua naja me cjuatjo cjuatacun xi satë naja xa xi nihña jimangu yaan, sacuaaha chuva rë xi casua Cristu. ⁸ Vëhë xi xujun rë Nina chja cuitjin:

Hya xi camiji me ngahnga, hacuaaha quiji cojo me xuta presu xi cafaha me. Hane casua me cjuatjo xi cafahatsja xuta rë me.

⁹ ¿Hane mé vijne cjuaxi camiji me? Cjua vëhë ne, vijne xi titjun ne cajne me hiscan xi hitsë sa nangui tsëhë ngasunhdë. ¹⁰ Hane xi cajne jan ne, hacui ni me xi hacuaaha camiji hiscan xi hitsë sa hnga tsëhë ngahnga, cojo sa xi jinguyë ni cuejña cahndë me. ¹¹ Ha me vëhë ni casua me cjuatjo cjuatacun xingu xingu. Casua me xi yahnga me ne, cumá me apóstol, yahnga me ne xi sua me xi cumachaya rë xuta cjuaxi cafahatsja me tsëhë Nina, hane yahnga nga me ne, cuichja me cojo xuta tsëhë cjuaxi cuaxëtje naja, hane yahnga nga me ne, pastor xi vicuya. ¹² Cuatjin cavëhëchjine me xuta rë me jan cojo sa xi xa xi sahmi me jan ne, cuisecoo rë xuta yungun xi sacu hñu rë me. ¹³ Hisca xi ngayejen ni ne, cuma tangun yaan cojo ngu ni cjuachacun xi macjain naja hacuaaha cojo yëjë cjuaxi machaya naja tsëhë me xi Quihndi rë Nina. Hane xi cuatjin cuma tangun yaan, cumacha yaan hane cuiyuju cahndë cjuatacun naja sacuaaha tjin chihin yëjë cjuatacun rë Cristu. ¹⁴ Hane sehe hacuiin tangun yaan cojo langa xi tsindeya cjuatacun rë hane fi tjengui ndiya rë tu mé ni cjuachacun xatsë sehe vixuya ngajñi cjuandacha rë xuta xi vinya haxi me. ¹⁵ Hitsë sa ndaja xi cuinújan cjuaquixi ngatsë rë cjuahmutacun xi tjin naja cojo rë me cojo sa xi cumacha yaan cojo sa xi yëjë ni xcusun naja cuma yaan sacuaaha Cristu, me xi matitjun tsajan. ¹⁶ Hane ngatsë rë ngahñu rë me vëhë ne, yëjë xuta xi macjain rë me Nina ne, ndaja yahangui xicjin me, sacuaaha naxahñu naja ne, tsuvangui rë yojo naja, ngatsë rë xi hincha xicjin. Hacuaha ngatsë rë xi jima ngu xuta jan ndaja sahmi me xa ne, ngu tangun ni cuma yehe me, hacuaaha sacu hñu rë me ngajñi rë cjuahmutacun jan.

Xcusun xatsë xi casacu naja ngatsë rë xi macjain naja Cristu

¹⁷ Ha cuanitjin ne, sacuaaha tichjá cojo nuju cojo cjuaxi rë Nai naja Jesucristu xi quihndë hacuiin cuinechun sa sacuaaha siu xuta xi hvíin me yo xi Nina, ta me vëhë ne, siu me cojo cjuatacun jñu rë me xi tsajin me vetjuncaa. ¹⁸ Vijniircu me ta tsëhë xi tsajin rë me cjuahñu xi sua Nina ta, tsëhë xi taja rcu me ngatsë rë xi taja xahasen rë me. ¹⁹ Hacuaha cachaja cjuatacun rë me, hane casuatë me yojo rë me, vëhë xi jercu macacun me xi sahmi me yëjë

xcusun cjuatsehen xi tjin ngasunhdē. ²⁰ Peru ngayun ne, hacuiin cuatjin camá nuju tsēhē Cristu ²¹ ta ngayun ne, hatuxa cachutayun jain tsēhē me, hacuaha camá nuju tsēhē me, cojo cjuaquixi xi tjin rē Cristu. ²² Sacuaha cjuatacun changá xi canduvuncujun ne, tejñuxun ta tsēhē xi vēhē xi tsitsehen cojo cjuandacha xi jercu matacun cojo. ²³ Meje rē cuma xatsē yun cojo cjuatacun nuju hacuaha cojo hasen nuju. ²⁴ Hane nihñu tsujun cjuatacun xatsē xi ha tjin ndaja xi fayangui xcusun xi tsēhē Nina ta xcusun vēhē ne, tsingacun ngu cjuahñu xi hatuxa cjuaquixi hacuaha tyjahi.

²⁵ Quihndē ta cuatjin ne, canújuun cjuandacha cojo cjuandesu ta, jima ngu yun ne, tinújun cjuaquixi cojo xingun tsēhē xi ngayējē ni ngayaan ne, camatangun yaan ta ngu ni yojo má ngayaan.

²⁶ Handasa cjan nuju ne, cavinchun ngu jyē, hane cjuacjan jan ne, hacuiin xi cjuecani rē cuaha nixtin, ²⁷ hane hisca xi hitsē ne, caningatjuun rē xitsehen xi sahmi xi nihñu ngu jyē.

²⁸ Xuta xi catsichējē me ne, catejñaxin me xcusun vēhē, hane catisahmi me xa nguñajacacun me cojo sa xi cuechutaha me yējē xcusun xi machaja rē me. Hane hacuaha cuma cuisecoo me xuta xi machaja rē.

²⁹ Canújuun cjuatsehen. Nújun ngu cjuaxi xi ndajiyi xi cuincha ndiya rē xuta xi cuiseñuju me cojo sa xi tsēhē me ndaja. ³⁰ Xi canihñuu xi cuma va rē Hasen rē Nina ta, cojo Hasen rē me jan ne, ngayun ne, casetaha nuju chuva xi tsingacun xi sacu nuju cjuahñu xatsē nixtin xi cuaxētje nuju me tsēhē jyē nuju.

³¹ Hacuaha tiyujunxun yējē ni cjuachan, yējē ni cjuasuē, yējē ni cjuahnga, yējē ni cjuachjataha cojo yējē sa xcusun cjuatsehen ³² ta cahndē rē vēhē ne, nihñu cjuandaja cjuajeya xingu xingu yun cojo xingun. Tjin nuju cjuayu-matacun cojo xingun. Hacuaha ninchatuhun xingun sacuaha catsinchataha Nina yun ngatsē rē Cristu.

5

Hacutjin meje rē xi cuiyuju xuta ladu rē Nina

¹ Ngatsē rē xi jemu hmucacun nuju Nina ta, tsēhē xi quihndi rē me yun, vēhē xi chjayunngun tsēhē me. ² Hane nechun cojo cjuahmutacun xi catsihmucacun naja Cristu hane hisca casua me yojo rē me ngatsē naja sacuaha ngu tsángu ndajiyi xi cueya chu hane cuma tsēhē Nina sacuaha ngu cuatjo xi chuya rē me.

³ Quihndē ta ngayun ne, tsēhē Nina yun ne, hisca xi caveyunnanguun cjuatsehen xi matacun cojo yojo jyē nuju ngajñi nuju. Caveyunnanguun hisca ngu sa cjuatacun chocun cojo cjuachan ta, ngayun ne, tsajin chuva rē xi nihñu xcusun vēhē. ⁴ Cavisiajmuun xcusun xi cjuasava, cojo cjuangarca cojo cjuaxcuehyu hya xi hacuiin mameje rē ta cahndē rē vēhē ne, tuhun nacuechji rē Nina. ⁵ Ha hyun ta xuta xi sahmi me cjuatsehen xi sahmi ngu xuta cojo ngu xi hacuiin tsēhē me, o sa ngajñi ni xihin me o ngajñi ni chjuun me o tu mé sa xcusun cjuatsehen jan o sa xi choho me, tangun cún me sacuaha me xi faharcu me nina ndyojo hane sacuiin rē me cahndē hiscan sahmi gobiernu Cristu cojo Nina. ⁶ Cuidadu cojo sa xi tsajin yo xi cuindacha nuju cojo cjuangarca ta, hatuxa ngatsē rē cjuachocun xi cuicun vihi ne, vinduva castigu jyē xi sua Nina xi cuma rē xuta xi vihndiin tsēhē me. ⁷ Vēhē xi ngayun ne, caninguisuunñuu cojo rē me.

⁸ Ta handasa xi hatsēe ne, ngayun cavinechun ngajñi jñu vē, peru quihndē xi tjin tangun yaan cojo Nai naja ne, camá hasen tsujun, hane nihñu sacuaha

sahmi xuta xi cama hasen cjuatacun rë me. ⁹ Ta tsëhë hasen jan ne, vetjucun xi jemu ndaja xuta jan hacuaha tyjahi cjuatacun rë me, hacuaha quixi me cojo xcusun rë me. ¹⁰ Nihñu xatitacun xi cuma nuju mé xi chuya rë Nina. ¹¹ Caninguisuunjñuu cojo xcusun xi venguichjiin rëhë xcun Nina xi sahmi xuta xi jñu cjuatacun rë me. Hitsë sa ndaja ne, ningacun tsejen cjuatsehen vëhë ta, ¹² tsëhë xi cjuatsehen vëhë xi sahmihma me ne, hisca mijí rë xi cueyananguen ta sava tsejen. ¹³ Ta hya xi vetjucaa tsejen xcusun xi sahmihma me jan ne, matsejen ndaja xi hatuxa cjuatsehen. ¹⁴ Cuatjin ta hya xi vetjucaatsejen ne, ma quixi yëjë xcusun, sa xi cjuatsehen o sa xi cjuandaja. Vëhë xi chja cjua cuitjin:

Ningacun rë cjuatacun nuju, ngayun xi catuhun rë cahndë xi cjuahajenda hane nduvunxun tsëhë xuta xi cachaja cjuatacun rë me, hane sehe Cristu ne, sua hasen nuju me.

¹⁵ Vëhë xi ngatsë rë yëjë ni cjua vëhë ne, chjuhun chuvun hacutjin cuan-gun cojo ngasunhdë nuju, hacuiin nechun sacuaaha xuta xi jñu cjuatacun rë me, ta nechun sacuaaha siu xuta xi jemu chutaha cjuatacun rë me. ¹⁶ Chjavunvuhun hora nuju ne, tetjún cjuandaja ta nixtin vihi ne, jemu tjín cjuatsehen. ¹⁷ Vëhë xi hacuiin ngarca yun ta, nihñu xati tacun xi cuma nuju mé xi chuya rë Nina. ¹⁸ Hacuiin nihñu cjuachihí ta, vëhë ne, tsinguetsun rë cjuatacun nuju ne, hane cahndë rë xi ningatjuntuhun xi siuhun nandá xi cuitexa rë cjuatacun nuju jan ne, tuhun cahndë xi Hasen rë Nina ne, cuitexa rë cjuatacun nuju. ¹⁹ Vëhë xi ngajñi cjuavisiajmi nuju ne, teyunnangun cju-a rë salmo, cojo himno cojo yëjë sa xcusun xi sen xi tsëhë Nina, quitaha tisun ne, cojo vëhë ne, hacuaha nihñu jyë nihñu hnga Nina cojo nguñajatacun. ²⁰ Hacuaha tuhun nacuechji rë Nina Nahmi naja yasen ni tsëhë yëjë ni xcusun xi vatjun má, hane nihñu cojo ñihi rë Nai naja Jesucristu.

Hacutjin cuinechan cahntsua ndya naja

²¹ Ninguijnu yojo nuju cojo sa xi cuma chjuhunrcun xingu xingu ngayun, cuatjin nihñu ngatsë rë xi chjuhun rcun Nina.

²² Ngayun yachjin ne, ninguijnu yojo nuju tinuhyun tsëhë xihin nuju ta, cuatjin vitexa Nai naja. ²³ Ta xihin nuju ne, vitexa nuju me sacuaaha rcun, cuanitjin sacuaaha Cristu vitexa rë yëjë xuta xi macjain rë me sacuaaha rcu me. Hane Cristu cavaxëtje me xuta yungun jan sacuaaha xi hacui yojo rë suva me. ²⁴ Cuanitjin ne, sacuaaha xuta yungun ne, vihndë me tsëhë Cristu ne, cuanitjin ni ngayun yachjin ne, yëjë xi nihñu xcun cjuahñu nuju ne, tinuhyun tsëhë xihin nuju.

²⁵ Hacuaha ngayun xihin ne, nihmutacun chjuun nuju, sacuatjin Cristu ne, catsihmucacun me xuta rë yungun hane casua me yojo rë me ngatsë rë xuta jan. ²⁶ Cuatjin casahmi me cojo sa xi sahmi tyjahi me cjuatacun rë xuta yungun jan cojo sa xi cuma xatsë me, hane catsityjahi me cojo cju-a rë me sacuaaha má xi matyjahi cojo nandá. ²⁷ Cojo sa xi cuma tsingacun suva me xi xuta yungun jan ne, cun tyjahi tyjahi me, ta hisca hitsë tsajin mé camá chojyihí cjuatacun rë me. ²⁸ Vëhë xi ngayun xihin ne, meje rë xi nihmutacun chjuun nuju sacuaaha yojo nuju suvun ta, yo xi tsihmucacun chjuun rë ne, tsihmucacun suva yojo rë. ²⁹ Tsajin yo xi tsitjunngui suva yojo rë ta, hatuxa vangui me xi xinë me sehe sacuhñu rë yojo rë me, hacuaha sahmi me cuidadu tsëhë. Hacuaha Cristu ne, cuanitjin ni sahmi me cojo xuta rë yungun ta, ³⁰ tsëhë xi sacuaaha yojo rë me má xuta jan. Cuatjin ngayaan ta camá yaan tsëhë yojo tsëhë ninda rë me casahmi me yaan sacuaaha xcusun rë suva me. ³¹ Ngatsë rë vihi ne, xihin ne, cuiyuju cha nahmi ra cojo naa rë cha,

sehe cumatangun cha cojo chjuun ra, hane catsijo ni jan ne, cumatangun sacuaaha xi ngu ni yojo. ³² Vihi ngu cjuatacun xi jemu chja vinuhya rë peru hacuaaha jemu ndajiyihi ta, chjá cojo nuju ta cjua vëhé ne, tichja tsëhé Cristu cojo xuta yungun. ³³ Peru handasa cuatjin vijne cjua vëhé ne, hacuaaha sahmi nguýë xi jimangu yun ne, nihmutacun chjuun nuju, sacuaaha yojo nuju suvun. Hane ngayun chjuun ne, mameje rë xi chjuhuncun xihin nuju.

6

¹ Ngayun quihndi ne, xi vitexa tsujun sacuaaha xuta xi macjain rë me Nina ne, tinuhyun tsëhé xutacha nuju ta, tsëhé xi cuatjin mameje rë ta, ² cuitjin chja cjua tsëhé ley: “Chjuhuncun chjuhunjeyun nahmi nuju cojo naa nuju.” Hane cjua rë ley jan, vihi xi tjun cachja Nina xi hacuaaha ticojo rë ngu cjuandaja xi hacui vi: ³ “Cuatjin nihñu cojo sa xi ndatjin cuinechun hacuaaha jyë nixtin cjuecani nuju nguehe xcun cjuahñu nuju.”

⁴ Hacuaaha ngayun nahmi ne, hacuiin xi tuhun xti rë quihndi nuju ta, xi hitsë sa ndaja ne, nichun hacuaaha tinújuntuhun rë cojo cjuandaja cojo cjuajeya hacuaaha ningacun rë xi cumacjain rë Nina.

⁵ Hacuaaha ngayun xi nihñu xa handasa mosu xi cavatsë me yun ne, tinuhyun tsëhé patrón nuju nguehe xcun cjuahñu vihi, tjín ngutacun xi nihñu xa, hacuaaha nihñu nguñajatacun, sacuaaha xi tinihñu ngatsë rë Cristu. ⁶ Nihñu nguñajatacun, hacuiin suva hya xi tivutsejen nuju me cojo sa xi cuichja ndaja me tsujun ta, nihñu sacuaaha meje rë xi sahmi mosu xi cachaha rë xi sahmi xa rë Cristu. ⁷ Nihñu nguñaja ni cjuasua, sacuaaha xi tinihñu tsëhé Nina, hane hacuiin tsëhé ngu xuta. ⁸ Cuatjin nihñu ta, ha hyun ta yëjë xcusun ndaja xi nihñu ne, Nina ne, sua me chjí nuju.

⁹ Hacuaaha ngayun patrón ne, ha chuva vëhé ni nihñu cojo mosu xi siu ntsun hane hacuiin cojo cjuachan ta, ninguitsun ta sa ngayun sa me vëhé ne, Nina siu tsja nuju me. Hane Nina ne, texta ni vutsejen naja me ngayëjë ni.

Xcusun ndaja xi sua Nina yaan xi cuisecoo naja xi nihña si cojo xitsehen

¹⁰ Sacuaaha ngu sa cjua xi cuichjá cojo nuju ngayun xingueen, cojo ngahñu xi sua me xi tjercu hñu camahani ne, tyujuhñu cjuatacun nuju xi tjín tangun yun cojo Nai naja. ¹¹ Chjuhun yëjë ni xcusun xi siu ntsun xi casua Nina yun cojo sa xi cuiyujunhñu cjuatacun nuju tsëhé cjuandacha xi sahmi xitsehen xi matitjun ta, ¹² si xi nihña ne, hacuiin cojo ngu xuta ngasunhndë má ta, cojo jingu sa hasen tsehen xi matitjun hacuaaha cojo yëjë xi vitexa rë ngasunhndë jñu vi cojo yëjë sa xi siu ngahnga. ¹³ Vëhé xi quihndë ne, chjuhun yëjë ni xcusun xi siu ntsun xi casua Nina yun cojo sa xi scaa nuju cuangun xcun hya xi nduva cjuacjintacun vë, hane handasa cuatjun vëhé ne, cuiyujunhñu cuaha cjuatacun nuju. ¹⁴ Cuiyujuhñu cjuatacun nuju sacuaaha ngu sindadu xi tjín chjine cha. Nechun cojo cjuaquixi rë Nina ta, vëhé cumachji rëhé nuju sacuaaha ngu cinturón xi cuetuhun cahntsua nuju. Hacuaaha quixi yun cojo cjuatacun nuju ta, vëhé sahmi chjí rëhé nuju sacuaaha chingá quicha rë sindadu xi cuetjo rë ndanisin rë cha. ¹⁵ Hacuaaha tjín chjine yun cojo cjua rë Nina xi chja tsëhé cjuajeya sacuaaha tjín chjine cha sindadu xi vincha ntsacu cha zapatu. ¹⁶ Hacuaaha cojo yëjë sa vihi ne, ndaja catamacjain nuju cojo sa xi cuma tsicangui rë yojo nuju hane tsicjé ngahñu rë cjuañihi xi sahmi si xitsehen cojo nuju, sacuaaha sahmi ngu quichatë xi yahatsja sindadu xi tsicangui rë yojo rë cha. ¹⁷ Chjuhunntsun cjuaninchataha rë Nina xi vetahatacun xi cumachji rëhé sacuaaha ngu cascu xi vaxëtje rë rcuun,

hacuaha chjuhunntsun cjuã rë Nina sacuaaha ngu espada xi sua nuju Hasen rë Nina. ¹⁸ Hacuaha quitaha tinihñu oración nuju yëjë ni hora. Tinújun hacuaha chjahyun rë Nina ngatsë rë Hasen rë Nina. Cojo sa xi cuma nihñu vihi, quitaha nechun cuidadú, hacuaha tinihñu oración nuju ngatsë rë yëjë xuta ladu rë Nina. ¹⁹ Hacuaha tinihñu oración ngatsë naha. Chjahyun xi Nina ne, sua sa ná me cjuã hya xi cuichjá, hane cuma cuichjá nguñajacacun cojo sa xi suá cumachaya rë xuta tséhë cjuã ndajyihi rë Nina xi cuaxëtje rë xuta ta, ²⁰ ngatsë rë cjuã vëhë ne, Nina catsingátju me ngahan, hacuaha ngatsë rë cjuã vëhë ne, tejñaya ndavaya quihndë. Vëhë xi nihñu oración cojo sa xi cuma cuichjá cjuã vihi cojo yëjë ngahñu xi mameje rë.

Nina rë Pablo xi titsingüinetaha me cjuã

²¹ Tíquico, xingueen, xi vinga ná hacuaha ndaja cjuinduju me cojo xa rë Nai naja ne, sua me vëhë xi cumachaya nuju tséhë yëjë ni xcusun xi tivatju tijima, cojo tséhë yëjë ni xcusun xi tisahme. ²² Vëhë xi tsingátju nuju me cojo sa xi cuichja me cojo nuju hacutjin nechin hane cojo vëhë ne, cuma suatacun.

²³ Hane Nina nahmi naja ne cojo Nai naja Jesucristu ne, catisua nuju me ngayun xingueen cjuandaja cjuajeya cojo cjuahmutacun ngajñi xi cumangutacun. ²⁴ Hane Nina ne, catsinchacuntihin me yëjë xuta xi hmu-cacun me Nai naja Jesucristu cojo ngu cjuahmutacun xi tsajin nixtin fëya. Cuatjin jain.

Carta xi catsingatju San Pablo xi cafahtsja xuta nandya Filipos

Cristu má me cjuahñu rë xuta xi macjain rë me

¹ Ngahan Pablo cojo Timoteo ne, sacuaaha mosu hndixahan rë Jesucristu ngayin. Ningatjin nuju ngu nina niñi, ngayujun ni xi tsêhë Nina ngayun, hacuaaha macjain nuju Jesucristu ndya nandya Filipos. Hacuaaha cojo me xi matitjun tsujun sacuaaha obispos hacuaaha cojo me xi visecoo rë me ne, ningatjin nina niñi tsêhë me. ² Nina Nahmi naja cojo Jesucristu, me xi matitjun tsajan ne, catisua nuju me cjuandaja cjuajeya rë me.

Oración xi sahmi Pablo tsêhë xuta xi macjain rë me Nina

³ Hya xi tsingátahacacun ngatsë nuju ne, suá nacuechji rë Nina. ⁴ Hya xi féhya rë Nina ngatsë nuju ngayujun ni ne, hatuxa tjin ná cjuasua ta, ⁵ tsêhë xi ngayun ne, cuatjin visecun ná xi cumachaya rë xuta cju ndajiyihi tsêhë Jesucristu. Cuatjin visecun ná hisca hya xi cafêhë tjëngë nuju ne, hisca quihndë. ⁶ Cavetsihin casahmi ndajiyihi Nina cjuatacun nuju. Vêhë xi ngahan ne, tjin ngucacun xi cuatjincjin ni sahmi me hisca nixtin xi cuya Jesucristu. ⁷ Hacuaaha ndatjin xi cuatjin tsingátahacacun ngatsë nuju ngayujun ni ta, tsêhë xi jemu vinga ná ngayun. Vinga ná ngayun ta, tsêhë xi ngayujun ngarcun ni ne, cojo ngayun tiniñu tsë tsë xa xi casua ná Nina cojo cjuandaja rë me, quihndë xi tejñaya ndavaya gneuhe, hora xi tisuá cjuaquixi naha cojo xutaxa rë, xi cju ndajiyihi tsêhë Jesucristu ne, jemu ndaja camahani hacuaaha hatuxa cjuaquixi. ⁸ Hisca vëë jain me ta jemu meje cuinduva tjëngë nga nuju ta, tsêhë xi ngahan ne, hmú cacún nuju ngayujun ni sacuatjin hmucacun nuju Jesucristu.

⁹ Féhya rë Nina xi cuma jyë sa cjuahmutacun xi tjin nuju, hacuaaha féhya rë me xi cuechutaha sa cjuatacun nuju, ¹⁰ cojo sa xi cuijnercun jarë xcusun xi ndatjin xi nihñu. Sehe ngajan xi cuma tyjahi xahasen nuju, hacuaaha ha café jyë nuju nixtin xi cuya nga Jesucristu ta, ¹¹ tsêhë xi Jesucristu ne, ha casua nuju me cjuandaja xi cuma nihñu hacutjin xi cjuaquixi. Xi cuatjin ne, xuta ne, cjuaharcun me Nina hacuaaha jemu ndaja cuichja me tsêhë me.

Cjuasua ne, caa rë fi xcun handasa vatju me cjuañihi

¹² Meje ná xi cumachaya nuju tsan, ta handasa cuitjin tejñaya ndavaya ne, hacuiin ndajintjin ta xuta ne, hitsë sa tijima chaya rë me cju ndajiyihi tsêhë Jesucristu. ¹³ Hisca yëjë sindadu xi jiyahñu rë ngahan cojo yëjë ni xuta xi yahnga ne, vëë me xi tsêhë xi jemu xuta rë Jesucristu ngahan ne, vëhë xi caveya ná me ndavaya. ¹⁴ Hacuaaha jemu cjin xingueen ne, tsêhë xi camachaya rë me hacutjin vátju quihndë xi tejñaya ndavaya ne, hitsë sa mangucacun me cojo Nina. Hane vëhë xi macjiin cacun me xi chja me cju rë Nina.

¹⁵ Quixi ta hacuaaha tjin xuta xi sua me machaya rë xuta cju tsêhë Jesucristu. Peru tsêhë xi sahmi xín cacun me cojo ná, hacuaaha mijí rë me xi cju naha cjuexcun, vëhë xi cojo me chja me. Peru yahnga nga me ne, cuatjin chja me ta, tsêhë xi jemu tjin rë me cjuandaja. ¹⁶ Cuma cuinújan ne, me xi cuacun tjin rë cjuandaja jan ne, sua me machaya rë xuta cju tsêhë Jesucristu ngatsë rë cjuahmutacun xi tjin rë me cojo ná, tsêhë xi ha vëë me ta

Nina ne, casua ná me xa xi cuichjátè ngatsè rë cjuua ndajyihí tsèhè Jesucristu. ¹⁷ Peru me xi cuacun tjin rë cjuaxintacun jan ne, sua me machaya rë xuta cjuua vèhè ngatsè rë xi meje sahmi yehe suvá me yojo rë me. Tsajin rë me ngu cjuatacun xi ndajyihí xi cuatjin chja me. Xi má rë me ne, ngahan ne, xi tejjñaya ndavaya nguehe ne, cumacjincacun ngatsè rë xcusun xi tisahmi me. ¹⁸ Tsimi sahmi rë xi cuatjin cjuatacun rë me xi chja me cjuua rë Nina, ¿há xi nguñajacacun me ne?, o ¿há xi hacuuiin nguñajacacun me ne?, ndastu cuenda xi cjuua tsèhè Jesucristu ne, tijimachaya rë xuta. Vèhè xi jemu ndama ná.

¹⁹ Hya xi ha cuatju cjuacjintacun naha ne, hacuaha ndaja cuma ná ta tsèhè xi ha hvè ta hya cuma tsejen xi tsajin jyè naha. Cuatjin cuma ta tsèhè xi tichjahyun rë Nina ngatsè naha, hacuaha tsèhè xi Hasen xi casua naja Jesucristu ne, cuisecoo ná. ²⁰ Jemu meje ná xi ngajñi rë yèjè ni xcusun xi sahme ne, tsajin mé xi sua sava ná. Hacuaha meje ná xi cumacjiin cacún ngajñi rë tu mé ni cjuacjintacun, cojo sa xi xuta ne, hatuxa sahmi jyè hnga me Jesucristu ngatsè naha, sa xi tsismi ná xutaxa rë ne, o sa tsajin ne, sa xi tsiquehen ná me. ²¹ Peru jinguyèjè rë xi tejjña cjuahñu ne, hatuxa meje sahme nguñajacacun yèjè ni hacutjin xi Jesucristu meje rë me. Hacuaha sa xi cyeua ne, jemu ndaja tsahan. ²² O sa xi cuitejjña sa cjuahñu ne, xa xi sahme ngatsè rë Jesucristu ne, ndatjin cuetju. Vèhè xi hisca hveen ne, jarè xi hitsè sa chuya ná, ¿há xi cyeua ne?, ¿há xi cuitejjña cjuahñu? ²³ Cuma cuinújan ne, jemu chja sacuse ná jarè xcusun xi ndatjin. Jercu meje cjué tjèngè Jesucristu ngajan hiscan tacun me ta, jemu sa ndaja tsahan xi cuatjin. ²⁴ Peru hitsè sa mameje rë xi cuitejjña cjuahñu ngatsè nuju. ²⁵ Tsèhè xi cajneccacún tsèhè cjuatacun vèhè ne, vèhè xi hvè ta cuitejjña sa cjuahñu. Cuitejjña sa cojo nuju ngayujun ni ne, cojo sa xi cuiséccoo nuju xi tuxaha sa cjuatacun nuju xi chutayun cjuachacun xi macjain naja, hacuaha hitsè sa ndaja cuma rë xahasen nuju tsèhè cjuua vèhè. ²⁶ Hacuaha hya xi cuinduvá cuitejjña nga cojo nuju ne, cuinújun ta jemu ndaja Jesucristu, ngatsè rë xi cavétju ndavaya.

²⁷ Nihñu yèjè ni hacutjin xi meje rë xi sahmi xuta xi ha macjain jain rë me cjuua ndajyihí tsèhè Jesucristu. Cuatjin nihñu, cojo sa xi ndaja cjuua sacú ná tsujun, ¿há xi cuinduvá tjèngè nuju?, o sa tsajin ne, ¿há xi tejjñataha jingu sa ladu? Peru meje cumachaya ná xi ngayun ne, tjin tangun cjuatacun nuju, hacuaha visecuun xingun xi nújun tjun ngatsè rë cjuua ndajyihí xi macjain naja. ²⁸ Hacuaha meje cumachaya ná xi ngayun ne, rcuun camahani tsèhè xuta xi sahmi nuju me condra. Xi cuatjin rcuun ne, cuma tsejen xi Nina ne, tacun jain me cojo nuju. Hacuaha cuma tsejen xi cuechu nixtin xi Nina ne, tsingatju me xuta xi cuacun jan xcun ndihi, peru ngayun ne, cuaxètje nuju me. ²⁹ Nina ne, ndaja casahmi me cojo nuju xi hacuuiin suvá xi cumacjain ni nuju Jesucristu ta hacuaha cuatjun cjuañihí ngatsè rë xi macjain nuju me. ³⁰ Titjun ne, cahyun cjuañihí xi cavátju camá. Quihndè ne, camachaya nga nuju xi ha cuanitjin ni tivátju tijima. Hacuaha ngayun ne, hacuanitjin ni tivatjun tijima quihndè.

2

Meje rë xi chjayanguen tsèhè Cristu sacuaaha catsinguijne me yojo rë me

¹ Tjin rë xahasen nuju cjuasua ta, tsèhè xi tjin tangun cjuatacun nuju cojo Jesucristu. Tjin nuju cjuetacun ta, tsèhè xi me vèhè ne, hmuacacun nuju me. Tjin tangun cjuatacun nuju cojo Hasen rë Nina. Hacuaha tjin nuju cjuahmutacun cjuayumatacun cojo xingun, xingu xingu ngayun. ² Quihndè ne, cojo sa xi cuma chihin cjuasua xi tjin rë xahasen naha ne, cuitjin

nihñu. Nihñu tangun cjuatacun nuju cojo xingun. Hacuaha ngajñi nuju ne, nihmutacun xingun cojo ngu ni cjuatacun nuju. ³ Sa xi meje nuju xi suvun ni xi ndajyihí cuatjun cuma ne, ndajin tjin. Hacuaha mijí rē xi nihñu yehe yojo nuju ta, xi meje rē ne, jeya ngayun. Hacuaha meje rē xi chutsujun xingun sacuaha xi hitsē sa vengui chjí rē me xi cumá nuju ngayun. ⁴ Mijí rē xi tsujun suvun ni cuinchunsun xi ndaja ta, hacuaha meje rē xi tinchunsun xi ndaja xi cumá rē jingu sa xuta.

⁵ Meje rē xi ningatuhuntacun sacuaha catsingatahacacun Jesucristu. ⁶ Me vèhē ne, handasa ha Nina me ne, peru hacuiin casahmi jyē hnga me yojo rē me xi meje cuejña me sacuaha Nina ta, ⁷ cahndē rē vèhē ne, cavejñaxin me cahndē rē me xcun Nina, hane casahmicuenda me xuta camá me ngu xuta sacuaha yaan, cojo sa xi sahmi me yējē ni hacutjin cuitexa Nina me. Hya xi ha camá me xuta ne, ⁸ cahndē me yējē ni hacutjin cachja Nina, hacuaha catsingatihin me xi catsisava xuta me, hisca catsingatihin me xi catsiquehen xuta me xcun cru, sacuaha xi jemu jyē jyē rē me. ⁹ Vèhē xi Nina ne, hya xi catsicuya me Jesucristu cjuahñu ne, hya casahmi jyē hnga me Jesucristu, hacuaha ngu ni me vèhē xi jemu vengui chjí rē ñihi rē me. ¹⁰ Cuatjin casahmi Nina, cojo sa xi yējē ni ángel, yējē ni xuta, cojo yējē ni xitsehen ne, cuechú nixtin xi cuixcuhnchi xcun Jesucristu xi cjuaharcun rē me. ¹¹ Hacuaha cuichja ta Jesucristu ne, hatuxa matitjun jain me. Xi cuatjin ne, cumatsejen xi Nina Nahmi naja ne, hatuxa jemu jyē hnga me cojo cjuatacun rē me.

Xuta xi macjain rē me Nina ne, tsejen xcusun rē me xcun yahnga xuta

¹² Sacuatjin ndaja canuhyun tsahan hya xi cavinechan cojo nuju, tsan ne, cuatjin hitsē sa nguñajatacun tinuhyun tsahan quihndē xi xín tejñataha. Hacuaha meje rē xi nihñu yējē ni hacutjin xi chuya rē Nina ta, tsèhē xi me vèhē xi vaxétje nuju me. Ndaja cuidadu cojo sa xi cumachihin cjuatacun vèhē. ¹³ Hacuaha scaa nuju nihñu cuatjin ta, tsèhē xi Nina sahmi me xi meje nihñu yējē ni hacutjin xi chuya rē me, hacuaha sua nuju me ngahñu xi scaa nuju nihñu cuatjin.

¹⁴ Ngajñi rē yējē ni cjuacjintacun xi tjin nuju ne, xi canújunjuun cojo xingun xi chuyiin nuju, xi canujuun cuitjin cuatjin. ¹⁵ Xi cuatjin ne, tsajin jyē nuju hacuaha tyahi xahasen nuju. Cuma cuinújan ne, ngayun xi ha quihndi rē Nina ngayun ne, tsajin jyē nuju, xi nechun ngajñi rē xuta tsehen xuta ndajin xi siu ngasunhndē. Meje rē xi cumatsejen xi jemu ndaja ngayun ngajñi rē xuta tsehen, ¹⁶ xi tuhun machaya rē xuta cjua ndajyihí xi sua naja cjuahñu xatsē. Cuatjin nihñu ne, cojo sa xi ndaja cuma ná ngatsē nuju nixtin xi cuya nga Jesucristu ta, tsèhē xi xi cuatjin ne, hya cumatsejen xi hacuiin tu mahya casahme ngahñu xi sahme hacutjin xi chuya rē Jesucristu, hacuaha hacuiin tu mahya casahme xá. ¹⁷ Ha ndasa tsiquehen ná xutaxa rē tsèhē xi ngahan cavisécoo nuju xi cumacjain nuju Jesucristu hacuaha cavisécoo nuju xi nihñu xa rē me, peru ndaja cuma ná. Hacuaha ndama ná xi ngayujun ni ne, casua nuju Nina cjuandaja rē me. ¹⁸ Ha chuva vèhē ni ne, ndaja catama nuju ngatsē rē cjuandaja vè, hacuaha ndaja catama nuju ngatsē naha.

Ejemplu xi sua apóstol

¹⁹ Sa xi meje rē Jesucristu, me xi matitjun tsajan, sacuatjin xi meje ná ne, tsingátju nuju Timoteo. Meje tsingátju nuju me cojo xati, cojo sa xi ngahan ne, hacuaha ndaja cuma rē xahasen naha, hya xi cuya nga me cojo cjua hacutjin tivatjun tijima. ²⁰ Me vèhē tsingátju me ta, tsèhē xi tsajin sa ná ngu xuta xi vinga nuju sacuaha me vèhē. Me vèhē ne, jemu meje rē me xi ndaja cuatjun

cuma. ²¹ Peru yějē me xi yahnga ne, sahmi cuenda me cjuandya rē suvá ni me, sahmi cuendaain me xa xi meje rē Jesucristu xi cumá. ²² Peru ha hyun xcusun rē Timoteo. Ha hyun ta hya xi cavisecoo ná me xi catihin cumachaya rē xuta cjua rē Nina ne, cavisecoo ná me sacuaaha visecoo ngu quihndi nahmi rē. ²³ Véhē xi, xi tu sacú cumachaya ná mé xi cuátju cuma ne, me véhē xi meje tsingátju nuju me. ²⁴ Hacuaha xi má ná ne, me xi matitjun tsajan ne, sua me cahndē xi cojo xati ne, cuinduvá tjēngē nuju.

²⁵ Peru xi má ná ne, hacuaaha sahmi ngujyē xi tsingátju nuju Epafrodito xinguen. Me véhē ne, casahmi me coná xa, hane cojo me véhē cacaa niji cojo cjuahngatacun rē xuta xi chohovēē naja. Hacuaha cavisecoo ná me sacuatjin xi meje nuju ngayun xi caningatjun me. ²⁶ Hane me véhē ne, jemu tjin cacun me xi meje scuēē nuju me ngayujun ni ta, tséhē xi choho camá rē me xi camachaya nuju cjua xi hmu rē me. ²⁷ Hacuaha quixi xi jemu cama hmu rē Epafrodito. Ña meje cueba me. Peru cahmi me ta, tséhē xi camayuma rē Nina me. Hacuaha camayuma rē Nina ngahan ta, tséhē xi mijí rē me xi cuma jyē sa cjuachoho xi tivátju tijima. ²⁸ Véhē xi cojo xati ne, tsingátju nuju Epafrodito, sehe cuma sua rē xahasen nuju xi chun nga me ngu ndiya. Hacuaha ngahan ne, cuma chuva hitsē cjuachoho xi tivátju tijima. ²⁹ Véhē xi chjuhunnstun me cojo cjuasua, tséhē xi me véhē ne, hacuaaha macjain rē me me xi matitjun tsajan. Hacuaha chjuhunrcun yějē ni xuta xi tangun cjuatacun rē cojo rē me. ³⁰ Me véhē ne, tséhē xi jercu casahmi me xa tséhē cjua rē Jesucristu ne, véhē xi hitsē sa ne, cahme me. Handasa cavetaha tsavi me yojo rē me xi cavisecoo ná me ne, peru camacjiincacun me xi cavisecoo ná me cahndē nuju ngayun.

3

Xcusun xi jemu vengui chjí camahani rē

¹ Quihndē tsan ne, catamasua rē xahasen nuju ngatsē rē me xi matitjun tsajan.

Ngahan ne, hacuiin ndya ma ná xi cúa tsihindu nga nuju cjua xi ha cachjá cojo nuju ta, tséhē xi cjua véhē ne, cuisecoo nuju xi tsajin yo tsinguetsun cjuatacun nuju xi macjain nuju Jesucristu. ² Nechun cuidadu cojo xuta machjiriin xi vindacha xi chja xi hachu meje rē xi xtí yojo naja, sehe tsejen xi tséhē Nina ngayaan. ³ Quixiin cjua rē me ta ngayaan xi tsejen xi tséhē Nina ngayaan. Hane Hasen rē Nina ne, visecoo naja xi ma chjahanrcun Nina, hacuaaha nechan cjuasua ngatsē rē Jesucristu. Ha hyan ta hatuxa cumaji cuetjuntjen ngatsē rē xcusun xi cun ngayaan cojo xcusun xi nihña. ⁴ Peru sa xi cuatjin cuma cuetjuntjen suvaan ne, ngahan ne, hitsē sa tjin ná chuva rē xi cuétjutjē xi cumá rē xuta xi yahnga. ⁵ Ngahan ne, hacuaaha cati ná xi cavéchu xi jyin nixtin, sacuaaha xcusun rē xutachanga naha. Ngahan ne, tjē rē xuta nangui Israel ngahan. Hacuaha quihndindai cjin rē Benjamín ngahan. Ha tuxa xuta tjē rē Israel ngahan ta xutacha naha ne, hacuaaha xuta tjē rē Israel me. Ngahan ne, tséhē partidu fariseo ngahan hacuaaha casahme yějē ni hacutjin chja ley rē yungun naha. ⁶ Ngahan ne, jercu cavétaharcu xcusun rē xutachanga naha, hane véhē xi hisca casuá cjuañihi xi cuma rē xuta xi macjain rē Jesucristu. Ngahan ne, tséhē xi casahme sacuatjin chja ley rē yungun naha ne, véhē xi camaji catsicaniji ná xuta hisca ngu jyē. ⁷ Xi catsingátahacacun hatsēē ne, jemu vengui chjí rē yějē xcusun véhē. Peru ngatsē rē Jesucristu ne, xi má ná quihndē ne, venguiin camahani

chjí rē xcusun vĕhĕ ta, cumaji cuaxĕtje ná. ⁸ Hisca venguin chjí rē yĕjĕ sa xcusun, má ná ta, tsĕhĕ xi jercu venguí chjí rē xi tjin tangun cjuatacun naha cojo Jesucristu, me xi matitjun tsajan. Ngatsĕ rē me vĕhĕ ne, ngahan ne, cacandĕxen yĕjĕ ni xcusun, sacua ha xi chanden xtĕ, cojo sa xi ngahan ne, cuma tsĕhĕ Jesucristu ngahan. ⁹ Hacuaha cuma tangun cjuatacun naha cojo rē me. Xi cuatjin ne, cjue jyĕ naha, hacuiin ngatsĕ rē xi sahme hacutjin chja ley rē yungun ta ngatsĕ rē xi macjain ná Jesucristu. Nina ne, tsicjĕ me jyĕ naja ngatsĕ rē xi macjain naja Jesucristu. ¹⁰ Jemu meje ná xi ndaja cuma tangun cjuatacun naha cojo Jesucristu. Hacuaha meje ná xi cojo ngahan sacú ná ngahĕu xi catsingacun Nina, hya xi camá catsicuya me Jesucristu cjuahĕu. Sa xi meje rē Nina ne, ngahan ne, tsingatehen xi cuátju cjuañihi hacua ha hisca tsingatehen xi tsiquehen ná xuta ta, tsĕhĕ xi cuatjin cavatju Jesucristu camá. ¹¹ Hane hya xi cueya ne, meje rē Nina xi hacua ha tsicuya ná me cjuahĕu xi tejĕna ngajĕni rē nima.

¹² Cjĕĕ cuma chihin yĕjĕ ni cjuatacun xi meje ná vĕ, hacua ha chaja sa cuma tyjahi cjuatacun naha. Peru tisahme sa ngahĕu, cojo sa xi cuma sahme chehen cjuatacun vĕhĕ. Cuatjin sahme ta, tsĕhĕ xi Jesucristu ne, ha casahmi tsĕhĕ me ngahan. ¹³ Cŭya cuichjá cojo nuju tsan ta, cjĕĕ sahme chehen cjuatacun vĕhĕ. Peru cuitjin meje sahme: tsicháya xcusun xi ha cavátju camá, hacua ha sahme ngahĕu xi cuma sahme xcusun xi venguí chjí rē xi sehe nduva. ¹⁴ Tisahme ngahĕu xi cuma sahme chehen xcusun vĕhĕ, cojo sa xi sacú ná cuatjo xi sua ná Nina ngatsĕ rē xi macjain ná Jesucristu. Nina ne, cuaxijin ná me xi cuitejĕna ngajan ngahnga hiscan tacun me.

Meje rē xi tjin tangun yaan xi macjain naja Nina

¹⁵ Vĕhĕ xi ngayaan xi ha ndaja macjain naja Jesucristu ne, meje rē xi cuatjin cuiyujun cjuatacun naja. Hane sa xi tjin yahnga ngayun xi hacuiin cuatjin cuiyujun cjuatacun nuju ne, Nina tsingacun nuju me hacutjin xi cjuaquixi. ¹⁶ Ndastu sahmi ngujoyĕ xi nihĕa cuenda tsĕhĕ cjuaquixi xi ha hyan ne, cuatjin meje rē xi nihĕa.

¹⁷ Vĕhĕ xi meje rē xi nihĕu hacutjin xi sahme, tsan. Hacuaha tetuhunrcun xcusun rē xuta xi sahmi hacutjin xi sahme. ¹⁸ Ha jemu cachjá cojo nuju ta jemu cjín xuta xi condra me tsĕhĕ cju ndajiyihi xi sua machaya naja hacutjin cahme Jesucristu xcun cru. Ña tijĕhnda xi tichjá nga ngu ndiya cojo nuju cju vĕhĕ. ¹⁹ Peru xuta xi sahmi me condra cju ndajiyihi vĕ ne, cjue me xcun ndihi. Cahndĕ rē xi cjuaharcun me Nina xi cjuaquixi ne, hitsĕ sa faharcun me tu mé ni xcusun xi chuya rē me. Cahndĕ rē xi cuma sava rē me tsĕhĕ xcusun xi sahmi me ne, tu hitsĕ sa sahmi yehe me yojo rē me. Cuma cuinújan ne, tjin tangun cjuatacun rē me cojo cjuatacun rē ngasunhndĕ. ²⁰ Peru ngayaan ne, xuta tsĕhĕ ngahnga ngayaan. Hacuaha ha nechayan rē Jesucristu, me xi matitjun tsajan, ta cuinduva me tsĕhĕ ngajan xi cuaxĕtje naja me. ²¹ Me vĕhĕ tsindeya me yojo jyĕ naja xi tsajin mé machji rĕhĕ, hane sahmi me sacua ha yojo rē suvá me xi jercu venguí chjí rē. Cojo ngahĕu rē suvá me ne, sahmi me ta, tsĕhĕ xi me vĕhĕ matitjun me tsĕhĕ yĕjĕ ni xcusun.

4

Tahan cjuasua yĕjĕ ni nixtin ngatsĕ rē Nai naja

¹ Vĕhĕ xi sacuatjin xi ha macjain nuju me xi matitjun tsajan tsan ne, cuatjin tangun cojo ngasunhndĕ nuju. Jercu meje cuinduvá tjĕngĕ nuju tsan.

Jemu ma sua rë xahasen naha ta, tsëhë xi ngayun ne, tivangun nduju chojo cjuatacun nuju xi macjain nuju Jesucristu.

² Quihndë ne, féhya nuju ngayun Evodia chojo ngayun Síntique nihñu favor ne, ngu tangun ni catama cjuatacun nuju chojo xingun, sacuatjin meje rë xi nihña ngayejen ni xi tsëhë me xi matitjun tsajan ngayaan. ³ Hacuaha ngaye xi ndaja compañeru naha ngaye ne, nihñi favor ne, tiseceue rë na xi cuacun vë, xi cuijnetaha si xi tisahmi na chojo xicjin na. Ta na xi cuacun vë ne, jercu casahmi na chojo ná xa, hya xi catihin camachaya rë xuta cjuanda jeyihi tsëhë Jesucristu. Hacuaha chojo cha Clemente chojo sa yahnga compañeru naha ne, cavisecoo ná me. Xuta xi cuacun vë ne, hatuxa sacú rë me cjuahñu xatsë ta, tsëhë xi ha tsëhë Nina me.

⁴ Ndaja catama rë xahasen nuju ngatsë rë xi tjin tangun cjuatacun nuju chojo me xi matitjun tsajan. Cúya cuichjá nga chojo nuju, ndaja catama rë xahasen nuju. ⁵ Meje rë xi cuma tsejen xi tjin nuju cjuandaja chojo yëjë ni xuta ta, tsëhë xi me xi matitjun tsajan ne, ha tacun xati xi cuinduva nga me. ⁶ Ngajñi rë yëjë ni cjuacjintacun nuju ne, xi camacjintacun. Tinújun chojo Nina hacuaha chjahyun rë me cjuandaja rë me. Hacuaha tuhun nacuechji rë me. Cuatjin meje rë xi tuhun cumachaya rë Nina tu mé ni xi meje nuju. ⁷ Ngajan xi cjuajeya xi sua nuju Nina ne, vëhë cuetjo nuju, chojo sa xi cumacjintacun, xi tjin tangun cjuatacun nuju chojo Jesucristu. Sacuaha cjuajeya xi sua nuju Nina jan ne, hisca vijniircun ndandaja ta, tsëhë xi jemu tu ndaja camahani cjuajeya vëhë.

Xcusun ndaja xi meje rë xi cuinchan cjuatacun naja

⁸ Quihndë tsan ne, nihñu tangun cjuatacun nuju chojo cjuatacun xi cuicun vihi: cjuatacun xi cjuaguixi, cjuatacun xi chjaharcun rë, cjuatacun xi ndatjin, cjuatacun xi tyahí, cjuatacun xi ndacun, cjuatacun xi chuya rë xuta ndaja. Cuma cuinújan ne, tu jarë ni cjuatacun xi jemu ndaja o sa xi hatuxa tjin chuva rë xi chjaharcun rë ne, vëhë nihñu tangun cjuatacun nuju chojo. ⁹ Hacuaha nihñu yëjë ni hacutjin xi camá nuju hya xi cavicuyá nuju hacutjin meje rë xi nihñu. Peru hacuiin suvá cjuanda xi cachjá chojo nuju ta hacuaha chojo xcusun xi casahme ngajñi nuju ne, chojo vëhë meje rë xi nihñu. Hane cuatjin ne, Nina xi sua naja cjuajeya ne, tacun me chojo nuju.

Cjuatjo tsëhë xuta nandya Filipino xi cuma rë Pablo

¹⁰ Ngatsë rë me xi matitjun tsajan ne, jercu ndama ná ta, handasa jemu cavatju nixtin ne, hindë cavuyun caningatuhuntacun nga ngatsë naha. Hacuiin hatuxa canichayun ná ta, cuenda xi casacuinyiin nuju hacutjin cuma xi cuiseacun ná hisca quihndë. ¹¹ Hacuiin tichjá chojo nuju cuatjin ngatsë rë xi tjin mé xi ma chaja ná ta, ngahan ne, ha casacu ná chuva rë hacutjin cumangucacún chojo tu mé ni cjuacjintacun xi nduva. ¹² Sa yuma sa nchina ngahan ne, hatuxa mangucacún. ¿Há tjin xi sínë?, o ¿há tsajin xi sínë?; ¿há xi jercu tjin ná?, o ¿xi ma chaja ná?, tsimii sahmi rë ta ngahan ne, ha catuxaha cjuatacun naha xi cumangucacún chojo tu mé ni cjuacjintacun xi nduva. ¹³ Scaa ná chojo tu mé ni cjuacjintacun ta, tsëhë xi Jesucristu ne, tisua ná me ngahñu. ¹⁴ Peru, jemu ndaja canihñu xi caviseacun ná ngajñi rë cjuañihi xi tivátju tijima.

¹⁵ Ngayun xuta nandya Filipino ne, ha hyun ta hya xi tjtjun casuá camachaya nuju cjuanda jeyihi tsëhë Jesucristu hacuaha sehe cavétju tsëhë distritu Macedonia ne, hisca ngu yungun cavisecuaain ná chojo tujún hya. Suvun tutu xi caviseacun ná. ¹⁶ Hacuaha hya xi tejñataha ngajan nandya

Tesalónica ne, ngu jo ndiya ne, caningatjun tujún tséhë cjuachaja xi tjin ná. ¹⁷ Hacuini jercu meje ná cjuandaja xi ningatjun ná ta xi hitsé sa meje ná ne, xi sacu nuju cjuandaja rë Nina ngatsë rë cjuandaja xi nihñu. ¹⁸ Ha cafahántsa yëjë ni xi caningatjun ná cojo Epafrodito. Vëhë xi ha tjin ná yëjë ni xi mameje ná. Hisca vangui sa xi tjin ná. Cuatjo nuju vë ne, tangun cojo ngu cuatjo xi ndaja jne, xi vejñaac xacun ngasuncun. Hane Nina ne, fahatsja me cuatjo jan ta jemu chuya rë me tséhë. ¹⁹ Hacuaha Nina naja ne, tséhë cjuanchina ndajyihí xi tjin rë me ne, hatuxa sua nuju me tu mé ni xi machaja nuju, ngayujun ni xi tjin tangun cjuatacun nuju cojo Jesucristu. ²⁰ Quihndë ne, catichja xuta ta Nina Nahmi naja ne, jercu ndaja camahani me yëjë ni nu yëjë ni nixtin. Cuatjin jain.

Cjua xi vijnetaha

²¹ Yëjë ni xuta xi tjin tangun cjuatacun rë cojo Jesucristu ndyá ne, tuhun rë me nina naha. Hacuaha xingueen xi siu cojo ná nguehe ne, tsingatju me ngu nina nuju. ²² Hacuaha cojo sa yëjë me xi tséhë Nina, hisca cojo me xi siu ngajan ndava me xi matitjun camahani tséhë xuta Roma ne, tsingatju me nina nuju.

²³ Cjuandaja rë Jesucristu, me xi matitjun tsajan ne, catejña cojo nuju.

Carta xi catsingatju San Pablo xi cafahatsja xuta ladu rë Jesucristu ngajan nandya Colosas

¹ Ngahan Pablo ne, apóstol tsêhë Jesucristu ngahan ta, tsêhë xi cuatjin camameje rë Nina. Ngahan cojo Timoteo xingueen ne, ² ningátjin nuju carta vihi ngayun xuta nandya Colosas, ngayujun ni xuta ladu rë Nina xi jercu ndaja titsangunndujun cojo ndiya rë me hacuaha tjin tangun cjuatacun nuju cojo Jesucristu. Nina Nahmi naja ne, catisua nuju me cjuandaja cjuajeya.

Sua Pablo nacuechji rë Nina ngatsë rë xuta nandya Colosas

³ Jercu tihín nacuechji rë Nina Nahmi rë Nai naja Jesucristu yasen yasen ni, hya xi nihñi oración ngatsë nuju. ⁴ Tihín nacuechji rë Nina ta camachaya niji hacutjin xi ngayun ne, mangutacún cojo Jesucristu hacuaha nihmutacún yëjë ni xuta ladu rë Nina. ⁵ Cuatjin tinihñu ta, jercu vetuhun tacún cjuandaja xi Nina tacunxin rë me ngajan ngahnga xi cuma nuju ngayujun ni. Cavet-suhun cavetuhun tacún cuatjin, hatsëë hya xi canuhyun cjuandajyihî xi cjuaquixi, xi chja tsêhë Jesucristu. ⁶ Cjuandajyihî jan ne, casacu camachaya nuju sacuatjin sa rë yahnga xuta tsêhë jercu cjin sa cahndë. Hane xi macjain rë xuta cjuandajyihî jan ne, jercu tisahmi me cjuandaja, hacuaha jercu cjin sa xuta tijmacjain rë me. Cuanitjin tivatju ngajñi nuju ngayujun ni, hisca hya xi camachaya nuju cjuaja jan hacuaha ndaja cavijnercun xi Nina ne, jercu sahmi me cjuandaja. ⁷ Cuatjin cachja cojo nuju Epafras, me xi jercu vinga niji hacuaha tangun fahacuenda me cojo niji xa xi vitexa Jesucristu. Me vëhë ne, jercu ndaja cjuinduju me tifahacuenda me tsêhë xa jan cojo sa xi tsujun ndaja. ⁸ Hacuaha casua me camachaya niji xi ngayujun ni ne, tjin nuju cjuahmutacun cojo yëjë ni xuta ladu rë Nina, cojo cjuahmutacun xi sua nuju Hasen rë Nina.

⁹ Ngatsë rë xi cuatjin camachaya niji tsêhë cjuaja xi chja tsujun ngayujun ni ne, vëhë xi tinihñi oración tsujun ngayujun ni yasen yasen ni hisca hya xi camachaya niji. Tichjahyin rë Nina xi cuijnercun yëjë hacutjin xi meje rë Nina xi nihñu. Tichjahyin rë me xi ndaja tuxaha cjuatacun nuju hacuaha cuijnercun cojo cjuatacun xi sua nuju Hasen rë Nina. ¹⁰ Cuatjin tichjahyin rë me, cojo sa xi ngayujun ni ne, cuangunndujun cojo ngasunhndë nuju sacuatjin meje rë xi sahmi xuta ladu rë Nai naja, cojo sa xi chuya rë me tsêhë yëjë ni xi nihñu. Cuatjin tichjahyin rë me, cojo sa xi ngayujun ni ne, nihñu yëjë ni xcusun cjuandaja, hacuaha ndaja sa chun Nina ngu nixtin ngu nixtin. ¹¹ Nina catisua nuju me ndaja cjin ngahñu, tucu ngahñu xi tjin rë me, cojo sa xi yëjë ni nixtin scaa nuju cojo yëjë ni xcusun xi vatjun má hacuaha nijyun tacún cojo xuta, táha tijmasua nuju. ¹² Cuatjin tichjahyin rë Nina, cojo sa xi ngayujun ni ne, tuhun nacuechji rë Nahmi naja ngatsë rë xi me vëhë ne, cavëhëchjine nuju me cojo sa xi cojo ngayun satë nuju cjuandaja xi sua me xuta ladu rë me ngajan ngahnga. ¹³ Nina Nahmi naja ne, cavaxëtje naja me tsêhë xitsehen xi matitjun tsêhë yëjë ni cjuatsehen, hane cavejña naja me tsja Quihndi rë me xi jercu hmucacun me. ¹⁴ Cojo xcusun xi casahmi Quihndi rë me jan ne, Nina ne, cavechjitje me yëjë ni jyë xi quitjen xuta, hane catsinchataha me ngayaan.

Sahmi Nina xi cuya cumandaja ngayaan cojo rë me

¹⁵ Quihndi rë me jan ne, tsingacun naja hacutjin xcusun rë Nina cojo Hasen rë me, handasa maji matsejen Nina. Quihndi rë me jan ne, hatuxa matitjun me tsêhë yêjê ni xi casahmi Nina ta, ¹⁶ tsêhë xi cojo me ne, Nina ne, casahmi me yêjê ni xi tjin ngasunhndë xi tsejen, cojo yêjê ni xi tjin ngahnga xi matsijin, sacuaaha yêjê ni xcusun hasen xi matitjun sa hasen ndaja sa hasen tsehen. Cojo me vêhë ne, casahmi Nina yêjê ni, cojo sa xi yêjê ni xi cuacun jan ne, sahmi jyë sahmi hnga rë me. ¹⁷ Quihndi rë me jan ne, hatuxa matitjun me tsêhë yêjê ni xi casahmi Nina ta, tsêhë xi me vêhë xi tjun sa tacun me xi cuma rë yêjê ni hacuaaha ngatsë rë me vêhë ne, siuchihin yêjê ni. ¹⁸ Me vêhë ne, vitexa me xuta ladu rë Nina sacuatjin rë rcuun xi vitexa rë yojo naja. Hacuaaha sua me cjuahñu xatsë xuta ladu rë Nina ta, tsêhë xi me vêhë tjun tjun me cavuya me cjuahñu tsêhë ngajñi rë yêjê nima, cojo sa xi cumatitjun camahani me. ¹⁹ Quihndi rë Nina jan ne, tsingacun naja hacutjin xcusun rë Nina cojo Hasen rë me ta, tsêhë xi cachuya rë Nina xi cuisehentë me cuejñacahndë súvã me cahntsua xahasen rë Quihndi rë me. ²⁰ Nina Nahmi naja ne, cavejña naja me tsja Quihndi rë me, tsêhë xi cavejñangucacun me xi cojo Quihndi rë me ne, tsicuya me ladu rë me ngayêjê ngarca ni, sa ngahnga sa ngasunhndë, cojo sa xi cumajyë cumahnga Quihndi rë me jan. Hane ngatsë rë jni rë Quihndi rë me xi cavanga xcun cru ne, hindë tsajin mé cjuachan.

²¹ Ngayujun ni ne, handasa hatsëë ne, jemu cjin nechun tsêhë Nina hacuaaha condra nuju me ngatsë rë xi jemu tsehen cjuatacun nuju hacuaaha jemu tsehen xcusun xi canihñu, ²² peru quihndë ne, casahmi Nina xi cavuya nga camandaja yun cojo rë me. Cuatjin casahmi me cojo cjuaveya tsêhë yojo rë Quihndi rë me, cojo sa xi ngayujun ni ne, tsêhë me yun hacuaaha tsajin camahani jyë nuju, hya xi squindaya nuju me xi cuangun xcun me. ²³ Cuatjin cuma sa xi cjuenduju xi siu cahndë cjuatacun nuju xi macjain nuju cjuandajyihî xi chja tsêhë Cristu, hacuaaha cjuenduju xi vetuhun tacún cjuandajyihî xi canuhyun jan. Hane cjuandajyihî jan ne, casacu camachaya rë xuta tsêhë jercu cjin cahndë. Hane ngahan Pablo ne, casatëxa ná xi suã machaya rë xuta cjuandajyihî jan.

Casuaxa Nina Pablo xi cuichjatë me cjuatahahma ndajyihî xi chja tsêhë Jesucristu

²⁴ Quihndë ne, ma sua ná xi tivátju cjuañihî cojo sa xi tsujun ndaja. Tisahmechehen tsêhë yêjê ni cjuañihî xi cachja Cristu xi cuátju cuma cojo yojo naha, cojo sa xi tsêhë xuta ladu rë me ndaja, hane ngayejen ni xi ladu rë me ne, sacuaaha yojo rë me ngayaan. ²⁵ Ngahan ne, camã ngahan ngu xuta xi visécoo rë xuta ladu rë Cristu, tsêhë xi Nina casuaxa ná me xi cuisécoo nuju ngayun xutaxín, cojo sa xi suã cumachaya nuju tsêhë yêjê ni cjuandajyihî xi cachja me. ²⁶ Cjuandajyihî jan xi cachja me ne, hacui cjuatahahma. Cjua vêhë ne, cavetjo Nina tsêhë yêjê ni xuta xi caviyuju me yêjê ni nixtin xi cavatju, peru quihndë ne, casua me camachaya rë yêjê ni xuta ladu rë me. ²⁷ Nina ne, cavejñangucacun me xi sua me cumachaya rë xuta xi cuacun jan xi cjuatahahma vihi ne, chja xi jercu tsinchacuntihin Nina xutaxín jan. Cuma cuinújan ne, Cristu ne, cuejñacahndë me cahntsua xahasen nuju ngayun xutaxín. Hane cuetuhun tacún xi sehe cuaxëndaja me yun. ²⁸ Ngayin ne, tihín cumachaya rë xuta tsêhë cjuã xi chja tsêhë Cristu. Yêjê ni xcusun xuta ne, viyijin me cuidadu hacuaaha vicuyin rë me cojo yêjê ni cjuahasen xi tjin ni. Cuatjin nihñi, cojo sa xi yêjê ni xuta xi cuacun jan ne, tyjahi camahani me xi tjin tangun cjuatacun rë me cojo Cristu, hya xi ningacuin me xcun Nina.

29 Ngatsë rë vëhë ne, ngahan ne, hacuaha hñu tisahme xa, hacuaha tisahme ngahñu cojo yëjë ni ngahñu xi tisua ná Cristu.

2

1 Hacuaha meje ná xi cumachaya nuju xi jercu tisahme ngahñu ngatsë nuju cojo ngatsë rë me xi siu ngajan nandya Laodicea cojo tsëhë yëjë sa me xi cjëë scuëë ná. 2 Cuatjin sahme, cojo sa xi ngayujun ni ne, sacú hñu rë zahasen nuju ngatsë rë xi tjin tangun cjuatacun nuju cojo xingun cojo yëjë ni cjuahmutacun. Hacuaha cuatjin sahme, cojo sa xi sacúndaja cumachaya nuju hacuaha jercu ndaja camahani cuijnercun cjuatahahma ndajyihí rë Nina, xi chja tsëhë Cristu. 3 Cristu ne, suvá ni me vëhë cuma sua naja me cjuatacun xi jercu ndaja cuijnercun yëjë ni cjuatahahma ndajyihí jan. 4 Cuitjin tichjá cojo nuju, cojo sa xi tsajin yo cuma cuindacha nuju cojo cjua xi matanguaain cojo cjua xi cjuaquixi, handasa jercu ndaja nuhya rë, xi má nuju. 5 Handasa tsajin tejñataha cojo nuju ne, peru jercu vityangë cacún tsujun ngayujun ni. Hacuaha ma sua ná, tsëhë xi hvë xi ngayujun ni ne, tjin tangun cjuatacun nuju cojo xingun hacuaha jercu ndaja mangu tacún cojo Cristu.

Vitexa Pablo xi nihña sacuatjin meje rë xi sahmi xuta ladu rë Jesucristu

6 Vëhë xi, sacuatjin xi camacjain nuju cjuandajyihí xi chja tsëhë Jesucristu, me xi Nai naja ne, cuatjin tágunndujun cojo ngasunhndë nuju xi tjin tangun cjuatacun nuju cojo rë me. 7 Catjinduju xi ndaja macjain nuju cjua jan, hacuaha ndaja sa catamacjain nuju ngu nixtin ngu nixtin. Catjinduju xi siu cahndë cjuatacun nuju cojo cjuachacun xi macjain naja, sacuatjin cavicuya nuju Epafras. Hacuaha catjinduju xi jercu tuhun nacuechji rë Nina Nahmi naja.

Tsavi cojo ngu cjuachacun xatsë xi vicuya xuta ndacha

8 Nechun cuidadu, sá tu yo sahmi xi cuisuhun ladu rë ngatsë rë xi cuindacha nuju cojo ngu cjuachacun xi venguin chjí rë, tsëhë xi cjuachacun jan ne, nduva tsëhë xcusun rë xuta ngasunhndë ni, hacuaha tsëhë suvá ngasunhndë vihi yëjë ni cjua rë jan, hacuiin tsëhë Cristu. 9 Nihñu cuidadu ta, yëjë xcusun rë Nina ne, tjin Cristu, ta Nina ne, vejñacahndë me yojo rë Cristu, 10 hacuaha ngayun ne, tsajin mé xi chaja rë hasen nuju, tsëhë xi tjin tangun cjuatacun nuju cojo Cristu, me xi matitjun camahani tsëhë yëjë ni hasen xi hacuaha vitexa, sa hasen ndaja sa hasen tsehen. 11 Ngatsë rë xi tjin tangun cjuatacun nuju ngayujun ni cojo rë me ne, ha sacuaha xi me vëhë cavatë me chuxin nuju. Hane vëhë ne, hacuiin vijne xi cati jain chuxin nuju sacuaha sahmi xuta cojo quihndi langa ta xi vijne jan ne, yëjë ni cjuatsehen xi tjin naja cojo yojo naja ne, cavaxëxin camahani Cristu. 12 Hya xi caxtenda ngayun ne, ha sacuaha xi caveyun ne, hacuaha Nina caveyaniji nuju me tangun cojo Cristu, sehe catsicuya nuju me cjuahñu nga cojo rë me, ngatsë rë xi camangu tacún cojo ngahñu rë Nina, me xi catsicuya rë Cristu cjuahñu tsëhë ngajñi rë yëjë nima. 13 Hatsëë ne, ha sacuaha xi nima má ngayun ngatsë rë jyë nuju hacuaha ngatsë rë yëjë cjuatsehen xi tjin nuju cojo yojo nuju. Peru quihndë ne, ngayujun ni xi catsicuya nga nuju Nina cjuahñu tangun cojo Cristu, Nina ne, catsinchataha naja me cojo yëjë jyë naja. 14 Cuma cuintújan ne, sacuaha xi cavujnu Nina cjua xi hinchá xcun xujun xi tsicaniji jyë naja. Sacuaha xi catsicjéya me xujun jan, hya xi cahme Cristu xcun cru. 15 Nina ne, caphaxin me xa xi siutahá yëjë ni hasen ndaja cojo hasen tsehen xi cavitexa, hane

catsingacuntë me xi cuatjin casahmi me. Cacaã rë me cavinchangahma me hasen xi cuacun jan, cojo yëjê ni xi casahmi Cristu.

¹⁶ Xicachjasuun tsêhê xuta xi tsicanijiyê me ngayun ngatsê rë xcusun xi chinu o xi hyun, o ngatsê rë suhi xi nihñu, há chuya nu, há chuya sá, o há chuya totje. ¹⁷ Xicachasuun ta yëjê ni xcusun xi cuacun jan ne, sacuaaha tjahnguen ni rë yëjê ni cjuandaja xi casua nuju Cristu. ¹⁸ Xicachasuun tsêhê xuta xi cuatjin tsicanijiyê nuju me xi chja me xi hatuxa meje rë xi ninguijnu yojo nuju hacuaaha chjuhuncun ángel. Xuta xi cuacun jan ne, chja me xi chja xu nijná cojo rë me hacuaaha sahmi yehe me yojo rë me suvá me ngatsê rë cjuatacun tsehen xi vitexa rë me. ¹⁹ Cuatjin sahmi me ta, vicuyaain me cjuachacun cjuaquixi tsêhê Cristu, me xi sahmi xi cumatangun cjuatacun rë yëjê ni xuta ladu rë Nina cojo xicjin hacuaaha sahmi xi cuijin xcun xi cjuenduju me cojo ndiya rë Nina sacuatjin xi meje rë Nina.

²⁰⁻²¹ Ngayujun ni ne, ngatsê rë xi tjin tangun cjuatacun nuju cojo Cristu, me xi cahme ne, vëhê xi camandaya ngayun tsêhê xcusun rë xuta ngasunhndê, sacuaaha mandaya ngu xuta tsêhê yëjê ni cjuandya rë me hya xi hme me. Vëhê xi mijí rë xi cuanguntjengun xcusun rë xuta xi chja xi cumaji chjahan vihi, cumaji xinêê vëhê, cumaji nicojon xingu vë, sacuaaha xi tuxa sahmi nguuyê xi cuinuhyun jan. ²² Mijí rë xi cuanguntjengun xcusun xi cuacun jan ta, tsêhê xi xichiné cojo xi hyun ne, hatuxa fê hya xi nicojo rë. Hacuaha xcusun xi cuacun jan ne, nduva tsêhê cjuã xi vitexa xuta ngasunhndê ni, nduva tsêhê cjuã xi vicuya xuta ngasunhndê ni. ²³ Hacuaha xcusun xi cuacun jan ne, sahmi xi xuta ne, sahmi me yëjê ni xi meje rë cjuatacun tsehen xi vitexa rë me, handasa tsejen sacuaaha xcusun ndaja, ngatsê rë xi vitexa naja xi chjahanrcun nina sacuatjin meje rë xuta ngasunhndê ni hacuaaha xi ninguijne yojo naja hacuaaha xi chjahanñehe cojo yojo naja. Peru xcusun xi cuacun jan ne, vitexaain camahani xi nihña cjuandaja.

3

Catamameje naja yëjê ni xi tsêhê ngahnga

¹ Ngayujun ni ne, casua nuju Nina cjuahñu xatsê, ha sacuaaha xi catsicuya nuju me cjuahñu tangun cojo Cristu. Vëhê xi yëjê ni hora ne, catamameje nuju yëjê ni xi tsêhê ngahnga, hiscan tacun Cristu, me xi Nina casahmi jyê casahmi hnga rë xi cuitexa me ngayêjê ni. ² Catamameje nuju yëjê ni xi tsêhê ngahnga, hacuain cjuatsehen xi tsêhê ngasunhndê ta, ³ tsêhê xi ngayun ne, ha caviyujunxun xcusun xi canihñu hatsêê, sacuatjin rë nima xi ha quihndê tsajin mé cuma sahmi sacuaaha hya xi tacun sa xcun cjuahñu. Hacuaha quihndê ne, tjin nuju cjuahñu xatsê tangun cojo Cristu, me xi tacun xcun Nina. Hane xcusun vëhê ne, hatuxa matsijin. ⁴ Hya xi Nina tsingacuntë me Cristu, me xi sua nuju cjuahñu xatsê ne, hya tsingacuntë nuju me hacuaaha sahmi jyê sahmi hnga nuju me tangun cojo rë Cristu jan.

Xcusun changá cojo xcusun xatsê

⁵ Vëhê xi xicanihñuu cjuatsehen, sacuatjin rë nima xi maji sahmi cjuatsehen. Xicanihñuu cjuatsehen sacuaaha cjuatsehen xi sahmi xuta cojo ngu xi hacuain chjuun rë me, hacuain xihin rë me, o sa xi ngajñi ni xihin me, o ngajñi ni chjuun me. Hisca ndajin tjin xi meje nihñu xcusun xi cuacun vë, cojo yëjê sa xcusun cjuatsehen. Mijí rë xi jercu nihmu tacún cjuanchina ta, xi cuatjin nihñu ne, hitsê sa nihmu tacún cjuanchina jan xi cuma rë Nina. ⁶ Nina ne, sahmi me castigu yëjê ni xuta xi vihndiin tsêhê me, xi cuatjin sahmi. ⁷ Hacuaha ngayujun ni ne, cuatjin canihñu hatsêê, hya xi tivinuhyuun

tsèhë Nina. ⁸ Peru quihndë ne, mijí rë xi nihñu yëjë ni xcusun xi cuichjá cojo nuju vihi: hacuiin cumacjan nuju, hacuiin nihñu cjuatsehen, hacuiin choho cuinújun tsèhë xingun, ⁹ hacuiin cuinújun cjuandacha cojo xingun. Xicanihñuu cuatjin ta, tsèhë xi ha caviyujunxun cjuatacun changá cojo yëjë ni xcusun xi canihñu xi cavitexa nuju cjuatacun jan, ¹⁰ hane ha cavisehen nuju cjuatacun xatsë xi Nina tisahmi me xi cuijin xcun xi cuma sacuaha cjuatacun rë suvá me xi catsindaja cjuatacun jan, cojo sa xi ngayujun ni ne, cumachaya ndaja sa nuju nguñaja cjuaquixi yo me. ¹¹ Ngajan xi cuendaain rë ¿há xutaxín o há xuta tjë rë Israel má ngayaan?, ¿há cati chuxin naja o há catiín rë?, ¿há xuta ngu nangui ngayaan?, ¿há tichjá cjuatacun naja?, ¿há xuta caxteña ngayaan, o há xuta ndaya tjín ngayaan? ta Cristu ni ne, me vëhë xi jercu tu vengui chjí camahani rë me.

¹² Ngayujun ni ne, tsèhë xi cavaxijin nuju Nina, hacuaha caviyujuxin nuju me, hacuaha hmu cacun nuju me ne, vëhë xi meje rë xi tjín nuju cjuayumat-acun cojo xingun, meje rë xi tjín nuju cjuandaja cojo xingun, meje rë xi tjín nuju cjuajeya cojo xingun, meje rë xi yehe tacún cojo xingun. ¹³ Hacuaha meje rë xi scaa nuju cojo xingun hacuaha ninchatuhun xingun, sa xi tjín mé tsèhë xi cuinchunjyun xingun. Sacuatjin rë Nai naja xi catsinchataha nuju me ne, cuanitjin ni nuju ngayujun ni cojo xingun. ¹⁴ Peru xi jercu vengui chjí sa rë xi cuma rë yëjë ni cjua xi cachjá cojo nuju jan ne, meje rë xi tjín nuju cjuahmutacun cojo xingun ta, xi cuatjin nihñu ne, hatuxa jercu ndaja cuma tangun cjuatacun nuju cojo xingun xingu xingu ngayun.

¹⁵ Cjuajeya xi casua nuju Cristu ne, catitexa rë cjuatacun nuju ta, tsèhë xi Nina ne, cavaxijin nuju me cojo sa xi cuinechun cojo cjuajeya ngajñi nuju cojo xingun. Hane meje rë xi yasen yasen ni ne, tuhun nacuechji rë Nina. ¹⁶ Cjuandajiyihi xi chja tsèhë Cristu ne, catiyujucahndë cahntsua xahasen nuju. Ticuyun xingun hacuaha tiyujun xingun cuidadu xingu xingu ngayun cojo yëjë cjuahasen xi sua nuju Nina. Sún nguñaja tacún tsèhë Nina, sacuaha salmo cojo himno cojo yëjë sa xcusun xi sen xi tsèhë Nina, sacuaha ngu nacuechji rë me xi tuhun.

¹⁷ Tu mé ni xi cuinújun o xi nihñu ne, catama sacuatjin meje rë xi sahmi xuta xi tjín tangun cjuatacun rë me cojo Nai naja Jesús. Hacuaha tuhun nacuechji rë Nina Nahmi naja, xi nihñu oración cojo Jesús.

Chja Pablo hacutjin meje rë xi nihña cojo xingueen cahntsua ndya naja

¹⁸ Ngayujun ni yachjin ne, tinuhyun tsèhë xihin nuju ta, tsèhë xi cuatjin ndatjin xi cuma ta, tjín tangun cjuatacun nuju cojo Nai naja. ¹⁹ Ngayujun ni xihin ne, hacuaha meje rë xi nihmu tacún chjuun nuju, hacuiin choho xcusun nuju cojo rë me.

²⁰ Ngayujun ni xi siucuaha xutacha nuju ne, tinuhyun tsèhë me tsèhë yëjë ni xi cuichja me cojo nuju ta, hya xi cuatjin nihñu ngayujun ni xi tjín tangun cjuatacun nuju cojo Nai naja Jesús ne, jercu chuya rë Nina. ²¹ Ngayujun ni xi má yun nahmi ne, xicaningatjuntuun xi cuinújuntuhun rë quihndí nuju, ta sá tu sahmi chúvacacun.

²² Ngayujun ni xi má yun mosu hndixahan ne, tinuhyun tsèhë xuta xi má me nai nuju tsèhë yëjë ni xi cuichja me cojo nuju, hacuiin suvá hya xi tivutsejen me ngayun, sacuatjin sahmi yahnga xuta xi meje cuaxëndaja suvá me yojo rë me xcun xuta, ta tinuhyun tsèhë me cojo ngu xahasen tyjahi ngatsë rë xi chjuhuncun Nai naja. ²³ Tu mé ni xcusun xi nihñu ne, nihñu nguñaja tacún, sacuaha xi tinihñu tsèhë Nai naja, hacuiin tsèhë xuta

ni. ²⁴ Cuatjin nihñu, tsëhë xi ha hyun ta Cristu Nai naja ne, me vëhë cuechji nuju me ta hacui me xi tivisecon rë. ²⁵ Peru sa xi tjin ngajñi nuju xi hatuxa choho tisahmi ne, Nina sahmi rë me castigu tucu xcusun tsehen xi casahmi me, hacuaha Nina ne, hatuxa quixi jain me cojo cjuatacun rë me xi tsichuva me yëjë ni xuta cojo cjuatacun rë me.

4

¹ Ngayujun ni xi má yun nai tsëhë mosu hndixahan ne, ndaja nihñu cojo mosu hndixahan xi siu ntsun, sacuatjin mameje rë ta, tsëhë xi ha hyun xi hacuaha cojo ngayun ne, tjin nai nuju xi tacun ngajan ngahnga.

Vitexa Pablo xi nihña oración hacuaha cuisiajme cjuandaja

² Ngayujun ni ne, nihñu oración yasen yasen ni. Mijí rë xi cuma tsëhë tacún. Tuhun nacuechji rë Nina. ³ Hacuaha nihñu oración ngatsë niji. Chjahyun rë Nina xi tuxaha ndiya xi cuisiajmi cojo xuta, cojo sa xi cuma tihín cumachaya rë me tsëhë cjuatahahma ndajiyihí xi chja tsëhë Cristu. Hane ngatsë rë cjuandajiyihí jan ne, tejñaya ndavaya. ⁴ Nihñu oración ngatsë naha, cojo sa xi ngahan ne, cuichjátë cjuatahahma jan, sacuatjin meje rë xi cuichjá.

⁵ Hacuaha yëjë ni xuta xi hacuiin ladu rë Nai naja me ne, meje rë xi ndaja nihñu cojo rë me cojo yëjë ni cjuahasen xi tjin nuju, yëjë ni hora xi cuma. ⁶ Hacuaha yëjë ni cjuavisiajmi nuju ne, meje rë xi cojo cjuandaja cuinújun yëjë ni hora. Xi cuatjin nihñu ne, sacú cumachaya nuju hacutjin chjayunngun cjuata tsëhë xingu xingu xuta xi cuacun jan.

Tsinguijnetaha Pablo cjuata rë me

⁷ Yëjë ni xi tivátju tijima ne, Tíquico ne, sua me cumachaya nuju. Me vëhë ne, ngu xuta ladu rë Jesús xi jercu vinga ná, hacuaha jercu ndaja cjuinduju me tivisecoo me ngahan xi tangun fahacuenda me cojo ná xa xi vitexa Cristu. ⁸ Titsingátju nuju me, cojo sa xi ngayujun ni ne, cumachaya nuju tsijin hacuaha cojo sa xi sua nuju me cjuajyëtacun. ⁹ Hane cojo me vëhë ne, titsingátju nuju cha Onésimo, cha nangui nuju. Cha vëhë ne, cha ladu rë Nina xi jercu ndaja cjuinduju cha cojo ndiya rë me, hacuaha jercu vinga ná cha. Catsijo me xi cuacun vë ne, sua me cumachaya nuju tsëhë yëjë ni xi cavatju nguehe camá.

¹⁰ Aristarco ne, me xi jiyatangun cojo ná nguehe ndavaya ne, tsingatju me nina nuju. Hacuanitjin ni Marcos, xicjin Bernabé. Ha cachjá cojo nuju tsëhë Marcos jan. Vëhë xi sa xi cjuehe me nangui nuju ne, chjuhunnstun me cojo cjuandaja. ¹¹ Jesús, me xi hacuaha hmí rë Justo ne, hacuaha tsingatju me nina nuju. Ngajñi rë yëjë ni xuta tjë rë Israel ne, jyan tu tu ni me vëhë xi tisahmitangun cojo ná xa, cojo sa xi xuta ne, tsingatihin me xi Nina cuitexa rë me. Jyan me xi cuacun jan ne, casua ná me cjuajyëtacun. ¹² Hacuaha Epafras, me xi tangun nangui nuju cojo hacuaha fahacuenda tsëhë xa xi vitexa Cristu ne, tsingatju me nina nuju. Me vëhë ne, jercu sahmi me oración ngatsë nuju yasen yasen ni, cojo sa xi ngayujun ni ne, cuma tyjahi camahani ngayun xcun Nina, hacuaha cojo sa xi ndaja cuijnercun yëjë ni hacutjin xi meje rë Nina. ¹³ Ngahan ne, cuichjátë cojo nuju ta Epafras jan ne, jercu vityanguicacun me tsujun cojo xuta Laodicea cojo xuta Hierápolis. ¹⁴ Hacuaha tsingatju nina nuju Demas cojo Lucas, me xi doctor xi jercu vinga ná.

¹⁵ Tuhun rë ngu nina yëjë ni xuta ladu rë Nina ngajan nandya Laodicea. Hacuaha tuhun rë Ninfa ngu nina cojo yëjë sa me xi matangun me ndava na.

¹⁶ Hane xi cjuë chutahaya të rë xujun ví ngajñi nuju ne, nihñu xi hacuaha

catichutahaya të rë ngajñi rë xuta ladu rë Nina ngajan nandya Laodicea. Hacuaha xujun xi catsingátju tsëhë xuta Laodicea ne, hacuaha chutahayun të ngajñi nuju. ¹⁷ Hane tinújun cojo Arquipo cjuá vihi: “Catjiniya tacún xi nihñuchuhun xa xi casatëxa nuju, xi tjin tangun cjuatacun nuju cojo Nai naja.” nina vi.

¹⁸ Ngahan, Pablo ne, titsihindu nuju cojo hntsa ngahan ngu nina vi. Ninguitsjun ná nguehe ndavaya. Nina ne, catisua nuju me cjuandaja.

Cjua xi titjun catsihindu San Pablo xi camá rë xuta nandya Tesalónica

¹ Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi matangun ngayun tséhë xi macjain nuju Nina Nahmi naja cojo Nai naja Jesucristu, ngajan nandya Tesalónica. Catisua nuju Nina cjuandaja cjuajeya.

Macjain ndaja rë xuta nandya Tesalónica

² Jercu tihin nacuechji rë Nina Nahmi naja ngatsë nuju ngayujun ni, hacuaha hatuxa veyinnanguin nuju tu ya ni hya xi nihñi oración. ³ Hya nin-guitsjin hacutjin jercu nihñu xa tséhë xi ndaja macjain nuju, hacutjin jercu nihñu cjuandaja tséhë xi hmu tacún Nina cojo xuta yumacujun, hacuaha hacutjin jercu ndaja ticaa nuju xi tinechunyun rë Nai naja Jesucristu.

⁴ Ngayun ne, jemu hmucacun nuju Nina, hacuaha hyin xi cavaxijin nuju me.

⁵ Cuatjin ta xi catihin camachaya nuju cjua rë Nina ne, hacuiin suvá cjua ta hacuaha Hasen rë Nina ne, casua niji ngahñu xi cuatjin canújin cojo nuju cjua jan xi hatuxa cjuaquixi. Ngayun ne, ha hyun hacutjin xcusun niji ngajñi nuju, xi ndajyihí xi cuma nuju.

⁶ Ngayun ne, sacuaaha canihñi hacuaha sacuaaha casahmi Nai naja ne, ha cuanitjin ni canihñu xi cachjuhunntsun cjua jan cojo cjuasua xi casua nuju Hasen rë Nina, handasa jemu choho cavatjun camá. ⁷ Cuatjin camá xi ngayëjë ni me xi macjain rë Nina ngajan ladu tséhë Macedonia cojo Acaya ne, hisca casahmi me sacuatjin canihñu ngayun. ⁸ Hisca hya xi titjun ngayun cachjuhunntsun cjua rë Nai naja ne, sehe jercu cjin quiji cjua jan, peru hacuiin tu ngajan ni Macedonia cojo Acaya ta hisca jingujyë ni. Hacuaha camachaya rë xuta xi jemu ndaja camacjain nuju tséhë Nina. Cuatjin ne, ha quihndë tsajin sa mé xi cuinújin ta ⁹ suvá xuta ne, chja me hacutjin cojo cjuandaja cachjuhunntsun niji hacuaha hacutjin caviyujunxun nina xi macjain nuju titjun, hane camacjain nuju ngu Nina xi cjuaquixi xi quicun. ¹⁰ Hacuaha chja me hacutjin tinechunyun rë Jesús, Quihndi rë Nina, xi cuya me tséhë ngahnga. Jesús jan ne, me vëhé xi catsicuya Nina cjuahñu rë me xi cavaxë Nina me ngajñi rë nima, hacuaha me vëhé ni xi cuaxëtje naja me tséhë castigo xi nduva.

2

Xa xi casahmi Pablo ngajan nandya Tesalónica

¹ Ngayun ne, ha hyun ta xi catsanguin tjenguin nuju ne, hacuiin tu mahya ta ² handasa jemu choho cavatjin camá ngajan nandya Filipos sacuatjin xi ha hyun, peru camacjiin tacuin xi canújin cojo nuju cjua rë Nina ta, tséhë xi Nina jan ne, cavisecoo niji me, handasa jemu camacjan rë yahnga xuta. ³ Hacuaha xi nújin cojo nuju ne, hatuxa cojo cjuaquixi cojo cjuandaja. Hacuiin vindachin. ⁴ Nina ne, me vëhé xi cafahachuva niji me, hane cachuya rë me tsijin, hacuaha casua me ngayin xa xi cuinújin cjua rë me cojo xuta. Vëhé xi cuatjin nújin. Hacuiin xi xuta chuya rë me ta xi Nina chuya rë me, tséhë xi Nina ne, me vëhé xi vëë me cjuatacun niji cojo xahasen niji. ⁵ Ngayun ne, ha hyun ta hacuiin cjuahaxi xi canújin cojo nuju, hacuaha vëë Nina jain ta hacuiin xi tujún meje niji. ⁶ Hacuiin jemu meje niji xi cjuaharcun niji xuta,

sa ngayun sa xuta xi yahnga, handasa tjin niji chuva rë xi chjaharcun niji tsëhë xi apóstol rë Cristu ngayin. ⁷ Peru jemu cojo cjuajeya cavinechin ngajñi nuju, sacuaaha xi sahmi ngu naa xi sahmi cuidadu me quihndi rë me. ⁸ Jemu cavinga niji ngayun. Hacuaha meje niji xi hacuuiin tu suvá cjuva rë Nina xi canújin cojo nuju ta hisca mé sa cjuacjintacun ne, cavejñitacuin xi cuisecuin nuju ta, tsëhë xi jemu cachuya niji tsujun. ⁹ Ngayun ne, vitsjen rë nuju tsëhë xi jemu jyë xa canihñi. Canihñi nixtin nixten, tsëhë xi hisca ngu ngayun mijí tihin nuju ngu cjuandya hya xi canújin cojo nuju cjuva rë Nina.

¹⁰ Ngayun xi macjain nuju Nina ne, cahyun, hacuaha hisca Nina ne, vëë jain me ta jemu ndaja cavinechin cojo nuju. Hisca ngu jyë cumaji nicanuju niji. ¹¹ Hacuaha ngayun ne, ha hyun hacutjain canújin cjuandaja cojo nuju jima ngu ngayun, sacuaaha chja ngu nahmi cojo quihndi rë me. ¹² Hacuaha catihin nuju cjuva xi nchunchujun ni ne, nihñu cjuandaja sacuatjain meje rë ndiya rë Nina ta, Nina ne, me vëhë xi vaxijin me ngayun xi sacú nuju cahndë hiscan xi me vëhë tacun tsja me. Ngajan ne, jemu cahndë ndajyihí camahani.

¹³ Vëhë xi jercu tihin nacuechji rë Nina, tsëhë xi hya xi canuhyun cjuva rë Nina xi canújin cojo nuju ne, camacjain nuju cjuva jua. Hane ndatjain sacuatjain caningatuhuntacun ta cjuva rë Nina jain, hacuuiin cjuva rë ngu xuta. Hacuaha jemu ndajyihí tsujun xi cuatjain macjain nuju cjuva jan. ¹⁴ Hacuaha ngayun ne, cavatjun camá sacuaaha cavatju me camá titjun, me xi camacjain rë Jesucristu ngajan nangui Judea. Sacuaaha xuta nangui rë me ne, jercu casuandya rë me, hacuanitjin ni xuta nangui nuju ne, jercu casuandya nuju me. ¹⁵ Nai naja Jesús ne, catsiquehen xuta nangui Judea me, hacuanitjin catsiquehen xuta jan xutachanga xi cachja cjuva rë Nina hatsëë. Hisca cojo ngayin ne, hacuaha casuandya niji me. Chuyiin rë Nina tsëhë xuta jan xi cuatjain sahmi me. Hacuaha choho vëë me me xi yahnga sa ta, ¹⁶ tsëhë xi mijí sua me cahndë xi cuinújin cjuva rë Nina cojo xuta xi hacuuiin tsëhë nangui Judea ne, catamacjain rë me hacuaha cuetjutje me. Jercu tu jyë camahani jyë rë me xi cuatjain sahmi me. Peru quihndë ne, cavechu nixtin xi cuma me castigo xi cuichja Nina.

Pablo ne, meje cjuve scutsejen nga me xuta Tesalónica

¹⁷ Hya xi ha catsanguinxin ngu jo nixtin tsujun ne, handasa cahyiin nuju, peru hatuxa ninguitsjin nuju cojo xahasen niji. Hacuaha jercu meje cuanguin tjenguin nga nuju. ¹⁸ Cavejñi xi cuanguin. Ngahan Pablo ne, ngu jo ndiya ne, cavejñá xi cjuë, peru Satanás ne, casuain cahndë. ¹⁹⁻²⁰ ¿Mé ngatsë rë xi tivinechinyin rë Jesús? ¿Mé ngatsë rë xi tjin niji cjuasua? ¿Mé ngatsë rë xi ndaja cuichja xuta tsijin? Ngatsë nuju ngayun xi camacjain nuju cjuva rë Nina xi canújin cojo nuju. Ngatsë rë vëhë xi hya xi cuinduva Jesús Nai naja ne, jemu ndaja cuichja xuta tsijin hacuaha jercu ndaja cuma niji.

3

¹ Xi camá ne, tsëhë xi ha quihndë cacain niji xi meje niji cumachaya niji hacutjain tivatjun tijima ne, vëhë xi camangutacuin xi cuinechin suvin ngajan nandya xi hmí Atenas. ² Hane caningatjin cha Timoteo xingueen xi quiji tjengui cha ngayun. Cuatjain caningatjin cha ta, tsëhë xi mosu rë Nina cha, xi chja cha cjuva ndajyihí tsëhë Cristu. Cuatjain caningatjin cha, cojo sa xi tsinguixi nuju cha hacuaha cuichja sa cha cjuva cojo nuju, cojo sa xi hitsë sa ndaja cumacjain nuju ³ hacuaha hacuuiin cuma chuva tacún ngajñi rë cjuacjintacun xi tivatjun tijima. Hane ngayun ne, ha hyun xi hatuxa cuatjain cuatjuun cjuacjintacun xi choho scuëë naja xuta, ⁴ tsëhë xi hisca hya

xi cavinechin cojo nuju ne, hya catihin camachaya nuju xi hatuxa cuatjun cjuañihi. Xi camá ne, cuatjin camá, sacuatjin xi ha hyun. ⁵ Hane ngahan ne, xi meje xati ná cumachaya ná hacutjin tivatjun tijima, vèhë xi catsingátju cha Timoteo, quiiji cjaha cha cjua sa xi ngayun ne, macjain cuaha nuju. Cuatjin casahme, tséhë xi camacjíncácun ngatsë nuju tséhë xi sa cavindacha nuju naain xi cuinengun ngajñi cjuatsehen ne, xa xi canihñi ne, tu mahya.

⁶ Peru quihndë ne, cavuya cha Timoteo xi quiiji tjengui cha ngayun. Hane ndajyihí cjua yaha cha tsujun, tséhë xi macjain cuaha nuju cjua rë Nina hacuaha hmutacun cuaha yëjë ni xuta. Hacuaha cachja cha cojo niji ta ninguitsjun cuaha niji cojo cjuandaja, hacuaha xi jercu meje chun niji sacuahatjin jercu meje chin nuju. ⁷ Cuatjin xi handasa jemu ndya tivatjin tijima cojo cjuañihi cojo cjuaxti, peru jemu casacu niji cjuetacun, tséhë xi ngayun ne, macjain cuaha nuju. ⁸ Quihndë ne, jercu tu ndaja camahani cuma niji ngayin, sa xi ngayun ne, ha ndatjin siu nuju cjuatacun nuju cojo Nai naja. ⁹ Hacuaha jemu meje tihin nacuechji rë Nina naja tséhë yëjë ni cjuasua xi casua niji me ngatsë nuju. ¹⁰ Nixtin nixten ne, jemu tichjahyin rë Nina xi sua me cahndë xi tjin ngu hora tjin ngu nixtin sacú xinguen ne, cuicuyin sa nuju cjua rë Nina xi cjëë cumachaya nuju.

¹¹ Meje niji xi Nina Nahmi naja cojo Nai naja Jesús ne, catisecoo niji me xi cuechintihin nuju. ¹² Hacuaha Nai naja meje rë me xi catamayë sa cjuahmutacun ngajñi nuju cojo xingun hacuaha cojo xuta xi yahnga sa, sacuatjin ngajñi naja cojo nuju. ¹³ Nina Nahmi naja catisahmi me cuatjin, cojo sa xi tsajin jyë nuju xcun me hya xi cuya Nai naja Jesús cojo yëjë ni ángel rë me.

4

Xcusun xi Nina chuya rë me hacutjin xi nihña

¹ Quihndë ne, ha tinihñú hacutjin xi cavicuyin nuju xi meje rë xi cumá, cojo sa xi chuya rë Nina tsujun. Vèhë xi jemu nújin cojo nuju tsan ta hitsë sa nihñu cuatjin ta, tséhë xi hatuxa cuatjin meje rë Nai naja Jesús.

² Hane ngayun ne, ha hyun cjua rë Nai naja Jesús xi ha cavicuyin nuju. ³ Cjuatacun xi meje rë Nina ne; xi cuma tyjahí cjuatacun nuju, xi canindesuun cojo chjuun xi xín, xi canindesuun cojo xihin xi xín. ⁴ Meje rë me xi jima ngu ngayun ne, catisacu chjuun nuju, peru cojo cjuandaja, xi tyjahí cjuatacun nuju. ⁵ Mijí rë xi cojo cjuatsehen, sacuatjin sahmi xuta xi hvíin me Nina. ⁶ Sacuaha cjuacjintacun vèhë ne, xi canihñuu xi cuindachun rë xingun ta, tséhë xi Nai naja ne, sahmi me castigu ngayëjë ni cjuatsehen vèhë, sacuatjin xi ha canújin cojo nuju. ⁷ Hacuaha hacuiin cajindaya naja Nina xi cjuatsehen nihña ta cajindaya naja me xi fë jyë naja. ⁸ Vèhë xi me xi tsitjungui cjuatacun vèhë ne, hacuiin xuta tsitjungui me ta Nina xi tisua nuju Hasen rë ne, vèhë tsitjungui me.

⁹ Quihndë ne, tsajin sahmi ngu jyë xi nihindin nuju xi nihñu hmutacun xingun ta, tséhë xi suvá Nina ne, ha cavicuya nuju me hacutjin meje rë me xi nihñu hmutacun xingun. ¹⁰ Hacuaha tinihñú jain hmutacun yëjë ni xuta xi macjain rë Nina ngajan yëjë ni nandya tséhë distritu Macedonia. Peru nújin cojo nuju ta cuatjin ndaja sa nihñu. ¹¹ Hacuaha teñju tacún xi jyuu nechun, nihñucuendun xi tsujun. Peru nihñu xa, sacuatjin xi ha cavicuyin nuju. ¹² Sa xi cuatjin nihñu ne, hisca cojo xuta xi macjaain rë Nina ne, cjuaharcun nuju me, hacuaha sacú nuju yëjë ni xi cuma meje nuju.

Cuinduva nga Nai naja

¹³ Quihndë ne, meje niji xi cuma chaya nuju hacutjin cuatju nima xi ha cahme, cojo sa xi hacuiin jemu choho cuma nuju sacuatjin rë xuta xi sacuiin rë me ngu cjuetacun, tsëhë xi macjain rë me Nina. ¹⁴ Tsëhë xi macjain naja xi cahme jain Jesús hacuaha cavascaya nga rë me ne, vëhë xi hacuaha macjain naja xi Nina ne, tsingascaya rë me nima xi xcun cjuahñu rë camacjain rë me Jesús.

¹⁵ Vëhë xi nguehe tihin cumachaya nuju ngu cjua tsëhë Nai naja ta jarë ngayaan xi nechan quicun hisca xi cuya Nai naja ne, hacuiin cuma titjun ngayaan tsëhë me xi ha cahme. ¹⁶ Tsëhë xi suvá Nai naja ne, cuinduvajne me tsëhë ngahnga. Cuinuhya rë sacuaaha cjua rë ngu me xi vitexa jain. Cuinuhya rë sacuaaha cjua rë ngu ángel xi ma titjun. Cuinuhya rë sacuaaha xta rë tyjo xi tsëhë Nina. Xi camá ne, nima xi camacjain rë me Cristu ne, tjun tjun me cuascaya rë me, ¹⁷ sehe ngayaan xi nechan quicun ne, cjuaha Nina ngayaan ngajñi rë yufi, hacuaha cojo nima xi cuacun jan, cumatangun ngayejen ni cojo Nai naja ngajan ngajñi tjo. Sehe yëjë ni hora yëjë ni nixtin cuinechan cojo rë Nai naja. ¹⁸ Vëhë xi meje rë xi tinújun cojo xingun cjua vihi ne, sacú nuju cjuetacun.

5

¹ Peru sacuaaha nixtin xi cuma cjuacjintacun vëhë ne, sáhmii nguýë nihindin nuju ta, ² tsëhë xi ngayun ne, ha hyun ta, hya xi cuya Nai naja ne, jemu cjuercun camahani rë ngayëjë ni xuta, tsëhë xi tu ñahñu ni cuinduva me. ³ Hya xi cuichja xuta xi macjain rë Nina ta: “Jemu ndatjin ta jemu jyuu tjin”, peru hya ne, tu ñahñu ni ne cuatju me ngu cjuañihi, sacuatjin vatju ma ngu chjuun xi tu ñahñu meje tsin quihndi rë me. Hane cuatjin cuatju me ta hisca ngu me cuatjinhngaain me. ⁴ Xi nguixun cjuehe ngu chëjë ne, jemu cjuercun naja. Peru ngayun ne, hacuiin jñu camaha tsujun xi nihñu cjuatsehen, xi cjuercun nuju hya xi cuechutaha nixtin xi cuya Nai naja ta, ⁵ ngayujun ni ne, nechun sacuaaha hasen rë nguinxtin. Ngayaan ne, hacuiin jñu camaha tsajan xi nihña cjuatsehen. ⁶ Cuatjin xi mijí rë xi nechan sacuaaha xi titsjuñafen, sacuaaha viyuju yahnga xuta xi macjain rë me Jesús ta, meje rë xi nechan quicun, nguñajatacun. ⁷ Hatuxa xcusun naja xi nguixun xi tsjuñafen. Hacuaha xcusun rë xuta chihí ne, nguixun ma chihí me. ⁸ Peru ngayaan ne, tsëhë xi nechan sacuaaha ndavá rë nguinxtin ne, vëhë xi meje rë xi nechan nguñajatacun. Meje rë xi ndaja cumacjain naja hacuaha nihña hmu tacun xingueen. Xi cuatjin nihña ne, hacuaha vëhë ne, cuisecoo naja ta cuetjo naja Nina. Hacuanitjin ni meje rë xi cuetahan tacun ta cjuaquixi xi cuaxëtje naja Nina. ⁹ Cuatjin meje rë ta, tsëhë xi Nina ne, hacuiin cavaxijin me ngayaan xi cuatjun castigu rë me ta, cavaxijin naja me xi cuaxëtje naja me, ngayaan xi macjain naja Nai naja Jesucristu ta, ¹⁰ Jesucristu ne, cahme me ngatsë naja, cojo sa xi tangun cuinechan cojo rë me, sa xi nechancuaan cjuahñu o sa xi nima camá ngayaan. ¹¹ Vëhë xi meje rë xi tinújun cojo xingun cjua vëhë, hane sacú nuju cjuetacun, sacuatjin xi ha tinihñú.

Pablo ne, tisua me cjua xuta xi macjain rë Nina

¹² Ngayun ne, nihñu favor ne, chjuhuncun rë xuta xi cavaxijin Nai naja xi cuma titjun tsujun, xi sahmi xa ngajñi nuju, xi tsinguixi nuju. ¹³ Jemu meje rë xi chjuhuncun me hacuaha nihñu hmu tacun me tsëhë xi tisahmi me xa vëhë. Ndaja tinechun cojo xingun.

¹⁴ Hacuaha nújin cojo nuju ta xuta xi mijí sahmi xa ne, tinújun cojo rë me catisahmi me xa. Hane xuta xi jima chuvacacun ne, tinújun cojo rë me, hane

sacú rë me cjuetacun. Hacuaha tisecuun rë me xi cjëë ndaja cumacjain rë. Hane tjin nuju cjuajeya cojo ngayëjë ni me.

¹⁵ Hacuaha nechun cuidadu xi hacuiin choho nihñu cojo rë me xi choho sahmi cojo nuju ta, xi meje rë ne, yëjë ni hora yëjë ni nixtin ne, suvá cjuandaja nihñu cojo xingun hacuaha cojo yëjë ni xuta.

¹⁶ Ndaja catama nuju yëjë ni nixtin. ¹⁷ Meje rë xi jemu nihñu oración.

¹⁸ Hacuaha hatuxa tuhun nacuechji rë Nina, handasa choho cuatjun cuma. Cuatjin meje rë Nina xi nihñu, ngayujun ni xi macjain nuju Jesucristu.

¹⁹ Hacuuiin nitjunngun xcusun xi sahmi Hasen rë Nina ngajñi nuju.

²⁰ Hacuuiin nitjunngun cjuarë me xi chja cjuarë xi casua Nina. ²¹ Peru chjuhunchuvun ngayëjë ni cjuarë. Hane jarë cjuarë xi ndaja ne, vëhë tiseñuju hacuaha tinuhyun. ²² Peru tétjunxun tsëhë ngayëjë ni cjuatsehen.

²³ Nina xi tsicjë me cjuachan ne, catisahmi tyjahi tyjahi me hasen nuju cojo cjuatacun nuju cojo yojo nuju, cojo sa xi nixtin hya xi cuya Nai naja Jesucristu ne, tsajin camahani jyë nuju. ²⁴ Me xi tivaxijin nuju ne, cjuaquixi xi chja me. Hatuxa sahmichihin me hacutjin xi chja me.

Cjuarë xi cuijnetaha

²⁵ Ngayun ne, nihñu oración ngatsë niji.

²⁶ Nuvuncjun yëjë ni me xi macjain rë Jesús xi tuhun rë me ngu nina niji, sacuaha xcusun naja.

²⁷ Tsëhë xi cavaxijin ná Nai naja ne, vëhë xi vitëxa nuju xi nújun cojo xujun vi xi cuihndë yëjë ni me xi macjain rë Jesús.

²⁸ Cjuandaja rë Nai naja Jesucristu ne, catisehen xahasen nuju.

Cjua xi ma jo catsihindu San Pablo xi cumá rë xuta nandya Tesalónica

¹ Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi ma tangun ngayun tséhë xi macjain nuju Nina Nahmi naja cojo Nai naja Jesucristu, ngajan nandya Tesalónica. ² Nina Nahmi naja cojo Nai naja Jesucristu ne, catisua nuju me cjuandaja cjuajeya.

Hya xi cuinduva Cristu ne, Nina ne, sahmi me castigu xuta xi tjin jyë rë

³ Hachu tjin niji xi tihin nacuechji rë Nina ngatsë nuju ngayun. Hacuaha ndatjin xi cuatjin nihñi ta, tséhë xi jemu xcun tivangun xi macjain nuju, hacuaha hitsë sa jima tsejen cjuahmutacun xi tjin nuju jima ngu ngayun cojo xingun. ⁴ Véhë xi ngayin ne, hya xi ma tangun me xi macjain rë Nina ne, nújin cojo rë me ta jemu sua má niji tséhë xi ngayun ne, jemu yehe tacún hacuaha jemu macjain nuju, handasa jemu yehe cjuañihi xi tivatjun tijima. ⁵ Cuatjin ma tsejen xi Nina ne, fahachuva naja me cojo cjuaquixi. Hane xi cuijnetaha ne, cuichja Nina ta sacú nuju ngu cahndë hiscan xi me véhë má titjun me, ta ngatsë rë véhë xi jercu choho tivatjun tijima.

⁶ Xi tsingatahacacun Nina ne, yëjë ni xuta xi choho tisahmi cojo nuju ne, ndatjin xi hacuaha cuma ngojo cojo rë me, ⁷ hacuaha ndatjin xi ngayaan xi choho tivatjuun tijima ne, sacú naja ngu cahndë xcun Nina xi chjahanjendan, hya xi Nai naja Jesús cuya me tséhë ngahnga ngajñi rë ngu ndihi jyë cojo ángel rë me xi jercu hñu ngahñu rë. ⁸ Hya sahmingojo me cojo xuta xi macjaain rë Nina, xi hacuaha hndiin me tséhë cjua ndajyihí tséhë Nai naja Jesús. ⁹ Hane castigu xi cuma xuta xi cuacun vë ne, cuaxëxin Nina me ngu ladu hiscan xín, xi tsajin nu tsajin nixtin xi cuechu me xcun Nai naja. Cuatjin ne, xi scuiin me hasen ndajyihí cojo ngahñu rë Nai naja. ¹⁰ Cuatjin cumá nixtin xi cuinduva Nai naja xi cuma jyë cuma hnga me. Hya ne, cuinduva me, cojo sa xi ngayëjë ni xuta xi camacjain rë me ne, cjuaharcun rë me hacuaha cjuercun rë me, hisca cojo ngayujun ni ta tséhë xi camacjain nuju cjua ndajyihí xi canújin cojo nuju.

¹¹ Véhë xi ngayin ne, jercu chjahyin rë Nina naja xi ngayun xi má yun ladu rë me ne, catamachji rëhë rë me ngayun. Hacuaha chjahyin rë Nina xi cojo ngahñu rë me ne, cuetjucaa jain yëjë ni cjuandaja xi ningatuhuntacun hacuaha yëjë ni xa xi nihñu tséhë xi macjain nuju me. ¹² Hacuaha xi cuatjin cumá ne, xuta xi vutsejen me ne, sahmi jyë sahmi hnga me Nai naja Jesús, hacuaha ngayun ne, cuma yehe cuma hnga ngayun ngatsë rë cjuandaja rë Nina naja cojo cjuandaja rë Nai naja Jesucristu.

2

Cuinduva ngu cha tsehen

¹ Quihndë ne, ha hyun xi Nai naja Jesucristu ne, cuinduva nga me xi sahmi tangun naja me. Véhë xi nújin cojo nuju ta ² hacuiin ngutjen cumacjintacun, hacuiin rcun cuma, sa xi sacú nuju cjua xi ha cavechu nixtin xi cafehe Nai naja. Handasa cuatjin cuichja xuta cojo nuju, o sa xi cuichja me xi cuatjin casua Nina me cjuatacun, o sa xi chjuhunntsun ngu xujun xi cuichja cuatjin sacuaha xi ngayin caningatjin, peru hacuiin cumacjain nuju ta, quixiin.

³ Catuun camahani cahndë xi cumandacha ngayun, tséhë xi chaja sa xi

cuechu nixtin vëhë ne, titjun ne, jemu sahmi xuta condra Nina, hacuaha cuinduva ngu cha tsehen xi hatuxa cuechiin cha xcun Nina. ⁴ Cha tsehen jan ne, choho scuëë cha yëjë ni xi hmí nina, hacuaha choho scuëë cha yëjë ni xi vechu chuva rë xi chjaharcun rë. Hane hisca cjue cha cuejña cha cahntsua yungun xi matitjun xi tsëhë Nina, hane cuichja cha ta cha vëhë nina cha.

⁵ ¿Há vitsjiin nuju ta ha cachjá cojo nuju cjua vihi, hya xi cavitejña nandya nuju? ⁶ Hacuaha ha hyun ta xi ngutjen ne, tsajin cahndë cuinduva cha tsehen jan ta, cuinduva cha hisca xi cuechu nixtin xi Nina sua me cahndë. ⁷ Hacuaha cjuatsehen ne, hisca hyan, ta jemu tijima yehe. Hane hisca xi cjuexin me xi tivechja cahndë ne, ⁸ sehe hya cuinduva cha tsehen jan. Peru Nai naja Jesús ne, tsiquehen me cha cojo tjo hntsua ni me, hacuaha tsicjë me cha, hya xi cuinduva me. ⁹ Hya xi cuinduva cha tsehen jan ne, tsëhë xi Satanás tsingatju rë cha ne, jemu hñu ngahñu rë cha hacuaha jemu cjín xcusun cjuarcun ndacha xi sahmi cha. ¹⁰ Hacuaha sahmi cha yëjë ni xcusun cjuatsehen xi cuindacha cha xuta. Cuindacha cha xuta xi cuechiin xcun Nina ta, tsëhë xi mijí rë me chuyiin rë me cjuaquixi xi vaxëtje naja. ¹¹ Ngatsë rë vëhë ne, sua Nina cahndë xi cumandacha xuta jan, cojo sa xi cumacjain rë me cjuandesu jan. ¹² Ngajan xi cuma me castigu, ngayëjë ni me xi camacjain rë cjuaquixi jan ta, tu cjuatsehen jan cachuya rë me.

Nina cavaxijin nuju me xi cuetjuntjun

¹³ Peru ngayin ne, meje rë xi jercu tihin nacuechji rë Nina ngatsë nuju ngayun xi hmucacun nuju Nai naja ta, tsëhë xi Nina ne, cavaxijin nuju me xi tjun tjun ngayun cuetjuntjun. Ngatsë rë xi Hasen rë Nina ne, titsityahi rë xahasen nuju xi tsajin xi cún nuju xcun Nina, hacuaha ngatsë rë xi macjain nuju cjuaquixi ne, vëhë xi cuetjuntjun. ¹⁴ Hya xi canújin cojo nuju cjuandajyihí rë Nina ne, hya cavaxijin nuju me xi cuetjuntjun. Cavaxijin nuju me xi sacú nuju cjuahñu ndajyihí sacuaha xi tjin rë Nai naja Jesucristu. ¹⁵ Vëhë xi nújin cojo nuju ta xi camacjiintacun, hacuaha xi canichayuun cjua xi cavicyuin nuju, cjua xi canújin jan cojo cjua xi canihindín jan. ¹⁶ Nai naja Jesucristu cojo Nina Nahmi naja ne, casahmi hmucacun me गयाan, hacuaha cojo cjuandaja rë me casua naja me cjuetacun xi tsajin hora tsajin nixtin xi cjuë, hacuaha casua naja me ngu cjua ndajyihí xi nechayan ni rë nixtin xi cuetjucaa. ¹⁷ Me vëhë ne, catisua me cjuetacun xahasen nuju, hacuaha catisua nuju me ngahñu xi cuinújun hacuaha xi nihñu yëjë ni cjuandaja.

3

Nihñu oración ngatsë niji

¹ Quihndë ne, nihñu oración ngatsë niji, cojo sa xi cjua rë Nai naja ne, xati cuechu jingujyë ni, hacuaha cojo cjuasua cjuahatsja xuta cjua rë me, sacuatjin camá ngajñi nuju. ² Hacuaha nihñu oración, cojo sa xi cuetjintjin tsëhë xuta tsehen ta, hacuiin ngayëjë xuta xi macjain rë me Nina. ³ Peru Nai naja ne, hatuxa quixi me cojo cjua rë me. Sua me yun ngahñu xi scaa nuju, hacuaha cuetjo nuju me, cojo sa xi tsajin mé cuma sahmi Satanás cojo nuju. ⁴ Ngatsë rë Nai naja ne, fë mangutacuín ta ngayun ne tinihñú jain, hacuaha nihñu sa cjua xi vitexin nuju. ⁵ Nai naja ne, catincha me cjuahmutacun rë Nina xahasen nuju, hacuaha catisua nuju me ngahñu rë Cristu xi scaa nuju tsëhë yëjë ni cjuacjintacun.

Meje rë xi nihña xa

⁶ Quihdē ne, sacuahatjin meje rē Nai naja Jesucristu ne, vitexin nuju xi naxunxun yojo nuju tsēhē yējē ni me xi jemu tsēhē me sahmi me xa, hacuaha xi sáhmii hacutjin xi cavicuyin nuju xi nihñu. ⁷ Ngayun ne, ha hyun ta meje rē xi nihñu ngu xa sehe sacú xi xinu, sacuatjin xi cahyun xi canihñí. Hacuuiin tu jyuu ni cavinechinyinjñi ngajñi nuju ne, ⁸ hacuuiin tu cjuatjo ni casacu niji niñu xi cachini ta, nixtin nixten ne, jercu canihñí xa, cojo sa xi hacuuiin ngayun nihñu gastu ngatsē niji. ⁹ Handasa satē niji cahndē xi chjahyin nuju xi cuiseacun niji, peru cachjahyiin ta canihñíxin xa, xi cuejñí ngu xcusun xi cuatjin nihñu. ¹⁰ Hacuaha hya xi cavinechintihin cojo nuju ne, hya canújin cojo nuju ta: Me xi mijí sahmi xa ne, xi catuun sinē me. ¹¹ Cuitjin tinújin cojo nuju ta, tsēhē xi casacu niji cjua xi ngajñi nuju ne, hinchajñi me xi sáhmii xa. Tu tsingusehenjñi me xcun cjuacjintacun xi ña cuendaain rē me. ¹² Ngajan xi vitexin rē me xi cuacun vē, sacuatjin meje rē Nai naja Jesucristu, xi catiyujuyuu cjuatacun rē me, hane catisahmi me xa xi sacú sinē me.

¹³ Hacuaha ngayun ne, xi camacjiintacun tsēhē cjuandaja xi tinihñú. ¹⁴ Sa xi tjin jarē me xi mijí cuihdē cjua xi tinújin xcun xujun vihi ne, chjuhuncuendun jarē me jan, hacuaha xi caninguisuunñuu cojo rē me, sehe me vēhē ne, cuma sava rē me. ¹⁵ Peru hacuuiin choho chun me ta, tuhun rē me cjua cojo cjuandaja ta, tsēhē xi xingun me.

Cjua xi cuijnetaha

¹⁶ Hane Nai naja, me xi tsēhē cjuajeya ne, catisua nuju me cjuajeya yējē ni nixtin hacuaha xcun yējē ni cjuacjintacun. Hacuaha Nai naja yaha nuju me ngayujun ni. ¹⁷ Suva ngahan, Pablo, tsihindu nuju ngu cjua vi, xi tisuá nuju ngu nina. Hatuxa xcusun naha xi cuitjin tsihindu xcun yējē ni xujun xi tsingátju. ¹⁸ Cjuandaja rē Nai naja Jesucristu ne, catisehen xahasen nuju ngayujun ni.

Xujun xi titjun catsihindu San Pablo cha Timoteo

¹Ngahan Pablo ne, apóstol tsêhê Cristu Jesús má ngahan ta, tsêhê xi cuatjin cavitexa Nina, me xi vaxête naja, hacuaha cuatjin cavitexa Cristu Jesús, me xi vetahan tacun. ²Tsihindu ri xujun vihi, ngaye Timoteo. Ngaye ne, sacuaha quihndi ndaja naha ngaye ta, tsêhê xi camacjain ri cjuarê Nina, hora xi cachjá cojo ri cjuajan. Nina Nahmi naja cojo Nai naja Cristu Jesús ne, catamayuma rê me ngaye, catisua ri me cjuandaja cjuajeya.

Tjin xuta xi vicuya ngu cjuachacun xi machjiriin

³Sacuahatjin xi ha cachjá cojo ri, hora xi cavêtju cêjê hiscan ladu tsêhê Macedonia ne, tinechintehe sa ngajan nandya Efeso. Tjin ngu jo cha ngajan xi tivicyua cha cjuachacun xi hacjahi. Hane ngaye ne, titexe rê cha xi cuacun vê ta ha quihndê cuicuyaain sa cha cuatjin. ⁴Hacuaha titexe rê cha ne, hacuiin cuetaharcu cha yêjê cuentu rê xutachanga naja ta, tsêhê xi hacuiin yêjê xi cjuaquixi. Ngu jo cuentu xi cuacun vêhê ne, jemu nduju fi, hane tsajin mé machjirêhê ta suvá ni xi si vangui, hacuaha tsajin mé visecoo naja xi nihña hacutjin xi meje rê Nina. Tsêhê xi macjain naja cjuarê Nina ne, vêhê xi hyan hacutjin xi Nina meje rê me xi nihña.

⁵Tichjá cojo ri xi cuatjin titexe rê cha xi cuacun vê, sehe cuma tyjahi xahasen rê cha, cuma ndajyihî cjuatacun rê cha, hacuaha cumacjain nguñajacacun rê cha. Xi cuatjin ne, hacuaha sacú rê cha cjuandaja xi cuma tsihmucacun xicjin cha. ⁶Peru ngu jo cha xi cuacun vê ne, cachaja cha ndiya rê cjuaquixi, cavetjuxin cha tsêhê cjuandaja jan, hane tu cjuarê xi machjiriin, vêhê tivisiajmi cha. ⁷Meje sahmi cha maestru tsêhê cjuarê xi cavitexa Nina xutachanga naja. Peru hvíin cha mé vijne cjuarê xi visiajmi cha, hisca suvá cha vijniircu cha cjuarê xi vicuya nguñaja nguñajacacun cha.

⁸Quihndê ne, ha hyan ta cjuarê xi cavitexa Nina jan ne, jemu ndaja. Peru meje rê xi cuijnercun, mé ngatsê rê xi Nina ne, cavitexa me cjuajan. ⁹Nina ne cavitexa me cjuajan, peru hacuiin ngatsê rê xuta xi ndaja sahmi ta, ngatsê rê xuta xi choho sahmi, xuta xi hndiin tsêhê ngu xuta xi matitjun tsêhê, xuta xi cuendaain rê tsêhê Nina, xuta xi sahmi cjuatsehen, cojo xuta xi faharcuaain rê Nina, xuta xi macjaain rê cjuarê Nina, xuta xi tsiquehen nahmi rê, tsiquehen naa rê, cojo sa tsiquehen xicjin. ¹⁰Hacuaha cavitexa Nina cjuajan ngatsê rê xuta xihin xuta chjuun xi tjin chjuunnahñu rê, xuta xi xanda, xuta xi vinchahma ngu xuta sehe fehya tujún xuta rê, xuta xi chja cjuandacha cojo xicjin, xuta xi chja cjuandacha hisca xcun xutaxa rê, hacuaha xuta xi sahmi vihi sahmi vêhê xi matanguaain cojo cjuaquixi. ¹¹Peru cjuaquixi jan ne, matangun cojo cjuarê ndajyihî tsêhê Nina. Hacuaha Nina xi jercu ndaja me ne, me vêhê casua ná me cjuarê xi cuatjin cuichjá.

Nacuechji rê Nina tsêhê cjuandaja rê me

¹²Suá nacuechji rê Nai naja Cristu Jesús ta, tsêhê xi camangucacun me cojo ná xi casua ná me xa rê me, hacuaha tisua ná me ngahñu cjuarê scaa ná sahme xa jan. ¹³Cuatjin casahmi me cjuandaja cojo ná quihndê, handasa hatsêe ne, jemu choho cachjá tsêhê me hacuaha jemu choho casahme, xi jemu yehe cjuañihî casuá rê xuta ladu rê me. Peru Nai naja ne, cama yuma rê me ngahan ta, tsêhê xi cjêe xi cumacjain ná me, hane vêhê xi hveen mé xi

casahme. ¹⁴Hane jemu casahmi camahani me cjuandaja cojo ná, xi casua me cahndé xi camacjain ná me hacuaha xi caveya me cjuahmutacun cahntsua xahasen naha. Cuatjin sahmi me cojo naja xi nihña tangun cjuatacun naja cojo Cristu Jesús.

¹⁵Cjua xi cuichjá nguehe ne, jemu cjuaquixi, hacuaha ndaja tjin xi cumacjain ré ngayëjë ni xuta ta, Cristu Jesús ne, canduva me nguehe ngasunhndé xi cuaxëtje me xuta xi sahmi cjuatsehen. Tsëhë yëjë xuta tsehen xi cuacun jan ne, ngahan hitsë sa tsehen ngahan. ¹⁶Peru Jesucristu ne, camayuma ré me ngahan ta, tsëhë xi meje ré me xi cumachaya ré yëjë ni xuta ta jemu sahmi jyë cacun me cojo ngu xuta xi jercu sahmi cjuatsehen. Sacuatjin xi casahmi me cjuandaja cojo ná ne, hacuaha ni tjin sahmi me cjuandaja cojo yëjë ni xuta xi cumacjain ré cjua ré me. Sehe sacú ré xuta jan cjuahñu xatsë xcun Nina. ¹⁷Vëhë xi meje ré xi hatuxa chjahanrcun ré Nina, ndaja cuinújan tsëhë Nina yëjë ni nixtin ta, me vëhë xi matitjun me, xi vitexa me yëjë ni nixtin ta, suvá ni me vëhë xi Nina me, hacuaha matsijin naja me. Hacuaha tsajin nixtin tsajin hora cueya me. Cuatjin jain.

¹⁸Ngaye Timoteo ne, sacuatjin cjuatacun xi ha cachja me xi hmí profeta tsiji hatsëë nixtin tsan ne, ha chuva vëhë ni tivitéxa ri xi nihñi. Hane cjuatacun vëhë ne, cumachjirëhé riji xcun xa ré Nina xi tinihñi sacuaha tjin machjirëhé ngu quicha ngajñi ré ngu si. ¹⁹Mijí ré xi cuihin ngaxtin xi macjain ri cjua ré Nina ta, meje ré xi nihñicuende cjuatacun ndajyihí xi quichehe. Ngu jo xuta ne, casahmi cuendaain me cjuatacun ndajyihí xi cavaha me, hane cuatjin catsichaja me cjuatacun ré me, hacuaha ha quihndé macjaain ré me Jesucristu. ²⁰Cuatjin cavatju cha Himeneo cojo cha Alejandro camá. Vëhë xi ngahan ne, casuá cahndé xi suandya hitsë Satanás cha xi cuacun vë, sehe cumachaya ré cha ta cuaaintjin camahani xi choho chja cha tsëhë Nina.

2

Meje ré xi nihña oración

¹Vëhë xi nguehe cuichjá cojo ri ta jemu meje ré xi chjahan ré Nina cjuandaja, meje ré xi tahan nacuechji ré me, hacuaha meje ré xi nihña oración ngatsë ré yëjë ni xuta. ²Meje ré xi nihña oración ngatsë ré xutaxa ré, hacuaha ngatsë ré ngayëjë ni xuta xi vitexa naja, sehe ngayaan ne, tsajin yo suandya naja suaxti naja, xi tsejen xi chjahanrcun ré Nina, hacuaha xi nihña cjuandaja. ³Jercu ndaja tjin xi cuatjin nihña oración ta, Nina, me xi vaxëtje naja ne, cuatjin chuya ré me. ⁴Meje ré me xi ngayejen ni xuta ne, cuetjuntjen hacuaha ndaja cuijnercun cjua xi cjuaquixi. ⁵Ngu ni Nina xi tacun me, hacuaha ngu ni me xi sahmi xi matangun cjuatacun naja ngayaan xuta cojo Nina. Me xi cuatjin sahmi jan ne, hacui ngu xuta xi hmí Cristu Jesús. ⁶Me vëhë xi casua me yojo ré me xi cuechjitje me jyë naja ngayejen ni ngayaan. Hane hya xi cavetjucaa nixtin ne, cuatjin cama tsejen xi Nina ne, meje ré me xi cuetjuntjen. ⁷Vëhë xi casatë ná xi má ngahan apóstol, xi cuicuyá ré xuta xi xín nangui ré me, cuichjá cojo ré me cjua xi cjuaquixi xi macjain naja. Hatuxa cjuaquixi cjua xi chjá cojo ri. Hacuín vindácha.

⁸Hacuaha meje ná xi xuta xihin ne, sahmi me oración ha tu jani ni hiscan xi matangun me. Hya xi scunitjen me tsja me xi sahmi me oración ne, meje ré cojo ngu xahasen tyjahí. Mijí ré xi quitaha cjan ré me, hacuaha mijí ré xi cojo si. ⁹Hacuaha yachjin ne, cataja me tsjian ré me hacutjin xi ndaja tjin, hacuín ngu xcusun xi jemu nchina tsejen. Mijí ré xi cuircu cun sahmi me tsjarcu me. Mijí ré xi tsindaja me yojo ré me cojo oro, cojo tuseti xi jemu hnga chjí ré, cojo

tsjian hnga chji rë. ¹⁰ Meje rë xi sahmi me cjuandaja ta, cuatjin ndaja tsejen tsêhë yachjin xi macjain rë me Nina. ¹¹ Hacuaha hya xi viseñuju me ngu cjua rë Nina ne, catitsinguijne me yojo rë me, jyuun ni catiyuju me. ¹² Hacuaha suaan cahndë xi yachjin ne, cuicuya me ngajñi rë xuta cjín, hacuaha suaan cahndë xi me vëhë cuitexa me xuta xihin. Xi meje rë ne, tu catiseñuju ni me. ¹³ Cuatjin meje rë ta, tsêhë xi hya xi casahmi Nina xuta ne, titjun casahmi me xutachanga naja Adán, sehe má jo ne, casahmi me Eva. ¹⁴ Hane Adán ne, hacuiin camandacha me ta, chjuun jan ne, me vëhë xi camandacha me, hane cuatjin camá xi casahmichiin chjuun jan cjua xi cavitexa Nina. ¹⁵ Peru yachjin ne, meje rë xi catisacu rë me quihndi. Cuatjin xi cuetjutje me, sa xi macjain rë me Nina, sa xi tsihmu cacun xicjin me, sa xi tyjahi xahasen rë me, hacuaha sa xi vetjo me cjuatacun rë me.

3

Xuta xi vitexa ngajñi rë xuta ladu rë Nina

¹ Nguehe cuichjá cojo ri ngu cjua xi cuatjin jain: yo xi meje cuitexa sacuaha obispo ngajñi rë xuta ladu rë Nina ne, jemu ndaja xa xi meje rë xuta jan. ² Ngajan xi me xi cuitexa ngajñi rë xuta ladu rë Nina ne, meje rë xi ngu xuta ndaja xi tsajin mé choho sahmi. Meje rë xi ngu xuta xi ngu ni chjuun rë, hacuaha xi vetjo yojo rë, xi tacun cahndë cjuatacun rë. Miji rë xi tujyë sahmi me. Meje rë xi ngu xuta xi cojo cjuandaja cjuhatsja me xuta xi nduva tjengui rë me ndava me. Hacuaha meje rë xi chutaha cjuatacun rë me xi cuicuya me xuta. ³ Miji rë xi ngu xuta chihi. Miji rë xi choyo xuta me ta, meje rë xi tjin rë me cjuandaja cjuajeya. Miji rë xi jercu tsimeje me tujún. ⁴ Hacuaha me xi vitexa ngajñi rë xuta ladu rë Nina jan ne, meje rë xi ngu xuta xi ndaja sahmi gobiernu ndava, hacuaha quihndi rë ne, vihndë tsêhë hacuaha faharcun rë. ⁵ Ta sa xi hacuiin ndaja ma sahmi me gobiernu ndava me ne, ¿hacutjin cuma cjuahacuenda me xuta ladu rë Nina? ⁶ Hacuaha miji rë xi ngu xuta xi sehe tiña nixtin cavisehen me ndiya rë Nina, sá tu jemu sahmi jyë xuta jan yojo rë me, cjuë ne, cuatju me castigu rë Nina, sacuaha tjin cavatju xitsehen matitjun camá. ⁷ Hane meje rë xi ngu xuta xi ha chjaharcun rë me, xi hisca cojo xuta xi hacuiin ladu rë Nina ne, ha tifaharcun rë me. Cuatjin xi xuta xi vitexa jan ne, hacuiin cuetju sava me, hacuaha hacuiin tsinguetsun xitsehen xi matitjun cjuatacun rë me.

Xuta xi visecoo ngu me xi vitexa

⁸ Hacuaha ni tjin ni xuta xi visecoo rë ngu me xi vitexa jan ne, meje rë xi ngu xuta xi ha chjaharcun rë, ngu xuta xi hacuiin jo xcun jo hntsua. Miji rë xi ngu xuta xi jercu hvi xan. Miji rë xi ngu xuta xi jercu tsimeje tujún. ⁹ Meje rë xi ngu xuta xi cojo ngu cjuatacun tyjahi macjain rë cjua xi cama ngascan casuacuenda naja Nina, cjua xi tsajin yo vëë rë hatsëë nixtin. ¹⁰ Tjun tjun ne, meje rë xi chjahachuva rë xuta jan. Hane sa xi tsejen ta tsajin mé jyë rë xuta jan ne, cuma cjue me xa xi cuisecoo me xuta xi vitexa. ¹¹ Hacuaha chjuun rë me ne, meje rë xi ngu chjuun xi ha chjaharcun rë, ngu chjuun xi visiajmii cjuandesu. Meje rë xi ngu chjuun xi vetjo me cjuatacun rë me, ngu chjuun xi ha sahmi chihin xa rë. ¹² Hane xuta xi visecoo rë ngu me xi vitexa jan ne, meje rë xi ngu ni chjuun rë me. Hacuaha meje rë xi ngu xuta xi ndaja sahmi me gobiernu ndava me cojo quihndi rë me. ¹³ Hane me xi jemu ndaja jain xa sahmi ne, jercu cjuharcun xuta me, hacuaha hitsë sa tsacjuiin me xi cuichja me cjua ndajyihî tsêhë Cristu Jesús xi macjain naja.

Ngu cjuarë Nina xi tsajin yo vëë

¹⁴ Quihndë xi titsihindu ri cjuarë vihi ne, vetahá cáacun ta xati cuma cjuë tjëngë ri. ¹⁵ Peru sa xi cuindeya ná ne, cjuarë xi titsingátju ri vi ne, sua cumachaya ri hacutjin xi mameje rë xi sahmi xuta rë Nina. Hane xuta rë Nina jan ne, hacui ngayaan xi macjain naja Nina xi quicun, hacui ngayaan xi nújantjen ngatsë rë cjuarquixi. ¹⁶ Cjuatacun rë Nina xi tsajin yo vëë, xi macjain naja vi ne, suvá tsejen ta jemu vengui chjì rë:

Cristu Jesús ne, hya xi canduva me nguehe ngasunhndë vihi ne, camá me ngu xuta sacuahatjin ngayaan xuta.

Peru tsajin camahani jyë rë me, chja Hasen xi tsëhë Nina.

Hacuaha cavëë ángel me.

Hane camachaya rë xuta tsëhë me yëjë ni nangui.

Hacuaha camacjain rë xuta me jingujyë ni ngasunhndë.

Hacuaha cafachatsja Nina me ngajan ngahnga.

4

Xuta xi vicuya cjuandacha

¹ Quihndë ne, Hasen rë Nina ne, chja quixi ta cuechu nixtin xi yahnga xuta ne, cuiyujuxin me cjuarë tsëhë Cristu Jesús, cjuarë xi macjain naja, hane tu cjuarë tsëhë xitsehen xi vindacha ne, vëhé scutaya me hacuaha vëhé cuetaharcu me. ² Hacuaha cuetaharcu me cjuarë xi cuicuya xuta xi jo xcun jo hnt sua xi vindacha. Sacuahatjin má taja chuxin rë ndyaja hiscan xi faha chu quicha ne, cuatjin cuetsun cjuatacun rë xuta ndacha xi cuacun vë. ³ Cjuavixan ne, suaain me cahndë cuma, hacuaha cuichja me ta tjin yahnga xcusun xi ndajin xi xinë. Peru Nina ne, casahmi me yëjë ni xcusun ne, cuma xinë ngayejen ni xi macjain naja me, ngayejen ni xi cavijnercun cjuatacun xi cjuarquixi. Peru meje rë xi tahan nacuechji rë me ta, ⁴ yëjë ni xcusun xi Nina casahmi me ne, jemu ndaja. Vëhé xi mijí rë xi nitjunnguen tu mé ni xcusun, ta meje rë xi chjahanntsan, peru tahan nacuechji rë Nina. ⁵ Hane ngatsë rë cjuarë Nina cojo cjuarë xi nújan hya xi tahan nacuechji rë me ne, vëhé sahmi xi tsajin tsavi tsëhë tu mé ni xcusun.

Ngu me xi ndaja sahmi xa rë Cristu Jesús

⁶ Sa xi tehe rë xuta ladu rë Nina yëjë ni cjuarë xi sehe catsihindu ri vë ne, jemu ndaja nihñi, xi tinihñi xa rë Cristu Jesús. Hacuaha hitsë sa cuma jyë cjuatacun riji ngatsë rë cjuarë xi macjain naja, hacuaha ngatsë rë cjuandaja xi cachtaye xi nihñi. ⁷ Peru xi canihñicuendiin yëjë ni cuentu rë xutachanga naja ta, hacuiin yëjë xi machjirëhë ta, ngu jo ne, suvá ni xutachanga naja, me vëhé xi cavaxëcun me. Cahndë rë vëhé ne, ngaye ne, nihñi ngahñu yëjë ni nixtin xi tsejen xi chjehercuin rë Nina nguñajatacuin. ⁸ Xi ninian yojo naja ne, jemu ndaja tjin. Peru hitsë sa ndaja tjin xi tsejen xi chjahanrcun rë Nina ta, tsëhë xi hya xi cuatjin nihña ne, sacu naja cjuandaja rë Nina quihndë nguehe xcun cjuahñu naja, hacuaha ni tjin ngajan xcun Nina. ⁹ Cjuarë xi titsihindu vi ne, hatuxa vechu chuva rë xi cumacjain naja ta, tsëhë xi jemu cjuarquixi. ¹⁰ Vëhé xi jercu tinihña xa, tsëhë xi ha vetahan tacun Nina xi quicun, Nina xi vaxëtje naja ngayejen ni ngayaan xuta, hacutjin ngayejen ni ngayaan xi macjain naja me.

¹¹ Ticoye rë xuta cjuatacun xi catsihindu vë, hane hisca titexe rë me.

¹² Nihñi cjuandaja ne, sehe tsajin yo xi chuyiin rë tsiji ngatsë rë xi chuva nu riji. Nihñi cjuandaja ne, sehe xuta xi macjain rë Nina ne, xi scuëë me

hacutjin nihñi ne, hacuaha ni tjin sahmi me; sacuaha tjin xi ha noje, sacuaha tjin xi nihñi, sacuaha tjin xi hmu tacuin xinguin, sacuaha tjin xi macjain ri Nina, sacuaha tjin xi ndajyihi xahasen riji. ¹³ Nguyëjë rë xi cjëë cjuëhë ne, hñu tinoje cojo xujun rë Nina, hya xi ma tangun xuta ngajan yungun. Ndaja tinoje cojo rë me ne, catisahmi me cjuandaja, hacuaha ticoye rë me. ¹⁴ Nihñixe cojo cjuatjo xi Nina casua ri me, nixtin hya xi me xi vitexa xuta ladu rë Nina ne, cavetahatsja ri me. Cuatjin camá ta, tsëhë xi cuatjin cachja Nina cojo ngu xuta xi hmí profeta xi cuatjin meje rë me xi cuma.

¹⁵ Nihñi nguñajatacuin ngayëjë ni hacutjin xi vitexa xujun vi. Xi cuatjin ne, ngayëjë ni xuta scuëë me hacutjin tihmi xcun cojo cjuandaja rë Nina. ¹⁶ Cuidadu ni tjin ri tsiji sove, hacuaha cojo cjuatacun xi vicoye. Tu chihin ni tihincueje cjuatacun vë. Sa xi cuatjin nihñi ne, cuma naxetje yojo riji, hacuaha cuma naxetje me xi cuiseñuju cjuaxi vicoye.

5

Hacutjin xi cuitexe rë xuta ladu rë Cristu

¹ Sa xi ngu me xi ha nchava ne, choho sahmi me ne, hacuain cuinojetehe rë me ta, cojo jeya tinoje cojo rë me, hacutjin xi sahmi me cjuandaja, sacuaha tjin xi nújan cojo nahmi naja. Hacuaha cojo xuta xihin, me xi vasen xuta ni ne, tinoje cojo rë me sacuaha tjin xi nújan cojo tseen. ² Hane yachjin xi ha chicuhun me ne, cojo cjuandaja tinoje cojo rë me sacuaha tjin xi nújan cojo naa naja. Hacuaha cojo yachjin xi vasen xuta ni me ne, tinoje cojo rë me sacuaha tjin xi nújan cojo na xi tichjan, cojo ngu xahasen ndajyihi.

³ Yachjin cahan xi cjuaquixi xi tsajin yo ngatsë rë me ne, meje rë xi chjahanrcun rë me, cuisecoon rë me. ⁴ Peru ngu chjuun cahan ne, sa xi tjin rë na quihndi o quihndindai ne, catisahmi nixti jan cjuandaja, catisecoo rë na, cojo sa xi cuatjin sahmingojo nixti jan cojo xutacha rë. Xi cuatjin cuma ne, hatuxa chuya rë Nina. ⁵ Tjin chjuun xi cjuaquixi xi cahan me, me xi ha siu suvá. Me vëhë xi vetaha cacun me Nina, hane sahmi me oración, fehya me cjuandaja rë Nina nixtin nixten. ⁶ Peru hacuaha tjin chjuun cahan xi sahmi ni me hacutjin xi ma sua rë xahasen rë me. Hane chjuun cahan xi cuatjin sahmi jan ne, handasa ndaja cun cjuahñu rë me ne, peru cjuatacun xi sahmi me ne, tsajin mé machjirëhë. ⁷ Cuatjin tinoje cojo xuta ladu rë Cristu, sehe tsajin mé jyë rë me cojo xutacha rë me. ⁸ Peru sa xi ngu xuta marcuaain rë me tsëhë xuta rë me, o sa xi marcuaain rë me tsëhë cahntsua ndava me ne, vëhë tsingacun naja xi catsitjungi me cjuarë Nina xi macjain naja. Hacuaha hitsë sa choho sahmi me xi cuma rë ngu xuta xi hatuxa macjaain rë Nina.

⁹ Xcun xujun xi yaja ñihi rë yëjë ni yachjin cahan ne, cumahindu ñihi rë na xi ha cafahá rë xi jyanchan nu, na xi cavejña cojo ngu ni xihin, ¹⁰ na xi ha vëë xuta xi ndaja xcusun rë, xi ha casahmi yëjë ni cjuandaja vihi: ha catsicha na quihndi, ha cafahatsja na cojo cjuandaja xuta xi quiji tjengui me na ndava na, ha cavisecoo na yahnga me xi ladu rë Cristu, ha casua na cjuetacun me xi tjin rë ngu cjuacjintacun, hacuaha ha casahmi na jingu sa xcusun xi ndatjin.

¹¹ Peru xcun xujun jan ne, mijí rë xi cuaquí ñihi rë na cahan xi chuva nu rë, sá cuechu ngu nixtin xi ha quihndë sahmi na xa rë Cristu nguñajacacun na, hane meje nga cuixan na ngu ndiya. ¹² Xi cuatjin sahmi na ne, cuetjucaa jyë rë na, tsëhë xi tsichaja na cjuaxi ha catsinguisehenjñi na. ¹³ Hacuaha cuma tsëhë na xi tu tsujihya ni na ndava xuta. Hane hacuain tu suvá ni cuma tsëhë na ta, hisca cuetsihin cuichja na cjuandesu, cuetsihin tsinguisehenjñi na jingu sa cjuatacun xi cuendaain rë na, hacuaha cuetsihin cuisiajmi na cjuaxi

mamijí rē xi cuichja na. ¹⁴ Vēhē xi meje ná xi catixan nga na cahan xi chuva nixtin rē. Catisacu rē na quihndi, hacuaha catjahacuenda na cahntsua ndava na. Sehe xuta xi chuyiin rē me tsajan ne, sacuiin rē me hacutjin choho cuichja me tsēhē xcusun xi ndaja sahmi na yachjin cahan jan. ¹⁵ Cuatjin chjá ta, tsēhē xi tjin ngu jo na cahan xi ha cavetjuxin na tsēhē ndiya rē Nina, cavisehen na ndiya rē Satanás.

¹⁶ Ngu chjuun xi ladu rē Cristu me ne, sa xi tjin ngu chjuun xi xicjin me xi cahan ne, mijí rē xi xuta ladu rē Cristu sahmi me gastu ngatsē rē chjuun cahan jan ta, me xi xicjin ni na ne, catisecoo me na. Xi cuatjin ne, xuta ladu rē Cristu ne, cuma cuisecoo me yachjin cahan xi tsajin yo ngatsē rē.

¹⁷ Yējē ni xuta changá xi ndaja vitexa me ngajñi rē xuta ladu rē Cristu ne, vechu chuva rē xi chjaharcun rē me hacuaha ndaja chjí sacú rē me. Peru me xi sahmi ngujoyē xi chjaharcun rē hacuaha ndaja chjí sacú rē me ne, me xi sua machaya rē xuta cjuua tsēhē Jesús cojo me xi vicuya naja cjuachacun.

¹⁸ Cuatjin chjá ta, tsēhē xi xcun xujun rē Nina ne, cuitjin camahindu cjuua vihi: “Mijí rē xi cueyún changa hntsua ngu ndyaja hya xi sahmi chu xa nuju xi sunesun chu naxu rē trigu xi cuetju trigu rē.” Hacuaha: “Ngu mosu ne, tjin rē cha chuva rē xi cjuaha cha chjí rē cha.”

¹⁹ Hya xi xinchajyē rē ngu xuta changá xi vitexa me xuta ladu rē Cristu ne, xi canihñicuendiin jyē jan sa xi ngu ni cha tichja cha. Hisca xi cjuēhe jo jyan cha xi cavēē cha xcusun xi casahmi xuta changá jan ne, sehe nihñicuende jyē xi vincha cha. ²⁰ Peru me xi tisahmi jain cjuatsehen ne, tinoje cojo rē me xcun ni ngayējē xuta ne, hacuaha yējē ni xuta jan ne, tsacjun me cuma, hane sahmi me cjuatsehen. ²¹ Nihñi ngayējē ni cjuua hacutjin xi titsihindu ri. Hacuaha meje rē xi chuva xi nihñi cojo ngu ne, nihñi cojo ngayējē ni xuta, sa xi vinga ri me o sa xi vingain ri me. Hisca Nina cojo Cristu Jesús cojo ángel xi cavaxjin me ne, vēē me hacutjin xi titsihindu ri vi. ²² Cuechu nixtin xi cuma meje sa xuta xi cjuahatsja me xa ngajñi rē xuta ladu rē Cristu, sacuaha ngu me xi cuitexa, o ngu me xi sahmi tu mé ni ngu xa xi cuma meje. Peru hacuiin marcu macjain cuinoje yo xuta xi satē rē xa jan. Ndaja ningatehetacuin titjun yo xuta xi ndaja me ta, tsēhē xi mijí rē xi ninguisihinjñi cojo xuta tsehen. Hisca sove ne, mijí rē xi nihñi cjuatsehen.

²³ Ha quihndē xi cahyiin suvá ni nandá ta, sihi hitsē xan rē uva ngatsē rē cahntsue, hacuaha ngatsē rē chíhin xi tu quitaha tu quitaha sacú ri.

²⁴ Tjin xuta xi suvá tsejen tsēhē me xi sahmi me cjuatsehen. Hane cjuatsehen ni rē me jan ne, vēhē sahmi xi cuma me castigu. Hacuaha tjin yahnga xuta xi matsijin tsēhē me xi sahmi me cjuatsehen. Peru xi cuma ngascan ne, cuma tsejen xi cun xi má me cojo jyē rē me. ²⁵ Hacuaha ni tjin xcusun xi ndaja ta suvá tsejen. Hane ha ndaja sa hacuiin ngutjen cuma tsejen, peru hatuxa cumaji cuiyujhma ta, tjin xi cuma tsejen.

6

¹ Xuta ladu rē Cristu xi má mosu hndixahan rē ngu xuta ne, jemu meje rē xi cjuaharcun me xuta xi má nai rē me. Sa tsajin ne, choho cuma cuichja xuta tsēhē Nina hacuaha cojo tsēhē cjuachacun xi vicuyan. ² Hane me xi nai rē mosu hndixahan jan ne, sa xi macjain rē me Cristu ne, mijí rē xi choho scuēē hndixahan jan me, tsēhē xi tangun ni macjain rē me Cristu. Cahndē rē xi choho scuēē rē me ne, meje rē xi cuisecoo hndixahan jan me yējē ni xa xi cuitexa me ta, tsēhē xi me xi cuma tsēhē yējē ni cjuandaja xi sahmi hndixahan jan ne, xuta ladu rē Cristu me. Hane vēhē xi jemu hmucacun hndixahan jan me. Tinoje cojo xuta yējē ni cjuua vēhē, hya xi cuicoye rē me.

Cjuandacha cojo cjuanchina

³ Sa xi ngu xuta vicuya me ngu cjuachacun xi hacjahi fi ne, sa xi manguaaincacun me cojo cjua xi cjuaquixi xi cachja Nai naja Jesucristu ne, hacuaha manguaaincacun me cojo cjuachacun xi tséhë Nina ne, ⁴ me vëhé ne, ngu xuta xi jemu sahmi jyë me yojo rë me. Peru hvíin camaha ni me, hacuaha machjiriin cjuatacun rë me ta, tséhë xi jemu meje cuisiajmi me tséhë tu mé ni cjua: “Cuitjin vijne cjua vëhé; jéya, cuatjin vijne”, chja me. Hatuxa jemu meje scaan me cojo cjua ngajñi rë cjuavisiajmi rë me. Hane xi cuatjin visiajmi me ne, vetjucaa cjuaxintacun, vetjucaa cjuahngatacun, hacuaha choho chja me tséhë xicjin me, choho tsingatahacacun me tséhë xicjin me, ⁵ hacuaha ngajan fë ngajan vetsihin ticjan me cojo cjua, xi tsajin hiscan cuijnetaha. Cuatjin sahmi me ta, tséhë xi ha cavetsun cjuatacun rë me ne, cjua xi cjuaquixi ne, hvíin camahani me. Xi tsingatahacacun me ne, xuta xi faharcun rë Nina ne, jemu ndaja cuatju me cuma ta, jercu sacú rë me cjuanchina. ⁶ Bueno, quixi ta ndaja cuátjun cuma xi tsejen xi chjahanrcun rë Nina, sa xi cumangutacun cojo xi tjin naja. ⁷ Ta tsajin camahani mé quichahan xi catsin yaan xi cafehen ngasunhndë vi, hacuaha tsajin camahani mé xi cuma cuanguencon, hya xi cueyan. ⁸ Peru sa xi ha tjin naja xi xinë cojo xi chajan ne, meje rë xi cojo vëhé ne, cumangutacun. ⁹ Peru xuta xi jemu meje rë me cuma nchina me ne, ndaya ndaya ni tsingatihin me xi cumandacha me xi sahmi me cjuatsehen. Xitu tsingusehenjñi me ngajñi rë cjuatsehen jan ne, ha quihndë cumaji cuetjuxin me, sacuatjin rë ngu chu xi jiyahñu cahntsua ngu chen. Hacuaha jemu cjín xcusun yumahasen xi meje rë me. Peru machjiriin xcusun jan ta, tu tsichaja tu tsinguetsun ni rë cjuatacun rë me. ¹⁰ Sacuaha xuta xi jercu meje rë me tujún ne, jemu cjín xcusun cjuatsehen sahmi me xi sacú rë me tujún. Yahnga me xi cuacun jan ne, hisca caviyujuxin me cjuachacun xi macjain naja. Hane ngatsë rë xi cavetjuxin me ne, vëhé xi jemu choho tivatju me jima.

Pablo ne, tsinguxi me Timoteo

¹¹ Peru ngaye xi ladu rë Nina ngaye ne, tihinxin tséhë xcusun xi cuacun vëhé. Tihin tjengui ndiya xi tséhë cjuaquixi, hacuaha nihñi hacutjin xi Nina chuya rë me. Ndaja catamacjain ri me, hacuaha ndaja nihmutacuin me. Caticaa ri xcun ngayëjë ni cjuacjintacun xi cuátji cuma, hacuaha nihñi jeya cjuatacun rijj. ¹² Nihñi ngahñu xi yëjë ni xcusun xi nihñi ne, cumatangun cojo cjuatacun xi macjain ri, sehe sacú ri cjuahñu xatsë ngajan xcun Nina xi tsajin nixtin cjuë. Tséhë vëhé xi Nina cavaxijin ri me. Hacuaha ha catehe cjuaquixi rijj xcun jemu cjín xuta hacutjin xi macjain jain ri Nina. ¹³ Nina xi tisua me cjuahñu rë ngayëjë ni xi tjin ne, vëé me hacutjin tivitéxa ri. Hacuaha Cristu Jesús, me xi casua cjuaquixi rë xcun Poncio Pilatu ne, vëé me hacutjin tivitéxa ri. ¹⁴ Cjua xi tivitéxa ri ne, tinohye. Hacuin nindeye cjua vë ta nihñichihin, hisca xi cuechu nixtin xi cuinduva nga Nai naja Jesucristu. ¹⁵ Hane hya xi cuechutaha nixtin vëhé ne, Nina tsingatju nga me Jesucristu. Nina ne, me vëhé xi ndaja me, me vëhé xi tyjahi me. Ngu ni me vëhé xi matitjun me. Matitjun me tséhë ngayëjë ni xi matitjun. Matitjun me tséhë ngayëjë ni xi vitexa. ¹⁶ Ngu ni me vëhé xi tsajin nixtin cueya me. Tacun me xcun ngu ndavá seti ndajyih, xi tsajin yo cuma cuechu. Hacuaha tsajin yo cavëé rë me, hacuaha hisca ngu cumaji scutsejen rë me. Me vëhé xi catjaharcun xuta me. Me vëhé xi catitexa me yëjë ni nixtin yëjë ni hora. Cuatjin jain.

¹⁷ Xuta xi jemu tjin rë me cjuanchina rë ngasunhndë vihi ne, titexa rë me xi hacuain sahmi yehe me yojo rë me. Hacuain cuetaha cacun me cjuanchina

xi tjin rë me ta, vëhë ne, tsajin cjuaquixi xi cjuecani rë. Peru catetaha cacun me Nina ta, Nina ne, hacuïn choho me ta, me vëhë xi sua naja me yëjë ni xcusun xi ndajyihî tsajan. ¹⁸ Hacuaha tinoje cojo rë xuta nchina xi cuacun jan ne, yehe cjuandaja catisahmi me cojo ngayëjë ni xuta. Mijî rë xi choho me. ¹⁹ Xi cuatjîn sahmi me ne, tivetjo me cjuandaja xi sehe cumachjirëhë rë me, hacuaha sacú rë me cjuahñu xi cjuaquixi.

Cjua xi vijnetaha

²⁰ Ngaye Timoteo ne, chjehecuende cjua xi ha ntse siu. Xi cavetinrcuïn cjuavisiajmi yumahasen xi chuyiin rë Nina tsëhë. Hacuaha xi cavetinrcuïn yëjë ni cjua rë xuta xi hisca ngajñi rë me matanguaain cjua rë me, handasa chja me xi jemu vechu cjuatacun rë me xi vijnercu me cjua. ²¹ Peru me xi cuatjîn chja ne, ha cavetjuxin me tsëhë cjuachacun xi macjain naja.

Nina catisua nuju me ngayujun ni cjuandaja rë me.

Xujun xi majo xi catsihindu San Pablo cojo Timoteo

¹Ngahan Pablo ne, apóstol tséhë Cristu Jesús má ngahan ta, tséhë xi cuatjin meje rë Nina. Véhë xi catsingatju ná me, xi cuichjá cojo xuta ta sua naja me ngu cjuahñu ndajyihi, sa xi nihña tangun cjuatacun naja cojo Cristu Jesús. ²Ngaye Timoteo ne, tsihindu ri xujun vihi ta, tséhë xi sacuha quihndi ndaja naha ngaye. Nina Nahmi naja cojo Cristu Jesús Nai naja ne, catamayuma rë me ngaye, catisua ri me cjuandaja, cjuajeya.

Tisua me cjuaquixi tséhë Nina

³Nixtin nixten, hora xi sahme oración naha ne, jercu veyanangë ri, hacuaha suá nacuechji rë Nina. Hacuaha sahme xa rë Nina cojo ngu cjuatacun tyjahi, sacuahatjin casahmi xutachanga naha. ⁴Vitsjen ná hacutjin cachjihnde, ngatsë rë xi cavétju cëjé tsiji. Hacuaha jemu meje ná xi ndove tjengui ná, sehe ngahan ne, jemu ndaja cuma ná. ⁵Hacuaha vitsjen ná hacutjin xi jemu ndaja macjain ri cjuarë Nina, sacuha tjin xi titjun camacjain rë chicuhun riji, chicuhun Loida, cojo na Eunice naa riji. Hane fëmangúcacun xi cojo ngaye ne, ha cuatjin ndaja macjain ri.

⁶Véhë xi chjá cojo ri ta xi catiin cahndë xi cjuë cjuatacun xi casua ri Nina, hya xi cavétahantsa ri. ⁷Ta Nina ne, hacuiin casua naja me ngu cjuatacun xi ngayaan ne, cumacjintacun ta, casua naja me ngu cjuatacun xi sacú naja ngahñu, xi nihña hmu tacuun xingueen, hacuaha xi scaa naja cuetjoon yojo naja. ⁸Véhë xi hacuiin nihñi savá, hya xi cuinoje cjuandajyihi tséhë Nai naja. Hacuaha hacuiin nihñi savá ngatsë naha ngahan xi tejñaya ndavaya, ngatsë rë xi chjá cjuarë me. Hacuiin nihñi savá ta, nihñi ngahñu cojo yëjé ni cjuañihi xi cuátji cuma, ngatsë rë cjuandajyihi xi tinoje. Cuatjin nihñi hacutjin chutaha ngahñu xi tisua ri Nina. ⁹Nina ne, cavaxëtje naja me hacuaha cavaxijin naja me, xi cuma tséhë me ngayaan. Hacuiin ngatsë rë xi jemu ndaja canihña xi cuatjin casahmi me ta ngatsë rë xi cuatjin meje rë me, tséhë xi jemu ndaja me. Hisca xi chaja sa cuejña ngasunhndë ne, ha catsingatahacacun Nina xi sua naja me cjuandaja rë me, ngayejen ni xi tséhë Cristu Jesús ngayaan. ¹⁰Hane hya xi cafehe Cristu Jesús, me xi vaxëtje naja ne, hya camachaya jain naja cjuandaja rë Nina jan. Hane Cristu jan ne, catsicjé me ngahñu rë cjuaveya, hacuaha casuacuenda naja me ta sua naja Nina ngu cjuahñu ndajyihi, xi tsajin nu tsajin nixtin cueyan nga. Véhë cjuatacun xi vicuya naja cjuandajyihi rë me.

¹¹Nina ne, casua ná me xa xi suá cumachaya rë xuta hacuaha cuicuyá rë xuta cjuandajyihi rë me. ¹²Ngatsë rë xa véhë ne, jemu cjin cjuañihi tivátju jima. Peru ma savaain ná, tséhë xi ha hvë Cristu, hacuaha camangucácun cojo rë me. Hacuaha tjin ná cjuaquixi xi me véhë ne, jyë me cojo cjuatacun rë me xi cuetjo ná me, hisca nixtin xi cuinduva nga me nguehe ngasunhndë.

¹³Nihñi sacuha tjin cjuaquixi xi ha cachjá cojo ri. Hacuaha nguñajatacun catamacjain ri Nina, hacuaha nihñi hmutacuin xinguin, tséhë xi ngaye ne, ladu rë Cristu ngaye. ¹⁴Nihñicuende cjuaquixi xi casua ri Nina. Hane Hasen rë Nina xi tacun cahntsua xahasen naja ngayejen ni xi macjain naja me ne, Hasen véhë xi sua ri ngahñu xi cuatjin nihñi.

¹⁵ Ngaye ne ha hye xi ngayëjë ni xuta xi tsëhë ladu xi hmí rë Asia ne, casmicacun ná me. Ngajñi rë xuta xi cuacun jan ne, hinchajñi cha Figelo cojo cha Hermógenes. ¹⁶ Peru cha Onesíforo ne, catamayuma rë Nina yëjë ni ndava cha ta, tsëhë xi jemu cjin ndiya xi casahmi cha cjuandaja xi cavisecoo ná cha. Hane cama savaain rë cha xi tejñaya ndavaya. ¹⁷ Xi tu cafehe cha nguehe nandya Roma ne, cavetsihin cavanguise cha ngahan, hisca xi casacu rë cha ngahan. ¹⁸ Nai naja ne, catamayuma rë me cha, nixtin hya xi cuinduva nga me nguehe ngasunhdë. Ta ngaye ne, ha ndaja hye hacutjin xi jemu cavisecoo ná cha ngajan nandya Efeso.

2

Xuta xi ndaja sahmi me xa rë Cristu

¹ Peru ngaye tsan ne, catisua ri Cristu Jesús cjuandaja rë me, xi cuma cuinechin nguñajatacuin. ² Jemu cjin xuta xi hacuaha caviseñuju me yëjë ni cjua xi cachjá cojo ri. Peru quihndë ne, meje rë xi ticoye rë ngujo cha cjua jan, cha xi tsejen xi mangutacuin cojo rë hacuaha chutaha cjuatacuin rë, sehe cha xi cuacun jan ne, hacuaha cuicuya cha xuta xi yahnga.

³ Ngaye ne, nihñi ngahñu xi scaa ri cojo yëjë ni cjuañihi xi cuátji cuma ngatsë rë Cristu Jesús, sacuaha tjin caa rë ngu sindadu xcun ngu si. ⁴ Hane sindadu xi hinchajñi cha tsëhë xa xi yaha cha ne, cumaji tsinguissehenjñi cha tu mé ni xa ta, tjin rë cha xi sahmi cha hacutjin xi chuya rë me xi matitjun tsëhë cha. ⁵ Hacuaha ngu cha xi cuisehen xcun ngu juegu xi ntsavë cha ne, sa xi chohotjin ntsavë cha ne, sacuiin rë cha cjuatjo, handasa tjun cha cuetju cha. ⁶ Hacuaha cha xi sahmi xa nguñña ne, meje rë xi cha vëhë xi titjun satë rë cha tsëhë xitjë xi casahmi cha. ⁷ Ndaja ningatetacuin hacutjin cjua xi tichjá cojo ri. Sehe Nai naja ne, me vëhë sahmi me xi cuijnercui cjua vë.

⁸ Ninguitsjin xi Jesucristu ne, cavascaya rë me ngajñi rë nima, hacuaha canduva tjë rë me xutachanga naja David. Vëhë cjuandajyihí xi ngahan visiajme cojo xuta. ⁹ Hane ngatsë rë xi cuatjin visiajme cjuandajyihí jan ne, vëhë xi choho tivátju jima. Hisca quitahahñu rë xuta ngahan nguehe ndavaya, sacuaha tjin rë ngu xuta tsehen xi yehe jyë rë. Peru cjua rë Nina ne, hacuiin quitahahñu. ¹⁰ Vëhë xi ticaa ná ngayëjë ni cjuañihi xi tivátju jima, cojo sa xi yëjë ni xuta xi cavaxijin Nina ne, cuetjutje me ngatsë rë xi macjain rë me Cristu Jesús, hacuaha cuechu me xcun Nina ngajan cuiyuju me nu cjui nu nduva.

¹¹ Cjua vihi ne jemu cjuaquixi:
Sa xi ha macjain naja Cristu hya xi cueyan ne, hacuaha cuinechan quicun nga cojo rë me;

¹² sa xi ha cacaa naja ne, hacuaha cuisecoon rë me cuitexan.

Sa xi ha canújan xi hyaan yo me ne, hacuaha ni tjin cuichja me ta hvíin me yo ngayaan.

¹³ Handasa ngayaan ne, nihñacheen cjua naja, peru me vëhë ne, hatuxa sahmi chihin me cjua rë me ta,
tsëhë xi hatuxa vindachaain me.

Hacutjin xi Nina chuya rë me

¹⁴ Ninguitsjin rë xuta jan cjua xi chjá cojo ri. Hacuaha tinojetehe rë me xi ha quihndë scaain me cojo cjuavisiajmi rë me ta, tsëhë xi cuatjin meje rë Nina. Venguin camahani chji rë xi cuatjin ticjan me cojo cjua ta, xi cuatjin sahmi me ne, tu titsinguetsun me cjuatacuin rë xuta xi viseñuju.

¹⁵ Nihñi ngu jyë xi Nina ne, chuya rë me tsëhë xa xi tinihñi. Xi cuatjin ne,

tsajin mé nihñi sava ta, tsêhê xi ha chihin tivicoye rê xuta cjuaxi cjuaquixi. ¹⁶ Xi caninguisinjñi ngajñi rê cjuavisiajmi ngarca xi tsajin mé machjirêhê xi visiajmi xuta ta, me xi cuatjin visiajmi ne, quihndê nga nchujun ne, tijima yehe sa cjuatsehen xi tjin rê me. ¹⁷ Hacuaha cjuavisiajmi rê me xi cuacun jan ne, tangun cojo hiscan xi hmu, xi quihndê nga nchujun ne, tijima tojo sa. Cuatjin tivatju cha Himeneo cojo cha Fileto ta, ¹⁸ tsêhê xi ha cavetjuxin cha tsêhê ndiya rê cjuaquixi. Chja cha ta quixiin xi cuascaya naja hya xi ha caveyan. Hane cojo cjuaxi vêhê ne, titsinguetsun cha cjuatacun rê ngujo xuta xi macjain rê me Nina. ¹⁹ Peru Nina ne, cavejña me ngu cjuatacun xi hatuxa cjuaquixi, xi tsajin yo cuma tsinguetsun rê. Hacuaha jo cjuaxi rê Nina xi hatuxa cjuaquixi. Ngu ne, chja cuitjin: “Nai naja ne, vêhê me jarê xuta xi tsêhê me”; ngu nga ne, chja cuitjin: “Yêjê ni xuta xi chja me xi ladu rê Nai naja me ne, meje rê xi catiyujuxin me tsêhê cjuatsehen.”

²⁰ Ndava ngu xuta xi ndaja vatju me ne, jemu cjin xcusun trasti xi tjin. Tjin trasti xi tsêhê oro cojo xi tsêhê quicha. Hacuaha tjin xi tsêhê ya cojo xi tsêhê nihndê. Ngujo trasti jan ne, jemu machjirêhê. Hane ngujo nga ne, chuva machjirêhê. ²¹ Cuatjin naja ngayaan xuta ladu rê Cristu ta, jemu tecjanjñi ngayaan. Peru xi cuma yaan xuta xi vengui chji rê ne, meje rê xi cuiyujuxen yêjê ni cjuatsehen. Xi cuatjin ne, cuma tyjahi cjuatacun naja, cumachjirêhê rê Nai naja ngayaan, hacuaha tjin ndaja ngayaan xi nihña yêjê ni cjuandaja.

²² Yêjê ni cjuatacun tsehen xi meje rê xuta xi chihndê me ne, ngaye ne, tiyijixin. Tihin tjengui ndiya rê cjuaquixi. Catjê catamacjain ri. Tihin tjengui cjuahmutacun. Tihin tjengui cjuajeya, sacuaha tjin sahmi yêjê ni xuta xi cojo ngu cjuatacun tyjahi fehya rê me Nai naja xi cuisecoo rê me.

²³ Hya xi tivinenguise xicjin xuta tsêhê cjuaxi ngarca xi vengui chji rê ne, xi canihñicuendiin cjuaxi chja me. Tsêhê xi ha hye ta tsêhê cjuaxi vêhê ne, hatuxa cuetjucaa ngu si. ²⁴ Hane xuta xi sahmi xa rê Nai naja ne, mijî rê xi sircu me ta meje rê xi ndaja me cojo ngayêjê ni xuta. Meje rê xi quicun cacun me xi cuicuya me xuta. Meje rê xi yehe cacun me. ²⁵ Hacuaha xuta xi chuyiin rê me tsêhê cjuaquixi ne, meje rê xi cuma quixi me, peru cojo cjuandaja cojo cjuajeya. Xi cuatjin ne, cuma xi sua Nina cahndê xi cuindeya cjuatacun rê xuta xi cuacun jan, hacuaha xi cuijnercu jain me cjuaxi cjuaquixi. ²⁶ Sehe hacuaha sacú nga rê me cjuatacun ndajyihî, hacuaha cuetjutje me tsêhê xitsehen matitjun xi cavindacha rê me. Cavindacha xitsehen xuta jan, xi casahmi me yêjê ni hacutjin xi meje rê xitsehen jan.

3

Nixtin xi cuijnetaha

¹ Catijnercui cjuaxi vihi: hya xi cuma tiña nixtin xi cjuê ngasunhndê ne, jemu choho cuatju xuta cuma ta, ² tsêhê xi xuta ne, cuitjin sahmi me: meje rê me xi suvâ ni me ndajyihî cuatju me cuma; jercu sahmi me cojo tujún; jemu haxi me ta jercu cuichja me xi ndaja vatju me. Hacuaha jercu sahmi hngacacun me; choho cuichja me tsêhê xicjin me hacuaha choho cuichja me tsêhê Nina. Cuihndiin me tsêhê xutacha rê me. Hisca ngu nacuechji naja suaain me, hisca ngu nacuechji rê Nina suaain me. Cuendaain rê me tsêhê Nina; ³ tsajin rê me cjuahmutacun; tsajin rê me cjuayumatacun; cuichja me cjuandesu. Hacuain cuetjo me yojo rê me; jemu sahmi xcuahya me; chuyiin rê me tsêhê yêjê ni cjuandaja. ⁴ Jo xcun jo hntsua me ta, cuiteña xicjin me; jemu tujyê sahmi me; jemu sahmi yehe me yojo rê me. Chuyiin rê me tsêhê Nina ta cjuasua xi tsêhê ngasunhndê ne, vêhê jemu chuya rê me tsêhê. ⁵ Hacuaha

sahmi me xcusun rē xuta xi macjain jain rē Nina, peru tsitjungui me hacutjin xi cjuaquixi.

Xi caninguisinjñii cojo xuta xi cuacun vē ta, ⁶ tsēhē xi ngajñi rē me ne, hinchajñi cha xi vanguise chuya rē xi cuma cuisehen ndava xuta, hane cuindacha cha yachjin xi ha tsingatihin mandacha. Tsingatihin na mandacha na ta, tsēhē xi jemu va tjin cacun na tsēhē jyē rē na, xi tisahmi na yējē ni hacutjin xi xahasen rē na meje rē. ⁷ Hacuaha yachjin jan ne, jemu vutaya na yējē ni cjuatacun xatsē, peru hatuxa vijniircu na cjuaxi cjuaquixi. ⁸ Ha hye ta hatsēē nixtin ne, jo cha surqui xi hmí Janes cojo Jambres ne, casahmi cha condra xutachanga naja Moisés. Hacuaha ni tjin rē cha ndacha xi cuacun jan ne, sahmi cha condra cjuaxi cjuaquixi ta, cavetsun cjuatacun rē cha, hacuaha machjiriin cha xi cumacjain rē cha Nina. ⁹ Hane hacuiin jemu xcun cuma cjue cha cojo cjuaxi ndacha rē cha ta, tsēhē xi ngayējē ni xuta ne, cjuahacuenda me xcusun yumahasen xi cun cha, sacuatjin cama tsejen xcusun yumahasen xi cun cha surqui xi cuacun jan hatsēē nixtin.

Pablo ne, tsinguixi me Timoteo

¹⁰ Peru ngaye ne, jemu ndaja tichutaye cjuaxi vicuyá cojo xcusun xi sahme cojo cjuatacun xi tjēngē. Hacuaha jemu ndaja hye hacutjin xi fē macjain ná, hacutjin xi jyē cācun, hacutjin xi hmu cācun, cojo hacutjin xi ndaja ticaa ná. ¹¹ Hacuaha ndaja camachaya ri tsēhē yējē ni cjuañihi xi cavátju camá. Jercu choho cavátju camá ngajan nandya Antioquía cojo Iconio cojo Listra. Peru Nai naja ne, cavaxētje ná me tsēhē yējē ni cjuañihi xi cavátju camá jan. ¹² Hacuaha yējē ni xuta xi meje cjuaharcun me Nina ta tsēhē xi macjain rē me Cristu Jesús ne, hatuxa tjin xi cuatju me cjuañihi. ¹³ Peru xuta tsehen cojo xuta ndacha ne, quihndē nga nchujun ne, tichaja sa cjuatacun rē me, xi vindacha me yahnga xuta ne, hacuaha jima ndacha suvá me.

¹⁴ Ngaye ne, hacuiin cuejñixin cjuaxi cachutaye, cjuaxi café ma ngu tacuin cojo. Ha hye yo xi cavicuya ri ta, ¹⁵ tsēhē xi hisca cjuaquihndi riji ne, cachutaye xujun rē Nina. Hane xujun jan ne, vēhē sua machaya ri xi Nina ne, cuaxētje naja me, ngayaan xi macjain naja Cristu Jesús. ¹⁶ Nina ne, casua me cjuatacun rē me ngujo xuta, sehe xuta jan ne, catsihindu me xujun rē Nina. Vēhē xi xujun jan ne, jemu machjirēhē xi cuicuya naja, xi cuichjataha naja, xi tsinguixi naja, xi cuincha naja ndiya rē cjuaquixi, ¹⁷ cojo sa xi ngayaan xuta ladu rē Nina ne, cuechutaha cjuatacun naja xi cuma nihña yējē ni cjuandaja.

4

¹ Tivutsejen naja Nina. Hacuaha tivutsejen naja Cristu Jesús, me xi tsichuva naja ngayējē ni ngayaan xuta, sa xi quicun cuaha ngayaan, o sa xi caveyan. Tsēhē xi cuinduva nga me, hacuaha tsēhē xi cuítexa naja me ne, vēhē xi chjá cojo ri ta ² tinoje cjuaxi rē Nina cojo xuta. ¿Há chuya rē me? ¿há chuyiin rē me? peru tsimii sahmi rē, tinoje cojo rē me. Hacuaha tinojetehe rē me. Ninguixi me. Ticoxē rē me. Peru niyētacuin cojo rē me. ³ Cuatjin nihñi ta, tsēhē xi cuetjuaca nixtin xi xuta ne, ha quihndē chuyiin rē me tsēhē cjuaxi cjuaquixi. Sahmi me hacutjin xi meje rē me, hane cuihndē me tu mé ni cjuaxi cuicuya maestru xi yahnga ta, maestru xi cuacun jan ne, suvá cjuaxi chuya rē xuta ne, vēhē cuicuya me. ⁴ Cuatjin xi xuta ne, sahmi ngaxtun me cjuaxi cjuaquixi ne, tu cuentu xi machjiriin ne, vēhē cuetaha rcu me. ⁵ Peru ngaye ne, meje rē xi tacun cahndē cjuatacun riji ngajñi rē tu mé ni ngu cjuacjintacun. Hacuaha tehe tacuin tsēhē yējē ni cjuañihi. Tinoje cojo xuta cjuaxi rē Nina, nihñichihin xá xi casua ri me.

⁶ Ngahan ne, chuva sa nixtin xi cjuë ngahan. Ha cama tiña nixtin xi cueya. ⁷ Ndaja casahme xa, casahmechehen xa xi casua ná Nina. Hacuaha ndaja macjain cuaha ná Nina. ⁸ Vêhê xi ha tjin ndaja cjuatjo xi sacú ná, tsêhê xi tyjahi cjuatacun naha. Nai naja, me xi tsichuva naja cojo cjuaquixi ne, me vêhê xi sua ná me cjuatjo jan hya xi cuechutaha nixtin. Hacuaha hacuiin tu suva ni ngahan xi sua ná me ta cojo ngayêjê ni xuta xi jemu meje rê me xi cuya nga Nai naja.

Pablo ne, fehya me ngu cjuandaja

⁹ Nihñi xati tacuin ndove tjengui ná ta, ¹⁰ tsêhê xi cha Demas ne, cavetjuxin cha tsahan, quiji cha ngajan nandya Tesalónica. Cuatjin casahmi cha ta, tsêhê xi hitsê sa chuya rê cha tsêhê xcusun rê ngasunhdê. Cha Crescente ne, quiji cha ladu tsêhê Galacia. Hane cha Tito ne, quiji cha ladu tsêhê Dalmacia. ¹¹ Hane suvá ni cha Lucas quitaha cha cojo ná. Noje cojo cha Marcos ne, sehe ndove cojo cha ta, tsêhê xi jemu machjirêhê cha xi cuisecoo ná cha tsêhê xa xi sahme. ¹² Cha Tíquico ne, catsingátju cha ngajan nandya Efeso. ¹³ Hya xi cuindove ne, ndovecueje tsjian tsangá naha xi cavejñá ndava cha Carpo, ngajan nandya Troas. Hacuaha cojo xujun naha, hacuaha cojo yêjê ni sa xujun naha ne, ndovecueje.

¹⁴ Cha Alejandro chjine quicha ne, jemu choho casahmi cha cojo ná. Peru Nai naja ne, sehe sahmingojo me cojo rê cha, chuva rê jyê xi tjin rê cha. ¹⁵ Hane ngaye ne, tjin ri cuidadu tsêhê cha ta, tsêhê xi jemu casahmi cha condra cjua rê Nina xi canújin.

¹⁶ Hya xi tjun tjun casuá cjuaquixi naha xcun xutaxa rê ne, tsajin yo cavisecoo ná. Yêjê ni amigu naha ne, cavetjuxin me tsahan. Hane catit-sijyêcacun Nina cojo me xi cuacun cavetjuxin tsahan jan. ¹⁷ Peru Nina ne, cavisecoo ná me, casua ná me ngahñu, xi cama cachjá cjua rê me cojo yêjê ni xuta xi hacuiin tsêhê nación tsêhê Israel. Hacuaha Nina ne, cavaxêtje ná me tsêhê xuta xi meje tsiquehen ná. ¹⁸ Hacuaha cuaxêtje ná Nai naja tsêhê ngayêjê ni cjuatsehen, sehe cjuahatsja ná me ngajan ngahnga hiscan xi vitexa me. Me vêhê xi hatuxa jyê me, hatuxa hñu me yêjê ni nixtin. Cuatjin jain.

Tsinguijnetaha me cjua

¹⁹ Cha Aquila cojo chjuun rê cha, na Prisca ne, tehe rê me ngu nina naha. Hacuaha cojo xuta rê cha Onesíforo ne, tehe rê me ngu nina naha. ²⁰ Cha Erasto ne, casetaha cha nandya Corinto. Hane cha Trófimo ne, tsêhê xi hmu rê cha ne, cafaña cha ngajan nandya Mileto. ²¹ Nihñi xati tacuin, ndove tjengui ná quihndê xi chaja sa chan hnchan. Cha Eubulo ne, cha Pudente ne, cha Lino ne, na Claudia ne, cojo ngayêjê ni xuta xi macjain rê cjua rê Cristu Jesús ne, tsingatju me nina riji.

²² Nai naja yaha ri me. Nina catisua nuju me cjuandaja rê me ngayujun ni.

Carta xi catsingatju San Pablo xi cafahtsja Tito

¹ Ngahan Pablo, sacuaaha ngu mosu hndixahan tsêhê Nina ngahan, hacuaaha apóstol tsêhê Jesucristu ngahan.

Jesucristu casuaxa me ngahan xi cuisécocoo rê xuta xi cavaxijinjnî Nina, cojo sa xi cumacjain rê me tsêhê Jesucristu, hacuaaha cojo tsêhê xi cumachaya rê me cjuaquixi rê Nina hane ndaja tsejen xi má me tsêhê Nina. ² Jercu vetahan tacun xi sacú naja cjuahñu xatsê, tsêhê xi cuatjin cachja Nina hisca hya xi chaja sa cuma ngasunhdê. Hacuaaha Nina ne, vindachaaïn me cojo cjuarê me. ³ Quihndê ne, jercu nixtin rê xi casua me camachaya naja tsêhê cjuarê me. Ngahan ne, casatêxa ná xi suá cumachaya rê xuta tsêhê cjuarê vêhê, tsêhê xi Nina xi vaxêtje naja ne, cuatjin cavitexa me.

⁴ Tito, tsihindu ri carta vihi, ngaye xi sacuaaha quihndi naha ngaye, tsêhê xi tangun mangutacun cojo Jesucristu. Nina Nahmi naja cojo Jesucristu xi vaxêtje naja ne, catisua ri me cjuandaja cjuajeya.

Xa xi sahmi Tito ngajan distritu Creta

⁵ Cavejñá ri hiscan distritu Creta, cojo sa xi ngaye nihñichihin yêjê xi caviyujú vasen, hacuaaha cojo sa xi tehe xa ngu jo xuta xi cumatitjun me tsêhê yungun tsêhê jima ngu nandya sacuahatjin cavitêxa ri. ⁶ Xuta xi cuatjin tehe xa rê me ne, meje rê xi jercu tyjahi xahasen rê me, hacuaaha ngu ni chjuun rê xingu xingu me. Hacuaaha meje rê xi quihndi rê me ne, ladu rê Jesucristu me, hacuaaha xi tsajin cjuarê me xi choho sahmi me o sa xi vihndiin me. ⁷ Cuatjin meje rê, tsêhê xi xuta xi matitjun me sacuaaha obispo ngajñi rê xuta rê yungun ne, me vêhê fahacuenda me tsêhê ngu tsé ngu xtí tsêhê Nina. Vêhê xi meje rê xi jercu tyjahi xahasen rê me. Mijí rê xi xta me, mijí rê xi ngutjen ma xtí rê me, mijí rê xi cha chihi me, mijí rê xi hngacacun me, mijí rê xi jercu vetahacacun me tujún xi sacú rê me ngajñi rê ngu cjuandacha cojo xicjin me. ⁸ Xi meje rê ne, xuta xi cumatitjun me jan ne, tjin rê me cjuandaja cojo xuta hinchá ndiya, hatuxa sahmi me cjuandaja, yehe cacun me, tsajin jyê rê me, hacuaaha jiya me ndiya rê Nina, hacuaaha jercu yehe xahasen rê me. ⁹ Hacuaaha meje rê xi cuetaha me yojo rê me tsêhê cjuarê xi cjuaquixi xi ha camá rê me, cojo sa xi cuma cueya me xahasen rê xingu xingu sa xuta cjuachacun xi cjuaquixi, hacuaaha cojo sa xi cuma sahmi me xi cuijnecacun xuta xi chjataha me tsêhê cjuachacun vêhê.

¹⁰ Meje rê xi xuta xi cuacun vê ne, tsêhê xi jercu tjin xuta xi vihndiin me tsêhê xutaxa rê yungun ne, jercu tjin xuta xi tujyê visiajmi me, jercu tjin xuta xi vindacha. Hatuxa ngajñi rê xuta tjê rê Israel xi cavisehen ladu tsêhê Jesucristu ne, jercu tjin xuta xi cuacun vê. ¹¹ Sahmi ngujoyê xi nihña xi hindê cuichjaïn me, tsêhê xi tsinguetsun me cjuatacun rê xuta tsêhê yêjê ngu ndihya. Cuatjin sahmi me hya xi vicuya me ngu cjuarê xi hisca mijí rê xi cuatjin cuicuya me. Hane cuatjin sahmi me, cojo sa xi sacú rê me tujún ngajñi rê ngu cjuandacha.

¹² Ngu profeta tsêhê distritu Creta ne, ha súvá me vêhê xi cachja me tsêhê xuta rê nangui rê me cuijtin: Yêjê ni xuta Creta ne, hatuxa ndacha me, jercu chu me, jercu vatjutaha jinê me, hacuaaha jercu tsêhê me. Cuatjin cachja me. ¹³ Hane jercu quixi xi cachja me. Vêhê xi hñu nojetehe rê me, cojo sa xi ndaja cumacjain rê me cjuachacun, ¹⁴ hacuaaha cojo sa xi cuetaharcuaïn me tsêhê

cuentu tséhë xuta tjë rë Israel o sa xi cjua xi vitéxa xuta xi tsindeya me cojo cjuandacha cjua xi cjuaquixi.

¹⁵ Me xi tyjahi cjuatacun rë ne, tsajin mé xi tsavi xi cuma rë me. Peru me xi macjaain rë cjuachacun ne, tsajin mé xi tsaviin xi cuma rë me ta hisca cjuatacun cojo xahasen rë me ne, ha camachocun. ¹⁶ Chja me xi vëë me Nina, jercu yëjë ni xi sahmi me ne, tsingacun me xi quixiin. Xuta xi cuatjin cun ne, sahmi xi choho vëë Nina me. Hatuxa vihndiin me, hane machjiriin me xi sahmi me cjuandaja.

2

Cjuachacun xi cjuaquixi

¹ Cjua xi noje ne, meje rë xi matangun cojo cjuachacun xi cjuaquixi.

² Tinoje cojo yëjë ni xihin changá, hacuiin tsingatjutaha me xi cuihi me o sa xi sinë me, hacuaha meje rë xi cuma chjahárcun rë me, meje rë xi yehe cacun me. Meje rë xi ndaja cumangucacun me cojo Nina, hacuaha ndaja tjín rë me cjuahmutacun, hacuaha ndaja scaa rë me tu mé ni cjuacjintacun.

³ Hacuanitjin ni tinoje cojo yëjë ni yachjin changá ne, meje rë xi jeya me, hacuaha mijí rë xi ndesu me, hacuaha mijí rë xi cuetaha me yojo rë me vinu. Meje rë xi cuicuya me yëjë ni xi ndaja. ⁴ Meje rë xi cuicuya me yëjë yachjin xi hitsë ni chuva nu rë ta meje rë xi tsihmucacun me xihin rë me cojo quihndi rë me, ⁵ hacuaha xi yehe cacun me, tyjahi xahasen rë me, hacuaha xi ndaja cjuahacuenda me cahntsua ndava me, hacuaha xi ndaja me, hacuaha xi cuihndë me tséhë xihin rë me. Cuatjin meje rë xi cuicuya na me, cojo sa xi tsajin yo choho cuichja tséhë cjua rë Nina.

⁶ Hacuaha ni tjín ni tinoje cojo yëjë ni xuta xi xihin xi hitsë ni chúva nu rë ta hacuaha meje rë xi yehe cacun me. ⁷ Hacuaha ngaye sove tejñi ntsacu tséhë cjuandaja. Hane hya xi cuicoye ne, meje rë xi jercu tyjahi cjuatacun riji, hacuiin xcuehyu cuinoje ta ⁸ súváj cju xi ndaja, xi tsajin yo cuma cuichjataha tséhë. Cuatjin meje rë, cojo sa xi xuta condra riji ne, cuma sava rë me, tséhë xi tsajin mé xi choho cuichja me tsajan.

⁹ Tinoje cojo mosu hndixahan ne, meje rë xi cuihndë me tséhë yëjë cjua xi cuichja nai rë me. Meje rë xi ndaja me, hacuiin choho cjuayangui me tséhë nai rë me. ¹⁰ Mijí rë xi tsichëjë me ta meje rë xi tsingacun me xi cuma cumangucacun cojo rë me. Cuatjin meje rë xi sahmi me, cojo sa xi yëjë xuta ne, cumachaya rë me xi jercu ndajyihí cjuachacun rë Nina, me xi vaxëtje naja.

¹¹ Nina ne, catsingacun me cjuandaja rë me, hane cjuandaja vë ne, hacui xi cuaxëtje naja ngayejen ni xuta. ¹² Hacuaha cjuandaja vëhë ne, vicuya naja xi meje rë xi cuejñaxen yëjë ni cjuatsehen cojo yëjë ni xcusun tséhë ngasunhndë xi meje naja, hacuaha vicuya naja xi meje rë xi tyjahi cjuatacun naja, meje rë xi tsajin jyë naja, meje rë xi nechanyan ndiya rë Nina xi tivanguen cojo ngasunhndë naja. ¹³ Meje rë xi cuatjin nihña nguyëjë rë xi nechanyan rë nixtin ndajyihí xi jercu vetahantacun, nixtin xi cuetjucaatsejen cjuahasen ndajyihí rë Nina naja Jesucristu, me xi cuaxëtje naja, me xi jercu jyë hnga me cojo hasen rë me. ¹⁴ Me vëhë ne, casua me yojo rë me xi cueya me ngatsë naja, cojo sa xi cuaxëtje naja me tséhë yëjë ni cjuatsehen, hacuaha tsityjahi me ngayaan ne, sehe sahmi tséhë me ngayaan, hane ngayaan ne, jercu meje nihña cjuandaja.

¹⁵ Tinoje yëjë cjua vëhë. Tinche ndiya xuta hacuaha tinojetehe rë me nguñajatacuin. Catiin cahndë xi yo sahmi chúva ri cojo cjuatacun riji.

3

Yějě ni xcusun xi meje rě xi sahmi xuta ladu rě Jesucristu

¹ Ninguitsjin rě yějě xuta ladu rě Jesucristu xi meje rě xi cuihndě me tsěhě xutaxa rě xi vitexa, hacuaha meje rě xi yějě ni nixtin ne, tjín ngu cacun me xi sahmi me cjuandaja. ² Tinoje cojo rě me ta mijí rě xi choho cuichja me tsěhě hisca ngu xuta. Meje rě xi hacuiin hngacacun me ta xi meje rě ne, jeya me, hacuaha ndaja me cojo xcusun rě me cojo yějě ni xuta. ³ Cuatjin noje cojo rě me, tsěhě xi ngayaan ne, hacuaha jemu chúva ningatahantacun hatsěě, hacuaha cavinuhyaan tsěhě Nina, hacuaha cavinechayaan ngu ndiya xi hacuiin hacui. Caninguissehen rcun cojo yějě ni xcusun cjuasua. Cavinechayaan ngu ndiya rě cjuatsehen, ngu ndiya rě cjuaxin. Xuta ne, choho cavěě me ngayaan, hacuaha choho cahyan xingueen xingu xingu ngayaan. ⁴ Peru Nina, me xi vaxětje naja ne, hya xi catsingacun me cjuandaja rě me cojo cjuahmutacun xi tjín rě me xi cuma rě yějě ni xuta ngasunhndě ne, ⁵ cavaxětje me ngayaan. Hacuiin tsěhě xi jercu ndaja canihña ta tsěhě xi yuma camá rě me ngayaan xi cavaxětje me ngayaan. Cuatjin cavaxětje me ngayaan hya xi casahmi me xi cavuya catsin ngayaan hya xi catsityahi me ngayaan. Hacuaha cuatjin cavaxětje me ngayaan hya xi casua naja me cjuahña xatsě hya xi casua me ngayaan Hasen rě me. ⁶ Hane ngatsě rě cjuandaja xi casahmi Jesucristu, me xi vaxětje naja ne, vėhě xi cuatjin jemu casua Nina ngayaan Hasen rě me, ⁷ cojo sa xi cjuě jyě naja ngatsě rě cjuandaja rě Jesucristu, hacuaha chjahanntsán cjuahña xatsě xi jercu vetahan tacun.

⁸ Yějě ni cjuá xi cachjá cojo ri vėhě ne, jemu cjuaquixi. Hacuaha meje ná xi cuinoje yasen yasen ni yějě cjuá vėhě cojo xuta xi camangucacun me cojo Nina, cojo sa xi me xi cuacun jan ne, sahmi me ngahña xi sahmi me suvá cjuandaja. Yějě ni cjuá vėhě ne, jercu ndaja hacuaha jercu machjirėhě rě xuta. ⁹ Xín tejñi yějě ni cjuavisiajmi xi hacuiin machjirėhě; xín tejñi cjuavisiajmi tsěhě ñihi rě yějě xutachanga rě xingu xingu me; xín tejñi yějě ni cjuavisiajmi tsěhě xuta xi cjan cojo xicjin; xín tejñi yějě ni cjuavixcan tsěhě ley rě Moisés. Yějě ni cjuavisiajmi vėhě ne, machjiriin hacuaha tu mahya cuisiajme. ¹⁰ Ngu xuta xi vaxě me ngu ngu xuta tsěhě ngajñi rě xuta yungun xi cjué ladu rě me ne, tinojetehe rě me ngu ndiya o hisca jo ndiya. Xi cjuě vėhě ne, hindě xicachasiin tsěhě me, ¹¹ tsěhě xi ngaye ne, ha hye xi ngu xuta xi cuatjin sahmi ne, jiya me ngu ndiya xi xín cjui, hacuaha sahmi me cjuatsehen. Hane cjuatsehen rě me jan ne, vėhě tsingacun xi cuaintjin xi sahmi me.

Cjuacjintacun tsěhě suvá Pablo cojo Tito

¹² Hya xi tsingátju Artemas o sa Tíquico xi cjuetjengui ri ne, nihñi ngu jyě xi cuindove tjengui ná ngajan Nicópolis, tsěhě xi tuxa ngajan cavejñángucácun xi tsingátju chan hnchan. ¹³ Tisecuee rě Zenas, me xi abogado me, cojo Apolos ne, catjindujú me cojo ndiya rě me, hane chjehecuende xi tsajin mé tsichaja rě me ndiya. ¹⁴ Hacuaha meje rě xi xuta naja ne, cuma rě me hacutjin sahmi me cjuandaja, cojo sa xi cuisecoo me ngajñi rě ngu cjuachaja xi jercu sahmi ngu jyě. Meje rě xi cuengui chjí rě me cojo ngasunhndě rě me.

Pablo ne, tisua me ngu nina

¹⁵ Yějě ni me xi siutahá cojo ná ne, tsingatju me ngu nina riji. Hacuaha tehe rě xuta xi hmucacun me ngayaan ngatsě rě xi tjín tangun cjuatacun naja cojo Jesucristu ngu nina.

Nina ne, catisua nuju me cjuandaja ngayujun ni. Cuatjin jain.

Carta xi Catsingatju San Pablo tséhë Filemón

¹ Ngahan Pablo, xi tejjāya ndavaya ngatsë rë xi sahme xa rë Jesucristu ne, tsihindu cojo Timoteo xingueen xujun vihi xi ningatjin nuju ngayun Filemón, ngayun xi jemu hmutacuin nuju, ngayun xi visecun niiji xcun xa xi nechantahan. ² Hacuaha ningatjin nuju xujun vihi ngayun Apia, ngayun xi hacuaha xinguin nuju, cojo ngayun Arquipo, ngayun xi tangun canihña cojo nuju ngahñu ngatsë rë cjua rë Nina, cojo ngayujun sa xuta ladu rë Nina xi ma tangun ngayun ngajan ndava me vëhë. ³ Nina Nahmi naja cojo Nai naja Jesucristu ne, catisua nuju me cjuandaja cjuajeya.

Vaxëndaja Pablo Filemón

⁴ Ngayun Filemón, hya xi veyanangë nuju ngajñi rë oración naha xi tisahme ne, nchunchujun ni ne, suá nacuechji rë Nina naha ta, ⁵ tséhë xi tivechutaha ná cjua xi jemu tjin nuju cjuahmutacun cojo yëjë xuta ladu rë Nina hacuaha jemu tjin ngu tacún cojo Nai naja Jesús. ⁶ Hacuaha féhya rë Nina xi ngayun xi mangutacun cojo Nai naja sacuatjin niiji ngayin ne, catuxaha sa me cjuatacun nuju xi cuijnercun yëjë ni cjuandaja xi tjin naja ngatsë rë xi tjin tangun cjuatacun naja cojo Jesucristu. ⁷ Jemu ndama ná, tai, hacuaha jemu sacu ná cjuetacun ngatsë rë cjuahmutacun xi tjin nuju ta, tséhë xi ngatsë nuju ne, casacu rë xahasen rë xuta ladu rë Nina cjuetacun.

Pablo fehya rë Filemón cjuandaja xi cuma rë Onésimo

⁸ Vëhë xi handasa tsacjun xi cuitéxa nuju mé xi ndatjin nihñu tséhë xi tjin tangun cjuatacun naha cojo Jesucristu ne, ⁹ peru hitsë sa chuya ná xi cjuéhya nuju tséhë xi ngajñi naja ne, jiya vasen xi hmí cjuahmutacun. Ngahan, Pablo ne, jemu changá ngahan hacuaha tejjāya ndavaya quihndë ngatsë rë xi sahme xa rë Jesucristu ne, ¹⁰ tiféhya nuju ngu cjuandaja xi cuma rë cha Onésimo, cha xi sacuaha quihndi naha tséhë xi camá cafaha cha cjuandajyihí xi chja tséhë Jesucristu xi casuá rë cha nguehe ndavaya.

¹¹ Handasa camachjiriin nuju cha mosu hndixahan nuju cha Onésimo hatsëë nixtin jan ne, peru quihndë ne, hisca ngayun hisca ngahan ne, jemu machjirëhë naja cha. ¹² Quihndë ne, titsingátju nga nuju cha, hane meje ná xi chjuhunntsun cha sacuaha xi ngahan suva xi chjuhunntsun ná. ¹³ Hacuaha meje ná xi cuejña cha cojo ná, cojo sa xi cjuahacuenda ná cha ngojo nuju jin-guyëjë rë xi tejjāya ndavaya ngatsë rë cjuandajyihí xi chja tséhë Jesucristu. ¹⁴ Peru mijí sahme tu mé ni hya xi chaja sa cuinújun mé xi ndatjin xi sahme. Cuatjin ta, tséhë xi meje ná xi cjuandaja xi nihñu ne, hacuiin cojo cjuachan ta suvá cojo cjuasua nuju. ¹⁵ Cavetjuxin rë xuma quihndi tsujun ngujo nixtin cojo sa xi quihndë xi cuya cha ne, cuejñacahndë nga cha cojo nuju yëjë ni nu yëjë ni nixtin. ¹⁶ Peru ha quihndë hacuiin sacuaha ngu mosu hndixahan nuju cha xi cuejña cha cojo nuju ta sacuaha ngu xuta xi jemu vengui sa chji rë me, sacuaha ngu xingun xi jercu hmutacún. Ngahan ne, jercu hmú cacún cha, hacuaha ngayun ne, hitsë sa ndaja hmutacún cha, hacuiin suvá sacuaha ngu xuta ni ta sacuaha ngu xuta ladu rë Nai naja.

¹⁷ Quihndë ne, ngayun Filemón ne, ngatsë rë xi ha hyun ta ngayaan ne, tangun ni mangutacun cojo Jesucristu ne, vëhë xi quihndë ne, chjuhunntsun cha sacuaha xi chjuhunntsun ná ngahan. ¹⁸ Hane sa xi mé choho casahmi cha cojo nuju, o sa xi quitjen cha tsujun ne, vëhë ne, tejjñu ladu naha.

¹⁹ Ngahan Pablo ne, cojo letra naha suva titsihindu cjua vihi; ngahan cuejñangojo vëhë. Mijí tsinguitsjén nuju xi ngayun ne, jemu quitjun camahani tsahan, tsëhë xi casuá camachaya nuju cjuandajyihí xi chja tsëhë Jesucristu.

²⁰ Quihndë tai ne, tiseacun ná hitsë ta ngayaan ne, tjín tangun cjuatacun naja cojo Nai naja; tuhun hitsë cjuetacun xahasen naha ta ngayaan ne, tjín tangun cjuatacun naja cojo Jesucristu.

²¹ Cuitjin tsihindu nuju ta, tsëhë xi tjín ngu cáacun cojo nuju ta cuinuhyun tsahan, hacuaha hvë ta hisca quisun sa nihñu tsëhë cjua xi chjá cojo nuju.

²² Hacuaha tuhunndujun ngu cahndë hiscan xi cuitejña ta, ngahan ne, vetahácacun xi Nina ne, sua me cahndë cjuëjtjengë nga nuju ngatsë rë xi cuatjin chjahyun rë me.

Tsingujnetaha Pablo cjua

²³ Epafra, me xi hacuaha jiya ndavaya cojo ná ngatsë rë xi sahmi me xa rë Jesucristu ne, hacuaha tsingatju me ngu nina tsujun ngayun Filemón.

²⁴ Hacuanitjin ni Marcos, Aristarco, Demas, cojo Lucas, me xi cuacun tangun sahmi xa cojo ná ne, hacuaha tsingatju me ngu nina tsujun.

²⁵ Catisehen cjuandaja rë Nai naja Jesucristu cahntsua xahasen nuju ngayujun ni. Cuatjin jain.

Xujun xi camahindu xi cjuahatsja xuta xi visiajmi Hebreo

¹ Nixtin titjun ne, jemu cjin ndiya hacuaha jemu cjin chuva rë xi casua Nina camachaya rë xutachanga naja ngu cjuahya xi catsingatju me cjuahya cojo profeta rë me. ² Peru quihndë nixtin vihi ne, casua me camachaya naja hya xi catsingatju me cjuahya cojo Quihndi rë me. Hane me vëhë xi cachja Nina xi cuma Nai rë yëjë ni xcusun xi tjin ngasunhdë, hacuaha casuaxa Nina Quihndi rë me jan xi me vëhë casahmi me ngasunhdë. ³ Hacuaha sacuatjin jemu jyë hnga Nina cojo hasen ndajyih rë me ne, cuatjin jyë hnga Quihndi rë me cojo hasen rë. Hacuaha sacujyih suvá Nina ne, cuajyih camahani Quihndi rë me. Hacuaha Quihndi rë Nina jan ne, yahangui me yëjë ni xcusun xi tjin ngasunhdë cojo cjuahya rë me xi jemu hñu ngahñu rë. Hane xi café catsityjahi me xuta tsëhë jyë rë ne, sehe quiji me ngahnga, cavejña me taha ladu quixi tsëhë Nina.

Hitsë sa matitjun Quihndi rë Nina xi cumá rë yëjë ni ángel

⁴ Hacuaha tu tjin xi hitsë sa jemu ndajyih xa xi casacu rë Quihndi rë Nina xi cumá rë xa xi casacu rë ángel ne, hacuanitjin ni cavechutaha me xi hitsë sa jemu camatitjun me tsëhë ángel xi cuacun jan, hya xi quiji cavejña me cojo Nina. ⁵ Hisca xi ngu ángel ne, cachjaain Nina cojo cjuahya vihi, sacuatjin cachja me cojo Quihndi rë me:

Ngaye xi quihndi naha ngaye;
hacuaha quihndë casuaxa ri.

Cuatjin cachja me. Hacuaha cachjaain me tsëhë ngu ángel cuitjin:

Ngahan cumá ngahan nahmi rë cha,
hane cha vëhë ne, cumá cha quihndi naha.

Cachjaain me cuatjin cojo ángel. ⁶ Hane ngu ndiya nga, hya xi tsingatju me Quihndi ngu rë me ngasunhdë ne, cuitjin chja me tsëhë Quihndi rë me:

Yëjë ni ángel naha ne, catjaharcun rë me.

Cuatjin cachja me. ⁷ Hane xi tsëhë ángel rë me ne, cuitjin chja me:

Ngahan sahme xi ángel naha ne, tangun xcusun rë cojo tjo,
hane ángel xi fahacuenda xa naha ne, sahme xi tangun xcusun rë cojo ndihi.

Cuatjin cachja me. ⁸ Peru xi tsëhë Quihndi rë me ne, cuitjin chja me:

Ngayun Nina, tsajin nu tsajin nixtin cuijnetaha gobiernu nuju,
hacuaha gobiernu xi nihñu ne, hatuxa cjuaquixi.

⁹ Canihmutacun cjuaquixi hane choho cahyun cjuatsehen;

hane vëhë xi ngahan Nina nuju ne, cavaxen nuju,

hacuaha hitsë sa jyë cjuasua casuá nuju ngayun
xi cuma rë xingun.

Cuatjin cachja me. ¹⁰ Hacuaha chja nga me cuitjin:

Ngayun, Nai naha, ntsacu cavetsihin ne, ngayun canindujun nangui;
hacuanitjin ni ngahnga, hacuaha ngayun canindujun.

¹¹ Yëjë xcusun vëhë ne, cuechu nixtin xi cjuë,

peru ngayun ne, tsajin nu tsajin nixtin xi cjuë ngayun.

Hacuaha yëjë xcusun vëhë ne, cuma changá sacuatjin rë ngu tsjian xi chajá
rë;

¹² hacuaha cuechu nixtin xi nijeyun xcusun xi cuacun vë sacuaha ngu tsjian
tsjanga,

hacuaha nindeyun sacuaha vindeya ngu tsjian xi chajá rë.

Peru ngayun ne, hatuxa vindeyaain ngayun;

hacuaha nixtin nuju ne, hatuxa cuijnitaain.

Cuatjin cachja me. ¹³ Hacuaha hisca ngu ángel ne, cachjaain Nina cojo rë cjuavihi, sacuatjin cachja me cojo Quihndi rë me:

Tinechin nguehe ladu quixi naha,

hisca hya xi yëjë ni xi sahmi ri condra ne, cuiyujú ngahan ngahma gobiernu riji.

¹⁴ Sacuaha ángel ne hacui hasen xi tsujiyihya tixa tsëhë Nina. Nina tsingatju me ángel xi cuacun vë xi fehe visecoo naja ngayaan xi cuetjuntjen tsëhë jyë naja.

2

Mijí rë xi chasen cjuandajyihí xi chja hacutjin cuetjuntjen

¹ Vëhë xi meje rë xi hitsë sa ndaja cuetahanrcun cjuandajyihí xi cavisifñuju, cojo sa xi hacuiin tu hitsë tu hitsë ne, cuetjuntjen tsëhë ndiya ndajyihí xi tivanguen. ² Ta sacuaha ley rë Nina xi cachja ángel hatsë nixtin ne, tjin jain rë ngahñu. Hane yëjë xuta xi casahmi cjuatsehen hacuaha cahndiin me tsëhë ley jan ne, camá me castigu sacuatjin xi mameje rë jyë rë me.

³ Hacuaha ngayaan ne, cumaji cuatjuhnga ngayaan tsëhë castigu xi satë naja, sa xi chasen cjuandajyihí xi jercu tu ndajyihí camahani xi chja hacutjin cuetjuntjen. Cjuandajyihí vëhë ne, titjun Nai naja cachja me, hane xuta xi cahndë me cjuar rë Nai naja ne, hacuanitjin ni cachja me cojo naja xi camá ngascan. ⁴ Hacuaha Nina ne, cojo jemu cjín cjuarcun xi ña quijircun naja hisca carcun cachutsejen ne, casua me camachaya naja xi cjuandajyihí vëhë ne, cjuaquixi jain. Hacuaha hya xi casua naja Nina Hasen rë me sacuatjin cavejñangucacun me ne, cuatjin xi casua me camachaya naja xi cjuandajyihí vëhë ne, cjuaquixi jain.

Hacutjin vaxëte naja cjuaveya rë Jesús

⁵ Nina ne, cachjaain me xi ngahma gobiernu rë ángel cuejña ngasunhdë, hya xi cuinduva me sahmi me gobiernu ngasunhdë xi tinújan tsëhë vi. ⁶ Tjin ngu cahndë tsëhë xujun rë Nina xi cachja ngu xuta cojo Nina cuitjin:

¿Mé vengui chjí niji ngayin xuta, xi cuatjin ninguitsjun niji?

¿Mé vengui chji niji xi cuatjin chjuhuncuendun niji?

⁷ Ngayun ne, ngujo nixtin ne, hitsë sa caninguijnu niji xi cuma rë ángel, peru canihñu yehe canihñu hnga niji cojo cjuatacun niji hacuaha canihñu xi chjihinjendin;

⁸ yëjë ni xcusun xi tjin ngasunhdë ne, caviyujun ngahma gobiernu niji ngayin xuta.

Cuatjin cachja ngu xuta cojo Nina. Hya xi cuatjin caviyuju Nina yëjë xcusun xi cuacun vë ngahma gobiernu rë xuta ne, yëjë ni caviyuju me, hisca ngu xcusun catsicanguiin me. Peru hisca quihndë ne, cjëë chan xi yëjë xcusun xi cuacun vë ne, cuiyuju ngahma gobiernu rë xuta. ⁹ Peru xi hyan ne, Jesús, xi ngu jo nixtin ne, hitsë sa catsinguijne Nina me xi cumá rë ángel, peru quihndë ne, casahmi jyë casahmi hnga Nina me cojo hasen rë me hacuaha casahmi me xi Jesús ne, cjuahájenda me. Cuatjin casahmi Nina cojo rë me tsëhë xi jemu jyë cjuañihi cavatju me hya xi cahme me. Cuatjin camá cojo sa xi cojo cjuandaja rë Nina ne, Jesús cueya me ngatsë rë yëjë ni xuta.

¹⁰ Nina ne, casahmi me yějě ni xcusun xi tjin, tsěhě xi cuatjin chuya rě me. Hacuaha meje rě me xi jemu cjin quihndi rě me xi cuma yehe cuma hnga cojo cjuatacun rě. Věhě xi ndatjin xi sahmi Nina xi ngajñi rě cjuañihi xi cavatju Jesús, me xi vaxětje naja ne, cuechutaha me yějě ni hacutjin xi meje rě Nina xi cuechutaha me. ¹¹ Me xi tiviyujuxin rě xuta xi cumá tsěhě Nina me cojo yějě ni xuta xi tiviyujuxin ne, ngu ni nahmi rě me. Hane věhě xi me xi Quihndi rě Nina ne, ma savaain rě me xi chja me xi xicjin me xuta xi cuacun jan, ¹² sacuatjin chja me xcun xujun rě Nina xi chja me cuitjin: Suá cumachaya rě yějě xinguen yo ngayun, hacuaha cuaxëndaja nuju sě tsujun ngajñi rě me hiscan xi matangun me. Cuatjin cachja Quihndi rě Nina. ¹³ Hacuaha chja nga me cuitjin: Hacuaha ngayun xi cumangu cácn cojo nuju. Cuatjin cachja nga me. Chja nga me cuitjin: Nguehe cuajyihni ngahan cojo yějě quihndi nuju xi catuhun ná. Cuatjin cachja me.

¹⁴ Tsěhě xi ngayaan quihndi rě Nina ne, tjin jni tjin yojo naja ne, věhě xi Jesús ne, hacuaha casacu rě me jni casacu rě me yojo rě me, cojo sa xi ngatsě rě cjuaveya rě me ne, cjuahataha me ngahñu rě xitsehen xi matitjun xi vitéxa rě cjuaveya. ¹⁵ Hacuaha ngatsě rě cjuaveya rě me ne, ma sahmi ndaya naja me ngayejen ni xuta xi rcun cjuaveya. Hane tsěhě xi cuatjin rcun cjuaveya ne, věhě xi sacuaha xi cjuaveya ne, cavitexa naja xcun cjuahñu naja. ¹⁶ Ha cjuaquixi ta hacuiin canduva me xi cuisecoo me ángel ta xi canduva me ne, tsěhě xi cuisecoo naja me ngayaan xuta tjě rě Abraham. ¹⁷ Hane ngatsě rě věhě xi casahmi ngujyě xi camá me sacuaha ngayaan cojo ngayějě ni chuva rě sacuatjin cun ngayaan xicjin me, cojo sa xi hacuaha cuma me ngu nahmi xi matitjun xi tjin rě me cjuayumatacun, hacuaha jemu ndaja sahmichihin me xa rě Nina, hacuaha cojo sa xi cuechjitje me jyě naja. ¹⁸ Hane tsěhě xi cuatjin suvá Jesús cavatju me cjuañihi hya xi cafahachuva xitsehen me ne, věhě xi quihndě ne, hacuaha cuma cuisecoo naja me ngayaan hya xi tifahachuva naja xitsehen.

3

Hitsě sa jyě hnga Jesús cojo hasen rě me xi cumá rě Moisés

¹ Ngayujun ni xuta ladu rě Nina xi cavaxijin nuju me xi cuma tsěhě me ngayun ne, cuisiajme hitsě tsěhě Jesús, me xi catsingatju Nina xi sua cumachaya naja tsěhě cjuachacun xi nújan xi macjain naja, me xi hacuaha má nahmi xi matitjun tsěhě cjuachacun xi nújan xi macjain naja. ² Jesús ne, jemu ndaja casahmichihin me yějě hacutjin xi meje rě Nina xi casuaxa rě me, sacuatjin casahmi xutachanga naja Moisés hatsěě xi hacuaha jemu ndaja casahmichihin me xa xi cavisecoo me xuta rě Nina. ³ Jesús ne, vechú chuva rě xi hitsě sa cuma jyě cuma hnga me cojo hasen rě me xi cuma rě Moisés. Má sacuatjin rě ngu cha xi sahmi ngu ndihya, xi vechú chuva rě xi hitsě sa chjaharcun rě cha xi cuma rě ndihya xi casahmi cha jan ta, ⁴ tsěhě xi yějě ni ndihya ne, tjin ngu xuta xi casahmi me, věhě xi camá, peru me xi casahmi yějě ni xcusun xi tjin ngasunhndě ne, hacui Nina. ⁵ Moisés ne, ngu xuta xi sahmi xa rě Nina ni má me, hane jemu ndaja chihin casahmi me xa xi casatěxa rě me ngajñi rě yějě ni xuta rě Nina. Hane xa xi casahmi me jan ne, xi catsingasca rě me cjuatacun rě xuta tsěhě cjuaxi cuichja Nina cuma ngascan. ⁶ Peru Cristu ne, Quihndi rě Nina camahani má me, hane jemu ndaja chihin casahmi me cuidadu yějě ni xuta rě Nina. Xuta xi cuacun vē

ne, hacui ngayaan, sa xi hacuiin nismetacun cjuatacun xi rcun camahani hacuaha sa xi hacuiin nismetacun cjuasua xi tjin rë xahasen naja xi vetahan tacun Nina.

Cjuahajenda tangun xuta rë Nina cojo rë me

⁷Vëhë xi meje rë xi cuetuhunrcun cjuaxi chja Hasen rë Nina xi chja cuitjin: Sa xi cuisiniñuju cjuaxi chjá quihndë ne,

⁸hacuiin nihñu taja tacún sacuatjin casahmi xuta hya xi cachjataha me Moisés

hacuaha cafachuva ná me ngajan hiscan jemu xín tsëhë nandya.

⁹Hane ngajan cafachuva ná xutachanga nuju, handasa ha cavëë me yëjë cjuandaja xi casahme cahntsua yachan nu xi catsuyihiya me jan.

¹⁰Vëhë xi camacjan ná cojo yëjë xuta xi caviyuju nixtin hya, cuitjin cachjá tsëhë me: “Cjuatacun rë me ne, hatuxa hacjahi ndiya fi, hvíin me ndiya naha.” Cuatjin cachjá.

¹¹Vëhë xi camacjan ná cojo rë me hane cachjá quixi xi tsajin nu tsajin nixtin xi cuisehen cjuahajenda tangun me cojo ná. Cuatjin cachja Hasen rë Nina.

¹²Nechun cuidado, ngayujun ni, cojo sa xi tsajin hisca ngu ngayun xi cumatsehen cjuatacun nuju hacuaha cumacjaain nuju tsëhë me, sa tu cjuatacun tsehen jan ne, cuaxëxin nuju tsëhë Nina xi quicun me. ¹³Cahndë rë vëhë ne, nchunchujun ni ne, tuhun cjuetacun xingun xingu xingu ngayun jinguyëjë rë xi tjin sa hora quihndë, cojo sa xi tsajin ngu ngayun xi cuma taja cjuatacun nuju ngatsë rë cjuandacha xi sahmi cjuatsehen. ¹⁴Ta cojo ngayaan satë naja cjuandaja xi tjin rë Cristu, sa xi scaa jain naja cumangutacun hisca xi cuijnetaha nixtin naja, sacuatjin camangutacun ntsacun cavetsihin.

¹⁵Tetuhunrcun nga sacuatjin chja xujun rë Nina xi chja cuitjin: Sa xi cuisiniñuju cjuaxi chjá quihndë ne, hacuiin nihñu taja tacún sacuatjin casahmi xuta hya xi cachjataha me Moisés.

Cuatjin chja xujun rë Nina. ¹⁶¿Yo me xi cuatjin cachjataha rë Moisés hya xi cavatju cavisiñuju me cjuaxi Nina ni? Yëjë ni xutachanga naja xi cavaxëxin Moisés tsëhë nangui Egipto. ¹⁷Hane ¿yo me xi camacjan rë Nina cojo rë cahntsua yachan nu ni? Ha hacui ni me changá xi cuacun vë xi casahmi cjuatsehen hane cahme me ngajan hiscan jemu xín tsëhë nandya. ¹⁸Hane ¿yo me xi cachja quixi Nina cojo xi tsajin nu tsajin nixtin xi cuisehen cjuahajenda tangun cojo me ni? Ha hacui ni me changá xi cuacun vë xi cahndiin tsëhë Nina. ¹⁹Hane cuatjin camá xi camaji cavisehen cafachajenda me ngajan, tsëhë xi camacjaain rë me.

4

¹Vëhë xi jinguyëjë rë xi tacun quicun cjuaxi cachja Nina xi cuisen chjahanjendan tangun cojo rë me ne, meje rë xi cumacjintacun sá tu tjin ngu ngayun xi cuechuntuun xcusun ndajiyihí vëhë. ²Ngayaan ne, hacuaha cojo ngayaan camachaya naja cjuandajiyihí vëhë sacuatjin camachaya rë xutachanga naja xi cuacun jan; peru me xi cuacun jan ne, tsajin mé camachjirëhë rë me cjuaxi cavisiñuju me jan ta, tsëhë xi hya xi cavisiñuju me cjuaxi jan ne, camacjaain rë me. ³Peru ngayaan xi camacjain naja ne, cuma cuiseen chjahanjendan tangun cojo rë Nina. Sacuatjin xi ha cachja me tsëhë cjuandajiyihí vëhë, xi cachja me cuitjin:

Vêhê xi camacjan ná cojo rê me hane cachjá xi tsajin nu tsajin nixtin xi cuisehen cjuahajenda tangun me cojo ná. Cuatjin cachja me. Nina ne, catsinguijnetaha me xa xi sahmi me hisca hya xi casahmi me ngasunhndê; ⁴ hacuaha tjin ngu cahndê tsêhê xcun xujun rê me ne, cachja me tsêhê nixtin xi má yatu jan cuitjin:

Ngahan ne, nixtin xi má yatu ne, cafahájenda tsêhê yêjê ni xa xi casahme.

Cuatjin cachja me. ⁵ Hacuaha ha xujun vêhê ni ne, cachja nga me cuitjin:

Tsajin nu tsajin nixtin xi cuisehen cjuahajenda tangun me cojo ná.

Cuatjin cachja me. ⁶ Hane tsêhê xi chaja sa cuisehen yahnga xuta xi cjuahajenda tangun me cojo Nina ne, hacuaha tsêhê xi xutachanga naja xi cojo tjun camachaya rê cjuandajyihî jan ne, cavisiin me cafahajenda tangun me, ngatsê rê xi cahndiin me tsêhê cjua xi tjun camachaya rê me jan ne, ⁷ vêhê xi Nina ne, cavejña nga me ngu nixtin, xi hacui quihndê. Jemu tsêê cavatju nixtin xi cavitexa Moisés, hya xi catsihindu xutachanga naja David cjua rê Nina xi ha canújan titjun xi chja cuitjin:

Sa xi cuisifñuju cjua xi chjá quihndê ne,

hacuiin nihña taja tacún.

Cuatjin cachja Nina. ⁸ Sa xi xutachanga naja Josué quijicojo me xuta xi cjuahajenda tangun cojo Nina ne, Nina ne, hacuaha cachjaain me xi camangaşcan xi tjin sa ngu nixtin xi cuisehen chjahanjendan tangun cojo rê me. ⁹ Ngajan xi tjin sa ngu nixtin xi cuisehen xuta rê Nina cjuahajenda tangun me cojo Nina. ¹⁰ Ta xuta xi visehen fahajenda tangun cojo Nina ne, hacuaha fahajenda me tsêhê xa xi casahmi me sacuatjin cafahajenda Nina tsêhê xa xi casahmi me. ¹¹ Ngajan xi meje rê xi nihña ngahña xi cuma cuisehen chjahanjendan cojo rê Nina, cojo sa xi hisca ngu ngayaan ne, hacuiin nihña sacuatjin casahmi xuta xi cahndiin me tsêhê Nina.

¹² Cjua xi chja Nina ne, quicun jain, hacuaha jemu tjin rê ngahña, hatuxa vetjucaa. Sacuaha xi hitsê sa yuju xi cumá rê quicha xi jo yuju rê, xi vatjuca rê hisca hasen naja, hacuaha handasa hiscan hinchacoo ninda naja ne, cuatju, cuechu hisca ngajñi rê xineninda naja. Cjua xi chja Nina jan ne, vêê hacutjin ningatahantacun, hacuaha vêê hacutjin má rê xahasen naja.

¹³ Hisca ngu xcusun xi Nina catsindaja me ne, cumaji chahma xi cumá rê me; yêjê ni xcusun vêhê ne, tjin tsejen xi cuma rê Nina, me xi tahancuendan rê yêjê ni xcusun xi canihña.

Jesús ne, hacui me xi má nahmi xi matitjun

¹⁴ Jesús, Quihndi rê Nina ne, hacui me xi nahmi xi matitjun xi tjin naja. Jemu ndaja camahani me, hacuaha cavatjutaha me ngahnga, sehe cavechu me xcun Nina. Vêhê xi meje rê xi hacuiin nismetacun cjuachacun xi nújan xi macjain naja. Cuatjin meje rê ta, ¹⁵ tsêhê xi nahmi xi matitjun xi tjin naja ne, ma mayuma rê me ngayaan xi jemu chuva tacun ta, tsêhê xi me vêhê ne, hacuaha cavatju me camá yêjê ni cjuacjintacun sacuatjin vatjun ngayaan má. Peru handasa cuatjin cavatju me camá ne, hisca ngu cjuatsehen ne, casahmii me. ¹⁶ Vêhê xi meje rê xi rcun camahani xi nihña tiña tsêhê Nina, me xi sahmi naja gobiernu cojo cjuandaja. Nihña tiña cojo sa xi chjahanntsán cjuayumatacun rê me, hane hacuaha sacú naja cjuandaja rê me xi cuisecoo naja hora xi mameje rê.

5

¹ Yêjê ni nahmi xi matitjun xi tuxijin rê ngajñi rê xuta ne, satê xa rê me xi visecoo me xuta, cojo sa xi sahmi tiña xuta tsêhê Nina. Hacuaha nahmi xi

cuacun vë ne, satëxa rë me xi sua me yëjë ni xcusun cjuatjo cojo Nina ngatsë rë cjuatsehen xi sahmi xuta. ² Nahmi xi cuacun vë ne, ma tsijyëcacun me cojo xuta xi hvíin camahani hacuaha cachaja tséhë ndiya rë Nina ta, tséhë xi nahmi vë ne, hacuaha chuva cacun me. ³ Véhë xi tjin rë me xi sua me cjuatjo cojo Nina ngatsë rë cjuatsehen xi casahmi suvá me, cojo ngatsë rë cjuatsehen xi casahmi jingu sa xuta.

⁴ Tsajin ngu xuta xi cojo cjuatacun rë suvá ni me ne, cjuaha me ngu xa ndajyihi vëhé ta me xi cjuaha ne, me xi suvá Nina cuichja me xi satë rë, sacuatjin cavatju xutachanga naja Aarón camá. ⁵ Hacuanitjin ni rë Cristu ta, hacuini casahmi jyë casahmi hnga suvá me yojo rë me xi cuma me ngu nahmi xi matitjun ta me xi cachja xi cuma me nahmi ne, hacui Nina, xi cachja me cuitjin:

Ngaye xi quihndi naha ngaye;

hacuaha quihndë casuá xa ri.

Cuatjin cachja Nina. ⁶ Hacuaha chja me jingu sa cahndë tséhë xujun rë me cuitjin:

Ngaye xi nahmi ngaye yëjë nu yëjë nixtin
sacuaha camá Melquisedec hatsëë nixtin.

Cuatjin cachja Nina. ⁷ Hane jinguyëjë rë xi Cristu tacun sa me cjuahñu cojo yojo rë me ne, hora xi cafehya rë me Nina, Nina xi tjin rë chuva rë xi cuaxëtje rë me tséhë cjuaveya ne, jercu cajindaya me hacuaha jercu cajihnda me. Hane cafahacuenda Nina cjuá rë me ta, tséhë xi jemu cafaharcun me Nina.

⁸ Cristu ne, handasa Quihndi rë Nina me xi cjuaquixi, peru cjuañihi xi cavatju me camá nguehe ngasunhdë ne, vëhé hitsë sa cavícuya rë me mé vijne xi nuhyan tséhë Nina. ⁹ Hane xi cuatjin casahmi Nina xi cavechutaha Jesús yëjë ni hacutjin xi meje rë Nina xi cuechutaha me ne, vëhé xi Jesús ne, ma vaxëtje me yëjë ni xuta xi vihndë tséhë me, hacuaha tsajin nu tsajin nixtin xi cuatju xuta xi cuacun vë castigu.

¹⁰ Hane hacuaha Nina casuaxa me Jesús xi má me nahmi xi matitjun sacuaha camá Melquisedec hatsëë nixtin.

Mijí rë xi nismetacun ndiya rë Nina

¹¹ Sacuaha tséhë cjuatacun vëhé ne, jemu tjin cjuá xi cuinújin cojo nuju, peru jemu chja cuátjin xi tihincuendin nuju ta, tséhë xi hacuini ndaja meje cuisinúju. ¹² Ngayun xi ha jemu tsëë nduvun chutayun cjuá rë Nina ne, ha tivicyun rë xuta cjuá rë Nina. Peru cahndë rë xi ha tivicyun ne, tu ngayun meje rë ngu xi cuícuya nga nuju cjuá xi tjun tjun chutaya rë tséhë cjuá rë Nina. Sacuaha xi mameje rë xi cuyun siuhun nga lechi, cahndë rë xi xinu niñu. ¹³ Sacuaha quihndi langa ne, vëhé xi suvá lechi hvi, hacuaha hvíin camahani mé xi ndaja o mé xi ndajin. ¹⁴ Peru sacuaha niñu xi chinë ne, xuta changá xi jinë me, xuta xi ha vëë me mé xi ndaja mé xi ndajin ta, tséhë xi cjuatacun rë me ne, ha jemu nduva sahmixa.

6

¹ Quihndë ne, meje rë xi cuejñaxen hitsë cjuachacun xi cachutayan hya xi tjun tjun camangutacun cojo Cristu, hane chutayan jingu sa cjuá xi hitsë sa chja, cojo sa xi cuejñachihin ndaja cjuatacun naja. Mijí rë xi cuyan chutayan nga cjuá xi ha cama naja titjun, sacuaha cjuá xi chja xi meje rë xi cuejñaxen rë yëjë xcusun xi machjirin xi nihña; sacuaha cjuá xi chja xi meje rë xi cumangutacun cojo Nina; ² sacuaha cjuá xi chja xi meje rë xi cuma tyjahi vihi cuma tyjahi vëhé xi cuma rë Nina; sacuaha cjuá xi chja xi meje rë xi

cuisanentsan ngu xuta; sacuaaha cjua xi chja xi cuya nima cjuahñu; sacuaaha cjua xi chja xi cuechu nixtin xi Nina ne, tsichuva naja me ngayejen ni cojo cjuatacun naja. ³ Vêhê xi quihndê ne, cuejñaxen hitsê cjua xi cuacun vê, hane chutayan jingu sa cjua xi hitsê sa chja cuijnercuun, sa xi sua Nina cahndê.

⁴ Xuta xi ha cavisehen cjuahasen rê Nina ngajñi rê cjuatacun rê me ne, hacuaaha casacu rê me hitsê cjuandaja xi Nina sua me, hacuaaha cavisehen Hasen rê Nina cahntsua xahasen rê me, ⁵ hacuaaha cavejña rê me hitsê cjuandajiyihî rê Nina, hacuaaha camachaya rê me hitsê cjuarcun xi hitsê sa rcu cjin cuma nixtin xi sehe nduva. ⁶ Sa xi xuta xi cuacun vê tsismicacun me ndiya rê Nina ne, cumaji cuisecoon rê me xi tsindeya me cjuatacun rê me ngu ndiya nga ta, xcusun xi tisahmi me ne, titsixcuehyu me Quihndi rê Nina, sacuaaha xi tivuya tivetaha suvá me me xcun cru. ⁷ Xuta xi cuacun vê ne, tangun me cojo nangui xi hvi rê tsi xi vaha xcun: sa xi nangui vêhê ma ngu xcusun xitjê xi cumachjirêhê rê xuta xi nai rê ne, tsinchacun Nina nangui vêhê; ⁸ peru sa xi suvá nahyá cuetju xcun nangui vêhê ne, venguiin camahani chji rê. Hacuaaha choho cuichja Nina cojo, hane hiscan xi cuijnetaha ne, cueti.

Cuanguen nduju cuetahantacun Nina

⁹ Peru handasa cuatjin nújin cojo nuju, ngayujun ni xi jemu hmutacuin nuju ne, peru ha hyin cojo cjuatacun niji xi ngayun ne, ndaja tivatjun tijima, cuma cuinújan ne, ha tivanguncujun ndiya xi cuaxêtje nuju. ¹⁰ Nina ne, quixi me cojo cjua rê me. Vêhê xi tsichayaain me yêjê xcusun xi canihñu, hacuaaha tsichayaain me cjuahmutacun xi camatsejen xi tjin nuju cojo rê me, hya xi cavisecon rê xuta ladu rê me, sacuatjin xi tinihñu hisca quihndê. ¹¹ Xi meje niji ngayin ne, jima ngu ngayun ne, hacuanitjin ni tinechun ngunajatacun jinguyêjê rê xi nechun cjuahñu, cojo sa xi sacú nuju yêjê cjuandaja rê Nina xi vetuhun tacun. ¹² Hacuaaha meje niji xi hacuiin cuma tsêhê ngayun ta xi meje niji ne, nihñu sacuatjin sahmi xuta xi ngatsê rê xi jemu ndaja ticaa rê me xi mangucacun me cojo Nina ne, vêhê xi tifahatsja me cjuandaja xi ha cachja Nina xi sacú rê me.

¹³⁻¹⁴ Hya xi cachja quixi Nina cojo Abraham xi sua rê me ngu cjuandaja ne, tsêhê xi ha quihndê tsajin sa yo xi matitjun xi cuma rê Nina ne, vêhê xi cachja me cuitjin: “Ngahan suva hvê xi cjuaquixi xi tsinchácun ri, hacuaaha jemu cjin sahme ri cojo xuta riji.” Cuatjin cachja me. ¹⁵ Hane xi cuatjin cacaa rê Abraham cavejñaya me cojo cjuajeya cjua xi cachja Nina ne, cavechu nixtin xi casacu jain rê me cjuandaja xi ha cachja Nina xi sua rê me. ¹⁶ Hya xi ngu xuta sua me ngu cjua rê me xi cjuaquixindaja ne, hisca veyanangui me ngu xi hitsê sa matitjun xi cumá rê me, xi hacui Nina; hane hya xi jo xuta tisua cjua rê me ne, sa xi cuetjujñi ngu me xi cuacun vê xi cuichja me: “Vêê Nina jain xi quixi” ne, ngajan ma chihin cjuavisiajmi rê me. ¹⁷ Vêhê xi hya xi cachja Nina xi sua rê me Abraham ngu cjuandaja ne, cuitjin cachja me: “Ngahan suva hvê.” Cuatjin cachja me cojo sa xi ngayaan xi chjahanntsan cjuandaja vêhê ne, cumachayandaja naja ta Nina ne, hya xi cuichja me ngu cjua ne, tsindeyaain me cjuatacun rê me. ¹⁸ Cuatjin cachja Nina cojo sa xi jercu ndaja sacú naja cjuetacun ngatsê rê jo xcusun xi hatuxa cumaji cuindeya. Ngu xcusun jan ne, hacui suvá Nina, hane xi ma jo jan ne, hacui cjua xi cachja me cojo Abraham. Hacuaaha Nina ne, hatuxa maji vindacha me. Hane ngayaan xi vetahan tacun Nina ne, sacú naja cjuetacun vêhê, cojo sa xi cumangutacun cojo cjua xi Nina cachja me xi cuechu nixtin xi cuiseen chjahanjendan tangun cojo rê me. ¹⁹ Hane xi cuatjin vetahan tacun Nina

ne, tsajin camahani mé cuma rê hasen naja, hacuaha cuma cuechun hisca hiscan tacun Nina, ²⁰ hiscan xi quiji Jesús cavuxaha me ndiya tsajan. Hane Nina casua xa me Jesús xi camá Jesús nahmi xi matitjun xi tsajin nu tsajin nixtin xi cjuë xa rê me, sacuaaha camá Melquisedec hatsëë nixtin.

7

Jesús ne, má me nahmi sacuaaha camá Melquisedec

¹ Melquisedec vë ne, matitjun me tsëhë nandya Salem, hacuaha má me nahmi xi sahmi me xa tsëhë Nina xi hatuxa jyë hnga cojo Hasen rê. Hane hya xi cavuya Abraham xi quiji cavaxëtje me quihndi rê hntsë me tsëhë condra rê ne, cavetju Melquisedec tsëhë nandya Salem quijitjengui me Abraham hiscan nduva, hane xi casacu xicjin me ndiya ne, catsinchacun Melquisedec Abraham. ² Hya xi camá ne, të cahndë cavatëcja Abraham yëjë ni xcusun xi camá sa cafaha me tsëhë xuta xi cuacun condra jan ne, casua rê me Melquisedec ngu cahndë tsëhë të cahndë jan, tsëhë xi Abraham ne, faharcun me Nina. Ñihi xi Melquisedec ne, meje cuichja “ngu me xi matitjun xi vitexa cojo yëjë ni cjuaquixi”; hacuaha ñihi xi chja Me xi Matitjun tsëhë Salem ne, meje cuichja “ngu me xi matitjun xi vitexa cojo yëjë ni cjuajeya.” ³ Xcun xujun rê Nina ne, tsajin camahani hiscan xi chja tsëhë naa tsëhë nahmi rê Melquisedec. Hisca tsëhë xutachanga rê me ne, tsajin hiscan xi chja. Hacuaha chjaain hacutjin catsin me ne, chjaain hacutjin cahme me. Cuatjin xi Melquisedec ne, meje tangun me cojo Quihndi rê Nina, tsëhë xi hacuaha ngu nahmi má me xi tsajin nu tsajin nixtin fë xa rê me.

⁴ Chutsujun hacutjin jercu vengui chjí rê Melquisedec, xi hisca xutachanga naja Abraham ne, casua me me ngu cahndë tsëhë yëjë xcusun xi cavatëcja me të cahndë jan. ⁵ Ley xi casua Nina rê Moisés xi camá ngascan ne, chja ta nahmi xi nduva tjë rê Leví ne, tjin rê me chuva rê xi cjuehya me cojo naja ngayaan xuta tjë rê xuta Israel xi cuichancjan të cahndë yëjë ni xcusun xi tjin naja, cjuaha nahmi vëhë ngu cahndë tsëhë të cahndë jan. Cuatjin chja ley rê Moisés xi cuechjen diezmu naja, handasa xicjin nahmi jan má ngayaan, hacuaha tjë rê Abraham ngayejen ni. ⁶ Melquisedec ne, handasa hacuiin tjë rê Leví má me, peru cafahatsja me ngu cahndë tsëhë xi camá të cahndë jan, xi casua Abraham. Hacuaha catsinchacun Melquisedec Abraham, me xi ha cachja Nina xi sacú rê cjuandaja. ⁷ Ngayejen ni ne, ha hyan ta me xi tsinchacun ne, me vëhë xi matitjun me tsëhë me xi manchacun. ⁸ Ngeuhe xcun cjuahñu naja vi ne, nahmi xi fahatsja me diezmu tsëhë yëjë xcusun xi ticja të cahndë ne, hacuaha xuta ngayaan ni me xi hacuaha hme me; peru xcun xujun rê Nina ne, chja tsëhë Melquisedec sacuaaha xi tacun cuaha me. ⁹ Nahmi xi nduva tjë rê Leví xi hacuaha cojo me tifahatsja me diezmu ne, cuma cuinújan ne, sacuaaha xi cojo me cavechji me diezmu rê me hya xi casua Abraham cojo Melquisedec jan diezmu rê me. ¹⁰ Cuatjin sacuaaha xi cavechji nahmi xi cuacun jan ta, tsëhë xi Abraham ne, ha cojo tjë xi cuacun vë yaha me hya xi casua me diezmu rê me cojo Melquisedec.

¹¹ Xuta Israel ne, cafahatsja me cjua xi chja hacutjin meje rê Nina xi sahmi yëjë xuta xi tjë rê Leví xi sahmi me xa sacuaaha nahmi. Quihndë ne, sa xi nahmi xi cuacun vë camá casahmi me xi cavechutaha xuta yëjë ni hacutjin xi meje rê Nina xi sahmi me ne, ha quihndë hacuiin sahmi nguyjë xi cuetjuñi sa ngu nahmi xi hacjahi xcusun rê, ngu nahmi xi hacuiin tangun xcusun rê cojo Aarón ta ngu nahmi xi tangun xcusun rê cojo Melquisedec. ¹² Hane hya xi vindeya xcusun rê xa xi sahmi nahmi ne, hacuaha hatuxa vindeya ley xi

vitexa rë me. ¹³ Hane Nai naja, me xi cuatjin chja xujun rë Nina tsëhë ne, hacjahi tjë me, hane sacuaaha tjë vëhë ne, hisca ngu nahmi cjëë cuetjuijñi me. ¹⁴ Hacuaha ha hyan ta Nai naja ne, tsëhë tjë rë Judá canduva me, hane Moisés ne, cachjaain camahani me xi tjë vëhë ne, ngajan cuetjuijñi ngu nahmi.

¹⁵ Yëjë cjua xi tinújan vi ne, tsejen xi jemu cjuaquixi, hya xi vetjuijñi sa ngu nahmi sacuaaha Melquisedec. ¹⁶ Hane nahmi xingu jan ne, hacui Nai naja, me xi cavechutaha xi camá nahmi, hacuiin ngatsë rë ngu ley xi chja yo tjë rë xi cuma nahmi ta ngatsë rë ngahñu rë ngu cjuahñu xi tjin rë me xi tsajin nu tsajin nixtin vetsun. Ngatsë rë vëhë xi cavechutaha me xi camá me nahmi.

¹⁷ Hacuaha Nina ne, cuitjin chja me tsëhë Nai naja:

Ngaye xi nahmi ngaye yëjë nu yëjë nixtin sacuaaha camá Melquisedec hatsëë nixtin.

Cuatjin cachja Nina. ¹⁸ Sacuaaha cjua rë ley xi cavitexa titjun ne, cavetsunya, tsëhë xi hatuxa tsajin rë ngahñu hacuaaha machjiriin ta, ¹⁹ tsëhë xi camaji casahmi xi cavechutaha xuta yëjë ni hacutjin xi meje rë Nina xi cuechutaha me. Hane cahndë rë ley vëhë ne, vetahan tacun ngu cjua xi hitsë sa ndajyih, hane ngatsë rë xi cuatjin vetahan tacun ne, vëhë xi nihña tiña tsëhë Nina.

²⁰ Hya xi casua xa Nina Jesús xi cuma me nahmi xi matitjun ne, cachja me cjua vihi: “Ngahan suva hvë.” Cuatjin cachja me. Peru hya xi cafaha xa nahmi xi yahnga jan ne, cachjaain Nina: “Ngahan suva hvë.” ²¹ Peru sacuaaha tsëhé Nai naja ne, xujun rë Nina ne, cuitjin chja:

Nai naja ne, cachja me cjua vihi: “Ngahan suva hvë.” Cuatjin cachja me, hacuaaha tsajin hora tsindeya me cjuatacun rë me xi cachja me cjua vihi: “Ngaye xi nahmi ngaye yëjë nu yëjë nixtin sacuaaha camá Melquisedec.”

Cuatjin cachja me. ²² Hane xi cuatjin casua xa Nina Jesús xi camá me nahmi xi matitjun tsajan ne, vëhë xi sacu naja cjuaquixindaja xi Nina ne, sahmichihin jain me compromisu xi sehe tisahmi me. Hane compromisu vëhë ne, hitsë sa ndajyih xi cuma rë xi casahmi me titjun. ²³ Sacuatjin rë nahmi xi yahnga jan ne, sacuiin rë me cahndë xi cjuenduju me sahmi me xa yëjë nu yëjë nixtin ta, tsëhë xi hatuxa hme me. Vëhë xi hisca ntsacu cavetsihin hisca quihndë ne jemu cjín camá me cojo yëjë sa tjë rë me xi yahnga xi hacuaaha camá nahmi. ²⁴ Peru Jesús ne, tsëhë xi tsajin nu tsajin nixtin xi cueya me ne, vëhë xi hacuaaha tsajin nu tsajin nixtin xi jingu sa cjuahatsja xa rë me xi má me nahmi. ²⁵ Vëhë xi ma vaxëtje me xuta xi sahmi tiña tsëhë Nina ngatsë rë xi camangucacun xuta jan cojo Jesús. Hane hya xi vaxëtje me xuta xi cuacun vë ne, ha quihndë tsajin nu tsajin nixtin xi cumameje nga cuetjutje me ta, tsëhë xi Jesús ne, tacun me yëjë nixtin xi cjuehya rë me Nina ngatsë rë xuta xi cuacun vë.

²⁶ Jemu ndatjin xi tjin naja ngu nahmi xi matitjun xi cuatjin xcusun rë me. Jesús, nahmi xi matitjun jan ne, jemu tyjahi me, tsajin rë me cjuatsehen, tsajin mé jyih mé má me, cavetjuxin me tsëhë xuta tsehen, quiji me hisca ngajan sa tsëhë ngahnga. ²⁷ Me vëhë ne, hacuiin tangun me cojo nahmi xi matitjun xi yahnga jan ta, me vëhë ne, tsajin mé má xi cojo me nchunchujun ni sua rë me Nina ngu chu xi cahme ngatsë rë jyë rë suvá me, hane xi cuma ngascan ne, sua nga me ngu chu xi cahme ngatsë rë jyë rë xuta. Jesús ne, ngu ndiya ni casua me ngu cjuatjo cojo Nina ngatsë rë jyë rë xuta, hya xi casua me yojo rë me xi cahme me. ²⁸ Sacuaaha ley rë Moisés ne, sua xa rë xuta xi cuma me nahmi xi matitjun tsëhë yëjë ni nahmi. Hane xuta ne, hatuxa caain rë cjuatacun rë me xi suvá cjuandaja sahmi me. Peru sacuaaha cjua xi cachja Nina hya xi cachja me xi “Ngahan suva hvë” ne, cjua vëhë casua xa rë

Quihndi rē Nina xi cuma me ngu nahmi xi matitjun. Hane cjuaxi cachja Nina jan ne, camá ngascan canduva xi cuma rē ley. Hacuaha Quihndi rē Nina ne, tsajin nu tsajin nixtin xi caain rē cjuatacun rē me xi suvá cjuandaja sahmi me.

8

Jesús ne, sahmi tangun me xuta cojo Nina ngatsē rē ngu compromisu xatsē

¹ Quihndē ne, cjuaxi hitsē sa matitjun tsēhē yējē ni cjuaxi tinújan vi ne, hacui cjuaxi vihi: tjin naja ngu nahmi xi matitjun xi cuatjin xcusun rē me. Quiji me ngahnga, caveña me taha ladu quixi tsēhē Nina xi jemu jyē hnga cojo hasen rē. ² Ngajan sahmi me xa xi má me nahmi ngajan ndava Nina. Peru ndava Nina jan ne, hacuiin ngu ndihya xi catsindaja ngu xuta ta cahndē vēhē ne, suvá Nai naja catsindaja me.

³ Yējē ni nahmi xi matitjun ne, hatuxa xa rē me xi sua me cjuatjo cojo Nina sua me ngu chu xi tsiquehen xuta. Vēhē xi cojo Jesús camameje rē xi tjin mé xi sua me cjuatjo cojo Nina. ⁴ Sa xi nguehe ngasunhdē tacun cuaha me quihndē ne, hacuiin cojo me má me nahmi ta nguehe ne ha tjin nahmi xi sua cjuatjo cojo Nina sacuatjin vitexa ley rē Moisés. ⁵ Sacuaha xa xi sahmi nahmi nguehe ngasunhdē vi ne, hacuiin tangun cojo xa xi má ngajan ngahnga ta, sacuaha ejemplu o tjahnguen ni rē xa xi má jan ne, vēhē xi má nguehe. Hya xi ha cuetsihin sahmi Moisés ndava Nina jan ne, cuitjin cachja Nina cojo rē me: “Nechin cuidadu ne ndandaja nihñi yējē ni xcusun vē sacuaha xcusun xi ha catsingácun ri ngajan hiscan naxi jan.” Cuatjin cachja Nina. ⁶ Quihndē ne, Jesús casacu rē me ngu xa xi hitsē sa ndaja, tsēhē xi hacuaha me vēhē sahmi tangun me xuta cojo Nina ngatsē rē ngu compromisu vēhē hane hitsē sa ndaja cjuaxi cachja me.

⁷ Sa xi ndatjin tjin chihin compromisu xi casahmi Nina titjun ne, sehe camamiji rē ngu nga compromisu xi ma jo xi hitsē sa ndaja. ⁸ Peru Nina ne, cavēē me xi xutachanga naja ne, quitjen me jyē, vēhē xi cachja me cuitjin: Ngahan Nai nuju ne, cuichjá cojo nuju ta cuechu nixtin xi sahme nga ngu compromisu xatsē cojo nuju ngayun xuta tjē rē Israel cojo xuta tjē rē Judá.

⁹ Peru ha quihndē hacuiin sacuaha compromisu xi casahme titjun cojo xutachanga nuju, hya xi cojo cjuahmutacun naha ne, cavaxēxen me tsēhē nangui Egipto; hane tsēhē xi hacuiin quiji nduju me sacuatjin compromisu xi casahme cojo rē me ne, vēhē xi ngahan ne, casahmecuendaan me, cuatjin chjá ngahan, Nai nuju.

¹⁰ Sacuaha compromisu xatsē xi sahme cojo nuju ngayun xuta tjē rē Israel hya xi cuma ngascan tsēhē nixtin vēhē ne, hacui vihi: Cueyá ley naha cahntsua cjuatacun nuju, sacuaha xi cuma hindu cjuaxi rē ley vēhē cahntsua cjuatacun nuju. Hacuaha ngahan cuma ngahan Nina nuju hane ngayun cuma ngayun xuta naha.

¹¹ Tsajin yo xi cuicuya xicjin, tsajin yo xi cuichja cojo xicjin cuitjin: “Meje rē xi cumachaya ri yo xi Nai naja.”

Tsajin yo xi cuichja cuatjin ta tsēhē xi yējē ni sa quihndi sa changá ne, ha camachaya rē yo ngahan.

¹² Nixtin hya ne, jemu tjin ná cjuaninchataha cojo cjuatsehen xi cún me hacuaha ha quihndē tsajin nixtin tsinguitsjen jyē rē me.

Cuatjin cachja Nina. ¹³ Hya xi chja Nina tsêhê ngu compromisu xi tjun jan ne, casahmi changá me. Hane xcusun xi ha jima changá jan ne, ha meje cjuêya.

9

Ndava Nina nguehe nangui

¹ Quihndê ne, ngajñi rê cjuá tsêhê compromisu xi casahmi Nina titjun ne, cachja me hacutjin xi chjahanrcun rê me, cojo xi cuma ndava me nguehe ngasunhndê. ² Vêhê xi camá ngu ndihya tsjian xi camá ndava Nina. Ngu cahntsua xi tjun tjun tacun, xi hmí rê Cahndê Rcun ne, ngajan tacun candelero, tacun maxê, siu pan xi viyuju xcun Nina. ³ Ngu cahntsua xi tacun cahncun taha cahntsua tsjian xi tyjangui má jo cahndê jan ne, ngajan tacun cahndê xi hmí Cahndê Xi Jercu Tu Rcu Camahani. ⁴ Ngajan tacun ngasuncun xi suvá oro camá hiscan xi tí tyjungunsa. Hacuaha ngajan tacun caxa tsêhê compromisu xi suvá oro casaxtê rê yêjê ni ladu rê. Hane cahntsua caxa jan ne, ngajan jiya tilu xi suvá oro cama, hane cahntsua tilu jan hinchandaja scuan cjuarcun xi hmí rê maná. Hacuaha bastón tsêhê Aarón xi cavetjusehen jan ne, cahntsua caxa jan jiyandaja. Hacuaha ngajan hinchandaja ndoyojo tê xi camahindu cjuá rê ley. ⁵ Xcun caxa jan ne, hinchacun jo quicha, xi sacuaha ángel rê Nina, xi fehma rê tyjunga rê xcun caxa jan. Hane xcun tyjavaxcun caxa jan ne, ngajan tsejen hasen rê ngahñu cjuá rê Nina hiscan tsicjê me jyê rê xuta. Peru quihndê ne, tsêhê cjuá xi ha cachjá cojo nuju vê ne, ha quihndê cuichjaan chichihin sa cojo nuju.

⁶ Quihndê xi ha caviyuju chihin yêjê ni xcusun vêhê cuatjin ne, yêjê ni nahmi ne, visehen me nchunchujun ni cahntsua xi tjun tjun tacun tsêhê ndihya tsjian jan, xi sahmi me xa rê me sacuaha nahmi. ⁷ Peru cahntsua xi má jo tacun tsêhê ndihya jan ne, suvá ni nahmi xi matitjun visehen me ngu ndiya xi ngu nu, hane hatuxa vaha me jni rê chu xi sua me cjuatjo cojo Nina ngatsê rê cjuatsehen xi casahmi suvá me, cojo ngatsê rê cjuatsehen xi casahmi xuta xi hisca hvíin me xi tjín rê me jyê. ⁸ Cojo cjuatacun vêhê ne, Hasen rê Nina ne, sua machaya naja xi ndiya xi cjuecani naja xcun Nina ne, cjêê tuxaha, jinguyêjê rê xi ndava Nina jan ne, tisahmi xa cuaha. ⁹ Yêjê cjuatacun xi cuatjin má vê ne, machjirêhê naja ngayaan sacuaha ngu ejemplu ni, quihndê nixtin vihi. Ta sacuaha cjuatjo xi sua me cojo Nina ngajan ndihya vêhê cojo chu xi tsiquehen xuta ne, maji tsityjahi rê cjuatacun rê xuta xi cuatjin faharcun me Nina. ¹⁰ Yêjê cjuatacun vêhê ne, vitexa suvá tsêhê xi chinê xi hyun ni cojo tsêhê xi ma tyjahi vihi ma tyjahi vêhê xi cumá rê Nina. Cjuatacun vêhê ne, vitexa suvá ni tsêhê taha xcun, hacuiin tsêhê cahntsua xahasen naja. Peru cjuatacun vêhê ne, cuitexa hisca nixtin xi Nina tsindeya me cjuatacun vêhê.

Ndava Nina ngajan ngahnga

¹¹ Peru Cristu ne, ha cavetjucun me xi má me nahmi xi matitjun xi sua naja me yêjê ni cjuandaja xi tisingatju Nina. Sacuaha cahndê hiscan xi tisahmi me xa xi má me nahmi ne, hitsê sa vengui chjí rê hacuaha hitsê sa tjín rê cjuaquixi. Hacuaha hacuiin xuta casahmi me, cuma cuinújan ne, hacuiin nguehe ngasunhndê vihi tacun. ¹² Hacuaha hacuiin ngatsê rê jni rê chu tentsun cojo jni rê chu ndyaja chihndê xi cavisehen me xcun Nina ta ngatsê rê jni rê suvá me. Hane ngu ndiya cavisehen ni me, hya xi ha cavaxêtje naja me xi quihndê tsajin nu tsajin nixtin chajá ngayaan. ¹³ Hane jni rê chu tentsun cojo jni rê chu ndyaja cojo ndesu rê chu ndyaja chihndê ne, hora

xi xinchutaha rē xuta xi camachocun yojo rē ne, caa rē tsityjahi rē yojo rē xuta jan cojo sa xi cuma tyjahi me xcun Nina. ¹⁴ Ha hitsē sa jni rē Cristu, me xi tsajin nu tsajin nixtin cjuē Hasen rē, hacuaha casua suvá me yojo rē me cojo Nina, ngu cjuatjo xi hatuxa jercu tu tyjahi camahani. Jni rē me jan ne, tsityjahi rē cjuatacun naja tsēhē yējē xcusun xi machjiriin xi nihña, cojo sa xi cuma nihña xa rē Nina, me xi quicun.

Ngatsē rē jni ne, ma tyjahi yējē ni xcusun

¹⁵ Vēhē xi Cristu ne, me vēhē xi sahmi tangun me xuta cojo Nina ngatsē rē ngu compromisu xatsē. Cahme me xi cuaxētje me xuta tsēhē cjuatsehen xi casahmi xuta jinguyējē rē xi sahmi xa cuaha compromisu xi tjun casahmi Nina. Hane ngatsē rē xi cuatjin cahme Cristu ne, vēhē xi xuta xi cavaxijin Nina ne cuma cjuahatsja me cjuandaja xi ha cachja Nina xi sua rē me, cjuandaja xi tsajin nu tsajin nixtin chjahataha rē. ¹⁶ Hiscan xi tjin rē xuta ngu testamentu ne, cuma sahmi xa, peru hisca hya xi ha tjin cjuaquixi xi ha cahme me xi casahmi xujun jan. ¹⁷ Ta ngu testamentu ne, vetsihin sahmi xa ngatsē rē ngu cjuaveya ta, tsēhē xi jinguyējē rē xi tacun quicun me xi casahmi ne, hatuxa tsajin rē ngahñu. ¹⁸ Vēhē xi hisca compromisu xi tjun casahmi Nina cojo xutachanga naja ne, hacuaha cojo jni rē chu camachihin. ¹⁹ Xi cavatju casua Moisés camachaya rē yējē ni xuta yējē ni cjuat tsēhē ley xi casua Nina ne, sehe cafaha me hitsē tsanga hani cojo ngu tsja rē ya xi hmí rē hisopo, sehe catsicahnchi me cojo jni rē chu hndindyaja cojo jni rē chu tentsun, caviseccjan rē me nandá ne, sehe cavinchutaha rē me libru tsēhē ley hacuaha cavinchutaha rē me yējē ni xuta. ²⁰ Ngajan xi cachja Moisés cojo xuta cuitjin: “Vihi jni xi sahmichihin rē compromisu xi cavitexa Nina hacutjin xi meje rē me xi nihña.” Cuatjin cachja me. ²¹ Hacuanitjin ni cojo yējē ni xcusun xi sahmi xa cahntsua ndihya jan. ²² Sacuatjin vitexa ley ne, ha ña meje yējē ni xcusun ne, ma tyjahi ngatsē rē jni. Hane sa xi cuangaain jni ne, hacuaha sacuiin cjuaninchataha.

Casua Cristu yojo rē me xi cjuahaxin me cjuatsehen

²³ Vēhē xi camameje rē xi cuatjin camatyjahi rē yējē xcusun xi sacuaha tjahnguen rē xcusun xi tjin ngajan hiscan tacun Nina. Peru xcusun xi tjin ngajan hiscan tacun Nina ne, camameje rē xi camatyjahi ngatsē rē cjuaveya xi hitsē sa ndacun xi cuma rē cjuaveya xi cuacun vē. ²⁴ Cristu ne, hacuiin cavisehen me ndava Nina xi xuta catsindaja me, ndihya xi tu cavetjutaha ni tsēhē hiscan xi cjuaquixi xi tacun Nina ta hisca ngahnga hiscan xi tacun Nina ne, ngajan xi cavisehen me. Cuatjin cavisehen me cojo sa xi quihndē ne, cuejña me xcun Nina, cuichjatje me ngatsē naja. ²⁵ Peru hacuiin cavisehen me xi sua me yojo rē me cojo Nina jemu cjín ndiya, sacuatjin sahmi nahmi xi matitjun xi chuva nu chuva nu visehen me ndava Nina cojo jni xi hacuiin jni rē me. ²⁶ Sa xi cuatjin cjín ndiya cavisehen Cristu ne, hacuaha cuatjin cjín ndiya camameje rē xi cueya me hisca hya xi cavetsihin ngasunhndē ne hisca quihndē. Peru quihndē xi ha tivijnetaha nixtin changá vēhē ne, Cristu ne, ngu ndiya canduva ni me xi sua me yojo rē me xi cueya me cojo sa xi cjuahaxin me cjuatsehen. ²⁷ Ngayejen ni ne, hatuxa ngu ndiya ni cueyan. Ngaxtun vēhē ne, sehe tsichuva naja Nina cojo cjuatacun naja. ²⁸ Hacuanitjin ni Cristu ta hacuaha ngu ndiya ni casua me yojo rē me xi cjuahaxin me jyē rē jemu cjín xuta. Ngaxtun vēhē ne, cuinduva nga me xi ma jo ndiya, peru ha quihndē hacuiin tsēhē jyē rē xuta ta tsēhē xi cuaxētje me xuta xi siuya rē me.

10

¹ Peru ley rë Moisés ne, sacuaaha tjahnguen ni rë yějë cjuandaja xi sehe sua naja Nina. Hacuiin ndandaja sua ley vëhë machaya naja hacutjin jain cun cjuandaja vëhë. Vëhë xi ley ne, tsajin nixtin xi cuma tsityjahi rë cjuatacun rë xuta xi tu nu tu nu fi me ndava Nina cojo chu xi tsiquehen me jan xi sua me cjuatjo cojo Nina. ² Sa xi cjuaveya rë chu vëhë cacaa rë catsityjahi jain rë cjuatacun rë xuta xi cafaharcun rë me ne, hacuaaha ha quihndë tsiquuin sa me chu ta, tsëhë xi xi má rë me ne, ha quihndë tsajin jyë rë me. ³ Peru xi cuatjin tsiquehen xuta chu ne, tu nu tu nu tsinguitsjen rë me tsëhë jyë rë me ta, ⁴ tsëhë xi jni rë chu ndyaja cojo jni rë chu tentsun ne, hatuxa maji fahaxin rë jyë rë xuta.

⁵ Vëhë xi hya xi cavějña Cristu ngasunhndë ne, cachja me cojo Nina cuitjin: Ngayun ne, hacuiin súvá cjuaveya rë chu xi meje nuju, hacuiin súvá cjuatjo xi meje nuju, vëhë xi canihñu jojo naha.

⁶ Hacuiin súvá cjuatjo xi tí xi chuya nuju tsëhë, hacuaaha hacuiin súvá ni jingu sa cjuatjo xi sua nuju xuta ngatsë rë jyë rë me xi chuya nuju tsëhë.

⁷ Sehe ngajan xi cachja nga Cristu: “Cuajyih ngahan nguehe, xi sahme yějë ni hacutjin xi meje nuju, ngayun Nina naha, sacuatjin camahindu tsahan xcun xujun nuju.”

Cuatjin cachja Cristu cojo Nina. ⁸ Xi tjun tjun ne, cachja Cristu xi Nina ne, mijí rë me hacuaaha chuyiin rë me tsëhë cjuaveya rë chu cojo jingu sa cjuatjo, cojo cjuatjo xi tí, cojo cjuatjo xi sua xuta ngatsë rë jyë rë me, handasa cuatjin vitexa ley xi cuatjin sahmi xuta. ⁹ Ngaxtun vëhë ne, cachja nga me xi tacun me xi sahmi me yějë ni hacutjin xi meje rë Nina. Cuma cuinújan ne, tsicjë me xcusun changá xi hme chu, cojo sa xi cuejña me ngu xcusun xatsë xi sahmi xuta yějë hacutjin xi meje rë Nina. ¹⁰ Nina ne, catsityjahi me cjuatacun naja ngatsë rë xi Jesucristu ne, casahmi me yějë ni hacutjin xi meje rë Nina, ngatsë rë cjuatjo xi casua Jesucristu xi casua me jojo rë me ngu ndiya ni.

¹¹ Yějë ni nahmi ne, nchunchujun ni hinchacun me fahacuenda me xa rë me xi má me nahmi, hacuaaha cuatjin cjín ndiya vuya sua me cjuatjo xi tu vëhë tu vëhë ni, xi hatuxa tsajin nixtin xi ma fahaxin rë jyë rë xuta. ¹² Peru Cristu ne, xi cavatju casua me ngu ni cjuatjo cojo Nina ngatsë rë jyë rë xuta ne, sehe quiji me ngahnga cavejña me taha ladu quixi tsëhë Nina. Hane cjuatjo xi casua me jan ne, tsajin nu tsajin nixtin xi meje rë xi cuya cjue nga xcun Nina. ¹³ Hane quiji me ngajan, cojo sa xi nixtin xi cjui sa ne, ngajan cuejñaya me hisca hya xi yějë ni xi sahmi rë me condra ne, cuiyuju ngahma gobiernu rë me. ¹⁴ Vëhë xi ngatsë rë ngu ni cjuatjo vëhë ne, catsityjahi Cristu cjuatacun rë xuta xi ha Nina tiviyujuxin rë me xi cuma tsëhë me me, hane tsajin nu tsajin nixtin xi cuya cuetsun nga cjuatacun rë xuta xi cuacun vë.

¹⁵ Hasen rë Nina ne, ha cuanitjin ni sua machaya naja cuitjin:

¹⁶ Sacuaaha compromisu xi sahme cojo xuta xi cuacun vë hya xi cuma ngascan tsëhë nixtin vëhë ne, hacui vihi:

Cueyá ley naha cahntsua cjuatacun rë me, sacuaaha xi cumahindu cjua rë ley vëhë cahntsua cjuatacun rë me.

¹⁷ Hacuaaha jyë rë me cojo cjuatsehen xi sahmi me ne, ha quihndë tsajin nixtin xi tsinguitsjen.

Cuatjin cachja Hasen rë Nina. ¹⁸ Hya xi ha camanchataha jyë ne, ha quihndë mamijí rë xi cjue sa cjue sa cjuatjo xcun Nina ngatsë rë jyë vëhë.

Meje rë xi nihña tiña tsëhë Nina

¹⁹ Vêhê xi ngayejen ni ne, rcuun camahani xi cuiseen xcun Nina quihndê ngatsê rê jni rê Jesús. ²⁰ Jesús ne, cavuxaha me ngu ndiya xatsê xi cuma naja, ngu ndiya xi cjuecojo naja xcun cjuahñu, ngu ndiya xi cjuecojo naja xcun Nina ngatsê rê cjuaveya rê Jesús. ²¹ Jesús ne, me vêhê má me nahmi xi jercu tu vengui camahani chíj rê, hacuaha sahmi naja me cuidado ngayejen ni xi má ngayaan ladu rê Nina. ²² Ngatsê rê yêjê cjuatacun vêhê ne, meje rê xi nihña tiña tsêhê Nina cojo nguñajatacun, meje rê xi tjin ngu tacun xi macjain naja Jesús ta, tsêhê xi cjuatacun naja ne, cachjahaxin rê cjuatsehen xi cún tsêhê xi sacuaha xi caxinchutaha rê jni, hane yojo naja ne, sacuaha xi cafengui cojo nandá tyahi. ²³ Meje rê xi hacuiin nismetacun cjuandaja xi nújan xi vetahan tacun ta, tsêhê xi me xi cachja cojo naja yêjê cjuandaja vêhê. ²⁴ Meje rê xi cuinchan chuva rê hacutjin cuisecoon xingueen xingu xingu ngayaan cojo sa xi tjin naja cjuahmutacun hacuaha nihña cjuandaja. ²⁵ Mijí rê xi cuejñaxen xi ma tangun ngayaan sacuaha xcusun rê jingu sa xingueen. Xi meje rê ne, cuma tangun ngayaan cojo sa xi tahan cjuetacun xingueen xingu xingu ngayaan, hitsê guan ta nixtin xi cuinduva Jesús ne, chutsejen ta ha tijima tiña.

Handajasa cjuatjo casacu naja cjuahñu xatsê, peru suaain cahndê xi tuyjê nihña cjuatsehen

²⁶ Cuatjin meje rê xi nihña ta sa xi ngu xingueen xi ha ndaja cafahatsja me cjuá xi ha cjuaquixi cjuenduju me cojo ngu ndiya rê cjuatsehen ne, ha quihndê tsajin sa mé cjuatjo xi cuma cjue ngatsê rê jyê rê me. ²⁷ Cahndê rê vêhê ne, hatuxa sacú rê me castigu, cjue cuetí me xcun ndihi xi ha jima tiña nixtin xi tsicjê rê yêjê xi choho vêê rê Nina. ²⁸ Hya xi ngu xuta tsitjungui me ley rê Moisés ne, cojo jo cojo jyan ni xuta xi tsinguixi me xi cuaintjin sahmi xuta vêhê ne, chja ley ta hatuxa cueya me, hacuaha hisca ngu tsajin yo cumayuma rê tsêhê me. ²⁹ Ngayun ne, ha ndaja hyun ta hitsê sa jercu jyihi camahani castigu meje rê xi cuma xuta xi sune tsufê me Quihndi rê Nina, hacuaha tsingatahacacun me xi tsajin mé vengui chíj rê jni rê Quihndi rê Nina jan, hacuaha choho chja me tsêhê Hasen rê Nina xi jercu casua rê xuta jan cjuandaja. Jni xi tsitjungui xuta jan ne, jni vêhê xi casahmichihin rê compromisu xi cachja Nina, hacuaha ngatsê rê jni vêhê ne, camatyjahi cjuatacun rê xuta jan. ³⁰ Ngayaan ne, ha hyan Nai naja, hane me vêhê xi cachja me cuitjin: “Ngahan satê ná xi sahmengojo cojo xuta tsehen; hatuxa ngahan sahmengojo.” Hacuaha chja nga me ngu ndiya cuitjin: “Ngahan Nai nuju ne, cjuahá chuva xuta naha.” Cuatjin cachja Nai naja. ³¹ Jemu jyê chiracun sa xi ngayaan cjuinenguenyan ngajñi rê castigu xi sahmi Nina, me xi quicun!

³² Peru ninguitsjun nixtin titjun, hya xi ha café cachjuhunnuntsun cjuahasen rê Nina sehe cacaa nuju cojo ngu cjuacjintacun jyê xi casua nuju cjuañihi xi cavatjun camá. ³³ Jiya hora ne, xcun cojo xcun ni choho cachja xuta tsujun hacuaha casua nuju me cjuañihi, hacuaha jiya hora nga ne, cavise-cuun rê xuta xi cuatjin cavatju me camá. ³⁴ Chjá cuatjin ta hacuaha hvê xi hacuaha camayuma nuju me xi hinchá ndavaya. Hacuaha hisca cojo cjuasua caningatuhun xi cachjahataha cjuachan rê yêjê ni xcusun xi ngayun tsujun, tsêhê xi ha hyun ta ngajan ngahnga ne, ha tjin nuju ngu xcusun xi hitsê sa ndaja, xi tsajin nu tsajin nixtin cjuê. ³⁵ Xicanismutacuun cjuatacun xi rcun camahani, ta xi cuatjin cuanguncujun cjuatacun vêhê ne, Nina ne, hatuxa jemu jyê cjuatjo xi sua nuju me. ³⁶ Ngayun ne, meje rê xi scaa nuju cojo cjuacjintacun xi vatjun má, cojo sa xi hya xi cuatjin café canihñu

hacutjin xi meje rë Nina ne, sacú nuju cjuandaja xi ha cachja Nina xi sua nuju me. ³⁷ Xujun rë Nina ne, cuitjin chja:

Ha tu chúva sa nixtin ne,

me xi cuinduva ne, hatuxa cuinduva me, ha quihndë cuindeyaain rë me.

³⁸ Xuta naha xi tsajin jyë rë me ne, sacú rë me cjuahñu xatsë ngatsë rë xi mangucacun me cojo ná;

peru sa xi cuya me cjue ngaxtun me ne, chuyiin ná tsëhë me.

Cuatjin chja xujun rë Nina. ³⁹ Peru ngayaan ne, hacuiin tangun ngayaan cojo xuta xi vuya fi ngaxtun me sehe tsicjë Nina me ta ngayaan ne, tangun ngayaan cojo xuta xi mangucacun me cojo Nina sehe cuaxëtje Nina me.

11

Ninguitsjen xutachanga naja xi jemu camangucacun me cojo Nina

¹ Quihndë ne, hya xi ha camangutacun cojo ngu cjua ne, sacuaaha xi ha tjin naja cjuaquixi xi hatuxa sacú naja ngu xcusun xi vetahan tacun, sacuaaha xi ha hyan xi xcusun xi matsijin ne, hacuaaha cjuaquixi. ² Tsëhë xi xutachanga naja ne, camangucacun me cojo Nina, vëhë xi Nina cachja tsëhë me xi tsajin xi cún rë me xcun Nina.

³ Tsëhë xi mangutacun cojo Nina ne, vijnercun xi Nina cojo cjua ni rë me ne, catsindaja me ngasunhndë, hacuiin cafaha me ngu xcusun xi matsejen xi catsindaja me ngasunhndë vi xi tsejen naja.

⁴ Tsëhë xi camangucacun xutachanga naja Abel cojo Nina ne, hitsë sa ndaja cjuatjo xi casua rë me Nina xi cuma rë cjuatjo xi casua xutachanga naja Caún. Vëhë xi Nina ne, cachja me xi Abel ne, tyahi me cojo cjuatacun rë me. Hacuaha suvá Nina catsingacun me xi cjuatjo xi casua Abel ne, jemu ndaja. Hane tsëhë xi cuatjin camangucacun Abel cojo Nina ne, vëhë xi handasa cahme me, peru hisca quihndë ne, cumachjirëhë sa naja cjuatacun rë me.

⁵ Tsëhë xi camangucacun xutachanga naja Enoc cojo Nina ne, cachjahataha rë me tsëhë ngasunhndë vi, cojo sa xi cueyaain me. Hane ha quihndë casaciin me ta, tsëhë xi Nina cafahataha rë me. Peru chaja sa xi cjuahataha Nina me ne, ha camatsejen xi Nina ne, jemu cachuya rë me tsëhë Enoc. ⁶ Peru sa xi manguaaintacun cojo Nina ne, cumaji nihña xi chuya rë me tsajan. Xuta xi sahmi tiña me tsëhë Nina ne, meje rë xi macjain rë me xi tjin jain Nina, hacuaaha Nina vëhë xi jemu jyë cjuatjo xi sua rë me xuta xi cuacun vangui rë me.

⁷ Tsëhë xi camangucacun xutachanga naja Noé cojo Nina ne, hya xi casua Nina camachaya rë me tsëhë xcusun xi cjëe cuma ne, casahmi me ngu barcu cojo sa xi cuetjutje me cojo xuta rë me. Cuatjin casahmi me ta, tsëhë xi faharcun me Nina. Hane xi cuatjin camangucacun me cojo Nina hacuaaha casahmi me cuatjin ne, ngajan camatsejen xi yëjë sa xuta tsëhë ngasunhndë ne, chajá me. Hane Noé ne, cuatjin camatyjahi me cojo cjuatacun rë me sacuatjin matyjahi ngayaan cojo cjuatacun naja xi mangutacun cojo Nina.

⁸ Tsëhë xi camangucacun xutachanga naja Abraham cojo Nina ne, hya xi cachja Nina xi cuetjuxin me tsëhë nangu hiscan xi tacun me xi cjue me ngu cahndë hiscan xi sua Nina xi cuma tsëhë me ne Abraham ne, cahndë me tsëhë Nina hane cavetju me quiji me, handasa hvíin me jani cuechú me. ⁹ Tsëhë xi camangucacun Abraham cojo Nina ne, caviyujutaha me ngu nangu xín xi cachja Nina xi sua rë me. Hane ndihya tsjian ni caviyuju me cojo quihndi rë me, Isaac cojo Jacob, quihndi xi hacuaaha cojo cjuahatsja cjuandaja xi ha cachja Nina xi sua me jan. ¹⁰ Cuatjin caviyuju Abraham ta, tsëhë xi jemu meje rë me xi cuechú me ngu nandya xi ndaja hñu cun

ndihya rë cojo xihndënaña rë, ngu nandya xi Nina cavejña me cjuatacun rë me hacutjin cuma, hacuaha me vëhë casahmi me. ¹¹ Tsëhë xi camangucacun Abraham cojo Nina ne, Nina casua rë me ngahñu xi cuma sacú rë chjuun rë me quihndi, handasa Sara chjuun rë me ne, hatuxa maji sacú rë me quihndi hacuaha Abraham ne, jemu changá me xi sehe sacú rë chjuun rë me quihndi. Cuatjin camá ta, tsëhë xi camangucacun Abraham xi Nina ne, hatuxa sahmichihin me cjuja xi cachja me. ¹² Vëhë xi ngatsë rë ngu ni Abraham ne, handasa hatuxa ha quihndë tsajin rë me ngahñu xi sacú rë chjuun rë me quihndi ne, peru tjë rë me ne, tangun cjin camá cojo niñú xi yaja ngahnga, tangun cojo tsumi rë tjehe ndachacun xi maji maxqui.

¹³ Yëjë ni xutachanga naja xi cuacun vë ne, mangucacun cuaha me cojo Nina hya xi cahme me. Casacuin rë me cjuandaja xi cachja Nina xi sua rë me, peru sacuaha xi ha cavëë me cjuandaja vëhë hane jemu ndama rë me. Cachja quixi me xi sacuaha xuta ngu nangui me xi caviyujutaha me nguehe ngasunhndë. ¹⁴ Hane xuta xi chja cuatjin ne, jemu quixi sua me machaya naja xi tivangui sa me ngu nangui xi cuma tsëhë suvá me. ¹⁵ Sa xi catsinguitsjen sa me nangui hiscan cavetju me ne, tjin sa rë me chuva rë xi camá cavuya me jan. ¹⁶ Peru me xi cuacun vë ne, xi meje rë me ne, ngu nangui xi cuma tsëhë suvá me ngajan ngahnga hiscan tacun Nina. Vëhë xi Nina ne, ma savaain rë me xi hmi rë me Nina rë xutachanga naja xi cuacun vë, tsëhë xi ha tjin ndaja rë Nina ngu nandya xi cumá rë me.

¹⁷ Tsëhë xi camangucacun xutachanga naja Abraham cojo Nina ne, hya xi catsichuva Nina me cojo cjuatacun rë me ne, casua Abraham cojo Nina quihndi rë me Isaac. Hane Abraham, me xi cachja Nina xi sua rë cjuandaja ne, cavejñangucacun me xi sua me quihndi ngu rë me, ¹⁸ handasa cuitjin cachja Nina cojo rë me: “Suvá tjë rë quihndi riji Isaac ne, vëhë ni xuta xi cumá tjë riji xi cjuaquixi.” Cuatjin cachja Nina. ¹⁹ Abraham ne, camaçjain rë me xi Nina ne, tjin jain rë me chuva rë xi hisca nima ne, tsicuya me cjuahñu. Cuatjin camá xi sacuaha xi ngajñi rë nima jain cavuya cafahatsja Abraham quihndi rë me.

²⁰ Tsëhë xi camangucacun xutachanga naja Isaac cojo Nina ne, catsinchacun me quihndi rë me Jacob cojo Esaú. Cachja me yëjë mé xi nduva ngascan xi cuma rë quihndi rë me.

²¹ Tsëhë xi camangucacun xutachanga naja Jacob cojo Nina ne, hya xi ha meje cueya me ne, catsinchacun me jima ngu quihndindai rë me xi quihndi rë xutachanga naja José, hacuaha cafaharcun me Nina taha yahangui me bastón rë me.

²² Tsëhë xi camangucacun José cojo Nina ne, hya xi ha meje cueya me ne, caveyanangui me xi cuechú nixtin xi yëjë ni xutachanga naja ne, cuetjuxin me tsëhë nangui Egipto, hacuaha cavitexa me hacutjin cuma cojo rë ninda rë me hya xi ha cahme me.

²³ Tsëhë xi camangucacun xutacha rë xutachanga naja Moisés cojo Nina ne, hya xi catsin Moisés ne, jyan sá caveyahma me, tsëhë xi cavëë me xi quihndinda jan ne, jemu ndajiyihi camahani, hane cavincharcuaain rë me jojo rë me tsëhë cjuja xi cavitexa me xi matitjun xi cueya yëjë ni quihndinda xi xihin tsëhë xutachanga naja.

²⁴ Tsëhë xi camangucacun Moisés cojo Nina ne, hya xi camachangá me ne, catsitjungui me cahndë rë me xi má me quihndi rë na quihndi rë me xi matitjun tsëhë nangui Egipto. ²⁵ Hitsë sa chuyaya rë me xi cjue me choho cuatju me cuma cojo xuta rë Nina, xi cuma rë xi sua me cjuasua xahasen

rë me nguhñu ngu hora ni ngajñi rë cjuatsehen. ²⁶ Catsingatahacacun me xi hitsë sa vengui chjì rë xi scaa rë me xi choho cuichja xuta tsëhë me ngatsë rë xi sahmi tangun me cojo xutachanga naja xi ha Nina cavaxijin me, xi cuma rë xi sacú rë me cjuanchina rë Egipto. Cuatjin catsingatahacacun me ta, tsëhë xi hatuxa quitahacacun me cjuatjo xi sua Nina me ngascan. ²⁷ Tsëhë xi mangucacun me cojo Nina ne, cavetjuxin me tsëhë nangui Egipto, hacuaha hisca cavincharcuain rë me yojo rë me tsëhë xi cjan rë me xi matitjun jan. Caca rë me cojo yëjë ni cjuacjintacun vëhë sacuaha xi tivutsejen me Nina xi matsijin. ²⁸ Tsëhë xi mangucacun me cojo Nina ne, casahmi me suhi tsëhë Pascua, hane cavitexa me yëjë ni xutachanga naja xi cuinchataha me jni rë chu ngajan ya ngahñu rë tingotjo ndava me xingu xingu me, cojo sa xi hora xi cjuehe hasen xi tsiquehen rë quihndi tjun rë yëjë ni xuta ne, tsiquiin rë hisca xi ngu quihndi tjun rë xutachanga naja.

²⁹ Tsëhë xi mangucacun xutachanga naja cojo Nina ne, cavatjucja me Ndachacun Hani sacuaha vatju me nangui quixí. Hya xi camá ne, xi canduva xuta Egipto tivatju me ne, hora vëhë cavuya camatangun nga nandá hane ngajan café xuta xi cuacun vë.

³⁰ Tsëhë xi mangucacun xutachanga naja cojo Nina ne, cavitijñundee me hñchua xondyojo tsëhë nandya Jericó, hane xi cavatju yatu nixtin ne, cavixujne hñchua vëhë. ³¹ Hacuaha tsëhë xi mangucacun ngu na Jericó xi hmí rë Rahab cojo Nina ne, hacuiin hya xi cahme yëjë sa xuta Jericó xi cahndiin tsëhë Nina, hya cahme na xi viteña yojo rë vë ta, tsëhë xi cojo cjuandaja cafahatsja na ngu jo xutachanga naja xi quiji cavutsejensun me nandya Jericó jan.

³² ¿Mé sa xi meje nuju xi cuichjá cojo nuju? ta hisca chutaain sa hora xi cuichjá cojo nuju tsëhë xutachanga naja Gedeón, cojo Barac, cojo Sansón, cojo Jefté, cojo David, cojo Samuel, cojo yëjë sa profeta. ³³ Xuta xi cuacun vë ne, tsëhë xi camangucacun me cojo Nina ne, caca rë me hya xi casahmi me si cojo xuta tsëhë jingu sa nandya, casahmi me xi ndiya rë cjuaquixi, cavetjucaa ngu jo cja xi cachja Nina cojo rë me. Camaji cavuxaha chu xa hñtsua chu hora xi meje siné chu me. ³⁴ Catiin me hya xi cavincha xuta me ngajñi ndihi xi meje cuaca me me. Cavatjuhnga me tsëhë xuta xi meje tsiquehen rë me cojo quicha. Handasa jemu ndaya tjín cacun me ne, casacu rë me ngahñu. Jemu casacu rë me ngahñu hya xi casahmi me si cojo xuta tsëhë jingu sa nandya, caca rë me catsinguijne me xuta xi choho vëe rë me. ³⁵ Ngu jo yachjin ne, cavuya cafahatsja me xuta rë me xi cavuya cjuahñu hya xi cahme.

Peru ngu jo nga xutachanga naja ne, jercu cavaja xuta me. Peru catsingatiin me xi sehenndaya me ta, tsëhë xi mijí tsismicacun me Nina hacuaha meje rë me xi sacú rë me ngu cjuahñu xatsë xi hitsë sa ndajyihí. Vëhë xi caca rë me hya xi cavaja xuta me hisca xi cahme me. ³⁶ Hane ngu jo nga me ne, catsixcuehyu xuta me, hacuaha cavaja xuta me cojo cuarta rë chu, hisca quiji me ndavaya hacuaha camahñu me cojo cadena. ³⁷ Catsiquehen xuta me cojo ndyojo, cavatëcja vasen xuta me cojo quicha nehñu, catsiquehen xuta me cojo quicha, catsujyihya nguehe catsujyihya ngajan me tixtë rë me chuxin rë chu tsánga cojo chuxin rë chu tentsun. Jemu camachaja rë me, jemu jyë cjuañihí cavatju me camá, choho casahmi xuta cojo rë me. ³⁸ Xutachanga naja xi cuacun vë ne, hisca vechiin chuya rë xi sacú rë ngasunhndë me. Catsujyihya me ngajan ngu xín camahani hiscan naxindya, hiscan nguijo, hisca ngu ngojo naxí caviyuju me.

³⁹ Peru xuta xi cuacun vë ne, handasa ha cavetjundaja me ngatsë rë xi mangucacun me cojo Nina ne, peru hisca xi ngu me casacuiin rë me cjuandaja xi ha cachja Nina xi sua rë me, ⁴⁰ tsëhë xi Nina ne, hya xi catsingatahacacun me ngatsë naja ne, ha cavejñangucacun me xi sahmi me ngu xcusun xi hitsë sa ndaja, xi hisca nixtin quihndë ne, sahmi Nina xi cuechutaha xutachanga naja xi cuacun vë yëjë ni hacutjin xi meje rë Nina xi cuechutaha me, sacuatjin tisahmi Nina cojo naja ngayaan quihndë.

12

Meje rë xi cuejñahñu cjuatacun naja cojo Jesús

¹ Vëhë xi ngayaan ta ha jemu cjin xutachanga naja xi machaya naja xi camangucacun me cojo Nina ne, meje rë xi cuejñaxen yëjë ni xcusun xi sahmindya naja, hacuaha cuejñaxen cjuatsehen xi mijí cjuexin tsajan, hacuaha nihña ngahñu xi scaa naja cuanguen nduju cojo ndiya xi Nina cavejña me xi cuma naja. ² Hacuaha meje rë xi cuejñahñu cjuatacun naja cojo Jesús, me xi cavejña ntsacu cjuachacun xi macjain naja hacuaha catsichihin me. Ngatsë rë cjuasua xi cavejña Nina xi cuma rë Jesús ne, cacaa rë me cojo cjuañihi xi casetaha me xcun cru, hisca casahmicuendaain me xi jemu cjuasava xi cuatjin cahme me. Hya xi camá ne, sehe quiji me ngahnga, hane ngajan tacun me taha ladu quixi tsëhë Nina.

Meje rë xi ningatehen xi cueyaquixi naja Nina ndiya

³ Vëhë xi ninguitsjun Jesús, me xi cacaa rë cojo yëjë xcusun xi casahmi xuta tsehen hya xi catsitjungi me Jesús. Ninguitsjun me, cojo sa xi hacuiin cjuenda rë cjuatacun nuju, hacuiin cuma ndaya tacún. ⁴ Ta ngayun ne, hisca cjuaveya cjëë cuechuntuhun xi nihñu ngahñu xi ningatuun rë cjuatsehen. ⁵ Sacuaha xi ngayun ne, canichayun cjuaxi hja Nina cojo nuju sacuaha hja ngu nahmi cojo quihndi rë me xi hja cuitjin:

Hacuiin tu xcuehyu ni cumacjain ri hya xi Nai naja tiveyaquixi me ngaye ndiya, tsan,

⁶ Ta Nai naja ne, quihndi xi hmucacun me ne, veyaquixi me ndiya, hacuaha sahmi me castigu yëjë ni xuta xi fahatsja me sacuaha quihndi rë me.

Cuatjin hja cjuaxan. ⁷ Ngayun ne, caticaa nuju cojo yëjë ni cjuacjintacun, ta xi cuatjin vatjun má ne, Nina tiveyaquixi nuju me ndiya. Nina ne, vutsejen me ngayun sacuaha quihndi rë me ta, cjuaquixi xi tsajin ngu quihndi xi nahmi rë ne, veyaquixiin rë ndiya. ⁸ Peru sa xi Nina cueyaquixiin nuju me ndiya sacuatjin veyaquixi me ndiya tsajan ngayejen ni ne, ngajan matsejen xi hacuiin quihndindaja rë me ngayun. ⁹ Ngayaan ne, hacuaha tjin xutacha naja nguehe ngasunhndë xi cavinchaquixi naja me ndiya, hacuaha cachjahanrcun me. Peru hitsë sa meje rë xi cuinuhyan tsëhë Nina Nahmi naja xi tacun me ngahnga. Xi cuatjin ne, cuechuntahan ngu cjuahñu xatsë.

¹⁰ Me xi cuacun vë ne, cavinchaquixi naja me ndiya ngu jo nixtin ni hacutjin xi má rë me xi ndatjin. Peru xi vinchaquixi naja Nina ndiya ne, ngayaan ndaja tsajan, cojo sa xi cuma tyjahi cjuatacun naja sacuatjin tyjahi cjuatacun rë súvá me. ¹¹ Hya xi tjin yo vinchaquixi naja ndiya ne, hacuiin ndama naja ta choho má naja, hora xi tichja me cojo naja. Peru sa xi cuinuhyan ne, xi cuma ngascan ne, sacú naja cjuandaja cjuajeya xi cuma tyjahi cjuatacun naja.

Mijí rë xi nitjungen Nina

¹² Vêhê xi ngayun xi ndaya tjin tacún xi tivangun cojo ndiya rê Jesús ne, tuhun ngahñu xahasen nuju. ¹³ Ngu quixi tángun ni cojo ndiya rê Jesús, cojo sa xi yo xi ndaya tjin cacun ne, hacuñin chajá tsêhê ndiya rê Jesús ta sacú rê ndiya xi cjuaquixi.

¹⁴ Nihñu ngahñu xi cuinechun ngu cjuandaja ngu cjuajeya cojo yêjê ni xuta, hacuaha nihñu ngahñu xi cuma tyjahi cjuatacun nuju, ta hisca xi ngu xuta ne, cuechiin me xcun Nai naja sa xi hacuñin tyjahi cjuatacun rê me. ¹⁵ Nechun cuidadu cojo sa xi tsajin ngu xuta xi cuechintaain me cjuandaja rê Nina, ta ngaxtun vêhê ne, choho cuma rê me hane tu hitsê tu hitsê ne, tsinguetsun me cjuatacun rê jemu cjin xuta. ¹⁶ Nechun cuidadu cojo sa xi tsajin ngu xuta xi sahmi me cjuatsehen cojo ngu xi hacuñin chjuun rê me. Hacuaha nechun cuidadu cojo sa xi tsajin ngu xuta xi hisca sahmicuendaain me Nina, sacuatjin rê xutachanga naja Esaú, xi casua me yêjê cjuanchina xi satê rê me xi má me quihndi tjún, ngatsê rê ngu comida xi cajnê me. ¹⁷ Ngayun ne, ha hyun ta xi camá ngasca hya xi meje cjuahatsja me ximinchacun rê nahmi rê me ne, cavitjungui me, tsêhê xi ha quihndê tsajin chuva rê xi tsindeya me cjuatacun rê me, handasa hisca cajihnda me xi meje rê me xi cuatjin cuma.

¹⁸ Ha jemu hatsêê xi xutachanga naja ne, quiji casahmi tiña me tsêhê ngu naxi xi tacun nguehe ngasunhndê hiscan xi catí ngu ndihi jyê, hiscan xi jemu jñu camahani, hiscan xi jercu hñu camahani cavanga tjo, ¹⁹ hiscan xi canuhya rê xi fane ngu tyjo, hiscan xi canuhya rê cjuaxi cachja Nina. Hane xuta xi cahndê me cjuaxi vêhê ne, jercu cafehya rê me xutachanga naja Moisés xi ha quihndê cuichjaain sa Nina cojo xuta xi cuacun vê. ²⁰ Cuatjin cachja me ta, tsêhê xi cacaaïn rê me cojo cjuaxi cachja Nina hya xi cachja me cuitjin: “Yo xi cjue cuisane ntsacu hiscan naxi vê ne, meje rê xi cueya cojo ndyojo, handasa ngu chu.” Cuatjin cachja Nina. ²¹ Xcusun vêhê ne, ngu chircun jyê, vêhê xi hisca Moisés ne, cuitjin cachja me: “Jemu tsácjun, ña fatsê ngahan.” Cuatjin cachja me.

²² Peru ngayun ne, casatiin sa nuju cjuacjintacun vêhê ta ngayun ne, canihñutangun cjuatacun nuju cojo Nina xi quicun, me xi tacun ngajan ngahnga, sacuaha nandya xi hmí rê Jerusalén, ndetjún xi hmí Sión. Canihñutangun cjuatacun nuju cojo yêjê jercu tu cjin camahani ángel xi tjin tangun xi sahmi jyê sahmi hnga rê Nina. ²³ Ngayun ne, canihñutangun cjuatacun nuju cojo yêjê xuta xi cahme xi quihndi rê Nina xi tjin tangun ngajan ngahnga hiscan xi siutahaxujun ñihi rê. Yêjê nima vêhê ne, vêhê xi sacuaha quihndi tjun rê Nina. Canihñutangun cjuatacun nuju cojo Nina, Nina xi tsichuva rê yêjê ni xuta cojo cjuatacun rê me. Ngayun ne, canihñutangun cjuatacun nuju cojo hasen rê xuta xi tsajin jyê rê, xi casahmi Nina xi cavechutaha me yêjê ni hacutjin xi meje rê Nina xi cuechutaha me. ²⁴ Ngayun ne, canihñutangun cjuatacun nuju cojo Jesús, me xi sahmitangun rê xuta cojo Nina ngatsê rê ngu compromisu xatsê. Hacuaha canihñutangun cjuatacun nuju cojo jni rê Jesús jan ne, hitsê sa ndaja sua machaya naja tsêhê cjuandaja rê Nina xi cuma rê jni rê xutachanga naja Abel.

²⁵ Nechun cuidadu, hacuñin nitjungun Nina, me xi tichja cojo naja. Ta sa xi xutachanga naja cavatjinhngaain me tsêhê castigo hya xi catsitjungui me Moisés, me xi cachja cjuaxi rê Nina cojo xuta nguehe ngasunhndê ne, hitsê guan ngayaan, sa xi nicuyan taha ngaxtuun tsêhê Jesús, me xi tichja cojo naja hisca ngajan ngahnga. ²⁶ Sacuaha nixtin rê xutachanga naja jan ne, ña nangui cafiniya cojo cjuaxi cachja Nina, peru quihndê ne, chja me cuitjin: “Ngu ndiya sa tsiniya nangui, peru hacuñin suvá nangui ni tsiniya ta cojo

ngahnga tsiniya.” Cuatjin chja Nina. ²⁷ Hya xi chja me cjua xi “ngu ndiya sa” ne, sua machaya naja xi chjahaxin rë yëjë ni xcusun xi finiya, cuma cuinújan ne, yëjë ni xcusun xi Nina casahmi me, cojo sa xi cuiyuju xcusun xi maji finiya. ²⁸ Vëhë xi quihndë ne, tahan nacuehji rë Nina ngatsë rë xi tiviseen ngahma gobiernu rë me; gobiernu vëhë ne, vëhë xi maji finiya. Hane xi cuatjin nihña ne, chjahanrcun Nina sacuatjin xi chuya rë me, cojo yëjë ni cjuandaja cjuajeya tsëhë xi ngayaan ne, rcun me. ²⁹ Cuatjin meje rë xi nihña ta Nina naja ne, tsicjë me yëjë ni xi cjuatsehen sacuatjin rë ngu ndihi jyë xi tsicjë cuaca rë yëjë ni xcusun xi ma ti.

13

Meje rë xi nihña hacutjin xi chuya rë Nina

¹ Tángun nduju cojo xcusun naja xi nihñahmutacun xingueen sacuaaha xi ngu jni ngu yojo naja. ² Hacuini nichayun xi cojo cjuandaja chjuhunnstun xuta ngu nangui xi cjeuhe nangui nuju ta tjin ngu jo xutachanga naja ne, cuatjin cafachatsja me xuta ngu nangui xi cafehe nangui rë me ne, hisca hvíin me ne, ángel xi cafachatsja me jan.

³ Ninguitsjun xuta xi hinha me ndavaya. Nihñucuendun sacuaaha xi cojo ngayun nechunyun cojo rë me ndavaya. Hacuaha ninguitsjun xuta xi choho sahmi jingu sa xuta cojo ta, tsëhë xi ngayun ne, tjin ngu nixtin ne, hacuaaha cuma cuatjun cuatjin. ⁴ Ngayujun ni ne, meje rë xi chjuhuncun xi hmí rë cjuavixan. Hisca ngu ngayun ne, miji rë xi ninguetun ngu cjuavixan xi ha tjin ndaja ta cuechu nixtin xi Nina ne, sahmi me castigu xuta xi sahmi me cjuatsehen cojo ngu xi hacuini chjuun hacuini xihin rë me, há tjin chjuun tjin xihin rë me ne, o há tsajin chjuun tsajin xihin rë me.

⁵ Hacuini jercu meje nicujun tujún xi tivangun cojo nixtin nuju. Cata-mangutacun ni cojo xi ha tjin nuju. Cuatjin nihña ta, tsëhë xi Nina ne, cuitjin cachja me: “Hatuxa tsajin nixtin xi tismecácun nuju.” Cuatjin cachja me.

⁶ Vëhë xi jemu ndama naja xi cuitjin nújan:

Nai naja ne, me vëhë xi visecoo ná me; vëhë xi tsacjuun.

¡Ndstu mé sahmi xuta cojo ná ngahan!

Cuatjin nújan.

⁷ Ninguitsjun me xi matitjun ngajñi nuju, me xi cuacun cachja cojo nuju cjua rë Nina. Ningatuhuntacún tsëhë cjuandaja xi cavetjucaa tsëhë xcusun xi casahmi me, hacuaaha catamangutacún cojo Nina sacuatjin camangucacun me xi cuacun vë.

⁸ Yëjë ni cjuatacun xi tjin rë Jesucristu hisca ntsacu cavetsihin ne, cjuatacun vëhë tjin rë me hisca quihndë, hacuaaha cjuatacun vëhë tjin rë me yëjë nixtin xi cju sa. ⁹ Xicatsanguun ndiya rë jingu sa cjuachacun xi hacuini tangun cojo cjuachacun xi cjuaquixi. Hitsë sa ndaja xi ngayaan ne, cumangutacun cojo Nina ngatsë rë cjuandaja rë me, xi cuma rë ngatsë rë cjuachacun xi vicuya yahnga xuta hacutjin xi meje rë xi xinë xi siuhun ta, tsëhë xi cjuachacun xi vicuya xuta xi cuacun vë ne, tsajin mé machjirëhë rë xuta xi tjengui me cjuachacun vëhë.

¹⁰ Cjuaveya rë Jesucristu ne, tangun hitsë cojo cjuatjo xi tu nu tu nu ni cjue xcun Nina ngatsë rë jyë rë yëjë ni xuta. Tangun hitsë ta, tsëhë xi sacuaaha nahmi xi sahmi me xcusun rë xutachanga naja ne, hatuxa cumaji sinë me yojo rë chu xi hme xi sua me sacuaaha ngu cjuatjo vëhë. ¹¹ Ngayujun ni ne, ha ndaja hyun ta nahmi xi matitjun ne, vaha me jni rë chu xi cahme, ficojo me ngajan Cahndë Rcun, xi sua rë me Nina sacuaaha ngu cjuatjo ngatsë rë

jjë rë xuta, peru yojo rë chu ne, cahndë rë xi sinë me ne, cjue ngajan ngu xín tséhë nandya, hane ngajan cjuë cueti. ¹² Cuanitjin rë Jesús ta ngajan ngu xín tséhë nandya cahme me. Cahme me cojo sa xi tsityjahi me cjuatacun rë xuta ngatsë rë jni rë suvá me. ¹³ Ngajan xi ngayaan ne, cuetjunxen tséhë nandya, cuma cuinújan ne, cuetjunxen tséhë xcusun rë xutachanga naja, cuanguentjenguen Jesús, hacuaha meje rë xi scaa naja xi choho chja xuta tsajan sacuatjin choho cachja me tséhë Jesús. ¹⁴ Cuma cuetjunxen tséhë nandya vë ta, tséhë xi nguehe ngasunhdë vi ne, tsajin naja ngu nandya xi cuejña yëjë nu yëjë nixtin ta ngayaan ne, tivinchasen sa nandya xi tsindaja Nina xi cuma ngasca, cuma cuinújan ne, ngajan ngahnga. ¹⁵ Vëhë xi ngayaan ne, xi tivanguen ndiya rë Jesús ne, meje rë xi yëjë ni hora naxenndajan Nina, sacuaha xi titahan ngu cjuatjo xi cuma rë me, cuma cuinújan ne, meje rë xi ndaja cuinújan tséhë me, meje rë xi cuinújanquixen xi tséhë me ngayaan. ¹⁶ Hacuian nichayun xi nihñu cjuandaja hacuaha cuisecun xingun xingu xingu ngayun ta xi cuatjin nihñu ne, sacuaha xi titahun rë Nina ngu cjuatjo xi jemu chuya camahani rë me tséhë.

¹⁷ Tinuhyun tséhë me xi matitjun ngajñi nuju, hacuaha nihñu yëjë hacutjin xi meje rë me xi cuacun vë ta me vëhë xi sahmi cuidadu nuju me hacuaha vë me xi cuechu nixtin xi sua me cuenta cojo Nina. Nihñu ngahñu xi me xi cuacun vë ne, cuma sua rë xahasen rë me, hacuian choho cuma rë me xi tisahmi me xa cuatjin ta sa xi choho cuma rë me ne, tsajin mé machjiréhë xi cuma nuju.

¹⁸ Nihñu oración ngatsë niji ta, tséhë xi ngayin ne, hyin cojo cjuatacun niji xi cjuatacun niji ne, tyjahi, hacuaha hatuxa meje nihñi cjuandaja ngajñi rë tu mé ni cjuacjintacun. ¹⁹ Hacuaha ngahan ne, jercu cjuéhya sa nuju xi cuatjin nihñu oración ngatsë niji, cojo sa xi sua Nina cahndë xi hitsë sa xati cuinduvatjengë nuju.

Nguehe cuijnetaha cju

²⁰ Quihndë ne, ngayaan ne, ha hyan ta Nina ne, sua naja me cjuandaja cjuajeya, hacuaha catsicuya me Nai naja cjuahñu, me xi cavejña ngajñi rë nima. Nai naja ne, hacuaha jemu ndaja sahmi naja me cuidadu sacuaha sahmi cuidadu ngu xuta chu tsánga rë me. Cuatjin ma sahmi Nai naja ngatsë rë jni rë me xi cavetju hya xi cahme me, jni xi casahmichihin rë compromisu xi yëjë nu yëjë nixtin sahmi xa. ²¹ Nina catisua nuju me yëjë cjuandaja rë me, cojo sa xi ngayun ne, cuma nihñu yëjë hacutjin xi meje rë me. Hacuaha catisahmi me cojo naja hacutjin xi chuya rë me, ngatsë rë xi ngayaan ne, tjin tangun cjuatacun naja cojo Jesucristu. Hane ngayaan ne, meje rë xi nihña jyë nihña hnga Jesucristu yëjë nu yëjë nixtin. Cuatjin jain.

²² Ngayujun ni ne, nihñu favor ne, tisiñuju cojo cjuasua cju a xi catsihindu nuju vë ta hacuaha hacuian cjín cju a vë xi catsihindu nuju. ²³ Nguehe tisuá tijimachaya nuju ta cha Timoteo xingueen ne, ha camandaya cha tséhë cjuañihi. Sa xi cjuhe xati cha ne, cuinduvintjenguin nuju ndyá, hane ndyá sacú xingueen. ²⁴ Tuhun ngu nina naha cojo yëjë me xi matitjun ngajñi nuju cojo yëjë sa me xi má ladu rë Nina. Xuta Italia xi xuta rë Nina ne, hacuaha tsingatju me ngu nina nuju.

²⁵ Nina catisua nuju me cjuandaja rë me. Cuatjin jain.

Carta xi catsihindu Santiago

Cjua xi catsihindu Santiago me xi hacuaha yahañihi rë Jacobo

¹ Ngahan Santiago, xi mosu hndixahan tsëhë Nina cojo tsëhë Nai naja Jesucristu ne, tsingátju ngu nina tsujun, ngayujun ni xi xuta ladu rë Nina ngayun, ngayujun ni xi cavitsojo yun ngasunhndë.

Cjuatacun ndaja xi nduva tsëhë Nina

² Ngayujun ni tsan ne, ngajñi rë yëjë ni xcusun cjuacjintacun xi cuátjun cuma ne, meje rë xi ndaja catama rë xahasen nuju ta, ³ tsëhë xi ha hyun ta, hya xi cavatju xi cacaa nuju cojo ngu cjuacjintacun jan ne, sa xi hacuiin canismutacún cjuachacun xi macjain nuju ne, vëhë cuisecoo nuju xi hitsë sa scaa nuju tu mé ni cjuacjintacun xi cuátjun sa cuma. ⁴ Peru nihñu ngujoyë xi scaa nuju cojo yëjë ni cjuacjintacun jan hisca xi cuijnetaha. Sehe ngajan xi cuma yun xuta tyjahi xi chutaha cjuatacun rë xi cuma sahmi yëjë ni cjuandaja.

⁵ Peru sa xi yo yun xi sahmi chaja nuju cjuatacun ne, chjahyun rë Nina, hane sacú nuju ta, tsëhë xi Nina ne, hisca sesuntaha sa hya xi sua naja me, hacuaha hacuiin chjahnga me cojo naja, hya xi chjahyan rë me. ⁶ Peru meje rë xi catamangutacún hora xi chjahyun rë me, hacuiin jo cuma tacún ta, tsëhë xi xuta xi jo má cacun me ne, tangun me cojo tsindyu rë ndachacun xi ficojo rë tjo, xi fi nguehe fi ngajan. ⁷ Xuta xi cuatjin cun me ne, catijnercu me ta tsajin mé xi sua Nina me ta, ⁸ tsëhë xi jo má cacun me, jo xcun jo hntsua me tsëhë yëjë ni xcusun xi sahmi me.

⁹ Peru xuta yuma xi ladu rë Nina me ne, ndaja catama rë xahasen rë me ta, xcun Nina ne, jercu vengui chjí rë me. ¹⁰ Hane xuta nchina xi ladu rë Nina me ne, hacuaha ndaja catama rë xahasen rë me, hya xi cuijnercu me xi yëjë ni cjuanchina rë me ne, hisca venguiin chjí rë xi cuma rë Nina. Xuta nchina ne, cjuë me sacuatjin fë naxu ndexin. ¹¹ Hya xi tjercu ma suë chan ndavá ne, xca jan ne, fë yëjë xi. Hacuaha naxu rë ne, fë vixu. Xcun rë ne, handasa tjercu ndajyihí camahani ne, fë vetsun. Hacuanitjin ni cjuë xuta nchina ngajñi rë cjuayuma xi sahmi me.

Cjuatacun tsehen

¹² Jemu ndaja tsajan ngayaan, sa xi scaa naja cojo yëjë ni cjuacjintacun xi cuátjun cuma ta, hya xi cavatju xi cacaa naja ne, hya sacú naja ngu cjuahñu ndajyihí ngajan xcun Nina. Ta cachja Nina xi, sa xi hmutacun me ne, sua naja me ngu cjuahñu ndajyihí jan. ¹³ Hya xi xahasen naja meje rë xi nihña ngu cjuatacun tsehen ne, mijí rë xi cuinújan xi Nina casua naja me cjuatacun tsehen jan, ta Nina ne, hatuxa tsajin rë me cjuatacun tsehen, hacuaha hatuxa suaain naja me cjuatacun tsehen xi nihña. ¹⁴ Peru cjuatacun tsehen xi meje nihña ne, hatuxa vetju tsëhë xahasen naja suvaan. ¹⁵ Hya xi ningatahantacun xi meje nihña cjuatsehen ne, cjuatacun jan sahmi xi nihña cjuatsehen. Hane sa xi hatuxa ningatehen rë yëjë ni cjuatsehen xi nihña ne, sacuiin cahndë cuechun xcun Nina.

¹⁶ Ngayujun ni tsan ne, mijí ná xi cuma ndacha ngayun. ¹⁷ Yëjë ni cjuandaja ndajyihí xi sacú naja ne, nduva tsëhë ngahnga ta, Nina xi casahmi me yëjë ni ndihí xi siutaha ngahnga ne, me vëhë sua naja me yëjë ni cjuandaja jan.

Ndihi xi siutaha ngahnga jan ne, vindeya xcusun rë ta, tjin hora sua ndavá rë ne, tjin hora suaain ndavá rë. Peru Nina ne, chuva xi tacun ni me, tsajin vindeya cjuatacun rë me. ¹⁸ Hane hora xi camacjain naja cjuá xi cjuaquixi ne, hora hya casua naja me ngu cjuahñu xatsë. Cuatjin casua naja me ta, tsëhé xi meje rë me xi गयाan ne, tjun tjun cuma yaan xuta ladu rë me. Sehe ngaxtun vëhé ne, cjin sa xuta xi hacuaha cuma me ladu rë Nina.

Cuitjin xi chjahanrcun jain Nina

¹⁹ Ngayujun ni tsan ne, hya xi yo cuichja cojo nuju ngu cjuá ne, titjun tinuhyunndujun mé cjuá xi cuichja me. Hacuini ngutjen chjayunngun, hacuini ngutjen cuma cjan nuju. ²⁰ Ta sa xi cjan nuju ne, nihñuu cjuandaja sacuahatjin xi meje rë Nina. ²¹ Peru yëjë ni cjuatsehen ne, meje rë xi tiyujunxun. Hane cjuá rë Nina xi camacjain nuju ne, tetjun cojo cjuandaja cojo cjuajeya cahntsua xahasen nuju ta, tsëhé xi cjuá vëhé ne, cuma cuaxëtje nuju.

²² Hane sa xi tu cuisifuju ni cjuá rë Nina jan, hane nihñuu hacutjin xi chja ne, tu cuindachun suvun ni rë yojo nuju. Vëhé xi hacuini tu cuisifuju ni ta, meje rë xi nihñu yëjë ni hacutjin xi vitexa cjuá rë Nina. ²³ Sa xi tu cuisifuju ni hane nihñuu hacutjin xi vitexa cjuá jan ne, tangun yun cojo ngu cha xi vutsejenya cha xcun cha cojo espeju. ²⁴ Cavutsejenya cha xcun cha hacutjin jyihi cha ne, peru xi cafe cha ne, ngutjen cachaya rë cha hacutjin jyihi cha. ²⁵ Peru hya xi cuisifuju cjuá xi vitexa Nina jan ne, sa xi chutayun sa cjuá, sa xi chayaain nuju cjuá, sa xi nihñu jain hacutjin xi vitexa cjuá jan ne, sacú nuju cjuandaja rë Nina xcun ngasunhndë nuju. Cjuá rë Nina xi cuacun jan ne, hatuxa cjuaquixi, hacuaha cjuá vëhé xi vëhéndaya naja tsëhé ngajni rë cjuatsehen.

²⁶ Sa xi tiningatuhuntacún xi jemu ndaja tichjuhuncun jain rë Nina, ngajni rë xi tujyë choho vetju ntsuvun nújun ne, tu mahya xi chjuhuncun rë Nina ta, tu tivindachun suvun ni rë yojo nuju. ²⁷ Jyan xcusun vihi xi chuya rë Nina Nahmi naja xi nihña: ngu ne, xi chjahanrcun jain me cojo ngu xahasen xi tyahi; má jo ne, xi cuisecoon rë hndixahan cojo chjuun cahan ngajni rë cjuacjintacun rë me; xi ma jyan ne, xi hacuini nihña cjuatsehen.

2

Meje rë xi chjahanrcun yëjë ni xuta

¹ Ngayujun ni tsan ne, quihndë xi macjain nuju Nai naja Jesucristu, me xi tjemu tjin rë cjuandaja ne, mijí rë xi nihñu jyë ngu xuta ne, hane nihñu chuvun nga ngu me. ² Sa xi cuisehen ngu xuta nchina cahntsua yungun nuju, xi hisca oro xtungun rë me hacuaha tjercu ndajyihi tsjan rë me ne, hacuaha cuisehen nga ngu xuta xi yuma cojo tsjan rë me xi jyihi ntsun ntsun me ne, ¿mé cuinújun cojo rë me? ³ Me xi ndajyihi tsjan rë jan ne, ¿há jemu chjuhuncun me, xi cuitjin cuinújun cojo rë me?: “Tinechun nguehe cahndë ndajyihi vihi.” Hane me xi yuma jan ne, ¿há cuitjin cuinújun cojo rë me?: “Ngaye ne, ngajan nechin jan”, o sa tsajin ne: “Nguehe nechin nguehe nangui.” ⁴ Sa xi cuatjin cuinújun ne, ngajan matsejen xi hisca ngajni nuju ne, hacuini tangun xcusun nuju xi nihñu cojo ngayëjë ni xuta. Tinichuvun xingun ni ne, peru cojo ngu cjuatacun tsehen.

⁵ Ngayujun ni tsan ne, tinuhyun cjuá vihi. Nina ne, cavaxijin me xuta xi yuma xcun ngasunhndë, cojo sa xi tjemu ndaja cumacjain rë xuta jan me, hacuaha sacú rë xuta jan cahndë ndajyihi nixtin xi cuetsihin cuitexa jain me

ngajñi rë yějë ni xuta ngasunhdë, sacuatjin xi ha cachja me xi sacú rë yějë ni xuta xi tsihmucacun me Nina. ⁶ Peru ngayun ne, nisavun rë xuta yuma. Peru ¿yo xi choho sahmi cojo nuju ni? ¿Yo xi faha nuju, fi vinchajyë nuju xcun xutaxa rë? Xuta nchina xi cuatjin sahmi cojo nuju. ⁷ Hacuï jain me. Hacuaha xuta xi nchina ne, me vëhë xi choho chja me tsëhë Jesucristu. Hane Jesucristu jan ne, hacuï me xi casua naja ñihi xi tsëhë suvá me.

⁸ Xcun xujun rë Nina ne, camahindu ngu cja xi cavitexa Nina, xi chja cuitjin: “Meje rë xi nihmitacuïn xinguïn sacuahatjin nihmitacuïn yojo rijí.” Sa xi cuatjin jain nihñu ne, jemu ndaja tjin. ⁹ Peru sa xi nihñu jyë ngu xuta hane nihñu chuvun nga ngu me ne, ha canichujún cja xi cavitexa Nina. Hacuaha suvá cja jan ne, vëhë cuinchajyë nuju ta canihñuu hacutjin chja cja jan. ¹⁰ Ta sa xi nichujún ngu cja xi cavitexa Nina ne, handasa nihñu yějë ni cja xi yahnga ne, peru tangun jyë nuju cojo jyë rë ngu xuta xi hndiin camahani tsëhë yějë ni cja xi cavitexa Nina jan. ¹¹ Cuatjin ta, tsëhë xi ngu ni Nina xi cavitexa me catsijo cja vihi. Ngu ne: “Xi canindesiïn cojo rë ngu chjuun, o cojo rë ngu xihin xi xín.” Ngu nga ne: “Xi caniquiïn xuta.” Vëhë xi handasa hacuïïn nindesun cojo rë ngu chjuun, peru sa xi nicuhun ngu xuta ne, ha canichujún cja xi cavitexa Nina jan, hane tjin jyë nuju xcun cja vëhë. ¹² Ngajan xi meje rë xi tinújun hacuaha nihñu cjuandaja, sacua ha xi ha ndiya tsichuva nuju Nina, scutsejen me hacutjin canihñu xi vitexa cja xi vëhëndaya naja. ¹³ Hane sa xi tsajin nuju cjuayumatacun cojo jingu sa ne, hacuaha tsajin rë Nina cjuayumatacun cojo nuju nixtin hya xi tsichuva nuju me. Peru sa xi tjin nuju cjuayumatacun ne, hacuaha tjin rë Nina cjuayumatacun cojo nuju nixtin hya.

Sa xi macjain jain naja ne, nihña cjuandaja

¹⁴ Ngayujun ni tsan ne, sa xi cuinújun xi macjain nuju Jesucristu, peru nihñuu cjuandaja ne, hisca vengui chjiïn rë ta, tsëhë xi Nina ne, cuaxintjiïn nuju me xi cuatjin nihñu. ¹⁵ Hya xi sacú xingun cojo ngu xuta ladu rë Jesucristu xi jemu yuma camahani, xi jercu ntsun tsjian rë me, hacuaha hisca tsajin niñu xi sinë me ne, ¹⁶ ¿há cuitjin cuinújun cojo rë me? “Tangún ni tsan. Xicamacjiintacún. Ndaja tetsun yojo nuju ta jemu hnchan, hacuaha ndaja xinu niñu ta quiji hora.” Peru sa xi tsajin mé catuhun rë me xi cuaja xi sinë me ne, vengui chjiïn camahani rë xi cuatjin cuinújun cojo rë me. ¹⁷ Vëhë xi vengui chjiïn rë xi tu suvá cuinújan ni xi macjain naja Jesucristu nguyëjë rë xi mijí nihña cjuandaja.

¹⁸ Peru tjin ngu cha xi cuichja cuitjin: “Hacjahi xuta xi macjain rë me Jesucristu, handasa sahmi me cjuandaja. Hacjahi xuta xi sahmi me cjuandaja, handasa macjaain rë me Jesucristu.” Peru ngahan cuichjá cojo rë cha jan ta hacuïïn hacjahi xuta ta ¿hacutjin cuma xi macjain jain naja, sa xi hacuïïn nihña cjuandaja? Ngatsë rë cjuandaja xi nihña ne, vëhë tsejen xi macjain jain naja Jesucristu. ¹⁹ Cha vëhë ne, ¿há macjain jain rë cha xi tjin ngu ni Nina? Tjemu ndaja tjin xi cuatjin macjain rë cha. Peru hacuaha xitsehen ne, cuatjin macjain rë, hane ña fatsë xitsehen má xi tsacjun. ²⁰ Tjemu yumahasen cha xi cuatjin cuichja jan. Peru nguehe cuichjá cojo rë cha ngu jo cja, cojo sa xi cuijnercu cha ta, vengui chjiïn rë xi cuinújan xi jercu macjain naja Jesucristu, sa xi mijí nihña cjuandaja. ²¹ Sacua ha xutachanga naja Abraham ne, ha hyan xi hatsëë nixtin ne, camangucacun me xi tsiquehen me quihndi rë me xi hmí Isaac ngajan xcun ngasuncun, sacuatjin xi ha cachja Nina cojo rë me. Hane ngatsë rë xi cuatjin cahndë me tsëhë Nina ne, vëhë xi cachja Nina xi ngu xuta

ndaja me, ngu xuta tyjahi me. ²² Ngajan matsejen ta xcusun xi casahmi me ne, cama tangun cojo cjua xi macjain rë me. Hacuaha ngatsë rë xi cuatjin casahmi me ne, vëhë xi camatsejen ta macjain jain rë me. ²³ Cuatjin camá sacuatjin chja ngu cjua xi camahindu xcun xujun rë Nina, xi chja cuitjin: “Abraham ne, camacjain rë me Nina. Vëhë xi Nina cachja me xi ngu xuta ndaja me, ngu xuta tyjahi me.” Hacuaha cachja Nina tséhë me ta amigu rë me.

²⁴ Cuatjin xi hyan xi chja Nina xi xuta tyjahi yaan sa xi nihña cjuandaja, hacuuiin sa xi tu suvá ni macjain naja. ²⁵ Hacuaha ni tjin ni cavatju na xi hmí rë Rahab, na xi caviteña na yojo rë na. Cama tyjahi xahasen rë na ta, tséhë xi casahmi na ngu cjuandaja, hya xi cojo cjuandaja casua na cahndé xi caviyuju xuta ndava na, xuta xi catsingatju xutachanga naja ngajan nangui rë na. Hacuaha hacjahi ndiya xi catsingacun na me, xi cuetju me cjue me hiscan xi tsajin condra rë me. ²⁶ Sacuatjin xi machjiriin yojo rë ngu nima ta tsajin hasen rë ne, ha cuatjin machjiriin xi macjain naja Jesucristu, sa xi tsajin cjuandaja xi nihña.

3

Hacutjin sahmi neje

¹ Mijí rë xi cjín ngayun cuma yun maestru tséhë cjuachacun tsan ta, ha hyun ta ngayin xi vicuyin cjuachacun ne, hitsë sa tsichuva niji Nina xi cuma rë xuta xi yahnga. ² Ngayejen ni ne, hatuxa cjín cjuatsehen xi nihña. Peru sa xi suvá cjuandaja chja ngu xuta, hane hisca ngu cjua chojyihin chjaain me ne, me vëhë ne, ngu xuta ndaja me, ngu xuta tyjahi me. Hacuaha ma vetjo me yojo rë me. ³ Sacuaha ngu naxin ne, sa xi cueyan frenu hntsu chu cojo sa xi cuihndé chu tsajan ne, vëhë sahmi xi cuma cuanguen cojo chu tu cutjin hiscan xi meje naja. ⁴ Hacuaha sacuaha tjin barcu ne, handasa tjercu jyihi, handasa jemu hñu ngahñu rë tjo xi tsivaha rë ne, peru cha xi cjuicojo barcu jan ne, ngu sasa ni tsiniya cha ngu ya lihndi xi hmí rë tímú, sehe ficojo cha tu cutjin hiscan xi meje cjue cha. ⁵ Hacuaha ni tjin ni neje ta, ngu rquí lihndi ni tséhë yëjë ni yojo naja. Peru handasa lihndi ne, tjemu yehe cjuahaxi xi nújan cojo rë. Sacuaha ngayaan ne, xi cuetahan rë ngu ndihi ne, handasa ngu ndihi lihndi ni ne, peru cuma cuaca rë yëjë ni ngu nguijñacha. ⁶ Hane neje ne, tangun cojo ndihi ta tjemu cjan rë. Tjercu ma chja cjuatsehen. Handasa tjin cahndé rë xi quitaha ngajñi yojo naja ne, peru caa rë tsinguetsun naja. Vëhë xi tjercu choho vatjun má xcun ngasunhndé naja ta, tséhë xi xitsehen ne, vëhë sahmi xi choho nújan. ⁷ Ngayaan xuta ne, camá canimaxun yëjë ni xcusun chu, sacuaha chu nguijña, chu nisë, chu yë, cojo chu ti. ⁸ Peru neje ne, tsajin yo cuma tsimaxu rë ta, hatuxa tsehen yojo vëhë. Saaain cahndé xi cuma maxu. Hacuaha sacuaha nehñu chu yë cjan rë, xi quitsë rë xan rë chu xi tsiquehen naja hya xi faha chu ne, cuatjin neje ta, quitsë rë cjuatsehen xi choho nújan. ⁹ Ha cojo neje ni ne, ndaja nújan tséhë Nina Nahmi naja, hane ha cojo vëhë ni ne, nchaten tséhë xingueen, handasa casahmi naja Nina sacuaha jyihi suvá ni me. ¹⁰ Tséhë ntsuvan ni ne, tecjan cjuandaja cojo cjuatsehen xi vetju nújan. Cuaaintjin camahani xi nújan, tsan. ¹¹ Ngu nandan ne, hatuxa cumaji cuetju tangun nandá xi hyun cojo nandá xi sa. ¹² Hane ngu ya laxa ne, cumaji cuaqui rë tsë. Hacuaha ngu nahñu tutsëjë ne, cumaji sua laxa rë. Hacuaha ni tjin ni nandá xtya ne, suaain nandá yufa.

Cjuatacun xi vengui chjí rë

¹³ Sa xi tjin ngajñi nuju ngu ngayun xi tjemu vechutaha cjuatacun nuju ne, meje rë xi nihñu cjuandaja. Meje rë xi cuma tsejen xi xuta ndaja xuta jeya ngayun, ngatsë rë xi nihñu cjuandaja xi vitexa cjuatacun nuju. ¹⁴ Peru sa xi tjin nuju cjuaxin cahntsua xahasen nuju, hane sa xi meje nuju xi suvun ni ngayun xi ndajyih cuátjun cuma ne, meje rë xi hacuiin nihñu yehe yojo nuju, hacuiin nújun xi tjercu vechutaha cjuatacun nuju ta, quixiin vë. ¹⁵ Ta cjuatacun vëhë ne, hacuiin ngu cjuatacun xi casua Nina ta cjuatacun ni rë xutajyë ngasunhndë vihi, sacuaaha cjuatacun rë xitsehen. ¹⁶ Hiscan xi tjin cjuaxin, hiscan xi tjemu choho me, ngajan ne, tjemu tujyë sahmi xuta, tjemu sahmi me yëjë ni cjuatsehen. ¹⁷ Peru sa xi tjin naja cjuatacun xi nduva tsëhë Nina ne, tjemu tyjahi xahasen naja, tjemu tjin rë cjuajeya xahasen naja, nihña yëjë ni ngu cjuandaja, tjin naja cjuayumatacun cojo xuta, tacun cahndë cjuatacun naja, hacuiin jo má tacun. ¹⁸ Hane sa xi ngatsë rë cjuandaja xi nihña cuma cuijnetaha si xi tjin ngajñi rë xingueen ne, cjuandaja cuinechan cojo xingueen, hane yahnga sa xuta ne, hacuaaha cuetsihin sahmi me cjuandaja.

4

Xuta xi tjercu macacun me cojo ngasunhndë

¹ ¿Mé má cuatjin tjercu nihñu si ngajñi nuju? ¿Mé má cuatjin chicjun cojo xingun? Nihñu ngatsë rë yëjë ni cjuatsehen xi tjercu meje rë xahasen nuju. ² Tu mé ni ne, meje nuju, peru ngatsë rë xi sacuiin nuju ne, vëhë xi nicuhun xingun. Tjin nuju ngu cjuaxin tsëhë tu mé ni, peru ngatsë rë xi sacuiin nuju ne, vëhë xi vetsuhun si cojo xingun, vetsuhun chicjun cojo xingun. Sacuiin nuju xi meje nuju ta, tsëhë xi chjahyuun rë Nina. ³ Hacuaha handasa chjahyun ne, peru sacuiin nuju ta, tsëhë xi hacuiin tsëhë cjuandaja xi chjahyun ta, xi chjahyun ne, tu nicujun ngajñi rë ngu cjuasua xi fehya xahasen nuju. ⁴ Ngayun xi jo xcun jo ntsuvun ne, ¿há hyuun ta sa xi tjenguen xcusun rë xuta ngasunhndë ne, má yaan condra tsëhë Nina? Vëhë xi tu yo ni xi vejñangucacun xi tjengui xcusun rë xuta ngasunhndë ne, sahmi me condra Nina. ⁵ Hacuiin tu cuenda camahindu xcun xujun rë Nina, hiscan xi chja cuitjin: “Nina ne, casua naja me ngu hasen xi tacun cahndë cahntsua xahasen naja. Vëhë xi mijí rë Nina xi cuetjunxen tsëhë ladu rë me.” ⁶ Hacuaha Nina ne, visecoo naja me cojo yëjë ni cjuandaja rë me, ta tjin sa ngu cahndë ngajan xujun rë me xi chja cjuarë me cuitjin: “Nina ne, chuyiin rë me tsëhë xuta xi sahmi yehe yojo rë, peru xuta xi jeya me ne, sua Nina me cjuandaja.” ⁷ Vëhë xi meje rë xi tinuhyun tsëhë Nina. Sa xi nihñuu hacutjin xi meje rë xitsehen ne, cuetjuxin xitsehen tsujun. ⁸ Tejñutsja Nina cjuatacun nuju, hane sehe Nina ne, cuaha nuju me. Tiyujunxun cjuatsehen xi tinihñu, hane ngayun xi jo má tacún ne, nihñu tyjahi xahasen nuju. ⁹ Catamavatacún, hacuaaha chjihndun, tsëhë xi canihñu cjuatsehen. Cahndë rë xi cuéjnu ne, chjihndun, hane cahndë rë xi sua ma nuju ne, choho catama nuju. ¹⁰ Ninguijnu cjuatacun nuju xi chjuhuncun Nai naja, sehe Nai naja ne, sahmi yehe nuju me.

Mijí rë xi nichuvan xingueen

¹¹ Hacuiin choho nújun tsëhë xingun tsan ta, sa xi choho nújun tsëhë xingun ne, tangun vëhë cojo xi choho nújun tsëhë cjuarë vitexa Nina. O sa xi nichuvun xingun ne, tangun vëhë cojo xi nichuvun cjuarë vitexa Nina. Hane sa xi nichuvun cjuarë vitexa Nina jan ne, hacuiin tinihñu hacutjin xi vitexa ta, tinihñu yojo nuju sacuaaha ngu xutaxa rë. ¹² Peru ngu ni me xi cavitexa

hacutjin xi nihña, hane ngu ni me vëhë xi tsichuva me. Me vëhë ni xi cuma cuaxëtje naja me, me vëhë ni xi cuma tsinguetsunya naja me. Peru ngayun ne, ¿yo cavitexa nuju xi nichuvun xingun?

Tsajin yo vëë rë mé xi cuma nchujun ni

¹³ Nguehe cuichjá ngu cjuá. Tjin ngu jo yun xi cuitjin nújun cojo xingun: “Nchujun ni nguini ne, cuétjun cuanguen ngu nangui. Ngajan cuinechan ngu nu xi nihña cjuayuma naja. Cuatjin nihña, sehe sacú naja tujún.” ¹⁴ Peru hisca hyúun hacutjin cuátjun cuma nchujun ni nguini. Ngayaan xcun ngasunhndë naja ne, tangun yaan cojo yufi nangui ta, yufi jan ne, tsejen hora xi nduva. Peru xi tu ngu hora ne, ha cavatjucjin, cafëya. ¹⁵ Vëhë xi hitsë sa ndatjin xi cuitjin cuinújun: “Sa xi Nai naja meje rë me ne, sua sa me cjuahñu naja xi nihña cuitjin cuatjin xa.” ¹⁶ Peru ngayun ne, tjercu nihñu yehe yojo nuju xi nújun cojo xingun hacutjin xi meje nihñu. Hane xi cuatjin nihñu yehe yojo nuju ne, ngu cjuatsehen vëhë. ¹⁷ Hane sa xi ha hyan hacutjin fi yëjë ni cjuandaja, peru mijí nihña ne, tjin jyë naja xcun Nina.

5

Hacutjin cuatju xuta nchina cuma

¹ Quihndë ne, ngayujun ni xi nchina yun ne, meje rë xi chjindayun chjihndun, ngatsë rë yëjë ni cjuachoho xi cuátjun cuma. ² Yëjë ni cjuanchina nuju ne, cuenguichjiin rë ta, tsëhë xi cjuë yëjë cjuehndu. Sacuaha tsjian ndaja nuju ne, cjuë sinë chu quixún. ³ Sacuaha tujún ndaja nuju ne, cuma xutsë. Hane tsëhë xi cuatjin xutsë tujún nuju ne, vëhë tsejen xi canihñuu cjuandaja cojo tujún jan, hane ngatsë rë vëhë ne, cuátjun castigu cuma. Tjercu tivetjun camahani cjuanchina nuju quihndë, nixtin xi ha ndiya cuijnetaha cjuë ngasunhndë. ⁴ Cjëë cjuë cuechjun yëjë ni chjí rë mosu nuju xi casahmi xa nguiña nuju, hane Nai naja ne, me xi ma titjun tsëhë yëjë ni ne, vihndë me cjuá xi tivinchajyë yëjë ni mosu nuju xi quitjun tsëhë. ⁵ Nguehe ngasunhndë vihi ne, tjercu ndajyíhi cavatjun camá, tjercu catuhun rë cjuasua yojo nuju. Peru sacuatjin xi hatuxa vechu nixtin xi cueya chu chinga xi jercu hñucacun chu ne, hacuaha ni tjin ni cuechu nixtin xi cuátjun castigu cuma. ⁶ Ngayun ne, canihñu castigu canicuhun xuta ndaja xuta tyjahi. Hane xuta ndaja xi cuacun jan ne, johó ni rë me xi canihñu cojo rë me.

Meje rë xi cuinechanyan rë Nina cojo jeya hacuaha chjahyan rë Nina

⁷ Vëhë xi tinechunyun cojo jeya tsan, hisca xi cuinduva nga Nai naja. Cha xi sahmi xa nguiña ne, xi cjuë cuincha cha tjë ne, cuejñaya cha cojo jeya hisca xi cuatju chan tsi ne, sehe cuma sacú rë cha ngu cosecha xi ndajyíhi tsëhë xitjë rë cha. ⁸ Hacuaha ni tjin ni, meje rë xi tinechunyun cojo jeya, hacuaha tejñuhñu xahasen nuju ta, tsëhë xi jima tiña nixtin xi cuinduva nga Nai naja. ⁹ Sa xi cuinchunyun xingun tsan ne, hacuaha cojo ngayun cuma yun castigu. Vëhë xi mijí rë xi cuinchunyun xingun ta, tsëhë xi me xi tsichuva naja ne, chaja sa hitsë xi cuinduva nga me. ¹⁰ ¿Há vitsjiin nuju hacutjin cacaa rë yëjë ni xutachanga naja xi cachja me cjuá xi caveya Nina cjuatacun rë me hatsë nixtin? Me xi cuacun vëhë ne, casahmi me cjuetacun ngajñi rë yëjë ni cjuañihi xi cavatju me camá. Hacuaha cuatjin meje rë xi nihñu tsan. ¹¹ Hatuxa nújan xi tjercu ndaja tsëhë me xi cacaa rë cojo cjuañihi. Ngayujun ni ne, ha machaya nuju cjuá xi chja hacutjin cacaa rë ngu xutachanga naja xi hmí rë Job, hya xi cavatju me cjuañihi camá. Hacuaha ha hyun ta, hya

xi cajnetaha cjuañihi xi cavatju me camá ne, tjemu ndaja casahmi Nai naja cojo rë me ta, tsëhë xi Nai naja ne, hatuxa tjín rë me cjuandaja, tjín rë me cjuayumatacun.

¹² Nguehe cuichjá cojo nuju ngu cjua xi tjemu vengui chjí rë tsan. Hora xi tivisiajmu cojo xingun ne, hacuín cuinújun xi vëë Nina, vëë tsuhi, hacuín cuinújun xi vëë tu mé sa ni xcusun. Meje rë xi yëjë ni xi cuinújun ne, cjuaquixi, hacuín cuindachun. Sehe ngajan xi Nina ne, sahmii nuju me castigu.

¹³ Sa xi choho tivatjun jima ne, chjahyun cjuandaja rë Nina. Sa xi tjemu sua nuju ne, sun ngu xi nihñu jyë nihñu hnga Nina. ¹⁴ Sa xi hmu nuju ne, chjindayun rë xuta changá xi vitexa ngajñi rë xuta ladu rë Nina, xi tsufë nuju me aceite hacuaha cjuehya me cjuandaja rë Nai naja ngatsë nuju. ¹⁵ Sa xi nguñajatacun hora xi chjahyan cjuandaja rë Nina ne, xuta hmu rë jan ne, cumandaja me ta, Nai naja ne, sua rë me cjuahñu. Hane sa xi casahmi xuta hmu rë jan ngu cjuatsehen ne, Nina tsinchataha jyë rë me. ¹⁶ Vëhë xi tijacun jyë nuju cojo xingun, hacuaha chjahyun cjuandaja rë Nina ngatsë rë xingun, sehe cumandaja me. Ngu xuta xi tyjahi cjuatacun rë me xcun Nina ne, hya xi fehya me cjuandaja rë Nina ne, tjercu vengui chjí rë cjua rë me ta, Nina ne, visecoo rë me. ¹⁷ Ngu xutachanga naja xi hmí rë Elías ne, vëhë ngu xuta sacuaha ngayaan. Peru cafehya nguñajacacun me cojo Nina xi cuaain tsi. Hane chuva rë jyan nu vasen ne, cavaain camahani tsi xcun nangui. ¹⁸ Hya xi camá ne, cafehya nga rë me Nina xi cataha tsi, hane cavuya cavaha nga tsi, hacuaha camá nga yëjë ni xitjë.

¹⁹ Ngayujun ni tsan ne, sa xi tjín ngu xuta ngajñi nuju xi cuetjuxin me tsëhë ndiya rë cjuaquixi, hane sa xi tjín ngu yun xi cuiseacun rë me xi cuya cuisehen nga me ndiya rë cjuaquixi ne, ²⁰ ninguitsjun cjua vihi: yo yun xi cuiseacun rë ngu xuta tsehen xi cuetjuxin me tsëhë cjuatsehen xi sahmi me ne, ngatsë nuju ne, cuetjutje me tsëhë castigu xi cuatju me cuma. Hacuaha ngatsë nuju ne, tjercu cjín jyë xi cumanchataha.

Carta xi tjun tjun catsingatju San Pedru

¹ Ngahan Pedru, apóstol tséhë Jesucristu ne, tsingátju carta vihi xi cuma nuju ngayujun ni xi cavitsojo ngayun ngajan distritu Ponto, distritu Galacia, distritu Capadocia, distritu Asia, cojo distritu Bitinia, cahndé ni nechuntuhun. ² Hisca hatsëë ne, Nina ne, cavejñangucacun me cavaxijin me ngayun, hacuaha Hasen rë me ne, caviyujuxin nuju, cojo sa xi cuinuhyun tséhë Jesucristu hacuaha cuma tyjahi xahasen nuju ngatsë rë jni rë me. Nina ne, catitsixuva me cjuandaja cjuajeya xi cuma nuju ngayujun ni.

Cuetahantacun ngu cjuahñu xatsë

³ Nihña jyë nihña hnga me xi Nina Nahmi rë Nai naja Jesucristu cojo Hasen rë me. Jercu hmu camá rë Nina ngayaan, hane ngatsë rë xi Jesucristu cavuya me cjuahñu tséhë ngajñi rë nima. Nina ne, casahmi me xi cavuya catsin ngayaan cojo sa xi cuetahan tacun ngu cjuahñu xatsë, ⁴ hacuaha cojo sa xi satë naja ngu cjuandaja rë Nina xi tsajin nixtin xi cuetsun, hatuxa tyjahi, hacuaha tsajin nixtin cjuëya. Hane yëjë ni cjuandaja vëhë ne, tetjo vëhë ngahnga xi cuma nuju ngayujun ni. ⁵ Hane tséhë xi ngayujun ne, mangutacun cojo Nina ne, vëhë xi me vëhë tisahmi me cuidadu ngayujun ni cojo ngahñu rë me, cojo sa xi cuechuntuhun cjuandaja xi cuaxëtje me ngayun. Hane cjuandaja vëhë ne, ha tjin ndaja rë Nina cojo sa xi tsingacun me hya xi cjuë nixtin xi nechantahan ngasunhndë.

⁶ Tséhë vëhë xi ngayujun ni ndama nuju, handasa hitsë sa nixtin ne, sahmi nguyjë xi jemu cuatjun cjuañihi cuma. ⁷ Cuatjin meje rë xi chutaha nuju, cojo sa xi cumatsejenquixi xi ndaja mangutacun cojo Nina. Sacuaha oro xi ma vetsun ne, ma chütahachuva rë cojo ndihi. Hacuaha ni tjin ni nuju ngayun ne, meje rë xi chutaha chuva rë xi mangutacun cojo Nina. Hane xi cuatjin mangutacun cojo Nina ne, jercu sa vengui chjí rë xi cuma rë oro. Hane xi cuatjin ndaja mangutacun cojo Nina ne, Nina ne, sahmi jyë sahmi hnga me ngayun, jemu ndajyihí cjuandaja xi sua nuju me, hacuaha cjuaharcun nuju me nixtin hya xi cuya cumatsejen nga Jesucristu. ⁸ Ngayun ne, hmutacún Jesucristu handasa cahyuun me, hacuaha mangutacun cojo rë me handasa hacuini tinutsujun me. Vëhë xi jercu ndama rë xahasen nuju ne, xi hisca maji nújun mé xi má nuju cojo xahasen nuju. ⁹ Ngajan xi Nina ne, cuaxëtje me ngayun, ngatsë rë xi jercu ndaja camangutacun cojo rë me.

¹⁰ Profeta ne, jercu cavutahaha camahani me hacutjin xi Nina cuaxëtje me xuta. Hacuí me vëhë xi ha tjun sa cachja me tséhë cjuandaja xi ngascan sua Nina ngayujun ni. ¹¹ Jercu cavutaya profeta xi cuacun jan janihya hacuaha hacutjin cuechú nixtin xi cachja Hasen rë Cristu xi jiya cahntsua xahasen rë me, hya xi tjun sa casua me camachaya rë xuta tséhë yëjë ni cjuañihi xi ngascan cuatju Cristu cuma cojo cjuandaja ndajyihí xi satë rë me ngascan. ¹² Nina ne, casua me camachaya rë profeta xi cuacun jan ta cjuá xi cachja me ne, hacuini tséhë me ndaja ta tsujun ndaja. Hane cjuá vëhë ne, hacuí cjuá xi cachja xuta xi casua me camachaya nuju cjuandajyihí xi chja tséhë Jesucristu ngatsë rë xi Hasen rë Nina xi caningatjun rë tséhë ngahnga ne, cuatjin casua rë me chuva rë xi cuichja me. Cjuá vëhë ne, hisca ángel ne, jercu meje cuijnercu.

Meje rë xi naxenxen yojo naja tséhë cjuatsehen

¹³ Vêhê xi meje rê xi tjin chjine ngayujun ni, hacuaha catiyuju chihin cjuatacun nuju. Ndaja tetuhun tacún tsêhê cjuandaja xi sua nuju Nina nixtin hya xi cuya cumatsejen nga Jesucristu. ¹⁴ Sacuaha quihndi xi ndaja vihndê ne, xicatuun cahndê xi cuitexa nuju cjuatacun tsehen xi tjin nuju hatsêê, hya xi jñu cjuatacun nuju. ¹⁵ Cahndê rê vêhê ne, ngajñi rê yêjê xi nihñu ne, naxunxun yojo nuju tsêhê cjuatsehen cojo sa xi tsêhê Nina cuma ngayun, sacuahatjin Nina, me xi cavaxijinjñi nuju ne, tuxa jercu xín me tsêhê yêjê ni cjuatsehen. ¹⁶ Tsêhê xi xcun xujun rê Nina ne, cuitjin camahindu cjuaxi cachja Nina: “Meje rê xi naxunxun yojo nuju tsêhê cjuatsehen cojo sa xi tsahan cuma ngayun ta, ngahan ne, tuxa jercu xín ngahan tsêhê yêjê ni cjuatsehen.”

¹⁷ Ngayujun ni ne, tsêhê xi “Nahmi” nújun tsêhê me xi texta ni tsichuva cjuatacun rê xingu xingu tucu xcusun xi sahmi me ne, vêhê xi meje rê xi ndaja chjuhuncun Nina nguyêjê rê xi nechuntuhun nguehe ngasunhndê vi. ¹⁸ Ha hyun xi Nina ne, cavaxêtje nuju me tsêhê ndiya xi hacuiin machjirêhê, ndiya xi caviyuju nuju xutachanga nuju. Hacuaha hyun xi hacuiin ngatsê rê ngu xcusun xi cuma cuetsun sacuaha plata cojo oro xi cuatjin casahmi Nina ta ¹⁹ ngatsê rê jni rê Cristu xi cavanga xi jercu machjirêhê, sacuahatjin machjirêhê jni rê cjuaveya rê ngu chu hnditsánga xi tsajin camahani mé má rê chu. ²⁰ Cristu jan ne, casuaxa Nina me hisca chaja sa xi cuejña ngasunhndê, peru quihndê xi tijima chuva nixtin xi nechantahan ngasunhndê vi ne, casua Nina xi catimachaya naja tsêhê me cojo sa xi ndaja cuatjun. ²¹ Ngatsê rê me vêhê ne, ngayun ne, camangutacun cojo Nina, me xi catsicuya Cristu cjuahñu tsêhê ngajñi rê yêjê nima hacuaha casahmi jyê casahmi hnga me Cristu. Vêhê xi mangutacun cojo Nina hacuaha vetuhun tacun me.

²² Ngayujun ni ne, xi tivinuhyun cjuaquixi rê Nina ne, cuatjin canitsiuhun xahasen nuju cojo cjuatacun nuju, cojo sa xi nihmutacún cojo nguñaja ni cjuandaja yêjê sa me xi ladu rê Jesucristu. Ngajan xi meje rê xi hñu nihmutacún xingun cojo nguñaja xahasen nuju. ²³ Ngayujun ni ne, hacuaha cavuya catsin nga ngayun, peru hacuiin tsêhê xuta xi hatuxa hme ta tsêhê ngu tjê xi cueyaain ta cjuaxi rê Nina, cjuaxi sua naja cjuahñu hacuaha tsajin nixtin cjuêya. ²⁴ Xujun rê Nina ne, cuitjin chja:

Yêjê ni xuta ne, sacuaha xca nguñaja me,
yêjê ni xi ndaja tsêhê me ne, sacuaha naxu rê xca jan.

Xca nguñaja jan ne, xí ne, naxu ne, vixu,

²⁵ peru cjuaxi rê Nai naja ne, tsajin nixtin xi cjuêya.

Hane cjuaxi vêhê ne, hacui cjuandajyihî xi casacu camachaya nuju.

2

¹ Vêhê xi ngayujun ni ne, meje rê xi tiyujunxun yêjê ni cjuatsehen, yêjê ni cjuandacha, yêjê xcusun xi sahmi xuta xi jo xcun jo hntsua tjin rê me, yêjê ni cjuaxin, yêjê ni cjuachjataha. ² Sacuatjin rê ngu quihndinda xi meje rê súvá lechi ne, cuatjin catamameje nuju cjuaxi rê Nina, cojo sa xi nguyêjê rê xi tivisehen nuju cjuaxi jan ne, tuxaha sa cjuatacun nuju hisca xi cuetjuntjun. ³ Cuatjin nihñu, sa xi ha camachaya nuju xi Nai naja ne, jercu ndaja me.

Sacuaha ngu ndyojo xi jercu vengui chjî rê ne, cuitjin rê Jesucristu

⁴ Nihñutiñu tsêhê me ta me vêhê ne, quicun me. Me vêhê ne, sacuaha ngu ndyojo xi handasa catsitjungui xuta ne, peru xi cuma rê Nina ne, hatuxa catuxijin rê hacuaha jercu vengui chjî rê. ⁵ Hacuaha ngayujun ni ne, sacuaha

ndyojo xi quicun ne, tuhun cahndē xi cjuaha nuju Nina, cojo sa xi cuma ngayun sacuaaha ngu yungun hiscan xi nechunxun, hane satēxa nuju nihñu xa rē Nina sacuaaha nahmi, xi tuhun cjuandaja nuju xcun Nina. Hane yējē ni cjuandaja vēhē ne, chuya rē Nina ngatsē rē Jesucristu. ⁶Xcun xujun rē Nina ne, cuitjin camahindu cjuā xi cachja Nina:

Ngahan vejñávasen ngu xihin ngajan ndetjún Sión, hane xihin jan ne, sacuaaha ngu ndyojo xi jercu vengui chjǐ rē, xi hacuaaha catuxijin rē xi cuma titjun tsēhē xihndēña; hane xuta xi cumangucacun cojo xihin jan ne, tsajin nu tsajin nixtin xi cuetju sava me.

⁷Hane xi cuma nuju ngayujun ni xi mangutacun cojo Jesucristu jan ne, jercu vengui chjǐ rē me. Peru xi cuma rē xuta xi manguaaincacun me ne, cuetjucaa cjuā xi camahindu xcun xujun rē Nina xi cuitjin chja:

Me xi catsitjungui xuta sacuaaha tsitjungui chjinevexo ngu ndyojo xi chuyiin rē me tsēhē ne,

me vēhē ne, camatitjun me tsajan ngayejen ni.

Cuatjin camahindu. ⁸Hacuaha cuetjucaa cjuā vihi:

Xihin jan ne, sacuaaha ngu ndyojo xi xtenguiya rē xuta, ngu ndyojo xi sahmi xi tsichaja me ndiya rē me.

Cuatjin chja cjuā. Xuta xi manguaaincacun me ne, xtenguiya rē me, tsēhē xi vihndiin me cjuandajiyi xi chja tsēhē Jesucristu. Hatuxa cuatjin cavejña Nina xi cuatjin cuatju me cuma.

Xuta xi tsēhē Nina me

⁹Ngayujun ni ne, ngu tjē xi cavaxijin Nina ngayun, sacuaaha nahmi xi fahacuenda yējē ni xi tsēhē Nina ngayun, xuta xi hatuxa siuxin rē Nina ngayun, hacuaaha xuta xi hatuxa tsēhē Nina ngayun. Cuatjin cun ngayujun ni, cojo sa xi ninguitsujun cjuandajiyi xi chja tsēhē yējē ni cjuandaja xi casahmi Nina, me xi cajindaya nuju xi cavetjunxun tsēhē ngajñi jñu, xi cuisuhun ngajñi hasen ndajiyi rē me. ¹⁰Hatsēē ne, hisca hacuiin xuta rē Nina ngayun, peru quihndē ne, xuta rē Nina camá ngayun. Hatsēē ne, hisca tsajin camayuma rē Nina ngayun, peru quihndē ne, camayuma rē me ngayun.

Meje rē xi cuinechan ndiya rē Nina

¹¹Ngayujun ni xi sacuaaha xuta ngu nangui xi nechunyun ndiya nguehe ngasunhndē vihi ne, vinchangē nuju xi nechunxun tsēhē yējē ni cjuatsehen xi fehya rē xahasen naja, tsēhē xi sacuaaha ngayaan xi vixcaan cojo xingueen ne, cuatjin rē yējē ni cjuatsehen vēhē cojo hasen naja. ¹²Ndaja nihñu ngajñi rē xuta xi hvíin me Nina, cojo sa xi me xi cuacun vē ne, handasa choho cuichja me tsujun quihndē sacuaaha xi ngayun xuta tsehen má yun ne, peru scuēē me yējē ni cjuandaja xi tinihñu, sehe sahmi jyē sahmi hnga me Nina nixtin hya xi cjuahataha Nina jyē rē xingu xingu me.

¹³Ngatsē rē Nai naja ne, tinuhyun tsēhē yējē ni xutaxa rē ngasunhndē vihi, há xi me xi matitjun camahani, ¹⁴há xi xuta xi tsingatju me xi sahmi castigu rē xuta xi choho sahmi hacuaaha cuaxēndaja me xuta xi ndaja sahmi. ¹⁵Cuatjin nihñu ta, tsēhē xi Nina ne, meje rē me xi cjuandaja xi ngayun nihñu ne, sahmi xi xuta xi hvíin ne, cumaji choho cuichja me tsujun. ¹⁶Tágun cojo ngasunhndē nuju sacuaaha xuta xi tsajin camahani mé xi tjin tsavi xi cuma rē me, peru hacuiin ngatsē rē vēhē xi nihñu ngu xcusun cjuatsehen ta, xi meje rē ne, tágun cojo ngasunhndē nuju sacuaaha xi mosu hndixahan rē Nina má ngayujun ni. ¹⁷Chjuhuncun ni yējē xuta. Nihmu tacún yējē ni xi hacuaaha

ladu rë Jesucristu me, meje rë xi rcún Nina, hacuaha chjuhuncun me xi matitjun camahani.

Cjuahmu xi cavatju Jesucristu camá

¹⁸ Ngayujun ni mosu hndixahan ne, tinuhyun tséhë nai nuju, hacuaha chjuhuncun me, hacuiin suvá me xi xuta ndaja cojo me xi jeya ta cojo me xi hngacacun. ¹⁹ Cuatjin nihñu ta jercu chuya rë Nina sacuatjin rë ngu me xi caa rë cojo ngu cjuañihi ngatsë rë xi vihndë me tséhë Nina, handasa tsajin jyë rë me xi cuatjin vatju me má. ²⁰ Sa xi ngayun choho nihñu hane má yun castigu ne, ¿yo ndaja cuichja tsujun xi scaa nuju castigu jan? Peru sa xi ngayun ndaja nihñu hane má ngayun castigu ne, jercu chuya rë Nina sa xi ngayun scaa nuju. ²¹ Nina ne, cajindaya me ngayun xi cuatjin cuatjun cuma. Cristu ne, cavatju me cjuañihi camá ngatsë nuju, hane cuatjin cavejña me ntsacu, cojo sa xi ngayun nihñu sacuatjin casahmi me. ²² Me vëhë ne, hisca ngu cjuatsehen casahmi me, hacuaha hisca ngu cjuandacha ne, cavetjiin cachja me. ²³ Hya xi xuta choho cachja cojo rë me ne, me vëhë ne, hacuiin choho catsicuya me tséhë xuta jan. Hya xi cavatju me cjuañihi ne, hacuiin cavincharcun me xuta jan ta cavetahacacun me Nina, me xi tsichuva rë xuta cojo cjuatacun rë me cojo cjuaquixi. ²⁴ Suvá Cristu jan ne, cavaha me yëjë cjuatsehen naja ngajñi yojo rë me, ngajan xcun cru, cojo sa xi cuma cuetjuxen tséhë cjuatsehen, hane cuma cuangentjenguen ndiya rë cjuaquixi. Ngayun ne, cavetjuntjun ngatsë rë cjuahmu xi me vëhë cavatju me camá. ²⁵ Titjun ne, sacuaha chu tsánga xi cachaja tjin nuju ngayun, peru quihndë ne, cavuyun nga ladu rë Cristu, me xi fahacuenda nuju sacuaha ngu xuta xi fahacuenda rë chu tsánga, cuatjin sahmi nuju me cuidadu.

3

Cuitjin xi meje rë xi cuiyuju xuta cojo chjuun cojo xihin me ndava me

¹ Quihndë ne, ngayujun ni yachjin ne, tinuhyun tséhë xihin nuju xingu xingu ngayun, cojo sa xi yahnga me xi vihndiin me tséhë cjuá rë Nina ne, cuijnecacun me, xi scuëë me xcusun nuju, handasa tsajin mé xi nújun, ² cuenda xi scuëë me xcusun ndaja xcusun jeya nuju. ³ Mijí rë xi jercu nihñuxun cojo yëjë ni ngu xcusun xi sahmi ndacun nuju cojo yojo nuju sacuatjin hya xi vatjutaha nihñu ndacun tsjarcun, hacuaha cojo hya xi nihñuxun cojo adorno tséhë oro, hacuaha cojo hya xi chujun ngu tsjian hnga chjí rë. ⁴ Cahndë rë vëhë ne, meje rë xi nihñuxun cojo yëjë ni ngu xcusun xi hincha cahntsua xahasen nuju sacuatjin hya xi ningacun cjuajeya xi cun yun ta yëjë cjuandaja vëhë ne, jercu venguí chjí rë xcun Nina. ⁵ Hatsëë ne, cuatjin casahmi yachjin xi siuxin me xi cuma rë Nina, yachjin xi cavetaha cacun me Nina. Me xi cuacun jan ne, cavihndë me tséhë xihin rë me. ⁶ Nima Sara ne, cuatjin cahndë me tséhë xutachanga naja Abraham, xihin rë me, hane “nai naha” cachja me tséhë me. Hane ngayujun ni ne, quihndi rë me ngayun, sa xi nihñu yëjë ni cjuandaja hacuaha tsajin mé xi rcún.

⁷ Cuanitjin ni nuju ngayujun ni xihin, xi nechun tangun cojo chjuun nuju xingu xingu yun ne, meje rë xi hyun xi hitsë ni chúva ngahñu rë yachjin. Chjuhuncun me ta, me xi cuacun vë ne, hacuaha chjuhunntsun tangun cojo rë me cjuahñu xatsë xi sua nuju Nina cojo cjuandaja rë me. Cuatjin nihñu ngayun ne, cojo sa xi tsajin mé sahmíndya rë oración xi nihñu.

Hya xi vatjun cjuañihi ngatsë rë nihña cjuandaja

⁸ Quihndë xi tsingújnetaha cuichjá cojo nuju ne, ngayujun ni ne, meje rë xi tjin tangun cjuatacun nuju cojo xingun, meje rë xi tjin tangun xahasen nuju cojo xingun, meje rë xi nihmutacún xingun xingu xingu ngayun sacuaaha xi ngu naa ngu nahmi nuju ngayujun ni. Meje rë xi tjin nuju cjuayumatacun, hacuaaha meje rë xi jeya ngayun cojo cjuatacun nuju. ⁹ Hacuaha cuéyanangë nuju xi mijí rë xi choho nihñu cojo yo xi choho sahmi cojo nuju, hacuaaha sa xi yo choho cuichja cojo nuju ne, mijí rë xi choho chjayunngun tsëhë ta xi meje rë ne, ninchacuntuhun rë. Cuatjin meje rë xi nihñu ta, Nina ne, cajindaya me ngayujun ni xi chjuhunntsun ngu cjuaninchacuntihin. ¹⁰ Tjin ngu cahndë xcun xujun rë Nina xi chja cuitjin:

Me xi meje rë xi ndaja cjue cojo ngasunhndë rë hacuaaha meje rë xi ndaja cuatju cuma ne,

mijí rë xi choho cuichja me hacuaaha mijí rë xi cuichja me cjuandacha;

¹¹ catetjuxin me tsëhë ndiya rë cjuatsehen, hane catisahmi me cjuandaja, catanguise me ndiya rë cjuajeya, hane vëhë catjicojo me.

¹² Cuatjin meje rë ta Nai naja ne, fahacuenda me xuta xi tsajin jyë rë, hacuaaha vihndë me oración xi sahmi xuta jan,

peru Nai naja ne, chuyiin camahani rë me tsëhë xuta xi sahmi cjuatsehen. Cuatjin chja xujun rë Nina.

¹³ ¿Yo choho sahmi cojo nuju sa xi ngayun hatuxa nihñu cjuandaja? ¹⁴ Peru handasa cuatjun cjuañihi cuma ngatsë rë xi nihñu cjuandaja ne, tsimii sahmi rë ta ha tsujun ndaja. Hane xicarcun hisca xi ngu, hacuaaha hacuiin cumacjintacún. ¹⁵ Meje rë xi chjuhunrcun Cristu cojo cjuatacun nuju ta me vëhë xi Nai nuju me. Hacuaha meje rë xi yëjë ni hora ne, tjin chjine ngayujun ni, cojo sa xi tuhun cjuaquixi nuju cojo tu yo ni xi cjuinenguise nuju mé má cuatjin vetuhun tacún Nina, ¹⁶ peru tinújun cojo nguñaja ni cjuandaja cjuajeya. Tángun cojo ngasunhndë nuju cojo ngu xcusun xi ngascan ne, hisca hitsë tsajin cuma sava nuju, cojo sa xi xuta xi choho cuichja me tsëhë cjuandaja xi nihñu ngatsë rë xi tjin tangun cjuatacun nuju cojo Cristu ne, cuetju sava me tsëhë yëjë xi choho chja me tsujun. ¹⁷ Hitsë sa ndaja xi cuatjun cjuañihi ngatsë rë xi nihña ngu cjuandaja, sa xi cuatjin meje rë Nina, xi cuma rë xi cuatjun cjuañihi ngatsë rë xi nihña ngu cjuatsehen. ¹⁸ Cristu ne, ngundiya ni cahme me ngatsë rë jyë naja. Me vëhë ne, tsajin xi cún rë me xcun Nina, peru cahme me ngatsë naja xi tjercu tjin jyë naja, cojo sa xi cuma cuiseen ladu rë Nina. Cristu ne, sacuaaha xihin xi má me ne, catsiquehen xuta me, peru sacuaaha hasen xi hacuaaha má me ne, catsicuya Nina me cjuahñu. ¹⁹ Hane sacuaaha hasen me jan ne, quiji cachja me ngu cju cojo yëjë ni hasen xi hinchahñu. ²⁰ Hane hasen xi cuacun jan ne, hacui xi cahndiin tsëhë Nina, hya xi tacunya tacunya Nina cojo jeya nguyëjë rë xi Noé titsindaja me barcu rë me. Hane ngu jo me xi caxincha me cahntsua barcu jan ne, chuva rë jyin má me xi yëjë me, cavetjutje me hya xi cavatju me xcun nandá. ²¹ Hane nandá jan ne, sacuaaha nandá xi xtenda yaan xi vaxëtje naja quihndë. Hya xi xtenda yaan ne, hacuiin xi tinityjahin yojo naja ta tichjahyan rë Nina ngu cjuatacun tyjahi, ngu cjuatacun ndaja, hane cuatjin vetjuntjen ngatsë rë xi Jesucristu ne, cavuya nga me cjuahñu. ²² Me vëhë ne, quiji me ngahnga, hane tacun me ladu quixi rë Nina. Quihndë ne, me vëhë vixeta me ángel cojo jingu sa xcusun hasen sa hasen ndaja sa hasen tsehen xi hacuaaha matitjun ngajan ngahnga.

4

Meje rë xi ningatahantacun sacuaaha catsingatahacacun Jesucristu

¹ Vêhë xi, sacuatjin Cristu cavatju me cjuañihi nguehe ngasunhdë vihi ne, cuanitjin ni ngayujun ni, meje rë xi taha catamangutacun cojo cjuañihi quihndë, tuxa má sa xi ngascan cuatjun cuma. Cuatjin meje rë ta, me xi ha cavatju cjuañihi camá ne, ha quihndë cuitexaain rë me cjuatsehen, ² hane cjuenduju me cojo ngasunhdë rë me sacuatjin meje rë Nina, hacuiin sacuaaha meje rë cjuatacun naja ngayaan xuta ngasunhdë. ³ Ha jercu canichujun nixtin hatsëë, hya xi canihñu xcusun xi chuya rë xutaxin tséhë. Jercu choho ndiya cavinechunyun, jercu camameje nuju cjuatsehen, jercu camachuhun, jercu catsangun suhi hisca xi jercu si rcu xuta hacuaaha jercu vatjutaha hvi me, hacuaaha jercu cachjuhunrcun nina ndyojo, xcusun xi hatuxa ndajintjin. ⁴ Quihndë ne, xutaxin jan ne, fircun rë me hisca choho chja me, hya xi ngayun ne, matanguaain yun cojo rë me hya xi me vêhë findujú me cojo ndiya rë cjuatsehen xi hinchá me. ⁵ Peru me vêhë ne, cuechú ngu nixtin xi sua me cuenta xcun me xi ha tjin chjine xi tsichuva me xuta xi quicun cojo xuta xi cahme cojo cjuatacun rë xingu xingu. ⁶ Vêhë xi hisca yëjë nima ne, casacu camachaya rë tséhë cjuandajyihi xi chja tséhë Jesucristu, cojo sa xi, sacuaaha hasen xi má jan ne, sacú rë cjuahñu sacuaaha cjuahñu rë Nina. Cuatjin camá handasa, sacuaaha xuta ngasunhdë xi má nima xi cuacun jan ne, ha cachjaháchuva rë xingu xingu cojo cjuatacun rë, sacuaaha chjaháchuva rë yëjë xuta ngasunhdë.

Hacutjin meje rë xi cuisecoon xingueen cojo cjuandaja xi sua naja Nina

⁷ Quihndë ne, ha camatiña nixtin xi cjuë ngasunhdë. Vêhë xi meje rë xi ngayujun ni ne, tiyujun chihin cjuatacun nuju hacuaaha tjin chjine ngayun, xi nihñu oración. ⁸ Hitsë meje sa rë xi nihmutacún xingun xingu xingu ngayun nguñajatacún ta, tséhë xi cjuahmutacun ne, vujnu rë jercu cjin jyë naja. ⁹ Hacuaaha chjuhunnstun xingun xingu xingu ngayun ndya nuju, xi hisca hitsë tsajin choho cuma tacún hya xi chjuhunnstun xingun. ¹⁰ Ngayun xi jercu cachjuhunnstun cjuandaja rë Nina hacuaaha satëxa nuju xi ninguitsujun cjuandaja jan ne, meje rë xi xingu xingu ngayun ne, cuisecon rë xuta xi yahnga, ha chuva rë xi casua nuju Nina ngu cjuandaja. ¹¹ Yo ngayun xi cuinújun ne, tinújun sacuaaha ngu xi chja cjuá rë Nina. Hane yo ngayun xi cuisecon xingun ne, tisecon rë me cojo yëjë ni ngahñu xi sua nuju Nina. Cuatjin meje rë xi nihñu, cojo sa xi ngañi rë tu mé ni cjuacjintacun ne, Nina ne, cuma jyë cuma hnga me cojo Hasen rë me ngatsë rë Jesucristu. Me vêhë ne, hatuxa jyë hnga me cojo Hasen rë me hacuaaha jercu hñu me cojo cjuatacun rë me yëjë nu yëjë nixtin. Cuatjin jain.

Cjuañihi xi cuatjun ngayaan xuta ladu rë Jesucristu

¹² Ngayujun ni ne, mijí rë xi cjuercun nuju tséhë cjuañihi jyë xi vatjun má xi chutahachuva nuju ta, tséhë xi hacuiin hacui ngu xcusun xi cjuercun naja. ¹³ Cahndë xi cjuercun nuju ne, meje rë xi catamasua nuju táha hacutjin tivatjun cjuañihi tijima sacuaaha cjuañihi xi cavatju Jesucristu camá. Cuatjin catamasua nuju, cojo sa xi hacuaaha jercu cumasua nuju nixtin hya xi cumatsejen hacutjin jyë hnga Jesucristu cojo Hasen rë me. ¹⁴ Sa xi xuta choho chja me tsujun ngatsë rë xi tjin tangun cjuatacun nuju cojo Cristu ne, tsujun ndaja ta, vêhë meje cuichja xi Hasen rë Nina xi jercu jyë hnga ne, tivéjña cojo nuju. (Xuta xi cuacun jan ne, hatuxa choho chja me tséhë Jesucristu, peru ngayun ne, nihñu jyë nihñu hnga me.) ¹⁵ Sa xi yahnga

ngayun cuatjun cjuañihi ne, mijí rē xi tsēhē xi caniquhun ngu xuta o sa tsēhē xi canihñu cjuachējē o sa tsēhē xi tu mé sa ngu cjuatsehen o sa tsēhē xi visuhunñu ngajñi rē cjuacjintacun rē xuta xi yahnga. ¹⁶ Peru sa xi yahnga ngayun cuatjun cjuañihi ngatsē rē xi ladu rē Cristu ngayun ne, mijí rē xi cumasava nuju ta meje rē xi nihñu jyē nihñu hnga Nina ngatsē rē vēhē.

¹⁷ Ha cavechú nixtin xi cuetsihin tsichuva Nina xuta cojo cjuatacun rē xingu xingu me, hane cuetsihin me cojo naja ngayaan quihndi rē me. Hane sa xi tjun ngayaan tsichuva Nina ngayaan cojo cjuatacun naja ne, ¿hacutjin cuatju me xi vihndiin tsēhē cjuandajyihí xi cachja Nina? ¹⁸ Hacua ha tjin ngu cahndé xcun xujun rē Nina xi cuitjin chja:

Sa xi xuta xi café jyē rē sehe tu ma vetjutje me ne, ¿hacutjin cuatju me xi hisca cuendaain rē tsēhē Nina cojo me xi jercu sahmi cjuatsehen?

Cuatjin chja xujun rē Nina. ¹⁹ Vēhē xi yējē me xi vatju cjuañihi tsēhē xi cuatjin meje rē Nina ne, meje rē xi catjindujú me cojo cjuandaja xi sahmi me hacua ha catejña me yojo rē me tsja Nina, me xi catsindaja rē me ta, Nina ne, hatuxa sahmi chihin me yējē cjuarē me.

5

Cjua rē Pedru xi vinchangui me xuta ladu rē Jesucristu

¹ Quihndē ne, meje cuichjá cojo nuju ngayujun ni xuta changá xi vitexun ngajñi rē yējē xuta ladu rē Jesucristu. Ngahan ne, hacua ha xuta changá ngahan xi cavēē hacutjin cavatju Jesucristu cjuañihi camá. Hacua ha satē ná ngahan sacuatjin rē me xi cuacun jan cjuandaja xi cuetjuca ngascan.

² Cuichjá cojo nuju xi hacua ha meje rē xi chjuhuncuendun xuta ladu rē Nina xi siuntsun, sacua ha ngu cha xi fahacuenda rē chu tsángu. Cuatjin nihñu nguñaja cjuasua sacuatjin meje rē Nina, hacuiin cjuachan hacua ha hacuiin ngatsē rē xi jercu meje nuju tujún. Chjuhuncuendun me nguñajatacún,

³ hacuiin sacua ha xi ngayun má yun nai tsēhē me ta meje rē xi tejñu ntsacu, cojo sa xi xuta ne, tjengui me ngayun cojo xcusun nuju. ⁴ Ngajan xi hya xi cuinduva nga me xi matitjun ne, ngayun ne, chjuhunntsun cjuandaja xi sua nuju Nina, cjuandaja xi tsajin nu tsajin nixtin cjuēya.

⁵ Cuatjin ngayujun ni xihin xi hitsē ni chúva nu nuju ne, tinuhyun tsēhē xuta changá. Hane ngayujun ni ne, meje rē xi jeya ngayun cojo cjuatacun nuju hacuiin xta yun ngajñi nuju cojo xingun ta tjin ngu cahndé xcun xujun rē Nina xi cuitjin chja:

Nina ne, tsitjungui me xuta xi jercu tjin rē cjuaxta cahntsua xahasen rē, peru xuta xi jercu tjin rē cjuajeya cahntsua xahasen rē me ne, Nina ne, jercu sua rē me cjuandaja.

Cuatjin chja xcun xujun rē Nina. ⁶ Vēhē xi ngayujun ni ne, meje rē xi ninguijnu yojo nuju xi cuinuhyun tsēhē Nina, me xi jercu hñu cojo cjuatacun rē. Cuatjin nihñu cojo sa xi me vēhē ne, sahmi jyē sahmi hnga me yun, hya xi cuechú nixtin rē. ⁷ Tiyujunxun yējē ni cjuacjintacun nuju, tiyujun tsja Nina, tsēhē xi me vēhē ne, vutsejen me ngatsē nuju.

⁸ Ngayujun ni ne, meje rē xi tjin chjine yun hacua ha nechun quicun ta, tsēhē xi Satanás ne, xitsehen xi maji vēē nuju ne, tsujyihí sacua ha ngu chu xa xi jercu titsichan chu, xi vangui chu yo xi sacú ru xi sinē chu. ⁹ Xicaningatuun rē, hane tiyujunhñu cjuatacun nuju xi mangutacún cojo Nina. Cuatjin nihñu ta ha hyun xi yējē sa me xi hacua ha cojo ladu rē Cristu hincha jingujyē ni ngasunhndē ne, hatuxa tjin rē me xi cuatju me yējē ni cjuañihi vēhē

cuma. ¹⁰ Peru xi ha cavatjun cjuañihi hitsë nixtin ne, Nina ne, tsityjahi me cjuatacun nuju, cuiyujuchihin me cjuatacun nuju, cuiyujuhñu me xahasen nuju, hacuaha cuiyuju cahndë me cjuatacun nuju. Nina xi sahmi cuatjin jan ne, hacui me xi tjin rë yëjë ni cjuandaja, hacui me xi cajundaya nuju me xi satë nuju cjuahasen ndajyihi rë me xi tsajin nu tsajin nixtin xi cjuëya, ngayujun ni xi tjin tangun cjuatacun nuju cojo Cristu. ¹¹ Nina ne, hatuxa jemu hñu me cojo cjuatacun rë me yëjë nu yëjë nixtin. Cuatjin jain.

Cjua xi vijnetaha

¹² Ngahan ne, catsihindu nuju ngu jo cjua vëhë, cojo sa xi cuinchangë nuju hacuaha tsinguixë nuju xi cjua vëhë ne, hacui cjuandaja jain rë Nina. Tiyyujunhñu cjuatacun nuju xi cuangunndujun cojo cjuandaja vëhë. Silvanu ne, me xi ndaja fitjengui rë ndiya rë Cristu ne, cavisecoo ná me xi catsihindu nuju.

¹³ Xuta rë yungun nguehe Babilonia, xi hacuaha cavaxijin rë me Nina ne, tsingatju me nina nuju. Hacuaha Marcos xi sacuaha quihndi naha ne, tsingatju cha nina nuju. ¹⁴ Tuhun rë xingun ngu nina, cojo cjuandaja cojo cjuahmutacun tindatsuhun xingun, sacuahatjin xcusun naja. Catisua nuju Nina cjuandaja cjuajeya ngayujun ni xi tjin tangun cjuatacun nuju cojo Cristu.

Carta xi majo xi catsingatju San Pedru

Pedru ne, tsingatju me cjuat tsëhë xuta xi macjain rë me Nina

¹Ngahan xi hmí ná Simón Pedru, mosu rë Jesucristu, hacuaha apóstol tsëhë me ne, tsingatju carta vihi tsujun ngayujun ngayun xi Nina naja Jesucristu cavaxëtje nuju me xi casua nuju ngu cjuatacun xi macjain nuju cuanitjin sacuahatjin ngayin. Cuatjin casahmi me ta Nina hatuxa jyihí tyjahi tyjahi cjuatacun rë me. ²Nina ne, catitsixuva me cjuandaja cjuajeya xi cuma nuju ngayujun ni ngatsë rë xi ndaja hyun Nina cojo Jesús, Nai naja.

Hacutjin cun xuta xi macjain rë me Nina

³Jesucristu xi cojo ngahñu ndajyihí rë me, jyë hnga me ne, cajindaya me yaan xi chan yo me. Hane cuatjin casua naja me yëjë ni xi mameje rë tsëhë cjuahñu xatsë hacuaha tsëhë ngu cjuatacun tyjahi. ⁴Cojo ngahñu vëhë casua naja Nina cjuat rë me xi tjercu tu ndaja vengui chjí rë. Cojo sa xi ngatsë rë cjuat vë ne, ngayun ne cuechuntuhun ngu cjuatacun sacuaha Nina, hacuaha cojo sa xi cuetjuntjun tsëhë xi cuetsun cjuatacun nuju cojo cjuatsehen xi fehya rë xuta. ⁵Hindë ngatsë rë vihi ne, ndaja nihñu ngahñu cojo sa xi ha macjain nuju Nina ne, má tyjahi cjuatacun nuju. ⁶Hane hacuiin cuanitjin ni, ta hacuaha ningascunyun cjuatacun nuju. Sehe tuhun hñu yojo nuju tsëhë cjuatsehen. Hacuaha cuanitjin ne cojo xi nihñu jyë tacún. ⁷Hacuaha cojo xi chjuhuncun Nina, hacuaha cojo xi chjuhuncun xingun, hane hacuiin tu cuanitjin chjuhuncun xingun ta cojo ngu cjuahmutacun.

⁸Sa xi cuatjin ndaja xcusun nuju, hane sa xi nihñu jain sacuatjin vitexa ne, xcun cjuahñu nuju ne, tjercu cuengui chjí nuju hacuaha hacuiin tu mahya ni camachaya nuju tsëhë Nai naja Jesucristu. ⁹Peru xuta xi cuaintjin jyihí xcusun rë me ne, cumá jñu cjuatacun rë me sacuaha ngu rcá me o sacuaha ngu cha xi vutsejen hiscan xi cjin peru hvíin cha mé xi tivutsejen cha. Ngatsë rë xi cachaya rë me xi camanchataha jyë rë me xi ha casahmi me. ¹⁰Vëhë xi ngayujun ni xingueen ne, sa xi nihñu jain sacuatjin vitexa xcusun ndaja jan ne, ngajan machihin cjuat ta Nina ne, cajindaya nuju me hacuaha cavaxijin nuju me ne, hane cuatjin ha tuxa tsajin ngu nixtin xi cuetjuncun tsëhë ndiya rë Nina. ¹¹Cuahatjin jemu ndaja sacu nuju cahndë xi cuisuhun hiscan xi sahmi gobiernu Nai naja Jesucristu, me xi vaxëtje naja, hane tsajin nu tsajin nixtin cuetjuncun.

¹²Vëhë xi vejñacacun xi cúya tsinguitsjen nuju cjuandaja vihi ha ndasa ha hyun hane hacuaha quitahatacun cjuatacun nuju yëjë ni cjuaquixi xi camachaya nuju. ¹³Peru jinguyëjë rë xi tjin ná cjuahñu ne, xi má ná ne, sahmi nguyjë xi cuascaya rë cjuatacun nuju xi tsinguitsjen nuju vi ta, ¹⁴tsëhë xi tacun xati nixtin xi cuejñá ngasunhdë vi, sacuaha ha casua Nai naja Jesucristu camachaya ndaja ná. ¹⁵Hisca hacuaha xati tisahmecácun ne sehe ngajan xi handasa cavéya ne tu mé ni hora cuma cuitsjen nuju tsëhë yëjë ni cjuat vihi.

Cavindeya xcusun rë Jesucristu, hacuaha cavaxëndaja Nina me

¹⁶Catihin camachaya nuju cjuat sacuaha tsëhë ngahñu xi tjin rë Nai naja Jesucristu cojo tsëhë hya xi cuinduva me. Cjuat vëhë hacuiin ngu cuentu ndacha xi ndaja nuhya rë peru cjuaquixi jain. Quixi ta cahyin cojo tuxcuin ta Jesucristu ne, jemu rcun me ta jemu jyë hnga hasen rë me. ¹⁷Hya ne,

Nina nahmi naja ne cāfaharcun rē me hacuaha cavaxēndaja me Jesús ta cjuā rē Nina ne canduva tsēhē ngahnga xi cachja cojo rē me cuitjin: “Vihi quihndi naha xi hmucācun ne, xi ngatsē rē me ne tjercu ndaja má ná.”¹⁸ Hindē ngayin suvin canuhyin cjuā vē ta canduva tsēhē ngahnga hya xi cavinechintihin ngajan cojo Nai naja rcu naxi hiscan cavatju camá.

¹⁹ Cojo xcusun xi cahyun ne, vēhē catsinguixi rē cjuā changá xi catsihindu profeta. Ngayujun ni ne jemu ndaja nihñu xi tivetuhun rcun yējē ni cjuā changá jan. Cjuā jan ne, tangun sahmi sacuaha ngu ndihi xi sua hasen rē hiscan xi jñu, hane cjuecanī rē hisca xi sahasen ne. Hane sacuaha sua hasen rē tiña sahasen xi cuetju niñú seti ne hacuaha Jesucristu sua hasen rē xahasen nuju. ²⁰ Cjuā xi hitsē sa sahmi ngu yējē ni meje rē xi machaya nuju ne, cjuā vihi má: sacuaha yējē cjuā xi catsihindu profeta xcun xujun rē Nina ne, cumajin sesuntaha sa ngu cjuatacun rē xuta ta, ²¹ hisca ngu cjuā jan tsajin xi catsihindu profeta cojo cjuatacun rē suva ni me, ta Hasen rē Nina casua rē me cjuatacun xi cuichja me cjuā jan xi tsēhē Nina.

2

Cuinduva maestru ndacha

¹ Peru nixtin hatsēē ne ngajan nangui rē Israel ne, hacuaha cavetjujñi xuta xi tsejen sacuaha profeta peru tu vindacha me. Hacuaha cuanitjin hindē ne cuetjucun maestru xindacha xi xinchajñi me ngajñi nuju. Me xi cuacun vē ne, tsinguissehnhma me cjuanchacun ndacha. Hisca tsitjungui me Nai naja xi cavaxētje rē me. Vēhē xi nguñhusasa cuechutaha rē me castigu xi satē rē me. ² Ngajan xi tjemu cjín xuta cuisehen cojo me ndiya tsehen vēhē, hacuaha ngatsē rē me ne, choho cuichja yahnga xuta tsēhē ndiya rē cjuaquixi xi cjuecojo naja xcun Nina. ³ Maestru xi cuacun ne, jercu sahmi me cojo tujún. Vēhē xi cuaxē me tsujun cojo cjuandacha xi ndaja nuhya rē. Peru me xi cuacun ne, hisca hatsēē ne tacunvasen castigu xi cuechutaha rē me, tacun cuaha hatuxa maji cuetjutje me tsēhē.

⁴ Cahyun ni ta Nina ne catsinchataain me ángel hya xi casahmi ángel cjuatsehen, ta cacandiya me catsihñu me cojo cadena hiscan jñu cojo sa xi siucuaaha hisca cuechutaha nixtin xi sahmi cuenda me tsēhē. ⁵ Hacuanitjin ne, catsinchataain Nina xuta ngasunhdē hatsēē nixtin ta hisca catsingatju me ngu tsi cjuarcun xi catsicjē rē ngayējē ni xuta tsehen jan. Cavetjutje me ngu tu tu xihin xi hmí rē Noé, ngu xihin xi casua camachaya rē xuta tsēhē ndiya rē cjuaquixi. Hacuaha yatu sa xuta cavetjutje me hya. ⁶ Hacuanitjin ne, casahmi Nina xi cavetsunya nandya Sodoma cojo nandya Gomorra, cavaca me ne hisca xi camá suva ndesu sa rē. Vēhē camá sacuaha ngu ejemplu xi chja xi cuatjin cuatju yējē ni xuta xi sahmi me cjuatsehen. ⁷ Peru hya ne, cavaxētjeñi Nina ngu cha xi tyjahi cjuatacun rē xi hmí rē Lot, cha vēhē ne jemu choho má rē xahasen rē cha tsēhē yējē ni cjuatsehen xi casahmi xuta nandya jan.

⁸ Jemu camá rē cha jan cjuaxti ta, tyjahi cjuatacun rē cha hane nchunchujun ni cavutsejen cha cavihndē cha xcusun tsehen xi casahmi xuta ta tsēhē xi cha vēhē jan ne, jiyajñi cha ngajñi rē me. ⁹ Cuatjin tsejen ta Nina ne, ma vaxētjeñi me xuta tyjahi tsēhē cjuañihi hacuaha ma viyujuvasen me xuta tsehen nguñhma castigu rē me xi cuejñaya me hisca xi cuechutaha nixtin xi cumacuenda tsēhē me. ¹⁰ Quixi jain ta xuta xi sahmi me cjuatsehen xi fehya yojo jyē rē me hacuaha xuta xi tsitjungui me xi tjin rē Nai naja derechu xi vitexa me ne, xuta vēhē ne, viyujuvasen me nguñhma castigu. Me xi cuacun

jan ne, jemu hñu jni rë me, sehñu me cojo cjuatacun rë me hane tsacjuiin me xi choho cuichja me tsëhë ángel xi siu cojo Nina. ¹¹ Peru ha ndasa sa xi ángel ne hitsë sa hñu cjuatacun me xi cumá rë me xi cuacun jan, hacjahi xcusun sahmi ángel ta vetjiincacun cuinchajyë xcun Nai naja.

¹² Xuta tsehen xi cuacun vë ne, jemu chu me, ta ngu chu ne, cjuatacun rë chu xi vitexa ru, hacuiin tsingatahatacun chu. Hacuaha siu chu cojo sa xi chjaha ru sehe cueya chu, hane cuatjin cumachjirëhë chu. Cuanitjin ne xuta jan choho chja me tsëhë yëjë ni xcusun xi vijniircu me ta, tsingataincacun me hacuaha sacuatjin catsijehnduya me cjuatacun hacuaha cjuë cjuehndu me suva me tangun me cojo ngu chu. ¹³ Cuatjin cuatju me ngu cjuañihi sacuaaha casahmi me xi cavatju ñihi xuta. Xi má rë me ne, tjemu tjin rë me cjuasua xi tisahmi me ha tu cutjin ni xi masua rë xahasen rë me hora hya. Nguyëjë rë xi tichinu tangun tsëhë suhi xi tjin nuju ne, me xi cuacun vëhë ne, ngu cjuasava me, ngu xcuehyu hinchajñi me cojo nuju xi tisua me cjuasua yojo rë me cojo ngu cjuandacha.

¹⁴ Xi tu scutsejen ni me jan ngu chjuun ne, hachu cuehya ran xahasen rë me. Fendaain rë me xi sahmi me cjuatsehen. Tsitsehen me xuta xi ndaya cacun. Yëjë fehya rë xahasen rë me ta cuatjin camanga rë. Ha tjinchihin xujun jyë rë me xcun Nina. ¹⁵ Cachaja me ndiya ta, tsëhë xi cavetjuxin me tsëhë ndiya quixi rë Nina. Cafayangui me xcusun xi casahmi Balaam quihndi rë cha Beor. Cha vë ne, jercu casahmi cha cojo tujún, hisca meje rë cha chji rë cjuatsehen. ¹⁶ Hacuaha Nina casahmi me xi ngu chu burra xi majin tsingatahacacun chu cojo cjuatacun ru, peru cojo xta rë xuta cachjataha chu cha jan hane casuaain chu cahndë xi cjue sa cha cojo cjuasca rë cha.

¹⁷ Maestru jan ne, machjiriin cjuatacun rë me. Tangun me cojo ngu ndava nandá xi quixíya, hacuaha tangun me cojo yufi xi ficojo rë tjojne. Nina tjin ndaja rë me ngu cahndë xi cuisehen me hiscan xi jñu cjín ni. ¹⁸ Maestru jan ne, jindayatë me cjuatacun rë me xi sahmi yehe me xi ndastu venguichji rë. Hacuaha tsingascaya rë me cjuatacun rë jingu sa xuta xi cuma meje rë me cjuatsehen xi fehya yojo rë me. Xuta jan ne, sehe tisahmi me ngahñu xi tivetjutje me tsëhë ngajñi rë xuta xi hinchanda ndiya rë cjuandacha. ¹⁹ Chja ndacha maestru xi cuacun ta cuma ndaya xuta jan tsëhë cjuatacun rë me xi vitexa ley, cuatjin chja me. Peru suva ni me ne, cjëë cuma ndaya me tsëhë cjuatsehen. Hane jima ngu ngayaan ne, ha tu jarë ni xi scaa rë tsinguijne naja ne, vëhë scaa rë cuitexa naja tsihñu cjuatacun naja. ²⁰ Cuatjin ne, xuta xi ha vëë me yo xi Nai naja Jesucristu xi vaxëtje naja hane yo xi cavetjuxin me tsëhë yëjë ni ngu cjuatsehen tsëhë ngasunhndë ne, sa xi tsingatihin me xi cuixuya nga me ngajñi cjuatsehen jan ngu ndiya nga ne, hane cjuatsehen jan scaa rë cuitexa rë me ne, hitsë sa sahmi yehe me jyë rë me xi cuma rë titjun. ²¹ Hya hitsë sa ndatjin tsëhë me sa xi camachayin rë me ndiya quixi jan tsëhë xi cuma rë xi titjun quiji ndaja me ne, peru sehe catsismicacun me tsëhë cjuatacun rë me ndiya xi cafahatsja me. ²² Hya xi cuatjin sahmi xuta ne, ngajan tsejen xi quixi jain cjuatacun rë me chja cuitjin: “Naña xi cavesu rë chu ne, vuya jinë chu tsëhë chu hane chu chinga xi sehe tu caffè catsinduya me chu ne, vuya vinduyachajo chu ngajñi ndasi.”

3

Handajasa vindeya rë Nai naja, peru cuiduva me

¹ Vihí má jo carta xi tsihindu nuju, ngayujun ni xingueen. Catsijo carta vi ne, yaha conseju xi ha hyun peru xi meje ná xi tsingascaya rë cjuatacun nuju cojo. ² Ninguitsjun tsëhë cjuatacun rë me hatsëë cachja profeta rë Nina, hacuaha

ninguitsjun tsëhë cjuua xi cachja Nai naja xi vaxëtje naja, cjuua jan xi apóstol cavicuya nuju.

³ Hacuaha hatuxa nihñucueundun tsëhë cjuua vihi: nixtin ngascan rë ngasunhndë ne, hya cumatsejen xuta xi sahmi me cjuatsehen tu cutjin cuehya rë yojo rë me. Me vëhë ne, cuejnucëë me ⁴ cuinenguise me cuitjin: “¿Jani tsejen Cristu? ta, tacunvasen cuaha cjuua xi cuinduva nga me. Peru cafë cahme xuta changá naja ne, hane ha nduva ni chuva xi nduva, cuanitjin sacuahatjin camá hisca xi casahasen ngasunhndë.” Cuatjin chja me. ⁵ Peru quixiin cjuua xi chja me ta, hatuxa mijí cjuahacuenda me tsëhë xcusun xi cama vi: cojo cjuua xi cachja Nina ne, ngasunhndë ne, ha tacun cuaha hisca hatsëë nixtin. Nangui ne, camatangun ngajñi nandá, hacuaha nandá ni ne, casua ngahñu rë ngasunhndë. ⁶ Sehe hacuaha nandá vëhë ni ne, catsinguetsun rë hya xi casesuntë nandá ngasunhndë nixtin vë. ⁷ Hindë ne hacuaha cojo cjuua rë Nina jan ne, ngahnga cojo nangui xi tsejen quihndë ne, ha tetjo cuaha rë Nina peru cojo cjuua vëhë ni ne, sehe cueti cojo ndihi. Ndihi vëhë ne cuaca rë hya xi cjuaháchuva Nina yëjë ni xuta tsehen nixtin xi cjuëya me xi cuma rë Nina.

⁸ Peru ngayun xingueen, chjuhuncueundun tsëhë cjuaquixi vi: xi má rë Nai naja ne, ngu nixtin ne, tangun ni nduju sacuaha ngu mil nu, hane xi ngu mil nu ne, tangun chuva sacuaha ngu nixtin. ⁹ Handasa xi ma tsingatahacacun xuta xi jemu tivindeya rë Nina xi cuma chihin cjuua xi cachja me ne, peru quixiin vë. Nina ne, ta tsijyëcacun me cojo nuju, tisua sa nuju cahndë cojo sa xi tsajin hisca ngu xuta xi chaja me ta, meje rë me xi yëjë ni xuta ne, tsindeya me cjuatacun rë me hane cuisehen me ndiya ndajiyihi.

¹⁰ Peru xi cuechun nixtin xi cuinduva Nai naja ne, ha sacutsja rë cjuëhe me sacuaha xi cjuëhe ngu chëjë xi má nguixun. Sehe ngajan cumá xi ngahnga ne, cuetsunya cojo ngu chircun xi tjercu cjuaneya camahani, hane yëjë xcusun xi camá cojo ne, cjuëya tundecjaya cojo ndihi. Hacuaha nangui ne, cjuë cueti cojo yëjë xcusun xi tjin rë. ¹¹ Tsëhë xi quixi jain xi hatuxa cuatjin cjuë cuetsunya yëjë xcusun vë ni, ngajan xi sahmi ngu jyë xi ngayun ne, ndandaja nihñu ngayun hacuaha tyjahi cjuatacun nuju. ¹² Nechunyun rë nixtin xi cuinduva Nina hane nihñu xati tacun xi xati cumá cjuëhe. Nixtin vëhë ne, ngahnga ne cuetsunya cojo ndihi, hane yëjë xcusun xi camá cojo ne, tundecjaya rë ne, cjuëya. ¹³ Peru ngayaan ne, nechayan rë cahndë xi cachja Nina xi cuiseen, ngu ngahnga xatsë, ngu nangui xatsë hiscan cuinechanchanden cojo suva mé xi tsajin jyë rë.

¹⁴ Vëhë xi ngayujun ni xingueen ne, jinguyëjë rë xi nechunyun rë yëjë ni xcusun vihi ne, nihñu nguñajatacun xi ndandaja nihñu cojo sa xi hya xi cuechutaha me yun ne, tyjahi cjuatacun nuju, tsajin xi cún nuju, hane hacuiin mé cjuachan tjin. ¹⁵ Ningatuhuntacun ngayun ta hindë xi titsijyëcacun Nai naja cojo naja ne xi jemu tafi me ne, vaxëcun rë xi xuta ne, cuetjutje me. Tangun ni chja Pablo xingueen ne, hane hacuanitjin catsihindu nuju tsëhë, sacuahatjin cjuatacun ndajiyihi xi casua Nina me. ¹⁶ Ngajan xi xcun yëjë ni carta xi catsihindu me ne, hacuaha chja me cojo nuju tsëhë yëjë ni xcusun vihi, handasa hinchajñi yahnga cjuua xi tjemu chja vijnercu. Xuta ngarca ne, xuta xi hacuiin nguñajatacun me ne, titsindeya me cjuatacun rë cjuua jan xi chja vijnercu hane hacuaha tsindeya me cjuatacun rë yahnga xujun rë Nina. Xi cuatjin sahmi me ne, tivangui me suva me jyë rë me.

¹⁷ Ngajan xi ngayun, xingueen, hangu ta hya xi chaja sa cumá ne ha camachaya nuju tséhë cjuacjintacun vihi, nechun cuidadu tséhë. Sehe ngajan hacuini mahinda tacun cojo cjuandacha tséhë xuta tsehen ta sehñu cuaha cojo cjuatacun quixi. ¹⁸ Peru catamajyë sa tsujun cjuandaja rë Nina hacuaha catuxaha sa cjuatacun xi tjin nuju tséhë Nai naja Jesucristu, me xi vaxëtje naja. Catama jyë catama hnga me yëjë nu yëjë nixtin. Cuatjin jain.

Xujun titjun, xi catsihindu San Juan

Cumangutacun ta Jesús camá me Quihndi rë Xuta

¹ Tihín cumachaya nuju ngujo cja tsêhë Jesucristu, me xi sua cjuahñu xatsë. Me vëhë xi ha tacun me hisca xi casahasen ngasunhndë. Canuhyin cja xi cachja me. Cahyin yëjë ni hacutjin xi casahmi me. Hisca casatë ntsin me. ² Me xi sua cjuahñu jan ne, camatsejen me. Hane ngayin ne, cahyin me. Vëhë xi titihín cjuaquixi niji, xi titihín tijimachaya nuju ta me vëhë ne, tsajin nu tsajin nixtin xi cavetsihin cjuahñu rë me, hacuaha tsajin nu tsajin nixtin xi cuijnetaha cjuahñu rë me. Ha tacun me ngajan cojo Nahmi rë me ne, peru canduva me nguehe, cama tsejen me ngajñi niji. ³ Vëhë xi titihín tijimachaya nuju cja xi canuhyin cojo xcusun xi cahyin, sehe ngajan xi cuma tangun cjuatacun nuju cojo Nina sacuatjin tjin tangun cjuatacun niji cojo Nina Nahmi naja cojo Jesucristu, Quihndi rë me. ⁴ Vëhë xi cuitjin tihindin nuju, cojo sa xi jemu ndaja cuma rë xahasen niji.

Xi cuanguen nduju cojo Nina ne, má sacuaaha casua hasen rë cjuatacun naja

⁵ Cja xi cachja Jesucristu cojo niji ne, cuitjin fi: Nina ne, hatuxa tjemu ndaja me. Tsajin camahani cjuatsehen hiscan tacun me. Hane ha cja vëhë ni xi tinújan cojo nuju. ⁶ Sa xi cuinújan xi tjin tangun cjuatacun naja cojo Nina hya xi tihñña cjuatsehen ne, tu vindachan ni ta, cjuatsehen xi tihñña ne, chuyiin rë Nina tsêhë. ⁷ Peru sa xi nechan ngajñi rë cjuandaja, sacuatjin rë Nina xi hatuxa tacun me ngajñi rë cjuandaja ne, cuatjin xi cuma tangun cjuatacun naja. Hacuaha cuatjin xi cjuengui xahasen naja tsêhë yëjë ni jyë naja, ngatsë rë xi cahme Jesús, Quihndi rë Nina.

Sa xi cuijacun cojo Nina ne, cumanchataha jyë naja

⁸ Sa xi cuinújan xi tsajin jyë naja ne, tu cuindachan suvaan ni rë yojo naja ta, quixiin xi nújan. ⁹ Peru sa xi cuijacun jyë naja cojo Nina ne, tsinchataha naja me, hacuaha cuaxëxin me yëjë ni cjuatsehen xi hincha xahasen naja. Cuatjin sahmi me ta tjercu ndaja me. Yëjë ni cja xi chja me ne, hatuxa sahmi chihín me. ¹⁰ Sa xi cuinújan xi hisca ngu cjuatsehen cjëë camahani nihña ne, tangun vëhë cojo xi cuinújan xi Nina ne, jemu ndacha me xi chja me xi tjin jyë naja, hacuaha cuatjin cumatsejen xi cja rë Nina ne, cavisiin camahani ngajñi rë cjuatacun naja.

2

Cristu, me xi chjatje ngatsë naja

¹ Titsihindu nuju yëjë ni cja vihi tsan ta, tsêhë xi cja vihi ne, cuicuya nuju xi hacuain nihñu cjuatsehen. Peru sa xi tjin yo yaan xi nihña ngu cjuatsehen ne, hacuaha tjin naja ngu me xi cuichjatje ngatsë naja xcun Nahmi naja. Me vëhë ne, hacui Jesucristu, me xi hatuxa tyjahi. ² Hacuaha me vëhë ne, cavechjitje me tsêhë yëjë ni jyë naja. Peru hacuain tu suvá ni jyë naja ta hacuaha cojo jyë rë yëjë sa xuta.

³ Sa xi nihña jain hacutjin xi vitexa Nina ne, ngajan matsejen xi cjuaquixi xi xuta rë me ngayaan. ⁴ Peru sa xi cuinújan xi hatuxa xuta rë Nina ngayaan hya xi mijí nihña hacutjin vitexa me ne, tjercu ndacha yaan ta quixiin xi nújan. ⁵ Peru hya xi nihña jain hacutjin xi vitexa me ne, hya matsejen xi nihmutacun jain me. Sa cuatjin ne, hyan ta tjin tangun cjuatacun naja cojo me. ⁶ Sa xi

cuinújan xi tjin tangun cjuatacun naja cojo me ne, meje rë xi nechan ngajñi rë cjuandaja sacuatjin cavejña Jesucristu.

Cjuatacun xatsë

⁷ Cjua xi titsihindu nuju vihi tsan ne, hacuiin ngu cjuatacun xatsë xi sehe tivitéxa nuju xi nihmutacun xingueen ta, ha hacui ni cjuatacun xi cavitéxa nuju hya xi tjun tjun camacjain nuju. ⁸ Peru cjuatacun xi titsihindu nuju vihi ne, cuma cuinújan xi sacuaaha ngu cjuatacun xatsë ta, hiscan xi ha cavechu cjuatacun jan ne, tivetsihin tisahmi xuta cjuandaja. Hane vëhë sahmi xi tivetsihin tifë cjuatsehen xi tjercu tjin ngasunhdë. Jesucristu ne, casahmi jain me yëjë ni hacutjin xi vitexa cjuatacun xatsë vihi, hacuaaha ngayujun ni ne, tinihñu hacutjin vitexa cjuatacun xatsë jan. ⁹ Sa xi cuinújan xi nechan ngajñi rë cjuandaja, hya xi choho hyan xingueen ne, quixiin xi nújan ta nechancuaan ngajñi rë cjuatsehen. ¹⁰ Peru sa xi hmutacun xingueen ne, cuatjin matsejen xi nechan ngajñi rë cjuandaja. Hane tsajin mé nihña xi sahmi xi cuixuya xingueen ngajñi rë cjuatsehen jan. ¹¹ Peru sa xi choho hyan xingueen ne, nechan ngajñi rë cjuatsehen, hacuaaha sacuiyiin naja hacutjin ndatjin nihña ta tsëhë xi cjuatsehen xi tinihña ne, sahmi jñu tsajan.

¹² Ngayujun ni tsan ne, tsihindu nuju ta, jyë nuju ne, ha camanchataha ngatsë rë Jesucristu. ¹³ Ngayujun ni xi xuta changá yun ne, tsihindu nuju ta, tsëhë xi ha hyun me xi ha tacun hisca xi casahasen ngasunhdë. Hane ngayujun ni xi cjëë cuma changá yun ne, hacuaaha tsihindu nuju ta ha cacaa nuju cojo xitsehen má titjun.

¹⁴ Ngayujun ni tsan ne, tsihindu nuju ta ha hyun Nina Nahmi naja. Ngayujun ni xi xuta changá yun ne, tsihindu nuju ta ha hyun me xi ha tacun hisca xi casahasen ngasunhdë. Hane ngayujun ni xi hacuiin changá yun ne, hacuaaha tsihindu nuju ta nechun nguñajatacún xi macjain nuju cjua rë Nina, cjua xi quichuhun cahntsua xahasen nuju, hacuaaha cacaa nuju cojo xitsehen ma titjun.

¹⁵ Miji rë xi chuya naja cjuatacun xi tjin ngasunhdë ta, sa xi chuya naja ne, cumaji nihmutacun Nina Nahmi naja. ¹⁶ Cuatjin ta, tsëhë xi yëjë ni cjuatacun xi tjin ngasunhdë vihi, sacuaaha cjuatacun tsehen xi ningatahantacun, sacuaaha cjuatacun xi tjercu meje naja yëjë ni xcusun xi chutsejen, sacuaaha cjuatacun xi tjercu nihña yehe yojo naja ne, yëjë ni cjuatacun xi cuacun vëhë ne, hacuiin nduva tsëhë Nina Nahmi naja ta nduva tsëhë suvá ngasunhdë vihi. ¹⁷ Hane xcusun rë ngasunhdë vihi ne, cojo yëjë ni cjuatacun xi tjercu chuya rë xuta ne, cjuëya. Peru xuta xi sahmi jain me hacutjin meje rë Nina ne, me vëhë ne, tsajin nu tsajin nixtin cjuëya me.

Cjuaquixi cojo cjuandesu

¹⁸ Ngayujun ni tsan ne, ha tijima tiña nixtin xi cjuë ngasunhdë. Ha canuhyun ta cuinduva xu ngu cha xi sahmi condra tsëhë Cristu. Peru quihndë ne, tjemu cjín xuta xi ha tijimatsejen xi condra tsëhë Cristu me. Hane vëhë xi ha hyin ta cama tiña nixtin xi cjuë ngasunhdë. ¹⁹ Xuta xi cuacun jan ne, cavetjuxin me tsajan. Peru hatuxa hacuiin ladu naja me ta, sa xi quixi xi ladu naja me ne, caviyuju me ngajñi naja. Peru cavetjuxin me tsajan, cojo sa xi cuma tsejen ta hacuiin ladu naja me.

²⁰ Ngayujun ni ne, casua nuju Jesucristu Hasen xi tsëhë Nina. Vëhë xi vijnercun cjua xi cjuaquixi. ²¹ Hacuiin tsingátahacacun xi vijniircun cjua xi cjuaquixi ta ha hvë xi vijnercun. Hacuaaha hyun ta cjuandacha ne, hatuxa

sacuiin naja ngajñi rë cjuua xi cjuaquixi. Vêhë xi cuitjin tsihindu nuju cjuua vihi.

²² Tjin xuta xi chja xi Jesús ne, hacuiin Cristu me, hacuiin me xi cavaxijin Nina xi cuaxëtje naja. Hane xuta xi cuatjin chja me ne, hatuxa tjemu ndacha me. Hacuaha xuta xi tsitjungui me Nahmi naja xi tacun ngahnga cojo Quihndi rë ne, me vëhë xi sahmi condra tsëhë Cristu. ²³ Yëjë ni xuta xi tsitjungui Quihndi rë Nina jan ne, tsajin tjin tangun cjuatacun rë me cojo Nahmi rë Quihndi jan. Peru xuta xi macjain rë Quihndi jan ne, hacuaha tjin tangun cjuatacun rë me cojo Nahmi jan.

²⁴ Ninguitsjun yëjë ni cjuua xi canuhyun hisca nixtin hya xi tjun tjun camacjain nuju. Sa xi quichuhun cjuua jan cahntsua xahasen nuju ne, hacuatjin tjin tangun cjuatacun nuju cojo Quihndi cojo Nahmi rë. ²⁵ Hacuaha cachja Cristu xi sua naja me ngu cjuahñu xatsë.

²⁶ Cuitjin tsihindu nuju ta, tsëhë xi tjin xuta xi meje cuindacha nuju me. ²⁷ Peru ngayun ne, Hasen xi tsëhë Nina xi casua Cristu ngayun ne, quichuhun cahntsua xahasen nuju. Vëhë xi hacuiin sahmi nguyjë xi cuinduva xuta cuicuya nuju me ta, tsëhë xi Hasen xi casua me jan ne, tivicuya nuju yëjë ni cjuua. Hane cjuua xi tivicuya nuju ne, hatuxa cjuaquixi, hacuiin cjuandacha. Quihndë ne, cuatjin tangunndujun cojo xi ha macjain nuju Jesucristu, sacuatjin xi ha cavicuya nuju Hasen xi tsëhë Nina jan.

²⁸ Quihndë tsan ne, cúa cuichjá cojo nuju ta tangun nduju cojo xi ha macjain nuju Jesucristu, sehe ngajan xi nixtin xi cuinduva nga me ne, ngayaan ne, hacuiin rcun cuma, hacuaha hacuiin tsisava naja me. ²⁹ Ha hyan ta Cristu ne, hatuxa tyjahi me. Vëhë xi cumangutacun ta yëjë ni xuta ndaja xuta tyjahi ne, me vëhë xi ha camá me quihndi rë Nina.

3

Me xi tsin ngatsë rë Hasen rë Nina ne, sacu rë me cjuahñu xatsë

¹ Tjercu tsihmucacun naja Nina Nahmi naja. Hisca chja me xi quihndi rë me ngayaan. Peru hacuiin tu suvá chja ni me ta cjuaquixi jain xi quihndi rë me ngayaan. Peru xuta tsehen ne, hvín me xi quihndi rë Nina ngayaan ta, tsëhë xi hacuiin xuta rë Nina me. ² Ngayaan tsan ne, quihndë ne, quihndi rë Nina ngayaan. Peru cjëë cumachaya naja mé xcusun xuta cuma ngayaan xi cuma ngascan. Peru ha hyan ta, hya xi cuinduva Cristu ne, cuma ngayaan sacuaha me vëhë ta, tsëhë xi hya ne, chan jain me hacutjin xi jyihi me. ³ Yëjë ni xuta xi tivetahacacen me Cristu ne, sahmi tyjahi suvá me xahasen rë me, sacuatjin tyjahi xahasen rë Cristu.

⁴ Peru yëjë ni xuta xi hinchajñi ngajñi rë cjuatsehen ne, hatuxa hndiin me tsëhë cjuua xi cavitexa Nina. Ta xi hacuiin nuhyaan tsëhë cjuua xi cavitexa Nina ne, vëhë xi hmí cjuatsehen. ⁵ Peru ha hyun ta Cristu ne, canduva me nguehe ngasunhdë, xi cjuahaxin me yëjë ni jyë naja. Hane me vëhë ne, hatuxa tsajin camahani jyë rë me. ⁶ Vëhë xi yëjë ni xuta xi cjuu nduju me cojo xi macjain rë me Jesucristu ne, ha quihndë tsajin hinchajñi me ngajñi rë cjuatsehen. Peru yëjë ni xuta xi hinchajñi cuaha me ngajñi rë cjuatsehen ne, me vëhë xi hatuxa cavijniircu me hacutjin cjuatacun rë Jesucristu, hacuaha hacuiin xuta rë Jesucristu me.

⁷ Ngayujun ni tsan ne, nechun cuidadu xi tsajin yo cuindacha nuju. Xuta xi hatuxa hinchajñi me ngajñi rë cjuandaja ne, me vëhë xi tyjahi xahasen rë me, sacuatjin tyjahi xahasen rë Cristu. ⁸ Peru xuta xi hatuxa hinchajñi me ngajñi rë cjuatsehen ne, tsëhë xitsehen matitjun me ta, tsëhë xi xitsehen

matitjun jan ne, hatuxa hisca ntsacu cavetsihin ne, sahmi cjuatsehen. Vêhê xi canduva Quihndi rê Nina ta, tsêhê xi meje tsicjêya me yêjê ni cjuatsehen xi sahmi xitsehen matitjun jan.

⁹ Xuta xi camá me quihndi rê Nina ne, tsajin hinchajñi me ngajñi rê cjuatsehen ta, tsêhê xi yaha me cjuatacun rê Nina. Hatuxa cumaji xinchajñi me ngajñi rê cjuatsehen ta, tsêhê xi quihndi rê Nina me. ¹⁰ Suvá tsejen yo xi quihndi rê Nina, hacuaha suvá tsejen yo xi quihndi rê xitsehen. Ta tu yo ni xi tsajin hinchajñi ngajñi rê cjuandaja, tu yo ni xi tsihmaaicacun xicjin ne, hacuain quihndi rê Nina.

Nihmu tacun xinguen xingu xingu yaan

¹¹ Cjua rê Nina xi canuhyun hisca ntsacu cavetsihin ne, cuitjin chja: meje rê xi nihmutacun xingueen. ¹² Mijí rê xi nihña sacuatjin casahmi cha Caín ta cha vêhê ne, quihndi rê xitsehen cha, hacuaha catsiquehen cha hntsê cha. Peru ¿há hyun mé ngatsê rê xi cuatjin catsiquehen cha hntsê cha ni? Catsiquehen cha hntsê cha ngatsê rê cjuaxin ta, tsêhê xi yêjê ni xi casahmi cha ne, hatuxa suvá cjuatsehen, hane xi casahmi hntsê cha ne, hatuxa suvá cjuandaja.

¹³ Vêhê xi hacuain cjuercun nuju tsan, hya xi choho scuêê nuju xuta tsehen. ¹⁴ Ngayaan ne, nihmutacun xingueen. Hane cuatjin matsejen xi ha cavetjunxen tsêhê ngajñi rê cjuatsehen, caviseen ndiya rê cjuandaja. Peru yo xi tsihmaaicacun xicjin ne, híncha cuaha ngajñi rê cjuatsehen. ¹⁵ Yêjê ni xuta xi choho vêê xicjin ne, tangun me cojo xuta xi tsiquehen xicjin. Hane ha hyun ta, yêjê ni xuta xi tsiquehen xicjin ne, tsajin rê me cjuahñu xatsê. ¹⁶ Cristu ne, ngatsê rê xi tsihmuacun naja me ne, joho ni rê me xi catsiquehen xuta me. Cuatjin camatsejen xi hmí cjuahmutacun. Hane hacuatjin ngayaan ne, meje rê xi ningatehen xi tsiquehen naja xuta, sa xi cuatjin mameje rê, ngatsê rê xi nihmutacun xingueen. ¹⁷ Ngayaan xi tjin chinê tjin hyun ne, sa xi tsajin naja cjuayumatacun hya xi ma chaya naja xi tjin ngu xingueen xi tsajin mé sinê me tsajin mé cuihi me ne, cuatjin matsejen ta tsajin camahani cjuahmutacun rê Nina cahntsua xahasen naja. ¹⁸ Mijí rê xi tu cuinújan ni xi nihmutacun xingueen tsan ta meje rê xi nihña cjuandaja, cojo sa xi cumatsejen xi tjin jain naja cjuahmutacun cojo xingueen.

¹⁹ Sa xi cuatjin nihña ne, vêhê matsejen xi tsêhê Nina xi cjuaquixi jain ngayaan, hacuaha vêhê xi cumangutacun tu ya ni ni hya xi chjahyan rê me cjuandaja rê me. ²⁰ Hane ha ndasa xahasen naja cuinchajyê naja xcun Nina xi choho nihña ne, peru mijí rê xi cumacjintacun ta, tsêhê xi Nina ne, hitsê sa jyê me cojo cjuatacun rê me xi cumá rê xahasen naja ta, tsêhê xi me vêhê ne, vêê me yêjê ni cjuatacun. ²¹ Ngajan xi sa xi tsajin mé cuinchajyê naja xahasen naja ne, hacuain cumacjintacun hya xi chjahyan rê me cjuandaja rê me. ²² Hane me vehe ne, sua naja me yêjê ni xi chjahyan rê me ta, tsêhê xi tinihña yêjê ni hacutjin xi cavitexa me, hacuaha tsêhê xi yêjê ni xi chuya rê me ne, cuatjin tinihña. ²³ Cjua xi cavitexa naja Nina ne, cuitjin chja: meje rê me xi catamacjain naja Jesucristu, Quihndi rê me, hacuaha meje rê me xi nihmutacun xingueen. Cuatjin cavitexa me. ²⁴ Hane yêjê ni xuta xi vihndê cjua xi cavitexa Nina ne, tjin tangun cjuatacun rê me cojo Nina, hacuaha Nina ne, jiya cahntsua xahasen rê me. Ngayaan ne, hyan xi jiya Nina cahntsua xahasen naja ta, tsêhê xi casua naja me Hasen rê me.

4

Chuva rê profeta ndacha

¹ Ngayujun ni tsan ne, mijí rē xi ngutjen cumacjain nuju tsēhē yējē ni cjuatacun xi cuichja xuta cojo nuju ta titjun chjuhunchuvun cjuatacun jan, ¿há ma tangun cojo cjuatacun rē Nina? Cuatjin meje rē ta, tsēhē xi ngasunhndē ne, tjemu cjin xuta xi tivindacha me. Chja suvá me ta cjuatacun xi vicuya me ne, cjuatacun rē Nina, peru quixiin vē. ² Peru sa xi ngu xuta cuichja quixi me ta Jesucristu ne, camá me ngu xuta ngasunhndē vihi ne, cumangutacún ta, ngajan matsejen xi me vēhē ne, chja jain me cjuatacun rē Nina. ³ Peru xuta xi hacuiin cuatjin chja quixi tsēhē Jesús ne, hatuxa tsajin camahani rē me cjuatacun rē Nina ta tjin rē me cjuatacun tsēhē xuta xi sahmi condra tsēhē Cristu. Ha canuhyun ta hatuxa cuechu nixtin xi cjeuhe ngu cjuatacun xi sahmi condra tsēhē Cristu, peru cuichjá cojo nuju ta cjuatacun vēhē ne, ha hisca hinchajñi ngajñi naja nguehe ngasunhndē. ⁴ Ngayujun ni tsan ne, tjin tangun cjuatacun nuju cojo Nina. Vēhē xi cacaa nuju xi camacjaain nuju tsēhē xuta ndacha xi cuacun jan. Camá cacaa nuju cuatjin ta, tsēhē xi Nina xi jiya xahasen nuju ne, hitsē sa jyē me xi cuma rē xitsehen matitjun xi jiya xahasen rē xuta xi macjaain rē Jesucristu. ⁵ Xuta ndacha xi cuacun jan ne, hatuxa tjin rē me cjuatacun rē xuta xi macjaain rē Jesucristu. Vēhē xi cjuatacun xi vicuya me ne, cjuatacun rē xuta xi macjaain rē Jesucristu, hacuaha yējē ni xuta xi macjaain rē Jesucristu ne, vetaharcu me cjua jan. ⁶ Peru ngayaan ne, tjin tangun cjuatacun naja cojo Nina. Yējē ni xuta xi hacuaha tjin tangun cjuatacun rē me cojo Nina ne, vetaharcu me cjua xi vicuyan. Peru yējē ni xuta xi tsajin tjin tangun cjuatacun rē me cojo Nina ne, vetaharcuaain me cjua xi vicuyan. Cuatjin xi ma sacuse naja yo xi chja cjuaquixi ne, o yo xi vindacha.

Xuta xi tsēhē Nina ne, hacuaha tjin rē me cjuahmutacun xi nduva tsēhē Nina

⁷ Meje rē xi nihmutacun xingueen tsan ta, yējē ni cjuahmutacun ne, hatuxa nduva tsēhē Nina. Yējē ni xuta xi tjin rē me cjuahmutacun ne, quihndi rē Nina me, hacuaha amigu rē Nina me. ⁸ Peru me xi hacuiin tsihmucacun xicjin ne, hacuiin amigu rē Nina me ta, Nina ne, hatuxa tjin rē me cjuahmutacun. ⁹ Nina ne, ngu tutu ni Quihndi xi tjin rē me. Hane ngayaan ne, hyan ta Nina ne, tjin rē me cjuahmutacun cojo naja, tsēhē xi catsingatju me Quihndi rē me ne nguehe ngasunhndē. Cuatjin catsingatju me Quihndi rē me, cojo sa xi sacú naja cjuahñu xatsē ngatsē rē Quihndi jan. ¹⁰ Ngayaan ne, nihmutacun Nina. Peru Nina ne, hitsē sa tsihmucacun naja me. Vēhē xi hisca catsingatju me Quihndi rē me xi cuechjitje ngatsē rē yējē ni jyē naja.

¹¹ Hane tsēhē xi cuatjin catsihmucacun naja Nina tsan ne, vēhē xi hacuaha meje rē xi nihmutacun xingueen. ¹² Nina ne, hatuxa tsajin yo xi cavēē rē me. Peru sa xi nihmutacun xingueen ne, Nina ne, jiya me cahntsua xahasen naja, hane cuatjin matsejen xi tjin jain naja sacuaha cjuahmutacun xi tjin rē Nina.

¹³ Ngayaan ne, hyan ta tjin tangun cjuatacun naja cojo Nina hacuaha hyan ta jiya me cahntsua xahasen naja, tsēhē xi casua naja me Hasen rē me. ¹⁴ Hane ngayin ne, cahyin jain cojo tuxcuin Quihndi rē Nina. Vēhē xi tinújin cojo cjuaquixi ta Nina Nahmi naja ne, catsingatju me Quihndi rē me, xi cuaxētje rē xuta ngasunhndē. ¹⁵ Tu yo ni xi chja cjuaquixi xi Jesús ne, Quihndi rē Nina jain me ne, me vēhē ne, jiya Nina cahntsua xahasen rē, hacuaha tjin tangun cjuatacun rē cojo Nina. ¹⁶ Ngayaan ne, macjain naja hacuaha ha hyan ta Nina ne, hmucacun jain me ngayaan. Nina ne, hatuxa tjin rē me cjuahmutacun. Hane xuta xi tjin rē cjuahmutacun ne, tjin tangun cjuatacun rē me cojo Nina, hacuaha Nina ne, jiya cahntsua xahasen rē me.

¹⁷ Hane hya xi cumachihin cjuahmutacun xi tjin naja ne, ngajan xi hacuiin rcun cuma, hya xi cuechutaha nixtin xi tsichuva naja Nina. Cuatjin ta, tsêhê xi nguehe ngasunhndê ne, hacuaha quihndi rê Nina ngayaan sacuatjin rê Jesucristu, xi Quihndi rê Nina me. ¹⁸ Hiscan xi tjin cjuahmutacun ne, tsajin mé chircun hinchajñi ta hya xi ha tjin chihin cjuahmutacun xi tjin naja ne, hisca hitsê ne, tsajin rcun cuma. Sa xi ningatahantacun xi Nina sahmi naja me castigu ne, vêhê xi rcun cuma. Peru sa xi cuatjin rcun cuma ne, ngajan matsejen xi tsajin tjin chihin cjuahmutacun xi tjin naja.

¹⁹ Ngayaan ne, tjin naja cjuahmutacun ta, tsêhê xi Nina ne, tjun me catsihmutacun naja me. ²⁰ Peru sa xi nújan xi nihmutacun Nina, hane choho hyan xingueen ne, tu vindachan ni xi nújan. Cuatjin ta, tsêhê xi sa xi hacuiin nihmutacun xingueen xi tsejen naja cojo tuxcun ne, hacuaha cumaji nihmutacun Nina xi cjêê camahani chaan me. ²¹ Nina ne, cavitexa naja me cjuá vihi: yo xi tjin rê cjuahmutacun cojo Nina ne, hacuaha meje rê xi tjin rê cjuahmutacun cojo xicjin.

5

Me xi má hya xi macjain naja Jesucristu

¹ Jesús ne, hacui me xi Cristu, me xi cavaxijin Nina xi cuaxêtje naja. Hane ngayejen ni xi cuatjin macjain naja tsêhê cjuá vêhê ne, quihndi rê Nina ngayaan. Yêjê ni xuta xi tsihmucacun me xi má xutacha rê ngu quihndi ne, hacuaha cojo quihndi jan tsihmucacun me. ² Sa xi nihmutacun jain Nina hacuaha nihña sacuatjin xi cavitexa me ne, ngajan matsejen xi tjin naja cjuahmutacun cojo yêjê ni xuta xi quihndi rê Nina me. ³ Hacuaha sa xi chjahanrcun jain yêjê ni cjuá xi cavitexa Nina ne, ngajan matsejen xi nihmutacun jain me. Hane yêjê ni cjuá xi cavitexa me ne, hacuiin jercu chja xi nihña ta, ⁴ tsêhê xi yêjê ni xuta xi quihndi rê Nina ne, scaa rê me cojo yêjê ni cjuatsehen xi tjin nguehe ngasunhndê. Cuatjin caa naja cojo cjuatsehen jan ta, tsêhê xi macjain naja Jesucristu. ⁵ Hane súvá ni xuta xi macjain rê tsêhê Jesús xi Quihndi rê Nina jain me ne, me vêhê xi caa rê me cojo yêjê ni cjuatsehen xi tjin ngasunhndê.

Hasen rê Nina ne, tsinguixi xi Jesús ne, hacui Quihndi rê Nina me

⁶ Hya xi canduva Jesucristu ne, camatsejen xi Quihndi rê Nina me nixtin xi cojo nandá caxtenda me cojo nixtin xi cavixu jni rê me hya xi cahme me. Peru hacuiin súvá ni nixtin xi caxtenda ni me ta cojo nixtin xi cahme me ne, hya camatsejen xi Quihndi rê Nina me. Hasen xi tsêhê Nina ne, cuatjin tisua naja cjuaquixi ta, tsêhê xi Hasen jan ne, hatuxa cjuaquixi xi chja. ⁷ Siu jyan xcusun xi tisua machaya naja ta Jesús ne, Quihndi rê Nina jain me. ⁸ Ngu ne, cuatjin chja quixi Hasen xi tsêhê Nina. Ma jo ne, cuatjin camatsejen hya xi caxtenda Jesús. Ma jyan ne, hacuaha cuatjin cama tsejen hya xi cahme me. Hane catsijyan xcusun xi cuacun jan ne, tjin rê ngu ni cjuatacun. ⁹ Ngayaan ne, macjain naja tsêhê cjuá xi chja xuta cojo naja. Peru hitsê sa vengui chjí rê cjuá xi chja Nina. Hane Nina ne, casua me camachaya naja yo xi Quihndi rê me. ¹⁰ Xuta xi macjain rê me tsêhê Quihndi rê Nina ne, hatuxa vêê me cojo cjuatacun rê me ta quixi jain cjuá xi cachja Nina. Xuta xi macjaain rê me tsêhê cjuá xi cachja Nina ne, sacuaaha xi cuichja me xi Nina ne, jemu ndacha me. Cuatjin chja me tsêhê Nina ta, tsêhê xi macjaain rê me tsêhê cjuá xi cachja quixi Nina, yo xi Quihndi rê me. ¹¹ Hane Nina ne, cachja cjuahñu xatsê jan ngatsê rê Quihndi rê me. ¹² Xuta xi tjin tangun cjuatacun rê me cojo Quihndi jan ne, tjin rê me cjuahñu xatsê vêhê. Peru xuta xi tsajin tjin tangun

cjuatacun rë me cojo Quihndi rë Nina jan ne, hacuaha tsajin rë me cjuahñu xatsë jan.

Conseju xi sua Juan xi cajnetaha

¹³ Vêhë xi cuitjin titsihindu nuju ngayujun ni xi macjain nuju tsêhë Quihndi rë Nina. Titsihindu nuju yêjê ni cjua vihi, cojo sa xi cumangutacun ta quixi xi tjin jain nuju ngu cjuahñu xatsë xi tsajin nu tsajin nixtin xi cjuë.

¹⁴ Ngayaan ne, mangutacun jain cojo Nina ta, tsêhë xi ha hyan ta sa xi tjin tangun cjuatacun naja cojo rë me hora xi tichjahyan rë me ne, cuihndë me xi cuinújan. ¹⁵ Hane tsêhë xi hyan ta vihndë me yêjê ni cjua xi nújan cojo rë me ne, vêhë xi hacuaha hyan ta sacú naja xi cachjahyan rë me.

¹⁶ Yo ngayaan xi chutsejen xi tivixuya ngu xingueen ngajñi rë ngu cjuatsehen xi cuma cumanchataha ne, meje rë xi cuinújanyumatahan tsêhë me, hane cuatjin sacú rë me cjuahñu xatsë. Peru tjin cjuatsehen xi cumaji cumanchataha. Hane hacuain tichjá cojo nuju xi cuinújunyumuntuhun tsêhë xuta xi tjin rë me jyë vêhë. ¹⁷ Yêjê ni cjuatsehen ne, Nina ne, chja me ta hatuxa jyë hmí rë. Peru tjin cjuatsehen xi cuma cumanchataha.

¹⁸ Ngayaan ne, hyan ta yêjê ni xuta xi cjuaquixi xi quihndi rë Nina me ne, hatuxa tsajin hinchajñi me ngajñi rë cjuatsehen. Cuatjin ta, tsêhë xi Quihndi rë Nina ne, sahmi rë me cuidadu, hane xitsehen matitjun ne, cumaji mé sahmi cojo rë me.

¹⁹ Ngayaan ne, ha hyan ta tsêhë Nina ngayaan. Hane yêjê sa xuta xi yahnga ne, tsêhë xitsehen má titjun me.

²⁰ Ngayaan ne, hacuaha hyan ta ha canduva Quihndi rë Nina. Hacuaha casua naja me cjuatacun, cojo sa xi cuijnercun yo xi Nina xi hatuxa cjuaquixi. Tjin tangun cjuatacun naja cojo me xi hatuxa cjuaquixi ta, tsêhë xi tjin tangun cjuatacun naja cojo Jesucristu, Quihndi rë me. Me vêhë xi Nina xi hatuxa cjuaquixi, hacuaha me vêhë xi sua naja cjuahñu xatsë xi tsajin nu tsajin nixtin xi cjuë.

²¹ Ngayujun ni tsan ne, mijí camahani rë xi chjuhuncun nina xi hacuain cjuaquixi.

Xujun má jo, xi catsihindu San Juan

Cjuaquixi cojo cjuahmutacun

¹ Ngahan, ngu xuta changá matitjun tséhë yungun ne, tsihindu nuju ngayun, ngu chjuun xi cavaxijin Nina. Hacuaha cojo yějë ni quihndi nuju ne, tsingátju nuju ngayujun ni ngu nina naha ta, tséhë xi tjemu hmú cáacun nuju cojo nguñaja cjuaquixi. Peru hacuun tu suva ni ngahan ta yějë ni me xi vëë jain me cjuaxi hatuxa cjuaquixi ne, hacuaha tsihmucacun nuju me. ² Cuatjin nihmitacuin nuju, ngatsë rë cjuaquixi xi ha siu cahndë ngajñi rë cjuatacun naja. Hane cjuaquixi xi cuacun jan ne, tsajin nu tsajin nixtin xi cuetjuxin tsajan. ³ Nina nahmi naja cojo Jesucristu Quihndi rë me ne, hatuxa sua naja me cjuandaja cjuajeya cojo cjuayumatacun, cuatjin xi ma vanguen tjenguen cjuaxi cjuaquixi, hacuaha ma nihmutacun jain xingueen.

Cuanguennuju cojo cjuachacun rë Cristu

⁴ Tjemu ndaja camá rë xahasen naha ta, tséhë xi cavécutaha ngu jo quihndi nuju xi hatuxa hinchajñi me ngajñi rë cjuaquixi, sacuahatjin Nina Nahmi naja cavitexa naja me. ⁵ Quihndë ne, ngeuhe cuichjá cojo nuju tsan ta meje rë xi ngayejen ni ne, nihmutacun xingueen. Hane cjuaxi vihi xi tichjá cojo nuju ne, hacuun ngu cjuaxatsë xi sehe cavitexa naja Nina ta cjuaxi vihi ne, hacui xi tacun hisca hya xi sehe cavetseen camacjain naja cjuaxi rë Nina. ⁶ Hane sa xi nihña jain yějë ni cjuaxi cavitexa naja Nina ne, ngajan matsejen xi tjin jain naja cjuahmutacun. Hane cjuaxi cavitexa Nina ne, hacui vihi: meje rë xi nihmutacun xingueen. Hacuaha hacui cjuaxi vëhë xi camachaya nuju hisca hya xi sehe cavetsuhun camacjain nuju cjuaxi rë Nina.

Cjuaxi tanguin cojo cjuaxi rë Nina ne, má cjuaxi ndacha

⁷ Cuatjin chjá cojo nuju ta, tséhë xi ngasunhdë vihi ne, tjemu tjin xuta ndacha xi macjaain rë me xi Jesucristu ne, camá jain me ngu xuta ngasunhdë vihi. Xuta ndacha jan ne, hacui me xi vindacha, hacuaha hacui me xi má condra rë Cristu. ⁸ Tjin nuju cuidadu, sehe ngajan xi hacuun nichayun cjuandaja xi canihñi ngajñi nuju. Cahndë rë vëhë ne, sacú nuju yějë ni cjuatjo xi sua nuju Nina.

⁹ Yějë ni xuta xi vatjutaha me tséhë cjuaxi cavicuya Cristu ne, tsajin tjin tangun cjuatacun rë me cojo Nina. Peru yějë ni xuta xi vetaharcu me suvá ni cjuaxi cavicuya Cristu jan ne, me vëhë ne, tjin tangun cjuatacun rë me cojo Nina Nahmi naja cojo Quihndi rë me. ¹⁰ Hya xi cjeuhe ngu me xi cuichja xi vicuya me cjuaxi rë Nina, peru sa xi cuicuyain me cjuaxi cavicuya Cristu ne, xi catuun cahndë cuisehen me cuejña me ndya nuju. Hisca ngu nina cachjayunnguun tséhë me ta, ¹¹ sa xi cuatjin tuhun rë me nina ne, sacuahaxi ma tangun yun cojo cjuatsehen xi sahmi me.

Cjuaxi vijnetaha

¹² Tjemu cjin sa cjuavisiajmi xi meje cuichjá cojo nuju ngayujun ni. Peru tsihinduun sa nuju sacuahatjin xcun ngu xujun vihi ta, tséhë xi hatuxa vejña xi cjuë tjëngë nuju, sehe cuinújan xcun cojo xcun, sehe ngajan xi tjemu ndaja cuma rë xahasen naja.

¹³ Na tichjun, xi hacuaha cavaxijin Nina na ne, tsingátju quihndi rë na ngu nina tsujun.

Xujun ma jyan, xi catsihindu San Juan

Juan sua suva me nina rē me

¹ Ngahan, ngu xuta changá matitjun tséhē yungun ne, tsihindu ri ngaye Gayo, ta ngaye ne, tjemu vinga ná ngaye, tjemu hmú cáacun ri cojo nguñaja cjuaquixi.

² Catisecoo ri Nina, tsan, xi cuma cuihin xcun cojo yējē ni cjuandaja, hacuaha xi ndajyihí cjuahñu riji, sacuahatjin xi ha ndajyihí xahasen riji.

³ Tjemu ndaja camá rē xahasen naha ta, tséhē xi jima ngu ndiya xi cafehe ngu ngu xingueen ne, tjemu ndaja cachja me tsiji. Ha tuxa chja me ta ngaye ne, nguñajatacuin hmi tjengui ndiya rē cjuaquixi. ⁴ Tjemu ndaja má camahani rē xahasen naha, hya xi machaya ná xi yējē ni xingueen xi sacuaha quihndi naha ne, cjui tjengui me ndiya rē cjuaquixi.

Conseju xi cuma rē xinguen xi chja me cjuarē Nina

⁵ Tjemu ndaja tinihñi, tsan, xi cuatjin tivisecue rē jingu sa xingueen, hisca cojo sa xingueen xi hyiin yo jan ta, tséhē xi cjin nandya nduva me. ⁶ Hane ngujo me xi cuacun véhē ne, sehe cavuya cafehe nga me nguehe. Hane hya xi cama tangun ngayin yungun ne, cachja me cojo niji ngayijin ni xi tjemu tjin ri cjuahmutacun. Quihndē ne, tu jani hya ni xi cuatju nga me nandya riji ne, tjemu ndatjin xi cuisecue rē me, cojo sa xi tsajin mé xi sahmi chaja rē me xi cuetju me cjue me ndiya ta, tséhē xi cuatjin chuya rē Nina xi nihña.

⁷ Cuatjin meje rē xi nihña ta, tséhē xi xuta xi cuacun jan ne, cavetju quiji me ngu nangui xi cuichja me cjuarē Jesucristu. Hane hisca ngu hñu ngu tē ne, faain me tséhē xuta xi macjaain rē Nina. ⁸ Véhē xi ngayaan ne, meje rē xi cuatjin cuisecoon rē me xi cuacun jan ta, tséhē xi cuatjin ne, hacuaha cuisecoon rē cjuarē cjuaquixi.

Diótrefes ne, choho chja cha tséhē Juan

⁹ Ha catsihindu ngu xujun xi tsingátju rē xuta xi ma tangun ngajan yungun. Peru cha Diótrefes, xi tjemu meje sahmi tjun cha ngajñi rē me ne, handasa hacuaha xingueen cha, peru faharcuaain cha cjuarē níjin. ¹⁰ Véhē xi hya xi cjuéhē ndyá ne, cuichjáyē cojo nuju ngayujun ni yējē ní xcusun xi sahmi cha jan. Cuichjá quixé hacutjin choho chja cha tsijin. Hane manguaaincacun cha cojo xi choho chja ni cha ta hacuaha tsitjungui cha ngu ngu xingueen xi nduva jingu sa nandya. Hane hya xi yahnga me xi meje sahmi me cjuandaja cojo xingueen xi cuacun nduva jan ne, mijí sua cha cahndē, hacuaha hisca mijí rē cha xi cuisehen nga me yungun.

¹¹ Xi canihñii cjuatsehen xi tsahmi yahnga xuta, tsan, ta tu tjin tsahmi xuta xi tsahmi cjuandaja ne, cuatjin meje rē xi nihñi. Xuta xi sahmi cjuandaja ne, tséhē Nina me. Peru xuta xi sahmi cjuatsehen ne, hacuiin amigu rē Nina me.

¹² Yējē ni xuta ne, ndaja chja me tséhē cha Demetrio. Hacuaha suvá tsejen xi sahmi jain cha sacuaha tjin vitexa Nina. Hisca ngayin ne, ndaja níjin tséhē cha. Hane ngaye ne, ha hye ta xi níjin ne, ha tuxa cjuaquixi.

Cjuarē xijinetaha

¹³ Tjemu tjin vasen sa xi meje cuichjá cojo ri, peru mijí cuichjá cojo ri sacuaha tjin xcun ngu xujun vihi. ¹⁴ Cahndé rē vēhē ne, tu tjenhñu ni ne, vejñá xi cjuē tjēngē ri, sehe cuisiajme xcun cojo xcun.

¹⁵ Quihdē ne, tsingátju ngu nina tsiji, hacuaha yějē ni amigu riji ne, tsingatju me ngu nina tsiji. Nihñi favor ne, yějē ni amigu niji xi siutaha ndyá ne, tehe rē me ngu nina niji jima ngu jima ngu me.

Carta tséhë San Judas

Judas ne, tichja me nina cojo yějë ni xuta xi cavaxijin Nina

¹ Ngahan Judas, xi mosu hndixahan rë Jesucristu, hacuaha xi hntse cha Jacobo ne, tsihindu xujun vihi xi chutayun ngayujun ni xi cavaxijin nuju Nina Nahmi naja, tséhë xi tjercu hmucacun me ngayun. Hane ngayujun ni xi camacjain nuju Jesucristu ne, Nina tisahmi cuidadu nuju me. ² Yějë ni cjuandaja cojo cjuajeya cojo cjuahmutacun tséhë Nina ne, catamacjin sa ngajni nuju.

Xuta xi vicuya cjuandacha

³ Ngayujun ni tsan ne, casahme xati cacun xi tsihindu nuju tséhë cjuandaja rë Nina xi cuaxëtje naja. Peru quihndë ne, hacuaha sahmi ngu yějë xi tsihindu nuju, cojo sa xi cuichjá cojo nuju xi cuinújuntjun ngatsë rë cjuachacun xi ha casua Nina ngayaan xi macjain naja me. ⁴ Tséhë xi tjin xuta xi cavindacha xi caxinchajni me ngajni nuju. Peru hatsëë nixtin ne, camahindu xcun xujun rë Nina tséhë castigu xi cuatju me cuma. Hatuxa xuta tsehen me, xi handasa tsejen sacuaha xi tjin rë me cjuandaja rë Nina naja ne, peru vatjutaha me yějë ni cjuatsehen xi sahmi me, hacuaha tsitjungui me ngu ni Nai naja Jesucristu.

⁵ Quihndë ne, handasa ha hyun cjuaja vihi ne, cúa cuichjá cojo nuju hacutjin casahmi Nai naja. Ngu ne, xuta nangui Israel ne, handasa cavaxëtje Nai naja me tséhë nangui Egipto ne, peru cama ngaskan ne, ngajni rë xuta nangui Israel jan ne, hacuaha casahmi me castigu xuta xi camacjaain rë tséhë me. ⁶ Ma jo ne, ángel xi caviyijin hiscan xi cachja Nai naja xi cuiyuju ta tu cavetjuxin tséhë cahndë rë ne, cavinchahnu me hiscan jnu, hisca xi cuechutaha nixtin xi cuichja Nai naja mé castigu cuatju ángel jan cuma nu cjui nu nduva. ⁷ Hane xi ma jyan ne, xuta nandya xi hmi rë Sodoma cojo xuta nandya Gomorra cojo sa xuta xi siu tahndee rë jan ne, hacuanitjin ni cahndiin me tséhë Nina. Tjercu casahmi me cjuatsehen xi tjin chjuunnahnu rë me. Hisca cavatjutaha sa me cjuatsehen ta ngajni xihin ni me ne, casahmi me cjuatsehen sacuaha xi chjuunnahnu rë me xicjin me. Véhë xi suvá sa cahndë rë nandya xi cuacun véhë ne, siu cuaha xi ninguitsjen tséhë castigu xi cavatju camá, xi café catí cojo ndihi rë Nina.

⁸ Hacuanitjin ni tisahmi xuta tsehen xi hinchajni ngajni nuju jan ta, ngajni rë cjuatacun rë me ne, tichja cojo rë me xi catisahmi me cjuatsehen jan, xi sahmi me cjuaja xi vitexa Nai naja, hacuaha xi choho catichja me tséhë ángel xi siu cojo Nina. ⁹ Peru suvá ángel matitjun xi hmi Miguel ne, hya xi ticjanya cojo xitsehen matitjun yojo rë Moisés ne, cavetjiincacun xi choho cuichja cojo xitsehen jan ta tu cuinitjin cachja: “Nina catichjataha me ngaye.” ¹⁰ Peru xuta tsehen xi cuacun vé ne, choho chja me tséhë yějë ni xcusun xi vijniircu me. Hane hitsë sa chu me xi cuma rë chu ta, handasa vëë me xi hmi rë cjuatsehen ne, hatuxa sahmi me. Hane cjuatsehen xi sahmi me jan ne, véhë xi tsinguetsun rë cjuatacun rë me.

¹¹ Jemu choho cuatju me cuma, tséhë xi fi me ndiya tsehen sacuatjin quiji xutachanga naja Caín, sahmi me cjuatsehen ngatsë rë tujún xi jercu meje rë me sacuatjin casahmi cha Balaam, hacuaha cueya me sacuatjin cahme cha Coré, ngatsë rë xi meje cjuahaxin cha xutaxa rë. ¹² Xuta tsehen xi cuacun jan ne, ngu cjuasava me hora xi tichinutangun tséhë cjuahmutacun xi tjin nuju

cojo xingun ta, tséhë xi hisca jinë hisca hvi me cojo nguñaja ni cjuasua, peru fahacuendaain me yo xi cajiné yo xi cajinii ta tu tséhë suvá ni me fahacuenda me. Sacuaha yufi xi cavaain ta cavatjucjin xi cavaha rë tjo quiji ne, hacuaha cuatjin machjiriin me. Sacuaha ya xi machjiriin xi vaquiin tú rë nixtin rë ne, tjune ni rë hisca tyjama rë sehe xi ne, hacuaha cuatjin machjiriin me. ¹³ Machjiriin me sacuaha tsindyu rë ndachacun xi hisca xu jima xcun xi cjan rë ne, hacuaha cuanitjin ni hisca xu jima cjuasava ngajñi rë me. Machjiriin me sacuaha machjiriin niñú xi siutaha ngahnga xi vejñaai cahndé rë ne, hacuaha cuatjin machjiriin me. Hane castigu xi cuatju me cumá ne, xi tsajin nu tsajin nixtin xi cuma ndaya me tséhë hiscan xi tjercu tu jñu camahani.

¹⁴ Hane ngu xutachanga niji xi hmí rë Enoc, xi quihndindaicjin rë Adán ne, hya xi cachja me ngu cjua xi caveya Nina cjuatacun rë me xi cuma ne, hacuaha cachja me tséhë xuta tsehen xi cuacun vë, cuitjin cachja me: “Cahvë Nai naja xi nduva me ngajñi rë ángel rë me xi tjercu tu cjin camahani.

¹⁵ Nduva me xi cjuahachuva me ngayejen ni, sehe cuichja me mé castigu xi cuatju yëjé ni xuta tsehen tséhë yëjé ni cjuatsehen xi casahmi me, hacuaha tséhë yëjé ni cjua xi choho cachja xuta tsehen xi cuacun jan tséhë Nina.”

¹⁶ Xuta tsehen jan ne, hatuxa choho chja me tséhë yëjé ni, hacuaha sahmi me tu cutjin xi macacun me. Sahmi yehe suvá me yojo rë me, hacuaha chja me cjuahaxi cojo xuta, tséhë xi meje rë me xi sahmi yehe xuta me.

Conseju xi sua Judas xuta xi macjain rë Nina

¹⁷ Peru ngayujun ni tsan ne, ninguitsjun cjua xi ha cachja apóstol tséhë Nai naja Jesucristu, ¹⁸ xi cachja me cuitjin: “Hya xi ha jima tiña cuya Nai naja ne, hya tjin xuta xi cuejnucé me tséhë yëjé ni cjuandaja rë Nina, hacuaha sahmi me yëjé ni cjuatsehen xi cuetju tséhë xahasen rë me.” ¹⁹ Xuta tsehen xi hinchajñi ngajñi nuju jan ne, vatécja me ngajñi rë yëjé ni ngu cjuandaja xi cuma. Tsingatahacacun ni me xi siné xi cuihi me, hane Hasen rë Nina ne, tsajin camahani rë me.

²⁰ Peru ngayujun ni tsan ne, sacuaha cjua rë Nina xi ha camacjain nuju ne, nihñu ngu jyé xi catamacjain sa nuju. Tinújunyumu ha tu cutjin xi visesco nuju Hasen rë Nina. ²¹ Nihñu cuidadu xi hacuiin nichayun cjuahmutacun rë Nina. Hacuaha tinechunyun rë nixtin xi Nai naja Jesucristu ne, cojo cjuandaja rë me ne, sua naja me cjuahñu naja xi tsajin nu tsajin nixtin xi cueyan.

²² Xuta xi jo má cacun me tséhë cjuandaja rë Nina ne, nújun cojo rë me ne, cojo sa xi hacuiin jo cuma cacun me. ²³ Naxuntjun me sacuaha ngu xuta xi naxentjen me xi ha ndiya cueti me. Hane yahnga me ne, tjin nuju cjuayumatacun cojo rë me, peru cojo cuidadu, xi satiin nuju jyé rë me.

Tsinguijnetaha Judas cjua

²⁴⁻²⁵ Ngu ni Nina xi vaxëtje naja ngatsë rë Nai naja Jesucristu ne, me vëhé xi cuma sahmi cuidadu me ngayun xi tsajin xtundiya yun ngajñi rë cjuatsehen, hacuaha cuiyuju me ngayun xcun me xi cun tyjahi tyjahi xahasen nuju ne, cojo yëjé ni cjuasua. Me vëhé xi tjin rë me yëjé ni ngu cjuandaja, hacuaha jyé me, hacuaha ma vitexa me, hacuaha ma sahmi me, hisca xi chaja sa xi cumandaja ngasunhdé, hisca quihndé, hacuaha hisca xi cuatju xi cjué ngasunhdé. Cuatjin jain.

Apocalipsis, cjuua xi sua cumachaya naja

Cjuua tséhë Jesucristu xi cafehecani chini rë Juan

¹ Cjuua vihi ne, cjuua tséhë Jesucristu xi casua Nina cojo sa xi tsingacun Jesucristu xuta ladu rë me xcusun xi hatuxa sahmi nguuyë xi cuatjú. Cjuua jan ne, ngu ángel cafehecani ná, ngahan xi hmí ná Juan, ngu mosu hndixahan rë me. ² Hane ngahan ne, tsinguíxë ta cjuaquixi yëjë xcusun xi cahvë hya, xcusun tséhë cjuua rë Nina cojo tséhë cjuaquixi xi chja Jesucristu. ³ Jemu ndaja tséhë me xi cuichjasun me cjuua rë xujun vihi, hacuaha jemu ndaja tséhë me xi cuihndë me cuincha me xahasen rë me cjuua xi camahindu xcun xujun vihi, tséhë xi ha camá tiña nixtin xi cuma chihin cjuua rë.

Cjuua xi catsihindu Juan xi cafahatsja yatu yungun xi tjin ngajan Asia

⁴ Ngahan Juan ne, tsihindú cjuua vihi xi cjuahatsja yatu yungun xi tjin ngajan nangui Asia. Chjuhunnstun cjuandaja cjuajeya tséhë Nina, me xi hacui, hacui ni me xi cavejña me hatsëë, hacuaha hacui ni me xi cuejña cuaha, hane cojo tséhë Hasen rë me xi siu xcun me xi hacui sacuaha yatu hasen. ⁵ Hacuaha cojo tséhë Jesucristu, me xi má testigu cjuaquixi, me xi tjun tjun cavuya cjuahñu tséhë ngajñi rë nima, me xi hacuaha matitjun tséhë yëjë ni xuta xi matitjun tséhë ngasunhndë, hane me xi hmucacun naja hacuaha cavaxëtje naja tséhë jyë naja hya xi cavanga jni rë me xi cahme me. ⁶ Hacuaha Jesucristu ne, casahmi me xi ngayaan ne, satë naja xi cuitexan ne, hacuaha cuma yaan sacuaha nahmi xi chjahancuendan Nina, Nina xi hacuaha má me nahmi rë me. Me vëhë ne, catimá jyë hnga me hacuaha catimá titjun me yëjë ni nu, yëjë ni nixtin. Cuatjin jain.

⁷ ¡Nutsujun, ta cuinduva me cojo yuffi! Hacuaha yëjë ni tuxcun ne, scuëë rë me. Hisca cojo me xi cahndiin tséhë me ne, scuëë rë me. Hane yëjë xuta tséhë jimangu tjë rë xuta ngasunhndë ne, cuatju me cjuandusin ngatsë rë me. ¡Cuatjin cumá! ¡Cuatjin jain!

⁸ Cuitjin chja Nina: “Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin. Ngahan xi tejña, hane ngahan xi vijnetaha. Cavéjña hatsëë, hacuaha cuéjña cuaha. Yëjë ni má sahme.”

Juan ne, cavutsejen me xi jyë hnga Jesucristu

⁹ Ngahan Juan ne, xingun má ngahan, tangun satë naja cjuañihi, tangun nechan ngahma gobiernu hacuaha tangun caa naja ngatsë rë xi mangutacun cojo Jesús. Ngahan cavitejñataha ngu nandya xi hmí rë Patmos xi vetjucaa tséhë ndachacun. Ngajan tejñataha ngatsë rë xi cachjá cjuua rë Nina cojo tséhë cjuaquixi xi chja Jesús. ¹⁰ Hya xi camá ne, nixtin xi chjaharcun Nina ne, Hasen rë Nina ne, cavisehentë cjuatacun naha. Hora vëhë ni ne, tséhë taha ngaxtun ne, cahndë ngu xta xi jemu hñu camahani nuhya rë, nuhya rë sacuaha xta rë tyjo ¹¹ hane cuitjin cachja:

—Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Chjehe ngu xtë xujun ne, nihndi xcusun xi tichutsijin hane sehe ningatjin catahatsja xuta yungun xi siu yatu nandya Asia xi cuicun vi: Efeso, cojo Esmirna, cojo Pérgamo, cojo Tiatira, cojo Sardis, cojo Filadelfia cojo Laodicea. —Cuitjin cachja xta jan.

¹² Hya xi camá ne, cavuya xi scutséjen yo xi tichja cojo ná, peru xi tu cavuya ne, xi cahvë ni ne, yatu candeleru xi camá tséhë oro. ¹³ Hane vasencja rë candeleru jan ne, jiyajñi ngu xihin xi tsejen sacuaaha Quihndi rë Xuta Jain. Yaja me ngu tsjan tjín tē ni xi vechu hisca ntsacu me, hane tjihñucja hiscan ndanisin rë me cojo ngu pañu nduju camá cojo nachjun tséhë oro. ¹⁴ Hane rcu cojo tsjarcu me ne, tyava tsejen sacuaaha tsejen tyava tsja rë chu tsánga o sacuaaha tsejen hnchan xi vixu. Hane tuxcun me ne, tsejen sacuaaha ndihi xi ña vitjen. ¹⁵ Ntsacu me ne, seti sacuaaha quicha sine xi catsicjē ndihi xutsē rē; hane xta rē ne, nuhya rē sacuaaha xta rē nandan xi tjemu hñu vanga. ¹⁶ Tsja xi ladu quixi ne, vahangui me yatu niñú. Hane tséhë hntsua me ne, vetju ngu espada yuju xi vatē taha xcun cojo taha ngaxtun. Hane xcun ne, tsejen sacuaaha tsuhi hya xi sua hasen cojo yējē ni ngahñu rē.

¹⁷ Ngajan xi ngahan ne, xi cahvë xcusun rē me ne, catícja taha ntsacu me sacuaaha xi cahme ngahan. Ngajan xi cavisane me tsja me ladu quixi xcun yojo naha, sehe cachja me cojo ná cuitjin:

—Xi carcuin. Ngahan xi ntsacu vetsihin ne, hacui ni ngahan xi vijnetaha. ¹⁸ Ngahan, quicun ngahan. Cavéya, peru quihndē tacunntsa llavi tséhē cjuaveya cojo tséhē Hades, cahndē hiscan siu nima. ¹⁹ Hindē ngaye ne, nihindi xcusun xi cahye vi cojo xcusun xi tijima quihndē cojo xcusun xi sehe cumá. ²⁰ Sacuaaha yatu niñú xi cahye hntsa ladu quixi naha cojo yatu candeleru xi camá tséhë oro jan ne, cuitjin vijne cjuatacun hma jan: yatu niñú jan ne, hacui ángel xi sua cumachaya rē xuta rē yatu yungun jan cjua rē Nina, hane yatu candeleru jan ne, hacui yatu yungun jan.

2

Cjua xi cjuahatsja yungun ngajan nandya Efeso

¹ Hindē nihindi cjua vi xi cjuahatsja ángel rē yungun ngajan nandya Efeso. Cuitjin nihindi: “Cjua vihi ne, cjua rē cha xi vahangui yatu niñú jan tsja ladu quixi cha hacuaaha tsujyihya cha vasencja rē yatu candeleru jan xi camá tséhë oro: ² Ha ndaja hvē tséhë xa nuju sacuaaha cjuandaja xi nihñu, jemu chja tivatjun peru ticaa nuju titsangun nduju cojo. Hvē xi tuun rē xuta tsehen cahndē ta, nichuvun cjuatacun rē xuta xi vindacha me sacuaaha xi má me apóstol. Hane camachaya nuju xi tu vindacha ni me. ³ Hacuaaha titsangun nduju hacuaaha ticaa nuju cojo cjuacjintacun xi tivatjun ngatsē rē xi veyunnangun ñihi naha, hacuaaha machuvaain cjuatacun nuju ngajñi rē cjuacjintacun jan. ⁴ Peru cojo yējē sa ne, tjín ná vihi condra nuju ta, hacuiin jemu nihmutacún ná sacuaaha xi canihmutacún ná hya xi titjun camangutacún cojo ná. ⁵ Véhē xi ninguitsjun hacutjin cavatjun hya xi tjín nuju cjuahmutacun véhē, hane nindeyun cjuatacun nuju ne, cuyun nihñu nga xcusun sacuaaha xi canihñu titjun. Cuatjin nihñu ta, sa tsajin ne, cuinduvá tjēngē nuju ne, cuaxēxen candeleru xi satē nuju tséhē cahndē rē. ⁶ Peru hacuaaha tjín sa nuju ngu xcusun xi ndaja tsujun ta, ndaja tsujun tséhē xi choho hyun xcusun xi sahmi xuta xi tjengui me cjuachacun tséhē Nicolás, ta cjuachacun jan ne, hacuaaha cojo ngahan ne, choho hvē. ⁷ Yo ngayun xi tjín nuju cjuasua xi cuinuhyun cjua xi chja Hasen rē Nina cojo yungun jan ne, ndaja tetuhuncun. Cuitjin chja: Yo xi scaa rē cjue xcun tséhē cjuatsehen ne, suá rē cahndē xi sinē tuhaxi xi sua cjuahñu xi vaqui rē ya xi secun cahndē ndajiyihi xi tséhë Nina.”

Cjua xi cjuahatsja yungun ngajan nandya Esmirna

⁸ 'Hindē nihindi cjuā vi xi cjuahatsja ángel rē yungun ngajan nandya Esmirna. Cuitjin nihindi: “Cjuā vihi ne, cjuā rē cha xi matitjun hacuaha matjengui. Cjuā rē cha xi cahme jan hane hacuaha cavuya nga cjuahñu. Hacuī cjuā vihi: ⁹ Ha hvē cjuacjintacun xi tivatjun cojo cjuayuma nuju. Peru ngajñi rē vèhē ne, ¡inchina ngayun! Hacuaha hvē cjuā chjataha rē xuta vè xi chja me xi xuta tjē rē Israel, o sa xuta rē Nina, má me, peru quixiin ta, xuta ladu rē Satanás má me. ¹⁰ Xi carcuun tsèhē xcusun xi cúatjun cuatjin. Naain ne, tsitsehen cha xuta cojo sa xi scandiya me yahnga ngayun ndavaya sehe chjahachuva nuju. Hacuaha tsujihihya tjengui nuju xuta jan cojo cjuañihi xcun tē nixtin ni. Peru tangunnduju cojo cjuatacun nuju handasa xi cueyun, hane ngahan ne, suá nuju corona rē cjuahñu. ¹¹ Yo ngayun xi tjin nuju cjuasua xi cuinuhyun cjuā xi chja Hasen rē Nina cojo yungun jan ne, ndaja tetuhuncun. Cuitjin chja: Yo me xi scaa rē cjue xcun ne, tsajin mé choho cuatju me tsèhē cjuaveya xi majo.”

Cjuā xi cjuahatsja yungun ngajan nandya Pérgamo

¹² 'Quihndē nihindi cjuā vi xi cuahatsja ángel rē yungun ngajan nandya Pérgamo. Cuitjin nihindi: “Cjuā vihi ne, cjuā rē cha xi tjin rē quicha yuju, xi vatē taha xcun cojo taha ngaxtun. Cuitjin chja cha: ¹³ Ha hvē cahndē jani hisca nechuntuhun, ta cahndē vèhē ne, cahndē hñu xi vitexa Satanás. Peru cojo yèjē sa ne, ndaja mangutacún cojo ná. Handasa hya xi catsiquehen me Antipas, me xi catsinguixi cjuaquixi naha ngajan cahndē hñu xi vitexa Satanás ne, hisca hya ne, hacuini cavitjayun ndiya rē xuta xi macjain rē me ngahan. ¹⁴ Peru hacuini yèjē tsujun ndaja ta, tjin ná ngu jo xcusun condra nuju ta nijyuntacún tsèhē ngu jo me ngajñi nuju xi tjengui me cjuachacun rē cha Balaam. Cha vèhē catsingacun cha Balac chuva rē hacutjin tsitsehen cha xuta nangui Israel nixtin hatsèē. Hane casahmi me jyē xi cajinē me yojo tsèhē cjuatjo rē nina ndyojo, hacuaha xi casahmi me cjuatsehen xi satē rē cjuachacun jan. ¹⁵ Hane hacuanitjin ngayun, ta ngajñi nuju siu me xi hacuaha tjengui rē cjuachacun jan, cjuachacun rē cha Nicolás. ¹⁶ ¡Nindeyun cjuatacun nuju! ta, sa tsajin ne, ha nduvá tjèngé nuju, hane sahme si cojo rē me xi cuacun vè cojo quicha rē cjuā xi vetju ntsuva. ¹⁷ Yo ngayun xi tjin nuju cjuasua xi cuinuhyun cjuā xi chja Hasen rē Nina cojo yungun jan ne, ndaja tetuhuncun. Cuitjin chja: Yo xi scaa rē cjue xcun ne, suá rē comida cjuarcun xi hmí rē maná xi jiyahma, hacuaha suá rē ngu ndyojo lihndi tyava hiscan camahindu ngu ñihi xatsē, ngu ñihi xi tsajin yo vèē rē, ta suva me xi cjuahatsja rē ne, suva ni me vèē me.”

Cjuā xi cjuahatsja yungun ngajan nandya Tiatira

¹⁸ 'Hacuaha nihndi cjuā vihi xi cjuahatsja ángel rē yungun ngajan nandya Tiatira. Cuitjin fi cjuā: “Vihi cjuā rē Quihndi rē Nina Jain, me vèhē ne, tuxcun me, sacuaha ndihi tsejen, hane ntsacu me sacuaha quicha sine xi catsicjē ndihi xutsē rē: ¹⁹ Ha machaya ná tsèhē xa sacuaha cjuandaja xi nihñu, sacuaha cjuahmutacun nuju, cojo xi mangutacún, hvē xa xi tinihñu cojo sa xi ndaja cjuecani nuju. Cjuandaja xi nihñu quihndē ne, quisun sa xi cuma rē xi canihñu ntsacu cavetsihin. ²⁰ Peru cojo yèjē sa ne, tjin ná vihi condra nuju ta, nijyuntacún tsèhē na chjuun Jezabel vè, na xi chja suva na xi profeta má na. Na vèhē ne, cojo cjuachacun rē na ne, tsinguetsun na hacuaha tsitsehen na xuta ladu naha cojo sa xi sahmi me cjuatsehen ngajñi xicjin ni me, hacuaha sinē me yojo rē chu xi cahme sacuaha ngu cjuatjo rē nina ndyojo. ²¹ Na vèhē ne, casuá ran cahndē xi tsindeya na cjuatacun ran, peru mijí choho cuma ran tsèhē xcusun tsehen rē xi sahmi na cojo xicjin na. ²² Vèhē xi tsijaña rē

na xcun ngu cahndé tséhé cjuahmu, hane me xi sahmi cjuatsehen cojo na ne, suá rē me ngu cjuañihi jyē, sa tsajin choho cuma rē me hane cuindeyaain cjuatacun rē me tséhé xcusun chocun rē na xi catsitsehen rē me xi casahmi me cjuatsehen jan. ²³ Hane me xi má sacuaaha quihndi tjē rē na ne, cjué tsiquéhen me, cojo sa xi cuatjin ne, cumachaya rē yējē sa xuta yungun naha xi ngahan ne, ndaja tsichúva cjuatacun cojo xahasen nuju, hane suá nuju jima ngu yun tucu satē nuju tséhé xcusun xi canihñu. ²⁴ Peru yahnga ngayun xuta Tiatíra xi hacuiin cojo ngayun cachjuhunntsun cjuachacun jan ne, ngayun hyuun mé xi vijne cjua xi cahntsua nungun tséhé Satanás. Ngayun ne, ndastu mé sa cuichjá xi nihñu ta, ²⁵ xi sahmi ngu jyē ne, xi cuangunndujun tuhunhñu mé xi tjin nuju tséhé Nina hisca hya xi nduvá ngahan. ²⁶ Yo xi scaa rē xi cjue xcun, hacuaaha sahmi chihin me cjuandaja naha hisca xi cuijnetaha ne, suá rē me ngahñu xi sahmi me gobiernu rē nanguicjín. ²⁷ Hane me véhē ne, cuitexa rē me xuta nanguicjín jan cojo ngahñu xi tjin rē me, sacuaaha cojo ngu cuarta xi camá tséhé quicha, hane sacuaaha cuma xuva rē ngu tiji xi nihndé camá ne, cuatjin cumá cojo xuta cjín jan. Sacuaaha ngahan ne, cafaahantsa xa jan tséhé nahmi naha, cuanitjin suáxa rē me xi sahmi me gobiernu. ²⁸ Hane suá rē me hasen rē niñú seti xi vetjucaa nguítajñu. ²⁹ Yo ngayun xi tjin nuju cjuasua xi cuinuhyun cjua xi chja Hasen rē Nina cojo yungun jan ne, ndaja tetuhunrcun.”

3

Cjua xi cjuahatsja yungun ngajan Sardis

¹ Cjua vihi nihindi cojo sa xi cjuahatsja ángel tséhé yungun ngajan nandya Sardis. Cuitjin fi cjua: “Cjua vihi xi cachja me xi tsuvangui rē yatu hasen rē Nina cojo yatu niñú: Hvē xa nuju. Tjin cjua nuju xi quicun yun, peru quixiin ta hvē ta cahme yun. ² ¡Catasca nuju! Mé tsujun xi siu quicun handasa ndiya cueya ne, tuhun rē ngahñu ta, xi má rē Nina naha ne, xa xi nihñu ne, hacuiin tsejen sacuaaha xi ha camá chihin xa jan. ³ Tetuhunrcun nguyējē ni cjua xi ha cachjuhunntsun tséhé Nina, tangunndujun cojo, hane nindeyun xcusun nuju. Cuatjin nihñu ta, sa xi cuascaain rē cjuatacun nuju ne, sehe cjué tjéngé nuju sacuaaha cjue tjéngui rē xuta ngu cha chējē, ta hyuun hora xi cuinduva tjéngé nuju. ⁴ Peru cojo yējē sa ne, tjin ngajñi nuju ngu jo xuta ngajan Sardis xi cjēé tsinguetsun me tsjian rē me cojo cjuatsehen. Me xi cuacun vē ne, cojo ná tsujyihya me; hane cojo ngahan ne, cuaja me tsjian tyava tyjahi, tséhé xi cuatjin ndatjin vechu chuva rē xi casahmi me. ⁵ Me xi scaa rē cjue xcun ne, cojo me nicaja rē me tsjian tyava, sacuaaha me xi cuacun vē. Hacuaaha tsajin nixtin xi scuñju ñihi rē me tséhé libru xi yaha ñihi rē xuta xi sacu rē cjuahñu ta, hisca cueyanangē ñihi rē me xcun Nahmi naha cojo xcun ángel rē me. ⁶ Yo ngayun xi tjin nuju cjuasua xi cuinuhyun cjua xi chja Hasen rē Nina cojo yungun jan ne, ndaja tetuhunrcun.”

Cjua xi cjuahatsja xuta rē yungun ngajan nandya Filadelfia

⁷ Cjua vihi nihindi cojo sa xi cjuahatsja ángel tséhé yungun ngajan nandya Filadelfia. Cuitjin fi cjua: “Cjua vihi ne, cjua rē me xi ndastu mé cjuatsehen tjin rē, hacuaaha quixi me. Me véhē ne, tacuntsja me llavi xi casatē rē nima David, me xi cavítexa. Hane cahndé xi vuxaha me jan ne, tsajin yo xi cuma cuechja. Hane sa xi vechja me ne, tsajin yo cuma scuxaha.” ⁸ Cuatjin fi cjua: “Hvē xa nuju. Casuá nuju cahndé xi tixaha tingotjo xi cumá nuju, hane tsajin yo cuma cuechja xi cumá nuju. Hacuaaha hvē ta, chuva má ngahñu nuju, peru handasa cuatjin ne, cavetjun cjua naha hacuaaha cjēé cjuahmu ñihi

naha. ⁹Tuhun cjuasua ta, chutsujun mé cumá rè xuta jan xi vihdé me tséhé Satanás. Xuta jan ne, chja me xi tjé rè Israel má me, peru hacuiin xuta naha me ta, xuta ndacha me. Sahme xi xuta jan ne, cuínduva me cuiticjxcun me ntsacun, hane scuëë me ta ngahan ne, meje ná ngayun. ¹⁰Cavetjun cjuajeya xahasen nuju sacuaaha xi ngahan catsingácun nuju. Ngatsé rè vèhé ne, ngahan ne, hacuaaha cuetjo nuju cojo sa xi satiin nuju cjuacjintacun tséhé hora xi chjahachuva rè xuta. Hora vèhé ne, ha tacun xati xi nduva xcun jingujyë ni ngasunhdé, hane hya chjahachuva rè jinguyëjë ni me. ¹¹Ngutjen ni cjuëhé. Tangunndujun cojo cjuja xi ha camachaya nuju tséhé, cojo sa xi tsajin yo cjue cojo corona xi saté nuju. ¹²Yo xi scaa rè cjue xcun tséhé cjuatsehen, ngahan ne, sahme xi cumá me sacuaaha xihndé xi xcun vasencja rè yungun xi vaniji hai rè yungun rè Nina. Hane quihndé cuetjuxiin me. Setaha rè me ñihi rè Nina naha cojo ñihi rè nandya rè Nina, Jerusalén xatsé. Nandya jan ne, sahmi Nina xi nduvajne tséhé ngahnga. Hacuaaha hisca setaha rè me ñihi xatsé naha. ¹³Yo ngayun xi tjin nuju cjuasua xi cuinuhyun cjuja xi chja Hasen rè Nina cojo yungun jan ne, ndaja tetuhunrcun.”

Cjuja xi cjuahatsja yungun ngajan Laodicea

¹⁴Cjua vihi nihndi cojo sa xi cjuahatsja ángel tséhé yungun ngajan nandya Laodicea: “Cjua vihi ne, cjuja rè me xi cjuaquixindaja, cjuja xi chja me ne, quixi hacuaaha cuatjin jain. Ngatsé rè me vè jan ne, cavetjucaa yëjë xi casahmi Nina. Cuitjin fi cjuja jan: ¹⁵Ndaja machaya ná hacutjin nihña xa nuju. Hacuiin jemu ndaja peru hacuaaha hacuiin jemu chojyihí, tu vasentjin siu. Xi má ná ne, hitsé sa ndaja sa xi hatuxa ndaja o sa xi hatuxa chojyihí. ¹⁶Ngayun ne, ha maji sa tu ngu tsé vè ngayun, peru ngayun ne, jemu va xcusun nuju, vèhé xi cuaxëxin nuju sacuaaha xi cuéhé natya cojo ntsuva. ¹⁷Vihi cjuja xi nújun: Ngayin ne, nchina ngayin. Jercu cavetjin tujún hane tsajin mé machaja niji. Cuatjin nújun. Peru machayiin nuju tséhé cjuaquixi ta, xi quixi ne, jemu chojyihí tsujun, cojo cjuatsehen nuju, yuma yun, rcá yun, hane hacuaaha quixti ngayun. ¹⁸Vinchajyë nuju xi chuhun tsahan. Tjin ná oro ndaja xi catsicjé ndihi xutsé rè, hane cojo vèhé cuma nchina jain yun. Tjin ná tsjian tyava xi cuma chujun cojo sa xi hacuiin tu yo ni scuëë cjuasava nuju xi quixti ngayun. Hacuaaha tjin ná rqui xi cuincha tuxcun, hane cumatsejen jain nuju. ¹⁹Tichjátaha nuju ta, hya xi tjin yo me xi ngahan meje ná me ne, chjátaha rè me hacuaaha vicuya rè me. Tséhé vèhé ne, catamachinitacun hane choho catama nuju, nindeyun xcusun nuju. ²⁰Nguehe tejña xi tichjá cojo nuju. Tu yo ni xi cuihdé xta naha ne, sehe sua cahndé ne, ngahan ne, cuisehen ngajan, hacuaaha siné ñiñu cojo me, hane me vèhé ne, siné me cojo ná ngahan. ²¹Yo ngayun xi scaa nuju cuangun xcun tséhé cjuatsehen, suá nuju cahndé xi cuinechun cojo ná cahndé hñu naha. Cuatjin cumá cojo nuju tangun ni sacuaaha xi ngahan ta, hacuaaha cacaa ná cëjë xcun, hane tejña cojo Nahmi naha cahndé hñu rè me. ²²Yo ngayun xi tjin nuju cjuasua xi cuinuhyun cjuja xi chja Hasen rè Nina cojo yungun jan ne, ndaja tetuhunrcun.”

4

Cavëë Juan cahndé rcun ngajan ngahnga

¹Hya xi cavatju vihi ne, cahvë xi ngajan ngahnga ne, tsejen ngu tingotjo xi tixaha. Hane xta rè me xi cahndé xi cachja cojo ná titjun jan xi nuhya rè sacuaaha nuhya rè ngu tyjo, xta vèhé cachja cojo ná cuitjin:

—Ndoveniiji nguehe sehe tsingá cun ri xcusun xi sehe cumá.

² Hora vèhè ne, catsuva ná ngahñu rë Hasen rë Nina, ngajan cahvè xi ngajan ngahnga ne, tacun ngu cahndé rcun cojo ngu me xi tacun xcun.

³ Hane me xi tacun xcun jan ne, xcusun rë me ne, seti tsejen sacuaaha ndyojo seti xi hmí rë jaspe o cornalina. Hane ngu yejña sacuaaha ndyojo seti xi hmí rë esmeralda, vèhè vindee rë cahndé rcun jan. ⁴ Tahndee rë cahndé rcun jan ne, siu sa can ñuju cahndé rcun, hane xcun jan ne, siu can ñuju xuta changá. Me vèhè ne, yaja me tsjian tyava hacuaaha hinchasun rcu me corona tsèhè oro. ⁵ Tsèhè cahndé rcun jan ne, vatè ndihichuhún hacuaaha tsingá chuhun. Hacuaaha xcun cahndé rcun jan ne, ti ndihi rë yatu lámpara xi hacui yatu Hasen rë Nina. ⁶ Hacuaaha nangui xcun cahndé rcun jan ne, tsejen sacuaaha ngu ndachacun tsèhè vidriu xi hasen sacuaaha hasen ndyojo tsin. Hane tsèhè tahndee rë cahndé rcun jan ne, chuva ngu yuju rë, siu ñuju xcusun xi quicun. Hane xcusun jan ne, yaja tuxcun jingujyè yojo rë, sa taha xcun, sa taha ngaxtun. ⁷ Ngu xi quicun jan ne, xcusun rë ne, sacuaaha chu xa tsejen. Xi majo ne, sacuaaha ndyaja, hane xi má jyan ne, sacuaaha xcun xuta tyeji xcun. Xi má ñuju ne, sacuaaha ngu chu jya xi tivitjen chu, cuatjin tsejen. ⁸ Jima ngu xi quicun jan ne, tjin jyun tyjunga rë. Hane jingujyè ni tsèhè yaja tuxcun, taha xcun cojo taha ngaxtun. Hane xi quicun jan ne, sa nixtin, sa nixten, sejiin ta, chja cuitjin:

Tyjahi, tyjahi, tyjahi

camahani Nina xi jemu hñu cjua.

Nina tacun me, cavejña me hatsèè, hacuaaha cuejña cuaha me.

Cuitjin chja.

⁹ Hane sahmi jyè hnga ñihi rë Nina hacuaaha sua nacuehji rëhè hacuaaha vaxëndaja rë Nina xi tacun xcun cahndé rcun jan, Nina xi tacun cuaha me yèjè nu, yèjè nixtin. Hane jimangu ndiya xi vaxëndaja rë Nina ne, hora hya ne, ¹⁰ can ñuju xuta changá xi siu jan, viticjxcun me xcun me xi tacun cahndé rcun jan, hane faharcun me me xi tacun nu cjuí nu nduva. Hacuaaha xuta changá jan ne, candisun me corona rë me xcun cahndé rcun jan, sehe chja me cuitjin:

¹¹ Ngayun Nai niji, ngayun Nina niji,

vechu chuva rë xi cuma jyè cuma hnga yun hacuaaha sacu nuju ngahñu cjua.

Ngayun canihñu yèjè ni xcusun,

hane ngatsè rë cjuandaja nuju siu yèjè ni hacuaaha camá yèjè ni.

5

Xtè xujun cojo yatu sellu

¹ Sehe cahvè xi tsja ladu quixi me xi tacun xcun cahndé rcun jan, yaha me ngu xtè xujun xi camahindu xcun cojo ngaxtun, hacuaaha xujun jan ne, tine rë yatu sellu. ² Hane hya ne, cahvè ngu ángel xi jemu hñu cjua, hane titsiquindé cojo yèjè ni ngahñu rë cjua vihi:

—¿Yo ngayun xi vechu chuva rë xi cuicheyun sellu rë sehe nixingun xtè xujun vihi?

³ Hya xi camá ne, ndastu yo, sa xi siu ngahnga, sa xi siu nangui, o sa xi siu ngahma nangui, ndastu yo cavetjucacun xi tsixinga xtè rë xujun jan, o sa xi scutsejen mé xi chja. ⁴ Hane ngahan ne, cajíhnda nguñajacá cun, tsèhè xi casacuiin yo xi cuechu chuva rë xi tsixinga xtè rë xujun jan, sehe scutsejen mé xi chja. ⁵ Ngajan xi ngu xuta changá jan ne, cachja me cojo ná cuitjin:

—¡Xi cachjihndiin sa! Chutsijin ta, me xi hmí rē Chu Xa tsēhē tjē rē cha Judá ne, me xi cavetjusehen tsēhē David xi cavitexa hatsēē ne, me vēhē cacaa rē me quiji me xcun. Hane me vēhē cuma tsixinga me xtē rē xujun cojo yatu sellu rē.

Cristu, ta xuta matitjun má me, cafaha me xtē xujun

⁶ Xi cavutsejen, ngajan secun vasencja rē cahndē rcun jan cojo tahndee rē, ngajñi rē ñuju xi quicun jan cojo xuta changá jan, ngajan secunhñu ngu xihin sacuaaha Chu Tsánga, xi tsejen sacuaaha ngu chu xi cahme. Me xi sacuaaha tsánga jan ne, tjin yatu ndyaja rē cojo yatu tuxcun xi hacui yatu hasen rē Nina xi visehen jingujyē ni ngasunhdē. ⁷ Hane me xi sacuaaha tsánga jan ne, canduva me cafaha me xtē rē xujun tsēhē tsja quixi me xi tacun xcun cahndē rcun jan.

Xuta changá ne, faharcun me Jesucristu

⁸ Hane hora xi cafhatsja me xtē rē xujun jan ne, catsiñuju xcusun xi quicun jan cojo can ñuju xuta changá jan ne, caticjaxcun me xcun Tsánga jan. Jimangu me ne, yaha me ngu arpa hacuaaha jimangu me hinchangui tsja me tyucu ndixuhi tsēhē oro xi quitsē rē cojo tyjungunsa. Hane tyjungunsa jan ne, hacui oración rē me xi nguñajacacun macjain rē me. ⁹ Hane me vēhē ne, tisē me ngu sun xatsē xi cuitjin fi cja rē:

Vechu chuva rē xi chjuhun xtē rē xujun vē, hane nuxuhun sellu rē; tsēhē xi catsiquehen me yun,

hane cojo jni nuju xi cavanga ne, cachuhun xi cumá rē Nina xuta tsēhē yējē ni tjē, yējē ni hne, yējē ni nandya, cojo yējē nación.

¹⁰ Hacuaha ngayun ne, canihñu xi xuta jan ne, cumá me xuta xi vitexa me, hacuaaha cumá me sacuaaha nahmi xi cjuahancuenda rē Nina xi faharcun me, hane cuitexa me nguehe xcun nangui.

Cjín ángel ne, faharcun rē Jesucristu

¹¹ Sehe cavutsejen jemu cjín camahani ángel xi cavindee rē cahndē hñu hiscan siu xcusun xi quicun jan cojo xuta changá jan. Hane tjin xqui sacuaaha tsēhē tē mil ndiya xi tē mil. Hacuaha cahndē xta rē ángel cjín jan ¹² cachja hñu cuitjin:

Me xi má Tsánga xi catsiquehen xuta me ne, vechu chuva rē xi cjuahatsja me ngahñu xi cuitexa me, cojo cjuanchina, cojo cjuahasen, hacuaaha hñu cumá cja rē me, tjin rē me cjuandaja rē xuta, cuma jyē hnga me hane yējē ni me ne, tsinchacuntihin rē me.

Yējē ngarca ni ne, faharcun rē Jesucristu

¹³ Sehe cahndē xi nguyējē ni xi siu ngahnga cojo nguyējē ni xi siu ngasunhdē cojo nguyējē ni xi siu nguihma nangui cojo ngajñi ndachacun, yējē ngarca xi cuacun vē ne, tichja cuitjin:

Cuitjin cumá tsēhē me xi tacun cahndē rcun hacuaaha cumá tsēhē Tsánga jan: ¡Catama tsēhē me xi tsinchacuntihin rē me, xi chjaharcun rē me, xi cuma jyē hnga me, xi tjin rē me ngahñu!

¡Cuatjin catama me tsēhē me nu cjui nu nduva!

¹⁴ Hane catsiñuju xcusun xi quicun jan ne, cachja cuitjin:

—¡Cuatjin jain!

Hane xuta changá jan ne, caticjaxcun me sehe cafharcun rē me.

6

Sellu tjun

¹ Cavutsejen ngahan hya xi Tsánga jan ne, cavuxaha me ngu sellu tséhë yatu sellu jan. Hane tséhë catsiñuju xcusun xi quicun jan ne, cahndë ngu xta xi nuhya rê sacuaaha xi faneya. Cuitjin cachja:

—iNdove!

² Hane cavutsejen xi cavetjutsejen ngu naxin tyava. Hane me xi quisun rê chu jan ne, yaha me ngu yanchijnu, sehe casacu rê me ngu corona hane cavetju me sacuaaha ngu cha xi cjue sahmi si xi tjin ngucacun cha xi scaa rê cha xi cjue cha xcun.

Sellu xi majo

³ Hane hya xi cavuxaha Tsánga jan sellu xi majo ne, cahndë ta, xcusun xi majo xi quicun jan ne, cajindaya cuitjin:

—iNdove!

⁴ Ngajan cavetjutsejen ngu nga naxin xi hani hñu xcusun ru. Hane me xi quisun rê chu vë ne, ngu me xi casatë xa rê xi cjuahaxin me cjuajeya xi tjin nangui, cojo sa xi xuta ne, tsiquehen xicjin me ngajñi rê me. Hane suva me vëhë ne, cafahatsja me ngu quicha jyë.

Sellu xi majyan

⁵ Hya xi cavuxaha me sellu xi majyan ne, cahndë xcusun xi quicun xi majyan jan, hane cuitjin cachja:

—iNdove!

Hane cavutsejen xi cavetjutsejen ngu naxin jma. Hane me xi quisun rê chu vë ne, yahatsja me ngu nisu chuva. ⁶ Sehe cahndë sacuaaha ngu xta xi vetju tséhë ngajñi rê catsiñuju xcusun xi quicun jan xi cachja cuitjin:

—Ngu ni kilu trigu sacu chjî rê mosu, o sa jyan kilu ni cebada sacu rê me; peru aceite cojo xan rê uva ne, cumachajiin.

Sellu xi má ñuju

⁷ Hane xi cavuxaha me sellu xi má nuju ne, cahndë xcusun xi quicun xi má nuju jan, hane cuitjin cachja:

—iNdove!

⁸ Hane cavutsejen xi cavetjutsejen ngu naxin xi jemu va jyihî. Hane me xi quisun rê chu jan ne, Cjuaveya hmî rê me, hane tjengui tiña rê me, me xi hmî rê Hades, cahndë hiscan xi má hasen rê nima castigu. Hane me vëhë jan ne, tjin rê me cahndë xi tséhë ngu tséhë ñuju rquí xuta ngasunhndë xi cuma tsiquehen me ngu rquí vë cojo espada o cojo jindya o cojo chíhin o sa xi cojo chu cjan rê xi tjin xcun nangui.

Sellu xi má hñu

⁹ Hya xi catuxaha sellu xi má hñu ne, ngajan ngahma rê ngasunscun ne, cahvë hasen rê nima xi catsiquehen xuta ngatsë rê xi camacjain rê me cjuar rê Nina cojo ngatsë rê cjuaquixi rê me xi casua me. ¹⁰ Me vëhë ne, cajindaya me cachja me cuitjin:

—Ngayun Nai rê yëjë ni, jemu tyjahi yun, quixi cjuar nuju. ¿Janihya nihñu cuendun jyë rê xuta xi siu me xcun nangui, hane nihñu ngojo jni niji? —Cuatjin cachja me.

¹¹ Ngajan xi cafahatsja me jimangu me ngu tsjan tyava, hane cafaha me cjuar xi cuejñajyu me ngu jo nixtin sa. Vindeya sa rê hisca hya xi cumachihin xqui rê xuta ladu rê me cojo me xi hacuaaha tangun cueya sahmi xuta sacuaaha cavatju me suva me.

Sellu xi má jyun

¹² Hacuaha cavutsejen hya xi cavuxaha me sellu xi má jyun. Hya ne, jercu cjuachan cafani nangui. Tsuhi ne, camá jma. Jemu va jyihí camá, sacuahá ngu tsjian jma. Hane sá xatsë ne, camá hani sacuahá jni. ¹³ Hane niñú tsëhë ngahnga ne, cavixu xcun nangui sacuahá vixu tu ré ya higo hya xi vanga tjo hñu. ¹⁴ Ngahnga ne, cafëya sacuahá ngu xujun të xi catsijeyu, hane hisca tjin ngu naxi o ngu nangui xi hinchá vasencja rë ndachacun ne, catjune rë cahndë rë. ¹⁵ Ngajan xi xuta xi vitexa me ngu nangui, cojo yahnga me xi cojo me vitexa me, cojo xuta nchina, cojo sindadu capitán, cojo xuta xi hñu cjuá, cojo yëjë sa xuta, sa xuta xi caxteña o sa xuta xi ndaya tjin, nguyëjë ni me quiji cavangahma me cahntsua nguio cojo ngajñi naxindya rë nguijná cha.

¹⁶ Sehe cafehyataha rë me nguijná cojo naxindya jan cuitjin:

—¡Catixusun niji cojo sa xi tinchunhmu niji! Cuatjin cuma cuinechinmi tsëhë xcun me xi tacun cahndë rcun hane satiin niji cjuaxti rë Tsánga jan.

¹⁷ Cuatjin cumá ta cavechu nixtin xi jercu choho cumá ngatsë rë cjuaxti rë me, hane ¿há tjin yo scaa rë cojo?

7

Xuta xi macjain rë Nina

¹ Xi cavutsejen vihi ne, cahvë ñuju ángel xi hinchacun quixi catsiñuju yuju rë ngasunhndë. Hane ángel jan ne, casuaain cahndë xi cuanga catsiñuju tjo xi vanga ngasunhndë ta, hisca xi ngu tjo ne, cuangaain xcun nangui, o xcun ndachacun, o hisca rcu ngu ya. ² Sehe cahvë ngu ángel xi hacjahi. Hane camiji ángel jan hiscan xi vetjucaa tsuhi, hacuahá yaha ángel sellu rë Nina quicun. Hane cajindayahñu ángel jan cojo catsiñuju vë ta tacuntsja ángel vë xi choho sahmi cojo nangui cojo ndachacun. ³ Cuitjin cachja me cojo:

—Ndastu mé dañu nihñu cojo nangui, cojo ndachacun, cojo ya. Ndastu mé nihñu hisca xi cajnetaha cavetaha sellu xten xuta xi cavatsë Nina naja.

⁴ Ngajan xi cahndë xi cachja me xqui rë me xi casetaha rë chuva cojo sellu jan: ngu cientu cojo yachan ñuju mil má me tsëhë yëjë xuta tjë rë Israel.

⁵ Tsëhë xuta tjë rë Judá ne, tejó mil má me xi yaha sellu; hacuahá tejó mil má me tsëhë xuta tjë rë Rubén, tejó mil tsëhë xuta tjë rë Gad. ⁶ Tejó mil má me tsëhë xuta tjë rë Aser; tejó mil tsëhë xuta tjë rë Neftalí, hacuahá tejó mil tsëhë xuta tjë rë Manasés. ⁷ Tsëhë xuta tjë rë Simeón ne, tejó mil má me xi yaha sellu; hacuahá tejó mil má me tsëhë xuta tjë rë Leví, tejó mil tsëhë xuta tjë rë Isacar. ⁸ Tsëhë xuta tjë rë Zebulón ne, tejó mil má me xi yaha sellu; hacuahá tejó mil má me tsëhë xuta tjë rë José, tejó mil tsëhë xuta tjë rë Benjamín.

Xutaxín xi hacuahá camacjain rë me

⁹ Xi cavatju xcusun vihi ne, cavutsejen, hane cahvë xutacjín. Hisca tsajin yo cuma cuexqui rë me. Canduva me tsëhë ngajñi rë jimangu nación, jimangu tjë ré xuta, jimangu nandya cojo jimangu hne. Hane cafehe me hinchacun me xcun cahndë rcun cojo xcun Tsánga jan. Yaja me tsjian tyava hacuahá yahatsja me jne. ¹⁰ Hane jindaya me cojo ngu xta hñu, tichja me cuitjin:

Xi cavetjuntjen ne, camá ngatsë rë Nina naja
xi tacun me cahndë rcun
cojo ngatsë rë Tsánga jan.

Cuatjin cachja me. ¹¹ Ngajan xi yëjë ni ángel ne, hinchacun quixi tahndee rë cahndë rcun jan hacuahá cavindee rë xuta changá jan cojo catsiñuju xcusun

xi quicun jan. Hane caticjxcun ángel xcun cahndě rcun hane cafaaharcun rě Nina, ¹² tichja cuitjin:

¡Cuitjin jain!

Nina ne, yějě ni tsinchacuntihin me. Jyě hnga me.

Tjin rě me cjuahasen. Taan nacuechji rě me.

Xuta ne, vaxěndaja me. Vechu chuya rě xi cjuahatsja me ngahñu xi cuitexa me. Hacuaha hñu cjuar rě me.

Cuanitjin cjue me yějě nu yějě nixtin.

¡Cuatjin jain!

¹³ Hya xi camá ne, ngu xuta changá jan, cafinenguisse me ngahan cuitjin:

—Me xi cuicun xi yaja tsjian tyava ne, ¿yo má me? hane ¿hisca jani canduva me?

¹⁴ Ngajan xi cafayanguě cuitjin:

—Tatá, xcusun vėhě ne, ngayun hyun, hacuiin ngahan.

Sehe cachja me cojo ná cuitjin:

—Me vihi cacaa rě me cjuañihi cjuacjintacun jyě. Cavane me tsjian rě me, camá tyava cojo jni rě Tsánga. ¹⁵ Vėhě xi tjin rě me cahndě xcun cahndě rcun rě Nina, hane fahacuenda me nixtin nixten cahntsua yungun rě me. Hane Nina xi tacun xcun cahndě rcun ne, ngu tangun ni cuejnándaja me cojo xuta jan. ¹⁶ Hindě tsajin nu tsajin nixtin cuma vojo rě me. Cuma xindaain rě me, cuacaain rě me tsuhi; hacuaha tsijendaain rě me cojo hnde rě, ¹⁷ ta cahndě rě vėhě ne, Tsánga xi tacun cavasencja rě cahndě rcun ne, cuahacuenda rě me, hane cuincha ndiya rě me xcun nandá xi sua cjuahñu. Hane Nina ne, tsixiya me yějě ndatuxcun xuta jan.

8

Sellu xi má yatu

¹ Hane xi cavuxaha me xi sacuaha Tsánga jan sellu xi má yatu ne, ngahnga ne, cavejña jyu camahani sacuaha chuya rě vasen hora. ² Cuatjin camá. Sehe cahvė xi yatu ángel vė xi siucahndě xcun Nina ne, cafaahatsja yatu tyjo. ³ Sehe canduva sa ngu ángel xi yaha ngu tyucu ndixuhi tsėhė oro, hane casecunquixi cojo tiña ngasuncun. Ngajan cafaahatsja me cjin tyjungunsa cojo sa xi cuaca me xcun ngasuncun tsėhė oro jan xi tacun xcun Nina. Hane hnde rě ne, camatangun cojo oración rě yějě me xi tyjahi cjuatacun rě me cojo sa xi cuma chihin cjuar. ⁴ Hane nihndi rě tyjungunsa xi yahatsja ángel jan ne, casecjan cojo oración rě me xi tyjahi cjuatacun rě me, hane camiji tangun hiscan tacun Nina. ⁵ Ngajan xi ángel jan ne, cafaha tyucu ndixuhi jan, catsingutsė rě cojo ndihi tsėhė ngasuncun jan hane catsingatjen rě xcun ngasunhndě. Hane hora vėhė cafaneya cjuachan cavatė hacuaha cafani nangui.

Yatu tyjo xi tsijane ángel

⁶ Hya xi camá ne, yatu ángel xi yaha yatu tyjo jan ne, caviyujucacun xi tsijane tyjo rě. ⁷ Ángel xi tjun jan ne, catsijane tyjo rě. Hane jercu cavaha tsi ndyjo xcun nangui. Hacuaha cavixu ndihi xi tecjan cojo jni. Cojo vėhė ne, tsėhė yějě ni ya xi tjin ne, tsėhė chuya jyan ne, ngu cati. Hisca cojo jinguyjė nguijná xi xcuen ne, cafė cati.

⁸ Sehe catsijane ángel xi majo jan tyjo rě. Hane hora vėhė ne, camatsejen sacuaha ngu nguijnácha jyě xi yaha rě ndihi xi cjanenguiya ngajñi ndachacun. Hane tsėhė yějě ndachacun ne, tsėhė chuya jyan cahndě, ngu ni cavuya

jni. ⁹ Ngajan xi tsëhë yëjë chu xi hinchá nandá jan, tsëhë chuva jyan chu ne, ngu chu cahme chu; hacuaha tsëhë chuva jyan barcu xi hinchasun ne, ngu café cati.

¹⁰ Sehe catsijane ángel xi majyan jan tyjo rë. Hane hora vëhë ne, canenguia tsëhë ngahnga ngu niñú jyë xi jercu ndaja seti sacuaha seti ngu ndihi jyë. Hane niñú jan ne, casatë rë ndajyë cojo hiscan vetju nandá. Hane tsëhë yëjë nandan jan ne, ngu tsëhë chuva jyan cahndë casatë rë. ¹¹ Niñú jan ne, yaha ñihi rë xca sa xi hmí rë Ajenjo, ta cavuya sa nandá hiscan cjanenguia niñú. Hane jemu cjín xuta cahme me xi cahvi me nandá sa jan.

¹² Sehe catsijane ángel xi ma ñuju tyjo rë, hane choho casahmi cojo tsuhi cojo sá ta jemu camachuva hasen rë. Hacuaha chuva rë jyan niñú ne, ngu ni café ngahñu rë cahvo. Ngajan xi tsëhë ngu cuaha nixtin o tsëhë ngu cuaha nixten ne, ngu tsëhë chuva jyan cahndë ne, camajñu hane casacuiin hasen rë.

¹³ Hya xi camá ne, ngajan vasencja rë ngahnga tivitjen ngu chu jya. Hane cuitjin sahmi sen chu cajindaya chu cojo ngu xta hñu:

—Cojo cjuatsehn nuju, ngayun xuta xi nechun ngasunhdë ta, tsëhë xi vangu sa jyan sa ángel xi chaja sa tsijane tyjo rë.

9

¹ Hya xi camá ne, catsijane ángel xi má hñu jan tyjo xi yaha, hane cahvë ngu niñú xi cjanengui tsëhë ngahnga xcun nangui. Hane cafahatsja niñú jan llavi tsëhë ngojo rë nduchin. ² Sehe cavuxaha nduchin ne, hane jemu camiji nihndi rë sacuaha nihndi rë ngu hornu jyë. Hisca tsuhi cojo jingujyë ni tjo ne, tsejen jñu ngatsë rë nihndi xi vetju tsëhë nduchin jan. ³ Hane tsëhë ngajñi rë nihndi jan ne, cavixu chu nchahva xcun nangui. Hane chu jan ne, tsavi cojo chu sacuaha tsavi cojo chu naya xi siu ngasunhdë. ⁴ Hane cafaha chu cjua xi tsajin mé sahmi chu cojo nguijña o cojo xca o sa cojo ya ta, suva xi satë chu xuta xi siutaain xten me sellu rë Nina. ⁵ Casacuiin rë chu cahndë xi tsiquehen chu xuta jan ta, cuenda jemu cuiyujuhmu me cahntsua hñu sa. Hane cjuahmu xi cuiyuju me cojo ne, jineya sacuaha jineya hiscan cjuaha chu naya.

⁶ Nixtin hya ne, xuta jan ne, tsimeje me cjuaveya, peru sacuiin cjuaveya xi cuma rë me. Xuta jan ne, cjuhyacacun me cjuaveya, peru sacuiin.

⁷ Chu nchahva jan ne, tjin chjine chu sacuaha naxin xi tjin chjine chu xi cjue chu si. Hinchasun rcu chu ngu xcusun sacuaha ngu corona tsëhë oro, hane xcun chu ne, tsejen sacuaha xcusun rë xcun xuta. ⁸ Tsa rë chu ne, sacuaha tsarcu yachjin, hane nehñu chu ne, sacuaha nehñu xa cjan rë. ⁹ Tixté cun ru cojo ngu xcusun sacuaha chinga quicha, hane xi nuhya rë xi fane tyjunga ru ne, hñu nuhya rë sacuaha cjín camahani carreta xi tijuvë naxin xi cuetsihin si. ¹⁰ Ndetsihin chu yaha quicha rë chu naya. Hane cojo quicha jan ne, tjin ru cahndë xi sua chu cjuañihi xuta xcun xi hñu sa jan. ¹¹ Hane sacuaha rey rë chu ne, má ángel rë nduchin jan. Ángel jan ne, Abedón hmí rë sa xi hne hebreo o Apollyon sa xi hne griego. Catsijo cjua vë ne, vijne Ngu xi Tsiqueya rë.

¹² Vëhë má cjuañihi xi tjun cuma. Jo sa má xi ha meje cuatju.

¹³ Hya xi camá ne, catsijane ángel xi má jyun tyjo rë. Ngajan xi canuhya rë ngu xta xi cavetju tsëhë tjeheh rë ngasunscun xi tacun xcun Nina, hiscan xi jyihi sacuaha ndyaja ru. ¹⁴ Xta jan ne, cachja cojo ángel xi má jyun xi catsijane tyjo jan. Cuitjin chaja:

—Nismi catsiñuju ángel xi tjihñu tjehen rë ndajyë jyë xi hmí rë Eufrates.

¹⁵ Hane camandaya catsiñuju ángel jan. Ángel jan ne, caviyujuya hisca xi cuechu nu, cuechu sa, hane cuechu nixtin xi cuma meje rë xi tsiquehen rë xuta. Chuva jyan chuva jyan xuta ne, ngu ngu me cueya me. ¹⁶ Hane xqui rë sindadu xi vitexa ángel jan ne, jo cientu millón má xi hinchasun naxin. Hane ngahan suva cahndë xqui rë.

¹⁷ Naxin cojo cha xi hinchasun rë chu xi cahvë ngajñi nijña naha ne, cuitjin cun. Cha xi hinchasun rë chu ne, yaja cha chinga quicha xcusun hani rë ndihi, xcusun rë susë hñu hacuaha xcusun sine. Hane rcu chu naxin jan ne, sacuaaha rcu chu xa cjan rë cun. Hane tsëhë hntsua chu ne, tivetju ndihi tivetju nihndi cojo azufre. ¹⁸ Hane ngatsë rë jyan cjuañihi jan xi vetju tsëhë hntsua chu matsejen ne, ngatsë rë ndihi, cojo nihndi cojo azufre ne, ngu cahndë tsëhë chuva jyan cahndë xuta cahme me. ¹⁹ Jemu tsavi cojo hntsua chu, peru hacuaha tsavi cojo ndetsihin chu. Ndetsihin chu ne, sacuaaha chu yë cun ta, tjin rcu. Hane rcu vëhë ne, má sahmi chu dañu cojo.

²⁰ Peru handasa cuatjin camá, xuta xi cacaa rë me ta cahmii me cojo cjuacjintacun vëhë ne, tsajin camacjincacun me tsëhë cjuatsehen xi casahmi me ta, cafaharcun cuaha me xitsehen cojo nina xi camá tsëhë oro, tsëhë plata, tsëhë quicha sine, tsëhë ndyojo, cojo tsëhë ya. Cafaharcun cuaha me nina jan xi maji vutsejen, maji hndë, maji tsujyihya. ²¹ Hacuaha tsajin camacjincacun me tsëhë xi catsiquehen xicjin me, o tsëhë xcusun xi sahmi me ngatsë rë xi ma rë me cjuá surqui, o tsëhë cjuatsehen xi sahmi ngajñi rë me sa chjuun cojo chjuun o sa xihin cojo xihin, o sa tsëhë cjuachëjë rë me. Catsindeyaain me xcusun rë me.

10

Ángel xi yaha xtë lihndi xujun

¹ Hya xi camá ne, ngajan cahvë ngu ángel xi hñu cjuá, nduvajne tsëhë ngahnga tixtëcun rë yuffi. Hacuaha ngu yejña cavindee rë rcu ángel jan. Xcun ne, seti sacuaaha tsuhi; hane tyuhmi rë ne, tsejen sacuaaha ngu ndihi hndë xi vitjen. ² Hane yahatsja ngu xtë lihndi xujun xi cavixinga. Hacuaha cavisane ntsacu quixi xcun ndachacun hane xi scun ne, xcun nangui quixí. ³ Ángel jan ne, cajindaya cojo ngu xta hñu, hane nuhya rë sacuaaha xi tsichan ngu chu xa. Hacuaha hora xi cajindaya ne, cachja xta rë yatu chuhun vatë. ⁴ Hora xi cachja yatu chuhun jan ne, cavéññacáacun xi tshindú cjuá jan peru casahmee ta, cahndë ngu xta tsëhë ngahnga xi cachja cojo ná cuitjin:

—Caveni nihndi cjuá rë yatu chuhun vë ta, cuiyujuhma cjuá vë.

⁵ Hya xi camá ne, ángel xi cahvë xi secun xcun ndachacun cojo xcun nangui quixí jan ne, catsiquijin tsja quixi ngahnga. ⁶ Hane casua cjuaquixi rë hisca caveyanangui rë Nina xi tacun yëjë nu yëjë nixtin, me xi hacuaha catsicha rë ngahnga cojo yëjë ni xi tjin rë, cojo nangui cojo yëjë xi tjin rë, cojo ndachacun cojo yëjë xi tjin rë. Cuitjin cachja xi casua cjuaquixi rë:

—Vindeyaain sa rë ta, ⁷ ha ndiya jiya nixtin xi suacuenda ángel xi má yatu. Hya tsijane tyjo rë ne, hane cumachihin cjuá xi jiyahma rë Nina, cjuá xi casua me camachaya rë profeta xi sahmi xa rë me.

⁸ Hya xi camá ne, ngajan cahndë nga xta xi cachja tsëhë ngahnga cojo ná cuitjin:

—Tihin chjehe xujun lihndi xi tjin tã jan tsëhë tsja ángel xi secun xcun ndachacun cojo xcun nangui quixí. —Cuatjin cachja xta cojo ná.

⁹ Vêhê xi cêjêjtjêngê ángel hane cafehya rê xi catisua ná xujun lihndi jan. Hane cachja cojo ná cuitjin:

—Juhun, chjehe xini cjuarê cojo sa xi titehercui. Cjua jan ne, sahmi sa rê cahntsue, peru ntsove ne, sahmi haxi rê.

¹⁰ Sehe cafaha xujun lihndi jan tsêhê tsja ángel, hane cajinê. Hane ntsuva ne, camá haxi rê sacuaaha xi cajinê tsjen, peru xi cafê cajinê ne, cahntsua canangui naha ne, camahmu. ¹¹ Sehe cavuya cachja nga cojo ná cuitjin:

—Tjin xi cuinoje ngu ndiya nga ngatsê rê Nina. Cuinoje tsêhê xutacjin, xuta xi hacjahi hacjahi naciôn rê me, xuta xi hacjahi hne chja me, hacuaha cojo xuta xi hñu cjuarê me ngatsê rê xi vitexa me.

11

Jo testigu xi cahme ne, cavuya nga cjuahñu rê

¹ Hya xi camá cajinê ne, casua ná ngu rquí ya naxu xi machjirêhê sacuaaha ngu ya chuva. Sehe cachja ángel jan cojo ná cuitjin:

—Tihin chjehe chuva rê yungun xi matitjun rê Nina cojo tsêhê ngasunscun. Hacuaha texqui me xi faharcun ngajan. ² Xi nichove yungun xi matitjun ne, hacuïn cojo cahndê xi má ndatsen rê nichove. Xi canichuviin vê. Cahndê vêhê ne, satêtsja xutaxín xi macjaain rê me Nina. Me xi cuacun vê ne, tsinguetsun rê vê, hacuaha tsinguetsun rê nandya rê Nina xcun xi yachan jo sá cojo xcusun tsehen xi cún me. ³ Xcun nixtin vêhê ne, tsingátju jo testigu naha, hane me xi cuacun vê ne, cuichja me xcusun xi sehe cumá. Ngu mil cojo jo cientu cojo jyanchan nixtin jan ne, cuichja me cjuarê naha, hacuaha cuaja me tsjan rê cjuachoho.

⁴ Jo me vêhê ne, hacui jo ya olivu xi tjin cjuarê tsêhê, hacuaha hacui me xi jo candeleru xi siu xcun Nina, me xi vitexa ngasunhndê. ⁵ Sa tjin ngu xuta xi meje sahmi me dañu me ne, cuetju ndihi tsêhê hntsua me hane tsicjêya rê xi chohovêê rê me. Chuva vêhê cueya tu yo ni xi meje xi choho sahmi cojo rê me. ⁶ Jo me vêhê ne, siutsja me ngahñu xi cuechja me ngahnga sehe cuain tsi nixtin xi cuehya me. Hacuaha satê rê me ngahñu xi sahmi me xi nandá ne cuya jni o xi cuanguihmu rê me nangui cojo yêjê xcusun cjuacjintacun. Cuatjin cumá tu cutjin cjin ndiya cuma meje sahmi me.

⁷ Ndatjin, peru hya xi cafê casua me cjuaquixi rê me ne, ngu me sacuaaha ngu chu chojyihí xi miji tsêhê nduchin ne, sahmi chu si cojo rê me, hane scaa ru cjeu chu xcun hane tsiquehen chu me. ⁸ Hane nima jan ne, hacuïn xinchaniji ta cuiyuju ndiyatê rê ciudad jyê. Ciudad jyê jan ne, sa xi chjahanchuvan ne, cuma cuinújan xi hmí rê Sodoma cojo Egipto. Ngajan ni ne, cahme Nai naja xcun cru, hane ngajan cuiyuju nima. ⁹ Xcun xi jyan nixtin vasen ne, jemu cjuehe xuta. Cjuehe me tsêhê yêjê ni nandya, tsêhê yêjê ni tjê, tsêhê yêjê ni hne cojo tsêhê yêjê ni naciôn. Cjuehe me scutsejen me nima, hane tsingatiin me xi xinchaniji nima. ¹⁰ Hane xuta xi siu ngajan ne, jercu ndama rê me ngatsê rê cjuaveya jan. Hisca cuiyuju me suhi hane tsingatju me cuatjo ngajñi xicjin me. Cuatjin sahmi me ta tjin rê me cjuasua xi cafê jo profeta jan xi jercu casua me cjuañihi.

¹¹ Peru xi cafê jyan nixtin vasen jan ne, xta xi sua Nina xi tsêhê cjuahñu ne, cavisehen nga rê nima. Hane cacinchacun quixi me. Ngajan xi ngu chircun jyê cavisehen rê xuta xi cavutsejen rê me. ¹² Hya xi camá ne, me xi cavuya xta rê ne, cahndê me ngu xta hñu xi cachja tsêhê ngahnga cuitjin:

—Nduvun nuju guehe.

Ngajan xi quijiniji me ngahnga ngajñi ngu yuffi. Hane cavëë xuta xi chohovëë rë me ta quijiniji me. ¹³ Ha hora vëhë ni ne, jercu cjuachan cafani nangui hane tsëhë chuva rë tã rqui tsëhë ciudad jan ne, cavixujne ngu. Hane ngatsë rë me vëhë ne, yatu mil xuta cahme. Ngajan xi xuta xi cavangui me ne, jercu catsacjun me camá. Sehe casahmi jyë casahmi hnga me Nina xi tacun ngahnga.

¹⁴ Cojo vëhë cajnetaha cjuacjintacun xi majo. Peru ha cjuehe xi ma jyan.

Xcusun xi camá hya xi cafane tyjo xi má yatu

¹⁵ Hya xi camá ne, catsijane ángel xi má yatu tyjo rë, sehe canuhya rë tsëhë ngahnga xta hñu xi cachja cuitjin:

Jingujyë rë nandya xi vitexa xuta ngasunhndë xi matitjun ne, cavisehen gobiernu rë Nina naja cojo Cristu, me xi catsingatju me.

Hane me vëhë sahmi me gobiernu yëjë nu yëjë nixtin.

¹⁶ Ngajan xi catsiyëjë can ñuju xuta changá xi siu me xcun cahndë rcun rë me ngajan xcun Nina ne, caticjan xcun me, hane cafaharcun me Nina. ¹⁷ Hane cuitjin cachja me:

Tihin nacuehji nuju, Tatá Nina. Ngayun jercu hñu camahani ngayun.

Hacui ni yun hya, hacui ni yun quihndë, hane hacui ni yun yëjë nixtin.

Hindë ticujun ngahñu jyë nuju xi satë nuju

hane ha tivetsuhun nihñu gobiernu.

¹⁸ Xuta ne, choho hvë me yun,

peru cavechu nixtin xi macjan nuju cojo cjuahngatacun rë me.

Cafehe hora xi nihñu cuendun tsëhë nima.

Tuhun chji rë me xi casahmi xa nuju sacuaaha profeta,

sacuaaha xuta nuju, sacuaaha xutaxín xi faharcun me ñihi nuju.

Tuhun rë yëjë ni me, sa yehe sa langa me.

Hane me xi tsicjëya rë cojo xcusun rë ne, tuhun rë me xi cjueya me.

¹⁹ Ngajan xi cachjahaxin rë tsjian rë tingotjo rë yungun rë Nina ngajan ngahnga, hane cahntsua yungun jan ne, camatsejen caxa ximinchacun xi yaha contrato xi casahmi Nina cojo xuta rë me. Cavatë ndihichuhún, cafaneya, catsinga chuhun, cafani nangui hacuaaha cavaha ngu tsi ndyojo xi jercu hñu camahani. Cuatjin camá.

12

Scaanya yë xitsehen cojo quihndi xi catsingatju Nina

¹ Hya xi camá ne, camatsejen cjuarcun xi sahmi sen ngajan ngahnga.

Camatsejen ngu chjuun xi tixtëcun ran tsuhi. Hane sá ne, tacun ngahma rë ntsacu na. Hane ngu corona xi camá tsëhë tejó niñú ne, vëhë quitaha xten na.

² Hane chjuun jan ne, meje tsin quihndi ran. Jercu jindaya na ngatsë rë cjuahmu cojo cjuachoho tsëhë hacutjin tivatju ran.

³ Hane camatsejen nga ngu sen ngajan ngahnga ta, camatsejen ngu yë xi jercu jyihi chu; hani xcusun ru. Chu jan ne, yatu má rcu chu, tã má ndyaja ru. Hane jima ngu rcu chu

hinja sun ngu corona. ⁴ Cojo ndetsihin chu ne cajavëjne chu ngu cahndë tsëhë jyan cahndë rë niñú rë ngahnga, hane cacandi chu nangui. Hane yë

jan ne, cafaña vassen chu xcun chjuun xi ha hindëya tsin quihndi ran cojo sa xi tsinguijne jingu chu quihndi rë na hora xi tsin.

⁵ Hya xi camá ne, na vëhë ne, catsin rë na ngu quihndi xihin. Hane quihndi xihin jan ne, yaha bastón xi cuitexa me cojo yëjë ni nación cojo ngahñu cjua xi tjín rë me. Hane quihndi

ran jan ne, cachjaha rë xcun Nina, ngajan xcun cahndë rcun rë me. ⁶ Hane

chjuun jan ne, cavanga na quiji na ngu xín. Ngu cahndé xi Nina tjin chjine rē me xi cumá ran. Hane ngajan sacu xi sinē na xcun ngu mil cojo jo cientu cojo jyanchan nixtin.

⁷ Hya xi camá ne, cavetsihin ngu si ngajan ngahnga. Miguel cojo yahnga ángel ladu rē me ne, casahmi me si cojo yē xitsehen jan hacuaha cojo ángel ladu rē xitsehen. ⁸ Hane cacaaín rē yē jan cojo ángel ru, hacuaha catsichaja chu cahndé ru ngajan ngahnga. ⁹ Vêhē xi caningatjen ru xcun ngasunhdē. Yē jan ne, jemu changá chu. Xitsehen xi matitjun o Satanás hmí ru. Chu ndacha chu, vindacha ru xuta ngasunhdē. Hane caningatjexin ru cojo ángel ru hiscan ngasunhdē.

¹⁰ Hya xi camá ne, cahndé ngu xta xi jemu hñu cachja ngajan ngahnga cuitjin:

—Quihndé cavechu nixtin xi Nina cuaxētje me xuta, cumatsejen ngahñu rē me cojo gobiernu rē me. Hacuaha tsejen xi hñu cjua rē Cristu, me xi catsingatju me ta, cama catsingatjexin me chu xi vinchajyē xingueen. Nixtin nixten cavinchajyē rē me xcun Nina naja, peru hindé tsajin. ¹¹ Hane xingueen jan ne, cacaa rē quiji me xcun ngatsé rē jni rē Tsánga jan cojo ngatsé rē cjuaquixi rē me xi casua me tséhē Nina ta, hacuiin machuvacacun me xi cjue xcun me cojo Nina handasa cjueya me. ¹² Hane ngatsé rē vèhē ne, ¡catama sua rē ngahnga cojo me xi siu xcun! Peru ¡ay tséhē nangui cojo ndachacun! ta, tséhē xi canduva tjengui rē xitsehen xi matitjun. Hacuaha jemu quítsé rē cjuaxti tséhē xi vèe xi nixtin rē ne, meje cuijnetaha. —Cuatjin cachja xta jan.

¹³ Hya xi camachaya ru xi caningatjen ru nangui ne, cavetsihin cavanga cojo chu chjuun xi catsi ran quihndí xihin jan. ¹⁴ Peru chjuun jan ne, cafahatsja na jo tyjunga rē chu jya xi jercu jyihí cojo sa xi cuma cuitjen na tséhē chu yē hiscan cahndé xi tjin chjine xi cuma ran ngajan ngu xín. Hane ngajan sacu xi sinē na xcun ngu chan cojo jo chan cojo vasen chan, hane cuechiintaain chu yē na. ¹⁵ Ngajan xi chu yē jan ne, cavaxé chu tséhē hntsua chu nandá sacuaña ngu ndajyē cojo sa xi cuechutaha rē chjuun jan ne, cjue tyjava na cojo ngahñu rē ndajyē. ¹⁶ Peru nangui ne, cavisecoo rē chjuun jan, hane caseya tsjuhun ne, cavingui rē ndajyē xi cavetju rē yē jan. ¹⁷ Vêhē xi yē jan ne, jercu camaxti ru cojo chjuun jan hane sehe quiji casahmi chu si cojo tjé rē na xi cavangui. Casahmi chu si cojo xuta ran xi vetjo cjua xi cavitexa Nina hacuaha sua me cjuaquixi rē Jesús.

13

Yē xitsehen ne, casua chu ngahñu xi cjuahatsja chu chojyihí

¹ Hya xi camá ne, cavejña chu yē jan tjehen ndachacun, hane cahvè xi ngu chu chojyihí ne, tivetju chu tséhē ndachacun. Tē má ndyaja ru hacuaha yatu má rcu chu. Hane tē corona seya xcun ndyaja ru. Hane jima ngu rcu chu ne, yaja ngu ñihí xi tsitjungui rē Nina. ² Chu chojyihí xi cahvè vè ne, sacuaña ntsacu cojo tsja chu oso; hane hntsua chu ne, sacuaña hntsua chu xa sine cjan rē. Hane yē jan ne, casua chu vè ngahñu ru cojo cahndé rcun rē chu, hacuaha casua xa rē chu. ³ Hane ngu rcu chu jan ne, casacuhmu rē hane tsejen xi tsajin rqui rē, ta cueya. Peru cojo yèjé sa ne, camandaja. Hane jinguyè ni xuta ngasunhdé ne, jercu quijircun rē me xi camandaja. Hane cojo cjuasua tjengui me chu. ⁴ Hane xuta ne, caticjan xcun me cafaharcu me chu yē jan ta,

tsëhé xi casua yë cahndé xi vitexa chu. Hacuaha cafaharcun me chu chojyihí jan. Cuitjin cachja me tsëhé chu:

—Ndastu yo xi cuechu xi cumá sacuaaha chu vi. Ndastu yo cuma scaanya cojo chu. —Cuatjin cachja xuta tsëhé chu.

⁵ Chu jan ne, casetaha ngu hntsa chu xi jemu cojo cjuaxta chja chu hacuaha tsitjungui ru Nina. Hane casacu ru cahndé xi cuitexa chu xcun xi yachan jo sá. ⁶ Hane cavetsihin xi choho cachja chu tsëhé Nina, canchati chu tsëhé ñihi rê cojo tsëhé cahndé hiscan viyuju Nina, hane tsëhé yëjë sa me xi siu me ngahnga. ⁷ Hane cafahaxa chu xi sahmi si chu cojo xuta xi tyjahi cjuatacun rê me cojo me xi ndaja cjuinduju me cojo Nina. Hane caa ru cjue chu xcun. Hacuaha cafaha xa chu xi cuitexa chu xuta rê yëjë ni tjë, yëjë nandya, yëjë hne cojo yëjë nangui. ⁸ Hane jinguyëjë me xi viyuju me ngasunhndé ne, cafaharcun me chu. Yëjë ni me xi tsajin ñihi rê me xcun xujun rê Tsánga rê Nina xi hisca ntsacu cavetsihin ngasunhndé ne, cavejña xi cueya. Tsajin ñihi rê me jan ta, tsajin rê me ngahñu xatsë. Hane me vëhé cafaharcun me chu.

⁹ Yo ngayun xi tjin nuju cjuasua xi cuinuhyun cjuavihi, ndaja tetuhuncun.

¹⁰ Me xi saté rê xi cuma me presu, cuatjin cumá. Me xi saté rê me xi cueya me cojo quicha, cuetjucaa jain. Jinguyëjë rê vëhé ne, mameje rê xi xuta xi macjain rê me Nina ne, cjuecani rê xi cumacjain sa rê me.

¹¹ Ngaxtun vëhé ne, cahvë nga ngu chu chojyihí, hane tivetju chu tsëhé nangui. Chu chojyihí xi majo ne, tjin jo ndyaja ru sacuaaha tjin chu tsánga, peru chja chu sacuaaha ngu yë jyë. ¹² Hane hacuaha cojo chu vëhé casaté rê chu ngahñu xi casaté rê chu xicjin cojo ñihi ru. Hane casahmi chu vë xi yëjë ni xuta xi siu ngasunhndé ne, cjuaharcun me chu chojyihí xi tjun jan, chu xi handasa cueya chu xi casacuhmu rê ne, camandaja. ¹³ Hane cama casahmi chu vë cjuarcun yehe cojo seña. Casahmi chu xi cuixu ndihi tsëhé ngahnga, hane xuta ngasunhndé ne, cavutsejen me cjuarcun. ¹⁴ Cuatjin cavindacha chu vë xuta ngasunhndé cojo cjuarcun xi cama casahmi chu ngatsé rê chu xi tjun. Hane cavitexa chu xi xuta ne, cuaxëtaha me ngu xcusun rê chu tjun jan xi casacuhmu rê cojo quicha peru cojo yëjë sa ne, quicun chu. Hane cuatjin casahmi me. ¹⁵ Hane chu xi majo jan ne, casacu ru cahndé xi sua chu xta rê xcusun jan cojo sa xi cuma cuichja xcusun jan, hacuaha cuma sahmi xcusun jan xi cueya tu cutjin cjín me xi tsingatiin xi cjuarcun xcusun jan. ¹⁶ Hane xcusun jan ne, casahmi ngu jyë xi yëjë ni xuta ne, setaha ngu sellu tsja ladu quixi o sa xten me. Cuatjin casetaha rê xuta, sa quihndí, sa changá me, sa nchina, sa yuma me, sa xuta ndaya tjin o sa xi mosu hndixahan; yëjë ni me casetaha rê me. ¹⁷ Hane chuya vëhé ne, sacuiin cahndé xteña hacuaha sacuiin cahndé cuatsé sa xi casetaain rê me sellu jan cojo ñihi rê chu chojyihí jan o cojo xqui rê letra rê ñihi ru.

¹⁸ Cjuatacun vihi ne, tjin mé vijne, peru meje rê xi cuacjantaha me cjuatacun rê me ta cuitjin fi cjuavihi: Catitsichuva me xqui rê chu jan ta, hatuxa xqui rê ngu xuta xihin. Hane xqui rê jan ne, jyan cientu cojo jyanchan jyun má.

14

Ngu cientu cojo yachan ñuju mil me xi cavatsé Nina

¹ Hya xi camá ne, cavutsejen nga, hane ngajan secun Tsánga jan, secun quixi xcun naxi xi hmí rê Sion. Hacuaha siu cojo me ngu cientu cojo yachan ñuju mil xuta xi casetaha xten me ñihi rê Tsánga jan cojo ñihi rê Nahmi rê

me. ² Hacuaha canuhya rè ngu xta tsèhë ngahnga xi nuhya rè sacuaaha fane jemu cjin nandan xi vanga o sacuaaha xi jemu hñu faneya. Hacuaha nuhya rè sacuaaha xi tsijane cha chjine arpa rè cha. ³ Hane xuta jan ne, tisè me ngu sun xatsè xcun cahndè rcun rè Nina hacuaaha xcun ñuju xcusun xi quicun cojo can ñuju xuta changá xi viyuju me ngajan. Hacuuiin yèjè me xi tjin rè me cahndè xi cuma rè me sun jan ta, suvá ngu cientu cojo yachan ñuju mil me xi cuacun jan xi cachaha rè me tsèhë ngasunhndè, me vèhë cuma rè me. ⁴ Me xi cuacun vè ne, catsinguetsiin me cjuatacun rè me cojo yachjin, ta caviyuju suva me. Me xi cuacun vè ne, tjengui me Tsánga tu jani xi cjui. Me xi cuacun vè ne, hacuaaha me xi cachjahaxin rè tsèhë ngajñi rè yahnga xuta xi cuma me sacuaaha ngu cuatjo xi cumá rè Nina cojo Tsánga. ⁵ Me xi cuacun vè ne, hisca xi ngu cjuandesu cavetjijn tsèhë hntsua me; ta tsajin xi cún rè me.

Jyan ángel xi cachja hacutjin cumá cojo xuta xi faharcun rè chu chojyihí

⁶ Sehe cahvè ngu ángel xi hacjahi xi vitjen vasencja rè ngahnga. Ángel vèhë ne, cjuecani rè cjuandajyihí rè Nina xi machuvaain ngahñu rè. Hane sua rè xuta ngasunhndè tsèhë yèjè ni nación, o tjè, o hne, o nandya xi cumachaya rè me cjuaj jan. ⁷ Hane cachja cojo xta hñu cuitjin:

—Chjuhunrcun rè Nina hacuaaha nihñu jyè nihñu hnga me ta, tsèhë xi ha cavechu hora xi sahmicuenda me yèjè ni. Chjuhunrcun me xi casahmi ngahnga cojo nangui cojo ndachacun cojo nanda yufa.

⁸ Sehe tjengui rè me ngu ángel xi majo, hane cachja cuitjin:

—Camá café ngahñu cjuar rè gobiernu xi vitexa rè nandya Babilonia. Xuta rè nandya jan ne, catsitsehen yahnga xuta tsèhë xi sacuaaha catsichihí rè me cojo xan xi hacui cjuatsehen xi sahmi ngu xihin cojo chjuun xi hacuiin tsèhë.

⁹ Sehe tjengui rè me ngu ángel xi majyan, hane cachja hñu cuitjin:

—Yo xi cjuaharcun rè chu chojyihí o sa xi cjuaharcun rè xcusun ru, hane setaha sellu ru xten o sa tsja me ne, ¹⁰ xuta jan ne, tjin rè me xi cuihingui me xan xi hacui cjuacjan rè Nina, hane tsajin mé xi tsinguijne rè ngahñu rè cjuacjan jan. Xuta jan ne, cuatju me cjuahmu tsèhë ndihí tsèhë azufre xi seti, cuatjin cuatju me xcun ángel cojo Tsánga. ¹¹ Hane nihndi rè ndihí rè cjuahmu rè me ne, cuiji yèjè nu yèjè nixtin. Sa nixtin sa nixten ne, sacuiin rè me cahndè cjuahajenda me tsèhë. Cuatjin cumá cojo me xi faharcun ru cojo xcusun ru. Cuatjin cumá cojo me xi siutaha rè sellu ru.

¹² Jinguyèjè rè xi vatju vèhë ne, mameje rè xi xuta xi macjain rè me Nina ne, cjuecani rè xi cuetjo me cjuaj xi cavitexa Nina hacuaaha cumacjain sa rè me.

¹³ Hya xi camá ne, cahndè ngu xta tsèhë ngahnga xi cachja cojo ná cuitjin:

—Nihndi cjuaj vihi: “Xuta xi ha cueya me quihndè cojo nixtin xi sehe nduva ne, jercu ndaja tsèhë me sa xi tjengui me ndiya rè Nina.”

Hasen rè Nina ne, chja tsèhë me cuitjin:

—Juun, cjuahajenda me tsèhë xi tsijenda rè me ta, tsèhë xi cumatsejen chji rè xa xi casahmi me. —Cuatjin chja Hasen rè Nina.

Ángel ne, fanga me xuta ngasunhndè xi satè rè me cjuacjan rè Nina

¹⁴ Hya xi camá ne, cavutsejen ngu yufí tyava, hane xcun yufí ne, tacun ngu xi tsejen sacuaaha quihndi rè xuta. Quisun rcu me ngu corona tsèhë oro hane yahatsja me quicha yuju ta cuatè me xitjè. ¹⁵ Ngajan xi cavetju nga ngu ángel tsèhë ndava Nina hane hñu cajindaya cojo ángel xi tacun xcun yufí jan. Cuitjin cachja:

—Chjuhun quicha nuju nangun ta, ha cavechu nixtin xi xti ta, tsëhë xi camá quichji cosecha tsëhë ngasunhdë.

¹⁶ Hya xi camá ne, me xi tacun xcun yufi jan ne, cavaja me nangui cojo quicha rë me, hane tjë rë ngasunhdë ne, camá cachaya rë.

¹⁷ Hya xi camá ne, hacuaha cavetju ngu ángel xi cavetju tsëhë ndava Nina xi tacun ngahnga ne, hacuaha yaha ngu quicha yuju. ¹⁸ Hane cavetju ngu ángel xi majo. Ángel vë ne, tacuntsja rë ndihi. Hane ángel vë ne, hñu cajindaya cojo ángel xi yaha quicha yuju. Hane cuitjin cachja cojo:

—Chehe quicha yuju riji ne, tiche yëjë hne rë uva tsëhë xcun ngasunhdë ta tsëhë xi uva rë ne, jemu quichji.

¹⁹ Hya xi camá ne, ángel jan ne, catsingatju quicha rë xcun nangui ne, cavatë rë uva xi hacui xuta tsehen. Hane cavincha rë cahndë hiscan xinune rë cojo sa xi cumatsyuhun ne cuetju nandá rë sacuaha satë rë matsyuhun cjuacjan rë Nina. ²⁰ Camatsyuhun hiscan xín hitsë tsëhë nandya, hane jemu cavetju jni hiscan camatsyuhun uva jan. Xi camiji jni ne, cavechutaha rë hiscan frenu rë chu naxin hacuaha cavanga ngu chuva rë jyan cientu cojo can kilómetro.

15

Yatu ángel xi siutsja cjuacjintacun

¹ Hya xi camá ne, cahvë ngajan ngahnga ngu nga sen cjuarcun xi jemu fircun naja. Cahvë yatu ángel cojo yatu cjuacjintacun. Hane cojo cjuacjintacun jan ne, cuijnetaha cjuañihi xi cumá ta, seyyu cjuacjan rë Nina.

² Hacuaha cahvë sacuaha ngu ndachacun hasen sacuaha hasen ndoyojo tsin, hane tsejen sacuaha tecjan cojo ndihi. Hane ngajan hinchacun xuta xi cacaa rë me quiiji xcun tsëhë chu chojyih cojo xcusun ru cojo xqui rë ñihi ru. Secun me cojo arpa xi cakahatsja me tsëhë Nina. ³ Me vëhë ne, së me sun xi tsëhë Moisés, me xi casahmi xa rë Nina hane hacuaha tsëhë Tsánga. Cuitjin fi cjuar rë:

Jemu má nihñu xa, jemu fircun niji tsëhë.

Nai niji ngayun. Ngayun, tsajin mé xi maji nihñu.

Qixi nújun, hacuaha chichihin ndiya nuju.

Ngayun vitexun jinguyëjë ni nación.

⁴ ¿Yo xi tsacjuini nuju, tatá? Tsajin yo.

Yëjë ni me sahmi jyë sahmi hnga me yun ta tsëhë xi ngu ni ngayun xi tyjahi cjuatacun nuju.

Vëhë xi yëjë ni nación cuinduva cuiticja xcun nuju tsëhë xi cumatsejen ndaja xa cjuaquixi nuju.

⁵ Hya xi camá xi cavatju vihi ne, cavutsejen nga ngahnga ne, hane tixaha hiscan cahndë rcun rë ndihya tsjian rë Nina hiscan hincha acuerdu xi camá cojo Nina. ⁶ Hane tsëhë ngajan ne, cavetju yatu ángel xi cuacun jan xi siutsja me xa rë yatu cjuacjintacun xi cumá. Ángel jan ne, yaja tsjian rë nachjun ndaja xi ndaja tyjahi. Hacuaha tñihñucja ndanisín rë cojo cinturón tsëhë oro.

⁷ Ngajan xi ngu xi quicun jan xi ñuju má ne, casua rë yatu ángel xi cuacun jan ngu ngu tyucu rë oro xi ndaja teya. Hane tyucu jan ne, quitsë rë cojo cjuacjan rë Nina, Nina xi tacun cuaha me yëjë nu yëjë nixtin. ⁸ Hane ndihya tsjian rë Nina jan ne, catsë rë cojo nihndi xi nduva tsëhë cjuahasen rë Nina xi seti cojo ngahñu rë me. Cuatjin camá xi tsajin yo ma visehen ngajan hisca xi cuijnetaha nixtin rë cjuañihi xi yahatsja yatu ángel jan.

*Tyucu xi hinchá cjuacjan rē Nina***16**

¹ Hya xi camá ne, cahndē ngu xta hñu xi vetju tsēhē ndava Nina hane cachja xta jan cojo yatu ángel jan cuitjin:

—Tangun titejnu tyucu jan cojo sa xi cjuacjan rē Nina ne, satē rē ngasunhdē.

² Cojo vēhē ne, quiji ángel xi tjun jan ne, cavitsingaxten rē tyucu rē xcun nangui. Hane yējē xuta xi yaha me sellu rē chu hacuaha faharcun me xcusun ru ne, casetaha rē me ngu xcusun chíhin vetju xi jemu cjan rē.

³ Sehe ángel xi majo ne, cavitsingaxten tyucu rē xcun ndachacun. Hane ndachacun ne, cavuya jni sacuaha jni rē ngu nima. Ngajan cafē cahme xi hinchá rē ndachacun.

⁴ Sehe ángel xi majyan ne, cavitsingaxten tyucu rē cojo sa xi casatē rē nandan ndajyē cojo hiscan xi vetjun nandá. Hane nandan jan ne, hacuaha cavuya jni. ⁵ Ngajan xi cahndē xi cachja ángel xi tacuntsja nandan jan cuitjin:

—Quixi yun chuva vihi. Ngayun nechun cuaha, hacuaha cavinechun.

⁶ Quixi yun chuva vihi ta catsinguitojo me jni rē xuta nuju cojo profeta xi chja cjuá nuju. Hane canicuyun chuva rē ta hacuaha cavanga jni rē me.

⁷ Hacuaha canuhya rē xi ngasunscun rē yungun ne, cafayangui cuitjin:

—Juun, cuatjin camameje rē. Tatá, Nina yun, hane tu mé ni ne, ma nuju. Jemu quixi cjuá xi vitexun.

⁸ Hya xi camá ne, ángel xi má ñuju ne, cavitsingaxten rē tyucu rē xcun tsuhi. Ngajan casacu rē ngahñu xi jemu cuaca rē xuta cojo ndavá rē. ⁹ Hane xuta ngasunhdē ne, cati me cojo ndavá hñu. Peru cahndē xi sahmi jyē sahmi hnga me Nina ne, canchati me tsēhē ñihi rē Nina, me xi vitexa me xcun yējē cjuacjintacun vihi.

¹⁰ Hya xi camá ne, ángel xi má hñu ne, cavitsingaxten rē tyucu rē xcun cahndē rcu rē chu jan. Hane ngajan camá xi nación xi sahmi chu gobiernu tsēhē ne, jemu jñu camahani camá jingujyē ni. Hane xuta ne, cajinēne me neje me tsēhē xi jercu má rē me. ¹¹ Hane nchati me tsēhē Nina rē ngahnga ngatsē rē cjuahmu rē me cojo tsēhē nindu xi vetju yojo rē me. Nchati me tsēhē Nina cahndē rē xi choho camá rē me tsēhē cjuatsehen rē me.

¹² Hya xi camá ne, ángel xi má jyun ne, cavitsingaxten rē tyucu rē xcun ndajyē jyē xi hmí rē Eufrates. Ngajan xi nandan jan ne, caxiya hane camandaja ndiya rē cojo sa xi ma vatjucja rey xi nduva ladu vetjucaa tsuhi.

¹³ Sehe cahvē jyan hasen tsehen xi cun sacuaha licuen, cavetju tsēhē hntsua chu yē jyē jan, tsēhē hntsua chu tjun cojo tsēhē hntsua chu ndacha.

¹⁴ Hane hasen jan ne, hacui hasen tsehen xi ma sahmi seña cjuarcun hacuaha hacui xi sahmi tangun rey, xuta matitjun rē jingujyē ni ngasunhdē cojo sa xi xuta jan ne, sahmi si condra rē Nina xi ma sahmi me yējē ni hya xi cuetjucaa nixtin rē Nina.

¹⁵ Tetuhunrcun cjuá rē Nina xi chja cuitjin: “Tjin chjine yun ta, tu ñahñu ni nduvá sacuaha nduva ngu chējē. Jercu ndaja tsēhē yo xi tacun quicun, sacuaha ngu me xi tacun chjine tsjian rē me xi cuaja me cojo sa xi tsajin yo sacutsejente cjuasava rē me.” Cuatjin chja cjuá jan.

¹⁶ Hane casahmi xi cama tangun rey jan ngajan ngu cahndē xi hne hebreo ne, hmí rē Armagedón.

¹⁷ Hya xi camá ne, ángel xi má yatu ne, cavitejnu tséhë tyucu rë ngajñi tjo. Ngajan xi hiscan ndava Nina, hiscan cahndë rcun rë me, canuhya rë ngu xta hñu xi chja cuitjin:

—¡Ha camá cajnetaha!

¹⁸ Ngajan xi sehe cavetsihin cavatë ndihi chuhun, cafaneya, catsinga chuhun, cojo xi jemu hñu cafani nangui. Hisca cjëë cjuani nangui cuatjin jinguyëjë rë xi caviyuju xuta xcun ngasunhdë ta, jercu cjuachan camahani cafani nangui. ¹⁹ Hane ciudad jyë ne, jyan rquí caseya tshun. Hacuaha yahnga nandya rë ngasunhdë ne, cavixujne. Hane Nina ne, catsinguitsen me cjuatsehen rë nandya Babilonia jyë hane casahmi me xi hacuaha cuma rë nandya jan castigu tséhë cjuacjan rë Nina xi hinchu tyucu. ²⁰ Hacuaha nangui xi vetju vasencja ndachacun cojo naxi ne, hya cafëya. ²¹ Hane tséhë ngahnga ne, tsi ndyojo yehe cavixusun rë xuta jan. Hane chuva ngu tsi ndyojo vë ne, sacuaña yachan kilu hai. Hane xuta ne, canchati me choho cachja me tséhë Nina ngatsë rë cjuacjintacun tséhë tsi ndyojo jan ta, cjuacjintacun jan ne, jemu chircun camahani.

17

Hacutjin cjuë na xi viteña yojo rë

¹ Hya xi camá ne, ngu tséhë yatu ángel jan xi yaha tyucu ne, canduva tjengui ná ne, cachja cuitjin:

—Ndove ne, tsingácun ri castigu rë na xi viteña yojo rë, na xi tacun na xcun jemu cjín nandá. ² Cojo na vëhë ne, rey tséhë nangui ne, casahmi me cjuatsehen; hane xuta ngasunhdë ne, catsichihi rë me cojo xan xi hacui cjuatsehen ran. —Cuatjin cachja ángel cojo ná.

³ Ngajan xi ángel ne, quijicojo ná ngajñi nguiña ngu cahndë xín. Hane ngajan cahvë ngu chjuun xi quisun na ngu chu chojyihi xi hani xi yatu rcu chu cojo të ndyaja ru. Hane chu jan ne, yaha ñihi xi tsitjungui rë Nina. ⁴ Chjuun jan ne, yaja na tsjan chacun xi moradu cojo hani. Hacuaha tsjan vëhë hisca seti jyíhi cojo oro cojo ndyojo ndacun hane cojo tu seti xi cavaqui rë. Hane yahatsja na ngu tyucu tséhë oro xi quitsë rë cojo xcusun tsehen cojo xi chocun rë cjuatsehen rë na. ⁵ Hane xten na ne, camahindu cjuu vihi: “Ngu cjuu xi meje rë cjuatacun: Babilonia, nangui xi matitjun. Nangui xi hacui na xi viteña yojo rë cojo yahnga xuta xi sahmi me cjuatsehen ne, fayangui xuta xcusun rë na.” Cuatjin camahindu. ⁶ Hane camachaya ná ta na vëhë ne, chihi na ta cahvi na jni rë nima xi cahme me ngatsë rë xi macjain rë me Nina cojo jni rë nima xi casua cjuaquixi rë Jesús.

Hane hya xi cahvë na ne, ngahan ne, jercu quijircu camahani ná. ⁷ Ngajan xi cachja ángel cojo ná:

—¿Mé má fircun ri? Ngahan ne, suacuenda ri cjuatacunhma tséhë chjuun jan cojo tséhë chu chojyihi xi quisun na, chu xi tjin yatu rcu chu cojo të ndyaja ru. ⁸ Chu chojyihi jan ne, quicun chu hatsëë, peru quihndë tsajin chu. Hane xi cuinduvaniji chu tséhë nduchin ne, jiya ndiya chu xi cjuëña chu. Hane xuta xi viyuju me ngasunhdë ne, me xi casetaain ñihi rë xcun xujun, xujun xi hisca ntsacu cavetsihin ngasunhdë, hinchu ñihi rë me xi satë rë me cjuahñu xatsë xi sua Nina ne, me vëhë cjuercun rë me. Cjuercun rë me hya xi scuëë me chu ta quicun chu hatsëë, tsajin chu quihndë, peru cuya cuejña ngu chu.

⁹ Mameje rë cjuatacun ta chja nuhya rë, peru yatu rcu chu ne, nuhya rë xi má yatu ndetjun hiscan quisun na o sa nandya hiscan vitexa na jan. Hacuaha nuhya rë xi má yatu me xi vitexa ngajan. ¹⁰ Hñu me vëhë ne, ha

cajnetaha nixtin xi cavitexa me. Ngu nga me ne, tivitexa me. Hane ngu sa me jan ne, hya xi cuitexa me, sahmi ngujoye xi hacuini cjin nixtin scaa re me.

¹¹ Hane chu chojyihí xi quicun chu hatsée, peru quihndé tsajin chu, cojo chu vèhé cuma jyin me xi cuitexa me ngajan. Chu jan ne, ma jyin, peru hacuini xin cuinduva chu ta, tsèhé ngajni re me xi yatu jan ne, ngajan cuinduva chu hane cjuí hiscan cjuéya cha.

¹² Hane të ndyaja ru xi cahye ne, hacui të xuta xi cjèe cjuahatsja me xa xi cuitexa me. Hane me vèhé ne, sacu re me cahndé xi cuitexa me tangun cojo chu, peru ngu hora ni cjuecani re nixtin re me. ¹³ Hane me vèhé ne, cama sacuaaha ngu ni cjuatacun re me. Hane sahmi tangun me ngahnu re me cojo gubiernu re me sehe sua me xi cjuahatsja chu chojyihí. ¹⁴ Hane hya xi sahmi me si cojo Tsánga jan, scaa re xi cjué xcun Tsánga cojo xuta xicjin. Hane xuta xicjin Tsánga ne, hacui me xi cavuxijin Nina, me xi ndaja finduju xi tjengui re ta, Tsánga jan ne, Nai re yèjè ni nai má me. Hacuaha vitexa me xuta xi vitexa. —Cuatjin cachja ángel cojo ná tsèhé na vèhé.

¹⁵ Cachja sa ángel cojo ná cuitjin:

—Sacuaaha nandá xi cahye hiscan xi tacun na xi viteña yojo re na, nuhya re xi má xuta tsèhé yèjè ni tjè, yèjè nandya, xuta cjin, xuta xi chja yèjè hne.

¹⁶ Hane me xi sacuaaha të ndyaja ru ne, cuya xi choho scuèe me na xi viteña yojo re, tsismi me na, hacuaaha cuejña cuatjin na. Hane xi cavejña suva na ne, sehe sinè chu yojo ran sehe cuaca ran cojo ndihí. ¹⁷ Tè me jan ne, cojo ngu ni cjuatacun meje sua me xa re me cojo ngahnu cjuá re me xi cjuahatsja chu chojyihí jan. Xi cuatjin casahmi me ne, camá hacuatjin cavincha Nina xahasen re me xi cumá hisca nixtin xi cuma chihin hacutjin cavejñacacun Nina xi cumá. ¹⁸ Hane sacuaaha chjuun xi cahye jan ne, nuhya re xi má ciudad rcun xi satè re xi cumatitjun tsèhé yèjè ni xuta xi vitexa xuta ngasunhndé.

18

Cjanengui nandya Babilonia

¹ Hya xi cavatju vihi ne, cahvè nga ngu ángel xi nduvajne tsèhé ngahnga xi jemu tjin re ngahnu cjuá re. Hane nangui ne, casahasen re cojo hasen re ngahnu jan. ² Hane ángel jan ne, cojo ngu xta hnu cajindaya cuitjin:

—¡Cjanengui! ¡Cafè ngahnu re Babilonia jyè! Quihndé suva machji re tsèhé xitsehen. Ngajan tsujyihíya hasen tsehen, ngajan vangui yèjè chu nisè xi jinè chu ngu xcusun chocun, chu xi chohovèe xuta chu. ³ Cuatjin camá re ta tsèhé xi xuta ngasunhndé ne, cavincha sca re me cojo xan re cjuatsehen ran. Cojo na vèhé ne, me xi vitexa me ne, casahmi me ne, casahmi me cjuatsehen. Hacuani tjin tsèhé xuta xi sahmi me negocio ta, camanchina me ngatsè re cjuatsehen ran. —Cuatjin cachja ángel.

⁴ Sehe cahndé nga ngu xta tsèhé ngahnga xi cachja cuitjin:

—Ngayun xi xuta naha ne, tetjun tsèhé nandya vihi. Tangunxun cojo sa xi cuajin yun cuatjuncun jyè re, hane satiin nuju cjuañihí xi satè re xuta vèhé. ⁵ Jyè re na xi hacui nandya vèhé ne, casexohnga re hisca cavechu ngahnga. Hane Nina ne, cjuaha cuenda me tsèhé cjuatsehen ran. ⁶ Nicuyun tsèhé na chuva xi casahmi na. Jo cuatjin vechutaha castigu xi cumá ran. Tisejun re copa ran jo cuatjin sa sehe hitsè sa cumá cjan xi cuma re copa xi cavincha na tsèhé xuta. ⁷ Ngojo re cjuaxta re na xi jercu sahmi na mé xi fehya cjuatacun tsehen re na ne, ndaja tuhun ran cjuañihí cjuachoho. Cuatjin cumá ran ta, cuitjin catsingatahacacun na cachja na: “Tejña cahndé rcun ta matitjun ngahan. Hacuini cahan ngahan, satiin ná cjuachoho.” Cuatjin

tsingatahacacun na. ⁸ Vêhë xi xcun ngu ni nixtin, cuechutaha ran yêjê ni, ta cuechutaha ran cjuachoho, cuechutaha ran jindya. Hacuaha tsicjêya ran ndihi. Cuatjin cumá ta, tsêhë xi Nina, me xi sahmi cuenda rê jyê ran ne, ma sahmi me yêjê ni.

⁹ Ngajan xi xuta xi rcun xi casahmi cjuatsehen ngajan hacuaha casua cjuasua xahasen rê ngajan ne, scuëë me nihndi rê, hane squihnda me hacuaha cuiyuju va me. ¹⁰ Hane cjuercun rê me ngatsë rê chircun xi tivatju ngajan, sehe squindaya me cuichja me cuitjin:

—¡Ay! Jercu choho cavatju ciudad ndajyihi, ciudad rcun. Tu ñahñu ni ne casatë rê yêjê ni cjuacjintacun xi cuma castigu rê.

¹¹ Hacuaha xuta xi sahmi me negocio ne, squihnda me hacuaha choho cumá rê me tsêhë xi quihndë ne, tsajin yo cuatsë chaha xi viteña me, ¹² chaha xi camá tsêhë oro, tsêhë quicha tyava, cojo ndyojo ndacun, cojo tu seti, cojo tsjian ndacun sa lino sa seda, sa xcusun hani sa moradu. Chaha rê ya xi ndaja jne, chaha xi camá tsêhë nehñu elefante, o tsêhë ya xi hnga chjí rê o tsêhë quicha sine, quicha hinda o tsêhë ndyojo seti. ¹³ Tsajin yo cuatsë rê chaha rê canela cojo yahnga xcusun xi sahmi xi ndaja chinë comida o sa tyjungunsa, sa balsamo xi hmí rê muro, sa vinu, sa aceite, sa ndyaja, sa chu tsánga, sa naxin o sa carreta, sa mosu cachaha rê xi hacu cjuahñu rê xuta. Tsajin yo cuatsë tsêhë me. ¹⁴ Cuitjin chja tsêhë nandya jan:

—Xcusun ndacun xi jercu cafehya xahasen riji ne, quijixin tsijin. Yêjê ni cjuanchina riji xi ndajyihi ne, cafêya, hane tsajin nu tsajin nixtin cuya sacu ri.

¹⁵ Ngajan xi me xi caviteña ngajan hane cojo vêhë cama nchina me ne, cjuercun rê me ngatsë rê chircun xi tivatju ngajan, xinchacun me cjin tsêhë, hane squihnda me hacuaha choho cumá rê me. ¹⁶ Cuitjin cuichja me tsêhë:

—¡Jemu va jyihi nandya! Camá ngu nandya jyê, jemu ndacun tsjian catsicaja rê xuta rê. Tsjian ndaja xcusun hani moradu. Tsjian xi cavaqui rê nachjun oro cojo ndyojo ndacun cojo tu seti. ¹⁷ Peru xcun xi ngu hora ne, cafê cavetsunya cjuanchina vë.

Hane yêjê me xi matitjun xi vitexa tsêhë barcu cojo xuta xi hincha me cahntsua, cojo cha xi sahmi xa xcun barcu o sa xuta xi sahmi negocio cojo, cumamijí sahmi tiña me tsêhë. ¹⁸ Squindayava me hya xi scuëë me nihndi rê xi seti hane cuichja me cuitjin:

—Hatuxa tsajin sa ngu ciudad xi cuanitjin ndajyihi sacuaaha camá ciudad jyê vi.

¹⁹ Hane cuitejnu me scuan rcu me ta jemu choho má rê me hacuaha squihndava me cuichja me cuitjin:

—¡Cojo cjuatsehen rê xuta nandya vi! Ngatsë rê cjuanchina rê me ne, tu yo ni me xi tjin rê ngu barcu rê chaha ne, cama nchina me. Peru ngu ñahñu ne, cavetsunya.

²⁰ Catamasua nuju tsêhë na, ngahnga. Catamasua nuju ngayun xi tyjahi cjuatacun nuju, ngayun xi má apóstol cojo ngayun xi má profeta. Catamasua nuju ta hindé casahmi Nina castigu na, casahmi cuenda me tsêhë na chuva xi casahmi na cojo nuju.

²¹ Ngajan xi ngu ángel xi jercu tjin rê ngahñu ne, cafaha me ngu ndyojo jyê chuva rê natsi rê molinu, hane catsingatjeya rê ngajñi ndachacun. Sehe cachja cuitjin:

—Chuva ngahñu vihi, cuanitjin ngahñu xi cjuinengui cojo nandya jyê xi hmí rê Babilonia. Hane tsajin nixtin xi cuya cumá. ²² Tsajin nixtin xi cuinuhya rê xi tsijane cha chjine arpa ngajan, o sa ngu sun, o sa fane chiruvi o

sa fane tyjo. Hisca ngu cha chjine tsëhë tu mé ni xcusun ne, cuyaaïn sahmi xa ngajan. Hacuaha cuyaaïn nuhya rê ndyojo rê molinu xi sahmi scuan rê pan.

²³ Ndihi rê ngu lámpara ne, cuyaaïn tsejen hasen rê ngajan. Tsajin nu tsajin nixtin xi ngajan cuma cjuavixan. Cuatjin cumá cojo ta, xuta xi casahmi me negocio ngajan ne, jemu hñu cjuá rê me cojo yëjë ni xuta ngasunhdë. Hane cavincha sca me xuta ne, cavindacha me cojo xcusun rê me.

²⁴ Hacuaha ngajan cavanga jni rê profeta cojo tsëhë xuta xi tyjahi cjuatacun rê me xcun Nina cojo jni rê yëjë ni xicjin me xi camá catsiquehen me nguehe ngasunhdë.

19

Xutacjín xi cuaxëndaja me Nina

¹ Hya xi camá cavatju vihi ne, cahndë sacuaaha xta rê xutacjín ngajan ngahnga xi chja cuitjin:

¡Catama jyë, catama hnga Nina! Nina ne, vaxëtje me xuta, tjin rê me hasen ndajyihî xi seti, hacuaha ma sahmi me yëjë ni.

² Jemu quixi cjuá xi vitexa me ta, casahmi me xujun jyë rê na xi caviteña yojo rê, na xi hñu cjuá na.

Na vëhë ne, catsinguetsun na cjuatacun rê ngayëjë ni cojo cjuatsehen rê na. Hane Nina ne, casahmingojo me cojo rê na jni rê xuta xi sahmi xa rê me. Jni rê me xi casahmi na xi cavanga.

³ Sehe cavuya cachja me cuitjin:

—¡Catama jyë, catama hnga Nina! ta, nihndi ran ne, miji nchunchujun ni, nu nu ni.

⁴ Ngajan xi can ñuju xuta changá cojo catsiñuju xcusun xi quicun ne, caviticja xcun Nina xi cjuaharcun rê me xi tacun me cahndë rcun. Cuitjin cachja me:

—¡Cuatjin jain! ¡Nihñu jyë nihñu hnga Nina!

⁵ Sehe cavetju tsëhë cahndë rcun ngu xta xi chja cuitjin:

Nihñu jyë nihñu hnga Nina, ngayun xi nihñu xa rê me.

Nihñu jyë hnga me sa quihndi sa changá yun.

⁶ Hya xi camá ne, cahndë sacuaaha xi tisë xutacjín. Nuhyá rê sacuaaha fane nandan xi jemu hñu vanga o sacuaaha faneya xi tsinga chuhun. Hane cjuá rê ne cuitjin chja:

¡Catamajyë catamahnga Nina naja ta, ha cavetsihî sahmi me gobiernu hane ma sahmi me yëjë ni!

⁷ Catamasua naja. Tahan cjuasua xahasen naja. Nihña jyë hnga me tsëhë xi cavechu cjuavixan rê Tsánga.

Chjuun rê ne, ha catsindaja na yojo ran.

⁸ Casacu rê na cahndë. Hane cuaja na tsjian ndaja xi seti, xi tyjahi.

Tsjian jan ne, hacui xcusun ndaja xi sahmi xuta xi tyjahi cjuatacun rê me xcun Nina.

Cuatjin cachja xutacjín jan.

Sinësuhî me tsëhë cjuavixan rê Tsánga

⁹ Hya xi camá ne, cachja ángel cojo ná cuitjin:

—Nihndi cjuá vi: “Jercu ndaja tsëhë me xi camachaya rê xi nduva me sinësuhî me tsëhë cjuavixan rê Tsánga.”

Hane cachja sa ángel cuitjin:

—Cjuá xi cachjá ne, cjuaquixi jain rê Nina.

¹⁰ Hane ngahan ne, caticjátaha ntsacu ángel xi cjuahárcun rë. Peru cachja cojo ná cuitjin:

—¡Xicanihñiii! ta, tangun ni chjí naja, ta xa naha ne, tangun cojo xa xi nihñu cojo xingun xi sua cumachaya rë cjuaquixi rë Jesús ne, hacuí xa xi vitexa Nina. Nina ne, me vëhë chjuhuncun me.

Hacuaha cjuaquixi rë Jesús ne, vëhë sacuaaha cacun rë cjuaxi cachja profeta.

Me xi quisun rë naxin tyava

¹¹ Sehe cahvë xi tixaha ngahnga, hane ngajan ne, cahvë ngu chu naxi tyava. Hane me xi quisun rë chu ne, chja tsëhë me ta, sahmi chihin me cjuaxi rë me hacuaaha quixi me. Jemu quixi cjuaxi me hya xi tsichuva me xuta cojo sa xi hya xi sahmi me si. ¹² Tuxcun me ne, sacuaaha ndihi xi ña vitjen. Rcu me ne, jercu hinchasun corona. Hane camahindu ngu ñihi rë me xi tsajin yo vëë rë, peru suva me vëë me. ¹³ Yaja me ngu tsjian xi tjintë ni ne, xi caseyaquinda cojo jni. Hane sacuaaha ñihi rë me ne, Cjua rë Nina hmí rë me. ¹⁴ Hane tjengui rë me sindadu cjin tsëhë ngahnga. Sindadu jan ne, cuaja me tsjian ndaja xi tyava, xi tyaji. Hane hacuanitjin hinchasun me naxin tyava. ¹⁵ Hane suva me ne, tsëhë hntsua me ne, vetju ngu quicha yuju xi cuanguihmu rë xutacjin. Hane hacuiin yuma cumá rë me xuta ta, cuitexa rë me cojo yaxti rë quicha. Hane sune me cahndë hisca nune rë uva cojo sa xi cuaxë me xan rë cjuacjan rë Nina, me xi ma sahmi yëjë ni. ¹⁶ Hacuaaha xcun tsjian rë me cojo tyjuhmi rë me ne, camahindu ñihi vi: “Me xi matitjun tsëhë ngayëjë ni xi matitjun. Me xi matitjun tsëhë ngayëjë ni xi vitexa.”

¹⁷ Hane cahvë xi ngu ángel ne, secun xcun tsuhi. Hane jindayahñu tsëhë nisë xi jemu hnga vitjen chu. Cuitjin cachja cojo chu:

—Nduvun. Catamatangun yun tsëhë suhi jyë rë Nina. ¹⁸ Ngajan xinu yojo rë xuta xi camatitjun, cojo yojo rë capitán rë sindadu cojo yojo rë xuta xi hñu cjuaxi, cojo yojo rë chu naxin cojo yojo rë xuta xi caxinchasun rë chu. Xinu yojo rë xuta, sa ndaya tjín me o sa xi caxteña me, sa langa me, sa changá me, xinu yojo rë me. —Cuatjin cachja me cojo chu nisë jan.

¹⁹ Hane cahvë chu chojyihí jan cojo xuta xi vitexa me cojo sindadu cjin rë, hane camatangun cojo sa xi sahmi si cojo me xi hinchasun chu naxin tyava jan. ²⁰ Hane ngajñi si vëhë ne, cachjaha rë chu chojyihí jan camá presu chu. Hacuanitjin ne camá presu chu xi casahmi cjuarcun ngatsë rë chu chojyihí cojo sa xi cavindacha chu xuta sehe setaha sellu rë chu xten me hacuaaha faharcun me xcusun ru. Sehe cacandiya quicu me catsijo chu ngajñi ndachacun xi ti cojo azufre. ²¹ Hane xicjin chu xi cavangui ne, catsiquehen me cojo quicha xi vetju tsëhë hntsua me xi miji rë naxin. Sehe yëjë ni nisë ne, cajinësua chu hisca xi cavechu rë xahasen ru cojo yojo rë xi cuicun vi.

20

Ngu mil nu xi seyahñu xitsehen

¹ Sehe cahvë ngu ángel xi nduvajne tsëhë ngahnga, hane yahatsja ángel vë llavi tsëhë nduchin hacuaaha yahatsja ngu cadena jyë. ² Hane cafaha rë yë jlyë jan. Chu vëhë ne, hisca hatsëë tacun chu. Chu vëhë ne, hacuí naan o sa Satanás. Hane xi cafaha rë chu ne, catsihñu rë chu cojo cadena xcun xi ngu mil nu. ³ Hacuaaha catsingatjenya ru cahntsua nduchin. Sehe casechjahñu tingotjo rë cojo llavi hane casetaha xcun ngu sellu. Cuatjin camá cojo sa

xi sacuiin sa cahndě cuindacha ru xutacjín hisca xi cuijnetaha ngu mil nu. Hane xi cuatju vėhė ne, cumandaya nga chu ngu jo nixtin.

⁴ Hya xi camá ne, cahvė cahndě rcun hane xcun silla jan ne, siu me xi casatė rė xa xi cuitexa me. Hacuaha cahvė hasen rė me xi catisun rė rcu ngatsė rė cjuaquixi rė me xi casua me tsėhė Jesús hacuaha ngatsė rė cjuarė Nina. Me vėhė ne, cafaharcuaain rė me chu chojyihı cojo xcusun ru, hacuaha casetaain rė me sellu rė chu sa xten me o sa tsja me. Hane cahvė xi cavuya nga cjuahñu rė me sehe cojo Cristu casahmi me gobiernu xcun ngu mil nu. ⁵ (Yahnga nima ne, cuyaaın cjuahñu hisca xi cjuė mil nu jan.) Matsejen ta vėhė nixtin xi tjun cuya cjuahñu rė nima. ⁶ Jercu ndaja tsėhė me hacuaha tyjahi cjuatacun rė me xi cojo me satė rė me xi tjun cuya me cjuahñu. Cjuaveya xi majo ne, satiın rė me ta, tsajin mé ma sahmi cojo me. Cumá me sacuaaha nahmi xcun Nina cojo Cristu hane sahmi me gobiernu cojo me xcun ngu mil nu.

⁷ Hane xi cuijnetaha mil nu jan ne, cumandaya nga Satanás tsėhė ndavaya hiscan caveya me. ⁸ Sehe cuya cuindacha xutacjín rė jingujyė ni ngasunhndė, cuindacha me xuta rė Gog cojo xuta rė Magog, cojo sa xi sahmitangun rė tsėhė si. Hane xqui rė me xi cumatangun me ne, cuechu sacuaaha tsumi tjehen rė ndajyė. ⁹ Hane xi camatangun me condra jan ne, cjue me jingujyė ni xcun nanguı. Hane ngajñi si ne, cuiyujuhndee rė me cahndė xi siu sindadu cjin rė Nina cojo nandya xi tsihmucacun me. Peru ndihı ne, cuijne tsėhė ngahnga hane cjue cueti xuta condra jan.

¹⁰ Hane Naain xi cavindacha rė ne, ningatjenya rė ngajñi laguna tsėhė azufre xi seti. Hane ha cuanitjin ne catundiya chu chojyihı jan cojo chu xi cavindacha. Hane ngajan ne, cuatju chu cjuañihı nixtin nixten, nu cjui, nu nduva.

Camacuenda tsėhė nima xcun cahndě rcun tyava

¹¹ Hya xi camá ne, cahvė nga cahndě rcun tyava xi matitjun cojo me xi tacun xcun. Hane ngatsė rė cavatjuxcun me, cafėya nanguı cojo ngahnga, hane casacuiin cahndė xi cuma rė. ¹² Hacuaha cahvė nima. Sa changá, sa quihndi, hinchacun yėjė ni nima xcun cahndě rcun jan. Hya xi camá ne, ngu jo libru ne catuxaha. Hacuaha catuxaha ngu libru xi hacjahi. Hane libru vėhė ne, libru rė cjuahñu. Sehe camacuenda tsėhė, sacuaaha xcusun xi casahmi nima, hacutjin xi camahindu xcun libru tjun. ¹³ Ndachacun ne, casua nima xi tjintsja. Cjuaveya cojo tsjun ne, hacuaha casua nima xi tjintsja. Hane jima ngu nima ne, camacuenda tsėhė hacutjin xcusun xi casahmi me. ¹⁴ Hya xi camá ne, tsajin sa cjuaveya, tsajin Hades, cahndė xi viyuju nima ta, catundiya ngajñi laguna xi seti cojo ndihı. Hane ndihı vėhė ne, hacui cjuaveya majo. ¹⁵ Ngajan xi nima xi casetaain ñihı rė me xcun libru tsėhė cjuahñu ne, cavixuya ngajñi laguna tsėhė ndihı jan.

21

Ngahnga cojo ngasunhndė ne, camá xatsė

¹ Xi cavatju vėhė ne, cahvė ngu ngahnga xatsė cojo ngu ngasunhndė xatsė ta, tsėhė xi ngahnga xi tjun cojo nanguı xi tjun ne, cafėya. Hane sacuaaha ndachacun ne, tsajin. ² Hane ngahan, Juan, cahvė nandya xi catsinchacun Nina xi hmı rė Jerusalén xatsė. Canduvajne tsėhė Nina ngajan ngahnga. Jemu ndaja tsejen nandya vė ta, tsejen sacuaaha ngu na xi cuixan xi canicaja rė na tsjian ndajyihı tsėhė xi nduva cha xi cuixan cojo rė na. ³ Sehe cahndė ngu xta hñu xi cachja tsėhė cahndě rcun. Cuitjin cachja:

—Ha quihndé cjue cuiyuju tangun Nina cojo xuta. Hane xuta jan ne, cumá xuta rē me, hane suva me ne, cumá me Nina rē me. ⁴Hane Nina ne, tsixiya me yějē ndatuxcun me. Quihndé tsajin sa cjuaveya. Tsajin sa cjuachoho. Tsajin mé má squihnda me. Tsajin cjuahmu. Cuatjin cumá ta, tséhē xi xcusun changá ne, ha cavatju.

⁵Hane me xi tacun xcun cahndé rcun ne, cachja me cuitjin:

—¡Tisahme xatsē yějē ni xcusun!

Hane cachja me cojo ná cuitjin:

—Nihindi cjua vihi ta, hacui cjuaquixindaja hane macjain naja tséhē.

⁶Hane cachja sa cojo ná cuitjin:

—Ha camachihin. Sacuaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Me xi xinda rē xahasen rē me ne, tu cuatjo ni suá cuihi me tséhē nandá xi sua cjuahñu xatsē. ⁷Me xi scaa rē cjue xcun ne, sacu rē me cjuatjo rē Nina. Hane cumá ngahan Nina rē me, hacuaha cumá me quihndí naha. ⁸Peru yo xi tsacjun, yo xi macjaain rē, yo xi hngacacun, cha tsiquehen, me xi sahmi cjuatsehen ngajñi xihin o sa ngajñi chjuun, o xi sahmi surqui, o xi faharcun nina ndacha, o xi chjaain me cjuaquixi ne, yějē ni me véhē ne, sacu rē me cahndé ngajñi laguna tséhē ndihi xi ti cojo azufre. Hane véhē ne, hacui cjuaveya xi majo.

Hacutjin jyihi ciudad xatsē xi hmí Jerusalén

⁹Hane ngu ángel tséhē yatu jan xi yahatsja tyucu tē xi quitsē rē cojo yatu cjuacjintacun xi vijnetaha jan ne, canduvatjengui ná ne, cachja cojo ná cuitjin:

—Ndove ta, tsingácun ri na xuta vixan, na xi camá chjuun rē Tsánga.

¹⁰Hane ángel jan ne, quijicojo ná ngajñi nijña naha hiscan ngu ndetjun naxi hnga. Sehe catsingacun ná nandya xi catsinchacun Nina, nandya xi hmí rē Jerusalén ta tinduvajne tséhē Nina ngajan ngahnga. ¹¹Hane ña tsejen xi seti cojo hasen tséhē ngahñu rē Nina, hisca sua hasen rē sacuaha ngu ndyojo seti xi yufa sacuaha ndyojo tsin. ¹²Hane cavindee rē ngu xondyojo teya hacuaha hnga. Tejó má tingotjo rē, hane jimangu tingotjo jan ne, ngajan siu ngu ángel. Hacuaha ngajan camahindu ñihi rē tejó tjē rē xuta nangui Israel. ¹³Xondyojo jan ne, tjin jyan tingotjo jimangu ladu. Jyan má ladu vetjucaa tsuhi. Jyan má ladu ngatihin. Jyan má ladu cananguí. Hacuaha jyan má ladu vetje tsuhi. ¹⁴Xondyojo rē ne, tacun xcun tejó xihndé naña. Hane xihndé naña ne, yaha ñihi rē tejó apóstol rē Tsánga xi camahindu xcun.

¹⁵Ángel xi chja cojo ná ne, yaha ngu ya naxu tséhē oro xi machjiréhē sacuaha ya chuya xi cjuahachuva rē nandya cojo xondyojo cojo tingotjo rē. ¹⁶Nandya jan ne, cuadrado jyihi. Jimangu tjeheh rē ne, jo mil jo cientu kilómetro má xi nduju. Hane hacuanitjin ne má xi hnga. ¹⁷Hane catsichuva xondyojo rē. Véhē tjin rē ngu cientu cojo yachan ñuju nda sacuaha chuya rē xuta ta véhē casahmixa ángel cojo.

¹⁸Sacuaha xondyojo rē ne, camá cojo ndyojo seti xi hmí rē jaspe, hane nandya ne, suva oro camá hane seti sacuaha ndyojo tsin. ¹⁹Xihndé naña rē xondyojo rē nandya ne, camá cojo ndyojo seti rē yějē ni xcusun xi sacuaha xcusun rē yejña. Xihndé naña rē xi tjun ne, camá tséhē jaspe. Xi majo ne, tséhē zafiro. Xi majyan ne, tséhē ágata, má ñuju ne, tséhē esmeralda, ²⁰má hñu ne, tséhē ónice, má jyun ne, tséhē cornalina, má yatu ne, tséhē crisólito, má jyin ne, tséhē berilo, má ñaja ne, tséhē topacio, má tē ne tséhē cirsopraso,

má tengu ne, tsëhë jacinto, hane má tejó ne, tsëhë amatista. ²¹ Sacuaha tejó tingotjo jan ne, camá tsëhë tu seti xi hmí perla. Hane jimangu tingotjo camá tsëhë ngu perla. Hane ndiyatë rë nandya jan, tsëhë suva oro camá peru sacuaha ndyojo seti xi ña hasen tsejen.

²² Ngajan ciudad vëhë ne, cahveen ngu yungun. Mamijí rë ta tsëhë xi ngajan cuiyuju Nina, Nai naja xi ma sahmi me yëjë ni, cojo Tsánga xi hacui me sacuaha yungun. ²³ Cuanitjin ne, mamijí rë tsuhi cojo sá xi sua hasen rë ta, tsëhë xi hasen rë ngahñu rë Nina ne, sua hasen rë ngajan, hane Tsánga ne, má ndihi rë. ²⁴ Yëjë xutacjín ne, tsujyihya me cojo ndihi vë xi cjue me cojo ngasunhdë rë me, hane xuta matitjun rë me ne, ngajan cjue cani me ngahñu rë xa xi vitexa me cojo xi cuaxëndaja me. ²⁵ Ngajan hisca xi ngu nixtin ne, sechjaain tingotjo rë, tsëhë xi ngajan ne, tsajin nixtin cuma nguixun. ²⁶ Hane xutacjín tsëhë ngasunhdë ne, cjue cani me ngahñu cjua rë me cojo cjuanchina rë me. ²⁷ Hatuxa tsajin cahndë xi cuma rë tu mé ni xi hacuiin tyjahi xcun Nina. Tsajin yo xi sahmi cjuatsehen, tsajin yo xi cuichja ndesu. Suva ni me xi casetaha ñihi rë xcun libru rë Tsánga, libru xi yaha ñihi rë me xi sacu rë cjuahñu xatsë ne, me vëhë sacu rë me cahndë.

22

¹ Sehe ángel ne, catsingacun ná ndajyë xi hacui nandá xi sua cjuahñu. Nandá vëhë ne, nandá yufa xi hasen sacuaha ndyojo tsin. Hane nandá vëhë ne, vetju tsëhë cahndë rcun rë Nina cojo Tsánga, ² hane vanga taha ndiyatë cavasen nandya. Xingu xingu ladu tsëhë ndajyë ne, secun ya tsëhë cjuahñu. Ya vëhë ne, tejó ndiya xi ngu nu tjin chan tsëhë tu rë ta, chuva sá sua tu rë. Hane xca rë ya ne, machjirëhë xi tsirqui rë xutacjin jan. ³ Ngajan ne, tsajin mé xi chohovëë Nina tsëhë. Ngajan nandya vë tacun cahndë rcun xi tsëhë Nina cojo Tsánga. Hane ngajan ne, me xi tacun xi xa rë me ne, cjuahacuenda rë me. ⁴ Scuëë me xcun Nina, hane ñihi rë Nina ne, setaha xten me. ⁵ Mamijí rë ndihi, sa ndihi rë lámpara o sa tsëhë tsuhi ta, Nina Nai naja ne, sua rë me hasen rë me. Hacuaha gobiernu xi sahmi me ne, cjuecani rë yëjë nu, yëjë nixtin.

Camatiña nixtin xi cuya Jesucristu

⁶ Hya xi camá ne, cachja ángel jan cojo ná cuitjin:

—Cjua vihi ne, cumacjain nuju tsëhë ta, quixi jain. Nina, Nai naja ne, catsingatju me ángel rë me xi sua cumachaya rë hasen rë xuta xi chja cjua rë me tsëhë xcusun xi xati cumá.

⁷ Chja cjua ta:

—Tuhuncuendun xi ngutjen cuinduvá. Jercu ndaja tsëhë xuta xi vetjon-daja me sahmicihin me cjua rë libru vihi xi chja tsëhë xcusun xi sehe cumá.

⁸ Juan hmí ná. Cahndë, hacuaha cahvë xcusun vihi. Hane hya xi camá cahndë cahvë ne, caticjaxcun taha ntsacu ángel jan xi catsingacun ná xcusun vihi ta, cjuaharcun ángel jan. ⁹ Peru cachja ángel cuitjin:

—¡Xicanihñii! ta, tangun ni chjí naja, ta xa naha ne, tangun cojo xa xi nihñu cojo xingun xi má profeta cojo yahnga xingun xi vetjo me cjua rë libru vihi. Nina ne, me vëhë chjuhuncun me.

¹⁰ Hacuaha cachja me cuitjin:

—Xicavisaniin sellu cjua xi sehe cumachihin xi hinchu libru vihi, ta nixtin rë ne, ha meje cuechu. ¹¹ Cuejña xi xuta xi choho sahmi me ne, catjinduju xi choho sahmi me, hane xuta tsehen ne, catjinduju me cojo cjuatsehen rë me,

hacuanitjin ni xuta xi quixi me ne, catjinduju me cojo ndiya rē cjuaquixi, hane xuta xi tyahi cjuatacun rē me, catjinduju me cojo ndiya rē cjuatacun tyahi.

¹² Chja me cuitjin:

—Tuhuncuendun xi ngutjen cúa. Hane xi cúa ne, nduva cojo chjí nuju. Suá rē jimangu me chuva rē hacutjin xi casahmí me. ¹³ Ngahan ne, sacuaaha letra xi vetsihin cojo letra A ne, vijnetaha cojo zeta. Hacuí ni ngahan xi ntsacu vetsihin ne, hacuí ni ngahan xi vijnetaha. Tejña hisca ntsacu cavetsihin yějé ni, hane tejña cuaha hya xi cjué. Matitjun, matjengui ngahan.

¹⁴ Jemu ndaja tséhé xuta xi catsityjahi me tsjian rē me cojo sa xi sacú rē me cahndé xi siné me tséhé ya rē cjuahñu xatsé. Xi cuatjin ne, cuma cuisehen me taha tingotjo rē nandya jan. ¹⁵ Peru xuta tsehen cuiyuju me ndatsen cojo xuta xi sahmi cjuasurqui, o xi sahmi cjuatsehen ngajñi xihin o sa ngajñi chjuun, o xi tsiquehen, o xi faharcun nina ndyojo o me xi tsihmucacun cjuandacha. Yějé ni me véhé cuiyuju me ndatsen nandya.

¹⁶ —Ngahan, Jesús ne, catsingátju ángel naha xi tsinguixi xcun ngayun xuta yungun cjuaquixi vihi. Ngahan ne, tjé rē David má ngahan. Quihndindaicjin rē David má ngahan. Niñú seti tséhé nguitajñu má ngahan. —Cuatjin chja Jesús.

¹⁷ Ngagan xi Hasen rē Nina cojo na xi cuixan cojo Tsánga ne, cjuayangui me cuitjin:

—Nduvun.

Hacuaha me xi cuihndé cjuá véhé ne, cuichja me cuinitjin ni:

—Nduvun.

Sa xi xinda nuju ne, nduvun. Sa xi cjueyatacun ne, siuhun tu cuatjo ni nandá rē cjuahñu.

¹⁸ Suá cumachaya nuju ngayun xi visiñuju cjuá rē xujun vihi xi sehe cumachihin ta, sa xi tjin yo xi cuesuntaha sa cjuá cojo cjuá xi camahindu nguehe, Nina ne, cuesuntaha me cjuañihi xi camahindu xcun xujun vi.

¹⁹ Hacuanitjin ne, sa xi tjin yo xi cjuahataha rē cjuá vihi xi sehe cumachihin, Nina ne, cjuahaxin me cahndé xi cumá rē me xcun xujun rē cjuahñu cojo tséhé nandya xi catsinchacun Nina cojo tséhé xcun ndaja xi camahindu xcun libru vihi.

²⁰ Hane me xi sua cjuaquixi xi cuicun vi ne, chja me cuitjin:

—Hatuxa nduva xati.

Cuatjin chja me. Cuatjin ndatjin. Nduvun, Tatá Jesús.

²¹ Quihndé ne, catisaté nuju cjuandaja rē Nai naja, Jesucristu. Cuatjin jain cumá.